

A close-up photograph of ivy leaves with prominent yellow-green veins, growing on a dark, textured tree trunk. The background is dark, making the leaves stand out.

# Tí Nuevo Testamento cuènte Inchéni Jesucristo C'óna Nquìva

San Juan Atzingo Popoloca New Testament

---

## Contents

Tí tan jína chrónka ch'ín Mateo	1
Tí tan jína chrónka ch'ín Marcos	65
Tí tan jína chrónka ch'ín Lucas	106
Tí tan jína chrónka ch'ín Juan	174
Tí xr̄a kjuích'e tí sín kjueyá ch'ín Jesús	224
Tí xroon ikjin ch'ín Pablo chr'énhen ch'án tí sín romanos	282
Tí xroon saoxín ikjin ch'ín Pablo chr'énhen ch'án tí sín tinkáchónki Cristo síin chjasin Corinto	307
Tí xroon yóxin ikjin ch'ín Pablo chr'énhen ch'án tí n̄nko chjasin Corinto	332
Tí xroon ikjin ch'ín Pablo k'uáyéhe tí sín Galacia	347
Tí xroon chr'énhen ch'ín Pablo tí sín tjejó chjasin Éfeso	356
Tí xroon ikjin ch'ín Pablo chr'énhen ch'án tí sín síin chjasin Filipos	364
Tí xroon tsíkjin ch'ín Pablo chr'énhen ch'án tí sín chjasin Colosas	370
Xroon saoxín ikjin ch'ín Pablo chr'énhen ch'án tí sín tinkáchónki Cristo chjasin Tesalónica	376
Xroon yóxin ikjin ch'ín Pablo chr'énhen ch'án tí sín tinkáchónki Cristo chjasin Tesalónica	381
Tí xroon saoxín ikjin ch'ín Pablo chr'énhen ch'án tí ch'ín Timoteo	384
Tí xroon yóxin ikjin ch'ín Pablo chr'énhen ch'án tí ch'ín Timoteo	391
Tí xroon ikjin ch'ín Pablo chr'énhen ch'án tí ch'ín Tito	396
Tí xroon chr'énhen ch'ín Pablo tí ch'ín Filemón	399
Tí xroon k'uáyéhe tí sín Hebreos	401
Tí xroon tsíkjin ch'ín Santiago	420
Tí xroon saoxín tsíkjin ch'ín Pedro	426
Xroon yóxin tsíkjin ch'ín Pedro	433
Tí xroon saoxín tsíkjin ch'ín Juan	437
Yóxin xroon tsíkjin ch'ín Juan	443
Tí níxin xroon tsíkjin ch'ín Juan	444
Tí xroon tsíkjin ch'ín Judas	445
Tí nkehe chrónka Jesucristo k'uíkon ch'ín Juan	447



## **Tí Nuevo Testamento cuènte Inchéni Jesucristo C'óna Nquiva**

**New Testament in Popoloca, San  
Juan Atzingo (MX:poe:Popoloca, San Juan Atzingo)**

Language: Popoloca, San Juan Atzingo  
Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit [www.dbs.org](http://www.dbs.org) (USA), [www.bibleleague.ca](http://www.bibleleague.ca) (Canada), and [www.opendoors.org](http://www.opendoors.org) (Europe).

### **Copyright and Permission to Copy**

Copyright © 1982 Wycliffe Bible Translators, Inc.

Copyright © 1982 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society ([www.dbs.org](http://www.dbs.org)).

---

PDF generated on 2017-08-24 from source files dated 2017-08-24.

4bdd3ef6-8285-5afb-93cc-3e595ad2792e

ISBN: 978-1-5313-0530-7

## Tí tan jína chrónka ch'ín Mateo

### Tí sín k'uaxrjeníxin ch'ín Jesús

(Lc. 3.23–38)

**1** Tíhi mé chrónka nkexro kaín tí sín k'uaxrjeníxin ch'ín Jesucristo. Mé jehe ch'án k'uaxrjeníxin ch'án tí ch'ín David la ko tí ch'ín Abraham. <sup>2</sup>Ch'ín Abraham mé it'é tí ch'ín Isaac la ko ch'ín Isaac mé it'é tí ch'ín Jacob la jehe ch'án mé it'é tí ch'ín Judá la ko kaín kíchó ch'án. <sup>3</sup>Ch'ín Judá mé it'é tí ch'ín Fares la ko ch'ín Zara la tí ìné sín mé it'in Tamar. Ch'ín Fares mé it'é tí ch'ín Esrom la jehe ch'án mé it'é tí ch'ín Aram. <sup>4</sup>Ch'ín Aram mé it'é tí ch'ín Aminadab la jehe mé it'é tí ch'ín Naasón la jehe mé it'é tí ch'ín Salmón. <sup>5</sup>Ch'ín Salmón mé it'é tí ch'ín Booz la ìné mé tjan Rahab. Ch'ín Booz mé it'é tí ch'ín Obed la ìné tí ch'ín Obed mé tjan Rut. Tí ch'ín Obed mé it'é tí ch'ín Isaí. <sup>6</sup>Ch'ín Isaí mé it'é tí rey David la jehe ch'án la ko tí tjan k'uéchjién ch'ín Urías mé táha it'é la ko ìné tí ch'ín Salomón.

<sup>7</sup>Ch'ín Salomón mé it'é tí ch'ín Roboam la jehe mé it'é tí ch'ín Abías la jehe ch'án mé it'é tí ch'ín Asa. <sup>8</sup>Ch'ín Asa mé it'é tí ch'ín Josafat la ch'ín Josafat mé it'é tí ch'ín Joram la ch'ín Joram mé it'é tí ch'ín Uzías. <sup>9</sup>Ch'ín Uzías mé it'é tí ch'ín Jotam la ch'ín Jotam mé it'é tí ch'ín Acaz la ch'ín Acaz mé it'é tí ch'ín Ezequías. <sup>10</sup>Ezequías mé it'é tí ch'ín Manasés la ch'ín Manasés mé it'é tí ch'ín Amón la ch'ín Amón mé it'é tí ch'ín Josías. <sup>11</sup>Ch'ín Josías mé it'é tí ch'ín Jeconías la ko kíchó ch'án. Tí sín a mé k'uéjó sín tí yaon a ntá xríngahya ikui tí sín Babilonia sákjuiko sín tí sín israelita kixin ts'ejóchjina sín tí chjasén sín Babilonia.

<sup>12</sup>Ntá kjuixin sákjuí sín mé ch'ín Jeconías mé it'é tí ch'ín Salatiel la

ch'ín Salatiel mé it'é tí ch'ín Zorobabel. <sup>13</sup>Ch'ín Zorobabel mé it'é tí ch'ín Abiud la ch'ín Abiud mé it'é tí ch'ín Eliaquim la ko ch'ín Eliaquim mé it'é tí ch'ín Azor. <sup>14</sup>Ch'ín Azor mé it'é tí ch'ín Sadoc la ko ch'ín Sadoc mé it'é tí ch'ín Aquim la ko ch'ín Aquim mé it'é tí ch'ín Eliud. <sup>15</sup>Ch'ín Eliud mé it'é tí ch'ín Eleazar la ch'ín Eleazar mé it'é tí ch'ín Matán la ch'ín Matán mé it'é tí ch'ín Jacob. <sup>16</sup>Ch'ín Jacob mé it'é tí ch'ín José la ch'ín José mé k'óna xí tjan María la jehe tjan María mé ìné tí ch'ín Jesús. Tí ch'ín Jesús la mé nchek'in sín Cristo.

<sup>17</sup>Mé xíkaha catorce t'áchrji k'uaxrjeníxin tí ch'ín Abraham ntá kjuák'e ch'ín David la í jnko catorce t'áchrji k'uaxrjeníxin tí ch'ín David la ntá tí sín Babilonia sákjuiko tí sín israelita chjasén sín la ntá í jnko catorce t'áchrji k'uéjó la ntá kokjíhi Cristo.

### Kokjíhi Jesucristo

(Lc. 2.1–7)

<sup>18</sup>Tí kokjíhi Jesucristo mé xíkíhi kónhen. Tí tjan María ìné ch'án mé tsotehe tjan ch'ín José. **A** ntá naxa kuákjahya kíchó sín ntá kónoxín kixin jehe tjan la ó tjejá tjan kixin tíha la kjuachaxién Nchakuen Dios. <sup>19</sup>Ch'ín José mé tí nkexro ts'óna xí tjan María, mé ijnko chojni jína la tjinkakonhya ch'án noxín chrók'óxroan ch'án tjan ntá kjuenkayáxin ch'án imó chrókjuákehe ch'án tjan kixin tjinkaon ch'án kixin ninkexró tsonoehya. <sup>20</sup>Ntá tí naxa tjenkayáxin ch'án kixin xíkaha sich'e ch'án ntá kotáchrién ch'án chrónkaxín titàya k'uúkuèn ch'án ikui ijnko ángel kuènte Ìnchéni nixja, chrónka kixin:

—José jaha mé k'uaxrjeníxin David. Tóxakuanhya la ko chrakonhya chrókuákjá tjan María ts'óna ichjián kixin tí xjan tsochónta tjan la kjuachaxin kuènté Nchakuen Dios ikui mé k'óna tí xjan a. <sup>21</sup>Sincheckokjíhi

tjan ijnko xjan ntoa la its'in xjan Jesús mé xikaha its'in xjan kixin jehe xjan tsjakjiin ijíe chojni —mé xikaha chrónka tí ch'in ángel.

<sup>22</sup> Kaín t'ha kónhen kixin tsoxiteyá tí nkehe chrónka Ìnchéni k'uénixja tí sín k'uéchrónka itén ch'án ósé. Mé ntáχρο xikihi:

<sup>23</sup> Ijnko tjan naxa chónthaha chojni ntoa mé tsjak'eyá tjan la tsochóna tjan ijnko xjan,

la sinchek'in sín ch'án Emanuel,\*

la t'ha t'axrxjén kixin Dios tjejókoni. Mé xikaha chrónka itén Dios.

<sup>24</sup> Ntá k'uàya ch'in José ntá kjuínchexiteyá ch'án tí nkehe k'uetōan tí ángel kuènte Ìnchéni la kuákja ch'án tjan María ts'óna ichjién ch'án. <sup>25</sup> Δ ntá kjónté xikaha la naxa kójnkojiéhya sín tí naxa kokjéhya xjan la ntá tí xjan mé kjuínchek'in sín Jesús.

### Tí sín mago kjuítsjehe sín xjan

**2** Tí kokjéxín ch'in Jesús tí chjasín Belén estado Judea la tí yaon a kjuák'e ijnko ch'in rey it'in Herodes mé k'uetuénhen ch'án tí nación a. Δ ntá xrí-nahya iso chojni ntoa kjuixín ijnko chjasín nó tjitōxin yaon mé kjuíji sín chjasín Jerusalén. Jehe sín mé sín mago mé tónoexín sín tí konotsé. <sup>2</sup> Ntá kjuanchankí sín kixin:

—¿Nketí tjen tí xjan tsikokjíhi ts'óna tí rey ts'etuénhen tí sín judío? K'uíkonxínni tí konotsé kuènte ch'án nó tjitōxin yaon na ntá ó kjuini kixin tsochjéheni ch'án kjuasáya —ichro sín.

<sup>3</sup> Ntá kuínhin tí ch'in rey Herodes tí xikaha ichro sín ntá imá tóxakonhen ch'án la ko tóxakonhen kaín tí sín chjasín Jerusalén. <sup>4</sup> Ntá tí ch'in rey k'uetōan kixin síxrakoa kaín tí sín

nchat'á t'etōan la kaín tí sín tjako tí ley la ntá kjuanchankíhi sín ch'án nketí chrókokjéxín tí nkexro Cristo. <sup>5</sup> Ntá jehe sín kjuátehe sín kixin:

—Tsokjéxín xjan chjasín Belén estado Judea mé xikaha tsíkjin tí sín tsíchrónka itén Dios. Ntáχρο xikihi:

<sup>6</sup> Jaha chjasín Belén nonte Judá, jaha la jehya ijnko chjasín imá ntsí; kixin tí nonte ts'axrxjén tí nkexro antsí t'etōan,

la jehe ch'án ts'ayakonhen tí chjasín kuèntana mé chjasín Israel.†

Mé xikaha nixja itén Dios.

<sup>7</sup> Ntá imó k'uíyehé ch'in Herodes tí sín mago la kjuanchankíhi ch'án sín nkesá kjuankixin k'uíkon sín tí konotsé. <sup>8</sup> Ntá chrónka sín ntá tuénxín k'uetōan ch'án kixin sátsji sín chjasín Belén la ntáχρο ch'án kixin:

—Sátjirá ntiha la tjéyará tí xjan la tió ts'itjará xjan la tsochronkará kixin ntá kjaxian janhan sátsjia ntiha tsot-jaha xjan kjuasáya —mé xikaha k'uetōan ch'in Herodes.

<sup>9</sup> Ntá kuínhin tí sín mago tí nkehe k'uetōan tí ch'in rey ntá sákjuí sín la xík'ikon sín tí konotsé inaá la kjuítaón va ntja la ntá chréhe sín hasta kjuák'e va chrítaón tí nchia tjen tí xjan a. <sup>10</sup> Ntá tió k'uíkon tí sín mago nketí kjuák'e tí konotsé la imá kóchéhe sín. <sup>11</sup> La k'uíxénhen sín tí nchia la k'uíkon sín tí xjan kjuák'eko tí tjan María iné xjan. Ntá k'uéjōxin toch'in sín la chjéhe sín kjuasáya ntá kuakitjehe sín tí nkehe kjuíkao sín la kjuanjōn sín chica oro la ko ihnti tsochéxin chjincō la ko xroan xraxé náxrjón. <sup>12</sup> Ntá chr'éxin kotáchríen sín chrónkaxín kixin chrók-janhya sín tí tjen ch'in Herodes. Méxra kjanxin sín í jnko ntja la sákjuí sín chjasén sín.

\*1:23 Isaías 7.14

†2:6 Miqueas 5.2

### Ch'ín José la ko tjan María sákjuí sín chjasin Egipto

<sup>13</sup>Ntá tió kjuixin sákjuí tí sín mago la ntá kotáchrién ch'ín José chrónkaxín titàya k'uíkon ch'án ijnko ángel kuènte Ìnchéni chrónka kixin:

—T'àyá sátsjikoa xjan la ko ìné xjan la sátsjirá chjasin Egipto la ntahó ts'e-jorá hasta tsòxrjankajia, kixin tí ch'ín Herodes xritjeyá tí xjan chrók'óyán ch'án xjan —mé xíkaha chrónka tí ángel.

<sup>14</sup>Ntá ch'ín José k'uàya la ntá sákjuíko ch'án xjan la ko ìné xjan la sákjuí sín chjasin Egipto tí tie a. <sup>15</sup>Ntahó k'uéjé sín hasta ik'uén ch'ín Herodes. Mé xíkaha kónhen kixin tsoxiteyá kaín tí nkehe chrónka Ìnchéni, k'uénixja tí sín tsíchrónka itén ch'án. Mé ntáchro sín kixin: “Chjasin Egipto kjuák'e xjanna ntá k'uíyaha ch'án”.<sup>‡</sup>

### Ch'ín Herodes mé k'uetōan its'en xjan

<sup>16</sup>À ntá kónohe ch'ín rey Herodes kixin tí sín mago mé kjuích'iyehé sín ch'án ntá imá kónínkaon ch'án la k'uetōan ch'án kixin its'en kaín tí chánjan ntoá síin chjasin Belén ó chóna iyó nánó la ko tí xjan naxa chónahya iyó nánó. Mé xíkaha k'uetōan ch'án kixin ó xraxínkaon ch'án nkehe kuínhin ch'án chrónka tí sín mago. <sup>17</sup>Mé xíkaha ó xiteyá tí nkehe tsíkjin tí ch'ín Jeremías ntáchro ch'án kixin:

<sup>18</sup>Kuínhin sín itén chojni chjasin Ramá mé tsjánka sín.

Tíha mé tí tjan Raquel la tsjánkamā tjan xjeen tjan.

Kohya nkexro sinchechéhe tjan kixin ó kaín xjan tsík'en xjan.<sup>¶</sup>

Mé xíkaha chrónka itén Dios.

<sup>19</sup>Ntá tió kjuixin k'uén ch'ín Herodes ntá ijnko ángel kuènte Ìnchéni mé

k'uíkonxín ch'ín José kotáchrién ch'án tí kjuák'e ch'án chjasin Egipto mé ntáchro kixin:

<sup>20</sup>—T'àyá sátsjikoa tí xjan la ko tí ìné xjan la tsokjan chjasin Israel kixin ó kjuixin k'uén tí nkexro chrók'óyán tí xjan a —mé xíkaha k'uetōan tí ch'ín ángel.

<sup>21</sup>Ntá ch'ín José mé k'uàya ch'án la sákjuíko ch'án tí xjan la ko tí ìné xjan la sákjuí sín chjasin Israel. <sup>22</sup>À ntá kuínhin ch'ín José kixin ch'ín Arquelao xjeen ch'ín Herodes mé k'uetōan ch'án tí estado Judea la ntá chrakon ch'án la sáchrókjuíhya ch'án ntiha. À ntá kotáchrién ch'án chrónkaxín Dios kixin sáchrókjuí ch'án estado Galilea. <sup>23</sup>Ntá tió kjuíji sín ntiha ntá sákjuí sín ijnko chjasin it'in Nazaret la ntaha k'uéjé sín. Mé xíkaha xiteyá tí nkehe tsíchrónka tí sín k'uénixja itén Dios senó. K'uéntáchro sín kixin jehe ch'án mé tsíkítexín sín nazareno.

### Juan el Bautista mé kjuák'e ch'án nteje

(Mr. 1.1–8; Lc. 3.1–9,  
15–17; Jn. 1.19–28)

**3** À ntá tí yaon a kjuák'e ch'ín Juan Bautista nteje Judea la kjuako ch'án.

<sup>2</sup>Ntáchro ch'án kixin:

—Títōhérá ijjárá la tjínkirá tí nkehe tjenkayáxinrá kixin í séhya itsi kjuachaxién Dios.

<sup>3</sup>Tí ch'ín Isaías, mé ijnko ch'ín tsíchrónka itén Dios, mé tsíkjin ch'án kuènte tí ch'ín Juan mé chrónka ch'án kixin:

Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntia tsixin Ìnchéni.

<sup>‡</sup>2:15 Oseas 11.1

<sup>¶</sup>2:18 Jeremías 31.15

Takitjehérá ijnko ntja ntoí.”<sup>8</sup>

<sup>4</sup>Tí iké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. **A** ntá tí nkehe kjóne ch'án mé kochjoá la ko itsjen kot-sjenta tónoxín nteje. <sup>5</sup>Itsje chojni kuix-in sín chjasin Jerusalén la ko í so chjasin sín estado Judea la ko chjinaxón tí ntarío Jordán kixin tsinhin sín nkexrí tjechrónka ch'án. <sup>6</sup>Ntá chrónka sín ijje sín ntá ch'ín Juan kuikítexín ch'án sín tí ntarío Jordán.

<sup>7</sup>Ntá xrínahya k'ufkon ch'ín Juan ikui nchónhya tí sín fariseo la ko tí sín saduceo kixin tjinkaon chrókuikite sín la ntá ntáchro ch'án kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkéhérá tí kjuanínkaon kuènte Dios ó tsi? <sup>8</sup>T'ichjánxin kixin chrók'uejorá jnkojína chrókuákoxinrá kixin chaxín kjuítoxinhínrá tí nkehe tjenkayáxinrá. <sup>9</sup>Jahará nchehnerá ntáchrorá kixin k'uaxrjeníxinrá ch'ín Abraham. Janhan ntáxrjan kixin kjónté tí xro i la Dios tsjacha chrókuich'éna ch'án chojni k'uaxrjeníxin ch'ín Abraham. <sup>10</sup>Tí chica hacha ó tjechónhen tsochrínjinxín tí nta. **A** ntá kaín xín nta t'ónahya to jína mé tsochrínjin kixin tsoche. <sup>11</sup>Janhan mé ñnta tíkítexián chojni kixin tsjakoxín sín kixin ó kjuitoxinhin sín ntíe sín. **A** ntá tí nkexro itsi chr'éxin mé tsikítexínrá tí Nchakuen Dios la ko xrohi. **Ants**í tjetóxin t'etqan ch'án a ntá janhan la kánhyó. Méxra chrókósuána sáchrókuikjan tokaté ch'án. <sup>12</sup>Jehe ch'án la ó tjexraá ch'án pala sinchetjuáxin ch'án noatrigó kixin tí ntáchjiji trigo la ókjé ts'ejo ch'án a ntá tí noatrigó la tsjenájín ch'án la ts'enkachjina ch'án. **A** ntá tí ntáchjiji trigo la tsjakaxín ch'án ijnko xrohi

ts'ankahya jnkochríxin —mé xíkaha kjuako ch'ín Juan.

### Kuikite ch'ín Jesús

(Mr. 1.9-11; Lc. 3.21-22)

<sup>13</sup>Ntá ch'ín Jesús kjuixín ch'án nó estado Galilea ikui ch'án tí ntarío Jordán tí tjen ch'ín Juan kixin ch'ín Juan tsík-ite tí jehe ch'án. <sup>14</sup>**A** ntá tí saoxín chrohya ch'ín Juan chrókuikite tí ch'ín Jesús ntáchro ch'án kixin:

—Náhi. Jeheni t'ichjánxinhinni jaha chrókufkíte tí jeheni. **A** ntá jaha k'uinka kixin jeheni chrókufkítia tí jaha —ichro ch'ín Juan.

<sup>15</sup>Ntá kjuátehe ch'ín Jesús kixin:

—**A** ntá jie la titohé tí xíkaha tjenkayáxin kixin t'ichjánxin tsikiteni kixin sinchexiteyáni tí nkehe k'uetqan Dios.

Ntá ch'ín Juan kuítekaon ch'án la xíkaha kjuich'e ch'án. <sup>16</sup>Ntá tió kuikite tí ch'ín Jesús la ntá xrínahya titàya xit-jehe nkajní la k'ufkon ch'án tí Nchakuen Dios, éxi kontóá tsjehe, k'uínkajinxín nkaya nkajní ntá kjuák'e chrítaón kja ch'ín Jesús. <sup>17</sup>Ntá xrínahya kuínhin sín ijnko tan kuixín nkaya nkajní ntáchro kixin:

—Tíhi mé xjanna la imá tjuaha ch'án la imá chàna kixin nchexiteyàna ch'án.

### Ch'ín Tsochren chrókuachroe ch'ín Jesús

(Mr. 1.12-13; Lc. 4.1-13)

**4** Ntá tí Nchakuen Dios mé sákjuíko ch'ín Jesús tí nteje a ntá ch'ín Tsochren tjinkaon chrókuachroe ch'ín Jesús. <sup>2</sup>Tí nteje a mé kjuák'e ch'án kjónehya ch'án cuarenta yaon la ko cuarenta tie la ntá chr'éxin kónohe ch'án ik'uén ch'án kjinta. <sup>3</sup>Ntá ch'ín Tsochren mé kóchjinehe tí ch'ín Jesús

kíxin tjinkaon chrókjuachaxin ch'án. Ntáchro ch'án kíxin:

—Tí chaxín jaha Xjeen Dios la ntáche tí xro i kíxin chrók'óna niotja.

<sup>4</sup>Ntá kjuátehe ch'ín Jesús ntáchro kíxin:

—Náhi. Ntáchro xroon itén Dios kíxin: “Jehya niotja ó chrók'uejóchónxin chojni. Náhi. Kaín tí tán nixja Dios tjejóchónxin chojni”\*\* —ichro ch'án.

<sup>5</sup>Ntá ch'ín Tsochren mé sákjuiko ch'ín Jesús tí chjasin tjóá mé chjasin Jerusalén, la sákjuiko ch'án tí chrítaón tí kja nínko a <sup>6</sup>la ntáchro ch'án kíxin:

—Tí chaxín Xjeen Dios jaha la títóhé t'anótjenxian tí noi ntihi kíxin ntáchro xroon itén Dios kíxin:

Dios mé ts'etuenhen tí sín ángel kuènte ch'án kíxin ts'ayakonhan sín.

Tsotsé sín itjá

kíxin tsotéhya totá ts'itja xro tí ts'anótjen††

—ichro ch'ín Tsochren.

<sup>7</sup>Ntá kjuátehe ch'ín Jesús ntáchro ch'án kíxin:

—Náhi. Kjaxin ntáchro xroon itén Dios kíxin: “Chjinihya chrókjuásixián kjuaxroan kjuachaxin kuènte Ìnchéni Dios”‡‡ —ichro ch'ín Jesús.

<sup>8</sup>A ntá tió kjuixixín sákjuiko ch'ín Tsochren tí ch'ín Jesús ijnko jna imá noi ntá kjuako tí Jínahya kaín xín tí nacióon sín chjasintajni la ko tí nkehe t'e-toan kuènte. <sup>9</sup>La ntáchro ch'ín Tsochren kíxin:

—Kaín tíha mé tsotjaha tí tsjak'éxian tóch'ian tsj'kosáyana tí janhan —mé xikaha ichro ch'ín Tsochren.

<sup>10</sup>Ntá kjuátehe ch'ín Jesús ntáchro ch'án kíxin:

—Sátjia Satanás kíxin xroon itén Dios ntáchro kíxin: “Chrókjuikosáyehé Ìnchéni Dios la jehó ch'án chrókjuich'ehé xra”¶¶ —ichro ch'ín Jesús.

<sup>11</sup>A ntá ch'ín Tsochren mé kuítóhe tí ch'ín Jesús la iso tí sín ángel ikui tsjinkitsa tí jehe ch'án.

### **Ch'ín Jesús kjuankíxin ch'án tí xra kuènte ch'án estado Galilea**

(Mr. 1.14–15; Lc. 4.14–15)

<sup>12</sup>A ntá ch'ín Jesús mé kuínhin ch'án kíxin tí ch'ín Juan mé tjechjina ch'án ntóechiso a, a ntá jehe ch'án mé sákjuí ch'án estado Galilea. <sup>13</sup>Kuítóehya ch'án chjasin Nazaret ntiha. Náhi. Sákjuí ch'án chjasin Capernaum la kjuák'e ch'án ntiha. Tí chjasin a mé tjen chrínta ntayaon chjino estado Zabolón la ko estado Neftalí. <sup>14</sup>Mé xikaha kjuich'e ch'án kíxin tsoxiteyá tí nkehe tsíkjin ch'ín Isaías, ijnko nkexro k'uéchrónka itén Dios. Ntáchro ch'án kíxin:

<sup>15</sup>Tí estado Zabolón la ko Neftalí tí ntja chrínta ntayaon la tí nó chók'á tjitoxin yaon tí ntarío Jordán, mé tí estado Galilea tí tjejó tí sín jehya judío.

<sup>16</sup>Mé ntiha tjejó tí sín sín tí sítié mé ts'ikon sín ijnko xrohi jíé, la tí sín éxi tsík'en xritjejó sín mé ts'inkaséyanxín ts'ejó sín.

<sup>17</sup>Ntá kjuankixin kjuako ch'ín Jesús ntáchro ch'án kíxin:

—Tjitóxínhinrá ntjará. Tsákjará ijnko ntja nixín kíxin kjuachaxin kuènte Dios tjen nkaya nkajni la í séhya tsi.

\*\* 4:4 Deuteronomio 8.3

†† 4:6 Salmo 91.11–12

‡‡ 4:7 Deuteronomio 6.16

¶¶ 4:10 Deuteronomio 6.13



### Ch'ín Jesús k'uíyehē noó chojni k'uétsé koche

(Mr. 1.16-20; Lc. 5.1-11)

<sup>18</sup>Ntá sákjuí ch'ín Jesús chrínta ntayaon Galilea ntá xrínahya k'uíkon ch'án yaá sín jnkokoá kíchó sín, ijnko mé it'in Simón mé kjaxin it'in ch'án Pedro la ko í jnko it'in Andrés. Jehé sín mé koche xritsé sín. Ntá tinkák'e sín nchísén chrínkí ntá. <sup>19</sup>Ntá ch'ín Jesús nixjehē sín ntáchro ch'án kixin:

—Chréhérá tí janhan ntá tsotjahará xra tsjéyará chojni.

<sup>20</sup>Ntá tuénxín kuítóhe sín tí nchísén k'uétséya sín koche, ntá sákjuíko sín ch'án.

<sup>21</sup>Ntá kjinhya kjuíji ch'án ntá k'uíkon ch'án ijnko yaá sín, jnkokoá kíchó sín, mé tí ch'ín Jacobo la ko ch'ín Juan, mé xjeen tí ch'ín Zebedeo. Tjejóko sín it'é sín tí ntabárcō la tjejtjonite sín tí nchísén tséya sín koche. Ntá kjaxin tí sín a k'uíyehē ch'ín Jesús. <sup>22</sup>La ntá tuénxín kuítóhe sín tí ntabárcō la ko tí it'é sín ntá sákjuíchréhē sín tí ch'ín Jesús.

### Kjuakohe ch'ín Jesús nchónhya chojni

(Lc. 6.17-19)

<sup>23</sup>Ntá sákjuí ch'ín Jesús nkuíxín tí estado Galilea la kjuakohe ch'án tí nínko Israel síin jnkojnko chjasin mé kjuako ch'án tí tan jína chrónka nkexrí tí kjuachaxin kuénte Dios la ko kjuínchekitohe ch'án jína kaín chojni chónka kaín xín chin la ko kaín kjuatjoté. <sup>24</sup>Ntá kaín xín tí sín tjejó tí estado Siria mé kuínhin sín kuénte Jesús la kjuíkao sín kaín xín tí sín níhi chónka kaín chin la ko tí sín imá tjetéhe sín la ko tí sín chónka nchakuen tí jínahya la ko tí sín t'aniáte sín la ko tí sín síxénká toté sín, la ntá ch'ín Jesús mé kjuínchekitohe ch'án sín jína. <sup>25</sup>Ntá itsjé chojni kjuíchréhē tí ch'ín Jesús, mé kjuixín sín estado Galilea la ko tí ch-

jasin chjinaxón Decápolis la ko chjasin Jerusalén la ko kuenté tí estado Judea la ko tí nó chók'á tjitoxin yaon tí ntarío Jordán.

### Kjuakohe ch'ín Jesús ijnko jna

**5** K'uíkon ch'ín Jesús kixin k'uéjō nchónhya chojni la ntá chrín ch'án ijnko jna la ntaha kjuák'etjaxin ch'án. Ntá tí sín k'uájiko ch'án a mé kóchjina sín chjinaxón tjejontaxin sín tí tjeen ch'án. <sup>2</sup>Ntá ch'ín Jesús kjuankixin kjuakohe ch'án sín kixin:

### Tí nkexro tjejó náxrjón

(Lc. 6.20-23)

<sup>3</sup>—Náxrjón tjejó tí sín nohe kixin t'ichjánxinhin sín nkehe kuénte Dios kixin ntá jehe sín mé tsochónka sín tí kjuachaxin kuénte Dios.

<sup>4</sup>'Náxrjón tjejó tí sín t'avá kixin Dios mé sinchekhéhē asén sín.

<sup>5</sup>'Náxrjón tjejó tí sín hnkehya asén kixin jehe sín mé ts'áyéhē sín tí nonte tsjanjon Dios.

<sup>6</sup>'Náxrjón tjejó tí sín éxí yóhē chrók'uenxín sín kjinta la chrók'uenxín sín ntá kixin xikaha imá tjinkaon sín sinchexiteyéhē sín Dios ntá Dios tsjinkitsa sín kixin ts'áyéhē sín tí nkehe tjinkaon sín.

<sup>7</sup>'Náxrjón tjejó tí sín tikonóhē kíchó sín kixin ntá Dios kjaxin tsikonóhē tí jehe sín.

<sup>8</sup>'Náxrjón tjejó tí sín kótjóá asén kixin ntá jehe sín sátsjik'ikon sín Dios.

<sup>9</sup>'Náxrjón tjejó tí sín tjinkaon kjuaxróxin kixin Dios sinchek'in ch'án xjeen ch'án tí jehe sín.

<sup>10</sup>'Náxrjón tjejó tí sín kjónté tjejótjasó-texín sín kixin kjuínchexiteyéhē sín Dios kixin ntá jehe sín mé kuénte sín nkaya nkajní.

<sup>11</sup>'Náxrjón tjejorá kjónté t'ántaxínhanrá sín la ko ntachrakonrá sín la ko kaín nkehe náxrjónhya ntáchro

sín kixin tinkachónkirá tí janhan. <sup>12</sup>Chrókócháhará la ko kjuaxróxin chrók'uejorá kixin ntá chr'éxin jahará ts'ayéherá ijnko nkehe antsí má jina nkaya nkajní. Mé xikaha kjuasóte tí sín k'uejój óse k'uechrónka sín tí itén Dios.

**Jahará la éxi yóhe xijnnta la ko éxi xrohi t'inkaséyanxín chjasintajni**

(Mr. 9.50; Lc. 14.34-35)

<sup>13</sup>'Jahará mé yóhe éxi xijnnta chjasintajni. A ntá tí chrók'uankéhé tí jní tí xijnnta la ntá xitjahya chrókójní ínaá. Ninkehó chrókjuich'ehya xra la chrók'uikitjí ntója la ko chrókuinkátja chojni.

<sup>14</sup>'A ntá jahará la mé tí xrohi t'inkaséyanxín chjasintajni. Ijnko chjasin itjen chrítaón jna la xitjahya tsjak'emá. <sup>15</sup>La ko kohya nkexro sinchek'ákjen ijnko lámpara ntá tsjak'e chrínki ijnko ntacajón. Íchá jina tsjak'e ch'án xrohi noi kixin ntá ts'inkaséyanxín kaín nkexro síin tí nchia ntiha. <sup>16</sup>Mé xikaha tí jahará chrókóyohará éxi tí xrohi t'inkaséyanxín kixin ts'ikon kaín chojni tí xra jina tjejoch'erá la ntá chrókjuanchehe sín kjuasáyé It'eni tjen nkaya nkajní.

**Kjuako ch'ín Jesús kuènte tí ley**

<sup>17</sup>'Jahará chróntáchrohyará kixin k'uinka kixin tsjakjíyan tí ley tsík'etóan ch'ín Moisés la ko tí nkehe kjuako tí sín k'uechrónka itén Dios. Náhi. Jehya xikaha k'uinka kixin tsjakjíyan tíha. Náhi. K'uinka janhan kixin tsjakoxian nkehe chaxín t'axrxjén tíha. <sup>18</sup>Chaxín xrxanka kixin tí naxa tjen nkajní la ko chjasintajni la kohya ninkehó ley tsjinhya, mé tsjinhya nijnko punto la nijnko letra kuènté tí ley tsjixinjian tsoxiteyá kaín tí nkehe t'ichjánxin tsoxiteyá. <sup>19</sup>Mé xikaha

tí nkexro tsitekakonhya tí nkehe k'uetóan tí ley kjónté ijnko nkehe imá intsí, la ko chrókjuako kixin xikaha chrókuitekakonhya chojni, la jehe sín la imá tsontsí sín tí tsi tí kjuachaxin kuènte Dios. A ntá tí nkexro tsitekaon la ko tsjakohe ókjé nkexro tsitekaon sín, mé antsí imá ts'etóan sín tí tsi kjuachaxin kuènte Dios. <sup>20</sup>Méxra tjonkará kixin t'ichjánxin kixin antsí jina ts'ejorá la tsoyóahyará tí sín tjako ley la ko tí sín fariseo kixin tí tsoyóhará sín la ntá xitjahya tsákjará tí kjuachaxin kuènte Dios tjen nkaya nkajní.

**Kjuako ch'ín Jesús kuènte tí kjuanínkaon**

(Lc. 12.57-59)

<sup>21</sup>'Jahará tsíkinhínrá kixin tí sín ósé tsík'ítuenhen sín kixin: "T'oyánhyará kichuárá<sup>§§</sup> kixin tí nkexro t'óyán kichó mé t'ichjánxin tsjasóte sín." <sup>22</sup>A ntá janhan tjonkará kixin jnkojín nkexro tsonínkakonhen kichó mé t'ichjánxin tsjasóte. A ntá tí nkexro t'ántaxinhin kichó la mé tí sín t'etóan mé sinchekitoexín ijié ch'án. La ntá tí nkexro tsontáche kichó kixin tsíxénká ch'án la tíha mé sátsji tsjasótexín tí síin xrohi. <sup>23</sup>A ntá tí tsjikueherá Dios nkehe tsochjehérá ch'án ntá tsjasánrá tí altar ntá tsoxráxinkáonrá tí jnkojín kichuárá kjuánjonkoará sín <sup>24</sup>la ntá tí xikaha la títóherá tí nkehe tí altar la sátsjirá tsonixjehérá ch'án jnkójina kixin í sòkohya kjuanínkaon. La ntá tsjixin la ntá tsjihará tsjánjonrá tí nkehe tjinkaonrá tsjánjonrá.

<sup>25</sup>'Tí síin jnkojín nkexro tjanchia jie tí jahará la tjinkaon chrókjuikoará ch'án juzgado, a ntá íchá jina jnkokoá chrókjuenkayáxinrá, jehe ch'án la ko jahará, ntia ó, kixin ntá sáchrókjuihyará tí tjen ch'ín juez. Kixin sáchrókjuirá tí tjen ch'án ntá jehe ch'án ts'etuenhen ch'án

§§5:21 Éxodo 20.13; Deuteronomio 5.17

tí policía kixin ts'ixenhenrá ntøechiso. <sup>26</sup> A ntá chaxín tjonkará kixin tí ts'ik-jahará sín ntøechiso la ts'axrjéxinhýará ntiha tsjixinjian tsjenkeherá sín kaín xín chichaon chontará.

**Ch'in Jesús kjuako kixin  
chrókjuasinhya sín jië,  
chróchóntahya sín chojni chjin ókjé**

<sup>27</sup> Jahará tsíkinhínrá tí nkehe tsík'ítuenhen tí sín ósé ntáchro kixin: “Chrókjuásinhýará jië, chróchóntahýará chojni chjin ókjé.”\* <sup>28</sup> A ntá janhan tjonkará kixin tí nkexro tsokomá ijnko tjan ókjé tjak'e asén chrókuákja ch'án la ó kjuixin kjuasin ch'án jië nkaya asén ch'án.

<sup>29</sup> A ntá tí ikuan chjina chrókjuásixián jië la chrókuakitsjenkiá ikuan la chróchr'an ikjín kixin íchá jína ts'ítjáyán it'ø cuerpo kuéntá kixin jehya kuénté cuerpo kuéntá sátsji tsjasótéxín tí síín xrohi. <sup>30</sup> A ntá tí itja chjina chrókjuásixián jië la chróchrínjian tí tjá a la chróchr'an ikjín kixin íchá jína ts'ítjáyán it'ø cuerpo kuéntá kixin jehya kuénté cuerpo sáchrókjui tsjasóte tí síín xrohi.

**Ch'in Jesús kjuako kixin  
chrók'uitjéhya kichó sín**

(Mt. 19.9; Mr. 10.11-12; Lc. 16.18)

<sup>31</sup> Kjaxin tsík'ítuenhen tí sín ósé kixin tí nkexro tjinkaon chrók'uitjíhi ichjién t'ichjánxín ts'óna xroon tsakja tí ichjién kixin ts'itjéxín kichó sín.† <sup>32</sup> A ntá janhan tjonkará kixin ijnko nkexro tsjákehe ichjién tí chróchóntahya tjan ókjé nkexro la jehe ch'án kuítóhe ch'án tjan kixin tsjasin tjan jië. A ntá tí nkexro tsøtehe ijnko tjan tsíkítsinkehe la kjaxin ó kjuasin ch'án jië.

**Ch'in Jesús kjuako kixin chjínhýa  
chrók'uákjénxinni ihnié Dios**

<sup>33</sup> Kjaxin tsíkinhínrá tsík'ítuenhen tí sín ósé kixin: “T'ichjánxín sínchexiteýará tí nkehe tsintáchrórá kixin chrók'uákjénxinhýará ihnié Inchéni chjíní.”‡ <sup>34</sup> A ntá janhan mé tjonkará kixin chrók'uákjénxinhýará ihnié Dios ninkehó la ko chrók'uákjénxinhýará nkajní kixin ntaha tjen Dios t'etøan. <sup>35</sup> La ko chrók'uákjénxinhýará chjasintajni kixin ntaha tjejókjén toté ch'án la ko chrók'uákjénxinhýará chjasin Jerusalén kixin ntiha la itjen tí Rey t'etøan. <sup>36</sup> La tjenkayáxixinhýará ikjára ó kixin jahará xitjahya tsjakérá ijnko kaxíhi tjóá ø nijnko kaxíhi tié. <sup>37</sup> Tí nkehe tsontáchrórá chaxín la chaxín la tí nkehe náhi la náhi la kohya nkehe chrókjuakét'oxinrá chróchrønkará. A ntá ichrén nkehe tjakét'oxinrá tsochrønkará la táha mé jínahya.

**Ch'in Jesús tjako ch'án kuénte tí sín  
t'itjáyenhya ichrén kjuanínkaon**

(Lc. 6.29-30)

<sup>38</sup> Jahará mé ó tsíkinhínrá tsík'ítuenhen tí sín ósé kixin tí takitsjenkí sín ikonrá la kjaxinrá chrókuakitsjenkírá ikon sín. A ntá tí chrókuakitsjenkí sín nënorá la kjaxinrá chrókuakitsjenkírá neno sín kjaxin.¶ <sup>39</sup> A ntá janhan mé tjonkará kixin tí jnkójín nkexro ichrén nkehe jínahya sit'ahará la jahará ch'e-hýará xíkaha. Náhi. Tí chjéhe ijnko nkexro ijnko tuaan la ntá tjóka tí í jnko nánko tuaan. <sup>40</sup> La tí síín jnkójín nkexro tjanchia jië la tjinkaon sín chrókuakitsjaha sín camisá la títóhe sín sátsjiko sín

\*5:27 Éxodo 20.14; Deuteronomio 23.21

†5:31 Deuteronomio 24.1–4

‡5:33 Números 30.2; Deuteronomio 23.21

¶5:38 Éxodo 21.24; Levítico 24.20; Deuteronomio 19.21

tí ka t'ínkayate kjaxin. <sup>41</sup>La tí t'etuanhanrá sín tsámará nkehe ijnko kilómetro la tjakét'oxinrá í yaá kilómetro. <sup>42</sup>Tí jnkojín nkexro tsjanchia nkehe la tí tjinkaon ch'án nkehe la chróntáchroh-yará kixin “náhí”, chrókjuincheckjenrá ch'án.

### Tjuèhérá tí sín nínkakonhanrá sín

(Lc. 6.27-28, 32-36)

<sup>43</sup>'Kjaxin ó tsíkinhínrá tsík'ítuenhen tí sín ósé kixin: “Tjuèhérá tí nkexro choxinrá la tsoninkákonhénrá tí sín jínahya kjuít'ahará.” <sup>44</sup>Á ntá janhan mé tjonkará kixin chrótjuèhérá tí sín nínkakonhanrá la chrókjuincheyaonrá tí sín jínahya kjuít'ahará la jína chrókjuinkitsará tí sín tjinkakonhya tí jahará la chrónixjehérá Dios kixin chrókjuinkitsa ch'án tí sín t'ántaxínhanrá la ko tí sín t'ahará tí jínahya. <sup>45</sup>Tí xikaha sich'erá la ntá jahará chaxín xjeen It'eni tjen nkaya nkajní kixin jehe ch'án mé t'etoon ch'án tsjiton yaon ts'inkaséyehenhen tí sín jínahya la ko tí sín jína la ko kjaxin t'etoon ch'án kixin ts'aniá ichrin tí sín tí sín jína la ko tí sín jínahya. <sup>46</sup>Tí jehó tjuèhérá tí nkexro tjuàhará, ¿la ntá nkehe chrókjuachará? Á ntá kjaxin tí sín nchekjènkí la xikaha ch'e sín. <sup>47</sup>La tí jehó nixjehérá tí sín kichuárá la ntá, ¿á chaxín imá jína t'ha ní? Kixin tí xikaha la kjaxin tí sín chónhya Dios la xikaha ich'e sín. <sup>48</sup>Kjaxinrá jahará ntoá chrók'uejorá kixin It'eni tjen nkaya nkajní la antsí má ntoá tjen ch'án.

### Kjuako ch'ín Jesús kuènté tí xra jína

**6**'Chrókjuásixínhyará kjuaxroan tí nkehe tinkachónkirá kixin tjinkáonrá chrók'uikon chojni ó. Á ntá jahará tí xikaha chrókjuich'erá ntá It'eni tjen nkaya nkajní la

ninkehó nkehe tsotjáhyará ch'án. <sup>2</sup>Tí tjínkitsará ijnko chojni nò la ninkexró chróchenkahyará. Jahará chrókóyóahyará tí sín ntoáhya tjenkayáxin ixri t'óxroan kixin mé xikaha ch'e sín t'óxroan sín nkaxenhen njnko la ko tí ntia kixin chrók'uikon chojni la chrókjuikosáyehe sín tí jehe sín kixin jína tjejóch'e sín. Á ntá janhan ntáxrjan kixin ó kjuixin k'uáyéhe sín nkehe la í ts'áyèhya sín inaá. <sup>3</sup>Á ntá tí jahará tió chrókjuinkitsará ijnko chojni chaxín nò la íchá jína kixin chrókónoehya ninkexró kjónté ijnko nkexro tjuá jína. <sup>4</sup>Á ntá jahará tí chrókjuánjonrá ichrén nkehe la ninkexró chrókónoehya la ntá tí It'eni ts'ikon ch'án kixin xikaha ch'erá la ninkexró noehya la ntá tí jehe ch'án mé tsotjáhará ch'án nkehe.

### Tjako ch'ín Jesús nkexrí tsonixjeheni Dios

(Lc. 11.2-4)

<sup>5</sup>Á ntá tió nixjehérá Dios la jehya éxi tí sín jnkojínxónhya tjenkayáxin sín chrónixjará. Jehe sín mé tóxrjínhin sín ts'ejóxin toté sín nkaxenhen njnko la ko ts'ejó sín esquina calle kuènte ntsin kixin ts'ikon kaín chojni kixin tjejónixjehé sín Dios. Ntá janhan chaxín ntáxrjan kixin jehe sín la xikaha kjuích'e sín la ó kjuixin k'uáyéhe sín nkehe la í ts'áyèhya sín inaá. <sup>6</sup>Á ntá tió nixjehérá Dios la t'ixenhénrá nchia ntoará la t'ikjehérá tí puerta la nixjehérá It'eni kixin ntaha tjekoará ch'án. Á ntá jehe ch'án ts'ikon kixin xikaha ninkexró ts'ikonhya ntá jehe ch'án tsjanjon ch'án nkehe ts'ayéhérá.

<sup>7</sup>Ntá tió chrónixjehérá Dios la chrókjateehya chrónixjará kixin chrókóyóahyará éxi tí sín chónhya Dios kixin jehe sín tjenkayáxin sín kixin nchón-

hya tsonixja sín, la mé xíkaha mé chrókuinhin Dios, ichro sín. <sup>8</sup> A ntá jahará chrókóyóahyará éxí tí jehe sín. It'éni ó nohe ch'án nkehe t'ichjánxínhanrá kjónté naxa tjanchéhyará ch'án. <sup>9</sup> Méxra xíkíhi chróntáchróró:

It'éni tjen nkaya nkajní jaha imá tjóá.

<sup>10</sup> Chrókui tí kjuachaxin kuénta.

Chrókjuich'e tí nkehe tóxrjínhan jaha ntili chjasintajni éxí tjech'e nkaya nkajní.

<sup>11</sup> Ijie la tsjánjuan tí niotja t'ichjánxínhinni.

<sup>12</sup> T'oxíka tí nkehe jínahya kjuích'eni kixin kjaxin jeheni ts'itjáyenhenni tí nkehe kjuích'ehe ni chojni.

<sup>13</sup> Títoéhyani kixin xrahya chrókjuasinni jie. Nchekaáni kaín tí jínahya chrókónhenni,

kixin jaha mé kuéntá tí kjuachaxin kixin ó noheni kixin jaha tjetétoan tí kjuachaxin jnkochrín. Amén.

<sup>14</sup> Tí jahará ts'itjáyhanhá tí nkexro kjuasinhanrá ichrén jie la mé kjaxin It'éni tjen nkaya nkajní mé ts'ikon ch'án kixin xíkaha kjuích'erá la ntá kjaxin jehe ch'án ts'oxíka ch'án tí jie kjuásinrá. <sup>15</sup> A ntá tí jahará ts'itjáyhanhá tí jie kjuasinhanrá í jnko chojni la ntá kjaxin It'éni tjen nkaya nkajní ts'ikon kixin xíkaha kjuích'erá k'uitjáyhanhá la ntá kjaxin jehe ch'án la ts'oxíkaha ch'án tí jie chontará.

**Ch'ín Jesús kjuako  
kixin chrók'óxroanhya  
sín kixin kjónehya sín**

<sup>16</sup> A ntá tí jahará tí naxa kjóntehyará kixin tjinkáonrá tsonixjehérá Dios la ntá chrók'uejohyará éxí t'avará éxí ch'e tí sín jehya jnkojínxón tjenkayáxin sín. Mé xíkaha ch'e sín kixin tjinkaon sín ts'ikon chojni kixin naxa kjónehya sín. Tí xíkaha ch'e sín la janhan ntáxrjan kixin ó kjuixin k'uáyéhe sín nkehe la í ts'áyèhya sín ínaá. <sup>17</sup> A ntá

tí jahará kjónté naxa kjóntehyará kixin tjinkáonrá tsonixjehérá Dios la t'ontirá ikonrá la tjéntóará kjará <sup>18</sup> kixin tsonoe-hya chojni kixin naxa kjóntehyará. Jehó It'éni tjekoará ntiha mé jehe ch'án nohe ch'án xíkaha ntá tsjanjon ch'án nkehe ts'ayéherá.

**Tí nkehe chaxín tje  
sín nkaya nkajní**

(Lc. 12.33-34)

<sup>19</sup> Jahará chrókjuásitonhyará nkehe tje ntili chjasintajni kixin ntili la ts'ín kué tí nkehe tje sinchek'itjáyhanhá va la ko tsochjisen tí chichaon la ko xíchee ts'ixenhen tsaáhará. <sup>20</sup> Íchá jína tjásitonrá tí nkehe tje nkaya nkajní kixin ntaha kohya iko sinchek'itjáyhanhá nkehe la tsochjisenhya tí nkehe la ko kohya xíchee ts'ixenhen tseé. <sup>21</sup> A ntá tí nkaya nkajní tsochontará nkehe tje la ntá tí nkehe tjenkayáxinrá la kjaxin ntaha tje.

**Tí xrohi t'inkaséyanxín cuerpo**

(Lc. 11.34-36)

<sup>22</sup> Tí ikonrá mé éxí yóhe ijnko xrohi t'inkaséyanxín tí cuerpo kuéntará. Tí jína ikonrá la ntá kjaxin kuénté tí cuerpo kuéntará mé chóna xrohi. <sup>23</sup> A ntá tí ikonrá la jínahya la ntá kuénté tí cuerpo kuéntará la sítié tje. A ntá tí chrókjuak'ehya tí xrohi la ntá antsí má chrókjuinchetié tí sítié.

**Dios la ko tí chichaon**

(Lc. 16.13)

<sup>24</sup> Kohya ninxeró tsjacha sich'ehe xra yaá lamó. Tí xíkaha chrókjuich'e ch'án la ntá ijnko tsonínkakohen ch'án la tí í jnko tsojtjéhe ch'án o ijnko la tsitekakohen ch'án la tí í jnko la tsitekakuenhya ch'án. Méxra xitjahya chrókjuich'ehe chojni xra Dios tí tjinkaon sín chróchóna sín itsje chichaon.

## Dios mé t'áyakonhen tí xjeen ch'án

(Lc. 12.22-31)

<sup>25</sup> 'A ntá ntáxrjan kixin chrókóxakuanhyará tí nkehe chrókjónterá o tí nkehe chrók'uirá o tí ka chrók'uitsará. ¿Á jehya antsí má sínkí tí kjuachón chróchontará, a ntá kánhyó sínkí tí nkehe chrókjónterá, la á jehya antsí má sínkí tí cuerpo kuéntará, a ntá kánhyó sínkí tí ka chrók'uitsará? <sup>26</sup> Xráxinkáonrá nkexrí síín tí koxroxé xritjaka. Jehé va la t'enkahya va noa la ko tjáhya va la ko chóntahya va nketí ts'inkachjínayá va tí noa, la kjánchó It'éni tjen nkaya nkajní la tjanjon ch'án nkehe sine va. A ntá jahará mé antsí tjetóan a ntá tí koxroxé la kénhyó. <sup>27</sup> ¿Á tjejó jnkojínrá tjenkayáxinrá kixin tí chrókóxakonhanrá imá a ntá naxa chrók'uankirá it'ó metro ntetoxinrá inaá?

<sup>28</sup> ¿Nkekuènté kixin imá tóxakonhanrá ikará ó? Tsjeherá nkexrí sít'ánkí tí catsjo síín nteje. Tí itsjo la ní ch'ehya xra la ko tjonhya. <sup>29</sup> La tjonkará kixin kjónté ch'ín rey Salomón k'uéchónta itsjé chichaon la naxa kjuíncheyóehya ch'án nkexrí náxrjón tsjehe tí tsjo a. <sup>30</sup> A ntá tí Dios la nchek'itsa tí ka yoa síín nteje kjónté ijie síchón ka la ntóye tsochexín tí nkaxenhen tja, a ntá jahará mé antsí chrókjuintak'itsará ch'án. ¿A ntá nkekuènté titekákonhyará ch'án? <sup>31</sup> Méxra xikaha chrókóxakuanhyará chrókjuanchankíhyará kixin nkehe chrókjónterá o nkehe chrók'uirá o nkehe chrók'uitsará. <sup>32</sup> Kaín tí nkehe la tí sín chónhya Dios mé tóxakonhen sín tíha. A ntá jahará chontará It'éni tjen nkaya nkajní la mé nohe ch'án kaín nkehe t'ichjánxinhanrá. <sup>33</sup> A ntá senó mé chrókjuéyará tí kjuachaxin kuènté Dios la chrókjuínchexiteyará tí nkehe jína tjinkaon ch'án, a ntá jehé ch'án mé tsjanjon ch'án kaín nkehe t'ichjánxinhanrá. <sup>34</sup> Tóxakuanhyará tí nkehe tson-

hen ntóye xikaha kixin ntóye la í jnko yaon táha la jnkojnko yaon tjikao kjuaxikaon kuènte.

## Chrók'uantaxienhyará kichuára

(Lc. 6.37-38, 41-42)

**7** 'Chrókuékahyará ókjé chojni jie kixin ntá Dios kjaxin chrókjuanchahya jie tí jahará. <sup>2</sup> A ntá Dios la tsjanchia ch'án jie tí jahará tí tsékará ókjé chojni jie. A ntá tí xikaha sich'erá la mé xikaha tsonhanrá kjaxin. <sup>3</sup> ¿A ntá nkekuènte tsjehé tí chjínínó ntsí tjenkánkí ikon tí kichuá tí naxa ántosán tí inta jie tjenkánkí ikuan? <sup>4</sup> A ntá tí chonta jaha tí nta jie tjenkánkí ikuan, ¿a ntá nkexrí kixin chróntáche tí kichuá kixin: "Títohé tsakitsjenkíni tí chjínínó ntsí tjenkánkí tí kuan?" <sup>5</sup> A ntá jaha la ntoáhya tjenkayáxian. Senó chrókuakitsjenkiá tí nta jie tjenkánkí ikuan kixin ntá chrók'uikuan tsakitsjenkiá chjínínó ntsí tjenkánkí ikon tí kichuá.

<sup>6</sup> 'Chróchjeéhyará tí nkehe tsíkótjóa tí konjá kixin jehé va tsokjan va tsonínkakonhanrá va ntá sinchekuenrá va. La ko kjaxin chróchjeéhyará tí cochíno tí xro perla tjeje kixin tsinkátja va la tsokuen.

## Tjanchia la tjéyá la t'inka puerta

(Lc. 11.9-13; 6.31)

<sup>7</sup> 'Tjanchará nkehe la Dios tsotjáhará. Tjéyará nkehe la ts'itjará. T'inkará puerta la ntá tsoxitjehe. <sup>8</sup> Kixin tí nkexro tjanchia nkehe la ts'áyehé tí nkehe la tí nkexro tjejá nkehe la ts'itja la tí nkexro t'inka puerta la tsoxitjehe.

<sup>9</sup> ¿Á tjejó jnkojín nkexro ntihi chrókjuanjón xro chrókjóné xjeen tí chrókjuanchia xjan niotja? Kja náhi. <sup>10</sup> O tí chrókjuanchia xjan ijnko koche la, ¿á chróchjehe ch'án tí xjeen ch'án konche chrókjóné ní? Kja náhi. <sup>11</sup> A ntá jahará kjónté jínahyará la ó nohará

nkehe jína chjehérá xjaanrá. A ntá It'éní tjen nkaya nkajní kjaxin antsí tsochjéhe ch'an nkehe jína tí nkexro tsjanchia nkehe.

<sup>12</sup> Méxra xikaha chrókjuikosáyehérá kichuárá éxi yóhe nkexrí tjinkáonrá chrókjuikosáyahará sín mé xikaha k'ue-toan ch'in Moisés la ko xikaha ntáchro tí xroon kuente tí sín k'uechrónka itén Dios ósé.

### Tí puerta tekahya

(Lc. 13.24)

<sup>13</sup> T'ixeenxínrá tí puerta tekahya. Kíxin tí puerta la ko tí ntja ts'itjáyaxín chojni la imá iton la ko teka la nchón-hya chojni sátsji tí ntja ntiha. <sup>14</sup> A ntá tí puerta la ko tí ntja sátsjixinni tí kjuachón la tekahya ntiha la ko tsjéhya chojni ts'itja tí ntja a.

### Tí to mé tjátsoanxínni tí nta

(Lc. 6.43-44)

<sup>15</sup> Méxra tóxakonhanrá tí ts'ikonrá itsi tí sín ch'ia tsontáchro sín kíxin kjaxin sín nixja sín itén Dios. Jehe sín la chrítaón ó tjoé kolélo ó, a ntá nkaya la kolobo jjehe. <sup>16</sup> Jahará la chrókjuátsoanxínrá tí jehe sín kíxin tí xra ch'e sín kíxin tí ntach'i la xitjahya chrók'óna to uva la ko tí kach'i xitjahya chrók'óna to higo. <sup>17</sup> Méxra kaín inta jína la t'óna to jína la ntá tí nta jínahya la kjaxin tí to la jehya to jína. <sup>18</sup> Tí nta jína la xitjahya chrók'óna to jínahya, la ko tí nta jínahya xitjahya chrók'óna to jína. <sup>19</sup> Kaínxín tí nta t'ónahya to jína mé tsochrínjin la tsoche. <sup>20</sup> Mé xikaha chrókjuatsoanxínrá jahará tí sín jehya jína kíxin tí xra tje-jóch'e sín.

### Jehya kaín chojni ts'ixenhen tí kjuachaxién Dios tjen nkaya nkajní

(Lc. 13.25-27)

<sup>21</sup> Kénhya chojni tsontáchro: "Ínchéni, Ínchéni", mé ts'ixenhen sín

tí kjuachaxién Dios tjen nkaya nkajní. Náhí. Jehó tí nkexro sinchexiteyá tí nkehe tóxrjinhin T'aná t'etqan tjen nkaya nkajní. <sup>22</sup> Tsixraká tí yaon a la ntá itsjé sín tsontáchro sín kíxin: "Ínchéni, Ínchéni, k'uénixjaxinni ihniá la ko tí ihniá mé kuakitsjexinni nchakuen tí jínahya la ko kjuachaxién ihniá kjuasixínni nchónhya kjuaxroan." <sup>23</sup> A ntá janhan tsjataha kíxin: "Janhan la chonhya tí jahará. Titonará sájtirá kíxin jahará imá jínahyará."

### Ch'in Jesús kjuíncheyóexin ch'an kíxin yaá nchia

(Lc. 6.47-49; Mr. 1.22)

<sup>24</sup> Méxra tí nkexro tinhin tí nkehe ntáxrjan la titekaon ch'an la jehe ch'an mé éxi yóhe ijnko nkexro chóna kjuaxrexinkaon jína la kjuích'éna nchia chrítaón tjo. <sup>25</sup> A ntá xrinahya xrakoa chrin, ikui yeé ntaninche la tjian chjéhe xrinto la kjónté xikaha la xikahya tí nchia kíxin itjo tjekjen nchia. <sup>26</sup> A ntá tí nkexro tinhin tí xrxanka la titekakon-hya mé jehe la éxi yóhe ijnko nkexro lon-ti la kjuích'éna ch'an ijnko nchia tí síin nchesen. <sup>27</sup> La ntá xrinahya xrakoa chrin ntá antsí kóyeé ntaninche tí tsaka la ko chjéhe xrinto la ntá xíka tí nchia, la ijnko kjuachrakon kónhen t'ha.

<sup>28</sup> A ntá tió kjuixin nixja ch'in Jesús la ntá imá chrakon tí chojni kíxin nkexrí kjuako ch'an. <sup>29</sup> Kíxin kjuako ch'an éxi ijnko nkexro chóna imá kjuachaxin la tóyóehya ch'an tí sín maestro kjuako tí ley.

### Ch'in Jesús kjuínchekitöhe jína ijnko chojni chóna chin lepra

(Mr. 1.40-45; Lc. 5.12-16)

**8** A ntá ch'in Jesús k'uínkajinxin ch'an tí jna la chréhe nchónhya chojni. <sup>2</sup> La ntá kóchjina ijnko ch'in níhi chóna chin lepra la kjuák'exin toch'in ch'an

nkayakon ch'ín Jesús la ntáchro ch'án kixin:

—Inchéni tí tjinkávan la jína chrókjuínchekitohéni jína —ichro ch'án.

<sup>3</sup>Ntá ch'ín Jesús mé kjuak'etja itja ch'án chrítaón tí ch'ín a la ntáchro ch'án kixin:

—Méxra xikaha tjínkavan. Ntá jie sijn-takitoha jína.

A ntá tuéxnín kuítóhe ch'án jína la ó kjuiin tí chin k'uéchónta ch'án.

<sup>4</sup>La ntá ntáchro ch'ín Jesús kixin:

—Ninkexró chenkahya ntihi. Jehó sátjia tjákohe tí ch'ín nchat'á kixin kuítóha jína la ko sátjkoa tí nkehe tsík'e-toan ch'ín Moisés\*\* kixin ntá xikaha tso-noexín kaín xín chojni kixin ó kuítóha jína —mé xikaha k'uetqan ch'ín Jesús.

**Ch'ín Jesús kjuínchekitohe  
jína ijnko nkexro ch'ehe  
xra ijnko capitán romano**

(Lc. 7.1-10)

<sup>5</sup>A ntá tió k'uixenhen ch'ín Jesús chjasin Capernaum la ntá xrínahya kóchjina ijnko capitán romano la chrónòda ch'án <sup>6</sup>ntáchro ch'án kixin:

—Inchéni ntoeni itjen ijnko ch'ín ch'e-heni xra mé níhi ch'án, tjetsínka ch'án, tsík'en toté ch'án la imá tjetéhe ch'án —ichro ch'án.

<sup>7</sup>A ntá ch'ín Jesús kjuátehe ch'án ntáchro ch'án kixin:

—¿Á sátsjia sintakitoha jína tí ch'ín a? —ichro ch'án.

<sup>8</sup>Ntá tí ch'ín capitán kjuátehe kixin:

—Náhi, Inchéni, tósuèheni kixin chrók'uixenhén ntoeni kixin jehya chojni jínani. Jehó chrókjuánjuan kjuachaxin kuéntá, ntá tí ch'ín ch'e-heni xra chrókuítóhe ch'án jína. <sup>9</sup>Janhan na

kjixin chonta chojni t'etuanna la ko kjixin janhan tétuanhan tí sín soldado. Tió tétuanhan ijnko sín sátjsi sín la ntá ó sátjsi sín. La kjixin tió tétuanhan ijnko sín kixin xrakoa sín la mé tji sín. La ko tió tétuanhan ijnko nkexro ch'ena xra kixin sich'e xra la ich'e xra —ichro ch'án.

<sup>10</sup>Ntá kuínhin ch'ín Jesús ntá kóx-akonhen ch'án kixin xikaha chro tí ch'ín a, ntá nixjehe ch'án tí sín chréhe ch'án ntáchro ch'án kixin:

—Chaxín ntáxrjan kixin kuenté tí nación Israel la k'uitjahya janhan ninkexró tinkáchónki xikaha éxi tinkáchónki tí ch'ín i. <sup>11</sup>Janhan xrjanka kixin nchónhya chojni ókjé tjixin tí tjitoxin yaon la ko tí tjiátóxin yaon la sineko sín tí ch'ín Abraham la ko Isaac la ko Jacob tí tjen tí kjuachaxin kuènte Dios. <sup>12</sup>A ntá itsjé tí sín chrók'uejó tí tjen tí kjuachaxin kuènte Dios la ts'axrxjén sín ntiha, sátjsi sín tí sítié la ntaha tsotsjánka sín la sinetaón neno sín.

<sup>13</sup>La ntá ch'ín Jesús mé nixjehe ch'án tí ch'ín capitán ntáchro ch'án kixin:

—Sátjia ntq. Éxi kuítekávan jaha la tsoxiteyá tsonhen tíha —ichro ch'án.

La ntá tí ch'ín ch'e xra la o tuéxnín tí hora a tsíkitohe ch'án jína.

**Ch'ín Jesús kjuínchekitohe  
ich'ee ch'ín Pedro jína**

(Mr. 1.29-31; Lc. 4.38-39)

<sup>14</sup>A ntá sákjuí ch'ín Jesús tí ntq ch'ín Pedro la ntaha k'uíkon ch'án kixin tí ich'ee ch'ín Pedro la níhi tjan tjetsínka tjan la chóna tjan sóa. <sup>15</sup>Ntá itsé ch'án itja tjan la ntá kjuínhin tjan tí sóa la ntá k'uínkatjen tjan la kjuankixin yaxínhin tjan kixin tsjanjon tjan nkehe sine sín.

\*\*8:4 Levítico 14.1-32



**Ch'ín Jesús kjuínchekitohe  
nchónhya tí sín níhi jína**

(Mr. 1.32-34; Lc. 4.40-41)

<sup>16</sup>La ntá tí ó kóntanonte ntá kjuikohe sín ch'ín Jesús nchónhya chojni chóna nchakuen tí jínahya. La ntá jnkokoá nixja ch'án la k'uaxrjexín tí nchakuen tí jínahya tí jehe sín la kjaxin kjuínchekitohe ch'án jína kaín tí sinníhi. <sup>17</sup>Mé xíkaha kjuích'e ch'án kixin tsoxiteyá tí nkehe tsíchronka tí ch'ín Isaías tí ch'ín k'uéchrónka itén Dios. Mé ntáchro ch'án xíkahi: “Jehe ch'án kuákja ch'án tí chin chóntani la ko jehe ch'án kuámá ch'án tí kjuatjoté.”†† Mé xíkaha ichro itén Dios.

**Tí sín tjinkaon tsochréhe  
tí ch'ín Jesús**

(Lc. 9.57-62)

<sup>18</sup>Tió k'uíkon ch'ín Jesús kixin nchónhya chojni k'uántatjen sín ch'án la ntá k'uetōan ch'án kixin ts'átōyē sín í jnko chrínta ntá. <sup>19</sup>La ntá ijnko tí sín maestro tjako tí ley mé kóchjinehe ch'án tí ch'ín Jesús la ntáchro ch'án kixin:

—Maestro tjinkaonni chróchréheni tí jaha kjónté nketí tjinkávan sátsjia —ichro tí ch'ín a.

<sup>20</sup>La ntá kjuátehe ch'ín Jesús ntáchro ch'án kixin:

—Tí koxróntá chóna va itjueé va la ko tí koxroxé chóna va kaké va. A ntá tí Xjeen Dios K'óna Chojni mé chónahya nketí ts'ok'èxin ch'án.

<sup>21</sup>A ntá ijnko tí chojni k'uájiko ch'án, mé ntáchro ch'án kixin:

—Inchéni, títōhēni senó sátsjikjaváni it'éni —ichro ch'án.

<sup>22</sup>La ntá kjuátehe ch'ín Jesús ntáchro ch'án kixin:

—Náhi, chréhe tí janhan. Títōhé kixin tí chojni tsík'en la jnkokón sín tsík'en ts-

javá kichó sín —mé xíkaha ichro ch'ín Jesús.

**Ch'ín Jesús kjuínchek'ixrata  
tí xrintō la ko tí ntá**

(Mr. 4.35-41; Lc. 8.22-25)

<sup>23</sup>Ntá ch'ín Jesús k'uixenhen tí ntabárcō la k'uixenko ch'án tí sín k'uájiko ch'án. <sup>24</sup>La ntá xríñahya imá síchrica ntá la ó chjina sítikia ntá tí ntabárcō. La kjánchó ch'ín Jesús la tjejua ch'án. <sup>25</sup>La ntá tí sín k'uájiko ch'án kjuínchek'àyá sín ch'án la ntáchro sín kixin:

—Inchéni nchekaáni kixin tí ntabárcō la ó meró ts'aniánki ntá —ichro sín.

<sup>26</sup>Ntá kjuátehe ch'án ntáchro ch'án kixin:

—¿Nkekuènté kixin imá chrakonrá? Intsíkoá tinkachónkirá Dios —ichro ch'án.

Kjuixin ntáchro ch'án xíkaha ntá k'uàya ch'án la k'uetuēnhen ch'án tí xrintō la ko tí ntayaon la ntá tuéxín k'uixrata. <sup>27</sup>La ntá imá chakon sín la ntáchro sín kixin:

—¿Xá nkexro tíhi? Kjónté xrintō la ko ntayaon la mé nchexiteyéhe ch'án —ichro sín.

**Tí sín chóna nchakuen tí  
jínahya tí nonte Gadara**

(Mr. 5.1-20; Lc. 8.26-39)

<sup>28</sup>Ntá tió k'uátōyē ch'ín Jesús tí ntayaon a ntá kjuíji sín tí nonte Gadara. La ntá yaá chojni chóna nchakuen tí jínahya k'uaxrjexín tōyē chojni tsík'en la kóchjinehe sín ch'án. Jehe sín mé imá jiehe sín la kohya ninxeró tjacha ts'at-sínka tí ntija ntiha. <sup>29</sup>La ntá kjuankixin k'óyako sín ntáchro sín kixin:

—Tjiatēhya jaha tí jeheni jaha Jesús mé Xjeen Dios. ¿Á k'uinka ntihi kixin sínchekjasóteni kjónte naxa

††8:17 Isaías 53.4

kjuixrakáhya tí yaon tsjasóteni? —ichro sín.

<sup>30</sup> A ntá ntiha kánhyó kjín siín itsjé cochíno xrine va. <sup>31</sup> La ntá tí nchakuen tí jínahya mé chrónóehē tí ch'ín Jesús kixin:

—Tí tsétoan kixin sátsjini la chrókuánjuan kjuachaxin chrók'uixenhenni tí cochíno —ichro sín.

<sup>32</sup> Ntá ntáchro ch'ín Jesús kixin:

—Tí xikaha la sátsjia —ichro ch'án.

La ntá tí nchakuen tí jínahya a mé k'uaxrxjín tí chojni la k'uixenhen tí cochíno. La ntá kaín xín tí cochíno kuinká va, k'uínkajinxin va ntiha kjuít-sínkayá va tsaka, ntá kjuítsínkankí va nta, kjuínhin va nta.

<sup>33</sup> La ntá tí chojni t'ayakonhen tí cochíno mé chrakon sín ntá kuinká sín sákjuí sín chjasin la kjuankixin chrónka sín kaín tí nkehe kónhen la ko kaín nkehe kónhen tí sín k'uéchóna tí nchakuen tí jínahya. <sup>34</sup> A ntá kaín tí sín chjasin ntiha sákjuítsjehe sín ntá kjuíji sín tí tjen ch'ín Jesús ntá k'uíkon sín kixin xikaha tsíkónhen la chrónóehē sín ch'án kixin sáchrókjuí ch'án ókjé.

### Ch'ín Jesús kjuínchekitohe jína ijnko chojni tsík'en toté

(Mr. 2.1-12; Lc. 5.17-26)

**9** La ntá kjuixin tíha ntá ch'ín Jesús mé k'uixenhen ch'án ijnko ntabáro la k'uátsínka ch'án í jnko lado chrínta nta la kjuíji ch'án chjasén ch'án. <sup>2</sup> A ntá ntiha kuikao sín ijnko ch'ín tsík'en toté la tjetsínkaták'á ijnko kania. Ntá k'uíkon ch'ín Jesús kixin chaxín tinkáchónki sín ch'án la ntá nixjehe ch'án tí sinníhi ntáchro ch'án kixin:

—Xjeenni nchechéhé asán. Tí jie chonta la ó kjuixin kjuínhan —ichro ch'án.

<sup>3</sup> La ntá iso tí sín maestro tjako tí ley mé jehó sín ikjo sín asén sín, ntáchro sín kixin:

—Tí ch'ín i mé ncheyóhe ch'án asén ch'án Dios kixin xikaha nixja ch'án.

<sup>4</sup> Ntá ch'ín Jesús mé ó nohe ch'án kixin nkehe tí kjo sín asén sín ntá ntáchro ch'án kixin:

—¿Nkeuèté kixin xikaha jínahya tjenkayáxinrá? <sup>5</sup> ¿Nkehe antsí xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuínhin ch'án tí jie yamá ch'án ó á antsí xrahya chróntátjan ch'án kixin chrók'uínkatjen ch'án sáchrókjuí ch'án? <sup>6</sup> Méxra tsjáqoxian kixin tí Xjeen Dios K'óna Chojni mé ntihi chjasintajni chóna kjuachaxin tsjakjihin ije chojni.

Ntá ntáche ch'án tí sinníhi a kixin:

—Ijie la t'inkatjen tjatsíyan kaniáa na sátsjia ntoa —ichro ch'án.

<sup>7</sup> Ntá tí ch'ín tsík'en toté na tuénxín k'uínkatjen ch'án la sákjuí ch'án ntoa ch'án. <sup>8</sup> Ntá kaín tí sín siín ntiha k'uíkon sín kixin xikaha kónhen la imá chrakon sín la kjuanchehe sín Dios kjuasáya kixin tí nkexro imá kjuáqoxin ch'án kjuachaxin kuènte Dios.

### Ch'ín Jesús k'uíyehē ch'án tí ch'ín Mateo

(Mr. 2.13-17; Lc. 5.27-32)

<sup>9</sup> A ntá ch'ín Jesús sákjuixin ch'án ntiha la k'uíkon ch'án ijnko ch'ín it'ín Mateo tjetjāxin ch'án ntiha nchekjènkí ch'án. Ntá ntáchro ch'ín Jesús kixin:

—Chréhé tí janhan —ichro ch'án.

Ntá ch'ín Mateo tuénxín k'uínkatjen ch'án chréhē ch'án tí ch'ín Jesús.

<sup>10</sup> A ntá chr'éxin ch'ín Jesús kjuák'e ch'án ntoa tí ch'ín Mateo la ntaha xranjon nkehe sine ch'án la ntá itsjé tí sín nchekjènkí la ko í so sín chóna jie mé kjuíji sín la kjaxin kjóneko sín tí ch'ín Jesús la ko tí sín k'uájiko ch'án. <sup>11</sup> La ntá tí sín fariseo kjaxin k'uíkon sín xikaha la kjuanchankíhi sín tí sín k'uájiko ch'ín Jesús, ntáchro sín kixin:

—¿Nkekuènté kixin tí ch'ín maestro kuèntará mé neko ch'án tí sín nchekjènkí la ko tí í so sín chóna jìe? —ichro sín.

<sup>12</sup>Ntá ch'ín Jesús la kuínhin ch'án nkehe tí tjo sín la ntáchro ch'án kixin:

—Tí sín níehya la t'ichjánxienhya sín nkexro sich'e xroan. Náhí. Jehó tí chojni níhi mé t'ichjánxinhin sín nkexro sich'ehe sín xroan. <sup>13</sup>Sátjirá la ts'ítjará nkexrí t'axrjéxín tí nkehe ntáchro xroon itén Dios. Mé ntáchro kixin: “Janhan tjínkavan kixin chrókuikonóhéhé chojni la tjínkakhya kixin chrók'oyánrá iko chrókuánjonrá.”<sup>††</sup> Mé xíkaha ichro itén Dios. Janhan na k'uinkahya ntihi kixin chrók'uíyaha chojni jína tjejó. Náhí. K'uinka kixin ts'íyaha tí chojni chóna jìe kixin chrókuítóhe sín tí ijìé sín ntá chrókuinkí sín tí tjenkayáxin sín —ichro ch'án.

### **Kjuanchankí sín kuènte tí nehya sín**

(Mr. 2.18-22; Lc. 5.33-39)

<sup>14</sup>Ntá iso tí sín k'uék'ajiko tí ch'ín Juan Bautista mé kóchjinehe sín ch'ín Jesús la kjuanchankíhi sín ch'án, ntáchro sín kixin:

—Jeheni la ko tí sín fariseo la jnkoyaxon nehanyi, a ntá tí sín xrikoá la, ¿nkekuènte xíkahya ch'e sín? —ichro sín.

<sup>15</sup>Ntá kjuátehe ch'ín Jesús, ntáchro ch'án kixin:

—¿Xá chrók'uává kaín tí sín tsík'íyèhe sín tsochjina tsoṭehe ijnko chojni kixin naxa tjen tí ch'ín tsíkóṭehe tjejóko sín ntiha? A ntá tsjixraká ijnko yaon tsotsé sín tí ch'ín tsíkóṭehe sátsjiko sín ch'án ntá kaín tí sín tsíkóchjina mé ts'ává sín la í sinehya sín.

<sup>16</sup>Nijnko chojni chrókjuak'enièhe tí ka ó ntaxin it'ò ka nixin kixin ntá chrókjuixèhe tí ka nixin chrók'úitjjan tí ka ntaxin ntá antsí má chrók'uichje.

<sup>17</sup>La ko kjaxin éxí yóhe chrókuikiahya chojni xranvino nixin ijnko tjuaxran ó ntaxin kixin tí xíkaha chrókjuich'e sín ntá chrók'uichje ti tjuaxran ntaxin. Ntá chrók'uitjýan tí xran la ko chrok'uitjýan tí tjuaxran. Ntá tí xranvino nixin chrókuikia ijnko tjuaxran nixin la ntá xíkaha la yóí nkehe chrók'uitjýanhya.

### **Ch'ín Jesús kjuínchexechón tí tjachjin xjeen ch'ín Jairo la ko kjuínchekitòhe jína ijnko tjan kuákóxin iké ch'án**

(Mr. 5.21-43; Lc. 8.40-56)

<sup>18</sup>Ntá naxa tjenixja ch'ín Jesús la ntá ikjui ijnko ch'ín t'etòan kuènte tí sín judío la kjuák'exín toh'in ch'án nkayakon tí ch'ín Jesús la chrónóhe ch'án kixin:

—Tí xjanna na ntá kjuixin k'uén. Xrjanóaha sáchrókjuini chrókjuakétja tjá jehe tjan ntá chróxechón tjan —ichro ch'án.

<sup>19</sup>Ntá k'uínkatjen ch'ín Jesús ntá sákjuíko ch'án tí ch'ín a la ko sákjuíko-toxin ch'án tí sín k'uájiko ch'án. <sup>20</sup>A ntá itjen ijnko chojni chjin níhi tjan, ó teyó nánó chóna tjan ijnko chin ts'ítji tjan jni. Ntá kóchjina tjan nóton tí ch'ín Jesús ntá kuákóxin tjan tí iké ch'án <sup>21</sup>kixin tjenkayáxin tjan kixin kjónté chrínta iké ch'án ó chrókuákóxin tjan, la táhó chrókuítóexín tjan jína. <sup>22</sup>Ntá nkátjía ch'ín Jesús la k'uíkon ch'án tí tjan a ntá ntáchro ch'án kixin:

—Xjeenni, nchechéhé asán jaha. Jaha la ó kuítóha jína kixin kuítekavan tí janhan —ichro ch'án.

Na ntá tuénxín ó kuítóhe tjan jína.

<sup>23</sup>Ntá tió kjuíji ch'ín Jesús ntòe tí ch'ín judío t'etòan la k'uíkon ch'án kixin ó yaxinhin tí sín músico kixin ó sátsjixravá xjan. La kaín tí chojni tsíkójnkotsé la

tsjánkàma sín xjan. <sup>24</sup>La ntá ntáchro ch'ín Jesús kíxin:

—Tí xjan méhe títòhéra, kíxin tsík'en-hya xjan, la tjejua xjan ó —ichro ch'an.

Ntá kjuanoá sín ch'án. <sup>25</sup>Ǻ ntá tí k'uaxrje kaín chojni la ntá ch'ín Jesús la k'uixenhen ch'án la itsé ch'án itja tí tjan a la ntá tuénxín k'uínkatjen tjan. <sup>26</sup>Ntá kuenté chjasin ntiha la kuínhin sín kíxin xíkaha kónhen.

### Ch'ín Jesús kjuínchekitohe jína yaá sín t'ikonhya

<sup>27</sup>Ntá sákjuíxin ch'ín Jesús ntiha la ntá yaá chojni t'ikonhya kjuíchréhe tí jehe ch'án la k'uíyehé sín ch'án ntáchro sín kíxin:

—Tikonóhéni jaha tsík'axrjeníxian David.

<sup>28</sup>Ntá k'uixenhen ch'ín Jesús ijnko nchia na ntá kóchjina tí yaá sín t'ikonhya la ntá ch'ín Jesús kjuanchankíhi sín ch'án, ntáchro ch'án kíxin:

—¿Á titekávan kíxin tsjácha sít'a xíkaha? —mé xíkaha kjuanchankí ch'án.

Ntá kjuátehe sín kíxin:

—Jeén, Ínchéni, titekaonni.

<sup>29</sup>Ntá ch'ín Jesús kjuak'etja tja ch'án chrítaón ikon sín la ntáchro ch'án kíxin:

—Tí xíkaha kuítekávan la tsoxiteyá —mé xíkaha ichro ch'án.

<sup>30</sup>La ntá tuénxín ó jína t'ikon sín. Ntá ch'ín Jesús k'uetuénhen sín ch'án kíxin:

—Ninkexró tsochenkahyará —ichro ch'án.

<sup>31</sup>Ntá tuénxín sákjuí sín la nkuíxin chjasin ntiha chrónka sín tí kjuaxroan kjuasin ch'ín Jesús.

### Ch'ín Jesús kjuínchekitohe jína ijnko ch'ín nósin

<sup>32</sup>Tió sákjuí tí sín k'uék'ikonhya, a ntá iso chojni kjuíkáo sín ijnko ch'ín nósin ch'án la chóna ch'án nchakuen tí jínahya. <sup>33</sup>Ntá ch'ín Jesús kuakitsje tí nchakuen tí jínahya ntá tí ch'ín nósin la

ó kjuankíxin nixja ch'án. Ntá kaín chojni la k'uíkon sín la ntáchro sín kíxin:

—Nunca t'ikonhyéni ijnko kjuaxroan xíkaha kuenté tí nación Israel —ichro sín.

<sup>34</sup>Ǻ ntá tí sín fariseo ntáchro sín kíxin:

—Tí nkexro t'etuénhen tí nchakuen tí jínahya tsíkjanjon kjuachaxin mé xíkaha takitsje tí ch'ín i tí nchakuen tí jínahya —mé xíkaha ichro sín.

### Ch'ín Jesús kuíkonóehé ch'án chojni

<sup>35</sup>Ntá k'uátsínka ch'ín Jesús itsje chjasin jíé la ko chjasin ntsí la kjuakoxin ch'án jnkojnko nínko Israel. Chrónka ch'án tí tan jína nkexrí tjen tí kjuachaxin kuénte Dios. La ntá kjuínchekitohe ch'án jína chojni níhi chóna kaín xín chin la ko chojni chóna kjuatjoté. <sup>36</sup>K'uíkon ch'án kíxin nchónhya chojni k'uéjéj sín ntá kuíkonóehé ch'án sín kíxin imá tóxakonhen sín la k'uéjéj sín éxí kolélo chónahya nkexro t'ayakonhen. <sup>37</sup>Ntá ntáche ch'án tí sín k'uájiko ch'án kíxin:

—Chaxín ntáxrjan janhan kíxin imá tsík'óna, kjánchó chojni sich'e xra mé tsjéhya. <sup>38</sup>Chrókjuanchehérá tí Ínché tí nonte kíxin chróchr'án ch'án itsje chojni chrókjuich'e xra —mé xíkaha ichro ch'ín Jesús.

### Ch'ín Jesús kjueyá teyó sín ts'ajiko ch'án

(Mr. 3.13-19; Lc. 6.12-16)

**10** Ntá ch'ín Jesús mé kjueyá ch'án teyó sín ts'ajiko ch'án la kjuanjon ch'án kjuachaxin tsakitsje sín kaín tí nchakuen tí jínahya t'etuénhen asén chojni la ko sinchekitohe sín jína kaín chojni chóna kaín chin la ko kaín xín kjuatjoté.

<sup>2</sup>Na mé tí teyó sín k'uájiko ch'án mé it'in sín xíkíhi: saoxín mé ch'ín Simón na mé kjaxin it'in ch'án Pedro la ko kíchó ch'án Andrés la ko ch'ín Jacobo la ko kíchó ch'án Juan mé tí xjeen ch'ín Zebe-

deo. <sup>3</sup>La ko kjaxin ch'ín Felipe la ko ch'ín Bartolomé la ko ch'ín Tomás la ko ch'ín Mateo mé tí ch'ín nchekjènkí la ko ch'ín Jacobo xjeen ch'ín Alfeo la ko ch'ín Lebeo, mé jehe ch'án kjaxin it'in ch'án Tadeo. <sup>4</sup>La ko kjaxin ch'ín Simón, mé kuènte tí sín cananista, la ko kjaxin ch'ín Judas Iscariote, mé tí nkexro chr'èxin kjuínchekji tí ch'ín Jesús.

**Ch'ín Jesús k'uetuēnhen tí  
teyó sín kixin sátsjikjako  
sín kjuachaxin kuènte Dios**

(Mr. 6.7-13; Lc. 9.1-6)

<sup>5</sup>Ntá k'uetuēnhen ch'ín Jesús tí teyó sín kixin sátsji sín la k'uetōan ch'án kixin:

—Tjíhýará tí tjejó tí sín jehya judío la ko t'ixēnhyará tí chjasin síin estado Samaria. <sup>6</sup>Náhi. Íchá jína sátsjírá tí tjejó tí chojni éxi kolélo kjuíchroē kuènte nación Israel. <sup>7</sup>Sátsjírá tjákoherá sín kixin kjuachaxiēn Dios tjen nkaya nkajní la í séhya tsi. <sup>8</sup>Sínchekitohérá jína chojni níhi la ko sínchekitohérá jína tí sín chóna chin lepra la ko sínchexechónrá chojni tsík'en la takítsjerá tí nchakuen tí jínahya. Jahará kjaxin kjuachaxiēn Dios, méxra chrókjuachahýará jahará kjaxin.

<sup>9</sup>Chrókjuikuahýará ninkehó chichaon oro la ko ninkehó chichaon plata la ko ninkehó chichaon cobre <sup>10</sup>la ko tí sátsjírá ntia la chrókjuikuahýará ka bolsa la chrókjuikuahýará yaá ka chrók'uínkayaterá la ko chrókjuankahýará tokatárá la ko chrókjuikuahýará nta tjíxinrá. Tí nkexro ch'e xra la jehí síin kjuachaxin ntiha chrókjóne.

<sup>11</sup>'A ntá tió tsjasánrá ijnko chjasin jié o ijnko chjasin ntsí la tjeýará ijnko nkexro tsjanjon kjuachaxin la ntōe sín ntahó chrókuitōhará ntá tsjixin tí xra ntá sátsjírá. <sup>12</sup>'A ntá tió t'ixēnhénrá ntōe sín la nixjehérá sín tjákoxinrá nkjojína. <sup>13</sup>'A ntá tí chaxín jína asén sín la ts'áyéhe sín

tí kjuaxróxin, a ntá tí náhi la sátsjikorá tí kjuaxroxin. <sup>14</sup>'A ntá tí tsochrohya sín tsjanjon sín kjuachaxin tsitōhará la tjinkakonhya sín tsinhin sín tí nkehe tsochronkará na mé t'axrjéxinrá tí ntōe sín o tí chjasén sín la t'oxēnjínrá tí inche chóna totárá. <sup>15</sup>'A ntá chaxín tjonkará kixin tió tsjixraká tí yaon tsjixixín na mé tí sín chjasin Sodoma la ko tí sín Gomorra kjónté imá k'uéchénta sín jiē la kánhyó tsjasóte sín, a ntá tí sín chjasin a la antsí tsjasóte sín kixin k'uéjoxróxinhya sín tí tan chrókuaáxin sín.

**Ókjé sín tsonínkakonhen  
tí sín kuènte Cristo**

<sup>16</sup>'Janhan tsochr'an tí jahará éxi yóhe chróchr'an kolélo ts'ejóyakjan kolóbo. Listo chrók'uejorá éxi konche xikaha la chrók'uejorá éxi kontóá chrókójiyahýará. <sup>17</sup>Chrókóxakonhanrá kixin itsi chojni tsotsé sín tí jahará la sátsjikoará sín tí tjejó tí sín t'etōan la ko nkaxenhen tí nínkoé sín tsjatiaxínrá sín. <sup>18</sup>La ntá tsjikaánrá sín tí tjejó tí sín t'etōan la ko tí síin tí sín rey kixin tinkachónkirá tí janhan. Ntá jína tsochronkará kixin tinkachónkirá tí janhan nkayakon tí jehe sín la ko nkayakon tí sín chónhya Dios. <sup>19</sup>'A ntá tió sátsjikoará sín tí tjejó tí sín t'etōan la tóxakuanhyará nkehe tson-táchorá o nkexrí tsonixjará kixin tió tsjixraká tí hora la ntá Dios mé tsjinkít-sará tsonixjará. <sup>20</sup>Kixin jehya jahará tsonixjará. Náhi. Tí Nchakuen It'eni mé tsochrónka nkehe tsonixjará.

<sup>21</sup>'Ntá iso chojni mé tsjikaán sín tí kichó sín kixin its'en la ko tí it'é mé tsjikaán tí xjeen. 'A ntá tí xjan mé tsokjan tsonínkakonhen tí it'é kixin its'en. <sup>22</sup>Káinxín chojni chjasintajni tsonínkakonhanrá sín kixin tinkachónkirá tí janhan. 'A ntá tí nkexro tsítōehya tsinkáchónki sín tí janhan hasta tsjéje chjasintajni mé tsaá. <sup>23</sup>Tió má chónkíhará sín ijnko chjasin la ntá sáts-

sjirá í jnko chjasin. La ntá chaxín tsoxrjanka kixin tí Xjeen Dios K'óna Chojni mé tsokjan tí naxa tjixinhya ts'atsínkará kaín tí chjasin Israel.

<sup>24</sup> Tí nkexro xrakohe la kánhyó tje-toan la tí maestro la antsí tje-toan, la ko kjaxin tí nkexro ch'e xra la tje-toan-hya la antsí tje-toan tí lamo. <sup>25</sup> A ntá tí nkexro xrakohe chrókjuakoxin ch'án éxí tí nkexro kjuakohe ch'án la ko tí nkexro ch'e xra chrókjuakoxin ch'án éxí tí lámoé ch'án ch'ehé ch'án xra. Tí ch'in inché nchia la kjaxin nchek'in sín Beelzebú la kjaxin tí sín kjéhya xikaha nchek'in sín.

### Nkexro tí chróchrakonhénrá

(Lc. 12.2-9)

<sup>26</sup> Méxra chróchrakuénhyará chojni. Kohya ninkehó nkehe imó chrókónoehya chojni la ko kohya nkehe tjemá ijie kixin chrókónoehya chojni chr'éxin. <sup>27</sup> Tí nkehe tjonkará sítié la t'ichjánxin tsochronkará tíó itsi xrohi t'inkaséyanxín tí yaon. La ko tí nkehe tjonkará ijie ninkexró noehya la t'ichjánxin chronkará chrókuinhin kaín sín. <sup>28</sup> Chróchrakuénhyará tí sín t'óyan cuérpoé chojni kixin asén chojni xitjahya ts'óyan sín. Íchá jína chróchrakonhénrá tí nkexro tsjacha sinchek'itjáyanxín cuérpoé chojni la ko asén chojni tí xrohi ts'ankahya.

<sup>29</sup> ¿Á chrókóxinhya yaá koxroxé ntsínsí ijnko chichaon ntsí? A ntá kjónté xikaha la chrók'uanótjenhya nijnko tí jehe va nonte tí chrókjuanjonhya It'éni kjuachaxin. <sup>30</sup> A ntá kjónté tí kaxihí chóna ikjárá la ó nohe ch'án nkekjaín ka chontará. <sup>31</sup> A ntá jahará chróchrakonhyará kixin tóyóahyará tí koxroxé kixin antsí sínkí tí jahará, a ntá tí koxroxé, kjónté nchónhya va, la kánhyó sínkí tíha.

### Tí sín tósuèhya tsochrónka sín kixin tinkáchónki sín Cristo nkayakon chojni

(Lc. 12.8-9)

<sup>32</sup> Kaín tí chojni tsochrónka kixin tinkáchónkina sín nkayakon chojni la janhan mé kjaxin tsoxrjanka kixin choxian tí jehe sín nkayakon T'aná tjen nkaya nkajní. <sup>33</sup> A ntá tí nkexro sinchemána tsontáchro sín kixin chónhya sín tí janhan nkayakon chojni la kjaxin janhan tsontáxrjan kixin chonhya tí jehe sín nkayakon T'aná tjen nkaya nkajní.

### Jnkokoáhya tsjenkayáxin chojni kixin ó kui Inchéni Jesús

(Lc. 12.51-53; 14.26-27)

<sup>34</sup> Tjenkayáxinhyará kixin k'uinkakian kjuaxróxin chjasintajni. Náhí. Janhan k'uinkakianhya kjuaxróxin. Tsjanjonko kichó chojni kixin k'uinka janhan. <sup>35</sup> Janhan k'uinka kixin tsonínkakonhen chojni it'é, la ko tí xjeen sín chjin mé tsonínkakonhen iné, la ko tí tíkintá tsonínkakonhen ich'ee. <sup>36</sup> Mé xikaha tí sín tsonínkakonhen kichó la mé tí sín naxa kjéhya sín.

<sup>37</sup> A ntá tí nkexro antsí tjuèhe it'é sín la ko iné sín la kánhyó tjuèhe tí janhan la mé xitjahya ts'óna sín kuéntana, la ko tí nkexro antsí tjuèhe xjeen sín la kánhyó tjuana sín la mé xitjahya ts'óna sín kuéntana. <sup>38</sup> La tí nkexro tamáhya ntacruz, chrèhya sín tí janhan la mé xitjahya ts'óna sín kuéntana. <sup>39</sup> Tí nkexro tjinkaon kixin kohya nkehe chrókónhen sín mé ts'itjáyan sín, a ntá tí nkexro chrókjuinçek'itjáyanxín asén kixin tinkáchónki sín tí janhan la mé tsaá sín.

### Tí nkexro ts'áyéhe nkehe

(Mr. 9.41)

<sup>40</sup> Tí nkexro chrókjuanjon kjuachaxin chrók'uejorá la mé éxí chrók'uáyéhe sín tí janhan la ko tí nkexro chrók'uáyéhe

tí janhan la éxí yóhē chrók'uáyéhe sín tí nkexro ichr'ánna k'uinka. <sup>41</sup>La tí nkexro chrókjuanjon kjuachaxin tsjak'e ijnko nkexro nixja itén Dios kixin táha la Dios ichr'án la mé ts'áyéhe nkehe éxí ts'áyéhe tí nkexro kjuako. La ko tí nkexro chrókjuanjon kjuachaxin tsjak'e ijnko chojni jína kixin jína ch'án mé xikaha ts'áyéhe sín nkehe éxí ts'áyéhe tí nkexro jína. <sup>42</sup>A ntá tí nkexro sinchek-itonhen ijnko vaso ntá kin kjónté ijnko chojni noehya má, chréhe tí janhan, la mé chaxín ntáxrjan kixin tí ch'ín a mé chaxín ts'áyéhe ch'án nkehe jína kixin xikaha kjuích'e ch'án.

### Ch'ín Juan Bautista k'uētuenhen iso sín

(Lc. 7.18-35)

**11** Ntá ch'ín Jesús kjuixin kjuakohe ch'án tí teyó sín xriko ch'án la ntá sákjuíxin ch'án ntiha la sákjuíkjako ch'án iso chjasin chjinaxón ntiha.

<sup>2</sup>A ntá ch'ín Juan mé tjechjina ch'án ntoechiso ntá xrínahya kuínhin ch'án nkerí xra tjech'e Cristo. La ntá k'uētuenhen ch'án iyó tí sín k'uék'ajiko ch'án kixin sátsjitsjehe sín tí ch'ín Jesús. <sup>3</sup>Ntá sákjuí sín kjuíji sín ntiha ntá kjuanchankíhi sín ch'án ntáchro sín kixin:

—¿Á jaha tí nkexro itsi ní o á naxa tsochónhenni í jnko nkexro? —ichro sín.

<sup>4</sup>A ntá kjuátehe ch'ín Jesús, ntáchro ch'án kixin:

—Sátjirá tjichenkará tí ch'ín Juan tí nkehe k'uíkonrá la ko tí nkehe kuínhínra. <sup>5</sup>Chenkará ch'án kixin tí sín k'uék'íkonhya la ó t'íkon sín jie la tí sín xitjahya k'uékji la ó tji sín la ko tí sín k'uéchóntha chin lepra la ó kótjóá sín kuítóhe sín jína la ko tí sín k'uékienhya la ó tinhin sín jie. Kjaxin tí sín tsík'en na ó xechón sín ínaá la ko kaín tí sín nòa mé síxrakohe sín tí tan jína tsaáxin

sín. <sup>6</sup>Méxra imá náxrjón tí nkexro ko-hya nkehe t'ínkákonhen tinkáchónki tí janhan.

<sup>7</sup>Tió sákjuí sín ntá ch'ín Jesús kjuankíxin nixjehe ch'án tí sín k'uéjé la chrónka ch'án kuènte ch'ín Juan ntáchro ch'án kixin:

—Tí sákjuítsjehérah ch'ín Juan nteje la, ¿nkexrí k'uíkonrá tí jehe ch'án? ¿Á k'uíkonrá ch'án éxí ijnko tji nchexrayehe xrínto? <sup>8</sup>Tí náhi, la ¿nkehe k'uíkonrá? ¿Á k'uíkonrá ch'án éxí ijnko nkexro tsík'itsa jína? Jahará ó nohará kixin chojni tsík'itsa jína la tjejó sín tí nchia kuènte tí sín rey. <sup>9</sup>¿A ntá nkehe k'uíkonrá? ¿Á ijnko nkexro chrónka itén Dios? Jehe chaxín la antsí chóntha ch'án kjuachaxin la tí sín k'uéchrónka itén Dios la kánhyó. <sup>10</sup>Ch'ín Juan mé tí nkexro kui éxí xikaha chrónka xroon itén Dios ósé. Mé ntáchro xíkíhi:

Janhan mé tsochr'an ijnko nkexro tsochrónka itan kuèntana tsítónxin ntia,

kixin tsjasiyóxin ch'án ntia kuénta.<sup>¶</sup> Mé xikaha chrónka itén Dios. <sup>11</sup>Ntá ijnko nkehe chaxín tsotjonkará kixin kaín tí nkexro k'uéjé senó la kánhyó tje-toan sín la antsí tje-toan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxi-én Dios tjen nkaya nkajní la antsí tje-toan sín la ntá jehe ch'ín Juan la kénhyó.

<sup>12</sup>Tí ikui ch'ín Juan Bautista hasta ijie la imá tjanjonxin tí sín tjinkaon ts'íkon sín tí kjuachaxin kuènte nkaya nkajní. La jehó tí sín imá chóntha kjuachaxin mé tsjacha sín. <sup>13</sup>Kaín tí sín profeta la ko tí ley kuènte ch'ín Moisés mé chrónka nkexrí tí kjuachaxin kuènte Dios hasta ikui ch'ín Juan. <sup>14</sup>A ntá tí jahará chrókuítekáoñrá tíhi; kixin ch'ín Juan la mé ikui kixin tí xra kuènte ch'ín Elías tsjintaxín sich'e ch'án kixin ch'ín Elías la t'íchjánxin

<sup>¶</sup>11:10 Malaquías 3.1

chrókui ch'án inaá. <sup>15</sup> Tí nkexro tjinkaon chrókuinhin la chrókuinhin.

<sup>16</sup> ¿Nkexrí chrókuinjuntayóaxian tí chojni tjejó ijie? Tóyóhe sín tí chánjan tjejótxaxin sín ntasin tsítán sín la t'íyeyhe sín kíchó sín <sup>17</sup> ntáchro sín kixin: “K'uánoani flauta kjánchó jahará la tehará. Itsjeni isón kuente chojni tsík'en la ntá k'uaváhyará la ko tsjankahyará.”

<sup>18</sup> Kixin tí ikui ch'ín Juan la kjónehya ch'án la k'uíhya ch'án vino la jahará ntáchrorá kixin ijnko nchakuen tí jínahya mé chóna ch'án. <sup>19</sup> A ntá tió kui tí Xjeen Dios K'óna Chojni ntá kjóne ch'án la ko ik'ui ch'án, ntá ntáchrorá kixin imá itsjé kjóne ch'án la imá ik'ui ch'án la ko imá t'ito ch'án tí chojni chóna jie la ko tí sín nchekjènki, ichrorá. A ntá tí kjuachaxin kuente Dios mé tjakoxin tí xjeen ch'án.

### Tí chjasin titekakonhya

(Lc. 10.13-15)

<sup>20</sup> Ntá ch'ín Jesús mé kjuankixin ch'án ntáche ch'án tí sín tjejó iso tí chjasin imá kjuasixin ch'án kjuaxroan kixin kjónté xikaha la naxa kuinkáchónkihya sín Dios. <sup>21</sup> Ntá ntáchro ch'án kixin:

—Nòará jahará tjejórá chjasin Corazín la ko nòará jahará tjejórá chjasin Betsaida. Tí chrók'uiixin tí kjuaxroan tí chjasin Tiro la ko chjasin Sidón éxi k'uíkonrá jahará ntá tí chrókójehe sín la tjoka chrókjuakoxin sín chrók'uinkáya sín ka tié la ko nteso chrókjuinchek'ia sín asén sín. <sup>22</sup> Ntá ntáxrjan kixin tí yaon tsitoéxin ijie chojni a ntá jahará antsí tsjasótiará, a ntá tí sín chjasin Tiro la ko chjasin Sidón la kénhyó tsjasóte sín. <sup>23</sup> A ntá jahará chojni chjasin Capernaum tjenkayáxinrá kixin imá nohará a ntá sátsjirá nkaya nkajni, ichrorá, kjánchó chaxínhya. Jahará la tsjaskajinxinrá ntilha sátsjirá tsjasótiará tí siín tí sín tsík'en. Tí chrókjuásian tí kjuaxroan tí

chjasin Sodoma éxi kjuásian chjasánrá la tí chjasin la kjá naxa chrók'uiixin sín naxa chrók'uitjáyanhya sín tí yaon ijie kixin tjoka chrókuitekaon sín. <sup>24</sup> A ntá tjonkará kixin tió sinchekitoéxin Dios ijie chojni la antsí tsjasótiará la tí sín chjasin Sodoma la kénhyó tsjasóte sín.

### Xrákirá tí tjén janhan la ts'ok'áhará

(Lc. 10.21-22)

<sup>25</sup> Ntá tí yaon a ch'ín Jesús mé nixjehe ch'án It'é ch'án ntáchro ch'án kixin:

—Tjáncháha kjuasáya It'éni mé Ìnché nkaya nkajni la ko chjasintajni kixin jaha kjuánjonhya kjuachaxin chrók'uitja tí sín imá nohe a ntá kjuánjuan kjuachaxin kixin ts'itja tí sín noehya. <sup>26</sup> Mé xikaha It'éni jaha kóxrjínhan kixin xikaha tsonhen —ichro ch'ín Jesús.

<sup>27</sup> Ntá ntáchro ch'ín Jesús kixin:

—T'aná mé chjina kaín xín nkehe. Kohya ninkexró chaxín chóxin tí Xjeen ch'án. Jehó It'é ch'án mé chóxin ch'án la kohya ninkexró chóxin tí It'é ch'án. Jehó tí Xjeen ch'án mé chóxin ch'án la ko tí sín tsíkjeýá ch'án tsochóxin sín ch'án. <sup>28</sup> Xrákirá kaín rá tí tjén janhan tí jahará imá tsíkóxrjérá kjuich'erá xra la yamará nkehe iye la ntá janhan mé sintak'ok'áhará. <sup>29</sup> Tákjára tí xra kuéntana la ts'itjará kuéntana kixin janhan mé jina asenná la ntahnkehya. Ntaha mé ts'itjará ts'ok'èxin asánrá. <sup>30</sup> Tí xra tsotjahará la xrahya la tí nkehe tsotjahará la yehya.

### Tí sín k'uajiko ch'ín Jesús mé ik'uin sín iso noatrigo ijnko yaon t'ok'éhe tí sín Israel

(Mr. 2.23-28; Lc. 6.1-5)

**12** A ntá ijnko yaon la ch'ín Jesús k'uátsínka ch'án ijnko nonte siín noatrigo tí yaon t'ok'éhe tí sín Israel. Na ntá tí sín xriko ch'án mé tsík'en sín kjinta la ntá kjuankixin sín ik'uin sín iso noatrigo a kixin sine sín. <sup>2</sup> A ntá iso tí sín fariseo k'uíkon sín kixin xikaha kjuich'e



tí sín xriko ch'ín Jesús la ntá ntáchro sín kixin:

—Tsjeheé tí sín xrikoa mé tjejóch'e sín xra tí yaon t'ok'éheni na mé kohya kjuachaxin tsonhen xra tí yaon i —ichro sín.

<sup>3</sup>Ntá kjuátehe ch'ín Jesús kixin:

—Jahará za kjuínchekuáxinhyará tí xroon chrónka nkehe kjuích'e ch'ín David la ko tí sín k'uájiko ch'án tió k'uén sín kjinta? <sup>4</sup>A ntá jehe sín mé k'uixenhen sín tí nchia kuènte Dios la kaín sín kjóne sín tí niotja tsfóyaon kuènte Dios kjónté kohya kjuachaxin sine ch'án ni tí sín k'uájiko ch'án. Jehó síin kjuachaxin sine tí sín nchat'á. <sup>5</sup>Jahará zá nchekuáxinhyará tí xroon tsfjkin ch'ín Moisés ntáchro kixin tí sín nchat'á kuènte nínko mé t'ok'èhya sín tí yaon sábadó la kjónté xikaha la jehya jie tíha? <sup>6</sup>Ntáxrjan kixin itjén janhan la antsí má chonta kjuachaxin la ntá tí nínko la kénhyó. <sup>7</sup>Jahará la tiénxinhyará nkexrí t'axrxjén tí nkehe ntáchro xroon itén Dios. Mé ntáchro kixin: “Janhan Dios tjínkavan kixin chrókuiikonóehérá chojni la tjínkakhya kixin chrók'oyánrá iko chrókjuánjonrá.”<sup>8</sup> Tí chrókuiénxinrá tíha la ntá chrókóninkákuénhyará tí janhan kixin ninkehó jie chontahya. <sup>8</sup>A ntá tí Xjeen Dios K'óna Chojni mé chóna kjuachaxin ts'etoan nkexrí tsonhen tí yaon t'ok'éheni —ichro ch'ín Jesús.

### **Ch'ín Jesús kjuínchekitohe jína ijnko chojni tsíxámá tja**

(Mr. 3.1-6; Lc. 6.6-11)

<sup>9</sup>Ntá ch'ín Jesús mé sákjuixin ch'án ntiha la k'uixenhen ch'án ijnko nínko Israel. <sup>10</sup>Mé ntiha itjen ijnko ch'ín tsíxámá tja. Na ntá tjejóntaxín iso sín fariseo a tjínkaon sín tsjanchia sín jie. La ntá kjuanchankíhi sín ch'án kixin:

—ZÁ síin kjuachaxin sinchekitohe jína ijnko chojni níhi tí yaon t'ok'éheni ní? —ichro sín.

<sup>11</sup>Ntá kjuátehe ch'ín Jesús ntáchro ch'án kixin:

—Jnkójín tí jahará chontará ijnko kolélo chrókjuítsínkáya ijnko tòye tí yaon t'ok'éheni zá chrókjuíhyará chrókuakitsjetaónrá va tòye ní? <sup>12</sup>Kjánchó tí chojni antsí má tjete sínkí a ntá tí kolélo la kénhyó. Méxra jína sich'eni tí xra jína kjónté tí yaon t'ok'éheni.

<sup>13</sup>Méxra nixjehe ch'án tí ch'ín níhi a, ntáchro ch'án kixin:

—Tjéntoá tjá —ichro ch'án.

A ntá tí ch'ín níhi tja kjuentoá tja ch'án la ó kjuixin kuítóhe jína éxí tí í jnko tja ch'án xikaha. <sup>14</sup>Ntá tí sín fariseo kónínkaon sín k'uaxrxjén sín ntiha sákjuí sín la kjuenkayáxin sín nkexrí ts'óyán sín tí ch'ín Jesús.

### **Itén Dios senó chrónka kuènte ch'ín Jesús**

<sup>15</sup>A ntá ch'ín Jesús mé kónohe ch'án kixin xikaha tjenkayáxin sín la ntá sákjuixin ch'án ntiha la itsjé sín chrehe sín ch'án. Kjuínchekitohe ch'án jína kaín tí sijníhi <sup>16</sup>la k'uetoan ch'án kixin tsochrónkahya sín noxín kixin nkexro tí jehe ch'án. <sup>17</sup>Mé xikaha ó xiteyá tí nkehe chrónka ch'ín Isaías, tí nkexro chrónka itén Dios ósé, mé tsíntáchro ch'án xikihi: <sup>18</sup>Ntihi tjen tí nkexro ch'ena xra la janhan mé kjuéyá ch'án, janhan tjuaha ch'án la chàna kixin itjen ch'án.

Tsotjaha ch'án tí nchakuenná la jehe ch'án mé tsochrónka ch'án nkexrí sintakitoaxián ijje chojni chjasintajni.

<sup>19</sup>Tsonínkakuénhya ch'án chojni la chjíníhya ts'óyako ch'án,

la ko kohya nkexro tsinhin itén ch'an tí ntja.

<sup>20</sup> Ts'óchjenjinhya ch'án kjónté itji tsíxréya,

la ts'ók'ankahya ch'án kjónté ijnko nkehe síhnhikoá.

Jehe ch'án naxa sich'e ch'án xra tsjixrakájjia tí yaon ts'etoan ch'án.

<sup>21</sup> La kaín xín chojni chjasintajni mé tsitekaon sín tí jehe ch'án.\*

Mé xikaha chrónka itén Dios ósé.

**Tí sín fariseo mé ntáchro sín kixin ch'ín Tsochren t'etuenhen asén tí ch'ín Jesús**

(Mr. 3.19-30; Lc. 11.14-23; 12.10)

<sup>22</sup> Ntá iso chojni sákjuíkohe sín ch'ín Jesús ijnko ch'ín t'ikonhya la ko nixjahya kixin chóna ch'án nchakuen tí jínahya. A ntá ch'ín Jesús mé kjuínchekitöhe ch'án jína la ntá jína nixja ch'án la ko jína t'ikon ch'án. <sup>23</sup> Ntá kaín xín chojni la chrakon sín la tjanchankíhi kichó sín ntáchro sín kixin:

—¿Á jehya xjeen David tíhi? —ichro sín.

<sup>24</sup> Ntá kuínhin tí sín fariseo la ntáchro sín kixin:

—Tí ch'ín a takitsje ch'án nchakuen tí jínahya kixin chóna ch'án tí kjuachaxin kuènte ch'ín Beelzebú, mé tí ch'ín mé Tsochren t'etuenhen kaín tí nchakuen tí jínahya.

<sup>25</sup> Ntá ó kónohe ch'ín Jesús tí nkehe tjenkayáxin sín ntá ntáchro ch'án kixin:

—Jnkojín gobierno jnkokoáhya tjenkayáxin sín ntá tjanjonko kichó sín na mé ts'itjáyán tí kjuachaxin ts'etoanxín sín, la ko kjaxin tí sín jnkokoá chjasin o tí sín jnkokoá nchia jnkokónhya tjenkayáxin sín la kjaxin xikaha ts'itjáyán sín. <sup>26</sup> A ntá tí chaxín ch'ín Tsochren chrókuakitsjexín asén ntihi kja í chróchóntahya kjuachaxin

naxa chrók'uetqan. <sup>27</sup> Jahará ntáchrorá kixin janhan kuakítsjexián tí nchakuen tí jínahya kjuachaxin kuènte ch'ín Beelzebú. A ntá tí chaxín xikaha la ntá nkexro chjéhe kjuachaxin tí sín chréhe tí jahará kixin tjacha sín takitsje sín nchakuen tí jínahya? Jehe sín mé tjakoxin sín kixin ntoáhya tjenkayáxinrá. <sup>28</sup> A ntá janhan mé kuakítsjexián tí nchakuen tí jínahya kjuachaxin kuènte Nchakuen Dios la tíha mé chrókónoaxínrá kixin tí kjuachaxián Dios mé ó kui tí tjejorá.

<sup>29</sup> ¿Nkexrí chrók'uixenhen ijnko nkexro ijnko ntqe ijnko ch'ín jiehe la chrókuakitsjehe ch'án tí nkehe chóna ch'án? Senó la chrókónteto ch'án kixin jína chrókueéhe sín ch'án.

<sup>30</sup> Tí nkexro titekakonhya tí janhan la mé nínkakonna sín. A ntá tí nkexro tjinkakonhya tí janhan mé t'inkákonhen tí xra it'a.

<sup>31</sup> Méxra xrxanka kixin Dios tsjakjiiin jnkojnko jie tjasin chojni la ko kaín nkehe jínahya nixja sín. A ntá tí t'ántaxínhin sín Nchakuen Dios la xitjahya tsjiiin ijje sín. <sup>32</sup> La ko xrxanka kixin kaín nkehe t'ántaxínhínrá tí Xjeen Dios K'óna Chojni la tsjakjiiin Dios. A ntá tí ts'ántaxínhínrá Nchakuen Dios la ntá mé í tsjiiinhya tí ijjará kjónté ntihi chjasintajni la ko kjónté tí chr'éxin.

**Tí nta chrókjuatsqanxín sín tí to jína**

(Lc. 6.43-45)

<sup>33</sup> Tí nta tsík'ánkí jína la t'óna to jína la tí nta tsík'ánkíhya jína la t'ónahya to jína. Méxra tí nta mé chrókjuatsqanxínni tí to a. <sup>34</sup> Jahará tsík'axrjeníxinrá konche. ¿Nkexrí jína chróntáchrorá jahará tí jehya jínará? Tí nixja ir'vará la éxí ntáchro asánrá mé nixja ir'vará. <sup>35</sup> Ijnko chojni jína mé jína nixja kixin jína asén ch'án. A ntá ijnko

\* 12:21 12.18–21 Isaías 42.1-4

chojni jínahya mé nixja tí nkehe jínahya kixin tí asén ch'án kjaxin jínahya. <sup>36</sup>Ntá tjonkará kixin itsi tí yaon tsjixixín tió sinchekitoexín Dios ijíé chojni ntá tsonohará kaín nkehe chjíní tsínixjará. <sup>37</sup>Kixin tí nkehe nixjará tsjakoxin á kjuásinrá jie ní o náhí.

**Tí sín jehya jína tjanchehe sín ch'ín Jesús kixin tsjakoxin ch'án ijnko kjuaxroan jie**

(Mr. 8.12; Lc. 11.29-32)

<sup>38</sup>Ntá iso tí sín fariseo la ko tí sín maestro tjako tí ley mé nixjehe sín ch'ín Jesús ntáchro sín kixin:

—Maestro, tjinkaonni chrók'uikonni chrókjuásian ijnko kjuaxroan náxrjón tsonoexínni kixin nkexro jaha —ichro sín.

<sup>39</sup>Ntá kjuátehe ch'ín Jesús ntáchro ch'án kixin:

—Tí sín jínahya la ko tí sín kuítóhe Dios mé tjanchia sín chrókjuásian kjuaxroan náxrjón. Kjánchó tsjakoxinhya í jnko kjuaxroan la jehó tí kjuaxroan kónhen ch'ín Jonás, tí nkexro k'uéchrónka itén Dios ósé. <sup>40</sup>Éxí yóhe kjuák'e ch'ín Jonás iní yaon la iní tie nkaxenhen tsee koche jie mé xikaha tí Xjeen Dios K'óna Chojni tsjak'e nkaxenhen tòye tosxravá iní yaon la iní tie. <sup>41</sup>Á ntá tí yaon tsitoexín ijíé chojni la ntá tí sín chjasin Nínive mé tsjanchia sín jie kixin tí sín tjejó jie, kixin tí sín chjasin Nínive mé kuítóhe sín ijíé sín tió kuínhin sín itén Dios chrónka ch'ín Jonás. Á ntá ijie itjén janhan la antsí má chonta kjuachaxin. Á ntá tí ch'ín Jonás la kénhyó k'uéchóna ch'án kjuachaxin, kjánchó jahará kuitekákonhyará tí janhan. <sup>42</sup>Kjaxin tí yaon tsitoexín ijíé chojni la tí tjan reina k'uetōan kjuixin nó Sur mé tsjanchia tjan jie kixin tí sín tjejó ijie kixin jehe tjan kjuixin imá ikjín kixin chrókuinhin tjan tí kjuaxrexinkaon jína k'uékjako ch'ín Salomón. Á ntá ijie

itjén janhan la janhan antsí má nòna á ntá ch'ín Salomón la kénhyó k'uénohe ch'án.

**Tió tsokjan tí nchakuen tí jínahya**

(Lc. 11.24-26)

<sup>43</sup>Á ntá ijnko nchakuen tí jínahya tsík'axrjexín ijnko chojni la mé ixri tí nonte xamá xritjeyá nketí náxrjón ts'ok'éhe. Á ntá k'uitjahya nketí náxrjón ts'ok'éhe. <sup>44</sup>La ntá kjuenkayáxin kixin: “Áxri tsokjan ntōna k'uaxrjéxian”, ichro. Á ntá tió ikjan tí nchakuen la t'ikon éxí ijnko nchia kohya ninxeró la éxí ijnko chojni tsík'ánjón ntōe la náxrjón tsjehe tí nkaxenhen nchia. <sup>45</sup>Á ntá k'uifkon tí jínahya xikaha tjen nchia la ntá sákjuikakjín í jnko yato nchakuen tí jínahya antsí má jínahya. Á ntá kaín k'uixenhen tí ntiha. Á ntá antsí má jínahya kónhen tí ch'ín a, á ntá tí senó la kénhyó. Mé xikaha tsonhen kaín tí sín sín ijie titekakonhya.

**Tí iné la ko kichó ch'ín Jesús**

(Mr. 3.31-35; Lc. 8.19-21)

<sup>46</sup>Ntá ch'ín Jesús naxa tjenixjehe ch'án chojni la ntá xrinahya kjuíji iné ch'án la ko kichó ch'án. Ntá kuítóhe sín ntója ó la tjinkaon sín chrónixjehe sín ch'ín Jesús. <sup>47</sup>Ntá ijnko nkexro ntiha sákjuíchéinka tí ch'ín Jesús, ntáchro ch'án kixin:

—Iná la ko kichua tjejó sín ntója la tjinkaon sín chrónixjaha sín tí jaha.

<sup>48</sup>Á ntá ch'ín Jesús kjuátehe ch'án nixjehe ch'án tí nkexro chrónka a, ntáchro ch'án kixin:

—¿Xá nkexro tí naná la ko nkexro tí kichiná? —ichro ch'án.

<sup>49</sup>Ntá kjuakoxin tja ch'án tí sín xriko ch'án la ntáchro ch'án kixin:

—Tí sín i la mé naná la ko kichiná. <sup>50</sup>Tí jnkojín sín i nchexitjeyá nkehe tjinkaon T'aná tjen nkaya nkajní na mé

táha mé naná la ko kichiná mé xikaha t'íkuan tí jehe sín —ichro ch'án.

**Ch'ín Jesús mé kjuíncheyóexin ch'án éxí ijnko chojni t'enka nontee**

(Mr. 4.1-9; Lc. 8.4-8)

**13** **A** ntá tí yaon a ntá ch'ín Jesús k'uaxrjexín ch'án nchia la sákjuí ch'án kjuák'etjaxín ch'án chrínta ntayaon. <sup>2</sup>Ntá k'uixikóchjina nchónhya chojni tí tjen ch'án la ntá jehe ch'án mé k'uit'ótjen ch'án ijnko ntabárco kjuák'etjaxín ch'án la kaín sín na tí chrínta ntá ó kuítóhe sín. <sup>3</sup>**A** ntá nchónhya nkehe kjuako ch'án kjuíncheyóexin ch'án, ntáchro ch'án kixin:

—Éxí ijnko ch'ín sákjuík'enka nontee <sup>4</sup>mé xikaha sákjuík'enka ch'án iso tí noatriga a. Ntá iso noa la tsík'ánótjen ntja ntá ikui koxroxé k'uínka va noa. <sup>5</sup>**A** ntá iso noa na mé k'uit'í chrík'á xro tí kohya itsjé nche ntá tjoka k'uayan kixin ntaha tjínhya chóntha nche. <sup>6</sup>Ntá tí kjuíton yaon la ntá tí ka la xamá kixin nínkahya chóntha nuèe. <sup>7</sup>**A** ntá í so noa kjuítsínkak'á tí síin kach'í na k'uánkí tí kach'í a na ntá í xitjahya k'uánkí tí noatriga a kixin tsíkjatae tí kach'í. <sup>8</sup>**A** ntá tí noa tsík'itjé nche jína na ntá tió k'uánkí la mé k'óna jína. Iso tí no na jnkokoá noatje mé k'óna ciento neno noa, a ntá í jnko mé k'óna sesenta neno noa, a ntá í jnko mé k'óna treinta. <sup>9</sup>Tí nkexro tjínkaon chrókuinhin la chrókuinhin —ichro ch'ín Jesús.

**Nkekuènté kjuíncheyóexin ch'ín Jesús**

(Mr. 4.10-12; Lc. 8.9-10)

<sup>10</sup>Ntá iso tí sín k'uájiko ch'ín Jesús mé kóchjinehe ch'án sín la ntá kjuanchankíhi sín kixin:

—¿Nkekuènté xikaha nixjehé sín ncheyóexián? —ichro sín.

<sup>11</sup>**A** ntá ch'ín Jesús kjuátehe ch'án ntáchro ch'án kixin:

—Jahará la Dios me tsjinkítsa tsonohará tí nkehe noehya í so chojni kuènte tí kjuachaxin kuènte Dios. **A** ntá tí jehe sín a la náhi. <sup>12</sup>Tí nkexro ó chóntha nkehe la antsí ts'áyéhe sín kixin antsí má tsochóntha sín. **A** ntá tí nkexro chónthaha la kjónté tí ntsí chóntha sín la ts'axrjehe sín. <sup>13</sup>Mé xikaha kjuíntayoáxuán kjuákuaxian sín kixin jehe sín t'ikon sín la ntá kjónté tjátsqanhya sín la tjejótin-hin sín a ntá kjónté kienxínhya sín. <sup>14</sup>Mé xikaha ó xiteyá tí nkehe k'uéchrónka ch'ín Isaías tí nkexro k'uéchrónka itén Dios, mé ntáchro ch'án xikihi:

Jehe sín tsinhin sín a ntá tsiénxínhya sín la ts'ikon sín la tsjatsqanhya sín tí nkehe ts'ikon sín.

<sup>15</sup>Imá icha asén tí sín chjasin i.

Chóntha sín ntatsjon kjánchó ts'íkjehe la chóntha sín ikon sín kjánchó t'ikonhya sín,

kixin chrók'uikonhya sín

la chrókuienhya sín la ko

xitjahya kíenxín sín,

kixin í tjinkakonhya sín chrókjan sín kixin janhan mé chrókjuíntakitoha sín jína.<sup>†</sup>

Mé xikaha tsíkjin ch'ín Isaías.

<sup>16</sup>Ntá ntáchro ch'ín Jesús inaá kixin:

—**A** ntá jahará la imá náxrjón tjejorá kixin t'ikonrá la ko tinhíná. <sup>17</sup>Chaxín xrjanka kixin itsjé tí sín k'uéchrónka itén Dios la ko tí sín jína mé k'uétjinkaon sín chrók'uikon sín tí nkehe t'ikonrá la ntá k'uíkonhya sín la ko k'uétjinkaon sín chrókuinhin sín tí nkehe tjejotinhíná la ntá kuíenhya sín.

<sup>†</sup>13:15 13.14–15 Isaías 6.9–10

**Ch'ín Jesús chrónkaxín nkexrí  
t'axrjexín tí nkexro sákjuík'enka**

(Mr. 4.13-20; Lc. 8.11-15)

<sup>18</sup> Tínhínrá nkexrí t'axrjexín tí ch'ín sákjuík'enka nontee. <sup>19</sup> Tí nkexro kuínhin tí itén Dios chrónka nkexrí tí kjuachaxin kuènte Dios la ntá kíenxín-hya sín la yóhe tí noa xènjintja ntia. Ó kui ch'ín Tsochren ntá kjuínchek'itjáyán ch'án tí itan jína kuínhin sín. <sup>20</sup> A ntá tí tje kjuítsínkak'á xro la mé t'axrjexín kíxín tí chojni kuínhin itén Dios la tjoka kóxrjínhin sín la kuínkáchónki sín. <sup>21</sup> Kjánchó nínkahya chóna nuèe na ntá itsi tí kjuaxróxinhya o tsochónkíhi sín chojni chrók'óyán sín kíxín tí itén Dios kuítekaon sín, a ntá tsítóhe sín tí tinkáchónki sín Dios. <sup>22</sup> A ntá tí tje kjuítsínkak'á kach'i na mé éxi yóhe ijnko chojni kuínhin itan jína kjánchó tjitoxienhya ntje sín kíxín tóxakonhen sín tí xra chóna sín chjasintajni la ko tjinkaon sín tsochóna sín itsjé nkehe. Kaín tíha mé t'ínkákonhen tí itén Dios kuínhin sín la ntá xikaha xitjahya sich'ehe sín xra Dios. <sup>23</sup> A ntá tí tje k'uínka tí nonte chóna nche jína na mé yóhe tí chojni kuínhin tí itén Dios na ko kíenxín sín la ntá xikaha jína ch'ehe sín Dios xra. Na iso sín la yóhe éxi tí tje k'óna ijnko ciento neno noa la iso sín la yóhe tí k'óna sesenta neno noa la iso sín la yóhe tí k'óna treinta neno noa —mé xikaha chrónka ch'ín Jesús.

**Ch'ín Jesús kjuíncheyóexin ch'án éxi  
tí kajnto k'uánkíkué tí noatrigo**

<sup>24</sup> Ntá ch'ín Jesús kjuíncheyóexin ch'án inaá ntáchro ch'án kíxín:

—Tí kjuachaxin kuènte Dios mé yóhe ijnko ch'ín k'uenka noa jína nontee ch'án. <sup>25</sup> A ntá tió k'uejójua kaín sín ntá ikui ijnko nkexro nínkakonhen sín la k'uenka ch'án kajnto chrík'á tí noa a la ntá sákjuí ch'án. <sup>26</sup> La ntá tí noa-

trigo k'uánkí la ntá ó sítintaa la ntá ntiha kjaxin kónoxíxin k'uánkí tí kajnto. <sup>27</sup> Ntá tí sín ch'e xra mé sákjuínixjehe sín tí lámoe sín la ntáchro sín kíxín: “Tí noa k'uènká nontaa la noa jína tíha. A ntá ¿nketí kjuixín tí kajnto tsík'ayan?” ichro sín kjuanchankí sín. <sup>28</sup> Ntá kjuátehe tí ìnché tí nonte ntáchro kíxín: “Kjá ijnko nkexro nínkakonna mé kjuích'e xikaha”, ichro ch'án. Ntá tí sín ch'e xra mé kjuanchankí sín kíxín: “¿Á tjínkáván kíxín sátsjini tsakítsjenkíni tí kajnto?” ichro sín. <sup>29</sup> A ntá kjuátehe ch'án kíxín: “Náhi. Tí sátsjia tsakítsjenkiá tí kajnto la kjá chóna tí katrigo ts'axrjenkí. <sup>30</sup> Íchá jína títóhé kíxín ts'ánkíkué tsjixin tsotjájiani. Ntá ts'etuenhenni tí sín tsotjá kíxín senó ts'ejo sín tí kajnto la sinchenteto sín kíxín tsoche la ntá chr'éxin tsotjá sín tí noatrigo ntá ts'inkachjina tí noa a” —mé xikaha chrónka ch'ín Jesús.

**Ch'ín Jesús kjuíncheyóexin ch'án éxi  
tí xroan ijnko ntayoa it'in mostaza**

(Mr. 4.30-32; Lc. 13.18-19)

<sup>31</sup> Ntá ch'ín Jesús kjaxin kjuíncheyóexin inaá ntáchro ch'án kíxín:

—Tí kjuachaxin kuènte Dios mé éxi yóhe ijnko tje mostaza k'uenka ijnko chojni nontee ch'án. <sup>32</sup> Tí tje a mé antsí má ntsí la ntá tí í so tje la kánhyó, a ntá chr'éxin ntá ts'ayan tí nta mostaza la ts'ánkí ijnko nta imá jíe la tí í so nta la kánhyó. Ntá koxroxé xritjaká mé itsi va sich'éna va kaké va tí chrík'á tí chaon nta.

**Ch'ín Jesús kjuíncheyóexin ch'án  
éxi tí xroan t'ánkíxín niotja**

(Lc. 13.20-21)

<sup>33</sup> Kjaxin kjuíncheyóexin ch'án tíhi mé ntáchro ch'án kíxín:

—Tí kjuachaxin kuènte Dios mé éxi yóhe tí xroan t'ánkíxín niotja. Kjuínkík-

janxin ijnko chojni chjin iní medida harina ntá tí ch'o mé k'uánkí.

**Tí nkehe kjuíncheyóëxin  
ch'ín Jesús tí nixja ch'án**

(Mr. 4.33-34)

<sup>34</sup> Ch'ín Jesús kjuakohe ch'án tí chojni la kjuíncheyóëxón ch'án la nixjahya ch'án ninkehó tí kohya nkehe chrókjuíncheyóëxin ch'án. <sup>35</sup> Mé xikaha kjuako ch'án kixin tsoxiteyá tí nkehe tsíchronka ijnko nkexro k'uéchrónka itén Dios ntáchro xikihi:

Mé tsoníxjaxian sintayóaxión nkehe tsonáxrjan tí nkehe ninkexró noehya desde k'óna chjasintajni.<sup>‡</sup>

**Ch'ín Jesús chrónkaxín ch'án nkexrí  
t'axrjexín tí kjuíncheyóëxin  
ch'án tí kajnto la ko tí notrigo**

<sup>36</sup> Ntá kjuixin nixjehe ch'ín Jesús tí sín a ntá sákjuí sín kaín sín la jehe ch'án k'uixenhen ch'án nchia. Ntá kóchjina tí sín k'uájiko ch'án la ntáchro sín kixin:

—Chronkaxián nkexrí t'axrjexín tí kajnto k'uánkíkué tí noa trigo tí nonte —ichro sín.

<sup>37</sup> Ntá ch'ín Jesús kjuátehe ch'án ntáchro ch'án kixin:

—Tí nkexro k'uenká tí noa jína mé tí Xjeen Dios K'óna Chojni. <sup>38</sup> A ntá tí nonte mé chjasintajni tíha. Tí noa jína mé éxi yóhe tí chojni kuákja kjuachaxin kuènte Dios. La ntá tí kajnto mé éxi yóhe tí chojni t'etuènhen Tsochren. <sup>39</sup> Tí nkexro nínkakonhenni mé k'uenká tí kajnto mé Tsochren tíha. A ntá tí tsotjá sín la mé tsjeje chjasintajni. A ntá tí sín tsotjá la mé tí sín ángel. <sup>40</sup> Éxi xrenájín tí kajnto la tsoche mé xikaha tsonhen tió tsjixixín tsjeje chjasintajni. <sup>41</sup> Tí Xjeen Dios K'óna Chojni mé tsetuènhen tí sín ángel kixin tsakitsjexín sín tí tjet'etóan Dios kaín tí chojni tjachroe í so cho-

jni la ko tí sín ch'e tí nkehe jínahya. <sup>42</sup> La tsochr'án sín sátsji sín tí tja síin xrohi la ntaha tsotsjánka sín la sinetaón neno sín. <sup>43</sup> Ntá kaín sín tí sín nchexiteyá tí nkehe tjinkaon Dios mé éxi tí yaon xikaha tsotsjehe sín tí tjet'etóan It'eni Dios. Tí nkexro tjinkaon chrókuinhin la chrókuinhin —mé xikaha ichro ch'ín Jesús.

**Ch'ín Jesús kjuíncheyóëxin ch'án  
éxi ijnko nkehe tjete tjemá**

<sup>44</sup> Tí kjuachaxin kuènte Dios mé éxi yóhe ijnko nkehe tjete tjemá ijnko nonte. Ijnko chojni k'uitja ch'án tí nkehe tjete la ntá kjuak'emá ch'án inaá ntahó. Ntá chéhe ch'án sákjuí ch'án la kjuínchekji ch'án kaín nkehe chóna ch'án la ntá ikjan ch'án la k'uena ch'án tí nonte a.

**Ch'ín Jesús kjuíncheyóëxin éxi  
ijnko xro perla tjete**

<sup>45</sup> Ntá ntáchro ch'ín Jesús kixin:

—Kjaxin tí kjuachaxin kuènte Dios mé éxi yóhe ijnko nkexro tjejá xro perla náxrjón. <sup>46</sup> Ntá tió ts'titja ch'án ijnko xro imá tjete la ntá sátsji ch'án sinchekji ch'án kaín nkehe chóna ch'án kixin ts'ena ch'án tí xro perla.

**Ch'ín Jesús kjuíncheyóëxin éxi  
ijnko nchísén tséya sín koche**

<sup>47</sup> Ntáchro ch'ín Jesús kixin:

—Kjaxin tí kjuachaxin kuènte Dios mé éxi yóhe ijnko nchísén tséya chojni koche t'enkí sín tí ntayaon la ntá tsotsé nchónhya clase koche. <sup>48</sup> Ntá tió tsíkaón koche tí nchísén tséya sín va la ntá tsakitsjenkí sín la tsjak'e sín chrínta ntá la ntaha ts'ejótjaxin sín la tsíchéhe sín koche jína la t'enká sín ntaxra. La ntá tí jehya koche jína la it'e sín. <sup>49</sup> Mé xikaha tsonhen tió tsjeje chjasintajni. Sátsji tí sín ángel la tsakitsjekjan sín cho-

<sup>‡</sup>13:35 Salmo 78.2

jni jínahya la tsitqhe tí chojni jína. <sup>50</sup>La tsochr'án sín tí sín jínahya sátsji sín tí tjen tja tí síin xrohi la ntaha tsotsjánka sín la ko sinetaón neno sín.

**Tí nkehe tjete nixin la  
tí nkehe tjete ntaxin**

<sup>51</sup>Ntá ch'ín Jesús mé kjuanchankí ch'án kixin:

—¿Á tiénxinrá jahará kaín tí nkehe ní?  
—ichro ch'án.

Ntá kjuátehe sín kixin:

—Jeén, Ìnchéni, ó kíenxínni —ichro sín.

<sup>52</sup>Ntá ntáchro ch'ín Jesús kixin:

—Ijnko maestro nohe tí nkehe kuènte ley la ntá ó nohe ch'án kuènte tí kjuachaxin kuènte Dios la jehe ch'án la éxí yóhe ijnko ìnché nchia chóna it-sjé nkehe tjete tjejóhchina la ntá nohe ch'án tsakitsje tí nkehe tjete nixin la tí nkehe tjete ntaxin —mé xikaha ichro ch'ín Jesús.

**Ch'ín Jesús kjuák'e  
ch'án chjasin Nazaret**

(Mr. 6.1-6; Lc. 4.16-30)

<sup>53</sup>Ntá kjuixin nixja ch'ín Jesús kjuíncheyóëxin ch'án tíha na ntá sákjuíxin ch'án ntiha. <sup>54</sup>La ntá sákjuí ch'án chjasén ch'án Nazaret. Ntaha kjuankíxin kjuakoxin ch'án tí ninko Israel. Ntá itsjé sín la kóxakonhen sín kuínhin sín tí tjako ch'án la ntáchro sín kixin:

—Tí ch'ín i la, ¿nketí tsíxraqhe ch'án kixin imá nohe ch'án la ko nkexrí kixin tjasin ch'án kjuaxroan? <sup>55</sup>¿Á jehya tíhi xjeen tí ch'ín carpintero la ìné ch'án mé María? La ko chóxinni tí kichó ch'án a mé ch'ín Jacobo la ko ch'ín José la ko ch'ín Simón la ko ch'ín Judas. <sup>56</sup>Kjaxin tí sín chjin kichó ch'án na ntihi tjejó sín. Méxra ¿nkexrí nohe ch'án kaín tí nkehe? —ichro sín.

<sup>57</sup>Mé xikaha chrohya sín tsitekakonhen sín ch'án. Ntá ntáchro ch'ín Jesús kixin:

—Nkuíxin tjikosáyehe chojni ijnko nkexro chrónka itén Dios. <sup>A</sup> ntá tí sín chjasén ch'án la ko kaín tí sín ntqe ch'án mé tjikosáyeheya sín ch'án —ichro ch'án.

<sup>58</sup><sup>A</sup> ntá tsjéhya kjuaxroan kjuasin ch'án ntiha kixin kuítekakuenhya sín ch'án.

**Ik'uén ch'ín Juan Bautista**

(Mr. 6.14-29; Lc. 9.7-9)

**14** <sup>A</sup> ntá tí yaon a ntá tí ch'ín Herodes mé tí nkexro k'uetqan tí estado Galilea mé kuínhin ch'án nkexrí ichro ch'ín Jesús. <sup>2</sup>Ntá nixjehe ch'án tí sín ch'ehe ch'án xra, ntáchro ch'án kixin:

—Kjá tíha la ch'ín Juan Bautista ó tsíxechón ch'án inaá. Mé xikaha chóna ch'án kjuachaxin tjasin ch'án kjuaxroan —ichro ch'ín Herodes.

<sup>3</sup>Méxra tí ch'ín Herodes mé tsík'etqan kixin ch'ín Juan tsontetoxín cadena la ko tsjak'echjina ch'án. Mé xikaha kjuích'e ch'án kixin xikaha tsíkjanchia tí tjan Herodías, tí tjan ichjién tí ch'ín Felipe, kichó ch'án. <sup>4</sup>Tí ch'ín Juan tsíntáche ch'án tí ch'ín Herodes kixin:

—Jehya jína tsochonta tí ichjién tí kichuá —mé xikaha tsíntáchro ch'án.

<sup>5</sup>Ntá ch'ín Herodes tjinkaon ch'án chrók'óyán ch'án tí ch'ín Juan kjánchó chrakonhen ch'án tí chojni kixin kaín sín ntáchro sín kixin ch'ín Juan mé nixja itén Dios, ichro sín. <sup>6</sup>A ntá tí yaon kia tsíkjitoxinhin nánó ch'ín Herodes la tí xjeen tjan Herodías mé ité tjan tí tjejó tí chojni tsík'íyehé ch'án. <sup>A</sup> ntá imá kóxr-jínhin ch'ín Herodes nkexrí ité tjan. <sup>7</sup>La ntá nixjehe ch'án tjan k'uákjenxin ch'án ihnié Dios ntáchro ch'án kixin tsochjéhe ch'án tjan kjónté jnkójn nkehe tsjanchia tjan, ichro ch'án. <sup>8</sup>Ntá jehe tjan la senó kjuíkjanchankíhi tjan ìné tjan ntá ìné tjan tsíntachro kixin ikja ch'ín Juan mé

tsjanchia tjan ntá jehe tjan mé nixjehe tjan tí ch'ín Herodes inaá ntáchro tjan kixin:

—Chjehéni ijnko plato tsjak'enkáya kja ch'ín Juan Bautista —ichro tjan kjuanchia tjan.

<sup>9</sup>Na ntá ch'ín Herodes la mé imá k'uává ch'án kixin xikaha kjuanchia tjan. Na ntá kaín tí sín síin ntiha ó kuínhin sín kixin kjuínchenohe ch'án Dios kixin ichrén nkehe tsjanchia tjan tsjanjon ch'án. <sup>10</sup>Méxra k'uetōan ch'án kixin ts'óchrínjin sín ikja ch'ín Juan tí tjen ch'án ntoechiso. <sup>11</sup>Ntá kjuikao sín kjuikoyá sín tí kja ch'ín Juan ijnko plato la chjéhe sín tí tjan tjarisoá ntá jehe tjan la sákjuíkénhen tjan iné tjan.

<sup>12</sup>Ntá tí sín k'uék'ajiko ch'án a mé sákjuíkakitsje sín tí cuérpoé ch'án la sákjuíkjává sín. La ntá chr'exín la sákjuí sín sákjuíchénka sín tí ch'ín Jesús kixin xikaha tsíkónhen ntiha.

### **Ch'ín Jesús kjuínchekjine ch'án in'ó mil chojni**

(Mr. 6.30-44; Lc. 9.10-17; Jn. 6.1-14)

<sup>13</sup>Ntá tí kuínhin ch'ín Jesús kixin xikaha tsíkónhen la ntá jehó ch'án sákjuí ch'án k'uit'ótjen ch'án ijnko ntabáro la sákjuí ch'án ijnko nonte ninkexró tjiya. A ntá kaín tí chojni la kuínhin sín nketí tjen ch'án la ntá k'uaxrjexín sín chjasén sín la ntá totó sín sákjuíchréhe sín ch'án.

<sup>14</sup>A ntá k'uaxrjexín ch'ín Jesús tí ntabáro a, a ntá k'uúkon ch'án kixin nchónhya chojni síin ntiha ntá kuikonóehé ch'án tí jehe sín na ntá kjuínchekitōhe ch'án jina tí sín níhi tsíkjikao sín. <sup>15</sup>La ntá ó k'uúxin tie na ntá tí sín k'uájiko ch'ín Jesús a mé kóchjinehe sín ch'án, ntáchro sín kixin:

—Ntá ó kóntó la kohya nkexro tjejó ntihi. Na ntá jaha chrókuétuénhen sín kixin sátsji sín tí chjasin ntsí chjinaxón tsjik'ena sín nkehe sine sín —ichro sín.

<sup>16</sup>Ntá kjuátehe ch'ín Jesús, ntáchro ch'án kixin:

—T'ichjánxinha sátsji sín. Chjehérá sín nkehe sine sín —ichro ch'án.

<sup>17</sup>Ntá kjuátehe sín kixin:

—Chóntahyani itsjé nkehe. Jehó in'ó niotja la ko yaá koche chóntani —ichro sín.

<sup>18</sup>Ntá ntáchro ch'ín Jesús kixin:

—Xrakoanará tí nkehe méhe ntihi —ichro ch'án.

<sup>19</sup>Ntá k'uetōan ch'án kixin kaín xín sín ts'ixitjajín sín tí chrítaón kaxi a. Ntá kuákja ch'án tí in'ó niotja la ko tí yaá koche ntá konta ch'án nkajní la kjuanchehe ch'án kjuasáyé Dios. Ntá kóchrít'ó ch'án tí niotja chjéhe ch'án tí sín k'uájiko ch'án la jehe sín mé k'óxikayehe sín chjéhe sín tí chojni síin a. <sup>20</sup>Ntá kaín sín kjuixin kjóne sín kókjehe sín. Ntá kjuixin ntá tí sín k'uájiko ch'ín Jesús kjuenájín kaín tí nkehe síxéhe sín la mé teyó ntaxra kaón.

<sup>21</sup>Na mé in'ó mil chojni ntoa kjóne sín, la tí chojni chjin la ko chánjan la kuákjahya sín cuenta nkekjaín tí sín a.

### **Ch'ín Jesús mé tjetjitaón ch'án nta**

(Mr. 6.45-52; Jn. 6.16-21)

<sup>22</sup>Ntá kjuixin tíha ntá k'uetuénhen ch'ín Jesús tí sín k'uájiko ch'án kixin ts'it'ótjen sín tí ntabáro ts'atōye sín í jnko nánko ntayaon. Ntá jehe ch'án naxa kuftōhe ch'án nixjehe ch'án tí sín síin ntiha. <sup>23</sup>Ntá kjuixin xíkayehe sín na ntá jehó ch'án chrín ch'án ijnko jna tsonixjehe ch'án It'é ch'án tjen nkaya nkajní. Na ntá ó k'uúxin tie la jehó ch'ín Jesús itjen ch'án ntiha. <sup>24</sup>La ntá tí ntabáro na mé tjenkátaón nta jnkosiné ntayaon. Ntá imá chjéhe nta tí ntabáro kixin tí xrintō la chjéhe la xitjahya sátsji ntabáro. <sup>25</sup>Na ntá las tres nantōye a mé sákjuíchréhe ch'án sín. Totó ch'án mé sákjuítónxin ch'án tí ntayaon la ntá kóchjinehe ch'án tí tjejó sín. <sup>26</sup>Na ntá tí sín k'uájiko ch'án mé k'uúkon sín kixin tjetjitaón ch'án tí ntayaon na ntá



imá chrakon sín la k'óyako sín. Ntáchro sín kixin kjuacha sín ichro sín, chrakon sín.

<sup>27</sup> Na ntá nixjehe ch'ín Jesús tí jehe sín ntá ntáchro ch'án kixin:

—Nchefeúrte asánrá, chrakonhyará. Janhan kjuihá —ichro ch'án.

<sup>28</sup> Ntá ch'ín Pedro mé nixjehe ch'án Ìnchéni, ntáchro ch'án kixin:

—Ìnchéni tí chaxín jaha la ntá chrókjuánjuan kjuachaxin chrókjuitaónni tí ntá tsjijini tí tjen jaha —ichro ch'án.

<sup>29</sup> Ntá ntáchro ch'ín Jesús kixin:

—Xrákiá.

Ntá k'uínkajinxin ch'ín Pedro tí ntabáro la kjuankixin ch'án tjetjitaón ch'án ntá sákjuíchréhe ch'án tí tjen ch'ín Jesús. <sup>30</sup> A ntá xrínahya ntá kónohe ch'án kixin imá chjéhe xrinto chrítaón ntá, ntá chrakon ch'án la kjuankixin tinkák'aniánkí ch'án ntá, ntá k'uèya ch'án ntáchro ch'án kixin:

—Ìnchéni, nchekaáni —ichro ch'án.

<sup>31</sup> A ntá tuénxín ch'ín Jesús mé itsé ch'án tja ch'ín Pedro la ntáchro ch'án kixin:

—Intsíkoá tinkachónkia tí janhan. ¿Nkekuènté títékákonhya? —ichro ch'án.

<sup>32</sup> Na ntá tió k'uit'ótjen sín yóí sín tí ntabáro la ntá tuénxín k'uíxratá tí xrinto. <sup>33</sup> Ntá kaín xín tí sín tjejóxehen tí ntabáro mé k'uéjóxin tochr'in sín nkayakon ch'ín Jesús la ntáchro sín kixin:

—Jaha mé chaxín Xjeen Dios —ichro sín.

**Ch'ín Jesús mé kjuínchekitøhe jína tí chojni níhi nonte Genesaret**

(Mr. 6.53-56)

<sup>34</sup> Ntá tió k'uátøye sín tí ntayaon ntá kjuíji sín tí nonte Genesaret. <sup>35</sup> Ntá tí

sín siín ntiha tjoka kjuátøan sín kixin jehe ch'ín Jesús tíha, ntá kuínhin tí sín chjasin chjinaxón ntiha la ntá kuíkao sín kaín tí sín níhi tí tjen ch'án. <sup>36</sup> Na ntá chrónøehe sín ch'án kixin chrókuítøhe ch'án kixin kjónté chrínta iké ch'án chrókuákóxin sín, la ntá kaín tí sín kuákóxin iké ch'án mé kuítøhe sín jína.

**Tí jie tjasin chojni**

(Mr. 7.1-23)

**15** A ntá chjasin Jerusalén kjuixin iso sín fariseo la ko iso tí sín maestro tjako tí ley la kjuíchréhe sín tí ch'ín Jesús. Ntá kjuanchankíhi sín ch'án kixin: <sup>2</sup>—¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín tsík'axrjeníxinni kixin t'óntihya sín itja sín ntá kjónté ine sín? —ichro tí sín fariseo a.

<sup>3</sup> A ntá kjuanchankí ch'ín Jesús kixin:

—¿Nkekuènté jahará kjaxin títékákonhyará nkehe tsík'etøan Dios? A ntá jahará tjinkáonrá naxá chrókuinkachónkirá tí nkehe kuinkáchónki tí sín tsík'axrjeníxínrá.

<sup>4</sup> Ntáchro Dios kixin: “Tsochontehérá kjuasáya it'ará la ko inará”, la ko ntáchro ch'án kixin: “Tí nkexro t'ántaxínhin it'é la ko iné la chrók'uen.”<sup>1</sup>

<sup>5</sup> A ntá jahará tsíntáchrórá kixin ó nchøxon kixin ijnko nkexro tsochénka it'é la ko iné kixin: “It'éni, inéni, chrokjuahya tsjinkítsani tí jaha kixin kaín nkehe chóntani la ó chjéheni Dios.” <sup>6</sup> A ntá jnkojín nkexro tsontáchro ch'án tíhi ntá í t'ichjánxinhya tsjinkítsa tí it'é la ko tí iné, mé xíkaha tsixrorá. Mé xíkaha jahará kuítøhérá tí nkehe k'uétøan Dios kixin tjinkáonrá chrókjuích'erá éxí kjuích'e tí sín tsík'axrjeníxínrá. <sup>7</sup> Jahará la jehya jnkojínxón tjenkayáxinrá. Ntá tsíntáchró tí ch'ín Isaías, tí nkexro

<sup>1</sup>15:4 Éxodo 20.12; 21.17; Levítico 20.9

k'uéchrónka itén Dios ósé. Mé chrónka ch'án kixin nkexrí tjejorá la xíkaha tsíkjin ch'án kixin:

<sup>8</sup>Tí chojni tí chjasin i ir'va ó xraxinkakonxín sín tí janhan a ntá tí asén sín la ikjín kuítóhe sín tí janhan.

<sup>9</sup>Méxra ó chónko tóchjina sín xraxinkaon sín tí janhan kixin tí nkehe tjako sín la tí nkehe tsík'e-toan chojni ó.<sup>§</sup>

Mé xíkaha ichro itén Dios.

<sup>10</sup>Ntá k'uúyehé ch'ín Jesús tí chojni ínaá la ntácho ch'án kixin:

—Chrókuinhínrá la ko chrókuiénxinrá. <sup>11</sup>Kaín nkehe ine chojni la ó nchoxon, jehya jie. Tí jie la tí nkehe t'axrjexín ir'va chojni —mé xíkaha ichro ch'ín Jesús.

<sup>12</sup>A ntá tí sín k'uúajiko ch'ín Jesús mé kóchjinehe ch'án la ntácho sín kixin:

—¿Á noha kixin tí sín fariseo mé kónínkaon sín tí kuínhin sín tí nkehe ntáche sín? —ichro sín.

<sup>13</sup>Ntá kjuátehe ch'án ntácho ch'án kixin:

—Kaín tí ka jehya T'aná tjen nkaya nkajní k'uenkaxin la mé ts'axrjenkixin nuèe. <sup>14</sup>Nté títóhé sín. Tí jehe sín la ntakótán sín la t'etuehenhén sín í so sín ntakótán. A ntá tíó ijnko chojni ntakótán tjitaón ntja la ntá yóí sín ts'anótjenyá sín ichrén tòye —ichro ch'án.

<sup>15</sup>Ntá ntácho ch'ín Pedro kixin:

—Chronka nkexrí t'axrjexín tíha —ichro ch'án.

<sup>16</sup>Ntá kjuátehe ch'ín Jesús ntácho ch'án kixin:

—¿Á kjaxinrá jahará tiénxinhyará?

<sup>17</sup>¿Á tiénxinhyará kixin kaín tí nkehe ineni na sátsji nkaya tseeni na ko xík'axrjexín tí cuérpoeni ínaá? <sup>18</sup>A ntá tí nkehe t'axrjexín ir'va chojni la t'axrjenixin asén chojni la tíha la mé tí jie tjasixín cho-

jni. <sup>19</sup>Kaín tíha mé t'axrjenixin asén chojni, mé tí jínahya tjenkayáxin sín la ko tí t'óyán kichó sín la ko tí tjachehe kichó sín la ko tí chóna sín í jnko chojni chjin ókjé la ko teé sín la ko tí kjuach'ia la ko tí t'ántaxínhin kichó sín. <sup>20</sup>Tí nkehe a mé tjasixín chojni jie. A ntá tí sineni kjónté nchexiteyáhyani ts'ónti tjani la tíha la jehya jie —mé xíkaha ichro ch'ín Jesús.

### Ijnko tjan jehya sín israelita mé kuinkáchónki tí ch'ín Jesús

(Mr. 7.24-30)

<sup>21</sup>Ntá ch'ín Jesús mé k'uaxrjexín ch'án ntiha la ntá sákjuí ch'án nó chjasin Tiro la ko chjasin Sidón. <sup>22</sup>Ntá ikui ijnko chojni chjin na mé ijnko tjan cananea na kjuák'e tjan tí chjasin ntiha. Kóchjinehe tjan tí ch'ín Jesús la k'uèya tjan ntácho tjan kixin:

—Ìnchéni, Xjeen David, tikonóehéni kixin tí xjeenni chjin la mé níhi tjan chóna tjan ijnko nchakuen tí jínahya —ichro ti tjan a.

<sup>23</sup>A ntá ch'ín Jesús la ninkehó kjuáteehya ch'án. A ntá tí sín k'uúajiko ch'án na kóchjina sín la ntáche sín ch'án kixin:

—Tétuehén tjan sátsji tjan kixin tinkák'óyako tjan chréhe tjan tí jeheni —ichro sín.

<sup>24</sup>Ntá ntácho ch'ín Jesús kixin:

—Dios mé ichr'ánna tsjéyá jehó tí kolélo kjuíchro kuènte nación Israel —ichro ch'án.

<sup>25</sup>A ntá tí tjan a kóchjina la kjuák'exín toh'in tjan nkayakon tí ch'ín Jesús la ntácho tjan kixin:

—Ìnchéni, tjínkítsani —ichro tjan.

<sup>26</sup>A ntá ch'ín Jesús kjuátehe ch'án ntácho ch'án kixin:

—Jehya tí jina chrókuakitsjahā niotja tí xjan ntá chrótjahā koniā chrókjóné va —ichro ch'án.

<sup>27</sup>A ntá jehe tjan la ntácho tjan kixin:

<sup>§</sup>15:9 15.8-9 Isaías 29.13

—Chaxín xikaha, inchéni. Kjánchó kjónté tí konja na tí nkehe tsjixènjinnkí mesa kuènte inché la ine va —ichro tjan.

<sup>28</sup>Ntá ntáchro ch'ín Jesús kixin:

—Jaha imá tinkachónkia tí janhan. Tí nkehe tjinkávan la tsoxiteyá —ichro ch'án.

Ntá tuénxín tí hora la tí xjeen tjan ó kuítohe jína.

### Ch'ín Jesús mé kjuínchekitohe jína nchónhya chojni níhi

<sup>29</sup>Ntá ch'ín Jesús mé sákjuixín ch'án ntiha la kjuíji ch'án chrínta ntayaon Galilea. Ntá chriin ch'án ijnko jna la ntiha kjuák'etjaxín ch'án. <sup>30</sup>Ntá kójnkotsé itsjé chojni tí tjen ch'án la kjuikao sín tí sjinníhi, mé tí sín xitjahya tji la ko tí sín t'ikonhya la ko tí sín nixjahya la ko tí sín tsixénká la kaín xín tí í so sjinníhi. K'uejo sín tí sjinníhi toté tí ch'ín Jesús kixin jehe ch'án mé sinchekitohe ch'án sín jína. <sup>31</sup>Kaín chojni la imá chrakon sín kixin k'uikon sín kixin tí sín k'uénixjahya la ó nixja sín la tí sín tsixénká la tsíkitohe sín jína la tí sín xitjahya tji la ó tji sín la ko tí sín k'uék'ikonhya la ó t'ikon sín. Méxra kjuanchehe sín kjuasáyé tí Dios kuènte tí sín Israel.

### Ch'ín Jesús mé kjuínchekjine noó mil chojni

(Mr. 8.1-10)

<sup>32</sup>Ntá k'uíyehé ch'ín Jesús tí sín k'uájiko ch'án la ntáchro ch'án kixin:

—Imá tikonóaha kaín tí chojni kixin ó ní yaon tjejókoni sín ntá kjuèhe sín nkehe sine sín. Tjinkakonhya chrókuétuanhan sín sáchrókjui sín ntøe sín kixin naxa nehya sín la ntja ó tsotienxín sín kjinta —ichro ch'án.

<sup>33</sup>Ntá ntáchro tí sín k'uájiko ch'án kixin:

—Ntá jaha la ó noha kixin nteje tjejóni la kohya nkehe tsochjéheni kaín xín tí chojni a —ichro sín.

<sup>34</sup>Ntá ch'ín Jesús mé kjuanchankíhi sín, ntáchro ch'an kixin:

—¿Nkekjaín niotja chontará? —ichro ch'án.

Ntá ntáchro sín kixin:

—Yato niotja chóntani la ko iso koche ntsínsí —ichro sín.

<sup>35</sup>Ntá ch'ín Jesús k'uetøan ch'án kixin kaín xín sín ts'ixitjaxín sín nonte, ichro ch'án. <sup>36</sup>Ntá kuákja ch'án tí yato niotja la ko tí koche ntsínsí la kjuanchehe ch'án kjuasáyé Dios. Ntá kóchrít'ø ch'án tí niotja a la ntá k'uetuenhen ch'án tí sín k'uájiko ch'án kixin ts'óxfkayehé sín tí niotja la ko tí koche kaín xín tí sín sín a, sine sín. <sup>37</sup>Na mé kaín xín sín kjóne sín na kókjehe sín ntá kjuenájín sín yatontaxra tot'ø tí nkehe naxa tsixehe. <sup>38</sup>▲ ntá tí sín kjóne mé noó mil chojni ntoa. ▲ ntá tí chojni chjin la ko chánjan la mé kuákjahya sín cuenta nkekjaín tí sín a. <sup>39</sup>Ntá ch'ín Jesús mé nixjehe ch'án sín sákjuí sín la ntá k'uit'ótjen ch'án ntabárco la sákjuí ch'án nó Magdala.

### Tí sín fariseo la ko tí sín saduceo tjanchia ijnko kjuaxroan náxrjón

(Mr. 8.11-13; Lc. 12.54-56)

**16** ▲ ntá iso tí sín fariseo la ko iso tí sín saduceo mé sákjuítsjehe sín tí ch'ín Jesús. Tjinkaon sín chrókjuachaxín sín ch'án la kjuanchehe sín ch'án kixin chrókjuakoxín ch'án ijnko kjuaxroan kixin á chaxín jehe ch'án tsíkixín ch'án tí tjen Dios. <sup>2</sup>▲ ntá ch'ín Jesús na kjuátehe ch'án, ntáchro ch'án kixin:

—Jahará ntáchrórá kixin ijie ntá kónjín ó tsi ijnko yaon jína kixin kjátse nkajní. <sup>3</sup>La ntá nchítjen ntáchrórá kixin ijie la náxrjónhya kixin kjátse nkajní la tjenkáya tjuí. Méxra jahará ntoáhya tjenkáyaxínrá. Ó nohará jtátsoanrá tí nkajní, a ntá jtátsoanhyará tí kjuaxroan sítónhen jie. <sup>4</sup>Tí sín jínahya la tí sín titekakonhya la tjanchia sín ijnko kjuaxroan jié. ▲ ntá ts'ikonhyará í jnko

kjuaxroan, jehó tí kjuaxroan kuènte ch'ín Jonás mé ts'ikonrá —mé xikaha ichro ch'ín Jesús.

Ntá kuitohe ch'án sín la sákjuí ch'án.

**Ch'ín Jesús ntáchro kixin chrókuitekakonhya sín tí nkehe tjako tí sín fariseo**

(Mr. 8.14-21)

<sup>5</sup>Ntá tí sín k'uájiko ch'ín Jesús mé k'uátòye sín ntayaoan la ntá k'uitjáyenhen sín tsíkjikohya sín niotja. <sup>6</sup>Ntá ntáchro ch'ín Jesús kixin:

—Chrócoxakonhanrá kixin tí xroan ts'ánkixín niotjé tí sín fariseo la ko tí sín saduceo.

<sup>7</sup>Ntá tí sín k'uájiko tí ch'ín Jesús mé ikjo sín kichó sín ntachro sín kixin:

—Mé xikaha ichro ch'án kixin tsíkjikohyáni niotja —ichro sín.

<sup>8</sup>Ntá kónohe ch'ín Jesús kixin nkehe tí kjo sín kichó sín, ntá ntáchro ch'án kixin:

—¿Nkekuènté tjóra kixin chontahyará niotja? Jahará la intsíkoá tinkachónkirá tí janhan. <sup>9</sup>Jahará ¿á naxá tiénxinhyará la ko á xráxinkákonhyará tí in'ó niotja k'óxikeyeheni kjóne tí in'ó mil chojni la ko á xráxinkákonhyará nkekjaín ntaxra kjuenájínrá tí nkehe tsíxehe? <sup>10</sup>La ko ¿á xráxinkákonhyará jahará tí yato niotja xikayehe kjóne tí noó mil chojni la ko á xráxinkákonhyará nkekjaín ntaxra kjuenájínrá tí nkehe tsíxehe? <sup>11</sup>¿Ntá ¿nkekuènté kixin kuiénxinhyará kixin janhan la jehya kuènte niotja tjénixja tíó ntáxrjan kixin chrócoxakonhanrá kixin tí xroan ts'ánkixín niotjé tí sín fariseo la ko tí sín saduceo? —mé xikaha ichro ch'ín Jesús.

<sup>12</sup>Na ntá kuiénxín sín kixin nixjahya ch'án kuènte tí xroan t'ánkixín niotja. Náhí. Tjenixja ch'án kixin chrócoxakonhen sín kixin tí nkehe tjako tí sín fariseo la ko tí sín saduceo.

**Chrónka ch'ín Pedro kixin ch'ín Jesús mé tí nkexro Cristo**

(Mr. 8.27-30; Lc. 9.18-21)

<sup>13</sup>Kjuúji ch'ín Jesús chjino tí chjasin Cesarea de Filipino ntá jehe ch'án mé kjuanchankíhi ch'án tí sín k'uájiko ch'án, ntáchro ch'án kixin:

—¿Nkehe tjo sín kixin nkexro tí Xjeen Dios K'óna Chojni? —ichro ch'án.

<sup>14</sup>Ntá jehe sín kjuátehe sín ntáchro sín kixin:

—Iso sín mé ntáchro sín kixin Juan Bautista, ichro sín. ¿Ntá í so sín na mé ntáchro sín kixin Elías, ichro sín. ¿Ntá í so sín mé ntáchro sín kixin Jeremías o í jnko nkexro k'uéchrónka itén Dios —ichro sín.

<sup>15</sup>Ntá ntáchro ch'ín Jesús kixin:

—¿¿Ntá jahará nkechorá kixin nkexro tí janhan? —ichro ch'án.

<sup>16</sup>¿Ntá ch'ín Simón Pedro kjuátehe ch'án ntáchro ch'án kixin:

—Jaha mé tí Cristo mé Xjeen Dios tjechón —ichro ch'án.

<sup>17</sup>Ntá kjuátehe ch'ín Jesús ntáchro ch'án kixin:

—Náxrjón tjen jaha Simón xjeen Jonás kixin kohya nijnko chojni kjuakoha tíha. Jehó T'aná tjen nkaya nkajní mé kjuakoha tíha. <sup>18</sup>Méxra ntáxrjan kixin jaha mé Pedro mé t'axrjexín kixin ijnko xro la chrítaón tí xro mé sít'ána nínko la kjónté tí kjuachaxin kuènte kjuach'én la tsjachahya sinchek'itjáyán. <sup>19</sup>Méxra jaha mé tsotjaha tí llave kuènte kjuachaxin nkaya nkajní la ntá tí nkehe tjánjonhya kjuachaxin tsonhen ntihi chjasintajni la kjaxin nkaya nkajní tsochóntahya kjuachaxin. ¿Ntá tí nkehe tsjánjuan kjuachaxin tsonhen ntihi chjasintajni la ntá kjaxin nkaya nkajní sín kjuachaxin.

<sup>20</sup>Ntá ch'ín Jesús mé k'uetuenhen ch'án tí sín k'uájiko ch'án kixin ninkexró tsochénkahya sín kixin jehe mé tí Cristo.

**Ch'ín Jesús chrónka  
ch'án kixin its'en ch'án**

(Mr. 8.31—9.1; Lc. 9.22-27)

<sup>21</sup> Ntá ch'ín Jesús kjuankixin ch'án chénka ch'án tí sín k'uájiko ch'án kixin t'ichjánxin satsji ch'án chjasin Jerusalén la ntaha la tí sín t'etoan kuènte nínko la tí sín nch'á tjetooan la ko tí sín maestro tjako ley mé imá sinchekjásote sín ch'án. La chrónka ch'án kixin ts'óyán sín ch'án kjánchó tí nixin yaon mé tsoxechón ch'án inaá. <sup>22</sup> Ntá ch'ín Pedro mé kuakitsjenta ch'án tí ch'ín Jesús la kjuankixin nixjehe ch'án ntáchro ch'án kixin:

—Kjá Dios tsjanjonhya kjuachaxin xikaha tsonhan Ìnchéni kixin jaha la xitjahya tsjasóte xikaha —ichro ch'ín Pedro.

<sup>23</sup> A ntá ch'ín Jesús mé kuinkátjá ch'án la nixjehe ch'án tí ch'ín Pedro, ntáchro ch'án kixin:

—Sátjia ntáha, Sátanas. Tjiatéhya tí jaha tí nkehe tsonna. Jaha chrók'uínkakonhén tí nkehe tjinkaon Dios. Jaha tjenkayáxinhya éxi tjinkaon Dios. Náhí. Tjenkayáxian éxi tjenkayáxin chojni ó —ichro ch'ín Jesús.

<sup>24</sup> Ntá nixjehe ch'ín Jesús tí í so sín k'uájiko ch'án, ntáchro ch'án kixin:

—Jnkojínrá tjinkáonrá tsochréhérá tí janhan la t'ichjánxin tsitohérá káin tí nkehe tjaké asánrá, ntá tsámárá tí ntacruz kuéntará, a ntá tsochréhérá tí janhan. <sup>25</sup> A ntá tí nkexro tjinkaon jehó sinchekaá asén la ts'itjáyan. A ntá tí nkexro chrókjuinçek'itjáyanxín asén kixin tinkáchónki sín tí janhan la tsaá. <sup>26</sup> ¿A ntá nkehe tsonhen tí chrókjuacha ijnko chojni chróchónka káin nkehe síin chjasintajni a ntá tí kjuachón chrókjuinçek'itjáyan? ¿Nkehe chrókjuenka chojni kixin chróchónka tí kjuachón? <sup>27</sup> Tí Xjeen Dios K'óna Chojni

tsikao ch'án tí kjuachaxin jié kuènte It'é ch'án tjen nkaya nkajni la káin tí sín ángel tsikao ch'án na ntá tsjenkehe ch'án jnkojnko chojni nkexrí tí xra kjuích'e jnkojnko tí jehe sín. <sup>28</sup> Chaxin xrjanka kixin isorá tjejorá ntihi la naxa ts'énhyará naxa ts'ikonjjará kixin nkexrí tí kjuachaxin tsochónka tí Xjeen Dios K'óna Chojni tí tsikao ch'án kjuachaxin jié —ichro ch'ín Jesús.

**Ch'ín Jesús mé k'uixitóxin  
nkexrí tsjehe ch'án**

(Mr. 9.2-13; Lc. 9.28-36)

**17** Ntá injón yaon chr'éxin ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan, kichó ch'ín Jacobo, la k'uit'ótjen sín ijnko jna imá noi. <sup>2</sup> Ntá ntiha tjejó sín ntá xrínahya k'uíkon sín kixin ch'ín Jesús mé k'uixitóxin nkexrí tsjehe ch'án. Tí nkayakon ch'án la imá tjákini tsjehe éxi yaon la ko iké ch'án la k'óna imá tjóá la tsjehe éxi yóhe ijnko xrohi t'inkaséyan. <sup>3</sup> Na ntá xrínahya k'uíkon sín itjen ch'ín Moisés la ko tí ch'ín Elías tjejótjo sín tí ch'ín Jesús.

<sup>4</sup> Na ntá ch'ín Pedro mé ntáche ch'án tí ch'ín Jesús kixin:

—Ìnchéni, jína kixin tjejóni ntihi. Tí tjinkávan la chrókjuich'énani iní nchia la mé ijnko kuéntá jaha la ijnko kuènte ch'ín Moisés la í jnko kuènte ch'ín Elías —ichro ch'án.

<sup>5</sup> Ntá naxa tjenixja ch'ín Pedro na ntá xrínahya ikui ijnko tjuí imá t'inkaséyan kjuák'etja chrítaón tí jna tjejó sín. Ntá xrínahya chríkjan tí tjuí kuínhin sín itén ijnko nkexro nixja na mé ntáchro kixin:

—Tíhi mé xjanna. Imá tjuaha ch'án la ko chàna kixin itjen ch'án. Chrókuinhínra tí nkehe tjako ch'án —ichro Dios.

<sup>6</sup> Kuínhin tí sín k'uájiko ch'án xikaha la ntá kjuítsínka sín nonte kixin imá chrakon sín. <sup>7</sup> Na ntá ch'ín Jesús mé

kóchjina tí tjejó sín la kuákóxin sín ch'án la ntáchro ch'án kixin:

—T'áya chrakonhyará —ichro ch'án.

<sup>8</sup>Na ntá xrinahya k'uikon sín kixin koha ninkexró. Jehó ch'ín Jesús mé tjen.

<sup>9</sup>Na ntá tí k'uínkajinxin sín tí jna ntá k'uetōan ch'ín Jesús, ntáchro ch'án kixin:

—Ninkexró chenkahyará tí nkehe k'uikonrá ijie hasta tsoxechónjian tí Xjeen Dios K'óna Chojni —ichro ch'án.

<sup>10</sup>Ntá tí sín k'uájiko ch'ín Jesús mé kjuanchankí sín, ntáchro sín kixin:

—¿Nkekuènté ntáchro tí sín maestro tjakó tí ley kixin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

<sup>11</sup>Ntá kjuátehe ch'ín Jesús, ntáchro ch'án kixin:

—Chaxín senó itsi ch'ín Elías kixin tsjasiyóxin ch'án kaín nkehe. <sup>12</sup>Kjánchó ó xrjanka kixin chaxín ó kui ch'ín Elías la tí sín chjasintajni la mé kjuátsoanhya sín ch'án la kjuínchekjasóte sín ch'án éxi kóxrjínhin sín. Mé xikaha kjaxin tí Xjeen Dios K'óna Chojni la mé kjaxin sinchekjasóte tí jehe sín —mé xikaha ichro ch'ín Jesús.

<sup>13</sup>Ntá tí sín k'uájiko ch'ín Jesús mé kónohe sín kixin ch'ín Jesús la nixja ch'án kuènte Juan Bautista.

### **Ch'ín Jesús mé kjuínchekitohe jína ijnko xjan t'aniáte**

(Mr. 9.14-29; Lc. 9.37-43)

<sup>14</sup>Ntá tió k'uúji sín tí siín nchónhya chojni la ntá kóchjina ijnko ch'ín tí tjen ch'ín Jesús la kjuák'exín toch'in ch'án nkayakon ch'án. La ntáchro ch'án kixin:

<sup>15</sup>—Inchéni, tikonóhéni kixin xjeenni la níhi, chóna ch'án chin t'aniáte. Nchónhya veces tjítsinkate ch'án xrohi la tjítsínkankí ch'án ntá.

<sup>16</sup>Ntá kjuíkəoni ch'án ntihi la tí sín xrikoá la kjuachahya sín kjuínchekitohe ch'án jína.

<sup>17</sup>¿Ntá kjuátehe ch'ín Jesús ntáchro ch'án kixin:

—Jahará la chaxínhya tinkachónkirá tí janhan la imá tjásinrá jie. ¿Xá hasta nkesá tjinkáonrá naxa ts'ejóni? ¿Hasta nkesá tsjácha tsjak'é tsjákohará? Xrakoa tí xjan méhe ntihi —ichro ch'án.

<sup>18</sup>Ntá ch'ín Jesús mé k'uetuenhen ch'án tí nchakuen tí jínahya la ntá k'uaxrxéjin tí nchakuen tí jínahya tí chánjan la tuénxín kuítohe xjan jína.

<sup>19</sup>Ntá kjuixin sákjuí sín la jehó ch'ín Jesús tjen ch'án la ntá tí sín k'uájiko ch'án mé kjuanchankíhi sín ch'án, ntáchro sín kixin:

—¿Nkekuènté kixin kjuachahyani kuakitsjeni tí nchakuen tí jínahya a? —ichro sín.

<sup>20</sup>Ntá ntáchro ch'ín Jesús kixin:

—Jahará la kjuachahyará kuakítsjerá nchakuen tí jínahya kixin intsíkoá tinkachónkirá tí janhan. Chaxín xrjanka kixin tí chrókuinkachónkirá kaín asánrá kjónté intsíkoá éxi ijnko tje mostaza intsí la ntá chróntácherá tí jna kixin: “Sátjixian ntihi la sátsjia ókjé”, chróchrórá chróntácherá tí jna la ntá tí jna sáchrókjuixin ntiha. Mé xikaha kaín nkehe chrókjuachará chrókjuich'erá tí chaxín tinkachónkirá tí janhan. <sup>21</sup>¿Ntá tí tsakítsjerá ijnko nchakuen tí jínahya la t'ichjánxin tsonixjehérá Dios la ko sintehyará.

### **Ch'ín Jesús chrónka ch'án inaá kixin its'en ch'án**

(Mr. 9.30-32; Lc. 9.43-45)

<sup>22</sup>Naxa k'uék'aji sín jnkokoá tí estado Galilea la ntáchro ch'ín Jesús kixin jehe ch'án tí Xjeen Dios K'óna Chojni mé tsotsé sín ch'án la ko tsjikaán sín ch'án tí siín chojni t'etōan sinchekjasóte sín ch'án <sup>23</sup>la ts'óyán sín ch'án. ¿Ntá tí yaon níxin ntá tsoxechón ch'án inaá, ichro ch'án. Ntá tí sín k'uájiko ch'án mé kuínhin sín la imá k'uává sín.

### Ch'ín Jesús kjuenka ch'án tí nkehe kjuanchia tí sín kuènte nínko

<sup>24</sup>Ntá tió kjuíji ch'ín Jesús la ko tí sín k'uájiko ch'án tí chjasin Capernaum la ntá tí sín nchekjènkí kuènte nínko mé sákjuítsjehe sín tí ch'ín Pedro la kjuanchankí sín kixin:

—Tí maestro kuèntá la, ¿a tjenkahya ch'án tí nkehe tjanchia tí sín nchekjènkí kuènte nínko? —ichro sín.

<sup>25</sup>Ntá kjuátehe ch'ín Pedro, ntáchro ch'án kixin:

—Kjá tjenka ch'án —ichro ch'án.

Ntá k'uíxenhén ch'ín Pedro tí nchia la ch'ín Jesús mé senó nixja ch'án ntáchro kixin:

—¿Nkechrua, Simón? ¿Nkexro chrókjuenka tí nkehe tjanchia tí sín t'etoan chjasintajni, á tí sín kuènte ntiho o á tí sín tsíkjinín ókjé? —ichro ch'ín Jesús.

<sup>26</sup>Ntá kjuátehe ch'ín Pedro, ntáchro ch'án kixin:

—Tí sín tsíkjinín ókjé mé tjenka sín —ichro ch'án.

Ntá ntáchro ch'ín Jesús kixin:

—A ntá tí sín chjasén sín la t'ichjánxinhya chrókjuenka sín. <sup>27</sup>Kjánchó tjinakakonhya tsonínkaon ninkexró ntihi. La ntá sátsjia tí ntayaon sátsjikoá tí ichjon chóna gancho tséxin sín koche la ntaha itsé tí chjon chrínkí ntayaon. Ntá tsákjá tí koche saxín sítsé gancho. Ntá takitjehe nkaya ir'va va la ts'itja ijnko chichaon. Táha mé tsjacha tsjenka kaín tí tjásikáha sín la ko tí tjásíkehé sín jaha. Táha mé sátsjikoá tjenka —ichro ch'ín Jesús.

### ¿Nkexro tí imá ts'etoan?

(Mr. 9.33-37; Lc. 9.46-48)

**18** A ntá tí yaon a tí sín k'uájiko ch'ín Jesús mé kóchjinehe sín ch'án ntá kjuanchankíhi sín ch'án kixin:

—¿Nkexro tí antsí má ts'etoan tí kjuachaxin kuènte nkaya nkajní? —ichro sín.

<sup>2</sup>Ntá ch'ín Jesús mé k'uíyehé ch'án ijnko chánjan la kjuak'e jnkosiné tí tjejó tí jehe sín <sup>3</sup>la ntáchro ch'án kixin:

—Chaxín xrjanka kixin tí ts'ónahyará éxí ijnko xjan ntsí ntá xitjahya tsákjára tí kjuachaxin kuènte Dios. <sup>4</sup>Tí jnkojín nkexro ts'óna éxí tí chánjan ihnkehya la mé antsí tjeoan ntiha. <sup>5</sup>A ntá tí nkexro ts'áyehé ijnko chánjan kixin tinkáchónki sín tí janhan la mé xikaha éxí chrók'uáyehé sín tí janhan —mé xikaha ichro ch'ín Jesús.

### Tí chojni tjasin jie mé tsjasóte sín

(Mr. 9.42-48; Lc. 17.1-2)

<sup>6</sup>Tí jnkojín nkexro chrókjuachroe ijnko chánjan ntsí tinkáchónki tí janhan la íchá jína chrókjuincheteyá sín ch'án ijnko xro tsík'óna xrochre ntá chrókjuíkkakánkí ch'án ntayaon nínka. <sup>7</sup>Imá náxrjónhya tjejó tí sín chjasintajni kixin síin nkehe tjasixín chojni jie. Xráxín la jehí síin, a ntá nòa tí nkexro tjasin tí nkehe tsjasixín chojni jie.

<sup>8</sup>Tí itjá o totá tjásixián jie na chrókójína chrókochrínjian chróchr'an ikjín kixin íchá jína chróchonta kjuachón kjónté it'óó itjá o it'óó totá. Á ntá tí yóí itjá o yóí totá chróchonta tsjásixián jie la tíha mé sátsjixián tí síche xrohi jnkochrín. <sup>9</sup>La ko kjaxin tí ikuan tjásixian jie na chrókójína chrókuakitsjenkiá tí ikuan chróchr'an ikjín kixin kjónté náyo ikuan na chróchonta kjuachón. A ntá tí yóí ikuan chróchonta tsjásixián jie la tíha mé sátsjixián tí síche xrohi jnkochrín.

### Kjuíncheyóexin ch'ín Jesús éxí ijnko kolélo tsík'itjayan

(Lc. 15.3-7)

<sup>10</sup>Chrókókjoniéhyará nijnko tí chánjan ntsínsí. Tjonkará kixin nkaya nkajní

la tí sín ángel kuènte tí xjanntsí la xráxín tjejó sín tí tjen T'aná nkaya nkajní. <sup>11</sup> Tí Xjeen Dios K'lóna Chojni la mé ikui kixin chrókjuinchekaá tí chojni xrichroe.

<sup>12</sup> ¿Jahará nkechrorá? Ijnko chojni chóna ijnko ciento kolélo ntá chrók'uitjáyán ijnko va na ¿á chrók'uitjáyán ch'án tí noventa y nueve va tí jnā ó a ntá á chrók'juikjeyáhya ch'án tí ijnko tí ko k'uitjáyán ní? <sup>13</sup> A ntá tí tsjacha ch'án ts'itja ch'án va ntá antsí tsochéhe ch'án kixin tí kolélo k'uitja ch'án la ntá kánhyó tsochéhe ch'án kixin tjejó tí noventa y nueve ko tsík'itjáyánhya va. <sup>14</sup> Mé xikaha kjaxin It'éni tjen nkaya nkajní la tjinkakonhya ch'án kixin chrók'uitjáyán ninkexró kjónté ijnko chojni kánhyó tjeoan.

**Chrók'uitjáyánhanrá tí jie  
kjuasinhanrá kichuárá**

(Lc. 17.3)

<sup>15</sup> Tí kichuá tí chrókjuít'aha ichrén nkehe jínahya la ntá jahvá chrónixjehé ch'án la nchexraxinkaon ch'án tí jie kjuasin ch'án. A ntá tí kjuacha nixjehé tí kichuá la í kohya kjuanínkaon. <sup>16</sup> A ntá tí tahya ch'án kuentá nkechrua la ntá ntáche á jnko o yaá chojni sátjiko kixin tsinhin sín á chaxín titekakonhya ch'án. <sup>17</sup> A ntá tí kjónté xikaha naxa titekakuenhya ch'án sín la ntá chenka tí sín tsíkójnkotsé nkehe tí jie kjuasin ch'án la ntá tí naxa titekakuenhya ch'án tí sín tsíkójnkotsé la ntá ts'ikonrá ch'án éxí ijnko chojni tinkáchónkihya Dios o éxí ijnko chojni nchekjènkj.

<sup>18</sup> Chaxín ntáxrjan kixin tí tsjánjonhyará kjuachaxin nkehe tsonhen ntihi chjasintajni la ntá kjaxin nkaya nkajni tsjanjonhya Dios kjuachaxin la ko tí tsjánjonrá kjuachaxin nkehe tsonhen ntihi chjasintajni la kjaxin ntaha nkaya nkajni tsjanjon Dios kjuachaxin.

<sup>19</sup> Kjaxin ntáxrjan kixin tí tjejó yaará ntihi chjasintajni la tí jnkokoá tje-

jótjenkayáxinrá chrókjuancheherá Dios ijnko nkehe tjinkáonrá la ntá jehe ch'án mé tsojtáhará ch'án. <sup>20</sup> Kixin tí tjejó yaá o iy'á chojni tjejó jnkokoá t'ákjenxin sín niná la janhan koína tjéntaxian tí tjejó sín ntiha.

<sup>21</sup> Ntá kóchjina ch'ín Pedro mé kjuanchankí ch'án ntáchro ch'án kixin:

—Inchéni, ¿nkekjaín veces chrók'uitjáyánhenni tí jie kjuasin kichó ní? ¿Á yato veces ó ní? —ichro ch'án.

<sup>22</sup> Ntá kjuátehe ch'ín Jesús, ntáchro ch'án kixin:

—Náhi, jehya yato veces ó. Náhi, hasta setenta veces tí yato.

**Ch'ín Jesús kjuíncheyóexin ch'án  
ijnko chojni ch'exón xra  
k'uitjáyánhya ch'án ijie kichó ch'án**

<sup>23</sup> Tí kjuachaxin kuènte Dios la éxí yóhe ijnko rey tjinkaon ch'án tsjentóáko ch'án kuentá tí sín ch'ehe ch'án xra. <sup>24</sup> Ntá kjuankixin ch'án tsítsínkaxín cuenta la ntá xrínahya kóchjina ijnko ch'ín ch'e xra síká nchónhya millones chichaon. <sup>25</sup> Tí ch'ín a mé chóntahya ch'án chichaon ts'ókjenhen ch'án tí ch'ín rey la ntá tí ch'ín rey mé k'uetōan ch'án kixin tí nkexro a mé tsoxi ch'án la koí tí ichjién ch'án la ko xjeen ch'án la ko kaín nkehe kuènte ch'án kixin ntá xikaha mé tsoxenka kaín tí síká ch'án. <sup>26</sup> A ntá tí nkexro ch'e xra mé kjuák'exín toch'in ch'án nkayakon tí rey la chrónóhe ch'án, ntáchro ch'án kixin: “Jaha Inchéni tikonóhéni la kjónté kjaxón tsjenkahani kaín tí síkáhani”, ichro ch'án. <sup>27</sup> A ntá tí ch'ín rey kjuikonóhe ch'án tí ch'ín a kjónté it-sjé síká ch'án, ntá kuítóhe ch'án sákjuí. <sup>28</sup> A ntá tí sákjuí tí ch'ín a ntá xrínahya xéta ch'án ijnko nkexro ch'eko ch'án xra mé ijnko nkexro síkéhe ch'án iso chichaon. La ntá tí ch'ín a mé tsénkíhi ch'án isin la ntáchro ch'án kixin: “¿Tsjénkana tí nkehe tjasíkàna ní



o náhí!” ichro ch'án. <sup>29</sup> A ntá tí ch'ín chóxin ch'án mé kjuák'exín toch'in ch'án nkayakon ch'án la chrónóhe ch'án ntáchro ch'án kixin: “Tjikonóhéni ijie la kjónté kjaxón tsjenkahani kaín tí nkehe sikáhani”, ichro ch'án. <sup>30</sup> A ntá jehe ch'án la kuikonóehya ch'án. K'uetóan ch'án kixin tí ch'ín a mé tsjak'echjina ch'án tsjixinjian tsjenka ch'án kaín tí síká ch'án. <sup>31</sup> Ntá tí í so sín ch'exón xra mé k'uifkon sín la ntá imá kóxakonhen sín la sákjuíchénka sín tí lámóé sín nkexrí kaá kónhen tí ch'ín síká. <sup>32</sup> A ntá tí lamo mé k'uetóan tsjik'íyehé sín tí nkexro jínahya la ntá ntáchro ch'án kixin: “Imá jínahya jaha. Janhan mé kjuintak'itjáyhanhan tí nkehe tjasíkàna kixin jaha chrónóana. <sup>33</sup> A ntá jaha mé kjaxin chrókuikonóehé tí nkexro choxian éxí janhan kuikonógha tí jaha”, ichro tí ch'ín lamo. <sup>34</sup> A ntá imá kónínkaon tí lamo a la k'uetóan ch'án kixin tsjasóte tí ch'ín a tsjixinjian tsjenka ch'án kaín tí síká ch'án.

<sup>35</sup> A ntá tí ch'ín Jesús ntáchro ch'án kixin:

—Mé xikaha T'aná tjen nkaya nkajní xikaha sit'ahará jahará tí jehya kaín asánrá ts'itjáyhanhárá tí jié chóna kichuárá —ichro ch'ín Jesús.

### Tjako ch'ín Jesús kuènte tí sín t'itjíhi kichó

(Mr. 10.1-12; Lc. 16.18)

**19** A ntá kjuixin nixja ch'ín Jesús kaín tíha, ntá sákjuixin ch'án estado Galilea la kjuíji ch'án estado Judea nó tóhe tí ntarío Jordán. <sup>2</sup> Ntá nchónhya chojni kjuíjichréhe sín ch'án ntá ntiha mé kjuínchekitóhe ch'án jína tí chojni níhi.

<sup>3</sup> Ntá iso sín fariseo mé kóchjinehe sín tí ch'ín Jesús kjuanchankíhi sín ch'án kixin tsotsjehe sín nkexrí tsixro ch'án, ntáchro sín kixin:

—¿Á síin kjuachaxin tsjákehe jnkojín chojni ichjién kjónté kohya jié jié? —mé xikaha kjuanchankí sín.

<sup>4</sup> Ntá kjuátehe ch'ín Jesús ntáchro ch'án kixin:

—¿Á nunca kjuínchekuáxinhyará jahará kixin ntáchro xroon itén Dios kixin tí nkexro kjuích'èna kaín chojni síin chjasintajni tí xrankíxixín, la tí nkexro mé “kjuích'èna ch'án chojni ntoa ko chojni chjin”?\*\* <sup>5</sup> La ko ntáchro kixin: “Mé xikaha tí chojni ntoa la tsítóhe sín it'é sín la ko ìné sín la tsakja sín ichjién sín la yóí sín la éxí ó jnko chojni xikaha ts'óna sín.”†† <sup>6</sup> Mé xikaha la í jehya yaá chojni tí jehe sín. Náhi. Ó jnko chojni k'óna tí jehe sín la mé Dios kjuanjón kjuachaxin kixin kuákja kichó sín, la í xitjahya ts'itjíhi kichó sín.

<sup>7</sup> Ntá tí sín fariseo mé kjuanchankíhi sín ch'án kixin:

—¿Ntá nkexrí kixin tí ch'ín Moisés k'uetóan kixin ts'óna ijnko xroon tsakja tí ichjién kixin tsjákeexín kichó sín?‡‡ —ichro tí sín fariseo.

<sup>8</sup> Ntá ntáchro ch'ín Jesús kixin:

—A ntá jahará titekákonhyará. Méxra ch'ín Moisés kjuanjón ch'án kjuachaxin kixin ts'óna tí xroon ts'itjéxín kichuárá. Kjánchó tí xrankíxixín la xikahya kónhen. <sup>9</sup> Méxra ntáxrjan kixin jnkojín sín tjákehe ichjién tí kjuasinhya jié, chónatahya tjan í jnko chojni, ntá kjuákehe ch'án tjan ntá tsakja ch'án í jnko chjin mé xikaha la ó jié tíha. La ko kjaxin tí ijnko chojni chjin tsíkítsínkehe ntá tsakja í jnko chojni la kjaxin jié tíha.

\*\*19:4 19.4: Génesis 1.27; 5.2

††19:5 Génesis 2.24

‡‡19:7 Deuteronomio 24.1-4

<sup>10</sup>La ntá tí sín k'uájiko ch'ín Jesús ntáchro sín kixin:

—Tí xikaha tjanjonko kichó sín chrók'uitjíhi kichó sín la íchá jína chrókóteehya sín.

<sup>11</sup>Ntá ntáchro ch'ín Jesús kixin:

—Kénhya chojni tsjacha tienxín tíha. Jehó tí sín kjuanjon Dios kjuachaxin tienxín sín. <sup>12</sup>Sín iso chojni tí tsík'ónaxín sín la chóntahya sín kojé sín la xitjahya tsochónta sín ichjién sín. La í so sín la chrokjuahya tsakja kichó sín kixin ókjé chojni kjaxin kjuich'ehe sín xikaha, la ko í so sín la takjahya kichó sín kixin tjinkaon Dios kixin xikaha sich'ehe sín ch'án xrá. Tí sín tsjacha sich'e tíha la chrókjuich'e sín xikaha.

### Ch'ín Jesús mé kjuíncheyaon ch'án chánjan

(Mr. 10.13-16; Lc. 18.15-17)

<sup>13</sup>Ntá ikjui chojni kjuikáo sín iso xjan kixin tjinkaon sín tsjak'etja tja ch'ín Jesús chrítaón tí chánjan la sincheyaon ch'án sín. Ntá tí sín k'uájiko ch'án mé kónínkakonhen sín tí sín kjuikáo tí xjan.

<sup>14</sup>Á ntá ntáchro ch'ín Jesús kixin:

—Nté títóhérá tsoxrakoa xjan tí tjén janhan la t'ínkakuènhyará xjan kixin tí sín kuènte kjuachaxin nkaya nkajní la mé tóyóhe éxí tí jehe xjan —ichro ch'án.

<sup>15</sup>Ntá kjuak'etja tja ch'án chrítaón tí xjan la ntá kjuixin ntá sákjuí ch'án ókjé.

### Ijnko ch'ín ntasoá rico mé kjuínixjehe ch'án tí ch'ín Jesús

(Mr. 10.17-31; Lc. 18.18-30)

<sup>16</sup>Á ntá injnko ch'ín ntasoá sákjuítsjehe ch'án tí ch'ín Jesús la kjuanchankíhi ch'án kixin:

—Jaha la injnko Maestro jína. La ntá ¿nkehe jína chrókjuich'eni kixin chróchóntani kjuachón jnkochrín? —ichro ch'án.

<sup>17</sup>Ntá ch'ín Jesús kjuátēhe ch'án, ntáchro ch'án kixin:

—¿Nkekuènté ntáchrua kixin jína tí janhan? Jehó jnkokoá nkexro la mé jína la tíha mé Dios. Á ntá tí tjinkávan tsochonta kjuachón jnkochrín la títékávan tí nkehe k'uetqan Dios —ichro ch'ín Jesús.

<sup>18</sup>Ntá ntáchro tí ch'ín ntasoá kixin:

—¿Nkehe tíha? —ichro ch'án.

Ntá ntáchro ch'ín Jesús kixin:

—Chrók'oyánhya chojni la ko chrókjuich'iyehya nijnko chojni chjin la ko chrókueehya la ko chrókjuich'énahya kjuach'ia kuènte ókjé chojni <sup>19</sup>la ko chrókjuíkosáyehé it'á la ko iná la ko chrótjuèhé kichuá éxí tjuèxian asán.<sup>¶</sup> —mé xikaha ichro ch'ín Jesús.

<sup>20</sup>Ntá ntáchro tí ch'ín ntasoá kixin:

—Kaín tíha la kjuínchexiteyáni desde tí ntasoáni. ¿Á ntá nkehe tí naxá t'itjáyan? —ichro ch'án.

<sup>21</sup>Ntá ntáchro ch'ín Jesús kixin:

—Tí tjinkávan antsí ntoá sinchexiteyá la sátjia sinchekjia kaín tí nkehe chonta la sinchekítónhén tí sín nò. Ntá kaín tí nkehe tjete la tsochonta nkaya nkajní. Ntá tsjixin ntá tsjihá la chréhé tí janhan —ichro ch'ín Jesús.

<sup>22</sup>Ntá kuínhin tí ch'ín ntasoá a xikaha ntá t'ává ch'án sákjuí ch'án kixin imá itsjé nkehe chónta ch'án.

<sup>23</sup>Ntá ch'ín Jesús mé nixjehe ch'án tí sín k'uájiko ch'án, ntáchro ch'án kixin:

—Chaxín tjonqará kixin tí chojni chónta imá itsjé nkehe na imá xrá ts'áyéhe sín tí kjuachaxin kuènte nkaya nkajní. <sup>24</sup>Kjatee xrjanka kixin antsí xrähya chrók'uatsínka injnko kocamello injnko tjar'i ntachica tjexrja. Á ntá antsí xrá kixin tí sín chónta itsjé nkehe chrók'uáyéhe tí kjuachaxin kuènte Dios —ichro ch'ín Jesús.

<sup>¶</sup>19:19 Éxodo 20.12–16; Deuteronomio 16.20; Levítico 19.18

<sup>25</sup> Ntá tí sín k'uájiko ch'án mé kuínhin sín la imá chrakon sín, la jehe sín kjuanchankíhi kichó sín kixin:

—Tí xikaha la çá nkexro chrókjuacha chrókuaá? —ichro sín.

<sup>26</sup> Ntá komá ch'ín Jesús tí jehe sín la ntáchro ch'án kixin:

—Chojni chjasintajni la xitjahya xikaha sich'e. A ntá Dios mé tsjacha sich'e xikaha —ichro ch'ín Jesús.

<sup>27</sup> Ntá ntáchro ch'ín Pedro kixin:

—Inchéni, jeheni kaín ni la kuítóheni kaín nkehe chónntani kixin tsochréheni tí jaha. A ntá çnkehe ts'áyéheni? —ichro ch'án.

<sup>28</sup> Ntá kjuátehe ch'ín Jesús kixin:

—Chaxín ntáxrjan kixin tió itsi tí yaon tsonixin kaín nkehe la tí Xjeen Dios K'óna Chojni la mé tsjak'e tí trono tsochóna kjuachaxin jié la ntá kjaxinrá jahará chréhérá tí janhan la ts'ejorá teyó trono sinchekitoxénrú ijié kaín tí sín tsík'axrjenixin tí teyó xjeen ch'ín Israel. <sup>29</sup> La ko kaín tí sín kuítóhe sín ntøe sín la ko kuítóhe sín tí kichó sín la ko kuítóhe sín it'é sín o iné sín la ko kuítóhe sín ichjién sín la ko xjeen sín la ko nontee sín kixin tinkáchónki sín tí janhan, na ntá antsí má tsochóna sín la ko kjaxin tsochóna sín kjuachón jnkochrixin. <sup>30</sup> A ntá nchónhya tí sín t'etøan ijie, mé tsjixixín tsochréhe sín. A ntá nchónhya tí sín t'ftuenhen ijie la tí sín a mé ts'etøan sín tí ntiha.

### Ch'ín Jesús kjuíncheyóexin ch'án éxí tí sín ch'e xra

**20** Tí kjuachaxin kuènte Dios la éxí yóhe ijnko chojni chónnta xra nontee ch'án la ntá ijnko yaon imá nchítjen sákjuíkjeýá ch'án chojni tsotjéhe ch'án to uva. <sup>2</sup> Ntá tí k'uitja ch'án tí sín sich'ehe ch'án xra ntá ikjo ch'án sín kixin ijnko denario tsjenkehe ch'án sín tí xra sich'e sín nontee ch'án tí yaon a. <sup>3</sup> Ntá chr'éxin como las nueve nchítjen ntá

sákjuí ch'án ntsin la k'uíkon ch'án í so sín tjejó ntsin chónntahya sín xra. <sup>4</sup> Ntá nixjehe ch'án sín ntáchro ch'án kixin: “Kjaxinrá sáchrókjuirá chrókjuich'erá xra nonteeni la jína chrókjuénkahará”, ichro ch'án. La ntá jehe sín sákjuí sín. <sup>5</sup> A ntá tí inché nonte la sákjuí ch'án inaá chonkixin naxa xík'itja ch'án í so sín ch'ehe ch'án xra la nta tí las tres kónjín la xikaha naxa xík'itja ch'án í so sín inaá. <sup>6</sup> A ntá las cinco kónjín sáxíkji ch'án ntsin inaá la k'uitja ch'án í so chojni ntaha chónntahya sín xra la ntá kjuanchankíhi ch'án sín kixin: “çNkekuènté tjejorá ntihi ch'ehyará xra kuenté yaon? —ichro ch'án.

<sup>7</sup> Ntá ntáchro sín kixin: “Kohya nkexro kjuanjon xra chrókjuich'eni”, ichro sín. Ntá ntáchro ch'án kixin: “Kjaxinrá chrókjuirá chrókjuich'erá xra nonteeni la jína chrókjuénkahará”, ichro ch'án. <sup>8</sup> A ntá ó kóntó ntá tí inché nonte mé nixjehe ch'án tí ch'ín t'etøan sítónhen xra nontee ch'án la ntáchro ch'án kixin: “T'iyehé kaín tí sín kjuích'e xra tjenkehé sín. Tjankixian tjenkehé tí chojni kjuixixín k'uixenhen xra la chr'éxin tjenkehé tí sín saoxín k'uixenhen xra”, ichro ch'án. <sup>9</sup> A ntá kóchjina kaín tí sín k'uixenhen xra las cinco kónjín la jnkójnko sín k'uáyéhe sín jnkójnko denario. <sup>10</sup> Ntá chr'éxin, tió kóchjina tí sín k'uixenhen xra nchítjen la ntá kjuenkayáxin sín kixin antsí itsjé chichaon chrókjuacha sín, ichro sín. Kjánchó kjaxin sín k'uáyéhe sín jnkójnko denario ó. <sup>11</sup> A ntá tí kjuachahya sín tjeje ntá kjuankixin sín kónínkakohen sín tí inché nonte <sup>12</sup> la ntáchro sín kixin: “Tí sín ikui kjuixixín la kjuích'e sín xra jnkokoá hora la ntá kjaxin kjuénkehé sín jnkokón éxí kjuacha tí jeheni. La ntá jeheni kjuích'eni xra kjónté sóa la kuenté yaon kjuích'eni xra”, ichro sín. <sup>13</sup> A ntá kjuátehe tí inché nonte nixjehe ch'án ijnko tí

jehe sín, ntáchro ch'án kixin: “Janhan la kjuít'ayahyará ninkehó. Ó kuítóexinni kixin ijnko denario tsjénkahará tí yaon. <sup>14</sup>Ntá tsákjá chíchakoan la sátjia. Janhan tjínkavan tsjénkaha tí sín k'uixenhen kjuixixín éxí tí kjuénkaha jaha. <sup>15</sup>¿Á chontahya janhan kjuachaxin xikaha chrókjuénkaha sín kixin tíha la chíchakonna? ¿Nkekuénté tóchjinóxinhan jaha kixin xikaha kjuénkaha sín?” ichro ch'án. <sup>16</sup>Mé xikaha iso tí sín tsjixixín chréhe sín la tí sín a senóxin ntiha la ntá itsjé tí sín senó la mé tsjixixín tsochréhe sín ntiha kixin nchónhya sín k'uíyaha kjánchó tsjéhya sín k'uítja —ichro ch'ín Jesús.

**Chrónka ch'ín Jesús  
inaá kixin its'en ch'án**

(Mr. 10.32-34; Lc. 18.31-34)

<sup>17</sup>Ntá ch'ín Jesús sákjuí ch'án ntia nó chjasin Jerusalén la ntá k'uaxrjentako ch'án tí teyó sín k'uájiko ch'án la ntáchro ch'án kixin:

<sup>18</sup>—Jahará ts'ikonrá ó sátsjini chjasin Jerusalén la ntá tí Xjeen Dios K'óna Chojni mé tsotsé chojni tsjikaán sín ch'án tí síin tí sín nchat'á t'etoan la ko tí sín maestro tí tjako ley. Ntá jehe sín ts'etoan sín kixin its'en ch'án. <sup>19</sup>Ntá tsjikaán sín ch'án tí síin chojni jehya judío la jehe sín mé tsjanoá sín ch'án la ko tsjate sín ch'án ntá tsjak'enkanı sín ch'án ijnko ntacruz kjánchó yaon níxin mé tsoxechón ch'án inaa —mé xikaha chrónka ch'ín Jesús.

**Tí nkehe kjuanchia tí iné  
ch'ín Jacobo la ko ch'ín Juan**

(Mr. 10.35-45)

<sup>20</sup>Á ntá tí iné tí xjeen ch'ín Zebedeo mé kjuikao tí jehe sín mé ch'ín Jacobo la ko ch'ín Juan mé kóchjinehe tjan tí ch'ín Jesús. Kjuák'exín toch'in tjan nkayakon tí ch'ín Jesús la chrónóehé tjan ch'án. <sup>21</sup>Ntá ch'ín Jesús kjuanchankíhi ch'án tjan kixin:

—¿Nkehe tjinkávan? —ichro ch'án.

Ntá kjuátehe tjan ntáchro tjan kixin:

—Tió tsétoanxián tí kjuachaxián jié la tsjánjuan kjuachaxin kixin tí iyó xjeenni chrók'uejó sín ijnko la itjá chjina la í jnko la itjá ikjon —ichro tjan.

<sup>22</sup>Ntá kjuátehe ch'ín Jesús, ntáchro ch'án kixin:

—Jahará la noahyará nkehe tjanchará.

¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

Ntá kjuátehe sín, ntáchro sín kixin:

—Kjá tsjachani —ichro sín.

<sup>23</sup>Ntá ntáchro ch'ín Jesús kixin:

—Chaxín kjónté chrókjuachará chrók'uirá éxí tí nkehe itsjá its'ia la ko chrókuikiterá éxí tsikite janhan, kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná ikjon kixin janhan la tónahya tocar kixin tsjánjuan tíha. Jehó T'aná tjen nkaya nkajni mé nohe kixin nkexro tsíkjejá ch'án ts'áyéhe tíha —ichro ch'ín Jesús.

<sup>24</sup>Ntá kuínhin tí ite sín kixin xikaha tsíkjanhia tí sín a ntá kónínkakonhen sín tí yaá a. <sup>25</sup>Á ntá ch'ín Jesús mé k'uíyehé ch'án tí jehe sín ntá ntáchro ch'án kixin:

—Jahará ó nohará kixin tí sín t'etoan chjasintajni la imá t'etuénhen sín kaín chojni la tí sín t'etoan imá nchehnkehe asén sín kixin ihyé sín t'etoan sín. <sup>26</sup>Kjánchó jahará la xikahya chrókjuich'erá. Náhi. Tí jnkójnra tjinkáonra chrókuétoanra la chrókjuínkĩtsará tí í so sín. <sup>27</sup>Á ntá ti jnkójnra tjinkáonra chrókuétoanra mé t'ichjánxin senó chrókjuákoxinra chrókjuich'eherá kíchuará xra. <sup>28</sup>Mé xikaha tí Xjeen Dios K'óna Chojni mé kuihya kixin chojni chrókjuich'ehe xra.

Náhi. Ikui ch'án kixin sich'ehe ch'án sín xra la ko ts'enyákonhēn chojni kixin tsaáxin nchónhya sín.

**Ch'ín Jesús kjuínchekitohe  
jína yaá chojni t'ikonhya**

(Mr. 10.46-52; Lc. 18.35-43)

<sup>29</sup> Ntá k'uaxrjéxin sín chjasin Jericó la nchónhya chojni chréhe tí ch'ín Jesús.

<sup>30</sup> Ntá ntaha chrínta ntia tjejójtjāxin yaá sín t'ikonhya. La ntá kuínhin sín kixin k'uatúsínka ch'ín Jesús la ntá kjuankixin t'íyēhe sín ch'án ntáchro sín kixin:

—Inchéni, jaha tsík'axrjeníxian David, tikonóhéni —ichro sín.

<sup>31</sup> Ntá nchónhya chojni mé ntáche sín tí sín t'ikonhya kixin:

—Tánírā tí jahará —ichro sín.

Ntá tí jehe sín antsí itsén k'uèya sín, ntáchro sín kixin:

—Inchéni, jaha tsík'axrjeníxian David, tikonóhéni —ichro sín.

<sup>32</sup> Ntá ch'ín Jesús kjuák'echónhen ch'án ntá k'uíyēhe ch'án tí sín t'ikonhya la kjuanchankíhi ch'án sín ntáchro ch'án kixin:

—Xá nkehe tí tjinkáonrá chrókjuít'a-hará? —ichro ch'án.

<sup>33</sup> Ntá jehe sín kjuátehe sín ntáchro sín kixin:

—Jaha Inchéni, tjinkaonni chrókjuínchek'ikuanni —ichro sín.

<sup>34</sup> Ntá ch'ín Jesús mé kuikonóhe ch'án tí jehe sín la kjuínchekuákóxin tja ch'án tí ikon tí sín t'ikonhya. Ntá tuénxín k'uifkon sín la chréhe sín tí ch'ín Jesús.

**K'uixenhen ch'ín Jesús  
chjasin Jerusalén**

(Mr. 11.1-11; Lc. 19.28-40; Jn. 12.12-19)

**21** Ntá kjuíji chjina sín chjasin Jerusalén, mé kjuíji sín tí chjasin ntsí Betfagé itjen chjinaxón tí jnā Olivo.

Ntá ch'ín Jesús k'uētuēnhen ch'án iyó tí sín k'uájiko ch'án <sup>2</sup>ntáchro ch'án kixin:

—Sátjirá tí chjasin ntsí itjen tóhe ntiha. Ntiha mé ts'ítjará ijnko kolócho tjechroé va la ko ijnko kolóchóxjan. Ntá tjasintankehérá va ntá tsjúkuanará va ntihi. <sup>3</sup>A ntá tí jnkójín nkexro tsjan-chankíhará nkekuénté tjasintankehérá va la ntá tsontáchrórā kixin “Inchéni t'ichjánxínhin va la ntá tíó tsjixin ntá tuénxín tsjikaáni va”, ichrorá —ichro ch'ín Jesús.

<sup>4</sup> Mé xíkaha kónhen kixin tsoxiteyá tí nkehe chrónka ijnko ch'ín k'uéchrónka itén Dios ósé ntáchro xíkíhi:

<sup>5</sup> Ntáche tí chojni chjasin Sión kixin:

“Tsjehérá ó kui tí ch'ín Rey kuéntará.

Ihnkehya ch'án la ijnko kolócho ó tje-  
jen ch'án,

mé ijnko kolóchóxjan, xjeen ijnko koló-  
cho támá nkehe.”<sup>§§</sup>

Mé xíkaha ichro tí itén Dios ósé.

<sup>6</sup> Ntá tí iyó sín mé sákjuí sín la kjuínchexiteyá sín tí nkehe k'uētoan ch'ín Jesús. <sup>7</sup> Ntá kjuíkao sín kolócho la ko xjeen va la kuakitsje sín ika titsáte sín ntá kjuínchekamá sín va ntá kjuák'ekjen ch'ín Jesús. <sup>8</sup> Ntá itsjé chojni kuakitsje sín ka titsáte sín na kjuentoá sín ka tinkák'ikjínxin sín ka tí ntia ts'atsínkaxín ch'ín Jesús. La iso sín xraá kajni la ko chaon nta yoa tsíkóchrínjin sín la tinkákjasin sín ntia a. <sup>9</sup> Ntá iso sín tsitaón ntia la ko í so sín chréhe iton ch'án mé kjuankixin sín itsje sín kixin:

—Tjancheheni kjuasáyé tí nkexro k'uaxrjeníxin tí rey David. Jína tí nkexro kjuixín kjuachaxién ihnié Inchéni. Tjancheheni kjuasáyé Dios —ichro sín itsje sín.

<sup>10</sup> Ntá k'uixenhen ch'ín Jesús tí chjasin Jerusalén la ntá kaín tí sín ntiha mé kóx-  
akonhen sín la itsjé sín kjuanchankí sín kixin:

§§21:5 Isaiás 62.11; Zacarías 9.9

—¿Xá nkexro tíhi? —ichro sín.

<sup>11</sup> La ntá nchónhya sín kjuátehe sín ntáchro sín kixin:

—Tíhi mé tí nkexro Jesús chrónka itén Dios kjuixín ch'án chjasin Nazaret estado Galilea —ichro sín.

### Ch'ín Jesús kjuínchetjóá tí nínko

(Mr. 11.15-19; Lc. 19.45-48; Jn. 2.13-22)

<sup>12</sup> A ntá ch'ín Jesús mé k'uixenhen ch'án tí nínko la ntá kuakitsje ch'án kaín tí sín nchekjixin nkehe ntiha la ko tí sín t'ena nkehe ntiha. La kótéka ch'án tí mesa tjinkítóixín sín chichaon la ko tí silla tjejókjen tí sín nchekji kontóá. <sup>13</sup> La ntá ntáchro ch'án kixin:

—Tí xroon itén Dios tsíkin sín ósé mé ntáchro kixin: “Tí ntona imé it'in nchia tsonixjanaxian sín.” A ntá jahará tí nchia i tsíkijch'énarátí tjeué xíchee\* —mé xíkaha ichro ch'ín Jesús.

<sup>14</sup> Ntaha nkaxenhen nínko kóchjinehe ch'ín Jesús iso tí sín t'ikonhya la ko iso tí sín xitjahya tji la ntá ch'ín Jesús mé kjuínchekitohe ch'án sín jína. <sup>15</sup> A ntá tí sín nchat'á tjeoan la ko tí sín maestro tjako tí ley mé k'uíkon sín kaín tí kjuaxroan kjuích'e ch'án la ko kuínhin sín kixin iso chánjan mé itsje sín nkaxenhen nínko ntáchro sín kixin: “Chjéheni kjuasáyé tí nkexro k'uaxr-jenixin rey David”, ichro sín. Ntá kuínhin tí sín a xíkaha ntá kónínkaon sín <sup>16</sup> la nixjehe sín tí ch'ín Jesús ntáchro sín kixin:

—¿Á kuínhín tí nkehe itsje tí chánjan? —kjuanchankí sín.

Ntá ntáchro ch'ín Jesús kixin:

—Ó kuínhan. Kjánchó, ¿á nunca kjuínchekuáxinhyará tí xroon itén Dios? La xíkahi chro:

Jaha kjuánjuan kjuachaxin kixin tí sín chánjan hyé la ko chánjan naxa tjejótakí

mé tsotsje sín†

—mé xíkaha ichro ch'ín Jesús.

<sup>17</sup> Ntá jehe ch'án mé kuítóhe ch'án sín la k'uaxrjexín ch'án chjasin Jerusalén la sákjuí ch'án chjasin Betania la ntiha k'ok'éhe ch'án tí tie a.

### Ch'ín Jesús kónínkakohen ch'án ijnko nta t'óna to higo

(Mr. 11.12-14, 20-26)

<sup>18</sup> A ntá tí kóyaon nchítjen ntá kjan sín chjasin Jerusalén inaá la ikui sín ntia ntá ch'ín Jesús mé ik'uén ch'án kjinta.

<sup>19</sup> Ntá k'uíkon ch'án itjen ijnko nta t'óna to higo chjino ntia. La ntá sákjuítsjehe ch'án tí nta, ntá k'uíkon ch'án kixin jehó ka itsa tí nta, naxa k'ónahya to. A ntá jehe ch'án mé nixjehe ch'án tí nta, ntáchro ch'án kixin:

—Í nunca ts'ónahya to inaá —ichro ch'án.

Ntá tí nta t'óna to higo mé tuénxín xamá. <sup>20</sup> Ntá tí sín k'uájiko ch'ín Jesús mé k'uíkon sín kixin xíkaha kónhen tí nta, ntá chrakon sín la kjuanchankíhi sín tí ch'ín Jesús kixin:

—¿Nkeuènté kixin tí nta t'óna to higo tuénxín xamá? —ichro sín.

<sup>21</sup> Ntá kjuátehe ch'ín Jesús, ntáchro ch'án kixin:

—Ntá chaxín ntáxrjan kixin tí tinkachónkirá Dios chaxín la ntá jehya jehó tí nta xíkaha kónhen, la kjaxin chrónix-jeherá tí jna i kixin: “Sátjixian ntihi sátjíkjiankiá ntayaon”, la mé xíkaha tsonhen. <sup>22</sup> Tí tinkachónkirá Dios nkehe tsjancheherá ch'án la ts'ayéherá —ichro ch'ín Jesús.

\*21:13 Isaías 56.7; Jeremías 7.11

†21:16 Salmo 8.2

### Tí kjuachaxin chón̄ta ch'ín Jesús

(Mr. 11.27-33; Lc. 20.1-8)

<sup>23</sup> Ntá kjuixin ntá ch'ín Jesús mé k'uíx-enhen ch'án tí n̄nko ntiha. Ntá tió tjet-jako ch'án ntá kóchjina iso tí sín nchat'a t'et̄oan la ko tí sín táda judío t'et̄oan la kjuanchankíhi sín ch'án ntáchro sín kixin:

—¿Nkehe tí kjuachaxin chonta kixin xikaha ch'e la ko nkexro tí kjuanjon kjuachaxin? —mé xikaha kjuanchankí sín.

<sup>24</sup> Ntá kjuátehe ch'ín Jesús ntáchro ch'án kixin:

—Ntá kjaxian janhan tsjanchánkíhará ijnko nkehe síná tsjateherá ntá janhan tsojtjonkará nkehe tí kjuachaxin chonta tjet'a tí xra i. <sup>25</sup> ¿A ntá nkexro k'uetuēnhen ch'ín Juan kixin tsikite ch'án chojni? ¿Á Dios ní o á chojni ó? —mé kjuanchankí ch'ín Jesús.

Ntá jehe sín itjo sín kichó sín kixin:

—A ntá tí tsontáchroni kixin Dios tsík'etuēnhen tí ch'ín Juan ntá tsjanchankí tí ch'ín a kixin nkekuènté kuítekakuenhyani ch'án. <sup>26</sup> A ntá tí tsontáchroni kixin chojni ó tsík'etuēnhen ch'án la ntá chrakonhenni tí chojni kixin kaín sín kuítekaon sín kixin ch'ín Juan la nixja ch'án itén Dios —ichro sín.

<sup>27</sup> A ntá kjuátehe sín ntáche sín tí ch'ín Jesús kixin:

—Náhi, noehyani —ichro sín.

Ntá ntáchro ch'án kixin:

—La ko kjaxin janhan tsoxrjankahya nkexro kjuanjon kjuachaxin kixin tjet'a tí xra —ichro ch'án.

### Ch'ín Jesús mé kjuíncheyóexin ch'án kixin éxí yaá xjan

<sup>28</sup> Ntá ntáchro ch'ín Jesús kixin:

—¿Nkehe tsixrorá? Itjen ijnko chojni chón̄ta yaá xjeen ch'án la ijnko yaon nixjehe ch'án ijnko xjan ntáchro ch'án

kixin: “Xjeenni ijje la sátsjia t'akjínjián to uva nontēni”, ichro ch'án. <sup>29</sup> Ntá kjuátehe tí xjan kixin: “Náhi tjinkakonhyani”, ichro ch'án. A ntá chr'éxin ntá k'uíxitoxin tí kjuenkayáxin ch'án la sákjuíkjjich'e ch'án tí xra a. <sup>30</sup> A ntá tí it'é xjan a mé kjuínixjehe ch'án tí í jnko xjan la jnkokón k'uetuēnhen ch'án la kjuátehe tí xjan kixin: “Jeén, ó sátsjini”, ichro ch'án. La ntá chaxínhya sátsíkji ch'án —ichro ch'ín Jesús.

<sup>31</sup> Ntá kjuanchankí ch'ín Jesús kixin:

—¿Nkexéhe tí yaá chánjan kjuínchexiteyá tí nkehe k'uetuēnhen it'é? —ichro ch'án.

Ntá kjuátehe sín kixin:

—Tí xjan sao —ichro sín.

Ntá ntáchro ch'ín Jesús kixin:

—Méxra chaxín tjonkará kixin tí sín nchekjènkí la ko tí chojni chjin ch'ieyehe nchónhya chojni ntoa la saoxín ts'ix-enhen sín tí kjuachaxin t'et̄oan Dios la ntá jahará la náhi. <sup>32</sup> Kixin ch'ín Juan Bautista mé ikui ch'án kjuakohará ch'án nkexrí chrók'uejorá la ntá jahará kuítekákuenhyará tí chrónka ch'án. A ntá tí sín nchekjènkí la ko tí chojni chjin ch'ieyehe nchónhya chojni ntoa mé kuítekaon sín. A ntá jahará kjónté xikaha k'uíkonrá la kjuítoxiénhyará tí tjenkayáxinrá la ko kuítekákonhyará —ichro ch'ín Jesús.

### Ch'ín Jesús kjuíncheyóexin ch'án kixin éxí chojni ch'e xra la jínahya asén sín

(Mr. 12.1-12; Lc. 20.9-19)

<sup>33</sup> Ntá ch'ín Jesús ntáchro ch'án kixin:

—Tsinhínrá ijnko nkehe sintayóaxian. Éxí ijnko ch'ín k'uenkaxin ch'án itsjé ntanoa t'óna to uva nontēe ch'án. Ntá kjuích'éna ch'án ijnko corral. La ko ijnko tjo kjuích'éna ch'án tōyē kixin ts'énya sín inté to uva. La ko kjuích'éna ch'án

ijnko tʒat'o noi kixin ts'it'ótjen ch'án tsotsjehe ch'án nkuixín.<sup>‡</sup>

'A nta kjuínchekjen ch'án tí nontee ch'án iso tí sín ch'e xra ntá kjuixin ntá sákjuí ch'án imá ikjín. <sup>34</sup>A ntá tí kjuixraká tí yaon k'óna nkehe ntá jehe ch'án mé ichr'án ch'án iso tí chojni ch'ehe ch'án xra kixin tsjikjanchehe sín tí sín ch'e xra nontee ch'án kixin tsjanjon sín tí nkehe tsakja ch'án. <sup>35</sup>A ntá tí sín t'ayakonhen tí nonte mé itsé sín tí sín kjuíkjanchia tí nkehe la kjuate sín iso la ko í so la k'óyán sín la í so la ixro k'uíchexín sín. <sup>36</sup>A ntá tí inché nonte a xíchr'án ch'án iso chojni ch'ehe ch'án xra inaá, a ntá tí sín ch'e xra la kjaxin xikahó kjuích'ehe sín tí sín kjuíji.

<sup>37</sup>'A ntá xikaha tsíkónhen ntá kjuenkayáxin ch'án ichr'án ch'án tí xjeen ch'án, la kjá chróchónthehe sín kjuasáyé tí xjeen ch'án, ichro ch'án. <sup>38</sup>A ntá tí k'uíkon tí sín ch'e xra tí xjeen ch'án la ntá jehó sín kjuenkayáxin sín kixin: “Tí ch'ín i mé ts'áyéhe ch'án kaín nkehe. Ts'óyánni ch'án kixin ntá tsitokoni kaín tí nkehe kuènte ch'án”, ichro sín. <sup>39</sup>Ntá itsé sín tí xjeen ch'án ntá kuakitsjexín sín ch'án tí nonte ntaha ntá k'óyán sín ch'án —mé xikaha kjuako ch'ín Jesús.

<sup>40</sup>Ntá kjuanchankíhi ch'ín Jesús tí sín kóchjina, ntáchro ch'án kixin:

—Tió itsi tí inché tí nonte a la, ¿nkehe sich'ehe ch'án tí sín ch'e xra? —ichro ch'ín Jesús.

<sup>41</sup>Ntá kjuátehe sín kixin:

—Mé tsjiji ch'án la tsíkonóehya ch'án tí sín jínahya la ts'óyán ch'án sín la tsjeyá ch'án ókjé chojni sinchekjen ch'án tí nonte a. Tsjeyá ch'án chojni jína tsjanjon tí to tsjixraká tí yaon ts'ínjin sín to —ichro sín.

<sup>42</sup>Ntá ntáchro ch'ín Jesús kixin:

—¿Á nunca kjuínchekuáxinhyará tí xroon itén Dios tsíkjin sín ósé? Mé ntáchro xikíhi:

Tí xro náxrxónhya kuítoenta tí sín ch'éna tʒat'o,

a ntá mé jie k'óna tí xro tjetooan.

Mé xikaha kjuích'e Inchéni Dios,

na ntá tíha mé ijnko nkehe kjuachrakon k'uíkonni.<sup>¶</sup>

Mé xikaha ichro itén Dios.

<sup>43</sup>Ntá ntáchro ch'ín Jesús kixin:

—Tjonkará kixin Dios tsakitsjahará tí kjuachaxin kuènte ch'án la ntá sinchek'áyéhe ch'án tí sín ch'e xra jína. <sup>44</sup>A ntá jnkójín nkexro tsjitsínka chrítaón tí xro i mé tsokuen ch'án la tí ts'ánótjen tí xro tsoxratja ijnko chojni la jehe sín ts'óna inche —mé xikaha ichro ch'ín Jesús.

<sup>45</sup>Ntá tí sín nchat'á tjetooan la ko tí sín fariseo mé kuínhin xikaha kjuíncheyóexin ch'ín Jesús ntá kienxín sín kixin kaín tí ntáchro ch'án kjuíncheyóexin ch'án kixin tí jehe sín xikaha tsonhen sín. <sup>46</sup>La ntá tjinkaon sín chrókjuínchekjasóte sín ch'án kjánchó chrakonhen sín tí chojni kixin kaín sín ntáchro sín kixin chaxín tí nkehe nixja ch'ín Jesús la kuènte Dios.

### Ch'ín Jesús kjuíncheyóexin éxí ijnko kia kótehe sín

**22** Ntá ch'ín Jesús mé kjuankixin nixja ch'án inaá la kjuíncheyóexin ch'án ntáchro ch'án kixin:

<sup>2</sup>—Tí kjuachaxin kuènte Dios mé éxí yóhe ijnko ch'ín rey kjuasin ch'án ijnko kia kixin tsotéhe xjeen ch'án.

<sup>3</sup>K'uetuenhen ch'án tí sín ch'ehe ch'án xra kixin tsjik'íyehé sín tí sín kjueyá ch'án, kjánchó jehe sín mé tjinkakonhya sín tsochjina sín. <sup>4</sup>A ntá k'uetuen-

<sup>‡</sup>21:33 Isaías 5.1–7

<sup>¶</sup>21:42 Salmo 118.22–23



hen ch'án inaá í so tí sín ch'ehe ch'án xra ntáchro ch'án kixin: “Chenka tí sín ó k'uíyaha kixin kaín tí nkehe sineni la ó tjechónhen. Ó kuétoan its'en tí koxinta la ko í so ko tsanká la kaín nkehe la ó síchónhen. A ntá chróxrakoa sín tí siín kia”, mé xikaha k'uetōan ch'án. <sup>5</sup>A ntá tí sín tsík'íyehē ch'án mé ántosén sín. Ijko sín la sákjuí nontē la í jnko la sákjuí ch'án í jnko xra chóna ch'án. <sup>6</sup>La í so tí sín a mé tsítse sín tí sín tsík'etuenhen tí ch'ín rey la k'óka tí sín a hasta ik'uén tí jehe sín. <sup>7</sup>Ntá tí ch'ín rey mé kónínkaon ch'án ntá k'uetuenhen ch'án tí sín soldado kixin its'en tí sín kjuàya la ko tsoche tí chjasén sín. <sup>8</sup>Ntá nixjehe ch'án tí sín ch'ehe ch'án xra inaá ntáchro ch'án kixin: “Kaín nkehe la ó síchónhen kixin tí nkexro tsotēhe la ntá tí sín k'uíyaha kuítékakonhya sín la kjuihya sín. <sup>9</sup>Méxra sátsjirá tí esquina tí ntja jíe la t'iyehérá kaín tí sín tsoxetará kixin itsji sin ti kia”, ichro ch'án. <sup>10</sup>Ntá tí sín ch'e xra mé sákjuí sín la k'uíyehē sín kaín tí sín t'átsínka tí ntja ntiha, mé chojni jína la ko chojni jínahya hasta k'uixikaón chojni tí nchia ntiha.

<sup>11</sup>Ntá tí ch'ín rey mé kuitsjehe kaín tí sín tsík'íyehē ch'án la ntá k'uíkon ch'án ijnko ch'ín ntiha chónahya ka jína kuente tí kia a. <sup>12</sup>La ntá nixjehe ch'án, ntáchro ch'án kixin: “Amigo, ¿nkexrí k'uixenhén kixin tsík'ítsahya kuente kié chojni tsotēhe?” ichro ch'án. Ntá tí ch'ín a kjuáteehya ch'án ninkehó. <sup>13</sup>A ntá tí ch'ín rey mé k'uíyehē ch'án tí sín ch'ehe ch'án xra la ntáchro ch'án kixin: “Sinchenteto toté la ko itja tí ch'ín a la ité ntója sítié la nta ntiha a mé tsotsjánka ch'án la sinetaón ch'án neno ch'án.”

<sup>14</sup>Ntá ntáchro ch'ín Jesús kixin:

—Nchónhya sín k'uíyaha la séhya sín k'uítja —mé xikaha kjuako ch'án Jesús.

### Ch'ín Jesús ntáchro ch'án kixin ó nchoxon tsjenkehe sín gobierno

(Mr. 12.13-17; Lc. 20.20-26)

<sup>15</sup>Ntá tí sín fariseo mé sákjuí sín ókjé la jnkokoá kjuenkayáxin sín kixin tsjachaxín sín tí ch'ín Jesús kixin ách'e ichrén jie tsjasin ch'án la ntá tsjanchia sín jie. <sup>16</sup>Ntá ichr'án sín iso tí sín ch'ehe sín xra la iso tí sín ch'ehe tí ch'ín Herodes xra kixin tsjachaxín sín tí ch'ín Jesús. Ntá tí sín a nixjehe sín ch'án ntáchro sín kixin:

—Maestro, ó noheni kixin tí nkehe ntáchrua jaha la chaxín, la ko ntoá tjákua ntje Dios, la ko jehya nkexrí tsjehe chojni tjenkayáxixián kixin á jína sín. <sup>17</sup>A ntá jaha chronka nkehe tjenkayáxian. ¿Á jína chrókjuenkehēni tí gobierno romano o náhi? —ichro sín kjuanchankí sín.

<sup>18</sup>Ntá ch'ín Jesús kónohe ch'án kixin ntoáhya tjenkayáxin sín ntá ntáchro ch'án kixin:

—Jahará ntoáhya tjenkayáxinrá. ¿Nkekuente chrókjuáchaxínráni?

<sup>19</sup>Tjákonará tí chichaon tjenkehérá sín méhe —mé xikaha k'uetōan ch'ín Jesús.

Ntá kjuikohe sín ch'án tí chichaon a. <sup>20</sup>Ntá k'uíkon ch'ín Jesús ntá kjuanchankí ch'án kixin:

—¿Nkexro tí tsík'axrjexín tjenkáni tí chichaon méhe la ko nkexro ihnié chóna? —ichro ch'án.

<sup>21</sup>Ntá kjuátehe sín kixin:

—Tí ch'ín t'etōan mé tjenkáni ch'án —ichro sín.

Ntá ntáchro ch'ín Jesús kixin:

—Chróchjehérá tí ch'ín gobierno t'etōan tí nkehe kuente ch'án la kjaxin tí nkehe kuente Dios la chróchjehérá Dios —mé xikaha chro ch'ín Jesús.

<sup>22</sup>Ntá tí kuínhin sín xikaha la chrakon sín la komá sín ch'án ntá sákjuí sín.

### Kjuanchankí sín kixin á tsoxechón chojni

(Mr. 12.18-27; Lc. 20.27-40)

<sup>23</sup>Ntá tí yaon a la iso sín saduceo sákjuítsjehe sín tí ch'ín Jesús. A ntá tí sín saduceo mé titekakonhya sín kixin tsoxechón chojni tsík'en la mé xikaha chrókjuachaxin sín ch'ín Jesús. Ntáchro sín kixin:

<sup>24</sup>—Maestro, tsintáchro ch'ín Moisés kixin tí its'en ijnko chojni la naxa itjen tí ichjién ch'án la tsík'ikonhya sín xjeen sín, ntá tí kichó tí nkexro tsík'en chrókuakja ch'án tí tjan k'án, a ntá tí xjeen sín mé ts'óna éxi xjeen tí ch'ín sao tsík'en. <sup>25</sup>Ntá ntihi k'uejó yato sín jnkokoá kichó sín. Ntá tí ch'ín sao kótehe ch'án. La ntá ik'uén ch'án. A ntá k'uechóntahya sín xjeen sín la ntá tí ichjién ch'án kótehe tjan tí ch'ín tsoyo. <sup>26</sup>A ntá tí ch'ín yóxin ik'uén kjaxin la tí ch'ín nixin kuákja ch'án tjan la ntá xikaha kónhen inaá. La kayatoé tí sín k'uechónta sín tjan xikaha kónhen sín kaín sín ik'uén sín. <sup>27</sup>A ntá kjuixixín ntá kjaxin tjan ik'uén tjan. <sup>28</sup>Ntá tió tsoxechón kaín xín chojni tsík'en, ¿ntá nkexro ts'óna xii tí jehe tjan kixin kayatoé sín kótehe tjan? —mé xikaha kjuanchankíhi sín tí ch'ín Jesús.

<sup>29</sup>Ntá ch'ín Jesús kjuátehe ch'án ntáchro ch'án kixin:

—Jahará la ntoáhya tjenkayáxinrá kixin noahyará nkehe chro xroon itén Dios la ko chonhyará tí kjuachaxin kuènte Dios. <sup>30</sup>A ntá tí chojni tsík'en tió tsoxechón la tsoteehya sín la ko tsoteehya tí xjeen sín kixin tí sín tsík'en la éxi tí sín ángel kuènte Dios ts'ejó sín nkaya nkajní. <sup>31</sup>A ntá tí kaín tí sín tsík'en tsoxechón, ¿á kjuinchekuáxinhyará nkehe

ntáchro Dios? Jehe ch'án xikihí chro ch'án: <sup>32</sup>“Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob.”<sup>§</sup> Méxra tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóchón —mé xikaha ichro ch'ín Jesús.

<sup>33</sup>Ntá kuínhin sín nkexrí kjuako ch'án ntá chrakon sín.

### Ch'ín Jesús chrónka tí nkehe imá tjeotan

(Mr. 12.28-34)

<sup>34</sup>Ntá tí sín fariseo mé tsikójnkotsé sín tió kónohe sín kixin nkehe chro ch'ín Jesús la ninkehó kjuáteehya tí sín saduceo. <sup>35</sup>La ijnko tí sín maestro tjako tí ley mé tjinkaon ch'án chrókjuachaxin ch'án tí ch'ín Jesús. Ntá kjuanchankí ch'án kixin:

<sup>36</sup>—Maestro, ¿nkexéhe tí nkehe imá tjeotan kuènte tí ley? —ichro ch'án.

<sup>37</sup>Ntá ntáchro ch'ín Jesús kixin:

—“Chrótjuèhérá Ìnchéni Dios kaín asánrá la ko kaín kjuaxrexinkaon kuèntará.”<sup>\*\*\*</sup> <sup>38</sup>Mé tíha mé tí ley imá tjeotan la ko saoxín k'uetōan Dios tíha. <sup>39</sup>A ntá tí nkehe yóxin la tóyóhe la mé ntáchro xikihí: “Chrótjuèhérá kichuárá éxi tjuèxinrá asánrá.”<sup>††</sup> <sup>40</sup>Tí iyó nkehe i la mé antsí tjeotan kuènte tí ley tsík'etōan Moisés la ko tí nkehe kjuako tí sín k'uechrónka itén Dios.

### ¿Xá nkexro it'é tí Cristo?

(Mr. 12.35-37; Lc. 20.41-44)

<sup>41</sup>A ntá tí sín fariseo la naxa jnkokoá tjejó sín <sup>42</sup>la ntá ch'ín Jesús mé kjuanchankí ch'án ntáchro ch'án kixin:

—¿Nkehe tjenkayáxinrá jahará? ¿Nkexro tí Cristo la nkexro tí

§22:32 Éxodo 3.6

\*\*22:37 Deuteronomio 6.5

††22:39 Levítico 19.18

tsík'axrjeníxin ch'án? —kjuanchankí ch'án.

Ntá ntáchro sín kixin:

—Tí Cristo mé tsík'axrjeníxin ch'án ch'ín David —ichro sín.

<sup>43</sup>Ntá ntáchro ch'ín Jesús kixin:

—¿Ntá nkexrí kixin Nchakuen Dios chénkaxín ch'ín David kixin David chróntáchro ch'án kixin Ìnché ch'án tí Cristo? Ntáchro ch'ín David xíkíhi:

<sup>44</sup>Ìnchéni Dios ntáche tí Ìnchéni kixin:

“Tjak'e tjaná chjina ntihó tsétoan, tsjixinjian kaín xín tí sín nínkakonhan

la tsjachahya sín ts'etóan sín kixin jahvá mé tsétoan.”\*\*

Mé xíkaha chro itén Dios. <sup>45</sup>'A ntá ¿xá nkexrí kixin Cristo chrók'óna xjeen David a ntá jehe ch'ín David kuikítexín ch'án Ìnché ch'án tí Cristo? —ichro ch'ín Jesús.

<sup>46</sup>A ntá ninkexró xitjahya kjuátēhe sín ninkehó la desde tí yaon a chrakon sín la í nínkehó kjuanchankíehya sín ch'án.

### Ch'ín Jesús tjanchia jje tí sín fariseo la ko tí sín maestro tjako tí ley

(Mr. 12.38-40; Lc. 11.37-54; 20.45-47)

**23** Ntá kjuixin tíha ntá ch'ín Jesús mé nixjehē ch'án tí chojni la ko tí sín k'uájiko ch'án, ntáchro ch'án kixin:

<sup>2</sup>—Tí maestro tjako tí ley la ko tí sín fariseo mé chóna sín kjuachaxín tsochrónkaxín sín tí ley kjuako ch'ín Moisés. <sup>3</sup>Méxra chrókjuínchexiteyéhérá kaín tí nkehe t'etóan sín la ko chrókjuich'erá kaín nkehe ntáchro sín kjánchó chrókuankíehyará tí jehe sín kixin jehe sín la ijnko nkehe ntáchro sín la ókjé nkehe ch'e sín. <sup>4</sup>T'etueñhen sín chojni tsamá ijnko nkehe imá ye, mé ijnko nkehe chrókjuachahya chrókuamá chojni. A ntá jehe sín na nijnko dedo tja sín chrókjuinkítsa sín tí nkehe imá ye yamá chojni. <sup>5</sup>Ich'e sín kaín xín

nkehe kixin tsotsjehe chojni. Tóxrjínhin sín tsjak'enkání totjen sín la ko itja sín ijnko xroon kjínjin iton ts'ínixín itén Dios la tjinkaon sín iké sín síxinkání nkehe tjákini. <sup>6</sup>Tjinkaon sín tsochóna sín silla jína ts'ejóksen sín sine sín tió sátsji sín tí sím kia la ko xritjeyá sín tí silla antsí náxrjón chrók'uejóya sín nkaxenhen nínko. <sup>7</sup>La ko tjinkaon sín kixin chojni chrókjuikosáyehe sín tsoxeta sín tí ntia la ko tjinkaon sín kixin tsontáchro chojni kixin maestro tí jehe sín.

<sup>8</sup>A ntá jahará la titoéhyará kixin tson-táchro sín kixin maestro tí jahará kixin jehe sín la ko jahará la ó jnkokónrá, la jahará chontará jnkokoá Maestro la mé Cristo tíha. <sup>9</sup>La ntá chróntáchroh-yará kixin ninkexró mé it'ará ntíhi chjas-intajni kixin jahará la chontará jnkokoá It'ará mé itjen nkaya nkajni. <sup>10</sup>La ko jehe sín chróntáchrohya sín kixin jefe tí jahará kixin jehó Cristo mé jefe. <sup>11</sup>Tí nkexro antsí tsjinkítsa iso chojni la jehe ch'án mé antsí t'etóan ch'án. <sup>12</sup>Kixin tí nkexro ntáchro kixin imá ijie la mé imá tsontsí. A ntá tí nkexro nchehnkehya la antsí tsojje.

<sup>13</sup>Nòará tí jahará maestro tjàkorá tí ley la ko tí jahará chojni fariseo. Jahará la jnkójínxónhya tjenkayáxinrá. Jahará la t'ikjéherá tí puerta ts'ixenxín chojni tí kjuachaxín kuènte Dios kixin titoéhyará ts'ixenhen ókjé chojni. A ntá ni jahará la xitjahya t'ixenhyará la ko tjánjonhyará kjuachaxín ts'ixenhen tí sín tjinkaon chrók'uíxenhen.

<sup>14</sup>Nòará tí jahará maestro tjàkorá tí ley la ko chojni fariseo. Jnkójínxónhya tjenkayáxinrá. Jahará takitsjeherá ntøe tí chojni tsíkók'án la ntá isé nixjehérá Dios kixin ch'iyexínrá chojni kixin jína tí jahará. A ntá xíkaha kjuich'erá jahará la antsí tsjasótíará.

<sup>15</sup> Nòará tí jahará maestro tjàkorá tí ley la ko chojni fariseo. Jahará la jnkójínxónhya tjenkayáxinrá. Jahará sátjirá nonte la chrítaón ntayaon kixin tsjáko-hérá ijnko chojni tsinkáchónki xíkaha tí tinkachónkirá la ntá tió kjuachará kjuachroerá sín la ntá jehe sín antsí má tsjasótexín sín tí xrohi la kánhyó jahará.

<sup>16</sup> Nòará tí jahará kixin tétóanrá kjánchó ntakótánrá. Ntáchrórá kixin tí jnkójín chojni tsontáchro kixin sinchexiteyá sín nkehe la t'ákjenxin sín tí nínko la ntá t'ichjánxinhya sinchexiteyá sín. A ntá tí tsontáchro sín kixin sinchexiteyá sín nkehe la t'ákjenxin sín tí chica oro sín nkaxenhen nínko la ntá t'ichjánxin sinchexiteyá sín. <sup>17</sup> Imá lontirá la ko ntakótánrá. ¿Á imá tjetóan tí chica oro o á imá tjetóan tí nínko kixin tí nínko mé kótjuáxin tí chica oro? <sup>18</sup> Kjaxin ntáchrórá kixin: “Tí jnkójín chojni tsontáchro sín kixin sinchexiteyá sín nkehe la t'ákjenxin sín tí altar la ntá t'ichjánxinhya sinchexiteyá sín. A ntá tí tsontáchro sín kixin sinchexiteyá sín nkehe la t'ákjenxin sín tí nkehe tjokehé sín Dios chrítaón tí altar la ntá t'ichjánxin sinchexiteyá sín tí nkehe tsintáchro sín.” <sup>19</sup> Imá lontirá la ko ntakótánrá. ¿Á imá tjetóan tí nkehe tsochjehérá Dios o á imá tjetóan tí altar kixin tí altar mé tótjuáxin tí nkehe tsjánjonrá? <sup>20</sup> Kixin tí nkexro tsontáchro kixin sinchexiteyá nkehe la t'ákjenxin ch'án tí altar la jehya t'ákjenxin ch'án tí altar ó. Náhí. Kjaxin t'ákjenxin ch'án kaín tí nkehe síin chrítaón ntiha. <sup>21</sup> A ntá tí nkexro tsontáchro kixin sinchexiteyá ch'án nkehe la t'ákjenxin tí nínko la jehya t'ákjenxin ch'án nínko ó. Náhí. Kjaxin t'ákjenxin ch'án tí Dios itjen ntiha. <sup>22</sup> A ntá tí nkexro t'ákjenxin nkaya nkajní la ntá kjaxin t'ákjenxin sín tí trono kuènte Dios la ko tí nkexro tjet'etóan ntiha.

<sup>23</sup> Nòará jahará maestro tjàkorá ley la ko jahará chojni fariseo. Jahará

jnkójínxónhya tjenkayáxinrá. Jahará la chjehérá Dios ijnko ite parte kaín tí kaxroan tsjiko tí nkehe ineni, mé tí menta la ko anís la ko comino. Kjánchó tahyará kuéntá tí nkehe imá tjetóan kuènte tí ley. Mé ntoá chrókujenkayáxinrá la ko chrókuikonóehérá kichuárá la ko chrókuinkachónkirá Dios. Tíhi la antsí tjetóan chrókuinchesiteyará la kjaxin chrókuitoéhyará chrokuich'erá tí í so nkehe. <sup>24</sup> Jahará la tétóanrá kjánchó ntakótánrá. Jahará la nchek'ankihirá kjónté ijnko kochjisen intsí chóna tí nkehe its'irá, a ntá ijnko kocamello kjónté ijíe va la t'ínkará.

<sup>25</sup> Nòará tí jahará maestro tjàkorá ley la ko jahará fariseorá. Jahará la jnkójínxónhya tjenkayáxinrá. Jahará la imá nchetjóará chrítaón tí vaso la ko tí plato, a ntá tí nkaxenhen tsíkaón kjuachee la ko jahorá tjinkáonrá chróchontará itsjé nkehe. <sup>26</sup> Jahará chojni fariseorá imá ntakótán jahará. Saxín chrókuinchetjóará tí nkehe nkaxenhen tí vaso la ko tí plato la ntá ó chrókótjóá tí chrítaón kjaxin.

<sup>27</sup> Nòará jahará maestro tjàkorá tí ley la ko chojni fariseorá. Jnkójínxónhya tjenkayáxinrá. Jahará la éxí yóhe ijnko tòye tsíxravá chojni, imá náxrjón tsjehe ntója, a ntá nkaxenhen mé tsíkaón huésoé chojni tsík'en la ko kaín nkehe tjuáhya. <sup>28</sup> Mé xíkaha tí jahará la tsjehe éxí chojni jína xíkaha, a ntá jnkójínxónhya tjenkayáxinrá la ko jínahyará.

<sup>29</sup> Nòará tí jahará maestro tjàkorá ley la ko chojni fariseorá. Jahará la jnkójínxónhya tjenkayáxinrá. Jahará la kjuich'énará tjat'o náxrjón chrítaón tí tòye tsíxravá tí sín k'uékjako itén Dios ósé la ko nchek'ítsará tjat'o chrítaón tòye kuènte tí sín jína asén. <sup>30</sup> La ntá ntáchrórá kixin tí chrók'uejorá tí k'uéjó tí sín tsík'axrjeníxinrá la ntá chrókuinkítsahyará chrók'uen tí sín kjuako itén Dios. <sup>31</sup> Méxra xíkaha jahorá

ntáchrorá kixin chaxín tsík'axrjeníxinrá tí sín k'óyán tí sín k'uékjako itén Dios. <sup>32</sup>Méxra ijie la tjinkáonrá tsjixinhanrá tí xra kjuíh'e tí sín tsík'axrjeníxinrá.

<sup>33</sup>Jahará la tsík'axrjeníxinrá konche. ¿Ntá nkexrí chrókuaará kixin itsi tí tsjasótiará? <sup>34</sup>Méxra janhan mé tsétuānhan chojni chrónka itén Dios la ko chojni imá nohe la ko chojni tjako, itsi sín. A ntá jahará la ts'oyánrá sín ts'ejoyánirá sín nta Cruz la í so sín la tsjatejínrá sín nkaxenhen ninko la ko tsochonkíhirá sín chjasin la chjasin. <sup>35</sup>Méxra jahará la yamará tí jie kixin tí sín jína k'uúitjixín ijnie senó. Méxra tsamará tí jie kixin ik'uén ch'ín Abel, tí nkexro jína, la ko kaín tí í so sín hasta ik'uén ch'ín Zacarías, xjeen Berequías, tí nkexro k'oyánxinrá chjino tí altar. <sup>36</sup>Chaxín tjonkará kixin kaín tí jie a mé yámá tí chojni siín ijie.

### Tsjánka ch'ín Jesús

(Lc. 13.34-35)

<sup>37</sup>Ntá ntáchro ch'ín Jesús kixin:

—Jerusalén, Jerusalén, jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuinkitsará. Nchónhya veces tjínkavan chrókójnkotsérá la chrók'uáyakonhánrá éxí ijnko cochíká mé t'ayakonhen xjeen va chrínkí kanēnee va mé xikaha tjínkavan chrók'uáyakonhánrá tí jahará. Kjánchó jahará la tjínkakonhyará xikaha. <sup>38</sup>Ntá jie la Dios la tsítóhe tí jahará. <sup>39</sup>Ntáxrjan kixin í ts'ikonhyará tí janhan ínaá tsjixrakájia tí yaon tsontáchrórá kixin: “Imá jína tí nkexro kuixín kjuachaxién ihnié Inchéni” —mé xikaha ichro ch'ín Jesús.

### Chrónka ch'ín Jesús kixin ts'itjáyan tí ninko

(Mr. 13.1-2; Lc. 21.5-6)

**24** Ntá ch'ín Jesús k'uaxrjexín ch'án tí ninko la ntá ó sáchrókjuí ch'án la ntá tí sín k'uájiko ch'án mé kóchjina sín kixin tsochónhen ch'án kixin kjaxín ch'án chrótsjehe ch'án kixin náxrjón tsík'óna tí ninko a. <sup>2</sup>A ntá ch'ín Jesús mé kjuátehe ch'án kixin:

—Jahará ¿á tjejtsejehérá kaín tíha? Chaxín tjonkará kixin tsjixraká tí yaon ts'oya kuenté ninko. Nijnko xro ts'ejókjehnya kichó kixin kaín tíha la tsoxíka —ichro ch'án.

### Tí nkehe tsonhen tió tsjixixín

(Mr. 13.3-23; Lc. 21.7-24; 17.22-24)

<sup>3</sup>Ntá sákjuí sín chrítaón tí jna Olivo la ch'ín Jesús kjuák'etjaxín ch'án la ntá tí sín k'uájiko ch'án mé kjuanchankíhi sín ch'án kixin:

—Tjinkaonni tsochronka nkesá tsonhen tíha. ¿Nkexrí tsonoxénni tió ts'inka tí jaha la ko nkexrí tsonoxénni tí itsi tí tsjixixín chjasintajni? —ichro sín.

<sup>4</sup>Kjuátehe ch'ín Jesús kixin:

—Tóxakonhanrá títóehyará kixin ninkexró chrókjuít'áyahará. <sup>5</sup>Nchónhya chojni itsi sich'iyaxín nina tsontáchró kixin: “Janhan mé tí Cristo” tsixro sín, la sich'iyehé sín nchónhya chojni. <sup>6</sup>A ntá tió tsinhínrá tsontáchró chojni kixin ó siín kjuanínkaon la ko ts'ixin kjuachrakon kixin tsjanjonko kichó sín la kjónté xikaha tsonhen la chrakonhyará. Ó jehí tsonhen tíha tí naxá ts'itjáyanhya chjasintajni. <sup>7</sup>Ijnko nación tsjanjonko í jnko nación la tsjanjonxin sín tí xra ts'etóan sín. La ko itsjé chjasin na tsókjinta la ko tsoníhi chojni la ko ntihi la ntaha tsínkí nonte. <sup>8</sup>Kaín tíha la ntá tsoxrankixixón tí kjuatjoté tsonhen chojni.

<sup>9</sup>’A ntá tsotsérá chojni la tsjikaánrá sín tí tjejó tí síxreé kíxin sinchekjásó-tiará sín la ntá ts'óyanrá sín. La ko kaín xín chojni síin chjasintajni tsonínkakohanrá sín kíxin tinkachónkirá tí janhan. <sup>10</sup>Ntá tí yaon a la itsjé sín la tsítóhe sín tsinkáchónkihya sín tí janhan la ko tsonínkakonhen sín kíchó sín la ko sinchekjí kíchó sín. <sup>11</sup>Ntá itsi nchónhya chojni ntoáhya tsjako la ntá sich'ieyehe sín nchónhya chojni. <sup>12</sup>La ts'ixin nchónhya jie jínahya la ntá ts'ixin itsjé chojni tsojtuèhya sín kíchó sín. <sup>13</sup>A ntá tí nkexro naxa tjejó tinkáchónki tí janhan hasta tí tsjixín la mé tsaá. <sup>14</sup>La ko tí itán jína chrónka nkexrí tjen tí kjuachaxin kuente Dios la t'ichjánxin tsinhin sín kuenté chjasintajni, la tió tsjixin tsinhin sín kuenté chjasintajni la ntá ó ts'ítjayan chjasintajni.

<sup>15</sup>’Ch'ín Daniel k'uechrónka itén Dios mé tsíkjin ch'án kíxin tsjixraká ijnko yaon tsjak'e ijnko nkehe jínahya nkaxenhen nínko tjóá. <sup>¶</sup>Ntá jahará ts'ikonrá tíha. A ntá tí nkexro nchekuáxin mé tsienxín nkehe tíha. <sup>16</sup>Ntá kaín tí sín tjejó estado Judea tsochriin sín jna sátsji sín. <sup>17</sup>A ntá tí sín tjejó chrítaón nchia ntoé sín la í xitjahya tsakitsje sín ninkehó. <sup>18</sup>Ntá tí tjejóch'e sín xra nontee sín la kjá í tsokjanhya sín tsjikakja sín iké sín. <sup>19</sup>Ntá nda tí chojni chjin tjejóyá sín la ko nda tí sín nchekakí xjan tí yaon a. <sup>20</sup>Chrókjuanchehérá Dios kíxin tí tsonhen tíha la chrókójehya nchakuen kin la ko chrókójehya tí yaon t'ok'éhe chojni. <sup>21</sup>Kíxin tíha mé ijnko kjuachrakon imá ijié la desde tí xrankíxín chjasintajni la nunca xikahya kónhen. <sup>22</sup>Ntá tí chrók'uetqanhya Dios kíxin tjoka ts'atsínka tíha ntá chrókuaáhya ninkexró. Ntá ts'etqan ch'án kíxin tjoka ts'atsínka tí kjuachrakon jie kíxin jehe ch'án mé imá tjuèhe ch'án tí sín tsíkjejá ch'án.

<sup>23</sup>’Ntá tí tsonáchro chojni kíxin: “Tsjehe ntilhi itjen Cristo”, o “Tsjehe ntilha itjen ch'án”, la ntá chrókuítekákuénhyará sín. <sup>24</sup>Kíxin ntá itsi iso sín tsonáchro sín kíxin Cristo tí jehe sín la ko kjaxin itsi í so sín ntoáhya tsjako la ko tsjasin sín kjuaxroan jie kíxin tjinkaon sín chrókjuich'ieyehe sín chojni kjónté tí sín tsíkjejá Dios. <sup>25</sup>Ó xrjanka senó nkehe tsonhen kíxin tsonohará. <sup>26</sup>Méxra tí chróntáchro sín kíxin: “Tsjeherá tí nteje ntilha tjen ch'án”, la ntá tsjihyará nó ntilha. O tí chróntáchro sín kíxin: “Tsjeherá ntilhi tí cuarto mé tjen ch'án”, la chrókuítekákonhyará. <sup>27</sup>Méxra éxí tsjonkíxín la t'ikon chojni t'inkaséyanxín tí tjitoxin yaon hasta tsjiatóxin yaon mé xikaha ts'ikon chojni tió itsi tí Xjeen Dios K'óna Chojni. <sup>28</sup>Mé éxí yóhe tí tjen ijnko cuerpo tsík'en la ntilha tsojnkotsé tí kontexjuen.

### **Tsokjan tí Xjeen Dios K'óna Chojni**

(Mr. 13.24-37; Lc. 21.25-33;  
17.26-30, 34-36)

<sup>29</sup>’A ntá séhyó tí tsjixín tí kjuachrakon jie la ntá tí yaon la tsojie a ntá tí nitjó la í ts'inkaséyanxínhya. La ko tí konotsé la tsoxénjinxín nkajní la kjaxin kaín nkehe síin nkaya nkajní la tsinkí. <sup>30</sup>La ntá ts'ikon chojni kíxin nkajní tsixin tí Xjeen Dios K'óna Chojni. La ntá kaín chojni chjasintajni tsochrakon sín la tsotsjánka sín la ts'ikon sín kíxin itsi tí Xjeen Dios K'óna Chojni, mé chríkjan tjuí mé tsjak'enkakjan ch'án tsikao tí kjuachaxin jie. <sup>31</sup>Ntá tsochr'án Dios tí sín ángel kíxin ts'ánao sín tí trompeta itsen kíxin tsochjina kaín tí nkexro kjueyá Dios tsjixin kanóe lado chjasintajni.

<sup>¶</sup>24:15 Daniel 9.27

<sup>32</sup>Chrók'uitjará nkexrí sintayóaxian kuènte ijnko nta to higo. Éxí yóhē tió chóna ntahte la ko ts'ixin kayoa la nta tsonoxínrá kixin í séhya tsokjan ichrin. <sup>33</sup>Mé xíkaha tí ts'ikonrá ts'at-sínka kaín tíha la ntá xíkaha tsonoxínrá kixin í séhya itsi Ínchéni. <sup>34</sup>Ntá tjonkará chaxín kixin kaín tíha senó tsonhen tí naxá ts'enhya tí chojni síñ jie. <sup>35</sup>À ntá tí nkajní la ko tí chjasintajni mé ts'itjáyan. À ntá tí nkehe ntáxrjan la nunca ts'itjáyanhya tsoxiteyá tíha.

<sup>36</sup>Á ntá tí yaon la ko tí hora tsoxiteyá tíha la kohya ninkexró nohe. Ni tí sín ángel tjejó nkaya nkajní noehya sín la ko ni tí Xjeen Dios noehya. Ó jehó tí It'é mé nohe.

<sup>37</sup>Éxí yóhē tí nkehe kónhen tí yaon k'uékjak'e ch'ín Noé mé xíkaha tsonhen tí tsokjan tí Xjeen Dios K'óna Chojni. <sup>38</sup>Tí naxá titjiéhya sín nta la kaín chojni la jína k'uéjé sín la kjóne sín la ko ik'uú sín la ko sítótehe sín kjuixrakájia tí yaon k'uixenhen ch'ín Noé ntabárcō.<sup>§§</sup> <sup>39</sup>À ntá jehe sín mé kienxínhya sín hasta kuijia tí k'uaniá chrin ntá ikui nta la k'uátjoá kaín sín. Mé xíkaha tsonhen tió itsi tí Xjeen Dios K'óna Chojni. <sup>40</sup>À ntá yaá chojni ntoa tjejóch'e sín xra nonte la ntá ijnko la sátsji la í jnko la tsítóhe. <sup>41</sup>La ko yaá chojni chjin mé tjejót'o sín la ijnko la sátsji la í jnko la tsítóhe.

<sup>42</sup>Chrók'uejotsjehérá kixin noahyará nkehora la ko nkesá ts'inka janhan. <sup>43</sup>Chrókónohará tíhi: tí chrókónohe ijnko ínché nchia nkehora tie chrókjui ijnko nkexro tseé la ntá chrókjuak'echónhen tí ínché tí nchia ntá xitjahya ts'ixenhen tí nkexro tjinkaon chrókueé. <sup>44</sup>Méxra jahará la jína chrók'uejorá kixin tí Xjeen Dios K'óna Chojni me titàya itsi.

## Tí nkexro jina ch'e xra la tí nkexro ch'ehya xra jina

(Lc. 12.41-48)

<sup>45</sup>Tí nkexro chaxín ch'e xra jína la ko imá nohe la ntá tí lámoe ch'án ts'etuenhen kixin ts'ayakonhen ch'án tí sín síñ ntōe ch'án la ko tsjanjon ch'án nkehe sine sín chintji tí hora a. <sup>46</sup>Náxr-jón tjen tí nkexro ch'e xra tió itsi tí lamo la ts'ikon kixin xíkaha tjenchexiteyá ch'án tí xra k'uítuenhen ch'án. <sup>47</sup>Chaxín tí lamo la tsjanjon ch'án kaín tí xra chóna ch'án ts'etōan tí ch'ín a. <sup>48</sup>À ntá ijnko chojni ch'ehya xra jína la ntá tsjenkayáxin ch'án kixin kjá tjokahya tsokjan tí lámoe ch'án <sup>49</sup>la ntá tsjankixin ch'án tsjanjonko ch'án tí í so sín ch'e xra la ko tsjankixin sineko ch'án la ko its'ikao ch'án kaín tí sín sítókoan. <sup>50</sup>Ntá xrinahya tsokjan ti lamo ijnko yaon la ko ijnko hora noehya tí nkexro ch'e xra. <sup>51</sup>La ntá jehe ch'án la sinchekjasóte tí ch'ín kuítóhehe xra kjuínchexiteyáhya la ts'etōan ch'án kixin tsjasóte tí ch'ín a éxí tí sín jnkojínxónhya tjenkayáxin. Ntá ntiha la tsotsjánka ch'án la ko sinetaón neno ch'án.

## Ch'ín Jesús kjuíncheyóexin ch'án kixin ite sín tjarisoá

**25** Ntáchro ch'ín Jesús kixin: —Tí kjuachaxin kuènte Dios mé éxí yóhē ite sín tjarisoá sátsji tí tsótehe chojni chuénko linterna tjiá aceite la sákjuíchónhen sín tí ch'ín tsíkótehe. <sup>2</sup>In'ó sín la tsíkóyaxíenhya sín la in'ó sín ó tsíkóyaxínhin sín. <sup>3</sup>Tí sín tsíkóyaxíenhya na kjaxin la tsíkji-jiko sin linterna kjánchó tsíkji-jikohya sín aceite tsíkja inaá. <sup>4</sup>À ntá tí sín tsíkóyaxínhin la sátsíkjiko sín xro tjiá aceite la ko tí linterna kuènte sín. <sup>5</sup>À ntá tí ch'ín tsíkótehe la tjokahya kui

ch'án la ntá jehe sín mé tsikihi sín kotáchrín la tsík'ejójua sín kaín sín. <sup>6</sup>A ntá kuichjina k'áxrótjen la kuínhin sín t'èya ijnko chojni kixin: “Ó kui tí ch'ín tsíkótehe na t'axrjerá ntója tsoxetará ch'án”, ichro ch'án. <sup>7</sup>A ntá kaín tí sín tjarisoá la k'uàya sín la kjuasiyóxin sín tí linterna kuènte sín. <sup>8</sup>A ntá tí in'ó sín tsikóyaxíenhin la nixjehe sín tí sín in'ó tsikóyaxínhin ntáchro sín kixin: “Chjehéni intsí aceite kuèntará kixin ó k'uànká aceite tjiá linternéni”, ichro sín. <sup>9</sup>A ntá tí sín tsikóyaxínhin mé ntáchro sín kixin: “Náhi, tí aceite tí xikaha tsjanjonni intsí jahará la antsí jeheni la tsjachahya. Íchá jína sájtjik'ènará tí sítoxín ntiha”, ichro sín. <sup>10</sup>Ntá tí in'ó tí sín kóyaxíenhya mé sákjuík'ena sín aceite la ntá ó kui tí ch'ín tsíkótehe. Tí in'ó sín tjejóchónhen mé sákjuíko sín ch'án tí kia tsíkótehe sín la ntá ó tuénxín k'uikjéhe tí puerta. <sup>11</sup>Ntá chr'éxin ikui tí in'ó sín tjarisoá tsikóyaxíenhya la t'ínka sín puerta ntáchro sín kixin: “Ó kuini takitjehé nchia.” <sup>12</sup>A nta jehe ch'an kjuátehe ch'án ntáchro ch'án kixin: “Chaxín tí jahará la ní chonhyará”, ichro ch'an.

<sup>13</sup>Ntá ntáchro ch'ín Jesús ínaá kixin:

—Méxra xikaha tí jahará chrók'uejót-sjehérá kixin noahyará nkeyaon la nkehora itsi tí Xjeen Dios K'óna Chojni —ichro ch'án.

### Ch'ín Jesús kjuíncheyóexin ch'án kuènte chichaon

<sup>14</sup>Ntá ntáchro ch'ín Jesús kixin:

—Tí kjuachaxin kuènte Dios la yóhe ijnko chojni tjinkaon sáchrókjuí ch'án í jnko nación la ntá k'uíyehé ch'án tí sín ch'ehe ch'án xra la ntá chjéhe ch'án sín tí chichaon a kixin ts'ayakonhen sín.

<sup>15</sup>Ijnko ch'án la k'uáyéhe ch'án in'ó mil chichaon, la í jnko la k'uáyéhe ch'án iyó mil chichaon, la í jnko la k'uáyéhe ijnko mil chichaon. Tí nkexro kjuanjon chichaon la mé kónohe ch'án

nkexro ti tsjacha sich'e jnkojnko xra. Ntá jehe ch'án tió kjuixin kjuanjon ch'án la ntá sakjuí ch'án ikjín. <sup>16</sup>Ntá tí nkexro k'uáyéhe in'ó mil chichaon la kjuích'eko ch'án xra tí chichaon kuákja ch'án la kjuacha ch'án í jnko in'ó mil. <sup>17</sup>Kjaxin tí nkexro k'uáyéhe iyó mil chichaon mé xíkja ch'án í jnko iyó mil. <sup>18</sup>A ntá tí nkexro k'uáyéhe ijnko mil chichaon mé sákjuí ch'án la kjuích'éna ch'án ijnko tòye kjuavá ch'án tí chichaon kuènte lámóé ch'án.

<sup>19</sup>A ntá nchónhya nánó k'uátsínka la ntá ikjan tí lámóé sín kixin ntá tsjentoáko sín ch'án cuenta. <sup>20</sup>Saoxín kui tí nkexro k'uáyéhe tí in'ó mil la chjéhe ch'án tí lamo í jnko in'ó mil la ntáchro ch'án kixin: “Jaha me chjehéni in'ó mil la ó kjuachani í jnko in'ó. Tákjá tjinhin tí chichaon í”, ichro ch'án. <sup>21</sup>Ntá tí lamo mé ntáchro kixin: “Nchoxon tí xikaha. Jaha la ijnko chojni jína ch'e xra. La ó kjuínchexiteyá jína. Kjónté jehya xra jíé la kjuínchexiteyá jína la ntá tsotjaha ijnko xra antsí jíé la tjak'e tsöchéheni.” <sup>22</sup>Ntá chr'éxin ikui tí nkexro k'uáyéhe iyó mil la ntáchro ch'án kixin: “Jaha mé chjehéni iyó mil la kjuachani í jnko iyó. Tákjá tjinhin tí chichaon í”, ichro ch'án. <sup>23</sup>La ntá tí lamo ntáchro kixin: “Nchoxon jaha mé ijnko nkexro jína ch'e xra la ó kjuínchexiteyá. Kjónté jehya xra jíé la kjuínchexiteyá jína la ntá tsotjaha í jnko xra antsí jíé. Tjak'e tsöchéheni”, ichro ch'án. <sup>24</sup>A ntá ikui tí ch'ín k'uáyéhe ijnko mil la ntáchro ch'án kixin: “Ó nòna kixin ijnko chojni imá jiehe tí jaha la itjaa tí nonte jehya jaha k'uénkaxian la tsákjá nkehe kjónté k'uénkahya. <sup>25</sup>Méxra chrakonni la sákjuíkjak'emáni tí chichaon chrínki nche. Tákjá chíchakoan tjinhin”, ichro ch'án. <sup>26</sup>A ntá kjuátehe tí lamo kixin: “Jaha ijnko chojni jínahya la ko séhe. Jaha la ó noha kixin chrótjaa tí nonte k'uénkahya



la chrókuákjaá tí nkehe k'uénkahya. <sup>27</sup> A ntá tí chichaon chróchr'an banco. Ntiha chrókjuich'exín xṛa ntá tí ikjan janhan ntá chrók'uayáha antsí itsjé chichaon chrókjuacha kichó chica", ichro tí lamo. <sup>28</sup> A ntá nixjehe ch'án tí í so sín tjejó la ntáchro ch'án kixin: "Takitsjehérá tí mil chóna ch'án la chjehérá tí nkexro chóna tí ite mil chichaon <sup>29</sup> kixin tí nkexro kjónté itsjé chóna la mé ts'áyéhe antsí la ntá tí nkexro chónahya la kjónté tí intsi chóna la ts'axrjehe. <sup>30</sup> A ntá tí nkexro ch'ehya xṛa la tsétuénhén sátsji ch'án tí sítié ntója la ntá ntiha la tsotsjánka ch'án la ko sinetaón ch'án neno ch'án."

### Tsitóexín ijíé chojni chjasintajni

<sup>31</sup> A ntá tí tsi tí Xjeen Dios K'óna Chojni la tsikao ch'án kjuachaxién jíé éxí ijnko Réy la ko tsikao ch'án kaín xín tí sín ángel ntá ntaha tsjak'etjaxín ch'án tí trono ts'etoxánxín tí kjuachaxién jíé. <sup>32</sup> Ntiha kaín xín tí chojni tsíkjiixín nkuixín nación tsochjina tí tjen ch'án la jehe ch'án tsakitsjekjan ch'án ijnko la í jnko. Éxí ijnko nkexro t'ayakonhen kolélo mé tsakitsjekjan ch'án tí kolélo la ókjé ts'ixin va la ko tí koténtso la ókjé ts'ixin. <sup>33</sup> Méxra ts'etoxan ch'án kixin tí kolélo la ts'ixin nó tja ch'án chjina, a ntá tí koténtso la nó ti tja ch'án kjon. <sup>34</sup> Ntá tí Rey tsonixjehe tí sín tjejó tja ch'án chjina tsontáchro kixin: "Xrákirá jahará ti tjen kjuachaxin kuènte T'aná kixin T'aná ó kjuíncheyaonrá ch'án. Tí naxa kjuích'énahya Dios chjasintajni la xráxín kjuenkayáxin ch'án xikaha tsonhen. <sup>35</sup> Janhan mé k'uén kjinta la jahará kjuánjonrá nkehe kjoné. La ik'uén ntá la jahará kjuánjonrá nkehe ik'uia, la k'uájia éxí ijnko chojni kjuixín ikjín la jahará kjuánjonrá nketí k'ók'ána. <sup>36</sup> La ko k'uéchontahya kaná la jahará kjuánjonrá ika k'uít-sa, la ko kónina la jahará kjuasántsje-

hérá ti janhan, la kjuak'échjina la ntá jahará kjuasántsjehérá tí janhan." <sup>37</sup> A ntá tí sín jína la tsjanchankí sín kixin: "Ínchéni, ¿nkesá k'uíkonni kixin ik'uén kjinta ntá kjuanjonni nkehe kjónte? ¿La nkesá k'uíkonni kixin ik'uén ntá la kjuanjonni nkehe ik'uia? <sup>38</sup> ¿La ko nkesá k'uíkonni kixin ikjín kjuíxian ntá kjuanjonni nketí k'ók'ána? ¿La ko nkesá k'uíkonni kixin chontahya iká la kjuanjonni ika k'uít-sa? <sup>39</sup> ¿La nkesá k'uíkonni kixin kónfha o kjuak'échjina la ntá kjuíjitsjeheni tí jaha?" mé xikaha tsjanchankíhi sín ch'án. <sup>40</sup> A ntá tí Rey tsontáchro kixin: "Tió kjuínkít-sará ijnko kichó ni kjónté ijnko chojni nóè la mé yóhe kixin tí janhan chrókjuínkít-sará."

<sup>41</sup> A ntá tí Rey t'etoxan mé tsonixjehe tí sín tjejó nó tja ch'án kjon tsontáchro kixin: "Sátjirá jahará kixin jahará tsjasótiará. Sátjirá tsjasótiará tí tjen tí xrohi ts'ankahya. Mé tí xrohi tjechónhen kixin tsoche tí ch'ín Tsochren la ko kaín tí sín ángel kuènte ch'án. <sup>42</sup> Tí ik'uén kjinta la jahará kjuánjonhyará nkehe kjoné la ko ik'uén ntá la jahará kjuánjonhyará nkehe ik'uia. <sup>43</sup> K'uájia éxí ijnko nkexro kjuixín kjín la jahará kjuánjonhyará nketí k'ók'ána la ko k'uéchontahya kaná la jahará kjuánjonhyará ka chrók'uít-sa la ko k'uénina la kjuak'échjina la jahará kjuasántsjehyará tí janhan." <sup>44</sup> Ntá tí jehe sín la tsjanchankí sín kixin: "Ínchéni, ¿nkesá k'uíkonni kixin ik'uén kjinta la ik'uén ntá la ko kjuíxian kjín la ko chontahya iká la ko níha la ko kjuak'échjina? ¿Mé nkesá k'uíkonni xikaha la ntá kjuínkít-sahyani ti jaha?" tsixro sín. <sup>45</sup> La ntá tí Rey tsjatehe ch'án tsontáchro ch'án kixin: "Tí xikaha kaín tíha kjuínkít-sahyará ijnko chojni imá nóè la éxí xikaha kjuínkít-sahyará tí janhan." <sup>46</sup> A ntá tí sín jínahya xikaha kjuích'e la mé sátsjixin sín ntihi tsjasóte sín jnkochríxín. A ntá tí sín jína la sátsji sín ts'áyéhe sín kjuachón

jnkochríxín —mé xíkaha chrónka ch'ín Jesús.

**Tí sín nínkakonhen ch'ín  
Jesús tjenkayáxin sín kíxín  
nkexrí ts'óyán sín ch'án**

(Mr. 14.1-2; Lc. 22.1-2; Jn. 11.45-53)

**26** Ntá kjuixín chrónka ch'ín Jesús kaín tíha, ntá nixjehe ch'án tí sín k'uájiko ch'án, ntáchro ch'án kíxín:

<sup>2</sup>—Jahará ó nohará kíxín t'itjáyan iyó yaon ntá tsjasin sín tí kia pascua la ntá tí Xjeen Dios K'óna Chojni mé tsotsé sín ch'án tsjikaán sín ch'án tí tjejó tí sín t'etoan ntá tsjak'enkanı sín ch'án ijnko ntacruz —ichro ch'ín Jesús.

<sup>3</sup>Ntá tí sín nchat'á t'etoan la ko tí sín maestro tjako tí ley la ko tí sín táda kuènte tí sín judío mé kójnkotsé sín tí ntasin kuènte tí nchia kjuák'e ch'ín Caifás tí ch'ín nchat'á t'etoan. <sup>4</sup>Ntaha tjenkayáxin sín kíxín nkexrí tsotsé sín ch'ín Jesús la ts'óyán sín ch'án. <sup>5</sup> Ntá ntáchro sín kíxín:

—Tí síin kia la chrótséhyani ch'án kíxín imá tsonínkaon tí chojni —ichro sín.

**Ijnko tjan kjuikao aceite xraxé  
kujikite tjan ikja ch'ín Jesús**

(Mr. 14.3-9; Jn. 12.1-8)

<sup>6</sup>Ch'ín Jesús tjen chjasin Betania ntøe ch'ín Simón tí ch'ín k'uéchóna chinlepra. <sup>7</sup>Ntá xrínahya kóchjina ijnko tjan kjuikao tjan ijnko xro tsík'óna xro mármol mé kuíkaón aceite xraxé náxrjón la imá tje te k'uíte. Ntá tí tjene ch'ín Jesús ntá tí tjan a mé kujikite aceite ikja ch'án. <sup>8</sup>Ntá tí sín k'uájiko ch'ín Jesús mé k'uíkon sín xíkaha ntá kónínkaon sín la ntáchro sín kíxín:

—¿Nkekuènté kóxénhen tí xroan a?

<sup>9</sup>Íchá jína chrókóxixín itsje chichaon tí xroan ntá tí chichaon a chrókjuinkitsa tí sín nòe a —ichro sín.

<sup>10</sup>Ntá kuínhin ch'ín Jesús tí nkehe tjo sín, ntá ntáchro ch'án kíxín:

—¿Nkekuènté t'antaxínhínrá tí tjan i? Ó nchoxon ijnko nkehe jína kjuích'e tjan. <sup>11</sup>Tí sín nòe la ó xráxín ts'e-jókoará sín, a ntá janhan la jnkochríxín-hya ts'ejóni. <sup>12</sup>Tí nkehe kjuích'e tjan mé kjuíncheka tjan aceite xraxé tí cuerpo kuèntana la mé xíkaha kjuakoxín tjan kíxín xíkaha tsoxravána. <sup>13</sup>Ntá chaxín tjonkará kíxín kuènté chjasintajni tío tsjako sín tí tán jína tsaáxin sín ntá tsochrónka sín kíxín xíkaha kjuích'e tjan ntá tsoxraxinkakonxín sín kíxín nkehe tí kjuích'e tjan —ichro ch'ín Jesús.

**Ch'ín Judas kjuínchekji tí ch'ín Jesús**

(Mr. 14.10-11; Lc. 22.3-6)

<sup>14</sup>Ntá ijnko tí teyóxin sín k'uájiko ch'ín Jesús mé it'in Judas Iscariote sákjuínixjehe ch'án tí sín nchat'á t'etoan <sup>15</sup>la ntáchro ch'án kíxín:

—¿Nkekjaín tsochjinará tsoxrjanka nketí tjen tí ch'ín Jesús? —mé xíkaha chro tí ch'ín Judas.

Ntá tí sín nchat'á t'etoan kjuenkehe sín ch'án treinta chichaon plata. <sup>16</sup>Ntá tuénxín tí hora tí ch'ín Judas mé xritjeyá ch'án nkexrí tsochénka ch'án sín nketí tjen tí ch'ín Jesús.

**Kjuixixín kjonéko sín tí ch'ín Jesús**

(Mr. 14.12-25; Lc. 22.7-23;

Jn. 13.21-30; 1 Co. 11.23-26)

<sup>17</sup>Ntá ikui tí yaon xrankíxixín kia sine sín niotja tsíkjikohya tí xroan t'ánkíxín niotja. Ntá tí sín k'uájiko ch'ín Jesús mé kóchjina sín kjuanchankíhi sín ch'án kíxín:

—¿Inchéni, nketí tjinkávan sincheyaxíxinni tí sineni tí kia pascua? —ichro sín.

<sup>18</sup>Ntá ntáchro ch'án kíxín:

—Sátsjirá Jerusalén la tsjasánrá ntøe ijnko ch'ín la nixjehérá ch'án tson-táchrorá kíxín: “Ntáchro Maestro kuèn-

téni kixin í séhya *naxa* tsjak'e ch'án la ntá ijie ntõa ntíhi tsoyaxixin kixin sineko ch'án tí sín xriko ch'án tí kia pascua", tsixrorá —mé *xikaha* ichro ch'ín Jesús.

<sup>19</sup> *A* ntá tí sín k'uájiko ch'ín Jesús mé kjuínchexiteyá sín la kjuíncheyaxixin sín ntíha tí nkehe sine sín kia pascua.

<sup>20</sup> Tió ntá kóntó la ntá ch'ín Jesús k'uéjoko tí teyó sín k'uájiko ch'án kjóne sín. <sup>21</sup> La ntá tió *naxa* tjejóne sín la ntáchro ch'ín Jesús kixin:

—Chaxín tjonkará kixin jnkójnra tje-jorá ntíhi mé sinchekjirána —ichro ch'án.

<sup>22</sup> Ntá kaín sín la kjuankixin kóxakonhen sín k'uává sín la ntá kjuankixin sín jnkójnko sín kjuanchankíhi sín tí ch'ín Jesús kixin:

—Inchéni, ¿á jeheni ní? —ichro sín.

<sup>23</sup> Ntá kjuátehe ch'ín Jesús kixin:

—Tí nkexro tsochr'ánkíkian niotja tí plato a mé tí nkexro a mé sinchekjina ch'án. <sup>24</sup> Tí Xjeen Dios K'óna Chojni *xikaha* tsjasóte ch'án éxí nixja xroon itén Dios, *a* ntá nõa tí ch'ín sinchekji ch'án. Íchá jína chrókokjéhya ch'án —mé *xikaha* ichro ch'ín Jesús.

<sup>25</sup> Na ntá tí ch'ín Judas tí ch'ín sinchekji ch'ín Jesús, mé ntáchro ch'án kixin:

—Maestro, ¿á janhan? —ichro ch'án.

Ntá ntáchro ch'ín Jesús kixin:

—Méxra *xikaha* tsintáchrua —ichro ch'án.

<sup>26</sup> Ntá tió tjejóne sín na ch'ín Jesús mé kuákja ch'án tí niotja ntá kjuanchehe ch'án kjuasáyé Dios. Ntá kóchrít'õ ch'án tí niotja ntá chjéhe ch'án kaín tí sín k'uájiko ch'án sine sín. Ntá ntáchro ch'án kixin:

—Sinterá tíhi mé cuerpo kuëntana —ichro ch'án.

<sup>27</sup> Na ntá kuákja ch'án ijnko vaso tjiá inté to uva na ntá kjuanchehe ch'án

kjuasáya Dios ntá kjuixin ntá chjéhe ch'án kaín tí sín tjejóko ch'án ik'ui sín. Ntá ntáchro ch'án kixin:

—Tíhi mé kaín rá it'irá <sup>28</sup> kixin tíhi mé *jnina* mé chrónkaxín ijnko nkehe nixin tsonhen. Mé tí *jnina* ts'ítji na mé tsjacha tsjinkitsa nchónhya chojni kixin ts'íjmáxin ijíé sín. <sup>29</sup> Tjonkará kixin ts'lhya janhan tí inté to uva inaá tsjixrakájia tí yaon ts'ayájia kjuachaxin kuente T'aná ntá xík'ini inté to uva inaá —mé *xikaha* ichro ch'ín Jesús.

**Ntá chrónka ch'ín Jesús kixin ch'ín Pedro sinchemá ch'án kixin chónhya ch'án tí ch'ín Jesús**

(Mr. 14.26-31; Lc.

22.31-34; Jn. 13.36-38)

<sup>30</sup> Ntá itsje sín ijnko himno ntá kjuixin ntá sákjuí sín tí *jnã* Olivo. <sup>31</sup> Ntá ntáchro ch'ín Jesús kixin:

—Jahará tsítõnaráni kaín rá ijie tie kixin ntáchro tí xroon itén Dios kixin: “Its'en tí nkexro Pastor t'ayakonhen kolélo ntá kaín tí ko mé tsjichroe va.”\*

<sup>32</sup> Na ntá tió tsoxechónna ntá sátsjia senó estado Galilea, *a* ntá jahará la chr'éxin tsochréhérá —ichro ch'án.

<sup>33</sup> Ntá kjuátehe ch'ín Pedro ntáchro ch'án kixin:

—Kjónté kaín sín tsítóha sín ntá janhan la náhi —ichro ch'án.

<sup>34</sup> Ntá ntáchro ch'ín Jesús kixin:

—Chaxín tsoxrxjanka kixin tí tie i *naxa* tsotsjehya kochíntõa la ó *sinchemána* níya —ichro ch'án.

<sup>35</sup> Ntá ntáchro ch'ín Pedro kixin:

—Kjónté koína its'én la *sintamáhya* tí jaha —ichro ch'án.

La ntá kaín tí sín k'uájiko ch'án na *xikaha* ichro sín kaín sín.

\*26:31 Zacarías 13.7



nchat'á t'etōan xra. <sup>52</sup>Ntá ntáchro ch'ín Jesús kixin:

—Chr'axenhén tjoē chica espada méhe. Kaínxín tí sín tjàyaxín chica espada la xikaha ts'enixín sín. <sup>53</sup>¿Á noahyará kixin janhan jina chrókjuáncháha T'aná la ntá tuénxín chróchr'an ch'án teyó ejército sín ángel? <sup>54</sup>Kjánchó tí xikaha chrókónhen la chróxiteyáhya éxí nixja xroon itén Dios kixin itén Dios mé chrónka kixin t'ichjánxín ó jehí xikaha tsonhen —ichro ch'ín Jesús.

<sup>55</sup>Ntá ch'ín Jesús mé ntáche ch'án tí sín ikui kixin:

—Jahará k'uinkakoará chica espada la ko inta kixin tsotserána éxí chrótseserá ijnko síchee xikaha. A ntá kaín yaon kjuak'é nkaxenhen nínko kjuákua ¿na ntá nkexrí ntiha mé tsexinhyarána? <sup>56</sup>Kjánchó jehí kaín tíha tsonhen kixin tsoxiteyá tí chrónka tí sín tsíkjin xroon itén Dios ósé —ichro ch'án.

Mé xikaha ntá kaín tí sín k'uájiko ch'ín Jesús na mé kuítóhe sín ch'án, ntá sákjuí sín.

### Ch'ín Jesús kóchjina ch'án tí síxreé t'etōan

(Mr. 14.53-65; Lc. 22.54-55,  
63-71; Jn. 18.12-14, 19-24)

<sup>57</sup>Ntá tí sín itsé ch'ín Jesús la sákjuíko sín ch'án ntōe ch'ín Caifás, tí nchat'á t'etōan. Ntaha mé tsíkójnkotsé kaín tí sín maestro tjako tí ley la ko tí sín t'etōan kuènte nínko. <sup>58</sup>Ntá ch'ín Pedro ikjín tinkáchréhe ch'án ntá kjuíji ch'án tí ntásin ntōe tí nchat'á t'etōan la kjaxin k'uixenhen ch'án tí ntásin la kjuák'eko ch'án tí sín policía kuènte nínko kixin tsotsjehe ch'án nkerí tsonhen.

<sup>59</sup>Ntá tí sín nchat'á t'etōan la ko tí sín táda la ko kaín tí sín t'etōan mé kjueyá sín nkexrí ts'eka sín jie tí ch'ín Jesús

kixin jina chrók'óyan sín ch'án. <sup>60</sup>Ntá kjónté nchónhya chojni kuikjanchia sín jie kjánchó k'uitjahya sín nkerí jie t'íká ch'án. Ntá kjónté la kóchjina iyó tsetigo ntoáhya chrónka sín <sup>61</sup>la ntáchro sín kixin:

—Ó kuínhinni ntáchro ch'án kixin: “Janhan na ts'oxíka tí nínko kuènte Dios la ntá iní yaon koá la ó tsjaké inaá”† —mé xikaha chro sín.

<sup>62</sup>Ntá tí nchat'á t'etōan k'uínkatjen la kjuanchankíhi ch'án tí ch'ín Jesús, ntáchro ch'án kixin:

—¿Nkekuènté tjátééhya ninkehó? ¿Á chaxín xikaha tsintáchrúa éxí xikaha ichro sín? —ichro ch'án.

<sup>63</sup>Ntá ch'ín Jesús la táníkoá ch'án nixjahya ch'án. Ntá ntáchro tí nchat'á t'etōan kixin:

—Kjuachaxién ihnié tí Dios tjechón t'akjénxian chrónka ntoá, ¿á jaha tí Cristo Xjeen Dios? —kjuanchankí ch'án.

<sup>64</sup>Ntá kjuátēhe ch'ín Jesús ntáchro ch'án kixin:

—Éxí tí ntáchrúa jaha. Ntá kjaxin xrajanka kixin chr'éxín ts'ikuan kixin tí Xjeen Dios K'óna Chojni mé tsjak'etjaxín nánko tí tja chjina Dios chónka kaín sín kjuachaxin la ko ts'ikuan itjuí mé tsixín ch'án nkaya nkajní —ichro ch'ín Jesús.

<sup>65</sup>Ntá kuínhin tí nchat'á t'etōan la ntá imá kónínkaon ch'án ntá kótséchje ch'án tí iké ch'án la ntáchro ch'án kixin:

—Tí ch'ín a k'uántaxínhin ch'án Dios kixin xikaha nixja ch'án. Méxra t'ichjánxinhya í so chojni tsochrónka. La ntá jahará la ó kuínhínra kixin nkexrí nixja ch'án. <sup>66</sup>¿A ntá jahará la, ¿nkechrorá? —mé ichro tí nchat'á a.

Ntá kjuátēhe sín ntáchro sín kixin:

—Chónka ch'án jie la chrók'uen ch'án —ichro sín.

<sup>67</sup>Ntá iso sín la kuíkíte sín ntate sín nkayakon ch'án na í so sín na kjuate sín

†26:61 Juan 2.19

ch'án la í so la chjéhe sín ikon ch'án.

<sup>68</sup>La ntáchro sín kixin:

—Tí chaxín tí Cristo jaha la tónoha nkexro kjuatia —ichro sín.

### Ch'ín Pedro kjuínchemá ch'án kixin chónhya ch'án tí ch'ín Jesús

(Mr. 14.66-72; Lc. 22.56-62; Jn. 18.15-18, 25-27)

<sup>69</sup>Ntá ch'ín Pedro naxá tjetjaxin ch'án tí ntasin la ntá ikui ijnko tjan ch'e xra ntiha kóchjinehe ch'án, la ntáchro tjan kixin:

—Kjaxian xríkoa tí ch'ín Jesús tsíkjin estado Galilea —ichro tjan.

<sup>70</sup>Á ntá ch'ín Pedro kjuínchemá ch'án nkayakon kaín sín la ntáchro ch'án kixin:

—Nonahya nkehe tí ntáchrua —ichro ch'án.

<sup>71</sup>Ntá sákjuí ch'án kjuíji ch'án chjina tí puerta. La ntá í jnko tjan k'uíkon tí jehe ch'án la nixjéhe tjan kaín sín tjejóntaxín, la ntáchro tjan kixin:

—Tí ch'ín i la kjaxin k'uájiko ch'án tí ch'ín Jesús tsíkjin chjasin Nazaret —ichro tjan.

<sup>72</sup>Ntá ch'ín Pedro kjuínchemá ch'án inaá, k'uákjenxin ch'án ihnié Dios, ntáchro ch'án kixin:

—Chonhya tí nkexro a —ichro ch'án.

<sup>73</sup>Ntá antsí chr'éxin tí sín k'uéjontaxín kóchjinehe sín ch'ín Pedro la ntáchro sín kixin:

—Chaxín jaha kjaxin jnkojín tí sín a kixin tjásoanxínni tí nixja jaha —ichro sín.

<sup>74</sup>Ntá k'uákjenxin ch'án ihnié Dios ntáchro ch'án kixin:

—Chonhya tí nkexro a —ichro ch'án.

Na ntá xrínahya itsje kochíntoa. <sup>75</sup>Ntá ch'ín Pedro mé xraxinkaon ch'án kixin nkexrí chrónka ch'ín Jesús senó kixin: “Naxá tsotsjehya kochíntoa mé ó tsjixin sínchemána nýa kixin chonhyana.”<sup>‡</sup>

Ntá xíkaha xraxinkaon ch'ín Pedro ntá k'uaxrjenta ch'án ntiha la imá tsjánka ch'án la ó mero ts'enxín ch'án tí kjuancheníhi, la sákjuí ch'án.

### Kjuikénhen sín ch'ín Jesús tí ch'ín Pilato

(Mr. 15.1; Lc. 23.1-2; Jn. 18.28-32)

**27** Ntá tí kóyaon k'uínkaséyan ntá kaín sín nchat'á t'etōan la ko tí sín t'etōan kuènte tí sín judío kjuenkayáxin sín nkexrí ts'óyán sín tí ch'ín Jesús. <sup>2</sup>Ntá tjechronteto ch'án sákjuiko sín ch'án tí tjen tí ch'ín Poncio Pilato, tí ch'ín gobernador romano.

### Ik'uén ch'ín Judas

<sup>3</sup>Ntá tí ch'ín Judas, tsíkjinchekji ch'ín Jesús, mé k'uíkon ch'án kixin ts'óyán sín tí ch'ín Jesús. La ntá xraxinkaon ch'án tí jie kjuasin ch'án la sákjuikénhen ch'án sín inaá tí treinta chichaon plata kuákja ch'án, mé chjéhe ch'án tí sín nchat'á t'etōan la ko tí sín tada. <sup>4</sup>La ntá ntáchro ch'án kixin:

—Ó kjuasinni jie kixin kjuínchekjini ijnko nkexro tjóá —ichro ch'án.

Á ntá jehe sín kjuátehe sín kixin:

—Ntá janhanna la nonahyana tíha. Tíha la ó jie kuènta —ichro sín.

<sup>5</sup>Ntá ch'ín Judas mé sákjuík'e tí chichaon nkaxenhen nínko ntá sákjuí ch'án kjuísik'á isin ch'án nta.

<sup>6</sup>Ntá tí sín nchat'á t'etōan kjuenájín sín tí chichaon la ntáchro sín kixin:

—Tí chichaon la kóxixin ijnié chojni la chrokjuahya chr'áxenhenni tí caja kuènte ofrenda —ichro sín.

<sup>7</sup>La ntá kjuenkayáxin sín jnkokoá kixin tí chichaon la ts'enaxín sín ijnko nonte it'in Nontee Tí Ch'ín Ch'éna Nhésen kixin tsochóna sín nketí tsoxravá tí chojni tsíkjin ikjín. <sup>8</sup>Mé xíkaha kjuínchek'in sín tí nonte mé

<sup>‡</sup>26:75 Mateo 26.34

Campo Kuènte Jni la hasta ijie la naxa xikaha nchek'in sín. <sup>9</sup>Mé xikaha ó xiteyá tí nkehe k'uéntáchro profeta Jeremías, ntáchro ch'án kixin: “Kuákja sín tí treinta chichaon plata (tí chichaon kjuanjon tí sín israelita kuènte tí ch'ín a), <sup>10</sup>la k'uénaxín sín tí nonte kuènte tí ch'ín ch'éna nchésen kixin xikaha kjuínchexiteyá sín tí nkehe k'uetuanna ìnchéni.”<sup>9</sup>

### Ch'ín Jesús kóchjina nkayakon tí gobernador Pilato

(Mr. 15.2-5; Lc. 23.3-5; Jn. 18.33-38)

<sup>11</sup>Na ntá ch'ín Jesús sákjuíko sín ch'ín nkayakon tí ch'ín gobernador la ntá jehe ch'án kjuanchankí ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'ín Jesús, ntáchro ch'án kixin:

—Éxí ntáchrúa jaha —ichro ch'án.

<sup>12</sup>Na ntá tí sín nchat'á t'etoan la ko tí sín táda t'etoan t'eka sín jie tí ch'ín Jesús kjánchó la ch'ín Jesús la ninkehó kjuáteheya.

<sup>13</sup>▲ ntá ch'ín Pilato kjuanchankí ch'án kixin:

—¿Á kiénhaya kaín tí jie t'eka sín tí jaha? —ichro ch'án.

<sup>14</sup>Kjánchó ch'ín Jesús la ninkehó kjuáteheya ch'án. Ntá tí ch'ín gobernador la chrakon ch'án.

### K'uetuotan sín kixin its'en ch'ín Jesús

(Mr. 15.6-20; Lc. 23.13-25;  
Jn. 18.38—19.16)

<sup>15</sup>▲ ntá tí kié pascua mé kuènnen tí ch'ín gobernador kixin jnkojnko nánó takitsjexín ch'án ntóechiso ijnko chojni tjechjina. Ntá tí chojni mé tsjanchia sín nkexro tí tsítóhe ch'án sátsji. <sup>16</sup>Ntá tjechjina ijnko ch'án, mé kaín sín ntiha ó nohe sín kixin jínahya ch'án, mé

it'in ch'án Barrabás. <sup>17</sup>Ntá itsjé chojni kójnksé la ntá ch'ín Pilato mé kjuanchankí ch'án kixin:

—¿Nkexro tjinkáonrá ts'atjánta, á tí ch'ín Barrabás o á tí ch'ín Jesús nchek'in sín Cristo? —ichro ch'án.

<sup>18</sup>Kixin tí ch'ín Pilato la ó nohe ch'án kixin kjuachjinoxínhin chóna tí sín kjuíkaán tí ch'ín Jesús.

<sup>19</sup>Ntá jehe ch'án naxa tjetjixin ch'ín tí nchekitoxixin ch'án ijíé chojni la ntá tí ichjién ch'án mé k'uetuennen tjan ijnko chojni tsjichénka ch'án kixin tsjiatehaya ch'án tí nkexro jína kixin kóntó náxrjónhaya k'uíkonxín tjan kotáchríen tjan kixin tí jehe ch'án.

<sup>20</sup>▲ ntá tí sín nchat'á t'etoan la ko tí sín táda t'etoan a mé nixjehe kaín tí chojni tsíkóchjina kixin chrókjuanchia sín kixin chrókuítóhe ch'án tí ch'ín Barrabás sáchrókjui, a ntá ch'ín Jesús mé chrók'uen. <sup>21</sup>▲ ntá tí ch'ín gobernador mé nixjehe ch'án sín inaá kjuanchankí ch'án kixin:

—¿Nkexro tí yaá sín tjejó ntihi tjinkáonrá ts'atjánta? —ichro ch'án.

Ntá kjuátehe sín ntáchro sín kixin:

—Ch'ín Barrabás mé chrók'uatjánta ch'án —ichro sín.

<sup>22</sup>▲ ntá ch'ín Pilato mé kjuanchankí ch'án kixin:

—¿A ntá nkehe sít'aha tí ch'ín Jesús tí ch'ín nchek'inrá Cristo? —ichro ch'án.

Ntá kaín sín kjuátehe sín kixin:

—¿Tsjak'enkání ch'án ntacruz! —ichro sín.

<sup>23</sup>Ntá ch'ín Pilato kjuanchankí ch'án ntáchro ch'án kixin:

—¿Xá nkehe tí kjuíche tí ch'ín i kixin? —ichro ch'án.

Ntá antsí má itsen k'uúxite sín, k'óyako sín, ntáchro sín kixin:

—¿Tsjak'enkání ch'án ntacruz! —ichro sín.

<sup>24</sup> Ntá ch'ín Pilato k'uúkon ch'án kixin í kohya tsjitóxinhin sín tsjenkayáxin sín la antsí má k'uúxité sín, nínkaon sín, la ntá kjuanchia ch'án xrakao sín inta, la nkayakon kaín tí sín tsíkójnkotsé ntaha k'ònti ch'án tja ch'án. La ntáchro ch'án kixin:

—Janhan tsámáhya jie tí its'en tí nkexro í chóntahya jie. Jahará xíkaha tjinkáonrá tsonhen —ichro ch'án.

<sup>25</sup> Ntá kaín sín kjuátehe sín kixin:

—Jeheni la ko xjeenni mé yámáni tí jie tí its'en tí nkexro í —ichro sín.

<sup>26</sup> Ntá ch'ín Pilato kuítóhe ch'án kixin sáchrókjui tí ch'ín Barrabás. Ntá tuénxín k'uetóan ch'án kixin tsjate sín tí ch'ín Jesús la ntá kjuínchek'áyéhe ch'án tí sín tsjak'enkani sín ch'án ntacruz.

<sup>27</sup> A ntá tí sín soldado a mé sákjuúko sín tí ch'ín Jesús tí palacio kuènte tí ch'ín gobernador. Ntaha kójnkotséxin kaín tí sín soldado romano la k'uántatjen sín tí jehe ch'án. <sup>28</sup> Ntá kuakitsjehe sín tí iké ch'án la ntá kjuínchek'inkáya sín ch'án ijnko ka kjátse tié. <sup>29</sup> La kjuak'enkaya sín kja ch'án ijnko corona tsíkjich'éna sín ntach'í la ko kjuanjon sín ijnko nta vara kixin tjenkáya tja ch'án chjina. La ntá k'uejóxin toch'in sín nkayakon ch'án la kjuanoá sín ch'án, ntáchro sín kixin:

—Jnkochríxín tsjak'é tsétuènhén tí sín judío —ichro sín.

<sup>30</sup> La ko kjaxín ntaté sín kuikite sín nkayakon ch'án la ko kuákja sín tí nta tjexraá ch'án la t'íchjéxin sín kja ch'án.

<sup>31</sup> Ntá kjuixin kjuanoá sín ch'án na ntá kuakitsjehe sín ch'án tí ka kjátse tié ntá kjuínchek'inkáya sín tí iké ch'án xráxín. Ntá sákjuúko sín ch'án kixin tsjak'enkani sín ch'án ntacruz.

### Kjuak'enkáni ch'ín Jesús ntacruz

(Mr. 15.21-32; Lc. 23.26-43; Jn. 19.17-27)

<sup>32</sup> A ntá sákjuúxin sín ntiha la xéta sín ijnko ch'ín kjuixín ch'án chjasin Cirene, mé it'in ch'án Simón. Ntá k'uetuènhén sín ch'án kixin tsámá ch'án tí ntacruz tsjak'enkani ch'in Jesús.

<sup>33</sup> Ntá kjuíji sín ijnko tjo it'in Gólgota na mé nkívee sín t'axrjéxin Nta Hueso Kja Chojni Tsík'en. <sup>34</sup> Ntá chjéhe sín ch'ín Jesús xranvino tsík'ixinkíqjanxín xroan tsjá kjánchó jehe ch'án k'uúhya ch'án.

<sup>35</sup> A ntá tí sín soldado kjuixin kjuak'enkani sín ch'án tí ntacruz ntá tí iké ch'án kjuích'exín sín suerte kixin nkexro tsakja. Mé xíkaha xiteyá tí nkehe nixja tí sín k'uechrónka itén Dios ósé, ntáchro kixin: “Nchónhya suerte kjuích'exín sín tí kaná.”<sup>8</sup> <sup>36</sup> Ntá tí sín soldado ntaha k'uejónnta sín t'ayakonhen sín ch'án. <sup>37</sup> Ntá kjuak'enkani sín tí ikja tí ntacruz ijnko ntachiso ntáchro kixin: “Ch'ín Jesús mé tí ch'ín Rey t'etuènhén tí sín judío.”

<sup>38</sup> Kjaxín yaá tí síchee k'uejójyáni sín ntacruz ijnko la nó tja chjina la í jnko la nó tja kjon. <sup>39</sup> Ntá tí sín tinkák'atsínka mé kjuanoá sín ch'án tinkátjía kja sín <sup>40</sup> la ntáchro sín kixin:

—Jaha ntáchrua kixin chrók'oxíka tí nínko a ntá íní koá yaon la ó chrókjuixin chrókjuích'éna inaá,\*\* ichrua. Méxra ijie jahvá nchekaá asán. Tí chaxín jaha Xjeen Dios la jahvá tjasinkajinxían tí ntacruz méhe —ichro sín.

<sup>41</sup> La ntá kjaxín tí sín nchat'á t'etóan la ko tí sín maestro tjako tí ley la ko tí sín fariseo la ko tí sín k'uetóan kuènte nínko kjuanoá sín ch'án, ikjo sín kíchó sín kixin:

§27:35 Salmo 22.18

\*\*27:40 Juan 2.19



<sup>42</sup>—Jehe ch'án mé kjuíncheakaá ch'án ókjé chojni ntá jehe ch'án xitjahya sincheakaá asén ch'án. Kja tí chaxín jehe ch'án tí Rey kuènte Israel ntá jehó ch'án chrókuinkajinxin ch'án asén ch'án tí ntacruz kixin ntá kjaxinni chrókuitekaonni tí jehe ch'án. <sup>43</sup>Jehe ch'án tsintáchro ch'án kixin Dios tjaha tsintáchro ch'án kixin Dios tjinkitsa tí jehe ch'án la ntá tsotsjeheni á chaxin tjinkaon Dios sincheakaá tí jehe ch'án kixin tsintáchro ch'án kixin Xjeen Dios tí jehe ch'án —ichro sín.

<sup>44</sup>Kjaxin tí síchee sínkáni ntacruz k'uántaxínhin sín ch'án.

### **Ik'uéen ch'ín Jesús**

(*Mr. 15.33-41; Lc.*

*23.44-49; Jn. 19.28-30*)

<sup>45</sup>Ntá chonkixin hasta las tres kónjín mé k'uúxin tie chjasintajni. <sup>46</sup>Ntá tí hora a ch'ín Jesús itsen k'uèya ch'án, ntáchro ch'án kixin:

—Elí, Elí, ¿lama sabactani? —mé tíhi t'axrjexín kixin: It'éni, It'éni, ¿nkekuènté kuitohéni?†† —mé xikaha ichro ch'án.

<sup>47</sup>Ntá iso sín tjejóntaxín kuínhin sín ntá ntáchro sín kixin:

—Tí ch'ín a mé t'fyehé tí ch'ín profeta Elías —ichro sín.

<sup>48</sup>Ntá ijnko ch'ín kuinká ch'án sákjuúfkakja ch'án ijnko ka ntá chr'ánkí ch'án xranvino isán ntá tí ka a kjuak'ekjen ch'án ijnko nta kjinjin ntá kjuínchechrin ch'án kixin chrók'ui ch'ín Jesús.

<sup>49</sup>Ntá í so sín ntáchro sín kixin:

—Nté títohé ch'án. Tsotsjeheni á tsi ch'ín Elías sincheakaá tí jehe ch'án —ichro sín.

<sup>50</sup>Ntá ch'ín Jesús itsen k'uúyato ch'án inaá, ntá kjuixin ik'uéen ch'án. <sup>51</sup>Mé ntá tuénxín k'uúchje tí ka tjenkakuénxín nkaxenhen nínko. Mé k'uúchje tí ka k'lóna yaá tí kjuankixixín noi hasta

nonte. La ko kuínkí nonte la ko tí tjo la kjaxin xitjehé. <sup>52</sup>La ko ó xitjehé tí tòye tsíxravá chojni la ko ó xechón itsjé tí sín k'uékinkáchónki Dios. <sup>53</sup>Kaín tí sín a mé k'uaxrjexín sín tí tòye, la tió kjuixin xechón ch'ín Jesús ntá k'uúxenhen sín tí chjasin tjóá mé chjasin Jerusalén la ntaha itsjé chojni k'uúkon kixin xíxechón tí sín a.

<sup>54</sup>Ntá tí ch'ín capitán la ko tí sín k'uéjókó ch'án, mé tí sín t'ayakonhen ch'ín Jesús, na ntá k'uúkon sín kuínkí nonte la kaín tí í so nkehe la ntá imá chrakon sín, la ntáchro sín kixin:

—Chaxín tí nkexro a mé Xjeen Dios.

<sup>55</sup>Ntá ntiha nchónhya chojni chjin ikjín tjejó sín, tjejótsjehe sín. Jehe sín k'uékinkáchréhe sín ch'ín Jesús tí kjuix-ín ch'án estado Galilea kixin mé ntiha kjuankixixín sín k'uékjinkitsa sín ch'án.

<sup>56</sup>Ntaha kjaxin tjen tjan María Magdalena la ko tjan María, iné tí ch'ín Jacobo, la ko ch'ín José la ko tí iné tí xjeen tí ch'ín Zebedeo.

### **Ntá xrává ch'ín Jesús**

(*Mr. 15.42-47; Lc.*

*23.50-56; Jn. 19.38-42*)

<sup>57</sup>Ntá tí ó ntá kóntó ikui ijnko ch'ín it'in José, mé ijnko ch'ín rico. Chjasén ch'án mé Arimatea la jehe ch'án kjaxin k'uéchréhe ch'án tí ch'ín Jesús. <sup>58</sup>Ntá tí ch'ín José sákjuútsjehe ch'án ch'ín Pilato kjuúkjanchia ch'án tí cuérpoé tí nkexro Jesús. Ntá ch'ín Pilato mé kjuanjon ch'án kjuachaxin. <sup>59</sup>Ntá ch'ín José mé kuákja ch'án tí cuerpo ntá kjuínchek'isímá ch'án ijnko ka tjóá. <sup>60</sup>Na ntá kjuak'enkaya ch'án ijnko tòye nixin kuènte ch'án kixin senó tsíkjich'éna ch'án. Ntá ijnko xro jíe k'uúkjèxín ch'án tí ntója tí tjo, ntá kjuixin ntá sákjuú ch'án. <sup>61</sup>Ntaha kjuák'e tí tjan

María Magdalena la ko í jnko tjan María tjejótxaxin sín ntoí chok'èxin tjen tòye.

### Tí sín soldado k'uáyakonhen tí tòye xrává ch'ín Jesús

<sup>62</sup> A ntá tí yaon ó kjuixin kjuasiyóxin sín nkehe kuènte tí yaon t'ok'éhe sín, la ntá tí sín nchat'á t'etoan la ko tí sín fariseo sákjuítsjehe sín tí ch'ín Pilato <sup>63</sup> la ntá ntáchro sín kixin:

—Ó xraxinkaonni kixin tió naxa kjuák'echón tí nkexro kjuích'ia la tsíntáchro ch'án kixin ts'atsínka iní yaon ntá tsoxechón ch'án inaá, tsíchro ch'án. <sup>64</sup> Méxra tsétuñhén tí sín soldado kixin ts'ayakonhen sín tí tòye tsoxétjajia tí nixin yaon. Tí náhi, la kjá tie itsi tí sín k'uájiko ch'án la tseé sín tí cuerpo kuènte ch'án la ntá chr'éxin tsochénta sín chojni kixin ó xíxechón tí nkexro a, mé xikaha sich'ia sín. La ntá tí xikaha sich'e sín antsí má sich'ia sín que tí xrankixín —mé xikaha ichro sín.

<sup>65</sup> Ntá ntáchro ch'ín Pilato kixin:

—Ntihi tjejó soldado. Sátsjirá la ts'ayakonhenrá jína tí tòye éxi tjinkáonrá —ichro ch'án.

<sup>66</sup> Na ntá sákjuí sín la kjuak'e sín ijnko sello chrítaón tí xro tjejkèxin tí tòye la kuítóhe sín tí sín soldado ntahó kixin ts'ayakonhen sín.

### Ó xechón ch'ín Jesús

(Mr. 16.1-8; Lc. 24.1-12; Jn. 20.1-10)

**28** Ntá ó k'uátsínka tí yaon t'ok'éhe sín. Ntá chjino t'inkaséyan tí yaon xrankixín semana, la ntá tjan María Magdalena la ko tí í jnko tjan María sákjuítsjehe sín tí tsíkixravá Jesús. <sup>2</sup> Ntá xrinahya kuínkí nonte imá tjan kixin ijnko ángel kuènte Ìnchéni k'uínkajinxin nkaya nkajni la kjuíji ch'án tí tsíxravá Jesús la kjuakjiin ch'án tí xro a tjejkèxin tòye la ntá chrítaón tí xro a kjuák'ekjen ch'án. <sup>3</sup> Tí ángel la imá tjákiní tsjehe éxi ijnko xrohi la tí iké ch'án

la imá tjóá tsjehe éxi chrinta. <sup>4</sup> Tí sín soldado mé k'uíkon sín xikaha la ntá síxranka sín chrakon sín la éxi tsík'en sín xikaha k'uéjó sín. <sup>5</sup> La ntá tí ángel mé ntáche ch'án tí chojni chjin kixin:

—Chrakonhyará. Janhan ó nòna kixin xritjéyará tí nkexro Jesús mé tí nkexro tsíkjak'enkání ntacruz. <sup>6</sup> Kjánchó í kohya ch'án ntihi ó tsíxechón ch'án inaá éxi chrónka ch'án senó. Xrákirá tsjehérá tí tsíkjak'e sín ch'án, í kohya ch'án. <sup>7</sup> Ntá sátsjirá tjoka tjíchenkará tí sín k'uájiko ch'án kixin: “Tí nkexro la ó tsíxechón. Ó kuítónxin ch'án ntia sátsji ch'án estado Galilea. Ntiha ts'ikonrá ch'án”, mé xikaha tsochronkará. Kaín tíha mé tjonkará —mé xikaha chrónka tí ch'ín ángel.

<sup>8</sup> A ntá tí chojni chjin tjoka sákjuíxin sín tí tsíxravá tí nkexro Jesús, la chrakon sín la ko chéhe sín la sákjuíchénka sín tí sín k'uék'ajiko ch'ín Jesús. <sup>9</sup> Ntá xrinahya titáya k'uíkuèn sín kixin itjen tí ch'ín Jesús la nixjehe sín ch'án. Ntá kóchjinehe sín ch'án la kjóá sín toté ch'án, kuítekaon sín ch'án. <sup>10</sup> La ntáchro ch'án kixin:

—Chrakonhyará sátsjirá tjíchenkará tí sín kichó ni kixin sáchrókjuí sín estado Galilea la ntaha ts'ikon sín tí janhan —mé xikaha ichro ch'ín Jesús.

### Tí nkehe chrónka tí sín soldado

<sup>11</sup> Tió sátsíkji tí chojni chjin la nta iso tí sín soldado k'uáyakonhen tí tsíxravá ch'ín Jesús mé sákjuí sín chjasin Jerusalén la chénka sín tí nchat'á t'etoan kaín tí nkehe tsíkónhen tí k'uéjó sín ntiha. <sup>12</sup> Ntá tí sín nchat'a t'etoan kjuínixjehe sín tí sín táda la ntá jnkokoá kjuenkayáxin sín ntá chjéhe sín nchónhaya chichaon tí sín soldado. <sup>13</sup> La ntáchro sín kixin:

—Chronkará kixin tí tie naxa tjejochrinrá ikui tí sín k'uék'ajiko tí nkexro Jesús, mé kueé sín cuerpo kuènte ch'án,

ichrorá. <sup>14</sup> A ntá tí chrókónohe tí ch'ín gobernador tíha la ntá jeheni tsonix-jeheni ch'án kixin tsonínkakuanhyará ch'án —mé xikaha ichro tí sín nchat'á.

<sup>15</sup> La ntá tí sín soldado k'uáyéhe sín tí chichaon la sákjuí sín la xikaha kjuích'e sín éxí k'uítuenhen sín. La mé xikaha chrónkaxín tí sín judío, la hasta tí yaon ijie la xikahó ichro sín, chrónkaxín sín.

**Ch'ín Jesús k'uētuenhen ch'án tí sín k'uék'ajiko ch'án tí xra sich'e sín**

(Mr. 16.14-18; Lc. 24.36-49; Jn. 20.19-23)

<sup>16</sup> A ntá tí tejnko sín k'uék'ajiko ch'ín Jesús sákjuí sín ijnko jna estado Galilea kixin xikaha tsík'etoan ch'ín

Jesús. <sup>17</sup> Ntá k'uíkon sín ch'ín Jesús la ntá kuinkáchónki sín ch'án kjónté iso sín naxa kjuenkayáxin á chaxín jehe ch'án o náhí. <sup>18</sup> Ntá ch'ín Jesús kóchjinehe tí jehe sín la ntáchro ch'án kixin:

—Dios mé chjina kaín xín kjuachaxin nkaya nkajní la ko chjasintajni. <sup>19</sup> Méxra sájtjirá kaín xín nación la tjákohérá chojni kixin tsitekaon sín tí janhan. Tíkítexínrá sín kjuachaxién ihnié It'eni la ko ihnié tí Xjeen la ko Nchakuèn Dios. <sup>20</sup> Tjákohérá sín kixin sinchexiteyá sín kaín xín nkehe kuétuanhanrá. Ijie la ó nohará kixin tsjak'é ts'ejokoará jnkochrín hasta tsjeje chjasintajni. Mé xikaha tsonhen. Amén —ichro ch'ín Jesús.

## Tí tan jína chrónka ch'ín Marcos

### Nteje mé kjuakoxin ch'ín Juan Bautista

(Mt. 3.1-12; Lc. 3.1-9,  
15-17; Jn. 1.19-28)

**1** Xikihí mé xrankixín tí tan jína kuènte Jesucristo mé tí Xjeen Dios.

<sup>2</sup> Ósé mé kjuák'e ch'ín Isaías mé ijnko nkexro tsíchr'án Dios chrónka itén ch'án k'uékjin ch'án nkexrí nixjehe Dios tí Xjeen ch'án ntáchro kixin:

Janhan tsochr'an ijnko nkexro tsochrónka tan kuèntana tsitónxin ntia,

kixin tsjasiyóxin ch'án ntia kuènta.<sup>‡‡</sup>

<sup>3</sup> Ntá tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntia tsixin Ìnchéni, takitjehérá ijnko ntia ntoí.”<sup>¶¶</sup>

<sup>4</sup> Tíha mé xitéyá ikui ch'ín Juan Bautista, mé xikaha kjuák'e ch'án nteje kuikite ch'án chojni. Kjuakohe ch'án chojni ntiha kixin chrókjuinkí sín tí nkehe tjenkayáxin sín chrókuítóhe sín tí ijíé sín ntá chrókuikite sín kixin xikaha mé chrókjuiin ijíé sín. <sup>5</sup> Itsjé chojni kuixin estado Judea la ko tí chjasin Jerusalén ikui sín tí kjuák'e ch'ín Juan kuínhin sín tí nkehe kjuako ch'án ntá chrónka sín tí jie yámá sín ntá ch'ín Juan mé kuikitexín sín ch'án ntarío Jordán.

<sup>6</sup> Tí ké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. **A** ntá tí nkehe kjóne ch'án mé kochjoá la ko tsjen kotsjenta tónoxín nteje. <sup>7</sup> Mé kjuák'ekjakohe ch'án chojni ntáchro ch'án kixin:

—Iton tí janhan mé tsichréhe ijnko nkexro antsí má chóna kjuachaxin, a ntá

janhan la kánhyó. Méxra chrókósuàna chrókjuasintanka tí correa tí tokaté ch'án. <sup>8</sup> Janhan mé ìnta ó kuikitexínrá. Ntá jehe ch'án mé tsikitexínrá ch'án tí Nchakuen Dios —ichro ch'ín Juan.

### Ch'ín Juan kuikite ch'án tí ch'ín Jesús

(Mt. 3.13-17; Lc. 3.21-22)

<sup>9</sup> Ntá tí yaon a ch'ín Jesús, k'uaxrjexín ch'án chjasin Nazaret estado Galilea. Na ntá ch'ín Juan mé kuikitexín ch'án tí ntarío Jordán. <sup>10</sup> Tíó k'uaxrjenkixin ch'ín Jesús tí ìnta, ntá xrinahya titàya k'uífkuèn ch'án na ó xitjehe nkajní la ntá tí Nchakuen Dios éxí kontóá k'uínkajinxin ntiha ntá kjuák'e chrítaón kja ch'án.

<sup>11</sup> Ntá xrinahya kuínhin sín nixja Dios nkaya nkajní, ntáchro kixin:

—Janhan mé xjanna imá tjuaha tí jaha. Imá chàna kixin nchexiteyàna tí jaha —mé xikaha kuínhin sín.

### Ch'ín Tsochren chrókjuachroe tí ch'ín Jesús kixin chrókjuasin ch'án jie

(Mt. 4.1-11; Lc. 4.1-13)

<sup>12</sup> Ntá tí Nchakuen Dios mé sákjuíko tí ch'ín Jesús nteje. <sup>13</sup> Kjuák'e ch'án cuarenta yaon tí nteje la ko ntiha mé k'uíxin ko jiehe ntá ch'ín Tsochren a na mé tjinkaon chrókjuachroe ch'án. La ntá tí sín ángel kui k'uàyakonhen tí jehe ch'án.

### Ch'ín Jesús kjuankixín kjuako ch'án estado Galilea

(Mt. 4.12-17; Lc. 4.14-15)

<sup>14</sup> Kjuixin kjuák'echjina ch'ín Juan ntotchiso ntá ch'ín Jesús na mé sákjuí ch'án nó estado Galilea sákjuíkjakohe ch'án tí sín ntiha tí tan jína kuènte Dios.

<sup>15</sup> Ntá ntáchro ch'án kixin:

—Ó kjuixraká tí yaon, la ó tsi tí kjuachaxin kuènte Dios ts'etqan ch'án.

‡‡1:2 Malaquías 3.1

¶¶1:3 Isaías 40.3

Chrókuítóhérá tí nkehe jínahya k'uék-jenkayáxinrá a ntá chrókuítekáonrá tí tan tsaáxinrá —mé xíkaha kjuako ch'ín Jesús.

**Ch'ín Jesús k'uíyehé  
noó tí sín itsé koche**

(Mt. 4.18-22; Lc. 5.1-11)

<sup>16</sup> Ch'ín Jesús tjetji ch'án chrínta ntayaon Galilea ntá xrínahya k'uíkon ch'án tí ch'ín Simón la ko tí kíchó ch'án mé it'in Andrés, mé koche xritsé sín, ntá tinkák'e sín tí nchísén chrínkí nta. <sup>17</sup> Ntá ntáchro tí ch'ín Jesús kixin:

—Chréhérá tí janhan, ntá tsotjahárá xra tsjéyará chojni —ichro ch'án.

<sup>18</sup> Ntá tuénxín kuítóhe sín tí nchísén k'uétséya sín koche ntá sákjuiko sín ch'án.

<sup>19</sup> Ntá kjínhya kjuíji ch'ín Jesús ntá k'uíkon ch'án tí yaá xjeen ch'ín Zebedeo. Ijnko mé it'in Jacobo. A ntá tí í jnko la mé it'in Juan. Jehe sín la ko tí it'é sín tjejóxenhén sín tí ntabárcó tjejótonité sín tí nchísén tséya sín tí koche. <sup>20</sup> Na ntá ch'ín Jesús mé k'uíyehé tí jehe sín kixin kjaxin tsochréhe sín ch'án. A ntá tuénxín kuítóhe sín tí it'é sín ch'ín Zebedeo kuítóeko ch'an tí ntabárcó la ko tí sín tjinkítsa ch'án ch'e xra. A ntá jehe sín sákjuiko sín ch'ín Jesús.

**Ijnko chojni chóna ijnko  
nchakuen tí jínahya**

(Lc. 4.31-37)

<sup>21</sup> Ntá kjuíji sín tí chjasin it'in Capernaum. Na ntá tí yaon t'ok'éhe sín mé k'uíxenhén ch'in Jesús tí nínko Israel. Na ntá ntaha mé kjuankixin ch'án kjuako ch'án. <sup>22</sup> A ntá tí chojni síin ntiha mé chrakon sín kuínhin sín tí nkehe kjuako ch'án kixin kjuakoxin ch'án kixin chóna ch'án kjuachaxin, la jehya éxí tí sín maestro tjako tí ley, ichro sín. <sup>23</sup> Ntá tí nínko Israel chjasin ntiha itjen ijnko chojni

chóna ijnko nchakuen tí jínahya k'uíyato ntáchro kixin:

<sup>24</sup> —¿Nkekuènté tjiaté tí jeheni kaín ni? Jaha Jesús kjuíxian Nazaret. ¿Á k'uinka kixin sinchek'itjáyanni? Janhan mé ó kjuátsoan tí jaha, la ko nóna kixin jaha tí nkexro tjóá kuènte Dios —mé xíkaha ichro tí nchakuen tí jínahya.

<sup>25</sup> Ntá ch'ín Jesús mé k'uétuènhén tí nchakuen tí jínahya ntáchro ch'án kixin:

—Tániá, t'axrjéxian tí jehe ch'án —mé xíkaha ichro ch'ín Jesús.

<sup>26</sup> A ntá tí nchakuen tí jínahya mé kjuínchek'aniáte tí ch'ín a la ko k'uíyatoxín tsen ntá k'uaxrjéxín tí ch'ín a.

<sup>27</sup> A ntá kaín sín chrakon sín ntá kjuanchankíhi sín kíchó sín, ntáchro sín kixin:

—¿Xá nkexro tíha kixin tjako ch'án nkehe nixin? Jehe ch'án chóna kjuachaxin kixin t'etuenhen ch'án tí nchakuen tí jínahya la titekakonhen —mé xíkaha ichro sín.

<sup>28</sup> A ntá imá tjoka k'uíxikónohe kaín xín sín estado Galilea kixin nkexrí tí kjuachaxin chóna tí ch'ín Jesús a.

**Ch'ín Jesús kjuínchekitohe jína tí  
ich'ee tí ch'ín Simón Pedro**

(Mt. 8.14-15; Lc. 4.38-39)

<sup>29</sup> Ntá tí ch'ín Jesús mé k'uaxrjéxín ch'án tí nínko, a ntá tuénxín sákjuiko ch'án ch'ín Jacobo la ko ch'ín Juan, sákjuí sín ntøe ch'ín Simón la ko ch'ín Andrés. <sup>30</sup> Ntá tí ich'ee ch'ín Simón na tjetsínka tjan, níhi tjan kixin chóna tjan sóa. Ntá chénka sín tí ch'ín Jesús.

<sup>31</sup> Ntá kóchjina ch'án tí tjetsínka tjan ntá itsé ch'án tja tjan k'uínkatjen tjan. Ntá tuénxín kjuíinhin tjan tí sóa chóna tjan. Ntá kjuanjon tjan nkehe sine sín.

**Ch'ín Jesús kjuínchekitohe  
jína nchónhya chojni níhi**

(Mt. 8.16-17; Lc. 4.40-41)

<sup>32</sup> A ntá tió kjuíátaón yaon tió k'uíxin tie kuíkøhe sín tí ch'ín Jesús kaín tí

sín níhi la ko tí sín chón̄ta nch̄akuen jín̄ahya; <sup>33</sup>na ntá kuenté ch̄jasin kójnkotsé sín k'uúixintankí sin ntója tí nchia a. <sup>34</sup>Ntá kjuínchekitohe ch'án jína kaín tí chojni níhi chón̄ta nchón̄hya clase chin la ko kuakitsje ch'án kaín tí nch̄akuen tí jín̄ahya. Na í kjuanjonhya ch'án kjuachaxin ḱixin tsonixja tí nch̄akuen tí jín̄ahya ḱixin ó kjuátsoan tíha nkexro tí jehe ch'án.

### Ch'ín Jesús mé kjuako ch'án estado Galilea

(Lc. 4.42-44)

<sup>35</sup>Ntá nax̄a sítíe k'uàya ch'ín Jesús k'uaxrjéxín ch'án tí ch̄jasin a sákjuí ch'án nteje ḱixin ntiha nixjeexín ch'án It'é ch'án tjen nkaya nkajní. <sup>36</sup>Ntá ch'ín Simón la ko tí sín xriko ch'án mé sákjuík-jeyá sín ch'án. <sup>37</sup>Ntá k'uitja sín ch'án ntá chénka sín ḱixin:

—Kaín sín xritjeyá sín tí jaha —ichro sín.

<sup>38</sup>Ntá ntáchro ch'ín Jesús ḱixin:

—Sátsjini ókjé ch̄jasin ch̄jinaxón ḱixin ntaha k̄jaxin tsjákoḥa sín tí tan jína, ḱixin xíkaha mé tí k'uaxrjexiān ch̄jasin ntiha.

<sup>39</sup>Ntá nkúixín estado Galilea sákjuí ch'án kuinkákjako ch'án jnkojnko ninko la ko kuakitsje ch'án tí nch̄akuen tí jín̄ahya chón̄ta sín.

### Ch'ín Jesús kjuínchekitohe jína ijnko ch'ín chón̄ta chinlepra

(Mt. 8.1-4; Lc. 5.12-16)

<sup>40</sup>Ntá kui ijnko ch'ín chón̄ta chinlepra kjuák'lexín toch'in ch'án nkayakon ch'ín Jesús ntá chrónóḣeḣe ch'án ntáchro ch'án ḱixin:

—Tí tjinkávan jaha la jína chrókjuínchekitoḣéni jína —ichro ch'án.

<sup>41</sup>Ntá ch'ín Jesús na imá kuikonóḣeḣe ch'án tí ch'ín a na ntá kjuentoá tja ch'án kjuak'e tja ch'án chrítaón tí ch'ín níhi a ntá ntáchro ch'án ḱixin:

—Méxra xíkaha tjínkavan. Ntá jie sín-takitoḣa jína —ichro ch'án.

<sup>42</sup>A ntá xíkaha ntáchro ch'án ntá tuénxín kjuín tí chinlepra ntá kuítoḣe ch'án jína. <sup>43</sup>Ntá k'uetuēnhen ch'ín Jesús tí ch'ín a ḱixin tjoka sátsji ch'án, ntáchro ch'án ḱixin:

<sup>44</sup>—Ninkexró chenkahya ntihi; jehó sátsja tjákoḣé tí ch'ín nch̄at'á ḱixin ó kjuínhan tí chinlepra la ko tjánjuan tí nkehe tsík'etoan ch'ín Moisés<sup>88</sup> ḱixin tso-noexín kaín xín chojni ḱixin ó kuítoḣa jína —ichro ch'án.

<sup>45</sup>A ntá tí ch'ín tsíkitoḣe jína, a ntá sákjuí ch'án kjuanḱixin ch'án chénka ch'án kaín xín chojni ḱixin nkexrí kuítoḣe ch'án jína. Méxra xitjahya ts'ixenhen ch'ín Jesús noxín nijnko ch̄jasin na ntá k'uaxrjenta ch'án tí kohya chojni. Ntá ḱjonté la kjuitsjehe sín ch'án kjuíxin sín nkúixín ch̄jasin.

### Ch'ín Jesús mé kjuínchekitoḣe jína ijnko chojni tsík'en toté

(Mt. 9.1-8; Lc. 5.17-26)

**2** Ntá ó k'uátsínka iso yaon ntá ch'ín Jesús mé xíkjan ch'án ch̄jasin Capernaum. Ntá k'uúixikónohe chojni ḱixin ijnko nchia ntiha kjuák'e ch'án. <sup>2</sup>Ntá tuénxín nchón̄hya chojni kóchjina ntá kjuachahya tí nchia k'uúixixenhen sín la ko k̄jaxin kjuachahya tí ntója nchia chrók'uúixintankí sín. A ntá ch'ín Jesús kjuako tí tan jína kuēnte Dios. <sup>3</sup>Ntá kui noó sín tinkátsénkí sín ijnko ch'ín tsík'en toté ch'án. <sup>4</sup>Kjánchó xitjahya kóchjina sín tí tjen ch'ín Jesús ḱixin nchón̄hya chojni síin. La ntá k'uit'ótjen sín tí chrítaón nchia a ntá k'óxrat'ó sín. Na ntá ijnko hno kjuak'ete sín tí kania tjenkáya

<sup>88</sup>1:44 Levítico 14.1-32

tí sinníhi a ntá kjuinkajin sín ntoí tí tjen ch'ín Jesús a. <sup>5</sup> Tió k'uíkon ch'ín Jesús tí nkehe kjuích'e sín ntá ó nohe ch'án kixin chaxin imá tinkáchónki sín tí jehe ch'án. Ntá nixjehe ch'án tí sinníhi ntáche ch'án kixin:

—Xjeenni, ó kjuixin kjuinhan tí jie chonta —mé xikaha ichro ch'án.

<sup>6</sup> Na ntá iso tí sín maestro tjako tí ley tjejótxajin sín ntiha na ntá jehó sín mé kjo sín asén sín kixin: <sup>7</sup> “¿Nkekuènté xikaha nixja tí ch'ín i ncheyóhe ch'án asén ch'án Dios? Kixin ninkexró xitjahya tsjatsiin ijie kixin jehó Dios mé chóna kjuachaxin tsjatsen ijie chojni”, mé xikaha ikjo sín asén sín. <sup>8</sup> Ntá ch'ín Jesús la ó nohe ch'án nkehe tjenkayáxin sín. Ntá ntácho ch'án kixin:

—¿Nkekuènté kixin xikaha tjenkayáxinrá? <sup>9</sup> ¿Nkehe antsí má xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuinhan ch'án tí jie yamá ch'án, o á antsí xrahya chróntátjan ch'án kixin chrók'uinkatjen ch'án chrókjuenájín ch'án kaniee ch'án ntá sáchrókjui ch'án? <sup>10</sup> Méxra jie tsjákoxian kixin tí Xjeen Dios K'óna Chojni mé ntihi chjasintajni chóna kjuachaxin tsjakjiinhan ijie chojni —ichro ch'án.

Ntá ntáche ch'án tí ch'ín xitjahya tji kixin:

<sup>11</sup> —Jaha tétuanhan t'inkatjen, tjenájian kaniaa na sátjia ntoa —ichro ch'án.

<sup>12</sup> A ntá tí sinníhi na tuénxín k'uínkatjen ch'án kjuák'exín toté ch'án na kjuenájín ch'án kaniee ch'án na kuamá ch'án k'uaxrjexín ch'án nchia sákjuí ch'án. Na ntá kaín tí sín siín a tsjehe sín nkexrí kónhen na chrakon sín la ko kjuanchehe sín Dios kjuasáyé. Ntá ntácho sín kixin:

—K'uíkonhyéni tí nkehe i —ichro sín.

### Ch'ín Jesús k'uíyehé ch'ín Leví

(Mt. 9.9-13; Lc. 5.27-32)

<sup>13</sup> A ntá chr'éxin ch'ín Jesús mé sáxíkji ch'án inaá chrínta ntayaon. Ntá kaín xín chojni kóchjina sín tí tjen ch'án ntá kjuako ch'án. <sup>14</sup> Ntá k'uátsínka ch'án k'uíkon ch'án tí ch'ín Leví xjeen ch'ín Alfeo tjetjaxin ch'án tjenchekjènkí ch'án. Ntá ch'ín Jesús mé k'uíyehé ch'án, ntácho ch'án kixin:

—Chr'éhé tí janhan —ichro ch'án.

Ntá ch'ín Leví mé tuénxín k'uínkatjen ch'án chr'éhe ch'án tí ch'ín Jesús.

<sup>15</sup> A ntá ch'ín Jesús kjuák'e ch'án ntoe tí ch'ín Leví, la ntá kjuanjón sín nkehe sine ch'án la ko kjaxin k'uéjé nchónhya tí sín nchekjènkí la ko kjaxin í so chojni chóna jie. Mé kaín tí sín a mé tjejótxajin sín tjejóneko tí ch'ín Jesús la ko tí sín k'uájiko ch'án, kixin nchónhya chojni chr'éhe sín tí jehe ch'án. <sup>16</sup> Na ntá tí sín maestro tjako tí ley la ko tí sín fariseo k'uíkon sín kixin ch'ín Jesús tjejóneko kaín ti sín nchekjènkí la ko tí í so sín chóna jie, a ntá ntáche sín tí sín k'uájiko ch'án kixin:

—¿Nkekuènté kixin tí maestro kuèntará neko ch'án la ko t'ikao ch'án tí sín nchekjènkí la ko tí í so sín chóna jie? —ichro sín.

<sup>17</sup> Na ntá ch'ín Jesús kuínhan ch'án nkehe tí tjo sín a. Ntá nixjehe ch'án tí sín a ntácho ch'án kixin:

—Tí sín níehya t'ichjánxienhya sín nkexro sich'e xroan. Náhí. Jehó tí sín níhi mé t'ichjánxinhan sín nkexro sich'ehe sín xroan. Janhan na k'uinkahya ntihi kixin chrók'uíyaha chojni jína tjejó sín. Náhí. K'uinka kixin ts'íyaha chojni chóna jie —ichro ch'án.

**Tjanchankíhi sín tí ch'ín  
Jesús kixin á chrókjónehya  
sín tió tsonixjehé sín Dios**

(Mt. 9.14-17; Lc. 5.33-39)

<sup>18</sup> Ijnko yaon na mé kaín xín tí sín k'uék'ajiko ch'ín Juan Bautista la ko tí sín fariseo a mé kjónehya sín kuénté yaon kixin mé xikaha ts'áyéhe sín kjuaxróxin, ichro sín. A ntá kui iso chojni nixjehé sín tí ch'ín Jesús ntáchro sín kixin:

—¿Nkekuénté kixin tí sín k'uék'ajiko sín tí ch'ín Juan la ko tí sín fariseo la nehya sín jie, a ntá tí sín xrikoa la ine sín? —ichro sín.

<sup>19</sup> Ntá kjuátehe ch'ín Jesús ntáchro ch'án kixin:

—¿Xá chrókjónehya tí chojni tsík'íyehé sín kóchjina ijnko kia tsotehe chojni tí naxa tjejóko sín tí nkexro tsotehe? Tí naxa tjen tí nkexro tsotehe la xitjahya kixin chrókjónehya sín. <sup>20</sup> A ntá itsi ijnko yaon itsi chojni sátsjiko sín tí ch'ín tsikótehe, ntá tí yaon la chaxín sinehya sín.

<sup>21</sup> Ninkexró chrókjua'eniéhe ijnko ka ó ntaxin it'ó ka nixin kixin ntá chrókjuixéhe tí ka nixin ntá antsí má chrók'uichje tí ka ntaxin a. <sup>22</sup> La ko kjaxin ninkexró chrókuikija xran vino nixin ijnko tjuaxran ó ntaxin; kixin tí xran vino nixin la chrókótséchje tí tjuaxran ntaxin ntá chrók'uitjáyan tí xran la ko tí tjoa. Méxra tí xran vino nixin chrókuikia ijnko tjuaxran nixin —mé xikaha ichro ch'ín Jesús.

**Tí sín k'uájiko ch'ín Jesús mé  
ik'uún sín iso neno noatrigo  
ijnko yaon t'ok'éhe sín**

(Mt. 12.1-8; Lc. 6.1-5)

<sup>23</sup> Ijnko yaon t'ok'éhe sín na ch'ín Jesús la ko tí sín k'uájiko ch'án mé k'uát-

sínka sín ijnko nonte síin noatrigo. Na ntá tí sín k'uájiko ch'án kjuankixin sín ik'uún sín iso noatrigo. <sup>24</sup> Na ntá iso tí sín fariseo kjuanchankíhi sín tí ch'ín Jesús a kixin:

—¿Nkekuénté kixin tí sín xrikoa tjejóch'e sín xra ijie? Na mé ko-hya kjuachaxin tsonhen xra tí yaon t'ok'éheni —ichro sín.

<sup>25</sup> Ntá kjuátehe ch'án ntáchro ch'án kixin:

—¿Á kjuinchekuáxinhyará jahará tí xroon chrónka nkehe kjuích'e ch'ín David la ko tí sín k'uájiko ch'án tí k'uén sín kjinta? <sup>26</sup> A ntá jehe ch'án k'uixenhen ch'án ntöe Dios tió kjuák'e nchat'á Abiatar k'uetöan, a ntá kjóne ch'án tí niotja tsíkóyaon kjónté jehó tí sín nchat'á mé k'uéchóna kjuachaxin sine sín la kjaxin chjéhe ch'án tí sín k'uájiko ch'án\* —ichro ch'ín Jesús.

<sup>27</sup> Kjaxin ntáchro ch'ín Jesús kixin:

—K'óna tí yaon ts'ok'éhe chojni kixin t'ichjánxin sín, la jehya kixin chrókjuikosáyehe tí yaon a. <sup>28</sup> A ntá tí Xjeen Dios K'óna Chojni mé chóna kjuachaxin ts'etöan nkehe tsonhen tí yaon t'ok'éheni —ichro ch'án.

**Ijnko chojni tsixámá tja**

(Mt. 12.9-14; Lc. 6.6-11)

**3** Ntá ch'ín Jesús k'uixenhen ch'án ijnko ninko Israel inaá. Na mé ntiha tjen ijnko ch'ín tsixámá ijnko tja ch'án. <sup>2</sup> Na ntá kóchjina iso chojni tsáyehe sín ch'ín Jesús ts'ikon sín kixin á sinchekitohe ch'án jína tí ch'ín tsixámá tja tí yaon t'ok'éhe sín kixin mé jína tsjanchia sín jie, ichro sín. <sup>3</sup> Ntá ch'ín Jesús mé ntáche ch'án tí ch'ín tsixámá tja a kixin:

—T'inkatjen, tjak'e jnkosiné ntihi —ichro ch'án.

<sup>4</sup> A ntá kjuanchankíhi ch'ín Jesús tí sín síin ntiha kixin:

\*2:26 1 Samuel 21.1-6; Levítico 24.5-9



—¿Nkehe síin kjuachaxin tsonhen tí yaon t'ok'éheni? ¿Á chrókjuich'eni tí jína ní o á chrókjuich'eni tí jínahya? ¿Á chrókjuinchekitoheni chojni jína ní o á chrók'óyánni chojni? —ichro ch'án.

Á ntá jehe sín la táníkoá sín. <sup>5</sup>Na ntá ch'ín Jesús la nínkaon ch'án komá ch'án tí jehe sín la ko t'ává ch'án kixin tjinkakonhya sín tsikonóhehe sín chojni. Na ntá k'uetuenhen ch'án tí ch'ín a kixin:

—Tjéntoá tjá —ichro ch'án.

Á ntá kjuéntoá ch'án tja ch'án la ó kuítóhe tja ch'án jína. <sup>6</sup>Na ntá tí sín fariseo a k'uaxrjexín sín nínko sákjuí sín k'uító sín tí sín kuénte ch'ín Herodes ntá kjuenkayáxinko kíchó sín kixin nkexrí chrók'óyán sín tí ch'ín Jesús.

### **Nchónhya chojni síin chrínta ntayaon**

<sup>7</sup>Ntá ch'ín Jesús la ko tí sín k'uájiko ch'án sákjuí sín chrínta ntayaon a. Á ntá nchónhya chojni kjujichréhe sín tsíkixín sín nó estado Galilea la ko kjaxin tsíkixín sín nó estado Judea <sup>8</sup>la ko chjasin Jerusalén la ko estado Idumea la ko ikjé sín kuixín sín nó tóhe ntario Jordán la ko iso sín tsíkixín sín nó chjasin Tiro la ko nó chjasin Sidón. Na mé kaín sín tsíkinhin sín kixin nkexrí tí kjuaxroan jíe kjuasin ch'ín Jesús ntá kuichréhe sín ch'án kixin chrók'uikon sín tíha kjaxin. <sup>9</sup>Ntá k'uetuenhen ch'án tí sín k'uájiko ch'án a kixin ntahó chrókjuak'e chonhen sín ijnko ntabárcó. Á ntá tí imá chrók'uixítja sín ch'án ntá chrók'uixenhen ch'án tí ntabárcó, a ntá ntiha chrókjuak'e ch'án tsochrónka ch'án. <sup>10</sup>Kixin itsjé chojni tsíkjinchekitoheni ch'án jína, na ntá kaín xín tí sín níhi k'uixítja sín ch'án kixin tjinkaon sín chrókuákóxin sín ch'án. <sup>11</sup>Kjaxin tí sín chóntha nchakuen tí jínahya na mé tió k'uíkon sín tí ch'ín Jesús ntá k'uéjoxin sín toch'in sín nkayakon ch'án. Ntá k'óyako tí nchakuen tí jínahya a ntáchro kixin:

—Jaha mé tí Xjeen Dios.

<sup>12</sup>Á ntá ch'ín Jesús ntáche ch'án tí nchakuen tí jínahya kixin kohya kjuachaxin tsochrónka kixin nkexro tí jehe ch'án.

### **Ch'ín Jesús kjueyá ch'án teyó sín ts'ajiko ch'án**

(Mt. 10.1-4; Lc. 6.12-16)

<sup>13</sup>Á ntá chr'éxin chr'in ch'ín Jesús ijnko jna, a ntá ntiha k'uíyehé ch'án tí sín tjinkaon ch'án chrók'uajiko ch'án ntá kóchjinehe sín ch'án. <sup>14</sup>Ntá kjueyá ch'án teyó tí sín ts'ajiko ch'án kixin ts'etuenhen ch'án sín sátsji sín tsjako sín tí tan jína. <sup>15</sup>Kjuanjón ch'án kjuachaxin sinchekitoheni sín chojni níhi jína la ko tsakitsje sín nchakuen tí jínahya chóntha chojni. <sup>16</sup>Á ntá tí sín i mé tí teyó sín tsík-jeyá ch'án mé it'in sín xíkíhi: Simón na mé kjuínchek'in ch'án Pedro; <sup>17</sup>la ko Jacobo la ko tí kícho ch'án Juan mé xjeen ch'ín Zebedeo. Kjaxin kjuínchek'in ch'án sín Boanerges mé t'axrjexín kixin Xjeen Sítjonta. <sup>18</sup>La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko í jnko Simón tíhi mé kuénte tí sín cananista, <sup>19</sup>la ko Judas Iscariote, mé kjuínchekji tí ch'ín Jesús chr'éxin.

### **Ntáchro sín kixin ch'ín Jesús chóntha kjuachaxin kuénte tí Jínahya**

(Mt. 12.22-32; Lc. 11.14-23; 12.10)

Na ntá chr'éxin ch'ín Jesús la ko tí sín k'uájiko ch'án k'uixenhen sín ijnko nchia. <sup>20</sup>Á ntá inaá kójnkotsé nchónhya chojni, a ntá xitjahya sine sín. <sup>21</sup>Ntá kónohe tí sín naxa kjéhya ch'ín Jesús ntá ikui sín sátsjiko sín ch'án kixin ntáchro sín kixin ó tsík'ixikján ch'án.

<sup>22</sup>Kjaxin tí sín tjako ti ley kuixín sín Jerusalén, ntáchro sín kixin:

—Tí ch'ín i chóntha ch'án tí ch'ín Beelzebú, mé ch'ín Tsochren, mé tí nkexro t'etuenhen kaín tí nchakuen tí jí-

nahya ntá xíkaha tjacha ch'án takitsje ch'án nchakuen tí jínahya a —ichro sín.

<sup>23</sup> Ntá ch'ín Jesús k'uíyehé ch'án tí sín ntá kjuíncheyóexin ch'án ntáchro ch'án kixin:

—¿Nkexrí kixin jnkokón ch'ín Tsochren chrókuakitsje asén? <sup>24</sup> A ntá tí sín t'etóan ijnko nación tjanjonko kichó la tsjachahya ts'etóan. <sup>25</sup> La ko kjaxín tí sín jnkokoá ntoe jnkokoáhya tjenkayáxin sín ntá xitjahya ts'ejóko kichó sín. <sup>26</sup> A ntá tí chaxín ch'ín Tsochren jnkokónhya tjenkayáxin tjanjonko kichó la ntá ts'itjáyán kjuachaxin kuente.

<sup>27</sup> Ninkexró tsjacha ts'ixenhen ntoe ijnko chojni jiehe kixin ts'axrjehe tí nkehe chóntha ch'án. Náhí. T'ichjánxin saxín sinchenteto ch'án tí ch'ín jiehe kixin jína tseéhe ch'án nkehe chóntha tí ch'ín a.

<sup>28</sup> Ijnko nkehe chaxín tsotjonkará kixin tió tsoxraxinkaon ijnko chojni tí jie chóntha la ko tsochronóehé Dios la ntá tsjakjiihin ch'án kaín tí jie la ko kaín tí nkehe jínahya tsíntáchro sín. <sup>29</sup> A ntá tí nkexro ts'ántaxínhin tí Nchakuen Dios na mé xitjahya tsjiin tí jie na mé jnkochrínxín tsochóntha sín tí jie a —ichro ch'án.

<sup>30</sup> Mé xíkaha ichro ch'án kixin tí sín a tsíntáchro sín kixin ijnko nchakuen tí jínahya mé chóntha tí jehe ch'án.

### Tí iné la ko kichó ch'ín Jesús

(Mt. 12.46-50; Lc. 8.19-21)

<sup>31</sup> A ntá kui iné ch'ín Jesús la ko kichó ch'án tjejó sín ntója ó na ntá k'uetuenhen sín ijnko chojni tsjik'íyehé ch'án. <sup>32</sup> A ntá tí sín tjejótxaxín tí tjen ch'ín Jesús ntiha chénka sín ch'án kixin:

—Iná la ko kichuá tjejó sín ntója xrit-jeyá sín ti jaha. —ichro sín.

<sup>33</sup> Ntá ntáchro ch'án kixin:

—¿Xá nkexro tí nana la ko nkexro tí kichiná? —ichro ch'án.

<sup>34</sup> Ntá komá ch'án tí chojni tjejótxaxín tí tjen ch'án ntá ntáchro ch'án kixin:

—Jahará mé nana la ko kichiná.

<sup>35</sup> Kaín tí sín nchexiteyá tí nkehe tjinkaon Dios na mé tí sín a mé kichiná la ko nana —ichro ch'án.

### Kjuíncheyóexin ch'án éxi ijnko chojni t'enka nonte

(Mt. 13.1-9; Lc. 8.4-8)

**4** Ch'ín Jesús mé kjuankixin ch'án kjuakoxin ch'án chrínta ntayaon inaá. A ntá ntiha mé kójnkotsé nchónhya chojni tí tjen ch'án. Ntá ijnko ntábárcó tjenkátaón ntá k'uit'ótjen ch'án, a ntá ntaha kjuák'e ch'án kjuakoxin ch'án. Ntá kaín tí sín tsíkójnkotsé mé kuítóhe sín chrínta ntayaon k'uejókinnhin sín. <sup>2</sup> Nchónhya nkehe kjuako ch'án kjuíncheyóexin ch'án. Ntá ntáchro ch'án kixin:

<sup>3</sup> —Tinhínrá tíhi: Ijnko chojni sákjuík'enka nontee. <sup>4</sup> Mé xíkaha sákjuík'enka ch'án iso tí noatriga a. Ntá iso noa la tsík'ánotjen ntia ntá kui koxroxe k'uínka va tí noa. <sup>5</sup> A ntá iso noa na mé k'uitji chrík'á xro tí kohya itsjé nche ntá tjoka k'uayan kixin tjínhya chóntha nche. <sup>6</sup> A ntá tió kjuiton yaon la ntá tí ka la chján; la ko chóntahya nuèe a ntá xámá. <sup>7</sup> A ntá í so noa kjuítsínkak'á tí síin kach'í la ntá tí kach'í k'uánkí la ntá tí noa í k'ónahya kixin sítja tí kach'í. <sup>8</sup> A ntá íso tí noa k'uitji nche jína la ntá k'uayan la ko k'uánkí nteto la ko k'óna jína. A ntá ijnko noa la mé k'óna treinta neno noa. A ntá í jnko la mé k'óna sesenta neno noa, a ntá í jnko la k'óna ijnko ciento neno noa —ichro ch'án.

<sup>9</sup> Ntá ntáchro ch'án kixin:

—Tí nkexro tjinkaon chrókuin hin la chrókuin hin —ichro ch'án.

**Ch'ín Jesús chronkaxín nkexrí  
t'axrjexín tí nkehe ntáchro ch'án**

(Mt. 13.10-17; Lc. 8.9-10)

<sup>10</sup> A ntá chr'éxin, tió kuítóhe ch'ín Jesús jehó ch'án, a ntá tí sín tjejó chjinaxón tí tjen ch'án la ko tí teyó sín k'uájiko ch'án mé kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án. <sup>11</sup> Ntá ntáchro ch'án kixin:

—A ntá jahará la Dios mé sintanohará tí nkehe tienxínhya chojni kuènte tí kjuachaxin kuènte Dios, a ntá tí sín titekakhya la ó kjuintayóaxuán kaín nkehe kuínhin sín. <sup>12</sup> Kixin kjónté ts'ikon sín la éxi k'uíkonhya sín, la ko kjónté tsinhin sín la tsienxínhya sín kixin ntá chrók'uixitoxinhya tí tjenkayáxin sín a la ko chrókjuiinhya tí ijíe sín<sup>†</sup> —ichro ch'án.

**Ch'ín Jesús chrónkaxín nkexrí  
t'axrjexín tí nkexro sákjuík'enka**

(Mt. 13.18-23; Lc. 8.11-15)

<sup>13</sup> Ntá ntáche ch'án sín kixin:

—¿Á kiénxinyará jahará nkexrí t'axrjexín tí nkehe kjuintayóaxian ní? ¿A ntá nkexrí chrókiénxínrá tí í so nkehe naxa sintayóaxian? <sup>14</sup> A ntá tí nkexro sákjuík'enka tí tje a mé yóhe ijnko nkexro sákjuíkjako itén Dios. <sup>15</sup> A ntá iso chojni la éxi tí tje kjuítsínka ntja; kixin kuínhin sín itén Dios, ntá chr'éxin ó kui ch'ín Tsochren kjuínchek'itjáyan ch'án tí tan jína kuínhin sín. <sup>16</sup> A ntá í so chojni la éxi yóhe tí tje kjuítsínkak'á xro: mé kuínhin sín itén Dios ntá tjoka kóxrjinhin sín kuítekaon sín. <sup>17</sup> Kjánchó nínkahya chóna nuèe, a ntá séhya kuítóhe; a ntá itsi tí kjuaxróxinhya tsonhen sín, o tsochónkíhi sín chojni kixin tí itén Dios kuítekaon sín ntá tsítóhe sín tí tin-

káchónki sín Dios. <sup>18</sup> A ntá í so chojni la éxi yóhe tí tje k'uínka chrík'á kach'í na mé kuínhin sín itén Dios <sup>19</sup> kjánchó tóxakonhen sín tí nkehe síin chjasintajni la ko tí nkehe tje te tóxrjinhin sín la ko tjinkaon sín tsochóna sín kaín xín nkehe. Kaín tíha mé t'inkákonhen tí itén Dios kuínhin sín a, la tí chojni xíkaha la xitjahya sich'ehe sín xra Dios. <sup>20</sup> A ntá í so chojni kuínhin tí itén Dios na kuinkáchónki sín la ntá xíkaha jína ch'ehe sín Dios xra. La iso sín la éxi yóhe tí tje k'uínka tí nonte jína k'óna treinta neno noa la ko iso sín la yóhe tí tje k'óna sesenta neno noa la ko iso sín la yóhe tí tje k'óna ciento neno noa —mé xíkaha ichro ch'ín Jesús.

**Ch'ín Jesús mé kjuíncheyóexin  
éxi ijnko xrohi tjeche**

(Lc. 8.16-18)

<sup>21</sup> Kjaxin ntáchro ch'ín Jesús kixin:

—¿Á chrókuíkaonni xrohi tjeche chrókjuak'emá chrínkí ntacajón o chrínkí cama? Kjá náhi. Tí xrohi la noi chrókjuak'e ts'inkaséyanxín. <sup>22</sup> Mé xíkaha kaín tí nkehe tjejó má jie tsonoxín chr'éxin la ko kaín tí nkehe ninkexró noehya jie la tsonoxín chr'éxin. <sup>23</sup> A ntá tí nkexro tjinkaon chrókuinhin la chrókuinhin tíhi —ichro ch'án.

<sup>24</sup> Kjaxin ntáchro ch'án kixin:

—Chrókjuenkayáxinrá jína tí nkehe tjejótinhinrá. Tí nkehe tjáchoayará jahará la Dios la kjaxin tíha tsjáchoayá ch'án tí nkehe ts'ayéhérá jahará, a ntá antsí má ts'ayéhérá tí jahará tjejontinhinrá. <sup>25</sup> A ntá tí nkexro chóna nkehe la antsí má ts'ayéhe sín. A ntá tí nkexro chóntahya la kjónté tí ntsí chóna la ts'axrjehe —ichro ch'án.

<sup>†</sup>4:12 Isaías 6.9-10

**Ch'ín Jesús mé kjuíncheyóexin ch'án  
éxí ijnko tje ts'ayan ts'ánkí**

<sup>26</sup> Kjaxin ntáchro ch'ín Jesús kixin:

—Tí kjuachaxin t'etoan Dios tóyóhe ijnko chojni sátsjik'enka nonte. <sup>27</sup> Ntá sákjuík'ajua ch'án tí tie la ko k'uàya ch'án tí nchítjen. A ntá xikahó k'uát-sínka iso yaon la ko iso tie, a ntá tí tje la k'uayan la k'uánkí. A ntá tí nkexro k'uénka la noehya ch'án nkexrí kónhen tíha. <sup>28</sup> A ntá tí nche mé kjuích'e xra jehó. Senó k'uayan tí chaon tí ka, a ntá kjuinta, a ntá chr'éxin icha tí noa tsjin-jin; <sup>29</sup> a ntá tió tsícha tí noa, a ntá tsakjin-jin sín tí noa kixin ó kjuixraká tí yaon tsotjá sín.

**Ch'ín Jesús kjuíncheyóexin ch'án  
éxí ijnko tje it'in mostaza**

(Mt. 13.31-32; Lc. 13.18-19)

<sup>30</sup> Kjaxin ntáchro ch'ín Jesús kixin:

—¿Nkehe chrókóyóhe tí kjuachaxin t'etoan Dios, nkehe chrókóyóexin tíha?

<sup>31</sup> Mé éxí yóhe tí tje it'in mostaza tsík'inka nonte. Tíha mé ijnko tje imá ntsí, a ntá tí í so tje síin chjasintajni la kénhyó. <sup>32</sup> A ntá jnkonaá tsík'inka tí tje la tsík'ayan tsík'ánkí imá ihyé, a ntá tí í so nta la kánhyó. A ntá kjaxin tí chaon tí nta tsík'ánkí imá ihyé, a ntá kjónté koxroxé xritjaka la jína ts'ok'éhe va chrínkí tí ts'van chaon tí nta.

**Nkehe tí xra kjuích'e tí nkehe  
kjuíncheyóexin ch'ín Jesús**

(Mt. 13.34-35)

<sup>33</sup> Mé xikaha ch'ín Jesús kjuakohe ch'án tí jehe sín, kjuíncheyóexin ch'án nchónhya nkehe éxí tí nkehe a kixin chrókjuacha chrókienxín sín tíha. <sup>34</sup> Kaínxín nkehe kjuakohe ch'án tí jehe sín la kjuíncheyóexin ch'án. A ntá jehó tí sín k'uájiko ch'án la chrónka ch'án nkexrí t'axrjexín kaín tí nkehe kjuíncheyóexin ch'án.

**Ch'ín Jesús k'uetuēhen  
ch'án tí xrinto la ko tí ntā  
síchrica kixin ts'ixita**

(Mt. 8.23-27; Lc. 8.22-25)

<sup>35</sup> A ntá tí yaon a la ntá ó kóntó ntá ntáche ch'ín Jesús tí sín k'uájiko ch'án a kixin:

—Sátsjini tóhe tí ntāyaon —ichro ch'án.

<sup>36</sup> Ntá kuítóhe sín kaín tí chojni a ntá sákjuíko sín tí ch'ín Jesús naxa tjenkáya ch'án tí ntabárcō la ko kjaxin í so ntabárcō sákjuí koí. <sup>37</sup> Ntá xrinahya tjian chjéhe xrinto la ntá síchrica ntā t'ix-enhen tí ntabárcō, ó mero tsokaón ntā tí ntabárcō. <sup>38</sup> A ntá ch'ín Jesús na mé tjejua ch'án tí tjar'i nóton tí tjejó sín nkaxenhen tí ntabárcō a tjejón ch'án ijnko ka. Na ntá kjuínchekjāya sín ch'án ntáchro sín kixin:

—Maestro! ¿Á ntōsán kixin ts'itjáyanni, ts'aniánkíni ntā ní? —ichro sín.

<sup>39</sup> A ntá ch'ín Jesús k'uàya ch'án, k'uetuēhen ch'án tí xrinto la ko tí ntā kixin ts'ixita, ntáchro ch'án kixin:

—Tániá, tjak'eta —ichro ch'án.

Na ntá tí xrinto la ko tí ntā k'uúxratá. <sup>40</sup> Ntá kjuanchankíhi ch'án tí sín k'uájiko ch'án ntáchro ch'án kixin:

—¿Nkeuēnté kixin imá chrakonrá? ¿Á naxa tinkachónkihyará Dios? —ichro ch'án.

<sup>41</sup> Ntá imá chrakon sín ntā kjo sín kíchó sín kixin:

—¿Xá nkexro tíhi? Kjónté xrinto la ko ntāyaon la mé kjuínchexiteyéhe ch'án —ichro sín.

**Ijnko chojni chóna nchónhya  
nchakuen tí jínahya nonte Gadara**

(Mt. 8.28-34; Lc. 8.26-39)

**5** Ntá tió k'uátóye sín tí ntāyaon, a ntá kjuíji sín tí nonte Gadara. <sup>2</sup> Ntá k'uínkajinxín ch'ín Jesús tí ntabárcō a.

Ntá xríngaha xeta ch'án ijnko ch'ín kuix-  
in nó tsíkijxravá chojni mé chóna ch'án  
ijnko nchakuen tí jínahya. <sup>3</sup>Tí ch'ín a  
mé kjuák'e ch'án tí tsíkijxravá chojni.  
Ninkexró tjachahya sinchenteto ch'án  
kjónté cadena tjachahya. <sup>4</sup>Nchónhya ve-  
ces kjuínchentetoxín sín ch'án cadena  
toté ch'án la ko itja ch'án, la kjónté  
kóchrifon ch'án kjuínchekuen ch'án tí  
cadena. Kohya ninkexro tjacha ts'etueñ-  
hen tí jehe ch'án. <sup>5</sup>K'uék'aji ch'án  
nchakotjin la ko tie t'íyato ch'án nó  
jñā la ko tí tsíkijxravá chojni la ko  
chjéhe asén ch'án xro. <sup>6</sup>Na ntá k'uifkon  
ch'án kixin kui ch'ín Jesús kjónté ikjín  
la kuinká ch'án kjuíji ch'án kjuák'exín  
toch'in ch'án nkayakon ch'ín Jesús a  
<sup>7</sup>k'óyako ch'án ntáchro ch'án kixin:

—¿Nkekuénté tjiaté jaha tí jeheni,  
jaha Jesús Xjeen Dios tjen nkaya nkajní?  
Dios nchenoheni kixin xrjanóaha nchek-  
jasótehyani —ichro ch'án.

<sup>8</sup>Mé xíkaha ichro ch'án kixin tsín-  
táchro ch'ín Jesús kixin:

—Jaha nchakuen tí jínahya, títóhé tí  
ch'ín i —ichro ch'án.

<sup>9</sup>Ntá ch'ín Jesús mé kjuanchankíhi  
ch'án tí ch'ín a kixin:

—¿Nkexrí it'ian? —ichro ch'án.

Ntá kjuátehe ch'án ntáchro ch'án  
kixin:

—Legión mé it'inni kixin nchónhyani  
—ichro ch'án.

<sup>10</sup>Ntá imá chrónóhe ch'án tí ch'ín  
Jesús kixin tsochr'ánhya ch'án ókjé tí  
nchakuen tí jínahya. <sup>11</sup>Na ntá síin  
nchónhya cochíno xrine va chjinaxón tí  
jñā ntiha. <sup>12</sup>Na ntá chrónóā tí nchakuen  
tí jínahya ntáchro kixin:

—Tétueñhenni sátsjini tí síin tí  
cochíno, títóhé ts'ixenhenni tí jehe va  
—ichro tí nchakuen tí jínahya a.

<sup>13</sup>Ntá ch'ín Jesús mé kjuanjon ch'án  
kjuachaxin. Ntá kaín xín tí nchakuen tí  
jínahya a mé k'uaxrxjén tí ch'ín a sákjuí  
kjuík'ixenhen tí cochíno a. Na ntá kaín

xín tí ko a mé chjina iyó mil va síin va  
xrine va. Na mé kaín xín va k'uínkajinxin  
va ntiha kjuítsínkayá va tsaka ntá kjuít-  
sínkankí va ntayaon ntá kjuínhin va nta.

<sup>14</sup>Na ntá tí chojni t'ayakonhen tí  
cochíno a na mé kuinká sín kixin  
chrakon sín na ntá sákjuí chrónka sín ch-  
jasén sín la ko nontee chojni. Na ntá itsjé  
chojni mé kuitsjehe sín nkehe tí tsíkón-  
hen ntiha. <sup>15</sup>Ntá kjuíji sín tí tjen ch'ín  
Jesús a na k'uifkon sín kixin itjen tí ch'ín  
k'uéchóna tí nchónhya nchakuen tí jí-  
nahya senó la ó jína tjen ch'án tjetjax-  
in ch'án tjenkáya ch'án iké ch'án, na  
ntá chrakon sín. <sup>16</sup>Na ntá tí sín tsík'ikon  
mé chrónka sín nkexrí k'uék'aji tí ch'ín  
k'uéchóna tí nchakuen tí jínahya la  
ko nkexrí kónhen tí cochíno a. <sup>17</sup>Ntá  
kjuankixin sín chrónóhehe sín tí ch'ín  
Jesús a kixin sáchrókjuixin ch'án ntiha.

<sup>18</sup>Na ntá ó ts'it'ótjen ch'ín Jesús tí  
ntabáro na ntá tí ch'ín k'uéchóna  
nchakuen tí jínahya na mé chrónóā  
ch'án kixin kjaxin ch'án sáchrókjuiko  
sín ch'án, ichro ch'án. <sup>19</sup>Ntá ch'ín Jesús  
kjuanjonhya ch'án kjuachaxin sátsjiko  
sín ch'án. Náhí. K'uetóan ch'án kixin:

—Sátjia ntóā tjíchenka tí sín naxā  
kjéhya tí jaha kixin nkexrí kaín tí  
kjuaxroan jíé kjuasin Dios kjuínchek-  
itóha jína kuíkonóaha ch'án tí jaha  
—ichro ch'án.

<sup>20</sup>Na ntá tí ch'ín a sákjuí ch'án  
kjuankixin chrónka ch'án kaín tí chjasin  
kuénte Decápolis kixin nkexrí kaín tí  
nkehe kjuích'e ch'ín Jesús kjuíncheki-  
tóhe ch'án jína. Na ntá kaín tí sín kuínhin  
na chrakon sín.

### Tí xjeen ch'ín Jairo la ko tí tjan kuákóxín iké ch'ín Jesús

(Mt. 9.18-26; Lc. 8.40-56)

<sup>21</sup>Ntá tió xíkankao ch'ín Jesús tí  
ntabáro tóhe tí ntayaon inaá ntá  
kóchjina nchónhya chojni ntá ntahó  
chrínta ntá kuítóhe ch'án inaá. <sup>22</sup>Na ntá

ikui ijnko ch'ín t'etōan kuènte nínko mé it'in ch'án Jairo. **A** ntá tió k'uíkon ch'án kixin itjen ch'ín Jesús ntá kjuák'exín toh'in ch'án chrínkí toté ch'ín Jesús a <sup>23</sup> imá chrónóhe ch'án kixin:

—Tí ijnko xjanna chjin ó tjet'en xjan. Xrjanóaha chrókjuini chrókjuak'é tja itjá chrítaon kja xjan ntá chrókuitōhe xjan jína —ichro ch'án.

<sup>24</sup> Ntá ch'ín Jesús sákjuiko tí ch'ín a. Na nchónhya chojni chréhe sín tinkák'ixitja sín ch'án inaá. <sup>25</sup> **A** ntá kjaxin tjenkákjan sín ijnko chojni chjin níhi tjan, ó chóna teyó nánó sítji tjan jni. <sup>26</sup> Imá tjote tjan kixin nchónhya chojni kjuanjon xroan kónhen tjan na ó kjuixin kjuèhe tjan kaín xín nkehe k'uéchóna tjan. Ó jehí titoehya tjan jína la íchá ntsí tinkákótao tjan. <sup>27</sup> **A** ntá tió kuínhin tjan chrónka chojni nkehe tí kjuaxroan kjuasin ch'ín Jesús ntá kui tjan kjuák'enkákjan tí chojni kóchjina nóton ch'ín Jesús ntá kuákóxin tjan tí ké ch'án, <sup>28</sup> ntá chro tjan kixin kjónté iké ch'án ó chrókuakóxin tjan na ó tíhó mé chrókuitōhe tjan jína, ichro tjan. <sup>29</sup> Ntá tuénxín tí jni na mé ó kjuixié tjan la ko kónohe tjan kixin ó kjuixin kuítohe tjan jína ti chin k'uéchóna tjan. <sup>30</sup> Ntá ch'ín Jesús na ó kónohe ch'án kixin kjuachaxién ch'án mé kuítoexín ijnko chojni jína ntá kuinkátjía ch'án kjuanchankíhi ch'án tí chojni síin a kixin:

—¿Nkexro kuákóxin tí kaná? —ichro ch'án.

<sup>31</sup> Ntá kjuátehe tí sín k'uajiko ch'án a ntá chro sín kixin:

—Ó noha kixin nchónhya chojni sítja, ¿ntá nkekuènté kixin naxa tjanchankiá kixin nkexro tí kuákóxian? —ichro sín.

<sup>32</sup> Ntá kuinkátjía ch'án tsjehe ch'án nkuíxín kixin tsonohe ch'án nkexro tí kuákóxin tí ké ch'án. <sup>33</sup> Ntá tí tjan a na mé chrakon tjan síxranka tjan ó nohe tjan kixin ó kuítohe tjan jína ntá xrakoa tjan kjuák'exín toh'in tjan nkayakon

ch'ín Jesús ntá ntoá chrónka tjan kaín nkehe kónhen tjan. <sup>34</sup> Ntá ntá chro ch'ín Jesús kixin:

—Xjeenni, kaín asán kuinkachónkia tí janhan ntá kuítoha jína. Ijie la kjuaxróxin sátsjia ntōa la ó kuítoha jína a —ichro ch'án.

<sup>35</sup> Na ntá naxa tjenixja ch'án ntá ó kui chojni kuíxin sín ntōe tí ch'ín t'etōan tí nínko. Ntá chénka sín ch'án kixin:

—Xjaan na ó kjuixin k'uén. ¿Nkekuènté naxa chjehé xra tí Maestro a? —ichro sín.

<sup>36</sup> Ntá ch'ín Jesús na ántosén ch'án tí chrónka sín ntá nixjehe ch'án tí ch'ín t'etōan tí nínko ntá chro ch'án kixin:

—Chrakonhya jaha, jehó tsinkachónke tí janhan —ichro ch'án.

<sup>37</sup> Ntá kjuanjonhya ch'án kjuachaxin kixin sátsji kaín sín, na ó jehó ch'ín Pedro la ko ch'ín Jacobo la ko ch'ín Juan mé kichó ch'ín Jacobo, sátsji sín. <sup>38</sup> Na ntá tió kjuíji sín tí ntōe tí ch'ín t'etōan tí nínko na k'uíkon sín kixin imá sítjité sín tsjankama sín tí xjan a. <sup>39</sup> Ntá k'uixenhen ch'ín Jesús nchia kjuanchankí ch'án kixin:

—¿Nkekuènté ánta tjasitérá tsjankamará tí xjan a? Tí xjan na tsík'enhya xjan na tjejua xjan —ichro ch'án.

<sup>40</sup> **A** ntá kjuanoá sín ch'án. Ntá k'uetōan ch'án kixin kaín sín sátsji sín ntója. Ntá kjuíko ch'án tí it'é la ko tí iné xjan la ko tí iy'á sín xrako ch'án ntá k'uixenko sín ch'án tí tjen tí xjan a. <sup>41</sup> Itsé ch'án tja xjan ntá nkívee xjan mé nixjeexín ch'án ntá chro ch'án kixin:

—Talita, cumi —mé t'axrjexín kixin: Lonchí, tétuanhan kixin t'áya.

<sup>42</sup> **A** ntá tí xjan a ó chóna tjan teyó nánó na mé tuénxín k'uínkatjen tjan ó jína tji tjan. Ntá kaín tí chojni síin ntiha la chrakon sín k'uíkon sín xikaha. <sup>43</sup> Ntá fuerte k'uetōan ch'ín Jesús kixin chróchenkahya sín ninkexró. La kjaxin

k'uetəan ch'án kixin tsjanjon sín nkehe sine tjan.

**Ch'ín Jesús kjuák'e  
ch'án chjasin Nazaret**

(Mt. 13.53-58; Lc. 4.16-30)

**6** A ntá chr'éxin k'uaxrjéxin ch'án chjasin ntiha. Ntá jehe ch'án la ko tí sín k'uájiko ch'án na mé sákjuí sín Nazaret tí chjasin tsík'ánkixin ch'án. <sup>2</sup>Na ntá tió kui tí yaon t'ok'éhe sín ntá kjuankíxin ch'án kjuakoxin ch'án tí nínko ntiha. Na ntá nchónhya chojni kuínhin sín ntá chrakon sín ntáchro sín kixin:

—¿Nketí tsíxrakohe tí ch'ín i kaín tíhi? ¿Nketí kuixin tí kjuaxrexinkaon chóntha ch'án la ko tí kjuaxroan tjasin ch'án? <sup>3</sup>¿Á jehya ch'án tí ch'ín ch'éna nta na mé xjeen tí tjan María, la tí kíchó ch'án a na mé ch'ín Jacobo, la ch'ín José, la ch'ín Judas, la ch'ín Simón? ¿A kjaxinhya ntihi tjejókoni tí kíchó ch'án chjin? —ichro sín.

Méxra tahya sín kuentá nkerí ch'e ch'án. <sup>4</sup>Na ntá ntáchro ch'ín Jesús kixin:

—Kaín chojni tjikosáyehe sín ijnko nkexro chrónka iten Dios. Ntá tí chjasén ch'án la ko kaín tí sín kjéhya ch'án la ko tí sín ntəe ch'án na mé tjikosáyeheya sín ch'án —ichro ch'án.

<sup>5</sup>Méxra ninkehó kjuaxroan xitjahya kjuasin ch'án ntiha, la jehó kjuak'etja tja ch'án chrítaón ikja iso chojni níhi kjuínchekitohe ch'án sín jína. <sup>6</sup>Ntá chrakon ch'án kixin xikaha kuítekakuenhya sín ch'án. Na ntá k'uáji ch'án tí chjasin ntsínsí chjinaxón ntiha kjuako ch'án.

**Ch'ín Jesús mé ichr'án tí teyó sín  
kixin sátsji sín tsjikjako sín itén Dios**

(Mt. 10.5-15; Lc. 9.1-6)

<sup>7</sup>Na ntá k'uíyehé ch'ín Jesús tí teyó sín k'uajiko ch'án a. Ntá kjuankíxin k'uetuénhen ch'án kixin yóyó yóyó sín sátsji sín la ko kjaxin kjuanjon ch'án

kjuachaxin kixin tsakitsje sín nchakuen tí jínahya chóntha chojni. <sup>8</sup>La ko k'uetəan ch'án kixin ninkehó tsjikohya sín kuènte ntia. Jehó tí nta tjixin sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon. <sup>9</sup>Na ko tokate ó tsjanka sín la ko tsjiko sín jehó tí ka tjejóya sín ó. <sup>10</sup>Kjaxin ntáchro ch'án kixin:

—A ntá tí ts'ixenhénra ijnko nchia a ntá ntaha tsjanjon sín kjuachaxin na ntahó chókuitəhará. A ntá tsjixinjian tí xra ntá sátsjixinrá ntiha. <sup>11</sup>Na ntá tí tsjasánra ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinhin sín tí nkehe chrókjuákohérá sín na ntá t'axrjéxinrá tí chjasin a ntá ts'oxénjinrá tí nche chóntha totará kixin xikaha tsjákoxinrá kixin ntoáhya kjuích'e tí jehe sín. A ntá chaxín ntáxrjan kixin tí yaon tsitəexin ijie chojni ntá antsí má tsjasóte tí chojni tí chjasin a, a ntá tí sín chjasin Sodoma la ko Gomorra la kánhyó tsjasóte sín.

<sup>12</sup>Na ntá sákjuí sín kuinkákjakohe sín tí chojni a kixin mé chrókjuítəoxinhin sín ntie sín. <sup>13</sup>La ko kjaxin kuakitsje sín itsjé tí nchakuen tí jínahya chóntha chojni. Na ko aceite mé kuíkite sín itsjé chojni níhi a la ntá kuítəhe sín jína.

**Ik'uén ch'ín Juan Bautista**

(Mt. 14.1-12; Lc. 9.7-9)

<sup>14</sup>Na ntá tí ch'ín rey Herodes mé kuínhin ch'án nkehe tí kjuaxroan kjuasin ch'ín Jesús. Na ntáchro ch'ín Herodes kixin:

—Kjá tí ch'ín Juan Bautista mé ó tsíxechón ch'án inaá kixin xikaha tí kjuachaxin chóntha tí ch'ín a —ichro ch'ín Herodes a.

<sup>15</sup>A ntá iso sín ntáchro sín kixin:

—Kjá ch'ín Elías k'uéchrónka itén Dios —ichro sín.

A ntá í so sín mé ntáchro sín kixin:

—Kjá ijnko nkexro yóhe tí sín k'uék-jako itén Dios ósé —ichro sín.

<sup>16</sup> Ntá kuínhin ch'ín Herodes tíha ntá ntáchro ch'án kixin:

—Kjá ó jehe tí ch'ín Juan tí kuétoan chrínjin kja ch'án, mé ó tsíxechón ch'án jie —ichro ch'án.

<sup>17</sup> Méxra tí ch'ín Herodes mé tsík'etoan ch'án kixin tsontetoxín tí ch'ín Juan cadena tsjak'echjina ch'án kixin xikaha tsíkjanchia tí tjan Herodías. <sup>18</sup> A ntá tí tjan Herodías k'uéchjién tí ch'ín Felipe. <sup>19</sup> A ntá tí savé ch'án Herodes mé kuákja tí tjan a kixin ts'óna ichjién ch'án. <sup>20</sup> A ntá tí ch'ín Juan tsintáche ch'án tí ch'ín Herodes kixin:

—Kohya kjuachaxin tsochonta tí ichjién tí kichuá —ichro ch'án.

<sup>19</sup> Mé xikaha tí tjan Herodías mé imá kónínkakonhen tjan tí ch'ín Juan ntá chrók'óyán tjan ch'án, kjánchó xitjahya <sup>20</sup> kixin tí ch'ín Herodes mé chrakonhen ch'án tí ch'ín Juan kixin ó nohe ch'án kixin tí ch'ín a mé ijnko nkexro jína la ko tjóá asén la méxra kuítoehya ch'án kixin jehe tjan chrók'óyán tjan ch'án. <sup>21</sup> A ntá kénhyó kienxín ch'án la kjónté kóxrjín-hin ch'án tí nkehe kuínhin ch'án kjuako ch'ín Juan. <sup>22</sup> A ntá tí tjan Herodías mé kjuacha tjan tí yaon kia tsíkjitoxinhin nánó tí ch'ín Herodes a kixin tsík'íyehé ch'án tí síxreé la ko tí sín k'uetoenhen tí sín soldado la ko tí sín t'etoan estado Galilea kixin itsi sín ntøe ch'án kixin síin kia. <sup>23</sup> A ntá tí xjeen tí tjan Herodías mé k'uixenhen tí tjejó sín, a ntá ité tjan, la kóxrjínhin ch'ín Herodes la ko kaín tí sín tjejóneko ch'án ntiha. Na ntá tí ch'ín rey ntáche ch'án tí tjan tjarisoá a kixin:

—Tjanhana tí nkehe tjinkávan na tsojtahá —ichro ch'án.

<sup>23</sup> Ntá kjuínchenohe ch'án Dios ntáchro ch'án kixin tsjanjon ch'án tí nkehe tsjanchia tjan kjónté jnkosiné tí chjasin t'etoan ch'án. <sup>24</sup> Ntá jehe tjan na mé kuínhin tjan ntá sákjuí tjan

chénka tjan iné tjan kixin tsintáchro ch'ín Herodes kixin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kixin:

—¿Nkehe tí chrókjuanchiani? —ichro tjan.

Ntá tí iné tjan mé ntáchro kixin:

—Ijie la itjia tjanchia tí kja tí ch'ín Juan Bautista, ichrua —ichro tjan.

<sup>25</sup> A ntá tí tjarisoá ikjan tjan tjoka k'uixenhen tjan tí tjen tí ch'ín rey, ntá ntáchro tjan kixin:

—A ntá ijie tjinkaonni ijnko plato tsjak'enkáya ikja ch'ín Juan Bautista tsochjehéni —ichro tjan.

<sup>26</sup> Na ntá tí ch'ín rey la mé imá k'uává ch'án kixin xikaha kjuanchia tjan kjánchó tsíkjinchenohe ch'án Dios la ko tsíkinhin kaín tí sín tsík'íyehé ch'án, la ntá xitjahya tsontáchro ch'án “Náhi” tí nkehe kjuanchia tjan. <sup>27</sup> Na ntá tuénxín k'uetoenhen ch'án ijnko ch'ín soldado kixin tsjikao ch'án tí kja ch'ín Juan a. <sup>28</sup> Ntá tí ch'ín soldado mé sákjuí ntøechiso, ntá kóchrínjin ch'án ikja tí ch'ín Juan a. Ntá ijnko plato kjuikoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuíkénhen tjan iné tjan.

<sup>29</sup> Na ntá kuínhin kaín tí sín k'uék'ajiko ch'ín Juan kixin xikaha tsíkónhen. Na ntá sákjuífkakja sín tí cuérpøe ch'án ntá kjuíkao sín ntá sákjuífkjavá sín.

### Ch'ín Jesús mé kjuanjon nkehe kjóne in'ó mil chojni

(Mt. 14.13-21; Lc. 9.10-17; Jn. 6.1-14)

<sup>30</sup> A ntá chr'éxin tí sín k'uájiko ch'ín Jesús a na mé ó kjan sín tí tjen ch'án inaá, chrónka sín nkexrí tí xra kjuích'e sín na ko nkexrí kjuako sín. <sup>31</sup> A ntá ntáchro ch'ín Jesús kixin:

—Ts'axrjentani sátsjini nteje tí kohya chojni ntá ts'ok'áhará ntsí —ichro ch'án.

Mé xikaha ntáchro ch'án kixin sásítji la ko síti nchónhya chojni na ntá



xrankahya ts'ejó sín sine sín. <sup>32</sup>Na ntá ch'ín Jesús la ko tí sín k'uájiko ch'án jehó sín k'uit'ótjen sín ijnko ntabárco sákjuí sín ijnko nonte jehó tjen. <sup>33</sup>Na ntá itsjé chojni k'uíkon sín kixin sákjuí sín la ko kjuátsoan sín kixin ch'ín Jesús. Ntá xrákuaxín sín chjasén sín kuinká sín na ntá senó kjuíji sín tí chrínta ntayaon tí tsiji ch'ín Jesús. <sup>34</sup>Ntá k'uínkajínxín ch'án tí ntabárco, a ntá k'uíkon ch'án kixin nchónhya chojni síin ntiha ntá kuíkonóhe ch'án tí jehe sín na mé éxí yóhe kolélo tjejó sín chóntahya va nkexro ts'ayakonhen va. Ntá kjuankíxin ch'án kjuakóhe ch'án sín nchónhya nkehe a. <sup>35</sup>Na ntá ó kóntó na ntá tí sín k'uájiko ch'ín Jesús a mé kóchjina sín tí tjen ch'án ntáchro sín kixin:

—Ntá ó kóntó la kohya ninkexró tjejó ntihi <sup>36</sup>na ntá jaha chrókuitóhe sín kixin sátsji sín tí chjasin chjinaxón a tsjik'ena sín nkehe kixin chóntahya sín nkehe sine sín —ichro sín.

<sup>37</sup>A ntá ch'ín Jesús kjuátehe ch'án ntáchro ch'án kixin:

—Chjehé sín nkehe sine sín —ichro ch'án.

Ntá kjuátehe sín ntáchro sín kixin:

—¿Á tsjik'enani iyó ciento denario niotja tsochjeheni sin sine sín ní? —ichro sín.

<sup>38</sup>Ntá ch'ín Jesús mé kjuanchankíhi ch'án sín kixin:

—¿Nkekjaín niotja chontará? Sátjitsjehérá —ichro ch'án.

Ntá sákjuítsjehe sín na ntá chrónka sín kixin:

—In'ó niotja la ko yaá koche mé síin —ichro sín.

<sup>39</sup>Na ntá k'uetsoan ch'án kixin kaín xín sín chrók'uixitjaxín sín tí chrítaón tí ka yoa a. <sup>40</sup>Na ntá xikaha kójnkojié sín ciento sín la ko cincuenta sín k'uixitjaxín sín. <sup>41</sup>Na ntá ch'ín Jesús kuákja ch'án tí in'ó niotja na ko tí yaá koche ntá

konta ch'án nkajín ntá kjuanchia ch'án kjuasáyé Dios. Na ntá kóchrít'ó ch'án tot'ó tí niotja a ntá chjéhe ch'án tí sín k'uájiko ch'án kixin ts'ókikayehe sín sine tí sín síin a la ko kjaxin kóchrít'ó ch'án tí yaá koche ntá k'ókikayehe sín kixin sine sín kaín sín. <sup>42</sup>Ntá kaín xín sín kjóne sín kókjehe sín. <sup>43</sup>A ntá kjuixin kjóne sín ntá tí sín k'uájiko ch'ín Jesús na mé kjuínchekaón sín teyó ntaxra tot'ó tí niotja la ko tí koche tsíxehe. <sup>44</sup>A ntá tí sín kjóne na mé in'ó mil chojni ntoa.

### Ch'ín Jesús mé tjitaón ntayaon

(Mt. 14.22-27; Jn. 6.16-21)

<sup>45</sup>A ntá tuénxín k'uetuenhen ch'ín Jesús tí sín k'uájiko ch'án kixin ts'it'ótjen sín tí ntabárco a ts'atòye sín ntayaon sátsji sín nó chjasin Betsaida, ichro ch'án. Na ntá jehe ch'án na mé naxá kuítóhe ch'án nixjehe ch'án kaín tí sín síin a. <sup>46</sup>Kjuixin nixjehe ch'án sín na ntá jehe ch'án chríin ch'án ijnko jna tsonixjeexín ch'án Dios. <sup>47</sup>A ntá tió k'uíxin tie ntá tí ntabárco na mé ó kjuíji jnkosiné ntayaon, a ntá jehe ch'án jehó ch'án kjuíji ch'án chrínta ntayaon. <sup>48</sup>Ntá kotohe ch'án k'uíkon ch'án kixin imá xra tjiko sín tí ntabárco a kixin tí xrinto imá chjéhe. Nantóye a mé sákjuíchréhe ch'án sín. Totó ch'án mé sákjuítonxín ch'án tí ntayaon na ntá kóchjinehe ch'án tí tjejó sín chrók'uátsínké ch'án sáchrókjui ch'án. <sup>49</sup>A ntá tí k'uíkon sín kjuítaón ch'án nta, ntá kjuenkayáxin sín kixin kjuacha sín, ichro sín, ntá k'óyako sín <sup>50</sup>kixin kaín sín k'uíkon sín ch'án la chrakon sín. Na ntá jehe ch'án mé tuénxín nixja ch'án ntáchro ch'án kixin: —Chrakonhyará. Janhan tíhi —ichro ch'án.

<sup>51</sup>Ntá k'uit'ótjen ch'án tí ntabárco tí tjejó sín, a ntá tí xrinto la ó k'uíxratá. Ntá imá chrakon sín kixin xikaha kónhen <sup>52</sup>kixin kienxínhya sín tí kjuaxroan

kjuích'e ch'án kuènte tí nigtja kixin naxa kénhya asén sín kuinkáchónki sín ch'án.

**Ch'ín Jesús mé kjuínchekitohe jína tí chojni níhi tí nonte Genesaret**

(Mt. 14.34-36)

<sup>53</sup>Ntá tió k'uátòye sín tí ntayaon ntá kjuíji sín tí nonte Genesaret ntá kjuak'echroé sín tí ntabárcō a tí chrínta ntá. <sup>54</sup>Na ntá tió k'uínkajinxin sín tí ntabárcō, a ntá tí sín sín ntiha tjoka kjuátsoan sín tí ch'ín Jesús. <sup>55</sup>Ntá sákjuí sín nkuíxín chjinaxón ntiha kjuankíxin sín kuikao sín tí sinníhi tinkátsénki sín kuikao sín tí tjen ch'ín Jesús. <sup>56</sup>La ko kaín nketí kjuíji ch'án, á chjasin ntsí, á chjasin hyé, á nontee sín ó kjuíjiko sín tí sinníhi a chrínta ntá. Na ntá chrónóehé sín tí ch'ín Jesús kixin kjónté chrínta iké ch'án ó chrókuákóxin sín, ichro sín. Na kaín xín tí sín kuákóxin iké ch'án mé kuítóhe sín jína.

**Tí nkehe nchekjita asén chojni**

(Mt. 15.1-20)

**7** **A** ntá iso sín fariseo la ko iso tí sín tjako tí ley kuíxin sín chjasin Jerusalén ntá kóchjinehe sín tí ch'ín Jesús. <sup>2</sup>Tí sín a, tió k'uíkon sín kixin iso tí sín k'uájiko ch'ín Jesús mé k'ón-tihya sín tja sín na kjónté ine sín mé t'axrjexín kixin kjuínchexiteyáhya sín tí ley, ntá kjonta tí sín a. <sup>3</sup>(Mé xíkaha kjuích'e sín kixin tí sín fariseo la ko kaín tí sín judío mé kuinkáchónki sín éxi k'uékjich'e tí sín táda ósé kixin ná t'òntó itja sín ntá sine sín. <sup>4</sup>Na ko tí tsokjanxin sín ntsin ná t'ónti sín ntá sine sín. Na ko kjaxin itsjé í so nkehe tinkáchónki sín, éxi tjonemá sín tí vaso t'iyá sín nkehe la ko tí nchésen la ko tí chī chjányan nkehe ne sín la ko tí kámé sín nchetjóá sín.) <sup>5</sup>Méxra tí sín fariseo la ko tí sín maestro

tjako tí ley a na mé kjuanchankíhi sín tí ch'ín Jesús kixin:

—¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín táda k'uéjé ósé? Na mé tí sín xrikoa t'óntihya sín tja sín ntá kjónté ine sín —ichro sín.

<sup>6</sup>Kjuátehe ch'ín Jesús ntáchro ch'án kixin:

—Ntoá tsíchrónka ch'ín Isaías ósé k'uéchrónka iten Dios tsíntáchro ch'án kixin ntoáhya tsjenkayáxinrá tí jahará kixin xíkíhi tsíkjin ch'án ntáchro ch'án kixin:

Tí chojni tí chjasin i ir'va ó xraxinkakonxín sín tí janhan, a ntá tí asén sín ikjín kuítóhe sín tí janhan

<sup>7</sup>Méxra ó chónkó tóchjina sín xraxinkaon sín tí janhan, kixin tí nkehe tjako sín la tí nkehe tsík'etōan chojni ó.<sup>‡</sup>

Mé xíkaha ichro itén Dios. <sup>8</sup>Ntá jahará kuítóherá tí nkehe tsík'etōan Dios ntá chréhérá tí nkehe ch'e chojni, a la mé tjonemará nchésen, la ko tí vaso t'íará nkehe, la ko kjaxin í so nkehe yóhe tinkachónkirá —ichro ch'án.

<sup>9</sup>Kjaxin ntáchro ch'án kixin:

—Jahará chréhérá tí nkehe k'uékjich'e chojni ntá xíkaha títóherá ntáha tí nkehe tsík'etōan Dios. <sup>10</sup>Tsíntáchro ch'ín Moisés kixin: “Tsochonteherá kjuasáyé it'ará la ko inará”, la ko “**A** ntá tí nkexro t'ántaxínhin it'é o iné la chrók'óyán sín.”<sup>¶</sup> <sup>11</sup>**A** ntá jahará ntáchrórá kixin ó nchoxon kixin ijnko nkexro tsochéna it'é la ko iné kixin: “It'éni, Inéni, chrokjuahya tsjinkitsani tí jaha kixin kaín tí nkehe chóntani mé k'óna Corbán” (mé t'axrjexín kixin kaín tí chichaon k'uáyéhe Dios). <sup>12</sup>**A** ntá

<sup>‡</sup>7:7 Isaías 29.13

<sup>¶</sup>7:10 Éxodo 20.12; 21.17

xíkaha jnkojín nkexro tsontáchro ch'án tíhi ntá jahará tsontáchrórá kíxín í t'ichjánxínhya tsjinkítsa ch'án tí it'é ch'án la ko tí iné ch'án. <sup>13</sup> A ntá tí xíkaha la títóhérá tí nkehe tsík'etóan Dios éxí sínkíhya, a ntá ókjé nkehe ich'erá, ntá tánkíhará chojni. Mé xíkaha ich'erá nchónhya nkehe tóyóhé tíha —ichro ch'ín Jesús.

<sup>14</sup> Na ntá k'uíyehé ch'ín Jesús tí chojni ínaá ntáchro ch'án kíxín:

—Tinhínrá kaín rá tí nkehe ntáxrjan la ko tiénxinrá. <sup>15</sup> Tí nkehe ine chojni la jehya jie tíha. Tí nkehe t'axrjeníxin asén chojni mé jie tíha. <sup>16</sup> Tí tjinkáonrá chrókuinhínrá la chrókuinhínrá —ichro ch'án.

<sup>17</sup> A ntá tíó kuítóhe ch'án kaín tí sín tsíkóchjina a na ntá jehe ch'án la ko tí sín k'uájiko ch'án mé k'uíxenhen sín nchia. Na ntá kjuanchankíhi sín ch'án kíxín nkexrí t'axrjexín tí nkehe kjuako ch'án a. <sup>18</sup> Na ntá ntáchro ch'ín Jesús kíxín:

—¿Á kjaxinrá tiénxinhyará? ¿Á noahyará kíxín tí nkehe ineni na jehya jie <sup>19</sup> kíxín jehya asénni sátsji? Tí nkehe ineni na sátsji nkaya tseeni na ko xik'axrje ínaá —ichro ch'án.

Mé t'axrjexín kíxín tí nkehe sineni la jehya jie.

<sup>20</sup> Ntá ntáchro ch'ín Jesús kíxín:

—A ntá tí nkehe t'axrjeníxin chojni na mé jie táha. <sup>21</sup> Nkaya asánrá mé t'axrjeníxin tí jínahya tjenkayáxinrá, la ko tí tjachehé kíchuará, la ko tí tjinkáonrá tsochontará chojni chjin ókjé, la ko tí t'oyán kíchuará <sup>22</sup> la ko tí chrókueerá, la ko tí tjaké asánrá tí nkehe chóna ókjé sín, la ko tí jínahya ch'ehérá kíchuará, la ko tí kjuach'ia xríkoará la ko tí jínahya tjenkayáxinrá, la ko tí chjinoxínhanrá, la ko tí ch'énará kjuach'ia, la ko tí kjuahnke chontará, na kó ti chontahyará

kjuaxrexinkaon jína. <sup>23</sup> Kaín tí nkehe jínahya a mé t'axrjeníxin chojni, la mé tjasixín sín jie.

### Ijnko tjan tsíkjixín kjín mé kuítekaon tjan tí ch'ín Jesús

(Mt. 15.21-28)

<sup>24</sup> Ntá ch'ín Jesús mé sákjuíxin ch'án ntiha ntá sákjuí ch'án nó chjasin Tiro la ko chjasin Sidón. Ntá k'uíxenhen ch'án ijnko nchia kíxín tjinkakonhya ch'án kíxín chrókónohe chojni kíxín ntaha tjan ch'án. Kjánchó xitjahya kjuák'emá ch'án ntiha. <sup>25</sup> Na ntá ijnko iné ijnko tjan tjarisoá chóna ijnko nchakuen tí jínahya mé kuínhin nkehe tí xra ch'e ch'ín Jesús kíxín tjasin ch'án kjuaxroan, ntá tuénxín kui tjan kjuák'exín toch'in tjan chrínkí toté ch'ín Jesús. <sup>26</sup> Na mé jehe tjan tsíkjixín kjín, na mé tsíkjixín tjan nó nación Sirofenicia. Na ntá jehe tjan a mé kui tjan chrónógehe tjan tí ch'ín Jesús kíxín chrókuakitsje ch'án tí nchakuen tí jínahya chóna xjeen tjan.

<sup>27</sup> Ntá ntáchro ch'ín Jesús kjuátehe ch'án kíxín:

—Títóhé senó chrókjóné tí xjan. Jehya tí jína chrókuakítsjahá xjan tí niotja ntá chrótjahá koniá chrókjóné va —ichro ch'án.

<sup>28</sup> Ntá jehe tjan kjuátehe tjan ntáchro tjan kíxín:

—Chaxín xíkaha, Inchéni. Kjánchó kjónté tí koniá tjejoyánkí mesa ine tí tot'o niotja tóxènjín tí chánjan —ichro tjan.

<sup>29</sup> Na ntá ntáchro ch'ín Jesús kíxín:

—Táha la chaxín ntoá ntáchrúa. Sátsjia kíxín tí nchakuen tí jínahya ó k'uaxrjexín tí xjaan —ichro ch'án.

<sup>30</sup> A ntá tíó kjuíji tjan ntóe tjan, na ntá k'uíkon tjan kíxín tí xjeen tjan na mé ó ntoá tjetsínkaták'á xjan tí cama kíxín ó tsík'axrje tí nchakuen tí jínahya a.

### Ch'ín Jesús mé kjuínchekitohe jína ijnko ch'ín tienhya la ko nixjahya

<sup>31</sup> Ntá ch'ín Jesús mé ó k'uaxrjexín ch'án inaá nó chjasin Tiro ntá k'uát-sínka ch'án chjasin Sidón la ko k'uát-sínka ch'án tí estado Decápolis ntá kjuíji ch'án nó ntayáon Galilea. <sup>32</sup> Ntá kjuíjao sín ijnko ch'ín tienhya na ko ntoáhya nixja ch'án. Ntá chrónóhe sín tí ch'ín Jesús a kixin tsjak'etja tja ch'án chrí-taón kja tí ch'ín a kixin tsitohe ch'án jína. <sup>33</sup> Na ntá ch'ín Jesús k'uaxrjenta tako ch'án tí ch'ín tienhya, k'uaxrjenta sín tí kohya chojni. Na ntá tí dedo tja ch'án mé chr'áxenhén ch'ín Jesús tatsjon tí ch'ín tienhya. La ko kjaxin tí dedo tja ch'án mé kjuíkte ch'án ntaté ch'án ntá kjuínchekákóxin ch'án nejen tí ch'ín nixjahya a. <sup>34</sup> Ntá konta ch'án nkajní k'uáváxin ch'án na ntá nixjehé ch'án tí ch'ín tienhya a, ntáchro ch'án kixin:

—Efata —mé t'axrjexín nkívée sín kixin: ¡Tsoxitjehé!

<sup>35</sup> Na ntá tuénxín xítjehé tatsjon tí ch'ín tienhya ntá kuínhin ch'án la ko kuítóhe jína tí nejen ch'án, ntá jína nixja ch'án. <sup>36</sup> Ntá ch'ín Jesús k'uetóan ch'án kixin ninkexró tsochenkahya sín. Ntá kjónté imá k'uetóan ch'án ntá ántosén sín kjónté íchá xrichronka sín. <sup>37</sup> Na mé imá chrakon sín ntá ntáchro sín kixin:

—Kaín nkehe ch'e ch'án la jína. Tí chojni tienhya la tinhin sín la ko tí chojni nixjahya la nixja sín —ichro sín.

### Ch'ín Jesús mé kjuanjon nkehe kjóne noó mil chojni

(Mt. 15.32-39)

**8** A ntá ijnko yaon nchónhya chojni k'uixikóchjina inaá. A ntá chónthahya sín nkehe sine sín. Na ntá ch'ín Jesús mé k'uíyehé ch'án tí sín k'uájiko ch'án, a ntá ntáchro ch'án kixin:

<sup>2</sup> —Imá tikonógha kaín tí sín i kixin ó ní yaon tjékian sín ntihi ntá chónthahya

sín nkehe sine sín. <sup>3</sup> Ntá chrókuétuanhya sín sáchrókjui sín ntóe sín tí naxa nehya sín kixin ntja ó chrókótiexin sín kixin iso sín la imá kjin tsíkjixín sín —ichro ch'ín Jesús.

<sup>4</sup> Na ntá kjuátehe tí sín k'uájiko ch'án ntáchro sín kixin:

—¿Nkexrí chrókónoxín nchónhya niotja chrókjone kaín tí sín a kixin kohya nchia tí tjeióni? —ichro sín.

<sup>5</sup> Na ntá ntáchro ch'ín Jesús kixin:

—¿Nkekjaín niotja chontará jahará? —ichro ch'án.

Ntá jehe sín kjuátehe sín ntáchro sín kixin:

—Yato niotja chóntani —ichro sín.

<sup>6</sup> Na ntá ch'ín Jesús k'uetuenhen ch'án kaín xín sín kixin ts'ixitjaxín sín nonte. Ntá kuákja ch'án tí yato niotja ntá kjuanchehe ch'án kjuasáyé Dios ntá kóchrít'o ch'án tí niotja a. Ntá chjéhe ch'án tí sín k'uájiko ch'án kixin jehe sín ts'óxíkayehé sín tsakja kaín xín tí sín siín a. <sup>7</sup> Na ko iso koche ntsínsí chónthá sín. Ntá ch'ín Jesús kjuanchia ch'án kjuasáya ntá k'uetóan ch'án ts'óxíkayehé sín kjaxin. <sup>8</sup> Na mé kaín xín sín kjóne sín na kókjehé sín. Ntá chr'éxin naxa kjuínchekaon sín yato ntaxra tí tot'o tí nkehe tsíxehé. <sup>9</sup> Na mé chjina noó mil chojni kjóne sín. Ntá ch'ín Jesús mé nixjehé ch'án sín sákjuí sín <sup>10</sup> ntá tuénxín jehe ch'án la ko tí sín k'uájiko ch'án na mé k'uit'ótjen sín tí ntabáro a sákjuí sín nó tí nonte Dalmanuta.

### Tí sín fariseo tjanchia sín ijnko kjuaxroan jié

(Mt. 16.1-4; Lc. 12.54-56)

<sup>11</sup> Na ntá kui iso sín fariseo kjuankixin sín tjo sín tí ch'ín Jesús kjuanchehe sín ch'án kixin chrókjuakoxín ch'án ijnko kjuaxroan jié kuènte nkaya nkajní kixin tjinkaon sín chrókjuachaxín sín ch'án.

<sup>12</sup> A ntá ch'ín Jesús na mé k'uáváxin

ch'án ikjín kjanxin asén ch'án ntá ntáchro ch'án kixin:

—¿Nkekuènté kixin tí chojni i na mé tjanchia sín ijnko kjuaxroan jié? Ijie la ninkehó kjuaxroan tsjákoxinhya —ichro ch'án.

<sup>13</sup> Na ntá kuítóhe ch'án tí sín a, ntá xík'it'ótjen ch'án tí ntabáro ntá sákjuí ch'án í jnko tóhe ntayaon ínaá.

**Tí xroan nchek'ánkí tí niojté tí sín fariseo**

(Mt. 16.5-12)

<sup>14</sup> Ntá k'uitjáyenhen sín tsíkjikohya sín nkehe sine sín. Jehó jnkokoá niojtá chóna sín nkaxenhen tí ntabáro a.

<sup>15</sup> Ntá ch'ín Jesús k'uetuenhen ch'án tí jehe sín kixin:

—Chrókóxakonhanrá kixin tí xroan nchek'ánkí niojté tí sín fariseo la ko niojté tí ch'ín Herodes a —ichro ch'án.

<sup>16</sup> Ntá tí sín xriko ch'án mé kjo sín kichó sín kixin:

—Mé xíkaha ichro ch'án kixin tsíkjikohyáni niojtá.

<sup>17</sup> Ntá kónohe ch'ín Jesús kixin nkehe tí kjo sín kichó sín ntá ntáchro ch'án kixin:

—¿Nkekuènté tjórá kixin chontahyará niojtá? ¿Á naxa tiénxinyará la ko naxa noahyará? ¿Á kénhya asánrá tinkachónkirá Dios? <sup>18</sup> ¿Á t'ikonxinyará ikonrá la ko á tiénxinyará tátsjinrá? ¿Á xráxinkákonhyará? <sup>19</sup> Tió kóchrít'va tí n'ó niojtá kjóne in'ó mil chojni na ¿nkekjaín ntaxra tí tot'ó niojtá naxa kjuenájjinrá? —ichro ch'án.

Ntá jehe sín kjuátehe sín ntáchro sín kixin:

—Teyó ntaxra tí nkehe kjuenájinni —ichro sín.

<sup>20</sup> Xintáchro ch'ín Jesús ínaá kixin:

—Na ko tí kóchrít'va tí yato niojtá kjóne noó mil chojni na ¿nkekjaín ntaxra tí tot'ó niojtá kjuenájjinrá? —ichro ch'ín Jesús.

Ntá ntáchro sín kixin:

—Yato ntaxra —ichro sín.

<sup>21</sup> Ntá ch'ín Jesús ntáchro ch'án kixin:

—Kjónté xíkaha la, ¿á naxa tiénxinyará? —ichro ch'án.

**Ch'ín Jesús mé kjuínchekitohe jína ijnko ch'ín t'ikonhya tí chjasin Betsaida**

<sup>22</sup> A ntá ch'ín Jesús kjuí sín chjasin Betsaida, a ntá ikui iso sín kuíkao ijnko ch'ín t'ikonhya. Ntá chrónóhe sín tí ch'ín Jesús kixin chrókjuínchekitohe ch'án jína tí ch'ín a. <sup>23</sup> Ntá ch'ín Jesús mé itsé ch'án tja tí ch'ín t'ikonhya a ntá k'uaxr-jentakó ch'án ikon tí chjasin a. Na ntá kuíkatehe ch'án ntaté ch'án ikon tí ch'ín t'ikonhya a la ko kjuak'etja tja ch'án ntá kjuanchankíhi ch'án kixin:

—¿Á ó t'ikuan ntsí? —ichro ch'án.

<sup>24</sup> Ntá ntáchro tí ch'ín t'ikonhya kixin:

—T'ikonni chojni, kjánchó éxí nta tsjehe itji —ichro ch'án.

<sup>25</sup> Ntá ch'ín Jesús mé xíkjak'etja tja ch'án ínaá tí kon tí ch'ín t'ikonhya a. A ntá tí ch'ín k'uíkonhya kuítóhe ch'án jína la jína t'ikon ch'án kaín nkehe. <sup>26</sup> Na ntá ch'ín Jesús mé k'uetuenhen ch'án tí ch'ín k'uék'ikonhya kixin sátsji ch'án ntøe ch'án ntáchro ch'án kixin:

—Chrók'uíxenyha chjasin la ko ninkexró chróchenkahya ntiha —ichro ch'án.

**Ch'ín Pedro chrónka ch'án kixin ch'ín Jesús mé tí nkexro Cristo**

(Mt. 16.13-20; Lc. 9.18-21)

<sup>27</sup> A ntá tí ch'ín Jesús la ko tí sín k'uájiko ch'án sákjuí sín tí chjasin ntsí chjino Cesarea de Filipino. A ntá tí ntia mé kjuanchankíhi ch'ín Jesús tí sín k'uájiko ch'án kixin:

—¿Nkehe ntáchro chojni kixin nkexro tí janhan? —ichro ch'án.

<sup>28</sup> Ntá ntáchro sín kixin:

—Iso sín mé ntáchro sín kixin jaha mé ch'ín Juan Bautista, ichro sín. **A** ntá í so sín na mé ntáchro sín kixin jaha mé ch'ín Elías, ichro sín. **A** ntá í so sín mé ntáchro sín kixin jaha mé ijnko tí sín tsíchrónka itén Dios ósé —ichro sín.

<sup>29</sup> Ntá kjuanchankíhi ch'án sín inaá kixin:

—¿**A** ntá jahará nkechorá kixin nkexro tí janhan? —ichro ch'án.

Ntá kjuátehe ch'ín Pedro ntáchro ch'án kixin:

—Jaha mé tí Cristo, ichroni —mé chro ch'án.

<sup>30</sup> Ntá k'uetōan ch'ín Jesús kixin tsochenkahya sín ninkexró.

### **Ch'ín Jesús chrónka ch'án kixin ts'en ch'án**

(Mt. 16.21-28; Lc. 9.22-27)

<sup>31</sup> Na ntá kjuankixin kjuako ch'ín Jesús kixin tí Xjeen Dios K'óna Chojni mé t'ichjánxin kixin imá tsjasóte ch'án la ko tsotjinkakonhya kaín tí sín táda kuènte nínko la ko tí sín t'etōan kuènte tí sín nchat'á la ko tí sín maestro tjako tí ley. **A** ntá tí sín a mé ts'óyán sín ch'án. Kjánchó tí nixin yaon na ó tsoxechón ch'án inaá. <sup>32</sup> Kaín tíha mé ntoá chrónka ch'án. **A** ntá ch'ín Pedro mé kuakitsjenta ch'án tí ch'ín Jesús chrókjuentuéhe ch'án. <sup>33</sup> Na ntá kuinkátjía ch'ín Jesús komá ch'án kaín tí sín k'uájiko ch'án a. Ntá kjuentuéhe ch'án tí ch'ín Pedro a ntáchro ch'án kixin:

—¡Sátjia ntáha, Satanás! Jaha la tjenkayáxinhya éxí tjenkayáxin Dios. Náhi. Jaha tjenkayáxian éxí tjenkayáxin chojni ó —ichro ch'án.

<sup>34</sup> Ntá ch'ín Jesús mé k'uíyehē ch'án tí sín k'uájiko ch'án la ko tí sín tsíkóchjina a. Ntá ntáchro ch'án kixin:

—Tí jnkojínrá tjínkáonrá tsochréhérá tí janhan na t'ichjánxin tsítōhérá kaín tí nkehe tjaké asanrá na ntá tsamará tí ntacruz kuéntará, **a** ntá tsochréhérá

tí janhan. <sup>35</sup> **A** ntá tí nkexro tjínkaon jehó sinchekaá asén mé ts'itjáyán. **A** ntá tí nkexro sinchek'itjáyánxín asén kixin tinkáchónki tí janhan la ko chrónkaxín tí tan tsjanjon kjuachón mé tsaá. <sup>36</sup> ¿**A** ntá nkehe tsonhen tí chrókjuacha ijnko chojni chróchónka kaín nkehe síin chjasintajni, **a** ntá kjuachón chrókjuechek'itjáyán? <sup>37</sup> ¿Nkehe chrókjueka chojni kixin chróchónka tí kjuachón? <sup>38</sup> **A** ntá jnkojín nkexro tsosuehe kixin tinkáchónki tí janhan la ko tí tan kuéntana nkayakon tí chojni jínahya chónka jie la kjaxin tí Xjeen Dios K'óna Chojni tsosuehe ch'án tsontáchro ch'án kixin chóxin ch'án tí jehe sín tió tsokjan ch'án tsikao ch'án tí kjuachaxin jíe kuènte It'é la ko tsikao tí sín ángel.

**9** Na ko kjaxin chrónka ch'ín Jesús kixin:

—Chaxín ntáxrjan kixin isorá tjejorá ntihi la naxa ts'énhyará ts'ikonjiará itsi tí kjuachaxin ts'etōan Dios —ichro ch'án.

### **Ch'ín Jesús mé k'uíxitoxin nkexrí tsjehe ch'án**

(Mt. 17.1-13; Lc. 9.28-36)

<sup>2</sup> Ntá k'uátsínka injon yaon ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan sákjuí sín jehó sín ijnko jna noi. Ntá ntiha mé xrínahya k'uíxitoxin ókjé nkexrí tsjehe ch'án k'uíkon tí jehe sín. <sup>3</sup> **A** ntá iké ch'án tsík'óna imá tjákini la ko imá tjóá éxí chrinta tsjehe, **a** ntá ntihi chjasintajni kohya ninkexró chrókjuechén tí ka chrókuitohe imá tjóá xikaha. <sup>4</sup> Na ntá titàya k'uíkuèn sín ntiha itjen tí ch'ín Elías la ko tí ch'ín Moisés tjejtóto sín tí ch'ín Jesús. <sup>5</sup> **A** ntá ch'ín Pedro mé ntáche ch'án tí ch'ín Jesús kixin:

—Maestro, jína kixin tjejóni ntihi. Chrókjuech'énani iní nchia la mé ijnko kuénta la ko ijnko kuènte ch'ín Moisés la ko ijnko kuènte ch'ín Elías.

<sup>6</sup>Mé xikaha ichro ch'án kixin kaín sín la imá chrakon sín la tí ch'ín Pedro la mé í noehya ch'án nkehe tsixro ch'án. <sup>7</sup>Na ntá xrínahya ikui ijnko tjuí kjuák'etja chrítaón kaín xín tí tjejó sín. Na ntá chríkjan tí tjuí kuínhin sín itén ijnko nkexro nixja na mé ntáchro kixin:

—Tí nkexro i mé xjanna. Imá tjuaha ch'án. Chrókuinhínrá tí nkehe tjako ch'án.

<sup>8</sup>Na ntá tió tsjehe sín nkuíxín tí tjejó sín la í kohya tí iyó sín a. Jehó tí ch'ín Jesús tjejóko sín.

<sup>9</sup>A ntá tí ó k'uínkajinxín sín tí jna ntá k'uetqan ch'ín Jesús kixin tsochenkahya sín ninkexró tí nkehe k'uíkon sín hasta tsoxechónjian tí Xjeen Dios K'óna Chojni. <sup>10</sup>Ntá ninkexró chenkahya sín tí nkehe k'uíkon sín. Na ntá jehó sín mé tje-jótjo sín kixin nkehe t'axrjéxín tí nkehe chrónka ch'án kixin tsoxechón ch'án ínaá. <sup>11</sup>Na ntá kjuanchankíhi sín tí ch'ín Jesús ntáchro sín kixin:

—¿Nkeuente kixin ntáchro tí sín tjako tí ley kixin saxín itsi tí ch'ín Elías la ntá chr'éxín itsi tí nkexro tsaáxinni? —ichro sín.

<sup>12</sup>Ntá ntáchro ch'ín Jesús kixin:

—Chaxín saxín itsi ch'ín Elías la ntá tsjasiyóxin ch'án kaín xín nkehe. ¿A ntá nkehe ntáchro xroon itén Dios kixin nkehe tsonhen tí Xjeen Dios K'óna Chojni? Na mé ntáchro kixin t'ichjánxin tsjasóte la ko tsotjinkakonhya sín. <sup>13</sup>Kjánchó ó xrjanka kixin chaxín ó tsíki ch'ín Elías, ntá kjuínchekjasóte sín ch'án éxí kóxrjínhin sín éxí nixja tí xroon itén Dios kixin xikaha tsonhen —mé xikaha chrónka ch'ín Jesús.

**Ch'ín Jesús mé kjuínchekitqhe  
jína ijnko xjan chóna ijnko  
nchakuen tí jínahya**

(Mt. 17.14-21; Lc. 9.37-43)

<sup>14</sup>A ntá tió ikjan sín tí kuítqhe tí í so sín k'uájiko ch'án ntá k'uíkon sín kixin

nchónhya chojni tsík'antatjen tí jehe sín. Kjaxin ntaha síin tí sín tjako tí ley ikjo tí jehe sín. <sup>15</sup>A ntá tuénxín tió k'uíkon sín tí ch'ín Jesús na ntá kaín sín kóchéhe sín tinká sín sákjuíchréhe sín ch'án, tsonix-jehe sín ch'án. <sup>16</sup>Ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tjórá tí sín í? —ichro ch'án.

<sup>17</sup>Ntá tjen ijnko ch'án tjenkákjan sín ntiha kjuátehe ch'án kixin:

—Maestro, ntihi kjuítkian ijnko xjanna chóna nchakuen tí jínahya na mé nchenixjahya xjan. <sup>18</sup>Kjonté nkerí tjen xjan la tí nchakuen tí jínahya mé tjáka xjan nonte, ntá ntalóxrjo sítixín ir'va xjan na netaón xjan neno xjan na méxra tjeheya xjan. Ntá xrjanóaha tí sín xrikoa kixin chrókuakitsje sín tí nchakuen tí jínahya a. Kjánchó kjuachahya sín —ichro ch'án.

<sup>19</sup>Ntá ch'ín Jesús kjuátehe ch'án ntáchro ch'án kixin:

—Jahará chojni kénhya asánrá tinkachónkirá Dios. ¿Xá hasta nkesá tjinkáonrá naxa ts'ejóni? ¿Xá hasta nkesá tsjácha tsjak'é tsjákohará? Xrákoará ntihi tí xjan méhe —ichro ch'án.

<sup>20</sup>Na ntá kóchjinako sín tí xjan a. Na ntá tí nchakuen tí jínahya mé k'uíkon tí ch'ín Jesús ntá kjuínchek'aniáte tí xjan a kjuítsínka xjan nonte la kjaminkítaón xjan nonte la sítji ntalóxrjo ir'va xjan. <sup>21</sup>Ntá ch'ín Jesús mé kjuanchankíhi tí it'é tí xjan a ntáchro ch'án kixin:

—¿Á óse xikaha tónhen xjan? —ichro ch'án.

Ntá ntáchro tí it'é tí xjan kixin:

—Desde naxa xjanntsí xjan. <sup>22</sup>A ntá jnkoyaxón tí nchakuen tí jínahya a mé tjákáte xjan xrohi la ko tjákánkí xjan ñtá kixin tjinkaon chrók'óyán tí xjan a. A ntá jaha zá tsjácha tsjínkítsani? La tikonóehéni tsjínkítsani —ichro ch'án.

<sup>23</sup>Ntá ntáchro ch'ín Jesús kixin:

—¿Nkekuènté tjanhankina kixin á tsjácha? Tí tsitekávan la kaín nkehe la jína tsonhen, kixin tí nkexro tsitekaon Dios la jína tsonhen kaín nkehe —ichro ch'án.

<sup>24</sup>Ntá tuénxín itsen kjuátēhe tí it'è xjan, ntáchro ch'án kixin:

—Ó titekaonni. Tsjínkĩtsani kixin antsí má tsitekaonni tí jaha —ichro ch'án.

<sup>25</sup>Ntá k'uúkon ch'ín Jesús kixin itsjé chojni kóchjina. Ntá nixjehe ch'án tí nchakuen tí jínahya chóna tí xjan a ntáchro ch'án kixin:

—Jaha la ijnko nchakuen tí jínahya nchenixjahya chojni la ko nchekíenhya chojni. Ijie la tétuanhan kixin t'axrjéxian tí xjan na ko tsítōhé xjan la í tsokjanhya ínaá —ichro ch'án.

<sup>26</sup>Ntá tí nchakuen tí jínahya a na mé k'óyato la ko kjuínchek'aniáte tí xjan a ínaá, ntá k'uaxrjéxín ntiha. Na éxí tsík'en xjan xikaha tsjehe xjan. Ntá itsjé sín ntáchro sín kixin ó tsíkjixín tsík'en xjan, ichro sín. <sup>27</sup>Na ntá ch'ín Jesús mé tséhe tja tí xjan kjuínchek'inkatjen ch'án xjan.

<sup>28</sup>Ntá ch'ín Jesús la ko tí sín k'uájiko ch'án k'uúxenhén sín ijnko nchia. Ntá jehe sín kjuanchankíhi sín ch'án kixin:

—¿Nkekuènté kixin kjuachahyani kuakitsjeni tí nchakuen tí jínahya a? —ichro sín.

<sup>29</sup>Ntá ntáchro ch'án kixin:

—Tíhi la t'ichjánxín kixin nchónhya tsochronóhéhá T'aná la ko sintehyará —ichro ch'án.

**Yóxin chrónka ch'ín  
Jesús kixin its'en ch'án**

(Mt. 17.22-23; Lc. 9.43-45)

<sup>30</sup>A ntá tió sákjuúxín sín ntiha ntá k'uátsínka sín estado Galilea. A ntá ch'ín Jesús tjinkakonhya ch'án kixin ninkexró ntiha tsonohe sín <sup>31</sup>kixin tinkákjakōhe ch'án tí sín k'uájiko ch'án a. Na mé chrónka ch'án ntáchro ch'án kixin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyán sín ch'án. Kjánchó tí yaon nixin na ó tsoxechón ch'án ínaá —ichro ch'án.

<sup>32</sup>Ntá jehe sín mé kíenxínhya sín nkehe tí ntáchro ch'án la chrakon sín chrókjuanchankíhi sín ch'án nkexrí t'axrjéxín tíha.

**¿Nkexro tí imá tjeotan?**

(Mt. 18.1-5; Lc. 9.46-48)

<sup>33</sup>Ntá kjuíji sín chjasin Capernaum; a ntá tí tjejó sín tí nchia ntiha ntá ch'ín Jesús mé kjuanchankíhi ch'án sín ntáchro ch'án kixin:

—¿Nkehe tí tinkakjórá kichuárá tí kuini ntja? —ichro ch'án.

<sup>34</sup>Ntá jehe sín la tánkoá sín kixin tí ntja kui sín tinkákjo kichó sín kixin nkexro tí imá ts'etōan. <sup>35</sup>Ntá ch'ín Jesús mé kjuák'etjaxín ch'án ntá k'uúyēhe ch'án tí teyó sín k'uájiko ch'án, a ntá ntáche ch'án sín kixin:

—Tí jnkojínrá tjínkaonrá chrókuétoanrá má ntá t'ichjánxín kixin tsjixixín tsochréhérá kaín sín, ts'ítuanhanrá la ko tsjínkĩtsará kaín xín sín —ichro ch'án.

<sup>36</sup>Ntá tséhe ch'án tja ijnko chánjan kjuak'e ch'án jnkosiné tí tjejó tí jehe sín a, ntá kjóa ch'án tí xjan a. Ntá ntáchro ch'án kixin:

<sup>37</sup>—Tí jnkojín nkexro chrók'uáyéhe ijnko chánjan kixin tinkáchónki sín tí janhan la mé xikaha chrók'uáyéhe sín tí janhan la ko kjaxín éxí chrók'uáyéhe sín tí nkexro ichr'ánna —ichro ch'án.

**Tí nkexro nínkakuenhyani tí  
jeheni la tjínkĩtsa tí jeheni**

(Lc. 9.49-50; Mt. 10.42)

<sup>38</sup>A ntá ch'ín Juan mé ntáchro ch'án kixin:

—Maestro, k'uúkonni ijnko chojni na mé kjuachaxín ihniá mé takitsjéxín ch'án nchakuen tí jínahya chóna chojni. Ntá k'uētēuhenni ch'án kixin



xikahya chrókjuich'e ch'án kixin xrikohyani ch'án —ichro ch'án.

<sup>39</sup> Ntá ntáchro ch'ín Jesús kixin:

—Nté t̄tohé ch'án kixin ninkexró tjasixín kjuaxroan kjuachaxin nina la tuénxín chrókjuacha chrók'uantaxina sín. <sup>40</sup> Tí nkexro ninkakuenhyani la mé tjinkitsa tí jeheni. <sup>41</sup> A ntá jnkojín nkexro tsotjáhará kjónté ijnko vaso inta ts-janjonxín sín nina kixin jahará la tin-kachónkirá Cristo, ntáxrjan kixin chaxín ts'áyéhe sín nkehe.

**Tí chojni tjasin jië mé tsjasóte sín**

(Mt. 18.6-9; Lc. 17.1-2)

<sup>42</sup> A ntá jnkojín nkexro chrókjuachroe ijnko xjan kixin chrókjuasin xjan jië tió tinkáchónki xjan tí janhan la íchá jina chrókjuincheteyá sín ch'án ijnko xro jié tsík'óna xrochre la chrókjuikákánkí sín ch'án ntayaon. <sup>43</sup> A ntá tí itjá tjasixián jië na mé íchá chrókójina chrókochrín-jian kixin kjónté jnkokoá tjá mé tsochontaxián kjuachón. A ntá tí yóí tjá la tíha mé sáchrókjuixian tí síin xrohi xitjahya ts'anka, <sup>44</sup> tí síin kos̄into t'enhya la ko síche xrohi ts'ankahya. <sup>45</sup> A ntá kjaxin tí totá tjasixián jië na íchá jina chrókochrínjian kixin kjónté jnkokoá totá mé tsochontaxián kjuachón. A ntá tí yóí totá la tíha sáchrókjuixian tí síin xrohi xitjahya ts'anka, <sup>46</sup> tí síin kos̄into t'enhya la ko síche xrohi ts'ankahya. <sup>47</sup> A ntá tí ikuan tjasixián jië na íchá jina chrókuakitsjenkiá tí kuan a kixin kjónté jnkokoá kuan mé sáchrókjuia tí tjen Dios t'etoan. A ntá tí yóí kuan la tíha mé sáchrókjuixian tí síche xrohi <sup>48</sup> tí síin kos̄into t'enhya la ko síin xrohi ts'ankahya.

<sup>49</sup> A ntá kaín nkexro t'ichjánxin tsjasóte. A ntá kaín nkehe ts'áyéhe Dios chóna xijnta. <sup>50</sup> Tí xijnta la jina. A ntá

tí chrók'uankehe tí jní la ntá xitjahya chrókójni inaá. Jahará mé chrókóyóhará éxí xijnta kixin kjuaxróxin chrók'uejokoará kichuará —ichro ch'án.

**Tjako ch'ín Jesús kixin chrókjuákehya kichó sín**

(Mt. 19.1-12; Lc. 16.18)

**10** Na ntá ch'ín Jesús mé k'uaxr-jexín ch'án chjasin Capernaum sákjuí ch'án nó estado Judea la ko nó tóhe ntarío Jordán. Ntá nchónhya chojni kójnkotsé sín tí tjen ch'án ntiha. Ntá kjuakohe ch'án tí jehé sín kixin xikaha kuèhnen ch'án. <sup>2</sup> Ntá iso sín fariseo mé kóchjinehe sín ch'án kjuanchankíhi sín ch'án nkehe, chrókjuachaxin sín ch'án. Ntáchro sín kixin:

—¿Á síin kjuachaxin tsjákehē chojni ntoa ichjién? —ichro sín.

<sup>3</sup> Ntá kjuátehe ch'án ntáchro ch'án kixin:

—¿Nkehe tí k'uetuanhanrá tí ch'ín Moisés? —ichro ch'án.

<sup>4</sup> Ntá ntáchro sín kixin:

—Ch'ín Moisés kjuanjon ch'án kjuachaxin kixin ts'óna ijnko xroon tsakja tí ichjién kixin ts'itjéxín kichó sín —ichro sín.

<sup>5</sup> Ntá ch'ín Jesús ntáchro ch'án kixin:

—Ntá jahará icha asánrá titekákonhyará ntá k'uetōan ch'án ts'óna tí xroon a. <sup>6</sup> Kjánchó tí xrankíxixín tió kjuíchéna Dios kaín xín nkehe la kjuíchéna ch'án ijnko chojni ntoa la ko ijnko chojni chjin.<sup>8</sup> <sup>7</sup> Méxra tí chojni ntoa tsítóhe ch'án tí it'é ch'án la ko iné ch'án kixin tsakja ch'án ichjién ch'án <sup>8</sup> ntá yóí sín ts'óna sín éxí jnkokoá chojni. Méxra jehya yaá chojni. Náhí, jnkokoá.<sup>\*\*</sup> <sup>9</sup> Na mé xikaha tí kjuachaxin kuente Dios kójnkocchiéxin sín ntá jehé sín chrók'uitjehya kichó sín —ichro ch'án.

§10:6 Génesis 1.27; 5.2

\*\*10:8 Génesis 2.24

<sup>10</sup> A ntá tjejó sín nchia ntá tí sín k'uájiko ch'án a mé kjuanchankíhi sín ch'án ínaá kixin á xitjahya ts'itjíhi kichó sín. <sup>11</sup> Na ntá ntáchro ch'ín Jesús kixin:

—Tí jnkojín nkexro tsjákehe ichjién ntá tsakja ch'án í jnko chjin na mé xikaha tsjachehe ch'án tí tjan tsikótehe ch'án saoxín. <sup>12</sup> La ko kjaxin tí chojni chjin tsikjákehe xii tsakja tjan í jnko chojni ntoa na mé xikaha kjaxin tjan tjasin tjan jie —ichro ch'án.

### Ch'ín Jesús kjuíncheyaon ch'án xjan

(Mt. 19.13-15; Lc. 18.15-17)

<sup>13</sup> Ntá kjuikao sín xjan kixin tjinkaon sín tsjak'etja tja ch'ín Jesús tí xjan a. Ntá tí sín k'uájiko ch'án mé kóninkakonhen sín tí sin kjuikao xjan. <sup>14</sup> Ntá k'uíkon ch'ín Jesús ntá kónínkaon ch'án ntáchro ch'án kixin:

—Nté títóherá tí xjan tsoxrakoa tí tjén janhan la t'inkakuènhyará xjan kixin tí sín kuènte kjuachaxin kuènte Dios la mé tóyóhe éxí tí xjan a. <sup>15</sup> Ntá chaxín ntáxrjan kixin tí nkexro ts'ónahya éxí ijnko chánjan xitjaha ts'ejó sín tí ts'etjoan Dios tí kjuachaxin kuènte ch'án —ichro ch'án.

<sup>16</sup> Ntá kjóa ch'án tí xjan a kjuak'etja tja ch'án xjan la kjuíncheyaon ch'án.

### Ijnko ch'ín ntasoá rico nixjehe ch'án tí ch'ín Jesús

(Mt. 19.16-30; Lc. 18.18-30)

<sup>17</sup> A ntá tió sákjuí ch'ín Jesús ínaá ntá xrakoa ijnko ch'ín tinká ch'án kjuák'exín toch'in ch'án nkayakon tí ch'ín Jesús kjuanchankí ch'án kixin:

—Jaha, maestro jína. ¿Nkexrí chrókjuich'eni kixin chrók'uitjani kjuachón jnkochríxín? —ichro ch'án.

<sup>18</sup> Ntá ntáche ch'ín Jesús tí jehe ch'án kixin:

—¿Nkekuènté ntáchrua kixin jína tí janhan? Jehó jnkokoá nkexro mé jína la tíha mé Dios. <sup>19</sup> Ntá jaha ó noha kixin nkexrí k'uetjoan Dios kixin: “Chrókjuacheéhya kichuá la chrók'oyán-hya chojni la chrókueehya la chrókjón-tahya kichuá la chrókjuich'iahya la ko chróchontehé kjuasáya it'á la ko iná”†† —ichro ch'án.

<sup>20</sup> A ntá jehe ch'án kjuátehe ch'án ntáchro ch'án kixin:

—Maestro, kaín tíha kjuínchexiteyáni desde ntasoáni —ichro ch'án.

<sup>21</sup> Ntá ch'ín Jesús mé komá ch'án la ko tjuèhe ch'án tí ch'ín a. Ntá ntáchro ch'án kixin:

—Naxa t'itjáyan jnkokoá nkehe chrókjuich'e. Sátjia nchekjia kaín tí nkehe chonta. A ntá tí chichaon sínchekjixián tí nkehe chonta la mé nchekitónhén tí chojni nòa, a ntá tí nkehe tjete tsochonta nkaya nkajní. A ntá tió tsjixin tsjánjuan kaín ntá tsjihá tamá tí ntacruz kuènta la chréhé tí janhan —ichro ch'án.

<sup>22</sup> Ntá tió kuínhin ch'án xikaha ntá k'uává ch'án sákjuí ch'án, kixin imá tsjé nkehe chóna ch'án.

<sup>23</sup> Ntá ch'ín Jesús komá ch'án tí sín síin ntiha ntáche ch'án tí sín síin k'uájiko ch'án kixin:

—Imá xrá ijnko chojni chóna imá tsjé nkehe ts'ixenhen sín tí tjen Dios t'etjoan —ichro ch'án.

<sup>24</sup> Ntá tóxakonhen tí sín k'uájiko ch'án kixin xikaha ntáchro ch'án. Ntá chrónka ch'án ínaá kixin:

—Tí sín tjekonhen tí nkehe chóna sín na imá xrá ts'ixenhen sín tí tjen Dios t'etjoan. <sup>25</sup> Antsí xráhya chrók'uátsínka ijnko kocamello ijnko tjar'in ntachica tjexrja. A ntá antsí má xrá ijnko ch'ín chóna itsjé nkehe chrók'uixenhen ch'án tí tjen Dios t'etjoan —ichro ch'án.

††10:19 Éxodo 20.12-16; Deuteronomío 5.16-20

<sup>26</sup> Ntá jehe sín kuínhin sín xíkaha ntá imá chrakon sín. Ntá tjanchankíhi kichó sín kixin:

—Tí xíkaha la, ¿xá nkexro chrókjuacha chrókuaá? —ichro sín.

<sup>27</sup> Ntá komá ch'ín Jesús tí jehe sín ntáchro ch'án kixin:

—A ntá chojni ó tsjachahya sich'e tíha, a ntá Dios jína sich'e kaín nkehe, kixin Dios la kohya nkehe tsjachahya sich'e —ichro ch'án.

<sup>28</sup> Ntá ch'ín Pedro ntáchro ch'án kixin:

—Inchéni, kaín ni mé kuítoheni kaín nkehe chóntani ntá chréheni tí jaha —ichro ch'án.

<sup>29</sup> Ntá kjuátehe ch'ín Jesús ntáchro ch'ín kixin:

—Chaxín ntáxrjan kixin jnkojín nkexro tsítóhe ntøe sín la o tí kichó ntoa o tí kichó chjin la o it'é o iné sín o ichjién sín o xjeen sín o nontee kixin tinkáchónki sín tí janhan la ko tjinkaon sín chrókjuako sín tí tan tsjanjon kjuachón <sup>30</sup> na mé ntihi chjasintajni tsochónta sín ciento veces nchónhya ntøe sín la ko éxí kichó sín la ko éxí iné sín la ko éxí xjeen sín ts'ikon sín itsjé chojni kjé la ko éxí nontee sín xíkaha ts'ikon sín itsjé nonte. Kjónté tsjasóte sín ntihi chjasintajni ntá chr'éxín tsochónta sín tí kjuachón jnkochríxín. <sup>31</sup> A ntá itsjé tí sín t'etøan ijie mé tsjixixín tsochréhe sín. A ntá itsjé tí sín t'ítuenhen ijie, na mé tí sín a mé ts'etøan sín tí ntíha.

**Níxín chronka ch'ín  
Jesús kixin its'en ch'án**

(Mt. 20.17-19; Lc. 18.31-34)

<sup>32</sup> Ntá tjejótji sín chríin sín tí ntja sátsji chjasin Jerusalén. Ntá ch'ín Jesús mé tje-taón ch'án ntja ntá tí sín k'uájiko ch'án mé tóxakonhen sín chrakon sín chréhe sín. Ntá k'uíyehé ch'án jehó tí teyó sín inaá ntá kjuankíxín ch'án chénka ch'án

sín nkexrí tí nkehe tsonhen ch'án. <sup>33</sup> Ntá ntáchro ch'án kixin:

—Ijie sátsjini Jerusalén. Na ntá tí Xjeen Dios K'óna Chojni mé tsotsé sín ch'án tsjikénhen sín tí sín nchat'á t'etøan la ko tí sín tjako tí ley. Ntá ts'etøan sín kixin its'en ch'án. Ntá sinchek'áyéhe sín ch'án tí sín jehya judío. <sup>34</sup> Ntá jehe sín la tsjanoá sín tí jehe ch'án la ko ntaté sín tsíkíte sín ch'án la ko tsjate sín ch'án ntá ts'óyán sín ch'án. Kjánchó tí yaon níxín mé tsoxechón ch'án inaá —mé xíkaha ichro ch'ín Jesús.

**Ch'ín Jacobo la ko  
ch'ín Juan tjanchia sín nkehe**

(Mt. 20.20-28)

<sup>35</sup> A ntá tí ch'ín Jacobo la ko ch'ín Juan mé xjeen ch'ín Zebedeo mé kóchjinehe sín tí ch'ín Jesús ntá ntáchro sín kixin:

—Maestro, tjanchahani ijnko xra —ichro sín.

<sup>36</sup> Ntá kjuanchankí ch'ín Jesús ntáchro ch'án kixin:

—¿Nkehe tí xra tjinkáonrá chrókjuít'a-hará? —ichro ch'án.

<sup>37</sup> Ntá ntáchro sín kixin:

—Tió tsétøanxián tí kjuachaxián jié na tjinkaonni kixin ijnkonni chrókjuak'eni itjá chjina a í jnkoni chrókjuak'eni itjá kjon —ichro sín.

<sup>38</sup> Ntá ntáche ch'ín Jesús tí jehe sín kixin:

—Jahará la noahyará nkehe tí tjanchanará. ¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

<sup>39</sup> Ntá jehe sín kjuátehe sín ntáchro sín kixin:

—Kja tsjachani —ichro sín.

Ntá ntáche ch'ín Jesús tí jehe sín kixin:

—Chaxín its'irá éxí tí nkehe tsjá it-s'ia la ko tsikiterá éxí tsikite janhan. <sup>40</sup> Kjánchó janhan xitjahya tsjánjuan kjuachaxin kixin ijnkorá chrókjuak'erá

tjaná chjina la í jnkorá chrókjuak'era tjaná kjon kixin janhan na tónahya to-car tsjánjuan tíha kixin tí sín a la xráxín ó tsíkónoxín —ichro ch'án.

<sup>41</sup> A ntá tió kuínhin tí ite sín xíkaha tsintáchro tí sín a ntá kjuankixin kónínkakonhen sín tí ch'ín Jacobo la ko tí ch'ín Juan. <sup>42</sup> Ntá k'uíyehé ch'ín Jesús kaín tí jehe sín ntá ntáche ch'án sín kixin:

—Ó nohará kixin tí sín t'etōan chjasintajni la imá t'etuenhen sín kaín chojni la ko tí sín imá tjetōan mé imá nchehnkehe asén sín kixin ihyé sín ts'etōan sín. <sup>43</sup> Kjánchó jahará la xíkaha chrókjuich'era. Náhí. Tí jnkojínrá tjinkáonrá chrókuetōanrá la chrókjuinkitsará tí í so sín. <sup>44</sup> A ntá tió jnkojínrá antsí chrókuetōanrá mé t'ichjánxin senó chrókjuákoxinrá chrókjuich'eherá kichuára xra. <sup>45</sup> Kixin tí Xjeen Dios K'óna Chojni mé kuihya ch'án kixin chojni chrókjuich'ehe ch'án xra. Náhí. Ikui ch'án kixin sich'ehe ch'án sín xra la ko ts'enyákonhen nchónhya chojni kixin tsaáxin sín ch'án —ichro ch'án.

**Ch'ín Bartimeo k'uék'ikonhya  
ch'án ntá ch'ín Jesús  
kjuínchekitōhe ch'án jína**

(Mt. 20.29-34; Lc. 18.35-43)

<sup>46</sup> Ntá kjujji sín chjasin Jericó. Ntá ch'ín Jesús la ko tí sín k'uájiko ch'án la ko nchónhya chojni k'uaxrxjén sín tí chjasin ntiha. Ntá ntiha tjen ijnko ch'ín t'ikonhya mé it'in ch'án Bartimeo ntá it'é ch'án mé it'in Timeo. Tjetjax-in ch'án chrínta ntja tjanchak'á ch'án. <sup>47</sup> Ntá kuínhin tí ch'ín t'ikonhya kixin ó kuichjina ch'ín Jesús, mé tí nkexro kjuix-in chjasin Nazaret, ntá tí ch'ín t'ikonhya kjuankixin t'èya ch'án ntáchro ch'án kixin:

—Jaha Jesús, tsík'axrjeníxian ch'ín David tikonóhéni —ichro ch'án.

<sup>48</sup> Ntá nchónhya sín k'uetuenhen sín ch'án kixin tsotáni ch'án. Ntá íchá antsí má tsen t'èya ch'án ntáchro ch'án kixin:

—Jaha, tsík'axrjeníxian ch'ín David tikonóhéni —ichro ch'án.

<sup>49</sup> Ntá ntahó kjuák'e ch'ín Jesús. Ntá k'uetōan ch'án kixin:

—T'iyehérá tí ch'ín a —ichro ch'án.

Ntá k'uíyehé sín tí ch'ín t'ikonhya ntá chénka sín ch'án kixin:

—Tócháha la t'inkatjen kixin tjet'iyaha ch'án. —ichro sín.

<sup>50</sup> Ntá kjuák'e ch'án tí ka tsítase ch'án ntá chrika k'uínkatjen ch'án kóchjinehe ch'án tí tjen ch'ín Jesús. <sup>51</sup> Ntá ch'ín Jesús kjuanchankíhi ch'án tí ch'ín a kixin:

—¿Xá nkehe tjinkávan chrókjuít'ahá? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Maestro, tjinkaonni kixin chrók'uikonni —ichro ch'án.

<sup>52</sup> Ntá ntáche ch'ín Jesús tí ch'ín a kixin:

—Ijie la jína sátsjia. Ó kuítóha jína kixin kuítekávan tí janhan —ichro ch'án.

Ntá tuénxín tí ch'ín t'ikonhya la ó k'uíkon ch'án ntá chréhe ch'án tí ch'ín Jesús.

**Ntá ch'ín Jesús k'uíxenhén  
ch'án chjasin Jerusalén**

(Mt. 21.1-11; Lc. 19.28-40; Jn. 12.12-19)

**11** Ntá tió kjujji chjina sín chjasin Jerusalén chjinaxón tí chjasin Betfagé la ko chjasin Betania chok'èxin tí jna Olivo ntá k'uetuenhen ch'ín Jesús iyó tí sín k'uájiko ch'án, <sup>2</sup> ntáchro ch'án kixin:

—Sátjirá tí chjasin ntsí chok'èxin ntiha. Ntá ikon chjasin ts'ikonrá kixin ntaha tjechroé ijnko kolócho naxa ninkexró tjiták'áhya va. Ntá tjasintankehéra va ntá tsjikoanará va ntihi. <sup>3</sup> A ntá tí jnkojín chojni

tsjanchankíhará sín kixin nkekuènté xíkaha ch'erá ntá tsontáchrórá kixin: “Tí Maestro mé t'ichjánxinhin va ntá tió tsoxéhe va la tsjikaáni va”, ichrorá —ichro ch'án.

<sup>4</sup>Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá kjuasintankehe sín va. <sup>5</sup>Ntá iso tí chojni tjejó ntiha kjuanchankí sín kixin:

—¿Nkekuènté xíkaha ch'erá tjasín-tankeh'érá tí kolócho a? —mé chro sín.

<sup>6</sup>Ntá kjuáteexín sín éxi k'uetqan ch'ín Jesús. Ntá kjuanjon sín kjuachaxin sátsjiko sín va. <sup>7</sup>Ntá tí kolócho mé kjuikohe sín ch'ín Jesús. Na ntá iké sín kjuínchekamá sín va, ntá kjuák'ekjen ch'ín Jesús. <sup>8</sup>Ntá itsjé chojni kuakitsje sín iké sín la kjuentoá sín tinkák'ikjínx-ín sín ka tí ntja ts'atsínkaxín ch'án. Ntá iso sín la mé tóchrínjin sín chaon nta itsá kayoa ntá xráqao sín tinkát'itjí sín ntja.

<sup>9</sup>À ntá tí sín tsítaón ntja la ko tí sín chréhe iton kjuankixin sín itsje sín chéhe sín ntáchro sín kixin:

—Tsjancheheni kjuasáyé Dios. Jína tí nkexro kuixín kjuachaxin ihnié Ìnchéni. <sup>10</sup>Jína tí kjuachaxién Dios itsi mé ts'etuenhen tí nkexro k'uaxrjeníxin it'éni David. Ntá tsjancheheni kjuasáyé Dios tjen nkaya nkajní —ichro sín.

<sup>11</sup>Ntá k'uíxenhén ch'ín Jesús chjasin Jerusalén la ko kjaxin k'uíxenhén ch'án tí nínko jié tsjehe ch'án nkuíxín tí nkaxenhén. Ntá ó kóntó ntá ch'ín Jesús sákjuíko ch'án tí teyó sín k'uájiko ch'án sákjuí sín chjasin Betania.

**Ch'ín Jesús kónínkakonhen ch'án ijnko nta t'óna to higo tsík'ónahya to**

(Mt. 21.18-19)

<sup>12</sup>À ntá tí kóyaon ntá kjanxín sín chjasin Betania ntá ch'ín Jesús mé k'uén ch'án kjinta. <sup>13</sup>Ntá k'uíkon ch'án kjín

kixin itjen ijnko nta t'óna to higo itsá kayoa. Ntá sákjuítsjehe ch'án tí nta kixin ákué tsahya to. Ntá k'uíkon ch'án kixin jehó ka itsa tí nta a kixin jehya tí yaon ts'óna to. <sup>14</sup>Ntá nixjehe ch'ín Jesús tí nta t'óna to higo k'uetuenhen ch'án tí nta kixin:

—Í ninkexró sinehya tí to ts'óna tí jaha ínaá —ichro ch'án.

À ntá tí sín k'uájiko ch'án mé kuínhin sín xíkaha.

**Ch'ín Jesús kjuínchetjóá ch'án nínko**  
(Mt. 21.12-17; Lc. 19.45-48; Jn. 2.13-22)

<sup>15</sup>Ntá kjuíji sín chjasin Jerusalén. Ntá k'uíxenhén ch'ín Jesús nkaxenhén nínko a. Ntá kjuankixin ch'án k'uinkíté ch'án tí sín nchekjixin nkehe ntiha la ko tí sín t'ena nkehe ntiha. À ntá kótéka ch'án tí mesa tjinkítóxixin sín chichaon la ko tí silla tjejókjen tí sín nchekji kontóá <sup>16</sup>la ko kjuanjonhya ch'án kjuachaxin kixin tsamá sín nkehe ts'ajixenhén sín nínko. <sup>17</sup>Ntá kjuakohé ch'án sín ntáchro ch'án kixin:

—Ntáchro xroon itén Dios kixin: “Tí ntona i mé it'in nchia tsonixjanaxín chojni nkuíxín nación”, à ntá jahará tsík'jich'énará itjueé xíchee<sup>‡‡</sup> —ichro ch'án.

<sup>18</sup>Ntá tí sín nchát'á t'etqan la ko tí sín maestro tjako tí ley na mé kuínhin sín tíha, ntá kjueyá sín nkexrí chrók'óyán sín ch'án, kjánchó chrakon sín kixin kóxrjinhin tí chojni tí nkehe kjuako ch'án. <sup>19</sup>Kjánchó ntá ó kóntó ntá k'uaxrjexín ch'án tí chjasin a sákjuí ch'án.

**Ó tsíxámá tí nta t'óna to higo**

(Mt. 21.20-22)

<sup>20</sup>À ntá tí nchítjen k'uátsínka sín tí tjen tí nta t'óna to higo ntá k'uíkon sín kixin ó tsíxámáxin nuèé tí nta. <sup>21</sup>À

‡‡11:17 Isaiás 56.7; Jeremías 7.11

ntá ch'ín Pedro xráxinkaon ch'án ntáche ch'án tí ch'ín Jesús kixin:

—Maestro, tsjehé tí nta t'óna to higo kónínkakhónhén jna na ó tsíxámá nta —ichro ch'án.

<sup>22</sup> Ntá kjuátehe ch'ín Jesús ntáchro ch'án kixin:

—Tinkachónkirá Dios. <sup>23</sup> Chaxín ntáxrjan kixin jnkojínrá chróntácherá tí jna í kixin: “Sátjixián ntihi tjíkjiankiá ntayaon”, a ntá tí kaín asánrá chrókuinkachónkirá Dios kixin chróxiteyá tí nkehe tsonáchrórá, ntá xíkaha chaxín tsonhen. <sup>24</sup> Mé xíkaha ntáxrjan kixin kaín tí nkehe tsjancheherá Dios tí tsítekaónrá kixin chaxín ts'ayéherá ntá xíkaha tsonhen tsoxiteyá. <sup>25</sup> A ntá tíó tjejonixjehéherá Dios ntá jnkojín nkexro naxa ninkákhónhénrá, la chrók'uitjáyánhanrá tíha kixin It'ará tjen nkaya nkajní kjaxin chrókjuinçek'itjáyán ch'án tí jie chontará. <sup>26</sup> A ntá tí sinček'itjáyánhyará tí ijíé chojni ntá It'ará tjen nkaya nkajní la kjaxin sinček'itjáyánhya ch'án tí jie chontará.

**Tjanchankíhi sín tí ch'ín Jesús nkehe tí kjuachaxin chóna ch'án**

(Mt. 21.23-27; Lc. 20.1-8)

<sup>27</sup> Ntá xíkjan sín chjasin Jerusalén inaá. Ntá xritjak'e ch'án nkaxenhen nínko ntá kóchjina tí sín nchat'á t'etoan la ko tí sín tjako tí ley la ko tí sín táda t'etoan nínko <sup>28</sup> kjuanchankíhi sín ch'án kixin:

—¿Nkehe tí kjuachaxin chonta jaha kixin xíkaha ch'e? ¿Nkexro tjáha tí kjuachaxin kixin xíkaha kjuich'e? —ichro sín.

<sup>29</sup> Ntá kjuátehe ch'ín Jesús ntáchro ch'án kixin:

—Ntá kjaxin janhan tsjánchánkíhárá ijnko nkehe, siná á chrókjuáteherá, ntá tsotjonkará nkehe tí kjuachaxin chonta janhan kixin xíkaha it'a. <sup>30</sup> ¿A ntá nkexro

k'uetuēnhen ch'ín Juan kixin tsíkite ch'án chojni? ¿Á Dios ní o á chojni ó? A ntá jie la tjáteherá —ichro ch'án.

<sup>31</sup> Ntá kjuankixin jehó sín tjo sín kíchó sín kixin:

—Tí tsonáchroni kixin Dios tsík'etuēnhen tí ch'ín Juan ntá tsjančankí tí ch'ín a kixin nkekuèté kuítekakuenhyani ch'án. <sup>32</sup> ¿Á chróntáchroni kixin chojni ó tsík'etuēnhen ch'án? —ichro sín.

Kjánchó chrakōnhen sín tí chojni chjasin kixin kaín sín kuítekaon sín kixin ch'ín Juan mé k'uénixja ch'án itén Dios.

<sup>33</sup> Ntá ntáche sín tí ch'ín Jesús kixin:

—Noehyani —ichro sín.

Ntá ntáchro ch'ín Jesús kixin:

—La ko kjaxin janhan tsoxrjankahya nkexro kjuanjon kjuachaxin kixin xíkaha t'a —ichro ch'án.

**Ch'ín Jesús mé kjuíncheyóexin ch'án éxí chojni ch'e hya xra jina**

(Mt. 21.33-46; Lc. 20.9-19)

**12** Ntá ch'ín Jesús kjuíncheyóexin ch'án inaá ntáchro ch'án kixin:

—Itjen ijnko ch'ín k'ueñkaxin ch'án itsjé ntandá t'óna to uva nontee ch'án la ko kjuích'éna ch'án corral la ko kjuích'éna ch'án ijnko tòye ts'énya sín to uva. A ntá kjuích'éna ch'án ijnko tjat'ò noi kixin ts'it'ótjen ch'án tsokotohe ch'án.

'A ntá kjuínchekjen ch'án tí nonte iso chojni ch'e xra. Ntá sákjuí ch'án kjín. <sup>2</sup> Ntá tí kjuixraká tí yaon ts'óna to ntá k'uetuēnhen ch'án ijnko tí nkexro ch'ehe ch'án xra kixin sátsjikjanchehe ch'án tí sín ch'e xra jnkosiné tí to tsakja ch'án. <sup>3</sup> Ntá tí sín ch'e xra mé tsé sín tí ch'ín a, kjuate sín ch'án ntá ninkehó chjéhya sín ch'án ntá sákjuí ch'án. <sup>4</sup> A ntá tí inché tí nonte mé xíchr'án ch'án tí í jnko nkexro ch'ehe ch'án xra. Ntá kjuíji ch'án ntiha ntá chjéhe sín ch'án xro kjuíncheníhi sín kja ch'án la ko k'uántaxínhin sín ch'án.

<sup>5</sup>Ntá tí ìnché tí nonte a xíchr'án ch'án í jnko chojni sákjuitsjehe ntiha. Ntá kjuíji ch'án ntiha ntá k'óyán sín ch'án. Ntá chr'éxin tí ìnché mé xíchr'án ch'án í so nkexro ch'ehe ch'án xrá sákjuitsjehe sín, kjánchó iso sín k'uékon sín la í so sín la k'óyán sín.

<sup>6</sup>Ntá jehe ch'án chóna ch'án jnkokoáxón xjeen ch'án na imá tjuéhe ch'án tí xjan a. Ntá kjuixixín chr'án ch'án tí xjan sákjuí xjan kixin kjuenkayáxin ch'án kixin: “Tsochóntehe sín kjuasáyé tí xjanna”, ichro ch'án. <sup>7</sup>A ntá tí sín ch'e xrá a tjo sín kichó sín kixin: “Tí ch'ín i mé ts'áyéhe kaín nkehe sín ntihi. A ntá jie ts'óyánni ch'án, a ntá jeheni ts'áyéheni kaín tí nkehe a”, ichro sín. <sup>8</sup>Ntá xikaha itsé sín ch'án k'óyán sín ch'án ntá kuakitsjexín sín ntøe ch'án tí nontee ch'án.

<sup>9</sup>A ntá kjuanchankí ch'ín Jesús ntá chro ch'án kixin:

—¿A ntá nkehe chrókjuich'e tí ìnché tí nonte a? Chrókui ch'án chrók'óyán ch'án tí sín ch'e xrá, a ntá chróchjéhe ch'án ókjé chojni.<sup>¶</sup>

<sup>10</sup>¿Á kjuínchekuáxinhyará jahará tí xroon itén Dios? Ntá chro xikihí:

Tí xro náxrjónhya kuítóenta tí sín ch'éna tjat'o,

mé jie k'óna tí xro tjetooan.

<sup>11</sup>Mé xikaha kjuíché Ìnchéni Dios, na ntá tíha mé ijnko nkehe kjuachrakon k'uíkonni<sup>§§</sup> —ichro ch'ín Jesús.

<sup>12</sup>Ntá chrótsé sín tí ch'ín Jesús chrókjuak'echjina sín ch'án kixin kíenxín sín kixin kaín tí ntá chro ch'án la jehe ch'án k'uántaxínhin tí jehe sín. Kjánchó chrakon sín kixin nchónhya chojni kóchjina ntá kuítóhe sín ch'án ntá sákjuí sín.

## ¿A jína chrókjuenkehe sín gobierno?

(Mt. 22.15-22; Lc. 20.20-26)

<sup>13</sup>A ntá ichr'án sín iso tí sín fariseo la ko iso tí sín kuente ch'ín Herodes kixin tsjanchankíhi sín ch'án iso nkehe kixin tí ntoáhya chrókjuatehe ch'án ntá jína chrók'ueka sín ch'án jie. <sup>14</sup>Ntá kjuíji sín tí tjen ch'ín Jesús ntá chro sín kixin:

—Maestro, ó noheni kixin tí nkehe chronka la chaxín tíha la ko jehya nkexrí tsjehe chojni tjenkayáxin kixin á jína sín, la ko ntoá tjákua ntje Dios. ¿Á jína chrókjuenkeheni tí gobierno tí chichaon tjanchia? ¿Á chrókjuenkeheni sín ní o náhi? —ichro sín.

<sup>15</sup>Ntá ch'ín Jesús kjuátsoan ch'án kixin jehya jína tjenkayáxin sín ntá chro ch'án kixin:

—Jehya jína kixin tjáchaxínrání. Xrákoará ijnko tí chichaon tjanchia sín tsotsjáha —ichro ch'án.

<sup>16</sup>Ntá xráko sín ijnko tí chichaon tsotsjehe ch'án. A ntá kjuanchankí ch'án kixin:

—¿Nkexro tí tsík'axrjexín tjenkání tí chichaon i la ko nkexro ihníé chóna? —ichro ch'án.

Ntá jehe sín kjuátehe sín kixin:

—Tí ch'ín t'etooan mé tjenkání ch'án —ichro sín.

<sup>17</sup>Ntá kjuátehe ch'ín Jesús ntá chro ch'án kixin:

—Chróchjehérá tí ch'ín gobierno t'etooan tí nkehe kuente ch'án; a ntá tí nkehe kuente Dios la chróchjehérá Dios —ichro ch'án.

Ntá chrakon sín kixin xikaha kjuátehe ch'án.

<sup>¶</sup>12:9 Isaiás 5.1-7

<sup>§§</sup>12:11 Salmo 118.22-23

**Kjuanchankí sín kixin  
á chaxín tsoxechón chojni**

(Mt. 22.23-33; Lc. 20.27-40)

<sup>18</sup> A ntá iso sín saduceo kuitsjehe sín tí ch'ín Jesús. A ntá tí sín saduceo mé ntáchro sín kixin chaxínhya tsoxechón chojni tsík'en mé xikaha chrókjuachaxin sín tí ch'ín Jesús ntáchro sín kixin:

<sup>19</sup> —Maestro, ch'ín Moisés mé tsikjin ch'án xroon ntáchro kixin tí ts'en ijnko savé chojni la ko naxa tjen tí ichjién ch'án na ko tsikjich'énahya sín xjeen sín ntá tí kichó tí nkexro tsík'en mé chrókuakja tí tjan k'án a ntá tí xjeen sín mé ts'óna éxí xjeen tí nkexro tsík'en.\*

<sup>20</sup> Kjánchó k'uéjó yato sín jnkokoá kichó sín. Ntá tí ch'ín sao mé kuákja ch'án ichjién ch'án. Ntá ik'uén ch'án, kjánchó ninkehó xjan tsikjich'énahya sín. <sup>21</sup> Ntá tí ch'ín tsoyo yóxin kuákja ch'án tí tjan k'án ntá k'uén ch'án koí ch'án. Ntá kjaxin tsikjich'énahya sín xjan. A ntá tí ch'ín nixin kuákja ch'án tí jehe tjan ntá xikaha kónhen inaá. <sup>22</sup> Ntá kayatoé sín k'uéchóna sín tjan la ko kaín sín ik'uén sín la ko ninkehó xjan kjuích'énahya sín kaín sín. Ntá kjuixixín ntá k'uén tjan kjaxin tjan. <sup>23</sup> Ntá tió tsoxechón kaín xín chojni la, ¿Ntá nkexro ts'óna xii tjan kixin kayatoé sín tsíkótehe tjan? —ichro sín.

<sup>24</sup> Ntá kjuátehe ch'ín Jesús ntáchro ch'án kixin:

—Ntoáhya tjenkayáxinrá kixin tiénx-inhyará nkehe ntáchro tí xroon itén Dios la ko chonhyará tí kjuachaxién Dios. <sup>25</sup> A ntá tió tsoxechón tí chojni tsík'en la tsotéehya sín la ko tsjanjonhya sín xjeen sín kixin tsotéhe sín kixin tí sín tsík'en la éxí sín ángel ts'ejó sín nkaya

nkajní. <sup>26</sup> A ntá tí tsoxechón tí sín tsík'en, ¿á kjuinchekuáxinhyará tí xroon tsíkjin ch'ín Moisés chrónka nkexrí k'uénix-jeexín Dios ijnko nta yoa tjeche ntáchro ch'án xikihi: “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob?”† <sup>27</sup> Méxra tí Dios i la jehya tinkáchónki tí sín tsík'en. Náhí. Jehe ch'án mé Dios tinkáchónki tí sín tjejóhón. Ntá jahará la imá tiénx-inhyará kixin xikaha ichrorá tjanchankírá —ichro ch'án.

**Tí nkehe antsí imá  
tjetoan tsík'etoan Dios**

(Mt. 22.34-40)

<sup>28</sup> Ntá kui ijnko ch'ín tjako tí ley kjuák'ekinhin ch'án nkexrí kjuachaxin sín ch'ín Jesús. Ntá kuínhin ch'án kixin imá jína kjuátehe ch'ín Jesús. Ntá kjuanchankí ch'án ntáchro ch'án kixin:

—¿Nkehe tí antsí tjetoan tsík'etoan Dios? —ichro ch'án.

<sup>29</sup> Ntá kjuátehe ch'ín Jesús ntáchro ch'án kixin:

—Tí nkehe antsí tjetoan tsík'etoan Dios mé tíhi: “Tinhínra kaín rá chojni Israel kixin Inchéni Dios la mé jnkokoá la kohya í jnko nkexro. <sup>30</sup> Ntá kaín asánra la ko kaín kjuaxrexinkaon kuéntará la ko kaín fuerza kuéntará chrótuèxínra.”‡ Mé xikaha tí nkehe antsí tjetoan tsík'etoan Dios. <sup>31</sup> A ntá tí nkehe yóxin tsík'etoan Dios la mé tóyóhe na mé ntáchro xikihi: “Chrótjuèhéra kichuará éxí tjuèxínra asánra,”¶ la kohya í jnko nkehe antsí má tjetoan tsík'etoan ch'án —ichro ch'ín Jesús.

<sup>32</sup> A ntá kjuátehe tí ch'ín tjako nínko a ntáchro ch'án kixin:

\*12:19 Deuteronomio 25.5

†12:26 Éxodo 3.6

‡12:30 Deuteronomio 6.4-5

¶12:31 Levítico 19.18



—Ntoá ntáchrúa tíha, Maestro kixin chaxín itjen jnkokoáxon Dios la ko kohya í jnko Dios.<sup>§</sup> <sup>33</sup>Noheni kixin kaín asénni la ko kaín kjuaxrexinkaon kuènténi la ko kaín fuerza kuènténi chrótjuèxinni Dios la ko chrótjuèheni kichó ni éxí tjuèxinni asénni.\*\*  
Tíha mé antsí má sínkí. A ntá kaín tí ko chrók'óyánni chrókjuanjonní chróchjánxin chrítaón altar la kánhyó tjetóan tíha —ichro ch'án.

<sup>34</sup>A ntá tió k'uifkon ch'ín Jesús kixin jína kjuenkayáxin ch'án kjuátehe ch'án ntá ntáchró ch'án kixin:

—Jaha la kijnhya tjen tí kjuachaxin kuènte Dios —ichro ch'án.

Ntá kóxakonhen sín ntá ninkexró kjuanchankíehya sín ch'án í so nekehe.

### ¿Xá nkexro It'é tí Cristo?

(Mt. 22.41-46; Lc. 20.41-44)

<sup>35</sup>Ntá ch'ín Jesús kjuák'ekjako ch'án tí nínko jíé. Ntá kjuanchankí ch'án ntáchró ch'án kixin:

—¿Nkexrí kixin tí sín tjako tí ley mé ntáchró sín kixin tí Cristo mé ts'axrjeníxin tí ch'ín David? <sup>36</sup>A ntá tí Nchakuen Dios mé kjuínkítsa tí ch'ín David ntáchró ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntihó tsétóan, tsjixinjian kaín xín tí sín nínkakonhan la tsjachahya sín ts'etóan sín kixin jahvá mé tsétóan”††

<sup>37</sup>¿Xá nkexrí kixin Cristo chrók'óna xjeen ch'ín David kixin jehe ch'ín David ntáchró ch'án kixin Ìnché ch'án tí Cristo a? —ichro ch'án.

Ntá itsjé chojni k'uéjókinhin sín kóxr-jínhin sín tí nkehe kjuako ch'án.

### Ch'ín Jesús chrónka nkexrí ch'e tí sín tjako tí ley

(Mt. 23.1-36; Lc. 11.37-54; 20.45-47)

<sup>38</sup>Ntá ch'ín Jesús kjuako ch'án ntáchró ch'án kixin:

—Tankíehyará tí sín tjako tí ley. Jehe sín mé tóxrjinhin sín chrók'uinkáya sín ka kijnjin la ko tjinkaon sín kixin kaín tí chojni tsoxeta sín ntia mé tsjikosáyehe sín. <sup>39</sup>Jehe sín xritjeyá sín tí nta antsí náxrjón ts'ejóyá sín tí nkaxenhen nínko. La ko kjaxin tió sátsji sín tí sine sín xritjeyá sín tí nta antsí náxrjón ts'ejóksen sín sine sín. <sup>40</sup>La ko takitsje sín ntóe chojni k'án. La ko ch'iyéxín sín chojni kixin isé nixjehe sín Dios kixin chrókuinhin chojni chróntáchró sín kixin imá jína tí jehe sín. Tí sín a mé antsí má tsjasóte sín —ichro ch'án.

### Tí ofrenda kjuanjón ijnko tjan k'án

(Lc. 21.1-4)

<sup>41</sup>A ntá jnkonaá mé ch'ín Jesús tjetjaxin ch'án nkaxenhen nínko chók'èxin tjen tí ntacajón tjetóxyeyá ofrenda. Ntá tjetsjehe ch'án kixin nchónhya chojni tinkáki sín chr'áxénhen sín chichaon tí ntacajón. La ko kjaxin nchónhya tí sín rico chr'áxénhen sín nchónhya chichaon tí ntacajón a. <sup>42</sup>Ntá kjaxin ntiha mé kjuí ijnko tjan k'án nòa tjan ntá chr'áxénhen tjan tí ntacajón yaá chichaon kánhyó tjete sínkí. <sup>43</sup>Ntá ch'ín Jesús k'uíyehé ch'án tí sín k'uájiko ch'án ntáchró ch'án kixin:

—Chaxín ntáxrjan kixin tí tjan k'án nòa tjan antsí tjete k'uifkon Dios tí chichaon chr'áxénhen tjan tí ntacajón, a ntá tí sín í so la kánhyó <sup>44</sup>kixin kaín sín la ó chichaon xéhe sín kjuanjón sín. Ntá jehe tjan la kjónté nòa tjan la kjuan-

§12:32 Deuteronomio 4.35

\*\*12:33 Oseas 6.6

††12:36 Salmo 110.1

jon tjan kaín tí chichaon k'u'échónta tjan chrók'uíte nkehe chrókjóne tjan —ichro ch'án.

**Ch'ín Jesús chrónka  
kíxin tsoxíka nínko**

(Mt. 24.1-2; Lc. 21.5-6)

**13** A ntá tió k'uaxrjexín ch'ín Jesús tí nínko jíé ntá ijnko tí sín k'uájiko ch'án ntáchro ch'án kíxin:

—Maestro, kjuánchí náxrjón tí xro la ko tí nchia tsík'óna —ichro ch'án.

<sup>2</sup>Ntá kjuátehe ch'ín Jesús ntáchro ch'án kíxin:

—¿Á tsjehé jaha tí nchia jíé tsík'óna ní? Tsjixraká tí yaon la í ninkehó xro ts'e-jókjenhya kíchó, la kaín tíha la tsoxika —ichro ch'án.

**Tí nkehe tsonhen chjina tí tsjixixín**

(Mt. 24.3-28; Lc. 21.7-24; 17.22-24)

<sup>3</sup>A ntá sákjuí sín chrítaón tí jnā Olivo chók'èxin tjen tí nínko a. Ntiha kjuák'et-jaxín ch'ín Jesús. Ntá ntiha ch'ín Pedro, la ko ch'ín Jacobo, la ko ch'ín Juan, la ko ch'ín Andrés kjuanchankíhi sín ch'án nkehe, ntáchro sín kíxin:

<sup>4</sup>—Tjinkaonni tsochronka nkesá tsonhen tíha la ko nkexrí tsonoexínni nkesá tsoxiteyá kaín tíha —ichro sín.

<sup>5</sup>Ntá ch'ín Jesús kjuátehe ch'án ntáchro ch'án kíxin:

—Tóxakonhanrá títoéhyará kíxin ninkexró chrókjuit'ayahyará. <sup>6</sup>Nchónhya chojni tsi tsonáchro sín kíxin jehe sín mé Cristo. Ntá xíkaha sich'iyehé sín nchónhya chojni.

<sup>7</sup>A ntá tió tsinhínrá kíxin tjanjonko kíchó sín la t'óyán kíchó sín la chrakonhyará tóxakuanhyará ó jehí tsonhen tíha. Kjonté xíkaha naxá tsjejehya chjasintajni. <sup>8</sup>Ijnko nación tsjanjonko í jnko nación. La ntiha la ntaha la tsinkí nonte la ko itsjé chjasin na tsokjinta la ko

ts'ixité sín tsonínkaon sín. Tíha na ntá xrankíxixón tí kjuatjoté.

<sup>9</sup>Tóxakonhanrá jahará kíxin mé tsjikaánrá sín nkayakon tí sín t'etoan ntá tí nkaxenhen nínko ntiha mé tsjatiaxínrá sín. Jahará t'ichjánxin tsochjinará tí tjejó tí sín gobernador la ko tí sín rey kíxin tinkachónkirá tí janhan; ntá tsjachará tsochronkará nkexrí tinkachónkirá tí janhan nkayakon tí jehe sín. <sup>10</sup>Tí naxá ts'itjáyanhya chjasintajni la mé t'ichjánxin tsinhin chojni kaín xín nación tí tan jína tsaáxin sín. <sup>11</sup>Tió sátsjikoará sín tsjikaánrá sín tí tjejó tí sín t'etoan, la tóxakuanhyará nkehe tsjateherá la ko nkehe tsjenkayáxinrá. Náhí. Chronkará tí nkehe kjuanjon Dios tsonáchrorá tí hora a, kíxin jahyará tsonixjará. Náhí. Nchakuen Dios mé tsonixja. <sup>12</sup>Iso chojni kjónté naxá kjéhya sín tsjikaán tí kíchó sín kíxin its'en. La ko kjáxin xíkaha iso chojni tsjikaán tí xjeen sín la ko kjáxin iso sín tsonínkakonhen sín tí it'é la ko iné la tsjikaán sín kíxin its'en. <sup>13</sup>Kaínxín chojni chjasintajni tsonínkakonhanrá sín kíxin tinkachónkirá tí janhan. A ntá tí sín tsítóehya tinkáchónki sín tí janhan hasta tsjixixín ná mé tsaá sín.

<sup>14</sup>Tsjixraká ijnko yaon ts'ikonrá tsjak'e tí nkehe jínahya tí chrókjua'ehya éxi tsintáchro profeta Daniel<sup>‡‡</sup>—ntá tí chojni sinchekuáxin tí xroon i mé chrókuienxín sín tíha—, a ntá tí chojni tjejó estado Judea ts'ikon sín xíkaha la sátsji sín tsochriin sín jnā tsjík'ejómá sín. <sup>15</sup>A ntá tí sín tjejó chrítaón nchia la í chrók'uínkajinhya sín, chrók'uixenhya sín nkaxenhen nchia chrókuakitsje sín ichrén nkehe chóna sín. <sup>16</sup>Ntá tí sín tjejó nontee sín la í chrókjanhya sín naxá chrókjua'ekja sín iké sín. <sup>17</sup>Ntá nòa tí chojni chjin ts'ejóyá tí

‡‡13:14 Daniel 9.27; 11.31; 12.11

yaon a la ko tí sín tjejonchekakí xjeen.  
<sup>18</sup>Chrókjuancheherá Dios kixin jehya nchakuen kin chrókónhen tíha. <sup>19</sup>Á ntá tí yaon a mé imá kjuaxróxinhya ts'ejó chojni kixin ninkehó yaon kuènhya xikaha desde ti kjuankíxixín Dios kjuich'éna ch'án chjasintajni la ko kjá xikaha tsonhen chr'éxin inaá. <sup>20</sup>Á ntá tí chrókjuanjon Inchéni Dios kjuachaxin kixin isé chrókónhen tíha, ntá ninkexró chrókjuacha chrókuaá. Á ntá náhí la kuikonóhe ch'án tí sín tsíkjeýá ch'án ntá k'uetóan ch'án kixin tjoka ts'atsínka tí kjuachrakon a.

<sup>21</sup>Á ntá jnkojín nkexro tsontáchro kixin: “Tsjehe, ntihi itjen tí Cristo”, o tsontáchro sín kixin: “Tsjehe, ntiha tjen ch'án”, la títekákuènyará sín. <sup>22</sup>Na mé itsi iso sín tsontáchro sín kixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan jié tjinkaon sín chrókjuich'iyexín sín chojni, kjónté tí sín tsíkjeýá Dios. <sup>23</sup>Á ntá jahará chroxakonhanrá kaín tíha. Tjéjtjonkará senó kixin tsonohará kixin xikaha tsonhen.

### Itsi tí Xjeen Dios K'óna Chojni

(Mt. 24.29-35, 42-44; Lc. 21.25-36)

<sup>24</sup>Ntá ts'atsínka tí kjuachrakon la ntá tí yaon la ts'inkaséyanhya, a ntá tí nitjó la tsjanjonhya xrohi. <sup>25</sup>Á ntá tí konotsé la ts'anótjexin nkajní la ko tí kjuachaxin síñ nkaya nkajní la kjaxin tsinkí. <sup>26</sup>Ntá ts'ikon sín tí Xjeen Dios K'óna Chojni itsi chríkjan tjuj tsíkao tí kjuachaxin jié. <sup>27</sup>Ntá tsochr'án ch'án tí sín ángel sátsji sín kuenté chjasintajni tsjikjenájín sín kaín chojni tsíkjeýá ch'án.

<sup>28</sup>Chrókiénxinrá tí nkehe sintayóaxian. Éxí yóhe tí nta t'óna to higo tió sít'ayan kahnte ntá nohará kixin ts'ixenhen nchakuen sóa <sup>29</sup>mé xikaha tió ts'ikonrá xikaha tsonhen kaín tíha ntá

tsonoaxínrá kixin ó kuichjina tí tsjeje chjasintajni. <sup>30</sup>Chaxín ntáxrjan kixin kaín tíha tsonhen tí naxa t'enhya tí chojni síñ chjasintajni. <sup>31</sup>Á ntá tí nkajní la ko tí chjasintajni mé ts'itjáyan. Á ntá tí nkehe ntáxrjan la ts'itjáyanhya, tsoxiteýá tíha.

<sup>32</sup>Á ntá tí yaon la tí hora tsoxiteýá tíha la ninkexro noehya. Kjaxin noehya tí sín ángel tjejó nkaya nkajní la ko kjaxin tí Xjeen Dios K'óna Chojni la noehya. Ó jehó It'eni mé nohe.

<sup>33</sup>Méxra chrók'uejotsjehérá, chrók'uejochonhénrá chrónixjehérá Dios kixin noahyará nkesá la ko nkehora tsonhen tíha. <sup>34</sup>Éxí yóhe ijnko chojni sátsji kjín, a ntá tí naxa sátxixinhya ch'án ntóe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntóe ch'án, la jnkojnko sín ts'áyéhe sín jnkojnko xra kuènte sín. La ko ts'etuenhen ch'án ijnko ch'ín tsjak'e ts'ayakonhen ch'án tí ntója nchia. <sup>35</sup>Méxra jahará chrók'uejotsjehérá kixin noahyará nkesá tsokjan tí inché tí nchia a, á ijnko tsontanonte o á ijnko k'áxrótjen o á ijnko tjetee tsje cochíká o á ijnko ts'inkaséyan. <sup>36</sup>Ntá xrinahya tsi ch'án ts'itjaxin ch'án kixin tjejochrinrá. <sup>37</sup>Mé xikaha tjonkará la ko xikaha ntátjan kaín chojni kixin chrók'uejótsejehe sín —ichro ch'án.

### Tjoyá sín kixin nkexrí tsotsé sín tí ch'ín Jesús

(Mt. 26.1-5; Lc. 22.1-2; Jn. 11.45-53)

**14** Naxa t'itjáyan iyó yaon ntá tsjasin sín tí kia pascua, la ko sine sín tí niotja tsíkjikohya tí xroan nchek'ánkí niotja.

Ntá tí sín nchat'á t'etóan la ko tí sín maestro tjako tí ley mé kjueýá sín kixin nkexrí sich'iyehé sín tí ch'ín Jesús kixin tsotsé sín ch'án a ntá ts'óyan sín ch'án. <sup>2</sup>Ntá ntáchro sín kixin:

—Kjánchó jehya yaon kia chrókón-hen tíha kíxin chrók'uíxitéhya chojni chrókónínkaon sín —ichro sín.

**Ijnko tjan kuikítexín aceite  
náxrjón xraxé ikja ch'ín Jesús**

(Mt. 26.6-13; Jn. 12.1-8)

<sup>3</sup> A ntá ch'ín Jesús kjuák'e ch'án ch-jasin Betania ntøe ch'ín Simón, tí ch'ín k'uechóntha chinlepra. A ntá tí tjene ch'ín Jesús ntá xrínahya ikui injko tjan kuikáo tjan injko xro mé tjía tí aceite xraxé it-sjo nardo, imá tjete tsík'ite. Ntá tí tjan a mé kuakitjehe tjan tí xro a ntá kuikite tjan kja ch'ín Jesús tí aceite a. <sup>4</sup> A ntá iso tí sín tjejó ntiha kónínkakohen sín tjan ntáchro sín kíxin:

—¿Nkekuènte kjuínchexénhen tjan tí aceite náxrjón xraxé? <sup>5</sup> Íchá jína chrókóxixin iní ciento chichaon denario tí aceite a ntá tí chichaon a mé chrókuítønhen tí chojni nòa —mé xíkaha ichro sín k'uantaxínhin sín tjan.

<sup>6</sup> Ntá ntáchro ch'ín Jesús kíxin:

—Nté títøherá tjan; ¿nkekuènte t'an-taxínhínrá tjan? Ó nchoxon tí nkehe kjuích'ena tjan. <sup>7</sup> A ntá tí chojni nòa la ó xráxin ts'ejókoará sín la jína tsjínkit-sará sín jnkójín yaon. Ntá janhan la jnkochrínhínya ts'ejóni. <sup>8</sup> Ntá jehe tjan kjuích'e tjan kaín nkehe tjinkaon tjan tsjanjon tjan. Ó senó kjuíncheka tjan xroan cuerpo kuèntana kíxin tsoxravána. <sup>9</sup> Chaxín ntáxrjan kíxin tí tsjako sín tí tan jína tsaáxin chojni nkuíxin chjas-intajni ntá tsochronka sín kíxin xíkaha kjuích'e tí jehe tjan, a ntá xíkaha tsoxraxinkakonxín sín tjan kíxin xíkaha kjuích'e tjan —ichro ch'án.

**Ch'ín Judas kjuinchekji  
ch'án tí ch'ín Jesús**

(Mt. 26.14-16; Lc. 22.3-6)

<sup>10</sup> A ntá ch'ín Judas Iscariote mé injko teyóxin sín k'ujáiko ch'ín Jesús a mé sákjuítsjehe ch'án tí sín nchat'á t'tøan

kíxin tsochrónka ch'án nkexrí tsotsé sín tí ch'ín Jesús. <sup>11</sup> A ntá jehe sín la chéhe sín kuínhin sín ntá ntáchro sín kíxin chaxín tsjanjon sín chichaon ts'áyéhe tí ch'ín Judas. Ntá kjuankíxin ch'án kjueyá ch'án nkexrí tsochrónka ch'án kíxin tsotsé sín tí ch'ín Jesús.

**Kjóneko sín tí ch'ín Jesús**

(Mt. 26.17-29; Lc. 22.7-23;

Jn. 13.2-30; 1 Co. 11.23-26)

<sup>12</sup> A ntá kui tí yaon xrankíxixin kia sine sín niøtja tsíkjikohya tí xroan nchek'ánki nio tió ts'óyan sín tí kolélo kuènte kia pascua. A ntá tí sín k'ujáiko ch'ín Jesús mé kjuanchankíhi sín ch'án kíxin:

—¿Nketí tjinkávan sátsjini sincheyaxíxinni kíxin sineni kuènte tí kia pascua? —ichro sín.

<sup>13</sup> Ntá k'uetuenhen ch'án iyó tí sín k'ujáiko ch'án ntáchro ch'án kíxin:

—Sátjirá chjasin Jerusalén ntá ntiha tsoxetará injko ch'ín yámá tóa tjía ntá. Tí ch'ín a tsochréhérá. <sup>14</sup> A ntá tí nchia ts'ixenhen ch'án la tsjanchankíhírá tí ìnché nchia, tsontáchrórá kíxin: “K'ue-toan tí Maestro kíxin: ¿Nketí tjen tí cuarto sinexínko ch'án tí sín xriko ch'án tí kia pascua a?”, xíkaha mé tsixrorá. <sup>15</sup> Ntá tsjakohará ch'án injko cuarto jíé, yóxin piso mé chóntha kaín nkehe t'ichjánxin. Mé ntaha mé sincheyaxíx-inrá tí nkehe sineni —ichro ch'án.

<sup>16</sup> Ntá jehe sín la sákjuí sín chjasin Jerusalén na ntá éxi chrónka ch'ín Jesús mé xíkaha k'uitja sín. Ntá tí cuarto a mé kjuíncheyaxíxin sín tí nkehe sine sín kuènte tí kia pascua.

<sup>17</sup> A ntá ó kóntó ntá ó kjuíji ch'ín Jesús la ko tí teyó sín k'ujáiko ch'án tí nchia ntiha. <sup>18</sup> Ntá k'uejó sín, a ntá tió tjejóne sín ntá ntáchro ch'ín Jesús kíxin:

—Chaxín ntáxrjan kíxin injko tí jahará tjejóne jnkokoá ntihi mé sinchekjiráni —ichro ch'án.

<sup>19</sup>Ntá jehe sín mé kjuankíxin k'uává sín. Ntá kjuankíxin sín jnkojnkó kjuanchankíhi sín tí jehe ch'án kíxin:

—¿Á janhan ní? —ichro sín.

<sup>20</sup>Ntá kjuátehe ch'ín Jesús ntáchro ch'án kíxin:

—Jehe ch'án mé ijnko tí teyóxinrá, mé tí nkexro tjenekian jnkokoá plato ntíhi. <sup>21</sup>Chaxín tí Xjeen Dios K'óna Chojni mé tsonhen éxí nixja xroon itén Dios. Kjánchó nõa tí ch'ín sinchekji ch'án. Íchá jína tí ch'ín a la chrókokjehya ch'án —mé xíkaha ichro ch'án.

<sup>22</sup>Á ntá nachrohe tjejóne sín na ch'ín Jesús kuákja ch'án ijnko niotja, ntá kjuanchia ch'án kjuasáyé Dios. Ntá kjuixin ntá kóchrít'o ch'án tí niotja ntá kjuanjón ch'án k'uáyéhe sín. Ntá ntáchro ch'án kíxin:

—Interá, tíhi mé cuerpo kuèntana —ichro ch'án.

<sup>23</sup>Na ntá kjaxin kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sín ik'uí sín kaín sín tí nkehe tjíá. <sup>24</sup>Ntá ntáchro ch'án kíxin:

—Tíhi mé jnina mé chrónkaxín kíxin chaxín tsoxiteyá tí nkehe nixin tsonhen na mé ts'itjí kíxin tsaáxin nchónhya chojni. <sup>25</sup>Chaxín ntáxrjan kíxin ts'íhya janhan tí înté to uva ínaá tí naxa tsjixrakáhya tí yaon itsi kjuachaxin kuènte Dios, a ntá ti yaon a xik'ífa înté to uva nixin —mé xíkaha ichro ch'ín Jesús.

**Ntá ch'ín Jesús chrónka ch'án kíxin  
ch'ín Pedro sinchemá ch'án  
kíxin chónhya tí jehe ch'án**

(Mt. 26.30-35; Lc.

22.31-34; Jn. 13.36-38)

<sup>26</sup>Ntá kjuixin itsje sín ijnko himno kuènte Dios ntá sákjuí sín tí jna Olivo.

<sup>27</sup>Ntá ch'ín Jesús ntáchro ch'án kíxin:

—Ijie tie kaín rá tsochrakonrá ntá tsitonará. Ntá tsoxiteyá éxí ntáchro xroon iten Dios kíxin: “Ts'óyán sín tí nkexro t'ayakonhen tí kolélo ntá tsokohya nkexro ts'ayakonhen va, a ntá tsjichroe va.”<sup>¶</sup> <sup>28</sup>Á ntá tió tsoxechónna ntá sátsjia estado Galilea ntá ntíha tsoxetani —ichro ch'án.

<sup>29</sup>Ntá ntáchro ch'ín Pedro kíxin:

—Kjonté kaín sín tsítóha sín ntá janhan la náhi —ichro ch'án.

<sup>30</sup>Ntá ntáchro ch'ín Jesús kíxin:

—Chaxín ntáxrjan kíxin ijie tie tí naxa tsjehya kochíntoá yáya, la jaha mé sinchemána níya kíxin chonhyana, tsixrua —ichro ch'án.

<sup>31</sup>Ntá itsen kjuátehe ch'ín Pedro ntáchro ch'án kíxin:

—Kjonté koína its'én la sintamáhya tí jaha —ichro ch'án.

La ko xíkaha ntáchro sín kaín sín.

**Ch'ín Jesús nixjeexín ch'án  
Dios tí Huerto Getsemaní**

(Mt. 26.36-46; Lc. 22.39-46)

<sup>32</sup>Ntá kjuíji sín ijnko nonte mé it'ín Getsemaní. Ntá k'uuetuènen ch'ín Jesús tí sín k'uájiko ch'án kíxin:

—Tjejorá ntíhyó nachrohe janhan tsonixjaha Dios —ichro ch'án.

<sup>33</sup>Ntá sákjuíko ch'án tí ch'ín Pedro la ko tí ch'ín Jacobo la ko tí ch'ín Juan. Ntá kjuankíxin imá k'uává asén ch'án kóxonhen ch'án. <sup>34</sup>Ntá ntáche ch'án sín kíxin:

—Imá t'ává asenná éxí chrók'uén xíkaha. Ijie la ntíhyó titóhará tjejotsjehérá —ichro ch'án.

<sup>35</sup>Ntá sákjuí ch'án ijnko kjínhya ntá kjuák'exín toch'in ch'án. Ntá kjuankíxin chrónóehé ch'án Dios kíxin chrókjuanjón ch'án kjuachaxin kíxin chrókjuasótehya ch'án tí nkehe chrókónhen ch'án tí yaon a. <sup>36</sup>Á ntá ntáchro ch'án kíxin:

—It'eni jaha. Jaha mé chonta kaín xín kjuachaxin na ntá chrónóghani tsjakjínhínni kaín tí jínahya tsonhenni tsjasóteni jie. Jehya kixin chrókónhen éxí tjinkaonni jeheni. Náhi. Éxí tjinkávan jaha —ichro ch'án.

<sup>37</sup> Ntá kjan ch'án ntá k'uitjaxín ch'án tí sín kuítóhe la tjejójua sín. Ntá ntáche ch'án tí ch'ín Pedro kixin:

—Simón, tjechrian jaha. ¿Xá xitjahya chrókjuak'etsjehé ijnko hora? <sup>38</sup> Ijie la tjejotsjehérá la ko chrónóehérá Dios kixin títoehya ch'án tí Jínahya chrókjuichroerá. Tí asánrá ntáchro kixin chrókjuinchexiteyará tí jína kjánchó tí cuérporá la tsjachahya —ichro ch'án.

<sup>39</sup> Ntá sákjuí ch'án ínaá chrónóehé ch'án Dios. Ntá ó jehe xikahó xínixja ch'án. <sup>40</sup> Ntá ikjan ch'án la ó tjejójua sín ínaá kixin kuíhí sín kotáchrin. Ntá í noe-hya sín nkexrí chrókjuatehe sín. <sup>41</sup> Ntá níxin sáxíkji ch'án ntá kjan ch'án ntá ntáchro ch'án kixin:

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kixin tí Xjeen Dios K'óna Chojni ts'áyéhe tí sín chóna jie sinchekjasóte sín ch'án. <sup>42</sup> Ntá t'àyará sátsjini kixin ó kjui tí nkexro sinchekjina.

### Sákjuíko sín tí ch'ín Jesús tsjak'echjina ch'án

(Mt. 26.47-56; Lc. 22.47-53; Jn. 18.2-11)

<sup>43</sup> Naxa tjenixja ch'ín Jesús ntá xrí-nahya kjuíji ch'ín Judas, mé ijnko tí teyóxin sín k'uájiko ch'ín Jesús. Nchón-hya chojni kjuíkao ch'án kjujiko sín chica espada la ko inta. Na mé kjuachaxi-én tí sín nchat'á t'etoan la ko tí sín maestro tjako tí ley la ko tí sín táda t'etoan nínko mé kjuixín sín.

<sup>44</sup> A ntá tí ch'ín Judas mé tí ch'ín sinchekji tsintáchro ch'án kixin:

—Tí ch'ín sinékian kochíto mé jehe tíha la itserá ch'án sájtikoará ch'án —ichro ch'án.

<sup>45</sup> Ntá kjui sín ntá tuénxín kóchjinehe ch'ín Judas tí ch'ín Jesús ntá ntáchro ch'án kixin:

—Maestro, Maestro —ichro ch'án.

Na ntá kjóneko ch'án kochíto. <sup>46</sup> A ntá tí sín kjuíji mé tsé sín tí ch'ín Jesús, sákjuíko sín ch'án.

<sup>47</sup> A ntá ijnko ch'ín tjentaxín ntiha mé kuakitsje ch'án chica espada kóchrínjin ch'án tatsjon tí ch'ín ch'ehe tí nchat'á t'etoan xra. <sup>48</sup> Ntá ch'ín Jesús mé ntáche ch'án tí sín a kixin:

—¿Nkekuénté kixin éxí chrótserá xíchee mé xikaha k'uinkakoará chica espada la ko inta kixin tsotseráni? <sup>49</sup> Kaín yaon kjuak'é nkaxenhen nínko kjuákoará, ¿ntá nkekuénté tsehyaráni? Kjánchó t'ichjánxin xikaha tsonhen kixin tsoxiteyá tí nkehe nixja xroon itén Dios —ichro ch'án.

<sup>50</sup> Ntá kaín tí sín k'uájiko ch'án na mé kuítóhe sín ch'án jehó ch'án ntá sákjuí sín.

### Ijnko ch'ín ntasoá sákjuixín ch'án ntiha

<sup>51</sup> A ntá ijnko ch'ín ntasoá mé kjaxin tinkáchréhe ch'án ntiha, a ntá jehó ijnko kamantá tjetsáte ch'án, ntá kjaxin itsé sín ch'án. <sup>52</sup> Kjánchó tí ké ch'án ó tsítsé sín ntá kjónté tjóchín ch'án sákjuí ch'án.

### Ch'ín Jesús kóchjina ch'án tí tjejó tí sín t'etoan

(Mt. 26.57-68; Lc. 22.54-55,  
63-71; Jn. 18.12-14, 19-24)

<sup>53</sup> Ntá sákjuíko sín tí ch'ín Jesús tí ntøe tí nchat'á imá t'etoan. Ntaha mé tsírójnkotsé kaín tí sín nchat'á t'etoan la ko tí sín táda t'etoan nínko la ko tí sín maestro tjako tí ley. <sup>54</sup> Ntá ch'ín Pedro la ikjín tjechréhe ch'án ntá kjuíji ch'án tí ntasin ntøe tí nchat'á imá t'etoan a. Ntaha síche xrohi. A ntá ntiha tjejójtjaxín tí sín policía tjejóchjixrohe

sín, ntá kjaxin ch'án ntaó kuítóhe ch'án tjechjixrohe ch'án.

<sup>55</sup> Ntá tí sín t'etueñhen tí sín nchat'á la ko kaín tí sín t'etoan kjueyá sín chojni kixin tsochrónka sín nkehe tí jie chóna ch'ín Jesús kixin jína chrók'óyán sín ch'án. Kjánchó ninkexró k'uitjahya sín tsjinkítsa tsochrónka. <sup>56</sup> Kjánchó itsjé sín ntáchro sín kjuach'ia ó t'eka sín ch'án jie kixin jnkokónhya tí nkehe ntáchro sín.

<sup>57</sup> Ntá k'uínkatjen iso sín ntá chaxínhya tí jie kjuanchia sín. Ntá ntáchro sín kixin:

<sup>58</sup> —Jeheni ó kuínhinni kixin ntáchro ch'án kixin ts'óxfka ch'án tí nínko tsíkjach'éanaxín chojni tja ntá iní yaon koá la ó tsjak'e ch'án í jnko nínko jehya chojni sich'éna<sup>58</sup> —ichro sín.

<sup>59</sup> Kjonté xikaha la jnkokónhya tí nkehe chrónka sín.

<sup>60</sup> Ntá tí ch'ín t'etueñhen tí sín nchat'á k'uínkatjen ch'án tí tjejó kaín sín ntá kjuanchankíhi ch'án tí ch'ín Jesús kixin:

—¿Á ninkehó tjeñehya jaha? ¿Á chaxín tí jie t'eka sín tí jaha? —ichro ch'án.

<sup>61</sup> Ntá ch'ín Jesús tání ch'án la ninkehó tjeñehya ch'án. Ntá xíkjanchankí tí nchat'á t'etoan ntáchro ch'án kixin:

—¿Á jaha tí Cristo Xjeen Dios imá tjóá? —ichro ch'án.

<sup>62</sup> Ntá ntáchro ch'ín Jesús kixin:

—Chaxín janhan tíha. Ntá chr'éxin ts'ikonrá kixin tí Xjeen Dios K'óna Chojni mé tsjak'etjaxin ch'án tí tja chjina kjuachaxin kuente Dios la ko itjuí mé ts'inkajinxin ch'án nkaya nkajíní —ichro ch'án.

<sup>63</sup> A ntá tí nchat'á t'etoan kótséchje ch'án tí iké ch'án kjuakoxin ch'án kixin imá nínkaon ch'án ntáchro ch'án kixin:

—T'ichjánxinhya í so chojni tsochrónka nkehe. <sup>64</sup> Jahará ó kuínhínrá kixin k'uántaxinhin ch'án Dios. ¿Ntá nkehe tsixrorá? —ichro ch'án.

Ntá kaín sín kjuátēhe sín kixin chrók'uen ch'án.

<sup>65</sup> Ntá ikjé sín la kjuankíxin sín kuikite sín ch'án ntate sín. Na iso sín na k'uíkjehe sín ikon ch'án na ntá kjuate sín ch'án na ko kjuanchankíhi sín ch'án kixin:

—Tónoha kixin nkeexo kjuatia —ichro sín.

A ntá tí sín policia kuente nínko chjéhe sín nkayakon ch'án.

### Ch'ín Pedro kjuínchemá ch'án kixin chónhya ch'án tí ch'ín Jesús

(Mt. 26.69-75; Lc. 22.56-62;  
Jn. 18.15-18, 25-27)

<sup>66</sup> Ntá tí ntásin nonte itjen ch'ín Pedro. Ntá ikui ijnko tjan ch'ehe tjan xra tí nchat'á t'etoan. <sup>67</sup> Ntá k'uíkon tjan kixin tjechjixrohe ch'ín Pedro. Ntá komá tjan ch'án ntá ntáchro tjan kixin:

—Jaha la kjaxin xrikoa tí ch'ín Jesús kjuixin chjasin Nazaret —ichro tjan.

<sup>68</sup> Ntá ch'ín Pedro kjuínchemá ch'án ntáchro ch'án kixin:

—Chonhya ch'án la ko nonahya tí nkehe ntáchrúa —ichro ch'án.

Ntá k'uaxrxjén ch'án ntiha sákjui ch'án ntója. Ntá xrínahya itsje ijnko kochíntoa. <sup>69</sup> Ntá tí tjan a mé k'uíkon tjan tí jehe ch'án ntá chénka tí sín sín-taxín ntaha kixin:

—A ntá tí ch'ín i mé jnkojín tí sín a —ichro tjan.

<sup>70</sup> Kjánchó kjuínchemá ch'án inaá. Ntá antsí chr'éxin tí sín k'uéjontaxín ntáche sín tí ch'ín Pedro kixin:

—Chaxín kjaxian jaha tsíkjixian estado Galilea kixin tjatsoanxínni kixin nixja jaha éxi nixja tí jehe sín —ichro sín.

<sup>71</sup> Ntá ch'ín Pedro kjuankíxin ch'án kjuínchenohe ch'án Dios ntáchro ch'án kixin:

—Chonhya tí ch'ín ntáchrórá jahará —ichro ch'án.

<sup>72</sup>Ntá yóxin itsje kochíntoá. Ntá ch'ín Pedro mé xraxinkaon ch'án kixin nkexrí ó chrónka ch'ín Jesús kixin: “Naxa tsotsjehya kochíntoá yáya mé ó tsjixin sinchemána níya kixin chonhyana.”\* Ntá xraxinkaon ch'án tíha la ntá kjuankixin ch'án tsjánka ch'án kixin ntoáhya kjuích'e ch'án kjuínchemá ch'án tí ch'ín Jesús.

### Ch'ín Jesús nkayakon tí ch'ín Pilato

(Mt. 27.1-2, 11-14; Lc. 23.1-5; Jn. 18.28-38)

**15** <sup>1</sup>A ntá ó k'uínkaséyan ntá tí sín nchát'á t'etoan kójnkotséko sín tí sín táda la ko tí sín tjako tí ley la ko kaín tí sín t'etoan kuènte nínko mé kójnkotsé sín ikjo kichó sín. Ntá kjuixin ntá kjuínchenteto sín tí ch'ín Jesús ntá kjuíkaán sín ch'án tí tjen tí ch'ín Pilato. <sup>2</sup>Ntá tí ch'ín Pilato mé kjuanchankí ch'án ntáchro ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'ín Jesús ntáchro ch'án kixin:

—Kjaxian jaha ntáchrua —ichro ch'án.

<sup>3</sup>A ntá tí sín nchát'á t'etoan mé k'ueka sín ch'án nchónhya jie. <sup>4</sup>Ntá ch'ín Pilato xíkjanhankí ch'án ínaá ntáchro ch'án kixin:

—¿Jaha, nkekuèté tjateehya ninkehó? Tsjehé kixin nchónhya jie t'eka sín tí jaha —ichro ch'án.

<sup>5</sup>A ntá ch'ín Jesús la ninkehó kjuáteehya ch'án. Ntá ch'ín Pilato la í noehya ch'án nkehe tsjenkayáxin ch'án.

### K'uáyéhe ch'ín Jesús kixin sinchekjasóte sín ch'án ntá its'en ch'án

(Mt. 27.15-31; Lc. 23.13-25;  
Jn. 18.38—19.16)

<sup>6</sup>A ntá ch'ín Pilato mé kuènen ch'án kixin tí kia a tsjanjon ch'án kjuachaxin kixin sátsji ijno chojni tjechjina, éxí tjinkaon tsjanhia tí sín tsíkójnkotsé tí kia a. <sup>7</sup>A ntá ntiha tjechjina ijno ch'ín mé it'ín Barrabás, la ko í so sín kuítেকakuenhya sín tí síxreé ntá k'óyán sín chojni. <sup>8</sup>Ntá kui nchónhya chojni kjuankixin sín kjuanchehe sín tí ch'ín Pilato kixin chrókjuich'e ch'án éxí kaín nánó xíkaha. <sup>9</sup>Ntá kjuátehe ch'ín Pilato kixin:

—¿Á tjinkáonrá tsitohá sátsji tí ch'ín Rey t'etuenhen tí sín judío? —ichro ch'án.

<sup>10</sup>Mé xíkaha ichro ch'án kixin jehe ch'án la ó nohe ch'án kixin kjuachjinoxínhin xriko tí sín nchát'á t'etoan, a ntá tsé sín tí ch'ín Jesús kjuíkénhen sín ch'án. <sup>11</sup>A ntá tí sín nchát'á t'etoan a mé kjuínchekóninkaon sín kaín tí chojni síin, ntáche sín kixin íchá jína chrókjuanchia sín kixin chrók'uatjánta ch'án tí ch'ín Barrabás. <sup>12</sup>Ntá ch'ín Pilato kjuanchankí ch'án ntáchro ch'án kixin:

—A ntá tí ch'ín t'íkítexínrá kixin ch'ín Rey t'etuenhen tí sín judío la ¿nkehe tjinkáonrá sít'ahá ch'án? —ichro ch'án.

<sup>13</sup>Ntá jehe sín kjuátehe sín k'óyako sín kjuanchia sín kixin:

—¿Tjakénkana ch'án ntacruz!

<sup>14</sup>Ntá ch'ín Pilato mé kjuanchankíhi ch'án tí jehe sín kixin:

—¿Xá nkehe tí jínahya kjuích'e ch'án? —ichro ch'án.

Kjánchó antsí má itsen k'óyako sín kjuanchia sín kixin:

\*14:72 Marcos 14.30



—¡Tjakénkãnia ch'án ntacruz! —ichro sîn.

<sup>15</sup> Ntá ch'ín Pilato mé tjinkaon ch'án sinchexiteyá ch'án tí nkehe kjuanchia tí sîn k'uúxité ntá kuítóhe ch'án kixin sátsji tí ch'ín Barrabás. Ntá k'uetóan ch'án kixin tsjate sîn tí ch'ín Jesús. Ntá kjuixin ntá kjuanjon ch'án kjuachaxin kixin tí sîn soldado sátsjiko sîn ch'án tsjak'enkani sîn ch'án ntacruz.

<sup>16</sup> Ntá tí sîn soldado a mé sákjuíko sîn ch'án tí ntasin tí palacio. Ntaha kójnkotséxin kaín tí sîn soldado.

<sup>17</sup> Ntá ntiha kuakitsje sîn iké ch'án ntá kjuínchek'inkáya sîn ch'án ijnko ka kjátse tié la ko kjuak'enkaya sîn kja ch'án ijnko corona tsík'óna ntach'í.

<sup>18</sup> Ntá kjuankíxin k'uúxité sîn ntáchro sîn kixin:

—Jnkochrín tsjak'e tsétuénhén tí sîn judío —ichro sîn.

<sup>19</sup> Na ntá ntavara chjéhe sîn ikja ch'án na ko ntaté sîn kuíkíte sîn ch'án. K'uéjoxin toch'in sîn nkayakon ch'án kjuích'eyáxixín sîn éxí imá chrókjuikosáyehe sîn ch'án. <sup>20</sup> Ntá tió kjuixin xíkaha kjuích'ehe sîn ch'án kjuanoá sîn ch'án ntá kuakitsjehe sîn ch'án tí ka kjátse tié tsíkjinchek'inkáya sîn ch'án ntá kjuínchek'inkáya sîn ch'án iké ch'án xráxín ínaá. Ntá kuakitsjexín sîn ch'án ntiha sákjuíko sîn ch'án kixin ntá tsjak'enkani sîn ch'án ntacruz.

**Ntá kjuak'enkani sîn  
ch'ín Jesús ntacruz**

(Mt. 27.32-44; Lc.

23.26-43; Jn. 19.17-27)

<sup>21</sup> A ntá ijnko ch'ín tsíkjixin chjasin Cirene, mé it'in ch'án Simón, mé xjeen ch'án mé tí ch'ín Alejandro la ko tí ch'ín Rufo, mé tsíkjixin ch'án nontee ch'án, ntá k'uátsínka ch'án ntiha. Ntá tí sîn sol-

dado a mé k'uetuénhen sîn ch'án kixin tsochréhe ch'án tsamá ch'án tí ntacruz tsjak'enkáni ch'ín Jesús.

<sup>22</sup> A ntá sákjuíko sîn tí ch'ín Jesús ijnko tjo it'in Gólgota, na mé nkívee sîn t'axrjexín kixin Tjo Calavera.

<sup>23</sup> Ntá ntiha chjéhe sîn ch'án xranvino tsík'ixinkíjkanxín xroan mirra chrók'ui ch'án, kjánchó k'uúhya ch'án. <sup>24</sup> Ntá tí sîn soldado kjuak'enkani sîn ch'án tí ntacruz a. Kjuixin ntá kjuích'exín sîn suerte tí ké ch'án kixin tsoñohe sîn nkexéhe tí ka sátsjiko sîn jnkojnko sîn.

<sup>25</sup> A ntá ó las nueve nchítjen tí kjuak'enkani sîn ch'án tí ntacruz a.

<sup>26</sup> Ntá ikja tí ntacruz kjuak'enkani sîn ijnko ntachiso ntsí tsíkjin sîn nixja nkekuènte kjuínchekjasóte sîn ch'án na mé ntáchro kixin: “Jehe ch'án mé Rey kuènte tí sîn judío”. <sup>27</sup> Na ko kjaxin k'uéjójyáni sîn ntacruz yaá tí síchee la ijnko la nánko chjina la í jnko la nó kjon tí tjen ch'ín Jesús. <sup>28</sup> Na mé xíkaha xiteyá éxí nixja xroon itén Dios ntáchro kixin: “Éxí yóhe ijnko chojni kjuasin jje mé k'uúkon sîn ch'án”†.

<sup>29</sup> Ntá tí sîn k'uatsínka ntiha mé kjuanoá sîn ch'án la ko k'uántaxínhin sîn ch'án tinkátjía kja sîn ntáchro sîn kixin:

—Kjá na ntáchrúa kixin chrók'oxíka tí nínko, a ntá iní yaon koá la ó chrókjuixin chrókjuích'éna ínaá,‡ ichrúa. <sup>30</sup> Nchekaá asán jahvá tjasinkajinxían tí ntacruz méhe —ichro sîn.

<sup>31</sup> Ntá tí sîn nchat'á t'etoan la ko tí sîn tjako tí ley mé kjuanoá sîn ch'án ikjo sîn kichó sîn kixin:

—Ó kjuínchekaá ch'án chojni ókjé ntá jehe ch'án mé xitjahya sinchekaá ch'án asén ch'án. <sup>32</sup> A ntá chaxín jehe ch'án tí Cristo tí Rey kuènte tí nación Israel ntá chrók'uikonni kixin jehó ch'án chrókjuinkajinxín ch'án asén ch'án

†15:28 Isaías 58.12

‡15:29 Marcos 14.58; Juan 2.19

tí ntacruz ntá kjaxin chrókuitekaonni ch'án —ichro sín.

Kjónté tí yaá sín kjaxin tjejóyáni ntacruz mé k'uántaxínhin sín ch'án.

### Ntá k'uén ch'ín Jesús

(Mt. 27.45-56; Lc. 23.44-49; Jn. 19.28-30)

<sup>33</sup> A ntá tió kui chonkíxin mé k'uíxin tie kuenté chjasintajni, kóxrjenhen tí sítié hasta las tres kónjin <sup>34</sup> ntá tí hora a mé itsen k'uèya ch'ín Jesús ntáchro ch'án kixin:

—Eloi, Eloi, ¿lama sabactani? —tí nkívee sín mé t'axrjexín kixin: It'éni, It'éni, ¿nkekuènté kuítóhèni?,<sup>¶</sup> mé xíkaha ichro ch'án.

<sup>35</sup> Ntá iso sín síin ntiha kuínhin sín, ntá ntáchro sín kixin:

—Tinhínrá kixin t'íyehé ch'án tí ch'ín Elías tí ch'ín k'uéchrónka itén Dios ósé —ichro sín.

<sup>36</sup> Ntá ijnko tí jehe sín síin ntiha kuinká ch'án kuákja ch'án ijnko ka ntá kjuínchekjataxín ch'án vino náxrjónhya ntá kjuak'ekjen ch'án ijnko nta kjinjin ntá kjuínchekjina ch'án tí tjen ir'va ch'ín Jesús chrók'ui ch'án tí vino náxrjónhya. Ntáchro tí ch'ín a kixin:

—Tsítóhèni tsotsjeheni á chaxín tsi tí ch'ín Elías tsjinkajin tí jehe ch'án —ichro ch'án.

<sup>37</sup> Ntá ch'ín Jesús itsen k'uíyato ch'án ntá kjuixin k'uén ch'án. <sup>38</sup> A ntá tí ka tjenkákuenxín nkaxenhen nínko mé yaá k'óna k'uichje kjuankíxixín noi la hasta nonte k'uichje. <sup>39</sup> Ntá tí ch'ín capitán romano mé tjen ch'án chok'èxin tí tjen ch'ín Jesús ntá k'uíkon ch'án kixin xíkaha ó kjuixin k'uén ch'án ntá ntáchro ch'án kixin:

—Chaxín tí nkexro i la Xjeen Dios —ichro ch'án.

<sup>40</sup> Kjaxin ntiha k'uejó iso chojni chjin, ikjín k'uejó sín tsjehe sín. Tjejóko sín tjan María Magdalena la ko í jnko tjan María na mé ijnko xjeen tjan it'in Jacobo na mé tí ch'ín tsoyo, ichro sín, la ko í jnko mé it'in José. La ko kjaxin ntaha kjuák'e tí tjan Salomé. <sup>41</sup> A ntá tí chojni chjin i mé kuinkáchréhe sín tí ch'ín Jesús ntá kjuíkao sín ch'án kixin k'uékjinkítsa sín ch'án tí k'uékjak'e ch'án estado Galilea la ko kjaxin í so chojni chjin inaá chréhe sín ch'án sákjuíko sín ch'án chjasin Jerusalén.

### Ntá xrává ch'ín Jesús

(Mt. 27.57-61; Lc. 23.50-56; Jn. 19.38-42)

<sup>42</sup> A ntá ó kóntó tí yaon a mé tí yaon t'óyaxínhin sín kixin tí xrankíxixín tí yaon t'ok'éhe sín, <sup>43</sup> mé kui ijnko ch'ín it'in José chjasén ch'án mé Arimatea. Jehe ch'án mé koí ch'án t'etjan ch'án tí xra kuènte tí síxreé. Kjaxin jehe ch'án tjechónhen ch'án itsi tí kjuachaxin kuènte Dios. Chrakonhya ch'án sákjuí ch'án ntøe ch'ín Pilato kjuíkjanchia ch'án tí cuerpo kuènte ch'ín Jesús. <sup>44</sup> Ntá ch'ín Pilato chrakon ch'án kixin ó tsíkjin tsík'en ch'ín Jesús, ntá k'uíyehé ch'án tí ch'ín capitán a kjuanchankíhi ch'án kixin á chaxín xíkaha kónhen. <sup>45</sup> Ntá chrónka tí ch'ín capitán kixin chaxín ó kjuixin k'uén ch'án. Ntá kuínhin ch'ín Pilato xíkaha ntá kjuanjon ch'án kjuachaxin kixin tsjikakja ch'ín José tí cuerpo kuènte ch'ín Jesús. <sup>46</sup> Ntá ch'ín José mé k'uena ch'án ijnko ka sávana náxrjón. Ntá kjuinkajin ch'án tí cuerpo kuènte ch'ín Jesús, a ntá jehe tí ka a mé kjuínchek'isimá ch'án tí cuerpo kuènte ch'án. Ntá kjuak'enkaya ch'án ijnko tòyè tsíxrayá itjo. Ntá ijnko xro jié mé k'uíkjèxin ch'án tí ntója tí tòyè. <sup>47</sup> A ntá tí tjan María Magdalena la ko tí tjan

<sup>¶</sup>15:34 Salmo 22.1

María iné ch'ín José mé k'uíkon sín nketí xráv ch'án.

### Ó xechón ch'ín Jesús

(Mt. 28.1-10; Lc. 24.1-12; Jn. 20.1-10)

**16** **A** ntá tió k'uatínska tí yaon t'ok'éhe sín ntá tí tjan María Magdalena la ko tí tjan María iné ch'ín Jacobo la ko tí tjan Salomé mé k'uena sín xroan xraxé sátsjiko sín sincheka sín tí cuerpo kuente ch'ín Jesús. <sup>2</sup>Ntá imá nchítjen tí yaon xrankíxixín tí semana mé kjuíji sín tí tòye tsíxráv ch'án, na mé ó kjuítjon yaon. <sup>3</sup>**A** ntá jehe sín mé tinkákjo kíchó sín kíxín:

—¿Xá nkexro tí chrókuakjijnhinni tí xro tjejkjèxin tí tòye? —ichro sín.

<sup>4</sup>**A** ntá xrinahya k'uíkon sín kíxín ó tsíkjixín tsíkjiin tí xro jíe tjejkjèxin tí tòye kíxín í tjenhya éxi k'uékjak'e senó. <sup>5</sup>Ntá kjuíji sín ikon tí tòye ntá k'uíkon sín kíxín tjetjaxín ijnko ch'ín ntasoá tí tja sín chjina tjenkáya ch'án ka kjínjin tjóá ntá imá chrakon sín k'uíkon sín. <sup>6</sup>Ntá ntáchro ch'án kíxín:

—Chrakonhyará. Ó nòna kíxín xritjéyará jahará tí ch'ín Jesús tsíkjiixín chjasin Nazaret kjuák'enkáni ch'án ntacruz. Ntá ó tsíxechón ch'án í kohya ch'án ntihi. Tsjehérá tí tsíkjak'e sín ch'án. <sup>7</sup>Ntá sátjirá tjíchenkará tí sín k'uék'ajiko ch'án la ko tí ch'ín Pedro kíxín tí ch'ín Jesús senó sátsji ch'án estado Galilea ntá ntaha tsoxetará ch'án éxi tsíchrónka ch'án —mé xíkaha chrónka tí ntasoá a.

<sup>8</sup>Ntá tí chojni chjin a mé sákjuíxin sín tí tsíxráv tí ch'ín Jesús imá síxránka sín chrakon sín. Ntá naxa chenkahya sín ninkexró kíxín chrakon sín.

### Ch'ín Jesús titàya xeta tí tjan María Magdalena

(Jn. 20.11-18)

<sup>9</sup>Tió tsíkjixín tsíxechón ch'ín Jesús nchítjen tí yaon xrankíxixín semana ntá titàya xeta ch'án saoxín tí tjan María Magdalena na mé jehe tjan tsikakít-sjexín ch'án yato nchakuen tí jínahya. <sup>10</sup>Ntá sákjuíchenka tjan tí sín k'uék'ajiko tí jehe ch'án t'ává sín tsjánka sín. <sup>11</sup>**A** ntá tió kuínhin sín kíxín tjechón tí ch'ín Jesús kíxín xíkaha tsík'ikon tjan la kjónté kuítেকakonhya sín.

### Iyó sín k'uék'ajiko ch'ín Jesús titàya k'uíkuèn sín tí jehe ch'án

(Lc. 24.13-35)

<sup>12</sup>**A** ntá chr'éxín ntá iyó tí sín a titàya k'uíkuèn sín tí ch'ín Jesús, ókjé nkexrí tsjehe ch'án. Tí sín a mé tjejótti sín ntja sátsji sín ijnko nonte. <sup>13</sup>**A** ntá jehe sín sákjuíchenka sín tí sín í so a; la kjónté xíkaha la kuítেকakonhya sín.<sup>§</sup>

### Ch'ín Jesús k'uetuennen ch'án tí sín k'uék'ajiko ch'án tí xra sich'e sín

(Mt. 28.16-20; Lc.

24.36-49; Jn. 20.19-23)

<sup>14</sup>**A** ntá tió kjuixixín la titàya k'uíkon tí tejnko sín tí jehe ch'án tí tjejóne sín. Ntá nixjehe ch'án sín kíxín nkekuènté icha asén sín tsíkitekakuenhya sín tí sín tsík'ikon kíxín tsíxechón ch'án. <sup>15</sup>Ntá ntáche ch'án sín kíxín:

—Sátjirá kuenté chjasintajni tjákohérá kain xín chojni tí tan jína tsaáxin sín. <sup>16</sup>Tí nkexro tsitekaon la tsikite la mé tsaá. **A** ntá tí nkexro tsitekakonhya na mé tsjasóte. <sup>17</sup>Ntá tí sín tsinkáchónki tí janhan mé tsjasin sín kjuaxroan kíxín kjuachaxin nina tsakitsjexín sín tí nchakuen tí jínahya chóna chojni la ko tsonixja sín ókjé nkíva. <sup>18</sup>Kjónté

konche chrótsé sín la kohya nkehe tsonhen sín la ko kjónté chrók'ui sín ijnko ntá chóna veneno la kohya nkehe tsonhen sín. Kjaxin ts'ejotja tja sín chojni níhi la tsitöhe sín jína.

**Ch'ín Jesús chrìin ch'án nkaya nkajní**

*(Lc. 24.50-53)*

<sup>19</sup>Ntá ó kjuixin nixjehe Ìnchéni Jesús tí jehe sín ntá sákjuí ch'án nkaya nkajní.

À ntá ntiha kjuák'etjaxin ch'án tí tja chjina Dios. <sup>20</sup>À ntá jehe sín sákjuí sín nkuíxín sákjuíkjako sín tí tan jína tsaáxin chojni. À ntá jehe Ìnchéni mé kjuínkítsa ch'án tí sín a la ko kjuachaxién ch'án mé kjuasixín sín kjuaxroan kixin tíha mé tsonoxín tí sín tjejótinhin kixin chaxín nkehe kuènte Dios kjuako sín. Amén.

## Tí tan jína chrónka ch'ín Lucas

### Tíhi mé xrankíxixín tí xroon i

**1** Nchónhya chojni tjinkaon chrókjin sín ntoá kaín xín nkehe nkexrí kónhen k'uátsínka Ìnchéni tí k'uéjóni. <sup>2</sup> Éxí kjuakoheni tí sín tsík'ikonxín kon sín tí xrankíxixín nkehe k'uátsínka ch'án la ntá k'uáyéhe sín tí xra sákju'fchronka sín tí tan jína <sup>3</sup> a ntá janhan kjaxian kjuánchánkiá jína kaín nkehe k'uátsínka tí xrankíxixín. Ntá nõna jína ikjian kaín tíha éxí tsikónhen ntá tsochr'anhan jaha Teófilo kixin imá tjuaha <sup>4</sup> kixin ntá jaha tsonoha jína tí nkehe chaxín tsíkjakoha sín.

### Ijnko ángel mé chrónka kixin tsokjíhi Juan Bautista

<sup>5</sup> A ntá tí ch'ín rey Herodes k'ue-toan ch'án tí estado Judea la ko ntiha kjuák'e ijnko nchat'á mé it'in Zacarías. Jehe ch'án mé kuènte tí sín tsík'axr-jenixin tí ch'ín Abías.\*\* A ntá ichjién ch'án mé it'in Elisabet. Jehe tjan mé tsík'axrjenixin tjan tí nchat'á Aarón. <sup>6</sup> Yóí sín na mé jína sín kixin éxí tjinkaon Dios la mé kjuínchexiteyéhe sín kaín nkehe k'ue-toan ch'án. Méxra ninkexró chrók'uekahya jie tí jehe sín. <sup>7</sup> A ntá jehe sín chóntahya sín xjeen sín kixin ó jehí tsíkitoenhya tjan Elisabet kixin sich'éna tjan xjan la ko ntá jie la ó táda ch'án la ko ó nána tjan.

<sup>8</sup> A ntá ijnko yaon tónhen tocar ch'ín Zacarías la ko tí í so sín tjejóko ch'án sich'e sín xra nchat'á kuènte Dios. <sup>9</sup> A ntá xíkaha kuènhen tí sín nchat'á a ntá jie ch'ín Zacarías mé kónhen tocar ts'ix-enhen ch'án tí cuarto tjóá kuènte njnko tsjak'e ch'án chjincõ chrítaón tí altar kuènte Dios. <sup>10</sup> Ntá kjuák'e ch'án ntiha

kjuak'e ch'án tí chjincõ la nachrohe kaín tí chojni k'uéjó sín ntója nixjehe sín Dios. <sup>11</sup> Ntá xrínahya k'uíkon ch'ín Zacarías ijnko ángel kuènte Dios tjexín toté ch'án nángo chjina tí altar tjak'exin sín chjincõ. <sup>12</sup> A ntá tió k'uíkon ch'ín Zacarías tí ángel la imá kóxakonhen ch'án la ko imá chrakon ch'án. <sup>13</sup> A ntá ntáchro tí ch'ín ángel kixin:

—Zacarías, chrakonhya jaha. Ó kuínhin Dios tí nkehe tjanchehé ch'án la ntá ichjián Elisabet sich'éna tjan ijnko xjan ntoa na mé sinchek'ian xjan Juan. <sup>14</sup> Jaha la tsocháha má la ko itsje chojni tsochéhe sín kixin tsokjíhi xjan <sup>15</sup> kixin imá tjeoan tsjak'e tí xjaan éxí tóxrjnhin Dios. Ninkehó xran vino la ko ninkehó í jnko xran ts'ihya ch'án. Tsochónta ch'án kjuachaxin kuènte Nchakuen Dios kjónté naxa tokjéhya ch'án. <sup>16</sup> Jehe ch'án mé tsjakohé ch'án tí chojni nación Israel a ntá itsje sín tsokjan sín tsinkáchónki sín Ìnché sín Dios. <sup>17</sup> Jehe ch'ín Juan tsítaón ch'án ntia tsixin Ìnchéni. Éxí k'uékjako ch'ín Elías ósé mé tsjako ch'án la ko tsochónta ch'án kjuachaxin éxí k'uéchónta ch'ín Elías kixin tí sín it'é xjan la mé jína ts'ejóko xjeen sín la ko kjaxin tí sín titekakhya mé tsitekaon sín. Mé xíkaha tsonixjehe ch'án chojni kixin ó itsi Ìnchéni la chrókuinkáchónki sín tí jehe ch'án.

<sup>18</sup> A ntá tí ch'ín Zacarías kjuanchankíhi ch'án tí ch'ín ángel ntáchro ch'án kixin:

—¿Nkexrí chrókónõna kixin chaxín chrókónhen tíhi? Janhan la ó tádana la ko tí chjin chonta la kjaxin ó nána tjan —ichro ch'án.

<sup>19</sup> Ntá kjuátehe tí ch'ín ángel ntáchro ch'án kixin:

—Janhan mé Gabriel la mé t'aha xra Dios. A ntá jehe ch'án mé k'uetuanna k'uinka tsonixjaha tsoxrjanka tí nkehe

\*\*1:5 1 Crónicas 24.10

jína tsonhen. <sup>20</sup> A ntá jie kuítekákonhya tí nkehe xrjanka a ntá tsonósian jaha xitjahya tsonixja jaha tsoxitjajia tí yaon tsokjíhi tí xjaan. Mé xíkaha tsoxiteyá kaín tíha —ichro ch'án.

<sup>21</sup> A ntá tí í so sín ntiha k'uejóchónhen sín ntója nínko kixin ts'axrje ch'ín Zacarías, ntá kóxakonhen sín kixin imá sé kóxrjenhen ch'án nkaxenhen nínko. <sup>22</sup> Ntá tió k'uaxrjexín ch'ín Zacarías tí nkaxenhen nínko la í xitjahya nixja ch'án. Ntá kónohe sín kixin ichrén kjuaxroan kuènte Dios tsík'ikon ch'án tí nkaxenhen nínko. Ntá itja ch'án ó tjakoxin ch'án tí nkehe chróntáchro ch'án kixin í xitjahya nixja ch'án.

<sup>23</sup> A ntá tió kjuixin tí yaon kjuích'e ch'ín Zacarías xra nínko ntá sákjuí ch'án ntøe ch'án. <sup>24</sup> A ntá chr'éxin ntá kjuák'eyá tí ichjién ch'án Elisabet. Ntá ntøe tjan ó kuítóhe tjan in'ó nitjó kjuenkayáxin tjan kixin: <sup>25</sup> “Mé xíkaha ijnko kjuaxroan kjuanjon Ìnchéni kixin chrók'uántaxienhyani chojni kixin ó tsochóntani xjeenni jie chrókjuikosáye-heni sín”, ichro tjan.

### Ijnko ángel chrónka kixin tsokjíhi Jesús

<sup>26</sup> A ntá k'uátsínka injon nitjó ntá Dios k'uetuènenhén tí ch'ín ángel Gabriel kixin sátsji ch'án ijnko chjasin estado Galilea mé it'in Nazaret, <sup>27</sup> sátsji nixjehé ch'án ijnko tjan tjarisoá naxa kuákjahya tjan chojni ntoá mé it'in tjan María. Jehe tjan mé tsíkatehe tjan kixin tsøtehe tjan ijnko ch'ín mé it'in José, mé tsík'axrjeníxin ch'án tí ch'ín rey David. <sup>28</sup> A ntá tí ch'ín ángel k'uíxenhen tí tjen tjan ntá ntáchro ch'án kixin:

—K'uinka nixjaha jaha kixin Dios kjuínkítsa tí jaha. Ìnchéni Dios tjekoa tí jaha. A ntá jaha imá kjuíntayavan ch'án ntá tí í so chojni chjin la kénhyó —ichro ch'án.

<sup>29</sup> Kjánchó tió k'uíkon tjan tí ch'ín ángel na mé kóxakonhen tjan kjuenkayáxin tjan kixin nkekuènte xíkaha nixjeheni ch'án, ichro tjan. <sup>30</sup> A ntá ntáchro tí ch'ín ángel kixin:

—Chrakonhya, María. Dios la imá tjetjinkítsa tí jaha. <sup>31</sup> A ntá jie la tsjak'èyá jaha, tsochonta ijnko xjan ntoá la ko sìnchek'ian xjan Jesús. <sup>32</sup> Imá ts'etøan ch'án la ko its'in ch'án Xjeen Dios nkaya nkajní. Ìnchéni Dios mé tsjanjon ch'án kjuachaxin ts'etøan ch'án éxí ijnko rey éxí k'uetøan ch'ín David, tí nkexro ts'axrjeníxin ch'án. <sup>33</sup> Jnkochríxin tsjak'e ch'án ts'etuènenhén ch'án tí sín nación Israel, la mé tsjejehya tí kjuachaxin ts'etøan ch'án —ichro tí ch'ín ángel.

<sup>34</sup> Ntá kjuanchankíhi tjan María tí ch'ín ángel kixin:

—¿Nkekuènte kixin xíkaha chrókónhen kixin janhan la naxa chontahya chojni ntoá? —ichro tjan.

<sup>35</sup> Ntá kjuatehe tí ch'ín ángel, ntáchro ch'án kixin:

—Tí Nchakuen Dios mé ts'inkajin éxí ijnko tjuí la ko tí kjuachaxin kuènte Dios mé tsjak'etja tí jaha, a ntá ts'óna tí xjan. Mé xíkaha tí xjan tsokjíhi la mé tjóá xjan la mé its'in xjan Xjeen Dios. <sup>36</sup> La ko kjaxin tjan Elisabet kjéhya jaha kjónté ó nána tjan la mé tjejá tjan. Senó la k'uechóntahya tjan xjan, a ntá jie la ó injon nitjó tjejá tjan. <sup>37</sup> Kixin tí kjuachaxien Dios la tsjacha tsonhen kaín xín nkehe —ichro tí ch'ín ángel.

<sup>38</sup> Ntá ntáchro tjan María kixin:

—Janhan mé t'aha Ìnchéni Dios xra. Ó nchoxon tí nkehe k'uetøan ch'án sintaxiteyáha ch'án éxí chrónka jaha —ichro tjan.

A ntá kjuixin chrónka tí ch'ín ángel ntá sákjuí ch'án.

### Tjan María sákjuitsjehe tí tjan Elisabet

<sup>39</sup> A ntá ijnko yaon tí tjan María tjan sákjuí tjan ijnko chjasin tjen tí jna estado Judea. <sup>40</sup> Ntá kjuíji tjan tí chjasin ntiha ntá k'uixenhen tjan ntøe ch'ín Zacarías la ntá nixjehe tjan tí tjan Elisabet. <sup>41</sup> A ntá tió kuínhin tjan Elisabet nixja tjan María ntá chrika tí xjan nkaya tsee tí tjan Elisabet. Ntá antsí k'uáyéhe tjan kjuachaxién Nchakuen Dios <sup>42</sup> ntá itsen nixja tjan ntáχρο tjan kíxin:

—Dios imá kjuintayavan la ntá tí í so chojni chjin la kénhyó la ko kjaxin kjuíncheyaon ch'án tí xjaan. <sup>43</sup> ¿Xá nkexro tí janhan kíxin kjuínixjana iné Ìnchéni? <sup>44</sup> Tió kuínhan nixjana ntá tí xjan la chrika xjan nkaya tsena kíxin chéhe xjan kjuiha. <sup>45</sup> Ntá jaha la cháha kíxin kuítekávan kíxin Ìnchéni Dios sinchexiteyá tí nkehe ntáχρο ch'án —ichro tjan.

<sup>46</sup> Ntá ntáχρο tjan María kíxin:

Aenná imá tjikosáyehe Ìnchéni Dios

<sup>47</sup> la ko chéhe aenná kíxin Dios sinchekaáni ch'án.

<sup>48</sup> Kíxin Dios ikuá kuentá ijnko tí chojni chjin nõe ch'exón xra kuènte ch'án.

A ntá ijie la ko jnkochrín tsonáχρο chojni kíxin náxrjón tjèn janhan, tsixro sín.

<sup>49</sup> Kíxin Dios chóna kaín kjuachaxin ntá janhan mé kjuasixínna ch'án ijnko kjuaxroan jíe;

imá tjóá tí ihnié ch'án.

<sup>50</sup> Jnkochrín tsikonóhe ch'án kaín tí sín tjikosáyehe sín ch'án.

<sup>51</sup> Tsíkjasin ch'án itsjé kjuaxroan jíe; kuakitsjehe ch'án tí kjuachaxin chóna tí sín nchehnke.

<sup>52</sup> Kuakitsjehe ch'án tí kjuachaxin chóna tí sín t'etøan,

A ntá tí sín nõa k'uék'etuanyha senó la mé jie chjéhe ch'án kjuachaxin ts'e-toan sín.

<sup>53</sup> A ntá tí sín t'enixn kjinta la kjuanjon ch'án kaín nkehe tsicháxinhin sín, a ntá tí sín rico xráxin jehó tja sín sákjuí sín.

<sup>54</sup> Kjuínkítsa ch'án tí sín nación Israel kíxin tjejóch'ehe sín ch'án xra; k'uitjáyenhya ch'án tí jehe sín kuikonóhe ch'án sín,

<sup>55</sup> éxí k'uéchenka ch'án tí sín k'uaxrjenixinni k'uéjó sín ósé, na mé tí ch'ín Abraham la ko kaín tí sín naxa ts'axrjenixin ch'án —mé xíkaha ichro tjan María.

<sup>56</sup> A ntá tjan María kuítøeko tjan tí tjan Elisabet iní nitjó la ntá chr'éxin xíkjan tjan ntøe tjan.

### Kokjíhi ch'ín Juan Bautista

<sup>57</sup> Ntá xétja tí yaon sinchekokjíhi tjan Elisabet tí xjeen tjan, a ntá kjuínchekokjíhi tjan ijnko xjan ntoa.

<sup>58</sup> A ntá tí sín chjinaxón ntøe la ko tí sín kjéhya tjan mé kjuíjitsjehe sín kíxin tsochéheko sín tjan kíxin kuínhin sín kíxin Dios imá tsíkikonóhe tí jehe tjan.

<sup>59</sup> Ntá tí yaon jnixin ikui sín sincheka sín xjan tí xroye kuènte tí sín judío. Ntá chrókjuinçek'in sín xjan Zacarías éxí it'in it'é. <sup>60</sup> Kjánchó ntáχρο iné xjan kíxin:

—Náhi. T'ichjánxin its'in xjan Juan —ichro tjan.

<sup>61</sup> Ntá ntáχρο sín kíxin:

—¿Nkekuènte kíxin xíkaha chrók'uin xjan? Kohya nkexro naxa kjéhya xíkaha it'in —ichro sín.

<sup>62</sup> A ntá kaín tí sín kjéhya kjuakoxin sín tja sín kjuanchankíhi sín tí it'é xjan kíxin nkexrí tjinkaon ch'án chrók'uin tí xjan. <sup>63</sup> A ntá tí it'é xjan mé kjuanchia ch'án ijnko ntachiso ntsí tsokjin ch'án ntá kjin ch'án kíxin: “Ihnié xjan mé Juan.” A ntá kaín tí sín tjejó sín ntiha la chrakon sín kuínhin sín xíkaha kónhen. <sup>64</sup> A ntá xrinahya ch'ín Zacarías kjuankíxin ch'án nixja ch'án

inaá kjuanchehe ch'án Dios kjuasáya.  
<sup>65</sup> A ntá kaín tí sín chjinaxón ntøe sín mé chrakon sín. La ntá nkuíxín tí jna kuènte estado Judea mé kjo sín kíchó sín chrónka sín kíxín xíkaha tsíkónhen. <sup>66</sup> A ntá kaín tí sín kuínhin mé kjuenkayáxin sín kjuanchankíhi sín kíchó sín kíxín:

—¿Xá nkehe tí xra tsíkítonhen tí xjan i? —ichro sín.

Kíxín chaxín Ìnchéni Dios tsíkjincheyan ch'án tí xjan.

### Tí ch'ín Zacarías itsje ch'án

<sup>67</sup> A ntá it'é tí xjan mé ch'ín Zacarías, mé antsí k'uáyéhe ch'án kjuachaxin kuènte Nchakuen Dios ntá xíkaha nixja ch'án itén Dios ntáchro ch'án kíxín:

<sup>68</sup> Imá jína Ìnchéni, na mé tí Dios kuènte tí nación Israel, kíxín ikui ch'án tí tjejóni kjuínchekaá ch'án nación kuènténi.

<sup>69</sup> La ko kjuanjon ch'án ijnko nkexro t'e-  
 toan sinchekaáni ch'án na mé ijnko nkexro k'uaxrjeníxin tí ch'ín David, tí nkexro k'uékjich'ehe Dios xra.

<sup>70</sup> Éxí k'uéchronkaxín tí sín kjueyá Dios k'uéchronka itén Dios ósé,

<sup>71</sup> k'uéchronka Dios kíxín sinchekaáni ch'án kíxín ntá tsjachahya kaín tí sín nínkakönhenni,

<sup>72</sup> tsíkónóhe ch'án tí sín k'uaxrjeníxinni ósé, ts'itjáyenhya ch'án tí nkehe tsíchronka ch'án tsoxiteyá.

<sup>73</sup> Tíhi mé tsíkjo Dios tí ch'ín Abraham ósé kíxín nkehe chaxín tsoxiteyá chr'éxin

<sup>74</sup> kíxín sinchekaáni ch'án kíxín kohya nkehe sich'ehe ni tí sín nínkakönhenni kíxín jína sich'ehe ni ch'án xra tsochrakonhyani,

<sup>75</sup> la ntá jína ts'ejóni sinchetjóáni ch'án kaín yaon tí naxa tjejóchónni.

<sup>76</sup> A ntá jaha xjeenni mé tsontáchro Dios kíxín jaha ijnko nkexro tsochrónka itén Dios tjen nkaya nkajní.

Jaha tsítónxian ntíja tsixín Ìnchéni la ko jaha tsjásiyóxian ntíja tsixín ch'án.

<sup>77</sup> Jaha tsjákohé tí chojni chjasintajni nkexrí tsjini tí jie chóna sín, ntá tsaá sín.

<sup>78</sup> A ntá Dios mé tjuèheni ch'án la ko kuíkonóhe ni ch'án, kíxín nkajní kuíxín ijnko xrohi níxin ts'inkaséyanxín tí yaon níxin.

<sup>79</sup> Tíha mé tsíkao tí xrohi ts'inkaséyanxín tí sín tjejó sítie la ko tí sín chrók'uitjáyan, la ko ts'ikonxínni tí ntíja tsjanjon kjuaxróxin.

Na mé kaín tíhi chrónka tí ch'ín Zacarías.

<sup>80</sup> A ntá tinkák'ánkí tí xjan a la ko Dios kjuínchek'ánkí tí kjuaxrexinkaon kuènte xjan kíxín antsí tsonohe xjan nkexrí tjen Dios. A ntá kjuák'e xjan nteje k'uánkí xjan kjuixrakájia tí yaon kjuankíxín kjuákohe ch'án tí chojni nación Israel.

### Kokjíhi ch'ín Jesús

(Mt. 1.18-25)

**2** A ntá tí yaon a na mé tí ch'ín imá t'etøan mé it'in Augusto César na mé k'uetøan ch'án kíxín ts'ínixín ihnié kaín xín chojni sínn tí chjasin t'etøan ch'án kíxín tsonohe ch'án nkekjaín chojni sínn.

<sup>2</sup> Tí xrankíxixín k'uínixín ihnié sín tió Cirenio mé k'uégobernador k'uetøan estado Siria. <sup>3</sup> Kaínxín chojni t'ichjánxin sátsji sín chjasén sín kíxín ntaha ts'ínixín ihnié sín. <sup>4</sup> Mé xíkaha ch'ín José kjaxin k'uaxrjexin ch'án tí chjasin Nazaret estado Galilea ntá sákjuí ch'án tí estado Judea na mé sákjuí ch'án chjasin Belén tí tsíkókjéxin tí ch'ín rey David kíxín jehe ch'ín José mé tsík'axrjeníxin ch'án tí ch'ín David. <sup>5</sup> Sákjuí ch'án chjasin Belén sákjuíko ch'án tí tjan María kíxín ntiha ts'ínixínko ihnié ch'án tjan kíxín jehe tjan tsíkatehe kíxín tsothehe ch'án. A ntá jehe tjan na mé ó tjejá tjan. <sup>6</sup> A ntá



xikaha kónhen nachrohe k'uéjó sín chjasin Belén, ntá kjuixraká tí yaon tsokjíhi xjeen tjan María. <sup>7</sup> A ntá ntiha kokjéxín tí xjeen tjan saó. Ntá kjuínchek'ísímá tjan xjan ka, a ntá kjuak'enkaya tjan ijnko nta neyá iko kixin jehe sín la k'uitjahya sín nchia xranka ts'ok'èxín sín mé kjónté ntiha k'uéjó sín.

### Tí sín ángel la ko tí sín k'uáyakonhen kolélo

<sup>8</sup> Kjaxin chjinaxón tí chjasin Belén tjejó iso chojni nteje ó la ntá ntahó titohe sín tí tie a kixin t'ayakonhen sín kolélo. <sup>9</sup> A ntá titàya k'uíkuèn sín ijnko ángel kuènte Dios la ko nkuíxín tí tjejó sín la k'uínkaséyan kixin tí kjuachaxin jíe kuènte Dios kuikao ch'án. Ntá jehe sín la imá chrakon sín. <sup>10</sup> A ntá tí ch'ín ángel ntáchro kixin:

—Chrakonhyará jahará. Ijie k'uinka tsotjonkará nkehe jína nixin kixin tsochéhe kaín xín chojni <sup>11</sup> kixin ijie tí chjasén ch'ín David kokjéxín tí nkexro tsaáxinrá jahará na mé Ìnchéni Cristo tíha. <sup>12</sup> Ntá tsoñoaxínrá jahará kixin tí xjan a kixin ika tjechr'ísímá xjan la ko ijnko nta neyá iko mé tjetsínkayá xjan —mé xikaha chrónka tí ch'ín ángel.

<sup>13</sup> A ntá titàya k'uíkuèn sín kixin nchónhya sín ángel kuixín nkaya nkajní tjejóko tí ch'ín ángel tjejótsje sín tjanchehe sín Dios kjuasáya, ntáchro sín kixin:

<sup>14</sup> Kjuasáyé Dios tjan nkaya nkajní kixin imá chónta ch'án kjuachaxin. Ntá chjasintajni ts'ixín kjuaxróxin tí tjejó tí sín sinchexiteyéhe ch'án.

Mé xikaha ichro sín.

<sup>15</sup> A ntá tí sín ángel xíkjan sín nkaya nkajní, a ntá tí sín t'ayakonhen kolélo ikjo sín kíchó sín ntáchro sín kixin:

—Ìntá sátsjini tí chjasin Belén tsjitsjeheni tí nkehe tsíkónhen kixin Ìnchéni k'uetqan kui tí nkexro kjuínchenoheni —ichro sín.

<sup>16</sup> Ntá tjián sákjuí sín ntiha la k'uitja sín tí tjan María la ko tí ch'ín José la ko tí xjan a tjetsínkayá nta neyá iko. <sup>17</sup> A ntá tió k'uíkon sín xikaha ntá chrónka sín tí nkehe tsíchrónka tí ángel kixin nkexrí tjan tí xjan a. <sup>18</sup> Ntá chrakon kaín tí sín kuínhin kixin xikaha chrónka tí sín k'uáyakonhen kolélo. <sup>19</sup> Kjánchó tí tjan María la asén tjan ó xraxinkakonxín tjan kaín tíha. <sup>20</sup> A ntá tí sín k'uáyakonhen kolélo la sákjuí sín ntja kuinkákjanchehe sín Dios kjuasáya kixin kaín tí nkehe tsíkinhin sín la ko k'uíkon sín kixin ó xiteyá kaín nkehe éxí tsíchrónka tí ángel.

### Sákjuiko sín tí xjan Jesús tí nínko Jerusalén

<sup>21</sup> A ntá tió xétja tí ijní yaon ntá kjuíncheka sín xjan xroye kuènte tí sín israelita ntá kjuínchek'in sín xjan Jesús éxí tsíntáchro tí ch'ín ángel chénka tí tjan María tí naxa kjuák'eyáhya tjan.

<sup>22</sup> A ntá tió kuítohe tjan María jína éxí chrónka ley kuènte Moisés <sup>††</sup> ntá sákjuiko sín tí xjan tí chjasin Jerusalén kixin tsochjéhe sín Dios kjuasáya. <sup>23</sup> Éxí ntáchro tí xroon ley kuènté Ìnchéni Dios kixin: “A ntá kaín xjan ntoa tsokjíhi saoxín la mé tsochjéhe sín Dios tí xjan a sich'ehe xjan xra Dios.”<sup>‡‡</sup> <sup>24</sup> Ntá xikaha sákjuí sín kixin ntaha tsjanjon sín iko ts'enxín ntiha tsochjéxín sín Dios kjuasáyé éxí t'etqan tí ley kuènte ch'án na mé yaá kontóá najni o yaá kontóá nteje chrókjuanjon sín.

<sup>25</sup> A ntá tí yaon a kjuák'e chjasin Jerusalén ijnko ch'án ó táda ch'án mé it'in ch'án Simeón. Jehe ch'án ijnko chojni jína la ko jnkochr'ixín xraxinkaon

<sup>††</sup>2:22 Levítico 12.1–8

<sup>‡‡</sup>2:23 Éxodo 13.2,12

ch'án Dios la ko kjuák'echónhen ch'án kixin itsi tí nkexro tsaáxin tí nación Israel. Tí Nchakuen Dios tjeko tí ch'ín Simeón <sup>26</sup> tsíkjinchenohe ch'án kixin naxa ts'enhya ch'án ts'ikonjia ch'án tí nkexro Cristo, na mé tí nkexro tsochr'án Ìnchéni Dios. <sup>27</sup> A ntá tí Nchakuen Dios kjuínchexraxinkaon tí ch'ín a kixin sátsji ch'án ninko. A ntá tió kui tí ìné la ko it'é xjan Jesús k'uúixenko sín xjan nkaxenhen ninko kixin sinchexiteyéhe sín tí nkehe t'etöan tí ley <sup>28</sup> ntá ch'ín Simeón kualja ch'án tí xjan a kjóa ch'án ntá kjuanchehe ch'án Dios kjuasáya ntáchro ch'án kixin: <sup>29</sup> Ijie jaha Ìnchéni Dios, tsjánjuan kjuachaxin kixin kjuaxróxin its'én janhan

kixin jaha ó kjuínchexiteyá tí nkehe tsintáchrúa

<sup>30</sup> kixin ó k'uúikõnxin kuãn tí nkexro tsaáxinni,

<sup>31</sup> mé xikaha kjuich'e kixin ts'ikon kaín xín chojni.

<sup>32</sup> Jehe ch'án mé tí xrohi ts'inkaséyanxín ntje tí sín jehya kuènte Israel,

la ko jehe ch'án tsjikosáyehe ch'án tí chjasín kuèntá Israel,

mé ichro ch'ín Simeón.

<sup>33</sup> Ntá ch'ín José la ko tí ìné ch'ín Jesús la chrakon sín kixin xikaha kuínhin sín ntáchro ch'ín Simeón kixin nkexrí tjen tí xjan. <sup>34</sup> Ntá ch'ín Simeón kjuíncheyaon ch'án sín ntá chénka ch'án tí tjan María mé tí ìné xjan Jesús kixin:

—Tí xjan i tsíkikao itsjé xra la itsjé tí sín Israel tsitekakuenhya sín xjan la tsítóhe sín la ko itsjé sín tsitekaon sín antsí tsonohe sín la ko nchónhya chojni tsotjinkakonhya tsinhin sín tí nkehe tsjako ch'án. <sup>35</sup> Mé xikaha tsonoxín nkexrí tjenkayáxin jnkobjnko asén chojni. Kjánchó kaín tíha tsoyóhe éxí ijnko chica espada chróchr'áte asán na mé tsoxakonhan la ko ts'avá má —ichro ch'án nixjehe ch'án tí tjan María.

<sup>36</sup> Kjaxin ntaha kjuák'e ijnko tjan chrónka itén Dios mé it'in tjan Ana, it'é mé it'in Fanuel, la mé tsík'axreníxin ch'án tí ch'ín Aser. Jehe tjan la ó nána tjan. Tí naxa k'uétjarisoá tjan la kótehe tjan. Ntá yatokoá nánó kjuák'eko tí xii tjan <sup>37</sup> ntá jie ochenta y cuatro nánó tsíkók'án tjan. Kuítóehya tjan tí xra kuènte ninko la mé ntahó tjen tjan ch'ehe tjan Ìnchéni Dios xra nchakotjin la ko tie la jnkoyaxón nehya tjan kixin jína tsonixjehe tjan Dios. <sup>38</sup> Ntá kóchjina tí tjan Ana tí yaon, a ntá kjuixin kjuanchehe tjan kjuasáyé Dios ntá kjuankíxin chrónka tjan nkexrí tjen tí xjan Jesús nixjehe tjan kaín tí sín tjejóchónhen kixin itsi nkexro sinchekaá tí chjasin Jerusalén.

#### Ntá kjan sín chjasin Nazaret

<sup>39</sup> Na ntá tió kjuixin kjuínchexiteyá sín kaín nkehe t'etöan tí ley kuènte Dios ntá kjan sín estado Galilea na mé chjasén sín chaxín Nazaret. <sup>40</sup> A ntá tí xjan a mé k'uánkí xjan la ko tsanká xjan la ko imá kónohe xjan kixin Dios imá tjinkitsa tjencheyaon xjan.

#### Tí xjan Jesús kjuák'e xjan tí ninko Jerusalén

<sup>41</sup> Tí it'é la ko ìné tí xjan Jesús xráxin k'uékji sín kaín nánó tí chjasin Jerusalén kixin tí kia pascua. <sup>42</sup> A ntá tió xetjehe ch'ín Jesús tí teyó nánó, ntá sákjuí sín kaín sín tí chjasin Jerusalén kixin xikaha kuènnen sín kixin tí kia a. <sup>43</sup> A ntá kjanxin sín ntiha sáchrókjuí sín chjasén sín tió k'uátsínka kia la tí xjan Jesús ó tsíkítóhe xjan Jerusalén ntahó, kjánchó ìné xjan la ko ch'ín José xraxinkakonhya sín kixin kohya tí xjan. <sup>44</sup> Jehe sín mé kjuenkayáxin sín kixin ách'e tí sín kuichréhe mé kuikao sín xjan la ntá xikaha chjina ijnko yaon ó tjejóyá sín ntja tsíkji sín. A ntá kjueyá sín xjan tí tjejó tí sín kjéhya la ko tí sín chóxin sín

<sup>45</sup> Kjánchó k'uitjahya sín xjan. Ntá kjan sín tí chjasin Jerusalén kíxin tsjeyá sín xjan ntiha.

<sup>46</sup> Ntá k'uátsínka iní yaon ntá k'uitja sín xjan la mé nkaxenhen nínko ntiha tjetjaxín xjan jnkosiné tí tjejó tí sín maestro tjako tí ley la tjetinhin xjan tí nkehe ntáchro sín la ko tjetjanchankíhi xjan tí jehe sín. <sup>47</sup> Ntá kaín tí sín tjejóntaxín tjejótinhin sín mé chrakon sín kíxin xíkaha imá nohe xjan la ko xíkaha tjatehe xjan kaín nkehe tjanchankíhi sín xjan. <sup>48</sup> Ntá tió k'uíkon iné la ko it'é la chrakon sín. Ntá ntáchro iné kíxin:

—Xjeenni, ¿nkekuènte xíkaha kjuich'e? It'á la ko janhan imá kóxakonhenni kjueyáni tí jaha —ichro tjan.

<sup>49</sup> Ntá ntáchro ch'ín Jesús kíxin:

—¿Nkekuènte tjéyá tí jeheni? ¿Á noahya jaha kíxin tóxakonhenni kíxin tí xra kuènte It'éni? —ichro ch'án.

<sup>50</sup> Kjánchó kíenxínhya sín nkexrí t'axr-jexín tí nkehe ntáchro ch'án.

<sup>51</sup> Ntá kjan sín chjasin Nazaret. A ntá ntiha naxa kuítekakonhen xjan tí jehe sín. A ntá tí iné la ntá asén tjan xráxín ó nohe kíxin xíkaha kónhen. <sup>52</sup> La ko naxa k'uánkí xjan kónteto xjan la ko k'uánkí tí kjuaxrexinkaon kuènte xjan la ko Dios kóxrjínhín nkexrí kjuínchexiteyá xjan la ko kjaxín kaín chojni kóxrjínhín sín kíxin jína tjan xjan.

### Ch'ín Juan Bautista kjuák'e nteje kjuako itén Dios

(Mt. 3.1-12; Mr. 1.1-8; Jn. 1.19-28)

**3** A ntá quince nánó k'uék'etoan ch'ín Tiberio tí xra gobierno, la ko tí ch'ín Poncio Pilato k'uéogovernador tí estado Judea, la ko tí ch'ín Herodes k'uéogovernador tí estado Galilea, la ko tí kíchó ch'án Felipe mé k'uéogovernador estado Iturea la ko estado Traconite, la ko

ch'ín Lisanas k'uéogovernador tí estado Abilinia. <sup>2</sup> A ntá ch'ín Anás la ko ch'ín Caifás k'uéuchóna sín xra nchat'á t'etoan. A ntá Dios mé kjuanjon kjuachaxin k'uáyéhe ch'ín Juan itjen ch'án nteje tsochrónka ch'án itén Dios. Ntá jehe ch'án it'é ch'án Zacarías. <sup>3</sup> Ch'ín Juan k'uátsínka ch'án kaín tí chjasin chjino tí ntarío Jordán kjuakohe ch'án chojni ntiha kíxin chrókjuinkí sín tí nkehe tjenkayáxin sín chrókuítohe sín tí ijé sín ntá chrókuikite sín kíxin xíkaha mé chrókjuuin ijé sín. <sup>4</sup> Mé xíkaha kónhen éxí k'uéchronka la ko tsíkjin ch'ín Isaías, mé tí nkexro k'uéchronka itén Dios ósé kíxin:

Tsinhin sín itén ijnko nkexro tsjak'e nteje ts'èya tsontáchro kíxin:

“Tóxakonhanrá ncheyóxinrá ntia tsixín Ìnchéni

Takítjehérá ijnko ntia ntoí.

<sup>5</sup> Kaínxín tsaka mé tsoyóxin,

la ko kaín xín jna la ko kaín xín itjo tsi-tohe yóxin,

la ko tí ntia tsíxrèya mé tsoxrentoá,

la ko kaín tí ntia yóxinhya la mé tsoyóxin;

<sup>6</sup> Xíkaha mé kaín xín chojni chjasintajni mé ts'ikon sín kíxin Dios mé chrókuaáxin sín.”<sup>¶</sup>

Mé xíkaha ichro itén Dios.

<sup>7</sup> A ntá tió kjuíji chojni ntiha kíxin ch'ín Juan chrókuíkite ch'án sín ntá ntáche ch'án tí jehe sín kíxin:

—Jahará tsík'axrjeníxinrá konche. ¿Xá nkexro kjuíntanohará kíxin chrókuinkeherá tí kjuanínkaon kuènte Dios ó tsi? <sup>8</sup> T'ichjánxín kíxin chrók'uejorá jnkójina chrókjuáqoxínrá kíxin chaxín kjuitoxínhínrá tí nkehe tjenkayáxinrá. Jahará nchehnerá ntáchrórá kíxin k'uaxrjeníxinrá ch'ín Abraham. Janhan ntáxrjan kíxin kjónté tí xro i la Dios tsjacha chrókjuich'éna

<sup>¶</sup>3:6 3.4-6 Isaías 40.3-5

ch'án chojni k'uaxrjeníxin ch'ín Abraham. <sup>9</sup>Kíxin tí chica hacha ó tjechónhen tsochrínjinxín tí nta. A ntá kaín xín nta t'ónahya to jína mé tsochrínjin kíxin tsoche —ichro ch'án.

<sup>10</sup>A ntá tí chojni mé kjuanchankíhi sín ch'án kíxin:

—A ntá tí xíkaha, ¿a ntá jeheni nkehe tí chrókjuich'eni? —ichro sín.

<sup>11</sup>Ntá kjuátehe ch'ín Juan kíxin:

—Tí nkexro chóna yaá camisa la chrókjuinchekitonhen tí nkexro chónahya. La ko tí nkexro chóna nkehe sine chróchjéhe sín tí nkexro chónahya nkehe sine —ichro ch'án.

<sup>12</sup>Kjaxin ikui iso tí sín nchekjènkí kíxin chrókuikite sín. Ntá kjuanchankíhi sín tí ch'ín Juan kíxin:

—Maestro, ¿nkehe chrókjuich'eni jeheni? —ichro sín.

<sup>13</sup>Ntá ntáchro ch'ín Juan kíxin:

—Jehó éxí tí tsík'ítuanhanrá chrókjuinchekjènkírá —ichro ch'án.

<sup>14</sup>Kjaxin iso sín soldado kjuanchankíhi sín ch'án kíxin:

—¿Kjaxin jeheni nkehe chrókjuich'eni? —ichro sín.

Ntá kjuátehe ch'án kíxin:

—Teéhyará ninkexró tí chíchakoen sín la ko ninkexró sích'énéhyará kjuach'ia la ko kjónté tí chichaon tjachará ó la kjuaxróxin chrók'uejorá —ichro ch'án.

<sup>15</sup>Kaín tí chojni chjasin k'uejóchónhen sín tóxakonhen asén sín tjinkaon sín tsonhe sín kíxin á tí ch'ín Juan mé tí Cristo. <sup>16</sup>Kjánchó chénka ch'ín Juan kaín tí sín tjejó a kíxin:

—Janhan mé ìnta tíkítexián chojni. A ntá tí nkexro itsi chr'éxín mé tsikítexínrá tí Nchakuen Dios la ko xrohi. Antsí t'etóan ch'án a ntá janhan la kánhyó. Méxra chrókósuána chrókjuasin-tankaha ch'án tí correa tí tokaté ch'án. <sup>17</sup>Jehe ch'án la ó tjexraá ch'án pala sinchetjuáxin ch'án noatriga kíxin tí ntachjiji trigo la ókjé tsejejo ch'án a

ntá tí noatriga la tsjenájín ch'án la ts'enkachjina ch'án. A ntá tí ntachjiji trigo la tsjakaxín ch'án ijnko xrohi ts'ankahya jnkochrín —mé xíkaha ichro ch'ín Juan.

<sup>18</sup>Mé xíkaha chronkaxín ch'án la ko it-sjé í so nkehe kjuínchexraxinkaon ch'án chojni mé xíkaha kjuakoxén ch'án sín tí tan jína. <sup>19</sup>Kjaxin kjuentuéhe ch'án tí ch'ín Herodes kíxin chóna ch'án tí tjan Herodías, mé tí ichjién kichó ch'án Felipe, la ko kjuentuéhe ch'án tí ch'ín Herodes kíxin tí í so nkehe jínahya tsíkijch'e ch'án. <sup>20</sup>Kjánchó ch'ín Herodes ántosén ch'án kjónté kuínhin ch'án la kjuínchek'ánkí ch'án tí ijje ch'án inaá kíxin kjuak'echjina ch'án tí ch'ín Juan tí ntóechiso.

### Kuíkite ch'ín Jesús

(Mt. 3.13-17; Mr. 1.9-11)

<sup>21</sup>A ntá naxa kuènhya tíha naxa kjuák'e ch'ín Juan kuíkite ch'án chojni ntá kjaxin ch'ín Jesús mé kuíkite ch'án. A ntá tjenixjehe ch'án Dios ntá xitjehe nkajín <sup>22</sup>ntá k'uínkajin Nchakuen Dios éxí ijnko kontóá tseje la kjuák'e chrítaón kja ch'án. Ntá xrinahya kuínhin sín itén nkexro nkaya nkajín ntáchro kíxin:

—Jaha mé xjanna la tjuaha tí jaha. Imá chàna kíxin nchexiteyána tí jaha.

### Tí sín tsík'axrjeníxin ch'ín Jesucristo

(Mt. 1.1-17)

<sup>23</sup>Ch'ín Jesús k'uechóna ch'án chjino treinta nánó tió kjuankíxin kjuako ch'án. Ntá kjuenkayáxin sín kíxin it'é la mé ch'ín José. Ntá it'é tí ch'ín José la mé ch'ín Elí. <sup>24</sup>A ntá it'é tí ch'ín Elí la mé ch'ín Matat; a ntá it'é tí ch'ín Matat la mé ch'ín Leví, a ntá it'é tí ch'ín Leví la mé ch'ín Melqui; a ntá it'é tí ch'ín Melqui la mé ch'ín Jana; a ntá it'é tí ch'ín Jana la mé ch'ín José. <sup>25</sup>A ntá it'é tí ch'ín José la mé ch'ín Matatías, a ntá it'é tí ch'ín Matatías la mé ch'ín Amós, a ntá it'é tí

ch'in Amós la mé ch'in Nahum, a ntá it'é tí ch'in Nahum la mé ch'in Esli; a ntá it'é ch'in Esli la mé ch'in Nagai, <sup>26</sup> a ntá it'é tí ch'in Nagai la mé ch'in Maat, a ntá it'é tí ch'in Maat la mé ch'in Matatías, a ntá it'é tí ch'in Matatías la mé ch'in Semei, a ntá it'é tí ch'in Semei na mé ch'in José, a ntá it'é tí ch'in José na mé ch'in Judá, <sup>27</sup> a ntá it'é tí ch'in Judá na mé ch'in Joana, a ntá it'é tí ch'in Joana la mé ch'in Resa, a ntá it'é tí ch'in Resa na mé ch'in Zorobabel, a ntá it'é tí ch'in Zorobabel na mé ch'in Salatiel, a ntá it'é tí ch'in Salatiel na mé ch'in Neri, <sup>28</sup> a ntá it'é tí ch'in Neri na mé ch'in Melqui, a ntá it'é tí ch'in Melqui na mé ch'in Adi, a ntá it'é tí ch'in Adi na mé ch'in Cosam, a ntá it'é tí ch'in Cosam na mé ch'in Elmodam, a ntá it'é tí ch'in Elmodam na mé ch'in Er, <sup>29</sup> a ntá it'é tí ch'in Er na mé ch'in Josué, a ntá it'é tí ch'in Josué na mé ch'in Eliezer, a ntá it'é tí ch'in Eliezer na mé ch'in Jorim, a ntá it'é tí ch'in Jorim na mé ch'in Matat, <sup>30</sup> a ntá it'é tí ch'in Matat la mé ch'in Leví, a ntá it'é tí ch'in Leví na mé ch'in Simeón, a ntá it'é tí ch'in Simeón na mé ch'in Judá, a ntá it'é tí ch'in Judá na mé ch'in José, a ntá it'é tí ch'in José na mé ch'in Jonán, a ntá it'é tí ch'in Jonán na mé ch'in Eliaquim, <sup>31</sup> a ntá it'é tí ch'in Eliaquim na mé ch'in Melea, a ntá it'é tí ch'in Melea na mé ch'in Mainán, a ntá it'é tí ch'in Mainán na mé ch'in Matata, a ntá it'é tí ch'in Matata na mé ch'in Natán, <sup>32</sup> a ntá it'é tí ch'in Natán na mé ch'in David, a ntá it'é tí ch'in David na mé ch'in Isaí, a ntá it'é tí ch'in Isaí na mé ch'in Obed, a ntá it'é tí ch'in Obed na mé ch'in Booz, a ntá it'é tí ch'in Booz na mé ch'in Salmón, a ntá it'é tí ch'in Salmón na mé ch'in Naasón, <sup>33</sup> a ntá it'é tí ch'in Naasón na mé ch'in Aminadab, a ntá it'é tí ch'in Aminadab na mé ch'in Aram, a ntá it'é tí ch'in Aram na mé ch'in Esrom, a ntá it'é tí ch'in Esrom na mé ch'in Fares, a ntá it'é tí ch'in

Fares na mé ch'in Judá, <sup>34</sup> a ntá it'é tí ch'in Judá na mé ch'in Jacob, a ntá it'é tí ch'in Jacob na mé ch'in Isaac, a ntá it'é tí ch'in Isaac na mé ch'in Abraham, a ntá it'é tí ch'in Abraham na mé ch'in Taré, a ntá it'é tí ch'in Taré na mé ch'in Nacor, <sup>35</sup> a ntá it'é tí ch'in Nacor na mé ch'in Serug, a ntá it'é tí ch'in Serug na mé ch'in Ragau, a ntá it'é tí ch'in Ragau na mé ch'in Peleg, a ntá it'é tí ch'in Peleg na mé ch'in Heber, a ntá it'é tí ch'in Heber na mé ch'in Sala, <sup>36</sup> a ntá it'é tí ch'in Sala na mé ch'in Cainán, a ntá it'é tí ch'in Cainán na mé ch'in Arfaxad, a ntá it'e tí ch'in Arfaxad na mé ch'in Sem, a ntá it'é tí ch'in Sem na mé ch'in Noé, a ntá it'é tí ch'in Noé na mé ch'in Lamec, <sup>37</sup> a ntá it'é tí ch'in Lemec na mé ch'in Matusalén, a ntá it'é tí ch'in Matusalén na mé ch'in Enoc, a ntá it'é tí ch'in Enoc na mé ch'in Jared, a ntá it'é tí ch'in Jared na mé ch'in Mahalaleel, a ntá it'é tí ch'in Mahalaleel na mé ch'in Cainán, <sup>38</sup> a ntá it'é tí ch'in Cainán na mé ch'in Enós, a ntá it'é tí ch'in Enós na mé ch'in Set, a ntá it'é tí ch'in Set na mé ch'in Adán, a ntá Dios mé xjeen ch'in Adán.

### Ch'in Tsochren chrókjuachroe tí ch'in Jesús

(Mt. 4.1-11; Mr. 1.12-13)

**4** A ntá ch'in Jesús imá ch'óna ch'án kjuachaxiën Nchakuen Dios ntá kjanxin ch'án tí ntarío Jordán. Ntá tí Nchakuen Dios sákjuiko ch'án nteje. <sup>2</sup>Ntaha kjuák'e ch'án cuarenta yaon na ntá tí ch'in Tsochren tjinkaon chrókjuachroe tí jehe ch'án. Kjónehya ch'án ninkehó tí cuarenta yaon a, a ntá chr'éxin ntá xringhaya ik'uén ch'án kjinta. <sup>3</sup>Ntá ntáchro tí ch'in Tsochren kixin:

—Tí chaxín jaha Xjeen Dios la ntáche tí xro i kixin chrók'óna niotja.

<sup>4</sup>A ntá kjuátehe ch'in Jesús ntáchro ch'án kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Kaín tí tan nixja Dios tjejóchónxin chojni”<sup>§§</sup> —ichro ch'án.

<sup>5</sup>Ntá sákjuiko ch'ín Tsochren tí ch'ín Jesús ijnko jna imá noi ntá kjuako tí Jínahya kaín tí nación sím chjasintajni.

<sup>6</sup>Ntá ntáchro tí ch'ín Tsochren kixin:

—Janhan tsotjaha kaín tí kjuachaxin la ko kaín tí nkehe tjete chóna kaín tí nación a. Janhan na k'uayáha kaín tíha la ntá jie tsotjaha tí nkexro tjínkavan tsotjaha. <sup>7</sup>Tí tsjak'éxian tóch'ian tsjíosáyana tí janhan ntá kaín tí nkehe la ts'óna kuéntá —ichro ch'án.

<sup>8</sup>Ntá kjuátehe ch'ín Jesús ntáchro ch'án kixin:

—Sátjia Satanás, kixin xroon itén Dios ntáchro kixin “Chrókjuíkosáyehé ìnchéni Dios la jehó ch'án chrókjuich'ehé xra”<sup>\*</sup> —ichro ch'án.

<sup>9</sup>A ntá ch'ín Tsochren mé sákjuiko ch'ín Jesús tí chjasin Jerusalén la sákjuiko ch'án tí chrítaón tí kja ninko, a ntá ntáchro ch'án kixin:

—Tí chaxín Xjeen Dios jaha la tìtohé t'anótjenxian tí noi ntihi <sup>10</sup>kixin ntáchro xroon itén Dios kixin:

Dios mé ts'etuenhen tí sín ángel kuènte ch'án kixin ts'ayakonhan sín.<sup>†</sup>

<sup>11</sup>Tsotsé sín itjá

kixin tsotéhya totá ts'itja xro tí ts'anótjen<sup>‡</sup>

—mé xikaha ichro ch'ín Tsochren.

<sup>12</sup>Ntá kjuátehe ch'ín Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjínfihya chrókjuásixián kjuaxroan kjuachaxin kuènte ìnchéni Dios”<sup>¶</sup> —ichro ch'ín Jesús.

<sup>13</sup>Mé xikaha tió kjuachahya tí ch'ín Tsochren kaín nkehe chrók'uetuenhen tí ch'ín Jesús ntá k'uaxrjenta ch'án iso yaon.

### **Ch'ín Jesús kjuankixin ch'án tí xra kuènte ch'án estado Galilea**

(Mt. 4.12-17; Mr. 1.14-15)

<sup>14</sup>Ntá ch'ín Jesús xíkjan ch'án estado Galilea inaá na imá chóna ch'án kjuachaxin kuènte Nchakuen Dios. Ntá tjejóto sín nkuíxín ntiha kixin nkexro tí jehe ch'án. <sup>15</sup>Kjuakoxin ch'án tí ninkoe sín kaín chjasin la ko kaín xín chojni kjuanchia sín kjuasáya kixin kóxrjinhin sín tí kjuako ch'án.

### **Ch'ín Jesús kjuák'e ch'án chjasin Nazaret**

(Mt. 13.53-58; Mr. 6.1-6)

<sup>16</sup>Ntá ch'ín Jesús sákjuí ch'án chjasin Nazaret na mé tí chjasin tsík'ánkixin ch'án. Ntá tí yaon t'ok'éhe sín mé k'uúixenhen ch'án ijnko ninko Israel kixin xikaha kuènnen ch'án. Ntá kjuák'exín toté ch'án kixin sinchekuáxin ch'án tí xroon itén Dios. <sup>17</sup>Chjéhe sín ch'án tí xroon kuènte tí profeta Isaías. Ntá kuak-itjehe ch'án tí xroon ntá k'uitja ch'án nketí nixja xikihí:

<sup>18</sup>Tí Nchakuen It'éni Dios tjetjinkitsana má, kixin kjueyána ch'án kixin tsoxrjanka tí tan jína kuènte Dios tsjakoha tí sín nòa.

K'uetuanna ch'án kixin sintakìtoha jína tí sín t'avá asén kixin chónahya sín nkerí tsaáxin sín, la ko tsjakoha tí sín tjejóchjina kixin nkexrí tsaá sín,

§§4:4 Deuteronomio 8.8

\*4:8 Deuteronomio 6.13

†4:10 Salmo 91.11

‡4:11 Salmo 91.12

¶4:12 Deuteronomio 6.16

la ko sintak'ikuən tí sín t'ikonhya,  
la ko sintakaá kaín tí sín tjejóttjasóte ko-  
hya nkehe tsaáxin sín,

<sup>19</sup> la ko tsoxrjanka kíxin ó kjuixraká tí  
yaon kíxin tí nkexro tsitekaon la tsaá  
sín.<sup>§</sup>

<sup>20</sup> A ntá ch'ín Jesús kjuixin  
kjuínchekuáxin ch'án tí xroon, a ntá  
chjéhe ch'án tí ch'ín tjinkítsa tí xra  
nínko ntá kjuák'etjaxin ch'án. Ntá  
kaín tí sín tsikójnksé ntiha nínko  
naxa tjejókomá sín tí jehe ch'án. <sup>21</sup> Ntá  
kjuankíxin chronkaxin ch'án ntáchro  
ch'án kíxin:

—Ntá ijie la ó xiteyá tí nkehe kjuin-  
takuáxin tí xroon itén Dios kuínhínra  
—ichro ch'án.

<sup>22</sup> Ntá kaín sín kóxrjínhin sín tí kjuako  
ch'ín Jesús la ko chrakon sín kíxin náxr-  
jón tí nkehe nixja ch'án. Ntá kjuan-  
chankíhi sín kichó sín ntáchro sín kíxin:

—¿A jehya xjeen ch'ín José tíhi?  
—ichro sín.

<sup>23</sup> Ntá kjuátehe ch'ín Jesús ntáchro  
ch'án kíxin:

—Kjá tsontáchorá kíxin janhan ijnko  
chojni ch'e xroan chrókjuintakítóha jína  
asenná senó, la ko tsontáchorá kíxin tí  
nkehe kuínhínra kjuít'a tí chjasin Ca-  
pernaum xikaha chrókjuít'a ntihi ch-  
jasenná, tsixrorá —ichro ch'án.

<sup>24</sup> Naxa tjenixja ch'án ntáchro ch'án  
kíxin:

—Ijnko nkehe chaxín tsotjonkará  
kíxin tí sín chjasén ijnko nkexro chrónka  
itén Dios la mé xráxin chóntehya sín  
kjuasáyé tí nkexro a. <sup>25</sup> Chaxín ntáxrjan  
kíxin k'uéjé itsjé chojni chjin tsikók'án  
tí nación Israel tió kjuák'e ch'ín Elías  
tí nkexro k'uéchrónka itén Dios la  
ntá í k'uániáhya chrin iní nánó ko t'ó  
la ko imá kókjinta nkuíxin chjasin

ntiha. <sup>26</sup> Kjánchó Dios la k'uetuenhya  
ch'ín Elías sáchrókjuitsjehe ch'án  
nijnko chojni chjin tsikók'án tí nación  
Israel. Náhí. Dios k'uetuenhen ch'án  
kíxin sátsjitsjehe ch'án ijnko chojni  
chjin tsikók'án itjen chjasin Sarepta  
chjino chjasin Sidón.\*\* <sup>27</sup> Kjaxin nación  
Israel k'uéjé nchónhya chojni chóna  
chinlepra tió kjuák'e ch'ín Eliseo  
chrónka ch'án itén Dios, kjánchó nijnko  
sín kuítóehya sín jína la mé jehó ch'ín  
Naamán kjuixin ch'án nación Siria mé  
kuítóhe ch'án jína†† —mé xikaha ichro  
ch'án.

<sup>28</sup> A ntá tió kuínhin sín xikaha ntáchro  
ch'ín Jesús la ntá kaín tí chojni k'uéjéx-  
enhen nínko la mé imá kónínkaon sín.

<sup>29</sup> K'uínkatjen sín itsé sín ch'án sákjuíko  
sín ch'án tí ikon chjasin la sákjuíko sín  
ch'án chrítaón tí tjo tí tjen tí chjasin a  
chrókjuinchek'anótjenxin sín ch'án tí tjo  
a. <sup>30</sup> A ntá ch'ín Jesús k'uátsinka jnkos-  
iné tí síin tí jehe sín la sákjuí ch'án.

### Ijnko chojni chóna ijnko nchakuen tí jínahya

(Mr. 1.21-28)

<sup>31</sup> A ntá ch'ín Jesús sákjuí ch'án tí ch-  
jasin Capernaum na mé ijnko chjasin es-  
tado Galilea, na ntá ntaha kjuankíxin  
ch'án kjuakohe ch'án chojni tí yaon  
t'ok'éhe sín. <sup>32</sup> Chrakon sín kíxin nkexrí  
kjuako ch'án kíxin kjuakoxin ch'án kíxin  
chóna ch'án kjuachaxin.

<sup>33</sup> A ntá nkaxenhen nínko kjuák'e  
ijnko ch'ín chóna ijnko nchakuen tí jí-  
nahya k'óyakoxin itén tí ch'ín a, ntáchro  
kíxin:

<sup>34</sup> —Títóhéni; ¿nkekuente tjiaté tí  
jeheni kaín ni, jaha Jesús kjuixian  
chjasin Nazaret? ¿Á k'uinka kíxin  
sinchek'itjáyanni? Ó tjátsoan tí jaha

§4:19 4.18-19 Isaías 61.1-2

\*\*4:26 4.25,26 1 Reyes 17.9;18.1

††4:27 2 Reyes 5.1-14

la ko nõna kixin jaha mé tí nkexro tjóá kuènte Dios —ichro tí nchakuen tí jínahya.

<sup>35</sup> Ntá ch'ín Jesús jiehe k'uetuēnhen tí nchakuen tí jínahya ntáchro ch'án kixin:

—Táníá. T'axrjéxian tí ch'ín a —ichro ch'án.

À ntá tí nchakuen tí jínahya kjuáka tí ch'ín a kjuítsínka ch'án nonte jnkosiné tí sín sín la k'uaxrje tí nchakuen tí jínahya la kohya ninkehó kónhen tí ch'ín kjuítsínka. <sup>36</sup> À ntá kaín sín chrakon sín itjo sín kichó sín kixin:

—¿Xá nkexrí kixin xikaha nixja tí ch'ín i? Jehe ch'án chóna kjuachaxin kixin k'uetuēnhen ch'án tí nchakuen tí jínahya k'uaxrjéxín tí nkexro i —ichro sín.

<sup>37</sup> À ntá nkuíxín ntiha ikjo sín kichó sín kixin nkerí kjuaxroan kjuích'e ch'ín Jesús.

### **Ch'ín Jesús kjuínchekitohe jína tí tjan ich'ee ch'ín Simón Pedro**

(Mt. 8.14-15; Mr. 1.29-31)

<sup>38</sup> Ntá ch'ín Jesús k'uaxrjéxín ch'án tí nínko la ntá k'uixenhen ch'án ntøe ch'ín Simón. À ntá tí tjan ich'ee ch'ín Simón mé níhi tjan chóna tjan ijnko sóa jíé ntá chronóehé sín ch'án kixin chrókjuínchekitohe ch'án tjan jína.

<sup>39</sup> Ntá k'uísén ch'ín Jesús tí tjan tjan ntá k'uetuēnhen ch'án tí sóa a ntá kjuiin. Ntá tuénxín k'uàya tjan la ntá kjuanjon tjan nkehe sine sín.

### **Ch'ín Jesús kjuínchekitohe ch'án jína itsjé chojni níhi**

(Mt. 8.16-17; Mr. 1.32-34)

<sup>40</sup> À ntá kuétaón yaon ntá kaín tí sín chóna sín sjinníhi chóna sín nchónhya clase chin mé kjuikao sín tí tjan ch'ín Jesús. Ntá kjuak'etja tja ch'án jnkojnko tí jehe sín a ntá xikaha kuítóhe sín jína.

<sup>41</sup> La ko nchónhya chojni níhi chóna nchakuen tí jínahya la mé k'uaxrje tí

nchakuen tí jínahya la k'óyako la ko ntáchro kixin:

—Jaha mé Xjeen Dios —mé ichro tí nchakuen tí jínahya.

Kjánchó ch'ín Jesús k'uetuēnhen ch'án tí nchakuen tí jínahya la kjuanjonhya ch'án kjuachaxin kixin tsonixja kixin ó nohe tí nchakuen tí jínahya kixin jehe ch'án na mé tí nkexro Cristo.

### **Ch'ín Jesús kjuako ch'án tí estado Galilea**

(Mr. 1.35-39)

<sup>42</sup> À ntá tí kóyaon k'uínkaséyan ntá ch'ín Jesús k'uaxrjenta ch'án chjasin sákjui ch'án nteje. À ntá kaín tí chojni kjuíkjejá sín ch'án la k'uitja sín tí tjan ch'án. Tjinkaon sín chrókjuínchexrjenhen sín ch'án kixin sáchrókjuihya ch'án ókjé. <sup>43</sup> Kjánchó kjuátēhe ch'ín Jesús ntáchro ch'án kixin:

—T'ichjánxin kixin sátsjia kaín chjasin ókjé tsoxrjanka tí tan jína kuènte Dios kixin nkexrí tí kjuachaxin t'etøan Dios, kixin xṛá ó mé k'uinka —ichro ch'án.

<sup>44</sup> À ntá xikaha k'uájikjako ch'ín Jesús kaín tí nínko Israel tí estado Galilea.

### **Kjuaxroan itsé sín koche**

(Mt. 4.18-22; Mr. 1.16-20)

**5** Ntá ijnko yaon kjuák'e ch'ín Jesús chrínta ntayaon Genesaret ntá kóchjina nchónhya chojni na mé k'uixitja kichó sín kixin tjinkaon sín chrókuinhin sín itén Dios. <sup>2</sup> Ntá k'uíkon ch'ín Jesús kixin tjejó iyó ntabároç jehó chjino chrínta ntayaon. À ntá tí sín itsé koche mé tsík'axrjéxín sín ntiha la k'uéjó sín tjentoá sín la ko tjejójtjønemá sín tí nchísén tséya sín koche. <sup>3</sup> Ntá ch'ín Jesús k'uit'ótjen ch'án ijnko tí ntabároç ntiha na mé ntabároç kuènte ch'ín Simón na ntá chronóehé ch'án tí ch'ín Simón kixin sátsjiko ch'án ntabároç ijnko chrínta ntá kjínhya. Ntá ntahó kjuák'enkáya ch'ín Jesús tí nta



kjuák'etjxin ch'án kjuakohe ch'án nchónhya chojni síin chrínta ntá. <sup>4</sup> A ntá tió kjuixin nixja ch'án ntá ntáche ch'án tí ch'ín Simón kixin:

—Tjíkóa ntabáro t'í tjíá ntá ninka ntá itérá tí nchísén tseyará koche —ichro ch'án.

<sup>5</sup> Ntá kjuátehe ch'ín Simón ntáchro ch'án kixin:

—Maestro, kjuích'eni xra kuenté tie la tséhyani ninkehó koche. Kjánchó t'í jaha xíkaha kuétuñhénni la mé tsochr'ánni tí nchísén inaá —ichro ch'án.

<sup>6</sup> Na ntá xíkaha kjuích'e sín la ntá nchónhya koche tsítsé t'í nchísén la ntá tí nchísén kjuankixin tinkák'ichje. <sup>7</sup> Ntá k'uèyaxin sín tja sín kixin chróxrakoa tí sín ch'eko sín xra tjejóxenhén t'í í jnko ntabáro kixin tsjinkítsa sín. Ntá xrákao sín ntabáro kuènte sín ntá kjuínchekaón sín yóí t'í ntabáro ntá chrókjuachahya t'í ntabáro na tjinkaon chrók'uániánkí ntá. <sup>8</sup> Ntá xíkaha k'uíkon ch'ín Simón Pedro ntá kjuák'exín toch'in ch'án nkayakon ch'ín Jesús ntá ntáchro ch'án kixin:

—Títóhéni Ìnchéni kixin jeheni ijnko chojni chóna jie —ichro ch'án.

<sup>9</sup> Mé xíkaha ichro ch'ín Simón kixin chrakon ch'án la ko kjaxin chrakon t'í í so sín tjejóko ch'án kixin xíkaha kónhen xrenájín nchónhya koche. <sup>10</sup> La ko ch'ín Jacobo la ko ch'ín Juan, xjeen ch'ín Zebedeo, na mé jnkokoá ch'eko sín xra ch'ín Simón, la kjaxin chrakon sín. Kjánchó ntáche ch'ín Jesús t'í ch'ín Simón kixin:

—Chrakonhya. Senó la koche k'uétse la nta jie la náhí la mé chojni tsjéyá —ichro ch'án.

<sup>11</sup> Ntá tió kjuíjiko sín t'í ntabáro t'í chrínta ntá la kuítóhe sín kaín nkehe kuènte sín ntá chréhe sín sákjuíko sín t'í ch'ín Jesús.

### Ch'ín Jesús kjuínchekitohe ch'án jína ijnko chojni chóna chinlepra

(Mt. 8.1-4; Mr. 1.40-45)

<sup>12</sup> Kjuák'e ch'ín Jesús ijnko t'í chjasin, ntá kui ijnko chojni níhi chóna chinlepra. A ntá tió k'uíkon ch'án t'í ch'ín Jesús ntá kjuák'exín toch'in ch'án chronóehe ch'án jnkójina ntáchro ch'án kixin:

—Ìnchéni, t'í tjinkávan jaha la jína chrókjuínchekitohéni jína —ichro ch'án.

<sup>13</sup> Ntá ch'ín Jesús kjuéntoá tja ch'án ntá kjuak'etja tja ch'án chrítaón t'í sín níhi ntáchro ch'án kixin:

—Méxra xíkaha tjínkavan. Ntá jie sín takitoha jína —ichro ch'án.

Ntá xíkaha ichro ch'án ntá t'í chinlepra tuénxín kjuiinhin t'í sinníhi. <sup>14</sup> A ntá k'uétuñhen ch'ín Jesús t'í ch'ín a kixin chróchenkahya ch'án ninkexró. Ntáchro ch'án kixin:

—Sátjia tjítsjehé t'í nchat'á la tsjánjuan t'í nkehe tsík'etóan ch'ín Moisés ts'áyéhe Dios<sup>‡‡</sup> kixin ntá tsonoexín kaín xín chojni kixin ó kuítóha jína —ichro ch'án.

<sup>15</sup> Kjánchó antsí k'uíxikónohe sín nkexrí t'í kjuaxroan kjuasin ch'ín Jesús, ntá nchónhya chojni k'uíxikóchjinehe sín ch'án kixin tsinhin sín nkehe tsjako ch'án, la ko tsitóexín sín jína t'í chin chóna sín. <sup>16</sup> Kjánchó ch'ín Jesús la k'uaxrjenta ch'án t'í kohya chojni la ntaha nixjeexín ch'án Dios.

### Ch'ín Jesús kjuínchekitohe ch'án jína ijnko ch'ín tsík'en toté

(Mt. 9.1-8; Mr. 2.1-12)

<sup>17</sup> A ntá ijnko yaon kjuák'ekjako ch'ín Jesús na ntá ntíha k'uéjótjxin iso sín fariseo la ko iso t'í sín tjako t'í ley, tsíkjixin sín kaín t'í chjasin ntsí estado Galilea la ko kaín t'í chjasin ntsí estado Judea la ko t'í chjasin Jerusalén. Ntá t'í

‡‡5:14 Levítico 14.4-8

kjuachaxin kuènte Dios kjuakoxin ch'án kixin sinchekitohe ch'án chojni jína. <sup>18</sup>Ntá kui iso chojni tinkátsénki sín ijnko ch'ín tsík'en tote tjenkáya ijnko kania. Ntá tjinkaon sín chrók'uixenko sín ch'án tí nchia kixin chrók'juak'e ch'án tí tjen ch'ín Jesús tjetjako ch'án. <sup>19</sup>Kjánhó xitjahya ts'ixenhen sín kixin nchónhya chojni s'ixenhen nchia. Ntá k'ujt'ótjen sín tí chrítaon nchia, ntá kjuakjiin sín iso teja la ko tí nta sít'ó ntá ntiha kjuinkajinxin sín tí ch'ín níhi tjenkáya kania ntoí tí tjen ch'ín Jesús. <sup>20</sup>Na ntá tió k'ufkon ch'ín Jesús kixin imá tinkáchónki sín ch'án ntá nixjehe ch'án tí ch'ín níhi, ntáchro ch'án kixin:

—Jaha, ó kjuixin kjuinhan tí jie chonta —ichro ch'án.

<sup>21</sup>A ntá tí sín maestro tjako tí ley la ko tí sín fariseo kjuankixin sín kjo sín asén sín kixin: “¿Xá nkexro tíhi ch'ia ch'án ncheyóhe ch'án asén ch'án Dios? Ninkexró xitjahya tsjakjiin ijie kixin jehó Dios mé chóntha kjuachaxin tsjatsen ijie chojni”, mé xikaha kjuenkayáxin sín.

<sup>22</sup>Ntá ch'ín Jesús la ó nohe ch'án tí nkehe tjenkayáxin sín ntá ntáchro ch'án kixin:

—¿Nkekuènte kixin xikaha tjenkayáxinrá? <sup>23</sup>¿Nkehe antsí xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuinhan ch'án tí ijie yámá ch'án, o á antsí xrahya chróntátjan ch'án kixin chrók'uínkatjen ch'án sáchrókjuí ch'án? <sup>24</sup>Méxra ijie tsjákoxian kixin tí Xjeen Dios K'óna Chojni mé chóntha kjuachaxin ntihi chjasintajni tsjakjiinhan ijie chojni —ichro ch'án.

Ntá k'uetuenhen ch'án tí ch'ín tsík'en tote ntáchro ch'án kixin:

—Jaha tétuñhan t'inkatjen tjatsíyan kaniáa la sátjia ntóa —ichro ch'án.

<sup>25</sup>Ntá tuénxín k'uínkatjen tí ch'ín tsík'en tote nkayakon kaín tí sín siín a la kuákja ch'án kanié ch'án k'uék-

jak'eták'á ch'án ntá sákjuí ch'án ntóe ch'án la kjuanchehe ch'án Dios kjuasáya. <sup>26</sup>Ntá kaín sín imá chrakon sín la kjuanchehe sín Dios kjuasáya kjónté chrakon sín la ntáchro sín kixin:

—Ijie mé k'uíkonni antsí má kjuaxroan jie —ichro sín.

### Ch'ín Jesús k'uíyehé ch'án tí ch'ín Leví

(Mt. 9.9-13; Mr. 2.13-17)

<sup>27</sup>Ntá chr'éxin ntá ch'ín Jesús k'uaxrexín ch'án nchia ntá k'ufkon ch'án ijnko ch'ín nchekjènkí mé it'in ch'án Leví tjetjaxin ch'án tjech'e ch'án xra nkaxenhen tí nchia ntsí tí xenkaxín chichaon a. Ntá ntáchro ch'án kixin:

—Chr'éhé tí janhan —ichro ch'án.

<sup>28</sup>Ntá ch'ín Leví mé tuénxín k'uínkatjen ch'án la ntá kuítóhe ch'án kaín xín nkehe ntá chr'éhe ch'án tí ch'ín Jesús.

<sup>29</sup>Ntá chr'éxin ch'ín Leví chóntha ch'án ijnko kia jie ntóe ch'án kjuikosáyehe ch'án tí ch'ín Jesús. Kjaxin k'u'éjó itsjé tí sín nchekjènkí la ko itsjé í so chojni chóntha jie k'u'éjótjaxinko sín tí ch'ín Jesús chjino tí mesa a. <sup>30</sup>A ntá tí sín fariseo la ko tí sín maestro tjako tí ley la mé kjuankixin sín tjonta sín tí sín k'uájiko ch'ín Jesús ntáchro sín kixin:

—¿Nkekuènte ntekoará la ko t'ikoará tí sín nchekjènkí la ko tí sín chóntha jie? —ichro sín.

<sup>31</sup>A ntá kjuátehe ch'ín Jesús ntáchro ch'án kixin:

—Tí chojni níehya t'ichjánxienhya sín nkexro sich'e xroan. Náhí. Jehó tí sín níhi mé t'ichjánxinhin sín nkexro sich'ehe sín xroan. <sup>32</sup>Janhan la k'uinkahya ntihi kixin chrók'uíyaha tí sín jína tjejó. Náhí. Janhan k'uinka kixin ts'iyaha tí sín chóntha jie kixin chrókuítóhe sín tí ijie sín ntá chrókjuinkí sín tí tjenkayáxin sín —ichro ch'án.

**Tjanchankíhi sín tí ch'ín  
Jesús kixin á chrókjónehya  
sín tió tsonixjehe sín Dios**

(Mt. 9.14-17; Mr. 2.18-22)

<sup>33</sup> A ntá kjuanchankíhi sín tí ch'ín Jesús kixin:

—¿Nkekuènte kixin tí sín k'uék'ajiko ch'ín Juan nkoyaxón nehya sín na nixjehe sín Dios, la ko kjaxin xikaha ch'e tí sín xriko tí sín fariseo, a ntá tí sín xrikoa la ine sín la ko it'i sín? —ichro sín.

<sup>34</sup> Ntá kjuátehe ch'ín Jesús kixin:

—¿Xá chrókjuachará chrókuétuenhenrá kaín tí sín tsík'íyehé sín tsíkóchjina tí tjejó tí sín tsíkótehe kixin chrókjónehya sín tí naxa tjejóko sín tí ch'ín tsíkótehe? <sup>35</sup> Kjánchó tsjixraká tí yaon itsi chojni tsotsé sín tí ch'ín tsíkótehe sátsjiko sín ch'án. Ntá tí sín tsíkóchjina la ts'ává sín la í sinehya sín —ichro ch'án.

<sup>36</sup> Kjaxin kjuíncheyóexin ch'án ntáchro ch'án kixin:

—Ninkexró chrókuaté ijnko camisa nixin ntá chrókjuak'eniéhe ijnko camisa ntaxin kixin xikaha chrókjuich'e sín ntá chrók'uitjáyán tí camisa nixin la ko kjaxin tí t'o ka k'uaxrjexín tí camisa nixin tsoyóehya tí camisa ntaxin.

<sup>37</sup> Kjaxin chrókuíkiyahará xranvino nixin ijnko tjuaxran ntaxin kixin tí xikaha chrókjuich'erá la chrók'uiichje tí tjuaxran ntaxin ntá chrók'uitjáyán tí xran la ko chrók'uitjáyán tí tjuaxran.

<sup>38</sup> A ntá tí xranvino nixin chrókuikia ijnko tjuaxran nixin kixin yóí la chrók'uitjáyánhya. <sup>39</sup> La ko kjaxin ninkexró tió tsík'i tí xran ntaxin naxa chrókóxrjinhjín chrók'ui xran nixin. Náhí. Tsontáchro ch'án kixin íchá jína tí xran ntaxin, tsixro ch'án —mé xikaha ichro ch'ín Jesús.

**Tí sín k'uájiko ch'ín Jesús mé  
k'uín sín iso noatrigo ijnko  
yaon t'ok'éhe tí sín israelita**

(Mt. 12.1-8; Mr. 2.23-28)

**6** Ijnko yaon t'ok'éhe sín la ch'ín Jesús k'uátsínka ch'án iso nonte t'óna noatrigo. Na ntá tí sín k'uájiko ch'án mé ik'uín sín iso noatrigo la kjuankixin sín nkaya tja sín ó k'óntajinyá sín tí noa ntá kjóne sín. <sup>2</sup> Ntá iso tí sín fariseo kjuanchankí sín kixin:

—¿Nkekuènte kixin tjejoch'erá xra jie? La mé kohya kjuachaxin tsonhen xra tí yaon t'ok'éheni —ichro sín.

<sup>3</sup> Ntá kjuátehe ch'ín Jesús kixin:

—¿Jahará á kjuínchekuáxinhyará tí xroon chrónka nkehe kjuích'e ch'ín David la ko tí sín k'uájiko ch'án tió k'uén sín kjinta? <sup>4</sup> Na mé jehe ch'án mé k'uíx-enhen ch'án ntøe Dios la kjóne ch'án tí niotja tsíkóyaon, la ko kjaxin chjéhe ch'án tí niotja tí sín k'uájiko ch'án kjónté jehó síin kjuachaxin sine tí sín nchat'á<sup>¶</sup> —ichro ch'ín Jesús.

<sup>5</sup> Kjaxin ntáchro ch'án kixin:

—A ntá tí Xjeen Dios K'óna Chojni mé chóna kjuachaxin ts'etøan nkexrí tsonhen tí yaon t'ok'éheni —ichro ch'án.

**Ch'ín Jesús kjuínchekitohe  
jína ijnko ch'ín tsixámá tja**

(Mt. 12.9-14; Mr. 3.1-6)

<sup>6</sup> A ntá í jnko yaon t'ok'éhe chojni ntá k'uíx-enhen ch'ín Jesús ijnko njnko Israel la ntá kjuankixin kjuako ch'án. A ntá ntaha kjuák'e ijnko ch'ín tsixámá tja ch'án chjina. <sup>7</sup> Na ntá tí sín tjako tí ley la ko tí sín fariseo tjejó sín tsáyehé sín tí ch'ín Jesús chrók'uiikon sín á sinchekitohe ch'án chojni jína tí yaon t'ok'éhe sín kixin ntá chrók'ueka sín ch'án jie.

<sup>8</sup> Kjánchó jehe ch'án ó nohe ch'án nkehe

<sup>¶</sup>6:4 6.3-4 1 Samuel 21.6; Levítico 24.5-9

tjenkayáxin asén sín ntá nixjehe ch'án tí ch'ín tsixámá tja ntáchro ch'án kixin:

—T'ínkatjen, tjak'e jnkosiné ntihi —ichro ch'án.

Ntá k'uínkatjen tí ch'ín a kjuák'exín tote ch'án. <sup>9</sup>Ntá nixjehe ch'ín Jesús tí í so sín ntáchro ch'án kixin:

—Tsjánchánkíhára ijnko xra. Tí yaon t'ok'éheni la, ¿á jína chrókjuich'eni ijnko nkehe jína ní o á chrókjuich'eni ijnko nkehe jínahya? ¿Á chrókjuinchekitoheni chojni jína ní o á chrók'óyánni chojni? —ichro ch'án.

<sup>10</sup>Ntá ch'ín Jesús komá ch'án kaín tí chojni síin ntiha ntá nixjehe ch'án tí ch'ín níhi ntáchro ch'án kixin:

—Tjéntoá tjá —ichro ch'án.

▲ ntá tí ch'ín a xikaha kjuích'e ch'án ntá kuítóhe tja ch'án jína. <sup>11</sup>Kjánchó tí sín fariseo tjejó mé kónínkaon sín mé ntá kjo sín kichó sín kixin tjinkaon sín chrók'óyán sín tí ch'ín Jesús.

### **Ch'ín Jesús kjueyá ch'án tí teyó sín ts'ajiko ch'án**

(Mt. 10.1-4; Mr. 3.13-19)

<sup>12</sup>▲ ntá ijnko yaon ch'ín Jesús sákjui ch'án ijnko jna kixin ntaha tsonixjeexín ch'án Dios la ntá ntahó kjuák'e ch'án kuenté tie tjenixjehe ch'án Dios. <sup>13</sup>▲ ntá tí k'uínkaséyan a na mé k'uíyehé ch'án tí sín chréhe sín ch'án ntá kjueyá ch'án teyó sín kixin ts'óna sín apóstol ts'ajiko sín ch'án. <sup>14</sup>▲ ntá tí sín í mé xikihi it'in sín. Na mé ch'ín Simón la ntá ch'ín Jesús kjuínchek'in ihnié ch'án Pedro kjaxin; la ko kichó ch'án ch'ín Andrés; la ko ch'ín Jacobo la ko ch'ín Juan, la ko ch'ín Felipe, la ko ch'ín Bartolomé, <sup>15</sup>la ko ch'ín Mateo, la ko ch'ín Tomás, la ko ch'ín Jacobo la mé it'é mé it'in Alfeo; la ko í jnko ch'ín Simón na mé tí ch'ín a mé k'uéek'aji tí partido cananista; <sup>16</sup>la ko ch'ín Judas la kichó ch'án mé it'in Jacobo; la ko ch'ín Judas Iscariote tí ch'ín kjuínchekji tí ch'ín Jesús.

### **Ch'ín Jesús kjuakohe ch'an nchónhya chojni**

(Mt. 4.23-25)

<sup>17</sup>Ntá ch'ín Jesús la ko tí jehe sín k'uínkajinxín sín tí jna ntá k'uéjéjó sín nonte yóxin jehe ch'án la ko tí sín kjueyá ch'án. Kjaxin k'uíxikóchjina nchónhya chojni kjuixín nkuixín estado Judea la ko chjasin Jerusalén la ko tí chrnta ntayaon tí síin tí chjasin Tiro la ko tí chjasin Sidón. Ó kjui sín kixin tsinhin sín tí nkehe tsjako ch'ín Jesús la ko tsi-tohe sín jína. <sup>18</sup>▲ ntá tí sín kjuaxróxinhya k'uéjéj k'uéchónta sín nchakuen jínahya na mé kuítóhe sín jína kjaxin. <sup>19</sup>Kaín chojni tjinkaon chrókuákóxin sín tí ch'ín Jesús kixin kjuínchekitöhe ch'án jína kaín xín chojni kixin jehe ch'án chóntha ch'án kjuachaxin jíé.

### **Tí kjuachéhe la ko tí kjuaxróxinhya**

(Mt. 5.1-12)

<sup>20</sup>Ntá komá ch'ín Jesús tí sín k'uájiko ch'án ntá ntáchro ch'án kixin:

—Náxrjón tjejorá jahará nõará kixin chontará kjuachaxién Dios.

<sup>21</sup>'Náxrjón tjejorá jahará t'énxinrá kjinta ijie kixin chr'éxin sinterá jína.

'Náxrjón tjejorá jahará tsjanará ijie kixin chr'éxin tsjanorá.

<sup>22</sup>'Náxrjón tjejorá jahará nínkakohanrá chojni la ko ts'inkítíará sín sát-sjirá ókjé, la ko t'ántaxínhanrá sín la ko t'ákjenxin sín ihniárá éxi ijnko nkehe jínahya kixin tinkachónkirá tí Xjeen Dios K'óna Chojni. <sup>23</sup>Tsocháhará má la ko imá tsochontará kjuachéhe tí yaon a kixin ts'ayéhérá nkehe kuente nkaya nkajni. ▲ ntá xikaha tí t'achrii tí sín jínahya ch'e la mé ósé kjuate sín tí sín k'uéchrónka itén Dios.

<sup>24</sup>'▲ ntá jahará rícorá kjuaxróxinhya ts'ejorá chr'éxin kixin ó kjuixin k'uayéhérá kaín nkehe.

<sup>25</sup> 'A ntá jahará kjónterá jína, kjuaxróxinhya ts'ejorá chr'éxin kixin ts'énxinrá kjinta.

'A ntá jahará tjanorá jie, kjuaxróxinhya ts'ejorá chr'éxin kixin ts'avará la ko tsotsjankará.

<sup>26</sup> 'Kjuaxróxinhya ts'ejorá tió kaín chojni tsjikosáyahará sín kixin xikaha tí t'áchrji sín kjuikosáyehe tí sín ntoáhya k'uéchronka itén Dios ósé.

### **Tsotjuèheni tí sín nínkakohenni**

(Mt. 5.38-48; 7.12)

<sup>27</sup> 'A ntá jahará tjejotinhínrá mé t'jéxrjanka kixin chrótjuèhérá tí sín nínkakohannrá la ko jína chrókjuínkĩtsará tí sín tjinkakohnya tí jahará. <sup>28</sup> Jína nixjehérá tí sín t'ántaxínhanrá la ko tjanchehérá Dios kixin tsjinkĩtsa ch'án tí sín chónkĩhará sín. <sup>29</sup> Tí chjéhe ijnko nkexro ijnko tuғанnrá chrókjóká tí í jnko nánko kixin chróchjéhe sín tíha kjaxin. La ko tí siín ijnko nkexro tjinkaon sín tsakitsjaha sín tí chamara tjín t'inkayate na mé t'itohé kixin kjaxin sátsjiko sín camisá kjaxin. <sup>30</sup> Tí jnkojín nkexro tjanchaha nkehe chonta la chjehé sín. 'A ntá tí tsakja sín nkehe kuéntá la tjanchehya sín kixin naḡa ts'ókjanhan sín. <sup>31</sup> Méxra chrókjuíkosáyehérá kichuárá éxí yóhe nkexrí tjinkáonrá chrókjuikosáyahará tí jehe sín kjaxin.

<sup>32</sup> 'Tí jehó tjuèhérá tí nkexro tjuàhará la tí xikaha la kohya ninkehó tsjachahyará. Kjónté tí sín jínahya tjasin jie la xikaha ch'e sín. <sup>33</sup> 'A ntá tí tjíkosáyeherá jehó tí sín tjikosáyahará la kohya ninkehó tsjachahyará xikaha. Kjónté tí sín jínahya tjasin jie mé kjaxin xikaha ch'e sín. <sup>34</sup> La ko tí nchekjenrá chichaon jehó tí sín tjenkáyáxinrá kixin ts'ókjanhanrá sín tí chichaon, la tí xikaha kohya ninkehó tsjachahyará. Kjónté tí sín jínahya tjasin jie xikaha ch'e sín nchekjen kichó sín chichaon la ko chónhen

sín kixin tsokjan tí chichakoēn sín inaá. <sup>35</sup> Kjánchó jahará chrótjuèhérá tí sín nínkakohannrá la ko jína chrókjuích'ehérá sín xra la ko chrókjuínchekjenrá sín chichaon la chróchoénhyará kixin chrókjan tí chichakoanrá inaá. Mé xikaha chrókjuích'erá la imá tsjachará la ko ts'ónará xjeen Dios nkaya nkajní kixin jehe ch'án ch'ehe ch'án jína tí sín chóntehya ch'án kjuasáya la ko tí sín jínahya. <sup>36</sup> Chrókjuíkonóehérá kichuárá éxí yóhe It'ará nkaya nkajní tikonóehé ch'án chojni.

### **Chrók'uántaxíenhyani kichó ni**

(Mt. 7.1-5)

<sup>37</sup> 'Chrókuékahyará jie ókjé chojni kixin ntá Dios chrókjuanchahya ch'án jie tí jahará. Chrókuétuānhyará kixin chrókjuasóte í jnko chojni kixin Dios kjaxin chrókjuínchekjasótiahayará ch'án tí jahará. Chrók'uitjāyanhanrá ichrén jie kjuasinhanrá í jnko chojni kixin ntá Dios chrókjuínchek'itjāyanhanrá ch'án tí jie kjuásinrá. <sup>38</sup> Chjehérá í so sín tí nkehe ts'áyéhe sín kixin ntá Dios tsotjáhará ch'án nkehe jína kjaxin, tjetóxin ijnko medida jína chrókjuanjon ch'án, icha tsík'enka ch'án kixin tsík'ótsjéyehe ch'án tí nkehe tsíkjachroayá ch'án tjetóxin tsjanjon ch'án. Dios tsotjáhará xikaha yóhe éxí tschjehérá í so chojni.

<sup>39</sup> Ntá kjuíncheyóēxin ch'ín Jesús ntáchro ch'án kixin:

—¿Xá á chrókójina ijnko chojni t'ikonhya chrókjuiko í jnko chojni t'ikonhya? Tí xikaha la yóí sín chrók'uanótjenyá sín ichrén tòye. <sup>40</sup> Ijnko nkexro xrakohe la noehya éxí tí nkexro tjako. Kjánchó tió tsjixin tsoxrakohe ch'án ntá tsonohe ch'án éxí nohe tí nkexro kjuakohe ch'án.

<sup>41</sup> '¿'A ntá nkekuénté tsjehé tí chjínínó ntsí tjenkánkí ikon tí kichuá, tí naḡa ántosán tí nta jie tjenkánkí ikuan? <sup>42</sup> ¿Mé xikaha nkexrí kixin chróntáche kichuá kixin chrókuítóhe ch'án kixin

chrókuakitsjenkíhí ch'án tí chjínínó ntsí tjenkánkí ikon ch'án tí naxá ántosán tí nta jié tjenkánkí ikuan? Jaha la ntoáhya tjenkayáxian ch'ia jaha. Senó chrókuakitsjenkiá tí nta jié tjenkánkí ikuan kixin ntá chrók'uikuan chrókuakitsjenkiá chjínínó ntsí tjenkánkí ikon tí kíchuá.

**Tí nta mé tjatsoanxínni tí to tsík'óna**

(Mt. 7.17-20; 12.34-35)

<sup>43</sup> 'Kohya nta jína chrók'óna to jínahya, la ko kjaxin kohya nta jínahya chrók'óna to jína. <sup>44</sup> Jnkojnko tí nta mé tjatsoanxínni tí to t'óna. Tí ntach'í xitjahya tsjakjinjinni to higo la ko xitjahya ts'inni to uva. <sup>45</sup> Ijnko chojni jína la jína nixja ch'án kixin jína asén ch'án. A ntá ijnko chojni jínahya la mé nixja tí nkehe jínahya kixin jínahya asén ch'án. Kixin éxí tjenkayáxin asén mé xikaha nixja ir'va.

**Ch'ín Jesús kjuíncheyóexin éxí  
yaá nkexro kjuích'éna nchia**

(Mt. 7.24-27)

<sup>46</sup> 'Nkekuènte ntáchrórá kixin janhan Ìnchárá, la ntá tahyará kuenté tí nkehe tétuanhanrá? <sup>47</sup> Méxra káin tí nkexro tóchjina tinhin tí nkehe ntáxrjan la ko titekaon sín la mé tsontáxrjan nkexro tí tóyóhe sín. <sup>48</sup> Na mé jehe sín tóyóhe ijnko nkexro kjuích'éna nchia la senó k'óxraya ch'án tòye nínka kixin ntá sich'éna ch'án nchia chrítaón tí tjo a. A ntá tió k'uánkí tí ntario la ikui tí ntá k'uúntate tí nchia, kjónté xikaha la k'uátjoákohya la ní kuínkíhya tí nchia a kixin jína tsík'óna chrítaón tjo tjekjen. <sup>49</sup> A ntá tí nkexro tinhin tí nkehe ntáxrjan la ntá tahya sín kuenté la mé tóyóhe ijnko nkexro kjuích'éna nchia chrítaón nche la kohya tjo chrínkí. A ntá tió k'uánkí tí ntario la ikui tí ntá k'uúntate tí nchia la ntá k'uátjoáko ntá tí nchia la ntá

kuenté tí nchia la k'uújtáyan —mé ichro ch'ín Jesús.

**Ch'ín Jesús kjuínchekitohe  
jína ijnko ch'ín ch'ehe ijnko  
soldado romano xra**

(Mt. 8.5-13)

**7** Ntá ch'ín Jesús kjuixin nixjehe ch'án tí chojni a ntá sákjuí ch'án chjasin Capernaum. <sup>2</sup> Ntaha kjuák'e ijnko capitán romano la mé chóna ch'án ijnko nkexro ch'ehe ch'án xra imá tjuèhe ch'án la ntá jie níhi tí ch'ín a tjet'en ch'án. <sup>3</sup> A ntá tió kuínhin tí ch'ín capitán itjo sín nkexrí tjen ch'ín Jesús ntá ichr'án ch'án iso sín táda judío tsjijitsjehe sín tí ch'ín Jesús tsochronóehe sín ch'án kixin chrókjuíji ch'án chrókjuínchekitohe ch'án jína tí ch'ín ch'ehe ch'án xra. <sup>4</sup> Ntá kjuíji sín kóchjinehe sín tí ch'ín Jesús kjuankixin chrónóehe sín ch'án ntáchro sín kixin:

—Imá jína tí ch'ín capitán la mé tjinkaon ch'án chrókjuínkítsa ch'án <sup>5</sup> kixin tjuèhe ch'án tí nacióon kuènteni la ko jehe ch'án kjuínkítsa ch'án la ko k'uetóan kixin ts'óna ijnko nínko kuènteni —ichro sín.

<sup>6</sup> Ntá ch'ín Jesús sákjuiko sín ch'án. Ntá ó kjuíjichjina sín chjino tí nchia la mé tí ch'ín capitán k'uetuènen ch'án iso chojni chóxin ch'án tsontáche sín tí ch'ín Jesús kixin:

—Tadá. Tjinkakonhya ch'án chrótjáha ch'án xra kixin jehe ch'án la jehya chojni jína la ko chrókósuèhe kixin chrók'uúx-enhén ntóe ch'án. <sup>7</sup> Mé xikaha chrókósuèhe ch'án chrókjuíji ch'án chrókjueyá ch'án tí jaha. Méxra tí kjuachaxin chrónixja ó chrókuítóexín jína tí ch'ín ch'ehe ch'án xra. <sup>8</sup> Kixin jehe ch'án kjaxin t'ítuènen ch'án la ko kjaxin chóna ch'án soldado t'etúenhen ch'án ínaá. Tió t'etúenhen ch'án ijnko sín kixin sátsji la mé sátsji la ko tió t'etúenhen ch'án í jnko sín kixin xrákoa la mé

xrákoa la ko tió t'etuenhen ch'án í jnko sín kixin sich'e ijnko xra la mé nchexiteyá ch'án —mé xikaha ichro tí sín kui.

<sup>9</sup>Ntá ó kuínhin ch'in Jesús xikaha ntá chrakon ch'án kixin xikaha tjenkayáxin tí ch'in a, a ntá nkátjía ch'án komá ch'án tí chojni chréhe ntáchro ch'án kixin:

—Ntáxrjan kixin naxá k'uújtahya njnko nkexro israelita xikaha tinkáchónki éxí tí ch'in i —ichro ch'án.

<sup>10</sup>A ntá ó kjan nchia tí sín tsík'ítuenhen la ó k'uíkon sín kixin ó tsíkitohe jína tí ch'in níhi.

### Ch'in Jesús kjuínchexechón tí xjeen ijnko tjan k'án chjasin Naín

<sup>11</sup>Ntá chr'éxin ntá sákjui ch'in Jesús ijnko chjasin it'in Naín la ko sákjuíko ch'án tí sín k'uájiko ch'án la ko nchónhaya í so chojni. <sup>12</sup>Tiό kjuíjichjina sín tí chjasin a la k'uíkon sín nchónhaya chojni sákjuíkjava sín ijnko chojni tsík'en na mé tí jnkokoá xjeen ijnko tjan k'án. Itsjé chojni chjasin ntiha sákjuíkotoxin sín tjan. <sup>13</sup>Ntá tió k'uíkon Ìnchéni tí tjan a ntá kuíkonóhe ch'án tjan ntáchro ch'án kixin:

—Tsjankahya —ichro ch'án.

<sup>14</sup>Ntá ch'in Jesús kóchjinehe ch'án tí sín tinkátsénkí tí nkexro tsík'en la kjuak'etja tja ch'án tí nkehe tinkátsénkía sín tí ch'in tsík'en. A ntá tí sín kuámá nta k'uéjóchónhen sín. Ntá ch'in Jesús nixjehé ch'án tí ch'in tsík'en ntáchro ch'án kixin:

—Ntásoá. Tétuanhan t'áya —ichro ch'án.

<sup>15</sup>Ntá tí ch'in tsík'en tuénxín kjuák'etjxin ch'án la ko kjuankixin nixja ch'án. Ntá ch'in Jesús kjuínchek'áyéhe ch'án iné tí ch'in ntasoá la sákjuíko. <sup>16</sup>A ntá tió k'uíkon sín xikaha kónhen la kaín sín imá chrakon sín la ko kjuankixin kjuanchehe sín Dios kjuasáya ntáchro sín kixin:

—Dios mé ichr'án ijnko chojni imá t'etuan chrónka itén Dios ts'ejókoni —ichro sín.

Kjixin ntáchro sín kixin:

—Ó kui Dios tsjinkitsa ch'án chjasén ch'án —ichro sín.

<sup>17</sup>A ntá nkuíxín estado Judea la ko kaín tí chjasin chjinaxón mé kuínhin sín kixin nkehe tí kjuaxroan kjuích'e ch'in Jesús.

### Tí sín ichr'án ch'in Juan Bautista

(Mt. 11.2-19)

<sup>18</sup>A ntá tí sín k'uájiko ch'in Juan mé chénka sín ch'án kaín tí nkehe tsíkónhen. Ntá k'uíyehé ch'án iyó tí sín k'uájiko ch'án <sup>19</sup>k'uetuenhen ch'án sín sátsjitsjehe sín tí ch'in Jesús tsjikjanchankíhi sín ch'án kixin á jehe ch'án tí nkexro tsi o á tsochónhen sín í jnko nkexro, tsixro sín. <sup>20</sup>A ntá tí sín ichr'án ch'in Juan mé kóchjina sín tí tjen ch'in Jesús ntáchro sín kixin:

—Ch'in Juan Bautista k'uetuan ch'án kuini tsikjanchankíhani kixin á jaha tí nkexro tsi ní o á tsochónhenni í jnko nkexro —ichro sín.

<sup>21</sup>A ntá tí yaon kjuíji sín na mé ch'in Jesús kjuínchekitohe ch'án itsjé chojni jína la mé kjuatsen ch'án kaín tí chin chóna sín la ko kuakit-sje ch'án tí nchakuen jínahya chóna sín la ko kjuínchek'ikon ch'án itsjé chojni t'ikonhya. <sup>22</sup>A ntá kjuátehe ch'in Jesús ntáchro ch'án kixin:

—Sátjirá tjíchenkará tí ch'in Juan kaín nkehe k'uíkonrá la ko kaín nkehe kuínhínra kixin tí sín k'uíkonhya la ó t'ikon sín jie, la ko tí sín k'uékjihya la ó tji sín jie, la ko tí sín k'uéchóna chinlepra la ó kuítohe sín jína, la ko tí sín kíenhya la ntá jie la ó tinhin sín, la ko tí chojni tsík'en la ó síxechón sín jie, la ko tí sín nòa síxraohe sín tí tan jína tsaáxin sín. <sup>23</sup>Ntá náxrjón tjen tí nkexro kohya

nkehe t'inkákonhen tí tinkáchónki sín tí janhan —mé ichro ch'án.

<sup>24</sup> Tió sátsíkji tí sín ichr'án ch'ín Juan ntá kjuankíxin nixjehe ch'ín Jesús tí sín k'uéjé ntiha kíxin nkexrí tjen ch'ín Juan ntáchro ch'án kíxin:

—Tió sákjuítsjehérá ch'ín Juan nteje, ¿nkexrí k'uíkonrá tí jehe ch'án? ¿Á k'uíkonrá ch'án éxí ijnko tji nchexrayehe xrínto? <sup>25</sup> Tí náhí, ¿la ntá nkehe k'uíkonrá? ¿Á k'uíkonrá ch'án éxí ijnko nkexro tsík'itsa jína? Jahará ó nohará kíxin chojni tsík'itsa jína la ko chóna kaín nkehe náxrjón la mé ntøe rey tjejó sín. <sup>26</sup> ¿Á ntá nkexrí k'uíkonrá ch'án? ¿Á k'uíkonrá ch'án éxí ijnko nkexro chrónka itén Dios? Na mé xrjanka kíxin chaxín xíkaha jehe ch'án na mé antsí t'etøan ch'án la ntá tí sín k'uéchrónka itén Dios ósé la kánhyó. <sup>27</sup> Ch'ín Juan mé tí nkexro kui éxí chrónka tí xroon itén Dios ósé ntáchro kíxin:

Janhan mé tsochr'an ijnko nkexro tsochrónka itan kuéntana tsitónxin ntja,

kíxin tsjasíyóxin ch'án ntja kuénta.<sup>§§</sup>

Mé xíkaha chrónka tí xroon itén Dios.

<sup>28</sup> Ntá ijnko nkehe chaxín tsotjonkará kíxin kaín tí nkexro k'uéjé senó k'uéchrónka itén Dios la kánhyó tjeoan sín la antsí tjeoan tí ch'ín Juan Bautista. Kjánchó ijnko nkexro kjónté tjetuanhya la tí ts'áyehé sín tí kjuachaxién Dios nkaya nkajní la antsí tjeoan sín a ntá jehe ch'ín Juan la kánhyó —ichro ch'ín Jesús.

<sup>29</sup> A ntá tió kuínhin sín tíhi la ntá kaín tí chojni la ko tí sín nchekjènkí tsíkikíte ch'ín Juan la ó kjuátsøan sín kíxin Dios la jína ch'án. <sup>30</sup> Kjánchó tí sín fariseo la ko tí maestro tjako tí ley tsíkikítehya ch'ín Juan la mé tjinkakonhya sín tí nkehe

tjinkaon Dios chrókjuinkítsa tí jehe sín.

<sup>31</sup> Ntá ntáchro ìnchéni kíxin:

—¿Nkexrí chrókjuíntayóaxian tí chojni tjejó jie? ¿Nkehe chrókóyóhe sín?

<sup>32</sup> Tóyóhe sín tí chánjan tjejótxajin sín tí ntašin tsítán sín la t'íyehé kíchó sín ntáchro sín kíxin: “Kjuínchentaçhroni flauta la tehyará la ko tsjeni isón kuente chojni tsík'en la tsjankahyará.” <sup>33</sup> Kíxin ó kui ch'ín Juan Bautista la kjónehya ch'án niotja la ko k'uíhya ch'án vino la ntá jahará ntáchrorá kíxin ijnko nchækuen tí jínahya chóna ch'án. <sup>34</sup> A ntá kjaxin ikui tí Xjeen Dios K'óna Chojni la kjóne ch'án la ko ik'ui ch'án la ntáchrorá kíxin imá kjóne ch'án la ko imá ik'ui ch'án vino la ko t'ito ch'án tí sín tjasin jie la ko tí sín nchekjènkí. <sup>35</sup> A ntá tí xjeen Dios mé tjakoxin sín kaín tí nkehe tjinkaon Dios.

### Ch'ín Jesús mé kjuák'e ch'án ntøe ijnko ch'ín fariseo it'ín Simón

<sup>36</sup> Ijnko ch'ín fariseo mé chronóehé ch'án tí ch'ín Jesús kíxin tsjiji ch'án ntøe ch'án sineko sín ch'án. Ntá sákjui ch'án ntøe tí ch'ín a, a ntá ntiha kjuák'etjaxin ch'án tí tjen mesa. <sup>37</sup> A ntá itjen ijnko tjan nchónhya jie chóna tjan. Itjen tjan tí chjasin ntiha la ntá kónohe tjan kíxin tsíkijji ch'ín Jesús ntøe tí ch'ín fariseo la ko ntaha sineko sín ch'án. Ntá kui tjan ntiha kuikao tjan ijnko xro tjete tsíkaón aceite xraxé náxrjón. <sup>38</sup> Ntá tsjánka tjan kóçhina tjan toté ch'ín Jesús ntá ntakon tjan kjuátanxin toté ch'án la ko kaxíhi tjan kjuínchexámáxin tjan toté ch'án la ko kjóneko kochíto toté ch'án la ko kjuíncheka tjan toté ch'án tí aceite xraxé náxrjón. <sup>39</sup> A ntá tió k'uíkon tí ch'ín fariseo tsík'íyehé tí ch'ín Jesús ntá kjo ch'án asén ch'án kíxin: “Tí chrókóchaxín tí nkexro i ijnko ch'ín chrónka itén Dios ntá chrókónohe ch'án kíxin nkexrí xéhe tí tjan tjetákóxin ch'án kíxin ijnko tjan



jínahya tíha”, ichro ch'án. <sup>40</sup>Ntá ch'ín Jesús ntáche ch'án tí ch'ín fariseo kixin:

—Simón, janhan chonta ijnko nkehe tsonixjaha —ichro ch'án.

Ntá kjuátehe tí ch'ín fariseo ntáchro ch'án kixin:

—Chronka, Maestro —ichro ch'án.

<sup>41</sup>Ntá ntáchro ch'ín Jesús kixin:

—K'uéj yáa chojni ntoa sfkéhe sín chichaon ijnko ch'ín nchekjen chojni chichaon. Ijnko la síká ch'án quinientos denario. A ntá tí íjnko a la síká ch'án cincuenta denario. <sup>42</sup>A ntá kjuachahya sín k'ókjenhen sín tí chichaon tí ch'ín síkéhe sín ntá kuikonóehé ch'án sín ntá k'óxíka ch'án tí cuenta síká yóí sín. A ntá jie chronka jaha kixin nkexro tí yóí sín antsí chrótjuèhe tí nkexro kuikonóehé ch'án —ichro ch'ín Jesús.

<sup>43</sup>Ntá kjuátehe tí ch'ín Simón ntáchro ch'án kixin:

—Janhan ntáxrjan tí nkexro kuikonóehé má —ichro ch'án.

Ntá ntáchro ch'ín Jesús kixin:

—Ntoá tjenkayáxian —ichro ch'án.

<sup>44</sup>Ntá ch'ín Jesús komá ch'án tí tjan a ntá ntáche ch'án tí ch'ín Simón kixin:

—¿Á t'íkuan tí tjan a ní? Janhan na mé k'uixanhan ntoa la ntá jaha la kjuánjonhya nta chrók'ontia totená. Kjánchó jehe tjan tí ntaKon tjan kjuínchek'óntixín tjan totená la ko kaxíhi tjan kjuínchexámáxin tjan. <sup>45</sup>A ntá jaha la kjontekoahyana kochíto. Kjánchó jehe tjan naxa kuítøehya tjan neko kochíto totená. <sup>46</sup>Jaha la kuíkítxinhyá aceite kja. A ntá jehe tjan kuíkíte tjan aceite xraxé náxrjón totená. <sup>47</sup>Mé xíkaha ntáxrjan kixin imá tjuana tjan kixin kaín tí nchónhya jie kjuasin tjan la mé kjuínhin tjan. A ntá ijnko nkexro kjuínhin intsíkoá jie la mé xíkaha intsíkoá tjáqoxín kixin tjuana sín —ichro ch'án.

<sup>48</sup>Ntá nixjehe ch'án tí tjan a ntáchro ch'án kixin:

—Ó kjuínhan tí jie chonta —ichro ch'án.

<sup>49</sup>A ntá kaín tí sín tsíkóchjina sín k'uéjótjaxín sín tí tjen ch'án mé kjuankixin kjo sín kíchó sín ntáchro sín kixin:

—¿Xá nkexro tíhi kixin tjakjuínhin ch'án ijíe chojni?

<sup>50</sup>A ntá ch'ín Jesús ntáche ch'án tí tjan a kixin:

—Ó kuaá jaha kixin kuítekáván tí janhan. A ntá jie kjuaxróxin sátsjia ntoa —ichro ch'án.

### Iso chojni chjin kjuínkítsa tí xra kjuích'e ch'ín Jesús

**8** A ntá chr'éxin ntá ch'ín Jesús k'uáji ch'án itsjé chjasin hyé la ko chjasin ntsínsí kjuako ch'án la ko chrónka ch'án tí tan jína kixin nkexrí tí kjuachaxin t'etøan Dios. A ntá tí teyó sín mé k'uájiko ch'án. <sup>2</sup>Kjaxin chréhe iso chojni chjin tsíkjinchekitohe ch'án jína tsíkakítsje ch'án tí nchakuen tí jínahya k'uéchónta sín la ko tsíkjatsen ch'án tí chin k'uéchónta sín. Ijnko tjan mé it'in María la ko kjaxin tikitexín tjan Magdalena na mé tsík'axrje yato nchakuen tí jínahya k'uéchónta tjan, <sup>3</sup>la ko íjnko tjan it'in tjan Juana ne mé xii mé it'in ch'án Chuza. Jehe ch'án mé ch'ehe ch'án xra tí ch'ín Herodes t'etøan ch'án, la ko íjnko tjan mé it'in tjan Susana, la ko itsjé íso sín k'uéjó sín. A ntá kaín sín kjuanjón sín tí nkehe k'uéchónta sín kjuínkítsa sín tí ch'ín Jesús la ko tí sín k'uájiko ch'án.

### Ch'ín Jesús kjuíncheyóexin ch'án éxí ijnko ch'ín k'uenká nonte

(Mt. 13.1-9; Mr. 4.1-9)

<sup>4</sup>Ntá nchónhya chojni kójnkotsé sín kjuítsjehe sín tí ch'ín Jesús, k'uaxrjexín sín kaín tí chjasin ntilha. A ntá ch'ín Jesús kjuíncheyóexin ch'án ntáchro ch'án kixin:

<sup>5</sup>—Éxí ijnko ch'ín sákjuík'enka noatrigo nontee ch'án. Mé xíkaha sákjuí ch'án ik'ue ch'án tí noatrigo a. Ntá iso noa la k'uanoótjen chrínta ntja ntá nkaxénjin chojni tí noa a la ko kjaxin tí koxroxe k'uínka va. <sup>6</sup> A ntá í so la k'uítji chrík'á xrō ntá k'uayan la xámá kixin kánhyó siín tjo. <sup>7</sup> A ntá í so la kjuít-sínkák'á kach'í ntá k'uánkí kach'í la ntá í xitjahya k'uánkí tí no a kixin tsíkjate tí kach'í. <sup>8</sup> A ntá í so la mé tsík'itji nche jína. A ntá tíó k'uánkí la k'óna jína la mé jnkojnko noatje k'óna ciento neno noa —mé xíkaha ichro ch'án.

Na ntá kjuixin kjuako ch'ín Jesús kaín tíha ntá itsen ntáchro ch'án kixin:

—Tí tjinkáonrá chrókuinhínrá la tinhínrá —ichro ch'án.

### **Ch'ín Jesús chronkaxín nkekuènte kjuíncheyóexin ch'án**

(Mt. 13.10-17; Mr. 4.10-12)

<sup>9</sup>Ntá tí sín k'uájiko ch'án kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án. <sup>10</sup>Ntá ntáchro ch'án kixin:

—Dios mé tsjinkítsa kixin tsonohará tí nkehe noehya í so chojni nkexrí t'e-toan Dios. Kjánchó tí í so sín tjákoḡa sín kjuintayóaxoán kixin ntá k'uúkon sín la kjónté tsjátsoanhya sín la ko kuínhin sín na kjónté naḡa tienxínhya sín.

### **Ch'ín Jesús chronkaxín nkexrí t'axrjexín tí ch'ín k'uenka nonte**

(Mt. 13.18-23; Mr. 4.13-20)

<sup>11</sup>Ntá tsōxrjanka nkexrí t'axrjexín tí nkehe kjuintayóaxoán. Tí noatje mé tí itén Dios. <sup>12</sup> A ntá tí noa k'uanoótjen chrínta ntja la mé tóyóḡe tí sín kuínhin tí tan a. A ntá ó kui ch'ín Tsochren ntá kjuínchek'itjáyán ch'án kaín tí itén Dios kuínhin sín chrókuaáxin sín kixin ntá chrókuitekakonhya sín tí nkehe chrókuaáxin sín. <sup>13</sup> A ntá tí noa kjuít-sínkák'á xrō la éxí yóḡe tí chojni kuín-

hin itén Dios la tjoka kóxrjínhin sín kuinkáchónki sín. Na ntá itsi tí kjuaxróxinhya, a ntá tsítóḡe sín tí itén Dios kuínhin sín kixin naḡa nínkahya chóna nuèe. <sup>14</sup> A ntá tí noa kjuít-sínkák'á kach'í na mé éxí yóḡe ijnko chojni kuínhin tí tan jína kjánchó tjitoxienhya ntje sín kixin tóxakonhen sín tí xrā chóna sín la ko tjinkaon sín tsochóna sín itsjé nkehe la ko kaín tí nkehe tóxrjínhin sín mé t'inkákonhen kixin xíkaha la xitjahya sich'ehe sín xrā Dios. <sup>15</sup> A ntá tí noa k'uínka nonte jína na mé éxí yóḡe tí chojni kuínhin tí itén Dios a ntá kaín asén sín kuítekaon sín la ntá kuítóehya sín tí tan, a ntá xíkaha la jína ch'ehe sín Dios xrā.

### **Ch'ín Jesús mé kjuíncheyóexin éxí ijnko xrohi tjeche**

(Mr. 4.21-25)

<sup>16</sup>Nijnko nkexro chrókjuinçek'ákjen xrohi chrókjuak'emā nkaxenhen chī o chrókjuak'emā chrínkí cama. Náhí. Noi chrókjuak'e xrohi kixin ntá tí sín ts'ixenhen nchia ts'ikonxín sín tí t'inkaséyan. <sup>17</sup>Kohya nkehe chrók'uejómá a ntá chr'éxin chrókónoxínhya; la ko kohya nkehe mó chrókónoehyani chr'éxin kixin kaín nkehe la tsonoxíxin tí xrohi a. <sup>18</sup> A ntá chrókuinhínrá jína kixin tí tjen ijnko nkexro chóna nkehe la mé ts'áyéḡe ch'án má. A ntá tí nkexro chóntahya nkehe la mé ts'axrjehe ch'án kjónté tí nkehe ntsí tónhen ch'án kixin chóna ch'án.

### **Tí iné la ko tí kíchó ch'ín Jesús**

(Mt. 12.46-50; Mr. 3.31-35)

<sup>19</sup> A ntá kjuíji iné la ko kíchó ch'ín Jesús tí tjen ch'án. Ntá xitjahya tsōchjinehe sín ch'án kixin nchónhya chojni siín. <sup>20</sup> A ntá ijnko sín ntiha tsíkjichenka ch'ín Jesús kixin:

—Iná la ko kichuá tjejó sín ntója la tjinkaon sín chrók'uikon sín tí jaha —ichro sín.

<sup>21</sup> Kjánchó kjuátehe ch'án ntáchro ch'án kixin:

—Tí sín tinhin itén Dios la ko titekaon sín na mé t'íkuan tí jehe sín éxí naná la ko kichiná —ichro ch'án.

**Ch'ín Jesús k'uetuēnhen tí xrinto la ko tí ntá kixin ts'ixita**

(Mt. 8.23-27; Mr. 4.35-41)

<sup>22</sup> Ntá ijnko yaon k'uixenhen ch'ín Jesús ijnko ntabarco la kofí tí sín k'uájiko ch'án. Ntá ntáchro ch'án kixin:

—Sátsjini tóhe ntayaon —ichro ch'án.

Ntá sákjuí sín. <sup>23</sup> Ntá nachrohe tje-jót'atòye sín a ntá ch'ín Jesús mé kjuák'ejua ch'án. A ntá xrínahya tjian chjéhe xrinto chrítaón ntá ntá xrankixin sítikia ntá tí ntabarco ntá chrakon sín kixin ts'aniankí ntá tí ntabarco. <sup>24</sup> Ntá kjuínchekjayēhe sín tí ch'ín Jesús, ntáchro sín kixin:

—Maestro, Maestro. Tjejót'aniankíni ntá —ichro sín.

Ntá ch'ín Jesús k'uàya ch'án ntá k'uetuēnhen ch'án tí xrinto la ko tí ntá kixin ts'ixita, a ntá náxrjón k'uixita tí ntá la ko tí xrinto. <sup>25</sup> Ntá ntáche ch'án tí sín k'uájiko ch'án kixin:

—¿Á naxa tinkachónkihyará Dios? —ichro ch'án.

Kjánchó jehe sín mé chrakon sín itjo sín kichó sín kixin:

—¿Xá nkexro tíhi kixin t'etuēnhen ch'án xrinto la ko tí ntá la titekakonhen ch'án?

**Ijnko ch'ín nonte Gadara chóna nchakuen tí jínahya**

(Mt. 8.28-34; Mr. 5.1-20)

<sup>26</sup> Ntá kjuíji sín tí nonte Gadara, na mé tóhe ntayaon ntoí chók'èxin estado Galilea. <sup>27</sup> Ntá k'uínkajinxin ch'ín Jesús tí ntabarco ntá kóchjina ijnko ch'ín chjasin ntiha. Ntá ó má sé chóna ch'án nchakuen tí jínahya. Na ntá ni ké ch'án t'ínkáyahya ch'án, la ko jehya ntōe ch'án

k'uékjak'e ch'án na mé tjen ch'án tí pan-teón. <sup>28</sup> Tió k'uíkon ch'án tí ch'ín Jesús ntá kjuák'exin toch'in ch'án nkayakon tí ch'ín Jesús, ntá k'óyako ch'án ntáchro ch'án kixin:

—¿Nkekuēnte tjiaté tí jeheni, jaha Jesús Xjeen Dios itjen nkaya nkajini? Chronóahani nchekjasótehyani —ichro ch'án.

<sup>29</sup> Xíkaha ntáchro ch'án kixin ch'ín Jesús tsík'etuēnhen tí nchakuen tí jínahya kixin ts'axrxjín tí jehe ch'án. Nchónhya veces tí nchakuen tí jínahya k'uék'etuēnhen tí jehe ch'án; a ntá tí chojni k'uétsé sín ch'án k'uékjinchen-teto sín tja ch'án la ko toté ch'án la mé cadena tsikóntetoxín ch'án kixin tjinkaon sín chrókjuak'e ch'án. Kjánchó k'uékóchrínjin ch'án tí nkehe tsíkóntetoxín ch'án kixin nchakuen tí jínahya tjinkaon sáchrókjuíko ch'án nteje. <sup>30</sup> Ntá ch'ín Jesús kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:

—Legión mé it'inni —ichro ch'án.

Ntáchro ch'án xíkaha kixin nchónhya nchakuen tí jínahya chóna ch'án. <sup>31</sup> A ntá kaín tí nchakuen tí jínahya chronóēhe tí ch'ín Jesús kixin chrók'uetōanhya ch'án kixin chrókjuitsinkayá tí tōyē ninka. <sup>32</sup> A ntá ntiha tí jna síin nchónhya cochíno xrine va. A ntá tí nchakuen tí jínahya chronóēhe tí ch'ín Jesús kixin chrókjuanjon ch'án kjuachaxin chrók'uixenhen tí cochíno a. A ntá kjuanjon ch'án kjuachaxin. <sup>33</sup> A ntá tí nchakuen tí jínahya k'uaxrxjín tí ch'ín a, a ntá k'uixenhen tí cochíno a. A ntá kaín tí cochíno kuinká va sákjuí va nó nkaya tsaka k'uánótjenkí va ntá kjuínhin va ntá.

<sup>34</sup> A ntá tí sín sít'ayakonhen tí cochíno k'uíkon sín kixin xíkaha kónhen ntá chrakon sín kuinká sín sákjuíchronka sín

tí chjasén sín la ko tí rancho. <sup>35</sup> A ntá tí chojni k'uaxrjexín sín chjasín sákjuitsjehe sín nkehe tí tsíkónhen. A ntá kjuíji sín ntiha tí tjen ch'ín Jesús ntá k'uíkon sín kixin ntaha tjen tí ch'ín tsík'axrjexín tí nchakuen tí jínahya. Ntaha tjetjaxín ch'án chrínkí toté tí ch'ín Jesús, ó tsík'inkáya ch'án iké ch'án kixin ó jína tjen ch'án, a ntá chrakon sín tí k'uíkon sín xíkaha. <sup>36</sup> A ntá tí jehe sín tsík'ikon sín kixin xíkaha kónhen la chrónka sín kixin nkexrí kuítóhe jína tí ch'ín k'uéchóntha tí nchakuen tí jínahya. <sup>37</sup> A ntá kaín tí chojni chjasín Gadara kjuankixin chronóehé sín tí ch'ín Jesús kixin sáchrókjuixin ch'án ntiha kixin imá chrakon sín. A ntá tí ch'ín Jesús k'uít'ótjen ch'án tí ntabáro sákjuixin ch'án ntiha. <sup>38</sup> A ntá tí ch'ín tsík'axrjexín tí nchakuen tí jínahya chronóehé ch'án tí ch'ín Jesús kixin á chrókjuanjonha ch'án kjuachaxin sáchrókjuí ch'án koí ch'án. Kjánchó ch'ín Jesús k'uuetuenhen ch'án kixin tsitohe ch'án ntáchró ch'án kixin:

<sup>39</sup> —Titóha satjia ntóa la ko chrónka nkexrí tí kjuachaxin jíé kuènte Dios kuítóaxián jína jaha —ichro ch'án.

A ntá sákjuí tí ch'ín a chrónka ch'án nkuíxín tí chjasén ch'án kixin ijnko kjuaxroan jíé kjuíche ch'ín Jesús kjuínchekitohe ch'án jína.

**Tí xjeen ch'ín Jairo la ko tí tjan kuákóxin iké ch'ín Jesús**

(Mt. 9.18-26; Mr. 5.21-43)

<sup>40</sup> Tió ch'ín Jesús kjan ch'án tí í jnko chrínta ntá ntá nchónhya chojni síin ntiha la chéhe sín kjuíji ch'án ntiha, kixin kaín sín tjejóchónhen sín ch'án. <sup>41</sup> Ntá kui ijnko ch'ín it'in Jairo na mé ijnko ch'ín t'etóan kuènte njnko. A ntá kjuák'exín toch'in ch'án tote tí ch'ín Jesús chronóehé ch'án kixin sáchrókjuí ch'ín Jesús ntóe ch'án <sup>42</sup> kixin chóntha ch'án jnkokoáxon xjeen ch'án chjin

chóntha teyó nánó la ó mero tjet'en tjan. A ntá sákjuí ch'ín Jesús la ntá nchónhya chojni chréhe k'uíxitja kíchó sín.

<sup>43</sup> Ntá síin sín ntiha. Na mé ntiha tjenkákjan ijnko chojni chjin níhi tjan sítji tjan jni na mé chóntha tjan teyó nánó titóehya tjan jína. A ntá kaín nkehe k'uéchóntha tjan kjuenkehe tjan tí sín ch'e xroan la ko nijnko sín kjuachahya sín kjuínchekitohe sín tjan jína. <sup>44</sup> A ntá jehe tjan kóchjina tjan nóton tí ch'ín Jesús na ntá kuákóxin tjan tí iké ch'án, a ntá tuénxín tí jni la í kjuíhya tjan.

<sup>45</sup> Ntá kjuanchankí ch'ín Jesús kixin:

—¿Nkexro tí kuákóxinna? —ichro ch'án.

A ntá kaín sín ntáchró sín kixin ninkexró, ichro sín. A ntá ch'ín Pedro la ko tí sín k'uéjókó ch'án ntáchró sín kixin:

—Maestro, nchónhya chojni síin la ko tótéka sín la ntáhi ntáha, ¿ntá nkekuènte kixin naxa tjanchankiá kixin nkexro tí kuákóxian? —ichro sín.

<sup>46</sup> Kjánchó ntáchró ch'ín Jesús kixin:

—Jnkojín nkexro kuákóxinna kixin kónóna kixin kjuachaxin kuèntaná kuítóexín ijnko chojni jína —ichro ch'án.

<sup>47</sup> A ntá tió k'uíkon tjan kixin ó kónoxín ntá kóchjina tjan chrakon tjan kjuák'exín tjan toch'in tjan chrínkí toté tí ch'ín Jesús. Ntá chrónka tjan nkayakon kaín xín chojni kixin nkekuènte kuákóxin tjan jína xíkaha.

<sup>48</sup> Ntá ntáchró ch'án kixin:

—Jaha, xjeenni, ó kuítóha jína kixin kuítekáván tí janhan. Kjuaxróxin sátjia —ichro ch'án.

<sup>49</sup> Naxa tjejótjo sín ntiha ntá xrínahya ikui ijnko nkexro kjuixín ntóe tí ch'ín t'etóan kuènte njnko, a ntá chénka ch'án tí ch'ín t'etóan kixin:

—Xjaan na mé ó kjuixin k'uén. Áxri í chjeéhya xra tí maestro —ichro ch'án.

<sup>50</sup> A ntá tió kuínhin ch'ín Jesús la kjuátehe ch'án ntáchró ch'án kixin:

—Chrakonhya. Títekáván tí janhan la tsitohe xjaan jína —ichro ch'án. **A** ntá sákjuí sín.

<sup>51</sup> **A** ntá tí kjuújik'ixenhen sín nchia ntá kuítoghya ch'ín Jesús kixin ókjé nkexro chrók'uixenko ch'án nchia. Jehó ch'ín Pedro la ko ch'ín Jacobo la ko ch'ín Juan la ko tí it'é la ko tí iné tí xjachjin chrók'uixenhen sín tí tjen tí xjan a. <sup>52</sup> Kaín tí sín tjejó ntaha tsjánkama sín tí xjan a. Kjánchó jehe ch'án ntáchro ch'án kixin:

—Tsjankahyará. Tí xjan la tsfk'enhya la tjeju xjan —ichro ch'án.

<sup>53</sup> Ntá tjanoá sín ch'án kixin jehe sín la ó nohe sín kixin tsik'en xjan. <sup>54</sup> **A** ntá jehe ch'án itsé ch'án tja xjan ntá it-sen k'uíyehé ch'án tí xjan ntáchro ch'án kixin:

—Tjarisoá, t'áya —ichro ch'án.

<sup>55</sup> Ntá kjan asén tjan ntá tuénxín k'uínkatjen tjan. Ntá k'uetqan ch'ín Jesús kixin tsjanjon sín nkehe sine tjan. <sup>56</sup> Ntá it'é la ko iné xjan la chrakon sín. **A** ntá ch'ín Jesús k'uetuēnhen ch'án sín kixin ninkexró chróchenkahya sín kixin xíkaha kónhen.

### Ch'ín Jesús ichr'án ch'án tí teyó sín

(Mt. 10.5-15; Mr. 6.7-13)

**9** Ntá ch'ín Jesús k'uetqan kixin tsqohjina tí teyó sín k'uájiko ch'án. Ntá chjéhe ch'án sín kjuachaxin tsakitsje sín kaín tí nchakuen tí jínahya chóna chojni la ko sinchekitqhe sín chojni jína. <sup>2</sup> Ntá k'uetqan ch'án kixin sátsjikjako sín nkexrí tí kjuachaxin t'etqan Dios la ko sinchekitqhe sín chojni jína. <sup>3</sup> La ko k'uetqan ch'án kixin:

—Ninkehó nkehe sátsjikohyará ntja sátsjirá, ni tí nta tjáxinrá la náhí, ni bolsa la náhí, ni niqtja, ni chichaon, la ko tsjíkoará jehó tí ka tjejóyará ó. <sup>4</sup> **A** ntá tí tsjasánrá ijnko nchia tsjanjon sín kjuachaxin la ntahó tsitohará la tsjixixín tí xra ntá sátsjixínrá ntiha. <sup>5</sup> **A** ntá tí ts-

jasánrá ijnko chjasin la ntá tsjanjonhya sín kjuachaxin tsjákorá ntá t'axrjéxinrá tí chjasén sín ntiha tsotsénkará tí nche chóna totará tsjákoxinrá xíkaha kixin Dios sinchekjasóte tí jehe sín —ichro ch'án.

<sup>6</sup> Ntá sákjuí sín kaín tí chjasin ntsíntsi sákjuíchronka sín tí tan jína tsaáxin chojni la ko kjuínchekitqhe sín chojni jína kaín chjasin.

### Ik'uén ch'ín Juan Bautista

(Mt. 14.1-12; Mr. 6.14-29)

<sup>7</sup> **A** ntá tí ch'ín Herodes t'etqan kuínhin ch'án kaín tí xra tjech'e ch'ín Jesús la tóxakonhen ch'án kixin iso sín ntáchro sín kixin ch'ín Juan Bautista la ó tsíxechón ch'án, ichro sín. <sup>8</sup> **A** ntá iso sín ntáchro sín kixin ch'ín Elías tsíxechón ch'án mé tí nkexro k'uéchronka itén Dios ósé. **A** ntá í so sín la ntáchro sín kixin jnkójín tí sín k'uéchronka itén Dios ósé la mé ó tsíxechón, ichro sín. <sup>9</sup> Kjánchó ntáchro ch'ín Herodes kixin:

—Janhan mé kuétoan kóchrínjin sín kja ch'ín Juan. ¿Á chrókóchaxín jehe ch'án kixin nchónhya kjuaxroan kuínhan tí tjech'e ch'án? —ichro ch'án. **A** ntá kjaxin jehe ch'án tóxakonhen ch'án sáchrókjuitsjehe ch'án tí ch'ín Jesús.

### Ch'ín Jesús kjuanjon nkehe kjóne in'ó mil chojni

(Mt. 14.13-21; Mr. 6.30-44; Jn. 6.1-14)

<sup>10</sup> **A** ntá tió kjan tí sín k'uájiko ch'ín Jesús ntá chénka sín tí jehe ch'án kaín tí xra kjuích'e sín. Ntá k'uaxrjentako sín ch'án tí kohya ninkexró chjinaxón chjasin Betsaida. <sup>11</sup> Ntá tió k'uúixikónohe chojni kixin ntaha tjen ch'ín Jesús ntá sákjuíchréhe sín ch'án. **A** ntá kjuanjon ch'án kjuachaxin ts'ejó sín. Ntá kjuankixin chrónka ch'án nkexrí tjen tí kjuachaxin t'etqan Dios la ko kjuínchekitqhe ch'án chojni jína.

<sup>12</sup> A ntá ó ntá kóntó ntá tí teyó sín k'uájiko ch'ín Jesús kóchjinehe sín ch'án ntáchro sín kixin:

—Nixjehé tí chojni kixin sátsji sín tí chjasin ntsí la ko tí ichrén nchia chjinaxón sátsjik'ok'éhe sín la ko sátsjik-jeyá sín nkehe sine sín kixin jaha la ó noha kixin nteje tjejóni la kohya nkehe tsochjéheni sín —ichro sín.

<sup>13</sup> Kjánchó ch'ín Jesús ntáche ch'án sín kixin:

—Chjehérá sín nkehe sine sín —ichro ch'án.

Ntá kjuátehe sín ntáchro sín kixin:

—Chóntahyani itsje nkehe; jehó in'ó niotja la ko yaá koche chóntani. ¿Á tjinkávan sátsjik'enani nkehe sine kaín tí chojni síin? —ichro sín.

<sup>14</sup> Kixin síin chjina in'ó mil chojni ntoa. A ntá ch'ín Jesús ntáche ch'án tí sín xriko ch'án kixin:

—Ntácherá sín tsojnkoié sín ts'ixit-jaxin sín jnkoinko cincuenta sín —ichro ch'án.

<sup>15</sup> A ntá xikaha kjuích'e sín k'uetōan sín, a ntá k'uúixitjāxin sín kaín sín. <sup>16</sup> A ntá ch'ín Jesús kuákja ch'án tí n'ó niotja la ko tí yaá koche. Ntá konta ch'án nkajní kjuanchehe ch'án kjuasáyé Dios kixin kjuanjōn tí nkehe sine sín. Ntá kóchrít'ō ch'án tí niotja la ko tí koche la chjéhe ch'án tí sín xriko ch'án. A ntá jehe sín k'óxikāyēhe sín chjéhe sín kaín tí chojni síin. <sup>17</sup> A ntá kaín sín kjōne sín la kókjehe sín. A ntá chr'éxin kjuenājín sín kaín tí nkehe síxehe mé teyó ntaxra kjuínchekaón sín.

### Ch'ín Pedro mé chrónka kixin ch'ín Jesús mé tí Cristo

(Mt. 16.13-19; Mr. 8.27-29)

<sup>18</sup> Ntá ijnko yaon ch'ín Jesús k'uaxrjenta ch'án tjenixjēhe ch'án Dios. Ntá tjejóko ch'án tí sín xriko ch'án ntá kjuanchankíhi ch'án tí jehe sín kixin:

—¿Nkehe ichro tí chojni kixin nkexro tí janhan? —ichro ch'án.

<sup>19</sup> A ntá jehe sín kjuátehe sín ntáchro sín kixin:

—Iso sín ntáchro sín kixin jaha tí Juan Bautista. A ntá í so sín ntáchro sín kixin jaha la tí ch'ín Elías. A ntá í so sín ntáchro sín kixin jaha ijnko nkexro k'uéchrónka itén Dios ósé mé ó tsíxechón —ichro sín.

<sup>20</sup> A ntá kjuanchankíhi ch'ín Jesús tí jehe sín kixin:

—A ntá jahará, ¿nkechorá, nkexro tí janhan? —ichro ch'án.

Ntá ntáchro ch'ín Pedro kixin:

—Jaha tí Cristo ichr'án Dios —ichro ch'án.

### Ch'ín Jesús chrónka kixin its'en ch'án

(Mt. 16.20-28; Mr. 8.30—9.1)

<sup>21</sup> Ntá ch'ín Jesús k'uetuēnhen ch'án sín kixin ninkexró tsochenkahya sín kixin nkexro tí jehe ch'án. <sup>22</sup> Ntá chénka ch'án sín kixin:

—Tí Xjeen Dios K'lóna Chojni t'ichjānxin tsjasóte nchónhya nkehe tsonhen la ko tsitekakuenhya tí sín t'etōan kuènte ninko la ko tí sín t'etōan kuènte tí sín nchāt'á la ko tí sín maestro tjako tí ley. Ts'óyán sín tí jehe ch'án, kjánchó tí níxin yaon na ó tsoxechón ch'án ínaa —ichro ch'án.

<sup>23</sup> Ntá chr'éxin chénka ch'án kaín sín kixin:

—Tí chaxin tsochréhérá tí janhan na t'ichjānxin tsitōhérá kaín tí nkehe tjaké asánrá, ntá tsamárá tí ntacruz kuèntará jnkoinko yaon, a ntá tsochréhérá tí janhan. <sup>24</sup> Tí nkexro tjinkaon jehó sinchekaá asén mé ts'itjāyan. A ntá tí nkexro sinchek'itjāyanxín asén kixin tinkáchónki tí janhan la tsaá. <sup>25</sup> ¿A ntá nkehe tsonhen tí chrókjuacha ijnko chojni chróchónta kaín nkehe síin chjasintajni a ntá kjuachón chrókjuinchek'itjāyan ch'án? <sup>26</sup> A ntá jnkōjín chojni chrókó-

suèhe kíxin tinkáchónki tí janhan la ko tí nkehe tjàkua, a ntá kjaxin tí Xjeen Dios K'óna Chojni mé tsosuèhe chrón-táchro ch'án kíxin chóxin ch'án tí jehe sín tió tsi ch'án éxi ijnko rey tsikao ch'án tí kjuachaxin kuènte It'é ch'án la ko tí sín ángel jína. <sup>27</sup> Tíhi mé ntoá xrjanka kíxin iso chojni tjejó ntihi tjejótinhin sín naxa ts'enhya sín ts'ikon sín kíxin Dios ts'e-toan tí kjuachaxin kuènte ch'án.

### **K'uixitóxin nkexrí tsjehe ch'ín Jesús**

(Mt. 17.1-8; Mr. 9.2-8)

<sup>28</sup> A ntá k'uátsínka ijní yaon tí tsíchronka ch'án tíhi ntá sákjuiko ch'án ch'ín Pedro la ko ch'ín Juan la ko ch'ín Jacobo la chrin sín ijnko jna kíxin tsonixjehe ch'án Dios. <sup>29</sup> Ntá ch'ín Jesús tjenixjehe ch'án Dios ntá k'uixitóxin nkexrí tsjehe ch'án la ko tí iké ch'án la tjóá la ko tjákini tsjehe. <sup>30</sup> Ntá xrínahya k'uikon sín yaá chojni tjejóto sín tí jehe ch'án na mé jehe sín la tí ch'ín Moisés la ko tí ch'ín Elías. <sup>31</sup> Imá t'inkáséyan jnkontatjen tí tjejó sín tjejóto sín tí ch'ín Jesús kíxin nkexrí its'en ch'án la ko nkexrí tsjasótéxin ch'án tí chjasin Jerusalén. <sup>32</sup> A ntá ch'ín Pedro la ko tí sín tjejóko ch'án la imá kuilhi sín kotáchrin; kjónté la k'uéjótsehe sín k'uikon sín tí kjuachaxin kuènte ch'ín Jesús la ko k'uikon sín tí yóí chojni ntoa tjejóko sín ch'án. <sup>33</sup> A ntá tió sátsji tí yóí sín tjejóko ch'ín Jesús ntá ch'ín Pedro ntáche ch'án tí ch'ín Jesús kíxin:

—Maestro, jína kíxin tjejóni ntihi. Chrókjuich'énanani iní nchia la mé ijnko kuéntá la ijnko kuènte ch'ín Moisés la ko ijnko kuènte ch'ín Elías —ichro ch'án.

Kjánchó ch'ín Pedro í noehya ch'án nkehe chróntáchro ch'án kíxin chrakon ch'án. <sup>34</sup> A ntá naxa tjenixja ch'án ikui ijnko tjuí kjuák'etja tí jna tjejó sín. Ntá chrakon sín tjejó sín chrínki tí tjuí. <sup>35</sup> Ntá xrínahya kuínhin sín chríkjan tí tjuí itén nkexro ntáchro kíxin:

—Tíhi mé Xjanna, imá tjuahá ch'án. Tinhínrá tí nkehe tsochronka ch'án la ko tí nkehe tjako ch'án.

<sup>36</sup> A ntá tió kjuixin kuínhin sín tí tan nixja ntá k'uikon sín kíxin jecho ch'ín Jesús tjen. A ntá tí jehe sín la táni sín kíxin xikaha k'uikon sín tí yaon a la ninkexró chenkahya sín tí nkehe k'uikon sín.

### **Ch'ín Jesús kjuínchekitohe jína ijnko chánjan chóna nchakuen tí jínahya**

(Mt. 17.14-21; Mr. 9.14-29)

<sup>37</sup> A ntá tí yaon chr'éxin k'uínkajinxin sín jna la ntá nchónhya chojni sákjuixinhin sín ntia ch'ín Jesús. <sup>38</sup> A ntá ijnko chojni tjenkákjan ch'án tí chojni kjuíji ntá itsen nixja ch'án ntáchro ch'án kíxin:

—Maestro, chronóahani kíxin chrót-sjehé tí xjeenni kíxin jnkokoaxón ó chón-tani a ntá níhi xjan. <sup>39</sup> Chóna xjan nchakuen tí jínahya la ntá nchek'íyato xjan la ko nchek'aniáte xjan nchexrànka xjan kíxin tjejóto xjan la ko ntáloxrjo sítjixin ir'va xjan la ko ncheníhi xjan, na mé chrohya tsjiinhin xjan. <sup>40</sup> A ntá chronóeheni tí sín xríkoa chrókuakít-sje sín tí nchakuen tí jínahya, kjánchó kjuachahya sín —ichro ch'án.

<sup>41</sup> Ntá kjuátehe ch'ín Jesús ntáchro ch'án kíxin:

—Jahará chaxínhya chojni tinkáchónki tí janhan. Jehya jína tjenkayáxinrá. ¿Xá hasta nkesá tjínkáonrá ts'ejóni tsjákohará kixin nunca t'itjáhyará? Xrákoa tí xjan ntihi —ichro ch'án.

<sup>42</sup> A ntá kóchjina tí chánjan. A ntá tí nchakuen tí jínahya kjuáka xjan nonte la ko kjuínchek'aniáte xjan inaá. Kjánchó ch'ín Jesús jjehe k'uetuenhen tí nchakuen tí jínahya kíxin ts'axrjexin xjan. Ntá k'uaxrje tí nchakuen tí jínahya ntá kuítóhe xjan jína. A ntá ch'ín Jesús kjuínchek'áyéhe tí it'é xjan. <sup>43</sup> A ntá

kaín sín chrakon sín kixin k'uikon sín tí kjuachaxin jié kuènte Dios.

**Ch'ín Jesús chrónka ch'án  
inaá kixin its'en ch'án**

(Mt. 17.22-23; Mr. 9.30-32)

Naxa chrakon sín kaín sín kixin tí kjuaxroan kjuich'e ch'ín Jesús la ntá ntáche ch'án tí sín xriko ch'án kixin:

<sup>44</sup>—Tinhínrá jna tíhi la ko t'itjáyanyar. Tsotsé sín tí Xjeen Dios K'óna Chojni la ko tsjikaán sín ch'án tí tjejó tí sín t'etqan —ichro ch'án.

<sup>45</sup>Kjánchó jehe sín kienxínnya sín tí nkehe ntáchro ch'án kixin naxa kjuanjonhya Dios kjuachaxin kixin chrókuienxín sín, ntá chrakon sín na kjuanchankíehya sín ch'án kixin nkexrí t'axrjexín tí nkehe ntáchro ch'án.

**Nkexro tí imá tjeoan ts'etqan**

(Mt. 18.1-5; Mr. 9.33-37)

<sup>46</sup> A ntá tí sín k'uájiko ch'ín Jesús kjuankixin sín itjo sín kichó sín kixin nkexro tí jehe sín antsí má tjeoan ts'etqan. <sup>47</sup> Kjánchó ch'ín Jesús kónohe ch'án nkehe tjenkayáxin asén sín. Ntá kuákja ch'án ijnko chánjan ntá kjuak'e ch'án tí tjeen ch'án <sup>48</sup> ntá ntáche ch'án sín kixin:

—Tí jnkójín nkexro chrók'uáyéhe tí jxan i kixin tinkáchónki sín tí janhan mé xikaha chrók'uáyéhe sín tí janhan. A ntá jnkójín nkexro chrók'uáyéhe tí janhan mé xikaha chrók'uáyéhe tí nkexro chr'ánna k'uinika. A ntá tí jnkójín nkexro antsí chrókjuinchehnkehya la mé antsí chrók'uáyéhe kjuachaxin chrók'uetqan.

**Tí nkexro nínkakuenhya tí jeheni la  
mé tóxrjínhín ch'án tí xra ch'eni**

(Mr. 9.38-40)

<sup>49</sup> Ntá ntáchro ch'ín Juan kixin:

—Maestro, k'uikonni ijnko nkexro kjuachaxin ihniá kuakitsjexín ch'án nchakuen tí jínahya chóna chojni. A ntá chénkani ch'án kixin xikahya chrókjuich'e ch'án kixin xrikohyani ch'án.

<sup>50</sup> Kjánchó ch'ín Jesús ntáchro ch'án kixin:

—Xikahya chróntáche ch'án kixin tí nkexro nínkakuenhya tí jeheni la kjá tóxrjínhín tí xra ch'eni —ichro ch'án.

**Ch'ín Jesús kjuentuéhe ch'án tí ch'ín  
Jacobo la ko tí ch'ín Juan**

<sup>51</sup> A ntá ó kóchjina tí yaon sát-sji ch'ín Jesús nkaya nkajní, na ntá táhó kjuenkayáxin ch'án sátsji ch'án chjasin Jerusalén. <sup>52</sup> Ich'án ch'án chojni kuitónxin ntja a ntá jehe sín sákjuj sín ijnko chjasin ntsí estado Samaria sákjuikjeyá sín nchia ts'ok'èxin sín. <sup>53</sup> Kjánchó tí sín samaritano kjuanjonhya sín kjuachaxin chrók'uejó sín kixin k'uikon sín kixin ó xra ó sátsji ch'án chjasin Jerusalén. <sup>54</sup> A ntá tió k'uikon tí sín k'uájiko ch'án la mé ch'ín Jacobo la ko ch'ín Juan la ntáchro sín kixin:

—Ínchéni, ¿á tjinkávan kixin chrókjuanchiani xrohi chrók'uinkajinxín nkaya nkajní chrókjuinчек'itjayan tí jehe sín éxi kjuanchia tí ch'ín Elías? —ichro sín.

<sup>55</sup> Ntá ch'ín Jesús kuinkátjía ch'án komá ch'án tí jehe sín ntá kjuentuéhe ch'án sín ntáchro ch'án kixin:

—Jahará la kjá noahyará nkexro nchakuen chontará. <sup>56</sup> Kixin tí Xjeen Dios K'óna Chojni kuihya ch'án kixin chrókjuinчек'itjayan ch'án chojni. Náhí. Xra ó ikui ch'án sinchekaá ch'án chojni —ichro ch'án.

Ntá sákjuj sín í jnko chjasin ntsí.



**Tí sín tjinkaon chróchréhe  
sín tí ch'ín Jesús**

(Mt. 8.19-22)

<sup>57</sup> A ntá jehe sín sákjuí sín ntia inaá. Ntá xeta sín ijnko nkexro ntáche ch'án tí ch'ín Jesús kixin:

—Inchéni, tjinkaonni chróchréheni tí jaha nketí tjinkávan sátsjia —ichro ch'án.

<sup>58</sup> Ntá ch'ín Jesús kjuátehe ch'án ntáchro ch'án kixin:

—Tí koxróntá chóna va itjueé va la ko tí koxroxé chóna va káké va. A ntá tí Xjeen Dios K'óna Chojni chónahya nketí ts'ok'èxin ch'án —ichro ch'án.

<sup>59</sup> A ntá ntáche ch'án í jnko nkexro:

—Chrèhé tí janhan —ichro ch'án.

Kjánchó kjuátehe ch'án kixin:

—Inchéni, tìtohéni senó sátsjikjaváni it'èni —ichro ch'án.

<sup>60</sup> Ntá kjuátehe ch'ín Jesús ntáchro ch'án kixin:

—Tìtohé kixin tí chojni tsík'en la jnkokón sín tsík'en tsjavá kichó sín. A ntá jaha la sátsjikjàkua nkexrí tjen tí kjuachaxin t'etōan Dios —ichro ch'án.

<sup>61</sup> Ntá ntáchro í jnko nkexro kixin:

—Inchéni, tjinkaonni tsochréheni tí jaha. Jehí tìtohé tsjinixjeheni tí sín síin ntōeni —ichro ch'án.

<sup>62</sup> Kjánchó ntáchro ch'ín Jesús kixin:

—Tí nkexro kjuankixin tsotsé ch'án arado ntá chrókjan chrókotónhen nóton mé xikaha xitjahya sich'ehe ch'án Dios xra.

**Ch'ín Jesús k'uetuēhen  
setenta chojni sátsjikjako sín**

**10** Ntá chr'èxin Ìnchéni kjueyá ch'án í jnko setenta chojni ntá k'uetuēhen ch'án sín sátsji sín yóyó sín sátsji sín tsitónxin sín ntia tí kaín chjasin na ko nkuíxín tjinkaon ch'án

sáchrókjuí ch'án. <sup>2</sup>Ntá ntáchro ch'án kixin:

—Chaxín ntáxrjan kixin imá tsík'óna, a ntá tí chojni ch'e xra mé tsjéhya. Chrókjuancheherá tí Ìnché nonte kixin chróchr'án ch'án itsjé chojni chrókjuich'e xra. <sup>3</sup>Sátjirá jahará. Xráxinkáonrá kixin tétuanhanrá sátsjirá éxí kolélo ts'ejóyákanrá chríkjan tí kolobo. <sup>4</sup>Tsjikoahyará kabólsa la ko tjoa t'inka chichaon la ko tokate tjíkoahyará la ko tí nixjehérá chojni tí ntia tìtoéhyará kixin chrókjuintaxrjanhanrá sín. <sup>5</sup>A ntá tíó ts'ixenhenrá jnkojín nchia la senó nixjehérá sín ntáchrorá kixin ts'áyéhe sín kjuaxróxin, tsixrorá. <sup>6</sup>A ntá tí tjejó sín kjuaxróxin ntiha la nixjehérá sín la ts'áyéhe sín kjuaxróxin. A ntá tí la náhí, a ntá tí kjuaxróxin chrók'uáyéhe sín na sátsjíkoará inaá. <sup>7</sup>A ntá tí nchia ntiha chrókjuanjōn sín kjuachaxin chrókuitōhará, ntaha mé tsjanjōn sín nkehe chóna sín sinterá la ko its'irá, kixin tí nkexro ch'e xra la síin kjuachaxin tsoxenkehe. Tsjíhyará í jnko nchia la ko í jnko nchia. <sup>8</sup>A ntá tsjasánrá ijnko chjasin tsjanjōn sín kjuachaxin ts'ejorá ntiha ntá interá tí nkehe tsjanjōn sín. <sup>9</sup>Nchekitōhérá chojni níhi jína. Ntá chenkará sín kixin tí kjuachaxin t'etōan Dios la kjinhya tjen tí tjejó sín, ichrorá. <sup>10</sup>A ntá tíó tsjasánrá ijnko chjasin a ntá tsjanjōnhya sín kjuachaxin la ntá t'axrjéxinrá ntōe sín sátjirá tí ntia chjasin ntiha ntá ntáchrorá kixin <sup>11</sup>kjōnté tí nche tsík'ixitja totará tsotsénkará kixin tsjākōxinrá kixin tí kjuaxróxinhya ts'áyéhe sín chr'èxin. Kjánchó chrókōnohe sín kixin tí kjuachaxin t'etōan Dios la kjinhya tjen tí tjejó sín, ichrorá. <sup>12</sup>Ntáxrjan kixin tí yaon tsjejexín chjasintajni la kjuaxróxinhya ts'atsínka tí chjasin a. Antsí náxrjōnhya tí nkehe ts'atsínka

sín, a ntá tí nkehe ts'atsínka chjasin Sodoma† la kénhyó —ichro ch'án.

### Iso chjasin titekakonhya

(Mt. 11.20-24)

<sup>13</sup>Nòará jahará chjasin Corazín. Nòará jahará chjasin Betsaida. Tí chrók'uíxin tí kjuaxroan tí chjasin Tiro la ko chjasin Sidón éxí k'uúkonrá jahará, ntá chrókójehe sín la tjoka chrók'juítóxinhin ntíe sín, tjoka chrók'juinkáya sín ka tié la ko chrók'juikjanjin sín ikja sín nteso, kíxin chrók'juakoxin sín kíxin t'ává sín. <sup>14</sup>A ntá tí yaon tsitoxénin ijíé chojni a ntá jahará antsí tsjasótiará, a ntá tí sín kuènte chjasin Tiro la ko chjasin Sidón la kénhyó tsjasóte sín. <sup>15</sup>A ntá jahará chjasin Capernaum, tjenkayáxinrá kíxin imá nohará a ntá sátsjírá nkaya nkajní, ichrorá. Chaxínhya. Jahará la tsjasinkajínrá sátsjírá tí tsjasótexín tí sín tsík'en.

<sup>16</sup>Tí nkexro tinhin tí nkehe ntáchrórá la mé xíkaha tinhin tí nkehe ntáxrjan la ko tí sín titekakonhya sín tí jahará na mé xíkaha titekakonnahya sín tí janhan. A ntá tí nkexro titekakonnahya sín tí janhan xíkaha titekakonhya sín tí nkexro chr'ánna k'uinka.

### Ó kjan tí sín setenta sátsíkji

<sup>17</sup>A ntá ó kjan tí sín setenta sátsíkji la imá chéhe sín ntáchro sín kíxin:

—Inchéni, kjónté tí nchakuen tí jínahya titekakonhenni tió t'ákjenxinni ihníá —ichro sín.

<sup>18</sup>Ntá ntáchro ch'ín Jesús kíxin:

—Kja chaxín k'uúkuān kíxin ch'ín Tsochren k'uánótjenxin nkajní éxí ijnko kjónkíxín xíkaha kónhen.\* <sup>19</sup>Ó tjahará kjuachaxin kíxin kjónté konche la ko konchia tsinkátjará la ko tsjachahya

ninkehó tí kjuachaxin kuènte tí ch'ín Tsochren kíxin ninkehó tsoanhyará. <sup>20</sup>Kjánchó jehya tíha chrókóchàxinrá kíxin tí nchakuen tí jínahya kuítekakonhanrá. Náhí. Chrókóchàxinrá kíxin ihníárá ó ts'ínixín nkaya nkajní —ichro ch'án.

### Tí Xjeen Dios nixjehe It'é ch'án

(Mt. 11.25-27; 13.16-17)

<sup>21</sup>A ntá tuénxín tí Nchakuen Dios kjuínchehéhe tí ch'ín Jesús ntá ntáchro ch'án kíxin:

—Tjáncháha kjuasáya It'éni Inché nkaya nkajní la ko chjasintajni kíxin kjuánjonhya kjuachaxin chrók'uitja tí sín imá nohe, a ntá kjuánjuan kjuachaxin kíxin ts'itja tí sín noehya. Mé xíkaha It'éni, jaha kóxrjínhan kíxin xíkaha tsonhen.

<sup>22</sup>T'aná mé chjina kaín xín nkehe. Ninkehró noehya nkexro tí Xjeen ch'án. Na mé jehó It'é ch'án mé nohe. La ko ninkehró noehya nkexro tí It'é ch'án. Na mé jehó tí Xjeen ch'án mé nohe ch'án la ko tí sín tsíkjeýá ch'án kíxin tjinkaon ch'án tsonohe sín nkexro It'é ch'án —ichro ch'án.

<sup>23</sup>Ntá komá ch'án tí sín k'uájiko ch'án ntá ntáche ch'án tí jehó sín kíxin:

—Chéhe tí sín k'uúkonxín kon sín éxí k'uúkonrá. <sup>24</sup>Ntáxrjan kíxin nchónhya tí sín k'uéchronka itén Dios ósé la ko nchonhya tí sín rey k'uétjinkaon sín chrók'uíkon sín éxí t'íkonrá, kjánchó k'uúkonhya sín, la ko k'uétjinkaon sín chrókuinhin sín tí nkehe tjejotinhínrá jie, kjánchó í kíenhya sín —ichro ch'án.

### Ch'ín Jesús kjuíncheyóexin éxí ijnko samaritano jína

<sup>25</sup>Ntá ijnko maestro tjako tí ley k'uúinkatjen ch'án nixjehe ch'án tí ch'ín

†10:12 Génesis 19.24–28

\*10:18 Isaías 14.12

Jesús tjinkaon ch'án tsonoexín ch'án á chaxín nohe ch'án tsjatehe ch'án ntá kjuanchankí ch'án kixin:

—Maestro, ¿nkexrí chrókjuich'eni chrók'uitjani tí kjuachón jnkochríxín? —ichro ch'án.

<sup>26</sup> Ntá kjuátehe ch'ín Jesús ntáchro ch'án kixin:

—¿Nkexrí nixja tí ley? ¿Nkexrí tiénxian? —ichro ch'án.

<sup>27</sup> A ntá tí maestro tjako tí ley mé kjuátehe ch'án ntáchro ch'án kixin:

—Chrótjuèheni Ìnchéni Dios kaín asénni la ko kaín fuerza chóntani la ko kaín kjuaxrexinkaon kuènténi la ko chrótjuèheni kichó ni éxí tjuèxínni asénni<sup>f</sup> —ichro ch'án.

<sup>28</sup> Ntá ntáchro ch'ín Jesús kixin:

—Jína kjuátehe. A ntá tí jaha xikaha sích'e la tsochonta kjuachón —ichro ch'án.

<sup>29</sup> Ntá tí maestro tjako tí ley mé tjinkaon chrókjuachaxín ch'án tí ch'ín Jesús ntá kjuanchankí ch'án ínaá kixin:

—¿Xá nkexro tí kichó ni chrótjuèheni, ichrua? —ichro ch'án.

<sup>30</sup> Ntá ch'ín Jesús kjuátehe ch'án ntáchro ch'án kixin:

—Ijnko chojni k'uínkajinxín nó ntia kjuixín chjasin Jerusalén sátsji ch'án chjasin Jericó, ntá kuátóhe ntia iso síchëe kueéhe sín ch'án kaín nkehe sáchrókjuiko ch'án, la ko iké ch'án tsíkakitsjehe sín ch'án, la tsíkjate sín ch'án, la ntá sátsíkji sín tsíkitohe sín ch'án la ó mero tjet'en ch'án. <sup>31</sup> Ntá xrí-nahya k'uátsínka ijnko nchat'á tí ntia ntiha ntá k'uíkon ch'án xikaha ntá ántosén ch'án k'uátsínké ch'án. <sup>32</sup> A ntá kjaxin ijnko ch'ín levita k'uátsínka chjinaxon ntiha. Ntá k'uíkon ch'án xikaha ntá ántosén ch'án k'uátsínké ch'án kjaxin. <sup>33</sup> A ntá ijnko ch'ín kjuixín estado Samaria k'uátsínka tí ntia ntiha ntá

k'uíkon ch'án xikaha tjetsínka tí nkexro ntá kuíkonóhe ch'án. <sup>34</sup> Ntá kóchjinehe ch'án tí nkexro tsíkónihi ntá kjuích'ehe ch'án xroan tí síchrit'ò chjéhe ch'án aceite la ko vino la ko kjuínchentetoxín ch'án ka. Ntá kjuixin ntá kjuínchekiták'á ch'án tí kolóchoe ch'án. Ntá sákjuíko ch'án ijnko nchia t'ók'èxín chojni ntiha la k'uáyakonhen ch'án. <sup>35</sup> Ntá tí kóyaon ntá sátsji tí ch'ín samaritano kuakitsje ch'án iyó tí chichaon la chjéhe ch'án tí ìnéhe tí nchia ntáchro ch'án kixin: “T'ayakonhén tí nkexro i, a ntá antsí má ts'ichjánxinhin ch'án la tió tsokjan ntá tsjénkaha ts'ókjanhan kaín tíha,” ichro ch'án. <sup>36</sup> A ntá tí iní nkexro k'uátsínka ntia la, ¿nkexro tjuéhe tí nkexro kjuínchenihi tí síchëe? —mé kjuanchankí ch'ín Jesús.

<sup>37</sup> A ntá kjuátehe tí maestro tjako tí ley kixin:

—Tí nkexro kuíkonóhe tí jehe ch'án —ichro ch'án.

Ntá ntáchro ch'ín Jesús kixin:

—Sátsjia jaha la xikaha chrókjuich'e —ichro ch'án.

### Ch'ín Jesús sákjuí ch'án ntøe tjan Marta la ko tjan María

<sup>38</sup> Naxa tjetji ch'ín Jesús kjuíji ch'án ijnko chjasin ntsí. A ntá ntiha itjen ijnko tjan it'in Marta, a ntá kjuanjon tjan kjuachaxin kuítóhe ch'án ntøe tjan ntiha. <sup>39</sup> A ntá tjan Marta chóna tjan ijnko kichó tjan it'in María. A ntá jehe tjan kjuák'etjaxín tjan chrínkí toté tí ch'ín Jesús tjetinhin tjan nkehe tí tjechro ch'án. <sup>40</sup> A ntá tjan Marta tóxakonhen tjan kixin nchónhya xra chóna tjan, ntá kóchjinehe tjan tí ch'ín Jesús ntáchro tjan kixin:

—Ìnchéni, ¿á tóxakuanhya kixin tí tjan kichó ni kuítóheni tjan, a ntá jehóni

<sup>f</sup>10:27 Deuteronomio 6.5; Levítico 19.18

tjeh'eni kaín xra? Ntáche tjan kixin tsjinkitsani tjan —ichro tjan.

<sup>41</sup> Kjánchó ch'ín Jesús kjuátehe ch'án ntáchro ch'án kixin:

—Marta, Marta, jaha imá tóxakonhan kixin t'inkákonhen nchónhya xra chonta. <sup>42</sup> Kjánchó jnkokoá nkehe t'ichjánxin. A ntá tjan María kjueyá tjan tí nkehe antsí jína la ko ninkexró tsakitsjehya tjan tíha —ichro ch'án.

### Ch'ín Jesús tjako ch'án nkexrí tsonixjeheni Dios

(Mt. 6.9-15; 7.7-11)

**11** A ntá jnkonaá ch'ín Jesús tjenixjehé ch'án Dios ijnko lugar tjen. Ntá kjuixin la ijnko tí sín xriko ch'án ntáchro kixin:

—Inchéni, tjákohéni nkexrí tsonixjeheni Dios kixin xikaha ch'ín Juan kjuakohe ch'án tí sín k'uájiko ch'án.

<sup>2</sup> Ntá ch'ín Jesús ntáchro ch'án kixin:

—Tió nixjehérá Dios ntáchrorá kixin: It'eni tjen nkaya nkajní, jaha imá tjóá. Chrókui ti kjuachaxin kuéntá.

Chrókjuich'e tí nkehe tóxrjínhan jaha ntilhi chjasintajni éxi tjeh'e nkaya nkajní.

<sup>3</sup> Ijie tsjánjuan tí niotja t'ichjánxinhinni jnkojnko yaon.

<sup>4</sup> T'óxíka tí nkehe jínahya kjuich'eni kixin kjaxin jeheni ts'itjáyenhenni tí nkehe kjuich'eheeni chojni.

Titóéhyaní jeheni xrahya chrókjuasinni jie. Nchekaáni kaín tí nkehe jínahya chrókónhenni

—mé xikaha ichro ch'ín Jesús.

<sup>5</sup> Kjaxin ntáchro ch'án kixin:

—A ntá jnkojínrá chróchontará ijnko chojni choxian, a ntá sáchrókjuia ntóe ch'án k'áxrótjen chróntáche ch'án kixin: “Amigo, nchekjenni iy'á niotja <sup>6</sup> kixin nantá ó kui ijnko chojni chóxinni kuixin ch'án kjín kjuíji ch'án ntóeni ntá chón-tahyani ninkehó tsochjéheni ch'án.” <sup>7</sup> A ntá tí chrókjuátehe tí nkexro chox-

ian tjen nkaxenhen chróntácho kixin: “Chjééhyaní xra. Tí ntója ntóeni méhe t'ikjéhe. A ntá xjeenni tjejót'ok'èkoni xjan. Ntá xitjahya ts'áyani tsotjáhani nkehe”, ichro ch'án. <sup>8</sup> Ntáxrjan kixin kjónté chrók'uayahya ch'án chrótjáhya ch'án nkehe kjónté chóxian ch'án, kjá ts'aya ch'án tsotjáha ch'án kaín nkehe t'ichjánxinhan kixin tjinkakonhya ch'án kixin naxá chrókjuak'é chrók'uèya jaha. <sup>9</sup> Mé xikaha ntáxrjan kixin: Tjanchiará nkehe la Dios tsotjáhará; tjéyará nkehe la ts'itará; t'inkará puerta la tsóxitjehé. <sup>10</sup> A ntá tí nkexro tjanchia nkehe la ts'áyéhe tí nkehe; la ko tí nkexro tjejá nkehe la ts'itja; la ko tí nkexro t'ínka puerta la tsóxitjehé.

<sup>11</sup> 'Zá jnkojínrá chontará xjaanrá chrókjuanchahará xjan niotja la zá chrókjuánjonrá ijnko xro? O chrókjuanchahará xjan koche la zá chróchjehérá ijnko konche? <sup>12</sup> O chrókjuanchahará xjan koja la zá chrókjuánjonrá ijnko konchía? <sup>13</sup> A ntá jahará kjónté jínahyará la ó nohará nkehe jína tsochjehérá xjaanrá, la mé antsí chrókónohará kixin It'eni tjen nkaya nkajní tsotjáhará Nchakuen ch'án tí jnkojínrá chrókjuanchehérá ch'án —ichro ch'ín Jesús.

### Tjanchia sín jie kixin ch'ín Jesús chóna kjuachaxin tí Jínahya

(Mt. 12.22-30; Mr. 3.19-27)

<sup>14</sup> Ntá ch'ín Jesús kuakitsje ch'án ijnko nchakuen tí jínahya tsíkjinchenósín ijnko chojni. A ntá tió tsík'axrje tí nchakuen tí jínahya a ntá tí ch'ín xitjahya nixja la jína nixja ch'án. Ntá kaín chojni chrakon sín kixin xikaha tsíkjjich'e ch'án. <sup>15</sup> A ntá jnkojín tí jehe sín ntáchro sín kixin:

—Tí ch'ín a mé takitsje ch'án nchakuen tí jínahya kixin chóna ch'án kjuachaxién tí ch'ín Beelzebú mé tí ch'ín Tsochren, na mé jehe ch'án mé

t'etuenhen kaín tí nchakuen tí jínahya —ichro sín.

<sup>16</sup> A ntá iso sín tjinkaon sín chrókjuachaxín sín tí ch'ín Jesús ntá kjuanchehe sín ch'án ijnko kjuaxroan náxrjón kuènte nkaya nkajní. <sup>17</sup> Kjánchó jehe ch'án ó nohe ch'án nkehe tjenkayáxin sín la ntáchro ch'án kixin:

—Jnkojín gobierno jnkokónhya tjenkayáxin sín ntá tjanjonko kichó sín na mé ts'itjáyán tí kjuachaxín ts'etoanxín sín, la ko tí sín jnkokoá nchia jnkokónhya tjenkayáxin sín xitjahya ts'ejóko kichó sín jnkokoá.

<sup>18</sup> A ntá kjaxin tí ch'ín Tsochren chrókjuánjonko kichó ch'án, ¿la nkexrí chróchonta ch'án kjuachaxin naxa chrók'uetqan ch'án tí chrók'uaxrje tí jínahya? A ntá jahará ntáchrórá kixin janhan takítsjé nchakuen tí jínahya kixin tí kjuachaxién ch'ín Tsochren chonta janhan, ichrorá. <sup>19</sup> A ntá tí xikaha la, ¿ntá nkexro chjéhe kjuachaxin tí sín chréhe tí jahará kixin tsjacha sín tsakitsje sín nchakuen tí jínahya? Jehe sín mé tjakoxín sín kixin jahará ntoáhya tjenkayáxinrá.

<sup>20</sup> A ntá tí kjuachaxién Dios mé takítsjéxian tí nchakuen tí jínahya na mé chrókónoaxínrá kixin tí kjuachaxién Dios t'etoan ch'án mé ó kui tí tjejórá.

<sup>21</sup> A ntá ijnko chojni jiehe yamá chica t'ayakonhen ch'án ntoe ch'án kixin tí nkehe chóna ch'án ts'itjáyanyha. <sup>22</sup> A ntá itsi ijnko nkexro antsí má tsehe, a ntá tsjanjonko ch'án tí inché nchia, a ntá tsjacha tsakitsjehe tí inché nchia kaín tí chica yamá ch'án kixin imá jieexín ch'án. A ntá tí ch'ín antsí tsehe mé tsakja ch'án kaín nkehe siín ntiha. <sup>23</sup> Tí nkexro titekakonhya tí janhan mé nínkakonna ch'án. A ntá tí nkexro tjinkitsahya tí janhan mé t'inkákonhen tí xra t'a —ichro ch'án.

## Ijnko tí nchakuen tí jínahya mé tsokjan ínaá

(Mt. 12.43-45)

<sup>24</sup> A ntá ijnko nchakuen tí jínahya tsík'axrjéxín ijnko chojni na mé ixri tí nonte xámá xritjeyá nketí náxrjón ts'ok'éhe. A ntá tí k'uitjahya ntá tjenkayáxin kixin: “Áxri tsokjan ntqna k'uaxrjéxian.” <sup>25</sup> A ntá tíó kjan la éxí ijnko chojni tsík'ánjón ntoe la náxrjón tsjehe tí nkaxenhen nchia. A ntá k'uifkon tí jínahya xikaha tjen nchia <sup>26</sup> a ntá sákjuikakjín yato nchakuen tí jínahya antsí má jínahya. A ntá antsí má jínahya kónhen tí ch'ín a, a ntá tí senó la kénhyó. Mé xikaha tsonhen ijnko chojni kénhya asén tinkáchónki Dios —ichro ch'án.

## Tí kjuachéhe chaxín

<sup>27</sup> Ntá ch'ín Jesús tjenixja ch'án chrónka ch'án kaín tíha ntá ijnko chojni chjin tjenkákjan tí jehe sín a itsen nixja tjan ntáchro tjan kixin:

—Chéhe tí nkexro k'uaxrjenixín tí jaha kjuíntak'ánkiá —ichro tjan.

<sup>28</sup> Ntá jehe ch'án kjuátehe ch'án ntáchro ch'án kixin:

—Antsí chéhe tí nkexro tinhin tí itén Dios la ko titekaon sín —ichro ch'án.

## Tí sín jínahya mé tjanchia sín ijnko kjuaxroan náxrjón

(Mt. 12.38-42; Mr. 8.12)

<sup>29</sup> Ntá nchónhya chojni sítójnkoatsé sín tí tjen ch'ín Jesús ntá jehe ch'án kjuankixin nixja ch'án ntáchro ch'án kixin:

—A ntá tí chojni siín jie la jí-nahya sín, a ntá tjanchia sín kixin chrókjuásian ijnko kjuaxroan náxrjón. Kjánchó tsjákoqxínhya í jnko kjuaxroan la jehó tí nkehe tsíkónhen ch'ín Jonás.

<sup>30</sup> Ntá éxí yóhe kónhen ch'ín Jonás kó-noexín tí sín chjasin Nínive mé xikaha tsonhen tí Xjeen Dios K'óna Chojni la

ts'ikon tí chojni síin jie. <sup>31</sup> A ntá tí yaon tsitoexín ijíe chojni tjejó jie la mé tí tjan reina k'uetoan kjuixín nó Sur mé ts'inkatjen tjan tsjanchia tjan jie kixin tí sín tjejó jie. Kixin jehe tjan imá kjín kjuixín tjan tsinhin tjan nkexrí imá k'uénohe ch'ín Salomón.<sup>§</sup> A ntá jie itjèn janhan antsí chonta kjuachaxin, a ntá ch'ín Salomón la kénhyó. <sup>32</sup> La ko tí sin chjasin Nínive kjaxin ts'inkatjen sín tió tsitoexín ijíe chojni la tsjanchia sín jie kixin tí sín tjejó jie la ko tsontáchro sín kixin chrókjuasóte tí chojni tjejó jie kixin tió kuínhin tí sín Nínive chrónka ch'ín Jonás itén Dios la kujitóxinhin sín ntje sín. A ntá jie itjèn janhan antsí má chonta kjuachaxin, a ntá ch'ín Jonás la kénhyó.

**Xrohi t'inkaséyanxín  
cuerpo kuènte chojni**

(Mt. 5.15; 6.22-23)

<sup>33</sup> Nijnko chojni chrokjuinçek'ákjen ijnko xrohi chrókjuak'ema ch'án la ko chrókjuak'ehya ch'án chrínki ijnko ntacajón. Náhí. Noi chrókjuak'e xrohi chrókjuak'enkáya candelero kixin ts'ikonxín chojni tí t'inkaséyan.\*\*  
<sup>34</sup> Tí ikonrá mé éxí yóhe ijnko xrohi t'inkaséyanxín tí cuerpo kuèntará. A ntá tí chontará ikonrá jína la ntá kuenté cuerpo kuèntará chóna xrohi. A ntá tí chontará ikonrá jínahya la ntá kuenté cuerpo kuèntará la sítié tjen. <sup>35</sup> Chrókóxakonhanrá kixin chrók'uayakonhénra tí xrohi chontará kixin chrók'uankahya kixin chrók'uixitiéhya tí tjejorá. <sup>36</sup> A ntá tí kuenté tí cuerpo kuèntará chróchóna xrohi la ko nit'ó chrók'uixitiéhya la ntá kuenté la chrók'uikonrá jína la éxí ijnko lámpara kuenté ch'e xra jína.

**Ch'ín Jesús chrónka kixin ntoáhya  
tjako tí sín fariseo la ko tí sín tjako ley**

(Mt. 23.1-36; Mr.  
12.38-40; Lc. 20.45-47)

<sup>37</sup> A ntá tió kjuixin nixja ch'ín Jesús ntá ijnko ch'ín fariseo chrónóehé ch'án tí ch'ín Jesús kixin sátsjiko ch'án ntóe ch'án sineko ch'án. Ntá tió kjuíji sín ntiha la k'uixenhen sín nchia ntá kjuák'etjaxín ch'ín Jesús chjino tjen tí mesa a. <sup>38</sup> A ntá tí ch'ín fariseo chrakon ch'án k'uíkon ch'án kixin ch'ín Jesús k'óntihya ch'án tja ch'án senó tí sine ch'án éxí tinkáchónki tí jehe sín. <sup>39</sup> Kjánchó ìnchéni ntáchro ch'án kixin:

—Jahará fariseorá nchetjóará tí ntója tí vaso la ko tí plato. A ntá nkaxenhen la tsíkaón kjuachée la ko kjuachjinoxín-hin. <sup>40</sup> Jahará lontjirá. ¿A noahyará kixin tí nkexro kjuích'éna tí ntója la koí tí nkaxenhen kjuích'éna ch'án? <sup>41</sup> Tí chrókjuinçekitonhénra chojni nòa kaín asánra tí nkehe chontará la ntá chrókóxakuanhyará tí chrók'ónti chojni o náhi.

<sup>42</sup> Nòará jahará fariseorá. Jahará chjehérá Dios ijnko ite parte kaín kaxroan tsjiko tí nkehe sineni. A ntá tahyará kuentá tí nkehe ntoá la ko nkexrí chrótjuèhéra Dios la ko nkexrí chrótjuèhéra kíchuará. Jína chróchjehérá Dios nkehe la ko chrók'uitjáyanhyará tí chrókjuínkítasar kíchuará.

<sup>43</sup> Nòará jahará fariseorá. Tjinkáonrá ts'ejokjenrá tí silla náxrjón nkaxenhen njnko la ko tjinkáonrá kixin jnkójina tsonixjahará sín tió tsoxétará sín ntasin.

<sup>44</sup> Nòará jahará maestro tjàkorá tí ley la ko jahará fariseorá. Ntoáhya tjenkáyaxinrá ch'iará. Jahará éxí yóhe tòye tsíxravá chojni tsík'en t'ikonhya

§11:31 1 Reyes 10.1–10

\*\*11:33 Lucas 8.16

chojni la t'atsínka sín nátaón la noehya sín kixin tsíxravá chojni ntiha.

<sup>45</sup> A ntá kjuátehe ijnko tí maestro tjako tí ley ntáchro ch'án kixin:

—Maestro, xíkaha ntáchrua la, ¿á kjaxinhya jeheni kaín ni t'ántaxínhínni ní? —ichro sín.

<sup>46</sup> A ntá ntáchro ch'ín Jesús kixin:

—Kjaxin nõará tí jahará tjàkorá tí ley. Tétuenhénrá chojni tsamá sín ijnko nkehe imá ye chrókjuachahya chojni chrókuamá. A ntá jahará nijnko dedo tjará chrókjuínkĩsará tí nkehe imá ye yámá sín.

<sup>47</sup> Nõará tí jahará. Ch'énará tjat'oe tí sín k'uéchronka itén Dios ósé tsík'óyán tí sín k'uaxrjeníxínrá. <sup>48</sup> Xíkaha jahará tjákoxinrá kixin ó nchoxon tí nkehe kjuích'e tí sín k'uaxrjeníxínrá ósé kixin jehe sín k'óyán sín tí nkexro k'uéchronka itén Dios ósé. A ntá jahará ch'énará tjat'oe tí tsíxravá sín.

<sup>49</sup> Mé xíkaha Dios chónka kjuaxrexinkaon imá jína ntá ntáchro ch'án kixin tsochr'án ch'án chojni tsochronka itén ch'án la ko tsochr'án ch'án chojni tsjikjako itén ch'án. A ntá chojni ts'óyán jnkójín tí jehe sín la ko tsochónkíhi tí í so sín, ichro ch'án. <sup>50</sup> A ntá Dios mé tsjanchia jie tí chojni síín jie kixin k'uúftji ijnié kaín tí sín k'uéchronka itén ch'án ósé desde tí xrankíxín k'óna chjasintajni <sup>51</sup> la mé xrankíxín k'uúftji ijnié ch'ín Abel la mé kjuixíxín k'óyán sín ch'ín Zacarías k'óyánxín sín ch'án jnkosiné tí tjen tí altar la ko tí njnko. Ntá Dios sinchekjasóte ch'án tí sín síín jie kixin xíkaha ik'uén kaín tí sín a.

<sup>52</sup> Nõará jahará maestro tjàkorá tí ley. Jahará tjinkákonhyará kixin í so chojni tsonohe sín tí nkehe chaxín la ni jahará tjinkákonhyará sinchexiteyará la ko titoéhyará kixin í so chojni chrókjuinchexiteyá sín —ichro ch'án.

<sup>53</sup> A ntá kjuixin nixja ch'ín Jesús kaín tíha ntá tí sín maestro tjako tí ley la ko tí sín fariseo imá kónínkakonhen sín ch'án ntá kjuankíxín sín kjuanchankíhi sín ch'án nchónhya nkehe <sup>54</sup> chrókjuachaxín sín ch'án kixin ách'e ntoáhya chrókjuatehe ch'án ntá chrókjuanchia sín jie tí jehe ch'án.

### Ch'ín Jesús chrónka kixin ntoáhya ch'e tí sín fariseo

**12** A ntá nchónhya mil chojni kójnkotsé sín ntá tinkák'íntate kichó sín. Ntá ch'ín Jesús saoxín kjuankíxín chénka ch'án tí sín k'uájiko ch'án ntáchro ch'án kixin:

—Chrókuítekákonhyará tí nkehe ntoáhya tjenkayáxin tí sín fariseo ch'ia sín, na mé éxí yóhe tí xroan nchek'ánkí niotja tí nkehe tjako sín. <sup>2</sup> Kohya nkehe mó jie chrókónoxinhya chr'éxin la ko kohya nkehe tjemá jie chrókónoahya chojni chr'éxin. <sup>3</sup> A ntá kaín nkehe ntáchrorá tí sítié la chr'éxin tsinhin chojni tí nchakotjin; la ko kaín nkehe mó ntáchrorá k'uikjéhérá nchia la chr'éxin ts'èya sín chrítaón nchia tsinhin kaín xín chojni.

### Nkexro tí chróchrakonhenni

(Mt. 10.26-31)

<sup>4</sup> Jahará chojni chóxin kichó ni mé tjonkará kixin chróchrakuenhyará tí chojni t'óyán tí cuerpo, a ntá chr'éxin la kohya nkehe tsjacha sín chrókjuich'e sín. <sup>5</sup> Kjánchó tjonkará kixin nkexro chróchrakonhénrá. Chróchrakonhénrá Dios mé tí nkexro tsakitsje kjuachón ntá chónka kjuachaxín tsochr'án chojni tí síín xrohi tsjasótéxín sín. Tí nkexro a mé chróchrakonhénrá ch'án má.

<sup>6</sup> ¿Á chrókóxixinhya in'ó koxroxe yaá chichaon ntsíntí? Kjánchó Dios la ts'itjáyenhya ch'án nijnko tí jehe va. <sup>7</sup> Kjonté tí kaxihí chónka ikjára la nohe ch'án nkekjaín ka chontará. Méxra

chrakonhyará tí jahará kixin antsí má tjeté sínkí tí jahará. **A** ntá kjónté nchónhya koxroxe la kánhyó sínkí tíha.

**Chróchrónkani kixin tinkáchónkini  
Inchéni Jesucristo nkayakon chojni**

(Mt. 10.32-33; 12.32; 10.19-20)

<sup>8</sup>Ntáxrjan kaín tíhi kixin tí nkexro tsochrónka kixin tinkáchónkina sín nkayakon chojni la kjaxin tí Xjeen Dios K'óna Chojni tsochrónka kixin chóxin ch'án tí jehe sín nkayakon tí sín ángel kuènte Dios. <sup>9</sup>**A** ntá tí sín sinchemá sín kixin chónhyana sín nkayakon chojni la ntá kjaxian janhan sintamá kixin chonhya tí jehe sín nkayakon tí sín ángel kuènte Dios.

<sup>10</sup>**A** ntá jnkojín nkexro ts'ántaxínhìn sín tí Xjeen Dios K'óna Chojni naxá jína ts'itjáyan tí jie k'uántaxínhìn sín. **A** ntá tí nkexro ts'ántaxínhìn tí Nchakuen Dios la xitjahya tsjìin tí jie tí xikaha tsixro sín.

<sup>11</sup>Tiò tsjikoará sín nkaxenhen ninko Israel la ko tí tjejó tí sín t'etōan la ko tí tjejó tí síxreé la tóxakuanhyará nkehe tsjateherá la ko tóxakuanhyará nkehe tsixrorá <sup>12</sup>kixin tió tsonixjará la tí Nchakuen Dios sinchexraxinkaonrá nkehe tsixrorá —ichro ch'án.

**Tí kjuaxikaon tsochónta  
chojni itsjé nkehe**

<sup>13</sup>Ijnko nkexro tjenkákjan tí sin tsíkójnkotsé ntáche ch'án tí ch'ín Jesús kixin:

—Maestro, ntáche tí kichó ni a kixin tsjanjon ch'án tí nkehe tónhenni tocar tsíkitohe it'éni tsakjani —ichro ch'án.

<sup>14</sup>Ntá kjuátehe ch'ín Jesús ntáchro ch'án kixin:

—Lontia jaha. ¿Nkekuènte chrókjuich'énará juez tí janhan chrók'oxikayaha tí nkehe chrókuakjará jahará? —ichro ch'án.

<sup>15</sup>Kjaxin ntáchro ch'án kixin:

—Tóxakonhanrá tí chróchontará it-sjé nkehe. Jehya tí nchónhya nkehe chróchontará ntá náxrjón chrók'uejorá —ichro ch'án.

<sup>16</sup>Ntá kjuíncheyóexin ch'án ntáchro ch'án kixin:

—Kjuák'e ijnko chojni rico, **a** ntá tí nontee ch'án na mé imá k'óna. <sup>17</sup>**A** ntá tí ch'ín rico kjuenkayáxin ch'án ntáchro ch'án kixin: “¿Nkexrí chrókjuít'a jie kixin chontahya nketí ts'ínkachjina tí noa k'ónana?” ichro ch'án. <sup>18</sup>Ntá kjuenkayáxin ch'án ntáchro ch'án kixin: “Ó nòna nkehe sit'a jie. Ts'oxíka tí t'ínkachjinayá noa chonta ntá sit'ána ijnko antsí jie ts'ínkachjinayá kaín nkehe k'ónana jie chonta. <sup>19</sup>Ntá tsontátjan asenná kixin: **Asénni**, nchónhya nkehe chonta jaha tsíchjina tsjacha nchónhya nánó. Ntá jie t'ok'áha la inte la its'ia la tócháha,” ichro ch'án. <sup>20</sup>Kjánchó ntáche Dios tí jehe ch'án kixin: “Lontia xikaha ichrua la, kixin ijie tie itsi nkexro tsjanchia asán. **A** ntá tí nkehe kjuásichjina la, ¿xá nkexro kuènte tíha?” ichro ch'án. <sup>21</sup>Mé xikaha tsonhen tí nkexro chóna nchónhya nkehe chjasintajni ntihi, **a** ntá naxá kjueyáhya ch'án nkehe kuènte nkaya nkajní —mé ichro ch'ín Jesús.

**Dios mé t'ayakonhen tí xjeen ch'án**

(Mt. 6.25-34)

<sup>22</sup>Ntá chr'éxin ntáche ch'ín Jesús tí sín k'uájiko ch'án kixin:

—Tjonkará kixin chrókóxakuanhyará tí nkehe chrókjónterá la ko tí ka chrók'uítsará. <sup>23</sup>Antsí sínkí tí kjuachón, **a** ntá tí nkehe chrókjónterá la kánhyó sínkí. La ko antsí sínkí tí ka chrók'uítsará. <sup>24</sup>Xráxinkáonrá nkexrí siín tí kon-tálo. T'enkahya va la ko tjáhya va la ko chónahya va nketí ts'ínkachjinayá va tí noa. Kjánchó Dios la tjanjon nkehe sine va. **A** ntá jahará la antsí tjetōan, **a**



ntá tí ko xritjaka la kénhyó. <sup>25</sup> ¿Á tjejó jnkojínrá tjenkayáxinrá kixin tí chrókóx-akonhanrá má ntá naxá chrók'uankírá it'ó metro ntetoxinrá ínaá? <sup>26</sup> A ntá xit-jahya chrókjuich'erá tíha kjónté ijnko nkehe ntsí, ¿a ntá nkehe tsonhen tóx-akonhanrá í so nkehe síin?

<sup>27</sup> Xráxinkáonrá nkexrí sít'ánkí tí catsjo lirio ch'ehya xra la ko tjonhya. Ntá kjónté ntáxrjan kixin tí ch'ín rey Salomón kaín ka náxrjón k'uék'inkáya ch'án naxá kjuíncheyóehya ch'án kixin antsí náxrjón tí tsjo a. <sup>28</sup> A ntá xikaha Dios mé nchek'itsa ch'án kaín kayoa kjónté ijie síchón la ntóye tsoche, la mé xikaha tsjanjon ch'án tí nkehe chrok'uítsará jahará. ¿Ntá nkekuènte kixin naxá titekákonhyará ch'án? <sup>29</sup> ¿Ntá nkekuènte ixrírá tóxakonhanrá xrtjéyará nkehe sinterá la ko nkehe its'irá? <sup>30</sup> A ntá tí chojni chjasintajni xritjeyá sín kaín tí nkehe a. Kjánchó It'ará ó nohe ch'án kixin t'ichjánxinhanrá kaín tí nkehe a. <sup>31</sup> Senó chrókjuéyará tí kjuachaxin kuènte Dios, a ntá jehe ch'án mé tsjanjon ch'án kaín nkehe t'ichjánxinhanrá.

### Tí nkehe tjete síin nkaya nkajní

(Mt. 6.19-21)

<sup>32</sup> Chrakonhyará jahará kolélo kuèntana. Kjónté tsjéhyará la It'ará tóxrjín-hin ch'án tsotjáhará ch'án tí kjuachaxin kuènte ch'án. <sup>33</sup> Nchekjírá kaín nkehe chontará la ntá chjeherá tí chichaon tí sín chóntahya. A ntá xikaha sích'erá la tí tjoa t'inka chíchakoanrá tsontaxinhya kixin tí nkehe tjete síin nkaya nkajní tsje-jehya la ko ntaha kohya xíchee la ko ts'ínhya kué la ko ts'itjáyanhya. <sup>34</sup> A ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

### T'ichjánxin listo chrók'uejóchónhenni

<sup>35</sup> T'ichjánxin listo ts'ejochonhénra la ko tsjak'ekoará xrohi tjeche. <sup>36</sup> Listo chrók'uejorá éxí chojni ch'e xra tjejóchónhen sín tsokjanxin tí lámoe sín tí tsíkótehe chojni kixin tíó tsi ch'án la ts'èya ch'án, la ntá tsakitjehe sín tí puerta tjoka. <sup>37</sup> Náxrjón tí nkexro ch'e xra tíó chrókjan tí lámoe sín chrók'uikon ch'án kixin naxá tjejótsjehe sín. Ntá chaxín ntáxrjan kixin tí ch'ín lamo ts'etóan ch'án kixin ts'ejótjaxin sín tí tjen mesa ntiha ntá tsjanjon ch'án nkehe sine sín. <sup>38</sup> Kjónté chrókui ch'án k'áxrót-jen o chrókui ch'án nantóye mé xikaha chrók'uikon ch'án kixin tjejótsjehe sín la náxrjón tí sín ch'ehe ch'án xra. <sup>39</sup> Chrókónohará tíhi kixin tí chrókónohe tí ìnché nchia nke hora chrókui tí xíchee ntá chrókjuak'etsjehe ch'án chrókuítóehya ch'án chrók'uixenhen xíchee tí ntóe ch'án chrókueé. <sup>40</sup> Ntá jahará kjaxinrá xikaha chrók'uejotsjehérá kixin titàya tsi tí Xjeen Dios K'óna Chojni.

### Tí nkexro jína ch'e xra la ko tí ch'ín ch'ehya xra jína

(Mt. 24.45-51)

<sup>41</sup> A ntá ch'ín Pedro kjuanchankí ch'án kixin:

—Ìnchéni, ¿á jehóni kaín ni kjuíncheyóéxian nkehe ntáchrua o kaín chojni? —ichro ch'án.

<sup>42</sup> Ntá ntáchro Ìnchéni kixin:

—¿Nkexro tí t'etóan tí xra jína, a ntá tí lámoe ts'etuenhen kixin ts'ayakonhen ch'án tí chojni síin tí nchia ntiha kixin tsjanjon ch'án nkehe sine sín xintii tí hora a? <sup>43</sup> Náxrjón tjen tí nkexro a tíó tsi tí lámoe ts'íkon ch'án kixin naxá tjech'e tí xra. <sup>44</sup> Tíhi mé chaxín tsontáxrjan kixin tí ch'ín lamo tsochjéhe ch'án kaín xra chóna ch'án ts'etóan tí ch'ín a. <sup>45</sup> A ntá tí ch'ín t'etóan sítónhen xra tsjenkayáxin

kíxin tjokahya tsokjan tí lámøe ch'án, a ntá tsjankíxin ch'án tsonínkakonhen ch'án tsjanjonko ch'án tí í so chojni ch'é xra, tí chojni ntoa la ko tí chojni chjin, a ntá jehe ch'án sine ch'án la its'i ch'án la tsokoaon ch'án. <sup>46</sup> A ntá tí lamo tsokjan tí yaon tjenkayáxinhya tí ch'ín ch'e xra, a mé ijnko hora noehya ch'án. A ntá imá sinchekjasóte ch'án tí ch'ín kuítóhehe xra la ntá tsjasóteko ch'án tí sín titekakonhya.

<sup>47</sup> A ntá tí nkexro nohe ch'án nkehe tí xra tjinkaon tí lámøe ch'án la tókakuenhya ch'án la titekakonhya ch'án la mé tí ch'ín a imá tsjasóte ch'án ts'ekon ch'án. <sup>48</sup> A ntá tí nkexro noehya nkehe tí xra tjinkaon tí lámøe ch'án ntá ch'e ch'án nkehe chrókjuasótexín ch'án la kjónté kánhyó tsjasóte ch'án ts'ekon ch'án. A ntá tí nkexro k'uáyéhe nchónhya nkehe la antsí tsjé xra ts'áyéhe ch'án sich'e ch'án; la ko antsí tsjé xra tsoxranchehe tí nkexro k'uáyéhe itsjé nkehe.

### Jnkokoáhya tsjenkayáxin chojni kíxin ó kui Ínchéni Jesús

(Mt. 10.34-36)

<sup>49</sup> Janhan k'uinka kíxin sjntak'ákjen xrohi chjasintajni. Ách'e ntáxrjan kíxin ó tjechr'ákjen tí xrohi a ntá naxa náhi. <sup>50</sup> T'ichjánxin nchónhya tsona tsjasótena. Tóxakonna tsoxiteyájjia kaín tíha. <sup>51</sup> ¿Á tjenkayáxinrá kíxin k'uinkakian kjuaxróxin tí chjasintajni ní? Méxra ntáxrjan náhi. Jnkokoáhya tsjenkayáxin chojni xíkaha. <sup>52</sup> Kíxin ijje xrankíxixín in'ó chojni naxa kjéhya jnkokoáhya tsjenkayáxin sín. Tí iní tsonínkakonhen tí yaá. Tí yaá tsonínkakonhen tí iní. <sup>53</sup> A ntá tí it'é tsonínkakonhen tí xjeen ntoa, la ko tí xjeen ntoa tsonínkakonhen tí it'é. A ntá tí iné tsonínkakonhen tí xjeen chjin, la ko tí xjeen chjin tsonínkakonhen tí iné. Tí ich'ee tsonínkakonhen tí tíkíntee la ko tí tíkíntee tsonínkakonhen tí ich'ee tjan.

### Tí nkehe chronkaxín nkehe tsonhen

(Mt. 16.1-4; Mr. 8.11-13)

<sup>54</sup> Ch'ín Jesús kjaxin ntáche ch'án tí chojni síin kíxin:

—A ntá ts'ikonrá ts'aya tjuí tí tjiatóxin yaon, a ntá ntáchrórá kíxin ts'aniá chrin, a ntá xíkaha chaxín tsonhen ts'aniá chrin. <sup>55</sup> A ntá tí chjéhe xrinto nó sur ntá ntáchrórá kíxin tsosóa, a ntá xíkaha chaxín tsosóa. <sup>56</sup> Jahará ntoáhya tjenkayáxinrá. Ó nohará tjenkayáxinrá nkexri tsonhen nkajni la ko chjasintajni. ¿Ntá nkexri naxa tiénxinhyará nkehe sítónhen tí tjejorá jie?

### Chrókóxakönhenni kjuaxróxin chrók'uejókoni tí sín nínkakönhenni

(Mt. 5.25-26)

<sup>57</sup> ¿Nkekuènte tjéyáhyará jahará nkehe tí jína? <sup>58</sup> Tí jnkojín nkexro tsjanchia jie sátsjikoará ch'án nkayakon tí sín t'etøan na tí ntja ó chrónkakjórá ch'án kíxin tsoyóxin ts'ixinhya kjuanínkaon kíxin sátsjikoahyará nkayakon tí ch'ín juez, kíxin tí ch'ín juez chrók'uetøan ch'án kíxin sátsjikoará tí sín comandante. A ntá tí ch'ín comandante chróchr'áxanhanrá ch'án ntøechiso. <sup>59</sup> Ntáxrjan kjá ni chrók'uaxrjéxinhyará ntilha tsjenkajiará kaín xín chichaon chonta.

### T'ichjánxin chrókjuinkí chojni tí nkehe tjenkayáxin sín

**13** A ntá tí yaon k'uejó iso sín chénka sín tí ch'ín Jesús kíxin nkexri kjuích'e ch'ín Pilato k'uetøan it-s'en iso chojni tsíkjin estado Galilea k'uítji ijnié sín kójnkojiéko tí ijnié tí ko k'óyán sín kjuanchexín sín kjuasáyé Dios. <sup>2</sup> A ntá kjuátehe ch'ín Jesús ntáchro ch'án kíxin:

—¿Á tjenkayáxinrá kíxin xíkaha kónhen tí sín tsíkjin estado Galilea kíxin antsí jié jie chóna sín, a ntá tí í so sín

chjasén sín la á náhí ní? <sup>3</sup> Ntáxrjan tíhi kjá náhí. **A** ntá jahará tí tjínkíhyará tí tjenkayáxinrá la kaín rá xíkaha its'enrá kjaxin. <sup>4</sup> ¿Á tjenkayáxinrá kixin ántsi má k'uéchónta jie tí dieciocho chojni ik'uén xrátja sín tí torre Siloé, **a** ntá tí í so sín chjasin Jerusalén la á náhí ní? <sup>5</sup> Ntáxrjan tíhi kjá náhí. **A** ntá jahará tí tjínkíhyará tí tjenkayáxinrá la kaín rá xíkaha ts'tjáyánrá kjaxin.

### **Ch'ín Jesús kjuíncheyóëxin ch'án éxi ijnko nta to higo t'ónahya to**

<sup>6</sup> **A** ntá ch'ín Jesús kjuíncheyóëxin ch'án ntáchro ch'án kixin:

—Ijnko chojni chóna ijnko nta to higo nóntee ch'án. Ntá sákjuítsjehe ch'án á k'óna to. **A** ntá náhí k'uitjahya ch'án ninkehó to. <sup>7</sup> Ntá ntáche ch'án tí nkexro t'ayakonhen tí nonte a kixin: “Ó ní nánó t'inkatsjahá tí nta la k'uitjáhya ninkehó to higo. T'ochrínjian tí nta kixin tsoxéhe tí nonte a.” <sup>8</sup> **A** ntá tí ch'ín t'ayakonhen nonte kjuátehe ch'án ntáchro ch'án kixin: “Áxri, títóhé ijie nánó kixin sintantá nche la ko tsjiko nchekatjehe. <sup>9</sup> **A** ntá tí xíkaha ách'e ts'óna to. **A** ntá tí náhí na ntá ts'ochrínjian chr'éxin.”

### **Ch'ín Jesús kjuínchekitohe jína ijnko tjan níhi tí yaon t'ok'éhe chojni**

<sup>10</sup> Ch'ín Jesús kjuák'e ch'án ijnko nínko kjuakoxin ch'án ijnko yaon t'ok'éhe chojni. <sup>11</sup> Ntiha tjan ijnko chojni chjin chóna dieciocho nánó chonta tjan ijnko nchakuen tí jínahya kjuíncheníhi tjan tjesékoá tjan xitjahya xrentoá tjan. <sup>12</sup> **A** ntá ch'ín Jesús k'uíkon ch'án kixin xíkaha tjan tjan ntá k'uíyehé ch'án tjan ntáchro ch'án kixin:

—Naná, ó kjuíinhan tí chin chonta —ichro ch'án.

<sup>13</sup> **A** ntá jehe ch'án kjuak'etja tja ch'an chrítaón tí jehe tjan **a** ntá tuénxín xrentoá tjan ntá chjéhe tjan kjuasáyé Dios. <sup>14</sup> **A** ntá tí ch'ín t'etóan kuénte

nínko kónínkaon ch'án kixin ch'ín Jesús kjuínchekitohe jína ijnko chojni ijnko yaon t'ok'éhe sín, ntá ntáche ch'án tí chojni a kixin:

—Síin injon yaon mé chrókónhen xra chrók'uinkará chrókuitóhará jína na jehya tí yaon t'ok'éheni chrókónhen tíha —ichro ch'án.

<sup>15</sup> **A** ntá Ìnchéni kjuátehe ch'án ntáchro ch'án kixin:

—Ntoáhya tjenkayáxinrá jahará. ¿Á chrókjuasintankeehyará tí koxintaará la o tí kolóchoará chrókjuíkoará va nta tí yaon t'ok'éheni ní? <sup>16</sup> **A** ntá tí tjan mé tsík'axreníxin tí ch'ín Abraham na mé ó chóna dieciocho nánó tsíkjinchenteto ch'ín Tsochren tí jehe tjan, ¿á jehya jína kjaxin chrókjuasintanka tí nkehe tsikón-tetoxín tjan tí yaon t'ok'éheni? —ichro ch'án.

<sup>17</sup> Ntá xíkaha ichro ch'ín Jesús la ntá kaín tí sín kónínkakonhen ch'án la kósuèhe sín. **A** ntá kaín tí chojni síin ntaha chéhe sín k'uíkon sín kaín tí kjuaxroan jie kjuakoxin tí jehe ch'án.

### **Kjuíncheyóëxin ch'ín Jesús éxi ijnko tje tse kuénte nta mostaza**

(Mt. 13.31-32; Mr. 4.30-32)

<sup>18</sup> Ntá ntáchro ch'ín Jesús kixin:

—¿Nkehe tóyóëxin tí t'etóan Dios tí kjuachaxin kuénte ch'án la ko nkehe jína chrókjuíntayóaxian? <sup>19</sup> Éxi yóhe ijnko tje tse kuénte nta mostaza k'uenka ijnko chojni nóntee ch'án. **A** ntá tíó k'uánkí kóyóhé éxi ijnko nta jie. **A** ntá tí koxroxé xritjaká mé kui va kjuích'éna va kaké va chrík'á tí chaon tí nta.

### **Ch'ín Jesús kjuíncheyóëxin éxi tí xroan t'ánkixin niotja**

(Mt. 13.33)

<sup>20</sup> Ntá ntáchro ch'ín Jesús ínaá kixin:

—¿Nkehe chrokjuíntayóaxian tí t'etóan Dios tí kjuachaxin kuénte ch'án? <sup>21</sup> Éxi yóhé tí xroan nchek'ánkí niotja

kjuinkíkjanxin ijnko chojni chjin iní medida harina. A ntá tí ch'ó la k'uánkí.

### Tí puerta tekahya

(Mt. 7.13-14, 21-23)

<sup>22</sup> K'uátsínka ch'ín Jesús kaín chjasin hyé la ko kaín chjasin ntsínsí nkákjako ch'án tí tan jína kixin jehe ch'án ó sát-sji ch'án chjasin Jerusalén. <sup>23</sup> A ntá ijnko nkexro kjuanchankí ch'án kixin:

—Inchéni, ¿á tsjéhya tí sín tsaá? —ichro ch'án.

A ntá jehe ch'án kjuátehe ch'án ntáchro ch'án kixin:

<sup>24</sup> —Tóxakonhanrá t'ixeenxínrá tí puerta tekahya kixin nchónhya sín tjinkaon sín chrók'uixenhen sín, kjánchó tjachahya sín. <sup>25</sup> A ntá tí ìnché nchia ts'ikjéhe ch'án tí puerta. A ntá chr'éxin jahará ts'ejorá ntója ts'èyará ts'inkará tí puerta tsontáchrórá kixin: “Tadá, takítjehé nchia”, tsixrorá. Kjánchó jehe ch'án tsjatehe ch'án tsontáchró ch'án kixin: “Nonahya nketí k'uinkaxínrá jahará”, tsixro ch'án. <sup>26</sup> A ntá tsjankixinrá tsontáchrórá kixin: “Kjóneni la ko k'uúni jnkokoá la ko jaha kjuákoxian tí ntasjinni”, tsixrorá. <sup>27</sup> A ntá jehe ch'án tsjatehe ch'án tsontáchró ch'án kixin: “Ó ntáxrjan janhan kixin chonhya tí jahará. Tìtohérá tí janhan sátjirá ókjé kaín tí jahará jínahya kjuich'erá.” <sup>28</sup> Ntaha tsotsjankará la ko sintetaónrá nénorá tió ts'ikonrá kixin ch'ín Abraham la ko ch'ín Isaac la ko ch'ín Jacob la ko kaín tí sín k'uéchronkaxín itén Dios mé tjejó sín tí tjen Dios t'etoan ch'án, a ntá jahará la ts'axrjéxinrá ntója ntiha. <sup>29</sup> Tsjixin chojni nó tjìtoxín yaon la ko nó tjíátóxin yaon la ko nó norte la ko nó sur ntá ts'ejótjaxín sín tí tjen Dios t'etoan ch'án la sine sín. <sup>30</sup> A ntá iso tí sín k'uítuenhen senó la mé ts'etoan sín, la ko iso tí sín k'uék'etoan senó la mé ts'ítuenhen sín.

### T'ává ch'ín Jesús

(Mt. 23.37-39)

<sup>31</sup> A ntá tí yaon a ikui iso sín fariseo ntáche sín tí ch'ín Jesús kixin:

—Sátjixian ntihi kixin ch'ín Herodes tjinkaon chrók'óyan ch'án tí jaha —ichro sín.

<sup>32</sup> A ntá jehe ch'án kjuátehe ch'án ntáchro ch'án kixin:

—Sátjirá chenkará tí ch'ín jínahya ch'ia kixin: “Ijie la ko ntóye tsakítsje nchakuen tí jínahya la ko sintakitoha chojni níhi jína la ntá tí nixin yaon a ntá tsjixinna tí xrā kuéntana,” tsixrorá. <sup>33</sup> Kjánchó t'ichjánxin kixin naxa sátjija tí jie yaon la ko ntóye la ko tí yaon chr'éxin kixin t'ichjánxin kixin ijnko nkexro chrónka itén Dios chrók'uenxín ch'án chjasin Jerusalén.

<sup>34</sup> 'Jerusalén, Jerusalén. Jahará t'oyánrá tí sín tjako itén Dios la chjehérá xro tí sín ich'án ch'án ikui chrókjuinkitsará. Imá itsjé veces tjinkavan chrókójnkotsérá la chrók'uáyakonhanrá éxi ijnko cochíká mé t'ayakonhen xjeen va chrínkí kanenee va mé xikaha tjinkavan chrók'uáyakonhanrá tí jahará. Kjánchó jahará la tjinkákonhyará xikaha. <sup>35</sup> Chrókónohará kixin Dios la tsítóhe ch'án tí jahará la ts'ikonhyará tí janhan tsjixrakája tí yaon tsontáchrórá kixin: “Jína tí nkexro kjuixín kjuachaxin ihnié ìnchéni Dios.”

### Ch'ín Jesús kjuínchekitöhe jína ijnko nkexro tsík'atjoyé kuenté

**14** A ntá tí yaon t'ok'éhe sín sákjuí ch'ín Jesús ntöe ijnko ch'ín fariseo t'etoan kixin ntaha sineko sín ch'án. A ntá tí í so sín fariseo tinkáchréhe sín tsotsjehe sín nkehe sich'e ch'án. <sup>2</sup> A ntá ntiha ntoí chók'èxin tí tjen ch'án itjen ijnko chojni tsík'atjoyé kuenté. <sup>3</sup> A ntá ch'ín Jesús kjuanchankíhi ch'án tí sín

maestro tjako tí ley la ko tí sín fariseo kixin:

—¿A síin kjuachaxin sinchekitoñeni jína ijnko chojni níhi tí yaon t'ok'éheni o náhi? —ichro ch'án.

<sup>4</sup>A ntá jehe sín la tání sín. A ntá ch'ín Jesús sákjuíko ch'án tí ch'ín níhi la kjuínchekitoñe ch'án jína la k'uētuenhen ch'án kixin sátsji ch'án. <sup>5</sup>A ntá ntáche ch'án tí sín fariseo kixin:

—Jnkojín tí jahará chontará kolóchoará o koxintaará chrókjuítsínkáya va tòye ¿á senóhya chrókuakítsjetaónrá va tòye kjónté yaon t'ok'éheni ní? —ichro ch'án.

<sup>6</sup>A ntá jehe sín ninkehó kjuátēehya sín kixin xikaha ichro ch'án.

#### Tí sín tsík'iyēhe sín sátsji sín kia tsíkótehe chojni

<sup>7</sup>Ntá k'uíkon ch'ín Jesús kixin tí sín tsíkóchjina tí kia a kjueyá sín silla náxrjón ts'ejóya sín tí tjen mesa ntá kjuíncheyóexin ch'án ntáchro ch'án kixin:

<sup>8</sup>—Tió jnkojín nkexro ts'iyaha sín kixin tsjasán ijnko kia tsotehe chojni la tjéyáhya tí nta silla kuente tí sín t'etoan kixin ách'e tsi jnkojín nkexro antsí t'etoan <sup>9</sup>a ntá tí nkexro k'uíyahará yóirá itsi ch'án tsjanchará ch'án kixin t'ínkátjēnxian tí tjen jaha méhe kixin ntaha tsjak'e í jnko nkexro, tsixro ch'án. Ntá tsosuaáha sátsjia tsjak'etjāxian tí silla kjuixixín. <sup>10</sup>Íchá jína tió t'iyaha sín chrókjuak'etjāxian tí silla tjetuanhya, kixin ntá chrókui tí ch'ín tsík'iyaha tson-táchro ch'án kixin: “Jína tjoni la t'at-sínka tjak'etjāxian tí silla antsí náxrjón”, kixin ntaha tsjikosáyaha sín nkayakon kaín tí sín ts'ejótjāxinkoa sín ntiha. <sup>11</sup>Kixin tí nkexro sinchēhnkehe asén kixin imá chrók'uetoan ch'án la mé chr'éxin Dios tsjanjonhya kjuachaxin kixin ts'etoan ch'án. A ntá tí nkexro k'uék'etoanhya la mé chr'éxin Dios ts-

janjon kjuachaxin kixin antsí ts'etoan ch'án.

<sup>12</sup>Kjāxín ntáche ch'án tí nkexro tsík'iyēhe ch'án kixin:

—Tió tsjāsian kia it'o yaon la o tson-jin la t'iyēehya tí sín choxian la ko tí sín kichuá la ko tí sín naxa kjéhya la ko tí sín rico chjino ntoa, kixin jehe sín la chr'éxin ts'iyaha sín inaá la xikahó la ó kjuixin kjan tí k'uíyēhé sín. <sup>13</sup>Íchá jína chrók'uíyēhé tí sín nòla la ko tí sín tsixénká toté sín la ko tí sín xitjahya tji la ko tí sín t'ikonhya. <sup>14</sup>Ntá chrókócháha jaha kixin jehe sín xitjahya ts'iyaha sín tsjasin sín kia. A ntá tió tsoxechónjian tí sín jína la mé Dios mé tsjenkaha kixin kjuínkítsa tí jehe sín.

#### Ch'ín Jesús kjuíncheyóexin ch'án éxí ijnko kia jié

<sup>15</sup>A ntá kuínhin ijnko tí sín tjejójtjāxín sín chjino tí mesa, a ntá ntáche ch'án tí ch'ín Jesús kixin:

—Náxrjón tí sín sine niotja tí tjen Dios t'etoan ch'án —ichro ch'án.

<sup>16</sup>Ntá ntáchro ch'ín Jesús kixin:

—Ijnko chojni kjuasin ijnko kia jié ijnko kónjín la k'uíyēhe ch'án nchónhya chojni tsi sín tí kia a. <sup>17</sup>A ntá ó kuichjina tí hora sine sín ntá k'uētuenhen ch'án ijnko chojni ch'ehe ch'án xra tsjichenka ch'án kaín tí sín ó tsík'iyēhe ch'án kixin chrókóchjina sín kixin ó tjejóchónhen kaín nkehe sine sín. <sup>18</sup>Ntá kaín sín kjuankixin sín chrónða sín kixin xitjahya tsjiji sín sine sín. A ntá tí ch'ín saoxín kjuítsjehe ch'án ntáchro ch'án kixin: “Na ntá k'uēnani ijnko nontēeni la t'ichjānxin tsjitsjeheni la xitjahya tsjijini tí t'iyēheni ch'án, ntá chénka ch'án kixin chrókónínkakuenhyani ch'án”, ichro ch'án. <sup>19</sup>A ntá í jnko ch'ín ntáchro ch'án kixin: “Na ntá k'uēnani in'ó yunta koxinta, a ntá t'ichjānxin tsotsjeheni á jína ch'e va xra, ntá chénka ch'án kixin chrókónínkakuen-

hyani ch'án", ichro ch'án. <sup>20</sup> A ntá í jnko ch'ín ntáchro kixin: "Na ntá kóteheni, méxra xitjahya tsjjini", ichro ch'án. <sup>21</sup> Ntá ó kjan tí ch'ín ch'e xra chénka ch'án tí ch'ín lámo kaín tí nkehe sín-táchro sín. A ntá tí ch'ín lámo kuín-hin ch'án xikaha la ntá kónínkaon ch'án ntá ntáche ch'án tí ch'ín ch'ehe ch'án xra kixin: "Tjoka sátjia kaín ntja ch-jasin í la tsjikoa ntíhi tí sín nòla la ko tí sín tsíxénká toté sín la ko tí sín xitjahya tji la ko tí sín t'íkonhya", ichro ch'án. <sup>22</sup> A ntá chr'éxin ntá kjan tí ch'ín ch'e xra chénka ch'án tí lámo kixin: "Ó kjuínchexiteyáni xikaha kuétuénhenni la kjónté naxa xranka chrókui chojni", ichro ch'án. <sup>23</sup> A ntá tí ch'ín lámo ntáche ch'án tí ch'ín ch'ehe ch'án xra kixin: "Sátjia kaín ntja jíe la ko kaín ntja ntsí la tétuénhén chojni síin chrókui sín chrók'uixixenhen nchia ntona naxa xranka. <sup>24</sup> Kixin ntáxrjan kixin nijnko tí sín k'uíyaha senó chrókui sín chrókjone sín tí nkehe chrótjaha sín", ichro ch'án.

### IXRA TSOCHRÉHENI CRISTO

<sup>25</sup> Nchónhya chojni nkáchréhe sín tí ch'ín Jesús, ntá jehe ch'án kuinkátjía ch'án kotónhen ch'án ton ch'án ntáchro ch'án kixin:

<sup>26</sup> —A ntá jnkojín chojni tsotjinkaon tsochréhe tí janhan la antsí má tje-toan chrótjuana sín la kjónté kénhyó chrótjuèhe it'é sín la ko ìné sín la ko ichjién sín la ko xjeen sín la ko kichó sín ntoa la ko kichó sín chjin la ko kjónté kénhyó chrótjuèhe asén sín. A ntá náhi la xitjahya ts'óna discípulo kuéntana jehe sín. <sup>27</sup> Tí nkexro tsamáhya tí ntacruz kuènte sín tsochréhya sín tí janhan la xitjahya ts'óna discípulo kuéntana. <sup>28</sup> A ntá jnkojín tí jahará chrókjui ch'énará ijnko tjat'ò nteto, ¿á senóhya chrókjuenkayáxinrá kixin nkekjaín chichaon ts'ichjánxin ts'ixenhen chrótsjehérá á nchõxon chrókjui xixin chrók'ónaxín tí tjat'ò a?

<sup>29</sup> A ntá tió tsjankíxinrá sich'énará tí tjat'ò ntá chr'éxin xitjahya tsjixin sich'é-nará, ntá kaín chojni ts'íkon sín ts-janoará sín <sup>30</sup> tsontáchro sín kixin jaha kjuankíxian kjuich'éna, a ntá jie xitjahya sinchekjixian ts'óna, tsixro sín. <sup>31</sup> A ntá jnkojín tí ch'ín rey t'etoan ts-janjonko í jnko rey t'etoan kjaxin násenó chrókjuenkayáxin ch'án kixin ite mil soldado chóna ch'án, á chrókjua cha ch'án chrókjua chaxin ch'án tí kán mil soldado chóna tí í jnko ch'ín t'etoan. <sup>32</sup> A ntá ti chrókjua chahya ch'án chrókjua-jonko ch'án tí í jnko ch'ín rey, ntá naxa ikjín tjen ch'án la íchá jina chróchr'án ch'án ijnko nkexro tsochronóehe ch'án kixin chrók'uixinhya kjuanínkaon. <sup>33</sup> Mé xikaha jnkojín tí jahará tí tsitoéhyará kaín nkehe ntoáhya tjenkayáxinrá xitjahya ts'óna discípulo kuéntana.

### TÍ XÍJNTA TSÍK'ÁNKÉHÉ TÍ JNÍ

(Mt. 5.13; Mr. 9.50)

<sup>34</sup> A ntá jina tí xjnta, kjánchó tí chrók'uánkéhé tí jní la ntá xitjahya chrókójní inaá. <sup>35</sup> Ntá tí xikaha la ni tí nche xitjahya tsjiko la chrók'ónahya nkehe la chrok'uitjini ntója. Tí nkexro tjinkaon chrókuinhin la chrókuinhin kaín tíhi —ichro ch'in Jesús.

### KJUÍNCHÉYÓEXIN CH'ÍN JESÚS ÉXÍ IJNKO KOLÉLO TSÍK'ITJÁYAN

(Mt. 18.10-14)

**15** Kaín tí sín nchekjènkí la ko tí sín chóna nchónhya jie kóchjinehe sín tí ch'ín Jesús kixin tjinkaon sín chrókuinhin sín tí nkehe tjechronka ch'án. <sup>2</sup> A ntá tí sín fariseo la ko tí sín maestro tjako tí ley kjuankíxin sín tjonta sín ch'án ntáchro sín kixin:

—Tí ch'ín i la kjónté tí sín chóna nchónhya jie la t'ito ch'án la ko neko ch'án —ichro sín.

<sup>3</sup> Ntá ch'ín Jesús kjuíncheyóexin ch'án ntáchro ch'án kixin:

<sup>4</sup>—A ntá jnkojín tí jahará, tí chontará ijnko ciento kolélo ntá chrók'uitjáyán ijnko va, ¿á chrók'uitjáyárá tí noventa y nueve va tí nteje ó, a ntá á chrók'juíkjéyáhyará tí ko tsík'itjáyán hasta chrók'uitjájíará va ní? <sup>5</sup>A ntá tí ts'itjára va ntá tsamára va tsöcháhará. <sup>6</sup>Ntá tió tsokjanrá ntóará ntá ts'iyehérá kaín tí sín choxinrá tjórá jína la ko tí sín chjinaxón ntóará ntá tsontácherá sín kixin: “Tsöchéheni ts'ejóni jie kixin ó k'uitjá tí kolélo tsík'itjáyán.” <sup>7</sup>Na mé kjáxin xíkaha tsotjonkará kixin antsí tsöchéhe kaín tí sín síin nkaya nkajní tió ijnko chojni tsítóhe kaín tí jie tsík-jenkayáxin ch'án. Ntá kánhyó tsöchèxin tí sín nkaya nkajní kixin tí noventa y nueve chojni jína t'ichjánxienhya chrókjuinkí sín tí nkehe tjenkayáxin sín.

### Kjuíncheyóexin ch'án éxí chichaon k'uitjáyán

<sup>8</sup>'A ntá ijnko chojni chjin chóna ite chichaon, a ntá tí chrókjuinçek'itjáyán tjan ijnko tí chichaon a la, ¿á chrókjuinçek'ákjenhya tjan xrohi kixin chrókjueyáxin tjan la ko chrok'uánjón tjan tí nchia kixin chrótsjehe tjan jína hasta chrók'uitjajia tjan? <sup>9</sup>A ntá tió chrók'uitja tjan la ts'iyehé tjan kaín tí chojni chjin jína tjo tjan la ko tí sín chjinaxón ntóe tjan la ntá tsontáche tjan sín kixin: “Tsöchéheni ts'ejóni kixin ó k'uitjani tí chichaon kjuínçek'itjáyanni.” <sup>10</sup>Ntá kjáxin xíkaha tsotjonkará kixin imá tsöchéhe kaín tí sín ángel kuente Dios tió ijnko chojni tsítóhe kaín tí jie tsíkjenkayáxin ch'án.

### Ch'ín Jesús kjuíncheyóexin ch'án éxí ijnko ch'ín kuicháxinhin chichaon

<sup>11</sup>Kjáxin ntáchro ch'ín Jesús kixin:

—Ijnko nkexro chóna yaá xjeen ch'án. <sup>12</sup>A ntá tí ch'ín tsoyo ntáche ch'án tí it'é ch'án kixin: “It'éni, chjehéni

kaín nkehe chróchjehéni.” A ntá tí it'é sín k'óchrít'óhe ch'án tí nkehe chóna ch'án. A ntá tí ch'ín tsoyo k'uáyéhe tí nkehe kuente ch'án. <sup>13</sup>A ntá kánhyó tsjé yaon chr'éxin tí xjeen ch'án tsoyo kjuínçekji ch'án kaín nkehe tsík'áyéhe ch'án, ntá sákjuíko ch'án tí chichaon sákjuí ch'án ókjé chjasin kjin. A ntá ntiha kjuínchexénhen ch'án kaín chichaon chóna ch'án kixin jehya tí jína kjuích'e ch'án. <sup>14</sup>A ntá tió kjuixin kjuèhe ch'án tí chichaon kuicháxinhin ch'án ntá xrí-nahya kókjinta tí chjasin ntiha ntá kohya nkehe sine kaín sín. A ntá jehe ch'án kjuankixin ch'án t'enxín ch'án kjinta. <sup>15</sup>Ntá jehe ch'án sákjuíkjejá ch'án xrá sich'e ch'án. Ntá chjasin ntaha tjen ijnko ch'ín kjuanchehe ch'án xrá. Ntá tí ch'ín a kjuanjon ch'án xrá ntá k'uetóan ch'án kixin sátsji ch'án nontee ch'án kixin ntiha ts'ayakonhen ch'án cochíno. <sup>16</sup>A ntá jehe ch'án t'enxín ch'án kjinta ntá tjinkaon ch'án chrókjóné ch'án tí nkehe ine tí cochíno kixin ninkexró tí ntiha chrohya tsjanjon nkehe sine ch'án. <sup>17</sup>Ntá jehe ch'án kjuák'e ch'án kjuenkayáxin ch'án kixin: “Nchónhya chojni síin ntóe t'aná ch'e sín xrá la chóna sín nkehe sine sín. Ntá janhán tjét'énxian kjinta ntihi. <sup>18</sup>Ntá jie tsokjan tí tjen t'aná la ntá tsontáxrjan kixin: It'éni, kjuasinni jie kuítékakuenhya It'éni nkaya nkajní la ko kjuasinhanni jie kuítékakuanhyani tí jaha. <sup>19</sup>Tósuèheni tsontáchrúa kixin xjaan tí jeheni. Ch'éneni éxí ijnko chojni t'aha xrá”, mé xíkaha kjuenkayáxin ch'án tsontáchró ch'án. <sup>20</sup>Ntá kuákja ch'án ntia xrakoa ch'án tí ntóe it'é ch'án.

'A ntá kjónté naxá kjin kui ch'án a ntá tí it'é ch'án la ó tsík'ikon ntá kuíkonóehé ch'án tí xjeen ch'án. Ntá kuínká ch'án la kjuíxinhin ch'án ntia la kjóa ch'án la ko kjónéko ch'án kochíto. <sup>21</sup>Na ntá ntáchro tí xjeen kixin: “It'éni kjuasinni jie kuítékakuanhyani Dios la

ko kjuasinhanni jie kuítekakuanhyani tí jaha. Tósuèheni tsontáchrúa kíxin xjaan tí jeheni”, ichro ch'án. <sup>22</sup> A ntá tí it'é ch'án k'uíyehé ch'án tí sín ch'ehe ch'án xra ntáchró ch'án kíxin: “Xrákoará tí ka antsí jína nchek'inkáyará ch'án la ko chr'axenhenrá dedo tja ch'án ijnko koch'aninko la ko nchekjankará ch'án totjoa. <sup>23</sup> La ko tjicakjínra koxintáxjan tsanka la t'oyánra va kíxin sinekoni ch'án tsjasinhinni ch'án kia. <sup>24</sup> Kíxin tí xjanna i la éxí ó tsík'en ch'án xikaha ntá jie la éxí ó xechón ch'án la tsík'itjáyan ch'án la ntá jie la ó kónoxín ch'án inaá”, ichro ch'án. Ntá kjuankíxin sín kjuasin sín kia.

<sup>25</sup> A ntá tí xjeen ch'án sao la nonte tjech'e ch'án xra. A ntá tió kjan ch'án kui ch'án chjinaxón nchia ntá kuínhin ch'án síin són la ko ité sín. <sup>26</sup> Ntá k'uíyehé ch'án ijnko ch'ín ch'e xra ntá kjuanchankíhi ch'án kíxin nkekuènte xikaha sítónhen. <sup>27</sup> A ntá tí ch'ín a ntáchró ch'án kíxin: “Kíchuá la ó tsíkjan. A ntá it'á la k'uetóan k'uén koxintáxjan tsanka kíxin jína xikjan ch'án”, ichro ch'án. <sup>28</sup> A ntá tí ch'ín sao la kónínkaon ch'án chrohya ch'án ts'ixenhen ch'án nchia. A ntá tí it'é ch'án k'uaxrjexín nchia chronóehé ch'án kíxin chrók'uixenhen nchia. <sup>29</sup> Kjánchó jehe ch'án kjuátehe ch'án ntáche ch'án it'é ch'án kíxin: “Nchónhya nánó t'a-hani xra, la xráxín kuítekakonhanni kaín nkehe kuétoan la kjuánjonhya nijnko kotèntsó chrókjónekoni tí sín chóxinni. <sup>30</sup> A ntá jie ikui tí xjaan i kjuínchek'itjáyan ch'án kaín nkehe chjehé ch'án kjuínchek'itjáyanxín ch'án chojni chjin. A ntá jie ikjan ch'án la naxa t'oyán koxintáxjan tsanka”, ichro ch'án. <sup>31</sup> A ntá ntáchró tí it'é ch'án kíxin: “Xjeenni jaha, xráxín tjejóko kíchó ni ntihi. Kaínxín nkehe kuèntana la kuènta jaha kjaxin. ¿Nkekuènte ninkávan? <sup>32</sup> A ntá jie la t'ichjánxin tsjasinhinni kíchuá kia tsochéheni kíxin éxí tsík'en ch'án

la ntá jie la ó tsíxechón, la tsík'itjáyan ch'án xikaha la ntá jie la kónoxín ch'án inaá.”

**Ch'ín Jesús kjuíncheyóexin  
ch'án éxí tí ch'ín k'uáyéhe xra  
la ntá kjuíuch'ehya xra jína**

**16** Kjāxin ntáche ch'ín Jesús tí sín k'uájiko ch'án kíxin:

—Kjuák'e ijnko ch'ín lamó ricó chóna ch'án ijnko nkexro chjéhe ch'án kjuachaxin kíxin ts'etóan tsonhen xra. Ntá kui ijnko nkexro chénka tí lamó kíxin: “Tí nkexro t'etóan nchexénhen ch'án tí nkehe chonta”, ichro ch'án. <sup>2</sup> A ntá tí ch'ín lamó k'uíyehé ch'án tí ch'ín ch'ehe ch'án xra ntáche ch'án kíxin: “¿Á chaxín xikaha ch'e kíxin xikaha ichro sín? A ntá jie tsjánjuan jaha kuentá tí xra kjuíuch'e kíxin ijie í sich'ehya xra tsétoan ntihi”, ichro ch'án. <sup>3</sup> A ntá tí ch'ín t'etóan tónhen xra kjuenkayáxin ch'án kíxin: “¿Nkehe chrókuít'a jie kíxin tí lamó la í tsjanjonhya ch'án xra sít'a? La ko janhan la chontahya fuérza sít'a xra nontee chojni la ko tósuàna kíxin chrók'uájia chrókuánchák'á nkehe. <sup>4</sup> Ó nóna nkehe sít'a kíxin ntá tsochonta nkexro tsjanjon kjuachaxin tsjak'é ntoe sín tí í tsochontahya xra sít'a”, ichro tí ch'ín t'etóan. <sup>5</sup> Ntá k'uíyehé ch'án jnkojnko jnkojnko tí sín síkéhe tí lámoe ch'án. A ntá tí ch'ín sao kui ntá tí ch'ín t'etóan mé kjuanchankíhi ch'án kíxin: “¿Nkekjaín tjasikéhe lámoeini?” ichro ch'án. <sup>6</sup> A ntá jehe ch'án kjuátehe ch'án ntáchró ch'án kíxin: “Síkani ijnko ciento ntabarril aceite”, ichro ch'án. A ntá tí ch'ín t'etóan ntáchró ch'án kíxin: “Ntihi tjen xroon tsjénkaxian a. Tjak'e nonte tjoka la ch'éna í jnko xroon la í cincuenta ó ténixián”, ichro ch'án. <sup>7</sup> Ntá chr'éxin la kjuanchankíhi ch'án í jnko nkexro kíxin: “A ntá jaha, ¿nkekjaín tjásiká?” ichro ch'án. Ntá ntáchró ch'án



kíxin: “Ijnko ciento medida noatrigo síkani”, ichro ch'án. **A** ntá ntáchro tí ch'ín t'etōan kíxin: “Tí xíkaha la ntihi tjen tí xroon tsjénkaxian. **A** ntá jie la ch'éna ochenta ó”, ichro ch'án. <sup>8</sup>**A** ntá tí ch'ín lamó kjuátsoan ch'án kíxin kjónté Jehya xṛa jína kjuích'e tí ch'ín t'etōan kjuích'ehe ch'án xṛa la kjánchó tí kjuích'ia ch'án la antsí nohe ch'án kjuích'ia ch'án. Méxṛa tí sín chjasintajni antsí nohe sín ch'iyehé kíchó sín, a ntá tí sin ixri tí t'ínkaséyan la xíkaha chrókjuenkayáxin sín chrókjuich'ia sín, chrókjuenkayáxin sín tí jína.

<sup>9</sup>Janhan la tétuanhanrá kíxin chrókuicháxinhanrá tí chichaon síin chjasintajni kjónté tjuáhya kíxin tsjínkítisará chojni kíxin ntá itsjórá sín jína. **A** ntá tió tsjeje káin chichaon ntá jehe sín ts'ejóchónhen sín nkaya nkajní ts'áyáhará sín jnkochrín.

<sup>10</sup>Tí nkexro k'uáyakonhen tí nkehe chóna kjónté tsjéhya la kjaxin chrókjuacha chrók'uáyakonhen itsjé nkehe chróchóna. **A** ntá tí nkexro kjuachahya k'uáyakonhen tí nkehe tsjéhya chóna la kjaxin chrókjuachahya chrók'uáyakonhen tí tsjé nkehe chróchóna ch'án. <sup>11</sup>Mé xíkaha tí xitjahya t'ayakonhénrá tí chichaon kuènte chjasintajni ntiho la, ¿ntá nkexrí chrók'uayéhérá nkehe tjete chaxín kuènte nkaya nkajní? <sup>12</sup>Mé xíkaha tí kjuachahyará k'uáyakonhénrá tí chichaon kuènte ókjé nkexro, ¿ntá nkexro chrótjáhará jahará tí nkehe chaxín tjete chrók'uáyakonhénrá?

<sup>13</sup>Nijnko nkexro xitjahya sich'ehe yaá lamó xṛa kíxin ijnko la tsonínkakhén ch'án la ko tí í jnko tsotjuèhe ch'án, o ijnko la tsitekakhén ch'án, la tí í jnko la tsitekakuenhya ch'án. Xitjahya chrókjuich'ehe chojni xṛa Dios tí tjinkaon sín tsochóna sín itsjé chichaon —ichro ch'án.

<sup>14</sup>**A** ntá tí sín fariseo imá kóxrjínhin sín chichaon, ntá kuínhin sín káin tíha nkerí ichro ch'ín Jesús, ntá kjuanoá sín ch'án. <sup>15</sup>Na ntá ch'ín Jesús ntáche ch'án sín kíxin:

—**A** ntá jahará tjinkáonrá chrók'uejóx-inrá jína nkayakon chojni. **A** ntá Dios la chóxin ch'án asánrá. **A** ntá tí nkehe imá tóxrjínhin ch'e chojni la Dios la tóxrjén-hya ch'án.

### **Tí ley la ko tí t'etōan Dios tí kjuachaxin kuènte ch'án**

<sup>16</sup>Naxa kjuakohya ch'ín Juan la k'uékjako sín tí ley kuènte ch'ín Moisés la ko tí nkehe k'uékjin tí sín k'uéchronka itén Dios ósé. **A** ntá kui ch'ín Juan la chrónka ch'án tí tan jína nkexrí ts'etōan Dios tí kjuachaxin kuènte ch'án ntá káin chojni imá tjinkaon sín chrókjuacha sín chrók'uejó sín tí tjen Dios t'etōan ch'án.

<sup>17</sup>Antsí xṛahya chrók'uitjáyan tí nkehe síin nkajní la ko chjasintajni. **A** ntá xitjahya kíxin chróxiteyáhya kjónté ijnko nkehe ntsí t'etōan tí ley.

### **Ch'ín Jesús tjako ch'án kíxin chrókjuákehya kíchó chojni**

(Mt. 19.1-12; Mr. 10.1-12)

<sup>18</sup>**A** ntá ijnko chojni tsjakehe ichjién la ntá tsakja ch'án í jnko chojni chjin la ijie tíha. **A** ntá tí ch'ín tsakja ijnko tjan tsíkítsínkehe la kjaxin ijie tíha.

### **Tí ch'ín rico la ko tí ch'ín Lázaro**

<sup>19</sup>Ntá kjuák'e ijnko ch'án imá rico ch'án la ko k'uítsá ch'án ka imá tjete náxrjón kjátse tié la ko káin yaon kjuasin ch'án kia. <sup>20</sup>**A** ntá ntója ntōe ch'án kjuák'etjaxin ijnko ch'ín nòa mé it'in ch'án Lázaro tjanachak'á ch'án la ko níhi ch'án tsíchr'enka kuenté ntōe ch'án. <sup>21</sup>**A** ntá tí ch'ín nòa la imá kjuak'e asén ch'án chrókjóné ch'án la ko chrókók-jeexín ch'án tí nkehe tot'ō tsjixènjinkíxin mesa kuènte tí ch'ín rico. **A** ntá tí koniá

la kjuamá va tí tosóa chóna ch'án. <sup>22</sup> A ntá ijnko yaon mé ik'uén tí ch'ín nò. A ntá tí sín ángel mé sákjuiko ch'án tí náxrjón tjen ch'ín Abraham. La ko kjaxin ik'uén tí ch'ín k'uéríko la sákjuíkjavá sín ch'án. <sup>23</sup> Ntá tjen ch'án tí sátsji tí sín tsík'en tjetjasóte ch'án. Ntá konta ch'án k'uifkon ch'án kixin ikjín náxrjón tjen ch'ín Abraham tjeko ch'án tí ch'ín Lázaro. <sup>24</sup> Ntá k'uèya tí ch'ín k'uéchóna tsjé nkehe ntáchro ch'án kixin: "It'éni Abraham, tikonóana tétuēnhén tí ch'ín Lázaro kixin sinchekjataxín ch'án kóhe dedo tja ch'án inta ntá tsi ch'án tsjak'eták'á ch'án nejen kixin tsoxruehe kixin tjinahya sóa tí xrohi síin ntihi", ichro ch'án. <sup>25</sup> Kjánchó ntáchro ch'ín Abraham kixin: "Xjeenni, xráinkávan kixin tió kjuák'e chjasintajni na ó k'uayéhé itsjé nkehe náxrjón. A ntá ch'ín Lázaro mé k'uayéhe ch'án nkehe náxrjónhya. A ntá jie ntihi kjuaxróxin tjen ch'án, a ntá jaha tjetjasótia méhe. <sup>26</sup> A ntá kjaxin jnkosiné tjen tsaka imá jié xitjahya ts'átòye tí sín síin ntihi tsjihya sín tí tjen jaha la ko kjaxin tí sín síin méhe xitjahya ts'átòye sín itsji sín ntihi", mé ichro ch'ín Abraham. <sup>27</sup> A ntá tí ch'ín k'uéríko mé ntáchro ch'án kixin: "Ntá xrjanóaha jaha It'éni Abraham kixin tétuēnhén tí ch'ín Lázaro sátsji ch'án ntøe t'aná <sup>28</sup> kixin ntaha kuítøhe in'ó tí sín kichiná, ntá chróchenka ch'án sín kixin chrókuihya sín ntihi chrókjuasótehya sín kixin imá náxrjónhya ntihi", mé ichro ch'án. <sup>29</sup> Kjánchó kjuátehe ch'ín Abraham ntáchro ch'án kixin: "Ó chóna sín tí nkehe tsíkjin ch'ín Moisés la ko tí sín k'uéchronka itén Dios ósé a. Chrókuinhin sín tí nkehe tsíntáchro tí sín a", ichro ch'án. <sup>30</sup> Ntá ntáchro tí ch'ín a ínaá kixin: "Náhi, It'éni Abraham. Chrókójina sáchrókjuitsjehe ijnko chojni tsík'en ntá chrókuitekaon sín chrókuítøhe sín ijjié sín", ichro ch'án. <sup>31</sup> Ntá ntáchro ch'ín Abraham kixin: "Tí tsitekakonhya sín tí

nkehe tsíntáchro ch'ín Moisés la ko tí nkehe tsíntáchro tí í so sín tsíchronka itén Dios ósé, ntá kjaxin tsitekakonhya sín kjónté chróxechón ijnko chojni tsík'en chrókjuichronka ínaá", ichro ch'án.

### Tí kjuaxikaon naxa tjasin chojni jie

(Mt. 18.6-7, 21-22; Mr. 9.42)

**17** Ch'ín Jesús ntáche ch'án tí sín k'uájiko ch'án kixin:

—Xrácín síin nkehe tsjasixín chojni jie. Kjánchó nò tí nkexro tjasin tí nkehe tsjasixín chojni jie. <sup>2</sup> Íchá jina chrókjuincheteyá sín ch'án ijnko xro tsík'óna xrochre chrókjuikákankí sín ntayaon kixin tjasin ch'án tí nkehe tsjasixín jie ijnko chánjan naxa noehya. <sup>3</sup> Tóxakonhanrá kixin xikahya chrókjuásinrá nkehe.

'A ntá tí kichuárá chrókjuasinhanrá ch'án ichrén jie chrónixjehérá ch'án chróchenkará ch'án kixin jehya jina tí xikaha kjuít'ahará ch'án. A ntá tí chrókuitekaon ch'án chrókjuitoxinhin ch'án tí tjenkayáxin ch'án, ntá chrók'uitjáyadhanrá tí nkehe kjuít'ahará ch'án. <sup>4</sup> Kjónté chrókjuasinhanrá ch'án jie yato veces jnkokoá yaon la ko yato veces chróntáchro ch'án kixin í xikahya tsjasin ch'án jie ínaá, la t'ichjánxin ts'itjáyadhanrá tí nkehe kjuít'ahará ch'án tí xikaha ntáchro ch'án.

### Tí kjuachaxin chónani kixin tinkáchónkini Cristo

<sup>5</sup> Ijnko yaon tí sín k'uájiko Ìnchéni ntáche sín ch'án kixin:

—Tjínkítsani kixin antsí chrókuinkáchónkini tí jaha —ichro sín.

<sup>6</sup> A ntá Ìnchéni ntáchro ch'án kixin:

—Kjónté intsí chrókuinkáchónkirá tí janhan éxi jíexin ijnko tje ntsí kuente nta mostaza la jina chrókuétuēnhénrá tí nta sicómoro kixin chrók'uaxrjenkixin tí tjen ntihi sáchrókjuí chróxenkaxín

jnkosiné ntayaon ntiha, a ntá tí nta la chrókjuinchexiteyá tí xíkaha chróntáchrórá.

### Nkexrí chrókjuinchexiteyá tí nkexro ch'e xra

<sup>7</sup>Jnkojín tí jahará tí chróchontará ijnko nkexro t'ahará xra, a ntá tí chrókjanxín ch'án nontaará kjuínchentá ch'án nche o k'uàyakonhen ch'án tí ko kuèntará, ¿á chróntácherá ch'án kixin senó chrókjuak'e ch'án chrókjóne ch'án? <sup>8</sup>Kjá náhí. Kjá chrókuétuènhénrá ch'án kixin senó chrókjuinchehján ch'án tí nkehe sinte la ko chrókóyaxínhin ch'án kixin tsjanjon ch'án nkehe nachrohe chrókjonte la ko chrók'uia. A ntá tsjixin sinte la ntá tsjak'e ch'án sine ch'án la ko its'i ch'án. <sup>9</sup>¿Á chrókjuancheherá ch'án kjuasáya kixin kjuínchexiteyá ch'án tí nkehe kuétuènhénrá ch'án? Kjá náhí. <sup>10</sup>Mé kjaxin xíkaha tí jahará tió chrókjuixin kaín tí xra k'uetuanhanrá Dios chróntáchróhyará kixin jína kjuich'erá xra kixin ó jehó tí nkehe k'uítuanhanrá kjuínchexiteyará, tsixrorá.

### Ch'ín Jesús kjuínchekitohe ch'án jína ite chojni chóna chinlepra

<sup>11</sup>Ntá sátsji ch'ín Jesús chjasin Jerusalén ntá k'uátsínka ch'án nó estado Samaria la ko estado Galilea. <sup>12</sup>Ntá kjuíji ch'án ijnko chjasin ntsí ntá xeta ch'án ite chojni ntoa níhi chóna sín chinlepra. Kjánchó ikjín tjejóchónhen sín <sup>13</sup>ntá itsen k'uúyèhe sín ch'án ntáchro sín kixin:

—Jesús, Maestro, tikonóhéní kaín ni —ichro sín.

<sup>14</sup>Ntá k'uíkon ch'ín Jesús tí jehe sín ikjín tjejó sín ntáche ch'án sín kixin:

—Sátsjirá tjákohérá tí sín nchát'á kixin ó kuítóhará jína, ichrorá.

Nachrohe sákjuí sín tinkákitóhe sín jína. <sup>15</sup>Ntá ijnko tí jehe sín tió kónohe ch'án kixin kuítóhe ch'án jína ntá kjan ch'án chjéhe ch'án kjuasáya Dios la itsen nixja ch'án. <sup>16</sup>Kjuák'exín toch'ín ch'án chrínkí toté ch'ín Jesús k'uúsén ch'án xrákjanyani ch'án nonte kixin kjuanchia ch'án kjuasáya. A ntá tí ch'ín a mé tsíkjiñ ch'án estado Samaria. <sup>17</sup>A ntá ch'ín Jesús ntáchro ch'án kixin:

—¿Xá jehya ite chojni kuítóhe jína? ¿Xá kjá tí sín ina? <sup>18</sup>¿Á jehó tí ch'ín i kjónté ikjín tsíkjiñ ch'án ikjan ch'án kjuanchehe ch'án kjuasáyé Dios ní? —ichro ch'án.

<sup>19</sup>A ntá ntáche ch'án tí ch'ín a kixin:

—T'ínkatjen sátjia. Kixin tí kuítekáván Dios la kuítóha jína —ichro ch'án.

### Itsi tí kjuachaxién Dios

(Mt. 24.23-28, 36-41)

<sup>20</sup>A ntá tí sín fariseo kjuanchankíhi sín tí ch'ín Jesús kixin nkesá tsi tí kjuachaxin kuènte Dios. A ntá jehe ch'án kjuátehe ch'án ntáchro ch'án kixin:

—A ntá tí tsi kjuachaxin kuènte Dios la me tíha ijnko nkehe xitjahya ts'ikon chojni. <sup>21</sup>Xitjahya tsontáchrórá kixin: “Ntihi tjen,” o “Ntiha tjen”; kixin tí kjuachaxin kuènte Dios itjen jnkosiné tí tjejorá —ichro ch'án.

<sup>22</sup>Ntá ntáche ch'án tí sín k'uájiko ch'án kixin:

—A ntá itsi tí yaon tsotjinkáonrá jnkojín yaon chrók'uikonrá tí Xjeen Dios K'óna Chojni, ntá í ts'ikonhyará ch'án. <sup>23</sup>Tsontáchro sín kixin ntihi tjen ch'án, o ntiha tjen ch'án. Kjánchó sáchrókjuihyará la ko chróchréhyará sín. <sup>24</sup>Kixin éxí ts'ikonrá tsjonkixín ts'inkaséyanxín kuenté nkajní mé xíkaha tsonhen tió itsi tí Xjeen Dios K'óna Chojni. <sup>25</sup>T'ichjánxín senó tsjasóte ch'án nchónhya la ko tí sín siín jie tsitekakuenhya sín ch'án. <sup>26</sup>Éxí kónhen tí yaon kjuák'e ch'ín Noé mé xíkaha tsonhen tió tsokjan tí Xjeen

Dios K'óna Chojni. <sup>27</sup> K'uékjine sín la ko k'uék'i sín la ko kótehe tí xjeen sín. A ntá xrínahya kui tí yaon k'uúixenhen ch'ín Noé tí ntabarco ntá k'uániá chrin, a ntá tí sín kútohe ntója la kaín sín k'uitjáyan sín. <sup>††</sup> <sup>28</sup> Mé kjaxin xikaha kónhen tí kjuák'e ch'ín Lot k'uékjine sín la ko k'uék'i sín la ko k'uék'ena sín nkehe la ko k'uékjinchekji sín nkehe la ko k'uék'enka sín nontee sín la ko k'uékjich'ena sín nchia. <sup>29</sup> A ntá tí yaon k'uaxrjéxín ch'ín Lot tí chjasin Sodoma, na mé nkajní kujxin xrohi la ko azufre, na mé tíha k'uénxín kaín xín tí sín ntiha. <sup>‡‡</sup> <sup>30</sup> Mé xikaha tsonhen tí yaon itsi tí Xjeen Dios K'óna Chojni.

<sup>31</sup> A ntá tí yaon i tí tjejó jnkojín nkexro chrítaón nchia tjejó't'ok'éhe sín, a ntá ichrén nkehe chóna sín kútohe sín nkaxenhen nchia la í chrók'uinkajinhya sín chrókuakitsje sín tí nkehe chóna sín, tjoka sáchrókjui sín ókjé. Kjaxin xikaha jnkojin chojni tjejó sín nontee sín la í chrókjanhya sín ntoe sín. <sup>32</sup> Xráxinkáonrá nkehe kónhen ichjién ch'ín Lot. <sup>¶¶</sup> <sup>33</sup> Tí nkexro tjinkaon kixin kohya nkehe chrókónhen na mé ts'itjáyan. A ntá tí nkexro chrókjuinçek'itjáyanxín asén kixin chróchronka itén Dios la mé tsaá. <sup>34</sup> A ntá tsontáxrjan kixin tí tie a jnkokoá ts'ejóuya yaá chojni la ijnko la sátsji la ko tí í jnko la tsitohe. <sup>35</sup> Yaá chojni chjin its'o sín jnkokoá, la ijnko la sátsji la ko ijnko la tsitohe. <sup>36</sup> Yaá chojni ts'ejóch'e sín xra nonte, la ijnko la sátsji a ntá ijnko la tsitohe —ichro ch'án.

<sup>37</sup> Ntá kuínhin sín tíha ntá kjuan-chankíhi sín ch'án kixin:

—¿Xá nketí tsonhen tíha, Ìnchéni? —ichro sín.

A ntá jehe ch'án kjuátehe ch'án ntácho ch'án kixin:

—Tí tjen tí cuerpo kuènte chojni tsík'en la mé ntiha tsojnkotsé tí kontexjuen —ichro ch'án.

**Ch'ín Jesús kjuíncheyóexin ch'án éxí ijnko tjan k'án la ko ijnko ch'ín juez**

**18** A ntá ch'ín Jesús kjuíncheyóexin ch'án kjuakoxín ch'án kixin jnkochrín chónixjehe chojni Dios la ko chrókóxrjéhya sín. <sup>2</sup> Ntá ntáche ch'án sín kixin:

—Ijnko chjasin kjuák'e ijnko ch'ín juez kjuikosáyehya ch'án Dios la ko k'uéchóntehya ch'án kjuasáyé ninkexró. <sup>3</sup> Kjaxin chjasin ntiha kjuák'e ijnko tjan k'án, jnkoyaxón sákjuítsjehe tjan tí ch'ín juez kjuanchia tjan jie ntácho tjan kixin chrókuitoexín kixin ijnko chojni nínkakonhen tjan ntiha. <sup>4</sup> Nchónhya veces tjitsjehe tjan tí ch'ín juez la chrohya ch'án chrókjuinçekitoxén ch'án. Ntá chr'éxin kjuenkayáxin ch'án ntácho ch'án kixin: “Kjónté í tsjikosáyàhya Dios la ko ninkexró tsjikosáyàhya <sup>5</sup> a ntá tí tjan k'án jnkoyaxón tjanchia tjan jie, la tsjínkítsa tjan tsitoexín tí jie tjanchia tjan kixin í jnkoyaxónhya itsi tjan tsochronða tjan kixin ó kjuixin kóninkavan jie”, ichro ch'án.

<sup>6</sup> Ntá ntácho Ìnchéni kixin:

—Mé xikaha ichro tí ch'ín juez jí-nahya. <sup>7</sup> ¿Xá chrókjuinkítsahya Dios tí sín kjueyá ch'án tí chróchronóehé sín ch'án nchakotjin la ko tie? ¿Á tjokahya chrókjuatehe chrókjuinkítsa sín ch'án? <sup>8</sup> Ntáxrjan kixin kjá tjoka chrókjuinkítsa sín ch'án. A ntá tió itsi tí Xjeen Dios K'óna Chojni, ¿á naxa chrók'uitja ch'án chojni tinkáchónki tí jehe ch'án ntiha chjasintajni? —mé chro ch'án.

<sup>††</sup>17:27 17.26–27 Génesis 6.5—7.24

<sup>‡‡</sup>17:29 17.28–29 Génesis 18.20—19.25

<sup>¶¶</sup>17:32 Génesis 19.26

**Ch'ín Jesús kjuíncheyóexin  
ch'án éxi ijnko ch'ín fariseo la  
ko ijnko ch'ín nchekjènkì**

<sup>9</sup>Ntá ch'ín Jesús kjuíncheyóexin ch'án nixjehē ch'án iso chojni tjenkayáxin sín kixin imá jína sín a ntá tí í so sín la náhí, ichro sín. Ntá ntáchro ch'án kixin:

<sup>10</sup>—Iyó sín ntoa sákjuì nkaxenhen nínko kixin tsonixjehē sín Dios. Ijnko la fariseo la ko ijnko la ch'ín nchekjènkì.

<sup>11</sup> A ntá tí ch'ín fariseo tjexín ch'án toté ch'án nixjehē ch'án Dios ntáchro ch'án kixin: “It'éni Dios, kjuasáya tjahá kixin jeheni la chóntahyani jiē éxi tí sín í so kixin teé sín la ko ch'iyehē kichó sín la ko ch'iyehē sín chojni chjin. Kjaxin jeheni la jehya éxi tí ch'ín nchekjènkì tjinhin. <sup>12</sup>Jeheni la nehyaní iyó yaon jnkojnko semana la ko kjaxin tjanjonni tí chichaon tjachani tí diezmo kuèntá”, ichro ch'án. <sup>13</sup> A ntá tí ch'ín nchekjènkì la imá kjín kuítóhe ch'án kóxakonhen ch'án chrókonta ch'án nkajní la mé chjéhe ch'án ntakuin ch'án ntáchro ch'án kixin: “It'éni Dios tikonóehéni tí jeheni kixin nchónhya jiē chóntani”, ichro ch'án. <sup>14</sup> Tjonkará kixin tí ch'ín nchekjènkì tió kjan ch'án ntøe ch'án la Dios kuikonóehē tí jehe ch'án la kjuiin-hin ch'án tí jiē chóna ch'án, a ntá tí ch'ín fariseo la náhí. Kixin kaín chojni nchehnkehe asén kixin imá jína tí jehe sín la mé imá tsontsí. A ntá tí chojni nchehnkehya asén la imá ts'ánkí tí kjuaxrexinkaon kuènte sín.

**Ch'ín Jesús kjuíncheyaon  
ch'án chánjan**

(Mt. 19.13-15; Mr. 10.13-16)

<sup>15</sup> Kjaxin kjuikao sín chánjan ntsíntsí tí tjen ch'ín Jesús kixin chrókjuincheyaon ch'án xjan. Kjánchó tió k'uíkón tí sín k'uájiko ch'án la í kjuanjonhya sín kjuachaxin kixin tsochjinako sín xjan.

<sup>16</sup> A ntá ch'ín Jesús k'uíyehē ch'án sín ntáchro ch'án kixin:

—Títóhérá chánjan méhe xrakoa tí tjèn janhan la t'ínkaquènhýará xjan kixin tí sín kuènte kjuachaxin kuènte Dios la mé tóyóhe tí jehe xjan. <sup>17</sup> Ntá chaxín ntáxrjan kixin tí nkexro ts'ónahya éxi ijnko chánjan xitjahya ts'ejó sín tí ts'etøan Dios tí kjuachaxin kuènte ch'án.

**Ijnko ch'ín ntasoá ríco kjuínixjehē  
ch'án tí ch'ín Jesús**

(Mt. 19.16-30; Mr. 10.17-31)

<sup>18</sup> Ijnko ch'ín t'etøan kuènte nínko kjuanchankíhi ch'án tí ch'ín Jesús kixin:

—Jaha la ijnko maestro jína la, ¿nkehe naxa t'itjáyan chrókjuich'eni kixin chróchóntani kjuachón jnkochrín? —ichro ch'án.

<sup>19</sup> Ntá kjuátēhe ch'ín Jesús ntáchro ch'án kixin:

—¿Nkekuènte ntáchrúa kixin jína tí janhan? Jnkokoá nkexro la mé jína la tíha mé Dios. <sup>20</sup> Jaha la ó noha nkehe tí k'uetøan Dios kixin chrókjuacheéhya kichuárá, la ko chrók'oyánhya chojni, la ko chrókueehya, la ko chróntáchrohya ninkehó nkehe chaxínhya kuènte ókjé chojni, la ko chrókjuíkosáyehé it'á la ko iná —ichro ch'án.

<sup>21</sup> A ntá jehe ch'án kjuátēhe ch'án ntáchro ch'án kixin:

—Kaín tíha kjuínchexiteyáni desde xjanntsíni —ichro ch'án.

<sup>22</sup> A ntá kuínhin ch'ín Jesús kaín tíha ntá jehe ch'án ntáchro ch'án kixin:

—A ntá jnkokoá nkehe naxa t'itjáyan chrókjuich'e, chrókjuinchekjia kaín nkehe chonta la chróchjehé tí chichaon tí sín nòa. A ntá tí nkehe tjete la tsochonta nkaya nkajní. A ntá tió tsjixin sijnchekitonhén sín nkehe, a ntá tsjihá ntá chréhe tí janhan —ichro ch'án.

<sup>23</sup> A ntá tí ch'ín a kuínhin ch'án xikaha la kóxakonhen ch'án kixin imá itsjé nkehe chóna ch'án. <sup>24</sup> Tió k'uíkón ch'ín

Jesús kixin kóxakonhen tí ch'ín a la ntá ntáchro ch'án kixin:

—Imá xrá kixin tí chojni chóna it-sjé nkehe chrók'uixenhen sín tí tjen Dios t'etóan. <sup>25</sup>Antsí xrahya chrók'uatsínka ijnko kocamello ijnko tjar'i ntachica tjexrja, a ntá antsí má xrá kixin ijnko chojni chóna itsjé nkehe chrókjuak'e tí t'etóan Dios —ichro ch'án.

<sup>26</sup>A ntá kuínhin sín kixin xikaha ntáchro ch'án ntá ntáchro sín kixin:

—¿Xá nkexro chrókjuacha chrókuaá? —ichro sín.

<sup>27</sup>Ntá ntáchro ch'ín Jesús kixin:

—Tí nkehe tsjachahya chojni chrókjuinchexiteyá, la Dios la tsjacha ch'án sich'e ch'án kaín tíha —ichro ch'án.

<sup>28</sup>A ntá ch'ín Pedro ntáchro ch'án kixin:

—Inchéni, jeheni la ó kuítóheni kaín nkehe chónani kixin tsochréheni tí jaha —ichro ch'án.

<sup>29</sup>Ntá kjuátehe ch'ín Jesús ntáchro ch'án kixin:

—Ntá chaxín tsotjonkará kixin jnko-jínra chrókuítóhéra ntóa, la o chrókuítóhéra it'á la ko iná, la o chrókuítóhéra kichuárá, la o chrókuítóhéra ichjiánra, la o chrókuítóhéra xjaanra kixin chrókjuich'erá xrá kuénte Dios <sup>30</sup>la antsí nkehe ts'ayéhéra níhi chjasintajni la ko tí chr'éxin la ts'ayéhéra kjuachón jnkochrín —ichro ch'án.

### **Ch'ín Jesús chrónka ch'án inaá kixin its'en ch'án**

(Mt. 20.17-19; Mr. 10.32-34)

<sup>31</sup>Ntá ch'ín Jesús k'uúyehé ch'án jehó tí teyó sín k'uájiko ch'án ntá chrónka ch'án kixin:

—Ijie sátsjini Jerusalén. A ntá ntaha tsoxiteyá kaín tí nkehe tsíkjin tí sín tsíchronka itén Dios ósé nkexrí tsonhen tí Xjeen Dios K'óna Chojni. <sup>32</sup>Tsjikaán sín ch'án tí tjejó tí sín jehya judío la

ko tsjanoá sín ch'án la ko ts'ántaxín-hin sín ch'án la ko ntate sín tsíkíte sín ch'án. <sup>33</sup>Tsjate sín ch'án, a ntá chr'éxin la ts'óyán sín ch'án. A ntá nixin yaon tsoxechón ch'án —ichro ch'án.

<sup>34</sup>A ntá jehe sín la ninkehó kiexínhya sín tí nkehe nixja ch'án kixin tíha ijnko nkehe naxá tsjachahya sín chrókienxín sín.

### **Ch'ín Jesús kjuínchekitóhe ch'án jína ijnko chojni t'ikonhya chjasin Jericó**

(Mt. 20.29-34; Mr. 10.46-52)

<sup>35</sup>A ntá ch'ín Jesús tió chjina chrók'uixenhen ch'án chjasin Jericó ntá ntiha chrínta ntja tjetjaxin ijnko ch'ín t'ikonhya tjanchak'á ch'án. <sup>36</sup>Ntá xrinahya kuínhin tí ch'ín t'ikonhya kixin sít'atsínka nchónhya chojni, ntá kjuanchankí ch'án kixin:

—¿Xa nkerí sítónhen? —ichro ch'án.

<sup>37</sup>Ntá chénka sín ch'án kixin ch'ín Jesús tsíkjin chjasin Nazaret ts'atsínka ch'án ntiha.

<sup>38</sup>Ntá k'uèya ch'án ntáchro ch'án kixin:

—Jaha Jesús tsík'axrjeníxian ch'ín David, tikonóhéni —ichro ch'án.

<sup>39</sup>A ntá tí sín tsítaón ntja la k'uetuenhen sín ch'án kixin tsotání ch'án. Kjánchó jehe ch'án antsí tsen k'uèya ch'án ntáchro ch'án kixin:

—Jaha tsík'axrjeníxian ch'ín David, tikonóhéni —ichro ch'án.

<sup>40</sup>A ntá ch'ín Jesús ntá ntahó kjuák'echónhen ch'án ntá k'uetóan ch'án kixin tsjikakjín sín tí ch'ín a. Ntá tió kuikao sín ch'án tí chjinaxón tjen ch'ín Jesús ntá kjuanchankí ch'ín Jesús kixin:

<sup>41</sup>—¿Nkehe tjinkávan sít'aha? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Jaha Inchéni, tjinkaonni chrókjuínchek'ikuanni —ichro ch'án.

<sup>42</sup>Ntá ntáchro ch'ín Jesús kixin:

—Ó ts'ikuan. Ó kuítóha jína kixin kuítekáván tí janhan —ichro ch'án.

<sup>43</sup>Ntá tuénxín k'uíkon tí ch'ín k'uék'ikonhya, a ntá jehe ch'án chréhe ch'án tí ch'ín Jesús la ko kjuanchehe ch'án kjuasáyé Dios. La ko kaín tí sín k'uíkon kixin xikaha kónhen kjuanchehe sín kjuasáyé Dios.

### Ch'ín Jesús la ko ch'ín Zaqueo

**19** A ntá ch'ín Jesús k'uúxhen ch'án chjasin Jericó la ntá k'uát-sínka ch'án tí chjasin a. <sup>2</sup>A ntá ntiha tjen ijnko chojni ríco it'in ch'án Zaqueo, t'etuenhen ch'án tí sín nchekjênki. <sup>3</sup>Tjinkaon ch'án chrókjuatsoan ch'án nkexro tí ch'ín Jesús, kjánchó nchónhya chojni síin la xitjahya t'ikon ch'án kixin intsi ch'án. <sup>4</sup>Ntá kuinká ch'án kuítaón ch'án ntija kixin tjinkaon ch'án chrók'uikon ch'án. Ntá kuátsé ch'án ijnko nta sicómoro chjinaxón tí ts'at-sínka ch'ín Jesús. <sup>5</sup>A ntá tió k'uatsínka ch'ín Jesús ntiha konta ch'án tí nta ntáchro ch'án kixin:

—Zaqueo, tjoka tjasinkajián kixin ntõa ntahó tsitõna jie —ichro ch'án.

<sup>6</sup>Ntá ch'ín Zaqueo la tjoka k'uúnkajin ch'án kóchéhe ch'án. <sup>7</sup>Ntá kaín sín k'uíkon sín xikaha ntá kjuankixin sín tjonta sín tí ch'ín Jesús, ntáchro sín kixin ntõe ijnko chojni chóna nchónhya jie tsitõhe ch'án. <sup>8</sup>Ntá ch'ín Zaqueo kjuák'exín toté ch'án ntáche ch'án ñchéni kixin:

—Jaha ñchéni, chrókónoha kixin tsjánjuan jnkosiné tí nkehe chonta sintakitõnhan tí sín nõa. A ntá tí jnkõjín nkexro kjuít'áyaha kuaáha la noó veces ts'okjanhan sín tí chichaon jie —ichro ch'án.

<sup>9</sup>A ntá ntáchro ch'ín Jesús kixin:

—A ntá jie la tsaá chojni tí nchia i kixin tí ch'ín a mé k'uaxrjenixin ch'ín Abraham. <sup>10</sup>A ntá tí Xjeen Dios K'óna

Chojni mé kuikjeyá la ko sinchekaá tí chojni chóna jie.

### Ch'ín Jesús kjuíncheyóexin ch'án éxi ite chichaon imá tjete sínkí

<sup>11</sup>A ntá tí chojni síin ntiha nachrohe tjejótinhin sín nkerí tjechro ch'ín Jesús, a ntá jehe ch'án kjuíncheyóexin ch'án nkehe kixin ó tjen ch'án chjinaxón chjasin Jerusalén, a ntá jehe sín kjuenkayáxin sín kixin tí kjuachaxin kuente Dios la ách'e ó tuénxín tsi, ichro sín. <sup>12</sup>A ntá ntáchro ch'án kixin:

—Itjen ijnko nkexro tsík'axrjenixin ijnko nkexro imá k'uék'etõan. Ntá sákjuí ch'án ókjé nación kixin ts'áyéhe ch'án kjuachaxin ts'óna ch'án rey, a ntá chr'éxin la xíkjan ch'án inaá. <sup>13</sup>A ntá tió chjina sátsji ch'án ntá k'uíyehé ch'án ite tí sín ch'ehe ch'án xrá ntá chjéhe ch'án jnkõjnko tí jehe sín jnkõjnko chichaon imá tjete sínkí. Ntá k'uetoan ch'án kixin: “Tsjan kixinrá ch'ekoará xrá tí chichaon hasta tí tsokjanjian”, ichro ch'án. <sup>14</sup>A ntá tí sín chjasén ch'án ntiha imá kónínkakõnhen sín ch'án, ntá ichr'án sín iso chojni chréhe sín tí sákjuí ch'án tsochenka sín tí sín síin ntiha kixin tjinkakonhya sín tí nkexro a ts'óna rey ts'etuenhen sín. <sup>15</sup>Kjonté xikaha ichro tí sín a la k'uáyéhe ch'án kjuachaxin ts'óna ch'án rey. Ntá kjan ch'án chjasén ch'án. Ntá k'uetoan ch'án xrakoa tí sín ch'ehe ch'án xrá, na mé tí sín tsík'áyéhe tí chichaon, kixin tsonõhe ch'án nkehe tí xrá kjuích'eko sín tí chichaon k'uáyéhe sín. <sup>16</sup>A ntá tí ch'ín xrankixixín kóchjina la ntáchro ch'án kixin: “Tí chichakõan la kjuachani ite chichaon inaá”, ichro ch'án. <sup>17</sup>A ntá kjuátehe tí ch'ín rey kixin: “Ó nchõxon tí xikaha jaha la ijnko chojni jína ch'e xrá. Jína kjuích'e xrá kjonté jehya xrá jie ntá tsjánjuan kjuachaxin tsétoan ite chjasin”, ichro ch'án. <sup>18</sup>A ntá kóchjina tí ch'ín í jnko a inaá ntáchro ch'án kixin: “Tí

chichakoan la kjuachani in'ó chichaon inaá", ichro ch'án. <sup>19</sup> A ntá xikaha inaá kjuátehe tí ch'ín rey kixin: "Tsjánjuan kjuachaxin tsétoan in'ó chjasin", ichro ch'án. <sup>20</sup> A ntá kóchjina tí ch'ín níxin ntáchro ch'án kixin: "Tí chichakoan la tjinhin. K'uánkintani panítóeni <sup>21</sup> kixin chrakonhanni kixin jaha la jiaha la tjinkávan tsákjá tí nkehe jehya jaha kjuaké la ko tsotja tí nkehe jehya jaha kuènkaxian", ichro ch'án. <sup>22</sup> A ntá tí rey ntáchro ch'án kixin: "Jehya chojni jina ch'e xra jaha. Tí nkehe ntáchrúa tsjancháxian jje. Jaha la ó noha kixin jiena janhan tsákjaá tí nkehe kjuakéhya, ichrua, la ko tsotja tí nkehe kuènkahya. <sup>23</sup> ¿Ntá nkekuènte kixin chr'anhya tí chichaon ijnko banco chrókjuich'exin xra? A ntá tió kjan ntona la antsí tsjé chichaon chrók'uayáha tí chrókjuacha kichó chica", ichro ch'án. <sup>24</sup> A ntá ntáche ch'án tí sín siín ntiha kixin: "Takítsjehérá ch'án tí chichaon tsík'áyéhe ch'án la ntá chjehérá tí ch'ín chóna ite chichaon", ichro ch'án. <sup>25</sup> A ntá jehe sín ntáchro sín kixin: "¿Nkekuènte chrók'uáyéhe ch'án kixin ó chóna ch'án ite chichaon?" ichro sín. <sup>26</sup> A ntá tí ch'ín rey kjuátehe ch'án ntáchro ch'án kixin: "Kjónté jnkójín nkexro itsjé chóna la ts'áyéhe má. A ntá tí nkexro chónahya la kjónté tí ntsí chóna ch'án la ts'axrjehe ch'án. <sup>27</sup> A ntá tí sín nínkakonna sín tjinkakonhya sín kixin ts'ónana rey la xrákoará sín ntihi ts'fkoñxín kuan ts'ochrínjinrá kja sín."

**Ch'ín Jesús k'uixenhen  
ch'án chjasin Jerusalén**

(Mt. 21.1-11; Mr. 11.1-11; Jn. 12.12-19)

<sup>28</sup> Tió kjuixin ntáchro ch'ín Jesús tíhi ntá chrin ch'án sátsji ch'án chjasin Jerusalén. <sup>29</sup> A ntá ó kjujji chjinaxón tí chjasin Betfagé la ko chjasin Betania chjinaxón tí jna nchek'in sín Olivo, ntá k'uetuenhen ch'án iyó tí sín k'uájiko ch'án <sup>30</sup> ntáche ch'án sín kixin:

—Sátjirá tí chjasin ntsí chok'èxin ntihi, a ntá tió tsjasánrá ntiha ts'itjará ijnko kolocho tjechroé va naxa ninkexró tjiták'áhya va. Tjasintankehérá va la tsjkuanará va ntihi. <sup>31</sup> A ntá tí jnkójín nkexro tsjančankíhará nkekuènte tjasintankehérá va la ntácherá sín kixin: "Inchéni ts'ichjánxinhin va", tsixrorá.

<sup>32</sup> A ntá tí sín k'uítuenhen sákjuí sín k'uitja sín éxi ntáchro ch'án. <sup>33</sup> A ntá tió tjejótsjintankehe sín va la ntá tí sín inché va kjuanchankíhi sín kixin:

—¿Nkekuènte tjasintankehérá tí kolócho? —ichro sín.

<sup>34</sup> A ntá jehe sín kjuátehe sín kixin:

—Inchéni ts'ichjánxinhin va —ichro sín.

<sup>35</sup> Ntá sákjuikohe sín va tí ch'ín Jesús, la ntá tí iké sín kjuínchekamá sín va, ntá kjuíták'á ch'ín Jesús tí kolócho a. <sup>36</sup> A ntá tinkákji tí kolócho tjejkjen ch'án la tinkák'ikjínxin sín tí iké sín ntja kixin nátaón tí ka ts'atsínka tí kolocho tjejkjen ch'án. <sup>37</sup> Ntá tió kjujíchjina sín tí chjinaxón tí t'inkajinxin chojni tí jna Olivo, a ntá kaín tí sín kuítekaon tí jehe ch'án chréhe sín kjuankixin sín itsen nixja sín chéhe sín kjuanchehe sín kjuasáyé Dios kixin kaín tí kjuaxroan k'uifkonxín kon sín. <sup>38</sup> Ntá ntáchro sín kixin:

—Jina tí nkexro Rey kjuixin kjuachaxin ihnié Dios. Tsjak'e kjuaxróxin nkaya nkajni la ko kjuasáyé Dios tjen nkaya nkajni —ichro sín.

<sup>39</sup> A ntá iso tí sín fariseo tjejóyákan sín í so chojni tjejóchexroan sín ntiha ntáchro sín kixin:

—Maestro, tétuenhén tí sín chréhe tí jaha kixin tsotáni sín —ichro sín.

<sup>40</sup> A ntá ch'ín Jesús kjuátehe ch'án ntáche ch'án sín kixin:

—A ntá tí sín í tsotáni sín la ixro tsotsje —ichro ch'án.

<sup>41</sup> A ntá tió kjujíchjina ch'án chjasin Jerusalén ntá k'uifkon ch'án tí chjasin la



ntá tsjánka ch'án kixin kuítekakonhya sín <sup>42</sup>ntáchro ch'án kixin:

—Chrókuiénxinrá la ko chrókónohará nkexrí chrók'uayèxinrá tí kjuaxróxin, kjánchó jahará kuítekákonyhará. **A** ntá ó kjuixin k'uátsínka tí kjuaxróxin chrók'uikonrá la xitjahya ts'ikonrá jie. <sup>43</sup>**A** ntá tsi iso yaon jínahya itsi tí sín nínkakonhanrá la sich'éna sín ijno tjat'ò ts'ántatjen tí chjasin tjejorá ntihi ts'inkákonhen kixin xitjahya ts'axrjéxinrá chjasin ntihi kixin nkuíxín ts'ejó sín ts'inkákonhanrá sín <sup>44</sup>ntá ts'óxfka sín kaín tí tjat'ò síin ntihi la ko ts'óyán sín kaín tí chojni síin la ko tsítóehya sín kixin ninkehó xro naxa ts'ejókjen kichó, kixin jahará kjuátsoanhyará kixin kuitsjehe Dios tí chjasin tjejorá ntihi.

### **Ch'ín Jesús kjuínchetjóá ch'án nkaxenhen nínko**

(Mt. 21.12-17; Mr. 11.15-19; Jn. 2.13-22)

<sup>45</sup>**A** ntá ch'ín Jesús k'uíxnen ch'án tí nínko jíé, **a** ntá kjuankíxin ch'án kuakitsje ch'án tí sín nchekji nkehe la ko tí sín t'èna nkehe ntiha. <sup>46</sup>Ntá ntáchro ch'án kixin:

—**A** ntá ntáchro xroon itén Dios chrónka kixin: “Tí ntona i mé it'in nchia tsonixjanaxián chojni”,<sup>§§</sup> ichro. **A** ntá jahará tí nchia i tsíkjih'énará itjueé xíchee —ichro ch'án.

<sup>47</sup>**A** ntá tí nínko ntiha kjuák'e ch'ín Jesús kjuako ch'án kaín yaon. **A** ntá tí sín nchat'á t'etóan la ko tí maestro tjako tí ley la ko kjaxin tí sín t'etóan tí chjasin ntiha kjuéyá sín nkexrí chrók'óyán sín ch'án. <sup>48</sup>Kjánchó k'uitjahya sín nkexrí

chrók'óyán sín ch'án kixin kaín chojni tjejótinhin tí nkehe tjechronka ch'án.

### **Tí kjuachaxin chóna ch'ín Jesús**

(Mt. 21.23-27; Mr. 11.27-33)

**20** **A** ntá ijno yaon kjuák'e ch'ín Jesús tí nínko ntiha kjuakohe ch'án chojni tí tan jína tsaáxin sín. **A** ntá kjui tí sín nchat'á t'etóan la ko tí sín maestro tjako tí ley la ko kjaxin tí sín t'etóan kuènte nínko. <sup>2</sup>Ntá kjuanchankíhi sín ch'án kixin:

—Chronka nkehe tí kjuachaxin chonta kixin xíkaha ch'e. ¿Nkexro kjuanjon tí kjuachaxin a? —ichro sín.

<sup>3</sup>Ntá kjuátehe ch'ín Jesús ntáchro ch'án kixin:

—Kjaxin janhan tsjánchánkíhará ijno nkehe siná nkexrí tsjateherá. <sup>4</sup>¿**A** ntá nkexro k'uetuènen tí ch'ín Juan kixin tsíkite ch'án chojni? ¿**Á** Dios ní o chojni ó? —ichro ch'án.

<sup>5</sup>Ntá kjuankíxin sín tjo sín kichó sín ntáchro sín kixin:

—¿Nkehe chrókjuateheni? **A** ntá tí tsontáchroni kixin Dios tsíchr'án tí ch'ín Juan la ntá tsjanchankí ch'án kixin nkekuènte kuítekakuenhyani ch'án. <sup>6</sup>**A** ntá tí tsontáchroni kixin chojni ó k'uetuènen sín ch'án la ntá kaín chojni tsonínkaon sín la ixro ts'óyánxinni sín kixin tjenkayáxin sín kixin ch'ín Juan chaxín k'uékjako ch'án itén Dios —mé xíkaha ikjo sín.

<sup>7</sup>Ntá kjuátehe sín kixin noehya sín nkexro tsíchr'án tí ch'ín Juan. <sup>8</sup>Ntá ntáchro ch'ín Jesús kixin:

—Kjaxin janhan tsoxrjankahya nkexro kjuanjon kjuachaxin tjet'a tíhi —ichro ch'án.

**Ch'ín Jesús kjuíncheyóëxin ch'án  
éxí tí sín ch'ehya xṛá jína**

(Mt. 21.33-44; Mr. 12.1-11)

<sup>9</sup>Ntá tuénxín kjuankíxin ch'ín Jesús nixjehe ch'án chojni kjuíncheyóëxin ch'án ntáchro ch'án kixin:

—Kjuák'e ijnko chojni k'uënkaxin ch'án nta to uva tí nontee ch'án, a ntá chr'éxin kjuínchekjen ch'án tí iso tí sín ch'e xṛá. A ntá kjuixin ntá sákjuí ch'án imá sé. <sup>10</sup>A ntá kui tí yaon tsakjin-jin sín to uva. Ntá k'uëtuënhen ch'án ijnko nkexro ch'ehe ch'án xṛá kixin tsjik-janchehe ch'án tí sín ch'e xṛá nontee ch'án kixin tsjanjon sín tí to tónhen ch'án tocar. A ntá jehe sín kjuate sín tí ch'ín a la ntá k'uinkíté sín ch'án la ninkehó tsíchjéhya sín ch'án. <sup>11</sup>A ntá tí ch'ín nontee ichr'án ch'án í jnko nkexro ch'ehe ch'án xṛá. A ntá kjaxin k'uán-taxínhin sín ch'án la ko kjuate sín ch'án la ko kjaxin ninkehó tsíchjéhya sín ch'án inaá. <sup>12</sup>A ntá tí ch'ín nontee ichr'án ch'án í jnko nkexro. A ntá tí sín ch'e xṛá kjaxin xikahó tsíkjich'ehe sín inaá, tsík'inkíté sín ch'án.

<sup>13</sup>Ntá tí ch'ín nontee ntáchro ch'án kixin: “¿Nkexrí chrókjuít'a jie? Tsochr'an tí xjanna imá tjuaha. Ách'e chrókuitekakonhen sín ch'án chróchóntehe sín ch'án kjuasáya”, ichro ch'án. <sup>14</sup>A ntá kjónté kui ch'án la k'uíkon tí sín ch'e xṛá ntá chénka sín kichó sín kixin: “Tí ch'ín i mé ts'áyéhe ch'án kaín nkehe kuente it'é ch'án. Ts'óyánni ch'án kixin jeheni tsitöekoni kaín tí nkehe a,” ichro sín. <sup>15</sup>A ntá kuakitsjexín sín ch'án tí nonte ntiha la k'lóyán sín ch'án.

A ntá kjuanchankí ch'ín Jesús kixin:

—A ntá tí inché nonte la, ¿nkehe chrókjuich'e ch'án kixin xikaha kónhen tí xjeen ch'án? <sup>16</sup>Chrókui ch'án

chrókjuinçek'itjáyan ch'án tí sín ch'e xṛá kixin xikaha kjuích'e sín k'lóyán sín tí xjeen ch'án, a ntá chróchjéhe ch'án í so nkexro chrókjuich'e xṛá tí nonte a —ichro ch'án.

A ntá tió kuínhin sín xikaha ntáchro sín kixin:

—Kjá Dios la xikahya tjinkaon ch'án —ichro sín.

<sup>17</sup>A ntá ch'ín Jesús komá ch'án tí jehe sín ntáchro ch'án kixin:

—¿A ntá nkehe t'axrxén tí nkehe ntáchro xroon itén Dios ntáchro xikihi?: Tí xṛó náxrjónhya kuítöenta tí sín ch'éna tjat'o, a ntá mé jie k'óna tí xṛó tje-toan.\*

<sup>18</sup>A ntá jnkojín chojni tsjitsínka chrítaon tí xṛó i tsökuen ch'án. A ntá ts'ánótjen tí xṛó i tsoxratja ijnko chojni la tsökuen, ts'óna nche.

**Tí xṛá tsjenkehe sín gobierno**

(Mt. 21.45-46; 22.15-22; Mr. 12.13-17)

<sup>19</sup>A ntá tí nchat'á t'etöan la ko tí maestro tjako tí ley tjinkaon sín chrótsé sín tí ch'ín Jesús tuénxín tí hora a kixin ó kónohe sín kixin jehe sín kuakitsjexín tí nkehe nixja ch'án. Kjánchó xitjahya tsotsé sín ch'án kixin chrakonhen sín tí chojni síin. <sup>20</sup>Ntá k'uëtuënhen sín chojni tsotsáyehe sín ch'án, éxí chojni chóna kjuasáyé ch'án chrókjo sín ch'án jnko-jína kixin ách'e ichrén nkehe ntoáhya tsonixja ch'án. A ntá jína tsjanchaxín sín jie tsjikaán sín ch'án tí tjen tí ch'ín gobernador. <sup>21</sup>Mé xikaha kjuanchankíhi sín ch'án nkehe, a ntá ntáchro sín kixin:

—Maestro, ó noheni kixin kaín nkehe ntáchrúa la ko kaín nkehe tjákua la chaxín ntoá la ko jehya nkexrí tsjehe chojni tjenkayáxixián kixin á jína sín, la ntá ntoá tjákua ntje Dios. <sup>22</sup>A ntá jie la chronka, ¿á jína chrókjuenkeheni tí gobierno romano o náhi? —ichro sín.

\*20:17 Salmo 118.22

<sup>23</sup> A ntá ch'ín Jesús la ó kónohe ch'án kixin ntoáhya tjenkayáxin sín ntá ntáchro ch'án kixin:

—¿Nkekuènte chrokjuachaxínráni?

<sup>24</sup> Tjákonará ijnko tí chichaon méhe. ¿Nkexro tí tsík'axrjexín tjenkání tí chichaon i la ko nkexro ihnié chóna méhe? —ichro ch'án.

Ntá kjuátehe sín kixin:

—Tí ch'ín t'etoan mé tjenkání ch'án —ichro sín.

<sup>25</sup> Ntá ntáchro ch'án kixin:

—Chróchjehérá tí ch'ín gobierno t'etoan tí nkehe kuènte ch'án; a ntá tí nkehe kuènte Dios chróchjehérá Dios —ichro ch'án.

<sup>26</sup> A ntá ninkehó kjuachahya sín kjuachaxín sín ch'án tí nkehe ntáchro ch'án nkayakon chojni chjasin ntiha. A ntá chrakon sín kuínhin sín kaín nkehe kjuátehe ch'án la ntá tí sín kjuanchankí la tání sín kohya nkehe ichro sín.

### **Kjuanchankí sín kixin á tsoxechón chojni**

(Mt. 22.23-33; Mr. 12.18-27)

<sup>27</sup> A ntá chr'éxin iso tí sín saduceo sákjuítsjehe sín tí ch'ín Jesús. Kjánchó tí sín saduceo titekakonhya sín kixin tsoxechón chojni tsík'en. Xíkaha ntáche sín tí ch'ín Jesús kixin:

<sup>28</sup> —Maestro, ch'ín Moisés tsíkjin ch'án tí xroon ley ntáchro kixin tió ts'en ijnko chojni la ntá tsitøhe ichjién, tí chónahya sín xjeen, la t'ichjánxin kixin kichó tí ch'ín tsík'en tsøtehe tí tjan k'án kixin tsochóna sín xjeen sín éxi xjeen tí ch'ín sao tsík'en ts'ikon sín.†

<sup>29</sup> A ntá k'uéjé sín yato sín jnkokoá kichó sín. A ntá tí ch'ín sao la kótehe ch'án. Ntá k'uén ch'án la chónahya ch'án ninkehó xjeen ch'án. <sup>30</sup> A ntá tí ch'ín yóxin kichó ch'án la kótehe tí tjan

k'án. Kjaxin k'uén ch'án chónahya sín xjeen sín. <sup>31</sup> A ntá tí ch'ín nixin xíkótehe jehe tjan inaá. Kjaxin xíkaha kayatoé sín. Kaín sín k'uén sín ninkehó xjeen sín chónahya sín. <sup>32</sup> A ntá kjuixixín kjaxin jehe tjan ik'uén tjan. <sup>33</sup> A ntá tió tsoxechón chojni tsík'en, ¿ntá nkexro tí jehe sín ts'óna ichjién tí jehe tjan kixin yato tí jehe sín kótehe tjan? —ichro sín.

<sup>34</sup> Ntá ch'ín Jesús kjuátehe ch'án ntáchro ch'án kixin:

—Ntihi chjasintajni tí chojni ntoa la ko ti chojni chjin tótehe sín takja kichó sín.

<sup>35</sup> A ntá tí sín kuítekaon sín tí janhan ntá tsjacha sín tsoxechón sín inaá la í tsøtehya sín la koí tsøtehya tí xjeen sín.

<sup>36</sup> Kixin tí sín a la xitjahya ts'en kixin éxi tí sín ángel ts'ejó sín kixin xjeen Dios tí jehe sín kixin Dios kjuínchexechón ch'án sín. <sup>37</sup> Kjaxin ch'ín Moisés tió chrónka ch'án kuènte tí nta tjeche kjuínchenoheni ch'án kixin tí sín tsík'en tsoxechón sín. Ntáchro ch'án kixin Ìnchéni Dios na mé tí Dios tinkáchónki ch'ín Abraham la ko ch'ín Isaac la ko ch'ín Jacob.‡ <sup>38</sup> Tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóchón, la Dios la t'ikon ch'án kixin kaín chojni la síchón —ichro ch'án.

<sup>39</sup> A ntá iso tí sín tjako tí ley la ntáchro sín kixin:

—Jína kjuàkua la ko jína ntáchrúa, Maestro— ichro sín.

<sup>40</sup> A ntá chrakon sín la í ninkehó kjuanchankíehya sín ch'án.

### **¿Xá nkexro tí it'é tí Cristo?**

(Mt. 22.41-46; Mr. 12.35-37)

<sup>41</sup> Ntá ntáchro ch'ín Jesús kixin:

—¿Nkexrí kixin ntáchro sín kixin tí Cristo mé ts'axrjenixin tí ch'ín David?

<sup>42</sup> A ntá ch'ín David ikjin ch'án tí libro Salmos la ntáchro ch'án kixin:

†20:28 Deuteronomio 25.5

‡20:37 Éxodo 3.6

Ìnchéni Dios ntáche tí Ìnchéni kixin:

“Tjak'e tjaná chjina ntiho tsétoan

<sup>43</sup> tsjixinjian kaín xín tí sín nínkakonhan la tsjachahya sin ts'etóan sín kixin jahvá mé tsétoan.”<sup>f</sup>

<sup>44</sup> ¿Xá nkexrí kixin Cristo chrók'óna it'é David, kixin jehe David kuikítexín ch'án Ìnché ch'án tí Cristo? —ichro ch'ín Jesús.

### Ch'ín Jesús kjuanchia ch'án iję tí sín tjako tí ley

(Mt. 23.1-36; Mr. 12.38-40; Lc. 11.37-54)

<sup>45</sup> Kaín chojni tjejótinhin sín nixjehe ch'ín Jesús tí sín k'uájiko ch'án ntáchro ch'án kixin:

<sup>46</sup> —Chrókóxakonhanrá chrókuankíe-hyará tí sín maestro tjako tí ley. Tóxr-jínhin sín chrók'uinkáya sín ka kjin-jin la ko tjinkaon sín kixin kaín chojni chrókjuikosáyehe sín tsoxeta sín ntasin la ko tjejá sín silla antsí náxr-jón chrók'uejóyá sín nkaxenhen ninko la ko tjejá sín kixin jína chrók'uejó sín tí sátsji sín kia, <sup>47</sup> la ko kjaxin takit-sjehe sín ntęe tí chojni chjin k'án. A ntá kjuixin kjuích'iyehe sín chojni ntá náxr-jón nixjehe sín Dios. A ntá jehe sín antsí má sinchekjasóte sín Dios kixin xikaha kjuích'ia sín.

### Tí chichaon kjuanjon ijnko tjan k'án nò

(Mr. 12.41-44)

**21** A ntá tí nkaxenhen ninko ch'ín Jesús k'uíkon ch'án kixin tí sín ricó kjuikao sín chichaon chr'áxehen sín tí ntacajón tjetóxroyéya chichaon. <sup>2</sup> A ntá kjaxin k'uíkon ch'án ikjui ijnko tjan k'án nò la ntá jehe tjan chr'áxehen tjan yaá chichaon ntsínsí. <sup>3</sup> Ntá ntáchro ch'ín Jesús kixin:

—La chaxín ntáxrjan kixin tí tjan k'án i nò tjan kjánchó antsí tje te sínkí

tí chichaon kjuanjon tjan kixin kaín asén tjan kjuanjon tjan, a ntá tí sín kjuanjon nchónhya la náhí. <sup>4</sup> Kixin kaín tí chichaon kjuanjon sín la chichaon síxèhe sín. A ntá jehe tjan kjónté nòla tjan na kjuanjon tjan kaín tí chichaon chrókuicháxinhin tjan —ichro ch'án.

### Ch'ín Jesús ntáchro ch'án kixin tí ninko ts'itjayan

(Mt. 24.1-2; Mr. 13.1-2)

<sup>5</sup> Iso sín tjejóto sín kixin nkexrí tsjehe ninko tsík'óna xrę náxrjón la ko í so nkehe tsíkjanjon chojni éxi ijnko nkehe chjéhe sín Dios. A ntá ch'ín Jesús ntáchro ch'án kixin:

<sup>6</sup> —A ntá tsi ijnko yaon tí ninko tje-jokomará ntihi la tsoxíka. A ntá tsokehya ninkehó xrę ts'ejókjén kichó inaá —ichro ch'án.

### Tí nkehe tsonhen tí naxa ts'itjayanhya chjasintajni

(Mt. 24.3-28; Mr. 13.3-23)

<sup>7</sup> Ntá kjuanchankíhi sín ch'án kixin: —Maestro, ¿nkesá tsonhen tíha? ¿Nkexrí tsonhen tí tsonoexínni tí nkehe tsonhen? —ichro sín.

<sup>8</sup> Ntá ntáchro ch'ín Jesús kixin:

—Chrókóxakonhanrá titoéhyará sit'áyahará chojni. Nchónhya chojni tsi tsontáchro sín kixin jehe sín tí Cristo, tsixro sín, la ko tsontáchro sín kixin: “Ijie mé tsoxiteyá tsonhen.” Kjónté xikaha tsontáchro sín la chrókuítekákuenhyará tí jehe sín. <sup>9</sup> A ntá tío tsinhínrá tsontáchro chojni kixin ó síin kjuaníkaon tjanjonko kichó sín, kjónté xikaha naxa chróchrakonhyará kixin kaín tíha t'ichjánxin ts'atsínka senó tí naxa tsjixixínhya ts'itjayan chjasintajni —ichro ch'án.

<sup>10</sup> Naxa tjechrónka ch'án ntáchro ch'án kixin:

—Ijnko nación la tsjanjonko í jnko nación la ko ijnko chjasin tsjanjonko í jnko chjasin. <sup>11</sup> Kjaxin imá tjian tsínkí nonte la ko tsokjinta la ko tsoníhi chojni nchónhya chjasin, a ntá nkajní nchónhya kjuachrakon jíé ts'ixin ts'ikon chojni.

<sup>12</sup> Naxa ts'atsínkahya tíha la tsonínkakonhanrá sín tsotsérá sín sátsjikoará sín tí nínko tsjanchia sín jie la ko sátsjikoará sín ts'íkjahará la ko sátsjikoará nkayakon tí sín rey la ko tí sín gobernador kixin tinkachónkirá nina. <sup>13</sup> A ntá tí yaon xikaha tsonhen la ts'ixin kjuachaxin kixin tsochronkará nkexro tinkachónkirá. <sup>14</sup> Tóxakuanhyará senó nkexrí tsjateherá tí nkehe tsjanchankíhará sín <sup>15</sup> kixin janhan la tsjánjuan kjuaxrexinkaon jína tsonixjará kixin nijnko tí sín nínkakonhanrá xitjahya tsontácho sín kixin ntoáhya tí nkehe tsjateherá. <sup>16</sup> Kixin kjónté it'ará la ko kichuára la ko tí sín kjéhyará la ko tí sín tjórá jína mé sintakjirá sín. Jehe sín ts'óyán sín jnkojínra. <sup>17</sup> Kaín chojni chjasintajni tsonínkakonhanrá sín kixin tinkachónkirá nina. <sup>18</sup> Kjánchó xikaha la nijnko kaxihí chóna kjára ts'itjáyannya. <sup>19</sup> Tí tsjtoéhyará tinkachónkirá tí janhan la tsochontará kjuachón jnkochríxín.

<sup>20</sup> A ntá tió ts'ikonrá kixin kuenté chjasin Jerusalén tsík'ántatjen sín soldado ntá tsonoaxínra kixin í séhya ts'itjáyan tí chjasin a. <sup>21</sup> A ntá tí sín tjejó sín Judea la t'ichjánxin sátsjixín sín ntiha sátsji sín jna. A ntá tí sín sín chjasin Jerusalén kjaxin t'ichjánxin sátsjixín sín ntiha la ko ti sin tjejó sín nontee sín la í xitjahya tsokjan sín chjasin. <sup>22</sup> Kixin tí yaon ts'ixin tsjasóte chojni tsoxiteyá tsonhen kaín nkehe nixja xroon itén Dios. <sup>23</sup> Nòà tí chojni chjin tjejóyá tí yaon a la ko tí sín chóna xjanhnté naxa nchekakí sín. Kixin tí yaon a la ts'ixin kjuatjoté tí chjasin la Dios tsjanjon kjuachaxin kixin imá tsjasóte chojni ntiha. <sup>24</sup> Jnkojínra

ts'énxinrá tí sín kjuanínkaon ntiha la ko jnkojínra tsotsérá sín sátsjikoará sín sinchekjasótiará kaín tí í so nación. A ntá tí sín jehya judío tsjixín ókjé nación tsinkátja sín chjasin Jerusalén kixin Dios mé tsjanjon kjuachaxin iso yaon xikaha tsonhen. A ntá chr'éxin tsontácho ch'án kixin: “La í kohya nkehe tsonhen.”

### A ntá tió itsi ti Xjeen Dios K'óna Chojni

(Mt. 24.29-35, 42-44; Mr. 13.24-37)

<sup>25</sup> A ntá tsonoaxínra nkexrí tsonhen tí yaon la ko nkexrí tsonhen nitjó la ko nkexrí tsonhen konotsé. A ntá chjasintajni tsokohya kjuaxróxin kaín nación la ko tsochrakon chojni kixin imá tsojna ntayaon. <sup>26</sup> A ntá chojni la tsojinhin sín kixin tsochrakon sín tsjenkayáxin sín nkehe tsonhen chjasintajni kixin kaín tí nkehe sínkání nkajní la tsinkí. <sup>27</sup> Ntá xikaha ts'ikon chojni kixin itsi tí Xjeen Dios K'óna Chojni itsi ch'án chríkjan ijnko tjuí tsikao ch'án tí kjuachaxin jíé kuènte nkaya nkajní. <sup>28</sup> A ntá tió tsoxrankixin tsonhen kaín tíha chrókócháhará chrókjuaya kjára ntá chróntáchorá kixin kijnhya tjen tí nkexro tsaáxinra —ichro ch'án.

<sup>29</sup> Kjaxin kjuíncheyóexin ch'án í jnko nkehe ntácho ch'án kixin:

—Tjenkayáxinra nkexrí sín tí nta t'óna to higo la ko kaín tí í so nta. <sup>30</sup> Tió ts'ikonrá kixin tinkák'ayan kahnte tí nta, ntá tsonoaxínra kixin í séhya ts'ixenhen nchakuen chrin. <sup>31</sup> Mé kjaxin xikaha tió ts'ikonrá kixin kaín tí nkehe sítónhen, ntá tsonoaxínra kixin tí kjuachaxin kuènte Dios la ó chjino tjen.

<sup>32</sup> Mé chaxín ntáxrjan kixin kaín tíhi tsonhen senó naxa t'enhya chojni tjejó jie. <sup>33</sup> A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyannya, tsoxiteyá tíha.

<sup>34</sup> Chrókóxakonhanrá chrókujtoéh-yará kixin chrókjuichròderá kixin tí imá

chrókjónterá la ko tí chrókókoanrá. Kíxin tí xíkaha la ntá titàya tsi tí yaon la chrók'uejochoénhyará. <sup>35</sup>Na mé éxí ijnko trampa xrínahya ts'ikjehe mé xíkaha itsi tí yaon a, la ko xíkaha tsonhen kaín chojni síin chjasintajni tí ts'ejóchoénhya sín. <sup>36</sup>Méxra listo chrók'uejorá la ko chrónixjehérá Dios kaín yaon chronóehérá ch'án kíxin tió tsi kaín tí kjuaxikaon xíkaha la ntá tsjinkítsará ch'án tsaará kíxin ntá tsjachará tsochjineherá tí tjen tí Xjeen Dios K'óna Chojni —ichro ch'án.

<sup>37</sup>Ch'ín Jesús kjuák'ekjakoxin ch'án tí nínko ntiha jnkojnko yaon, a ntá tie la sákjuí ch'án tí jnā nchek'in sín Olivo, la ntaha kuítóhe ch'án. <sup>38</sup>A ntá kaín chojni kóchjina sín tí nínko jnkojnko nchítjen kíxin tsinhin sín tí nkehe tsochronka ch'án.

### Imó kjuenkayáxin sín nkexrí tsotsé sín tí ch'ín Jesús

(Mt. 26.1-5,14-16; Mr. 14.1-2, 10-11; Jn. 11.45-53)

**22** Ntá kuichjina tí yaon kia sine sín tí niotja tjikohya tí xroan t'ánkíxin niotja na mé tí kia nchek'in sín pascua. <sup>2</sup>Ntá tí nchát'á t'etōan la ko tí sín maestro tjako tí ley kjuenkayáxin sín nkexrí chrók'óyán sín tí ch'ín Jesús kíxin chraqonhen sín tí chojni chjasin ntiha.

<sup>3</sup>A ntá ch'ín Tsochren k'uixenhen asén ch'ín Judas, mé kjáxin it'in ch'án Iscariote, mé jehe ch'án ijnko tí teyó tí sín k'uájiko ch'ín Jesús. <sup>4</sup>Tí ch'ín a mé sákjuítsjehe tí sín nchát'á t'etōan la ko tí sín t'etōan kuènte nínko, ikjo kichó sín kíxin nkexrí tsjikaán sín tí ch'ín Jesús. <sup>5</sup>Ntá jehe sín kóchéhe sín la ko ntáchro sín kíxin tsjenkehe sín tí ch'ín Judas. <sup>6</sup>Ntá kjuátehe ch'án sinchexiteyá ch'án ntá kjueyá ch'án nkexrí tsotsé sín tí ch'ín Jesús tí kohya chojni.

### Kjuixixín kjoneko sín tí ch'ín Jesús

(Mt. 26.17-29; Mr. 14.12-25; Jn. 13.21-30; 1 Co. 11.23-26)

<sup>7</sup>Ntá ó kui yaon kia sine sín niotja tjikohya tí xroan t'ánkíxin niotja, a ntá t'ichjánxin ts'óyán sín tí kolélo sine sín kuènte tí kia pascua. <sup>8</sup>A ntá ch'ín Jesús k'uetuenhen ch'án tí ch'ín Pedro la ko tí ch'ín Juan kíxin sátsji sín sincheyaxín sín tí nkehe sine sín kuènte tí kia pascua. <sup>9</sup>Ntá jehe sín kjuanchankíhi sín ch'án kíxin:

—¿Nketí tjinkávan sincheyaxíxinni? —ichro sín.

<sup>10</sup>Ntá kjuátehe ch'án kíxin:

—Tió ts'ixenhenrá chjasin Jerusalén tsoxetará ijnko chojni ntoa yámá ijnko tóa tjíá ntá. Chréhérá ch'án sátsjirá tí nchia ts'ixenhen ch'án. <sup>11</sup>Tsontácherá tí ìnché tí nchia kíxin: “Ntáchro Maestro kíxin: ¿Nketí tjen tí cuarto tsjánjuan kjuachaxin tsoyaxíxin sineko ch'án tí sín teyó xriko ch'án tí yaon pascua?” tsixrorá. <sup>12</sup>A ntá jehe ch'án tsjakohará ch'án ijnko cuarto jíé tí yóxin piso la ntiha síin nkehe t'ichjánxin, la ntaha sincheyaxíxinrá tí sineni tsonjín —ichro ch'án.

<sup>13</sup>A ntá jehe sín sákjuí sín k'uitja sín kaín nkehe éxí tsichronka ch'ín Jesús. Ntá ntiha kjuíncheyaxíxin sín sine sín kuènte pascua.

<sup>14</sup>A ntá kui tí hora, a ntá ch'ín Jesús la ko tí sín k'uájiko ch'án kjuíji sín ntiha k'uejótjāxin sín tí tjen tí mesa. <sup>15</sup>Ntá ntáchro ch'ín Jesús kíxin:

—Imá tjínkavan kíxin tsjasinni kia sinekianrá tí yaon pascua naxa ts'énhya janhan. <sup>16</sup>Ntáxrjan kíxin sinehya janhan xíkaha inaá tí naxa tsoxiteyáhya tíha tió tsi kjuachaxin kuènte Dios —ichro ch'án.

<sup>17</sup>Ntá kuákja ch'án tí nkehe tjíá inté to uva ntá chjéhe ch'án kjuasáya Dios ntá ntáchro ch'án kíxin:

—Tákjárá tíhi la its'irá kaín rá <sup>18</sup> kixin ntáxrjan kixin xík'ikianhyará tí inté to uva tí naxa tihya tí kjuachaxin kuènte Dios —ichro ch'án.

<sup>19</sup> A ntá kjuixin ntá kuákja ch'án tí niotja ntá kjuanchehe ch'án kjuasáyé Dios, ntá kóchrít'o ch'án chjéhe ch'án tí jehe sín ntáchro ch'án kixin:

—Tíhi mé cuerpo kuèntana kixin ts'ényákonhanrá. Mé xíkaha tsoxráinkákonxínrá tí janhan —ichro ch'án.

<sup>20</sup> Kjaxin xíkaha kjuanjon ch'án tí nkehe tjá inté to uva tíó kjuixin kjóne sín la ntáchro ch'án kixin:

—Tí nkehe tjá tí vaso chronkaxín tí nkehe nixin tsonhen tsoxiteyá kixin tí jnina ts'itjí tsojtjuáxin tí ijjárá.

<sup>21</sup> Tí nkexro sinchekjina mé tjekjan tí tjen mesa ntihi. <sup>22</sup> Méxra tí Xjeen Dios K'óna Chojni its'en éxí k'uítuenhen; kjánchó nòa tí ch'ín sinchekji ch'án kixin tsjasóte ch'án —ichro ch'án.

<sup>23</sup> A ntá jehe sín kjuankixin sín tjan-chankíhi kichó sín:

—¿Xá nkexro sinchekji ch'án? —ichro sín.

### **Ikjo sín kixin nkexro tí imá ts'etjoan**

<sup>24</sup> A ntá jehe sín mé tjo sín kixin nkexro antsí ts'etjoan. <sup>25</sup> A ntá ntáchro ch'ín Jesús kixin:

—Tí sín reyes kuènte tí naciones imá t'etjoan sín. A ntá tí chojni mé ntáchro sín kixin tí sín t'etjoan la mé chojni ch'e xra jina. <sup>26</sup> A ntá jahará xíkahya chrókjuich'erá. Íchá jina tí nkexro imá t'etjoan chrók'óna éxí tí nkexro antsí nta-soá chróchóxin chrók'uítuenhen, na mé tí nkexro t'etjoan chrók'óna éxí ijnko nkexro ch'exón xra. <sup>27</sup> ¿A ntá nkexro tí antsí t'etjoan, á tí nkexro lámō tjetjaxin tí tjen mesa ntá sine ch'án, ó á antsí t'etjoan tí nkexro kuikao tí nkehe sine ch'án? Náhí. Tí nkexro tjetjaxin tí tjen mesa mé antsí t'etjoan ch'án. Mé xíkaha janhan

tjénkajánrá éxí ijnko nkexro ch'exón xra tí janhan.

<sup>28</sup> Jahará xráxin k'uéjontaxínrá k'uíkonrá kaín nkehe náxrjónhya kónna. <sup>29</sup> Méxra janhan tsjánjuan kjuachaxin tsétoanrá éxí chjina T'aná tí tétjoan janhan <sup>30</sup> kixin sinterá la ko its'irá tí tsjak'e mesa kuèntana tí tsétoan janhan nkaya nkajní la ko tsétoanrá sinchekitoexínrá tí ijíé kaín tí sín k'uaxrjeníxin tí teyó xjeen ch'ín Israel.

### **Ch'ín Jesús chrónka ch'án kixin ch'ín Pedro sinchemá kixin chónhya tí jehe ch'án, tsixro ch'án**

(Mt. 26.31-35; Mr.

14.27-31; Jn. 13.36-38)

<sup>31</sup> Ntá ntáchro Ìnchéni kixin:

—Simón, Simón, chrókónoha jaha kixin ch'ín Tsochren kjuanchia ch'án tí jahará chrók'ótsjéyehe ch'án tí jahará éxí noatrigo. <sup>32</sup> Kjánchó janhan xr-janóahā T'aná kixin jaha chrókuítóehya tí tinkachónkia tí janhan. A ntá jaha kjónté tsjásian jje, a ntá tsokjan inaá ts'itjáyanyha tinkachónkia tí janhan ntá sinchechéhé kichuará —ichro ch'án.

<sup>33</sup> A ntá ntáchro ch'ín Simón kixin:

—Ìnchéni, listo tjenni sátsjini ts'ikjéhekoani la jehya ts'ikjéheni ó la kjaxin ts'enkoani —ichro ch'án.

<sup>34</sup> A ntá kjuátehe ch'ín Jesús ntáchro ch'án kixin:

—Pedro, ntáxrjan kixin ijie jaí naxa tsjehya kochíntoa sinchemána iníya kixin chonhya tí janhan, tsixrua —ichro ch'án.

### **Ntá ó kuichjina tí hora xíkaha tsonhen ch'án**

<sup>35</sup> Ntá ch'ín Jesús kjuanchankíhi ch'án tí jehe sín kixin:

—Tió kuétuanhanrá sákjuirá kjuíkoahyará kabolsa la ko kjuíkoahyará tí nkehe t'inka chichaon

la ko kjuíkoahyará tokate na, zá naxa t'itjáyan ichrén nkehe ní? —ichro ch'án.

Ntá kjuátehe tí jehe sín ntáchro sín kixin:

—Náhi. Ninkehó nkehe t'itjáyanhya —ichro sín.

<sup>36</sup> Ntá ntáchro ch'án kixin:

—A ntá jie tí nkexo chóna kabolsa la tsakja sátsjiko la ko kjaxin tí nkehe t'inka chichaon. A ntá tí nkexo chónahya chica espada chrókjuinchekji ch'án tí ka t'inkáya ch'án kixin chrók'uenaxin ch'án ijnko chica. <sup>37</sup> Ntáxrjan kixin t'ichjánxin tsoxiteyá tsona éxí nixja xroon itén Dios ntáchro kixin: “Éxí yóhe ijnko chojni kjuasin jie mé xikaha ts'ikon sín ch'án.”<sup>38</sup> Mé xikaha kaín nkehe chrónka xroon itén Dios kixin tsona mé t'ichjánxin tsoxiteyá —ichro ch'án.

<sup>38</sup> A ntá jehe sín ntáchro sín kixin:

—Inchéni, ntihi tjejó yaá chica espada —ichro sín.

Ntá kjuátehe ch'án kixin:

—Kjonté ó táhó la ó nchoxon —ichro ch'án.

### **Ch'ín Jesús nixjeéxin ch'án Dios tí Huerto Getsemaní**

(Mt. 26.36-46; Mr. 14.32-42)

<sup>39</sup> Ntá ch'ín Jesús sákjuixin ch'án chjasin Jerusalén sákjuí ch'án ijna Olivo kixin xikaha kuènnen ch'án k'uékjich'e ch'án la koí tí sín k'uájiko ch'án tinkáchréhe sín. <sup>40</sup> Ntá kjuíji sín ntiha ntá ntáchro ch'án kixin:

—Nixjehérá Dios kixin tsjinkítsa ch'án tí jahará kixin tsjásinhyará jie —ichro ch'án.

<sup>41</sup> Ntá ch'ín Jesús k'uaxrjenta ch'án tí jehe sín sákjuí ch'án ijnko kjínxin éxí chrók'ue chojni xro. Ntá kjuák'lexin toh'in ch'án kixin tsonixjehe ch'án Dios. <sup>42</sup> Ntá ntáchro ch'án kixin:

—It'éni, tí tjinkávan chrókjuinchekaáni kaín nkehe náxrjónhya chrók'uatsínkani. Kjánchó jehya éxí tjinkaonni jeheni chrókónhenni. Náhi. Éxí tjinkávan jaha —ichro ch'án.

<sup>43</sup> Ntá xrinahya k'uíkon ch'án itjen ijnko ángel tsíkixin nkaya nkajní kixin tsjinkítsa ch'án. <sup>44</sup> A ntá imá tóxakonhen ch'án, a ntá antsí fuerte nixjehe ch'án Dios, ntá k'uíxin ch'án ntachjin éxí yóhe jni xikaha k'uítji k'uánótjen nonte.

<sup>45</sup> Ntá tió kjuixin nixjehe ch'án Dios ntá k'uínkatjen ch'án ntá sákjuí ch'án tí tjejó tí sín k'uájiko ch'án, ntá k'uitjaxín ch'án kixin tjejójua tí jehe sín kixin kjuachahya sín imá t'ává sín. <sup>46</sup> A ntá ntáchro ch'án kixin:

—¿Nkekuènte tjejochrinrá? T'àyará. Nixjehérá Dios kixin tsjinkítsará ch'án kixin tsjachroehyará ch'ín Tsochren —ichro ch'án.

### **Itse sín tí ch'ín Jesús**

(Mt. 26.47-56; Mr. 14.43-50; Jn. 18.2-11)

<sup>47</sup> A ntá ch'ín Jesús naxa tjenixja ch'án ntá xrinahya kui nchónhya chojni yamá chica. Tí ch'ín it'in Judas, ijnko tí teyo sín k'uájiko ch'ín Jesús, kuítaón ch'án ntia, ntá kóchjinehe ch'án tí ch'ín Jesús kixin sineko ch'án kochíto. <sup>48</sup> A ntá ntáchro ch'ín Jesús kixin:

—Judas, zá ijnko kochíto ó sinchekjixian tí Xjeen Dios K'óna Chojni? —ichro ch'án.

<sup>49</sup> A ntá tí sín tjejóko ch'ín Jesús tió k'uíkon sín kixin xikaha kónhen ntá kjuanchankíhi sín ch'án kixin:

—Inchéni, zá chrókuatéxinni sín chica espada? —ichro sín.

<sup>50</sup> A ntá ijnko tí jehe sín kjuíncheníhi ch'án ijnko ch'ín ch'ehe xra nchat'á t'etqan, kóchrínjin ch'án ntatsjon ch'án chjina.



<sup>51</sup> A ntá ntáchro ch'ín Jesús kixin:

—Táhó, t̄t̄ohé, ó t̄jen —ichro ch'án.

Ntá ch'ín Jesús itsé ch'án tí ntatsjon tí ch'ín ch'e x̄r̄a a, ntá kjuínchekitohe ch'án jína. <sup>52</sup> Ntá tuénxín ch'ín Jesús ntáche ch'án tí sín nchat'á t'et̄oan la ko tí sín t'et̄oan kuente n̄j̄nko la ko tí sín táda t'et̄oan mé tí sín ts̄l̄ki sátsjiko sín ch'án ntáchro ch'án kixin:

—¿Nkekuente k'uinkakoará chica espada la ko inta éxí chrótserá ijnko x̄ichee? <sup>53</sup> A ntá kaín yaon kjuak'é janhan k'uejóni kjuákoáxinrá tí n̄j̄nko ntiha la ninkehó tseh̄yará tí janhan. A ntá jie mé tí hora kuéntará ntá kjuacha tí kjuachaxin kuente s̄itié —ichro ch'án.

### Ch'ín Pedro kjuínchemá ch'án kixin chónhya ch'án tí ch'ín Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup> Ntá itsé sín tí ch'ín Jesús kjuínchenteto sín ch'án sákjuíko sín ch'án nt̄ōe nchat'á t'et̄oan. A ntá ch'ín Pedro ikjín tinkáchréhe ch'án. <sup>55</sup> A ntá tí nt̄asin ntiha kjuaka sín xrohi s̄ixrohe sín. A ntá ch'ín Pedro kjaxin kjuák'entaxín ch'án tí t̄ejó sín ntiha. <sup>56</sup> A ntá ijnko t̄jachjín ch'e x̄r̄a tió k'uík̄on t̄jan kixin koí ch'ín Pedro t̄jehj̄fxrohe ch'án ntiha ntá komá t̄jan tí jehe ch'án ntá ntáchro t̄jan kixin:

—Kj̄axin tí ch'ín i xriko tí ch'ín Jesús —ichro t̄jan.

<sup>57</sup> Ntá ch'ín Pedro kjuínchemá ch'án ntáchro ch'án kixin:

—¿Nkekuente x̄ikaha ichr̄ua jaha? Ni chonhya tí nkexro a —ichro ch'án.

<sup>58</sup> A ntá ant̄síkoá chr'éx̄in ikui í jnko chojni k'uík̄on tí jehe ch'án ntá ntáchro kixin:

—Kj̄axin jaha x̄ríkoa tí nkexro a —ichro.

Ntá ch'ín Pedro ntáchro ch'án kixin:

—Náhí, janhya —ichro ch'án.

<sup>59</sup> Ntá éxí ijnko hora chr'éx̄in ntá nixja í jnko ch'ín chénka tí í so sín kixin:

—Tí ch'ín i chaxín xriko tí ch'ín Jesús kixin kjaxin ts̄íkj̄ix̄in ch'án estado Galilea —ichro ch'án.

<sup>60</sup> Ntá ntáchro ch'ín Pedro kixin:

—Nonahya janhan nkehe tí ntáchrua —ichro ch'án.

Ntá tuénxín nax̄a t̄jenixja ch'án ntá x̄r̄ínahya ó ts̄je kochínt̄ōa. <sup>61</sup> Ntá Ìnchéni kuinkátj̄á ch'án komá ch'án tí ch'ín Pedro. Ntá ch'ín Pedro xraxinkaon ch'án kixin x̄ikaha ts̄íchronka Ìnchéni kixin: “Nax̄a tsotsjehya kochínt̄ōa sinchemána iníya.”\*\* <sup>62</sup> Ntá ch'ín Pedro sákjuí ch'án ntója, ts̄jánka ch'án xraxinkaon ch'án tí jie kjuasin ch'án.

### Kjuanoá sín tí ch'ín Jesús

(Mt. 26.67-68; Mr. 14.65)

<sup>63</sup> Tí sín sákjuíko ch'ín Jesús kjuanoá sín ch'án la ko kjuate sín ch'án. <sup>64</sup> K'uikjéhe sín ka kon ch'án ntá kjuate sín ch'án ntá kjuanchankíhi sín ch'án kixin:

—Ijie la tónoha nkexro kjuatia —ichro sín.

<sup>65</sup> La ko í so nkehe ntáchro sín k'uán-taxính̄in sín ch'án.

### Ntá sákjuíko sín tí ch'ín Jesús nkayakon tí sín t'et̄oan

(Mt. 26.59-66; Mr.

14.55-64; Jn. 18.19-24)

<sup>66</sup> A ntá kóyaon nch̄akotjín la kójnkotsé kaín tí sín táda t'et̄uēnhen tí sín judío, la ko tí nchat'á t'et̄oan, la ko tí sín maestro t̄jako tí ley la sákjuíko sín tí ch'ín Jesús nkayakon tí sín imá t'et̄oan. Ntá ntiha kjuanchankíex̄in sín ch'án kixin:

<sup>67</sup> —Ijie la ch̄ronka, ¿á jaha tí Cristo? —ichro sín.

Ntá jehe ch'án kjuátehe ch'án kixin:

\*\*22:61 Lucas 22.34

—Tí tsontáxrjan kixin chaxín janhan na tsitekákonhyará. <sup>68</sup> A ntá tí chrókjuáanchánkíhará ichrén nkehe la chrókjuáteehyará la ko chrók'uatjántahyarána. <sup>69</sup> A ntá jie tí Xjeen Dios K'óna Chojni mé tsjak'etjaxín tí tja chjina kuènte Dios chóna kaín xín kjuachaxin —ichro ch'án.

<sup>70</sup> A ntá tuénxín kaín sín kjuanchankíhi sín ch'án kixin:

—¿Á chaxín jaha tí Xjeen Dios? —ichro sín.

A ntá kjuátehe ch'ín Jesús ntáchro ch'án kixin:

—Chaxín janhan xikaha ntáchrora tí jahará —ichro ch'án.

<sup>71</sup> Ntá kjo sín kichó sín kixin:

—¿Nkehe tsonhen naxa chróchrónka í so chojni? Jeheni kaín ni kuínhinni nkehe k'uaxrjexín ir'va ch'án —ichro sín.

### Sákjuíko sín tí ch'ín Jesús nkayakon tí ch'ín Pilato

(Mt. 27.1-2, 11-14; Mr. 15.1-5; Jn. 18.28-38)

**23** Ntá kaín sín k'uínkatjen sín ntá sákjuíko sín tí ch'ín Jesús nkayakon tí ch'ín Pilato. <sup>2</sup> A ntá ntiha kjuankíxin sín t'eka sín jie tí jehe ch'án ntáchro sín kixin:

—K'uitjani tí nkexro i tjachroe ch'án chojni nación kuénteni ntáchro ch'án kixin chrókjuenkeehyani tí gobierno romano, la ko kjaxin ntáchro ch'án kixin jehe ch'án mé Cristo ch'án, na mé ijnko rey tíha —ichro sín.

<sup>3</sup> A ntá ch'ín Pilato kjuanchankíhi ch'án tí ch'ín Jesús ntáchro ch'án kixin:

—¿Á jaha tí Rey t'etuénhen tí sín judío a ní? —ichro ch'án.

Ntá ch'ín Jesús kjuátehe ch'án ntáchro ch'án kixin:

—Chaxín xikaha ntáchrúa jaha —ichro ch'án.

<sup>4</sup> A ntá ch'ín Pilato ntáche ch'an tí sín nchat'á t'etoan la ko tí chojni tsíkikao sín kixin:

—T'itjáhya nijnko jie chóna tí nkexro i —ichro ch'án.

<sup>5</sup> A ntá jehe sín antsí itsen nixja sín ntáchro sín kixin:

—Tjachroe ch'án kaín xín chojni estado Judea kixin tí nkehe tjako ch'án. Kjuankíxin ch'án kjuako ch'án estado Galilea, a ntá jie ó kui ch'án ntihi la xikaha tjako ch'án —ichro sín.

### Sákjuíko sín tí ch'ín Jesús nkayakon tí ch'ín Herodes

<sup>6</sup> A ntá kuínhin ch'ín Pilato xikaha ntáchro sín ntá kjuanchankí ch'án á tí ch'ín i la á Galilea tsíkixín ch'án. <sup>7</sup> A ntá kjuátehe sín kixin ntaha tsíkixín ch'án, ntá k'uetjoan ch'ín Pilato kixin sátsjiko sín ch'án tí tjen ch'ín Herodes kixin jehe ch'án mé gobernador tí estado Galilea kixin kjaxin ch'án tjen ch'án chjasin Jerusalén tí yaon a. <sup>8</sup> A ntá ch'ín Herodes k'uíkon ch'án kjuíji tí ch'ín Jesús ntá imá kóchéhe ch'án kixin isé tjinkaon ch'án chrók'uikon ch'án tí ch'ín Jesús kixin tsíkinhin ch'án chrónka chojni nkexrí tjako ch'án, ntá tjinkaon ch'án chrók'uikon ch'án ijnko kjuaxroan chrókjuakoxín ch'ín Jesús. <sup>9</sup> Nchónhya nkehe kjuanchankíhi ch'án tí ch'ín Jesús, kjánchó ch'ín Jesús ninkehó kjuáteehya ch'án. <sup>10</sup> Kjaxin ntiha k'uejó tí sín nchat'á t'etoan la ko tí sín maestro tjako tí ley la ntá nchónhya jie k'ueka sín ch'án kixin nínkakonhen sín ch'án.

<sup>11</sup> A ntá ch'ín Herodes la ko tí sín soldado kuénte ch'án kjuankíxin sín kjuikosáyehya sín ch'án la ko kjuanoá sín ch'án kjuínchek'inkáya sín ch'án ka tjete náxrjón éxi t'inkáya tí sín rey. A ntá tuénxín ch'ín Herodes k'uetjoan ch'án kixin sátsji ch'án inaá tí tjen ch'ín Pilato. <sup>12</sup> A ntá tí yaon a ch'ín Pilato la ko ch'ín Herodes kjuankíxin sín tjuèhe kichó sín

kíxin tí senó la k'uénínkakonhen kíchó sín.

### **K'uetōan sín kíxin its'en ch'ín Jesús**

(Mt. 27.15-26; Mr. 15.6-15;  
Jn. 18.39—19.16)

<sup>13</sup> A ntá ch'ín Pilato k'uíyehē ch'án tí nchat'á t'etōan la ko tí sín gober-nador la ko kaín chojni chjasin ntiha kíxin tsojnkotsé sín <sup>14</sup> ntá ntáche ch'án sín kíxin:

—Jahará kjuíkuanará tí nkexro i ntáchrórá kíxin ntoáhya tjakōhe ch'án chojni kíxin chrókónínkakonhen sín tí gobierno. Kjánchó janhan kjuánchánkíhā ch'án itsjé nkehe kuínhínrá ntá k'uíkonrá kíxin k'uitjahya ninkehó tí jie tékará ch'án. <sup>15</sup> La ko kjaxin ch'ín Herodes k'uitjahya ch'án tí jie tékará tí ch'ín Jesús ntá chr'án ch'án ínaá ntihi. Ó k'uíkonrá kíxin ninkehó jie chóntahya ch'án chrók'uenxín ch'án. <sup>16</sup> Sintakjasóte ch'án ntá chr'éxín tsjánjuan kjuachaxin sátsji ch'án —ichro ch'án.

<sup>17</sup> A ntá tí yaon kia a la t'ichjánxín kíxin ch'ín Pilato tsjanjon kjuachaxin sátsji ijnko chojni tjechjina kíxin xíkaha kuènhen sín ósé. <sup>18</sup> Ntá kaín sín kjuankíxin sín k'óyako sín ntáchró sín kíxin:

—¡Tí nkexro la náhí! ¡Ch'ín Barrabás mé t'atjáta! —ichro sín.

<sup>19</sup> A ntá ch'ín Barrabás tsík'ikjéhe sín ch'án kíxin jehe ch'án la ko í so chojni kónínkakonhen sín tí chjasin ntiha la ko tsík'óyán ch'án chojni. <sup>20</sup> A ntá ch'ín Pi-lato tjinkaon ch'án chrókjuanjon ch'án kjuachaxin sáchrókjui ch'ín Jesús. A ntá xíkjančhankíhi ch'án tí chojni síin ntiha ínaá. <sup>21</sup> Kjánchó jehe sín antsí má tsen k'óyako sín ntáchró sín kíxin:

—¡Tjakékanirá ch'án ntacruz!  
¡Tjakénkanirá ch'án ntacruz! —ichro sín.

<sup>22</sup> Níxin xíkjančhankí ch'ín Pilato ntáchró ch'án kíxin:

—¿Xá nkehe ntoáhya kjuích'e ch'án? Janhan la k'uitjahya ninkehó jie chóna ch'án chrók'uenxín ch'án. Sintakjasóte ch'án la ntá chr'éxín tsjánjuan kjuachaxin sátsji ch'án —ichro ch'án.

<sup>23</sup> Kjánchó jehe sín antsí tsen kjuanchia sín ntáchró sín kíxin chrókjuak'enkáni ch'án ntacruz. A ntá k'óyako sín la ko k'óyako tí sín nchat'á t'etōan ntá kjuacha sín kjuanchia sín tí nkehe tsonhen. <sup>24</sup> A ntá ch'ín Pilato kjuanjon ch'án kjuachaxin xíkaha tsonhen tí nkehe kjuanchia sín. <sup>25</sup> A ntá kjuanjon ch'ín Pilato kjuachaxin sátsji tí ch'ín Barrabás éxi kjuanchia sín, na mé tí ch'ín k'uikjéhe sín kíxin k'uékje ch'án kjuanínkaon la ko k'uék'óyán ch'án chojni. A ntá ch'ín Pilato kjuanjon ch'án kjuachaxin kíxin sátsjiko sín tí ch'ín Jesús sinčekjasóte sín ch'án éxi tjinkaon sín.

### **Kjuak'enkani sín ch'án ijnko ntacruz its'en ch'án**

(Mt. 27.32-44; Mr.  
15.21-32; Jn. 19.17-27)

<sup>26</sup> A ntá tió sákjuíko sín ch'ín Jesús tsjak'enkani sín ch'án ntacruz, ntá itsé sín ijnko ch'ín tsíkjixín chjasin Cirene it'in ch'án Simón, mé kjuixín ch'án non-tee ch'án, ntá kjuínčekamá sín ch'án tí ntacruz tsjak'enkáni ch'ín Jesús la tin-káchréhe ch'án.

<sup>27</sup> Kjaxin chréhe nchónhya chojni ntoa la ko nchónhya chojni chjin chréhe sín tsjánkamā sín ch'án. <sup>28</sup> Kjánchó ch'ín Jesús nkátjía ch'án komá ch'án tí jehe sín kíxin tsjánka sín ntáchró ch'án kíxin:

—Jahará chojni chjin chjasin Jerusalén, chrótsjankamāhyará tí janhan. Chrótsjankará kíxin tí nkehe tsonhanrá jahará la ko xjaanrá. <sup>29</sup> Kíxin itsi yaon tsontáchrórá kíxin náxrjón tí sín chóntahya xjan la ko tí sín

kjuínchekokjéhya xjan la ko tí sín kjuínchekakíhya ninkehó xjan. <sup>30</sup>Ntá tsjankíxin chojni tsonátche sín tí jna kíxin tsoxrátja sín la ko tsonátche sín tjo kíxin tsjavá sín. <sup>31</sup>Kjónté tí nta yoa la ó sítónhen kaín tíhi la íchá tíó chróxamá tí nta la ¿nkehe tí kaá chrókónhen tí nta tsíxamá? —ichro ch'án.

<sup>32</sup>Kjaxin sákjuíko sín iyó sín tsíkjasin jie kíxin ts'óyaníko sín ch'ín Jesús. <sup>33</sup>Ntá tíó kjuíji sín tí jna tikítexín sín tí jna Nta Hueso Kja Chojni, na mé ntiha kjuak'enkani sín ch'ín Jesús tí ntacruz la ko kjaxin tí iyó sín chóna jie, la ijnko la tja ch'án chjina la í jnko la tja ch'án kjon tjejóyáni sín ntacruz kjaxin. <sup>34</sup>Ntá tíó kjuixin kjuak'enkani sín tí ch'ín Jesús tí ntacruz ntá nixjehe ch'án tí It'é ch'án Dios ntáchro ch'án kíxin:

—It'éni, tónínkakuènhya sín kíxin tí nkehe kjuích'ehe sín kíxin noehya sín nkehe tí kjuích'e sín —ichro ch'án.

A ntá tí sín soldado k'óxikayehé sín iké ch'án ch'exín sín suerte kíxin tsonoexín sín nkexro tsakja tí ka a. <sup>35</sup>Kaín chojni chjasin ntiha tjejótsjehe sín kíxin xíkaha sítónhen la ko kjaxin tí sín t'etjan tjanoá sín tí jehe ch'án ntáchro sín kíxin:

—Kjuínchekaá ch'án ókjé chojni, a ntá jie jehe ch'án chrókjuínchekaá ch'án asén ch'án tí chaxín jehe ch'án tí Cristo tí nkexro tsíkjevá Dios —ichro sín.

<sup>36</sup>La ko kjaxin tí sín soldado kjuanoá sín ch'án kóchjinehe sín ch'án kuikao sín xranvino náxrjónhya chjéhe sín ch'án chrók'ui ch'án, <sup>37</sup>ntáche sín ch'án kíxin:

—Tí jaha chaxín rey kuènte tí sín judío ntá jahvá chrókjuínchekaá asán —ichro sín.

<sup>38</sup>Kjaxin ntiha ikja tí ntacruz kjuak'enkani sín ijnko ntachiso ntsí tsíkjin sín nkíva griego la ko nkíva latín la ko nkíva hebreo ntáchro kíxin: “Tíha mé Rey kuènte tí sín judío”, ichro.

<sup>39</sup>Ijnko tí sín chóna jie tjenkáni ntacruz k'uántaxínhin ch'án tí ch'ín Jesús ntáchro ch'án kíxin:

—Tí jaha chaxín Cristo, jahvá chrókjuínkajian asán, ntá tsjixin ntá chrókjuínkajian tí jeheni —ichro ch'án.

<sup>40</sup>A ntá tí ch'ín jnko a k'uètuènhen tí í jnko ch'ín a kíxin tsotání ch'án, ntáchro ch'án kíxin:

—Ntáchrohya xíkaha. ¿Á chrakuenhya Dios kíxin xíkaha ichrua kíxin kjaxin jeheni na ó tjejótsasóteni? <sup>41</sup>Yóíni na nchoxon tjejótsasóteni tjejótsjenkani tí jie kjuasinni. A ntá tí nkexro i ninkehó nkehe jínahya kjuích'e ch'án, la ntá koí ch'án tjetjasóte ch'án —ichro tí ch'ín a.

<sup>42</sup>Ntá ntáchro ch'án kíxin:

—Jesús, xráxinkávan tí janhan tíó ts'ayéhé kjuachaxin tsétjan jaha —ichro ch'án.

<sup>43</sup>Ntá kjuátéhe ch'ín Jesús ntáchro ch'án kíxin:

—Chaxín ntáxrjan kíxin ijie jaí ts'ejóko kíchó ni nkaya nkajní —ichro ch'án.

### Ntá ó k'uén ch'ín Jesús

(Mt. 27.45-56; Mr.

15.33-41; Jn. 19.28-30)

<sup>44</sup>Ntá ó chjina chonkíxin. A ntá k'uíxin tie kuenté chjasintajni hasta las tres kónjín. <sup>45</sup>Ik'uén yaon, la ko tí ka t'inkákuènxín nkaxenhen nínko k'uichje jnkosiné. <sup>46</sup>Ntá ch'ín Jesús k'uèya ch'án itsen ntáchro ch'án kíxin:

—It'éni tjen nkaya nkajní, jaha ts'ayéhé asénni —ichro ch'án.

Xíkaha ichro ch'án ntá k'uén ch'án.

<sup>47</sup>A ntá k'uíkon tí ch'ín capitán romano kaín xíkaha kónhen ntá kjuanchehe ch'án kjuasáyé Dios ntáchro ch'án kíxin:

—Chaxín tí nkexro la jína la ninkehó jie chónahya —ichro ch'án.

<sup>48</sup>A ntá kaín tí chojni tsíkójnksé ntiha k'uíkon sín xíkaha kónhen ntá sákjuíxin sín ntiha chrakon sín tjate sín

ntakuin sín kixin xikaha kónhen. <sup>49</sup> A ntá kaín tí sín chóxin ch'ín Jesús la ko kjaxin tí chojni chjin k'uékinkáchónki sín ch'án tsíkjin sín estado Galilea ikjín tjejó sín tjejótsjehe sín nkerí sítónhen.

### Sákjuíkjává sín tí ch'ín Jesús

(Mt. 27.57-61; Mr. 15.42-47; Jn. 19.38-42)

<sup>50</sup> A ntá ntiha tjen ijnko ch'ín it'in José, chjasén ch'án mé Arimatea estado Judea. Kjaxin jehe ch'án ijnko tí sín imá t'etoan kuènte tí sín judío, jehe ch'án mé ijnko nkexro jína. <sup>51</sup> Jehe ch'án kjuák'echónhen ch'án itsi tí kjuachaxin kuènte Dios. Méxra kórxjienhya ch'án nkexrí kjuích'e tí sín í so t'etoan. <sup>52</sup> Méxra sákjuítsjehe ch'án tí ch'ín Pilato kjuíkjanchia ch'án tí cuerpo kuènte ch'ín Jesús. A ntá ch'ín Pilato kjuanjon ch'án kjuachaxin. <sup>53</sup> Ntá sákjuí sín tsjinkajinxin sín ch'án ntacruz. Ntá kjuixin kjuinkajin sín ch'án ntá kjuínchek'ísímá sín ch'án ijnko ka jié, ntá sákjuíko sín tsoxravá ch'án ijnko tòye xráxin tsíkjih'éna ch'ín José jehó tjo la ko naxa ninkexró tsíxraváhya ntiha. <sup>54</sup> Kaín tíha kónhen tí yaon viernes kónjin. Tí yaon mé tjejóyaxínhin sín kixin í séhya tsoxrankixin tí yaon t'ok'éhe sín sábadó kixin kohya kjuachaxin sich'e sín ninkehó xra.

<sup>55</sup> A ntá tí chojni chjin nkáchréhe kjuícoxín ch'ín Jesús estado Galilea kjaxin sákjuíko sín sákjuítsjehe sín tí tòye tsoxravá ch'án la ko k'uíkon sín jína nkexrí kjuak'e sín tí cuerpo kuènte ch'án. <sup>56</sup> A ntá tíó kjan sín tí nchia tjejó sín k'óyaxínhin sín kjueya sín xroan xraxé náxrjón itsa ntóé ch'án kixin xikaha k'uékinkáchónki tí sín judío. A ntá k'ok'éhe sín tí yaon sábadó éxi t'etoan tí ley.

### Ó xechón ch'ín Jesús

(Mt. 28.1-10; Mr. 16.1-8; Jn. 20.1-10)

**24** Tí yaon domingo, mé tí yaon xránkixín semana tí chojni chjin na xíkjan sín inaá tí tsíxravá ch'ín Jesús sákjuíko sín xroan xraxé tsík'ena sín. La ko í so chojni chjin sákjuíkotoxin sín. <sup>2</sup> Ntá ó kjuíji sín ntiha k'uíkon sín tí xro tsíkjèxin tí tòye la í xikaha tjen tí sákjuí sín. <sup>3</sup> Ntá k'uixenhen sín tòye ntá k'uitjahya sín cuerpo kuènte Ìnchéni Jesús. <sup>4</sup> Ntá chrakon sín ntá noehya sín nkehe sich'e sín. Ntá xrinahya k'uíkon sín iyó chojni ntoa tjejóxin toté chjinaxon tí tjejó sín, la iké sín la tjákini tsjehe. <sup>5</sup> A ntá tí chojni chjin kjuínchek'isén kja sín tjejótsjehe sín nonte kixin imá chrakon sín, a ntá tí chojni ntoa ntáchro sín kixin:

—¿Nkekuènte xritjéyará tí nkexro tjechón tí síin tí sín tsík'en? <sup>6</sup> Tjenhya ch'án ntihi la ó xechón ch'án. Xráxinkáonrá nkehe ntáchro ch'án tí kjuák'e ch'án estado Galilea <sup>7</sup> ntáchro ch'án kixin jehe ch'án tí Xjeen Dios K'óna Chojni t'ichjánxin tsotsé tí sín chóna jje tsjak'enkanı sín ch'án ntacruz la ko tí nixin yaon tsoxechón ch'án inaá —ichro sín.

<sup>8</sup> A ntá tí síchjin xráxinkaon sín kixin nkexrí tsíchronka ch'ín Jesús, <sup>9</sup> a ntá tíó kjanxin sín tí tsíxravá ch'án ntá chénka sín tí tejnko tí sín k'uék'ajiko ch'án la ko kaín tí í so sín. <sup>10</sup> A ntá tí sín sákjuíchenka tí sín apóstol la mé tjan María Magdalena la ko tjan Juana la ko tjan María iné ch'ín Jacobo la ko tí í so chojni chjin. <sup>11</sup> A ntá tí sín apóstol kuínhin sín éxi ijnko nkehe chaxínhya tí nkehe chrónka tí jehe sín ntá kuítekakonhya sín.

<sup>12</sup> Kjánchó ch'ín Pedro k'uaxrjexín ch'án nchia tinká ch'án sákjuítsjehe ch'án tí tsíkjinxravá ch'ín Jesús. Ntá kjuíji ch'án k'uíkon ch'án tí nkaxenhen tòye

k'uíkon ch'án kixin jehó tí ka tsík'ísímá ch'án ntaha tjen. Ntá kjan ch'án tí nchia tjen ch'án chrakon ch'án kixin xíkaha tsíkónhen.

**Tí ntia Emaús sákjuí sín la kjuíjichréhe Inchéni**

(Mr. 16.12-13)

<sup>13</sup> A ntá tí yaon a iyó sín sákjuí sín ijnko chjasin ntsí it'in Emaús, mé kjínx-in tejnko kilómetro tí chjasin Jerusalén. <sup>14</sup> Tinkákjo sín kíchó sín kixin kaín tí nkehe tsíkónhen tí chjasin Jerusalén. <sup>15</sup> A ntá nachrohe nixja sín tinkákjo sín, a ntá ch'ín Jesús kóchjinehe ch'án tí jehe sín sákjuíko sín ch'án. <sup>16</sup> Kjónté k'uíkon sín ch'án la kjuanjonhya Dios kjuachaxin kixin chrókjuatsöan sín tí jehe ch'án. <sup>17</sup> A ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tinkakjórá tí k'uinkará ntia? ¿Nkekuènte kixin t'avará? —ichro ch'án.

<sup>18</sup> A ntá ijnko tí jehe sín mé it'in Cleofas, mé kjuátehe ch'án kixin:

—Kaín chojni ó nohe sín nkehe tí tsíkónhen chjasin Jerusalén. A ntá jaha kjaxin kjuák'e ntiha la ¿á jahvá noahya nkehe tí tsíkónhen tí yaon a ní? —ichro ch'án.

<sup>19</sup> A ntá jehe ch'án kjuanchankíhi ch'án tí jehe sín kixin:

—¿Xá nkehe tsíkónhen? —ichro ch'án.

Ntá chénka sín ch'án kixin:

—Tí nkehe tsíkónhen ch'ín Jesús tsíkjin ch'án chjasin Nazaret. Jehe ch'án na ijnko nkexro k'uéchronka itén Dios, na mé kjuakoxin ch'án kjuachaxin kuènte nkaya nkajní kaín tí nkehe k'uékjich'e ch'án la ko kaín nkehe k'uéntáchro ch'án mé xíkaha k'uíkon Dios la ko k'uíkon tí chojni. <sup>20</sup> A ntá tí nchat'á t'etöan la ko tí sín gobierno kjuínchek'áyéhe sín ch'án kixin its'en ch'án la tsjak'enkani sín ch'án ntacruz. <sup>21</sup> A ntá jeheni k'uejóchónhenni

kixin jehe ch'án chrókjuinchekaá ch'án tí sín Israel. A ntá jie ó chóna ini yaon xíkaha kónhen. <sup>22</sup> A ntá iso chojni chjin kjaxin k'uékinkáchónki sín ch'án kjuínchechrakon sín tí jeheni kixin jehe sín tsíkjitsjehe sín tí tsíxravá ch'án imá nchítjén <sup>23</sup> la mé tsík'itjahya sín tí cuerpo kuènte ch'án, ntá kjan sín chrónka sín kixin tsík'ikon sín iyó sín ángel chrónka sín kixin ch'ín Jesús la tjechón ch'án, ichro sín. <sup>24</sup> Ntá tuénxín iyó tí sín k'uájikoni kjaxin sákjuitsjehe sín tí tsíxravá ch'án la kuik'itja sín éxi chrónka tí chojni chjin, kjánchó ch'ín Jesús la k'uíkonhya sín —ichro tí yaá sín a.

<sup>25</sup> Ntá kjuátehe ch'ín Jesús ntáchro ch'án kixin:

—Lontirá jahará la tjokahya kuítekáonrá tí nkehe k'uéchronka tí sín profeta k'uéjó ósé. <sup>26</sup> ¿Xá t'ichjánxinhya chrókjuasóte Cristo senó ntá chrók'uáyéhe ch'án tí kjuachaxin chrók'uetöan ch'án? —ichro ch'án.

<sup>27</sup> Ntá kjuankixin ch'án chronkaxín ch'án nkexrí t'axrxjín kaín tí nkehe nixja xroon itén Dios kixin nkehe tsonhen tí jehe ch'án la mé kjuankixixín ch'án chronkaxín ch'án tí nkehe tsíkjin ch'ín Moisés la ko kjuintaxín chronkaxín ch'án tí nkehe tsíkjin tí í so sín profeta.

<sup>28</sup> Ntá kjuíji sín tí chjasin ntsí a, a ntá ch'ín Jesús tsjehe ch'án éxi naxa sáchrókjui ch'án kjín. <sup>29</sup> A ntá jehe sín mé chronóehe sín ch'án kixin ntahó chrókuitöhe ch'án, ntáchro sín kixin:

—Titöha ts'ejóni ntihi kixin ntá ó kóntó la ó ts'ixitie —ichro sín.

Ntá ch'ín Jesús la k'uixenhen ch'án nchia kixin tsitöeko sín ch'án. <sup>30</sup> A ntá tjejótjaxinko sín ch'án tí tjen tí ntamesa, ntá ntiha xranjon nkehe sine sín, ntá kuákja ch'án tí niotja la kjuanchehe ch'án kjuasáyé Dios la kóchrít'o ch'án kuákja tí jehe sín. <sup>31</sup> Ntá tuénxín xraxinkaon sín ntá kjuátöan sín

tí jehe ch'án. Ntá tuénxín k'uitjáyankoá ch'án. <sup>32</sup>Ntá jehe sín itjo sín kíchó sín ntáchro sín kixin:

—¿Á chaxínhya chéhe asénni tí kuikaoni ch'án ntja kixin chronkaxín ch'án nkexrí t'axrjexín tí itén Dios tsíkjin sín ósé? —ichro sín.

<sup>33</sup>Ntá tuénxín k'uínkatjen sín kjan sín chjasin Jerusalén. A ntá ntaha k'uitja sín tí tejnko sín jnkokoá tjejó sín la ko tí í so sín. <sup>34</sup>A ntá tí sín ntiha chrónka sín kixin:

—Chaxín tjechón Ìnchéni la mé ch'ín Simón tsík'ikon ch'án tí jehe ch'án —ichro sín.

<sup>35</sup>Ntá jehe sín kjaxin chrónka sín nkehe tsíkónhen tí ntja sákjuí sín kixin nkexrí kjuátsoanxín sín tí ch'ín Jesús tí kóchrít'o ch'án niotja kjuanjon ch'án.

### Titàya k'uíkuèn sín ikui ch'ín Jesús

(Mt. 28.16-20; Mr.

16.14-18; Jn. 20.19-23)

<sup>36</sup>A ntá jehe sín naxa tjejó tjo sín kaín tí nkehe tsíkónhen, a ntá xrínahya ch'ín Jesús kjuák'e jnkosiné tí tjejó sín, nix-jehe ch'án tí jehe sín ntáchro ch'án kixin:

—¿Á kjuaxróxin tjejorá? —ichro ch'án.

<sup>37</sup>A ntá jehe sín la imá chrakon sín kjuenkayáxin sín kixin k'uíkon sín ijnko xríntoe chojni.

—Ách'e kjuachani —ichro sín.

<sup>38</sup>A ntá ntáche ch'ín Jesús tí jehe sín kixin:

—¿Nkekuènte chrakonrá? ¿Nkekuènte xikaha tjenkayáxin asánrá? <sup>39</sup>Tsjehérá tjaná la ko totená kixin chaxín janhan. It-serána la ko komárána, kixin ijnko xríntoe chojni chón tahya nto la ko chón tahya hueso éxí t'ikonrá kixin chonta janhan —ichro ch'án.

<sup>40</sup>A ntá xikaha ichro ch'án ntá kjuako ch'án itja ch'án la ko toté ch'án. <sup>41</sup>Ntá kjónté xikaha k'uíkon sín la naxa kuítekaonhya sín kixin chéhe sín la ko

chrakon sín. A ntá ch'ín Jesús ntáchro ch'án kixin:

—¿Á chontará ichrén nkehe sineni ntihi ní? —ichro ch'án.

<sup>42</sup>Ntá chjéhe sín ch'án it'o koche tsíchjántaón xrohi la ko ijnko t'o katjé kotsjenta tjiá tsjen. <sup>43</sup>A ntá jehe ch'án kuákja ch'án kjóne ch'án k'uíkonxín kon sín. <sup>44</sup>Na ntá ntáchro ch'án kixin:

—Kaín tí nkehe k'uátsínka tí janhan mé k'uéntáxrjan tí naxa k'uék'ejóni senó; kixin t'ichjánxin tsoxiteyá kaín tí nkehe chrónka tí ley tsíkjin ch'ín Moisés la ko tí nkehe tsíkjin tí sín profeta la ko tí nkehe ntáchro tí salmo kixin nkexrí tsona janhan —ichro ch'án.

<sup>45</sup>Ntá kjuanjon ch'án kjuachaxin kixin tsienxín sín tí xroon itén Dios tsíkjin sín ósé. <sup>46</sup>Ntá chénka ch'án sín kixin:

—Mé xikaha nixja tí xroon itén Dios kixin tí Cristo la t'ichjánxin ts'en, la nixin yaon t'ichjánxin tsoxechón ch'án. <sup>47</sup>A ntá t'ichjánxin tsjakoxin sín ihnié ch'án tsjankixixín sín chjasin Jerusalén la ko chrókuinhin chojni kuenté chjasintajni kixin chrókuítóhe sín ijjié sín chrókuitekaon sín tí jehe ch'án kixin jehe ch'án mé chrókjuincheyaon tí ijjié sín. <sup>48</sup>A ntá jahará mé tsochronkaxínrá kixin xikaha k'uíkonrá kaín tíha. <sup>49</sup>Ntá tsochr'an janhan tí Nchakuen T'aná éxí tsíntáchro ch'án. Kjánchó chjasin Jerusalén ntahó titohará tsoxiteyájia ts'ayéhérá kjuachaxin tsixin nkaya nkajní.

### Ch'ín Jesús sákjuí ch'án nkaya nkajní

(Mr. 16.19-20)

<sup>50</sup>A ntá ch'ín Jesús sákjuíko sín ch'án k'uaxrjexín sín chjasin Jerusalén sákjuí sín chjasin Betania. Ntá kjuàya ch'án tja ch'án kjuíncheyaon ch'án tí jehe sín. <sup>51</sup>A ntá kjuixin kjuíncheyaon ch'án sín ntá k'uaxrjenta ch'án tí jehe sín ntá sákjuí ch'án nkaya nkajní. <sup>52</sup>A ntá jehe sín k'uíkon sín xikaha, a ntá xraxinkaon

sín ch'án, ntá kjan sín chjasin Jerusalén nkaxenhen n̄nko tjanchehe sín Dios  
chéhe sín. <sup>53</sup> Δ ntá kaín yaon tjejó sín kjuasáya. Amén.



## Tí tan jína chrónka ch'ín Juan

### Tí nkekro chrónkaxín nkekxí tjen Dios mé k'óna ijnko chojni chjasintajni

**1** A ntá tí xrankíxín naxa k'ónahya tí chjasintajni a na mé xráxín tjen tí nkekro chrónkaxín nkekxí tjen Dios, na mé Cristo tíha, na mé kjuák'eko Dios na mé kjaxin Dios tíha. <sup>2</sup>Tí xrankíxín na mé tí nkekro xráxín kjuák'eko Dios <sup>3</sup>la ko kjuachaxin kuènte ch'án na mé k'ónaxín kaín xín nkehe síin jie. A ntá kohya ninkehó nkehe k'ónakoá, na mé kaín xín nkehe síin na mé k'ónaxín tí kjuachaxin kuènte ch'án. <sup>4</sup>Jehe ch'án na mé kjuanjon kjuachaxin kaín nkehe síchón síin chjasintajni la ko jehe ch'án mé xrohi t'inkaséyanxínhin jnkojnko ntje chojni chjasintajni. <sup>5</sup>Tí xrohi a mé t'inkaséyanxín tí sítié a. A ntá tí sítié a mé tjinkaon chrók'ók'anka tí xrohi a, kjánchó kjuachahya k'ók'anka.

<sup>6</sup>Ntá kjuák'e ijnko chojni k'uètuèhen Dios kui mé it'in ch'án Juan. <sup>7</sup>Ikui ch'án kjuák'echrónka ch'án nkekxínchi tjen tí xrohi t'inkaséyanxín chjasintajni kíxín kaín xín chojni chrókuitekaon sín tí tjechrónka ch'án a. <sup>8</sup>A ntá tí ch'ín Juan la jehya tí xrohi a. Ó k'uítuènhón ch'án kui ch'án kíxín tsochrónka ch'án nkerí kuènte tí xrohi a. <sup>9</sup>A ntá tí xrohi chaxín t'inkaséyanxínhin kaín xín chojni na ó tsíki ch'án chjasintajni jie.

<sup>10</sup>Kjuák'e ch'án chjasintajni na mé Dios tsíkjich'éanaxín ch'án chjasintajni tí kjuachaxin kuènte tí nkekro a na kjónté kjuák'e ch'án chjasintajni na naxa kjuátsoanhya sín ch'án. <sup>11</sup>Ikui ch'án tí tjejó tí sín judío k'uaxrjeníxín ch'án, kjánchó kuítekakuenhya sín ch'án. <sup>12</sup>A ntá tí sín kuítekaon sín ch'án mé k'uáyéhe sín kjuachaxin kíxín ts'óna sín xjeen Dios. <sup>13</sup>Ntá yóehya ts'axrjeníxín sín it'é sín chjasintajni ntihyó la ko yóehya ijnko it'é

chrókjuenkayáxin ch'án chrókjuich'éna ch'án ijnko xjan. Náhi. Dios mé kjueyá ch'án nkekro ts'óna xjeen ch'án.

<sup>14</sup>A ntá tí nkekro chrónkaxín nkekxí tjen Dios na mé k'óna ijnko chojni chjasintajni kjuák'enkákjanni ch'án na mé imá k'uétjuèhé ch'án chojni chjasintajni la ko imá ntoá chrónka ch'án. Kuayeni k'uíkonní kíxín imá t'etjan ch'án kíxín jehe ch'án mé tí jnkokoáxón Xjeen It'éni tjen nkaya nkajni na mé xíkaha imá t'etjan ch'án.

<sup>15</sup>Ch'ín Juan mé chrónka ch'án nkekxí tjen tí nkekro a. Ntáchro ch'án kíxín:

—Senó k'uékjákohará kíxín chr'éxin tsi tí nkekro a, na mé antsí má t'etjan ch'án, a ntá janhan la náhi kíxín tí janhan naxa kohyana la tí jehe ch'án la ó xráxín tjen ch'án —mé xíkaha chrónka ch'ín Juan.

<sup>16</sup>Kaínni ó k'uáyéheni tí kjuachaxin jíé tjetjanjon ch'án la ko antsí má tjencheyaonni ch'án la ko tjencheyaonni ch'án. <sup>17</sup>Dios mé tsík'etuenhen ch'ín Moisés kíxín tsokjin ch'án tí ley. A ntá Ìnchéni Jesucristo mé kjuakoxin ch'án kíxín nkekxí imá tjuèhé Dios tí chojni chjasintajni. A ntá kaín nkehe chrónka ch'án mé antsí ntoá. <sup>18</sup>Kohya ninkexró chjasintajni k'uíkon sín Dios a. A ntá tí jnkokoáxón Xjeen ch'án na mé xráxín jnkokoá tjenkayáxinko It'é ch'án la mé jehe ch'án mé ó kjuínchekónoheni ch'án nkekxí tjen It'é ch'án nkaya nkajni.

### Ch'ín Juan mé chrónka ch'án nkekxínchi tjen ch'ín Jesús

(Mt. 3.11-12; Mr. 1.7-8; Lc. 3.15-17)

<sup>19</sup>Iso tí sín judío k'uéjó sín chjasin Jerusalén na ntá ichr'án sín iso chojni nchat'á la ko iso tí sín levita, ikui sín kuinixjehe sín tí ch'in Juan kjuan-chankíhi sín ch'án kíxín:

—¿Nkekro tí jaha? —ichro sín.

<sup>20</sup>Ntá kjuínchemáhya ch'án, ntáchro ch'án kíxín:

—Náhi. Jehya janhan tí Cristo —ichro ch'án.

<sup>21</sup> Ntá xíkjanchankíhi sín ch'án inaá, ntáchro sín kixin:

—¿Xá nkexro tí jaha? ¿Á jaha tí profeta Elías? —ichro sín.

Ntá ch'ín Juan la xíkjatehe ch'án ntáchro ch'án kixin:

—Náhi. Jehya janhan Elías —ichro ch'án.

Ntá xíkjanchankíhi sín ch'án inaá kixin:

—¿Á jaha tí nkexro tjejóchónhenni itsi tsochrónka itén Dios? —ichro sín.

Na ntá ntáchro ch'ín Juan inaá kixin:

—Náhi. Janhya —ichro ch'án.

<sup>22</sup> Ntá kjuanchankíhi sín ch'án inaá kixin:

—¿Ntá nkexro jaha? T'ichjánxin tsonoheni tsochénkani tí sín ichr'ánni ikuini. ¿Nkehe tsochrónka kixin nkexro tí jaha? —ichro sín.

<sup>23</sup> Ntá kjuátehe ch'ín Juan ntáchro ch'án kixin:

—Janhan mé tí nkexro tsjak'e nteje ts'èya tsoxrjanka kixin: “Takitjehérá ijnko ntja ntoí tsixin Închéni” —mé xikaha ichro ch'án kjuátexín ch'án itén ch'ín Isafas k'uechrónka xroon itén Dios ósé.<sup>††</sup>

<sup>24</sup> A ntá tí sín fariseo mé tsíchr'án tí jehe sín kuikjanchankíhi sín tí ch'ín Juan. <sup>25</sup> A ntá kjuanchankíhi sín ch'án kixin:

—Ó ntáchrua kixin jahya tí Cristo tí nkexro tsaxin chojni la ko jahya tí Elías, la ko jahya nijnko tí nkexro k'uechrónka itén Dios ósé. ¿A ntá nkekuenté tikite chojni tí xikaha? —mé ichro sín.

<sup>26</sup> Ntá ntáchro ch'ín Juan kixin:

—Janhan na mé inta ó tikitexían chojni. Ó ntihi tjenkákjan ijnko nkexro naxa tjatsoanhyará. <sup>27</sup> Jehe ch'án mé tsi ch'án

nóton tí janhan. A ntá antsí má t'etoan ch'án, a ntá janhan na kénhyó. A ntá tósuàna chrókjuasintanka tí correa tokaté ch'án —ichro ch'án.

<sup>28</sup> Káin tíha mé tsíkónhen tí chjasin it'ín Betábara tí nó tjitoxin yaon tóhe tí ntarío Jordán tí kjuák'e ch'ín Juan kuikjete chojni.

### Ch'ín Jesús na mé éxi yóhe ijnko kolélo kuente Dios

<sup>29</sup> A ntá tí yaon chr'éxin mé k'uíkon ch'ín Juan kixin ó tjekui ch'ín Jesús. Ntá nixjehe ch'án tí sín tsíkóchjina ntáchro ch'án kixin:

—Tsjehérá tí nkexro tjekui mé tí Kolélo kuente Dios jehe ch'án. Tíha mé tsjiinxín ijie chojni chjasintajni. <sup>30</sup> Janhan mé k'uexrjanka kixin tí iton tí janhan mé tsichréhe ijnko nkexro antsí t'etoan, a ntá janhan la kénhyó tétoan kixin naxa kohyana na jehe ch'án la ó xráxin tjen ch'án. <sup>31</sup> Kjuxin janhan naxa chonhya nkexro tíha. A ntá xra ó k'uíinka kjuak'é kuikitexían chojni inta kixin tí chojni nación Israel mé chrókjuásoanxín sín ch'án —ichro ch'ín Juan

<sup>32</sup> Kjuintxín ntáchro ch'ín Juan kixin:

—Ó k'uíkuan kixin tí Nchakuen Dios mé k'uínkajxinxin nkaya nkajni na éxi yóhe ijnko kontóá k'uínkajin la ko kjuák'e va ntoí tí tjen ch'án. <sup>33</sup> A ntá janhan kjuxin naxa chonhya nkexro tíha. A ntá tí nkexro k'uetuanna kixin tsjak'é tsíkitexían chojni inta mé tsíchrónka ch'án kixin tí Nchakuen Dios mé ts'inkajin tsjak'e ntoí tí tjen ijnko chojni na mé tsjatsoanxían janhan kixin tí nkexro a mé tsíkitexín ch'án Nchakuen Dios chojni. <sup>34</sup> A ntá janhan jie mé ó k'uíkonxin kuan kixin xikaha kónhen tí jehe ch'án, a ntá xrjanxían kixin táha mé Xjeen Dios tíha —mé xikaha chrónka ch'án.

<sup>††</sup>1:23 Isafas 40.3

### Tí sín saoxín kjueyá ch'ín Jesús

<sup>35</sup> Tí yaon chr'éxin kjuák'e ch'ín Juan la ko iyó tí sín k'uájiko ch'án, <sup>36</sup> a ntá xrínahya k'uíkon ch'án k'uátsínka ch'ín Jesús. Ntá ntáchro ch'ín Juan kixin:

—Tsjeherá tí nkexro i mé tí Kolélo kuènte Dios —ichro ch'án.

<sup>37</sup> Ntá kuínhin tí yóí sín k'uájiko ch'ín Juan na ntá sákjuíchréhe sín tí ch'ín Jesús. <sup>38</sup> Ntá kuinkátjía ch'ín Jesús k'uíkon ch'án kixin tinkáchréhe sín ntá kjuanchankíhi ch'án sín kixin:

—¿Xá nkehe xritjéyará? —ichro ch'án.

Ntá ntáchro sín kixin:

—Maestro, ¿xá nketí nchia itjen? —ichro sín.

<sup>39</sup> Ntá kjuátehe ch'án ntáchro ch'án kixin:

—Íntá sátsjini ts'ikonrá nketí —ichro ch'án.

Ntá kuinkáchréhe sín ch'án k'uíkon sín nketí nchia kjuák'e ch'án ntá k'uéjoko sín ch'án kuenté tí kónjín kixin kjuíji sín ntiha como las cuatro kónjín.

<sup>40</sup> A ntá yóí sín ts'ikinhin sín tí chrónka ch'ín Juan ntá sákjuíchréhe sín tí ch'ín Jesús na mé ijnko mé it'in Andrés. Jehe ch'án chónka ch'án ijnko savé mé it'in Simón Pedro. <sup>41</sup> Na ntá tuénxín tí ch'ín Andrés sákjuíkjeýá ch'án tí savé ch'án Simón. Ntá chénka ch'án tí savé ch'án kixin:

—Ó k'uitjani tí nkexro Mesías —ichro ch'án. Tíha mé t'axrjexín kixin Cristo.

<sup>42</sup> A ntá ch'ín Andrés mé kuikao ch'án tí savé ch'án Simón tí tjen ch'ín Jesús. Ntá ch'ín Jesús mé komá ch'án tí ch'ín Simón ntáchro ch'án kixin:

—Jaha mé Simón, it'á mé it'in Jonás. Ntá jie sintak'ian Cefas —ichro ch'án. A ntá tí palabra Cefas la ko tí palabra Pedro na mé yóí mé t'axrjexín kixin ixro tíha.

### Ch'ín Jesús mé kjueyá ch'án tí ch'ín Felipe la ko tí ch'ín Natanael

<sup>43</sup> A ntá tí yaon chr'éxin mé sáchrókjui ch'ín Jesús tí estado Galilea. Ntá k'uitja ch'án tí ch'ín Felipe, na ntá ntáche ch'án kixin:

—Chr'éhé tí janhan —ichro ch'án.

<sup>44</sup> A ntá tí ch'ín Felipe mé chjasén ch'án mé it'in Betsaida tí chjasén ch'ín Andrés la ko ch'ín Pedro. <sup>45</sup> Ntá tí ch'ín Felipe mé sákjuíkjeýá ch'án tí ch'ín Natanael na ntá chénka ch'án kixin:

—Ó k'uitjani tí nkexro tsi éxi k'uéchrónka tí ch'ín Moisés tí tsíkjin ch'án tí xroon chrónka tí nkehe k'uetqan Dios. Kjaxin tí sín k'uéchrónka tí itén Dios chr'éxin mé k'uéchrónka sín kixin itsi tí nkexro a. Na ntá ó k'uitjani ch'án na mé jehe ch'án mé it'in Jesús, la it'é mé it'in José, la mé chjasén ch'án mé Nazaret —ichro ch'ín Felipe.

<sup>46</sup> A ntá ntáchro ch'ín Natanael kixin:

—¿Xá kjuánchí má chrókójina tí nkehe chrók'uaxrjexín tí chjasin Nazaret a? —ichro ch'án.

Ntá kjuátehe ch'ín Felipe ntáchro ch'án kixin:

—Xrákiá ts'ikuan —ichro ch'án.

<sup>47</sup> Na ntá k'uíkon ch'ín Jesús kixin ó kui tinkákóchjina ch'ín Natanael, na ntáchro ch'án kixin:

—Ó kui ijnko ch'ín chaxín israelita la kohya nijnko kjuach'ia xriko ch'án —ichro ch'án.

<sup>48</sup> Na ntá ntáchro ch'ín Natanael kjuanchankíhi ch'án tí ch'ín Jesús kixin:

—¿Nkexrí kixin tjátsoanna? —ichro ch'án.

Ntá kjuátehe ch'ín Jesús ntáchro ch'án kixin:

—Naxa nixjaahya tí ch'ín Felipe mé k'uíkuan tí jaha tjenkankiá tí nta t'óna to higo —ichro ch'án.

<sup>49</sup> Na ntá ntáchro ch'ín Natanael kixin:

—Maestro, jaha la chaxín tí Xjeen Dios tjen nkaya nkajíní tsétuenhén tí nación Israel —ichro ch'án.

<sup>50</sup> Ntá kjuátehe ch'ín Jesús ntáchro ch'án kixin:

—Jehya tí nkehe ntáxrjan k'uíkuan tjenkankiá nta t'óna to higo, jehya táhó tsítékákonxian. Náhí. Chr'éxin xiki í jnko kjuaxroan antsí má jié ts'íkuan, a ntá tíhi la kénhyó —ichro ch'án.

<sup>51</sup> Kjaxin ntáchro ch'ín Jesús kixin:

—Ijnko nkehe ntoá tsoxrjanka kixin tsoxitjehe tí nkajíní ts'ikonrá itsi itsjé tí sín ángel kuènte Dios mé ts'it'ótjen la ko ts'inkajin tí tjeñ janhan mé tí Xjeen Dios K'óna Chojni —ichro ch'án.

### Chjasin Caná estado Galilea kótehe ijnko chojni

**2** A ntá iní yaon chr'éxin ntá kótehe ijnko ch'ín chjasin Caná estado Galilea. Mé koí tí iné ch'ín Jesús tsík'íyehé sín tjan la ntiha tjen tjan koí. <sup>2</sup> Kjaxin tsík'íyehé sín tí ch'ín Jesús la ko tí sín k'uájiko ch'án kixin sátsji sín tí tsíkótehe sín ntiha. <sup>3</sup> Ntá ó tsík'ankehe sín tí xranvino ik'uí sín na ntá tí iné ch'ín Jesús mé ntáche tjan tí jehé ch'án kixin:

—Ó tsík'ánkã xranvino its'i sín —ichro tjan.

<sup>4</sup> Ntá ntáchro ch'ín Jesús kixin:

—Naná, ¿nkehe tsonhen chonka? Naxã kjuixrakáhya tí yaon tsjásian kjuaxroan —ichro ch'án.

<sup>5</sup> A ntá tí iné ch'án na mé ntáche tjan tí sín ch'e xřã kixin:

—Tí chrén nkehe chrók'uetuanhanrá ch'án chrókjuínchexiteyará —ichro tjan.

<sup>6</sup> A ntá síin ntiha injon chí tsík'óna xřõ na mé tíha tjiá ntã t'ònti sín kixin xikaha mé ts'axrjehe tí jje chóna sín koí, mé xikaha kuinkáchónki tí sín judío. Na mé jnkojnko chí mé tjacha tikia ochenta litro la o ciento litro ntã. <sup>7</sup> Ntá k'uetuenhen ch'ín Jesús tí sín ch'e xřã kixin:

—Tíkjará ntã kain tí chí a tsokaón —ichro ch'án.

Ntá kjuínchexiteyá sín kjuínchekaón sín ntã jnkojnko tí chí a. <sup>8</sup> A ntá ntáche ch'ín Jesús tí jehé sín inaá kixin:

—Tákjá intsí ntã tjiá chí tjikuehé tí ch'ín t'etoan tí kia a —ichro ch'án.

Ntá xikaha kjuích'e sín kjuínchexiteyá sín. <sup>9</sup> A ntá tí ch'ín t'etoan tí kia a mé tsjéxin ch'án tí ntã tsík'óna xranvino kjónté noehya ch'án nketí kuixin tí xran a. Jehó tí sín ch'e xřã kuikao sín mé nohe sín kixin jehé sín mé tsíkakitsje sín ntã. Ntá tí ch'ín t'etoan mé k'uíyehé ch'án tí ch'ín tsíkótehe. <sup>10</sup> Ntáche ch'án kixin:

—Xrácín tí sín tjasin kia la senó tí xranvino náxrjón tjanjon sín na tió chrók'uihya tí sín tsíkóchjina na ntã tjanjon sín tí xranvino náxrjónhya. A ntã jaha la náhí. Senó kjuakéchjina tí xranvino antsí má náxrjón, a ntã tí jie tjetjánjuan jaha —ichro ch'án.

<sup>11</sup> Tí kjuaxroan a kjuích'e ch'ín Jesús chjasin Caná estado Galilea mé tí kjuaxroan saoxín kjuasin ch'án mé kjuakoxin ch'án nkexrí imá jié tí kjuachaxin kuènte ch'án, a ntã tí sín k'uájiko ch'án mé kuítekaon sín tí jehé ch'án.

<sup>12</sup> Ntá ó k'uátsínka kia, a ntã sákjuí ch'án chjasin Capernaum, sákjuíko ch'án iné ch'án la ko kichó ch'án la ko tí sín k'uájiko ch'án, cóxrjenhen sín ntiha iso yaon.

### Ch'ín Jesús mé kjuínchetjóá ch'án tí ninko jié

(Mt. 21.12-13; Mr.

11.15-18; Lc. 19.45-46)

<sup>13</sup> A ntá ó kuichjina tí yaon kia kuènte pascua kuènte tí sín judío. Ntá ch'ín Jesús sákjuí ch'án chjasin Jerusalén. <sup>14</sup> Ntá nkaxenhen tí ninko jié ntiha k'uíkon ch'án tí sín nchekjixin koxinta la ko kolélo la ko kontóá. La ko ntiha kjaxin tjejótjaxin tí sín tjinkixixín chichaon.

<sup>15</sup>Ntá ch'ín Jesús mé kuákja ch'án ihno tsíxehe sín ntiha, kjuích'éna ch'án ijnko chikoté, ntá kuakitsjexín ch'án sín nkaxenhen nínko kaín xín sín la ko tí kolélo la ko tí koxinta. Na ntá tí ntamesa tjinkítóxixín sín tí chichaon mé kótéka ch'án tsíkjaminkí xènjín tí chichaon a. <sup>16</sup>Ntá k'uetuenhen ch'án tí sín nchekji tí kontóá a kixin:

—Takítsjerá kaín tí nkehe a. Ch'énahyará ijnko ntasin tí ntøe T'aná ntihi —ichro ch'án.

<sup>17</sup>Ntá xráxinkaon tí sín k'uájiko ch'án tí nkehe tsíkjin sín ósé kixin: “Éxí xrohi k'uákjen asenná nínkavan kixin tí ntøa tjikosáyehya sín.” ††

<sup>18</sup>Ntá tí sín judío mé kjuanchankíhi sín ch'án kixin:

—¿Xá nkerí kjuaxroan tsjásixián tsjákoxian nketí kjuachaxin chonta kixin xíkaha kjuích'e tíhi? —ichro sín.

<sup>19</sup>Ntá kjuátehe ch'ín Jesús kixin:

—Tí ts'oxíkará tí nínko i ntá iníkoá yaon la ó sít'ána nixin tsjak'e inaá —ichro ch'án.

<sup>20</sup>Na ntá ntáchro tí sín judío a kixin:

—Cuarenta y seis nánó k'uéjé sín kjuích'éna sín tí nínko i, a ntá jaha ntáchrúa kixin iní yaon koá sích'éna inaá, ichrua —ichro sín.

<sup>21</sup>Kjánchó kienxínhya sín kixin tí nínko ntáchro ch'ín Jesús la tí cuerpo kuènte ch'án. <sup>22</sup>Ntá tió kjuixin xechón ch'án ntá xráxinkaon tí sín k'uájiko ch'án kixin xíkaha tsíchrónka ch'án, ntá kuítekaon sín tí xroon itén Dios tsíkjin sín ósé la ko tí nkehe tsíchrónka ch'án.

### Ch'ín Jesús mé nohe nkehe tónhen asén kaín xín chojni

<sup>23</sup>Tiό kjuák'e ch'ín Jesús chjasin Jerusalén tí kia pascua, a ntá itsjé chojni kuinkáchónki sín tí jehe ch'án kixin ó k'uíkon sín tí kjuaxroan kjuasin ch'án.

<sup>24</sup>Kjánchó ch'ín Jesús la kuítekakuenhya ch'án tí jehe sín kixin jehe ch'án la ó nohe ch'án jína nkexrí tónhen asén jnkojnko chojni <sup>25</sup>a ntá t'ichjánxienhya ch'án kixin ninkexró chróchenka ch'án nkexrí tjenkayáxin chojni kixin ó kónohe ch'án kaín nkehe tónhen asén kaín xín chojni.

### Ch'ín Nicodemo kuinixjehe ch'án tí ch'ín Jesús

**3** Kjuák'e ijnko ch'án kuènte tí sín fariseo a mé it'in ch'án Nicodemo. Jehe ch'án mé ijnko nkexro imá tjeotoan kuènte tí sín Israel. <sup>2</sup>A ntá ijnko tie kjuíchréhe ch'án tí ch'ín Jesús a nixjehe ch'án ntáchro ch'án kixin:

—Maestro, kónoheni kixin It'éni tjen nkaya nkajní mé tsíchr'án k'uinka tsjákohéni kixin tí jehya Dios chrókjuak'ekoa la xitjahya chrókjuásian kjuaxroan jíé —ichro ch'án.

<sup>3</sup>Ntá kjuátehe ch'ín Jesús ntáchro ch'án kixin:

—A ntá tsotjonka ijnko nkehe imá tjeotoan. Tí nkexro tsokjéhya nixien mé xitjahya ts'ikon tí kjuachaxin ts'etøan Dios —ichro ch'án.

<sup>4</sup>A ntá ch'ín Nicodemo kjuanchankí ch'án ntáchro ch'án kixin:

—Ó tádana, ¿nkexrí chrókokjína nixien? ¿Á chrók'uíxanhan tsee naná inaá ntá chrókokjína nixien ní? —ichro ch'án.

<sup>5</sup>Ntá kjuátehe ch'ín Jesús ntáchro ch'án kixin:

—Ntá tsotjonka ijnko nkehe imá tjeotoan. Jehó tí sín tsíkokjéxín ntá la ko kjaxin tsíkokjéxín Nchakuen Dios mé ts'áyéhe sín tí kjuachaxin kuènte Dios. <sup>6</sup>Tiό ijnko xjan ts'axrjeníxin chojni na mé tí xjan mé chojni ó. A ntá tí Nchakuen Dios tsokjéxín nixien ijnko chojni na ntá ts'áyéhe sín tí Nchakuen Dios a. <sup>7</sup>Chrakonhya tí nkehe

xrjanka kixin “Kaín chojni t'ichjánxin tsokjîhi nixien.”<sup>8</sup> Éxí yóhe tí tinhín tí chjéhe xrînto ntá noahya nketí kuix-in tí xrînto la ko noahya nketí sátsji na mé kjaxin xikaha kónhen kaín tí nkexro tsíkokjéxín Nchakuen Dios —ichro ch'án.

<sup>9</sup>Ntá xíkjanckhankí ch'ín Nicodemo ínaá kixin:

—¿Nkekuènté kixin xikaha chrókónhen? —ichro ch'án.

<sup>10</sup>Ntá kjuátehe ch'ín Jesús ntáchro ch'án kixin:

—¿Jaha ijnko maestro imá t'etqan tí nación Israel ntá naxa tiénxinhya tí nkehe ní? <sup>11</sup>Chaxín tjétjonka tí nkehe nòna la ko tí nkehe k'uíkuan ntá titekákonnahya jaha. <sup>12</sup>Tí nkehe tjétjonka la kuènte chjasintajni ó ntá kjónté la titekákonnahya jaha. ¿Ntá nkexrí chrókuítekávan tí chrótjonka nkehe kuènte nkaya nkajní? <sup>13</sup>Kohya í jnko nkexro k'uit'ótjen chjasin nkaya nkajní. Jehó tí Xjeen Dios K'óna Chojni mé kjuák'e chjasin nkaya nkajní la ko ntiha kuixín ch'án. <sup>14</sup>Éxí yóhe ch'ín Moisés tió k'uúxín sín tí nteje, a ntá Dios mé k'uetqan kixin sinchekjanoya ch'án ijnko konche tsjak'enkani ch'án ijnko nta, ntá xikaha kjuích'e ch'án kjuak'enkani ch'án tí konche tí nta a komá sín tí konche ntá kuaá sín k'uénhya sín, <sup>15</sup>“mé xikaha tsonhen tí Xjeen Dios K'óna Chojni mé t'ichjánxin kixin tsjak'enkani ch'án ijnko ntacruz <sup>15</sup>kixin mé xikaha kaín nkexro tsinkáchónki tí jehe ch'án mé tsaá sín tsochónta sín kjuachón jnkochríxín.

### Dios imá tjuèhe ch'án tí chojni chjasintajni

<sup>16</sup>Kixin Dios mé imá tjuèhe ch'án chojni chjasintajni ntá kjuanjon ch'án jnkokoqáxón Xjeen ch'án, kixin ntá

jnkojnko chojni tsinkáchónki tí Xjeen ch'án mé ts'itjáyanhya sín tsochónta sín kjuachón jnkochríxín. <sup>17</sup>Chr'ánhya Dios tí Xjeen ch'án chjasintajni kixin sinchekjasóte chojni kixin tí jié kjuasin sín. Náhí. Ó jehí ichr'án ch'án tí Xjeen ch'án chjasintajni kixin sinchekaa chojni.

<sup>18</sup>'Na mé tí sín tsitekaon tí Xjeen Dios la tsjasótehya sín. A ntá tí sín titekakuenhya sín na mé ó kjuixin kjuíncheki-tqexín Dios tí ijíe sín tsjasóte sín kixin titekakuenhya sín tí jnkokoqáxón Xjeen Dios. <sup>19</sup>Na mé xikaha Dios sinchekjasóte sín jnkochríxín kixin ó kui tí nkexro t'inkaséyanxín chjasintajni na kjónté ntá antsí má tóxrjínhin sín tí sítié a. A ntá tí t'inkaséyan la náhi kixin naxa tóxrjínhin sín tí nkehe jínahya tjejóch'e sín. <sup>20</sup>Kaín tí sín tjejóch'e nkehe jínahya na mé tóxrjínhyanhá sín t'inkaséyan chrókóchjinehya sín kixin tsonoxínhya tí nkehe jínahya tjejóch'e sín. <sup>21</sup>A ntá tí sín tjejóch'e sín tí jína a na mé chéhe sín tóchjinehe sín tí t'inkaséyan kuènte Dios kixin tsonoxín tí nkehe ch'e sín kixin ntá kaín xín chojni mé tsjatsqan sín kixin tjejóch'e sín tí nkehe tóxrjínhin Dios.

### Ch'ín Juan Bautista chrónka ínaá kuènte ch'ín Jesús

<sup>22</sup>Na ntá chr'éxín ch'ín Jesús la ko tí sín k'uájiko ch'án na sákjuí sín estado Judea. Ntaha k'uéjoko sín ch'án kuíkíte ch'án chojni. <sup>23</sup>Kjaxin ch'ín Juan kjuák'e ch'án chjasin Enón chjino tí chjasin Salim na mé ntiha kjuák'e kuíkíte ch'án chojni kixin ntiha mé yeé ntá síin. Na ntá nkáki sín kuíkíte sín. <sup>24</sup>Mé xikaha kónhen naxa kjuák'echjinahya ch'ín Juan.

<sup>25</sup>Ntá tí sín k'uájiko ch'ín Juan la ko tí sín judío mé kjuachaxín kichó sín kixin nkexrí íchá jína chrókótuáxin chojni,

ichro sín. <sup>26</sup> A ntá tí sín k'uájiko ch'ín Juan sákjuítsjehe sín ch'án chénka sín ch'án kixin:

—Maestro, tí ch'ín kjuák'ekoa tóhe ntarío Jordán, na mé tí nkexro tsíchronka kuènte ch'án, la mé itjen ch'án tikíte ch'án chojni la ko kaín xín chojni mé tjichréhe sín ch'án —ichro sín.

<sup>27</sup> Na ntá ntá chro ch'ín Juan kixin:

—Tí chrókjuanjonhya Dios kjuachaxin ntá chrokjuahya chrók'uáyéhe chojni. <sup>28</sup> Ó kuínhínrá ntoá k'uéxrxjanka senó kixin janhya tí Cristo. Náhí. Janhan ó kuítuannuá kuítónxián ntja tsóxrxjanka kixin ó tsi ch'án. <sup>29</sup> Éxí yóhe ijnko ch'ín tsotehe na mé jehe ch'án mé ts'áyéhe ch'án tí ichjién ch'án. A ntá tí ch'ín chóxin ch'án mé chéhe asén ch'án tjet-inhin ch'án tjenixja tí ch'ín ts'áyéhe ichjién a. Mé xíkaha janhan imá chàna kixin xíkaha sítónhen kixin itsjé chojni sítóchjinehe sín tí ch'ín Jesús tsinhin sín nkehe tí tjenixja ch'án. <sup>30</sup> A ntá jehe ch'án t'ichjánxin antsí ts'etoan ch'án. A ntá janhan la kénhyó —mé chro ch'ín Juan.

### Tí nkexro kuixín nkaya nkajní

<sup>31</sup> Tí nkexro kuixín nkaya nkajní mé kaín nkehe t'etuenhen ch'án. A ntá ijnko chojni kuènte chjasintajni ó mé chrónka kuènte chjasintajni ó. A ntá tí nkexro kuixín nkaya nkajní mé kaín nkehe t'etuenhen ch'án. <sup>32</sup> Jehe ch'án mé chrónka ch'án tí nkehe tsík'ikon ch'án la ko tí nkehe tsíkinhin ch'án. Kjánchó kohya chojni titekaon sín tí nkehe chrónka ch'án. <sup>33</sup> A ntá jnkojín nkexro titekaon sín tí nkehe chrónka ch'án na mé xíkaha tjakoxin ch'án jie kixin chaxín ntoá chrónka Dios <sup>34</sup> kixin tí nkexro ichr'án Dios mé nixja itén Dios kixin jehya intsíkoá tí Nchakuen Dios k'uáyéhe ch'án. Náhí. <sup>35</sup> It'eni Dios mé tjuèhe ch'án tí Xjeen ch'án na mé xíkaha

ó tsíchjéhe ch'án kjuachaxin kixin kaín xín nkehe ts'etuenhen ch'án. <sup>36</sup> A ntá tí nkexro tsitekaon tí Xjeen Dios mé xíkaha tsochónta sín tí kjuachón jnkochr'ín. A ntá tí sín titekakuenhya sín tí Xjeen Dios mé tsochóntahya sín tí kjuachón jnkochr'ín xíkaha. Tí sín a mé Dios sinchekjasóte sín jnkochr'ín.

### Ch'ín Jesús ikjo ch'án ijnko tjan samaritana

**4** A ntá tí sín fariseo mé kónohe sín kixin antsí tsjé chojni chréhe sín tí ch'ín Jesús kuikíte ch'án sín na ntá tí chojni chréhe sín tí ch'ín Juan la kánhyó tsjé sín. <sup>2</sup> Kjánchó jehya ch'ín Jesús kuikíte ch'án chojni. Méxra tí sín k'uájiko ch'án mé kuikíte sín chojni. <sup>3</sup> A ntá tió kónohe ch'ín Jesús kixin xíkaha tsíkinhin tí sín fariseo ntá k'uaxrxjén ch'án tí estado Judea xíkjan ch'án estado Galilea inaá.

<sup>4</sup> Ntá t'ichjánxin ts'átsínka ch'án estado Samaria. <sup>5</sup> A ntá kjuíji ch'án ijnko chjasin mé it'in Sicar kuènte estado Samaria, mé chjino tí nonte tsíkjinchek-itonhen ch'ín Jacob tí xjeen ch'án José. <sup>6</sup> La ó chjino tjen tí tòye takitsje chojni ìnta mé it'in Ìnté Jacob. Na ntá ó chonkixin kjui sín ntiha. Méxra tí ch'ín Jesús la imá kóxrxjé ch'án kixin imá kjín tí ntja kjuixín ch'án ntá kjuák'etjaxin ch'án chrínta tí tòye takitsje sín ìnta. <sup>7-8</sup> Ntahó kuítóhe ch'án. A ntá tí sín k'uájiko ch'án sákjuí sín tí chjasin chjinaxón sákjuík'ena sín nkehe sineko sín ch'án. Ntá séhyó ikui ijnko tjan kuènte estado Samaria ikui tjan tsakitsje tjan ìnta. Ntá ntá chro tí ch'ín Jesús kixin:

—Chjina intsí ntá its'ia —ichro ch'án.

<sup>9</sup> A ntá tí tjan samaritana mé kjuanchankíhi tjan tí ch'ín Jesús kixin:

—¿Nkekuènté kixin jaha ijnko chojni judío mé chrókjuanchana ntá kixin janhan ijnko chojni samaritana? —mé chro tí tjan a.

(Mé xikaha kjuanchankí tjan kixin tí sín judío mé ninkehó t'ikonhya tí sín samaritano.) <sup>10</sup> Na ntá ntáchro ch'ín Jesús kixin:

—Chrókónoha tí nkehe tjanjon Dios la ko chrókjuatsoan jaha nkexro tí tjetjan-chaha ntá ntá chrókjuanchana ntá, ntá chrótjaha tí ntá tjechón chaxín —ichro ch'ín Jesús.

<sup>11</sup> Na ntá ntáchro tí tjan a kixin:

—¿Ntá nkexrí kixin xraahya jaha ninkehó nkehe tsakítsjeyá ntá kixin tí tòye i la imá nínka? ¿Ntá nkexrí tsochjina tí ntá tjechón tjimé? <sup>12</sup> Tí nkexro k'uaxrjeníxinni mé Jacob mé kuítòeheni tí tòye tjáá ntá ntihi la ko kjaxin ik'uú ch'án tí ntá la ko kjaxin ik'uú tí xjeen ch'án la ko tí iko kuènte ch'án. ¿A ntá xá jaha la xá antsí má tjetooan jaha, a ntá jehe ch'án la kénhyó ní? —mé kjuanchankíhi tjan tí ch'ín Jesús.

<sup>13</sup> Na ntá kjuátehe ch'ín Jesús ntáchro ch'án kixin:

—Tí sín it'i sín tí ntá ntihi tí tòye i nántaxón its'en sín ntá inaá. <sup>14</sup> A ntá tí sín its'i sín tí ntá sintakitonhan sín mé í ts'enhya sín ntá inaá. Tí ntá sintakitonhan sín mé ts'óna éxi yóhe ijnko ntá ts'axrje nkaya asén sín mé tsinkákjanjon tí kjuachón tsochóna sín jnkochrín —ichro ch'án.

<sup>15</sup> Ntá ntáchro tí tjan a inaá kixin:

—Chjina tí ntá, a ntá ts'énhyaana ntá inaá la ko ts'inkahya ntihi tsakítsje ntá —ichro tjan.

<sup>16</sup> Ntá k'uetooan ch'ín Jesús kixin:

—Sátjia tjík'iyehé xiá ntá ts'inkará ntihi inaá —ichro ch'án.

<sup>17</sup> Ntá ntáchro tjan kixin:

—Chontahya xiná —ichro tjan.

Ntá ntáchro ch'ín Jesús kixin:

—Chaxín ntáchrúa kixin chontahya jaha xiá. <sup>18</sup> K'uéchonta jaha in'ó xiá, a ntá tí ch'ín chonta jie jehya xiá. Na mé chaxín tí nkehe ntáchrúa kixin chontahya xiá chaxín —ichro ch'án.

<sup>19</sup> Na ntá kuínhin tjan tíha ntá ntáchro tjan kixin:

—T'íkuan kixin jaha ijnko nkexro chrónka itén Dios. <sup>20</sup> A ntá tí sín k'uaxrjeníxinni k'uúxin ósé mé k'uéxrxinkakonxín sín Dios tí jna ntihi. Kjánchó jahará chojni judío mé ntáchrórá kixin tí nínko jie chjasin Jerusalén kaín ni chróxrxinkakonxínni Dios —ichro tjan.

<sup>21</sup> Ntá ch'ín Jesús ntáche ch'án tjan kixin:

—Títekáván kixin tjetsi tí hora a tsoxráxinkákonxínhyará It'eni Dios tí jna ntihi la ko tsoxráxinkákonxínhyará ch'án chjasin Jerusalén kjaxin. <sup>22</sup> Jahará chojni samaritano chonhyará tí nkexro xráxinkaónrá. Ntá kaín ni chojnini judío mé chóxinni tí nkexro xráxinkaonni. Méxra tí nkexro tsjakjihin chojni tí jie yamá sín mé ts'axrjeníxin tí sín judío. <sup>23</sup> Ntá tjetsi tí hora a na mé tí jie ó kui tí hora a na tí sín chaxín tjinkaon sín chróxrxinkaon sín It'eni la mé asén sín ó tsoxrxinkakonxín sín It'eni Dios. Dios mé tóxrjínhin ch'án kixin chojni xikaha chrókjuich'e sín chróxrxinkakonxín sín ch'án. <sup>24</sup> Jehe Dios na mé nchakuen ó, a ntá tí sín chróxrxinkaon sín ch'án na mé t'ichjánxin kixin asén sín ó tsoxrxinkakonxín sín ch'án —mé xikaha chrónka ch'ín Jesús.

<sup>25</sup> A ntá ntáchro tí tjan a kixin:

—Ó nóna kixin itsi tí nkexro Mesías, tí nkexro a mé Cristo. Tió tsi ch'án ntá tsjakoheni ch'án kaín xín nkehe —ichro tjan.

<sup>26</sup> Ntá ntáchro ch'ín Jesús kixin:

—Tí nkexro a la mé janhan tjetjuá jie —ichro ch'án.

<sup>27</sup> Na ntá tí sín k'uájiko ch'án mé kjanxin sín tí chjasin a, ntá chrakon sín k'uúkon sín kixin tjenixjehe ch'án ijnko chojni chjin. Kjánchó nijnko sín kjuanchankíehya sín ch'án kixin nkehe tjinkaon ch'án na nkekuèté nixjehe



ch'án tí tjan a. <sup>28</sup> A ntá tí tjan mé kjuak'e tjan tí toa nonte ntá sákjuí tjan tí chjasin ntaha ntáche tjan tí sín ntaha kixin:

<sup>29</sup> —Íntará sátsjitsjeheni ijnko ch'ín chrónka ch'án kaín xín nkehe kjuít'a tí senó a. ¿Xá chrókó Jehya tí nkexro i Cristo? —ichro tjan.

<sup>30</sup> Na ntá tí chojni a mé xrákuaxin sín tí chjasin a ntá kuitsjehe sín tí ch'ín Jesús.

<sup>31</sup> Naxa tihya sín nachrohe tí sín k'uájiko ch'án mé chrónóehē sín ch'án ntáchro sín kixin:

—Maestro, kjaxian chrókjónte nkehe —ichro sín.

<sup>32</sup> Kjánchó ntáchro ch'án kixin:

—Ó chonta janhan nkehe siné. Jahará la kjá naxa noahyará —ichro ch'án.

<sup>33</sup> A ntá tí sín k'uájiko ch'án mé kjuan-chankíhi sín kichó sín kixin:

—¿Xá jnkójín sín tsíkikao sín nkehe kjóne ch'án? —ichro sín.

<sup>34</sup> Kjánchó ntáchro ch'ín Jesús kixin:

—Éxi yóhe chrókjoné nkehe mé tí sít'a tí xra la ko tsjixinna tí xra kuènte tí nkexro chr'ánna k'uinka. <sup>35</sup> Ntáchrorá kixin: “Noó nitjō naxa t'itjāyan tsochón-henni ntá tsotjāni noatrigō”, ichrorá. Kjánchó ntáxrjan kixin chrótsjehérá tí no a kixin ó tsícha la ko ó tinkáxamá kixin ó jína chrótjāni. <sup>36</sup> Tí sín ch'e xra tjá sín mé tsoxenkehe sín. A ntá tí nkehe tjá sín mé ts'áyéhe kjuachón jnkochr'ín. Ntá tí sín k'uēnkā sín nonte la ko tí sín tjá sín jnkokón tsochéhe sín. <sup>37</sup> Mé xíkaha tsox-iteyá tí nkehe ntáchro sín kixin: “Ijnko nkexro mé t'ēnkā noa, a ntá ókjé sín tsotjā sín tí noa a”, ichro sín. <sup>38</sup> A ntá janhan ichr'an tí jahará tsotjará ijnko nonte tsík'ēnkahyará. Na mé ókjé sín kjuích'e sín xra ntá jahará tsjachará tí xra kjuích'e tí sín a —ichro ch'án.

<sup>39</sup> A ntá itsjé tí sín samaritano kuènte tí chjasin ntiha mé kjuankixin kuinkáchónki sín tí jehe ch'án kixin xíkaha chrónka tjan kixin jehe ch'án ó chrónka ch'án kaín xín nkehe kjuích'e

tjan tí senó a. <sup>40</sup> A ntá tió kuínhin sín tí nkehe chrónka tjan ntá kui sín tí tjan ch'ín Jesús ntá chrónóehē sín ch'án kixin tsitohe ch'án ntiha. Ntá kuítohe ch'án ntiha iyó yaon. <sup>41</sup> Ntá itsjé sín kjaxin kuinkáchónki sín ch'án kixin tí nkehe kuínhin sín nixja ch'án. <sup>42</sup> Ntá ntáche sín tí tjan a kixin:

—Ntá jie Jehya jehó tí nkehe chrónka kuítekaonni. Náhi. Tí jie ó kuínhinni nixja ch'án ntá kónoheni kixin jehe ch'án chaxín tí nkexro Cristo sinchekaá tí chojni chjasintajni —ichro sín.

### **Ch'ín Jesús kjuínchekitohe jína ijnko xjeen ijnko ch'ín ch'ehe xra gobierno**

<sup>43</sup> A ntá k'uátsínka iyó yaon ntá ch'ín Jesús k'uaxrjexín ch'án estado Samaria ntá sákjuí ch'án nó estado Galilea. <sup>44</sup> A ntá jehe ch'án tsintáchro ch'án kixin tí nkexro chrónka itén Dios la tí chjasén sín mé tjikosáyehya sín ch'án. <sup>45</sup> Kjánchó tió kjuíji ch'án tí estado Galilea na mé k'uáyéhe sín ch'án la ko kjuikosáyehē sín ch'án jína kixin kjaxin sín sátsíkji sín tí kia pascua chjasin Jerusalén tsík'íkon sín kaín tí kjuaxroan kjuasixín ch'án tí kia ntiha.

<sup>46</sup> Ntá xíkjan ch'ín Jesús inaá chjasin Caná, estado Galilea, na mé ntiha tsíkjinchekjaminca ch'án tí ntá tí xranvino a. Ntaha mé kjuák'e ijnko ch'ín ch'ehe xra gobierno. A ntá níhi tí xjeen ch'án ntoa itjen chjasin Capernaum. <sup>47</sup> Ntá kuínhin tí ch'ín ch'ehe xra gobierno kixin itjen ch'ín Jesús tí estado Galilea tsíkixín ch'án estado Judea ntá sákjuíchrēhe ch'án chrónóehē ch'án tí ch'ín Jesús kixin sáchrókjuí ch'ín Jesús ntōe ch'án sinchekitohe jína tí xjeen ch'án ó tjet'en xjan. <sup>48</sup> Ntá ntáchro ch'ín Jesús kixin:

—Kja tí jahará tí chrók'uikonhyará kjuaxroan chrókjuásian la chrókuinkachónkihyará tí janhan —ichro ch'án.

<sup>49</sup>Ntá chrónòà tí ch'ín ch'ehe xṛa gobierno ntáchro ch'án kixin:

—¿Á chrókójínahya sáchrókjuini ntona jaí kixin xjanna ó tjet'en? —ichro tí ch'ín a.

<sup>50</sup>Ntá kjuátehe ch'ín Jesús ntáchro ch'án kixin:

—Ikjan sátjia nṛa kixin tí xjaan na ó jina tjen jie —ichro ch'án.

Ntá kuítekaon ch'án nkerí ichro ch'ín Jesús ntá sákjuí ch'án. <sup>51</sup>Á ntá kjuíji ch'án chjino ntṛe ch'án ntá xrinahya tí sín ch'ehe sín ch'án xṛa kjuíxinhin sín ntja chrónka sín kixin:

—Xjaan la ó jina tjen —ichro sín.

<sup>52</sup>Ntá kjuanchankíhi ch'án sín kixin nkehora kjuankixin kuítehe xjan jina, na ntá chrónka sín kixin:

—Ijna la una kónjín mé kjuini tí sóa —ichro sín.

<sup>53</sup>Ntá kónohe tí it'é xjan kixin xikaha tí hora tsintáchro ch'ín Jesús kixin tí xjeen ch'án na ó jina tjen. Á ntá jehe ch'án la ko kaín tí sín sín ntṛe ch'án mé kuinkáchónki sín tí ch'ín Jesús.

<sup>54</sup>Tíha mé tí yóxin kjuaxroan kjuasin ch'ín Jesús tió kuixin ch'án estado Judea ikjan ch'án estado Galilea.

### Ch'ín Jesús kjuínchekitohe jina ijnko ch'ín tsík'en tote chjasin Betesda

**5** Ntá chr'éxin tí sín judío mé kjuasin sín ijnko kia na ntá ch'ín Jesús xík-jan ch'án chjasin Jerusalén inaá. <sup>2</sup>Á ntá ntaha chjino tí ntója t'ixenxín kolélo chjasin mé tjen ijnko pila tóxroyéya ntá mé nkiva hebreo tí ntá mé it'in Betesda. Á ntá chrínta tí pila sín in'ó cuarto ntsíntí. <sup>3</sup>Ntaha tjejótsínka nchónhya chojni níhi, iso sín t'ikonhya la ko iso sín xitjahya tji la ko iso sín tsík'en toté. Tjejóchónhen sín kixin nkehora tsínki ntá <sup>4</sup>kixin nántaxón k'uínkajin ijnko ángel kjuíankí ntá kjuínchekinkí ntá. Á ntá tí nkexro senó tsjiánkí ntá mé tsitohe jina kjónté cualquiera chin chóna. <sup>5</sup>Á ntá

ntaha kjuák'e ijnko ch'ín na mé chóna ch'án treinta y ocho nánó níhi ch'án. <sup>6</sup>Á ntá tió k'uíkon ch'ín Jesús kixin tjetsínka tí ch'ín a la ko kónohe ch'án kixin ósé níhi ch'án, ntá kjuanchankí ch'án kixin:

—¿Á tjinkávan tsitohe jina? —ichro ch'án.

<sup>7</sup>Ntá ntáchro tí sinníhi kixin:

—Chóntahyani ninkexró tsjinkitsani tsjiánkíni ntá. Á ntá tí tjinkaonni chrókjuíankíni ntá la ntá ókjé nkexro tjítaón ntja tjiánkí ntá senó —mé chro tí sinníhi.

<sup>8</sup>Á ntá k'uetṛan ch'ín Jesús kixin:

—Ijie la t'inkatjen, tjatsíyan kaniáa, itjia —ichro ch'án.

<sup>9</sup>Ntá tuénxín kuítehe ch'án jina, ntá kjuatsen ch'án kaniéé ch'án kjuankixin itji ch'án. Kjánchó yaon sábadó tíha mé tí yaon t'ok'éhe sín. <sup>10</sup>Mé xikaha tí sín judío ntáche sín tí ch'ín kuítehe jina kixin:

—Ijie tí yaon t'ok'éheni ntá kohya kjuachaxin tsamá kaniáa —ichro sín.

<sup>11</sup>Á ntá ntáchro tí ch'ín a kixin:

—Tí nkexro kjuínchekitona jina mé k'uetuanna kixin tsjatsíyan kaniána la ko sátsjia —ichro ch'án.

<sup>12</sup>Ntá kjuanchankíhi sín ch'án kixin:

—¿Nkexéhe tí nkexro k'uetuanhan kixin tsjatsíyan kaniáa la ko sátsjia? —ichro sín.

<sup>13</sup>Á ntá tí ch'ín tsíkitohe jina na í kjuátsoanhya ch'án tí nkexro kjuínchekitohe ch'án jina kixin ntaha la sín nchónhya chojni, a ntá ntahó k'uítjáyánxín ch'ín Jesús. <sup>14</sup>Á ntá chr'éxin ch'ín Jesús xeta ch'án tí ch'ín a nkaxenhen tí ninko jie ntá ntáchro ch'án kixin:

—Tsjehé kixin ijie la ó jina tjen jaha la í tjásinhya jie inaá. Á ntá tí tsjásian jie inaá a ntá antsí má jínahya tsonhan —ichro ch'án.

<sup>15</sup>Á ntá sákjuí tí ch'ín a ntá chénka ch'án tí sín judío kixin jehe ch'ín Jesús mé kjuínchekitohe ch'án jina.

<sup>16</sup>Mé xikaha tí sín judío kjuankíxin sín chónkíhi sín tí ch'ín Jesús la ko chrók'óyán sín ch'án kíxin kjuínchekitohe ch'án chojni jína tí yaon t'ok'éhe sín. <sup>17</sup>Kjánchó ch'ín Jesús ntáche ch'án tí jehe sín kíxin:

—Méxra T'aná naxa tjech'e ch'án xra. A ntá janhan kjaxin tjét'a xra —ichro ch'án.

<sup>18</sup>Méxra xikaha tí sín judío antsí tjinkaon sín chrók'óyán sín ch'án kíxin kuítেকakuenhya ch'án tí ley kuènte tí yaon t'ok'éhe sín la ko kjaxin ntáchro ch'án kíxin tí It'é ch'án la mé Dios, mé xikaha ncheyóhe ch'án asén ch'án Dios.

### Tí kjuachaxin chóna tí Xjeen Dios

<sup>19</sup>Ntá ntáche ch'ín Jesús tí jehe sín kíxin:

—Ijnko nkehe tjeoan tsotjonkará kíxin tí Xjeen Dios nkaya nkajní tí jehó kjuachaxin kuènte ó la mé xitjahya sich'e xra. Jehó tí xra t'ikon ch'án tjech'e It'é ch'án mé kjaxin ch'án xikaha ch'e ch'án. <sup>20</sup>A ntá tí It'é mé tjuèhe tí Xjeen ch'án, la ko tjakohe ch'án kaín xín xra ch'e ch'án, la ko antsí tjeoan tí xra naxa tsjakøhe ch'án kíxin ntá tsochrakonrá kíxin ts'ikonrá tí xra sich'e ch'án. <sup>21</sup>Tí It'é mé chóna kjuachaxin nchexechón tí sín tsík'en la ko chjéhe ch'án sín kjuachón. A ntá tí Xjeen kjaxin chóna kjuachaxin tsochjéhe kjuachón tí nkexro tjinkaon tsochjéhe ch'án. <sup>22</sup>A ntá It'é la í sinchekitoexínhya ch'án ijíé ninkexró. Kaín tí kjuachaxin kuènte ch'án chjéhe ch'án tí Xjeen kíxin sinchekitoexín ch'án ijíé chojni chjasintajni <sup>23</sup>kíxin ntá kaín chojni tsjikosáyehe sín tí Xjeen éxí yóhe tjikosáyehe sín tí It'é ch'án. Tí sín tjikosáyehya tí Xjeen xikaha kjaxin tjikosáyehya sín tí It'é kíxin jehe ch'án mé tsíchr'án tí Xjeen.

<sup>24</sup>Ijnko nkehe tjeoan tsotjonkará kíxin tí jnkojínra tjeotinhínra tí nkehe

tjàkua la ko tinkachónkirá tí T'aná, mé tí nkexro ichr'ánna, na mé xikaha ó chontará tí kjuachón la ko tsjasótiah-yará, na mé kuítóhéra tí ntia chrók'uénxinrá, la ntá jie kjuankíxinrá tsochontará tí kjuachón jnkochríxín. <sup>25</sup>Ijnko nkehe tjeoan tsotjonkará kíxin ó tsi tí yaon, na mé jie tíha, mé xikaha tsonhen kíxin tí sín tsík'en tsinhin sín tsonixja tí Xjeen Dios. A ntá tí sín tsitekaon sín na mé ts'ejóchón sín. <sup>26</sup>Tí It'é mé chóna ch'án kjuachaxin tsjanjon ch'án tí kjuachón la ko jehe ch'án mé chjéhe ch'án kjuachaxin tí Xjeen kíxin kjaxin tí Xjeen tsjanjon tí kjuachón <sup>27</sup>la ko kjaxin chjéhe ch'án kjuachaxin tí Xjeen ch'án sinchekitoexín tí ijíé chojni chjasintajni kíxin jehe mé tí Xjeen Dios K'óna Chojni. <sup>28</sup>Chrakonhyará tjétjonkará xikaha. Na mé ó tsi tí yaon kíxin kaín tí sín tsík'en mé tsinhin sín tsonixja ch'án. <sup>29</sup>A ntá ts'axrxén sín tí tòye la tí sín kjuích'e sín xra jína mé tsoxechón sín ntá tsochóna sín tí kjuachón. A ntá tí sín kjuích'e sín xra jínahya na mé kjaxin tsoxechón sín ntá sátsji sín tsjasóte sín.

### Tí kjuachaxin chóna ch'ín Jesús

<sup>30</sup>Tí jehó kjuachaxin kuèntana xitjahya sít'a ninkehó xra. A ntá jie ntakitoaxián tí ijíé éxí k'uetuanna T'aná. A ntá tí nkehe ntakitoaxián la jína ntoá kíxin tjínkakonhya sít'a éxí tjínkavan. Náhí. Éxí tjinkaon T'aná, tí nkexro ichr'ánna, mé xikaha tjét'a. <sup>31</sup>A ntá tí chróxrjanka kíxin nkexrí imá jína janhan la tíha la ninkehó kjuachaxin chróchóntahya. <sup>32</sup>Itjen í jnko nkexro tjechrónka nkexrí tjén janhan a ntá ó nóna kíxin tí nkehe chrónka ch'án la sínkí. <sup>33</sup>Jahará tsíkétuenhénra chojni kjuíkjanchankíhi sín tí ch'ín Juan kíxin nkexrínchi tjén janhan. A ntá tí nkehe tsíkjatøhe ch'án la chaxín ntoá tíha. <sup>34</sup>Kjánchó chontiaxínhya tí nkehe tsochrónka nijnko chojni chjasintajni

nkexrínchi tjén janhan. Jehí ntáxrjan tíha kíxin jahará jína chrókuaará. <sup>35</sup>Tí ch'ín Juan kjuák'e éxí yóhe ijnko xrohi kjuák'eche k'uínkaséyanxín la ko jahará kócháhará xíkaha, kjánchó séhya kóxr-jínhanrá tí xrohi a. <sup>36</sup>Kjánchó síin nkehe antsí tjetaon tjácoxín nkexrí tjén janhan, a ntá kánhyó tjetaon tí nkehe tsíchrónka tí ch'in Juan. Tí xra tjét'a, mé tí xra kjuanjon T'aná sít'a tsjixinna tí xra, na mé tíha mé tjácoxín kíxin chaxín T'aná tsíchr'án k'uinka. <sup>37</sup>Kjáxin jehe T'aná, tí nkexro ichr'ánna, mé chrónkaxín ch'án nkexrí tjén janhan. A ntá jahará naxa kiénhyará tí nkehe nixja ch'án la ko k'uínkonhyará ch'án <sup>38</sup>la ko kjáxin itén ch'án kuítóehya nkaya kjará kíxin tjinkákonhyará tsítekáonrá tí Xjeen Dios tsíchr'án tsíki. <sup>39</sup>Jahará nchekuáxinrá jína tí xroon tsíkjin tí sín tsíchrónka itén Dios ósé kíxin ntáchrórá kíxin ntaha ts'itjaxínrá tí kjuachón tsochontará jnkochr'ín. A ntá tí nkehe tsíkjin sín ósé mé chrónka kuènte janhan. <sup>40</sup>Kjánchó jahará tjinkákonhyará tsochjinará tí tjén janhan kíxin chrók'uayéhérá tí kjuachón a.

<sup>41</sup>'Janhan na tjéyáhya kíxin chojni chrókjuikosáyana sín. <sup>42</sup>A ntá janhan ó nòna kíxin jahará la tjuèhyará Dios. <sup>43</sup>Mé k'uinkaxian janhan tí kjuachaxin kuènte T'aná. Kjánchó jahará la títekákonnahyará. A ntá tí chrókui í jnko nkexro kjuachaxin chrókuakitsjeníxin asén ó, a ntá tíha mé tjinkáonrá chrókuítekákonhénrá. <sup>44</sup>¿Nkexrí chrókuítekáonrá jahará kíxin tjéyará kíxin tí chojni chjasintajni chrókjuikosáyahará sín, a ntá tjéyáhyará tí kjuachaxin chrókJuanjon jnkokoá Dios? <sup>45</sup>Tsontáchróhyará kíxin janhan tsjánchíá jie tí jahará nkayakon T'aná. Náhí. Ch'ín Moisés mé tsjanchia ch'án jie tí jahará kíxin tsontáchrórá kíxin jehe ch'án kuinkachónkirá.

<sup>46</sup>Kja tí jahará chrókuítekáonrá nkehe tsíntáchró ch'ín Moisés ntá chrókuítekáonrá tí janhan kíxin tí xroon tsíkjin ch'án mé chrónka kuènte tí janhan. <sup>47</sup>A ntá tí títekákonhyará tí nkehe tsíkjin ch'án, ¿ntá nkexrí chrókuítekákonnará nkehe ntáxrjan janhan? —ichro ch'án.

### Ch'ín Jesús kjuanjon ch'án nkehe kjóne in'ó mil chojni

(Mt. 14.13-21; Mr. 6.30-44; Lc. 9.10-17)

**6**A ntá chr'éxin ntá sákjuí ch'ín Jesús k'uátóye ch'án tí ntayaon Galilea na mé tí ntayaon Tiberias tíha. <sup>2</sup>A ntá nchónhya chojni tinkáchréhe sín kíxin k'uíkon sín tí kjuaxroan jie kjuasin ch'án kjuínchekitohe ch'án jína tí sinníhi. <sup>3</sup>A ntá jehe tí ch'ín Jesús chr'in ch'án ijnko jna na ntá ntaha kjuák'etjaxín ch'án la koí tí sín k'uájiko ch'án a. <sup>4</sup>A ntá í séhya ts'ixin tí kia pascua a mé kié tí sín judío a. <sup>5</sup>A ntá tí ch'ín Jesús k'uíkon ch'án kíxin nchónhya chojni chr'in sín kjuichréhe sín ch'án ntá kjuanchankíhi ch'án tí ch'ín Felipe kíxin:

—¿Nketí chrók'uénani nkehe sine kaín tí chojni a? —ichro ch'án.

<sup>6</sup>Mé xíkaha ntáchró ch'án kíxin síná nkehe tsixro ch'ín Felipe. A ntá tí ch'ín Jesús la ó nohe ch'án nkehe tí kjuaxroan tsjasin ch'án. <sup>7</sup>Ntá kjuátéhe ch'ín Felipe ntáchró ch'án kíxin:

—Kjonté doscientos chichaon denario chróchóntani chrók'uínáxin tí niotja la naxa chrókJuachahya chrók'uáyéhe jnkojnko sín tot'o tí niotja a —ichro ch'án.

<sup>8</sup>A ntá ch'ín Andrés, ijnko tí sín k'uájiko ch'ín Jesús la savé mé ch'ín Simón Pedro mé ntáchró ch'án kíxin:

<sup>9</sup>—Ntíhi tjen ijnko xjan ntoa chóna in'ó niotja tsík'óna noa cebada la ko chóna ch'án yaá koche. ¿Xá chrókJuacha tíhó kíxin nchónhya chojni sín? —ichro ch'án.

<sup>10</sup> A ntá ntáchro ch'ín Jesús kixin:

—Tétuénhén tí sín sín a kixin ts'ixit-jaxin sín —ichro ch'án.

A ntá nchónhya ika yoa sín na ntá ntaha k'uúixitjaxin sín na mé éxí in'ó mil chojni k'uúixin sín. <sup>11</sup> A ntá ch'ín Jesús kuákja ch'án tí niotja ntá kjuanchehe ch'án Dios kjuasáya ntá chjéhe ch'án tí sín k'uájiko ch'án. A ntá jehe sín k'óxikayehe sín chjéhe sín kaín tí sín sít-jaxin a. Xikaha kjaxin k'óxikayehe sín tí koche. A ntá kaín sín kjóne sín éxí tjinkaon sín. <sup>12</sup> Kjuixin kjóne sín ntá k'uetuénhen ch'ín Jesús tí sín k'uájiko ch'án ntáchro ch'án kixin:

—Tjénájínrá tí nkehe tot'o síxèhe sín kixin ts'itjányanhya ninkehó —ichro ch'án.

<sup>13</sup> Ntá xikaha jehe sín kjuenájín sín kjuínchekaón sín teyo ntaxra tí tot'o tí in'ó niotja tsík'óna noa cebada síxèhe sín tí kjuixin tsikjine sín. <sup>14</sup> A ntá tí sín kjóne tí niotja k'uúikon sín tí kjuaxroan jié kjuasin ch'ín Jesús ntáchro sín kixin:

—Jehe ch'án mé chaxín tí nkexro tsíchr'án Dios kixin itsi tí chjasintajni ts-jakoheni ch'án —ichro sín.

<sup>15</sup> Kjánchó ch'ín Jesús mé kónohe ch'án kixin tjinkaon sín sáchrókjuiko sín ch'án chróchr'áxénhen sín ch'án tí xra rey kixin chrók'uetqan ch'án. A ntá jehe ch'án tjinkakonhya ch'án tíha ntá jehó ch'án sáxíkji ch'án nteje inaá kjuák'e ch'án ntiha.

**Éxí ijnko ntja xikaha kjuítaón  
ch'ín Jesús tí ntayaon**

(Mt. 14.22-27; Mr. 6.45-52)

<sup>16</sup> A ntá ó kóntó ntá tí sín k'uájiko ch'ín Jesús k'uúinkajinxin sín jna sákjuí sín chrínta ntayaon <sup>17</sup> k'uit'ótjen sin ijnko ntabarco kjuankixin sín ts'atòye sín ntayaon sátsji sín chjasin Capernaum. Na ó k'uúixin tie na naxa kjanhya ch'ín Jesús. <sup>18</sup> Ntá kjuankixin chjéhe xrinto tsanká ntá kjuankixin tinkák-

jaminkí nta. <sup>19</sup> A ntá tió kjuacha sín á in'ó o injon kilómetro ntá xri-nahya k'uúikon sín tí ch'ín Jesús tinkákóchjinehe ch'án tí ntabarco, éxí ijnko ntja tjetjitaón ch'án tí nta, ntá k'uúikon sín ntá imá chrakon sín. <sup>20</sup> Kjánchó ntáchro ch'án kixin:

—Janhan tíha. Chrakonhyará —ichro ch'án.

<sup>21</sup> Ntá imá chéhe sín k'uit'ótjen ch'án tí ntabarco. Ntá ó tuénxín kjuúji sín tí chjasin sátsji sín.

**Tí chojni xritjeyá sín tí ch'ín Jesús**

<sup>22</sup> A ntá tí yaon chr'éxin na mé tí sín kuítqhe tóhe ntayaon na mé ó nohe sín kixin jnkokoáxon ntabarco k'uék-jak'e ntiha la ko ó nohe sín kixin ch'ín Jesús kjá ni sátsíkjikohya sín ch'án na mé k'uúikon sín kixin jehó tí sín k'uájiko ch'án sátsíkji sín. <sup>23</sup> Kjánchó sín ntabarco tixin chjasin Tiberias tinkákóchjinehe tí nó kjónexín sín tí niotja kjuanchaxín ch'ín Jesús kjuasáyé Dios. <sup>24</sup> A ntá tió k'uúikon sín kixin kohya ch'ín Jesús la ko kjaxin kohya tí sín k'uájiko ch'án, ntá jehe sín mé k'uit'ótjen sín iso ntabarco ntá sákjuí sín chjasin Capernaum sákjuíkjeyá sín tí ch'ín Jesús.

**Ìnchéni Jesús mé éxí  
niotja tjanjon kjuachón**

<sup>25</sup> A ntá tóhe ntayaon xéta sín tí ch'ín Jesús ntá kjuanchankíhi sín ch'án kixin: —Maestro, ¿nkesá k'uinka ntihi? —ichro sín.

<sup>26</sup> Ntá kjuátehe ch'ín Jesús ntáchro ch'án kixin:

—Ó nòna kixin jahará tjéyará tí janhan kixin kjónterá niotja kókjahará, la jehya kixin kiénxinrá tí kjuaxroan kjuásian. <sup>27</sup> Chrókjuich'ehyará tí xra chrók'uite tí nkehe chrókjónterá tjoka tsjeje ó. Náhí. Chrókjuéyará tí nkehe chrókjuejehya chrókjónterá chrók'uayéxinrá tí kjuachón jnkochrín. Tí nkehe tjanjon

tí Xjeen Dios K'óna Chojni mé chrókjón-terá kixin It'é ch'án mé tjakoxin ch'án kixin tí Xjeen ch'án mé chóna kjuachax-ién tí jehe ch'án —ichro ch'ín Jesús.

<sup>28</sup> A ntá kjuanchankíhi sín ch'án kixin:

—¿Nkexrí chrókjuich'eni chrokiunchexiteyáni nkexrí tjinkaon Dios? —ichro sín.

<sup>29</sup> A ntá kjuátehe ch'ín Jesús ntáchro ch'án kixin:

—Dios mé tjinkaon ch'án kixin chrókuinkachónkirá tí nkexro tsíchr'án ch'án —ichro ch'án.

<sup>30</sup> Ntá kjuanchankíhi sín ch'án kixin:

—¿Nkehe tí kjuaxroan chrókjuákoéxianni chrók'uikonni kixin ntá chrókuitekaonni tí jaha? ¿Nkehe tí xra ch'e jaha? <sup>31</sup> Tí sín tsík'axrjenixinni k'uéjéjó sín ósé mé kjóne sín maná k'óna niotja tió k'uixin sín nteje mé xikaha tí xroon kuente Dios tsíkjin ijnko nkexro ósé ntáchro kixin: “Kjuanjon ch'án tí nkehe kjóne sín mé niotja tsíkjin nkaya nkajní”<sup>§§</sup> —ichro sín.

<sup>32</sup> A ntá kjuátehe ch'ín Jesús ntáchro ch'án kixin:

—Ijnko nkehe tjetoan tjonkará kixin jehya ch'ín Moisés kjuanjon tí maná k'óna niotja k'uínkajinxin nkaya nkajní. Náhí. T'aná mé tjetjanjon tí niotja chaxín jina k'uínkajinxin nkaya nkajní. <sup>33</sup> Tí niotja tjanjon Dios mé tí nkexro k'uínkajinxin nkaya nkajní tjejóchónxin chojni chjasintajni —ichro ch'án.

<sup>34</sup> Na ntá kjuanchia sín kixin:

—Jaha ñchéni, jnkochrín chjehéni tí niotja a —ichro sín.

<sup>35</sup> A ntá ntáchro ch'ín Jesús kixin:

—Janhan mé tí niotja tjanjon kjuachón. Tí sín tóchjina sín tí janhan í ts'enhya sín kjinta, la ko tí sín tsitekaon sín tí janhan í ts'enhya sín nta. <sup>36</sup> Kjánchó éxí k'uétjonkará senó

na ó k'uíkonrá tí janhan na kjónté naxa titekákonhyará. <sup>37</sup> A ntá kaín tí sín chjina T'aná la tsochjina sín tí janhan. A ntá kaín tí sín tjejótóchjinehe sín tí janhan la tsétuanhya sín kixin sátsji sín. <sup>38</sup> Janhan k'uinkaxian nkaya nkajní jehya tí xra tóxrjina chrókjuít'a. Náhí. K'uinka kixin chrókjuít'a tí xra tóxrjínhin tí nkexro tsíchr'ánna. <sup>39</sup> A ntá T'aná mé tí nkexro tsíchr'ánna mé tjinkaon ch'án kixin sintak'itjányanhya ninkexró tí sín chjina ch'án na mé tjinkaon ch'án kixin janhan mé sintaxechón kaín sín tí yaon tsjixín. <sup>40</sup> Mé xikaha tjinkaon tí nkexro tsíchr'ánna kixin kaín tí sín ts'ikon sín tí janhan mé tí Xjeen Dios la ko tsitekaon sín tí janhan chrók'uáyéhe sín kjuachón jnkochrín. A ntá janhan sintaxechón sín tí yaon tsjixín —ichro ch'án.

<sup>41</sup> A ntá tí sín judío kjuankixin sín kjonta sín tí ch'ín Jesús kixin tsín-táchro ch'án kixin jehe ch'án mé tí niotja k'uínkajinxin nkaya nkajní. <sup>42</sup> Mé ntáchro sín kixin:

—¿Á jehya tí Jesús, it'é mé it'ín José, na mé chóxinni tí it'é la ko tí ñé ch'án? ¿Ntá nkekuénté ntáchro ch'án kixin nkajní k'uínkajinxin ch'án? —ichro sín.

<sup>43</sup> Ntá kjuátehe ch'ín Jesús ntáchro ch'án kixin:

—Títohéra tjontahyará tí janhan. <sup>44</sup> Kohya nkexro chrókóchjina tí tjén janhan tí chrókjuínkítsahya T'aná. A ntá tí sín tóchjina na mé sintaxechón sín tí yaon tsjixín. <sup>45</sup> Na mé tí sín k'uéchrónka itén Dios ósé mé tsíkjin sín xroon ntáchro kixin: “Dios mé tsjakohe ch'án kaín chojni.”\* A ntá kaín tí sín tsíkinhin tí nixja T'aná la ko kjuakohe ch'án sín mé sítóchjina sín tí tjén janhan.

§§6:31 Salmo 78.24

\*6:45 Isaías 54.13

<sup>46</sup>Jehya kixin itjen ijnko chojni tsík'ikon T'aná. Náhi. Jehó tí nkexro kuixin tí tjen Dios mé tsík'ikon ch'án Dios. <sup>47</sup>Chaxín tí nkehe tjéxrjanka kixin tí sín titekaon sín tí janhan mé ó tsochóna sín kjuachón jnkochrín. <sup>48</sup>Janhan na mé tí niotja tjanjon kjuachón. <sup>49</sup>Tí sín k'uaxrjenínrá k'uéjó ósé kjóne sín tí maná k'óna niotja tió k'uéjó sín nteje, a ntá kjónté ik'uén sín k'uítjáyán sín. <sup>50</sup>Tí nkehe xrjanka mé tí niotja k'uínkajinxin nkaya nkajní, a ntá tí sín sine tí niotja a mé ts'enhya sín. <sup>51</sup>Janhan mé tí niotja tjechón k'uínkajinxin nkaya nkajní. A ntá tí sín sine tí niotja a mé ts'ejóchón sín jnkochrín. Tí niotja tsjánjuan ts'ejóchónxin chojni chjasintajni mé ntóna tíha —ichro ch'ín Jesús.

<sup>52</sup>A ntá tí sín judío mé sítjité sín itjo sín kichó sín ntácho sín kixin:

—¿Nkexrí chrókjuanjon ch'án ntoe ch'án chrókjóneni? —ichro sín.

<sup>53</sup>A ntá kjuátehe ch'ín Jesús ntácho ch'án kixin:

—Ntá tsotjonkará kixin tí sintehyará ntoe tí Xjeen Dios K'óna Chojni, la ko tí ts'ihyará ijníe ch'án, ntá tsochontahyará kjuachón jahará. <sup>54</sup>Tí sinterá ntóna la ko it'irá jnina ntá tsochontará kjuachón jnkochrín la ko janhan mé sintaxechnrá tí yaon tsjixín. <sup>55</sup>Kixin ntóna na mé chaxín nkehe ine chojni la ko jnina na mé chaxín nkehe it'i chojni. <sup>56</sup>Tí sín ine ntóna la ko it'i sín jnina mé jnkokoá tjenkayáxinkian sín la ko janhan mé xríkian sín. <sup>57</sup>T'aná tsíchr'án ch'án tí janhan mé chóna kjuachaxin, a ntá janhan mé tjéchonxian tí jehe ch'án. Ntá tí sín sine tí ntóna mé ts'ejóchónxin sín tí janhan. <sup>58</sup>A ntá tjénixja kuènte tí niotja k'uínkajinxin nkaya nkajní na mé yóehya tí maná tsík'óna niotja kjóne tí sín tsík'axrjenínrá ósé kixin jehe sín na kjóne sín na kjónté k'uén sín. A ntá tí sinterá tí niotja k'uínkajinxin nkaya nkajní

ntá ts'ejochónrá jnkochrín —mé chro ch'ín Jesús.

<sup>59</sup>Kaín tíha mé kjuakohe ch'án tí sín tsíkójnkotséxin tí nínko Israel chjasin Capernaum.

### Tí nkehe chrónka ch'ín Jesús mé tjanjon kjuachón jnkochrín

<sup>60</sup>A ntá tió kuínhin sín tí nkehe kjuako ch'ín Jesús ntá itsjé tí sín k'uájiko ch'án ntácho sín kixin:

—Imá xra tí nkehe chrónka ch'án. ¿Xá nkexro chrókuinhin tíha? —ichro sín.

<sup>61</sup>A ntá kónohe ch'ín Jesús kixin xikaha tóxakonhen sín kíenxínhya sín tí nkehe tsintácho ch'án ntá kjuanchankíhi ch'án sín kixin:

—¿Á kjaxinrá tjinkákonhyará tsinhínrá tíhi? <sup>62</sup>¿Ntá nkexrí tsonhen chrók'uikonrá kixin tí Xjeen Dios K'óna Chojni mé sátsji ch'án inaá tí nó tsíkixin ch'án tí tsíkjak'e ch'án ósé? <sup>63</sup>Tí Nchakuen Dios mé tjanjon tí kjuachón, a ntá tí nto la ninkehó sínkíhya. Na ntá tí nkehe tjétjonkará na mé kuènte tí Nchakuen Dios na mé tjejóchónxin chojni. <sup>64</sup>Kjánchó isorá naxa titekákonahyará —ichro ch'án.

Mé xikaha ichro ch'án kixin tí xrankíxixín ó kónohe ch'án kixin nkexro tí sín tsitekakuenhya sín ch'án la ko kónohe ch'án kixin nkexro sinchekji ch'án. <sup>65</sup>A ntá ntácho ch'án kixin:

—Méxra xikaha k'uétjonkará kixin ninkexró tsochjina tí tjén janhan tí tsjinkítsahya T'aná —ichro ch'án.

<sup>66</sup>A ntá kjuixin tíha ntá nchónhya tí sín k'uék'ajiko ch'ín Jesús ntá xrinahya kuítóhe sín, í chrehya sín ch'án. <sup>67</sup>Ntá kjuanchankíhi ch'án tí teyo sín k'uájiko ch'án ntácho ch'án kixin:

—¿Á kjaxinrá tjinkáonrá xikaha sáchrókjuirá? —ichro ch'án.

<sup>68</sup>Ntá kjuátehe ch'ín Simón Pedro kixin:

—Jaha Ìnchéni, ¿nkekuènté tjanchankíhíni á sáchrókjuini ókjé? Jaha tí tan chronka a mé tsochóntaxínni kjuachón jnkochríchín <sup>69</sup>ntá kuítekaonni ntá ó noheni chaxín kixin jaha tí Cristo mé Xjeen Dios tjechón —ichro ch'án.

<sup>70</sup>Ntá kjuátehe ch'ín Jesús ntáchro ch'án kixin:

—Janhan kjuéyá tí kaín rá teyórá la ko jnkójínrá ntihi mé ts'ónará ijnko jínahya —ichro ch'án.

<sup>71</sup>Tíha mé t'axrjexín tí ntáchro ch'ín Jesús chrónka ch'án kixin ch'ín Judas Iscariote, tíha it'é mé it'in Simón, mé ijnko tí teyó sín tsíkjeýá ch'án ntá kjónté sinchekji ch'án tí ch'ín Jesús.

### Tí sín jnkokoá kichó ch'ín Jesús mé kuítekakuenhya sín ch'án

**7** Ntá kjuixin tíha ntá k'uáji ch'ín Jesús tí estado Galilea. Chrók'uajihya ch'án tí estado Judea kixin tí sín judío tjinkaon sín chrók'óyán sín ch'án. <sup>2</sup>Kjánchó ó kuichjina tí yaon kia ntá tí sín judío sich'éna sín itsjé its'van tsjásixín sín kia. <sup>3</sup> **A** ntá tí sín kichó ch'ín Jesús ntáche sín ch'án kixin:

—Chrókuitoahya ntihi. Sáchrókjuia estado Judea kixin ntá kjaxin tí sín chréhe tí jaha tjejó ntiha chrók'uikon sín tí kjuaxroan tsjásian. <sup>4</sup>Kixin tió tjinkaon ijnko nkexro kixin chojni tsochóxin sín ch'án ntá móhya chrókjuich'e ch'án xra. **A** ntá tí chaxín tjetjásian kjuaxroan la jehya mó chrókjuásian kjuaxroan. Náhi. Chrók'uikon kaín xín chojni síin chjasintajni —mé chro sín.

<sup>5</sup>Xíkaha ntáchro tí sín kichó ch'án kixin kjaxin jehe sín titekakuenhya sín tí jehe ch'án. <sup>6</sup>**A** ntá kjuátehe ch'ín Jesús ntáchro ch'án kixin:

—Naxa kjuixrakáhya tí hora kuèntana tsjásian kjuaxroan. Ntá jahará la cualquier hora tjinkáonrá

jína chrók'uikonrá kjuaxroan. <sup>7</sup>Tí sín chjasintajni xitjahya tsonínkakonhanrá sín tí jahará. Ntá janhan na imá nínkakonna sín kixin ntátjan sín kixin jehya jína tí nkehe tjejóch'e sín. <sup>8</sup>Jahará la sáttjirá tí kia a. **A** ntá janhan la tjíhya kixin naxa kjuixrakáhya tí hora kuèntana —ichro ch'án.

<sup>9</sup>Mé xíkaha ntáchro ch'án ntá kuítohe ch'án estado Galilea.

### Itjen ch'ín Jesús tí kia a

<sup>10</sup>**A** ntá ó kjuixin sátsíkji tí sín jnkokoá kichó ch'ín Jesús ntá jehe ch'án la kjaxin sákjuí ch'án tí kia a kjánchó noxínhya xritjak'e ch'án. <sup>11</sup>**A** ntá tí sín judío mé xriteyá sín ch'án tí kia a la ntáchro sín kixin:

—¿Xá nketí tjen tí ch'ín a? —ichro sín.

<sup>12</sup>**A** ntá itsjé sín ntiha mé kjo sín kichó sín kixin nkexrí tjen ch'án. Iso sín ntáchro sín kixin: “Jína ch'án”; kjánchó í so sín ntáchro sín kixin: “Jehya chojni jína ch'án, méxra imá ch'iyehé ch'án chojni”, ichro sín.

<sup>13</sup>Kjánchó noxínhya kjo sín xíkaha kixin chrakonhen sín tí sín judío a.

<sup>14</sup>**A** ntá ó kjuíji jnkosiné tí kia a ntá k'uixenhen ch'ín Jesús tí nínko jíé ntá kjuankixin ch'án kjuako ch'án. <sup>15</sup>**A** ntá tí sín judío chrakon sín komá sín ch'án ntáchro sín kixin:

—¿Xá nkexrí nohe tí ch'ín i nchónhya tí nkehe kixin tsíxrakoehya ch'án? —ichro sín.

<sup>16</sup>Ntá kjuátehe ch'ín Jesús ntáchro ch'án kixin:

—Tí nkehe tjàkua la jehya kuèntana na mé tí xra kuènte tí nkexro tsíchr'ánna k'uinka. <sup>17</sup>Tí jnkójínrá tjinkáonrá chrókjuinchexiteyéhérá éxí tóxrjínhin Dios la tsonohará á chaxín kuènte Dios tí nkehe tjàkua o á kuèntana tíha. <sup>18</sup>**A** ntá tí nkexro tjako tí nkehe



t'axrjeníxin kja sín ó mé xíkaha ch'e kixin tjinkaon sín kixin tí chojni ó mé chróchón̄tehe sín ch'án kjuasáya. A ntá tí nkexro tjinkaon kixin tí chojni a mé chrókjuikosáyehe sín tí nkexro tsíchr'án ch'án na mé jehe ch'án mé tjako ch'án tí nkehe chaxín ntoá la ko ninkehó ch'iyahya tí jehe ch'án.

<sup>19</sup>¿Á jehya ch'ín Moisés tjáhará tí itén Dios chrókuítekáonrá? Kjánchó nijnkorá kuítekákuenhyará tí nkehe tsíkjin ch'án. ¿Méxra nkekuènté tjinkáonrá chrók'oyánrá tí janhan? —ichro ch'án.

<sup>20</sup>Ntá kjuátehe tí sín a ntáchro sín kixin:

—Jaha chonta ijnko nchakuen tí jí-nahya. ¿Xá nkexro chrók'óyán tí jaha? —ichro sín.

<sup>21</sup>Ntá kjuátehe ch'ín Jesús ntáchro ch'án kixin:

—Jnkokoá kjuaxroan kjuásian tí yaon t'ok'éheni ntá chrakonrá. <sup>22</sup>A ntá ch'ín Moisés tsík'etōan kixin xjaanrá ntoa itsa xjan xroye, (kjánchó jehya ch'ín Moisés kjuankíxin ch'án kjuako ch'án tíha, na mé tí sín tsík'axrjeníxinrá kjuankíxin sín kjuako sín tíha). Mé xíkaha nchekará xjan tí xroye a kjónté yaon t'ok'éheni.

<sup>23</sup>A ntá xíkaha nchekará xjan xroye tí yaon t'ok'éheni kixin xíkaha chrókjuinçek'itjáyankíhyará ninkehó tí nkehe k'uetōan ch'ín Moisés, ¿ntá nkekuènté kixin ninkákonnará tí janhan kixin kjuintakitōhā jína ijnko chojni tí yaon t'ok'éheni? <sup>24</sup>Chrókjuanchahyará jiē kixin tí nkehe t'ikonxínrá ikonrá ó. Chrókjuenkayáxinrá tí nkehe jína tóxrjínhin Dios —mé chro ch'ín Jesús.

### **Ch'ín Jesús chrónka kixin nketí k'uaxrjeníxin ch'án**

<sup>25</sup>A ntá iso sín chjasin Jerusalén kjuankíxin sín kjo sín kíchó sín kjuanchankí sín kixin:

—¿Á jehya tí ch'ín a xritjeyá sín chrók'óyán sín? <sup>26</sup>Ntá jie noxín tjen ch'án nixja ch'án kohya ninkexró nínkakonhen ch'án. Kjá tí síxreé titekaon sín kixin tí nkexro a chaxín Cristo tíha. <sup>27</sup>Kjánchó ó noheni nketí tsíkjixín ch'án. A ntá tíó tsi tí nkexro Cristo ntá ninkexró tsonoehya nketí tsixín ch'án —ichro sín.

<sup>28</sup>A ntá ch'ín Jesús kjuak'ekjako ch'án tí ninko jíé ntá kuínhin ch'án kixin xíkaha kjo sín, ntá itsen nixja ch'án ntáchro ch'án kixin:

—Chaxín choxinrá tí janhan la ko nohará nketí chjasin tsíkjixian. Kjánchó jehya kixin k'uinka sintaxiteyá tí nkehe ntáchro asenná ó. Ó k'uinka kixin ichr'ánna tí nkexro chaxín tjechón tjen nkaya nkajní. Jahará naxā chonhyará tí nkexro a. <sup>29</sup>Janhan la choxian ch'án kixin ntaha tsík'inkaxian na mé jehe ch'án mé tsíchr'ánna ch'án —ichro ch'ín Jesús.

<sup>30</sup>Ntá chrótsé sín ch'án chrókjuak'echjina sín ch'án ntá kjónté ninkexró tséhya sín ch'án kixin naxā kjuanjonhya Dios kjuachaxin chrótsé sín ch'án. <sup>31</sup>Kjánchó itsjé chojni kuítekaon sín tí jehe ch'án. A ntá ntáchro sín kixin:

—A ntá tíó chrókui tí Cristo la, ¿á má jíé kjuaxroan chrókjuasin ch'án, a ntá tí ch'ín i la kénhyó ní? —ichro sín.

### **Tí sín fariseo ichr'án sín chojni policía tsotsé sín tí ch'ín Jesús tsjak'echjina sín ch'án**

<sup>32</sup>A ntá tí sín fariseo kuínhin sín nkehe tí ntáchro chojni kixin nkexrí tjen ch'ín Jesús, ntá jehe sín la ko tí sín nchāt'á t'etōan k'uetuenhen sín iso sín policia kuènté ninko tsotsé sín ch'án tsjak'echjina sín ch'án. <sup>33</sup>A ntá ntáchro ch'ín Jesús kixin:

—Kjaxin í séhya tsjak'é ntihi ts'ejóni ntá sáxikjiya tí tjen tí nkexro ichr'ánna. <sup>34</sup> A ntá jahará tsjéyará tí janhan na ts'itjahyará kixin xitjahya tsjasánrá tí tsjak'é janhan —ichro ch'án.

<sup>35</sup> A ntá tí sín judío kjuankíxin sín kjuanchankíhi sín kíchó sín kixin:

—¿Ntá nketí nó sátsji ch'án kixin tsjachahyani ts'itjani ch'án? ¿Xá sátsjichréhe ch'án tí sín judío tjejóyákan tí sín nixja nkíva griego kixin ntá tsjakohe ch'án tí sín griego? <sup>36</sup> ¿Nkexrí t'axrjéxin tí nkehe ntáχρο ch'án kixin tsjeyáni ch'án na kjónté ts'itjahyani ch'án la tsjachahyani tsjichréheni ch'án tí tsjak'e ch'án? —ichro sín.

### Ntario tjechón

<sup>37</sup> A ntá tí yaon tsjixixín tí kia a mé tí yaon jíé mé k'uínkatjen ch'ín Jesús, a ntá itsen nixja ch'án ntáχρο ch'án kixin:

—Kja tí jnkójnra ik'uénra ntá xrákirá its'irá ntá. <sup>38</sup> A ntá éxi ntáχρο xroon Itén Dios kixin tí sín titekaon sín tí janhan na mé nkaya asén sín ts'óna ijnko río ts'axrje intá tjechón —ichro ch'án.

<sup>39</sup> Mé xíkaha chrónkaxín ch'ín Jesús nkexrí tjen tí Nchakuen Dios ts'áyéhe tí sín tsitekaon sín tí jehe ch'án. Kjánchó naxa tihya tí Nchakuen Dios kixin ch'ín Jesús naxa sátiyhya ch'án nkaya nkajní.

### Jnkokoáhya kjuenkayáxin tí chojni

<sup>40</sup> A ntá iso sín tió kuínhin sín tí nkehe ntáχρο ch'ín Jesús ntá ntáχρο sín kixin:

—Kja chaxín tí ch'ín i mé tí profeta ó tsíkji —ichro sín.

<sup>41</sup> Ikjé sín ntáχρο sín kixin:

—Jehe ch'án mé tí nkexro Cristo —ichro sín.

A ntá í so sín ntáχρο sín kixin:

—¿Xá nkekuénté chrókjuixín Galilea tí nkexro Cristo? <sup>42</sup> Tí xroon tsíkjin sín ósé mé chrónka kixin tí nkexro Cristo

mé ts'axrjeníxin tí sín k'uaxrjeníxin tí ch'ín rey David la ko tsjixín ch'án chjasin Belén mé tí chjasin k'uékjak'e ch'ín David —ichro sín.

<sup>43</sup> Mé xíkaha jnkokoáhya kjuenkayáxin sín kaín sín kixin nkexro tí ch'ín Jesús. <sup>44</sup> Iso sín tjinkaon sín sáchrókjuiko sín ch'án chrókjuikjehe sín ch'án kjánchó ninkexró kjuích'ehya xíkaha.

### Tí síxreé kuítekakonhya sín tí ch'ín Jesús

<sup>45</sup> A ntá tí sín policia kuénte njnko mé kjan sín tí tjejó tí sín fariseo la ko tí sín nchat'á t'etoan. Ntá tí sín a mé kjuanchankíhi sín tí sín policia kixin:

—¿Nkekuénté kjuíkoahyará ch'án? —ichro sín.

<sup>46</sup> Ntá kjuátehe tí sín policia kixin:

—Kohya ninkexró nixja éxi xíkaha nixja tí ch'ín a —ichro sín.

<sup>47</sup> Ntá ntáche tí sín fariseo tí sín policia kixin:

—¿Á kjaxinrá kuítóhéra kjuít'ayahará ch'án? <sup>48</sup> ¿Á kuítekaon tí jehe ch'án jnkójn tí sín t'etoan kuénténi o tí sín fariseo? <sup>49</sup> A ntá tí sín a mé chónhya sín tí ley na mé tsjasóte sín —ichro sín.

<sup>50</sup> A ntá tí ch'ín Nicodemo, tí ch'ín kjuítsjehe tí ch'ín Jesús ijnko tie senó na mé jehe ch'án fariseo ch'án na ntá ntáche ch'án sín kixin:

<sup>51</sup> —Tí ley kuénténi la kohya kjuachaxin sinchekjasóteni ijnko chojni tí naxa kíenhyani nkehe nixja ch'án la ko kíenhyani tí jíe kjuasin ch'án —ichro ch'án.

<sup>52</sup> Ntá kjuátehe sín ntáχρο sín kixin:

—¿Á kjaxian jaha kjuíxian estado Galilea ní? Nchekuáxian tí xroon itén Dios ntá tsonoha kixin nijnko tí sín k'uéchrónka itén Dios tsíkjinhyha sín tí estado Galilea —ichro sín.

**Ijanko tjan kjuasin jie  
chón̄ta ókjé chojni ntoa**

<sup>53</sup> Ntá jnkojnko tí sín xíka sín sákjuí sín n̄toe sín.

**8** Ntá ch'ín Jesús mé sákjuí ch'án tí jn̄a Olivo. <sup>2</sup>Ntá tí kóyaon nchítjen ikjan ch'án k'uixenhen ch'án tí ninko jie a la ko kaín xín tí chojni mé kóchjinehe sín ch'án. Ntá kjuák'etjaxin ch'án kjuankíxin ch'án kjuako ch'án.

<sup>3</sup>Ntá tí sín tjako tí ley la ko tí sín fariseo mé kjuikao sín ijnko tjachjin kónoxíxin kíxin chón̄ta tjan ókjé chojni ntoa. Ntá kjuak'e sín tjan jnkosiné tí sín tjejó ntiha.

<sup>4</sup>Ntá ntáche sín tí ch'ín Jesús kíxin:

—Maestro, tí tjan i kónoxíxin kíxin kjuasin tjan jie chón̄ta tjan ókjé chojni ntoa. <sup>5</sup>A ntá tí ley tsíkjin ch'ín Moisés mé t'etoan kíxin ixro chrók'óyánxinni tí chojni chjin xíkaha ch'e. ¿A ntá jaha, nkechrua? —ichro sín.

<sup>6</sup>Mé xíkaha ichro sín kíxin tjinkaon sín kíxin ách'e ntoáhya chrókjuatehe ch'ín Jesús ntá chrókjuanchia sín jie. Ntá ch'ín Jesús mé k'uísén ch'án kjinxin ch'án dedo tja ch'án nonte a. <sup>7</sup>Ntá naxa tinkájanckankíhi sín ch'án. Ntá k'uínkatjen ch'án k'uetōan ch'án kíxin:

—Xá nkexro tí tjejorá ntihi chón̄tahya ninkehó jie mé saoxín chróchjéhe sín tjan xro —ichro ch'án.

<sup>8</sup>Ntá xík'isén ch'án inaá ikjin ch'án tí nche inaá. <sup>9</sup>Ntá tí sín a mé kuínhin sín tí nkehe k'uetōan ch'ín Jesús ntá kósuèhe sín kíxin koí sín chón̄ta sín jie, ntá jnkojnko jnkojnko sín, sásítji sín na mé saoxín tí ch'ín antsí má táda ch'án sákjuí ch'án, ntá kaín tí sín í so a sákjuí sín kjaxin sín.

Ntá jehó tí ch'ín Jesús la ko tí tjan a kuítōhe sín ntiha. <sup>10</sup>Ntá xrentoá ch'án la kjuanchankíhi ch'án tjan kíxin:

—¿Nkekjá tí sín kjuanchia jie? ¿Á kohya ninkexró kjuínckekjasótiahya ní? —ichro ch'án.

<sup>11</sup>Ntá ntáchro tjan kíxin:

—Náhi, Ínchéni, ninkexró —ichro tjan.

Ntá ntáchro ch'ín Jesús kíxin:

—Kjaxin janhan sintakjasótiahya. Sátjia la í tjásinhya jie inaá —ichro ch'án.

**Ch'ín Jesús mé xrohi  
t'inkaséyanxín chjasintajni**

<sup>12</sup>Ntá ch'ín Jesús xínixjehe ch'án tí sín tsíkkóchjina inaá ntáchro ch'án kíxin:

—Janhan mé xrohi t'inkaséyanxín chjasintajni. Tí tsochréhérá tí janhan ntá ts'ajirá tí t'inkaséyan tsochontaxínrá tí kjuachón a la ko í ts'ajihyará tí sítie a —ichro ch'án.

<sup>13</sup>Ntá tí sín fariseo ntáchro sín kíxin:

—Jahvá tjechronka nkexrí tjen jaha na mé chaxínhya tíha kíxin jahvá tjechronka —ichro sín.

<sup>14</sup>Ntá kjuátēhe ch'ín Jesús ntáchro ch'án kíxin:

—Janhván tjetjonkará nkexrí tjén na kjónté chaxín xrjanka kíxin ó nòna nketí nó k'uinkaxian la ko nòna nketí sátsjiyá. A ntá jahará noahyará nketí k'uinkaxian la ko noahyará nketí sátsjiyá. <sup>15</sup>Jahará la éxí chojni chjasintajni ó tékará jie. A ntá janhan la tékahya jie ninkexró. <sup>16</sup>Kjánchó ntoá chrókjuin-takitoaxián ijie chojni kíxin jehya janhván t'a tíha, T'aná tjékian, na mé tí nkexro k'uetōanna k'uinka ntihi na mé jehe ch'án mé tjékian ch'án ntihi ntakitoaxínkian ijie chojni. <sup>17</sup>A ntá tí ley tsíkjin ch'in Moisés mé ntáchro kíxin tí tsonoxín iyó sín tsochrónka á chaxín xíkaha tsíkkónhen ntá chrókuitekao chojni. <sup>18</sup>Ntá janhan na mé tjéxrjanka nkexrí tjén janhan la ko kjaxin T'aná mé tí nkexro k'uetōanna k'uinka mé jehe ch'án kjaxin chrónka ch'án nkexrí tjén janhan —ichro ch'án.

<sup>19</sup>Ntá kjuanchankíhi sín ch'án kíxin:

—¿Nketí tjen It'á? —ichro sín.

Ntá kjuátehe ch'ín Jesús ntáchro ch'án kixin:

—Jahará la chonhyará tí janhan la ko kjaxin chonhyará T'aná. Tí chrókochoxinrá tí janhan ntá kjaxin chrókochoxinrá tí T'aná —ichro ch'án.

<sup>20</sup>Mé xikaha chro ch'ín Jesús tí kjuák'ekjakoçin ch'án tí ninko jíe chjino ntacajón tjetóxroyéya chichaon tjanjon sín. Kjánchó ninkexró tséhya sín ch'án kixin naçá kjuixrakáhya tí hora tsotsé sín ch'án.

**“Xitjahya tsjasánrá tí nó sátsjiyá janhan”**

<sup>21</sup>Ntá ch'ín Jesús ntáche ch'án sín inaá kixin:

—Ntá sátsjiyá janhan. Ntá jahará tsjéyará tí janhan, ntá tió ts'énrá naçá yamára ijjárá. Xitjahya tsjasánrá tí nó sátsjiyá janhan —ichro ch'án.

<sup>22</sup>Ntá ntáchro tí sín judío ikjo sín kichó sín kixin:

—¿Á ts'óyán ch'án asén ch'án kixin xikaha ntáchro ch'án kixin xitjahya tsjijini tí nó sátsji ch'án? —ichro sín.

<sup>23</sup>Ntá ntáche ch'ín Jesús tí jehe sín kixin:

—Jahará la nonte ntihi k'uaxrjénix-inrá. A ntá janhan la nkaya nkajní k'uaxrjénixian. Jahará la kuènte chjasintajni ntihi. A ntá janhan la janhya kuènte chjasintajni. <sup>24</sup>Mé xikaha tjonkará kixin tió ts'énrá naçá tsochontará ijjárá kixin tí tsítékákonhyará tí janhan, mé tí nkexro xráçín tjen,<sup>¶</sup> ntá kjónté ts'énrá naçá tsochontará tí ijjárá —ichro ch'án.

<sup>25</sup>Ntá kjuanchankí sín ntáchro sín kixin:

—¿Nkexro tí jaha? —ichro sín.

Ntá kjuátehe ch'ín Jesús ntáchro ch'án kixin:

—Tí xrankixín kjuankixian tjonkará kixin nkexro tí janhan. <sup>26</sup>Itsje nkehe chonta chróntáxrjan kixin chrókuin-takitoaxián tí jie chontará. Kjánchó tí nkexro k'uetuanna k'uinka na mé tí nkehe chrónka ch'án la chaxín. A ntá jehó tí nkehe kuinhan chrónka ch'án mé tjáqoha tí sín chjasintajni —ichro ch'án.

<sup>27</sup>Kjánchó jehe sín mé kienxínhya sín kixin nixja ch'án kuènte It'é ch'án tjen nkaya nkajní. <sup>28</sup>A ntá ntáchro ch'án kixin:

—Tió sinchek'it'ótjenrá noi tí Xjeen Dios K'óna Chojni, ntá tsonohará kixin janhan mé tí nkexro xráçín tjen.<sup>§</sup> Ntá tsonohará kixin jehya janhan tétóan tí xra tjét'a. Náhí. Jehó tí nkehe kjuakona T'aná mé tjétákua. <sup>29</sup>Tjéçian tí nkexro k'uetuanna k'uinka kixin jehí xráçín T'aná la kuítónahya janhván kixin xráçín ntáxiteyáha tí nkehe tóxrjínjin ch'án —ichro ch'án.

<sup>30</sup>Mé xikaha ntáchro ch'án ntá nchónhya chojni kuítekaon sín tí jehe ch'án.

**Nkexrí tjejó tí sín xjeen Dios la ko nkexrí tjejó tí sín chrokjuahya tsítóhe sín ijje sín**

<sup>31</sup>Ntá nixjehe ch'ín Jesús tí sín judío kuinkáchónki sín ch'án ntáchro ch'án kixin:

—Tí tsítóéhyará tí tan kjuákohtará ntá jahará chaxín discípulo kuéntana <sup>32</sup>la ko tsjátsoanrá tí nkehe chaxín, la ko tí nkehe chaxín mé tsotjáhará kjuachaxin tsaáxinrá, a ntá tsokohya nkehe ts'inkákonhen —ichro ch'án.

<sup>33</sup>Ntá kjuátehe sín ntáchro sín kixin:

—Jeheni mé tsík'axrjenixinni ch'ín Abraham na í xráçín kohya nkexro k'uena tí jeheni. ¿Nkekuénté ntáchrúa jaha kixin ts'áyéheni kjuachaxin tsaáxinni? —ichro sín.

¶8:24 Éxodo 3.14

§8:28 Éxodo 3.14

<sup>34</sup>Ntá ntáchro ch'ín Jesús kixin:

—Tjetoan tí nkehe tjétjonkará kixin tí sín tjasin jje mé éxí chojni k'uíná chrokjuahya tsitohe sín ijje sín. <sup>35</sup> A ntá ijnko chojni k'uíná la jnkochríxínnya tsjak'e ch'án tí ntoe tí nkexro a. A ntá tí xjeen tí nkexro na mé jnkochríxín tsitohe ntiha. <sup>36</sup> Ntá tí tsaáxinrá tí Xjeen Dios ntá chaxín tsochontará kjuachaxin, a ntá tsokohya nkehe ts'inkákonhen. <sup>37</sup> Ó nõna kixin jahará tsík'axrjeníxinrá ch'ín Abraham. Kjánchó tjinkáonrá chrók'oyánrá tí janhan kixin títekákonhyará tí nkehe tjéxrjanka. <sup>38</sup> Janhan xrjanka tí nkehe k'uíkuan kixin nkexrí tjen T'aná. A ntá jahará tjejonchexiteyéhérá tí nkehe kuínhínrá chrónka it'ará —ichro ch'án.

<sup>39</sup> A ntá jehe sín kjuátehe sín ntáchro sín kixin:

—It'éni mé ch'ín Abraham —ichro sín.

Kjánchó ntáchro ch'ín Jesús kixin:

—A ntá tí jahará chrókóchaxín xjeen ch'ín Abraham ntá chrókjuich'erá éxí kjuich'e ch'án. <sup>40</sup> A ntá tjétjonkará tí tan chaxín kuínhan chrónka Dios na kjónté chrók'oyánrá tí janhan. A ntá ch'ín Abraham xikahya kjuich'e ch'án. <sup>41</sup> Jahará tjejoch'erá éxí kjuich'e it'ará —ichro ch'án.

Ntá ntáchro sín kixin:

—Jehya k'ónamá tí jeheni. Náhí. Chóntani jnkokoá It'éni mé Dios —ichro sín.

<sup>42</sup> Ntá ntáche ch'ín Jesús tí jehe sín kixin:

—Tí chrókóchaxín kixin Dios mé It'ará la ntá chrótuáanará kixin janhan kjaxin k'uaxrjeníxinna Dios k'uinkaxian tí tjen ch'án. Jehya kixin janhván k'uinka. Náhí. Dios mé ichr'ánna k'uinka. <sup>43</sup> ¿Nkekuénté kixin tiénxinyará tí nkehe tjonkará? Jehí tjinkákonhyará chrókuinhínrá tí nkehe xrjanka. <sup>44</sup> Jahará mé xjeen Tsochren la ko jahará tsík'axrjeníxinrá ch'án la ko tjinkáonrá

sínchexiteyará tí nkehe tjinkaon ch'án. Tsochren mé xrankíxixín kjuaya ch'án. Nunca k'uénixja ch'án ntoá. Xrácín ch'ía ch'án kixin xikahó tjenkayáxin ch'án. Jehe ch'án mé it'é kaín tí kjuach'ia. <sup>45</sup> A ntá janhan tjétjonkará nkehe ntoá ntá títekákonnahyará. <sup>46</sup> ¿Á tjejorá jnkojínrá nohará nkerí jje kjuásian janhan? A ntá tí ntáxrjan tí nkehe ntoá, ¿ntá nkekuénté títekákonnahyará? <sup>47</sup> Tí sín tinkáchónki Dios mé tjinkaon sín chrókuinhin sín itén Dios. A ntá jahará la tinkáchónkihyará Dios ntá tjinkákonhyará chrókuinhínrá itén ch'án —ichro ch'ín Jesús.

### Cristo la ó xrácín tjen ntá chr'éxin kjuák'e ch'ín Abraham

<sup>48</sup> A ntá tí sín judío ntáche sín tí ch'ín Jesús kixin:

—Chaxín ntoá ntáchroni kixin jaha mé ijnko chojni samaritano la ko chonta ijnko nchakuen tí jínahya —ichro sín.

<sup>49</sup> Ntá kjuátehe ch'ín Jesús ntáchro ch'án kixin:

—Janhan chontahya ninkehó nchakuen tí jínahya. Tí xra t'a mé tjikosáyaha T'aná. Ntá jahará mé chontahyará kjuasáyé tí janhan. <sup>50</sup> Janhan na tjéyáhya nkexro tsjikosáyana. Kjánchó itjen ijnko nkexro tjinkaon ch'án chrókjuikosáyana chojni, a ntá jehe ch'án mé tsjanchia jje tí sín kuítekakonyha. <sup>51</sup> Imá tjetoan tí nkehe tjétjonkará kixin tí tsítekáonrá tí nkehe tjákua la í ts'énhyará —ichro ch'án.

<sup>52</sup> Ntá kjuátehe tí sín judío ntáchro sín kixin:

—Ntá ó noheni kixin chaxín chonta ijnko nchakuen tí jínahya. Ch'ín Abraham la ko kaín tí sín k'uéchrónka itén Dios ósé la mé ik'uén sín. Ntá jaha ntáchrúa kixin tí tsitekaonni tí nkehe tjákua jaha ntá í ts'énhyani, ichrúa. <sup>53</sup> ¿Xá imá tétóan jaha la ntá kánhyó t'etóan it'éni Abraham? Jehe ch'án la ik'uén ch'án la ko kjaxin ik'uén tí sín

k'uechrónka itén Dios ósé. ¿Xá nkexro tí jaha, ichrua? —mé chro sín.

<sup>54</sup>Ntá kjuátehe ch'ín Jesús ntáchro ch'án kixin:

—Tí chrókjuíkosáyaha asenná na mé sínkíhya tíha. A ntá T'aná mé tjikosáyana ch'án na ntá jahará ntáchrorá kixin jehe ch'án mé Dios kuéntará. <sup>55</sup>Kjánchó chonhyará ch'án. A ntá janhan choxian ch'án. Tí chróntáxrjan kixin janhan chonhya ch'án ntá chrókóyóna tí jahará chrókjuít'ayahará. Kjánchó janhan na choxian ch'án la ko ntáxiteyáha tí nkehe t'etóan ch'án. <sup>56</sup>Ch'ín Abraham tí nkexro tsík'axrjeníxinrá la imá kóchéhe ch'án kixin ts'ikon ch'án tí yaon ts'inka janhan. Ntá ó kjuixin k'uíkon ch'án ntá kóchéhe ch'án —ichro ch'án.

<sup>57</sup>A ntá tí sín judío ntáche sín tí ch'ín Jesús kixin:

—Jaha naxa chontahya cincuenta nánó, ¿na ntá nkekuénté ntáchrua kixin ó k'uíkuan tí ch'ín Abraham? —ichro sín.

<sup>58</sup>Ntá kjuátehe ch'ín Jesús ntáchro ch'án kixin:

—Imá tjetóan tí nkehe tjetjónkará kixin naxa kohya ch'ín Abraham mé xráxín itjén janhan —ichro ch'án.

<sup>59</sup>Ntá kuákja sín xro chróchjéhe sín tí ch'ín Jesús. Kjánchó kjuák'emá ch'án nínko ntá chr'éxin k'uaxrjexín ch'án ntiha. K'uátsínka ch'án jnkosiné tí tjejó sín sákjuí ch'án.

### Ch'ín Jesús kjuínchekitohe jína ijnko ch'ín tsíkokjéxín t'ikonhya ch'án

**9** K'uátsínka sín ijnko ntá k'uíkon ch'ín Jesús ntiha tjen ijnko ch'ín tsíkokjéxín t'ikonhya ch'án. <sup>2</sup>Ntá tí sín k'uájiko ch'ín Jesús kjuanchankíhi sín ch'án kixin:

—Maestro, ¿Nkekuénté tsíkokjéxín ch'án t'ikonhya ch'án? ¿Á ijé it'é o iné ch'án o á ijé ch'án? —ichro sín.

<sup>3</sup>Ntá kjuátehe ch'ín Jesús ntáchro ch'án kixin:

—Jehya ijé ch'án la ko jehya ijé it'é la ko iné ch'an. Náhí. Jehí xíkaha tsíkonhen ch'án kixin tí kjuachaxién Dios tsjakoxín kixin tsitoxín ch'án jína. <sup>4</sup>Naxa nchakotjin t'ichjánxin sit'a tí xra tjinkaon tí nkexro tsíchr'ánna. Ntá ts'ixin tie ntá kohya ninkexró tsjacha sich'e xra. <sup>5</sup>Naxa itjén janhan mé ntihi chjasintajni na mé janhan xrohi t'inkaséyanxín tí chjasintajni —ichro ch'án.

<sup>6</sup>Ntá ó kjuixin ntáchro ch'án tíha ntá kuíkite ch'án ntáten ch'án intsí nche k'óna nchet'o ntá kuátematóxin ch'án ikon tí ch'ín t'ikonhya. <sup>7</sup>Ntá k'uetuenhen ch'án tí ch'ín t'ikonhya kixin:

—Sátjia tí pila tjiá ntá it'in Siloé t'on-tia kuan —ichro ch'án. (A ntá tí ih-nié Siloé mé t'axrjexín nkívee sín kixin K'uítuenhen.)

Ntá sákjuí tí ch'ín t'ikonhya k'ónti ch'án ikon ch'án ntá kjan ch'án k'uíkon ch'án. <sup>8</sup>Ntá tí sín ntóe chjinaxón ntóe ch'án la ko tí sín k'uek'ikon sín kixin t'ikonhya ch'án mé ntáchro sín kixin:

—¿Á jehya tí ch'ín i k'uekjak'etjaxín ch'án k'uekjanchak'á ch'án? —ichro sín.

<sup>9</sup>Iso sín ntáchro sín kixin:

—Kjá chaxín jehe ch'án —ichro sín.

Ikjé sín ntáchro sín kixin:

—Náhí, jehya jehe ch'án. Tóyóhó ch'án tí ch'ín a —ichro sín.

Kjánchó jehe ch'án kjuátehe ch'án kixin:

—Chaxín janhan —ichro ch'án.

<sup>10</sup>Ntá kjuanchankíhi sín ch'án kixin:

—¿Nkexrí kixin jaí t'ikuan jaha? —ichro sín.

<sup>11</sup>Ntá kjuátehe ch'án ntáchro ch'án kixin:

—Ijnko ch'ín mé it'in Jesús mé kjuích'éna ch'án nchet'o kuátematóxin ch'án kuan la ntá k'uetuanna ch'án kixin satsjia tí pila tjiá ntá nchek'in sín Siloé

ts'ontia kuṇ, ichro ch'án. Ntá sákjuia k'ontia, ntá xrínahya ó k'uíkuan —ichro ch'án.

<sup>12</sup> Ntá kjuanchankíhi sín ch'án ntáchro sín kixin:

—¿Nketí tjen tí ch'ín a? —ichro sín.

Ntá kjuátehe ch'an ntachro ch'an kixin:

—Nonahya janhan —ichro ch'an.

**Tí sín fariseo tjanchankíhi sín tí ch'ín k'uék'ikonhya kuítóhe jína**

<sup>13</sup> Ntá tí sín a sákjuiko sín tí ch'ín k'uék'ikonhya sákjuíchréhe sín tí sín fariseo a. <sup>14</sup> A ntá tí yaon t'ok'éhe sín mé tsíkjich'éna ch'ín Jesús tí nchet'ò kjuínchekitoexín jína tí ch'ín k'uék'ikonhya. <sup>15</sup> A ntá tí sín fariseo xíkjančankíhi sín ch'án inaá kixin nkexrí kuítóhe ch'án jína t'ikon ch'án jie. Ntá kjuátehe ch'án ntáchro ch'án kixin:

—Kuátematóxin ch'án nchet'ò kuṇ, ntá k'ontia kuṇ ntá jie t'íkuan —ichro ch'án.

<sup>16</sup> Ntá iso tí sín fariseo ntáchro sín kixin:

—Tí chojni a jehya kuènte Dios kixin chóntahya ch'án kjuasáyé tí yaon t'ok'éheni —ichro sín.

Kjánchó ikjé sín ntáchro sín kixin:

—¿Xá nkexrí chrókjuasin ch'án kjuaxroan jie tí chóna ch'án jie? —ichro sín.

Mé xíkaha jnkokónhya kjuenkayáxin tí jehé sín. <sup>17</sup> Ntá xíkjančankíhi sín tí ch'ín k'uék'ikonhya inaá kixin:

—¿Ntá jaha nkechrua nkexro tíha tí nkexro kjuíntak'ikuan? —ichro sín.

Ntá kjuátehe ch'án ntáchro ch'án kixin:

—Janhan ntáxrjan kixin jehé ch'án mé ijnko nkexro chrónka itén Dios —ichro ch'án.

<sup>18</sup> Kjánchó tí sín judío kuítekakonhya sín kixin chaxín k'uék'ikonhya ch'án ntá jie t'ikon ch'án. Ntá k'uíyehé sín tí it'é la

ko tí iné tí ch'ín tsíkitohe jína. <sup>19</sup> Kjuanchankíhi sín ntáchro sín kixin:

—¿Á xjaan tíhi tí ntáchorá kixin tí tsíkókjéxin ch'án t'ikonhya ch'án? ¿Ntá nkexrí jie t'ikon ch'án? —ichro sín.

<sup>20</sup> Ntá kjuátehe tí it'é la ko tí iné ch'án ntáchro sín kixin:

—Ó noheni kixin xjeenni ch'án la ko noheni kixin tí kokjéxin ch'án t'ikonhya ch'án. <sup>21</sup> Kjánchó noehyani nkexrí kixin t'ikon ch'án jie la ko noehyani nkexro kjuínchekitohe ch'án jína. Tjančankíhírá ch'án, ó nteto ch'án, ntá jehé ch'án tsochrónka ch'án kixin nkexrí kuítóhe ch'án jína —ichro sín.

<sup>22</sup> Mé xíkaha kjuátehe tí it'é la ko tí iné ch'án kixin chakonhen sín tí sín judío kixin ó kjuixin chrónka tí sín judío kixin tsjanjonhya sín kjuachaxin ts'ixenhen njnko tí sín titekaon kixin ch'ín Jesús mé tí nkexro Cristo. <sup>23</sup> Mé xíkaha ntáchro tí it'é la ko tí iné ch'án kixin chrókjuanchankíhi sín ch'án, ó nteto ch'án, ichro sín.

<sup>24</sup> Ntá yóxin xík'íyehé tí sín judío tí ch'ín k'uék'ikonhya ntá k'uetuēhen sín ch'án kixin:

—Tjetsjehe Dios ntá ntoá chrónka kixin ó noheni kixin tí ch'ín a na chóna ch'an jie —ichro sín.

<sup>25</sup> Ntá tí ch'ín k'uék'ikonhya kjuátehe ch'án kixin:

—Nonahya á chóna ch'án jie o á chóntahya ch'án jie. Jnkokoá nkehe nòna kixin senó k'uék'ikonhya ntá jie t'íkuan —ichro ch'án.

<sup>26</sup> Ntá xíkjančankíhi sín ch'án inaá kixin:

—¿Nkexrí kjuích'e ch'án kixin kjuíntak'ikuan ch'án? —ichro sín.

<sup>27</sup> Ntá kjuátehe ch'án ntáchro ch'án kixin:

—Ó kjuixin tjonkará kjánchó títekákonhyará. ¿Nkekuèté tjinkáonrá kixin tsotjonkará inaá? ¿Á kjaxinrá

tjinkáonrá tsochréhérá ch'án? —ichro ch'án.

<sup>28</sup>Ntá kónínkakonhen sín ch'án la k'uántaxínhín sín ch'án la ko kjuátehe sín kixin:

—Jaha la chréhé tí chojni a. **A** ntá jeheni na chréhéni tí nkehe k'uetōan ch'ín Moisés. <sup>29</sup>Ó noheni kixin Dios k'uénixjehe ch'ín Moisés. **A** ntá tí ch'ín a la noehyani nketí tsíkjin ch'án —ichro sín.

<sup>30</sup>Ntá kjuátehe tí ch'ín ntáchro kixin:

—Imá ókjé tíha. Tí ch'ín a mé kjuínchek'ikonna. **A** ntá jahará ntáchrorá kixin noahyará nketí tsíkjin ch'án. <sup>31</sup>Ó noheni kixin tienhya Dios tí nkehe tjanchia tí chojni chóna jie. Jehó tinhin ch'án tí nkehe tjanchia tí sín titekaon Dios la ko nchexiteyēhe sín tí nkehe tjinkaon ch'án. <sup>32</sup>Nunca kienhyéni kixin ijnko nkexro chrókjuinchek'ikon ijnko chojni tsíkókjéxín t'ikonhya. <sup>33</sup>**A** ntá tí nkexro a tí chrókujínhya ch'án tí tjen Dios la kjá ninkehó nkehe xitjahya chrókjuich'e ch'án —ichro ch'án.

<sup>34</sup>Ntá kjuátehe tí sín fariseo ntáchro sín kixin:

—Jaha la nchónhya jie chonta tíó kokjía. **A** ntá jie ¿á tjínkávan kixin jaha chrókjuákohéni ní? —ichro sín.

Ntá kótéka sín tí ch'ín a kixin ts'axrjéxín ch'án tí nínko a sátsji ch'án.

### Ntakótán nchakuen sín

<sup>35</sup>Ntá kuínhin ch'ín Jesús kixin xikaha k'uetuēnhen tí sín judío kixin ts'axrjéxín nínko tí ch'ín k'uék'ikonhya. Ntá xeta ch'ín Jesús tí ch'ín a ntá kjuanchankí ch'án kixin:

—¿Á tinkachónkia tí Xjeen Dios K'óna Chojni? —ichro ch'án.

<sup>36</sup>Ntá kjuátehe tí ch'ín a ntáchro ch'án kixin:

—Tjákohéni nkexro tíha kixin ntá tsínkáchónkini ch'án.

<sup>37</sup>Ntá kjuátehe ch'ín Jesús ntáchro ch'án kixin:

—Ó k'uíkuan jaha. Janhan mé tí nkexro tjetjuá jaha —ichro ch'án.

<sup>38</sup>Ntá kjuák'exín toch'in ch'án toté ch'ín Jesús ntáchro ch'án kixin:

—Ijie kuítekavan tí jaha Ìnchéni —ichro ch'án.

<sup>39</sup>Ntá ntáchro ch'ín Jesús kixin:

—K'uinka ntihi chjasintajni kixin sintakitoaxián ijé chojni kixin ntá tí sín t'ikonhya la mé ts'ikon sín, a ntá tí sín t'ikon jie la í ts'ikonhya sín —ichro ch'án.

<sup>40</sup>**A** ntá iso tí sín fariseo k'uéjontaxín kuínhin sín kixin xikaha ntáchro ch'ín Jesús, ntá kjuanchankíhi sín ch'án kixin:

—¿Xá kjáxin jeheni ntakótáni? —ichro sín.

<sup>41</sup>Ntá kjuátehe ch'ín Jesús ntáchro ch'án kixin:

—**A** ntá tí jahará tí chaxín chrók'uikonhyará ntá chróchontahyará jie. Kjánchó ntáchrorá kixin t'ikonrá. Méxra chontará jie —ichro ch'án.

### Ch'ín Jesús ncheyóexín tí t'inkachjina kolélo

**10** Ntá ntáchro ch'ín Jesús kixin:

—Imá tjetōan tí nkehe tjetjōnkará kixin tí ts'ixenhen ijnko chojni tí t'inkachjina kolélo ntá jehya puerta tí corral t'ixenxín ch'án na mé ókjé chrok'uixenxín ch'án na mé xíchee tíha la tjinkaon chrókueé. <sup>2</sup>**A** ntá tí nkexro t'ixenxín tí puerta na mé nkexro t'ayakonhen tí kolélo a. <sup>3</sup>La ko tí ch'ín tjet'ayakonhen tí puerta a mé tsakitjehe ch'án tí puerta a kixin ts'ixenhen tí nkexro chaxín t'ayakonhen tí kolélo a. **A** ntá tí kolélo a mé tsjatsōan va itén ch'án. Ntá t'iyexín ch'án jnkojnko ihnié jnkojnko tí kolélo kuènte ch'án ntá ts'axrjéxín va ntōe va. <sup>4</sup>Ntá t'ikon ch'án kixin k'uaxrje káin va ntá kuítonhen ch'án va ntia ntá tinkáchréhe va kixin



tjatsqan va itén ch'án. <sup>5</sup>Chrohya va tjichréhe va ijnko chojni ókjé na mé tsinkéhe va tí chojni a kixin tjatsoanhya va itén ókjé chojni —ichro ch'án.

<sup>6</sup>Mé xikaha ntácho ch'ín Jesús kjuíncheyóexin ch'án. Kjánchó tienxínhya sín nkexrí t'axrjexín tíha.

### Ch'ín Jesús mé tí pastor jína

<sup>7</sup>Ntá chrónka ch'ín Jesús ínaá ntácho ch'án kixin:

—Ijnko nkehe tjetoan tsotjonkará kixin janhan la éxí tí puerta t'ixenxín tí kolélo tí t'inkachjina va. <sup>8</sup>Kaín tí sín kuitónxin ntja kui senó mé xíchee la ko chrókueé. La ntá tí kolélo la ántosén va tí nkehe ntácho tí jehe sín. <sup>9</sup>Janhan mé tí puerta a mé t'ixenxínrá tí janhan mé tsaará la mé tsoyóhará tí kolélo síin kjuachaxin ts'axrjexín va tí kòrré va sátsjikjine va la ko síin kjuachaxin ts'ixenhen va tí ts'inkachjina va ínaá.

<sup>10</sup>Á ntá xíchee mé jehó chrókueé la ko tjinkaon chrók'óyán la ko chrókjuinçek'itjáyan kaín nkehe. Á ntá janhan k'uinka kixin tsochontaxinrá kjuachón na mé kjuachón jnkochrín.

<sup>11</sup>Janhan mé ijnko pastor jína a ntá tí pastor jína mé ts'enyákonhen tí kolélo a. <sup>12</sup>Á ntá tí nkexro ch'e xra tjinkaon chrókjuacha ó na mé ts'ikon ch'án itsi ijnko kolobo tsítóhe ch'án tí kolélo sátsji ch'án kixin jehe ch'án la jehya tí nkexro t'ayakonhen tí kolélo la ko jehya kolélo kuènte ch'án. Ntá tí kolobo mé tsotsé va tí kolélo ntá tsinká va la sátsjichroe va. <sup>13</sup>Mé xikaha tí chojni tjinkaon chrókjuacha tí xra chrókjuich'e ó la mé sátsji. Á ntá tí kolélo la ántosén ch'án kuáhya ch'án kuenté tí jehe va.

<sup>14-15</sup>Á ntá janhan mé ijnko pastor jína. Mé xikaha T'aná chóxin ch'án tí janhan la ko kjaxin janhan choxian tí jehe ch'án mé xikaha choxian janhan tí sín éxí kolélo kuèntana la ko jehe sín mé chóxin sín tí janhan. Ntá ts'enyákon-

han tí sín éxí kolélo kuèntana. <sup>16</sup>Kjaxin chonta kolélo naxa jehya kòrré va ntíhi mé kjaxin t'ichjánxin sátsjicakjián va. Á ntá tí tsitekakonna va ntá ts'óna jnkokoá kòrré va la ko jnkokoá nkexro ts'ayakonhen va.

<sup>17</sup>Tjuana T'aná kixin kjónté its'én la tsoxechónna ínaá. <sup>18</sup>Kohya nkexro tsakitsjena tí kjuachón chonta janhan tí chrókjuánjonhya kjuachaxin. Chonta janhan kjuachaxin its'én la ko chonta janhan kjuachaxin tsoxechónna ínaá. Tíhi mé k'uetuanna T'aná —ichro ch'ín Jesús.

<sup>19</sup>Tió kuínhin tí sín judío tí nkehe ntácho ch'ín Jesús ntá kjuankixin jnkokoáhya kjuenkayáxin sín. <sup>20</sup>Nchónhya tí jehe sín ntácho sín kixin:

—¿Nkekuènté tinhínrá tí nkehe ntácho ch'án? Jehe ch'án mé chóna ch'án nchakuen tí jínahya la ko lóco ch'án —ichro sín.

<sup>21</sup>Ntá ikjé sín ntácho sín kixin:

—Xikahya chrónixja ijnko chojni chóna nchakuen tí jínahya. ¿Á ijnko nchakuen tí jínahya la á jína chrókjuinçek'ikon ijnko chojni t'ikonhya? —ichro sín.

### Tí sín judío kuítekakuenhya sín tí ch'ín Jesús

<sup>22</sup>Á ntá tí nchakuen kin tí chjasin Jerusalén k'uíxin kia xraxinkakonxín sín tí yaon tsíkjixin tsík'óna nínko. <sup>23</sup>Ntá ch'ín Jesús itjen ch'án tí nínko tí ntasin kuènte Salomón. <sup>24</sup>Ntá tí sín judío k'uántatjen sín tí ch'ín Jesús kjuanchankíhi sín ch'án kixin:

—¿Hasta nkesá ts'ejóchónhenni tsinhinni jína? Á ntá jie chrónka ntoá kixin á chaxín jaha tí Cristo —ichro sín.

<sup>25</sup>Ntá kjuátehe ch'ín Jesús kixin:

—Ó tjonkará ntá naxa títekákonhyará. Kaín tí xra tjét'a janhan tí kjuachaxin kuènte T'aná mé tjakoxin nkexro tí janhan. <sup>26</sup>Kjánchó jahará títekákonhyará

kíxin jahará la jehya kolélo kuèntana éxi tjonkará senó. <sup>27</sup> Tí kolélo kuèntana mé tjatsoan va tí tanná la ko kjaxin janhan tjatsoan tí jehe va la ko jehe va mé chréhe va tí janhan. <sup>28</sup> Janhan mé tjaha va tí kjuachón jnkochrín la í ts'itjáyanhya va la ko ninkexró tsjachahya tsakit-sjexín va tjaná. <sup>29</sup> Ó kjuanjon T'aná, mé tí nkexro tjetóxin t'etoan, na ninkexró tsjacha tsakitsjexín va tí tja ch'án. <sup>30</sup> Janhan la ko T'aná na mé jnkokoá nkexro tíha —ichro ch'án.

<sup>31</sup> Ntá tí sín judío kuákja sín xro chróchjéhe sín ch'án inaá. <sup>32</sup> Ntá kjuátehe ch'ín Jesús ntáchro ch'án kíxin:

—Nchónhya nkehe jína k'uikonrá kjuákoxian kjuachaxin kuènte T'aná. ¿Ntá nkekuènté chróchjinárá xro? —mé chro ch'án.

<sup>33</sup> Ntá kjuátehe tí sín judío kíxin:

—Jehya tí kjuaxroan jína tjásian chrótjiáxiánni xro. Náhi. Jaha ijnko chojni ó ntá kjuincheyóhé asán Dios na mé tsoitjiáxiánni xro —ichro sín.

<sup>34</sup> Ntá ntáchro ch'ín Jesús kíxin:

—Ntá ntáchro xroon itén Dios tsikjin sín ósé kíxin ntáchro Dios kíxin: “Kjaxinrá éxi Dios tí jahará.”\*\* <sup>35</sup> Ntá ó noheni nkehe ntáchro xroon itén Dios na ntá xitjahya tsitekakonhyani tíha. Mé xikaha ntáchro Dios kíxin éxi Dios jnkojnko nkexro k'uáyéhe itén ch'án. <sup>36</sup> A ntá kjuéyána Dios ichr'ánna ch'án chjasintajni, ¿ntá nkekuènté ntáchrórá kíxin k'uántaxinhan Dios kíxin janhan ntáxrjan kíxin Xjeen Dios tí janhan? <sup>37</sup> Kja tí chrókuít'ahya tí xra ich'e T'aná la chrókuítekákonhyará. <sup>38</sup> A ntá kjónté tjét'a tí xra a kjónté títekákonhyará tí janhan na mé chrókuítekáonrá tí xra tjét'a chrókoáoaxinrá chrókiénxinrá

kíxin T'aná la ko janhan mé jnkokoá tjékian ch'án —ichro ch'án.

<sup>39</sup> Mé xikaha chrótsé sín tí ch'ín Jesús inaá chrók'uikjéhe ch'án ntá kjuachahya sín ntá sákjuí ch'án.

<sup>40</sup> Ntá ch'ín Jesús xíkjan ch'án tí í jnko lado ntarío Jordán inaá tí k'uékjak'e ch'ín Juan k'uékikítexín ch'án chojni senó. <sup>41</sup> Ntá nchónhya chojni sákjuíchréhe sín ch'án ts'ikon sín ch'án ntáchro sín kíxin:

—Chaxin ch'ín Juan kjuasinhya ch'án kjuaxroan jié la kjónté ntoá tí nkehe chrónka ch'án kuènte tí ch'ín i —ichro sín.

<sup>42</sup> Ntá nchónhya sín kuítekaon sín tí ch'ín Jesús tí kjuíji sín ntiha.

### Ik'uén ch'ín Lázaro

**11** Itjen ijnko ch'ín níhi mé it'in ch'án Lázaro, chjasén ch'án na mé Betania, mé tí chjasén tí tjan María la ko tí kjavé tjan Marta. <sup>2</sup> Tí tjan María mé jnkokoá kichó tí ch'ín Lázaro mé tí ch'ín níhi na mé jehe tjan mé tí tjan kuikítexín aceite xraxé toté Ìnchéni la ko kjuínchexámáxin tjan kaxihí tjan toté ch'án.†† <sup>3</sup> A ntá yóí tí kichó ch'án chjin ichr'án sín ijnko nkexro tsochénka tí ch'ín Jesús kíxin:

—Ìnchéni jaha, tí nkexro choxian tjuèhé la níhi ch'án —ichro ch'án.

<sup>4</sup> Ntá kuínhin ch'ín Jesús ntá ntáchro ch'án kíxin:

—Tí chin chóna ch'án jehya kíxin ónaá chrók'uitjáyanxón ch'án tí ts'en ch'án. Náhi. Tíha mé tsjakoxin tí kjuachaxin jié kuènte tí Xjeen Dios —ichro ch'án.

<sup>5</sup> A ntá tí ch'ín Jesús la imá tjuèhé ch'án tí tjan Marta la ko tí tjan kichó tjan la ko tí ch'ín Lázaro. <sup>6</sup> Na ntá tió kuínhin ch'án kíxin níhi ch'ín Lázaro na kjónté

\*\* 10:34 Salmo 82.6

†† 11:2 Juan 12.3

kuítóhe ch'án iyó yaon ínaá tí nó kjuák'e ch'án. <sup>7</sup> A ntá chr'éxín ntáche ch'án tí sín k'uájiko ch'án kixin:

—Sátsjini estado Judea ínaá —ichro ch'án.

<sup>8</sup> Ntá kjuátehe tí sín k'uájiko ch'án kixin:

—Maestro, naxa séhya tí sín judío ntiha chrótjáha sín xro tjinkaon sín chrók'óyánxian sín xro. ¿Á tjinkávan sátsjia ntiha ínaá? —ichro sín.

<sup>9</sup> Ntá ntáchro ch'ín Jesús kixin:

—Jnkojnko yaon mé chóna teyó hora. Tió ixri chojni nchakotjin tsóténkixín-hya sín ninkehó kixin t'inkaséyanxín xrohi chjasintajni a. <sup>10</sup> Tí sín ixri tie mé tsóténkixín sín nkehe kixin chónahya sín xrohi —ichro ch'án.

<sup>11</sup> Ntá chr'éxín ntáche ch'ín Jesús tí sín k'uájiko ch'án kixin:

—Ó k'uájua tí nkexro chóxinni mé ch'ín Lázaro. Ntá sátsjia sintakjayaha ch'án —ichro ch'án.

<sup>12</sup> Ntá ntáchro tí sín k'uájiko ch'án kixin:

—Ínchéni, tí k'uájua ch'án la mé chrókuitóhe ch'án jina —ichro sín.

<sup>13</sup> Kjánchó tí nkehe ntáchro ch'ín Jesús mé t'axrxjén kixin ó tsíkjixin tsík'en tí ch'ín Lázaro. Ntá tí sín k'uájiko ch'án kjuenkayáxin sín kixin ó jehí tjejua ch'ín Lázaro. <sup>14</sup> Ntá ntoá chrónka ch'ín Jesús kixin:

—Ó tsík'en ch'ín Lázaro. <sup>15</sup> Ntá chàna kixin kohyana ntiha kixin mé xikaha tsitékákoxínra. A ntá jie întará sátsjitsjeheni ch'án —ichro ch'án.

<sup>16</sup> Ntá ch'ín Tomás, kjaxin tikítexín sín ch'án ch'ín Nóhé, mé ntáche ch'án tí í so sín kixin:

—Sátsjini koíni kaín ni ts'enkaoni ìnchéni —ichro ch'án.

### Ch'ín Jesús ntáchro ch'án kixin sinchexechón ch'án chojni ínaá

<sup>17</sup> Ntá kjuíji ch'ín Jesús kuínhin ch'án kixin ch'ín Lázaro la ó chóna noó yaon tsíkjixravá ch'án. <sup>18</sup> A ntá tí chjasin Betania mé chjinaxón tí chjasin Jerusalén, chóna iyó kilómetro ko t'ó kjínxin. <sup>19</sup> A ntá itsjé tí sín judío sátsíkjitsjehe sín tí tjan Marta la ko tí tjan María tjejónixjehe sín kixin kánhyó ts'ává sín kixin tsík'én tí kichó sín a. <sup>20</sup> Ntá kuínhin tjan Marta kixin ó kui ch'ín Jesús ntá k'uaxrxjén tjan nchia tsjixinhin ntja. A ntá tí tjan María kuítóhe tjan nchia. <sup>21</sup> Ntá tí tjan Marta ntáche tí ch'ín Jesús kixin:

—Ínchéni jaha. Chrókjuak'e ntihi ntá chrók'uenhya kichó ni. <sup>22</sup> Kjánchó ó nòna kixin Dios tsotjáha kaín nkehe tsjanchehé ch'án —ichro tjan.

<sup>23</sup> Ntá ntáchro ch'ín Jesús kixin:

—Tsoxechón kichuá ínaá —ichro ch'án.

<sup>24</sup> Ntá ntáchro tjan Marta kixin:

—Ó nòna kixin tsoxechón ch'án tió tsoxechón kaín tí sín tsík'en, tí yaon tsjixixín —ichro tjan.

<sup>25</sup> Ntá ntáchro ch'ín Jesús kixin:

—Janhan mé ntaxechón chojni la ko tsochóna sín kjuachón. Tí nkexro tsitekaon sín tí janhan na kjónté ó tsík'en sín la naxa sintaxechón sín ínaá. <sup>26</sup> La ko kaín xín tí sín naxa tjejóchón sín la tsitekaon sín tí janhan na ts'enhya sín. ¿Á títekávan xikaha ní? —ichro ch'án.

<sup>27</sup> Ntá ntáchro tjan kixin:

—Chaxín Ìnchéni títekavan kixin jaha mé Cristo, mé Xjeen Dios, mé tí nkexro kui chjasintajni —ichro tjan.

### Tsjánka ch'ín Jesús tí tsíkjixravá nkexro Lázaro

<sup>28</sup> Ó kjuixin ntáchro tjan Marta xikaha ntá sákjuik'íyehé tjan kichó tjan María ntá imó chénka tjan kixin:

—Ntiha tjen Maestro t'iyahá ch'án —ichro tjan.

<sup>29</sup> Ntá kuínhin tjan María ntá tuénxín k'uínkatjen tjan sákjuítsjehe tjan tí ch'ín Jesús. <sup>30</sup> Naxa tsík'ixenhya ch'án chjasin naxa tjen ch'án tí xéta ch'án tjan Marta. <sup>31</sup> Ntá tí sín judío tjeiónixjehe tjan María kixin kánhyó ts'ává tjan, mé k'uíkon sín kixin tjoka k'uaxrjexín tjan nchia, ntá kjuíchréhe sín tjan kjuenkayáxin sín kixin sátsji tjan tí tsík'ixravá kichó tjan, ntaha tsjitsjánkamā tjan ch'án, ichro sín.

<sup>32</sup> Ntá tí tjan María mé kjuíji tjan tí tjen ch'ín Jesús ntá kjuák'exín toch'in tjan toté ch'án ntá chro tjan kixin:

—Inchéni jaha, chrókjuak'e jaha ntihi ntá chrók'uenhya kichíná —ichro tjan.

<sup>33</sup> Ntá k'uíkon ch'ín Jesús kixin tsjánka tí tjan María la ko tí sín judío kjuikotoxin tjan ntá imá k'uává ch'án kóxakonhen asén ch'án. <sup>34</sup> Ntá kjuanchankí ch'án kixin:

—¿Nketí kjuavará ch'án? —ichro ch'án.

Ntá ntá chro sín kixin:

—Inchéni, ¿á sátsjitsjehé? —ichro sín.

<sup>35</sup> Ntá tsjánka ch'ín Jesús. <sup>36</sup> Ntá ntá chro tí sín judío kixin:

—Tsjeherá kixin imá tjuèhe ch'án tí ch'ín tsík'en —ichro sín.

<sup>37</sup> Kjánchó í so sín ntá chro sín kixin:

—Jehe ch'án mé kjuínchek'ikon tí ch'ín t'ikonhya. ¿Á xitjahya chrókjuanjon ch'án intsí kjuachaxin chrók'uenhya tí ch'ín Lázaro ní? —ichro sín.

### Ó xechón ch'ín Lázaro

<sup>38</sup> Ntá imá t'ává asén ch'ín Jesús kóchjinehe ch'án tí tòye. Tí tòye mé ijnko tjo, a ntá tí ntója tí tjo mé tsík'ikjèxin ijnko xro. <sup>39</sup> Ntá k'uetōan ch'ín Jesús kixin:

—Tjakjíyan tí xro a —ichro ch'án.

A ntá tí tjan Marta mé kichó tí nkexro k'uén mé ntá chro tjan kixin:

—Inchéni, kjá noha kixin kjá imá xra kixin ó chóna noó yaon tsík'en ch'án —ichro tjan.

<sup>40</sup> Ntá kjuátehe ch'ín Jesús ntá chro ch'án kixin:

—Ó tjonka kixin tsítekáván ntá ts'ikuan tí kjuachaxin jié kuènte Dios —ichro ch'án.

<sup>41</sup> Ntá kjuakjiiin sín tí xro a. Ntá ch'ín Jesús konta ch'án nkajní ntá chro ch'án kixin:

—It'eni, tjáncháha kjuasáya kixin ó kuínhín tí nkehe ntáxrjan. <sup>42</sup> Janhan na ó nòna kixin xráxin tjetinhín tí nkehe ntáxrjan ntá xíkaha ntáxrjan jie kixin tsinhin tí sín tjejóntaxín ntihi ntá tsitekaon sín kixin jaha mé kuétoan k'uinka —mé ichro ch'ín Jesús.

<sup>43</sup> Ntá kjuixin nixja ch'án tíha ntá itsen k'uèya ch'án kixin:

—¿Lázaro, t'axrjéxian méhe! —ichro ch'án.

<sup>44</sup> Ntá tí ch'ín tsík'en k'uaxrjexín ch'án tòye, na tí tja ch'án la ko tí toté ch'án naxa tjejóchróntetoxín ka la ko tí nkayakon ch'án tjejkèxin ijnko ka. Ntá k'uetōan ch'ín Jesús kixin:

—Tjasintankará tí ka chróntetoxín ch'án kixin jina tsji ch'án —ichro ch'án.

### Imó kjuenkayáxin sín kixin nkexrí ts'óyan sín tí ch'ín Jesús

(Mt. 26.1-5; Mr. 14.1-2; Lc. 22.1-2)

<sup>45</sup> Ntá itsjé tí sín judío sákjuífkotoxin sín tí tjan María mé k'uíkon sín tí kjuaxroan kjuasin ch'ín Jesús ntá kuítekaon sín tí jehe ch'án. <sup>46</sup> Kjánchó iso tí jehe sín sákjuítsjehe sín tí sín fariseo kjuíchénka sín tí kjuaxroan tsík-jasin ch'ín Jesús. <sup>47</sup> Ntá tí sín fariseo la ko tí sín nchat'á t'etōan jnkokoá kójnkot-séko sín tí sín antsí t'etōan, la ntá chro sín kixin:

—¿Xá nkexrí chrókjuich'ehe ni tí ch'ín a kixin jehe ch'án mé tjasin ch'án kjuaxroan jié? <sup>48</sup> A ntá tí chrókui-

tōheni ch'án xikahó ntá kaín xín chojni chrókuitekaon sín tí jehe ch'án, ntá tsi tí sín romano t'etōan sinchek'itjáyán sín tí ninkoéni la ko tí xra chóntani la ko tí nación kuènténi —ichro sín.

<sup>49</sup>Ntá ch'ín Caifás mé tí nkexro t'etuenhen tí sín nchat'á tí nánó a ntáche ch'án tí jehe sín kixin:

—Jahará la noahyará ninkehó t'ha <sup>50</sup>la ko kjá ní tjenkayáxinhyará kixin íchá jína kixin jnkokoá chojni chrók'uenyákonhen chjaséni kixin ntá chrók'uitjáyánhya kuenté tí nación kuènténi —ichro ch'án.

<sup>51</sup>Kjánchó ch'ín Caifás la jehya jehó ch'án chrók'uenkayáxin ch'án t'ha. Náhí. Jehe ch'án mé k'uētuenhen tí sín nchat'á tí nánó, a ntá tí Nchakuen Dios kjuínchekónohe ch'án kixin ch'ín Jesús mé ts'enyákonhen tí nación judía. <sup>52</sup>A ntá jehya tí nación kuènte sín ó chrók'uenyákonhen ch'án. Náhí. Kjaxin kixin sinchekaa ch'án kaín tí sín ts'óna xjeen Dios tjejó sín kuenté chjasintajni. <sup>53</sup>A ntá tí yaon a tí sín t'etuenhen tí sín judío mé kjuankíxin sín kjuenkayáxin sín kixin chrók'óyán sín tí ch'ín Jesús.

<sup>54</sup>A ntá ch'ín Jesús la í noxínhya k'uáji tí k'uéjó tí sín judío, na mé k'uaxrjexín ch'án tí estado Judea, sákjuí ch'án chjinaxón nteje, tí tjen ijnko chjasin it'in Efraín. Ntaha kuítōeko ch'án tí sín k'uájiko ch'án.

<sup>55</sup>Ntá í séhya ntá ts'ixin tí kia pascua mé ijnko kié tí sín judío. Ntá it-sjé chojni k'uaxrjexín sín chjasén sín sákjuí sín chjasin Jerusalén kixin ntaha tsoyáxinhin sín kixin tsotjóá sín kjónté naxa xrankíxinhya ts'ixin tí kia pascua. <sup>56</sup>Ntaha k'uájikjeyá sín tí ch'ín Jesús k'uéjóxenhen sín tí ninko jíé ntá kjuanchankíhi sín kichó sín kixin:

—¿Jahará nkechorá? ¿Á chrók'jui ch'án tí kia ní o náhí? —ichro sín.

<sup>57</sup>A ntá tí sín fariseo la ko tí sín t'etuenhen tí sín nchat'á na ó k'uētōan

sín kixin tí sín ijnko nkexro nohe nketí tjen ch'ín Jesús chróchrónka sín kixin ntá jína chrók'juitsé sín ch'án chrók'juinchenteto sín ch'án la ko chrók'juak'echjina sín ch'án.

### Ijnko tjan kjuíncheká tjan aceite xraxé náxrjón toté tí ch'ín Jesús

(Mt. 26.6-13; Mr. 14.3-9)

**12** Naxa t'itjáyán injon yaon ntá ts'ixin tí kia pascua. A ntá ch'ín Jesús sákjuí ch'án chjasin Betania tí tjen ch'ín Lázaro. Tí ch'ín Jesús mé tsíkjinchexechón ch'án. <sup>2</sup>Ntá ntiha kjóne sín ijnko kónjín kjuikosáyehe sín tí ch'ín Jesús. A ntá tí tjan Marta mé kjuíncheyáxin tjan. A ntá tí ch'ín Lázaro la ko í so sín k'uéjó sín kjóneko sín tí ch'ín Jesús. <sup>3</sup>Ntá tjan María kuik'ao tjan it'o litro aceite tsík'óna xroan nardo imá tjehe tsík'enaxín tjan ntá kjuíncheka tjan toté ch'ín Jesús ntá kaxíhi tjan kjuínchexámáxin tjan tí toté ch'án. Na mé kuenté nkaxenhen nchia kókaxraxé tí xroan. <sup>4</sup>Ntá ch'ín Judas Iscariote, it'é ch'án mé it'in Simón, jehe ch'án mé ijnko tí sín k'uájiko ch'ín Jesús, na mé tí ch'ín sinchekji tí ch'ín Jesús chr'éxin, mé ntáchro ch'án kixin:

<sup>5</sup>—¿Nkekuènté kóxihya tí xroan xraxé, chrók'óxiyin iní ciento chichaon denario kixin chrók'juink'itsa tí sín nòà? —ichro ch'án.

<sup>6</sup>Kjánchó ch'ín Judas la jehya ntáchro ch'án xikaha kixin chrók'juikonóhe ch'án tí sín nòà. Náhí. Ntáchro ch'án tíhi kixin xráxin chee ch'án kixin jehe ch'án t'ayakonhen ch'án tí nkehe tjinká chichaon ntá xráxin teé ch'án tí chichaon tsíxrenájín ntiha. <sup>7</sup>Ntá ntáchro ch'ín Jesús kixin:

—Nté t'itōhérá tjan. Tsík'jak'echjina tjan tí xroan a kixin tí yaon tsoxrávána. <sup>8</sup>Tí sín nòà jnkochr'ixín ts'ejokoará sín. A ntá janhan jnkochr'ixínhya ts'ejóni —ichro ch'án.

**Tí sín judío itjo sín nkexrí  
chrók'óyán sín tí ch'ín Lázaro**

<sup>9</sup> A ntá itsjé tí sín judío k'uixikónohe sín kixin ch'ín Jesús kjuák'e ch'án tí chjasin Betania, a ntá sákjuí sín ntiha. Jehya kixin chrókjuitsjehe sín tí ch'ín Jesús ó. Náhi. Kjaxin tjinkaon sín chrókjuitsjehe sín tí ch'ín Lázaro mé tí ch'ín tsíkjinchexechón ch'ín Jesús. <sup>10</sup> Ntá tí sín nchat'á t'etōan mé kójnkotsé sín kjuenkayáxin sín chrók'óyán sín tí ch'ín Lázaro kjaxin <sup>11</sup> kixin itsjé tí sín judío kuítekaon sín tí ch'ín Jesús kixin xikaha kjuínchexechón ch'án tí ch'ín Lázaro ntá k'uaxrjekjanxín sín tí sín nchat'á.

**K'uixenhen ch'ín Jesús  
chjasin Jerusalén**

(Mt. 21.1-11; Mr. 11.1-11; Lc. 19.28-40)

<sup>12</sup> Nchónhya chojni sátsíkji sín chjasin Jerusalén kixin tí kia pascua. A ntá tí yaon chr'éxin k'uixikónohe sín kixin tsjiji ch'ín Jesús tí chjasin ntiha. <sup>13</sup> Ntá kóchrínjin sín chaan ntakajni kjuíxinhin sín ntia itsji ch'ín Jesús, itsje sín, ntáchro sín kixin:

—Tjancheheni Dios kjuasáya. Imá jína tí nkexro kuixin tí kjuachaxiэн It'eni tjen nkaya nkajni. Imá jína tí ch'ín Rey ts'etuenhen tí nación Israel —ichro sín itsje sín.

<sup>14</sup> Ntá tsík'itja ch'ín Jesús ijnko kolócho la ntá kjuák'ekjen ch'án, éxi nixja itén Dios kixin:

<sup>15</sup> Chrakonhyará jahará tjejorá chjasin Jerusalén,

tsjehérá ó tjekui tí ch'ín Rey kuéntará, tjekjen ch'án ijnko kolócho.††

<sup>16</sup> A ntá tió kónhen tíha kíenxínhya tí sín k'uájiko ch'ín Jesús kixin nkekuénté xikaha kónhen. A ntá chr'éxin tió kjuixin sákjuijia ch'án nkaya nkajni ntá xraxinkaon sín kixin xikaha tsíkjin

tí sín k'uéchrónka itén Dios ósé nkexrí tsonhen ch'án, na ntá xikaha chaxín xiteyá tí chrónka sín senó kixin xikaha tsonhen ch'án.

<sup>17</sup> Mé xikaha kaín tí sín tsíkójnkotsé tí kjuák'e ch'ín Jesús tió k'uíyehé ch'án tí ch'ín Lázaro kixin ts'axrxén ch'án tí tòyē tsíkji xravá ch'án ntá xechón ch'án mé tí sín a mé chrónka sín tí nkehe k'uíkon sín. <sup>18</sup> Mé xikaha sákjuíxinhin sín tí ntia tsjixin ch'ín Jesús, k'uixikónohe sín kixin xikaha tsíkjasin ch'ín Jesús tí kjuaxroan jié. <sup>19</sup> Mé xikaha ntáchro tí sín fariseo itjo sín kichó sín kixin:

—Tsjehérá kaín rá, ninkehó tsjachahyani sich'eni kixin kaín xín chojni sákjuíchréhe tí jehe ch'án —ichro sín.

**Iso sín nkivee griego  
tjeyá sín tí ch'ín Jesús**

<sup>20</sup> Iso sín nixja griego k'uéjójákjan tí sín sákjuí sín tí kia chjasin Jerusalén tsoxraxinkakonxín sín Dios.

<sup>21</sup> Ntá kóchjinehe sín tí ch'ín Felipe, chjasén ch'án mé Betsaida, estado Galilea, chrónóehé sín ch'án kixin:

—Tjinkaonni chrók'uikonni tí ch'ín Jesús —ichro sín.

<sup>22</sup> Ntá ch'ín Felipe sákjuíchenka ch'án tí ch'ín Andrés. Na ntá yóí sín sákjuíchenka sín tí ch'ín Jesús. <sup>23</sup> Ntá ntáchro ch'ín Jesús kixin:

—Ó kjuixraká tí yaon, a ntá tí Xjeen Dios K'óna Chojni mé sátsji ch'án ts'áyehé ch'án tí kjuachaxin kuente It'é. <sup>24</sup> A ntá tsotjonkará ijnko nkehe chaxín kixin tí chrókjuítsinkahya ijnko noatrigó tí nche chrók'uénhya tí noa a, ntá jnkokoá noa chrókjuak'e. A ntá tí chrók'uen tí noa a ntá chrók'óna nchónhya noa kixin chrótjá sín. <sup>25</sup> A ntá tí nkexro imá tjuèhe asén

††12:15 Zacarías 9.9

kíxin kohya nkehe chrók'uat sínka na mé tsochóntahya ch'án kjuachón jnkochrín. **A** ntá tí nkexro tjequènhya asén kjónté chrók'uénxin ntihi chjasintajni tí chrónka ch'án itén Dios na mé chr'éxin tsochónta ch'án kjuachón jnkochrín. <sup>26</sup> **A** ntá tí jnkójn nkexro tjinkaon chrókjuich'ena sín xra t'ichjánxin tsochréhe sín tí janhan. **A** ntá tí tjén janhan na mé kjaxin tjejó tí sín ch'ena sín xra. **A** ntá jnkójn sín sich'ena sín xra xíkaha na mé T'aná mé tsjikosáyehe tí jehe sín.

### Ch'ín Jesús chrónka ch'án kíxin its'en ch'án

<sup>27</sup> Ntá jie imá tóxakonhen asenná. ¿Nkehe chróntáxrjan? ¿Á chrókjuáncháha T'aná kíxin sinchekaána ch'án tí nkehe tsona jie o náhí? Kjánchó xra ó k'uinka xíkaha tsona. <sup>28</sup> Jaha It'éni, tjákoxian tí kjuachaxin kuènte ihniá —ichro ch'án.

Ntá kuínhin sín nixja ijnko nkexro nkajní ntáchro kíxin:

—Ó kjuixin kjuákoxian tí kjuachaxin la ko xíkaha xikjákoxian inaá.

<sup>29</sup> **A** ntá tí sín tjejóntaxín tsíkinhin sín mé ntáchro sín kíxin kjónta, la ko í so sín ntáchro sín kíxin:

—Ijnko ch'ín ángel nixjehe ch'án —ichro sín.

<sup>30</sup> Kjánchó ntáchro ch'ín Jesús kíxin:

—Náhí. Jehya kíxin janhan tí jie chrókujinhan tí nixja ch'án. Náhí. Nixja ch'án kíxin tsinhínrá jahará. <sup>31</sup> Ntá jie tsitoexín tí ijje chojni chjasintajni na mé tí nkexro t'etōan chjasintajni mé ts'axrjehe ch'án tí xra t'etōan ch'án. <sup>32</sup> **A** ntá tió tsjak'énkania ijnko ntacruz ntá nchónhya sín ts'ikon sín ntá tsitekaon sín tí janhan —ichro ch'án.

<sup>33</sup> Mé xíkaha chrónkaxín ch'án kíxin nkexrí ts'enxín ch'án. <sup>34</sup> **A** ntá kjuátehe tí sín ntiha ntáchro sín kíxin:

—Kuínhinni nchekuáxin sín tí xroon tsíkjin sín ósé chrónka kíxin Cristo la jnkochrín tsjak'e ch'án. ¿Ntá nkekuènté ntáchrúa kíxin tí Xjeen Dios K'óna Chojni t'ichjánxin tsjak'enkáni ch'án ijnko ntacruz? ¿Xá nkexéhe tí Xjeen Dios K'óna Chojni? —ichro sín.

<sup>35</sup> Ntá ntáchro ch'ín Jesús kíxin:

—Naxa tjen tí xrohi tjejókoará, kjánchó í séhya tsjak'e. Chrók'uajirá tí naxa tjen ti xrohi t'inkaséyanxín ntia. **A** ntá náhi la ó ts'ixin tie. **A** ntá tí sín ixri tí sítié a mé noehya sín nketí sátsji sín. <sup>36</sup> Títekaonrá tí xrohi tí naxa tjen t'inkaséyan kíxin mé ts'onará chojni kuènte t'inkaséyan —ichro ch'án.

Ntá kjuixin chrónka ch'ín Jesús tíha ntá sákjuí ch'án kjuák'eméhe ch'án tí jehe sín.

### Tí sín judío kuítekakonhya sín tí ch'ín Jesús

<sup>37</sup> K'uékjasin ch'ín Jesús nchónhya kjuaxroan jíé k'uíkonxín kon sín ntá kjónté kuítekakuenhya sín ch'án <sup>38</sup> kíxin mé xíkaha tsoxiteyá tí nkehe tsintáchro ch'ín Isaías tsíkjin ch'án ósé kíxin: Ínchéni, kohya nkexro kuítekaon tí nkehe chrónkani.

Kohya nkexro kjuínchenohe Dios tí kjuachaxin jíé kuènte ch'án.<sup>¶¶</sup>

<sup>39</sup> Méxra kuítekakuenhya sín tí ch'ín Jesús éxi tsíkjin ch'ín Isaías kjaxin kíxin:

<sup>40</sup> Dios kjuínchek'ikonhya ch'án sín la ko kjuínchecha ch'án asén sín,

kíxin ntá chrók'uikonhya sín,

la ko chrókienxínhya sín,

kíxin ntá chrókóchjinehya sín tí janhan kíxin chrókjuíntakitōha sín jína.<sup>§§</sup>

<sup>41</sup> Xíkaha k'uéchrónka ch'ín Isaías

¶¶12:38 Isaías 53.1

§§12:40 Isaías 6.10

imá ósé kixin k'uek'ikon ch'án tí kjuachaxin jié kuènte Jesús ntá k'uechrónka ch'án nkexrí tsjak'e tí ch'ín Jesús.

<sup>42</sup> Kjánchó itsjé tí sín judío t'etóan kuítekaon sín tí ch'ín Jesús kjánchó noxínhya chrónka sín. Chrakonhen sín tí sín fariseo kixin chrókónínkaon sín la í chrókjuanjonyha sín kjuachaxin chrók'uixenhen sín tí nínkoe sín judío. <sup>43</sup> Mé xíkaha imá kóxrjínhin sín kixin chojni chjasintajni chrókjuikosáyehe sín ntá kánhyó kjueyá sín kixin chrókjuikosáyehe sín Dios.

### Tí nkehe ntáchro ch'ín Jesús mé tsitoexixin ijié chojni

<sup>44</sup> Ntá itsen nixja ch'ín Jesús ntáchro ch'án kixin:

—Tí titekáonrá tí janhan na mé jehya janhván titekáonrá na mé kjaxin titekáonrá T'aná, mé tí nkexro k'uetuanna k'uinka. <sup>45</sup> Éxí tí t'ikonrá tí janhan mé xíkaha t'ikonrá tí nkexro k'uetuanna k'uinka. <sup>46</sup> A ntá janhan mé xrohi k'uinka chjasintajni kixin tí sín titekaon sín tí janhan ts'ejóhya sín tí sítié a. <sup>47</sup> A ntá tí jnkojínrá tinhínrá tí nkehe xrjanka ntá titekákonnahyará la jehya janhan sintakjasótiará kixin jehya kixin k'uinka sintakjasóte chojni chjasintajni. Náhí. K'uinka kixin sintakaá chojni. <sup>48</sup> A ntá tí titekáonhyará tí janhan la ko titekáonhyará tí tan kuèntana la ó síin nkexrí tsitoexixin ijiará, na mé éxí tí tan xrjanka mé Dios sinchekitoexín ijiará tí yaon tsjixixín chjasintajni. <sup>49</sup> Jehya tí nkehe kuèntana tjéxrjanka. Náhí. T'aná na mé tí nkexro k'uetuanna k'uinka mé k'uetuanna nkehe tsoxrjanka la ko nkehe tsjàkua. <sup>50</sup> A ntá nòna kixin tí nkehe k'uetóan T'aná mé xranjonxín tí kjuachón jnkochríxín. Mé xíkaha tí nkehe ntáxrjan mé tjéxrjanka kixin T'aná mé k'uetuanna.

### Ch'ín Jesús kjuínchek'ònti ch'án toté tí sín k'uájiko ch'án

**13** A ntá tí yaon xíka tí ntóye tsjasin sín tí kia pascua. A ntá ch'ín Jesús ó nohe ch'án kixin ó kjuixraká tí hora tsítóhe ch'án chjasintajni sát-sjichréhe ch'án It'é ch'án. Xráxín tjuèhé ch'án tí sín kuènte ch'án chjasintajni, a ntá jie tsjakoxin ch'án kixin imá tjuèhe ch'án tí jehe sín.

<sup>2</sup> A ntá tí ch'ín Tsochren tsík'etuenhen asén ch'ín Judas Iscariote, it'é mé it'in Simón, kixin sinchekji ch'án tí ch'ín Jesús. <sup>3</sup> Ntá ch'ín Jesús la ó nohe ch'án kixin tsíkixín ch'án tí tjen Dios la ko xikjan ch'án sátsjichréhe ch'án Dios inaá. La ko ó nohe ch'án kixin It'é ch'án tsíkjanjon kjuachaxin ts'etuenhen ch'án kaín xín nkehe. <sup>4</sup> Ntá naxa tjejóne sín ntá k'uínkatjen ch'ín Jesús kuakit-sje ch'án tí ka titsáte ch'án la kuákja ch'án ijnko ka xámáxin chojni t'ónti k'uínkat'óxin ch'án. <sup>5</sup> Ntá kuíkja ch'án ijnko nkehe ntá, ntá kjuankixin ch'án kjuínchek'ònti ch'án toté jnkojnko tí sín k'uájiko ch'án la ko kjuínchexámáxin ch'án tí ka k'uínkat'óxin ch'án.

<sup>6</sup> Na ntá tió kjujixraká tí tjen ch'ín Pedro, a ntá ntáchro ch'ín Pedro kixin:

—Jaha Ìnchéni la, ¿nkekuènté chrókjuínchek'óntia toténi? —ichro ch'án.

<sup>7</sup> Ntá kjuátehe ch'ín Jesús ntáchro ch'án kixin:

—Jaha la naxa tiénxinhya tí nkehe tjét'a janhan. Chr'éxin ntá tsiénxian nkekuènté tjét'a tíha —ichro ch'án.

<sup>8</sup> Ntá ntáchro ch'ín Pedro kixin:

—Jaha la sinchek'óntihya toténi —ichro ch'án.

Ntá ntáchro ch'ín Jesús kixin:

—Tí sintak'óntihya tí jaha la kjá ninkehó tsochontahya tí janhan —ichro ch'án.



<sup>9</sup>Ntá kjuátehe ch'ín Simón Pedro ntáchro ch'án kixin:

—Náhi, Ìnchéni. Jehya tí toténi ó chrókjuinček'óntia. Kjaxin itjani la ko ikjani chrókjuinček'óntia —ichro ch'án.

<sup>10</sup>Ntá ntáchro ch'ín Jesús ínaá kixin:

—Tí sín tsíkjin sín tsík'ónti la t'ichjánx-inhya kuenté sín ts'ónti sín ínaá. Náhi. Jehó toté sín ó mé t'ichjánxin naxa ts'ónti kixin kuenté la ó tjóá. A ntá jahará la ó tjóará, kjónté kénhyará —ichro ch'án.

<sup>11</sup>Mé xikaha ntáchro ch'ín Jesús kixin kénhya sín tjóá sín kixin ó nohe ch'án nkexro sinčekji ch'án.

<sup>12</sup>Ntá tió kjuixin kjuinček'ónti ch'án toté sín kaín sín ntá xík'inkáya ch'án ínaá tí ka kuítsáte ch'án ntá kjuák'et-jaxin ch'án tí k'uínkatjénxin ch'án. Ntá ntáchro ch'án kixin:

—¿Á kiénxinrá tí nkehe kjuít'a?

<sup>13</sup>Jahará la ntáchrórá kixin janhan Maestro kuéntará la ko Ìnchárá. Chaxín ntoá ntáchrórá kixin janhan tíha. <sup>14</sup>Janhan tí Maestro kuéntará la ko ìnchárá kjuintak'óntia totará. A ntá jahará kjaxin xikaha chrókjuinček'óntirá toté kíchuará.

<sup>15</sup>Janhan mé kjuákoxian kixin xikaha chrókjuich'erá éxi kjuít'a janhan.

<sup>16</sup>Ijnko nkehe chaxín tsotjonkará kixin tí sín ch'exón xra mé t'etoanhya sín éxi t'etoan tí lámoe sín, la ko tí sín k'uáyéhe sín injko xra t'etoanhya sín éxi t'etoan tí sín kjuanjon tí xra a. <sup>17</sup>Tí chrókiénxinrá nkehe tíha la ko chrókjuinček'iteyará la chrókócháhará má.

<sup>18</sup>Jehya kaín rá xikaha ntáxrjan. Ó nòna kixin nkexro kjuéyá janhan. Kjánchó t'ichjánxin tsoxiteyá tí nkehe tsíkjin sín ósé ntáchro kixin: “Ijnko nkexro tjénekan mé tsjanjonkian.”\*

<sup>19</sup>Mé xikaha tjétjonkará senó kixin tió

ts'atsínka tíha ntá tsítekáonrá kixin janhan mé tí nkexro xráxín tjen. <sup>20</sup>Ijnko nkehe tjetoan tjétjonkará kixin tí tsjánjonrá kjuachaxin tsitohe tí chojni ichr'an janhan, mé éxi yóhe chrókjuánjonrá kjuachaxin chrókuitohe tí janhan, a ntá tí tsjánjonrá kjuachaxin tsitona janhan mé éxi yóhe chrókjuánjonrá kjuachaxin chrókuitohe tí nkexro k'uetuanna k'uinka —ichro ch'ín Jesús.

### Ch'ín Jesús chrónka kixin ch'ín Judas sinčekji ch'án

(Mt. 26.20-25; Mr.

14.17-21; Lc. 22.21-23)

<sup>21</sup>Ntá kjuixin chrónka ch'ín Jesús tíha, ntá kóxakonhen asén ch'án má ntá ntoá chrónka ch'án kixin:

—Ijnko nkehe tjetoan tsotjonkará kixin jnkojínrá tjejorá ntihi mé sinčekjiráni —ichro ch'án.

<sup>22</sup>Ntá tí sín k'uájiko ch'án kjuanjxin komáxin la ko í komáxin kíchó sín kixin noehya sín nkexro tí ntáchro ch'án. <sup>23</sup>A ntá injko ch'ín k'uájiko ch'ín Jesús imá tjuèhe ch'án itjen ch'án chjinaxón tí tjen ch'ín Jesús tjejóne sín. <sup>24</sup>Ntá ch'ín Simón Pedro kjuakoexín seña k'uetuhen ch'án tí í jnko ch'ín a kixin:

—Tjanchankíhí ch'án nkexro tíha —ichro ch'án.

<sup>25</sup>A ntá tí ch'ín a na mé antsí kóchjinehe ch'án tí ch'ín Jesús, ntá kjuanchankí ch'án ntáchro ch'án kixin:

—Ìnchéni, ¿nkexro tíha? —ichro ch'án.

<sup>26</sup>A ntá kjuátehe ch'ín Jesús ntáche ch'án tí ch'ín a kixin:

—Sintakjata it'o niotja, a ntá tí nkexro tsotjahá tí t'o niotja a mé tí nkexro a —ichro ch'án.

A ntá mé xikaha kjuinčekjata ch'ín Jesús it'o niotja ntá chjéhe ch'án tí ch'ín Judas Iscariote, it'é ch'án mé it'ín

\* 13:18 Salmo 41.9

Simón. <sup>27</sup>Ntá k'uáyéhe ch'án tí niotja ntá tuénxín k'uixenhen asén ch'án tí ch'ín Tsochren. Ntá ntáche ch'ín Jesús tí jehe ch'án kixin:

—Tí xrá tjinakávan s̄ich'e la jaí tóxakonhan —ichro ch'án.

<sup>28</sup>Kjánchó nijnko tí sín tjejóne ntiha kienxínhya sín nkekuénté xikaha ntáchro ch'án. <sup>29</sup>Ch'ín Judas la t'ayakonhen ch'án tí nkehe tjinaká chichaon ntá iso sín kjuenkayáxin sín kixin ách'e ch'ín Jesús mé k'uetuēnhen ch'án tí ch'ín Judas kixin ichrén nkehe sátsjik'ena ch'án kuēnte tí kia a, o ách'e ichrén nkehe sinchekitonhen ch'án tí sín nò a. <sup>30</sup>Ntá k'uáyéhe ch'ín Judas tí niotja, a ntá k'uaxrjéxin ch'án ntiha. A ntá ó k'uixín tie.

### Ijnko nkehe nixin k'uetōan ch'ín Jesús

<sup>31</sup>A ntá ó kjuixín sátsikji ch'ín Judas, ntá ntáchro ch'ín Jesús kixin:

—A ntá jie tsonoxín tí kjuachaxín jié kuēnte tí Xjeen Dios K'óna Chojni la ko tsjakoxín ch'án tí kjuachaxín jié kuēnte Dios. <sup>32</sup>Na mé xikaha tí Xjeen Dios K'óna Chojni mé tsjakoxín tí kjuachaxín jié kuēnte Dios. A ntá Dios mé tsjakoxín ch'án tí kjuachaxín kuēnte Xjeen ch'án la tjoka tsoxiteyá. <sup>33</sup>Xjeenni, í séhya naxa tsjak'é janhan ts'ejókoará ntihi. Ntá jahará mé ts'ajikjéyará tí janhan. Ntá éxi yóhe k'uetjanka tí sín judío mé tjonkará kjaxinrá kixin: Ninkexró xitjahya tsjiji sín tí sátsjiyá janhan.† <sup>34</sup>Ijnko nkehe nixin tétuanhanrá ijie kixin chrótjuèhérá kichuára éxi yóhe tjuahará mé xikaha chrótjuèhérá kichuára. <sup>35</sup>Tí tsotjuèhérá kichuára ntá tsonoexín káin xín chojni síin chjasintajni kixin tinkachónkirá tí janhan —ichro ch'án.

### Chrónka ch'ín Jesús kixin ch'ín Pedro sinchemá ch'án kixin chónhya ch'án tí jehe ch'án

(Mt. 26.31-35; Mr.  
14.27-31; Lc. 22.31-34)

<sup>36</sup>Ntá kjuanchankíhi ch'ín Simón Pedro tí ch'ín Jesús kixin:

—Ínchéni, ¿nketí sátsjia? —ichro ch'án.

Ntá kjuátehe ch'ín Jesús ntáchro ch'án kixin:

—Tí nó sátsjiyá xitjahya tsochréhérá jaí. Ntá chr'éxin tsjasánchréhérá ntiha —ichro ch'án.

<sup>37</sup>A ntá ntáchro ch'ín Pedro kixin:

—¿Nkekuénté xitjahya tsochráha tí jaha jaí? Kjonté chrók'ueyákonhán —ichro ch'án.

<sup>38</sup>Ntá kjuátehe ch'ín Jesús ntáchro ch'án kixin:

—¿Á chaxín ts'enyákòna jaha? Ijnko nkehe chaxín tsotjonka kixin naxa tsotsjehya tí kochíntōa la ó tsjixin sinchemána níya kixin chonhyana, tsixrua.

### Jesús mé ntja sátsjixinni tí tjen It'eni tjen nkaya nkajní

**14**†Tóxakuanhyará jahará. Títekáonrá Dios la ko kjaxín títekáonrá tí janhan. <sup>2</sup>Ntōe T'aná nchónhya nchia síin ts'ejóni. A ntá tí xikahya chrók'uixin la xikahya chrótjonkará. Méxra sátsjiyá sintayóxian tí chrók'uejóni. <sup>3</sup>A ntá tí sátsjiyá sintayóxian, ntá tió tsjixin ntá ts'inka inaá, ntá sátsjini kixin jahará kjaxín chrók'uejorá ntiha tí tsjak'é janhan. <sup>4</sup>Jahará la ó nohará nketí sátsjiyá la ko ó nohará tí ntja a —ichro ch'án.

<sup>5</sup>Ntá kjuátehe ch'ín Tomás ntáchro ch'án kixin:

†13:33 Juan 7.33

—Ìnchéni, noehyani nketí sátsjia jaha. ¿A ntá nkexrí chrókónoheni tí ntĩa a? —ichro ch'án.

<sup>6</sup>Ntá kjuátēhe ch'ín Jesús ntáchro ch'án kixin:

—Janhan mé tí ntĩa la ko janhan mé tí tan chaxín la ko janhan mé tsjánjuan tí kjuachón. Jehó tí nkexro tsitekaon tí janhan mé jína tsjiji tí tjen T'aná. <sup>7</sup>Tí chrókjuátsoanrá tí janhan ntá xíkaha chrókjuátsoanrá T'aná kjaxin. Na ntá ó choxínrá ch'án jie la ko ó tjejókomará ch'án —ichro ch'án.

<sup>8</sup>Ntá ntáchro ch'ín Felipe kixin:

—Ìnchéni, tjtóhéni kixin tsochóxinni It'á. Táho mé tjinkaonni —ichro ch'án.

<sup>9</sup>Ntá kjuátēhe ch'ín Jesús ntáchro ch'án kixin:

—Felipe, ósé tjejóni, ¿a ntá naxa tjátsoanhya tí janhan ní? A ntá xíkaha tí t'ikonrá tí janhan na mé xíkaha chrók'uíkonrá T'aná. ¿Nkekuènté tjanchàna kixin chrókuiítóha chrók'uíkonrá tí T'aná? <sup>10</sup>¿Á títékákonhya jaha kixin janhan jnkokoá tjékian T'aná, la ko T'aná tjen tí tjén janhan? Tí nkehe níxja janhan la jehya kuèntana. Náhí. T'aná tjékian janhan mé tjech'e ch'án tí xra kuènte ch'án.

<sup>11</sup>Títékáonrá kixin jnkokoá tjékian T'aná, a ntá T'aná itjen tí tjén janhan. Kjónté kuítékákonhyará xíkaha la chrókuítékáonrá kixin tí kjuaxroan jié kjuákoxiā k'uíkonrá. <sup>12</sup>Ijngo nkehe chaxín tjonkará kixin tí chaxín tsítékáonrá tí janhan ntá kjaxinrá tsjachará sích'erá xra yóhe tjét'a la ko kjaxin ixra antsí jié tsjachará sích'erá kixin janhan la ó sátsjiyá tí tjen T'aná. <sup>13</sup>Kaín nkehe tsjanchatóxixínrá tí njina na mé tsjánjuan kixin xíkaha tsjákoxiān tí kjuachaxin kuènte T'aná. <sup>14</sup>Tí chrén nkehe tsjanchatóxixínrá njina la janhan la tsjánjuan.

### Ch'ín Jesús chrónka ch'án kixin chaxín tsochr'án ch'án tí Nchakuen Dios

<sup>15</sup>Tí chaxín tjuèhéra tí janhan ntá chrókjuínchexiteyéhéra tí nkehe kuétuanhanrá. <sup>16</sup>Ntá tsoxrjannóaha T'aná kixin tsochr'án ch'án Nchakuen ch'án kixin tsjinkitsa tí jahará la ko sinchexéhe asánrá la mé ts'ejokoará jnkochr'ín. <sup>17</sup>Jehe ch'án mé Nchakuen chaxín. Tí sín chjasintajni xitjahya ts'áyéhe sín ch'án kixin t'ikonhya sín ch'án la ko chónhya sín ch'án. Kjánchó jahará ó choxínrá ch'án kixin tjejokoará ch'án la ko ts'ejokoará ch'án jnkochr'ín. <sup>18</sup>Janhan na tsitoáhyará nòerá jahórá, na mé tsokjan inaá kixin ts'ejóni. <sup>19</sup>A ntá séhya ntá tí sín chjasintajni ts'ikonhya sín tí janhan inaá. Kjánchó jahará mé ts'ikonrá tí janhan. Ntá kjaxinrá ts'ejochónrá kixin janhan na tjéchuān. <sup>20</sup>A ntá tí yaon a chrókónohará kixin T'aná la ko janhan jnkokoá tjékian la ko kjaxin jahará la ko janhan jnkokoá tjejóni. <sup>21</sup>Tí nkexro nohe tí nkehe tétōan la ko sinchexiteyéhe sín mé xíkaha tsjákoxiān sín kixin chaxín tjuèhe sín tí janhan. A ntá tí tjuèhe sín tí janhan ntá T'aná mé tsotjuèhe tí jehe sín la ko kjaxin janhan tsotjuahā sín la ko tsjákoxiān nkexrí tjén janhan —ichro ch'ín Jesús.

<sup>22</sup>A ntá tí ch'ín Judas, jehya tí ch'ín Iscariote tíha, na mé kjuanchankí ch'án kixin:

—Ìnchéni, ¿nkekuènté jehóni tjákoxiān, a ntá tjákoéinhya tí chojni chjasintajni? —ichro ch'án.

<sup>23</sup>Ntá kjuátēhe ch'ín Jesús ntáchro ch'án kixin:

—Tí nkexro tjuèhe tí janhan mé sinchexiteyéhe tí nkehe tétōan. La ko T'aná mé tsotjuèhe tí jehe sín la ntá T'aná la ko janhan ts'ejókoni sín. <sup>24</sup>A ntá tí sín tjuèhya tí janhan la mé nchex-

iteyèhya sín tí nkehe tjàkua. **A** ntá tí nkehe tjàkua tjejotinhínra la jehya kuèntana. Náhí. Kuènte T'aná tí nkexro k'uetuanna k'uinka.

<sup>25</sup> Naxa tjejóni la tjétjonkará kaín tíhi.

<sup>26</sup> **A** ntá Nchakuen T'aná tsochr'án ch'án kjuachaxin nina mé tsjinkítsa tí jahará la ko sinchechéhe asánra la ko tsjakohará kaín nkehe la ko sinchexraxinkaonrá kaín nkehe xrjanka.

<sup>27</sup> Kjuaxróxin tsitohá la ko kjuaxróxin kuèntana tsotjahará. Jehya éxí tí kjuaxróxin chrókjuanjon tí sín chjasintajni. Náhí. Chrókóxakuenhya asánra la ko chróchrakonhyará. <sup>28</sup> Ó kuínhínra ntáxrjan kixin sátsjiyá la ko tsokjan janhan ts'ejóni inaá. Tí chaxín tjuèhéra tí janhan ntá chrókócháhará tí kuínhínra kixin sátsjiyá tí tjen T'aná kixin antsí t'etóan ch'án la kánhyó tétóan janhan. <sup>29</sup> Senó tjétjonkará tíhi kixin tió tsonhen tíha la ts'ikonrá ntá tsítekáonrá jahará.

<sup>30</sup> Ntá jie la í séhya tsonixjahará kixin tí jie itsi tí ch'ín Tsochren, mé tí nkexro t'etuenhen tí sín chjasintajni. **A** ntá jehe ch'án la ninkehó t'etuannahya tí janhan.

<sup>31</sup> Kjánchó t'ichjánxin kixin xikaha tsonhen ntá tí sín chjasintajni mé tsonohe sín kixin tjuaha T'aná la ko nchexiteyáha tí nkehe k'uetuanna ch'án. Ntá jie t'inkatjenrá sátsjixínni ntihi.

**Tí nta t'óna to uva la ko tí chaan nta**

**15** 'Janhan mé éxí yóhe ijnko ntanòna tjechón itsa to uva la ko T'aná mé éxí yóhe tí nkexro t'ayakonhen tí nta a. <sup>2</sup> Tsochrínjin ch'án tí chaan nta t'ónahya to. **A** ntá tí chaan nta t'óna to mé nchetjuák'á ch'án kixin ntá ts'óna antsí má tsjé to. <sup>3</sup> **A** ntá jahará la kótjuáxinrá tí tanná k'uétjonkará senó. <sup>4</sup> Tí tsitohéhyará tí janhan ntá kjaxin janhan tsitoháhya tí jahará. Mé xikaha ijnko chaan nta ts'axrjentehe tsjachahya jehó ts'óna to, la ko

xikaha jahóra tsjachahyará sich'erá tí xra kuèntana tí tsitohéra tí janhan.

<sup>5</sup> 'Janhan na mé yóhe tí ntanòna, **a** ntá jahará la tí chaan tí ntanòna tsík'ayanta. Tí nkexro jnkokoá tjenkayáxinkian mé tsjacha ts'óna nchónhya to. **A** ntá tí tsinkáchónkihya sín tí janhan la ninkehó xra tsjachahya sín sich'e sín. <sup>6</sup> **A** ntá tí nkexro jnkokoáhya tjenkayáxinkian na mé éxí yóhe tí nta ch'ehya xra tsíkóchrínjin sín tsík'itjí sín chrínta tí nonte a tsoxámá ntá tsoxrejo ntá tsoche.

<sup>7</sup> Ntá tí chaxín tsitohéhyará tsinkachónkirá tí janhan la ko ts'itjáyanhyará tí nkehe kjuákohará ntá tsjanchiará ichrén nkehe tjinkáonrá la ts'ayéhéra. <sup>8</sup> **A** ntá T'aná la tsochéhe ch'án tí ts'ónará itsjé to. Mé xikaha tsjácoxínra kixin tinkachónkirá tí janhan. <sup>9</sup> Janhan tjuahará tí jahará éxí tjuana T'aná. Chrókónohará kixin tjuahará. <sup>10</sup> Tí tsítekáonrá tí nkehe kuétuānhanrá ntá tsonohará kixin tjuahará éxí yóhe kjaxin janhan ntaxiteyá tí nkehe k'uetuanna T'aná ntá kónòna janhan kixin tjuana ch'án.

<sup>11</sup> Mé xikaha tjonkará kaín tíha kixin ntá éxí chana mé xikaha tsjintaxín tsochéhe asánra. <sup>12</sup> Tí nkehe kuétuānhanrá la mé tíhi kixin chrótjuèhéra kichuára éxí tjuahará xikaha. <sup>13</sup> Ninkexró chrókóyóhe éxí tí nkexro imá tjuèhe tí sín chóxin ch'án ntá ts'enyákonhen ch'án tí jehe sín. <sup>14</sup> Jahará la chojni choxian tí tsítekáonrá tí nkehe tétuānhanrá. <sup>15</sup> Ntáxrjanhya janhan kixin jahará chojni ch'exón xra kixin tí chojni xikaha ch'exón xra mé noehya sín nkehe tí xra ch'e tí lámoe sín a. Náhí. **A** ntá jahará la chojni choxian kixin kaín xín nkehe kjuakona T'aná mé kjuákohará. <sup>16</sup> Jehya kixin jahará kjuéyará tí janhan. Náhí. Janhan mé kjuéyá tí jahará kixin tsotjahará xra, **a** ntá éxí yóhe to xé mé chrók'uaxrje jina tí xra

sich'endará kixin chrók'uitjáyanhya. A ntá T'aná mé tsotjáhará ch'án kaín xín nkehe tsjanhexínrá nina. <sup>17</sup> Mé xikaha tétuanhanrá kixin tsotjuèhérá kichuárá.

**Tí sín chjasintajni nínkakonhen  
sín tí ch'ín Jesús la ko tí  
sín tinkáchónki ch'án**

<sup>18</sup> Tí tsonínkakonhanrá tí chojni chjasintajni ntá chrókónohará kixin senó janhan nínkakonna sín. <sup>19</sup> Tí chrókókuèntará chjasintajni ntá tí sín chjasintajni chrótuàhárá sín kixin naxa kjéhyará sín. Kjánchó janhan kjuéyá tí jahará kixin chrók'uaxrjékjanxínrá tí sín sín chjasintajni. A ntá tí sín chjasintajni nínkakonhanrá sín kixin jahará jahará kuèntará chjasintajni. <sup>20</sup> Xráxinkáonrá tí nkehe tsítjonkará kixin tí sín ch'ehe lámoe sín xra tjetóxinhya ts'etóan sín. <sup>21</sup> Éxí yóhe chónklna sín mé xikaha tsochónkíhi sín tí jahará. A ntá tí kuítekaon sín tí nkehe kjuákoha sín ntá kjaxin tsitekaon sín tí nkehe naxa tsjákohérá sín. <sup>21</sup> Mé xikaha sit'ahará sín kixin jahará tinkáchónkirá tí janhan la ko jehe sín chónhya sín tí nkexro ichr'ánna k'uinka ntihi.

<sup>22</sup> Tí chrók'uinkahya janhan ntihi chrónixjahya sín ntá chrókuamáhya sín jie. Ntá jie kohya nkerí tsaáxin sín kixin tí jie tinkákjasin sín. <sup>23</sup> Tí sín nínkakonna mé xikaha nínkakonhen sín T'aná. <sup>24</sup> Chróchóntahya sín jie tí chrók'uejókianhya sín ntihi chrókuás-inhya janhan kjuaxroan jie éxí tsíkjas-inhya ninkexró senó. Ntá jie ó k'uíkon sín kaín tí kjuaxroan, a ntá kjónté nínkakonna sín tí janhan la ko nínkakonhen sín T'aná kjaxin. <sup>25</sup> Mé xikaha tsonhen kaín tíha kixin ntá tsoxiteyá tí nkehe ntáchro tí ley kuènte sín kixin: “Kohya jie kjuásian janhan ntá kjónté

kónínkakonna sín.”<sup>26</sup> A ntá tsi tí nkexro tsjinkítsa la ko sinchechéhe asánrá. Tíha mé tí Nchakuen Dios chaxín. Janhan mé tsochr'an ch'án kixin tí kjuachaxin kuènte T'aná. A ntá jehe ch'án mé tsochrónka nkexrí tjén janhan <sup>27</sup> la ko jahará kjaxinrá tsochrónkará nkexrí tjén janhan kixin tí xrankíxixín la k'uéjóni jnkokoá.

**16** Kaín tíhi tjetjonkará kixin chrókuítoéhyará tí nkehe kjuákohárá. <sup>2</sup> Tí sín judío tsjanjonhya sín kjuachaxin ts'ixenhenrá nínkoé sín la ko tsjixraká tí yaon kixin tí sín ts'óyán sín tí jahará tsontáchro sín kixin xikaha mé tjejóch'e sín xra kuènte Dios, tsixro sín. <sup>3</sup> Mé xikaha sich'e sín kixin chónhya sín T'aná la ko chónhyana sín. <sup>4</sup> A ntá tjonkará kaín tíhi kixin tió tsjixraká tí yaon xikaha tsonhen ntá tsoxráxinkáonrá kixin ó k'uétjonkará senó a.

**Tí xra ch'e Nchakuen Dios**

Tí xrankíxixín k'uétjonkahyará tíhi kixin jnkokoá k'uék'ejóni. <sup>5</sup> Ntá jie sátsjiyá tí tjen tí nkexro ichr'ánna k'uinka. Kjánchó nijnkorá tjanchankíhyará nketí sátsjiyá. <sup>6</sup> Ntá kjuixin tjonkará tíha ntá imá t'avará kixin kuínhínrá xikaha xrajanka. <sup>7</sup> A ntá chaxín tí nkehe tjetjonkará kixin íchá jína sátsjiyá kixin jahará jína chrók'uejorá. A ntá tí sáchrókjuíhya ntá chrókuihya tí nkexro tsjinkítsará. A ntá tí sátsjiyá janhan ntá tsétoan kixin itsi ch'án ntihi. <sup>8</sup> A ntá tió tsi ch'án mé sinchexraxinkaon ch'án tí chojni chjasintajni kixin jehe sín mé tjasin sín jie, la ko itjen ijnko ntia ntoá chrókuakja sín la ko Dios mé sinchekitoxín tí jie kjuasin sín. <sup>9</sup> Xikaha chóntha sín jie kixin tinkáchónkihya sín tí janhan. <sup>10</sup> A ntá tsonhe sín kixin itjen tí ntia ntoá kixin

<sup>15:20</sup> Juan 13.16

<sup>15:25</sup> Salmo 35.19; 69.4

sátsjiyá tí tjen T'aná ntá ts'ikonhyará tí janhan ínaá, <sup>11</sup> la ko tsonohe sín kixin Dios sinchekitoexín ijie kixin ó kjuixin kuítóexín ijie tí nkexro t'etōan chjasintajni kixin tsjasóte.

<sup>12</sup> Naxa chonta janhan itsjé nkehe chrótjonkará, kjánchó chrókjuachahyará chrókiénxinrá jie. <sup>13</sup> A ntá tió tsi tí Nchakuen Dios chaxín ntoá ntá jehe tí Nchakuen Dios mé tsjakohará ch'án kaín xín nkehe ntoá. Méxra jehya tí nkehe kuènte ch'án tsochronka ch'án na mé tí nkehe tsinhin ch'án mé tsochronka ch'án tsjakohará ch'án tí nkehe tsonhen chr'éxin. <sup>14</sup> Jehe ch'án mé tsjikosàyana ch'án kixin ts'áyéhe ch'án tí nkehe kuèntana ntá tsjakohará ch'án nkehe tíha. <sup>15</sup> Kaínxín nkehe chóna T'aná na mé kuèntana. Mé xikaha ntáxrjan kixin tí Nchakuen Dios chaxín ntoá mé ts'áyéhe ch'án tí nkehe kuèntana ntá tsjakohará ch'án nkehe tíha.

**Senó ts'avá sín ntá  
chr'éxin tsochéhe sín**

<sup>16</sup> Ntá í séhya la í ts'ikonhyará tí janhan. La ko kjaxin séhya xik'ikonrá tí janhan ínaá kixin sátsjiyá tí tjen T'aná —ichro ch'án.

<sup>17</sup> Ntá iso tí sín k'uájiko ch'án mé kjuanchankíhi sín kichó sín kixin:

—¿Nkexrí t'axrjéxin tí nkehe ntáchro ch'án kixin í séhya ts'ikonhyani ch'án la ko kjaxin séhya ntá xik'ikonni ch'án ínaá kixin sátsji ch'án tí tjen It'é ch'án? <sup>18</sup> ¿Nkexrí t'axrjéxin tí ntáchro ch'án kixin “í séhya”? Méxra tienxínhya nkehe tí ntáchro ch'án —ichro sín.

<sup>19</sup> Ntá kónohe ch'ín Jesús tí nkehe chrókjuanchankíhi sín ch'án ntá ntáche ch'án sín kixin:

—Xikaha tjonkará kixin í séhya ts'ikonhyará tí janhan la ko kjaxin séhya xik'ikonrá tí janhan ínaá. ¿Á tíha mé tjeotjanchankíhírá kichuárá ní?

<sup>20</sup> Tjéttjonkará ijnko nkehe chaxín kixin imá tsotsjankará la ko ts'avará. A ntá tí chojni chjasintajni la tsochéhe sín. A ntá jahará ts'avará la ko sintaníhará kjónté chr'éxin tsocháhará má. <sup>21</sup> Éxí yóhe ijnko tjan sinchekokjíhi tjan xjeen tjan mé imá tóxakonhen tjan kixin ó kjuixraká tsjoté tjan. A ntá tsjixin tsokjíhi xjan ntá í xraxinkakonhya tjan nkexrí kjoté tjan kixin chéhe tjan kokjíhi ijnko xjan ntihi chjasintajni. <sup>22</sup> Mé xikaha jahará ijie t'avará. Ntá xik'íkuan tí jahará ínaá ntá imá tsochéhe asánrá la ko tsokohya ninkexró tsakitsajahará tí kjuachéhe tsochontará.

<sup>23</sup> Tió tsi tí yaon a ntá tsjanchankí-nahyará ninkehó. Chaxín tí nkehe tjéttjonkará kixin T'aná tsotjáhará ch'án kaín nkehe tsjanchatóxixínrá nina. <sup>24</sup> Naxa kjuánchatóxixínhyará ninkehó tí nina. Ntá jie tjanchiará la ts'ayéhé, a ntá tsjintaxín tsocháhará.

**Ìnchéni Jesucristo mé kjuacha  
ch'án k'uetōan ch'án, ntá  
chjasintajni la náhi**

<sup>25</sup> Tí nkehe tjéttjonkará mé kjuintayóaxián ó. Ntá tsjixraká tí yaon la í ninkehó sintayóaxián na mé ntoá tsotjonkará nkexrí tjen T'aná. <sup>26</sup> A ntá tí yaon a mé tsjanchaxínrá nkehe nina. Ntá ntáxrjanhya tíhi kixin tsonixjayákonhanrá tí tjen T'aná <sup>27</sup> kixin jehe T'aná mé tjuahará jahará. Na mé tjuahará ch'án kixin jahará tjuanará tí janhan la ko kixin kuítekónrá kixin janhan k'uinkaxian tí tjen Dios. <sup>28</sup> K'uaxrjéxian tí tjen T'aná k'uinka chjasintajni. Ntá jie la ó tsitōha chjasintajni ntá sátsjiyá ínaá tí tjen T'aná —ichro ch'án.

<sup>29</sup> Ntá ntáchro tí sín k'uájiko ch'án a kixin:

—Ntá jie ntoá tjéchronka ninkehó ncheyoéxinhya. <sup>30</sup> Ntá jie tienxíni kixin jaha mé noha kaín xín nkehe la ko t'ichjánxinhya kixin jnkojín nkexro

chrókjuanchankíha sín ichrén nkehe. Méxra xíkaha titekaonni kixin jaha mé k'uinkaxian tí tjen Dios —ichro sín.

<sup>31</sup>Ntá kjuátehe ch'ín Jesús ntáchro ch'án kixin:

—Á jie kuítekaonrá ní? <sup>32</sup>Ntá tsi tí yaon na mé jie tíha na ntá tsochrakonrá jnkojnkorá tsoxíkará sátsjirá ntá tsitonará janhván tsjak'é. Kjánchó jehya janhván tjén. T'aná mé tjékian. <sup>33</sup>Tjétjonkará kaín tíhi kixin ntá kjuaxróxin ts'ejó asánrá tinkachónkirá tí janhan. A ntá ntihi chjasintajni kjónté kjuaxróxinhya tjejorá tjejtjasóterá kjánchó chrakonhyará kixin janhan mé ó kjuixin kjuacha tsétoan. A ntá tí chjasintajni la kjuachahya ts'etóan —ichro ch'án.

**Ch'ín Jesús chrónóehé ch'án It'é  
ch'án kixin chrók'uayakonhen  
tí sín k'uájiko ch'án**

**17** Ntá ó kjuixin chrónka ch'ín Jesús kaín tíha ntá konta ch'án nkajni ntáchro ch'án kixin:

—Jaha It'éni, ó kjuixraká tí yaon a. A ntá jie chróchjehé tí Xjaan antsí má kjuachaxin kixin kjaxin tí Xjaan chrókjuikosáyehe tí jaha. <sup>2</sup>Jaha tsíchjehé kjuachaxin tí Xjaan kixin ts'etuenhen ch'án kaín xín chojni na ntá jehe ch'án tsochjéhe kjuachón jnkochrínín kaín tí sín tsíchjehé ch'án. <sup>3</sup>Tí kjuachón jnkochrínín mé t'axrjéxín kixin tsochóxian sín tí jaha tí jnkokoá Dios chaxín tjechón la ko kjaxin tsochóxin sín Jesucristo la mé jaha kuétuenhén ch'án kui ch'án ntihi chjasintajni.

<sup>4</sup>Ó kjuixin kjuíkosáyaha tí jaha ntihi chjasintajni kjuixinna tí xra chjina sít'a. <sup>5</sup>A ntá jie It'éni, chjina jaha tí kjuachaxin jié k'uéchonta janhan tí k'uéjóni jnkokoá naxa k'ónahya chjasintajni.

<sup>6</sup>Ó kjuixin kjuákoḡa tí sín chjina chjasintajni kixin nkexro tí jaha. Jaha mé

k'uékuèntá sín tí ósé ntá jie chjina tí janhan la ó kjuákoḡa sín itán la ntá ijie la ó kuítekaon sín. <sup>7</sup>Ntá jie ó kjuátsoan sín kixin kaín tí kjuachaxin chonta janhan la jaha tsíkjánjuan. <sup>8</sup>Kixin ó kjuixin kjuákoḡa sín tí tán chjina jaha, ntá kuítekaon sín, ntá kuíenxín sín kixin mé chaxín tsík'inkaxian tí tjen jaha, na mé kuítekaon sín kixin jaha kuétuanna k'uinka.

<sup>9</sup>Janhan mé xrjanóḡa kixin chrók'uayakonhén tí jehe sín. Jehya kixin xrjannóḡa kixin chrók'uayakonhén kaín tí chojni síin chjasintajni. Náhí. Jehó xrjanóḡa kixin chrók'uayakonhén tí sín chjina kixin kuèntá sín. <sup>10</sup>A ntá kaín tí nkehe chonta janhan na mé kuèntá jaha la ko kaín tí nkehe kuèntá la mé kuèntana kjaxin. A ntá tí kjuachaxin jié kuèntana mé ts'inkaséyanxín tí jehe sín.

<sup>11</sup>A ntá jie tsitonahya janhan ntihi chjasintajni. Kjánchó jehe sín naxa tsitöhe sín chjasintajni. A ntá jie tsjasán tí tjen jaha. Jaha It'éni imá jina jaha, t'ayakuenxián sín tí kjuachaxin tí ihniá kixin ntá jnkokoá chrókjuenkayáxin sín éxi tí jaha la ko janhan jnkokoá tjenkayáxinni. <sup>12</sup>A ntá tí naxa k'uéjókian tí jehe sín ntihi chjasintajni la k'uàyakuànxián sín tí kjuachaxin tí ihniá chjina. Nijnko tí jehe sín k'uitjányan sín. A ntá jnkokoá nkexro mé k'uitjányan mé tí ch'ín xráxín ts'itjányan kixin xíkaha tsoxiteyá éxi nixja tí xroon tsíkjin sín.

<sup>13</sup>Ntá jie ó tsjasán tí tjen jaha. A ntá naxa itjén janhan chjasintajni mé ntáxrjan tíhi kixin ntá tsochéhe sín éxi yóḡe imá chàna. <sup>14</sup>Janhan mé kjuákoḡa sín itán jaha, a ntá jie tí sín chjasintajni mé nínkakonhen tí jehe sín kixin jehe sín la jehya kuènte chjasintajni éxi kjaxin janhan na janhya kuèntana chjasintajni. <sup>15</sup>Tjáncháhya kixin chrókuakítsjehé sín chjasintajni. Náhí. Tjáncháhá kixin chrók'uayakonhén sín

kíxin chrókjuich'iyehya sín tí Jínahya. <sup>16</sup>Jehe sín la jehya kuènte chjasintajni éxí yóhe janhan kjaxin janhya kuènte chjasintajni. <sup>17</sup>Nchetjuáxian sín tí kjuachaxin kuèntá kíxin itán jaha mé tí tan chaxín ntoá. <sup>18</sup>Éxí yóhe jaha kuétuanna k'uinka chjasintajni mé xíkaha janhan tétuñhanhán sín kíxin chrók'uejójáxian sín tí xra kuèntá chrókjuít'a kíxin chrókjuinkítsa tí jehe sín, a ntá jehe sín kjaxin chrókjuich'e sín tí xra kuèntá kíxin kuínhin sín itán chaxín ntoá.

<sup>20</sup>'Kjánchó jehya kíxin xrjanógha kíxin chrókjuínkítsa tí jehó sín. Náhi. Kjaxin xrjanógha kíxin chrókjuínkítsa kaín tí sín tsitekaon sín chr'éxin tsinhin sín tí nkehe tsochrónka tí sín a. <sup>21</sup>Mé xíkaha xrjanógha kíxin kaín tí jehe sín jnkokoá chrókjuenkayáxin sín éxí jaha It'éni la ko janhan jnkokoá tjenkayáxinni mé xíkaha xrjanógha kíxin kaín tí jehe sín la ko jaha la ko janhan jnkokoá chrókjuenkayáxinni. A ntá tí sín chjasintajni chrókuitekaon sín kíxin jaha tsíkétuanna k'uinka ntihi. <sup>22</sup>A ntá tí kjuachaxin jíe chjina na mé tjahá tí jehe sín kíxin ntá kaín sín jnkokoá chrókjuenkayáxin sín éxí yóhe jaha la ko janhan jnkokoá tjenkayáxinni. <sup>23</sup>Janhan la ko jehe sín jnkokoá chrókjuenkayáxinni éxí jaha la ko janhan jnkokoá tjenkayáxinni. Mé xíkaha tí sín chjasintajni chrókónohe sín kíxin jaha kuétuanna k'uinka la ko kjaxin chrókónohe sín kíxin jaha tjuèhé tí jehe sín éxí yóhe tjuana tí jaha.

<sup>24</sup>Jaha It'éni, tí sín kjuánjuan la tjínkavan kíxin tí jehe sín chrók'uejójáxian sín tí tsjak'é janhan kíxin chrók'uikon sín tí kjuachaxin jíe chjina; kíxin xráxín naxá k'ónahya chjasintajni k'uetjuana jaha. <sup>25</sup>It'éni jaha, imá jina jaha. Kjonté tí sín chjasintajni naxá chónhya sín tí jaha, ntá janhan na ó xráxín choxian tí jaha la ko kaín tí sín i kjaxin ó nohe

sín kíxin jaha kuétuanna k'uinka. <sup>26</sup>Ó kjuákoḡa sín kíxin nkexro tí jaha la ko xíkaha naxá tsjákoḡa sín, kíxin éxí tjuana jaha mé xíkaha chrótjuèhe sín kíchó sín la ko janhan chrók'uejójáxian tí jehe sín —mé xíkaha chrónóeḡe ch'ín Jesús tí It'é ch'án.

### Ch'ín Jesús sákjuíko sín ch'án tsjak'echjina ch'án

(Mt. 26.47-56; Mr. 14.43-50; Lc. 22.47-53)

**18** Ó kjuixin ntáchro ch'ín Jesús kaín tíha ntá jehe ch'án la ko tí sín k'uájiko ch'án k'uaxrxéxin sín ntiha k'uatòye sín tí tsáka Cedrón. Ntaha tjen ijnko nonte síin nchónhya nta k'uíxenhén ch'ín Jesús la ko tí sín k'uájiko ch'án. <sup>2</sup>Kjaxin ch'ín Judas tí ch'ín sinchekji tí ch'ín Jesús mé nohe ch'án kíxin ntaha tjen tí huerto a kíxin ntaha jnkoyaxón kójnkotséko ch'ín Jesús tí sín k'uájiko ch'án a. <sup>3</sup>A ntá ch'ín Judas ó kjuíkao ch'án nchónhya sín soldado la ko iso sín policía kuènte nínko tsík'etueñhen tí sín nchat'á t'etəan la ko tí sín fariseo. Ntá kjui sín kaín sín xraá sín chica la ko kjuíkao sín xrohi t'inkaséyanxín tí kjuixín sín. <sup>4</sup>A ntá ch'ín Jesús ó nohe ch'án kaín xín nkehe ts'atsínka ch'án, ntá sákjuí ch'án kjuanchankíhi ch'án sín ntáchro ch'án kíxin:

—¿Nkexro xritjéyará? —ichro ch'án.

<sup>5</sup>Ntá kjuátehe sín ntáchro sín kíxin:

—Tjeyáni tí ch'ín Jesús tsíkjin chjasin Nazaret —ichro sín.

Ntá kjuátehe ch'ín Jesús ntáchro ch'án kíxin:

—Janhan tíha —ichro ch'án.

A ntá ch'ín Judas tí ch'ín tsíkjinchekji tí ch'ín Jesús mé koí tjenkákjan ch'án tí jehe sín ntiha. <sup>6</sup>A ntá tió kjuátehe ch'ín Jesús kíxin jehe ch'án tíha, ntá jehe sín xráchonka sín kjuítsínka sín nonte. <sup>7</sup>Ntá xíkjanhankí ch'ín Jesús inaá ntáchro ch'án kíxin:



—¿Nkexro xritjéyará? —ichro ch'án.

Ntá xintáchro sín kixin:

—Tjeyáni tí ch'ín Jesús tsíkjixín ch-jasin Nazaret —ichro sín.

<sup>8</sup>Ntá ntáchro ch'ín Jesús kixin:

—Ó kjuixin tjonkará kixin janhan tíha. Tí xritjéyará tí janhan ntá títóhérá sátsji tí í so sín xríkian —ichro ch'án.

<sup>9</sup>Mé xíkaha ntáchro ch'ín Jesús kixin ntá tsoxiteyá tí nkehe tsintáchro ch'án kixin: “Tí sín kjuanjon T'aná la ninkexró kjuintak'itjáyanhya.”<sup>8</sup> <sup>10</sup>Ntá ch'ín Simón Pedro kuakitsje ch'án tí chica espada chrinkatoxín ch'án kóchrínjin ch'án tatsjon chjina ijnko ch'ín it'in Malco, mé ijnko ch'ín ch'ehe nchat'á t'etoan xra. <sup>11</sup>Kjánhó ch'ín Jesús ntáche ch'án tí ch'ín Pedro kixin:

—Chr'axenhén tjoe chica espada méhe. Kjá ntáchrua kixin tsjasótehyana, kjá ichrua. Kjánhó T'aná kjuanjon kjuachaxin kixin nchónhya tsjasótena —ichro ch'án.

**Ch'ín Jesús kjuák'e nkayakon tí ch'ín t'etuénhen tí sín nchat'á**

(Mt. 26.57-58; Mr. 14.53-54; Lc. 22.54)

<sup>12</sup>À ntá tí sín soldado la ko tí ch'ín comandante t'etuénhen sín la ko tí sín policía judío kuènte nínko mé itsé sín tí ch'ín Jesús kjuínchenteto sín ch'án.

<sup>13</sup>À ntá sákjuíko sín ch'án ntøe ch'ín Anás ich'ee tí ch'ín Caifás mé tí nkexro tsík'áyehé xra nchat'á t'etoan tí nánó a. <sup>14</sup>À ntá tí ch'ín Caifás, jehe ch'án na mé tí nkexro tsintáche tí sín judío kixin íchá jína kixin jnkokoá chojni chrók'uenyákonhen kaín tí sín chjasén ch'án.\*\*

**Ch'ín Pedro kjuínchemá ch'án kixin chóxin ch'án tí ch'ín Jesús**

(Mt. 26.69-70; Mr.

14.66-68; Lc. 22.55-57)

<sup>15</sup>Ch'ín Simón Pedro la ko í jnko ch'ín k'uék'ajiko ch'ín Jesús mé kuinkáchréhe sín ch'án. Tí ch'ín ijnko a mé chóxin ch'án tí nchat'á t'etoan. Ntá k'uúenkeno ch'án tí ch'ín Jesús tí ntasin ntøe tí nchat'á t'etoan. <sup>16</sup>Kjánhó ch'ín Pedro kuítóhe ch'án ntója ntasin ó. Ntá tí ch'ín ijnko a chóxin tí nchat'á t'etoan mé k'uaxrje ch'án ntasin nix-jehe ch'án tí tjan t'ayakonhen tí ntója ntasin chrónóehé ch'án tjan ntá xranjon kjuachaxin ntá k'uúenhen ch'ín Pedro kjaxin. <sup>17</sup>Na ntá tí tjan t'ayakonhen tí ntója ntasin kjuanchankíhi tjan tí ch'ín Pedro kixin:

—¿Á jahya kjaxin xríkoa tí ch'ín a? —ichro tjan.

Ntá kjuátehe ch'ín Pedro kixin:

—Náhí, janhya —ichro ch'án.

<sup>18</sup>Ntá imá kin ntá tí sín ch'exón xra la ko tí sín policía kjuaka sín xrohi ntaha tjejóxin toté sín tjejóchjixrohe sín. La ko koí ch'ín Pedro tjechjixrohe ch'án ntiha.

**Tí nchat'á t'etoan mé kjuanchankíhi ch'án tí ch'ín Jesús**

(Mt. 26.59-66; Mr.

14.55-64; Lc. 22.66-71)

<sup>19</sup>Ntá tí nchat'á t'etoan kjuankixin kjuanchankíhi ch'án tí ch'ín Jesús kixin nkexro tí sín k'uájiko ch'án la ko nkehe tí kjuakohe ch'án sín. <sup>20</sup>Ntá kjuátehe ch'ín Jesús ntáchro ch'án kixin:

—Noxín kjuak'é kjuákua, la ntá kaín xín chojni kuínhin sín. Xráxín k'uék'jákoxian kaín xín tí nínko ntsí la ko tí nínko jíé tójnkotséxin kaín xín sín judío. Ninkehó nkehe kjuákohya

§18:9 Juan 17.12

\*\*18:14 Juan 11.49–50

imó. <sup>21</sup> ¿Nkekuènté tjanhankina tí janhan xikaha? Chrókjuanchankíhí tí sín kuínhin kixin nkexrí kjuákoha sín. Jehé sín mé nohe sín nkehe kjuákoha sín —ichro ch'án.

<sup>22</sup> Kjuixín ntáchro ch'ín Jesús tíhi ntá ijnko ch'ín policia kuènte njnko mé tjen-taxín ch'án ntiha chjéhe ch'án nkayakon tí ch'ín Jesús ntáchro ch'án kixin:

—¿Á xikaha jiehe tsjátehé tí nchat'á t'etoan ní? —ichro ch'án.

<sup>23</sup> Ntá kjuátehe ch'ín Jesús ntáchro ch'án kixin:

—Tí ntoáhya tí nkehe xrjanka ntá chonka nkehe tí ntoáhya. A ntá tí ntoá tí nkehe xrjanka, ¿ntá nkekuènté kixin tjatena? —ichro ch'án.

<sup>24</sup> Ntá k'ueṭoan ch'ín Anás kixin tjechróntetoxinhín ch'ín Jesús sátsji ch'án tí tjen ch'ín Caifás tí nchat'á t'etoan.

### **Ch'ín Pedro xikjinchemá ch'án inaá kixin chóxin ch'án tí ch'ín Jesús**

(Mt. 26.71-75; Mr.

14.69-72; Lc. 22.58-62)

<sup>25</sup> Ntá ch'ín Simón Pedro mé naxa tjexín toté ch'án tjechjixrohe ch'án. Ntá kjuanchankíhi sín ch'án kixin:

—¿Á kjaxinhya jaha xríkoa tí nkexro i ní? —ichro sín.

Ntá ch'ín Pedro kjuínchemá ch'án inaá ntáchro ch'án kixin:

—Náhi, janhya —ichro ch'án.

<sup>26</sup> A ntá ijnko ch'ín ch'ehe tí nchat'á t'etoan xra, na mé tí ch'ín a mé naxa kjéhya ch'án tí ch'ín tsíkóchrinjin ch'ín Pedro ntatsjon, na mé kjuanchankí ch'án kixin:

—¿Á jehya jaha tí k'uíkuān tjekoa ch'án tí huerto ní? —ichro ch'án.

<sup>27</sup> Ntá ch'ín Pedro xikjinchemá ch'án inaá kixin jehya ch'án, ichro ch'án. Ntá xrináhya tuénxín itsje ijnko kochíntoa.

### **Ch'ín Jesús kjuák'e nkayakon tí ch'ín Pilato**

(Mt. 27.1-2, 11-14; Mr.

15.1-5; Lc. 23.1-5)

<sup>28</sup> Ntá k'uaxrjexín sín ntōe ch'ín Caifás, sákjuiko sín ch'ín Jesús tí palacio t'etoanxín tí ch'ín gobernador. Ntá ó kjuankixin k'uínkaséyan kjuíji sín ntiha. A ntá tí sín judío la mé í k'uíxenhya sín tí palacio kixin tí xikaha chrók'uixenhen sín tí nchia a la chrókuamá sín tí jie síin ntiha la í xitjahya sine sín tí kia pascua, ichro sín. <sup>29</sup> A ntá ch'ín Pilato k'uaxrjexín ch'án tí nchia t'etoanxín ch'án kjuanchankíhi ch'án sín kixin:

—¿Nkehe tí jie chóna tí nkexro í? —ichro ch'án.

<sup>30</sup> Ntá kjuátehe sín ntáchro sín kixin:

—Tí chróchóntahya ch'án jie jie la chrókjuíkoghanyi ch'án —ichro sín.

<sup>31</sup> Ntá k'ueṭoan ch'ín Pilato kixin:

—Sátjikoará ch'án nchekitoexínrá nkerí jie chóna ch'án kixin éxí ntáchro tí ley kuèntará —ichro ch'án.

Ntá kjuátehe tí sín judío ntáchro sín kixin:

—Jeheni chojni judíoni la chóntahyani kjuachaxin ts'óyánni ninkexró —ichro sín.

<sup>32</sup> Mé xikaha tsoxiteyá tí nkehe tsín-tachro ch'ín Jesús kixin nkexrí ts'énxín ch'án. <sup>33</sup> Ntá ch'ín Pilato xík'ixenhen ch'án tí nchia t'etoanxín ch'án ntá k'uíyehé ch'án tí ch'ín Jesús kjuanchankíhi ch'án kixin:

—¿Á jaha tí nkexro Rey t'etuenhen tí sín judío ní? —ichro ch'án.

<sup>34</sup> Ntá ntáchro ch'ín Jesús kjuanchankí ch'án kixin:

—Tí nkehe tjanhankíná, ¿á jahyá kjuenkayáxian xikaha, o á í jnko nkexro kjuanchia jie kixin tí janhan? —ichro ch'án.

<sup>35</sup>Ntá kjuátehe ch'ín Pilato ntáchro ch'án kixin:

—¿Á kjanhya janhan tí judío kixin? Tí sín chjasán la ko tí sín nchat'á t'etoan mé kjuikaán sín tí jaha. ¿Xá nkehe kjuich'e kixin? —ichro ch'án.

<sup>36</sup>Ntá kjuátehe ch'ín Jesús ntáchro ch'án kixin:

—Tí kjuachaxin chonta janhan jehya kixin chjasintajni chrókuétoan. Náhí. Tí chrókuétoan chjasintajni ntá tí sín xrík-ian chrókjuanjonko sín tí sín judío kixin chróséhyana sín la chrókuikánhyana sín ntihi. Kjánchó tí kjuachaxin chonta janhan jehya kixin chjasintajni chrókuétoan —ichro ch'án.

<sup>37</sup>Ntá ntáchro ch'ín Pilato kixin:

—¿Á jaha chaxín ijnko rey? —ichro ch'án.

Ntá kjuátehe ch'ín Jesús ntáchro ch'án kixin:

—Janhan tí rey éxí ntáchrua jaha. Tí xra ó kokjina la ko tí xra ó k'uinka chjasintajni kixin tsoxrjanka nkehe tí chaxín ntoá. Kaín tí sín titekaon tí nkehe chaxín ntoá mé tjejótinhin sín tí nkehe tjákua —ichro ch'án.

<sup>38</sup>Ntá ntáchro ch'ín Pilato kixin:

—¿Xá nkehe tí nkehe chaxín ntoá, ichrua? —ichro ch'án.

### Ch'ín Pilato kjuanjon kjuachaxin kixin its'en ch'ín Jesús

(Mt. 27.15-31; Mr. 15.6-20; Lc. 23.13-25)

Ntá kjuixin kjuanchankí ch'ín Pilato tíha ntá k'uaxrjexín ch'án ntiha ntá sákjuí ch'án tí tjejó tí sín judío nixjehe ch'án sín ntáchro ch'án kixin:

—K'uítjáhya ninkehó jie chóna tí nkexro i. <sup>39</sup>Kjánchó jahará la ó kuánhanrá kixin tí kia pascua tsjánjuan kjuachaxin kixin ts'atjánta ijnko nkexro tjechjina. ¿Á tjínkaonrá kixin ts'atjánta tí ch'ín Rey t'etuñhen tí sín judío? —ichro ch'án.

<sup>40</sup>Ntá kaín sín k'óyako sín kjuanchia sín kixin:

—Tí ch'ín a la náhí. T'atjánta tí ch'ín Barrabás —ichro sín.

Kjánchó tí ch'ín Barrabás mé ijnko chojni chee tíha.

**19** Ntá ch'ín Pilato mé k'uetōan ch'án kixin tsjate sín tí ch'ín Jesús. <sup>2</sup>Ntá tí sín soldado kjuich'éna sín ntach'í ijnko corona ntá kjuak'enkaya sín ikja tí ch'ín Jesús. La ko kjuínchek'inkaya sín ch'án ijnko ka kjátse tié kixin jehe sín tsjikosáyehe sín ch'án éxí ijnko rey, kjánchó chaxínhya tíha. <sup>3</sup>Ntá kóchjinehe sín tí tjen ch'án ntáchro sín kixin:

—Isé tsjak'e tsétuñhén tí sín judío —ichro sín.

Kjánchó chaxínhya tíha kjuanoá sín ch'án. La ntá tuénxín itja sín kjuatexín sín nkayakon ch'án.

<sup>4</sup>Ntá ch'ín Pilato k'uaxrjexín ch'án tí nchia t'etoanxín ch'án inaá nixjehe ch'án tí sín tsíkójnkotsé ntáchro ch'án kixin:

—Tsjeherá tsakítsjexián ch'án ntihi kixin tsonohará kixin k'uítjáhya janhan ninkehó jie chóna ch'án —ichro ch'ín Pilato.

<sup>5</sup>Ntá k'uaxrjexín ch'ín Jesús ntiha tjenkáya kja ch'án tí corona tsík'óna ntach'í la ko tjenkáya ch'án tí ka kjátse tié. Ntá ntáchro ch'ín Pilato kixin:

—Tsjeherá, ntihi tjen ch'án —ichro ch'án.

<sup>6</sup>Ñ ntá tió k'uifkon tí sín nchat'á t'etoan la ko tí sín policía kuénte nínko ntá kjuankixin sín t'óyako sín ntáchro sín kixin:

—¡Tjakénkanirá ch'án ntacruz! ¡Tjakénkanirá ch'an ntacruz! —ichro sín.

Ntá ntáchro ch'ín Pilato kixin:

—Jahará tjíkoará ch'án tjaké nkanirá ch'án ntacruz kixin janhan k'uítjáhya ninkehó jie chóna tí jehe ch'án —ichro ch'án.

<sup>7</sup>Ntá kjuátehe tí sín judío kixin:

—Jeheni chojni judío mé chóntani ijnko ley t'etoan kixin chrók'uen ch'án kixin ncheyóhe ch'án asén ch'án kixin Xjeen Dios tí jehe ch'án —ichro sín.

<sup>8</sup>Ntá tió kuínhin ch'ín Pilato tíha ntá antsí chrakon ch'án <sup>9</sup>ntá xík'ixenhen ch'án tí nchia t'etoanxín ch'án inaá kjuanchankíhi ch'án tí ch'ín Jesús kixin:

—¿Nketí k'uinkaxian jaha? —ichro ch'án.

Ntá ch'ín Jesús ninkehó kjuáteehya ch'án.

<sup>10</sup>Ntá ntáchro ch'ín Pilato kixin:

—¿Jaha nkekuénté tjáteehya nkehe tjánchánkíha? ¿Á noahya jaha kixin chonta janhan kjuachaxin tsétoan tsjak'enkania ntacruz la ko kjaxin chonta janhan kjuachaxin tsontáxrjan kixin sátsjia kohya nkehe tsonhan? —ichro ch'án.

<sup>11</sup>Ntá kjuátehe ch'ín Jesús ntáchro ch'án kixin:

—Ninkehó kjuachaxin chróchontahya jaha chrókuétoan chrók'uen o sáchrókjuia tí Dios chrótjáhya tí kjuachaxin. A ntá tí chojni kjuikaána tí tjen jaha la antsí jíé jíe chóna sín, a ntá jaha la kánhyó —ichro ch'án.

<sup>12</sup>Ntá kuínhin ch'ín Pilato tíhi ntá kjuankíxin ch'án kjueyá ch'án nkexrí chrók'ueotoan ch'án kixin sáchrókjui ch'ín Jesús kohya nkehe chrókónhen ch'án. Kjánchó tí sín judío k'óyako sín ntáchro sín kixin:

—Kja tí tsjtohé sátsji ch'án kohya nkehe tsonhen ch'án ntá jaha jnkokoqáhya tjenkayáxinkoa tí ch'ín t'etuenhen tí nación kuénténi. Tí nkexro ch'éna asén ch'án éxí ijnko rey mé nínkakonhen ch'án tí ch'ín t'etuenhenni —ichro sín.

<sup>13</sup>Ntá kuínhin ch'ín Pilato tíhi ntá k'ueotoan ch'án kixin tsakitsje sín tí ch'ín Jesús ntója ntá ch'ín Pilato kjuák'etjaxin ch'án tí silla nchekitoexín ch'án jíe, mé nkíva hebreo mé it'ín Gabata, mé t'axr-

jexín kixin tjat'o noi jehó xro tsík'óna.

<sup>14</sup>Na mé ó chjina chonkíxin ntá tí tsonjín la mé ó tsjasin sín tí kia pascua. Ntá ch'ín Pilato ntáche ch'án tí sín judío kixin:

—Ntíhi itjen tí ch'ín rey kuéntará —ichro ch'án.

<sup>15</sup>Kjánchó jehe sín k'óyako sín ntáchro sín kixin:

—¡Its'en ch'án! ¡Its'en ch'án! ¡Tsjak'enkání ch'án ntacruz! —ichro sín.

Ntá ntáchro ch'ín Pilato kixin:

—¿Á tjinkáonrá kixin janhan chrókjuakénkania ijnko ntacruz tí ch'ín rey kuéntará ní? —ichro ch'án.

Kjánchó tí sín nchat'á t'etoan mé kjuátehe sín kixin:

—Náhi. Chóntahyani í jnko rey, jehó tí ch'ín César —ichro sín.

<sup>16</sup>Ntá ch'ín Pilato kjuanjón ch'án kjuachaxin sátsjiko sín tí ch'ín Jesús tsjak'enkání sín ch'án ntacruz. Ntá sákjuíko sín ch'án.

### **Kjuák'enkání ch'ín Jesús ntacruz**

(Mt. 27.32-44; Mr.

15.21-32; Lc. 23.26-43)

<sup>17</sup>Ntá sákjuíko sín tí ch'ín Jesús kuámá ch'án tí ntacruz tsjak'enkání ch'án. Ntá kjujiko sín ch'án ijnko tjo tik-itexín sín Hueso Kja Chojni. A ntá nkíva hebreo mé tik-itexín sín Gólgota. <sup>18</sup>Ntaha mé kjuak'enkání sín ch'án tí ntacruz. Ntá kjaxin yaá sín nánánko k'uejó jnkojnko sín ntá jnkosiné kjuák'e ch'ín Jesús.

<sup>19</sup>Ntá k'ueotoan ch'ín Pilato kixin tsokjin sín ijnko ntachiso tsjak'enkání sín ikja tí ntacruz ntáchro kixin: “Ch'ín Jesús kjuixín ch'án chjasin Nazaret, mé tí ch'ín Rey kuénte tí sín judío”, tsixro. <sup>20</sup>A ntá itsjé tí sín judío mé kjuínchekuáxin sín tí letra tsík'óna kixin chjino tí chjasin Jerusalén tsíkjak'enkání sín ch'ín Jesús ntacruz la ko iní nkíva tsíkjin sín, na mé ijnko nkíva la hebreo, la ijnko nkíva la griego, la ijnko nkíva la latín. <sup>21</sup>Ntá tí

sín nch'at'á t'etoan kuènte tí sín judío mé ntáche sín tí ch'ín Pilato kixin:

—Chrókjinhya jaha xikaha kixin jehe ch'án mé tí “Ch'ín Rey kuènte tí sín judío.” Náhí. Íchá jína chrókjian jaha kixin “Jehe ch'án ntáchro ch'án kixin jehe ch'án mé tí ch'ín Rey kuènte tí sín judío” —ichro sín.

<sup>22</sup> Kjánchó kjuátehe ch'ín Pilato kixin:

—Tí letra kuétoan k'óna la ó k'óna, kjónté xikahó tsitöhe —ichro ch'án.

<sup>23</sup> Ntá tí sín soldado tió tsíkjixin tsík-jak'enkani sín tí ch'ín Jesús tí ntacruz ntá kuákja sín tí ké ch'án la k'óxikeyehe sín jnkojnko ka kuákja sín kanoé sín. La ko kjaxin kuákja sín tí ka kjínjin k'uék'inkáya ch'án. Tí ka mé tsíxronhya ka la me jnkokoá ka tíha. <sup>24</sup> Ntá tí sín soldado kjo sín kichó sín ntáchro sín kixin:

—Tsótséchjehyani tí ké ch'án. Íchá jína sich'exinni suerte ntá tsotsjeheni siná nkexro ts'áyéhe tí ka.

Mé xikaha xiteyá éxí ntáchro xroon itén Dios tsíkjín sín ósé ntáchro kixin: “Kjuích'exín sín suerte ntá k'óxikeyehe sín kaná.”†† Mé xikaha kjuích'e tí sín soldado.

<sup>25</sup> A ntá chjino tí ntacruz kjuák'enkání ch'ín Jesús mé kjuák'e tí iné ch'án la ko tí tjan kichó tjan mé tjan María ichjién ch'ín Cleofas, la ko tí tjan María Magdalena. <sup>26</sup> A ntá tió k'uúikon ch'ín Jesús kixin itjen tí iné ch'án la ko chjino tjen tí ch'ín antsí tjuèhé ch'án k'uék'ajiko ch'án, ntá nixjehe ch'án tí iné ch'án, ntáchro ch'án kixin:

—Naná, tsjehé kixin ntaha tjen xjaan —ichro ch'án.

<sup>27</sup> Ntá nixjehe ch'ín Jesús tí ch'ín a ntáchro ch'án kixin:

—Tsjehe kixin ntaha itjen iná —ichro ch'án.

A ntá tí ch'ín a mé k'uáyéhe ch'án tí tjan a sákjuíko ch'án tjan ntøe ch'án k'óna éxí iné ch'án xikaha.

### Ik'uén ch'ín Jesús

(Mt. 27.45-56; Mr. 15.33-41; Lc. 23.44-49)

<sup>28</sup> Ntá ó nohe ch'ín Jesús kixin kaín xra ó kjuixin xiteyá ntá tjinkaon ch'án kixin tsoxiteyá kaín nkehe ntáchro tí xroon tsíkjín sín ósé ntá xikaha ntáchro ch'án kixin:

—Ik'uén nta.

<sup>29</sup> Ntá ntíha tjen ijnko nchésen tsíkaón xranvino sán ntá kjuínchekjataxín sín ijnko ka tí xranvino, a ntá tí ka a kjuak'ekjen sín ijnko nta kjínjin, ntá kjuínchechrín sín tí tjen ir'va ch'án.

<sup>30</sup> Ntá ik'uí ch'ín Jesús tí xranvino sán ntá ntáchro ch'án kixin:

—Ó kjuixin xiteyá kaín xín nkehe —ichro ch'án.

Ntá k'uísén kja ch'án ntá ó kjuixin k'uén ch'án.

### Ijnko soldado chr'áte ch'án chica yo tí chjia ch'ín Jesús

<sup>31</sup> A ntá xikaha yaon ntóye mé tí yaon kia pascua ntá tí sín judío tjinkakonhya sín kixin tí cuerpo kuènte tí sín tsík'en naxa ts'ejóyáni tí ntacruz tí yaon t'ok'éhe sín kixin tí yaon pascua mé ijnko yaon imá jíé, ichro sín. Mé xikaha kjuanchehe sín tí ch'ín Pilato kixin ts'etoan ch'án kixin tsochjenjin toté tí sín tjejóyáni tí ntacruz la ko ts'inkajin tí cuerpo kuènte tí sín tsík'en. <sup>32</sup> Ntá tí sín soldado sákjuí sín k'óchjenjin sín tí toté tí ch'ín saoxín tjen la ko k'óchjenjin sín tí toté tí ch'ín tjen nánko a tjejóyáni sín tí ntacruz tí tjen ch'ín Jesús. <sup>33</sup> Ntá kjuíji sín tí tjen ch'ín Jesús ntá k'uúikon sín kixin ó tsíkjixin tsík'en ch'án, ntá í k'óchjenjinhya sín toté ch'án.

<sup>34</sup> A ntá ijnko ch'ín soldado mé chr'áte ch'án chica yo tí chjia tí ch'ín Jesús ntá tuénxín k'uaxrje jni la ko inta. <sup>35</sup> A ntá janhan mé tjékjian tí xroon í mé kjuak'é ntiha k'uúkuān ḱixin xikaha kónhen ntá ntoá tjéxrjanka ḱixin jahará kjaxinrá chrókuítekáonrá. <sup>36</sup> Mé xikaha kónhen tíha ḱixin tsoxiteyá tí nkehe ntáchro xroon itén Dios tsíkjin sín ntáchro ḱixin: “K'óchjenjinhya sín ninkehó huésøe ch'án.”<sup>¶¶</sup> <sup>37</sup> Kjaxin itjen í jnko nketí nixja tí xroon itén Dios tsíkjin sín ósé ntáchro ḱixin: “Tsokomá sín tí nkekro tsíchr'áte sín chica.”<sup>¶¶¶</sup>

### Xravá ch'ín Jesús

(Mt. 27.57-61; Mr.

15.42-47; Lc. 23.50-56)

<sup>38</sup> Ntá ó kjuixin kónhen kaín tíha ntá ch'ín José, mé ijnko ch'ín kjuixin chjasin Arimatea, mé kjuanchehe ch'án tí ch'ín Pilato kjuachaxin ḱixin tsjinka-jjinxin ch'án tí ntacruz tí cuerpo kuènte ch'ín Jesús sátsjiko ch'án tsjavá ch'án. Jehe ch'án imó kuinkáchónki ch'án tí ch'ín Jesús ḱixin chrakonhen ch'án tí sín judío. Ntá ch'ín Pilato mé kjuanjon ch'án kjuachaxin ntá sákjuíko ch'ín José tí cuerpo kuènte ch'ín Jesús. <sup>39</sup> Kjaxin ch'ín Nicodemo, tí ch'ín kjuínixjehe tí ch'ín Jesús ijnko tie a mé kjui ch'án kjuikao ch'án treinta kilo xroān xraxé tjiko xroān mirra la ko xroān áloes. <sup>40</sup> Mé xikaha ch'ín José la ko ch'ín Nicodemo k'uáyéhe sín tí cuerpo kuènte ch'ín Jesús kjuínchek'ísimá sín ijnko ka kjínjin tsíka tí xroān xraxé a ḱixin xikaha k'uékinkáchónki tí sín judío k'uékjavá sín chojni tsík'en. <sup>41</sup> Tí kjuák'enkání ch'ín Jesús ntacruz ntá chjinaxón ntiha tjen ijnko huerto itjen ijnko tòye nixin naxa ninkexró tsíxrávähya ntiha. <sup>42</sup> Ntaha kjuavá sín tí

ch'ín Jesús ḱixin chjinaxón tjen tí tòye a la ko í séhya tsoxranḱixin tí yaon t'ok'éhe tí sín judío.

### La ntá ó tsíxechón ch'ín Jesús

(Mt. 28.1-10; Mr. 16.1-8; Lc. 24.1-12)

**20** A ntá tí yaon xranḱixín semana ntá tí tjan María Magdalena naxa sítie sákjuí tjan tí tjen tí tòye, ntá k'uíkon tjan ḱixin ó tsíkjin tí xro tsík'ikjéxin tí tòye a. <sup>2</sup> Ntá kuinká tjan sákjuí tjan tí tjen tí ch'ín Simón Pedro la ko tí ch'ín í jnko, mé tí nkekro imá k'uétjuèhe ch'ín Jesús, ntá ntáchro tjan ḱixin:

—Ó tsíkakitsjexin sín tòye tí cuerpo kuènte Ìnchéni ntá noehyani nketí tsíkjak'e sín —ichro tjan.

<sup>3</sup> Ntá ch'ín Pedro la ko tí ch'ín í jnko mé kuínhin sín xikaha ntá sákjuí sín tí tjen tí tòye a. <sup>4</sup> Ntá yóí sín kuinká sín sákjuíko kíchó sín. Kjánchó tí ch'ín í jnko antsí tjan kuinká ch'án ntá kánhyó tjan kuinká ch'ín Pedro, ntá tí ch'ín í jnko senó ch'án kjuíji ch'án tí tjen tí tòye a. <sup>5</sup> K'uísén ch'án tsjehe ch'án nkaxenhen tí tòye a. A tí ka tsík'ísimá ch'ín Jesús mé naxa tjejó k'uíkon ch'án, kjánchó jehe ch'án k'uixenhya ch'án tí tòye a. <sup>6</sup> Ntá kjónté chr'éxin kjuíji ch'ín Simón Pedro ntá k'uixenhen ch'án tí tòye a. Ntá kjaxin k'uíkon ch'án ḱixin tjejó tí ka tsík'ísimá ch'ín Jesús <sup>7</sup> la ko k'uíkon ch'án tí ka tsík'ísimá ikja ch'án na mé tí ka tsíxreya ka la ókjé tjen ka, a ntá tí í so ka na mé ókjé tjejó ka kjaxin. <sup>8</sup> Na ntá tí ch'ín í jnko k'uék'ajiko ch'ín Jesús, mé tí ch'ín tsíkji sín na kjaxin k'uixenhen ch'án tí tòye ntá k'uíkon ch'án tí nkehe tsíkónhen ntá kuítekaon ch'án. <sup>9</sup> Ḱixin naxa k'uékienxínhya sín tí nkehe k'uéchrónka xroon itén Dios ḱixin t'ichjánxin tsoxechón tí ch'ín Jesús. <sup>10</sup> A ntá tí sín sátsíkjisjehe tòye la xíkjan sín ntøe sín.

¶¶19:36 Salmo 34.20

¶¶¶19:37 Zacarías 12.10

**Titàya k'uíquèn tjan María  
Magdalena tí ch'ín Jesús**

(Mr. 16.9-11)

<sup>11</sup> Ntá tjan María mé ntahó kuítóhe tjan ntója tí tòyè tsjánka tjan. Naxa tsjánka tjan k'uísén tjan tsjehe tjan nkaxenhen tí tòyè <sup>12</sup> ntá xrínahya k'uíkon tjan yaá sín ángel tjejóyá sín ka tjóá tje-jótjaxín sín tí tsíkjak'e tí cuerpo kuènte ch'ín Jesús na mé ijnko ch'ín ángel na mé tjen ch'án tí tsíkjak'e ikja ch'ín Jesús la ko tí í jnko a itjen ch'án tí tsík'ejó toté ch'án. <sup>13</sup> A ntá tí sín ángel mé kjuanchankí sín kixin:

—Naná, ¿kuènte tsjanaka? —ichro sín.

Ntá kjuátehe tjan ntáchro tjan kixin:

—Sátsíkjiko sín Ìnchéni, ntá nonahya nketí tsíkjak'e sín ch'án —ichro tjan.

<sup>14</sup> Kjuixin ntáchro tjan tíha ntá kuinkátjía tjan ntá k'uíkon tjan kixin itjen ch'ín Jesús, kjánchó kjuátsoanhya tjan kixin jehe ch'án. <sup>15</sup> Ntá ch'ín Jesús kjuanchankíhi ch'án tjan ntáchro ch'án kixin:

—Naná, ¿nkekuènté tsjanaka? ¿Nkexro tjeýá? —ichro ch'án.

A ntá jehe tjan kjuenkayáxin tjan kixin jehe ch'án mé t'ayakonhen ch'án tí huerto, a ntá ntáchro tjan kixin:

—Kja tí jaha sákjuíkoa ch'án ntá jie chrónka nketí sákjuíkoa ch'án kixin jahan sátsíjkian ch'án jie —ichro tjan.

<sup>16</sup> Ntá ch'ín Jesús mé nixjehe ch'án tjan ntáchro ch'án kixin:

—¡María! —ichro ch'án.

Ntá kuinkátjía tjan ntá nixjaxín tjan nkiva hebreo ntáchro tjan kixin:

—¡Raboni! —ichro tjan. Tíha mé t'axr-jexín kixin Maestro.

<sup>17</sup> Ntá ntáchro ch'ín Jesús kixin:

—Tatjántana kixin naxa sáttjía jahan tí tjen T'aná. Sátjia tjítsjehé tí sín kichiná chénka sín kixin sátsjivá tí tjen T'aná na mé kjaxin It'ará tí jahará na mé

Dios kuèntana la ko kjaxin Dios kuèntará —ichro ch'án.

<sup>18</sup> Ntá tí tjan María Magdalena sákjuíchénka tjan tí sín k'uék'ajiko ch'ín Jesús chrónka tjan kixin xíkaha tsík'ikon tjan Ìnchéni. La ko kjaxin chrónka tjan kixin xíkaha tsíntáchro ch'án.

**Tí sín k'uék'ajiko ch'ín Jesús  
titàya k'uíquèn sín ch'án**

(Mt. 28.16-20; Mr.

16.14-18; Lc. 24.36-49)

<sup>19</sup> A ntá ó kónjín tí yaon a mé tí yaon xrankíxixín semana, a ntá tí sín k'uék'ajiko ch'ín Jesús jnkokoá kójnkotsé sín nkaxenhen nchia tsík'íkjehe sín ntója nchia jína kixin chrakonhen sín tí sín judío. Ntá xrínahya titàya kónohe sín k'uíkon sín kixin jnkosiné tí tjejó sín itjen ch'ín Jesús, ntá nixjehe ch'án kjuaj-na tí sín k'uék'ajiko ch'án ntáchro ch'án kixin:

—Jína tjejorá —ichro ch'án.

<sup>20</sup> Ntá kjuixin ntáchro ch'án tíhi ntá kjuako ch'án itja ch'án la ko chjia ch'án. Ntá kóchéhe tí sín k'uék'ajiko ch'án kixin k'uíkon sín Ìnchéni. <sup>21</sup> Ntá ntáchro ch'ín Jesús ínaá kixin:

—Kjuaxróxin ts'ejorá. Yóhe T'aná k'uetuanna k'uinka, a ntá jie la janhan tétuñhan tí jahará —ichro ch'án.

<sup>22</sup> Ntá k'uánote ch'án tí jehe sín ntáchro ch'án kixin:

—T'ayéhérá Nchakuen Dios. <sup>23</sup> Tí ts'itjáyannahrá tí jie kjuasin jnkójín chojni ntá xíkaha tsjün tí ijíé sín. Ntá tí ts'itjáyanyhará tí jie kjuasin jnkójín chojni ntá naxa kjuinnya tí ijíé sín —ichro ch'án.

**Ch'ín Tomás k'uíkon ch'án  
kixin tsíxechón Ìnchéni**

<sup>24</sup> A ntá tí ch'ín Tomás, ijnko tí teyóxin sín k'uék'ajiko ch'ín Jesús mé kjaxin tìk-itexín sín ch'ín Nóhé mé kohya ch'án tí

kui ch'ín Jesús. <sup>25</sup> Ntá chr'éxin tí í so sín k'uék'ajiko ch'ín Jesús ntáche sín ch'án k'ixin:

—Ó k'uíkonni Ìnchéni —ichro sín.

Kjánchó ntáchro ch'ín Tomás k'ixin:

—Tí ts'íkõnnya janhan tí ts'íkjiatexín chica clavo itja ch'án la ko tsochr'ánxianhya dedo tjaná ntiha la ko tí tsochr'ánxianhya tjaná tí chjia ch'án, ¿na mé nkexrí chrókuítekavan? —ichro ch'án.

<sup>26</sup> A ntá tí k'uátsínka ijnko semana ntá jnkokoá kójnkotsé sín nkaxenhen nchia la ko kjaxin kjuák'eko sín ch'ín Tomás. Tsík'ikjehe sín ntója nchia jína ntá xrinãhya titàya kónohe sín k'uíkon sín k'ixin jnkosiné tí tjejó sín itjen ch'ín Jesús, ntá nixjehe ch'án tí jehe sín k'uék'ajiko ch'án ntáchro ch'án k'ixin:

—Kjuaxróxin ts'ejorá —ichro ch'án.

<sup>27</sup> Ntá ntáche ch'án tí ch'ín Tomás k'ixin:

—Chr'axénhén dedo tjá tí ts'íkjiatexín chica clavo tjaná la ko xrákoa tjá chr'axénhén chjiana. Chróntáchrohya k'ixin chaxínhya. Tsítekáván k'ixin chaxín —ichro ch'án.

<sup>28</sup> Ntá kjuátehe ch'ín Tomás ntáchro ch'án k'ixin:

—Ìnchéni jaha la ko Dios kuèntana! —ichro ch'án.

<sup>29</sup> Ntá ntáche ch'ín Jesús tí ch'ín Tomás k'ixin:

—Jaha Tomás k'uíkonjian ntá kuítekáván. Ntá antsí náxrxón tjejó tí sín kjónté k'uíkonhya la titekaon sín —ichro ch'án.

### Tíhi mé chrónka nkekuènte tsikjin ch'ín Juan tí xroon i

<sup>30</sup> Ch'ín Jesús kjuasin ch'án itsjé í so kjuaxroan náxrxón k'uíkon tí sín k'uájiko ch'án kjónté chrónkahya tí xroon i k'ixin xikaha kónhen. <sup>31</sup> Tí nkehe chrónka tí xroon i ikjian janhan k'ixin chrókuítekáonrá jahará k'ixin Jesús mé tí Cristo, mé tí Xjeen Dios k'ixin ntá kaín

ni chróchóntani kjuachón jnkochr'ixin k'ixin chrókuítekaonni ch'án.

### Yato tí sín k'uék'ajiko ch'ín Jesús xrinãhya titàya k'uíkon sín ch'án

**21** A ntá chr'éxin tí sín k'uék'ajiko ch'ín Jesús titàya xik'íkon sín tí jehe ch'án inaá chrínta ntayaon Tiberias. Mé xikaha kónhen <sup>2</sup> k'ixin jnkokoá k'uéjó sín ch'ín Simón Pedro la ko ch'ín Tomás, me tí ch'ín tikítexín sín ch'ín Nóhé, la ko ch'ín Natanael kuixín ch'án chjasin Caná estado Galilea, la ko tí yaá xjeen ch'ín Zebedeo la ko tí yaá sín inaá k'uék'ajiko ch'ín Jesús. <sup>3</sup> Ntá ntáchro ch'ín Simón Pedro k'ixin:

—Sátsjitse koche —ichro ch'án.

Ntá kjuátehe sín k'ixin:

—Kóini sátsjikoani —ichro sín.

Ntá sákjuí sín k'uít'ótjen sín ijnko ntabáro. Kjánchó ninkehó koche tséhya sín kuenté tie. <sup>4</sup> A ntá ó chjina ts'inkaséyan ntá xrinãhya titàya k'uíkon sín itjen ch'ín Jesús chrínta ntayaon, kjánchó kjuátsoanhya tí sín k'uék'ajiko ch'án k'ixin jehe ch'án. <sup>5</sup> Ntá kjuanchankíhi ch'án sín k'ixin:

—Jahará ntasoá, ¿á naxã ninkehó koche tsehyará? —ichro ch'án.

Ntá kjuátehe sín ntáchro sín k'ixin:

—Naxã ninkehó ko tséhyaní —ichro sín.

<sup>6</sup> Ntá ch'ín Jesús ntáche ch'án sín k'ixin:

—Itérá tí nchísén tí nánko chjia chjina tí ntabáro la tsotserá va —ichro ch'án.

Ntá xikaha kjuích'e sín k'ue sín nchísén ntá í tjachahya sín tsakit-sjenk'ixin sín ntã tí nchísén k'ixin nchónhya koche tjinká. <sup>7</sup> A ntá tí ch'ín antsí tjuèhe ch'ín Jesús mé ntáche ch'án tí ch'ín Pedro k'ixin:

—Ìnchéni tí méhe! —ichro ch'án.

Ntá kuínhin ch'ín Simón Pedro k'ixin Ìnchéni tíha ntá k'uinkáya ch'án iké ch'án inaá (k'ixin tsikakitsje ch'án iké



ch'án) ntá kjuíánkí ch'án ntá. <sup>8</sup>Tí í so sín k'uék'ajiko ch'ín Jesús mé kjuíji sín tí chrínta ntayaon kjuíkao sín tí ntabárcō tinkánkákjéntóxin tí nchísén tjínká koche chrítaón ntá kixin ijnko ciento metro kjínxin tí chrínta ntá k'uéjō sín. <sup>9</sup>Ntá kjuíji sín chrínta ntá ntá k'uínkajínxin sín tí ntabárcō ntá k'uíkon sín tjeche xrohi síxènkí xrinta ntá chrítaón tí xrinta tjeijken ijnko koche la ko nánko sín nioṭja. <sup>10</sup>Ntá kjuanchia ch'ín Jesús ntáchro ch'an kixin:

—Xrákoará iso koche tsítserá nantá —ichro ch'án.

<sup>11</sup>Ntá ch'ín Simón Pedro k'uit'ótjen ch'án tí ntabárcō kuákja ch'án tí nchísén kuínkánkákjen ch'án xrákao ch'án tí nchísén tjínká koche iye na mé ijnko ciento cincuenta y tres va. Ntá kjónté nchónhya va la k'uichjehya tí nchísén a.

<sup>12</sup>Ntá ntáchro ch'ín Jesús kixin:

—Xrákirá, interá —ichro ch'án.

À ntá nijnko tí sín k'uék'ajiko ch'án chrókjuanchankíhi sín ch'án kixin nkexro tí jehe ch'án kixin ó kjuátsōan sín kixin Ìnchéni tíha. <sup>13</sup>Ntá kóchjina ch'ín Jesús kuákja ch'án tí nioṭja chjéhe ch'án tí jehe sín la ko xíkaha xíkjanjon ch'án tí koche.

<sup>14</sup>Tíhi mé níxin k'uíkon tí sín k'uék'ajiko ch'ín Jesús kixin tsíxechón ch'án.<sup>§§</sup>

### Ch'ín Jesús itjo ch'án tí ch'ín Simón Pedro

<sup>15</sup>Kjuixin kjóne sín ntá kjuanchankíhi ch'ín Jesús tí ch'ín Simón Pedro kixin:

—Jaha Simón, xjeen Jonás, ¿á antsí tjuana jaha, a ntá tí í so la kánhyó? —ichro ch'án.

Ntá kjuátehe ch'ín Pedro ntáchro ch'án kixin:

—Jeén, Ìnchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha la t'ayakonhén tí kolélo kuèntana —ichro ch'án.

<sup>16</sup>Ntá yóxin kjuanchankí ch'ín Jesús ínaá kixin:

—Jaha Simón, xjeen Jonás, ¿á tjuana jaha? —ichro ch'án.

Ntá kjuátehe ch'ín Pedro ntáchro ch'án kixin:

—Jeén, Ìnchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha la t'ayakonhén tí kolélo kuèntana —ichro ch'án.

<sup>17</sup>Ntá níxin kjuanchankí ch'ín Jesús kixin:

—Jaha Simón, xjeen Jonás, ¿á tjínkavan tí janhan? —ichro ch'án.

À ntá k'uává ch'ín Pedro kixin níxin kjuanchankí ch'ín Jesús kixin á tjínkaon ch'án tí jehe ch'án ntá ntáchro ch'án kixin:

—Jaha Ìnchéni, ó noha kaín xín nkehe. Ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha t'ayakonhén tí kolélo kuèntana. <sup>18</sup>Ntá ijnko nkehe chaxín tjetjónka kixin tí naxá k'uéntasoyá jaha k'uék'inkaya ká jahvá la ko k'uékjia tí k'uékóxrjínhan jaha. À ntá tíó tsotáda jaha ntá tsjéntoá tjá ntá í jnko nkexro sintak'inkaya ka la ko sátsjiko sín tí tóxrjíanhya sáchrókjuia —ichro ch'án.

<sup>19</sup>À ntá tíhi mé chrónkaxín ch'ín Jesús kixin nkexrí ts'enxín ch'ín Pedro na mé t'axrjéxín nkexrí tsochjéhe ch'án Dios kjuasáya. Ntá kjuixin ntáchro ch'ín Jesús kixin:

—Chrèhé tí janhan —ichro ch'án.

### Nkehe tsonhen tí ch'ín antsí tjuéhe ch'ín Jesús

<sup>20</sup>Ntá kuínkátjía ch'ín Pedro ntá k'uíkon ch'án kixin tinkáchréhe tí ch'ín

antsí tjuèhe ch'ín Jesús, na mé tí nkexro kjuák'e chjinaxón tí kjuák'e ch'ín Jesús tí kjóne sín tsíkjanckhíhi ch'án tí ch'ín Jesús kixin nkexro sinckekji ch'án.\*

<sup>21</sup>Ntá ch'ín Pedro k'uíkon ch'án kixin tinkáchréhe tí ch'ín a ntá kjuanchankíhi ch'án tí ch'ín Jesús kixin:

—Inchéni, ¿a ntá tí ch'ín i la nkehe tsonhen ch'án a? —ichro ch'án.

<sup>22</sup>Ntá kjuátehe ch'ín Jesús kixin:

—Tí tjinckavan naxa chrókjuak'echón ch'án tí chrókjan la jaha la chrókjuiatéhya tíha. Ntá jaha la chréhe tí janhan —ichro ch'án.

<sup>23</sup>Ntá kjuankixin kjo tí sín k'uék'a-jiko ch'ín Jesús kixin ts'enhya tí ch'ín a. Ntá jehya kixin ntáchro ch'ín Jesús

kixin chrók'uenhya tí ch'ín a. Náhi. Ó jehí ntáchro ch'án kixin tí tjinkaon ch'án naxa chrókjuak'echón tí ch'ín a tí chrókjan ch'án chrókui ch'án chrókjuiatéhya tí ch'ín Pedro chrókjuanchankí ch'án nkehe tsonhen í jnko chojni.

<sup>24</sup>A ntá tí nkexro a mé tí nkexro chrónka kixin chaxín kónhen kaín tíha la ko ikjin ch'án tí xroon i. Ntá ó noheni kixin tí nkehe tsíkjin ch'án la chaxín ntoá tíha.

<sup>25</sup>Naxa siín nchónhya nkehe kjuakoxin ch'ín Jesús kjinhya janhan. Tí chrók'óna jnkojnko jnkojnko tíha ntáxrjan kixin kjá chrókjuachahya tí chjasintajni chrók'uinka kaín tí xroon chrók'óna xikaha. Amén. Ó tjen.

---

\*21:20 Juan 13.25

## Tí xrā kjuích'e tí sín kjueyá ch'ín Jesús

### Itsi Nchakuen Dios

**1** Tjuaha jaha Teófilo na tí libro saoxín mé kjan̄ kaín nkehe kjuako ch'ín Jesús la ko tí xrā kjuích'e ch'án tí xrankíxixín <sup>2</sup> hasta tí yaon sákjuí ch'án nkaya nkajní. Ā ntā ti naxā sákjuíhya ch'án nkajní la kjueyá ch'an tí sín sich'ehe ch'án xrā la ntá tí Nchakuen Dios mé kjuínkítsa ch'án ntá nixjehe ch'án sín la k'uetuenhen ch'án sín kixin tsonohe sín nkehe tí xrā chrókjuich'e sín. <sup>3</sup> Tió kjuixin k'uén ch'án ntá kónoxín kixin tjechón ch'án, k'uíkon tí jehe sín la ko cuarenta yaon mé k'uíkon sín ch'án jnkoyaxón. Itsjé nkehe kjuakoxín ch'án kixin tsonoexín sín kixin chaxín tjechón ch'án la ko kjuako ch'án nkexrí tí kjuachaxin kuènte Dios.

<sup>4</sup> Ti naxā kójnkotséko ch'án tí sín k'uájiko ch'án la jehe ch'án mé k'uetuenhen ch'án sín kixin naxā sátsjixinhya sín tí chjasin Jerusalén. Chronka ch'án kixin:

—Chróchonhénrá ntiho chrók'uayéhérá tí nkehe tsjanjon T'aná, me tí nkehe kuinhínrá xrjanka janhan. <sup>5</sup> Ā ntá chaxín ch'ín Juan ìntā ó kuíkítexín ch'án chojni. Ā ntá ijie kánhyó itsjé yaon ntá jahará la Nchakuen Dios la tsikitiaxínrá.

### Sákjuí ch'ín Jesús nkaya nkajní

<sup>6</sup> Ntá ti naxā kójnkotséko sín ch'ín Jesús, kjuanchankíhi sín ch'án kixin:

—Jaha Ìnchéni, ¿á tsjánjonhya kjuachaxin jaí ts'etqanni chjasénni Israel inaá? —ichro sín.

<sup>7</sup> Ntá kjuátehe ch'ín Jesús kixin:

—Náhi. Chontahyará kjuachaxin tsonohará nkesá tsonhen tíha. Jehó T'aná chóna kjuachaxin ts'etqan

tíha. <sup>8</sup> Ntá itsi tí Nchakuen Dios ntá ts'ayéhérá kjuachaxin sátsjichronkará nkehe tí xrā kjuít'a, mé sátsjirá tsjákohérá kaín sín chjasin Jerusalén, la ko estado Judea, la ko estado Samaria, la ko kuènte chjasintajni.

<sup>9</sup> Ntá kjuixin nixja ch'ín Jesús ntá xrinahya tinkák'ít'ótjen ch'án sákjuí ch'án la tjejótsjehe sín. Sákjuí ch'án hasta kjuák'enkákjan ch'án ijnko tjuí. Ntá í t'íkonyha sín nkerí kjuíji ch'án. <sup>10</sup> Ntá naxā tjejókonta sín tí sákjuí ch'ín Jesús nkajní, ā ntá xrinahya titàya k'uíkuèn sín yaá chojni ntoa tjejóyá sín ka tjóá tjejó sín chjinaxón tí tjejó tí jehe sín. <sup>11</sup> Ntá tí sín a mé ntáchro sín kixin:

—Jahará chojni kjuíxinrá estado Galilea, ¿nkehe tsonhen naxā kontará nkajní? Xíkaha tjejokontará sákjuí Jesús la ko mé xíkaha xiki ch'án inaá —ichro sín.

### Xreyá ch'ín Matías tsjiatéhe lùké ch'ín Judas

<sup>12</sup> Na ntá kjanxin sín tí jnā it'in Olivo na ikjan sín chjasin Jerusalén. Tíha a mé kjínhyó tjen kixin ó xíkahó k'uetqan tí ley sátsji sín tí yaon t'ok'éhe sín. <sup>13</sup> Na ntá kjuíji sín tí chjasin ntiha ntá k'uit'ótjen sín tí yóxin piso tí nchia tsíkjen sín k'uék'ejó sín. Mé ntiha tjen ch'ín Pedro, la ko ch'ín Jacobo, la ko ch'ín Juan, la ko ch'ín Andrés, la ko ch'ín Felipe, la ko ch'ín Tomás, la ko ch'ín Bartolomé, la ko ch'ín Mateo. La kjaxin ch'ín Jacobo, mé it'é ch'án it'in Alfeo, la ko ch'ín Simón, mé tí ch'ín a mé kuènte tí partido cananista, la ko kjaxin ch'ín Judas, savé ch'án mé it'in Jacobo. <sup>14</sup> Kaín sín kójnkotsé sín ntiha tsonixjehe sín Dios la ko k'uéjoko sín tí kichó tí ch'ín Jesús la ko tí tjan María, iné ch'án, la ko iso chojni chjin.

<sup>15</sup> Ntá tí yaon a tí ch'ín Pedro k'uínkatjen ch'án kjuák'exín toté ch'án jnkosiné tí tjejó tí sín tinkáchónki Ìnchéni mé

ijnko ciento ikán chojni mé tsíkójnko tsé ntiha. Ntá ntáchro ch'án kixin:

<sup>16</sup>—Kíchóni, t'ichjánxin tsoxiteyá éxí nixja xroon itén Dios éxí tsínixja ch'ín David tsíchrónka Nchakuen Dios nkehe sich'e ch'ín Judas. Tí ch'ín Judas mé kjuíkao ch'án tí sín tsotsé ch'ín Jesús.

<sup>17</sup>Jehe ch'án mé kjaxin k'uék'ajikoni la jnkokón xra k'uáyèkoni ch'án. <sup>18</sup>A ntá jehe ch'án mé sákjuúk'enaxín ch'án ijnko nonte tí chichaon kjuacha ch'án kixin tí jié kjuasin ch'án. Ntá k'uánótjen ch'án la ikja ch'án k'uitja nonte la xitjehe tsee ch'án k'uaxrje kaín sîntandé ch'án. <sup>19</sup>Ntá xíkaha kónohe kaín tí sín chjasin Jerusalén ntá tí nonte kjuínchek'in sín nkívee sín Acéldama mé t'axrjéxín kixin ijnko nonte síin ijní. <sup>20</sup>Tí xroon Salmo mé nixja xíkíhí:

Tsitóhe ntoé ch'án a,  
la kohya nkexro ts'ejó ntiha.

La ko kjaxin ntáchro kixin:

Í jnko nkexro ts'áyéhe tí xra kuènte ch'án.<sup>†</sup>

Mé xíkaha tsíkjin ch'ín David.

<sup>21</sup>Tí tjejóni ntihi la síin chojni ó k'uájikoni xráxín tí k'uék'ajikoni Ìnchéni Jesús <sup>22</sup>desde k'uíkonni nkexrí kuíkite ch'ín Juan tí jehe ch'án la ko hasta k'uíkonni sákjuí ch'án nkaya nkajní. Ntá ijie t'ichjánxin tsoxreyá jnkojín tí sín a tsojnkotsékoni sín kixin kjaxin tsochrónka sín kixin chaxín xechón Ìnchéni Jesús —mé xíkaha chrónka ch'ín Pedro.

<sup>23</sup>Ntá kjuenkayáxin sín tsonoxín yaá chojni mé tí ch'ín José, t'ikón ch'án Barsabás la ko Justo, la ko kjaxin í jnko ch'án it'in Matías. <sup>24</sup>Ntá nixjehe sín Dios la ntáchro sín kixin:

—Ìnchéni jaha mé choxian asén kaín chojni. Tjáhóhèni nkexro tsonhen tocar xra tí yaá tí nkexro í kónoxín <sup>25</sup>tsjiatéhe xra apóstol kuènte ch'ín Judas. A ntá tí

ch'ín Judas mé kuítóhe ch'án tí xra kixin kjuasin ch'án ijie la ntá ijie sákjuí ch'án tjetjasóte ch'án —ichro sín.

<sup>26</sup>Ntá kjuích'e sín suerte ntá xrínahya kónhen tocar tí ch'ín Matías, ntá tuénxín tí hora a kuákja ch'án xra k'uéjókó ch'án tí tejnko tí sín kjueyá Ìnchéni.

## Ó kui Nchakuen Dios

**2** Ntá ó kui tí yaon kia Pentecostés ntá kaín tí sín tinkáchónki Jesús mé kójnko tsé sín jnkokoá tjejó sín. <sup>2</sup>Xrí-nahya kuínhin sín ijnko tóvéntó kuix-in nkajní. Tí tóvéntó mé éxí ijnko xrín-to fuerte chjehe. Kuenté tí nchia tjejóx-enhen sín mé kóvéntó kjaxin. <sup>3</sup>Ntá xrínahya k'uíkon sín nkehe éxí xrohi nene tsjehe. Ntá tíha xíkayehe la k'uéjókjen jnkojnko kja tí jehe sín. <sup>4</sup>Na ntá kaín sín k'uáyéhe sín tí Nchakuen Dios ntá kjuankíxin sín nixja sín í jnko nkíva kixin Nchakuen Dios kjuínkítsa sín nixja sín.

<sup>5</sup>A nta tí yaon a la tí chjasin Jerusalén k'uéjó chojni judío tjinkaon sín sinchex-iteyéhe sín tí nkehe tinkáchónki sín, mé tsíkjin sín nkuíxín chjasintajni. <sup>6</sup>A ntá jehe sín mé tsíkinhin sín tí tóvéntó ntá tsíkóhjin nchónhya chojni. Ntá í noehya sín nkehe chrókjuenkayáxin sín kixin jnkojnko tí jehe sín mé kuínhin sín kixin nixja tí sín a jnkojnko nkívee sín. <sup>7</sup>Ntá síxranqa sín, chrakon sín ntá jehe sín mé tjo sín kíchó sín kixin:

—¿Á jehya kaín tí sín tjejónixja mé tsíkjin sín estado Galilea? <sup>8</sup>La ¿nkekuènté tjejótinhinni kixin nixja sín jnkojnko nkíveeni? <sup>9</sup>Kixin ntihi mé síin chojni tsíkjin chjasin Partia, la ko Media, la ko Elam, la ko Mesopotamia, la ko Judea, la ko Capadocia, la ko Ponto, la ko Asia, <sup>10</sup>la ko Frigia, la ko Panfilia, la ko Egipto la ko nkuíxín Africa antsí nó ntaha Cirene. La ko kjaxin chojni romano tjejó ntihi. Iso tí sín a mé

<sup>†</sup>1:20 Salmos 69.25; 109.8

chaxín tsíkokjéxín judío, la í so la tin-káchónki sín Dios éxí tí sín judío xíkaha.

<sup>11</sup> La kjaxin síin chojni tsíkjixín Creta, la ko Arabia. Mé xíkaha kaín ni tsíkjixínni tí chjasin a mé tsíkinhinni tjeónixja tí sín a tí kjuaxroan kuènte Dios jnkojnko nkíveeni —mé xíkaha ichro sín.

<sup>12</sup> Ntá tóxakonhen kaín sín la chrakon sín ntá kjuanchankíhi kíchó sín kíxin:

—¿Nkehe t'axrjexín kaín tíha? —ichro sín.

<sup>13</sup> A ntá iso sín kjuanoá sín ntáchro sín kíxin:

—Tsékoan tí sín a —ichro sín.

### A ntá ch'ín Pedro chénka tí sín síin

<sup>14</sup> Ntá jehe ch'ín Pedro mé k'uínkatjen ch'án, kjuák'exín toté ch'án la ko tí tejnko sín apóstol mé k'uínkatjen sín la ntá ch'ín Pedro mé itsen nixja ch'án. Ntáchro ch'án kíxin:

—Jahará chojni judío la ko jahará tje-jorá chjasin Jerusalén. Kaínrá tje-jorá tin-hínrá tí nkehe tsoxrjanka. <sup>15</sup> Tí sín tjejó ntili la jehya tsékoan sín éxí ntáchrórá, kíxin na ntá las nueve nchítjen la kohya nkexro tsékoan. <sup>16</sup> Tíhi mé tsíchrónka ch'ín profeta Joel:

<sup>17</sup> Ntáchro Dios kíxin: Itsi ijnko yaon tsjixixín

ntá tsochr'an Nchakuenná ntá ts'áyéhe chojni.

Ntá tí xjaanrá ntoa la ko tí xjaanrá chjin mé tsonixja tan kuèntana.

La ko tí sín ntasoá mé titàya ts'íkuèn sín tí nkehe tsjákoha sín.

La ko tí sín ó táda la kotáchrién sín ts'íkonxín sín kíxin nkexrí tjinkaon Dios.

<sup>18</sup> Tí yaon tsonhen kaín tíha la tsochr'an tí Nchakuenná ts'áyéhe kaín tí sínntoa ch'ena xrá la ko tí síchjin kjaxin la tsochrónka sín tanná.

<sup>19</sup> Ntá janhan mé tsjákoxian ijnko kjuachrakon nkajní.

A ntá chjasintajni tsjákoxian kjuaxroan: mé ts'ixin ijní la ko xrohi la ko itjui tsík'óna ihnchi.

<sup>20</sup> Mé tí yaon la ts'inkaséyanxínnya, ts'óna ts'ixin tie.

A ntá tí nitjó mé ts'óna ijní.

Xíkaha senó tsonhen ntá itsi Ìnchéni.

Tíhi mé ijnko yaon imá jié la imá náxrjón.

<sup>21</sup> A ntá kaín tí nkexro tsjanchehe ihnié Ìnchéni kíxin tsjinkítsa sín mé tsaá sín.<sup>‡</sup>

Mé xíkaha tsíchrónka ch'ín Joel.

<sup>22</sup> Jahará chojni israelita tinhínrá tí nkehe tsoxrjanka. Tí ch'ín Jesús tsíkjixín chjasin Nazaret mé Dios kjuakoxin ch'án kíxin tsíchr'án ch'án kíxin kjuasin ch'án itsjé kjuaxroan jié k'uíkonrá la ko kjuako ch'án kíxin Dios tsíchjéhe ch'án kjuachaxin kíxin tjinkaon ch'án chrók'uikonrá. Jahará ó jína nohará kaín tíha. <sup>23</sup> Kjonté xíkaha k'uíkonrá la jahará itserá ch'án éxí tsíkjenkayáxin Dios ósé. A ntá jahará kjuínchek'ayéhérá ch'án tí sín jínahya, a ntá tí sín jínahya mé k'óyán sín ch'án, kjuak'enkanı sín ch'án ijnko ntacruz. <sup>24</sup> Kjánchó Dios la kjuínchexechón ch'án inaá la kjuatsen ch'án tí kjuatjoté kuènte kjuach'én kíxin ntá ti kjuach'én xitjahya ts'etuènnen tí jehe ch'án. <sup>25</sup> A ntá ósé tí ch'ín rey David tsíchrónka ch'án kuènte Jesús ntáchro ch'án kíxin:

Jaha Ìnchéni t'íkuən kíxin jnkochríxín tjétaón ntja tí xritjak'é janhan.

Jaha mé itjen tjaná chjina kíxin chróko-hya jié chrókjuásian.

<sup>26</sup> Méxra imá chéhe asenná. Ir'va tsjexian tí nkehe náxrjón.

Ó nòna kíxin kohya nkehe ts'atsínka kjonté its'én.

<sup>‡</sup>2:21 2.17–21 Joel 2.28–32

<sup>27</sup> Ó nòna kíxin tí jaha tsitòéhya asenná chríkjan tí síin chojni tsík'en.

Tsjánjonhya kjuachaxin kíxin tsoxíka ntona kíxin janhan mé ijnko nkexro t'aha xra jína tjuèhe.

<sup>28</sup> Jaha mé kjuákona tí ntja tsjanjon kjuachón. Jaha mé nchechàna kíxin t'ayakonna.<sup>¶</sup>

Mé xíkaha tsíkjin ch'ín David.

<sup>29</sup> Kíchóni tìtohéra tsontáxrjan kíxin ch'ín David, tí nkexro k'uaxrjeníxinni mé tsík'én ch'án la ko tsíkjixravá ch'án. Ntá naxa noheni nketí tsíxravá ch'án.

<sup>30</sup> A ntá ch'ín David mé ijnko nkexro tsíchronka itén Dios la ó nohe ch'án kíxin chaxín Dios chrónka kíxin ijnko nkexro ts'axrjeníxin ch'án mé ts'óna rey mé ts'etoan éxí jehe ch'án k'ue-toan ch'án. <sup>31</sup> Mé xíkaha ch'ín David la ósé ó nohe ch'án nkehe tsonhen la mé chrónka ch'án kíxin tsoxechón Cristo la ko ntácho ch'án kíxin tí asén ch'án tsi-toehya tí síin tí sín tsík'en la ts'itjáyanya tí cuerpo kuènte ch'án. <sup>32</sup> Méxra Dios kjuínchexechón tí ch'ín Jesús, mé k'uíkoni kaín ni la mé chrónkani kíxin chaxín tíha. <sup>33</sup> Ntá ijie Jesús mé sákjuiko ch'án Dios la nàngo itja chjina Dios mé tjen ch'án. Ntá tsintácho It'é ch'án Dios kíxin tsochr'án ch'án tí Nchakuen ch'án. Ntá jie ó kui la ó k'uíkonrá la ko kuín-hínrá nkehe kónhen. <sup>34</sup> Tí ch'ín David la jehya jehe ch'án sákjuí nkaya nkajní, kíxin jehe David ntácho ch'án kíxin:

Ìnchéni Dios mé ntáche tí Ìnchéni kíxin:

“Tjak'e tjaná chjina ntiho tsétoan, <sup>35</sup> tsjixinjian kaín xín tí sín nínkakonhan la tsjachahya sín ts'etoan sín kíxin jahvá mé tsétoan.”<sup>§</sup>

Mé xíkaha tsíkjin ch'ín David.

<sup>36</sup> Ntá kaín rá chojni israelita chrókónohará chaxín kíxin jehe tí ch'ín

Jesús ó kjuakénkanirá tí ntacruz la Dios mé kjuích'éna Ìnchára ijie, mé tí Cristo —mé xíkaha chrónka ch'ín Pedro.

<sup>37</sup> Ntá tí kuínhin sín tíha ntá imá kóx-akonhen asén sín. La ntá kjuanchankíhi sín ch'ín Pedro la ko tí í so sín kjueyá ch'ín Jesús. Ntácho sín kíxin:

—Kíchóni, a ntá jie la ¿nkexrí chrókjuich'eni?

<sup>38</sup> Ntá kjuátehe ch'ín Pedro ntácho ch'án kíxin:

—Chrókuitohérá tí ijíará la chrórxáinkáonrá Dios. Ntá chrókuikitiaxínrá ihnjé Jesucristo ntá Dios mé tsjakjihinhará tí ijíará ntá jehe ch'án tsjanjon ch'án Nchakuen ch'án ts'ayéhéra. <sup>39</sup> Dios mé sinchekitonhanrá ch'án tí Nchakuen ch'án ts'ayéhéra jahará la ko xjaanrá la ko kjaxin tsochjéhe ch'án Nchakuen ch'án kaín xín tí sín tjejó ikjín. Mé jehe ch'án tsochjéhe ch'án Nchakuen ch'án jnkojnko tí nkexro tsjeyá ch'án.

<sup>40</sup> Mé xíkaha ntácho ch'ín Pedro la ko í so nkehe ntácho ch'án. Nta nixjehe ch'án sín inaá, ntácho ch'án kíxin:

—Chrókuitohérá tí jínahya tjenkayáxin tí chojni síin chjasintajni kíxin jahará me jína chrókuaará.

<sup>41</sup> Ntá kaín tí sín kuítekaon tí nkehe chrónka ch'án la ntá kuíkite sín la tí yaon a kóchjina iní mil chojni kjuankíxin tinkáchónki Ìnchéni Jesús la k'uíto tí sín ó xráxín síin. <sup>42</sup> Ntá kaín sín mé jína k'uek'ejó sín mé kuítekaon sín tí nkehe kjuako tí sín kjueyá Jesús la kjuínkítsa sín kjuanjon sín tí nkehe chrókjóné tí í so sín la ko chjéhe sín Dios kjuasáya la ko kójnkotsé sín kíxin sine sín niotja xraxinkakonxín sín kíxin ik'uéni Ìnchéni.

<sup>¶</sup>2:28 2.25–28 Salmo 16.8–11

<sup>§</sup>2:35 2.34–35 Salmo 110.1

### Mé xikaha k'uejó tí sín xrankixín tinkáchónki Ìnchéni

<sup>43</sup> La ntá kaín tí í so sín mé chrakon sín kixin tí sín tsíkjeýá Jesús kjuasin sín itsjé kjuaxroan. <sup>44</sup> La kaín tí sín tinkáchónki Jesús mé jnkokoá k'uejó sín la jnkokoá chóna sín tí nkehe sine sín. <sup>45</sup> Kjuínchekji sín tí nkehe chóna sín ntá k'óxikayehe sín tí chichaon la chjéhe sín tí sín chónahya. <sup>46</sup> Jnkojnko yaon kójnkotsé sín tí nínko la ntá jnkojnko ntoe sín kjóneko kichó sín. La ko kjóno sín niotja kixin xraxinkakonxín sín kixin ik'uéni Ìnchéni la ko kjuaxróxin k'uejó sín la kohya nkexro kjuínchehnke. <sup>47</sup> Kjuanchehe sín kjuasáyé Dios. Ntá kaín chojni k'uechónthehe sín kjuasáya. A ntá jnkojnko yaon Ìnchéni mé kjueyá iso chojni kixin tsotsjé tí sín tsaá.

### Kuítohe jína ijnko nkexro xitjahya tji

**3** Ijnko yaon tí ch'ín Pedro la ko ch'ín Juan mé chrin sín sákjuí sín tí tjen tí nínko. Mé kjuíji sín las tres kónjín, tí hora mé nixjehe sín Dios. <sup>2</sup> Kaín yaon kjuák'e ntiha ijnko ch'ín tsíkokjéxín xitjahya tji. Sátsíkjiko sín ch'án tí nínko la tsíkjak'etjaxín sín ch'án tí ntója puerta mé it'in Ntója Náxrjón. Ntaha tjetjan-chak'éhe ch'án chichaon tí sín sít'ixenhen ntiha. <sup>3</sup> Ntá xríñahya k'uíkon tí ch'ín xitjahya tji kjuíji tí ch'ín Pedro la ko ch'ín Juan ts'ixenhen sín nínko, a ntá kjuanchak'éhe ch'án sín chichaon. <sup>4</sup> Na ntá ch'ín Pedro la ko ch'ín Juan mé komá sín tí ch'ín a la ntá ntáchro ch'ín Pedro kixin:

—Tsjehé ntihi.

<sup>5</sup> A ntá tí ch'ín a tjetsjehe ch'án jína kixin ách'e ichrén nkehe tsjanjon tí sín a, ichro ch'án. <sup>6</sup> A ntá ch'ín Pedro ntáchro kixin:

—Na chontahya plata ni oro kjánchó tí nkehe chonta la tsotjahá. Mé kjuachaxin ihnié Jesucristo, tí nkexro tsíkjixín ch-

jasin Nazaret, la t'inkatjen itjia —mé xikaha ichro ch'ín Pedro.

<sup>7</sup> Ntá ch'ín Pedro mé itsé ch'án tí tja chjina tí ch'ín xitjahya tji ntá k'uínkatjen ch'án. Ntá xríñahya ó kósóji tí nta ntoá toté ch'án. <sup>8</sup> Ntá tí ch'ín xitjahya tji la chrika ch'án la kjuák'exín toté ch'án ntá kjuankixin ch'án itji ch'án. Ntá k'uixenko sín ch'án nkaxenhen nínko. Tjetji ch'án la ko chrika ch'án la chjéhe ch'án kjuasáya Dios. <sup>9</sup> Na ntá kaín tí chojni sín tí chjasin ntiha la k'uíkon sín kixin ó tji ch'án la ko chjéhe ch'án kjuasáya Dios. <sup>10</sup> Ntá chrakon sín kixin xikaha tsíkónhen kixin tsíkjatsqan sín kixin jehe tí nkexro kjuák'etjaxín kjuanchak'á ch'án chichaon ntója nínko it'in Ntója Náxrjón.

### Nixjehe ch'ín Pedro tí chojni síin tí ntásin Salomón

<sup>11</sup> Na tí ch'ín xitjahya tji la mé títoehya ch'án tí ch'ín Pedro la ko ch'ín Juan. Ntá kaín xín tí sín síin ntiha chrakon sín kuinká sín sákjuítsjehe sín tí ntásin kuènte nínko it'in ntásin Salomón kixin ntaha tjejó tí sín a. <sup>12</sup> Ntá tí k'uíkon ch'ín Pedro xikaha la ntáche ch'án sín kixin:

—Jahará chojni israelita, ¿nkekuènte chrakonrá jahará la ko nkekuènte komaráni? ¿Á tjenkayáxinrá kixin jehóni kjuínchekitoheni jína tí ch'ín i kixin jehóni chónani kjuachaxin la ko kixin imá tinkáchónkini Dios? <sup>13</sup> Náhí. Tí Dios k'uekinkáchónki ch'ín Abraham, la ko Isaac, la ko Jacob mé imá chjéhe ch'án kjuachaxin tí Xjeen ch'án Jesús. Kjánchó jahará tsíkjikénhenrá ch'án tí sín t'etqan. Ntá tí ch'ín Pilato mé tjinkaon ch'án chrók'uatjánta ch'án tí ch'ín Jesús kjánchó jahará la tjinkákonhyará xikaha. <sup>14</sup> A ntá jahará chrókjuanchiará chrókuítohe sáchrókjuí tí nkexro tjóá jína asén. A ntá náhí. A ntá jahará mé tjinkáonrá sátsji ijnko chojni

chón̄ta nchón̄hya j̄e. <sup>15</sup> A ntá jahará tsík'oyánrā tí nkexro tjanjon kjuachón. A ntá Dios mé kjuínchexechón tí jehe ch'án la mé x̄ikaha k'uíkonn̄i la chrónkani. <sup>16</sup> Tí kjuachax̄ién ihnié Jesús mé tinkáchónk̄ini la ntá tíha mé kuítōex̄ín j̄ina tí nkexro k'uíkonn̄rā la ko choxinrā. Tí ch'ín a mé kuítekaon ch'án ntá kuítōhe ch'án j̄ina. Mé x̄ikaha ó k'uíkonn̄rā kaín rá.

<sup>17</sup> Kíchóni ó nõna kíxin tió jahará la ko tí sín t'etōan k'oyánrā Jesús la ni kónoahyarā nkehe kjuich'erá.

<sup>18</sup> Ntá ó xiteyá tí nkehe tsíntáchro Dios tsínixj̄ax̄ín tí sín tsíchrónka itén ch'án kíxin tí Cristo t'ichj̄ánx̄ín tsjasóte ch'án. <sup>19</sup> Méx̄rā tsitōh̄erá ij̄járā ntá xráinkáonrā Dios ntá jehe ch'án mé ts'óx̄ika ij̄járā ntá Ìnchéni mé sinchekitōhará ch'án j̄ina. <sup>20</sup> Ntá jehe ch'án mé tsochr'án Jesucristo ínaá la xrā ó tsi kíxin tsaáxinrā. <sup>21</sup> Na ntá ijie la Jesucristo la nkaya nkaj̄ní ntahó tsitōhe ch'án hasta tsjasiyóxinjian Dios kaín nkehe éx̄i tsíntáchro ch'án tsínixj̄ax̄ín ch'án tí sín tsíchrónka itén ch'án ósé.

<sup>22</sup> A ntá senó tí ch'ín Moisés tsíchénka tí sín tsík'axrjeníx̄inni kíxin: “Ìnchéni Dios mé tsochr'án ijnko nkexro ts'axrjeníx̄inrā tsochrónka itén ch'án éx̄i tsíchr'án ch'án tí janhan. T'ichj̄ánx̄ín tinhínrā kaín tí nkehe tsontáchro ch'án. <sup>23</sup> A ntá tí chojni titekakonhya tí nixja tí nkexro a la ts'itj̄áyan sín la tsitōhe sín tí nación Israel,”\*\* mé x̄ikaha tsíchrónka ch'ín Moisés.

<sup>24</sup> Kaínx̄ín tí sín tsíchrónka itén Dios kjuankíx̄ix̄ín ch'ín Samuel la ko kaín tí sín kui chr'éx̄in mé chrónka sín kíxin kaín tíha tsonhen x̄ikaha tí yaon i. <sup>25</sup> Mé tí nkehe tsíntáchro Dios tsínixj̄ax̄ín ch'án tí sín tsíchrónka itén ch'án kíxin x̄ikaha chrók'uayéhérá jahará tí nkehe

chrókjuanjon ch'án kíxin chrók'uejorá j̄ina. Dios tsík̄jich'éna ch'án ijnko pacto mé nixjehe ch'án tí sín tsík'axjeníx̄inrā mé tsíntáche ch'án tí ch'ín Abraham kíxin: “Kaínx̄ín chojni chjasintajni mé tsoyaonx̄ín sín kíxin ijnko nkexro ts'axrjeníx̄in tí jaha.”†† <sup>26</sup> Dios kjuínchexechón ch'án tí Xjeen ch'án la sax̄oin ichr'án ch'án tí tjejorá jahará israelitará kíxin chrókjuintayaonrā ch'án kíxin jnkojnko tí jahará chrókuitōh̄erá tí nkehe j̄inahya ich'erá —ichro tí ch'ín Pedro.

### Tí ch'ín Pedro la ko ch'ín Juan nkayakon tí sín t'etōan

**4** Ch'ín Pedro la ko ch'ín Juan la nax̄a tjejónixjehe sín tí sín tsíkójnkotsé ntá xrínahya ikui tí sín nchat'á la ko tí ch'ín t'etuenhen tí sín soldado kuènte tí n̄inko la ko tí sín saduceo. <sup>2</sup> Imá kónínkaon sín kíxin ch'ín Pedro la ko ch'ín Juan kjuakohe sín tí sín tsíkójnkotsé nkexr̄i tsoxechón chojni tsík'en kíxin x̄ikaha xechón ch'ín Jesús. <sup>3</sup> Ntá kuínhin sín x̄ikaha ntá itsé sín tí sín a ntá sákjuíko sín, chr'áx̄enhen sín ntōechiso. Ntahó k'uējó sín hasta kóyaon kíxin ó ntá kóntó. <sup>4</sup> A ntá nchónhya tí sín tsíkinhin tí tan a la kuítekaon sín. Ntá kjuixraká tí número tí chojni ntoa mé in'ó mil chojni ntoa ó.

<sup>5</sup> A ntá tí yaon chr'éx̄in kójnkotsé tí chjasin Jerusalén tí sín t'etōan kuènte tí sín judío la ko tí sín tjako tí ley. <sup>6</sup> Mé kjaxin ntaha tjen ch'ín Anás, mé jehe ch'an mé tí nchat'á imá t'etōan, la ko ch'ín Caifás, la ko kjaxin ch'ín Juan, la ko ch'ín Alejandro, la ko kaín tí chojni kjéhya tí nchat'á t'etōan. <sup>7</sup> Ntá k'uetōan sín kíxin síxrakoa ch'ín Pedro la ko ch'ín Juan. Ntá k'uējó sín jnkosiné la ntá kjuanchankíhi sín ntáchro sín kíxin:

\*\* 3:23 3.22–23 Deuteronomio 18.15,19

†† 3:25 Génesis 22.18



—¿Nkexro kjuanjon kjuachaxin o nkexro kjuachaxin ihnié kixin xikaha ich'era tí nkehe?

<sup>8</sup>Ntá ch'ín Pedro imá chóna ch'án kjuachaxin kuente Nchakuen Dios ntá kjuátehe ch'án ntáchro ch'án kixin:

—Jahará chojni t'etoan kuente chjasin la ko jahará sín táda kuente chjasin Israel, <sup>9</sup>jahará mé tjanchankirá kixin nkexrí kuítohe ijnko chojni níhi jína kixin tjinkáonrá tsonohará. <sup>10</sup>Ntá tinhínrá jína tí nkehe tsochrónkaxínni kixin kaín rá chojni chjasin Israel tsonohará kixin tí ch'ín i itjen ntihi mé kuítohe ch'án jína kjuachaxién ihnié Jesucristo, tí nkexro tsíkijixin chjasin Nazaret. A ntá jahará mé tsíkjakénkanirá ch'án tí ntacruz la ntá Dios kjuínchexechón ch'án inaá. <sup>11</sup>Tí ch'ín Jesús i mé tí xro náxrjónhaya kuítoéntará tió kjuich'énará tjat'o ntá mé jie k'óna tí xro tjetooan.<sup>‡‡</sup> <sup>12</sup>Kohya í jnko nkexro chóna kjuachaxin chrókuaáxinni kixin kohya í jnko ihnié chojni ntihi chjasintajni chrókuinkáchónkini chrókuaáni —mé xikaha ichro ch'ín Pedro.

<sup>13</sup>Tí síxreé mé k'uíkon sín kixin ch'ín Pedro la ko ch'ín Juan mé nixja sín kaín asén sín la ntá kónohe sín kixin tí sín a mé noehya sín xroon la tjetuanhaya sín. Ntá chrakon tí sín t'etoan ntá kjuátsoan sín kixin tí sín a mé tsík'ajiko ch'ín Jesús. <sup>14</sup>A ntá tí ch'ín tsíkitohe jína mé ntiha tjejóko sín ch'án. Méxra xitjahya tsjanchia sín jie tsjasóte tí sín a. <sup>15</sup>Ntá tí síxreé a mé k'uetooan sín kixin tí sín a ts'axrje sín ntója ntá jehó sín k'uéjoxenhen sín nchia ikjo sín kichó sín. <sup>16</sup>Ntá ntáchro sín kixin:

—¿Nkehe chrókjuich'eheni tí sín a? Kaínxín tí chojni ntihi chjasin Jerusalén mé ó k'uíkon sín kixin kjuínkítsa Dios tí sín a ntá kjuasin sín ijnko kjuaxroan jie ntá xitjahya tsontáchroni kixin chaxín-

haya tíha. <sup>17</sup>Í tjinkakonhyani kixin naxa tsochrónka sín tíha kixin naxa tsinhin chojni. Méxra ts'etoanni kixin í tsochénkahya sín ninkehró tí ihnié Jesús.

<sup>18</sup>Na ntá k'uíyehé sín tí sín a inaá ntá k'uetuenhen sín kixin ninkehó chrónixja sín la ko chrókjuako sín ihnié Jesús, ichro sín. <sup>19</sup>A ntá ch'ín Pedro la ko ch'ín Juan kjuátehe sín ntáchro sín kixin:

—Tjenkayáxinrá jahará, ¿á chrókóxrjínhin Dios chrókjuintaxiteyáharáni jahará o chrókjuinchexiteyéhéni tí jehe ch'an? <sup>20</sup>A ntá jeheni la xitjahya tsítoheni tsochrónkani tí nkehe ó k'uíkonni la ko tí nkehe kuínhinni —ichro sín.

<sup>21</sup>A ntá kjónté xikaha kuínhin tí síxreé la jiehe k'uetooan sín ntá kjuanjon sín kjuachaxin kixin sátsji tí sín a kixin k'uitjahya sín nkexrí sinchekjasóte sín tí sín a kixin kaín tí sín chjasin ntiha chjéhe sín Dios kjuasáya kixin tí kjuaxroan kjuich'e sín. <sup>22</sup>Na mé tí ch'ín kuítohe jína kixin tí kjuaxroan mé chjina k'uaxitjehe ch'án cuarenta nánó a.

#### **Tí sín tinkáchónki Jesús tjanchia sín kixin tsochrakonhya sín**

<sup>23</sup>Ntá tí ch'ín Pedro la ko ch'ín Juan tsíxranjon kjuachaxin sátsji sín na ntá sákjuí sín tí tsíkójnkotsé iso tí sín chóxin sín. Ntá chrónka sín kaín nkehe k'uetooan tí sín nchat'á t'etoan la ko tí sín táda. <sup>24</sup>Ntá kjuixin kuínhin tí sín tsíkójnkotsé na ntá kaín sín nixjehé sín Dios la ntáchro sín kixin:

—Ínchéni, jaha mé kjuich'éna nkajní la ko chjasintajni la ko tí ntayaon la ko kaín xín tí nkehe síin. <sup>25</sup>Jaha mé kjuachaxién Nchakuan nixjaxian ch'ín David tí nkexro kjuít'aha xra. Ntáchro ch'án kixin:

¿Nkekuente kixin kónínkaon kaín tí chojni nación ókjé?

<sup>‡‡</sup>4:11 Salmo 118.22

A ntá tí chojni israelita mé tjenkayáxin nkehe ninkehó sínkíhya.

<sup>26</sup>Tí sín rey síin chjasintajni la ko kaín tí sín tí chjasin kójnkotsé sín nínkankonhen sín Ìnchéni la ko Cristo.<sup>¶</sup> Mé xíkaha tsíkjin ch'ín David ósé.

<sup>27</sup>Mé xíkaha chaxín ch'ín Herodes, la ko ch'ín Poncio Pilato, la ko kjaxin tí chojni tsíkjin ókjé, la ko tí sín israelita mé tsíkójnkotsé sín tí chjasin ntihi kixin kónínkankonhen sín tí Xjaan Jesús chón-tahya jìe, mé tí nkexro tsíkjéyá jaha sit'aha xra. <sup>28</sup>Mé xíkaha kjuínchex-iteyá sín tí nkehe ósé tsíkjenkayáxian kixin t'ichjánxin xíkaha tsonhen. <sup>29</sup>A ntá Ìnchéni, tsjehé kixin imá jiehe k'uetóan tí sín a. La ntá jaha tsjínkítsa tí sín sit'aha xra tsochrakonhya sín tsochrónka sín itán. <sup>30</sup>La ko tí kjuachaxián sijncheki-toexín jína tí chojni níhi la ko tsjákoxian kjuaxroan kjuachaxián ihnié tí nkexro Jesús t'aha xra —mé xíkaha nixjehé sín Dios nkaya nkajní.

<sup>31</sup>A ntá tí kjuixin nixjehé sín Dios a ntá tí tjejó sín mé kuínkí nonte. La ntá kaín sín antsí k'uáyéhe sín Nchakuen Dios ntá kaín asén sín kjuankíxin sín chrónka sín itén Dios.

### Tí kaín nkehe síin la kaín sín mé kuènte sín

<sup>32</sup>La kaín tí sín kuínkáchónki sín Jesús mé jnkokoá kjuenkayáxin sín. Kohya nkexro ntácho kixin jehó kuènte tí nkehe síin. Náhí. Kaín sín mé kuènte sín. <sup>33</sup>Tí sín tsíkjéyá Jesús mé kaín asén sín chrónkaxín sín kixin nkexrí xechón Ìnchéni Jesús. Ntá Dios antsí kjuíncheyaon kaín sín. <sup>34</sup>Kohya ninkexró nóaxinhya tjejó ntiha kixin kaín tí sín chóna nontee sín o ntóe sín kjuínchekji sín. Na ntá tsíkjikao sín tí chichaon <sup>35</sup>chjéhe sín tí sín kjueyá Jesús. A ntá tí sín k'óxikayehe sín tí

chichaon, kuákja tí sín nò. <sup>36</sup>Mé xíkaha kjuích'e ijnko ch'ín levita it'in José. Jehe ch'án la tsíkjin ch'án nonte Chipre jnkosiné ntayaon. Tí sín kjueyá Jesús mé kjuínchek'in sín ch'án Bernabé, mé t'axr-jexín kixin tí ch'ín nchechéhe asén chojni. <sup>37</sup>Jehe ch'án a mé kjuínchekji ch'án ijnko nontee ch'án ntá kjuíkao ch'án tí chichaon kjuínchek'áyéhe ch'án tí sín kjueyá Jesús.

### Ijje kjuasin ch'ín Ananías la ko tjan Safira

**5** A ntá í jnko ch'án mé it'in Ananías, a ntá ichjién ch'án mé it'in Safira, mé jehe sín mé kjuínchekji sín ijnko nontee sín. <sup>2</sup>A ntá tí ch'ín a kjuenkayáxinko ichjién ch'án ntá kuakitsjentehe sín iso tí chichaon. Ntá í so mé sákjuíko ch'án la chjéhe ch'án tí sín kjueyá Jesús la kjuanjon ch'án éxí kaín. <sup>3</sup>Ntá ntácho ch'ín Pedro kixin:

—Ananías, ¿kuènté chjehé kjuachaxin tí Tsochren kixin k'uetuenhen asán? Ntá kjuích'iyehé tí Nchakuen Dios kixin kjuínchemá iso chichaon kjuínchekjixián nontaa. <sup>4</sup>¿Á jehya nontaa tíha? Ntá tió kjuínchekjia la, tí chichaon la, ¿á jehya kuèntá? ¿Kuènte kjuenkayáxian sích'e tíha? Kjuích'iyehé Dios, jehya chojni kjuích'iyehé.

<sup>5</sup>Na ntá kuínhin tí ch'ín Ananías ntá kjuítsínka ch'án ntá ik'uén ch'án. La ko kaín xín tí sín ntiha kónohe sín nkehe kónhen tí ch'ín a la imá chrakon sín. <sup>6</sup>Na ntá ikjui iso sín ntasoá la ntá kjuínchek'ísimá sín ika tí cuerpo kuènte ch'án la ntá sákjuíko sín, sákjuíkjavá sín.

<sup>7</sup>Ntá k'uátsínka iní hora ntá kjuíji ichjién ch'ín Ananías k'uixenhen tjan tí nchia ntaha a. La noehya tjan nkehe tsíkónhen tí ntiha. <sup>8</sup>Ntá ch'ín Pedro mé kjuanchankíhi tí tjan a, ntácho ch'án kixin:

<sup>¶</sup>4:26 4.25–26 Salmo 2.1–2

—Chronka, ¿á chaxín xikahó kóxi<sup>x</sup>ín tí nonte ó kjuin<sup>ch</sup>ekjirá? —ichro ch'án.

Ntá kjuátehe tjan kíxin:

—Chaxín xikahó kóxi<sup>x</sup>ín.

<sup>9</sup>Ntá ntáchro ch'ín Pedro kíxin:

—¿Nkekuènte jnkokoá kjuenkayáxinrá kjuich'iyehé<sup>r</sup>á Nchakuen Ìnchéni? Kjá ntáchrórá kohya nkehe chrókónhanrá. Ntihi ó kui tí sín ntasoá sákjuí<sup>k</sup>jává sín xia na ntá jaí sátsjiko sín tí jaha —mé xikaha ichro ch'ín Pedro.

<sup>10</sup>Ntá tuénxín kjuí<sup>s</sup>ínka tjan Safira toté tí itjen ch'ín Pedro ntá ik'ue<sup>n</sup> tjan. Ntá k'uí<sup>x</sup>enhen tí sín ntasoá tí nchia a ntá k'uí<sup>k</sup>on sín kíxin tsík<sup>j</sup>ixin tsík'en tjan. La ntá sákjuí<sup>k</sup>o sín tí cuerpo kuènte tjan la kjuavá sín tjan tí chjinaxón tsíxrává tí xii tjan. <sup>11</sup>Na kaín tí sín kuènte nínko la ko tí í so sín kuínhin tí xikaha tsíkónhen, mé imá chrakon sín.

### Itsjé kjuaxroan kjuakoxín sín

<sup>12</sup>A ntá tí sín kjueyá Jesús mé kjuakoxín sín nchónhya kjuaxroan tí síin chojni ntiha la ko kaín sín mé kójnkotsé sín tí ntásin it'in Salomón. <sup>13</sup>Chrakon iso sín k'uí<sup>t</sup>ohya tí jehe sín la kjónté la kaín chojni tjikosáyehe tí jehe sín. <sup>14</sup>La ntá xrin<sup>a</sup>hya nchónhya chojni ntoa la ko chojni chjin kjuankíxin tinkáchónki sín Ìnchéni. <sup>15</sup>Ntá itsjé chojni mé kuakitsje sín tí chojni níhi k'uejo sín ntia. Tjejóták'á sín chrítaón cama la ko kania kíxin ts'atsínka ch'ín Pedro ntá kjónté it-s'ueen ch'án ó ts'atsínka tí tjejó sín mé chrókuitoexín sín jina. <sup>16</sup>Kjaxin tí chjasin chjino mé kjuixín nchónhya chojni ikjui sín chjasin Jerusalén la kjuikao sín tí chojni níhi la ko tí chojni chón<sup>t</sup>a nchakuen tí jínahya. La kaín sín a mé kuitóhe sín jina.

### Ch'ín Pedro la ko ch'ín Juan mé chónkíhi sín

<sup>17</sup>Na ntá tí sín nchat'á t'et<sup>o</sup>an la ko tí sín kuènte tí sín saduceo mé imá

kóchjinoxínhin sín. <sup>18</sup>Na ntá itsé sín tí sín kjueyá Jesús la chr'áx<sup>e</sup>nhen sín ntøechiso. <sup>19</sup>A ntá ijnko ángel kuènte Ìnchéni ikui tí tie a kuakitjeh<sup>e</sup> ch'án ntója ntøechiso ntá kuakitsje ch'án tí sín a. La ntá k'uet<sup>e</sup>nhen ch'án sín kíxin:

<sup>20</sup>—Sátjirá nínko la tsjákohérá kaín tí sín ntiha tí tan níxin tsjanjon kjuachón.

<sup>21</sup>Kjuixin kuínhin sín ntá sákjuí<sup>s</sup> sín ntá tí k'uínkaséyan k'uí<sup>x</sup>enhen sín tí nínko kjuako sín.

A ntá tí nchat'á t'et<sup>o</sup>an la ko tí sín k'uejóko ch'án mé k'uí<sup>y</sup>eh<sup>e</sup> sín tsojnkotsé kaín tí síxreé, mé tí sín t'et<sup>o</sup>an kuènte Israel. Na ntá k'uet<sup>o</sup>an sín kíxin tsoxrakoa tí sín tjejóchjina tsík<sup>j</sup>eyá Ìnchéni. <sup>22</sup>A ntá kjuí<sup>j</sup>i tí sín policía tí ntøechiso a ntá k'uitjahya sín tí sín a. La ntá ikjan sín la <sup>23</sup>ntáchro sín kíxin:

—Kjuí<sup>j</sup>ini ntiha la k'uí<sup>k</sup>onni tsík<sup>j</sup>eh<sup>e</sup> jina ntøechiso a la k'uejó tí sín soldado a ntója. Ntá kuakitjeh<sup>e</sup>ni ntøechiso la k'uitjahyani ninkexró tí nkaxenhen —ichro sín.

<sup>24</sup>Ntá kaín tí nchat'á t'et<sup>o</sup>an la ko tí ch'ín k'uet<sup>e</sup>nhen tí policía kuènte nínko la ko i so tí sín nchat'á t'et<sup>o</sup>an mé kuínhin sín ntá ntáchro sín kíxin xá nkexrí chrókónhen chrók'uitjáyan tí xra kuènte tí sín a. <sup>25</sup>Na ntá tuénxín kjuí<sup>j</sup>i ijnko nkexro ntáchro kíxin:

—Tí sín k'uejochjinará jahará mé ó nkaxenhen nínko ntaha tjejó sín tjejó<sup>t</sup>-jakoh<sup>e</sup> sín chojni —ichro ch'án.

<sup>26</sup>La ntá tí ch'ín k'uet<sup>e</sup>nhen tí sín policía mé sákjuí<sup>k</sup>o ch'án tí sín policía la kjuí<sup>k</sup>akjín tí sín tjako. Ninkehó kjuí<sup>ch</sup>'ehya tí sín policía tí sín tjako kíxin chrakon sín kíxin ách'e tí sín síin ntiha mé tsjak'e sín xro, ichro sín. <sup>27</sup>Na ntá tió kjuí<sup>k</sup>ao sín tí sín a la k'uejó sín nkayakon tí sín t'et<sup>o</sup>an ntá tí nchat'á t'et<sup>o</sup>an ntáchro ch'án kíxin:

<sup>28</sup>—Jeheni kjuanjonhyani kjuachaxin kíxin tsjákorá ihnié tí nkexro a. ¿A ntá nkehe kjuí<sup>ch</sup>'erá jahará? Kuenté ch-

jasin Jerusalén tsíkjákorá. La tjinkáonrá tsékaráni jie kixin jeheni tsík'óyánni tí ch'ín a —ichro ch'án.

<sup>29</sup> A ntá ch'ín Pedro la ko tí iso sín kjueyá Jesús ntáchro sín kixin:

—A ntá jeheni t'ichjánxín sinchexiteyéheni Dios senó. A ntá chr'éxín sinchexiteyéheni chojni. <sup>30</sup> Tí Dios tsíkinkáchónki tí sín tsík'axjeníxinni ósé mé kjuínchexechón Jesús, tí nkexro a mé kjuakénkanirá tí ntacruz tsík'oyánrá. <sup>31</sup> Ntá ijie tjeko ch'án Dios nkaya nkajní la nánko itja chjina Dios mé tjen ch'án la Dios kjuích'éna ch'án ijnko nkexro t'etóan kixin sinchekaá ch'án chojni kixin tí nación Israel chrókjan chrókuinkáchónki sín Dios ntá chrók'uitjáyan tí jie chóna sín. <sup>32</sup> La ko kjaxin jeheni chrónkani kaín tí nkehe k'uíkonni kjuachaxién Nchakuen Dios. Tí Nchakuen ch'án mé chjéhe Dios kaín tí nkexro chaxín sinchexiteyéhe tí jehe ch'án.

<sup>33</sup> La ntá tí sín t'etóan a mé kuínhin sín tíha ntá kónínkaon sín la ko tjinkaon sín chrók'óyán sín tí sín a. <sup>34</sup> Na ntá tjen ijnko chojni fariseo mé ijnko síxreé it'in ch'án Gamaliel. Jehe ch'án mé ijnko maestro kjuako tí ley la kaín chojni chjasin ntiha chónthehe ch'án kjuasáya. Mé k'uínkatjen ch'án kjuák'exín toté ch'án la nixja ch'án k'uetoan ch'án kixin tí sín tsíkjoyá Ìnchéni mé ts'axrje sín ntója intsí, ichro ch'án. <sup>35</sup> Na ntá nixjehé ch'án kaín tí síxreé ntáchro ch'án kixin:

—Jahará chojni israelita, tóxakonhanrá kixin kohya nkehe chrókjuich'eherá tí sín a. <sup>36</sup> Xráxinkáonrá kixin senó kjuák'e ijnko ch'ín it'in Teudas la tónhen asén ch'án kixin imá t'etóan ch'án. Ntá itsjé sín mé noó ciento chojni kjuíchréhe ch'án. Na ntá ókjé chojni k'óyán sín tí ch'ín a la ntá kaín tí sín kuinkáchréhe tí jehe ch'án mé xíka sín sákjuí sín ntá ntaó kjuèxín tí xrá k'uékjich'e sín. <sup>37</sup> Ntá chr'éxín tió xrenájín kaín ihnié

chojni k'uéjó na ntá ikjuí í jnko ch'ín mé it'in ch'án Judas la kjuixín ch'án estado Galilea. Ntá itsjé chojni kjuíchréhe ch'án. La ntá kjaxin k'óyán sín ch'án la ntá kaín xín tí sín kjuíchréhe ch'án xíka sín sákjuí sín inaá. <sup>38</sup> Méxra tjtóhérá tjiatéhyará tí jehe sín a. A ntá tí tjejóch'e sín xrá kuènte chojni ó la kjaxin ts'itjáyan. <sup>39</sup> A ntá tí chaxín tjako sín kjuachaxién Dios ntá tsjachahyará sinchek'itjáyanrá tíha. Méxra tjtóhérá sín kixin tsjánjonkohyará Dios.

<sup>40</sup> Na ntá kaín tí síxreé mé kuítekaon sín la ntá k'uíyehé sín tí sín kjueyá Jesús. La ntá kjuate sín la xík'etuñhen sín kixin í tsonixjahya sín ihnié Jesús la ntá kjuanjón sín kjuachaxin kixin sátsji sín. <sup>41</sup> Ntá tí sín kjueyá Jesús mé k'uaxrjexín sín tí tjejó tí sín t'etóan kjónté xíkaha kónhen sín la chéhe sín kixin Dios kjuanjón kjuachaxin kjuasóte sín kixin tí kjuako sín ihnié Jesús. <sup>42</sup> Kuítoehya sín tsjako sín kuènte Jesucristo kaín yaon tí nkaxenhen nínko la ko tí jnkojnko ntóe chojni.

### Kjueyá sín yato chojni tsjinkítsa

**6** Na ntá tí yaon a tjoka sítinkákótsjé tí sín tinkáchónki Ìnchéni. A ntá tí sín nixja nkíva griego mé kónínkakonhen sín tí sín nixja nkíva hebreo. Ntáchro sín kixin tí sín chjin k'án kuènte sín la kánhyó jína k'uáyehé tí nkehe síxikayehé sine sín jnkojnko yaon, ichro sín. <sup>2</sup> Na ntá tí teyó tí sín tsíkjoyá Jesús mé k'uíyehé sín kaín tí sín tinkáchónki Ìnchéni. Ntá nixjehé sín, ntáchro sín kixin:

—Jeheni la jehya jína tsítóheni tí xrá tjakoni itén Dios, kixin ntá sit'aharáni xrá ts'óxíkayeheni tí nkehe sine tí sín k'án. <sup>3</sup> Méxra jahará kíchó ni tsjéyará yato chojni ntoa tí tjejorá, tí chojni jína choxinrá la ko nohe sín la ko antsí chóna sín Nchakuen Dios mé tí sín a sinchek'áyeheni tí xrá a. <sup>4</sup> A ntá jeheni

la tsonixjeheni Dios la ko tsinkákjakoni itén ch'án —mé xíkaha ichro sín.

<sup>5</sup>La ntá kaín sín mé kuínhin sín xíkaha ntá jnkokoá kjuenkayáxin sín. La ntá kjueyá sín ch'ín Esteban, mé ijnko nkexro imá tinkáchónki Ìnchéni la ko antsí chóna ch'án tí Nchakuen Dios. La kjaxin kjueya sín ch'ín Felipe, la ko ch'ín Prócoro, la ko ch'ín Nicanor, la ko ch'ín Timón, la ko ch'ín Parmenas la ko ch'ín Nicolás. Jehe ch'án mé tsíkjin ch'án chjasin Antioquía la ósé mé tsíkinkáchónki ch'án ti nkehe tinkáchónki tí sín judío. <sup>6</sup>Ntá kjuixin kjueyá sín tí sín a ntá kjuikao sín ti tjejó tí sín tsíkjevá Ìnchéni. La ntá tí sín a mé nixjehe sín Dios la ko k'uejotja tja sín chrítaón tí ikja tí sín tsíkónoxín.

<sup>7</sup>Tí itén Dios sítinkákji la tinkákót-sjé tí sín tinkáchónki Ìnchéni chjasin Jerusalén. Kjaxin itsjé tí sín nchát'á judío kjuankíxin sín tinkáchónki sín Ìnchéni.

#### **À ntá itsé sín ch'ín Esteban**

<sup>8</sup>Tí ch'ín Esteban mé ijnko nkexro k'uechóna kjuachaxin kixin Dios tsíkjincheyaon ch'án la nchónhya kjuaxroan kjuakoxín ch'án tí sín chojni. <sup>9</sup>À ntá iso sín tsíkjin sín tí sín ninko judío kuènte tí sín senó k'uejó esclavo sín tsíkjin sín chjasin Cirene, la ko Alejandría, la ko Cilicia, la ko estado Asia, mé kjuankíxin sín ikjo sín ch'ín Esteban. <sup>10</sup>Kjonté xíkaha la kjuachahya sín kixin Nchakuen Dios mé kjuínkítsa tí ch'ín Esteban nixja ch'án. <sup>11</sup>Na ntá jehe sín mé kjuenkehe sín ókjé chojni kixin tsochrónka sín kixin kuínhin sín k'uántaxínhin ch'án ch'ín Moisés la ko Dios, ichro sín. <sup>12</sup>Mé xíkaha k'uixité kaín chojni la ko tí sín t'etoan kuènte ninko la ko tí sín tjako tí ley. La ntá itsé sín tí ch'ín Esteban la tinkánkákjen sín ch'án sákjuiko sín ch'án tí sín tí

síxreé a. <sup>13</sup>Kjaxin kjueyá sín chojni tsochrónka kixin ntoáhya kjuako ch'ín Esteban la ntáchro tí sín a kixin:

—Tí ch'ín a mé títoehya ch'án t'ántaxínhin ch'án tí ninko kuènténi la ko tí ley. <sup>14</sup>Ó kuínhinni kixin chrónka ch'án kixin tí ch'ín Jesús, tí ch'ín tsíkjin chjasin Nazaret, mé sinchek'itjáyan ch'án tí ninkoeni ntihi la ko tsjitóxinhin ch'án tí nkehe tinkáchónkini mé tí nkehe tsík'etoan ch'ín Moisés —mé xíkaha ichro sín.

<sup>15</sup>Ntá tí síxreé la ko kaín tí sín sítjaxin ntiha la komá sín tí ch'ín Esteban la mé k'uifkon sín kixin tí kàré ch'án mé éxí ijnko ángel mé xíkaha tsjehe tí jehe ch'án.

#### **Tí nkehe kjuátehe ch'ín Esteban**

**7** À ntá tí sín nchát'á t'etoan kjuanchankíhi sín tí ch'ín Esteban kixin:

—¿Á chaxín kaín tíhi tsíntáchrúa?

<sup>2</sup>Na ntá jehe ch'án kjuátehe ch'án ntáchro ch'án kixin:

—Kaínrá kichó ni Israel la ko sín táda tinhínra tí nkehe tsontáxrjan. Dios kuènteni chóna kjuachaxin mé kjuakohe ch'ín Abraham tí nkexro k'uaxrjeníxinni tió kjuák'e ch'án nación Mesopotamia tí naxá sátjihya ch'án tsjak'e ch'án nonte Harán. <sup>3</sup>Dios tsíntáchró kixin: “Títohé chjasán la ko kaín tí nkexro kjéhya. Na ntá sátjia tí nonte tsjákohá jaha.”<sup>§§</sup> <sup>4</sup>Na ntá ch'ín Abraham k'uaxrjexín ch'án tí nonte Caldea. Ntá sákjuí ch'án kjuák'e ch'án tí nonte Harán. Na ntá kjuixin ik'uén it'é ch'án na ntá Dios kjuikao tí jehe ch'án tí nonte tjejorá ijie. <sup>5</sup>Kjánchó ch'ín Abraham la kuákjahya ch'án nít'ó nonte hasta ni tí tsjak'e toté ch'án la chóntahya ch'án. À ntá chrónka Dios kixin chaxín chr'éxin tió tsjixin ts'en ch'ín Abraham la tí sín ts'axrjeníxin ch'án mé ts'áyéhe sín tíha. Kjonté naxá

kohya nijnko xjeen ch'án la mé xíkaha ntáchro Ìnchéni. <sup>6</sup>Kjaxin tsintáchro Dios kixin tí sín ts'axrjeníxin ch'ín Abraham la ts'ejó sín ókjé nonte, la ko sich'exón sín xra la ko náxrjónhaya ts'ejó sín noó ciento nánó. <sup>7</sup>La kjaxin xintáchro Dios ínaá kixin: “Ntá chr'éxin janhan sintakjasóte tí sín kjuínchekjasóte xjaan. La ntá tí xjaan mé tsokjan sín ntihi ntá tsoxraxinkakonxín sín tí janhan,” mé xíkaha ichro Dios. <sup>8</sup>Na ntá Dios mé tsíkjo ch'ín Abraham kixin kaín tí chojni ntoa ts'axrjeníxin ch'án mé itsa sín xroye. Na ntá xíkaha tió kokjíhi xjeen ch'an Isaac ntá ch'ín Abraham mé chjéhe ch'án xjan xroye tió xétjehe xjan ijní yaon. Ntá kjaxin xíkaha kjuích'e ch'ín Isaac tió chóna ch'án xjeen ch'án Jacob, la ntá ch'ín Jacob la xíkaha kjuích'e ch'án ínaá. Ntá tí sín a mé k'óna it'é tí teyó tribu tsík'axrjeníxin tí sín Israel.

<sup>9</sup>Tí xjeen ch'ín Jacob mé tí sín k'uaxrjeníxinni óse la jehe sín k'uéchjinoxín-hin sín tí kichó sín José ntá kjuínchekji sín ch'án la tí sín k'uena la sákjuíko sín ch'án nó nación Egipto, kjánchó Dios mé kjuínkítsa tí jehe ch'án. <sup>10</sup>Dios mé kjuínchekaá ch'án tí náxrjónhaya k'uékjak'e ch'án. La ko Dios kjuanjon kjuachaxin kixin imá tsonohe ch'án. Na ntá k'uíkon ch'ín Faraón tí rey kuènte nación Egipto a xíkaha tí xra jína kjuích'e ch'ín José ntá kjuanjon ch'án kjuachaxin kixin ts'etōan ch'ín José tí nación Egipto la ko tí ntōe ch'án.

<sup>11</sup>Na ntá kókjinta xrinahya la náxrjónhaya k'uejó tí sín nación Egipto la ko nonte Canaán la tí sín tsík'axrjeníxinni la k'uitjahya sín nkehe sine sín. <sup>12</sup>Δ ntá tsíkinhin ch'ín Jacob kixin tí nación Egipto mé sítóxi noa trigo ntá k'uetuenhen ch'án tí sín xjeen ch'án kixin sátsji sín ntiha tsjik'ena sín noa, la jehe tí sín a mé tí sín tsík'axrjeníxinni. Tíha mé tí saoxín sákjuí sín. <sup>13</sup>Ntá tí yóxin sákjuí sín ntiha ntá ch'ín José kjuínchenohe

ch'án sín kixin tí sín a la savé ch'án. La ntá kjuakōhe ch'án tí ch'ín Faraón tí sín naxa kjéhya ch'án. <sup>14</sup>La ntá k'uetōan tí ch'ín José kixin sátsjikakjín sín it'é ch'án Jacob la ko kaín tí sín kjéhya ch'án, mé ijnko setenta y cinco chojni kjéhya ch'án. <sup>15</sup>Mé xíkaha kónhen la tí ch'ín Jacob mé sákjuí ch'án la kjuák'e ch'án nación Egipto ntá chr'éxin ntiha mé k'uénxin ch'án. La ntá chr'éxin kjaxin tí sín tsík'axrjeníxinni k'uénxin sín ntiha. <sup>16</sup>Ntá chr'éxin kualktsjexín sín tòye tí huésóe tí ch'ín Jacob la sákjuíko sín tí nonte Siquem, la ntá ntiha mé kjuavá sín tí nonte tsík'ena ch'ín Abraham mé tsík'enehe ch'án tí xjeen ch'ín Hamor chjasin Siquem.

<sup>17</sup>La ntá ó kuichjina tsoxiteyá tí nkehe tsintáchro Dios tsíkjo ch'ín Abraham ntá tí sín Israel imá kótsjé sín nación Egipto. <sup>18</sup>Δ ntá xrinahya í jnko ch'ín rey kjuankíxin k'uetōan nación Egipto la k'uéchónhaya ch'án tí ch'ín José. <sup>19</sup>La ntá tí ch'ín rey kjuích'iyehé ch'án tí sín naxa kjéhyani la ko kjuínchekjasóte ch'án sín. La tsík'etōan ch'án kixin tí xjan ntoa na ntá kokjíhi mé tsjik'itjí sín xjan kixin its'en xjan. <sup>20</sup>Na ntá tí yaon a tsíkokjílhi ch'ín Moisés ntá imá kóxrjínhin Dios tí xjan a. It'é la ko ìné xjan mé k'uéchóna sín xjan iní nitjó koá ntōe sín. <sup>21</sup>Ntá chrokjuahya tsjak'ema sín xjan la ntá kjuíkjáka sín xjan. La ntá xjeen tí ch'ín rey kuènte Egipto mé kjuíkkaja tjan xjan la sákjuíko tjan ntōe tjan la kjuínchek'ánkí tjan xjan éxí xjeen tjan xíkaha. <sup>22</sup>La ntá tí ch'ín Moisés mé k'uitja ch'án kaín nkehe nohe tí sín Egipto a la imá tjetōan tí nkehe k'uén-táchro ch'án la ko tí nkehe k'uékjich'e ch'án.

<sup>23</sup>La ntá tió chóna tí ch'ín Moisés cuarenta nánó ntá tjinkaon ch'án tsjitsjehe ch'án tí sín israelita naxa kjéhya ch'án. <sup>24</sup>Ntaha mé k'uíkon ch'án kixin ijnko chojni Egipto kjuate ijnko cho-

jni naxa kjéhya tí jehe ch'án. Ntá chrókjuinkĩtsa ch'án tí sín naxa kjéhya ch'án ntá k'óyán ch'án tí ch'ín Egipto a.<sup>25</sup> Kjuenkayáxin ch'án kixin tí sín naxa kjéhya ch'án, mé tí sín israelita, mé tso-noexín sín kixin Dios mé tsíchr'án tí jehe ch'án sinchekaá sín ch'án. Kjánchó tí sín a kjuátsoanhya sín.<sup>26</sup> La ntá í jnko yaon tí ch'ín Moisés k'uŕkon ch'án kixin yaá sín israelita tjanjonko kíchó sín. La ntá tjinkaon ch'án chrókjuít'oxin ch'án kixin chrokjuanjonha sín. La ntá chro ch'án kixin: “Jahará jnkokoá kichuárá la, ¿nkekuènté tjanjonrá?”<sup>27</sup> A ntá tí nkexro chóna tí jje mé kónínkaon ch'án la kótéka ch'án tí ch'ín Moisés. Ntá ntá chro ch'án kixin: “¿Nkexro kjuanjon kjuachaxin kixin jaha k'óna juez kuènténi? <sup>28</sup> ¿Á tjinkávan ts'oyánni kjaxinni éxí k'oyán tí ch'ín Egipto ijna ní?” <sup>29</sup> A ntá kuínhin tí ch'ín Moisés tíha ntá tjoka sákjuí ch'án. Sákjuí ch'án tí nación Madián ntá ntiha kjuák'e ch'án éxí ijnko chojni tsíkjinín ókjé. Ntá ntaha tsíkótehe ch'án la ko kjuích'éna ch'án yaá xjan ntoa.

<sup>30</sup> Na ntá k'uátsínka cuarenta nánó ntá tí nteje hjino jna it'in Sinaí mé xrinahya k'uŕkon ch'án ijnko ángel tjenkákjan tí xrohi chríkjan tí ntayoa tjeche. <sup>31</sup> Ntá tí ch'ín Moisés la chrakon ch'án kixin xíkaha k'uŕkon ch'án la ntá kóchjinehe ch'án kixin chrótsjehe ch'án la ntá kuínhin ch'án itén Ìnchéni ntá chro kixin: <sup>32</sup> “Janhan mé Dios tinkáchónki tí sín tsík'axrjeníxian mé Abraham, la ko Isaac, la ko Jacob,” mé xíkaha ichro Dios. Ntá tí ch'ín Moisés la kjuankixin chrakon ch'án la síxránka ch'án ntá í tjinkakonhya ch'án tsotsjehe ch'án. <sup>33</sup> Na ntá ntá chro Ìnchéni kixin: “Takít-sje tokatá kixin tí nonte tinkatja la nonte

tjóá chóntahya jje. <sup>34</sup> Ó k'uíkuān kixin tí sín kuèntana mé imá tjejtjasóte sín nación Egipto. La ó kuínhan kixin t'èya sín. La ntá ijje ó k'uinka kixin tsjínkĩtsa sín. Méxra xrákiá jaha tsétuanhan jaha sátsjia nación Egipto,”<sup>35</sup> ichro Dios.

<sup>35</sup> Tí sín israelita mé kjuanoá sín tí ch'ín Moisés. Tsíntá chro sín kixin: “¿Nkexro kjuanjon kjuachaxin kixin jaha k'óna juez?” ichro sín. Kjánchó Dios ichr'án ch'án tí ch'ín Moisés kixin ts'e-ŕon ch'án la ko sinchekaá ch'án tí sín israelita kjuachaxin tí ángel k'uŕkon ch'án chríkjan tí nta. <sup>36</sup> Ntá tí ch'ín Moisés kuakitsjexín ch'án Egipto tí sín tsík'axr-jeníxinni ósé. La imá itsjé kjuaxroan kjuasin ch'án la itsjé kjuakoxin ch'án tí nación Egipto, la ko tí Ntayaon Kjátse,

la ko tí nteje k'uáji sín cuarenta nánó. <sup>37</sup> Jehe tí ch'ín Moisés a mé chénka tí sín israelita kixin: “Dios mé tsochr'án ijnko chojni tsoníxja itén Dios ts'axr-jeníxin tí sín kichuárá éxí ichr'án ch'án tí janhan. Títekákonhénrá tí jehe ch'án.”<sup>†</sup>

<sup>38</sup> Tí ch'ín Moisés mé kjuák'eko ch'án tí chojni tí k'uéjé sín tí nteje. Nta ijnko ángel mé nixjehe ch'án tí jna Sinaí la ko tí sín k'uaxrjeníxinni mé k'uáyéhe sín tí tan tjanjon kjuachón, ntá tí tan mé k'uátsínka tí jeheni ijje.

<sup>39</sup> A ntá tí sín k'uaxrjeníxinni ósé mé tjinkakonhya sín kixin chrókuitekaon sín la kjuanoá sín tí ch'ín Moisés la ko tjinkaon ínaá chrókjan sín nación Egipto. <sup>40</sup> A ntá ntá che sín ch'ín Aarón kixin: “Tjinkaonni sích'éna ijnko dios kixin tsinkáchónkini kixin í noehyani nkehe kónhen tí ch'ín Moisés, tí nkexro kjuínkĩtsa k'uaxrjeníxinni nación Egipto.”<sup>‡</sup>

<sup>41</sup> Ntá kjuínchekjanoya sín ijnko koxintáxjan la ntá k'óyán sín iko kjojehe tí nkehe tsíkjanoya a la imá kóchéhe sín

<sup>†</sup>7:34 7.30–34 Éxodo 3.1–10

<sup>‡</sup>7:37 Deuteronomio 18.15,18

<sup>‡</sup>7:40 Éxodo 32.1

k'uíkon sín tí nkehe tsík'ónaxín tja chojni. <sup>42</sup> A ntá Dios mé kuítohe tí jehe sín kixin tsinkáchónki sín tí konotsé siín nkajní. Tíhi mé tsíkjin ijnko nkexro k'uéchrónka itén Dios ntáchro xíkíhi:

Jahará chojni Israel, ¿á k'oyánrá tí iko kjókānará tí janhan

tí cuarenta nánó k'uejorá nteje ní?

<sup>43</sup> Kja náhi, jehó tí nkehe kjuích'énarā mé kjókēherá tí ko a. Kjuíkoarā tí ninkoje tí dios Moloc

la ko kjaxin kjuíkoarā tí konotsé kuènte dios Renfán.

A ntá tí nkehe tsíkjich'énarā jahará mé xráinkákonxínrá éxi Dios kuèntarā.

Méxra janhan tsakítsjexínrá tí tjejorá la tsétuanhánrá sátsjirā chjasin Babilonia.<sup>41</sup>

Mé xíkaha ntáchro Dios ósé.

<sup>44</sup> Naxa k'uéjé tí sín k'uaxrjeníxinni tí nteje la chóna sín ijnko ninko kamantá chóna tí ley tsík'etoan Dios. Tíhi kjuích'éna sín éxi tsík'etuenhen Dios tí ch'ín Moisés kixin sich'éna ch'án kaín nkehe k'uíkon ch'án. <sup>45</sup> Ntá tí sín tsík'axrjeníxinni mé k'uáyéhe sín tí ninko kuítonhen sín. Ntá tí sín kjuíkao ch'ín Josué mé kjuíkao sín tí ninko tió kjuacha sín k'uáyéhe sín í jnko nonte kuènte í so chojni kuakitsje Dios, kixin ts'áyéhe tí jehe sín. Mé xíkaha kónhen hasta tí yaon kjuankíxin k'uetōan ch'ín David. <sup>46</sup> Imá kjuíncheyāon Dios tí ch'ín rey David la ntá tí ch'ín David mé tjinkaon ch'án sich'éna ch'án ijnko ninko kuènte Dios mé tí Dios k'uékinkáchónki ch'ín Jacob. <sup>47</sup> Kjánchó jehe ch'án kjuích'énahya ch'án tí ninko a. Tí ch'ín Salomón mé kjuích'éna. <sup>48</sup> Kjánchó Dios nkaya nkajni chrohya tsjak'exenhen ijnko nchia tsíkjich'énaxín chojni itja. Ntáchro ijnko ch'ín nixja itén Dios kixin:

<sup>49</sup> Janhan Dios nkaya nkajni itjén tétoanxían ntá chjasintajni tjekjen totená.

¿Xá nkexéhe tí nchia chrókjuích'énarā?

¿Xá nketí chrókjuak'é chrók'ok'ánaxián?

<sup>50</sup> ¿Xá jehya tjaná kjuít'ánaxián kaín tí nkehe ní?<sup>8</sup>

Mé xíkaha ichro Dios.

<sup>51</sup> 'A ntá jahará la icha asánrá xráxin títekákonhyará. Jahará tinhínrá kjánchó ich'erá éxi chojni chónhya Dios. Xráxin tjánjonkoará Nchakuen Dios. Jahará mé tóyóhará tí sín tsík'axrjeníxínrá ósé. <sup>52</sup> Tí sín tsík'axrjeníxínrá kjuínchekjasóte kaín tí sín tsíchrónka itén Dios. K'óyán sín tí sín k'uéchrónka kixin itsi tí nkexro chónthaya jie. A ntá ó kui tí nkexro a ntá jahará kjuínchekjirā ch'án ntá k'óyán sín ch'án. <sup>53</sup> Jahará k'uayéherá tí nkehe k'uetōan Dios senó, mé tí nkehe chrónka tí ángel, la kjónté xíkaha kuítekákonhyará —ichro ch'ín Esteban.

### Ik'uén ch'ín Esteban

<sup>54</sup> Ntá tí kuínhin tí jehe sín tí nkehe ntáchro tí ch'ín Esteban ntá imá kónínkaon sín la netaón neno sín kixin nínkakonhen sín ch'án. <sup>55</sup> A ntá ch'ín Esteban antsí chóna ch'án Nchakuen Dios la konta ch'án nkajni k'uíkon ch'án kjuachaxién Dios la ko k'uíkon ch'án kixin ch'ín Jesús tjexín toté ch'án nánko tja chjina Dios. <sup>56</sup> Ntá ntáchro ch'ín Esteban kixin:

—Tsjehérá kixin k'uíkuān kixin xitjehe nkajni la ntaha itjen tí Xjeen Dios K'óna Chojni nánko tja chjina Dios.

<sup>57</sup> A ntá jehe sín la k'uíkjehe sín ntatsjon sín la itsen k'uúixité sín ntá sákjuí sín k'uúixitja sín ch'án <sup>58</sup> sákjuíko sín ch'án ikon chjasin ntá ixro chjéhe sín ch'án. La tí sín tjanchia jie mé kuakitsje sín iké

<sup>41</sup>7:43 7.42–43 Amós 5.25–27

<sup>8</sup>7:50 7.49–50 Isaías 66.1–2



sín la k'uejo sín toté ijnko ch'ín ntasoá it'in Saulo kixin ts'ayakonhen ch'án tí ka a. <sup>59</sup>La it'e sín xro ntá ch'ín Esteban mé chrónóhehe ch'án Ìnchéni la ntáchro ch'án kixin:

—Ìnchéni Jesús takjá nchakuenná.

<sup>60</sup>Ntá tuénxín kjuák'exín toch'in ch'án la k'uèya ch'án itsen ntáchro ch'án kixin: —Ìnchéni jaha mé tahya kuentá tí jie kjuasin sín.

Mé xikaha ichro ch'án ntá ik'uén ch'án.

### Ch'ín Saulo chrók'óyán ch'án tí sín tinkáchónki Jesús

**8** La tí ch'ín Saulo mé jnkokón kjuenkayáxinko ch'án tí sín k'óyán tí ch'ín Esteban.

A ntá tí yaon a na mé kjuankíxin sín ts'óyán sín tí sín tinkáchónki Jesús chjasin Jerusalén. La kaín xín tí sín na ntá kjuankíxin tinkáchónki Cristo mé xíkayéhe sín sákjuí sín nkuíxín estado Judea la ko estado Samaria. A ntá jehó tí sín tsíkjeýá Jesús mé kuítóhe sín ntiha. <sup>2</sup>Na iso sín imá tinkáchónki Dios mé kjuavá sín ch'ín Esteban la ko tsjánkàma sín ch'án la ko t'avéhe sín ch'án. <sup>3</sup>A ntá tí ch'ín Saulo la kjuankíxin kónínkakonhen ch'án tí sín tinkáchónki Cristo. K'uíxenhén ch'án jnkojnko jnkojnko ntøe sín la itsé ch'án tí sín ntoa la ko tí chojni chjin. La ntá kuinkánkákjen ch'án sín sákjuíko ch'án sín kixin ts'e-jóchjina sín.

### Kjuako sín itan jína tí estado Samaria

<sup>4</sup>A ntá tí sín sákjuíxin chjasin Jerusalén mé xritjako sín nkexrí tí tan tsaáxinni nkuíxín tí sákjuí sín. <sup>5</sup>La ijnko ch'ín it'in Felipe mé sákjuí ch'án ijnko chjasin estado Samaria la kjuankíxin ch'án chrónka ch'án itan kuènte Cristo. <sup>6</sup>Na ntá nchónhya chojni kójnkotsé ntiha la kaín sín kuínhin sín jína tí nkehe ntáchro ch'ín Felipe kixin

ó k'uíkon sín tí kjuaxroan kjuakoxin ch'án. <sup>7</sup>Itsje chojni chóna nchakuen tí jínahya mé kuítóhe sín jína la tí nchakuen tí jínahya k'óyako k'uaxrxjén tí jehe sín. La nchónhya tí sín chóna chin xitjahya itji la ko tí sín síxénká toté mé kuítóhe sín jína. <sup>8</sup>A ntá imá kóchéhe kaín tí sín síin chjasin ntiha.

<sup>9</sup>Tí chjasin a mé kjuák'e ijnko ch'ín it'in Simón mé ijnko ch'ín ósé mé k'uékjinchexroan ch'án. K'uékjich'iyehé ch'án tí sín estado Samaria ntáchro ch'án kixin ijnko chojni imá tjetoan tí jehe ch'án. <sup>10</sup>La kaín tí sín ntiha k'uejó sín kuínhin sín jína, mé tí chánjan ntsíntsí hasta tí chojni imá táda la k'uéntáchro sín kixin:

—Tí ch'ín i imá chóna ch'án tí kjuachaxin kuènte Dios —ichro sín.

<sup>11</sup>K'uékitekakonhen sín ch'án kixin k'uékjinchexroan ch'án k'uékjich'iyexín ch'án sín itsje nánó. <sup>12</sup>Ntá tió kuítekaon sín tí tan jína kjuako ch'ín Felipe kuènte tí kjuachaxin kuènte Dios la ko Jesucristo la ntá chojni ntoa la ko chojni chjin mé kuíkite sín. <sup>13</sup>A ntá kjaxin tí ch'ín Simón, mé kuítekaon ch'án la kuíkite ch'án, koí ch'án. Ntá kjuankíxin k'uájiko ch'án tí ch'ín Felipe la imá chrakon ch'án kixin k'uíkon ch'án tí kjuaxroan jié kjuasin tí ch'ín Felipe.

<sup>14</sup>A ntá tí sín apóstol, mé tí sín tsíkitohe chjasin Jerusalén, kuínhin sín kixin itsje tí sín estado Samaria ó kuítekaon sín itén Dios. Ntá k'uètuènhén sín ch'ín Pedro la ko ch'ín Juan sátsji sín ntiha. <sup>15</sup>Ntá tió kjuíji sín ntá kjuanchehe sín Dios kixin tí sín ntiha tinkáchónki Cristo chrók'uáyéhe sín Nchakuen Dios <sup>16</sup>kixin nijnko tí jehe sín ntiha naxá tsík'áyèhya sín Nchakuen Dios. Jehó tsíkikitexín sín ihnié Ìnchéni Jesús. <sup>17</sup>Ntá tí ch'ín Pedro la ko tí ch'ín Juan mé k'uejotja itja sín chrítaón kja tí sín a la ntá ó k'uáyéhe sín Nchakuen Dios.

<sup>18</sup>Na ntá tí ch'ín Simón mé k'uíkon ch'án kixin tí sín apóstol k'uejotja itja sín chrítaon kja tí sín a ntá k'uáyéhe tí sín a Nchakuen Dios. La ntá xróxin ch'án chichaon <sup>19</sup>la ntáchro ch'án kixin:

—Chjehéni jeheni tí kjuachaxin kixin kjaxin jeheni chrókjuak'etja itjani chrítaon ikja jnkójn chojni ntá chrók'uáyéhe sín Nchakuen Dios —ichro ch'án.

<sup>20</sup>Ntá ntáchro ch'ín Pedro kixin:

—Jaha la ko tí chichakoán ts'itjáyankoa kixin tjenkayáxian kixin chrók'uèna tí kjuachaxin kuènte Dios. <sup>21</sup>Jaha chontahya kjuachaxin ts'ixenhén tí xra a kixin ó nohe Dios kixin jaha la tjuáhya asán. <sup>22</sup>Méxra tsitohé tí ijiá la chrónóhé Dios kixin ách'e tsjakjìnhan ch'án tí jie tjenkayáxian. <sup>23</sup>Ó t'íkuan kixin imá chjinoxínhin asán la ko nchónhya jie chonta —ichro ch'ín Pedro.

<sup>24</sup>La ntá ch'ín Simón kjuátehe ch'án ntáchro ch'án kixin:

—Nixjehérá ìnchéni kixin tí janhan kixin chrókónnahya tí janhan éxí tí ntáchrórá —ichro ch'án.

<sup>25</sup>Ntá kjuixin chrónka tí sín apóstol tí tan kuènte Dios ntiha ntá sákjuí sín kjuako sín tí tan tsjanjon kjuachón nchónhya tí chjasin ntsíntí estado Samaria. Ntá ikjan sín chjasin Jerusalén.

### Tí ch'ín Felipe la ko tí ch'ín tsíkjiixin nación Etiopía

<sup>26</sup>À ntá kjuixin tíha ntá ijnko ángel kuènte ìnchéni mé ntáche tí ch'ín Felipe kixin:

—T'ínkatjen sáttja nó sur tsoxeta tí ntja t'inkajinxin chjasin Jerusalén hasta chjasin Gaza —ichro tí ch'ín ángel.

Na ntá tí ntja a mé ijnko ntja t'atsínka nó nteje. <sup>27</sup>Na ntá tí ch'ín Felipe k'uínkatjen sákjuí tí ntja. La

ntiha xrinahya xeta ch'án ijnko chojni tsíkjiixin nó nación Etiopía. Jehe ch'án mé ijnko chojni eunuco mé tja ch'án sín chichakoén tí tjan reina Candace t'etuñhen tí nación Etiopía. Jehe ch'án sátsíkji ch'án chjasin Jerusalén xraxinkakonxín ch'án Dios. <sup>28</sup>À ntá tí ch'ín a la xíkjan ch'án inaá chjasén ch'án. Kjuák'exenhen ch'án ijnko carro la tjenchekuáxin ch'án ijnko xroon tsíkjin ch'ín Isaías, ijnko nkexro k'uéchrónka itén Dios. <sup>29</sup>La ntá tí Nchakuen Dios mé k'uetuñhen tí ch'ín Felipe ntáchro kixin:

—Sáttja tóchjina antsí tí tjen tí carro.

<sup>30</sup>Ntá kóchjinehe tí ch'ín Felipe tí tjen tí carro a, la ntá kuínhin ch'án kixin tjenchekuáxin tí ch'ín a tí xroon tsíkjin ch'ín Isaías. La ntá kjuanchankíhi ch'án kixin:

—¿Á tiénxian tí nkehe tjenchekuáxian méhe?

<sup>31</sup>La ntá kjuátehe tí ch'ín a ntáchro ch'án kixin:

—¿Nkexrí chrókuiánxian kixin kohya nkexro tsjinkítsana tsochrónkaxín nkexrí t'axrjexín tíha? —ichro ch'án.

Ntá kjuanchia ch'án kixin tí ch'ín Felipe ts'it'ótjen la tsjak'etjaxin chjinaxón tí tjen ch'án.

<sup>32</sup>Na tí xroon itén Dios tjenchekuáxin ch'án mé tíhi:

Jehe ch'án mé sákjuíko sín éxí ijnko kolélo kjuíko sín ts'óyán sín.

La éxí ijnko kolélo tsjánkahya tíó kjínhin sín kaxree va

mé xíkaha jehe ch'án ninkehó xítjeehya ir'va ch'án.

<sup>33</sup>K'uíkon sín ch'án éxí ijnko chojni chóna jie la ntoáhya kjuínchekjasóte sín ch'án.

Kohya nkexro tsjacha tsochrónka kuènte tí sín chrók'uaxrjenixin ch'án

kíxin jehe ch'án la k'uénxín ch'án chjas-intajni.\*\*

Mé xíkaha chrónka tí xroon itén Dios.

<sup>34</sup> A ntá tí ch'ín eunuco mé kjuanchankíhi ch'án tí ch'ín Felipe ntáchro ch'án kíxin:

—Tsotsenkávan chrónka nkexro tsonhen tíha. ¿Á jehe ch'án tsonhen tíha o á ókjé nkexro ní? —mé xíkaha kjuanchankí ch'án.

<sup>35</sup> La ntá tí ch'ín Felipe kjuankíxin chrónka ch'án kuènte tí nkehe tjenchekuáxin tí ch'ín a la chrónka ch'án tí tan jína kuènte Jesús. <sup>36</sup> A ntá xrínahya kjuíji sín tí tjíá ntá, ntá ntáchro tí ch'ín eunuco kíxin:

—Tsjehe tjíá ntá. ¿Á xitjahya chrókuíkítana? —ichro ch'án.

<sup>37</sup> Na ntá ntáchro tí ch'ín Felipe kíxin:

—Tí kuítékávan kaín asán la kjá jína tsikitia.

La ntá kjuátehe tí ch'ín a, ntáchro ch'án kíxin:

—Títekávan kíxin tí Jesucristo la Xjeen Dios —ichro ch'án.

<sup>38</sup> La ntá tí ch'ín tsíkjixín Etiopía a k'uetōan ch'án tsochónhen tí carro a la ntá yóí sín mé tí ch'ín Felipe la ko tí ch'ín tsíkjixín Etiopía mé k'uúnkajin sín ntá kjuíánkí sín ntá la tí ch'ín Felipe kuíkíte ch'án tí ch'ín a. <sup>39</sup> La ntá kjuixín k'uaxrenkí sín ntá la ntá tí Nchakuen Ìnchéni sátsíkjiko tí ch'ín Felipe ókjé. A ntá k'uúkonhya kichó sín inaá. Ntá kjónté xíkaha la tí ch'ín eunuco sákjuí ch'án la antsí chéhe asén ch'án. <sup>40</sup> A ntá tí ch'ín Felipe xrínahya kjuíji chjasin Azoto. Ntá nkák'atsínka ch'án la chjasin la í chjasin la chrónka ch'án itén Ìnchéni kíxin nkexrí tsaáxin sín hasta kjuíji ch'án chjasin Cesarea a.

## Tí nkehe kónhen ch'ín Saulo

(Hch. 22.6-16; 26.12-18)

**9** A ntá tí ch'ín Saulo la imá tjinkaon ch'án chrók'óyán ch'án tí sín tinkáchónki Ìnchéni Jesús. Méxra sákjuít-sjehe ch'án tí ch'ín nchat'á t'etōan. <sup>2</sup> Ntá kjuanchia ch'án ijnko xroon kíxin ts'áyéhe ch'án kjuachaxin kíxin sátsji ch'án tí nínko chjasin Damasco tsjeyá ch'án tí sín kuákja ntá nixín mé tí sín ntoa la ko tí síchjin la tsotsé ch'án sín la ntá sátsjiko ch'án sín chjasin Jerusalén. <sup>3</sup> La ntá kjuíji ch'án chjinaxón chjasin Damasco, a ntá xrínahya titàya ikui ijnko xrohi t'inkaséyan kuíxin nkaya nkajní k'uantatjen ch'án a. <sup>4</sup> A ntá ch'ín Saulo mé kjuítsínka ch'án nonte, a ntá kuínhin ch'án nixja ijnko nkexro kíxin:

—Saulo, Saulo, ¿nkekuènte ninkákonna xritjéyá tí janhan?

<sup>5</sup> A ntá ch'ín Saulo kjuanchankí ch'án kíxin:

—¿Xá nkexro jaha?

Ntá tí tan mé kjuátehe, ntáchro kíxin:

—Janhan mé Jesús, mé tí nkexro xritjéyá jaha. <sup>6</sup> T'áya sáttja. T'ixenhén tí chjasin Damasco, ntá ntiha mé tsinhín nkehe sích'e —ichro tí ch'ín Jesús a.

<sup>7</sup> La ntá tí sín k'uájiko ch'ín Saulo la imá chakon sín. Kuínhin sín tí itén tí nkexro kjánchó k'uúkonhya sín ninkexró.

<sup>8</sup> La ntá tuénxín k'uàya ch'ín Saulo ntá kuakitjenkí ch'án ikon ch'án kjánchó t'ikonhya ch'án. A ntá tí sín xriko ch'án tinkátséhe sín itja ch'án sákjuíko sín ch'án chjasin Damasco. <sup>9</sup> A ntá ntiha kjuák'e ch'án la iní yaon k'uúkonhya ch'án la ko kjaxin kjónehya ch'án la ko ninkehó k'uúhya ch'án.

<sup>10</sup> A ntá chjasin Damasco mé kjuák'e ijnko ch'ín tinkáchónki Ìnchéni it'in Ananías. La ntá titàya k'uúkuèn ch'án Ìnchéni ntáchro kíxin:

\*\*8:33 8.32–33 Isaiás 53.7–8

—Ananías.

Ἀ ntá ch'ín Ananías mé kjuátēhe ch'án kixin:

—Ntihi tjenni, Ìnchéni.

<sup>11</sup> Ntá ntá chro Ìnchéni kixin:

—T'inkatjen sátjia tí ntja it'in Ntja Ntoí. Ntá tió tsjasán ntōe ch'ín Judas tjanchankíhí sín á ntahya itjen ijnko ch'ín tsíkjixín chjasin Tarso me it'in ch'án Saulo. Jehe ch'án mé tjechrónōana ch'án. <sup>12</sup> Ἀ ntá titàya k'uíkuèn ch'án kixin tsjiji ijnko ch'ín it'in Ananías ts'ix-enhen ch'án tsjak'etja tja ch'án chrítaón kja tí jehe ch'án kixin xik'ikon ch'án inaá —ichro Ìnchéni.

<sup>13</sup> Ntá kuínhin ch'ín Ananías tíha ntá ntá chro ch'án kixin:

—Ìnchéni náhí, tsjihyani kixin ó kuín-hinni chrónka nchónhya chojni kixin nkexrí xéhe tí ch'ín a. Imá tsjé nkehe jehya jína kjuích'ehe ch'án tí sín kuítekaon tí jaha chjasin Jerusalén. <sup>14</sup> Ἀ ntá jie la ó kjui ch'án ntihi kixin tsík'áyéhe ch'án kjuachaxin kuènte nchat'á t'etōan kixin tsotsé ch'án kaín tí sín tinkáchónki ihniá.

<sup>15</sup> Kjánchó Ìnchéni ntá chro kixin:

—Sátjia. Janhan kjuéyá tí ch'ín a kixin tsjako ch'án tanná. Tsjakōhe ch'án tí sín ókjé nación la ko tí sín rey la ko kjaxin tí sín israelita. <sup>16</sup> Janhan tsjākōhā ch'án kixin nchónhya tsjasóte ch'án kixin tsinkáchónkina ch'án.

<sup>17</sup> Ἀ ntá ch'ín Ananías sákjuí ch'án tí nchia itjen ch'ín Saulo la ntá k'uíxehen ch'án. La ntá kjuak'etja tja ch'án chrítaón ikja tí ch'ín Saulo la ntá chro ch'án kixin:

—Kíchóni Saulo, Ìnchéni Jesús, tí nkexro k'uíkuan tí ntja k'uinkaxian, mé k'uētuan̄na kjuíha kixin sintak'ikuan inaá la ko ts'ayéhé Nchakuen ch'án —ichro tí ch'ín Ananías a.

<sup>18</sup> Ntá tuénxín k'uanotjexin ikon ch'ín Saulo ijnko nkehe éxi kjōe koche xikaha. Ntá xík'ikon ch'án inaá. La ntá k'uínkatjen ch'án la ko kuíkite ch'án.

<sup>19</sup> La ntá chr'éxín ntá kjóne ch'án la ntá ikjan asén ch'án inaá. Ntá kuítōhe ch'án iso yaon k'u'éjóko ch'án tí sín tinkáchónki Ìnchéni chjasin Damasco.

### **Kjuako ch'ín Saulo chjasin Damasco**

<sup>20</sup> Na ntá kjuankixin ch'ín Saulo kjuakōxín ch'án iso nínko Israel kixin Jesús mé Xjeen Dios. <sup>21</sup> La kaín tí sín tjejótinhin imá chrakon sín la ntá chro sín kixin:

—¿Á jehya tí ch'ín i tjinkaon sinchek'itjáyan ch'án kaín tí chojni tinkáchónki Jesús chjasin Jerusalén? ¿Á jehya tí xrā a kjuixín ch'án ntihi kixin tsotsé ch'án sín la sátsjiko ch'án sín tí tjejó tí sín nchat'á t'etōan? —ichro sín.

<sup>22</sup> Kjánchó antsí má fuerte kjuako ch'ín Saulo kixin chaxín tí ch'ín Jesús mé tí Cristo. La tí sín judío k'u'éjó chjasin Damasco kjuachahya kjuachaxin sín ch'án.

### **Kjuachahya tí sín judío chrótsé sín tí ch'ín Saulo**

<sup>23</sup> Na ntá ó k'uatásínka nchónhya yaon ntá tí sín judío kjuenkayáxin sín nkexrí chrók'óyán sín tí ch'ín Saulo. <sup>24</sup> Ἀ ntá ó kuínhin ch'án nkehe kjuenkayáxin sín. Ἀ ntá nchakotjin la ko tie tjejóchónhen tí sín chrók'óyán tí jehe ch'án tí ntója ts'axrjexín ch'án chjasin. <sup>25</sup> Ἀ ntá tí sín tinkáchónki Ìnchéni mé kjuak'enkaya sín tí ch'ín Saulo ijnko ntaxra jíe ijnko tie. Ntá kjuinkajinxín sín tí ntaxra tjenkáya tí ch'ín Saulo nóton tí tjat'o tsík'antatjen tí chjasin a. Ntá kuaá ch'án.

### **Ch'ín Saulo sákjuí chjasin Jerusalén**

<sup>26</sup> Ntá tí kjuíji ch'ín Saulo chjasin Jerusalén ntá tjinkaon ch'án chrókójnkotséko ch'án tí sín tinkáchónki Ìnchéni. Kjánchó kaín sín chrakonhen sín ch'án kixin kuítekakonhya sín kixin á chrókóchaxin

kjaxin ch'án tinkáchónki ch'án Ìnchéni.

<sup>27</sup> A ntá ch'ín Bernabé mé sákjuíko ch'án tí ch'ín Saulo tí tjejó tí sín apóstol la ntá chrónka ch'án kixin ch'ín Saulo mé tsík'ikon ch'án Ìnchéni tí ntja sákjuí ch'án ntá Ìnchéni mé nixjehe ch'án. Méxra chjasin Damasco k'uékjako ch'án ihnié Ìnchéni la chrakonhya ch'án.

<sup>28</sup> Méxra ch'ín Saulo kuítóhe ch'án chjasin Jerusalén la ko k'uájiko ch'án tí sín a. La chrakonhya ch'án kjuako ch'án kjuachaxién ihnié Ìnchéni Jesús.

<sup>29</sup> La ikjo ch'án tí sín judío nixja nkiva griego. A ntá jehe sín la tjinkaon sín chrók'óyán sín tí jehe ch'án. <sup>30</sup> A ntá tí sín kichó ni tinkáchónki Cristo mé tsíkinhin sín nkehe chrókónhen ch'án la ntá sákjuíko sín ch'án tí chjasin Cesarea la k'uetuénhen sín ch'án sátsji ch'án chjasin Tarso.

<sup>31</sup> Na ntá tí sín tinkáchónki Ìnchéni kuenté estado Judea, la ko estado Galilea, la ko estado Samaria la kjuaxróxin k'uéjé sín la antsí má tinkáchónki sín Ìnchéni. K'uéchónta sín kjuasáyé Ìnchéni la ko tí Nchakuen Dios kjuínkítsa sín la ntá antsí má sítinkákótsjé sín.

### Ch'ín Eneas kuítóhe ch'án jína

<sup>32</sup> Na ntá tí ch'ín Pedro xristsjehe ch'án kaín tí sín tinkáchónki Ìnchéni. Kjaxin sákjuítsjehe ch'án tí sín kichó ni tjejó chjasin Lida. <sup>33</sup> Ntiha mé k'uitja ch'án ijnko ch'ín it'in Eneas. Ijní nánó tjetsínkaták'á ch'án cama kixin tsík'en toté ch'án. <sup>34</sup> Na ntá ntáchro ch'ín Pedro kixin:

—Eneas, Jesucristo mé sintakitqha jína ijie. T'inkatjen tjatsìyan camá —ichro ch'án.

Na ntá ch'ín Eneas tuénxín k'uínkatjen ch'án. <sup>35</sup> La kaín tí sín siín chjasin Lida la ko chjasin Sarón k'uíkon sín kixin kuítóhe ch'án jína la ntá kjaxin sín kuinkáchónki sín Ìnchéni.

### Ó xechón tjan Dorcas

<sup>36</sup> A ntá tí yaon a mé kjuák'e ijnko tjan chjasin Jope tinkáchónki tjan Ìnchéni mé it'in tjan Tabita. Ntá nkiva griego la mé t'axrjexín kixin Dorcas. A ntá tí tjan a mé jína kjuích'e tjan tí k'uékjak'e tjan la kjuínkítsa tjan tí chojni nòa. <sup>37</sup> Ntá ijnko yaon imá kónfhi tjan ntá ik'uén tjan. La ntá kjuínchek'ónti sín cuérpoé tjan la ntá tí yóxin piso noi kjuák'e sín tjan. <sup>38</sup> Tí chjasin Jope mé chjino tí chjasin Lida la mé ntiha kjuák'e ch'ín Pedro. A ntá tí sín tinkáchónki Ìnchéni mé nohe sín kixin ntiha tjen ch'án. Ntá ichr'án sín iyó chojni tson táche sín ch'án kixin tjoka itsji ch'án í sinchexrjenhya ch'án, tsixro sín.

<sup>39</sup> Na ntá sákjuíko sín ch'ín Pedro. Ntá kjuíji sín ntiha ntá tuénxín sákjuíko sín ch'án tí tjen tí cuérpoé tí tjan tsík'en. La ntaha tjejó kaín chojni chjin k'án imá tsjánka sín. La kjuako sín tí iké sín tsíkjon tí tjan Dorcas tí naxa kjuák'e tjan. <sup>40</sup> A ntá k'uetqan ch'ín Pedro kixin kaín sín ts'axrje sín ntója. Na ntá kjuák'exín toch'in ch'án nixjehe ch'án Dios. Ntá komá ch'án tí tjan tsík'en ntá ntáchro ch'án kixin:

—Tabita, t'àya.

Ntá kuakitjenki tjan ikon tjan ntá k'uíxon tjan kixin ntaha itjen ch'ín Pedro ntá k'uàya tjan, kjuák'etjaxin tjan. <sup>41</sup> A ntá itsé ch'án itja tjan la k'uínkatjen tjan. La ntá k'uíyehé ch'án kaín tí sín tinkáchónki Ìnchéni la ko kjaxin kaín chojni chjin k'án kixin ntá ts'ikon sín kixin ó xíxechón tjan. <sup>42</sup> Na ntá kaín sín siín chjasin Jope mé kónohe sín tí kjuaxroan kjuích'e ch'ín Pedro ntá itsjé sín kuinkáchónki Ìnchéni. <sup>43</sup> A ntá ch'ín Pedro kuítóhe ch'án itsjé yaon tí chjasin a la kjuák'e ch'án ntqé ch'ín Simón, ijnko ch'ín nchentá tjoé iko.

### Ch'ín Pedro la ko ch'ín Cornelio

**10** Chjasin Cesarea kjuák'e ijnko ch'ín it'in ch'án Cornelio. Jehe ch'án mé capitán k'uetuēnhen tí sín soldado italiano. <sup>2</sup>Tí ch'ín a la imá jína ch'án la kaín tí sín kjéhya ch'án mé imá xraxinkaon sín Dios. Kjaxin kjuanjon ch'án nchónhya chichaon kixin tjinkaon ch'án tsjinkitsa tí sín judío la ko xráxín nixjehē ch'án Dios. <sup>3</sup>La ntá ijnko yaon las tres kónjín titàya k'uúkuèn ch'án ijnko ángel kuènte Dios k'uúixenhen tí tjen ch'án ntáchro kixin:

—Cornelio.

<sup>4</sup>A ntá tí ch'ín Cornelio komá ch'án tí ángel la chrakon ch'án kjuanchankíhi ch'án kixin:

—¿Nkehe tjinkávan jaha? —ichro ch'án.

Ntá ntáchro tí ángel kixin:

—Dios kóxrjnhin kixin tí nixjehé ch'án la ko tí jína ch'e tjínkítsa tí sín nòà. <sup>5</sup>Ntá jaha tétuēnhén jnkójin chojni sát-sji chjasin Jope kixin tsjikakjín sín ch'ín Simón kjaxin it'in ch'án Pedro. <sup>6</sup>Itjen ch'án ntøe ijnko ch'ín kjaxin it'in Simón. Tí ch'ín a mé nchentá tjoé iko. Mé tjen ntøe ch'án chjinaxón tí ntayaon a.

<sup>7</sup>Ntá tió sákjuí tí ángel nixjehē ch'ín Cornelio la ntá jehe ch'an k'uúyehē ch'án yaá sín ch'ehe ch'án xra la ko ijnko ch'ín soldado kjaxin xraxinkaon Dios, la chón-tehe sín kjuasáya kichó sín. <sup>8</sup>Ntá kjuixin chénka ch'án kaín sín tí nkehe k'uúkon ch'án ntá k'uetuēnhen ch'án sín sátsji sín chjasin Jope.

<sup>9</sup>Í jnko yaon chr'éxin chjina chonkixin tjejóyá sín ntia chjino chjasin Jope ntá ch'ín Pedro mé k'ui't'ótjen ch'án chrítaón nchia kixin ntaha nixjēxín ch'án Dios. <sup>10</sup>Ntá imá k'uén ch'án kjinta la tjinkaon ch'án chrókjóne ch'án. Nachrohe tsochján tí nkehe sine ch'án la ntá titàya k'uúkuèn ch'án nkehe <sup>11</sup>mé k'uúkon ch'án kixin xitjehē nkaya nkajní

ntá ntiha k'uúnkajinxin ijnko ka jié. Kanoé punté tí ka tjejóte. <sup>12</sup>Tí nkaxenhen tí ka a tjinká ko noó toté la ko konche la ko kaín ko xritjaká. <sup>13</sup>Ntá kuínhin ch'án nixja ijnko nkexro ntáchro ch'án kixin:

—Pedro, t'àya, t'oyán tí ko a ntá inte.

<sup>14</sup>Ntá ch'ín Pedro kjuátēhe ch'án kixin:

—Náhí, Ìnchéni. Nunca nehyani tí nkehe tjuáhya.

<sup>15</sup>Ntá kjuátēhe tí tan ínaá ntáchro kixin:

—Tí nkehe ó kjuínchetjóá Dios. La ntáchrohya kixin tjuáhya —ichro ch'án.

<sup>16</sup>Xikaha kónhen iní veces ntá tuénxín sákjuí tí ka nkaya nkajní. <sup>17</sup>Ntá ch'ín Pedro naxa tjenkayáxin ch'án nkehe t'axr-jexín tí k'uúkon ch'án la xrínahya ó kui tí sín ichr'án ch'ín Cornelio ntója nchia. Ó tsíkjanchankí sín nketí tjen ntøe ch'ín Simón. <sup>18</sup>Ntá kjuanchankí sín itsen kixin:

—¿Á ntihi tjen ch'ín Simón kjaxin it'in ch'án Pedro?

<sup>19</sup>Naxa tjenkayáxin tí ch'ín Pedro tí nkehe k'uúkon ch'án ntá Nchakuen Dios chrónka kixin:

—Tsjehé ó kui iní sín xritjeyá tí jaha.

<sup>20</sup>T'àya t'inkajián sátjikoa tí sín a. Tóx-akuanhya jaha, janhan mé kuétuanhan sín ikui sín —ichro Nchakuen Dios.

<sup>21</sup>Ntá k'uúnkajin tí ch'ín Pedro tí tjejó tí sín a ntá ntáchro ch'án kixin:

—Janhan tí nkexro xritjeyará. ¿Nkehe tí tsonhen tjinkáonrá?

<sup>22</sup>Ntá kjuátēhe sín ntáchro sín kixin:

—K'uetøan tí ch'ín capitán Cornelio ikuini ntihi. Jehe ch'án me ijnko chojni imá jína la ko xraxinkaon ch'án Dios. Kaín tí sín judío tjikosáyehe ch'án la ko tjuèhe sín ch'án. Ijnko ángel kuènte Dios mé nixjehē ch'án chénka ch'án kixin chrók'uúyehē ch'án tí jaha kixin chrókjuia ntøe ch'án la ntá chrókuinhin

ch'án tí nkehe tsontáchrúa —mé xíkaha chrónka sín.

<sup>23</sup> Na ntá tí ch'ín Pedro kjuanjón kjuachaxin kixin ntahó chrók'ok'éhe sín ti tie a. Ntá kóyaon ntá sákjuíko ch'án sín. Kjaxin iso sín tinkáchónki Ìnchéni tjejó chjasin Jope mé sákjuikotoxin sín.

<sup>24</sup> Na ntá í jnko yaon a kjuíji sín chjasin Cesarea. Ntiha chónhen tí ch'ín Cornelio la ko kjaxin kaín sín kjéhya ch'án la ko tí sín chóxin ch'án. K'uíyehe ch'án tí jehe sín kixin tsinhin sín. <sup>25</sup> Ntá tió kjuíji tí ch'ín Pedro ntøe tí ch'ín Cornelio ntá k'uaxrxén ch'án nchia nixjehe kichó sín. Ntá kjuák'exín toch'in tí ch'ín Cornelio nkayakon tí ch'ín Pedro la kjuikosáyehe ch'án. <sup>26</sup> A ntá tí ch'ín Pedro kjuínchek'inkatjen ch'án tí ch'ín a la ntáchró ch'án kixin:

—T'inkatjen. Tjak'exián totá. Janhan mé ijnko chojni éxi tí jaha.

<sup>27</sup> A ntá kjuixin ikjo sín la ntá k'uíx-enhén sín ntøe ch'án la ntá k'uíkon tí ch'ín Pedro kixin nchónhya chojni tsíkójnkotsé ntiha. <sup>28</sup> Ntá ntáchró ch'án kixin:

—Jahará nohará kixin tí jeheni judíoni chóntahyani kjuachaxin tsojnkotsékoni chojni ókjé la ko chóntahyani kjuachaxin ts'ixenhenni ntøe chojni ókjé. Kjánchó Dios kjuakona kixin xitjahya tsontáxrjan kixin tjuáhya nijnko chojni. <sup>29</sup> Méxra tió k'uíyanará la tjoka k'uinka. Tjínkavan chrókónona kixin nkekuente k'uíyanará.

<sup>30</sup> Ntá kjuátehe ch'ín Cornelio ntáchró ch'án kixin:

—K'uátsínka tí noó yaon ntá tí hora kjuák'eni ntihi ntøeni kjónehyani la nixjeheni Dios. Ntá xrínahya k'uíkonni ijnko chojni chóna iké tjákini. <sup>31</sup> La ntáchró ch'án kixin: “Cornelio, ó kuínhin Dios tí nkehe nixjehé ch'án la ó nohe ch'án kixin imá tjínkítsa jaha tí chojni nò. <sup>32</sup> Méxra tétuénhén chojni sátsji chjasin Jope kixin tsjikakjín sín tí ch'ín

Simón mé kjaxin it'in ch'án Pedro. Itjen ch'án ntøe ijnko ch'ín mé kjaxin it'in Simón nchentá ch'án tjeó iko. Chjino tí ntayaon a itjen ntøe ch'án,” ichro tí ángel. <sup>33</sup> Méxra xíkaha tjoka ichr'ánni sín tsíkjejá sín tí jaha. Jína k'uinka ntøeni. Ntá ijie ó nohe Dios kixin kaín ni tjínkaonni tsinhinni nkehe tí k'uétuanhan Ìnchéni tsochrónka tsinhinni.

### Ch'ín Pedro kjuakøhe ch'ín Cornelio ntøe ch'án

<sup>34</sup> Ntá ntáchró ch'ín Pedro kixin:

—Ijie ó t'íkuan kixin jnkokón t'íkon Dios kaín xín chojni. <sup>35</sup> Tí nkexro kaín nación titekaon la chónthehe kjuasáyé Dios la mé tóxrjínhin ch'án. <sup>36</sup> Dios mé nixjehe ch'án tí sín k'uaxrjenixin tí sín Israel la kuínhin sín tí tan tjanjon kjuaxróxin chrónka Ìnchéni Jesucristo. Jehe ch'án mé Ìnché ch'án kaín nkehe. <sup>37</sup> Jahará ó nohará jína kaín tí nkehe tsíkónhen nkuíxín tí tjejó tí sín judío mé kjuankíxin estado Galilea tió kjuixin kjuako ch'ín Juan kixin t'ichjánxin tsikite chojni. <sup>38</sup> Jahará ó nohará kixin Dios kjuanjón kjuachaxién ch'án la ko Nchakuen ch'án k'uáyéhe tí ch'ín Jesús tí nkexro tsíkjin chjasin Nazaret. Ó nohará kixin tí ch'ín Jesús mé k'uáji ch'án ntiha la tí nkehe jína kjuích'e ch'án kixin kjuínchekitøhe ch'án jína kaín chojni tjasótexín kaín tí kjuachaxién tí jínahya. Mé xíkaha jína kjuích'e ch'án kixin Dios tjejo tí jehe ch'án. <sup>39</sup> A ntá jeheni mé chaxín k'uíkonni kaín tí nkehe kjuích'e tí ch'ín Jesús tí estado Judea la ko tí chjasin Jerusalén. A ntá chr'éxin kjuak'enkani sín ch'án ijnko ntacruz la k'óyán sín ch'án. <sup>40</sup> A ntá Dios kjuínchexechón ch'án tí nixin yaon la kjuanjón ch'án kjuachaxin kixin k'uíkonni ch'án inaá. <sup>41</sup> Jehya kixin kaín chojni chrók'uikon sín ch'án. Náhí. Jehó tí sín tsíkjejá Dios kixin ts'íkon chaxín xechón ch'án. Jeheni kjónekoni ch'án la

ko k'uífkaoni ch'án tió xíxechón ch'án inaá. <sup>42</sup>K'uetōan ch'án kíxin jeheni tsjakoheni chojni la tsochrónkani kíxin jehe ch'án mé tí nkexro juez sinchekitoexín ijíé tí sín tjejóchón la ko tí sín ó tsík'en. <sup>43</sup>Kaín tí sín k'uéchrónka itén Dios mé chrónka sín kíxin jnkojnko tí sín tinkáchónki Jesús mé ts'óxíka ch'án ijíé sín —ichro ch'ín Pedro.

### Tí sín jehya judío k'uáyéhe sín Nchakuen Dios

<sup>44</sup>Naxa tjenixja ch'ín Pedro ntá kaín tí sín tjejótinhin tí nkehe kjuako ch'án k'uáyéhe sín tí Nchakuen Dios. <sup>45</sup>Ntá tí sín judío kjuikotoxín ch'ín Pedro la chrakon sín kíxin Dios mé kjuanjon Nchakuen ch'án, kjaxin k'uáyéhe tí sín jehya judío. <sup>46</sup>Méxra kuínhin sín nixja sín jnkojnko nkíva ókjé la ko kuínhin sín tjanchehe sín Dios kjuasáya. <sup>47</sup>Ntá ntáchro ch'ín Pedro kíxin:

—Jehe sín ó k'uáyéhe sín tí Nchakuen Dios xíkaha jeheni. Ntá chrókjuanjonni kjuachaxin kíxin tsikite sín —ichro ch'án.

<sup>48</sup>La ntá k'uetōan ch'ín Pedro kíxin tsikite kaín sín kjuachaxién ihnié Jesucristo. Ntá tí sín kuíkite mé kjuanchia sín kíxin chrókuitohe tí ch'ín Pedro ntiha iso yaon.

### Nixjehe ch'ín Pedro tí sín tinkáchónki Cristo chjasin Jerusalén

**11** Na ntá tí sín tsíkjejá ìnchéni la ko kaín tí sín tinkáchónki ìnchéni k'uéjé estado Judea mé kuínhin sín kíxin tí sín jehya judío ó tinkáchónki sín itén Dios. <sup>2</sup>Na ntá ch'ín Pedro ikjan ch'án chjasin Jerusalén. La ntá iso tí sín judío tinkáchónki sín ìnchéni tjonta sín ch'án. <sup>3</sup>Kjuanchankíhi sín ch'án ntáchro sín kíxin:

—¿Nkekuènté kjuítsjehé tí sín jehya judío, la ko kjóntekoa tí jehe sín? —mé xíkaha kjuanchankí sín.

<sup>4</sup>Ntá tí ch'ín Pedro kjuankíxin ch'án chrónka ch'án desde tí xrankixíxin kaín nkehe tsíkónhen ch'án. Ntáchro ch'án kíxin:

<sup>5</sup>—Janhan mé kjuak'é chjasin Jope kjuak'énixjahá Dios. La ntá titàya k'uífkuèn ijnko ka jíé k'uínkajinxín nkaya nkajní. Kanoé punté tí ka tjejóte la kjuák'e chjino tí tjén. <sup>6</sup>Ntá tsjahá jína tí nkehe la k'uífkuán kíxin tí nkaxenhen tí ka tjínká ko noó toté la ko iko nteje la ko konche la ko iko xritjaká. <sup>7</sup>La kjaxin kuínhan itén ijnko nkexro nixjana ntáchro ch'án kíxin: “Pedro, t'aya t'oyán tí ko a ntá inte.” <sup>8</sup>Ñ ntá kjuátahá kíxin: “Náhi, ìnchéni. Nunca nehyani tí nkehe tjuáhya.” <sup>9</sup>Ñ ntá kjuátehe tí tan kuixín nkaya nkajní a inaá chrónka kíxin: “Tí nkehe a mé ó kjuínchetjóá Dios. La ntáchrohya kíxin tjuáhya,” ichro ch'án. <sup>10</sup>Xíkaha kónhen iní veces. Ntá sákjuí kaín tí nkehe a nkaya nkajní inaá. <sup>11</sup>Ntá xrínahya tuénxín kjuíji iní chojni ntoa tí nchia tjejóni. Tsíkjixín sín chjasin Cesarea xritjejá sín tí janhan. <sup>12</sup>Tí Nchakuen Dios mé k'uetōan kíxin sáchrókjuikian sín la chrókóxakonahya. Kjaxin sákjuikian injon tí sín kíchó ni tjejó i. Kaínni k'uíxenhenni ntōe tí ch'ín a. <sup>13</sup>Ñ ntá tí ch'ín ntōe ntiha mé chrónka ch'án kíxin k'uífkon ch'án ijnko ángel tjexín toté la nixja ntáchro kíxin: “Tétuènhén chojni sátsji chjasin Jope kíxin tsjikakjín sín ijnko ch'ín it'in Simón la ko kjaxin it'in ch'án Pedro. <sup>14</sup>Jehe ch'án mé tsonixjaha ch'án tsochrónka ch'án nkexrí tsaá jaha la ko kaín tí sín kjéhya.” <sup>15</sup>Ntá kjuankíxian nixjahá sín na ntá ó kui tí Nchakuen Dios k'uáyéhe sín éxí k'uáyéheni tí senó a. <sup>16</sup>Na ntá xraxinkaonni tí nkehe k'uénixja ìnchéni. K'uéntáchro ch'án kíxin: “Ñ ntá chaxín ch'ín Juan ìntá ó kuíkítexín ch'án chojni, ñ ntá ijie jahará tsikítiaxínrá tí Nchakuen Dios.” <sup>17</sup>Éxí xíkaha jeheni tió kjuankíxin



kuinkáchónkini Ìnchéni Jesucristo ntá kjuanjon Dios Nchakuen ch'án k'uáyéheni mé xikaha ijie la kjuanjon Dios tí Nchakuen ch'án k'uáyéhe tí jehe sín kjaxin. ¿Xá nkexro tí janhan kixin chrókjuánjonkian Dios? —ichro ch'ín Pedro.

<sup>18</sup> A ntá tí sín kichó ni tjejó chjasin Jerusalén kuínhin tí nkehe tsfónhen ntá tání sín ntá kjuanchehe sín kjuasáyé Dios. Ntáchro sín kixin:

—Kjuanjon Dios kjuachaxin kjaxin kixin tí sín jehya judío ts'áyéhe sín kjuachaxin kixin tsinkáchónki sín Dios la ko tsakja sín kjuachón jnkochríxin —mé xikaha ichro sín.

### Tí nínko chjasin Antioquía

<sup>19</sup> Ti kjuixin k'uen ch'ín Esteban ntá kjuankíxin sín chónkíhi sín tí sín tinkáchónki Ìnchéni. Ntá iso sín sákjuí sín estado Fenicia la ko Chipre jnkosiné ntayaoon la ko sákjuí sín chjasin Antioquía. Kjuakohe sín tí sín judío nkexrí tjen tí tan jína. A ntá tí sín jehya judío la náhi. <sup>20</sup> A ntá í so sín tinkáchónki Ìnchéni tsíkjixín chjasin Chipre la ko tsíkjixín sín Cirene sákjuí sín chjasin Antioquía. Tió kjuíji sín ntiha mé kjuakohe sín tí sín jehya judío nkexrí tjen tí tan jína kuènte Ìnchéni Jesucristo. <sup>21</sup> Tí kjuachaxin kuènte Ìnchéni mé chónka tí jehe sín; méxra nchónhya tí sín ntiha mé kuítohe sín tí nkehe k'uékinkáchónki sín ntá kuítekaon sín Ìnchéni Jesús.

<sup>22</sup> Tí sín tinkáchónki Ìnchéni chjasin Jerusalén mé kuínhin sín nkehe tsíkónhen chjasin Antioquía. Ntá ichr'án sín ch'ín Bernabé sákjuí ch'án ntiha. <sup>23</sup> Ntá tió kjuíji ch'án ntiha ntá k'uíkon ch'án kixin Dios imá kjuínkítsa tí sín ntiha kjaxin. Ntá imá kóchéhe asén ch'án. Ntá nixjehe ch'án sín kixin kaín asén sín ts'ejó sín tsinkáchónki sín Ìnchéni. <sup>24</sup> Ch'ín Bernabé la ijnko chojni imá jína asén la antsí chónka ch'án Nchakuen

Dios la jína tinkáchónki ch'án; méxra kóchjina nchónhya sín kuinkáchónki sín Ìnchéni.

<sup>25</sup> Kjuixin tíha a ntá ch'ín Bernabé sákjuí ch'án chjasin Tarso sákjuíkjejá ch'an tí ch'ín Saulo. <sup>26</sup> Ntá tió k'uitja ch'án ntá sákjuíko ch'án chjasin Antioquía. Ntá k'uejóko sín tí sín tinkáchónki Ìnchéni ntiha kuenté ijnko nánó la kjuakohe sín itsjé chojni. Ntiha chjasin Antioquía kjuankíxin sín kuíkí-texín sín tí sín tinkáchónki Cristo mé ih-nié cristiano.

<sup>27</sup> A ntá iso sín chrónka itén Dios sákjuíxin sín chjasin Jerusalén la kjuíji sín chjasin Antioquía. <sup>28</sup> Ijnko ch'ín it'in Agabo k'uínkatjen ch'án kjuák'exín toté ch'an tí tsíkójnkotsé tí sín tinkáchónki Jesús la kjuachaxién Nchakuen Dios chrónka ch'án kixin tsokjinta nkuíxín ntiha. Tí nkehe chrónka ch'án mé chaxín kónhen tió kjuák'e ch'ín Claudio k'ue-toan ch'án. <sup>29</sup> A ntá tí sín tinkáchónki Ìnchéni chjasin Antioquía kjuenkayáxin sín kixin jehe sín tsjinkítsa sín tí sín kichó sín tinkáchónki Ìnchéni estado Judea. La jnkojnko sín kjuanjon sín tí nkehe chónka sín. <sup>30</sup> Mé xikaha kjuenájín sín chichaon sákjuíko ch'ín Bernabé la ko ch'ín Saulo chjéhe sín tí sín t'ayakonhen nínko estado Judea.

### Ik'uén ch'ín Jacobo la ko kjuák'echjina ch'ín Pedro

**12** A ntá tí yaoon a tí ch'ín rey Herodes mé ntá kjuankíxin ch'án kóninkakonhen ch'án tí sín tinkáchónki Jesús. <sup>2</sup> La k'uetooan ch'án kixin tí ch'ín Jacobo ts'enxín ijnko chica espada tjate. Jehe ch'án mé kichó ch'án tí ch'ín Juan a. <sup>3</sup> Ntá k'uíkon ch'ín Herodes kixin imá kóchéhe tí sín judío kixin xikaha kónhen la ntá kjaxin itsé ch'án tí ch'ín Pedro. Tíha mé kónhen tí yaoon kia pas-cua tió kjóne sín niotja chóntahya tí xroan nchek'ánkí niotja. <sup>4</sup> Kjuixin itsé

ch'ín Herodes tí ch'ín Pedro ntá chr'áx-enhen ch'án ntøechiso. Ntá ntiha mé tjejónta noó grupo soldado la mé noó soldado jnkøjnko grupo. Kjuenkayáxin ch'ín Herodes kixin tsjixin ts'átsínka tí kia pascua ntá sátsjiko ch'án tí ch'ín Pedro tí síin tí sín israelita kixin ts'ikon kuénté chjasin ntiha kixin nkexrí its'en ch'án. <sup>5</sup>Méxra ch'ín Pedro naxa tjechjina ch'án la ntaha sínta sín ch'án, la ntá kaín tí sín tinkáchónki Ìnchéni la tjejónixjehe sín Dios kaín asén sín kixin tsjinkítsa Dios tí ch'ín Pedro.

### Dios kjuínkítsa ch'ín Pedro k'uaxrjexín ch'án ntøechiso

<sup>6</sup>Tí tie a mé kjuenkayáxin ch'ín Herodes kixin tsoyaon ntá tsakitsje ch'án ch'ín Pedro sátsjiko ch'án tí síin tí sín chjasin. A ntá ch'ín Pedro tjejua ch'án la nánánko tí jehe ch'án tjejó yaá soldado la chróntetoxín tja ch'án yaá chica cadena. Ntá í so sín soldado a tjejónta sín ntója ntøechiso. <sup>7</sup>A ntá xrínahya tuénxín ikui ijnko ángel kuénte Ìnchéni, a ntá tí nkaxenhen ntøechiso imá k'uínkaséyan ijnkòyé ntiha. Kjuak'etja itja tí ángel tí chjia ch'ín Pedro kjuínchekjayehe ch'án. Ntá k'uetøan tí ángel ntáchro kixin:

—Tjoka t'áya.

La ntá tí chica cadena tjejóchrónte-toxín itja ch'ín Pedro mé k'uánótjen.

<sup>8</sup>Ntá xík'etøan tí ángel ntáchro kixin:

—T'ínkaya iká la tjanka tokatá.

Ntá kuítekaon ch'ín Pedro la kjatée xík'etøan tí ángel ntáchro kixin:

—T'ítsate iká ntá chréhe sátsjini —ichro ch'án.

<sup>9</sup>Ntá ch'ín Pedro chréhe ch'án iton tí ángel a ntá noehya ch'án á chaxín xíkaha kónhen tí nkehe kjuích'e tí ángel o náhí. Ntáchro ch'án kixin ách'e ijnko nkehe k'uíkonxón ch'án. <sup>10</sup>Ntá kjuixin k'uát-sínka sín tí tjejó tí soldado saoxín la kjuixin xík'atsínka sín tí tjejó tí soldado a yóxin. La ntá kjuíji sín ijnko puerta

chica ijié chjinaxón ntia. La ntá tí puerta chica la jehó xitjehe. Ntá k'uaxrje sín tjejónti sín ijnko ntia la ntá xrínahya tí ángel ó sákjuí la ntá jehó ch'ín Pedro kuítóhe ch'án. <sup>11</sup>A ntá tí ch'ín Pedro kónohe ch'án kixin chaxín kónhen tíha. Ntá ntáchro ch'án kixin:

—Ntá ó noheni kixin chaxín Ìnchéni tsíchr'án tí ángel kuénte ch'án kixin sinchekaáni kixin ts'óyánhyani ch'ín Herodes la ko tsoenhyani kaín tí nkehe tjinkaon tí sín judío —ichro ch'án.

<sup>12</sup>Ntá ó nohe ch'án kaín nkehe kónhen ch'án ntá sákjuí ch'án ntøe ijnko tjan María, iné ch'ín Juan kjaxin tükítexín sín Marcos. Ntaha tsíkójnkotsé itsjé sín tinkáchónki Ìnchéni tjejónixjehe sín Dios.

<sup>13</sup>La ntá t'ínka ch'án tí puerta chjinaxón ntia la nixja ch'án. La ntá ijnko tjan it'in Rode k'uaxrje tjan kjuitsjehe tjan kixin nkexro tíha. <sup>14</sup>A ntá tió kjuátsoan tjan itén ch'ín Pedro ntá k'uitjáyenhen tjan kuakitjeehya tjan tí ntója a kixin imá kóchéhe tjan. Kuinká tjan sákjuíchrónka tjan kixin ntója puerta ntiha itjen ch'ín Pedro. <sup>15</sup>Ntá ntáchro sín kixin:

—Lontia.

La naxa chrónka tjan kixin chaxín jehe ch'án ntá xintáchro sín kixin:

—Jehya jehe ch'án. Kjá tí xríntøe ch'án.

<sup>16</sup>A ntá ch'ín Pedro naxa t'ínka ch'án tí ntója puerta la ntá tió kuakitjehe sín la k'uíkon sín ch'án ntá chrakon sín.

<sup>17</sup>A ntá kjuakoxín ch'ín Pedro itja ch'án kixin tsotání sín ntá chrónka ch'án kixin Ìnchéni mé kuakitsjexín ch'án ntøechiso. Ntá k'uetøan ch'án ntáchro ch'án kixin:

—Chenkará ch'ín Jacobo la ko kaín kíchó ni nkehe k'uátsínka janhan —ichro ch'án ntá sákjuí ch'án ókjé.

<sup>18</sup>Ntá tí kóyaon a imá kóxakonhen tí sín soldado a kixin noehya sín nketí sátsíkji ch'ín Pedro. <sup>19</sup>La ntá k'uetøan ch'ín Herodes kixin sátsjikjeyá sín ch'án, kjánchó k'uitjahya sín ch'án. A ntá tí

sín soldado kuamá sín tíha ntá k'ueṭoan ch'ín Herodes kixin its'en sín. Na ntá kjuixin tíha ntá ch'ín Herodes k'uaxr-jexín ch'án estado Judea ntá sákjuí ch'án chjasin Cesarea la ntiha kjuák'e ch'án.

### Ik'uén ch'ín Herodes

<sup>20</sup> A ntá ch'ín Herodes mé nínkakonhen ch'án tí sín chjasin Tiro la ko chjasin Sidón. Ntá jehe sín jnkokoá kjuenkayáxin sín kixin sátsjitsjehe sín ch'án. Ntaha itjen ijnko ch'ín it'in Blasto k'uàyakonhen ch'án ntøe ch'ín Herodes ntá kjuanchehe sín ch'án kixin tsonixjayákonhen sín ch'án tí ch'ín t'etøan. Kjuanchia sín kixin chrókónínkakuenhya sín ch'ín Herodes kixin naxa tsochr'án ch'án tí nkehe sine sín kixin chjasén ch'án sítixin tí nkehe ine sín. <sup>21</sup> Ntá ch'ín Herodes k'uíyehē ch'án sín kixin tsojnkotsé sín ijnko yaon. Ntá jehe ch'án k'uítsá ch'án ka náxrjón kuènte chojni t'etøan la kjuák'enkáya ch'án ijnko silla kuènte chojni t'etøan. La ntá kjuankíxin ch'án nixjehē ch'án tí sín tsíkójnksé. <sup>22</sup> A ntá tí sín a kjuankíxin k'uèya sín, ntáchro sín kixin:

—Jehya chojni tjenixja. Dios tjenixja —ichro sín.

<sup>23</sup> A ntá tuénxín ijnko ángel kuènte Ìnchéni kjuínchenfhi ch'ín Herodes kixin kjuíncheyóhē ch'án asén ch'án Dios. La ntá kosínto kjóne nkaya tsee ch'án ntá k'uén ch'án.

<sup>24</sup> La ntá itsjé chojni tinkáki nhin itén Dios la nkuíxín tinkákótsjé tí sín tinkáchónki Ìnchéni.

<sup>25</sup> La ntá tí ch'ín Bernabé la ko tí ch'ín Saulo ó kjuixinhin sín ixrā kuènte sín chjasin Jerusalén la ntá sáxíkji sín chjasin Antioquía la sákjuíko sín ch'ín Juan mé kjaxin tikítexín sín ch'án Marcos.

### Ch'ín Saulo la ko ch'ín Bernabé sákjuíkjako sín

**13** A ntá tí nínko chjasin Antioquía la sín iso sín nixja sín itén Dios la kjuakohe sín chojni. Tí sín tjako mé ch'ín Bernabé la ko ch'ín Simón, kjaxin it'in ch'án Negro, la ko ch'ín Lucio, chjasen ch'án mé Cirene, la ko ch'ín Manaén, ijnko ch'ín tsík'ánkíko ch'ín Herodes tí ch'ín t'etøan estado Galilea, la ko ch'ín Saulo. <sup>2</sup> Ijnko yaon la tjejótojnkotsé sín xraxinkaon sín Dios la kjónehya sín. Ntá Nchakuen Dios mé ntáche ch'án sín kixin:

—Tsakitsjekjan ch'ín Bernabé la ko ch'ín Saulo kixin ó kjuéyá sín tsjánjuan ijnko xrā sich'e sín.

<sup>3</sup> Ntá nixjehē sín Dios la kjónehya sín la ntá kjuixin ntá k'uejotja tja sín chrí-taón ikja tí sín a la nixja sín jnkojnko sín kixin ó sátsji sín.

### Ch'ín Pablo la ko ch'ín Bernabé tjako sín nonte Chipre

<sup>4</sup> A ntá tí Nchakuen Dios ichr'án ch'ín Bernabé la ko ch'ín Saulo sákjuí sín chjasin Seleucia. Ntá ntaha k'uíxenhén sín ijnko ntabárco sákjuí sín ijnko nonte it'in Chipre. <sup>5</sup> Ntá kjuíji sín ijnko puerto it'in Salamina. Ntaha kjuakoṁín sín itén Dios tí nínko kuènte tí sín judío. Kjaxin kjuíjiko sín ch'ín Juan kixin tsjinkítsa ch'án. <sup>6</sup> La ntá sákjuí sín nkuíxín nonte Chipre hasta kjuíji sín chjasin Pafos. Ntaha xéta sín ijnko ch'ín nchexroan me ijnko ch'ín judío it'in Barjesús. Jehe ch'án kjuích'ia ch'án ntáchro ch'án kixin kjaxin ch'án nixja ch'án itén Dios. <sup>7</sup> A ntá tí ch'ín nchexroan a mé kjuák'eko ch'án tí ch'ín gobernador Sergio Paulo. A ntá tí ch'ín gobernador mé imá jína kjuenkayáxin ch'án. K'uíyehē ch'án tí ch'ín Bernabé la ko tí ch'ín Saulo kixin jehe ch'án tjinkaon ch'án tsinhin ch'án itén Dios. <sup>8</sup> A ntá tí ch'ín nchexroan,

nkiva griego mé t̄ik̄itexin sín ch'án Elimas, mé nínkakonhen ch'án tí sín tjako a kixin tjinkakonhya ch'án kixin tí ch'ín t'et̄oan chrókuitekaon ch'án Ìnchéni. <sup>9</sup> A ntá tí ch'ín Saulo, k̄j̄axin t̄ik̄itexin sín ch'án Pablo, imá chón̄ta ch'án Nchakuen Dios. La ntá komá ch'án tí ch'ín nchexroan. <sup>10</sup> Ntáchro ch'án kixin:

—Jaha mé chojni ch'ia, jínahya, xjeen Diablo la nínkakonhén kaín nkehe jína. ¿Nkekuènte kixin ch'éna jínahya tí nt̄ia ntoá kuènte Ìnchéni? <sup>11</sup> A ntá ijie la Ìnchéni sintakjasótia. Tsit̄oḥa ntakótán iso yaon la ts'ikonhya tí xrohi kuènte yaon —ichro ch'ín Pablo.

Ntá tuénxín tí ch'ín Elimas la k'uíx-ítie tjen ch'án. La ntá kjueyá ch'án ijnko nkexro tsinkátséhe tja ch'án sát-sjiko ch'án kixin t'ikonhya ch'án. <sup>12</sup> A ntá xikaha mé k'uíkon tí ch'ín gobernador nkehe kónhen la ntá kjuankixin tinkáchónki ch'án Ìnchéni kixin k'uíkon ch'án tí kjuachaxin kuènte Ìnchéni.

### **Ch'ín Pablo la ko ch'ín Bernabé tjejó chjasin Antioquía estado Pisidia**

<sup>13</sup> Ntá tí ch'ín Pablo la ko tí sín xriko ch'án sákjuúxin sín chjasin Pafos. K'uíx-enhen sín ntabárc̄o sákjuí sín kjuíji sín chjasin Perge estado Panfilia. Ntá ntaha ch'ín Juan<sup>††</sup> kuítoḥe tí jehe sín ntá kjan ch'án chjasin Jerusalén. <sup>14</sup> Ntá sákjuúxin ch'ín Pablo la ko ch'ín Bernabé chjasin Perge kjuíji sín chjasin Antioquía chjinaxon Pisidia. A ntá tí yaon t'ok'éhe sín ntá k'uíxenhen sín tí n̄ínko Israel na ntaha k'uéjót̄j̄axin sín. <sup>15</sup> Ntá kjuixin kjuínchekuáxin sín tí xroon kuènte ley la ko tí nkehe tsíkjin tí sín k'uéchrónka itén Dios ntá tí sín t'et̄oan kuènte n̄ínko mé k'uíyeh̄e sín tí sín a ntá ntáchro sín kixin:

—Kíchóni tí chonta nkehe tsochronka kixin ant̄sí má tsochéheni la chronka jie tsinhinni —ichro sín.

<sup>16</sup> Ntá ch'ín Pablo k'uínkatjen ntá kjuakoxin itja ch'án kixin tsotáni sín. Ntá ntáchro ch'án kixin:

—Chrókuinhínrá jahará chojni israelita la ko k̄j̄axin chrókuinhínrá jahará tsík̄j̄ixinrá chjasin ókjé tí chaxin tjinkáonrá nchexiteyéhérá Dios. <sup>17</sup> Tí Dios tinkáchónki tí sín chjasin Israel mé kjueyá ch'án tí sín tsík'axrjenixinni. Ntá chr'éxin Dios kjuanjin kjuachaxin kixin chrókótsjé tí jehe sín tí nax̄a k'uéjó sín chjasin Egipto. Éxí chojni tsík̄j̄ixin ókjé k'uéjó sín a ntá chr'éxin ntá kjuachaxién Dios kjuínk̄itsa sín k'uaxrjexin sín tí nonte ntiha ínaá. <sup>18</sup> Dios kjuínk̄itsa sín tí cuarenta nánó k'uéjó sín tí nteje. <sup>19</sup> Ntá chr'éxin kjuínchek'it̄j̄ayan ch'án yato nación k'uék'ejó nonte Canaán, kixin tí sín tsík'axrjenixinni chrók'uáyéh̄e tí nonte a. <sup>20</sup> Ntá kaín sín k'uéjó sín ntiha ijnko cuatrocientos cincuenta nánó. K'uék'et̄oan tí sín juez hasta ikjui tí ch'ín Samuel ijnko ch'ín k'uéchrónka itén Dios. <sup>21</sup> Ntá kjuanchia tí sín israelita ijnko ch'ín rey ts'et̄uēnhen sín. Ntá kjueyá Dios tí ch'ín Saúl la k'uētoan ch'án cuarenta nánó. Jehe ch'án it'é ch'án mé ch'ín Cis la k'uaxrjenixin ch'án ch'ín Benjamín. <sup>22</sup> Ntá chr'éxin Dios kuakitsjehe ch'ín Saul tí x̄a kjuák'e ch'án ntá k'uáyéh̄e ch'ín David tí x̄a rey. Ntá ntáchro Dios kixin: “Ó k'uít̄já ch'ín David, it'é ch'án mé Isaí. Jehe ch'án mé ijnko chojni nchekh̄ana mé sinchexiteyàna ch'án kaín nkehe t̄j̄ínkavan”. <sup>23</sup> Ijnko tí chojni k'uaxrjenixin tí ch'ín David mé Jesús. Tíha la Dios tsíchr'án ch'án kixin sinchekaá tí sín israelita. Mé xikaha tsíntáchro ch'án. <sup>24</sup> Nax̄a tjakohya ch'ín Jesús ntá ch'ín Juan kjuako ch'án tí tan kuínhin tí sín israelita la ntáchro ch'án kixin chrókjan sín chrórxaxinkaon sín Dios ntá chrokuikite

<sup>††</sup>13:13 Hechos 12.25

sín. <sup>25</sup>Ntá chjina its'en ch'ín Juan ntáchro ch'án kixin: “Janhan na jehya tí nkexro tjenkayáxinrá. Náhí. Chr'éxin na itsi í jnko nkexro la chrókósuàna chrókjuasintanka tí correa tokaté ch'án kixin antsí mé t'etoan tí jehe ch'án la kánhyó t'etoan tí janhan,” mé xikaha tsintáchro ch'ín Juan.

<sup>26</sup>Jahará kichó ni tsík'axrjeníxinrá ch'ín Abraham tinhínrá la ko kaín rá chojni tsíkjin ikjín nchexiteyéherá Dios, tinhínrá tí tán tsaáxinrá. <sup>27</sup>Méxra tí sín k'uék'ejó sín chjasin Jerusalén la ko tí sín t'etoan ntiha mé kónoehya sín nkexro tí ch'ín Jesús la ko kuienxínhya sín tí nkehe tsikjin tí sín k'uéchrónka itén Dios senó tió kjuínchekuáxin sín tí xroon tí nkaxenhen ninko jnkojnko tí yaon t'ok'éhe sín. Mé xikaha jehe sín tió kjuínchekjasóte sín tí ch'ín Jesús la kjuínchexiteyá sín éxi nixja tí xroon a. <sup>28</sup>Ntá k'uitjahya sín ninkehó jie kixin chrók'uen ch'án ntá kjónté kjuanchehe sín tí ch'ín Pilato kixin ts'etoan ch'án kixin its'en ch'án. <sup>29</sup>Δ ntá ó xiteyá tí nkehe tsikjin tí sín ósé kuènte ch'án. Ntá kjuixin k'uén ch'án ntá kjuinkajinxín sín tí cuerpo kuènte ch'án tí ntacruz ntá kjuavá sín ch'án. <sup>30</sup>Δ ntá Dios kjuínchexechón tí jehe ch'án inaá. <sup>31</sup>Δ ntá nchónhya yaon k'ufkon sín ch'ín Jesús tí sín k'uék'ajiko ch'án tió sákjuixin sín estado Galilea la sákjuí sín chjasin Jerusalén. Δ ntá ijie tí sín a mé tjejónixja sín nkexrí kjuako ch'ín Jesús, tjakohe sín kaín chojni.

<sup>32</sup>'Δ ntá jie jeheni tjakoni tí tan jína, mé tí nkehe tsikjanjon Dios tsík'áyéhe tí sín tsík'axrjeníxinni ósé. <sup>33</sup>Mé xikaha xiteyá k'uáyéheni tí jeheni tsík'axrjeníxinni tí sín a. Δ ntá Dios kuènte tí sín

a mé kjuínchexechón tí ch'ín Jesús éxi nixja tí xroon yóxin Salmo, ntáchro kixin: “Jaha mé xjanna. Janhan mé tjahá kjuachón jie.”<sup>¶</sup> <sup>34</sup>Ntá tsintáchro Dios kixin sinchexechón ch'án tí ch'ín Jesús kixin tsóxikahya cuérpoé ch'án. Mé xikaha chrónka tí xroon itén Dios. Ntáchro kixin: “Janhan mé sintaxiteyá tí nkehe chaxín tjanka ch'ín David.”<sup>¶¶</sup> <sup>35</sup>La ko í jnko Salmo mé ntáchro xikihi: “Jaha tsjánjonhya kjuachaxin kixin tsóxika tí cuérpoé tí nkexro tjóá kjuít'aha xra.”<sup>§§</sup> <sup>36</sup>Δ ntá ch'ín David kjuínchexiteyá ch'án éxi tsík'etoan Dios tí kjuák'e ch'án ntá kjónté chr'éxin ik'uén ch'án ntá xravá ch'án xikaha k'uéxravá tí sín tsík'axrjeníxinni la ntá kjónté la xíka ntoe ch'án. <sup>37</sup>Δ ntá tí cuérpoé tí nkexro kjuínchexechón Dios la kótjehya. <sup>38</sup>Méxra kichó ni t'ichjánxin tsonohará kixin nkexrí tsjiin ijjará kixin Jesús mé k'uenyákonhánrá. <sup>39</sup>Δ ntá kaín nkexro tinkáchónki Jesús mé ó kjuínchetjóá ch'án asén sín. Δ ntá tí ley k'uetóan ch'ín Moisés kjuachahya kótjuáxin ti jie. <sup>40</sup>Chrókóxakonhanrá kixin chrókuànhyará xikaha éxi tsikjin tí sín ósé xikihi:

<sup>41</sup>Tsjehérá jahara chojni titekakonhya. Ijie la tsochrakonrá kixin nkehe tsonhen kixin janhan Dios tsjákoxiān ijnko nkehe jie ijnko yaon kjánchó sítekákonhyará kjónté ókjé nkexro chróchrónka.\*

<sup>42</sup>Δ ntá ch'ín Pablo la ko tí nkexro k'uájiko ch'án k'uaxrjexín sín nkaxenhen tí ninko, a ntá chrónòna tí sín jehya sín judío tsíkokjéxín, kjuanchia sín kixin í jnko semana tí yaon t'ok'éhe sín la inaá tsochrónka ch'án éxi tí kjuako ch'án. <sup>43</sup>Ntá tí kjuixin xíkaxín sín tí kójnkotsé

¶13:33 Salmo 2.7

¶¶13:34 Isafas 55.3

§§13:35 Salmo 16.10

\*13:41 Habacuc 1.5

sín tí nínko ntá nchónhya tí sín judío, la ko tí sín jehya sín judío, mé tí sín na ntá kuinkáchónki sín éxí tí sín judío la xraxinkaon sín Dios, la mé imá kóxrjín-hín sín tí nkehe kjuako ch'ín Pablo la ko ch'ín Bernabé la ntá sákjuíchréhe sín. <sup>44</sup> A ntá jehe sín mé k'uetōan sín kixin ántsí jína chrókuinkáchónki sín tí Dios tjuèhe kaín chojni.

<sup>44</sup> A ntá í jnko semana kjuèxin, tí yaon t'ok'éhe sín la kójkotsé kaín tí sín sín tí chjasin ntiha kixin tjinkaon sín tsinhin sín itén Dios. <sup>45</sup> A ntá k'ufkon tí sín judío a kixin nchónhya chojni tsíkójkotsé, ntá imá kóchjínōxínhin sín, ntá kjuankíxin sín k'uántaxínhin sín tí ch'ín Pablo. <sup>46</sup> A ntá ch'ín Pablo la ko ch'ín Bernabé la íchá ántsí má chrakonhya sín nixja sín ntáchro sín kixin:

—T'ichjánxin senó jahará judíorá chrókuinhínrá itén Dios. Kjánchó tjinkákonhyará tsinhínrá tí nkehe jína tsjanjon kjuachón jnkochrín. A ntá ijie la tsitohará tí jahara judíorá la ntá jeheni la sátsjini tsjakoheni tí sín jehya judío <sup>47</sup> xíkaha tsík'etōan Ìnchéni. Ntáchro ch'án kixin:

Janhan ichr'an tí jahará éxí xrohi ts'inkaséyanxín kaín nación kixin sátsjikoará tí tan tsjanjon kjuachón tsaáxin chojni hasta tí ántsí má kjín kjuèxin chjasintajni.<sup>†</sup>

Mé xíkaha k'uetōan Dios.

<sup>48</sup> A ntá kuínhin tí sín jehya sín judío tíha la kjuankíxin kóchéhe sín la ntáchro sín kixin tí tan kuènte Ìnchéni la nkehe jína, ichro sín.

La ntá kjuankíxin kuinkáchónki kaín tí sín tsíkítōenxín sín kixin tsochóna sín kjuachón jnkochrín. <sup>49</sup> Ntá xíkaha xrankíxin xrako tí itén Ìnchéni nkúixín tí chjasin ntiha. <sup>50</sup> A ntá tí sín judío nixjehe sín iso chojni chjin jína tjetōan la ko tí chojni ntoa t'etōan tí chjasin ntiha

la ntá kjuínchekónínkaon tí sín a la ntá kjuankíxin sín chrók'óyán sín tí ch'ín Pablo la ko tí ch'ín Bernabé ntá sákjuíxin sín chjasin ntiha. <sup>51</sup> A ntá jehe sín la kót-sjénka sín tokaté sín kixin tsoxénjin tí nche chóna toté sín. Tíha mé kjuakōxin sín kixin ntoáhya kjuenkayáxin tí sín a. A ntá sákjuí tí jehe sín chjasin Iconio. <sup>52</sup> Ntá tí sín tinkáchónki Ìnchéni la imá chéhe sín kixin ántsí chóna sín Nchakuen Dios.

### Ch'ín Pablo la ko ch'ín Bernabé tjejó chjasin Iconio

**14** Ntá kjuíji ch'ín Pablo la ko ch'ín Bernabé tí chjasin Iconio. Ntá k'uúixenhen sín nínkoe tí sín judío ntá jína kjuako sín. La ntá nchónhya tí sín judío la ko tí sín jehya judío mé kuítekaon sín tí nkehe kjuako sín. <sup>2</sup> A ntá iso tí sín judío kuítekakonhya la ntá kjuankíxin nchekónínkaon sín tí chojni jehya judío kixin tsonínkakonhen sín tí sín tjako. <sup>3</sup> A ntá tí sín tjako la isé kuítóhe sín ntiha la chrakonhya sín nixja sín la ko tinkáchónki sín Ìnchéni Jesús. La ntá Ìnchéni kjaxin kóxrjínhin ch'án tí nkehe nixja sín kixin nkexrí tjuèheni Dios la kjuanjon ch'án kjuachaxin tsjasin sín kjuaxroan. <sup>4</sup> A ntá tí sín tjejó chjasin ntiha la jnkokónhya kjuenkayáxin sín. Iso sín kuítekakonhen sín tí sín judío la í so sín kuítekakonhen sín tí sín tsík-jeyá Ìnchéni. <sup>5</sup> A ntá tí sín judío la ko tí sín jehya judío mé kjuenkayáxinko sín tí sín t'etōan kixin sinchechrakon sín tí sín tsík-jeyá Ìnchéni la ko tsochjéhe sín xro. <sup>6</sup> La ntá tí ch'ín Pablo la ko tí ch'ín Bernabé kónohe sín nkehe kjuenkayáxin tí sín a ntá sákjuí sín chjasin Listra la ko chjasin Derbe estado Licaonia la nkúixín ntiha. <sup>7</sup> La kjaxin ntaha kjuako sín tí tan jína kuènte Ìnchéni.

<sup>†</sup>13:47 Isaías 42.6; 49.6

## Chjéhe sín xro ch'ín Pablo chjasin Listra

<sup>8</sup>Ntá tí chjasin Listra itjen ijnko ch'ín xitjahya tji. Nunca xitjahya k'uáji ch'án kixin tsíkokjéxín ch'án xitjahya itji ch'án. <sup>9</sup>Méxra ó tjetjaxínkoá ch'án ntá kuínhin ch'án nkehe tí tjako ch'ín Pablo. Ntá ch'ín Pablo komá ch'án tí ch'ín a ntá kónohe ch'án kixin tí ch'ín antsí tinkáchónki ch'án Ìnchéni kixin tsítóhe ch'án jína. <sup>10</sup>Ntá jehe ch'án itsen ntáche ch'án tí ch'ín a kixin:

—T'inkatjen, ntoá tjak'exián totá —ichro ch'án.

Ntá tuénxín k'uínkatjen ch'án, chrika ch'án, kjuák'exín ch'án toté ch'án ntá ó jína tji ch'án. <sup>11</sup>Ntá kaín tí sín chjasin ntiha k'uíkon sín nkehe kjuích'e ch'ín Pablo, ntá kaín sín k'uíyexin sín nkívee sín Licaonia ntáchro sín kixin:

—Dios tsík'lóna chojni mé tsíkixín nkajní tjejókoni ntihi —ichro sín.

<sup>12</sup>La ntá kjuínchek'in sín ch'ín Bernabé mé tí dios Júpiter a ntá ch'ín Pablo mé tí dios Mercurio kixin imá nixja ch'án. <sup>13</sup>Ntá tí ch'ín nchat'á kuènte tí dios Júpiter mé chóna ch'án nínko tí t'ixenxínni ikon chjasin ntá kjuíkao ch'án koxinta tjeteyá tsjo. A ntá jehe ch'án la ko kaín tí chojni la chréhe sín kixin tjinkaon sín chrókjuikosáyehe sín tí sín tjako la ko tjinkaon sín chrók'óyán sín tí koxinta chrók'uáyéhe tí sín a. <sup>14</sup>A ntá tí sín apóstol mé ch'ín Pablo la ko ch'ín Bernabé mé kónohe sín tíha ntá kjuankíxin sín kótséchje sín iké sín la sákjuíkjiakjan sín tí chojni síin ntiha la t'óyako sín ntáchro sín kixin:

<sup>15</sup>—¿Kuènté kixin tjejoch'erá xíkaha? Jeheni chojni éxi tí jahará. Tí xra ó kuini kixin tsochrónkani itén Dios kixin tsi-tohéra kaín tí nkehe ninkehó sínkíhya la ntá chrókjanrá chrókuinkachónkirá Dios tjechón. Jehe ch'án mé kjuích'éna ch'án nkajní la ko chjasintajni la ko tí

ntayaon la ko kaín tí nkehe síin. <sup>16</sup>Ntá ósé mé kuítóhe Dios chojni kixin jehó ts'aji sín ntje sín. <sup>17</sup>Kjónté la Dios tjako-xín ch'án kixin jehe ch'án t'etoan ch'án kixin kjuích'éna ch'án kaín nkehe. Jehe ch'án mé t'etoan kixin ts'aniá chrin ntá ts'enkani la jína ts'óneheni, la jehe ch'án tjanjon ch'án nkehe kixin jnkochríxin ts'ixin nkehe sineni, la ko jehe ch'án mé nchechéhene ch'án —mé xíkaha ichro ch'ín Pablo.

<sup>18</sup>Kjónté xíkaha ichro tí sín tjako la naxa tjinkaon tí chojni chrokjuikosáyehe sín chrók'óyán sín koxinta chrókjokehe sín tí sín tjako.

<sup>19</sup>A ntá ikui iso tí sín judío kjuixín sín chjasin Antioquía la ko chjasin Iconio. Nixjehe sín tí sín ntiha kixin tsítóhe sín tí nkehe jehya jína tjako tí sín a ntá kónínkaon sín ntá kjuankíxin chjéhe sín xro tí ch'ín Pablo. La ntá ách'e ó kjuixín tsík'en ch'án ntá kuinkánkákjen sín ch'án sákjuíko sín ch'án ikon chjasin. <sup>20</sup>Ntá tí sín tinkáchónki Ìnchéni mé kójnkotsé sín k'uántatjen sín tí ch'ín Pablo ntá k'uàya ch'án xíkjan ch'án tí chjasin ntiha ínaá. Ntá tí yaon chr'éxín ntá sákjuíko ch'án tí ch'ín Bernabé chjasin Derbe.

<sup>21</sup>A ntá ó kjuixín chrónka sín tí tan jína la ko kjuacha sín itsjé chojni kuinkáchónki Ìnchéni ntiha ntá kjan sín chjasin Listra la ko chjasin Iconio la ko chjasin Antioquía. <sup>22</sup>Nkuixín tí chjasin k'uátsínka sín mé kjuínchechéhe sín tí sín kuinkáchónki Ìnchéni. K'uetóan sín kixin naxa jína chrókuinkáchónki sín Ìnchéni la ntáchro sín kixin tí ts'ixenhenni tí kjuachaxin kuènte Dios t'ichjánxin tsjasóteni. <sup>23</sup>A ntá ntiha kjueya sín chojni jnkojnko nínko kixin ts'etuehen sín tí sín tinkáchónki Jesús kixin jína ts'ejó sín. Ntá nixjehe sín Dios tí naxa kjónehya sín la ntá ntáche sín Ìnchéni kixin ts'ayakonhen ch'án tí sín ó kuinkáchónki tí jehe ch'án.

### Ch'ín Pablo la ko ch'ín Bernabé ikjan sín chjasin Antioquía estado Siria

<sup>24</sup>Ntá chr'éxin k'uaúsínka sín estado Pisidia la ntá kjuúji sín estado Panfilia. <sup>25</sup>Ntá chjasin Perge kjuako sín tí tan kuènte Ìnchéni la ntá kjuixin ntá sákjuí sín chjasin Atalia. <sup>26</sup>Ntá ntiha k'uúix-enxín sín ntabáro ntá sákjuí sín chjasin Antioquía tí chjasin k'uénixjehe chojni Dios k'uékjanchia sín kixin Dios tsjinkitsa tí sín a sich'e sín tí xra. La ntá ó kjuixin xiteyá. <sup>27</sup>Ntá tió kjuúji sín chjasin Antioquía ntá kójnkotsé kaín tí sín tinkáchónki Jesús. Ntá kjuankixin chrónka ch'ín Pablo nkexrí kjuínkítsa Dios tí jehe sín la ko nkexrí kjuanjón Dios kjuachaxin tsjakohe sín tí chojni jehya judío kixin kjaxin sín tsitekaon sín Ìnchéni. <sup>28</sup>A ntá tí ch'ín Pablo la ko tí ch'ín Bernabé itsjé yaon k'uéjoko sín tí sín tinkáchónki Ìnchéni ntiha.

### Kójnkotsé sín chjasin Jerusalén

**15** A ntá iso chojni tsíkixin sín estado Judea ntá kjuúji sín chjasin Antioquía. Ntá kjuankixin sín kjuakohe sín tí sín kichó ni kixin xitjahya tsaáxin sín tí chóntahya sín tí xroye tsík'etoan ch'ín Moisés. <sup>2</sup>Ntá tí ch'ín Pablo la ko tí ch'ín Bernabé la ko tí sín judío kjuankixin kjuanjónkoxín sín kichó sín. Ntá áxri ntá kónoxín kixin tí ch'ín Pablo la ko tí ch'ín Bernabé la ko í so chojni la sátsji sín chjasin Jerusalén. Ntaha tsonixjehe sín tí sín apóstol la ko tí sín t'etoan nínko kixin nkexrí tsonhen tí xroye tsík'etoan ch'ín Moisés.

<sup>3</sup>Tí sín tinkáchónki Ìnchéni chjasin Antioquía mé ichr'án sín tí sín a ntá k'uaúsínka sín estado Fenicia la ko estado Samaria la tinkáchrónka sín kixin nkexrí tí sín ókjé jehya sín judío kjuitoxinhin tí k'uékjenkayáxin sín ntá kuákja sín ntíe Dios. Ntá kaín tí sín kichó ni imá kóchéhe sín tí kuínhin sín xikaha.

<sup>4</sup>La ntá kjuúji ch'ín Pablo la ko ch'ín Bernabé chjasin Jerusalén ntá tí sín tinkáchónki Ìnchéni la ko tí sín apóstol la ko tí sín t'etoan kuènte nínko mé kjuanjón sín kjuachaxin ts'ejó tí sín a. Ntá chrónka sín kixin Dios imá kjuínkítsa tí jehe sín. <sup>5</sup>Ntá iso tí sín fariseo ó tsíkitekaon Ìnchéni mé k'uínkatjen sín ntá ntáχρο sín kixin:

—T'ichjánxin isa xroye tí sín jehya judío tinkáchónki Ìnchéni la ko t'ichjánxin ts'ítuenhen sín sinchexiteyéhe sín kaín tí ley —ichro sín.

<sup>6</sup>Na ntá kaín tí sín apóstol la ko tí sín t'etoan nínko mé kójnkotsé sín kjuenkayáxin sín nkexrí tsonhen kixin xikaha ichro tí sín judío. <sup>7</sup>Ntá imá nixjehe kichó sín ntá k'uínkatjen ch'ín Pedro ntáχρο ch'án kixin:

—Jahará kichó ni ó nohará nkexrí kixin senó Dios tsíkijeyá tí jeheni kixin tsjakoheni kaín tí sín jehya judío kixin tsinhin sín tí tán jína kuènte Cristo kixin kjaxin jehe sín tsitekaon sín. <sup>8</sup>Dios mé ó nohe ch'án nkexéhe kaín asén chojni. Kjuakoxin ch'án kixin k'uáyéhe ch'án tí sín jehya judío kixin chjéhe ch'án sín Nchakuen ch'án éxi tí xikaha k'uáyéheni tí jeheni. <sup>9</sup>Dios la t'ikon kaín chojni jnkokón éxi tí jeheni. Ntá kjuínchetjóa ch'án asén sín kixin ó tinkáchónki sín Ìnchéni. <sup>10</sup>Méxra ¿nkekuènté titekakonhyará tí nkehe kjuích'e Dios la ntá tétuenhénra chojni sinchexiteyá sín kaín tí nkehe ixra tsitekaon sín? Ni jeheni la ko ni tí sín tsík'axrjenixinni kjuachahya sín kjuínchexiteyá sín tíha. <sup>11</sup>Náhi. Ó noheni kixin kjuasáyé Ìnchéni Jesús mé kuaáxinni la ko kjaxin xikaha kuaáxin tí jehe sín kuítekaon —mé xikaha ichro ch'ín Pedro.

<sup>12</sup>Ntá kaín tí sín tsíkójnkotsé táni sín kuínhin sín nkexrí chrónka tí ch'ín Bernabé la ko tí ch'ín Pablo kixin Dios kjuínkítsa sín kjuasin sín itsjé kjuaxroan



k'uíkon tí sín jehya sín judío. <sup>13</sup> Kjuixin nixja ch'ín Pablo la ko ch'ín Bernabé ntá kjuankíxin nixja ch'ín Jacobo, ntáchro ch'án kíxin:

—Kíchóni, tinhínrá tí nkehe tsoxrjanka. <sup>14</sup> Ch'ín Simón Pedro chrónka nkexrí kjuakoxin Dios kíxin tjuèhe ch'án tí chojni jehya judío la nkexrí kjueyá Dios iso tí sín kíxin tsinkáchónki sín tí jehe ch'án. <sup>15</sup> Mé xíkaha chaxín chrónka tí xroon tsíkjin tí sín k'uéchrónka itén Dios kíxin:

<sup>16</sup> Janhan mé tsokjan chr'éxin.

Tió ts'inka ntá sit'ána nixin tí nchia tsík'oya kuènte David

la janhan la tsjínkítsa sín ts'etoan sín.

<sup>17</sup> Kíxin kjaxin kaín xín chojni mé tsjeyá sín Ìnchéni

la ko kjaxin kaín xín tí sín ókjé nación mé tí sín kótjuáxin nina mé tsinkáchónkina sín.

<sup>18</sup> Ìnchéni mé kjuakoxin kaín tíha tí ósé la tsíkjanjon ch'án tí tan kuènte ch'án.<sup>‡</sup>

Mé xíkaha ichro itén Dios

<sup>19</sup> Méxra ntáxrjan kíxin tí sín jehya judío la t'ichjánxinhya sinchexiteyá sín kuenté tí ley kíxin ó kuítóhe sín tí nkehe kuinkáchónki sín senó kíxin jína chrókjueyá sín Dios. <sup>20</sup> Méxra tsochr'énhenni sín ijnko xroon la jehó ts'etuenhenni sín kíxin chrókjónehya sín tí nto tsíkjokehe chojni tí nkehe tsíkjanoya la ko chróchóntahya sín chojni chjin ókjé la ko chrókjónehya sín tí nto kuènte ko tsíchrínjinhya ikja va la ko chrókjónehya sín ijnié va. <sup>21</sup> A ntá jnkojnko chjasin siín nkexro chrónkaxín tí ley kuènte ch'ín Moisés nchekuáxin sín tí nkaxenhen njnko jnkojnko tí yaon t'ok'éhe sín —ichro ch'ín Jacobo.

<sup>22</sup> Ntá kaín tí sín tsíkjeýá Ìnchéni la ko tí sín t'etoan kuènte njnko la ko kaín tí í so sín tinkáchónki Ìnchéni kjueyá sín iso

chojni tsochr'án sín chjasin Antioquía, mé kjueyá sín ch'ín Judas, tikítexín sín ch'án Barsabás, la ko ch'ín Silas sátsjiko sín ch'ín Pablo la ko ch'ín Bernabé. Tí sín a mé sín tjetoan ntiha. <sup>23</sup> Ntá ichr'án sín tí xroon sákjuíko tí sín a ntáchro kíxin:

“Jeheni chojni tsíkjeýá Ìnchéni la ko chojni t'etoan kuènte njnko ntihi la nixjahaíni tí jahará, kíchó ni jehya judío, tjejórá chjasin Antioquía la ko estado Siria la ko estado Cilicia. <sup>24</sup> Ó noheni kíxin iso chojni tsíkixin chjaséni kjónté k'uéchóntahya sín kjuachaxin la kjuínchexakonhanrá sín kíxin ntáchro sín kíxin t'ichjánxin itsará tí xroye tsík'etoan ch'ín Moisés. <sup>25</sup> Ntá jnkokoá kjuenkayáxinni tsjeyáni nkexro tjejó ntihi kíxin sáchrókjuitsjehe tí jahará la chrókjuijiko sín ch'ín Bernabé la ko ch'ín Pablo kíxin imá tjuèheni sín. <sup>26</sup> Tí sín a mé ántosen sín kjónté chrók'uénxín sín kíxin tí tinkáchónki sín Ìnchéni Jesucristo. <sup>27</sup> Méxra tsochr'ánni ch'ín Judas la ko ch'ín Silas tsjiji sín kíxin jehe sín mé tsonixjahaíni sín tsochrónkaxín sín mé kjuínkítsani kjuenkayáxinni kíxin jehya chrók'uetuanhanráni ijnko nkehe imá xra. Náhí. Jehó tí nkehe kánhyó xra t'ichjánxin sinchexiteyará mé t'etoanni: <sup>29</sup> chrókjóntehyará tí iko tsíkjokehe chojni tí nkehe tsíkjanoya la ko kjaxin chrókjóntehyará tí iko a la ko chrókjóntehyará tí nto kuènte tí ko tsíchrínjinhya kja la ko kjaxin ninkexró chrókuakjahya í jnko chojni chjin ókjé. Ntá tí sinchexiteyará kaín tí nkehe t'etoanni la jína ts'ejorá.” Mé xíkaha nixja tí xroon.

<sup>30</sup> Ntá kjuixin nixja sín ntá tí sín a sákjuí sín chjasin Antioquía. Ntá tíó kjuíji sín ntiha ntá kójnkotsé tí sín tinkáchónki Jesús ntá kjuanjon sín tí xroon a. <sup>31</sup> Ntá tíó kjuínchekuáxin tí sín kíchó

<sup>‡</sup>15:18 15.16–18 Amós 9.11–12

ni tí xroon a ntá imá kóchéhe sín kixin xikaha chrónka tí xroon a. <sup>32</sup>Ntá tí ch'ín Judas la ko tí ch'ín Silas kjaxin sín ó nohe sín tsochrónkaxín sín itén Dios la nixja sín jína la imá kjuínchechéhe sín tí sín kíchó ni kixin tí nkehe nixja sín. <sup>33</sup>Ntá ntahó k'uéjé sín iso yaon, ntá tió sátsji sín ntá kaín tí sín tinkáchónki Ìnchéni nixjehe sín jína ntá ó xíkjan sín inaá tí tsíkjin sín tí tjejó tí sín tsíchr'án sín. <sup>34</sup>Kjánchó ch'ín Silas kjuenkayáxin ch'án kixin ntahó chrókuitóhe ch'án. <sup>35</sup>À ntá ch'ín Pablo la ko ch'ín Bernabé kuítóhe sín chjasin Antioquia. Jehe sín la ko í so chojni mé kjuako sín la ko chrónkaxín sín itén Ìnchéni.

### Ch'ín Pablo kjuankíxin tí yóxin viaje

<sup>36</sup>À ntá chr'éxin ch'ín Pablo nixjehe ch'án ch'ín Bernabé. Ntáchro ch'án kixin:

—Sátsjtsjeheni tí sín kíchó ni kaín tí chjasin kjuakoxinni itén Ìnchéni ósé. Tsjtsjeheni nkexrí tjejó sín ntiha —ichro ch'án.

<sup>37</sup>À ntá ch'ín Bernabé la tjinkaon ch'án kixin kjaxin sáchrókjuiko sín ch'ín Juan kjaxin tikítexín sín ch'án Marcos. <sup>38</sup>À ntá ch'ín Pablo kóxrjienhya sátsjiko sín tí ch'ín Marcos a kixin jehe ch'án kuítóhe ch'án sín estado Panfilia la kjuínkit-sahya ch'án kixin naxá tsonhen tí xra. <sup>41</sup>Méxra jnkokoáhya kjuenkayáxin sín la ntá xikayehe sín la ókjé sákjuí sín. Ch'ín Bernabé sákjuíko ch'án tí ch'ín Marcos la k'uixenhen sín ijnko ntabárcó sákjuí sín nonte Chipre. <sup>40</sup>À ntá tí ch'ín Pablo la jehó ch'án mé kjueyá ch'án tí ch'ín Silas ntá chr'éxin sákjuí sín. Tí sín kíchó ni ntiha kjuanchehe sín Dios kixin jína ts'ayakonhen sín ch'án la ntá sákjuí sín. <sup>41</sup>Ntá k'uátsínka sín estado Siria la ko estado Cilicia la kjuínchechéhe sín asén tí sín tinkáchónki Ìnchéni nínko ntiha.

### Ch'ín Timoteo sákjuíko ch'án ch'ín Pablo la ko ch'ín Silas

**16** Ntá kjuíji ch'ín Pablo chjasin Derbe la ko chjasin Listra. Ntá ntaha itjen ijnko ch'ín tinkáchónki Jesús it'in ch'án Timoteo. Jehe ch'án mé xjeen ijnko tjan judía tinkáchónki Ìnchéni. À ntá it'é ch'án mé ijnko ch'ín griego. <sup>2</sup>Ntá tí sín kíchó ni tjejó chjasin Listra la ko chjasin Iconio mé nixja sín kixin jína tí ch'ín Timoteo. <sup>3</sup>À ntá ch'ín Pablo mé tjinkaon ch'án sáchrókjuiko ch'án tí ch'ín Timoteo. Ntá senó k'uetóan ch'án chrókua tí ch'ín Timoteo a tí xroye kixin tsonínkakonhya tí sín judío tí chjasin sátsji sín kixin ó nohe tí sín a kixin it'é ch'ín Timoteo la mé griego. <sup>4</sup>Ntá sákjuí sín la kaín tí chjasin k'uátsínka sín la nixjehe sín tí sín kíchó ni la chrónkaxín sín tí nkehe tsík'etóan tí sín apóstol la ko tí sín t'etóan kuènte nínko chjasin Jerusalén. <sup>5</sup>Ntá tí chojni tinkáchónki Ìnchéni mé antsí má ntoá k'uéjé sín la ko jnkojnko yaon sítinkákótsjé sín.

### Xríngnya titàya k'uíkuèn ch'ín Pablo ijnko chojni estado Macedonia

<sup>6</sup>Ntá Nchakuen Dios kjuanjonhya kjuachaxin kixin sátsjikjako sín itén Dios estado Asia ntá k'uátsínka sín nó estado Frigia la ko estado Galacia. <sup>7</sup>Ntá tió kjuíji sín estado Misia ntá kjuenkayáxin sín sáchrókjuí sín nó estado Bitinia. Ntá Nchakuen Jesús kjuanjonhya kjuachaxin kixin sátsji sín nó ntiha. <sup>8</sup>Méxra k'uátsínka sín ikjín tí estado Misia la ntá kjuíji sín chjasin Troas chrínta ntayaon. <sup>9</sup>Ntá ijnko tie xríngnya titàya k'uíkuèn ch'ín Pablo ijnko ch'ín estado Macedonia kjuák'exín toté ch'án chrónòa ch'án kixin: “T'átsínka Macedonia tsjínkítsani,” ichro ch'án. <sup>10</sup>Méxra tíha tsík'íkon ch'ín Pablo la ntá

tuénxín kóyaxínhinni kixin sátsjini estado Macedonia kixin kónoexínni kixin Dios kjueyáni kixin ntiha tsjakoni tí tan jína tsaáxin chojni. [Janhan tí ch'ín Lucas ikjinni tí xroon i k'uéjókotoxínni kichó ni ntiha.]

**Ch'ín Pablo la ko ch'ín Silas,  
k'uéjó sín chjasin Filipos**

<sup>11</sup>Ntá ntaha chjasin Troas k'uix-enxínni ijnko ntabárcō ntá sákjuíni ntóij nko nonte ntsí tinkátaón nta it'in Samotracia. Ntá tí yaon chr'éxin kjujini chjasin Neápolis. <sup>12</sup>Ntá ntiha sákjuixinni la kjujini chjasin Filipos. Tí chjasin a mé k'uéchóna tí sín romano ósé ntá ijnko chjasin antsí má tjetooan tí it'ō tí estado Macedonia. Ntaha mé k'uéjóni iso yaon. <sup>13</sup>Ntá tí yaon t'ok'éhe sín ntá k'uaxr-jexínni tí chjasin Filipos ntá sákjuíni ijnko chrínta ntarío mé ntiha kuèhen sín tsojnkotsé sín tsonixjehe sín Dios. Mé ntaha k'uéjótjaxinni la kjuankíxinni kjuakoheni iso chojni chjin tsikójnkotsé ntiha. <sup>14</sup>Ntá ijnko tí jehe sín mé ijnko tjan it'in tjan Lidia la tsíkjixin tjan chjasin Tiatira. Jehe tjan mé nchekji tjan ika náxrjón kjátse tié. Ntá jehe tjan xraxinkaon tjan Dios la jína tjetinhin tjan la Inchéni mé kjuínkítsa asén tjan kixin tsinhin tjan jína tí nkehe kjuako ch'ín Pablo. <sup>15</sup>Ntá jehe tjan la ko kaín tí sín tjejó ntōe tjan mé kuíkite sín. Ntá chrónógehe tjan tí ch'ín Pablo ntáchro tjan kixin:

—Tí chaxín tjátsoan kixin chaxín tinkáchónkini Inchéni la jína chrókuitōha ntōeni ntihi —ichro tjan.

Ntá kjónté kuítōheni ntiha.

<sup>16</sup>Ntá ijnko yaon sákjuíni tí nó kuèhen sín nixjeexín sín Dios ntá ó xétani ijnko tjan tjarisoá chóna nchakuen tí jínahya tónoexín tjan. Ó tsík'íná tjan la nchónhya chichaon tjacha tí inché tjan kixin xikaha tónohe tjan. <sup>17</sup>A ntá tí tjan tjarisoá a kjuankíxin tjan tinkáchréhe

tjan tí ch'ín Pablo la ko tí jeheni ntá t'èya tjan ntáchro tjan kixin:

—Tí sín i ch'ehe sín xra Dios nkaya nkajni la tjako sín ijnko ntia jína tsaáxin chojni.

<sup>18</sup>Mé xikaha kjuíuch'e tjan itsjé yaon. Ntá kóchjinhin ch'ín Pablo la nkátjía ch'án nixjehe ch'án tí nchakuen tí jínahya chóna tí jehe tjan, ntáchro ch'án kixin:

—Kjuachaxiēni ihnié Jesucristo tétuānhán kixin ts'axrjéxian tí jehe tjan —ichro ch'án.

Ntá tuénxín ó k'uaxrjéxín tí nchakuen tí jínahya tí jehe tjan.

<sup>19</sup>Na ntá tí inché tí tjan a mé k'uúkon sín nkehe kónhen tjan la ó nohe sín kixin í tsjachahya sín chichaon kuènte tí xra ch'e tjan. Ntá kónínkaon sín ntá itsé sín tí ch'ín Pablo la ko ch'ín Silas la kuinkánkákjen sín sákjuíko sín tí tjejó tí síxreé ntsin tjetooan. <sup>20</sup>Ntá kjuíkaán sín ntaha tí tjejó tí sín juez la ntáchro sín kixin:

—Tí sín i mé sín judío la imá sítjité sín chjasénni. <sup>21</sup>Tjako sín tí nkehe kuènyani tsonoheni la tóxrjienhyani sich'eni kixin jeheni mé chojni romanoni.

<sup>22</sup>Kaín tí sín ntiha kónínkakohen sín tí jehe sín. Ntá tí sín juez mé k'uetōan ts'axrjehe sín iké sín ntá ts'ekonxín sín nta sé. <sup>23</sup>Ntá tió kjuixín k'uékon sín nchónhya ntá chr'áxenhén tí sín a ntōechiso ntá k'uetuēnhén sín tí ch'ín t'ayakonhen ntōechiso kixin jína chrók'uayakonhen sín tí sín a. <sup>24</sup>Ntá tí ch'ín t'ayakonhen ntōechiso mé k'uáyéhe ch'án kjuachaxín ntá chr'áxenhén ch'án tí sín a ijnko cuarto chríka ntōechiso kixin ts'axrjehya sín. Ntá chr'áxenhén ch'án toté sín tí nta tjejóxrja la ko chica ye.

<sup>25</sup>A ntá tió k'áxrótjen la ch'ín Pablo la ko ch'ín Silas mé nixjehe sín Dios la ko itsje sín himno kuènte Dios. La tí sín í so tjejóchjina mé tjejótin-

hin sín kixin xikaha tjejóch'e sín tje-jótsje sín. <sup>26</sup>Ntá xrínahya tjian kuínkí nonte la kjuínchekinkí kuenté tí xrankíxixín ntóechiso ntá tuénxín kaín tí ntója puerta mé xítjehe la ko k'uánótjen tí chica cadena tschróntetoxín kaín tí sín tjejóchjina. <sup>27</sup>Ntá tí ch'ín t'ayakonhen ntóechiso mé k'uàya ch'án. Ntá k'uíkon ch'án kixin síxítjehe tí ntója puerta ntóechiso a. Ntá kuakitsje ch'án chica espada ntá chrók'óyán ch'án asén ch'án kixin kjuenkayáxin ch'án kixin ó kjuixin tsfinká kaín tí sín síchjina, ichro ch'án. <sup>28</sup>Ntá ch'ín Pablo k'uèya ch'án itsen ntáchro ch'án kixin:

—Náhi kohya nkehe ch'ehé asán kixin kaín ni naxa tjejóni ntihyó —ichro ch'án.

<sup>29</sup>Ntá tí ch'ín t'ayakonhen ntóechiso kjuanchia kixin ts'ákjen xrohi ntá k'uíx-enhén ch'án kuinká ch'án la síxránka ch'án chrakon ch'án ntá kjuítsínka ch'án toté tí ch'ín Pablo la ko tí ch'ín Silas. <sup>30</sup>Ntá tuénxín kuakitsjexín ch'án sín ntiha ntá kjuanchankíhi ch'án sín kixin: —¿Nkexrí chrókjuít'a kixin chrókuaána? —ichro ch'án.

<sup>31</sup>Ntá kjuátehe sin ntáchro sín kixin:

—Títekáván Ìnchéni Jesucristo la tsaá jaha la ko tí sín tjejó ntóe.

<sup>32</sup>Ntá kjuakohe sín tí jehe ch'án a la ko kaín tí sín tjejó ntóe ch'án ti tan kuènte Ìnchéni. <sup>33</sup>Na kjónté sítie la tí hora a sákjuíko ch'án sín kjuínchek'íjma ch'án tí tsíchrít'ó sín. Ntá tuénxín jehe ch'án la ko kaín xín sín tjejó ntóe ch'án mé kufkite sín. <sup>34</sup>Na ntá chr'éxín tí jehe ch'án sákjuíko sín ntóe ch'án. Ntá ntiha kjuanjón ch'án nkehe sine sín. Imá chéhe ch'án la ko kaín tí sín ntóe ch'án kixin ó kuítekaon sín Dios.

<sup>35</sup>Ntá kóyaon nchítjen ntá tí sín juez k'uetuénhen sín tí sín policía sátsjitsjehe sín tí ch'ín t'ayakonhen ntóechiso kixin chrókjuanjón ch'án kjuachaxin ts'axrje ch'ín Pablo la ko ch'ín Sílas. <sup>36</sup>Ntá tí

ch'ín t'ayakonhen ntóechiso mé chénka ch'án tí ch'ín Pablo tí nkehe chrónka sín ntáchro ch'án kixin:

—Tí sín juez a mé tsík'etóan sín kixin tsjánjuan kjuachaxin kixin sátsjirá. Méxra sátsjirá kjuaxróxin —mé xikaha ichro tí ch'ín a.

<sup>37</sup>Ntá ch'ín Pablo ntáche ch'án tí sín policía kixin:

—A ntá jeheni kjónté chojni romanoni mé kjuateni sín nkayakon nchónhya chojni. Jehya kixin chrókjuanchia sín nke jie chóntani. Náhi. Kjónté la chr'áxenhenni sín ntóechiso. A ntá ijie la zá imó chrókuakitsjeni sín ní? Náhi. Tsjjia ti jehe sín tsakitsjeni sín —ichro ch'án.

<sup>38</sup>Ntá tí sín policía mé sákjuíchénka sín tí sín juez nkehe ntáchro tí sín tjejóchjina. Ntá imá chrakon sín kixin kuín-hin sín kixin tí sín a mé chojni romano. <sup>39</sup>A ntá sákjuí tí sín juez ntá chrónòehe sín tí ch'ín Pablo la ko ch'ín Silas kixin tsonínkakonhya sín kixin xikaha kónhen sín ntá k'uaxrjexín sín ntiha ntá chrónòe tí sín a sátsjixin sín tí chjasin ntiha. <sup>40</sup>Ntá ch'ín Pablo la ko ch'ín Silas tió k'uaxrjexín sín tí ntóechiso ntá kjuíji sín ntóe tí tjan Lidia. Ntá tió kjuixin sákjuítsjehe sín tí sín kíchó ni la kjuínchechéhe sín ntá sákjuíxin sín ntiha.

### Kónínkaon tí chojni chjasin Tesalónica

**17** Ntá ch'ín Pablo la ko ch'ín Silas la k'uátsínka sín chjasin Anfípolis la ko chjasin Apolonia ntá kjuíji sín chjasin Tesalónica. Ntaha itjen ijnko nínko judío. <sup>2</sup>A ntá ch'ín Pablo sákjuí ch'án nínko éxi kuènnen ch'án la jnkojnko yaon t'ok'éhe sín chjina iní semana ikjo ch'án tí jehe sín la chrónkaxín ch'án nkexrí ntáchro xroon itén Dios. <sup>3</sup>Kjuako ch'án kixin tí nkexro Cristo mé t'ichjánxin its'en la ko chr'éxín tsoxechón ch'án inaá. Ntáchro ch'án kixin:

—Tí ch'ín Jesús a mé jeheni chrónkaxinni kixin tsinhínra jahará mé Cristo tíha.

<sup>4</sup> A ntá iso tí sín judío kuítekaon sín ntá k'uíto sín tí ch'ín Pablo la ko tí ch'ín Silas. Ntá kjaxin kuítekaon itsjé tí sín griego xraxinkaon Dios a la ko kjaxin nchónhya chojni chjin tjetooan kuítekaon. <sup>5</sup> A ntá iso tí sín judío tinkáchónkihya Ìnchéni mé imá kóchjio sín ntá kójnkotséko sín iso chojni jínahya ch'e, ch'ehya sín xra, ixri ntja. Ntá kaín sín k'uixité sín la kjuínchexakonhen sín tí sín siín chjasén sín. Ntá itsjé sín k'uix-enhen sín ntøe ijnko ch'ín it'in Jasón kjueyá sín ch'ín Pablo la ko ch'ín Silas kixin tjinkaon sín sáchrókjuíkohe sín tí sín a tí sín t'etooan. <sup>6</sup> A ntá k'uitjahya sín tí sín a ntá kjónté itsé sín tí ch'ín Jasón la ko í so tí sín tinkáchónki Ìnchéni ntá kuinkánkákjen sín sákjuíko sín tí siín tí síxreé tí chjasin ntiha. Ntaha nínkaon sín k'uèya sín ntá chro sín kixin:

—Tí sín i mé kjuínchexakonhen chojni kuenté chjasintajni. La ntá ó kjui sín chjasénni ntihi kjaxin. <sup>7</sup> La ntá tí ch'ín Jasón a mé kjuanjon ch'án kjuachaxin kixin tí sín a mé ts'ejó sín ntøe ch'án. Kaín sín titekakonhya sín tí ley kuènte tí ch'ín romano t'etooan. Ntá chro sín kixin itjen í jnko nkexro antsí má t'etooan, ntá tíha mé Jesús —ichro sín.

<sup>8</sup> Ntá tió kuínhin kaín tí sín tsíkójnkotsé la ko tí síxreé ntá k'uixité sín kónínkaon sín. <sup>9</sup> Ntá ch'ín Jasón la ko tí sín tjejóko ch'án kjuenka sín ntá tí síxreé kuítóhe sákjuí sín.

### Ch'ín Pablo la ko ch'ín Silas sákjuí sín chjasin Berea

<sup>10</sup> Ntá tuénxín tí tie a tí sín kíchó ni mé ichr'án sín ch'ín Pablo la ko ch'ín Silas kixin sátsji sín chjasin Berea. Ntá tió kjuíji sín ntaha k'uixenhen sín tí nínkoé tí sín judío. <sup>11</sup> A ntá tí sín judío ntiha la antsí má jína asén sín, ntá tí sín ch-

jasin Tesalónica la náhi. Antsí má kóxr-jínhin sín tsinhin sín tí itén Dios la jnko-jnko yaon kjuínchekuáxin sín tí xroon chóna itén Dios kixin tsonhe sín á chaxín ntoá xíkaha tí ntá chro tí sín a. <sup>12</sup> Méxra nchónhya tí jehe sín kuítekaon sín la ko kjaxin nchónhya tí chojni chjin griego tjetooan mé kuítekaon la ko kjaxin tí chojni ntoa. <sup>13</sup> A ntá tí sín judío chjasin Tesalónica konohe sín kixin ch'ín Pablo mé kjuakoxin itén Dios chjasin Berea inaá. Ntá sákjuí sín ntiha a ntá kjuínchekóninkaon tí sín a. <sup>14</sup> A ntá tí sín kíchó ni tinkáchónki Ìnchéni ichr'án sín tí ch'ín Pablo sátsji nó chrínta ntayaon. A ntá ch'ín Silas la ko ch'ín Timoteo naxa kuítóhe sín tí chjasin Berea. <sup>15</sup> Ntá iso tí sín ntiha sákjuíko sín tí ch'ín Pablo la kjuíji sín tí chjasin Atenas. Ntá kjan sín chjasén sín kixin k'uetooan ch'ín Pablo kixin tsochrónka sín kixin tjoka chrókóxakonhen tí ch'ín Silas la ko tí ch'ín Timoteo tsijji sín ntiha tsoxéta sín ch'án.

### Ch'ín Pablo itjen chjasin Atenas

<sup>16</sup> Ntá nachrohe kjuák'echónhen ch'ín Pablo kixin itsjé tí ch'ín Silas la ko tí ch'ín Timoteo chjasin Atenas ntá imá k'uává asén ch'án kixin k'uíkon ch'án kixin tí chjasin ntiha siín nchónhya tí nkehe tsík-janoya. <sup>17</sup> Ntá tí nínko ntiha kjuakøhe ch'án iso sín judío la ko iso tí chojni xraxinkaon Dios. La kaín yaon ntsin kjuák'e ch'án kjuakøexín ch'án tí chojni siín ntiha. <sup>18</sup> La iso tí sín kjuínchekuáxin tí xroon kuènte tí chojni it'in epicúreo la ko iso tí sín kjuínchekuáxin tí xroon kuènte tí chojni it'in estoico kjuankixin nixjehé sín tí ch'ín Pablo. Iso sín ntá chro sín kixin:

—¿Nkekuènté kixin ánta tjenixja tí nkexro a?

La í so sín ntá chro sín kixin:

—Méxra tjenixja ch'án kuènte í jnko dios.

Mé xikaha ichro sín kixin kjuako ch'in Pablo tí tán jina kuente Jesús la ko kjuako ch'an kixin Jesús kjónté k'uén ntá xechón. <sup>19</sup>Ntá sákjuiko sín ch'in Pablo ijnko tjo it'in Areópago. Ntiha mé kuènenhén sín tójnkotsé sín kixin tjenkayáxixín sín. Ntá nixjehé sín tí ch'in Pablo, ntáchro sín kixin:

—Tjinkaonni tsochronka tí nkehe nixin kjuíkoa. <sup>20</sup>Itsjé tí nkehe ókjé tjetjákua la tjinkaonni tsonoheni nkehe t'axrjexín kaín t'ha —ichro sín.

<sup>21</sup>Ntá kaín tí sín chjasin Atenas la ko tí sín tsíkjiixin ókjé tjejó ntiha mé tóxrjénhaya sín í jnko xra, jehí tóxrjínhin sín chrókuinhin sín la ko chrónixja sín ijnko nkehe nixin.

<sup>22</sup>Ntá ch'in Pablo k'uínkatjen ch'an kjuák'lexín toté ch'an tí sín tí jehe sín chrítaón tí Tjo Areópago. Ntá ntáchro ch'an kixin:

—Jahará tjejorá chjasin Atenas tinhínra. Janhan ó k'uíquán kixin jahará la itsjé dios tinkachónkirá. <sup>23</sup>Ntá tí kjuak'é ntiha k'uájia la k'uíquán itsjé tí nketí tjásixínra culto ntá k'uitja ijnko altar ts'inixín kixin: “Ntíhi xraxinkakonxínni ijnko Dios naxa chónhyani”. Méxra tí Dios xráxinkáonra kjónté naxa chonhyará mé tí Dios a mé tjákoahará.

<sup>24</sup>Tí Dios mé kjuích'éna ch'an chjasintajni la ko kaín nkehe sín chjasintajni. Jehe ch'an mé inché nkajni la ko chjasintajni. La tjexenhya ch'an ijnko nínko tsíkjiich'énaxín chojni tja. <sup>25</sup>La t'ichjánxienhaya ch'an kixin chojni chrókjuinkitsa tí jehe ch'an kixin jehe ch'an mé chjéhe kjuachón kaín chojni la ko tjanjon ch'an xrinto la ko kaín nkehe sín.

<sup>26</sup>Kaín tí nación k'uaxrjenixin jnkokoá chojni kixin chrók'uejó sín nkuíxín chjasintajni. Kjaxin chrónka Dios nkesá la ko nketí ts'ejó chojni. <sup>27</sup>Méxra jeheni t'ichjánxin tsjeyáni Dios kixin ntá tsienxínni nkexrí ts'itjani ch'an. Jehya imá ikjín itjen

ch'an, chjino tí tjejóni itjen ch'an. <sup>28</sup>Jehe ch'an tjejóchónxinni ch'an la ko nchekinkíni ch'an la jehe ch'an t'ayakonhenni ch'an. Mé xikaha tsintáchro jnko ch'in chjasánra ósé kixin: “Jeheni mé naxa kjéhya Dios.” <sup>29</sup>Jeheni mé naxa kjéhyaní Dios méxra xitjahya tsjenkayáxinni kixin sich'énani Dios chica oro o chica plata o xro kixin éxí tsíkjenkayáxin chojni kixin sich'éna sín dios kuente sín. <sup>30</sup>Senó Dios kónínkakonhya ch'an kixin ó nohe ch'an kixin naxa chónhaya sín ch'an. Ntá ijie t'etuenhen Dios kaín xín chojni sín chjasintajni tsokjan sín la tsinkáchónki sín tí jehe ch'an. <sup>31</sup>Dios tsíkjejá ijnko yaon sinchekitoexín ijie chojni chjasintajni. Tsíkjejá ch'an ijnko chojni la kjuakoxin kaín kjuachaxin kixin tí nkexro kjónté tsík'en la xechón inaá —ichro ch'in Pablo.

<sup>32</sup>Na ntá tió kuínhin sín kixin nkexrí tsoxechón chojni tsík'en ntá iso sín kjuanoá sín ch'an. Ntá í so sín ntáchro sín kixin:

—Chr'éxin tsinhinni inaá tí nkehe ntáchrúa —ichro sín.

<sup>33</sup>Ntá ch'in Pablo kuítóhe ch'an tí jehe sín. <sup>34</sup>Na ntá iso sín kjuíchréhe sín ch'in Pablo la kjuankixin tinkáchónki sín Inchéni. Ijnko tí sín tinkáchónki a mé it'in ch'an Dionisio mé ijnko tí síxreé kjuínchekitoexín ijie chojni chrítaón tí Tjo Areópago la ko ijnko tjan tinkáchónki tjan mé it'in tjan Dámaris la ko í so sín kjaxin kjuankixin sín tinkáchónki sín Inchéni.

### Sákjuí ch'in Pablo chjasin Corinto

**18** Ntá kjuixin t'ha ntá ch'in Pablo sákjuixin ch'an chjasin Atenas la sákjuí ch'an chjasin Corinto. <sup>2</sup>Ntiha mé xéta ch'an ijnko ch'in judío it'in Aquila. Jehe ch'an mé tsíkjiixin ch'an estado Ponto la séhya jehe ch'an la ko ichjién ch'an Priscila mé kjuixín sín

nación Italia kixin t'ichjánxin ts'axrjexín sín ntiha kixin tí ch'ín t'et'əoan mé it'in Claudio k'uetəoan ch'án kixin kaín tí sín judío mé ts'axrjexín sín tí chjasin Roma. Ntá ch'ín Pablo mé kjuínixjehe ch'án sín. <sup>3</sup>Jnkokón xra ch'e sín la ko jehe ch'án, ch'éna sín kamantá t'óna nchia. Méxra ntá ntahó kuítóeko kichó sín kixin jnkoqá sich'e sín tí xra a. <sup>4</sup>Ntá jnkojnko tí yaon t'ok'éhe sín sákjuí ch'ín Pablo tí ninko nixjehe ch'án tí sín judío la ko tí sín jehya judío kixin tjinkaon ch'án kixin kaín tí chojni chrókuitekaon sín.

<sup>5</sup>Ntá tió ch'ín Silas la ko ch'ín Timoteo kjuixín sín estado Macedonia ntá ch'ín Pablo kjuák'e xra ó kjuako ch'án itén Dios kixin tsonhe tí sín judío kixin Jesús mé tí nkexro Cristo. <sup>6</sup>Ntá tí sín judío mé kjuankíxin kóninkakonhen sín tí ch'ín Pablo la imá k'uántaxinhín sín ch'án. Ntá jehe ch'án k'ótsjènka ch'án iké ch'án kixin kjuakoxín ch'án kixin xíkaha ts-jasóte sín. Ntá ntáchro ch'án kixin:

—A ntá ijie la jahará kjuéyará tí jie ts'itjáyanxínrá. A ntá janhan la í chontahya jie kixin ó kjuákoahará tí tán jína, a ntá kuítékákonhyará. A ntá ijie la íchá jína sátsjia tsjákoḥa tí sín jehya judío —ichro ch'án.

<sup>7</sup>Ntá k'uaxrjexín ch'án ninko ntá sákjuí ch'án ntəe ijnko chojni mé it'in Justo mé jehe ch'án xraxinkaon ch'án Dios. Ntəe ch'án mé chjinaxón ninko. <sup>8</sup>Ntá ch'ín Crispo, ijnko nkexro t'et'əoan kuènte ninko, la ko kaín tí sín tjejó ntəe ch'án, mé kjuankíxin sín kuítekaon sín Ìnchéni. Kjaxin itsjé tí sín tjejó chjasin Corinto mé kuínhin sín tí tan la ntá kjuankíxin sín kuítekaon sín Ìnchéni la kuíkite sín. <sup>9</sup>Ntá ijnko tie titàya k'uíkuèn ch'ín Pablo Ìnchéni nixjehe ch'án ntáchro kixin:

—Chrakonhya tjàkua itan kuèntana. Títəəhya tsəchronka <sup>10</sup>kixin janhan tjejóko kichó ni kixin ninkexró kohya nkehe sit'aha. Kixin janhan la chonta it-

sjé chojni tí chjasin ntihi tinkáchónki tí janhan.

<sup>11</sup>Méxra ch'ín Pablo mé kuítóhe ch'án ijnko nánó ko t'ə ntiha chjasin Corinto, kjuakoḥe ch'án sín itén Dios.

<sup>12</sup>A ntá tí yaon k'uetəoan ch'ín Galión estado Acaya, ntá itsjé tí sín judío kóninkakonhen sín tí ch'ín Pablo. Ntá itsé sín ch'án sákjuíko sín ch'án tí tjejó tí sín t'et'əoan. <sup>13</sup>A ntá ntáche sín tí ch'ín t'et'əoan kixin:

—A ntá tí nkexro i ixri ch'án tjachroe ch'án chojni kixin ókjé nkexrí chrókuinkáchónki sín Dios la ko tsitekakonhya sín tí nkehe t'et'əoan tí ley.

<sup>14</sup>Na ntá tjinkaon ch'ín Pablo chrónixja, ntá ch'ín Galión ntáche ch'án tí sín judío kixin:

—Tí chaxín ijnko jie jíe kjuasin tí ch'ín i ntá kjónté chrókuinhan tí nkehe ntáchrorá jahará judiorá. <sup>15</sup>A ntá jehí tjanjonxinrá tí nkehe nixjará la ko ihnié chojni la ko tí ley tinkachónkirá. Méxra jahóra chrókuinchekitəoxínrá tíha kixin janhan tjínakonhya ts'óna juez sintaktəoxian kuènte tí nkehe a —ichro ch'án.

<sup>16</sup>Ntá k'uetəoan ch'án kixin sátsjixín sín ntiha. <sup>17</sup>Ntá tí sín griego la kónínkaon sín la itsé sín tí ch'ín Sóstenes tí ch'ín t'et'əoan kuènte tí ninko judío, la ntahó kjuatexín sín ch'án. Jehe ch'ín Galión a la mé kjónté k'uíkon ch'án la ántosén ch'án.

### Ch'ín Pablo xíkjan ch'án chjasin Antioquía ntá sákjuí ch'án níxin viaje

<sup>18</sup>A ntá ch'ín Pablo kuítóhe ch'án chjasin Corinto itsjé yaon ntá nixjehe ch'án tí sín kichó ni ntiha ntá k'uixenhen ch'án ntabarco sákjuí ch'án nó estado Siria a sákjuíko ch'án tjan Priscila la ko ch'ín Aquila. Ntá kjuíji sín chjasin Cencrea la ntá naxa k'uixenhya ch'án ntabarco inaá la ikjín ch'án mòləé kixin xíkaha kjuakoxín ch'án kixin kjuínchexiteyá ch'án tí nkehe chrónka ch'án.

<sup>19</sup>Ntá tió kjuúji sín tí chjasin Éfeso ntá kuítóhe ch'ín Pablo tí tjan Priscila a la ko tí ch'ín Aquila. Ntá sákjuí ch'án ijnko nínko la ikjo ch'án tí sín judío tsíkójkotsé ntiha. <sup>20</sup>Ntá jehe sín chrónòda sín kixin chrókuítóhe ch'án isé ntiha, kjánchó jehe ch'án la chrohya ch'án. <sup>21</sup>Ntá tuénxín nixjehe ch'án sín ntáchro ch'án kixin:

—T'ichjánxin tsjak'é chjasin Jerusalén tí yaon kia itsi. Kjánchó tsokjan inaá tsotsjaha tí jahará tí naxa tjinkaon Dios —ichro ch'án.

Ntá kuítóhe ch'án sín ntá k'uúixenhen ch'án ntabarco sákjuúxin ch'án chjasin Éfeso. <sup>22</sup>Ntá tió kjuúji ch'án chjasin Cesarea ntá sákjuí ch'án chjasin Jerusalén na ntá sákjuúnixjehe ch'án tí sín tinkáchónki Ìnchéni ntiha. Ntá tuénxín xíkjan ch'án chjasin Antioquia. <sup>23</sup>Ntá kuítóhe ch'án ntiha itsjé yaon ntá xíkji ch'án inaá ntá xík'atsínka ch'án itsjé chjasin estado Galacia la ko estado Frigia la kjuínchechéhe ch'án kaín tí sín tinkáchónki Ìnchéni.

### Ch'ín Apolos kjuako ch'án chjasin Éfeso

<sup>24</sup>Ntá tí yaon a mé ijnko ch'ín judío it'in Apolos ikui chjasin Éfeso mé tsíkijxin ch'án chjasin Alejandría. Jehe ch'án mé ijnko nkexro antsí nohe chrónka kixin chóxin ch'án xroon itén Dios. <sup>25</sup>Jehe ch'án ó xrakohe ch'án ntje Ìnchéni ntá imá tóxrjnhin ch'án nixja ch'án la ko tsjako jína kuènte ch'ín Jesús. Kjánchó jehó nohe ch'án nkexrí kuíkite chojni ch'ín Juan. <sup>26</sup>Δ ntá ch'ín Apolos kjuák'e ch'án kjuako ch'án tí nínko la chrakonhya ch'án. Ntá tió kuínhin tí tjan Priscila la ko tí ch'ín Aquila tí kjuako ch'án ntá k'uaxrjentako sín ch'án la kjuakohe sín ch'án tí nkehe naxa noehya ch'án kuènte ntje Dios. <sup>27</sup>Ntá tjinkaon ch'ín Apolos sátsji ch'án estado Acaya. Ntá tí sín kichó ni kjuínkítsa sín

ch'án la ikjin sín ijnko xroon chr'énhen sín tí sín tinkáchónki Ìnchéni tjejó ntiha kixin jína tsjanjon sín kjuachaxin tsjak'e ch'án. Ntá tió kjuúji ch'án estado Acaya ntá kjuínkítsa ch'án kjuakohe ch'án tí sín tsíkjinkítsa Dios tsíkitekaoon sín ch'án. <sup>28</sup>Ntá kjuakoexín ch'án kaín chojni kixin ntoáhya ch'e tí sín judío, la xitjahya tsontáchro sín náhi. Kjuakohe ch'án sín kixin tí xroon itén Dios chrónka kixin Jesús mé tí nkexro Cristo.

### Kjuák'e ch'ín Pablo chjasin Éfeso

**19** Ntá naxa itjen ch'ín Apolos tí chjasin Corinto ntá ch'ín Pablo k'uatsínka ch'án nchónhya chjasin chrík'á jna la ntá kjuúji ch'án chjasin Éfeso la ntaha xéta ch'án nchónhya chojni tinkáchónki ntje Dios. <sup>2</sup>Ntá kjuanchankíhi ch'án sín kixin:

—¿Á k'uayéhérá Nchakuen Dios tió kuinkachónkirá Ìnchéni? —ichro ch'án.

Ntá kjuátehe sín kixin:

—Náhi, kienhyani á tjen Nchakuen Dios —ichro sín.

<sup>3</sup>Ntá kjuanchankí ch'ín Pablo kixin:

—¿Nkexro kjuachaxién kuíkítará? —ichro ch'án.

Ntá kjuátehe sín kixin:

—Éxí kjuako ch'ín Juan kuíkiteni —ichro sín.

<sup>4</sup>Ntá ntáchro ch'ín Pablo kixin:

—Ch'ín Juan mé kuíkite ch'án chojni kixin chrókjan sín chrókuinkáchónki sín Dios la ko kjuako ch'án kixin chrókuitekaoon sín tí nkexro itsi chr'éxin. Tíha mé Jesús, tí Cristo —ichro ch'án.

<sup>5</sup>Ntá kuínhin sín xíkaha ntá kuíkite sín kjuachaxién ihnié Ìnchéni Jesús. <sup>6</sup>Δ ntá ch'ín Pablo kjuák'etja itja ch'án chrítaon ikja sín ntá ikui Nchakuen Dios k'uayéhe sín ntá kjuankixin sín nixja sín itsjé nkiva ókjé la ko kjuankixin sín kjuako sín tí nkehe kjuanjon Dios. <sup>7</sup>Kaín tí sín ntoa tinkáchónki mé chjina teyó sín.



<sup>8</sup> A ntá chjina iní nitjó, la ch'ín Pablo k'uékji ch'án nínko la kjuako ch'án kaín asén ch'án. Nixjehe ch'án chojni la chrónka ch'án nkexrí tjen tí kjuachaxin kuènte Dios. <sup>9</sup> A ntá iso sín la kjónté la imá icha asén sín tjinkakonhya sín tsinkáchónki Ìnchéni. Ntá imá t'án-taxínhin sín tí tan jína kuènte Ìnchéni nkayakon chojni. Ntá tí ch'ín Pablo k'uaxrjentako ch'án tí sín tinkáchónki Ìnchéni ntá ijnko escuela it'in Tiranno ntaha kjuakoxin ch'án kaín yaon. <sup>10</sup> Mé xikaha kjuák'e ch'án kjuako ch'án iyó nánó, ntá kaín tí sín k'uéjé ntiha estado Asia mé kuínhin sín itén Ìnchéni Jesús, mé tí sín judío la ko kjaxin tí sín jehya judío. <sup>11</sup> Ntá Dios antsí má kjuakoxin kjuaxroan jié kixin tí nixja ch'ín Pablo. <sup>12</sup> Ntá itsjé chojni kjuikao sín pañitoé sín la ko iké sín kuákoxin ch'ín Pablo ntá sákjuíko sín kjuínchekakóxin sín tí sín níhi ntá kuítóhe sín jína la ko kjaxin nchakuen tí jínahya k'uaxrjexín tí jehe sín.

<sup>13</sup> A ntá iso tí sín judío ixri sín ntáchro sín tónohe sín tsakitsje sín nchakuen tí jínahya ch'iyehé sín chojni mé tjinkaon sín tí kjuachaxién ihnié Jesús. La ntá ntáche sín tí nchakuen tí jínahya kixin:

—Kjuachaxién ihnié tí Jesús tjako tí ch'ín Pablo t'etoanxinni kixin jaha nchakuen jínahya sátjixian ntihi —ichro sín.

<sup>14</sup> Mé xikaha k'uékjich'e tí yato xjeen ijnko ch'ín judío it'in Esceva mé ijnko nchat'á t'etōan. <sup>15</sup> Ntá ijnko yaon nixjehe sín nchakuen tí jínahya. Ntá tí nchakuen tí jínahya kjuátehe ntáchro kixin:

—Chóxinni nkexro ch'ín Jesús la ko ó noheni nkexro ch'ín Pablo. A ntá jahará, ¿la nkexro tí jahará? —ichro tí nchakuen tí jínahya.

<sup>16</sup> Ntá tí ch'ín chóna tí nchakuen tí jínahya kjaminkitaón ch'án tí jehe sín a la ntá imá tsehe ch'án kjuacha ch'án

kjuíncheníhi ch'án kaín sín la imá kjoté sín. Ntá k'uaxrjexín sín ntōe sín tjóchin sín la ko síchrít'ō cuérpoé sín. <sup>17</sup> Ntá kaín tí sín judío la ko tí sín jehya judío tjejó chjasin Éfeso mé kuínhin sín tí nkehe tsíkónhen la imá chrakon sín. Imá jié tí kjuachaxin ihnié Ìnchéni Jesús, ichro sín.

<sup>18</sup> Kjaxin itsjé tí sín tinkáchónki Ìnchéni mé kjuíchrónka sín kixin tí ósé k'uékjich'e sín nchónhya nkehe jínahya. <sup>19</sup> Itsjé tí sín k'uékjich'e nkehe jínahya k'uékjinchexroan sín la kuikao sín libro k'uékjich'exín sín xra ntá kjuaka sín tí libro a la k'uíkon nchónhya chojni. Ntá kuákjaxin sín cuenta nkekjaín k'uíte tí libro a ntá kónohe sín cincuenta mil peso k'uíte tí libro a kjuaka sín. <sup>20</sup> Ntá tí itén Ìnchéni sítinkák'ánkí la tjakoxin kixin chaxín chóna kjuachaxin.

<sup>21</sup> Ntá kjuixin tíha ntá ch'ín Pablo mé kjuenkayáxin ch'án chrókjuitsjehe ch'án tí sín nó Macedonia la ko Acaya ntá ntaha sáchrókjuixin ch'án chjasin Jerusalén. Ntá kjaxin ntáchro ch'án kixin tsjixin sátsji ch'án chjasin Jerusalén ntá kjaxin t'ichjánxin sátsji ch'án chjasin Roma. <sup>22</sup> Ntá ichr'án ch'án iyó tí sín tjinkítsa ch'án sátsji sín estado Macedonia, mé ch'ín Timoteo la ko ch'ín Erasto, ntá nachrohe jehe ch'án naxa kuítóhe ch'án estado Asia iso yaon.

### **Kónínkaon k'uixité chojni chjasin Éfeso**

<sup>23</sup> Ntá itsjé chojni chjasin Éfeso kónínkaon sín la k'uixité sín kixin kóxrjienhya sín tí itén Ìnchéni. <sup>24</sup> Kixin ntiha mé itjen ijnko ch'ín it'in ch'án Demetrio. Kjuích'éna ch'án nkehe chica plata tsjehe éxí nínko kuènte tí dios Diana la nchónhya chichaon kjuacha ch'án la ko tí sín kjuích'eko ch'án xra. <sup>25</sup> Ntá kójnkotséko sín í so sín jnkokón tí xra ch'e sín. Ntá ntáchro ch'án kixin:

—Jahará nohará kixin tí xr̄a ch'eni la tjachani jína la náxrxón tjejóni. <sup>26</sup>Kjánchó ó k'uíkonrá la ko ó kuínhínrá tí nkehe xritjako ch'ín Pablo. Tjako ch'án kixin tí nkehe tsíkjanoya mé jehya Dios. Kjánchó jehya chjasin Éfeso ó. Náhí, nkuíxín estado Asia kuítekaon chojni. <sup>27</sup>Imá tóxakonhenni kixin tí xr̄a ch'eni ts'itjáyán la kjaxin tóxakonhenni tsootáchro sín kixin chónkó tí nínkoe tí dios Diana imá jíé la ko ts'itjáyán tí kjuachaxin kuènte tjan. Ntá í tsitekakhya sín tí kjuachaxin kuènte tjan nkuíxín estado Asia la ko kuènté chjasintajni —ichro ch'ín Demetrio.

<sup>28</sup>Ntá tí kuínhin sín xíkaha la imá kónínkaon sín ntá k'uèya sín ntáchro sín kixin:

—Ts'itjáyanhya tí dios Diana kuènte sín Éfeso.

<sup>29</sup>Ntá imá tóxakonhen tí sín chjasin Éfeso la í noehya sín nkehe chrókjuich'e sín kixin kónínkakonhen sín tí ch'ín Gayo la ko tí ch'ín Aristarco mé iyó sín tsíkixin sín Macedonia. Ntá kuinkánkákjen sín kuíkao sín tí nchia jíé tójkotséxin sín xr̄axín. <sup>30</sup>Ntá ch'ín Pablo tjinkaon ch'án chrók'uixenhen ch'án tí nchia kixin tsonixjehē ch'án sín, a ntá tí sín tinkáchónki Ìnchéni mé chrohya sín kixin ts'ixenhen ch'án tí nchia a. <sup>31</sup>Kjaxin iso tí síxreé kuènte tí estado Asia mé chóxin sín ch'ín Pablo, ntá k'uetōan sín kixin tsochénta chojni tí ch'ín Pablo kixin chrókjuiatéhya ch'án tí síin sín ntiha. <sup>32</sup>A ntá iso tí sín tsíkójkotsé ntáchro sín ijnko nkehe, la í so sín ntáchro sín ókjé nkehe kixin nínkaon sín. La itsjé sín la í noehya sín nkehe xr̄a tsíkójkotséxin sín kixin nínkaon sín. <sup>33</sup>La iso sín judío chénka sín ijnko ch'ín it'in Alejandro nkerí xr̄a kjuixin sín kixin tsonixja ch'án. Ntá kjuák'e ch'án jnkosiné ntá kjuakoxin ch'án itja ch'án kixin tsootáni sín ntá tsonixjaxin ch'án tí sín judío tsinhin kaín chojni. <sup>34</sup>Ntá tíó

kjuátsoan tí sín tsíkójkotsé kixin kjaxin tí ch'ín a mé judío ch'án ntá kaín sín k'óyako sín chjina iyó hora ntáchro sín kixin:

—Ts'itjáyanhya tí dios Diana kuènte tí sín chjasin Éfeso —ichro sín.

<sup>35</sup>Ntá tí ch'ín secretario kuènte tí chjasin ntiha mé k'uetōan ch'án tsootáni sín. Ntá ntáchro ch'án kixin:

—Chojni chjasén Éfeso tinhínrá. Kuènté chjasintajni nohe sín kixin tí sín chjasin ntihi mé t'ayakonhen sín tí nínko kuènte tí dios Diana. Tí retrato kuènte tjan mé tsíkixin nkaya nkajní. <sup>36</sup>Kohya nkexro tsootáchro kixin chaxínhya tíha. Méxr̄a tánírá. Tjenkayáxinrá jína nkehe chrókjuich'erá. <sup>37</sup>Jahará kjuíkoará tí sín a ntihi la kjánchó k'uántaxíenhya sín tí nínkōeni la ko k'uántaxíenhya sín tí tjan santo kuènténi. <sup>38</sup>Méxr̄a ch'ín Demetrio la ko tí sín ch'eko ch'án xr̄a la tí tjanchia sín jie jnkójn nkexro la síin juez sinchekitoexín. Méxr̄a tsochrónka sín tí tjan tí ch'ín juez kixin jnkójnko sín la chrókuitoexín tí jie chónka sín. <sup>39</sup>Ntá tí síin ijnko nkehe tsjanchará ntá t'ichjánxin tsojnkotsérá la ntoá chrókuitoexín. <sup>40</sup>Tóxakonhenni kixin kjá tí sín t'etōan ts'ekani sín jie kixin jehya jína k'uíxiténi kónínkaonni. Noehyani nkehe tsjateheni kixin tí tsjanchankí sín nkekuènte k'uíxiténi, tsixro sín.

<sup>41</sup>La ntá k'uetōan ch'án kixin sátsji sín kixin ó kjuixin tí kójkotsé sín.

### Sátsji ch'ín Pablo estado Macedonia la ko estado Grecia

**20** Ntá tí kjuixin k'uíxité sín, a ntá ch'ín Pablo k'uíyehē kaín tí sín tinkáchónki Ìnchéni ntiha ntá kjuako ch'án iso kjuaxrexinkaon jína, ntá nixjehē kichó sín ntá sáxíkji ch'án nó estado Macedonia. <sup>2</sup>Ntá nkuíxín k'uat-sínka ch'án la kjuínchechéhē ch'án tí

sín tinkáchónki Ìnchéni kixin tí nkehe nixja ch'án. Ntá chr'éxìn kjuíji ch'án estado Grecia. <sup>3</sup>Ntiha kuítóhe ch'án iní nitjó ntá chrók'uixenhen ch'án ijnko ntabárcō ntá sáchrókjuí ch'án estado Siria. Ntá kónohe ch'án kixin iso sín judío nínkakonhen sín tí jehe ch'án a ntá kjuenkayáxin ch'án tsokjanxin ch'án toté ch'án inaá ts'atsínka ch'án Macedonia. <sup>4</sup>Ntá tí sín sákjuíko ch'ín Pablo mé tí ch'ín Sópater mé jehe ch'án tsíkjin ch'án chjasin Berea, la ko kjaxin ch'ín Aristarco, la ko ch'ín Segundo. Jehe sín mé tsíkjin sín chjasin Tesalónica, la ko ch'ín Gayo tsíkjin ch'án chjasin Derbe, la ko kjaxin sákjuíko ch'án ch'ín Timoteo, la ko ch'ín Tíquico, la ko ch'ín Trófimo, mé tsíkjin sín estado Asia. <sup>5</sup>Ntá tí sín kíchó ni a mé kuítónxin sín ntja ntá tjejóchónhen sín tí jeheni chjasin Troas. <sup>6</sup>Kjuixin k'uátsínka tí kia tió kjóne sín niotja chónthaya tí xroan t'ánkixin niotja, ntá k'uixenhenni ijnko ntabárcō k'uaxrjexinni Filipos ntá k'uátsínka in'ó yaon ntá kjuíjini chjasin Troas ntá ntiha xétani tí sín kuítónxin sín ntja. **A** ntá ntiha kuítóheni yato yaon.

### Ch'ín Pablo sákjuí chjasin Troas

<sup>7</sup>Ntá tí yaon xrankixín semana ntá kójnkotséni kixin tsochrít'ō niotja tsoxraxinkakonxinni Ìnchéni. Ntá ch'ín Pablo nixjehe ch'án kaín tí sín tinkáchónki Ìnchéni la tjinkaon ch'án sátsjixin ch'án ntiha tí yaon chr'éxìn, ntá antsí má sé tí nkehe chrónka ch'án la naxa tjenixja ch'án k'áxrótjen. <sup>8</sup>Tí tsíkójnkotsé sín a mé ijnko piso noi la ntiha mé síche nchónhya xrohi. <sup>9</sup>Ntá ntiha itjen ijnko ch'ín ntasoá it'in ch'án Eutico mé tjetjaxin ch'án chrítaón ventana. Ntá tí ch'ín Pablo imá sé nixja ch'án ntá tí ch'ín ntasoá mé tsíkíhi ch'án kotáchrin. **A** ntá xrinahya tsík'ajua

ch'án ntá tsík'anótjenxin ch'án tí ventana tí nixin piso ntiha ntá sákjuíkjat-sen sín ch'án la ó tsíkjin sín tsík'en ch'án. <sup>10</sup>Ntá ch'ín Pablo k'uínkajin ch'án ntá kjuítsínkaták'á ch'án chrítaón tí ch'ín tsík'anótjen a la kjóa ch'án. Ntá ntáche ch'án tí sín kíchó ni kixin:

—Chrakonhyará tsík'enhya ch'án, tjechón ch'án —ichro ch'án.

<sup>11</sup>Ntá ch'ín Pablo k'uit'ótjen ch'án inaá tí k'uínkajinxin ch'án kixin ntiha ts'óxikayēhe ch'án niotja sine sín tsoxraxinkakonxin sín Ìnchéni. Ntá naxa tjenixja ch'án hasta k'uínkaséyan a ntá sákjuí ch'án. <sup>12</sup>Ntá tí ch'ín ntasoá tsík'anótjen sákjuíko sín la tjechón ch'án kohya nkehe xéhe ch'án ntá kaín sín imá kóchéhe sín.

### Sákjuíxin ch'ín Pablo chjasin Troas kjuíji ch'án chjasin Mileto

<sup>13</sup>Jeheni mé kuítónxinni ntja saoxín la k'uixenhenni ijnko ntabárcō sákjuíni nó chjasin Asón kixin ntiha tsoxetani ch'ín Pablo éxí tsintáchro ch'án kixin tjinkaon ch'án sátsjixin ch'án toté ch'án ntiha. <sup>14</sup>Ntá ó xetani tí jehe ch'án chjasin Asón ntá k'uixenhen ch'án tí ntabárcō kjaxin ch'án ntá sákjuíkoni ch'án nó chjasin Mitilene. <sup>15</sup>Ntá tí sákjuixinni ntiha ntá tí yaon chr'éxìn ntá k'uátsínkani estado Quío ntá tí yaon chr'éxìn kjuíjini chjasin Samos. Ntá inaá k'uixenhenni tí ntabárcō ntá sákjuíni chjasin Trogilio ntá ntiha k'ok'éheni. Ntá xík'ixenhenni ntabárcō inaá ntá tí yaon chr'éxìn kjuíjini chjasin Mileto. <sup>16</sup>Mé xíkaha kjuích'eni kixin ch'ín Pablo í tjinkakonhya ch'án chrókjuak'e ch'án isé estado Asia la í tjinkakonhya ch'án chrókjan chjasin Éfeso kixin tjinkaon ch'án tjoka chrókjuíji ch'án chjasin Jerusalén kixin ntiha chrókjuak'e ch'án tí yaon Pentecostés, ichro ch'án.

**Nixjehe ch'ín Pablo tí sín  
t'etuenhen nínko chjasin Éfeso**

<sup>17</sup> Tí itjen ch'ín Pablo tí chjasin Mileto k'uíyehē ch'án tí sín t'etuenhen tí nínko chjasin Éfeso. <sup>18</sup> Ntá tió kui sín ntá ntáchro ch'án kixin:

—Tí jahará la ó nohará nkexrí kjuak'é la ko kjuàkua desde tí yaon xrankixixín k'uinka estado Asia. <sup>19</sup> Ó nohará kixin kaín tí yaon k'uejóni la kaín asenná kjuít'aha xṛá Ìnchéni la kjuíntahnkehya. Imá tsjanka kixin nchónhya kjuasótena kixin tjinkaon tí sín judío chrók'óyánna sín. <sup>20</sup> Janhan la kjuítoahya kjuàkua kaín tí nkehe jína t'ichjánxin tsonohará. Mé xikaha kjuàkua tió kójnkot-sérá la ko xikaha kjuíjkjuaxian jnkojnko nṛará. <sup>21</sup> Kjuákoḥá kaín chojni judío la ko kaín chojni jehya judío kixin t'ichjánxin tsítóhe sín tí jie tjasin sín la ko tsitekaon sín Dios la ko Ìnchéni Jesucristo. <sup>22</sup> Ntá ijie sátsjiyá chjasin Jerusalén kixin Nchakuen Dios k'uetuanna la í nonahya nkehe tsonna ntiha. <sup>23</sup> Ntá jehó ñona kixin kaín chjasin ts'at-sínka la chrónka Nchakuen Dios kixin tsjak'echjinana la ko tsjasótena. <sup>24</sup> Kaín tíha la tóxakonahya. Kjonté chrókjuasó-texián la ninkehó sínkíhyana la janhan la chàṇá kixin tí xṛá chonta la chrókjuíntaxín la chrókjuíntaxiteyá tí xṛá chjina Ìnchéni Jesús kixin tsjàkua tí tan jína nkexrí tjuèhe Dios chojni.

<sup>25</sup> Ntá jie ó ñona kixin tí jahará kjuákoḥará kjuachaxin kuènte Dios la nijnkorá ts'ikonhyará tí janhan inaá. <sup>26</sup> Méxṛá tinhínrá ijie kixin í jehya jiēna kixin jnkójínrá chrók'uitjáyánrá. <sup>27</sup> Kixin ó kjuàkua kaín tí nkehe tjinkaon Dios kixin tsonohará la í t'itjáyánhya ninkehó. <sup>28</sup> Méxṛá xráxinkáonrá ts'ejorá jnkójína la ts'ayakonhénrá kaín tí sín tinkáchónki Ìnchéni kixin Nchakuen Dios mé tjáhará tí xṛá pastor kixin

ts'ayakonhénrá tí sín kuènte tí nínko ch'án k'uenaxín ch'án tí ijnié ch'án. <sup>29</sup> Ó ñona tió sátsjia ntá itsji í so chojni éxi kolóbo jiehe tsotjinkaon sinchek'itjáyán tí sín tinkáchónki Ìnchéni. <sup>30</sup> La ntá kjonté jahará la isorá tjejorá ntihi tsjankixínrá tsjàkorá kjuach'ia chrínki chrókjuákoḥará kichuárá tí nkehe chaxín. A ntá tí sín tinkáchónki tsjichréhe sín tí nkehe ntoáhya. <sup>31</sup> Méxṛá chróxráxinkáonrá kixin chjina iní nánó kjuak'é kjuákoḥará nchakotjin la ko tie la kjuítoahya kjuíntaxraxinkávan hasta kjuínchenfhi asenná nixjahará jnkojnko tí jahará.

<sup>32</sup> A nta jie la jahará kichó ni tjetjáncháha Dios kixin t'ayakuanxínrá ch'án tí itén ch'án kixin tjuahará ch'án. Jehē ch'án imá chónṭa kjuachaxin tsjinkĩtsará ntá ts'ayéhérá kaín tí nkehe tjinkaon ch'án tsochjéhe ch'án kaín tí chojni tsfokótjóá. <sup>33</sup> Janhan mé kjuakéhya asenná chichakoen chojni o iké jnkójín chojni. <sup>34</sup> Náhí. Jahará ó nohará jína kixin janhan na mé tjaná kjuít'axián xṛá kjuácha k'uenaxín tí nkehe t'ichjánxinna la ko kjaxin tí nkehe t'ichjánxinhin tí chojni k'uejókian. <sup>35</sup> Méxṛá kjuákuaxínrá xikaha sīch'erá xṛá kixin jína tsjínkĩtsará tí chojni chónṭahya. Xráxinkáonrá kixin síntáchro Ìnchéni Jesús kixin: “Antsí tsochéheni kixin tí nkehe chrókjuanjónni, a ntá kánhyó tsochéheni kixin tí nkehe chrók'uíyéheni.”

<sup>36</sup> Ntá kjuixin ntáchro ch'ín Pablo xikaha ntá jehē ch'an la ko kaín sín k'uejójxin toch'in sín ntá nixjehe sín Dios. <sup>37</sup> Ntá kaín sín tsjanka sín la ko kjóá sín ch'án la ko tséhe sín tja ch'an. <sup>38</sup> Imá k'uává sín kixin chrónka ch'án kixin í ts'ikonhya sín ch'án inaá. Ntá sákjuíko-toxin sín ch'án nó tí tjen tí ntabárcō sátsjiko ch'án.

**Sákjuí tí ch'ín Pablo  
nó chjasin Jerusalén**

**21** **A** ntá tió kuítóhenni tí sín kíchó ni ntá k'uíxenhenni ntabárcō la ntá tuénxín sákjuíni estado Cos. Ntá tí yaon chr'éxín sákjuíni chjasin Rodas, ntá ntiha sákjuíni chjasin Pátara. <sup>2</sup>Tí chjasin Pátara la mé ntiha k'uitjani ijnko ntabárcō sátsji nó estado Fenicia. Ntá k'uíxenhenni tí ntabárcō a ntá sákjuíni. <sup>3</sup>Ntá tió k'uátsínkani la k'uíkonni tí nonte Chipre itjani ikjon kuítóhe ntá k'uatsínkani estado Siria. Ntá tí ntabárcō la ts'atsínka tsítóhe tí nkehe tjinká tí puerto chjasin Tiro, la jeheni la nachrohe sákjuíni tí chjasin a. <sup>4</sup>Ntá ntiha k'uitjani tí sín tinkáchónki Ìnchéni a ntá ntiha kuítóhekoni sín yato yaon. **A** ntá jehe sín mé kjuínchenohe sín Nchakuen Dios chénka sín tí ch'ín Pablo kixin sáchrókjuihya ch'án chjasin Jerusalén. <sup>5</sup>Ntá kjuixin k'uátsínka tí yato yaon a ntá sákjuíxinni ntiha. La kaín tí sín tinkáchónki Ìnchéni la ko ichjién sín la ko xjeen sín sákjuíko-toxinni tí k'uaxrjantani ikon chjasin ntá sákjuíni chrínta ntayaon. K'uéjóxinni toch'inni nixjeheni Dios <sup>6</sup>ntá tuénxín nixjeheni sín jnkojína ntá tséhe tja kíchó ni. Ntá k'uíxenhenni tí ntabárcō, a ntá jehe sín ikjan sín ntōe sín.

<sup>7</sup>Ntahó chjasin Tiro kjuixixín tí k'uíxenhenni tí ntabárcō ntá kjuíjini chjasin Tolemaida. Ntiha kjuínixjeheni tí sín kíchó ni tinkáchónki Ìnchéni. Ntá ntiha k'uéjókoni sín ijnko yaon. <sup>8</sup>Ntá tí yaon chr'éxín sákjuíxinni ntiha ntá kjuíjini chjasin Cesarea. Ntá ntiha sákjuíni ntōe ch'ín Felipe, ijnko ch'ín kjaxin tjako itén Ìnchéni. Jehe ch'án mé ijnko tí sín yatōxín tjinkítsa tí sín kjueyá Ìnchéni. **A** ntá jeheni mé kuítóhenni ntiha. <sup>9</sup>Tí ch'ín Felipe a mé chónka ch'án noó xjeen ch'án chjin naxá tóteehya sín. Tí xjeen ch'án a mé chrónkaxín sín tí itén Dios. <sup>10</sup>Ntá ntaha k'uéjókoni sín itsjé yaon ntá ikjui ijnko

ch'ín nixja itén Dios it'in Agabo, tsíkjixín ch'án estado Judea. <sup>11</sup>Ikjui ch'án kjuinixjehe ch'án tí jeheni la ntá kuákja ch'án tí tjoa t'ínkat'óxin ch'ín Pablo na ntá kjuínchentetoxín toté ch'án la ko itja ch'án ntá ntáchro ch'án kixin:

—Tí Nchakuen Dios mé ntáchro kixin mé xíkaha chjasin Jerusalén tí sín judío sinchenteto sín ìnché tí tjoa sinchek'áyéhe sín ch'án tí sín jehya judío —ichro ch'án.

<sup>12</sup>Ntá kjuixin kuínhinni tíha ntá jeheni la ko tí sín chjasin Cesarea chrónóeheni tí ch'ín Pablo kixin sáchrókjuihya ch'án tí chjasin Jerusalén. <sup>13</sup>Ntá kjuátehe ch'ín Pablo kixin:

—¿Nkekuénté tsjankará la ko nkekuénté nchek'ávárani? Janhan na chrakonhya kjónté jehya tí sinchentetona sín ó. Náhí. Kjónté kjaxin chrók'uénxian chjasin Jerusalén tí tinkáchónkia Ìnchéni —ichro ch'án.

<sup>14</sup>Ntá kjuachahyani nixjeheni ch'án ntá kuítóhenni ch'án. Ntáchroni kixin:

—Tí nkehe tjinkaon Ìnchéni mé tsonhen —ichroni.

<sup>15</sup>Ntá kjuixin tíha ntá kóyaxínhinni ntá sákjuíni nó chjasin Jerusalén. <sup>16</sup>Ntá sákjuíkoni iso tí sín tinkáchónki Ìnchéni tsíkjixín chjasin Cesarea. Sákjuíkoni sín ntōe ijnko ch'ín tsíkjixín Chipre it'in ch'án Mnasón. Jehe ch'án mé ósé tinkáchónki ch'án Ìnchéni. Ntá kjuanjon ch'án nketí kuítóhenni.

**Ch'ín Pablo sákjuítsjehe tí  
ch'ín Jacobo**

<sup>17</sup>Tiό kjuíjini chjasin Jerusalén ntá tí sín kíchó ni tinkáchónki Ìnchéni mé kjuanjon sín kjuachaxin k'uéjóni la chéhe sín. <sup>18</sup>Ntá tí yaon chr'éxín ch'ín Pablo sákjuíkoni ch'án kjuítsjeheni ch'ín Jacobo la ntaha tjejó kaín tí sín t'etōan kuénte nínko. <sup>19</sup>Ntá ch'ín Pablo kjuixin nixjehe ch'án sín ntá tuénxín chrónka ch'án kaín tí xrá kjuích'e Dios

tió kjuakohe ch'án tí sín jehya sín judío. <sup>20</sup>Tiό kuínhin sín ntá kjuanchehe sín kjuasáyé Dios, a ntá ntáche sín ch'ín Pablo kixin:

—Kíchóni, jaha k'uíkuan kixin sín itsjé mil sín judío ó kuinkáchónki sín Jesús kjánchó kaín sín ntáchro sín kixin t'ichjánxin tsítóehyani tí ley. <sup>21</sup>Ntá tsík-inhin sín kixin jaha mé tsíkjakohé tí sín judío tjejó chjasin ókjé kixin t'ichjánxienhya sinchexiteyéhe sín tí nkehe k'uetóan ch'ín Moisés. La kjaxin kuínhin sín kixin jaha tsíkjakohé sín kixin tí xjeen sín t'ichjánxienhya itsa sín tí xroye la ko t'ichjánxienhya tinkáchónki sín éxi k'uékinkáchónkini ósé. <sup>22</sup>¿Ntá nkehe chrókuich'eni? Kixin tió tsinhin sín kixin kjuihá la tsojnkotsé nchónhya sín. <sup>23</sup>Méxra íchá jína jaha sinchexiteyá tíhi. Ntihi tjejó noó sín t'ichjánxin sinchexiteyá sín tí nkehe chénka sín Dios. <sup>24</sup>Jaha sáchrókuíkoa sín la chrókótjóa jaha la ko jehe sín. La ko kjaxin chrókuéнка tsokjín sín ntá tso-noexín tí sín judío kixin chaxínhya tí nkehe tsíkinhin sín la ko tso-noexín sín kixin kjaxian jaha nchexiteyéhe tí ley. <sup>25</sup>A ntá tí sín jehya judío tsíkitekaon Ìnchéni la ikjinni ijnko xroon ó chr'énhenni sín. K'uetuenhenni sín kixin sinehya sín tí nto tsíkjokehe chojni tí nkehe tsíkjanoya, la ko kjaxin sinehya sín jni, la ko sinehya sín tí nto tsíchrínjinhya isin va, la ko chróchóntahya sín íjnko chojni chjin ókjé —ichro sín.

### Tséxin sín tí ch'ín Pablo tí nínko

<sup>26</sup>Ntá ch'ín Pablo sákjuíko ch'án tí noó sín la ntá tí yaon chr'éxin kjuínchetjóa asén sín. Ntá kjuixin ntá k'uúixenhen ch'án tí nínko kixin tsochrónka ch'án kixin ó kjuixin kjuínchexiteyá ch'an tí nkehe k'uúituenhen ch'án. Tíhi mé t'axr-jexín kixin jnkojnko sín tsíjkaó sín nkehe tsjanjon sín.

<sup>27</sup>Ó chjina chróxétja tí yato yaon ntá iso tí sín judío tsíkjixin estado Asia mé tsík'ikon sín ch'ín Pablo nkaxenhen tí nínko. Ntá kjuínchekónínkaon sín kaín chojni chjasin ntiha ntá itsé sín tí ch'ín Pablo. <sup>28</sup>Ntá k'uèya sín ntáchro sín kixin:

—Kaínra chojni chjasin Israel tsjínkit-saráni kixin tsotséni tí ch'ín i. Jehe ch'án mé ixri nkuíxin xritjakohe ch'án chojni nkehe jehya jína kuènte chjaséni, la ko titekakonhya ch'án tí ley kuènte Moisés, la ko titekakonhya ch'án nínkoeni. A ntá ijie la tsík'ixenko ch'án iso sín griego la kjuínchekjita sín nkaxenhen tí nínko tjóa —ichro sín.

<sup>29</sup>Mé xikaha ichro sín kixin tsík'ikon sín senó kixin chjasén sín mé xriko ch'ín Pablo tí ch'ín Trófimo tsíkjixin chjasín Éfeso. Kjuénkayáxin sín kixin ch'ín Pablo la kjá tsíkjiko ch'án tí ch'ín a nkaxenhen nínko.

<sup>30</sup>Ntá kuenté tí chjasin a kónínkaon sín la ntá kaín tí chojni kuinká sín ikui sín ntá itsé sín tí ch'ín Pablo. Ntá kuinkánkákjenxín sín ch'án nkaxenhen nínko la kuakitsje sín ch'án ntója ntá tuénxín k'uúikjehe sín tí puerta nínko.

<sup>31</sup>Ntá tjinkaon sín chrók'óyan sín ch'án ntá ijnko ch'ín comandante k'uetuenhen itsjé tí sín soldado romano kuínhin ch'án kixin kuenté tí chjasin Jerusalén k'uúixité nínkaon sín. <sup>32</sup>Ntá tí ch'ín comandante sákjuíko ch'án iso sín soldado la ko tí sín k'uetuenhen tí soldado a la kuinká sín sákjuí sín tí síin tí chojni. Ntá tió k'uúikon tí sín a kixin ó kjuíji tí ch'ín comandante la ko tí sín soldado a ntá kuítóhe sín, í kjuatehya sín ch'ín Pablo. <sup>33</sup>Ntá tí ch'ín comandante kóchjina ch'án la itsé ch'án tí ch'ín Pablo. Ntá k'uetóan ch'án kixin tí sín soldado sinchentetoxín sín tí ch'ín Pablo yaá chica cadena. Ntá chr'éxin kjuanchankíhi ch'án sín kixin nkexro tí jehe ch'ín Pablo la ko nkehe tí kjuích'e ch'án. <sup>34</sup>A ntá tí chojni tsíkójn-kotsé la

ijnko sín k'óyako ijnko nkehe la í so sín la ókjé nkehe. A ntá tí ch'ín comandante la tienxínhya ch'án nkekuènte xíkaha kjuíuch'e sín kixin k'uíxité sín. Ntá k'ue-toan ch'án kixin tí sín soldado sátsjiko sín tí ch'ín Pablo tí cuartel síin tí sín soldado. <sup>35</sup> La ntá tió kjuíjiko sín ch'án tí t'ít'ótjenxin sín tí nchia a ntá t'ichjánxin kuámá sín tí ch'ín Pablo kixin tí chojni tjinkaon sín chrókjuate sín ch'án kixin nínkaon sín. <sup>36</sup> Kaín tí chojni chréhe nó-ton t'èya sín ntáchro sín kixin:

—Chrók'uen ch'án —ichro sín.

### **Ch'ín Pablo chrónka nkayakon chojni kixin chóntahya ch'án jie**

<sup>37</sup> Ntá tió sáchrókjuíko sín ch'ín Pablo tí nkaxenhen tí cuartel kuènte tí sín soldado a ntá kjuanchankíhi ch'ín Pablo tí ch'ín comandante ntáchro ch'án kixin:

—¿Á jína tsonixjahani jaha intsí? —ichro ch'án.

Ntá kjuátehe tí ch'ín comandante ntáchro ch'án kixin:

—¿Jaha la á noha nixja griego?

<sup>38</sup> Méxra ¿á jehya jaha tí chojni tsíkjin- in Egipto kjuínchenínkaon chojni la ko sákjuíko nteje tí noó mil chojni tsíkjàya? —ichro ch'án.

<sup>39</sup> Ntá kjuátehe ch'ín Pablo ntáchro ch'án kixin:

—Náhi, janhan mé ijnko chojni judío. Tsíkokjínaxián chjasin Tarso, estado Cilicia. Janhan me ijnko chojni tsíkjin- in ijnko chjasin imá tjeotan. A ntá ijie xrxannóaha kixin tsjánjuan kjuachaxin tsonixjahá tí chojni —ichro ch'án.

<sup>40</sup> Ntá tí ch'ín comandante kjuanjon kjuachaxin ntá ch'ín Pablo kjuák'exín toté ch'án tí tjen escalera ntá tja ch'án ó kjuakoxin ch'án kixin tsotání sín. Ntá tání sín ntá kjuankixin nixjxin ch'án nkíva hebreo. Ntáchro ch'án kixin:

**22** —Jahará kichó ni la ko chojni it'é xjan tinhínra nkehe tí tsoxrjanka kixin chontahya jie —ichro ch'án.

<sup>2</sup> Ntá kuínhin sín kixin nixjxin ch'án nkíva hebreo ntá antsí má tání sín. Ntá ntáchro ch'ín Pablo inaá kixin:

<sup>3</sup> —Janhan mé ijnko chojni judío tsíkokjínaxián chjasin Tarso estado Cilicia. K'uankixian ntihi chjasin Jerusalén la kjuíntakuáxian tí nkehe kjuako tí ch'ín Gamaliel la titekavan tí ley tsíkinkáchónkí tí sín tsík'axreníxinni ósé. Tjínkavan chrókjuít'aha Dios xra kaín asenná éxí tjínkáonrá jahará ch'erá tí yaon ijie. <sup>4</sup> Ti senó k'uénínkakonhan chrók'oyán tí sín tinkáchónki Ìnchéni kjuíntanteto chojni ntoa la ko chojni chjin kixin chrók'uejóchjina sín. <sup>5</sup> A ntá tí sín nchat'á t'etoan la ko kaín tí sín táda t'ayakonhen nínko la mé nohe sín kaín t'ha kixin jehe sín mé kjuanjon sín xroon ts'áyéhe tí sín kichó ni judío tjejó chjasin Damasco. Ntá sákjuia nó ntiha kixin chrókjuíkjéyá tí sín tinkáchónki Ìnchéni kixin chrótse sín ntá chrókjuíkian sín ntihi Jerusalén chrokjuasóte sín.

### **Ch'ín Pablo chrónka nkexrí kjuankixin tinkáchónkí ch'án Ìnchéni**

(Hch. 9.1—9; 26.12—18)

<sup>6</sup> A ntá tió kjuasán chjina chjasin Damasco chjina chonkixin ntá xrinahya k'uinkáséyan jnkontatjén tí tjén ijnko xrohi imá t'inkaséyan kuixin nkajní. <sup>7</sup> Ntá kjuachr'ítsinka nonte ntá tuénxín kuínhan itén ijnko nkexro nixjana ntáchro kixin: “Saulo, Saulo, ¿nkekuèté ninkákonna xrtjéyá tí janhan?” <sup>8</sup> Ntá kjuánchánkiá kixin: “¿Xá nkexro jaha?” Ntá kjuátehe ch'án ntáchro ch'án kixin: “Janhan mé tí nkexro Jesús tsíkjin chjasin Nazaret, mé tí nkexro xrtjéyá.” <sup>9</sup> La ntá tí sín k'uájikian mé k'uíkon sín tí xrohi la chakon sín kjánchó kuénhya sín itén tí nkexro nixjana. <sup>10</sup> Ntá kjuánchánkiá kixin: “¿Xá nkehe tsonhen

tjinkávan sít'aha jaha?" Ntá kjuátehe ch'án ntáchro kixin: "T'áya sájtia t'ixenhén chjasin Damasco ntá ntiha tsochronka sín kaín nkehe sích'e." <sup>11</sup>Ntá tí xrohi a mé k'uixenka ikuān ntá í xitjahya t'íkuān. Ntá tí sín chríkjan mé kuinkátséna sín sákjuíkjan sín chjasin Damasco.

<sup>12</sup>Ntá ntaha kjuák'e ijnko ch'ín it'ín Ananías ijnko chojni jína kjuínchex-iteyéhe ch'án tí ley kuènte ch'ín Moisés. Kaín tí sín judío síñ chjasin Damasco tjikosáyehe sín tí jehe ch'án. <sup>13</sup>Ntá ch'ín Ananías mé kuitsjehe ch'án tí janhan ntá tió kui ch'án ntáchro ch'án kixin: "Kíchóni Saulo, ijie la ts'ayéhé kjuachaxin ts'ikuan ínaá." Ntá ó jína t'íkuān. <sup>14</sup>Ntá tuénxín ntáchro ch'án ínaá kixin: "Tí Dios kuinkáchónki tí sín tsík'axrjeníxinni la ó tsík'jeyá ch'án tí jaha kixin tsonoha nkehe tjinkaon ch'án la ko kixin ts'ikuan tí nkexro jína la ko tsinhín tan k'uaxrjexín ir'va ch'án. <sup>15</sup>Jaha mé tsochronka tí nkehe k'uíkuan la ko tí nkehe kuínhín tsinhin kaín tí chojni chjasintajni. <sup>16</sup>À ntá jie la í choénhya má. T'áya la tsikítiaxián ihnié Ìnchéni kixin mé ts'ímáxin íjía," ichro ch'ín Ananías.

### **Pablo chrónka kixin Dios ichr'án ch'án tsjakohé tí sín jehya sín judío**

<sup>17</sup>'Na ntá tió xíkjan chjasin Jerusalén ntá sákjuia nínko tsonixjahā Dios ntá titàya k'uíkuèn <sup>18</sup>Ìnchéni ntáchro ch'án kixin: "Tjoka ts'axrjéxian chjasin Jerusalén kixin tsitekakuenhya sín tí nkehe tjákua mé tí tan kuèntana." <sup>19</sup>Ntá janhan ntátjan ch'án kixin: "Ìnchéni, jehe sín ó nohe sín kixin senó k'uék'atsínka kaín tí nínko la k'uétsé tí sín tinkáchónki tí jaha la sákjuíkjan sín ntøechiso k'uékon sín. <sup>20</sup>Tió k'óyán sín tí ch'ín Esteban tí nkexro k'uékjit'aha xra, k'uénixja ti tan kuènta ntá janhan kjaxin tjéntaxián ntiha la janhan

ntáxrjan kixin ó nchoxon its'en ch'án la k'uáyakonhan tí iké tí sín kjuàya." <sup>21</sup>Ntá Ìnchéni xínixja ínaá, ntáchro ch'án kixin: "Tétuanhan jaha kixin sátsjia chjasin kjin kixin tsjákohé tí chojni jehya judío."

### **Ntá tí ch'ín comandante k'uáyéhe tí ch'ín Pablo kixin tsjasóte ch'án**

<sup>22</sup>Ntá tí sín tsíkójkotsé mé kuínhin sín kaín tíha ntá kjuankixin k'uèya sín ntáchro sín kixin:

—Its'en ch'án, í tsjak'echónhya ch'án —ichro sín.

<sup>23</sup>Naxa t'ixratáhya sín t'óyako sín ntá tótsjénka sín iké sín la ko kuákja sín nche it'e sín. <sup>24</sup>Ntá tí ch'ín comandante mé k'uetuenhen ch'án tí sín soldado a kixin sátsjiko sín ch'ín Pablo nkaxenhen tí cuartel kuènte sín. Ntá ntiha k'uetøan ch'án kixin tsjatéxín sín ch'án chikoté ntá tsonoxín tí ch'ín comandante nkekuènte imá t'óyako sín nínkakonhen sín tí jehe ch'án. <sup>25</sup>Ntá kjuixin kjuínchenteto sín ch'án kixin tsjate sín ch'án ntá nixjehe ch'ín Pablo ijnko ch'ín capitán itjen ntiha ntáchro ch'án kixin:

—¿Á chontará kjuachaxin tsjaterá ijnko chojni romano, kixin naxa kjuéyáhyará nkerí jie chonta? —ichro ch'án.

<sup>26</sup>Tió kjuixin kuínhin tí ch'ín capitán ntá sákjuíchénka ch'án tí ch'ín comandante ntáchro ch'án kixin:

—¿Nkehe sích'e jaha kixin tí nkexro i mé ijnko chojni romano?

<sup>27</sup>Ntá tí ch'ín comandante mé kóchjinehe ch'án tí ch'ín Pablo la kjuanchankí ch'án, ntáchro ch'án kixin:

—¿Á jaha chaxín chojni romano? —ichro ch'án.

Ntá kjuátehe ch'ín Pablo kixin chaxín jehe ch'án.

<sup>28</sup>Ntá ntáchro tí ch'ín comandante kixin:



—¿A ntá nkexrí kixin janhan nchón-hya chichaon kjuènká kixin ts'ónana chojni romano?

A ntá ntáchro ch'ín Pablo kixin:

—Janhan na chojni ntiha tsíkókjínaxián.

<sup>29</sup> Na ntá tí sín soldado chrókjuate ch'ín Pablo mé kuínhin sín kixin ch'ín Pablo ijnko chojni romano ntá kuítóhe sín ch'án sákjuí sín ókjé. Ntá tí ch'ín comandante a mé kónohe ch'án kixin tí ch'ín Pablo a mé ijnko chojni romano ch'án chaxín. Ntá chrakon ch'án kixin tsíkjinchenteto ch'án.

### Ch'ín Pablo nixjehe ch'án tí sín t'etoan kuènte tí sín judío

<sup>30</sup> A ntá tí kóyaon ntá tí ch'ín comandante a mé tjinkaon ch'án tsohohe ch'án nkehe tí jie chrók'ueka tí sín judío tí ch'ín Pablo. Ntá kjuasintanka ch'án chica cadena tsíchróntetoxín tja tí ch'ín Pablo ntá k'uetōan ch'án kixin tsojnkotsé kaín tí ncha't'á t'etoan la ko tí sín t'etoan kuènte sín judío, a ntá kuakitsje ch'án tí ch'ín Pablo la kjuak'e ch'án jnkosiné tí sín tí jehe sín.

**23** Ntá ch'ín Pablo komá tí sín t'etoan kuènte sín judío ntá ntáchro ch'án kixin:

—Kíchóni, tí k'uékjak'é hasta ijie la Dios tjetsjehe kixin ijnko kjuaxrexinkaon jína chonta —ichro ch'án.

<sup>2</sup> Ntá tí ch'ín Ananías tí ch'ín ncha't'á t'etoan mé k'uetuēnhen ch'án tí sín chjino tjejó tí tjen ch'ín Pablo tsochjéhe sín ir'va ch'án. <sup>3</sup> Ntá kjuátehe ch'ín Pablo kixin:

—Dios mé sinchekjasóte ti jaha kixin ntoáhya kjuich'e. Tjetjaxian méhe kixin tsjéyá nkehe tí jie chonta éxí nixja tí ley. A ntá ¿nkekuènte kuítékákonhya tí ley, la kuétoan kixin ts'ékonna? —ichro ch'án.

<sup>4</sup> A ntá tí sín sín ntiha ntáchro sín kixin:

—¿Á xikaha ts'antaxínhín tí ncha't'á t'etoan kuènte Dios?

<sup>5</sup> Ntá kjuátehe ch'ín Pablo ntáchro ch'án kixin:

—Kíchóni, kjuatsōanhya janhan kixin jehe ch'án mé tí ncha't'á t'etoan. Ntáchro tí xroon itén Dios kixin: “Chrók'uantaxíenhya tí chojni t'etuēnhen chjasán”<sup>8</sup> —ichro ch'án.

<sup>6</sup> Ntá ch'ín Pablo mé kónohe ch'án kixin iso chojni sín ntiha mé chojni kuènte partido saduceo, ntá í so sín a mé kuènte partido fariseo. Ntá itsen k'uèya ch'ín Pablo, ntáchro ch'án kixin:

—Kíchóni, janhan mé ijnko chojni fariseo la tí sín kjéhyana mé fariseo kjaxin. Jahará mé tjéyará nkehe tí jie chonta kixin janhan mé tinkachónkia kixin tsoxechón chojni tsík'en.

<sup>7</sup> Ntá kjuixin ntáchro ch'án tíha ntá tí sín fariseo la ko tí sín saduceo mé kjuankixin sín ikjo kichó sín ntá xikaha jnkokónhya kjuenkayáxin tí sín tsíkójnkotsé ntiha. <sup>8</sup> Kixin tí sín saduceo a mé ntáchro sín kixin tsoxechónhya chojni tsík'en la ko kjaxin kohya sín ángel la ko kohya ncha'kuen. A ntá tí sín fariseo la titekaon sín kaín tí nkehe a.

<sup>9</sup> Ntá kaín sín k'uèya sín la ntá iso tí sín maestro tjako ley kuènte sín fariseo mé k'uínkatjen sín ntáchro sín kixin:

—Tí ch'ín i, kohya ninkehó nkehe jínahya kjuich'e ch'án. Ách'e ijnko ncha'kuen chojni o ijnko ángel mé nixjehe ch'án —ichro tí sín fariseo.

<sup>10</sup> Ntá imá sítjité sín nínkaon sín. Ntá tí ch'ín comandante a mé tóxakonhen ch'án kixin chrókjuinchekuen sín tí ch'ín Pablo ntá k'uetuēnhen ch'án tí sín soldado a kixin sátsjikakjín sín ch'án la tsíkao sín ch'án inaá tí cuartel kuènte tí sín soldado.

<sup>11</sup> A ntá tí tie a na ntá xrinahya titàya k'uíkuèn ch'ín Pablo Ìnchéni nixja ch'án, ntáchro kixin:

—Chrakonhya Pablo kixin éxí chronka tanná chjasin Jerusalén la mé xikaha tsochronka chjasin Roma.

### Kjuenkayáxin sín chrók'óyán sín tí ch'ín Pablo

<sup>12</sup> Ntá tí yaon chr'éxin a ntá iso tí sín judío a mé kjuenkayáxin sín kixin ts'óyán sín tí ch'ín Pablo. Ntá k'uákjenzin sín ihnié Dios chaxín toxiteyá la sinehya sín la ko ts'ihya sín ninkehó tí naxa ts'óyánhya sín ch'án. <sup>13</sup> Chjina cuarenta sín kjuenkayáxin sín kixin xikaha sich'e sín. <sup>14</sup> Ntá sákjuichenka sín tí sín nchat'á t'etöan la ko tí sín t'etuenhen kuènte tí sín judío la ntáche sín kixin:

—K'uákjenzinni ihnié Dios kixin chaxín tsoxiteyá kixin í sinehyani ninkehó tí naxa ts'óyánhyani tí ch'ín Pablo. <sup>15</sup> Méxra ntá jahará la ko í so ti sín t'etuenhen tí sín judío tsontácherá tí ch'ín comandante a kixin tsjikao sín tí ch'ín Pablo ntihi tí tjejorá ntóye nchítjen kixin antsí má tsjanchankíhírá ch'án nkehe siná á chaxín tí jie t'íká ch'án. A ntá jeheni senó ts'ejóchónhenni tí tsjixin ch'án ntá ts'óyánni ch'án kixin í tsjihya ch'án ntihi —ichro sín.

<sup>16</sup> Ntá tí xjeen tí kjave tí ch'ín Pablo a mé ts'kinhin ch'án nkehe tí tjo tí sín a. Ntá sákjuí ch'án k'uixenhen ch'án cuartel kuènte tí sín soldado kixin tsochronka ch'án nkehe tí tjo sín kuínhin ch'án. <sup>17</sup> La ntá ch'ín Pablo mé k'uíyehé ch'án ijnko tí sín capitán la ntáchro ch'án kixin:

—Sátsjikoá tí ch'ín ntasoá ti tjen tí ch'ín comandante kixin tjinkaon ch'án tsochronka ch'án nkehe —ichro ch'án.

<sup>18</sup> Ntá tí ch'ín capitán a mé sákjuíko ch'án ti tjen tí ch'ín comandante ntá ntáchro tí ch'ín capitán a kixin:

—A ntá tí ch'ín Pablo tjechjina mé k'uíyeheni ch'án kixin tsjikaoni tí ch'ín

ntasoá ntihi kixin tjinkaon ch'án tsonixjaha jaha —ichro ch'án.

<sup>19</sup> Ntá tí ch'ín comandante a mé tséhe ch'án itja tí ch'ín ntasoá a ntá k'uaxrjentako ch'án jehó ch'án ntá kjuanchankíhi ch'án kixin:

—¿Nkehe tí tjinkávan tsochronka? —ichro ch'án.

<sup>20</sup> Ntá ntáchro tí ch'ín ntasoá a kixin:

—Iso tí sín judío mé kjuenkayáxin sín kixin tsjanchaha sín kixin ntóye nchítjen sátsjikoá ch'ín Pablo tí tsjnkotsé tí sín judío t'etöan. Sit'ayaha sín tsontáchro sín kixin tjinkaon sín tsjanchankíhi sín ch'ín Pablo tí nkehe antsí má xra. <sup>21</sup> A ntá jaha la chrókuítekákonhya kixin chjina cuarenta chojni tjejóchónhen sín imó la k'uákjenzin sín ihnié Dios kixin sinehya sín la ko ts'ihya sín ninkehó tsjixinjian its'en ch'ín Pablo. Ntá ijie tjejóchónhen sín tsonhe sín nkehe tsixrua jaha —ichro ch'án.

<sup>22</sup> A ntá tí ch'ín comandante a mé nixjehe ch'án tí tí ch'ín ntasoá la k'uetöan ch'án kixin:

—Tsochenkahya ninkexró kixin xikaha kjuíchronka —ichro ch'án.

### Ichr'án sín tí ch'ín Pablo tí itjen tí ch'ín gobernador Félix

<sup>23</sup> Ntá tí ch'ín comandante a mé k'uíyehé ch'án yaá tí sín capitán a ntá k'uetöan ch'án kixin tsoyaxínhin sín sátsjiko sín iyó ciento sín soldado sátsjixin toté la ko setenta tí sín tsjiták'á kokate la ko iyó ciento soldado sátsjiko chicalanza, ntá las nueve tie sátsji sín chjasin Cesarea, ichro ch'án. <sup>24</sup> La ko k'uítuenhen sín sinchekamá sín kokate tsjiták'á ch'ín Pablo la ts'ayakonhen sín ch'án jina kixin kohya nkehe tsonhen kixin tsjiji ch'án tí tjen ch'ín Félix, tí ch'ín gobernador. <sup>25</sup> Ntá tí ch'ín comandante ikjin ch'án ijnko xroon a, ntáchro kixin:

<sup>26</sup> “Janhan mé tí ch'ín Claudio Lisias chr'anhan ijnko xroon kixin jaha ch'ín

Félix ijnko gobernador jína, nixjaha. <sup>27</sup>Tí sín judío a mé itsé sín tí ch'ín i kixin chrók'óyán sín ch'án. Ntá tió kónòna kixin ijnko chojni romano tí jehe ch'án la ntá sákjuíkian sín soldado kjuíntakaá ch'án. <sup>28</sup>Tjínkavan tsonòna nkekuènte kixin nínkakonhen sín ch'án. Ntá sákjuíkian ch'án tí tsíkójnko tsé tí sín judío. <sup>29</sup>Ntá kónoxín kixin nínkakuénxín sín ch'án kixin tí ley kuènte sín kjuínchexiteyáhya ch'án, ichro sín. Jehya jie jíé tsíkjasin ch'án kixin chrók'óyán sín ch'án o chrókjuak'echjina sín ch'án. <sup>30</sup>Ntá ó kuínhan kixin tí sín judío a mé chrók'óyán sín ch'án. Ntá méxra jie ichr'an ch'án tí tjen jaha la ko kjaxin kjuáncháha tí sín a kixin chrókjuíji sín tí tjen jaha chrókjuá sín kixin nkekuènte nínkakonhen sín ch'án. Kjuasáyá. Ó tjen.”

<sup>31</sup>Ntá tí sín soldado a mé kjuínchexiteyá sín éxí k'uítuénhen sín a ntá sákjuíko sín tí ch'ín Pablo tí tie a chjasin Antípatris. <sup>32</sup>Ntá tí yaon chr'éxín tí sín soldado xrixín toté ó a mé xíkjan sín tí cuartel kuènte sín. Ntá tí sín k'uejókjen kokate a mé naxa sákjuíko sín tí ch'ín Pablo. <sup>33</sup>Ntá tió kjuíji sín tí chjasin Cesarea ntá tí sín soldado a mé kjuanjón sín tí xroon a chjéhe sín tí ch'ín gobernador la ko kjaxin kjuínchek'áyéhe sín ch'án tí ch'ín Pablo. <sup>34</sup>Ntá kjuixin kjuínchekuáxin tí ch'ín gobernador a tí xroon ntá kjuanchankí ch'án nketí chjasén ch'ín Pablo. La ntá kónohe ch'án kixin estado Cilicia tsíkjuíxín tí ch'ín a. <sup>35</sup>Ntá ntáchro ch'án kixin:

—Ntá tsínhan nkehe tsixro tí sín itsji ts'eka jie.

Ntá k'uetuénhen ch'án tí sín soldado a kixin ts'áyakonhen sín tí ch'ín Pablo tí nchia kuènte ch'ín Herodes.

**Ch'ín Pablo nixjehe ch'án  
ch'ín Félix chrónka ch'án  
kixin kjuasinhya ch'án jie**

**24** Ntá k'uaúsínka in'ó yaon, ntá ch'ín Ananías, tí nchat'á imá t'etoan, kjuíji ch'án chjasin Cesarea. Kjaxin kuíkao ch'án iso tí sín t'etoan kuènte nínko a la ko ijnko ch'ín abogado it'in Tértulo. Tí ch'ín a mé tsonixjehe tí ch'ín gobernador kixin tsjanchia sín jie kuènte ch'ín Pablo. <sup>2</sup>Ntá tió kuíkao tí sín soldado tí ch'ín Pablo ntiha ntá tí ch'ín Tértulo kjuankíxín ch'án nixjehe ch'án tí ch'ín Félix ntáchro ch'án kixin:

—Kjuasáyá jaha gobernador kixin imá kjuínkítsa kixin kjuaxróxin tjejóni la kjuasáyá kixin imá noha kjuíncheyóxian tí nación kuènteni. <sup>3</sup>Kjuasáyá jaha Félix. Imá jína jaha kixin k'uíyéheni kaín tíha. <sup>4</sup>Tjínkakonhya sintak'itjáyahan nchónhya tiempo la xrjanóaha kixin chrókjuak'é chrókuinhín intsikoa tí nkehe tsoxrjanka. <sup>5</sup>A ntá ijie ó k'uitjani kixin tí ch'ín i mé éxí ijnko chin t'óxíka kuenté chjasintajni kixin ch'iyehé ch'án tí sín judío ntá xíka sín. Jehe ch'án mé t'etoan ch'án tí sín tinkáchónki tí ch'ín tsíkjuíxín chjasin Nazaret. <sup>6</sup>Jehe ch'án mé kjaxin chrókjuínchekjita ch'án tí nínko. A ntá itséni ch'án ntá chrókjuínchekitoexínni tí ijie ch'án éxí t'etoan tí ley kuènteni. <sup>7</sup>A ntá tí ch'ín comandante Lisias kjuixrónkáxin ch'án kuíkao ch'án nchónhya sín soldado la kuakitsje sín tí ch'ín Pablo. <sup>8</sup>Ntá k'uetóan ch'án kixin tí sín tjanchia jie chrókuitsejehe sín tí jaha kixin jaha chrókjuanchankíhí ch'án kixin chrókónoha jína nkexéhe tí jie chrókjuínchekjasótéxín sín ch'án —ichro tí ch'ín Tértulo.

<sup>9</sup>Ntá ntáchro kaín tí sín judío síin ntiha kixin:

—Kaín tíha la chaxín —ichro sín.

<sup>10</sup>Ntá tí ch'ín gobernador a mé kjuakoxin tja ch'án kixin tsonixja tí ch'ín Pablo a. Ntá ntáchro ch'ín Pablo kixin:

—Chéheni kixin tsonixjahani tsochrónkani kixin kohya jie kjuasinni kixin ó noheni kixin jaha la juez kuènte tí nación ntihi la nchónhya nánó tétóan.

<sup>11</sup>Jaha la kjaxin ó chrókónoha kixin na ntá teyó yaon kjuújini chjasin Jerusalén kixin ntaha tsoxráxinkakoxínni Dios. <sup>12</sup>Kónoxínhya kixin nijnko nkexro chrókjuachaxinni, la ko kjuínchexakuenhyani ninkexró ninko la ko ni tí njnko ntsí la ko ninketó chjasin. <sup>13</sup>Tí sín i la xitjahya tsonáchro sín kixin xikaha tí jie kjuasinni.

<sup>14</sup>Janhan chaxín xrxanka kixin t'aha xra tí Dios k'uékinkáchónki tí sín tsík'axrenixinni mé yóhe tí ntja nixin. A ntá jehe sín ntáchro sín kixin ókjé nkehe tinkáchónkini. Kjánchó janhan mé tinkáchónkia kaín tí nkehe tsíkjin sín tí xroon kuènte ley la ko tinkáchónkia kaín tí nkehe k'uénixja tí sín k'uéchónka itén Dios. <sup>15</sup>Kjaxín tinkáchónkia tí Dios tinkáchónki tí jehe sín kixin tjéchonhan kixin Dios sinchexechón kaín chojni jina la ko kaín chojni jínahya kjaxin. <sup>16</sup>Méxra tóxakonna kixin tjóá chrókjuak'é kixin chrókjuanchahya Dios jie la ko kjaxin chojni chrókjuanchahya jie.

<sup>17</sup>Nta kjuixin k'uatsínka iso nánó ixrini ókjé ntá kjuújini chjasénni kixin tsjanjonni chichaon la ko kjaxin tsochjéheni Dios nkehe. <sup>18</sup>Méxra mé xikaha tjenni nkaxenhen njnko nta iso sín judío tsíkjin estado Asia ó xetani ntiha. Ntá kjuínchetjóáni asénni la tsjéhya chojni k'uíkon la kohya chojni kjuánjonkoni. <sup>19</sup>A ntá tí sín a mé t'ichjánxin chrókui sín ntihi kixin chrókjuanchia sín jie tí nínkakonna sín. <sup>20</sup>A ntá tí náhi la tí sín tjejó ntihi chróchrónka sín kixin nkehe tí jie k'uitjaxín sín tió kjuák'eni tí tjejó tí

sín t'etóan kuènte tí sín judío. <sup>21</sup>Kjá tí tsonáchro sín kixin náxrxónhya ijnko nkehe itsen k'uèya ntáxrxan kixin: “Ijie sinchekitoexinrá jiena kixin sinchekjasótenará kixin janhan tinkachónkia kixin tsoxechón chojni tsik'en” —ichro ch'án.

<sup>22</sup>Ntá kjuixin kuínhin tí ch'ín Félix, la jehe ch'án jina kónohe ch'án kixin nkexrí tí ntja nixin. Ntá kjuínchekitoexínhya ch'án ijé ch'ín Pablo. Ntáchro ch'án kixin:

—Tsijjia tí ch'ín comandante Lisias ntá tsochrónka ch'án nkekuènte tí jie tjanchiará ntá tsonóna —ichro ch'án.

<sup>23</sup>Ntá k'uetuenhen ch'án ijnko ch'ín capitán kixin ts'ayakonhen ch'án ch'ín Pablo kjánchó tsítóhe sín ch'án intsí la ko tsítóhe sín ts'ixenhen tí sín chóxin ch'án, tsjtsjehe sín ch'án.

<sup>24</sup>Ntá iso yaon chr'éxin ntá kjuújiko ch'ín Félix tjan Drusila ichjién ch'án, mé ijnko tjan judía. Ntá k'uetóan ch'án kixin tsjik'íyehé sín tí ch'ín Pablo kixin tsochrónka ch'án nkexrí tinkáchónki chojni Jesucristo. <sup>25</sup>A ntá ch'ín Pablo mé kjuako ch'án kixin nkexrí ts'ejó chojni jina la ko nkexrí ts'etuenhen chojni asén sín kixin ch'ehya sín tí jínahya la ko nkexrí Dios sinchekitoexín ijé chojni tí tsjixixín. Ntá ch'ín Félix kuínhin ch'án xikaha ntá chrakon ch'án, ntáchro ch'án kixin:

—A ntá jie la sájtia. Ntá ts'iyaha tió chonta tiempo —ichro ch'án.

<sup>26</sup>A nta ch'ín Félix tjechónhen ch'án kixin kjá ch'ín Pablo tsjanjon ch'án chichaon ntá tsjanjon ch'án kjuachaxin sátsji ch'án. Ntá jnkoyaxón k'uíyehé ch'án tí ch'ín Pablo kixin tsonixjehe ch'án. <sup>27</sup>Ntá xikahó kónhen hasta k'uát-sínka iyó nánó ntá tí ch'ín Félix kuítóhe ch'án tí xra gobernador la ntá íjnko ch'ín it'in Porcio Festo mé k'uíxenhen ch'án tí xra a ínaá. A ntá ch'ín Félix mé kuítóhe ch'án tí ch'ín Pablo tjechjina ch'án kixin

tjinkaon ch'án chrókjuinchexiteyá ch'án tí nkehe tjinkaon tí sín judío.

### Ch'ín Pablo nkayakon tí ch'ín Festo

**25** Ntá tí ch'ín Festo kjuíji ch'án ntiha kixin ts'ixenhen ch'án tí xra gobernador. Ntá iní yaon chr'éxin ntá sákjuixin ch'án chjasin Cesarea la kjuíji ch'án chjasin Jerusalén. <sup>2</sup>Ntiha tí sín nchat'á t'etöan la ko tí sín judío imá tjetöan mé kjuanchia sín kixin tsjasóte ch'ín Pablo. <sup>3</sup>Kjuanchia sín kixin xra ó chrók'uetoan ch'án kixin chrókjui ch'ín Pablo ntiha chjasin Jerusalén. Kixin jehe sín ó tsíkjenkayáxin sín kixin tsochr'án sín iso chojni tsochónhen tí ntja ts'óyán sín tí ch'ín Pablo. <sup>4</sup>Kjánchó ch'ín Festo kjuátehe ch'an ntáchro ch'án kixin ó tsíkjenkayáxin ch'án kixin í séhya tsjak'e ch'án ntiha. Méxra tí ch'ín Pablo la tjechjina ch'án chjasin Cesarea la xitjahya ts'etöan ch'án kixin tsjixrakoa. <sup>5</sup>Ntá ntáchro ch'án kixin:

—Tí chojni tjetöan kuèntará sáchrókjuikian ntiha chjasin Cesarea. A ntá tí chaxín tsíkjasin ch'án jie ntá ntiha la jína tsjanchia sín jie —ichro tí ch'ín Festo.

<sup>6</sup>Ntá ch'ín Festo kjuák'e ch'án chjasin Jerusalén chjina ijní o ite yaon ntá ikjan ch'án chjasin Cesarea inaa. Ntá tí yaon chr'éxin a kjuák'etjaxin ch'án tí tjet'etöanxín ch'án ntá k'uetoan ch'án kixin tsjikakjín sín tí ch'ín Pablo. <sup>7</sup>Ntá tió k'uixenhen ch'ín Pablo ntiha ntá tí sín judío kuixin Jerusalén kóchjinehe sín ch'án ntá kjuanchia sín nchónhya jie imá hyé. Kjánchó ijnko nkehe chaxínhya t'eka sín ch'án jie. <sup>8</sup>A ntá tí ch'ín Pablo a chrónka ch'án kixin kjuasinhya ch'án jie. Ntáchro ch'án kixin:

—Ninkehó jie kjuasinhyani mé ninkexró kjuánjonkohyani la ko kjaxin jehya chrókuitekakonhyani tí ley kuènte tí sín judío la ko jehya chrókuitekakonhyani tí ninko la ko

jehya chrókuitekakonhyani tí ch'ín gobernador romano.

<sup>9</sup>A ntá ch'ín Festo tjinkaon ch'án kixin tsonínkakuenhya ch'án tí sín judío ntá kjuanchankíhi ch'án tí ch'ín Pablo ntáchro ch'án kixin:

—¿Á tjinkávan sátsjia chjasin Jerusalén kixin ntiha janhan chrókjuintakitoaxián nkehe tí jie chonta jaha? —ichro ch'án.

<sup>10</sup>Ntá kjuátehe ch'ín Pablo kixin:

—Náhi, jeheni ó ntihi tjenni tí t'etöanxín tí sín gobierno romano la jína chrókjuinchekitoexián ijiéni kixin jaha la ó noha kixin ninkehó ije kjuích'ehyani tí sín judío. <sup>11</sup>Kja tí chaxín kjuásian ichrén jie jie chrók'uénxian la chrakonhyana kjónté chrók'uén. A ntá ti chaxínhya xikaha t'ekana sín jie la ninkexró chóntahya kjuachaxin chrók'uetoan sáchrókjuikoni tí jehe sín. A ntá tjánchiá kixin jehe tí ch'ín imá t'etöan mé sinchekitoexín tí jie —ichro ch'án.

<sup>12</sup>Ntá ch'ín Festo mé kjuanchankíhi ch'án iso tí sín tjinkitsa ch'án ntá ntáchro ch'án kixin:

—Jaha mé tjanchia kixin tí ch'ín imá t'etöan sinchekitoexín ch'án ijiá. Méxra tétuanhan sátsjia tí tjen tí ch'ín a —ichro ch'án.

### Ch'ín Pablo nkayakon tí ch'ín rey Agripa

<sup>13</sup>Ntá k'uátsínka iso yaon ntá tí ch'ín rey Agripa la ko tjan Berenice kjuíji sín chjasin Cesarea kixin tsonixjehé sín tí ch'ín Festo. <sup>14</sup>Ntá ntiha mé kuítóhe sín itsjé yaon ntá ch'ín Festo a mé chénka ch'án tí ch'ín rey nkehe kuènte tí ch'ín Pablo. Ntáchro ch'án kixin:

—Ntihi itjen ijnko ch'ín tjechjina tsíkítóhe ch'ín Félix. <sup>15</sup>A ntá tió kjuak'e chjasin Jerusalén ntá tí sín nchat'á t'etöan la ko tí sín t'etüenhen tí sín judío a mé kjuíjitsjehe sín tí janhan ntá kjuanchia

sín jië kuènte ch'ín Pablo. Kjuanchia sín kixin chrók'óyánni tí jehe ch'án. <sup>16</sup>Ntá janhan kjuátaha kixin: Jeheni chojni t'etöan kuènte sín romano mé kuènhyani ts'etöanni its'en ninkexró tí naxa tsochjinahya tí ch'ín kjuasin jië kixin tsontáchro ch'án á chaxín tí jië tjanchia sín o náhi. <sup>17</sup>Ntá tí sín judío kui ntihi ntá chuánhya má. Kjónté tí yaon chr'éxin kjuak'étxaxian tí ntákitöexián ijíé chojni la kuétöan kixin síxrakoa tí ch'ín Pablo. <sup>18</sup>À ntá tí sín kóchjina kohya ninkehó ichro sín kuènte tí jehe ch'án éxí kjuenkayáxian janhan chrón-táchro sín. <sup>19</sup>Jehó nínkakuenxín sín ch'án kixin tí nkehe tinkáchónki ch'án la ko nínkakuenxín sín ch'án kixin tí nkexro it'ín Jesús mé ik'uén ch'án ntá jie ntáchro ch'ín Pablo kixin tjechón ch'án inaá. <sup>20</sup>Janhan la nonahya nkexrí tsi-töexín tí ijíé ch'án ntá kjuánchánkíhã tí ch'ín Pablo á tjinkaon ch'án sátsji ch'án chjasin Jerusalén kixin ntaha tsitöexin tí jié ch'án. <sup>21</sup>À ntá jehe ch'án tsíkjanchia ch'án kixin tí ch'ín imá t'etöan mé chrókjuinchekitöexín ch'án ijíé ch'án. Ntá kuétöan janhan kixin naxa ntihyó tsjak'echjina ch'án tsononajia janhan nkesá tsétuánhan ch'án sátsji ch'án ntiha —ichro ch'án.

<sup>22</sup>À ntá ch'ín Agripa ntáche ch'an tí ch'ín Festo kixin:

—Kjaxian janhan tjínkavan tsínhan tí nkehe tsochrónka tí ch'ín a.

Ntá kjuátehe ch'ín Festo ntáchro ch'án kixin:

—Ntóye tsinhín nkehe tsochrónka ch'án.

<sup>23</sup>Ntá tí yaon chr'éxin tí ch'ín Agripa la ko tí tjan Berenice kjuíji sín la k'uíx-enhen sín la ko tí sín soldado t'etöan tsíkjkao sín, la ko k'uíxenko sín iso chojni tjetöan kuènte chjasin ntiha. Ntá k'uetöan ch'ín Festo kixin tsjixrakoa tí ch'ín Pablo. <sup>24</sup>Ntá ntáchro ch'ín Festo kixin:

—Jaha ch'ín rey Agripa tinhín la ko tinhínrá kaín rá tsikójnkotsérá ntihi. Tsjehérá tí ch'ín Pablo itjen ntihi. Kaín tí sín judío k'ueka sín ch'án jië tí chjasin Jerusalén la ko kjaxin chjasin Cesarea ntihi la kuítöehya sín, tjanchana sín kixin chrók'uen ch'án. <sup>25</sup>À ntá tónhenni kixin kohya jië jíé kjuasin ch'án kixin chrók'uen ch'án. Kjánchó jehe ch'án mé tsíkjanchia ch'án kixin tí ch'ín imá t'etöan chrókjuinchekitöexín ijíé ch'án. Ntá kjuenkayáxian kixin tsétuánhan ch'án sátsji ch'án ntiha. <sup>26</sup>Nonahya nkehe chaxín tsokjian ts'áyéhe tí ch'ín t'etöan. Ntá jie kuétöan kjuíkkajín sín ch'án kjuíkao sín ch'án tí tjejóni ntihi kixin tjetöan kixin jaha ch'ín Agripa la ko kaín rá tjejórá ntihi tsjanchankíhírá ch'án kixin mé tsonöna janhan nkehe tsokjian. <sup>27</sup>Méxra náxrxjónhya chróchr'an ijnko tí chojni tjechjina naxa nonahya nkehe tí jië t'eka sín ch'án.

### Ch'ín Pablo nkayakon tí ch'ín rey Agripa chrónka ch'án tí jië t'eka sín ch'án

**26** Ntá tí ch'ín rey Agripa a mé ntáche ch'án tí ch'ín Pablo kixin: —Ó nchöxon jahvá tsochrónka —ichro ch'án.

Ntá tí ch'ín Pablo mé kjuaya tja ch'án ntá kjuankixin nixja ch'án, ntáchro ch'án xíkíhi:

<sup>2</sup>—Chàna kixin tsonixja nkayakuan tí jaha rey Agripa tsoxrjanka kaín tí jië t'ekana tí sín judío. <sup>3</sup>Ó noheni kixin jaha la ó noha jína kuènte tí ley la ko tí nkehe tinkáchónki tí sín judío, la ko jaha noha nkehe tí kjuachaxín sín kichó sín. Méxra xrxjannóaha kixin tjak'etinhín jína.

### Chrónka ch'ín Pablo nkexrí kjuák'e ch'án tí ósé

<sup>4</sup>Kaín tí sín judío la ó nohe sín nkexrí k'uékjak'é tí chjasenná la ko chjasin Jerusalén tí naxa k'uéntasoána.

<sup>5</sup> Kjaxin jehe sín la ó nohe sín la kjá jína chróchrónka sín kixin tí naxa k'uén-tasoána la k'uéfariseona. A ntá tí sín fariseo a mé antsí má kjuínchexiteyéhe sín tí ley kuènte tí nkehe tinkáchónkini. <sup>6</sup> Ntá ijie sínchekitoexián jiëna kixin nínkaon tí sín judío a kixin tjéçonhan kixin Dios mé sínchexechón chojni inaá xikaha tsíchénka ch'án tí sín tsík'axrjenixinni. <sup>7</sup> Tí teyó tribu tsík'axrjenixin ch'in Israel mé tjejóçónhen sín kixin ts'ikon sín tsoxiteyá tí nkehe tsíchronka Dios. Méxra xraxinkaon sín Dios nchakotjin la ko tie. Méxra mé xikaha tjéçonhan, jaha rey Agripa, la mé xikaha nínkakonna tí sín judío ijie. <sup>8</sup> ¿Á titekákonhyará jahará kixin Dios sínchexechón chojni tsík'en?

### **Ch'in Pablo k'uénínkakonhen ch'án tí chojni tinkáchónki Ìnchéni**

<sup>9</sup> Janhan mé kjaxin k'uékjenkayáxian nchónhya nkehe k'uénínkakonhan tí sín tinkáchónki Jesús tí nkexro tsíkjixin chjasin Nazaret. <sup>10</sup> Mé xikaha kjaxin k'uékjit'a chjasin Jerusalén. Tí sín nchát'á t'etóan mé kjuanjón sín kjuachaxin kixin janhan tsochr'áxanhan ntóechiso nchónhya tí sín tinkáchónki Ìnchéni. Ntá tió k'óyán sín tí sín a mé janhan la ntáxrjan kixin ó nchoxon xikaha kónhen. <sup>11</sup> Nchónhya veces kjuíntakjasóte tí sín tinkáchónki Ìnchéni kixin chrókuítóhe sín tí nkehe tinkáchónki sín. Mé xikaha k'uékjit'a kaín xín nínko kixin imá k'uénínkakonhan tí jehe sín la xikaha k'uájichráhã sín kjónté sátsíkjí sín chjasin ókjé.

### **Chrónka ch'in Pablo nkexrí kuinkáchónki ch'án Ìnchéni**

(Hch. 9.1—19; 22.6—16)

<sup>12</sup> Méxra xra ó sákjuia janhan chjasin Damasco. Tí sín nchát'á t'etóan mé ó kjuanjón sín kjuachaxin kixin xikaha t'ahã sín xra. <sup>13</sup> A ntá tí ntia

a jaha rey chrókónoha kixin chonkixin k'uíkuan éxi ijnko xrohi t'inkaséyan kuixin nkaya nkajni antsí má fuerte la kánhyó fuerte tí xrohi kuènte yaon la tí t'inkaséyan mé k'uantatjen tí janhan la ko tí sín xríkjan. <sup>14</sup> Ntá kaín ni kjuítsínkani nonte ntá xríñghya kuínhan nixja ijnko nkexro mé nkiva hebreo nixjaxin ch'án. Ntáçro tí nkexro a kixin: “Saulo, Saulo, ¿nekuènte nínkakónna xríjtéyá tí janhan? Jahvá nchekjasóte asán kixin tjanjonkoa tí janhan. Éxi yóhe ijnko koxinta kónínkaon va tí chriáte sín va chica yo mé xikaha jaha.” <sup>15</sup> Ntá kjuánchánkiá kixin: “¿Xá nkexro jaha?” Ntá tí nkexro me kjuátehe kixin: “Janhan mé Jesús mé tí nkexro chréhe jaha. <sup>16</sup> Ijie t'aya jaha, tjak'exián totá. Janhan kjuánjuan kjuachaxin kixin k'uíkuan tí janhan ijie kixin jaha sích'ena xra. Janhan kjuéyá tí jaha kixin tsochénta chojni kixin k'uíkuan tí janhan la ko tsoçronka tí nkehe tsjákohá inaá tí xik'ikuan tí janhan inaá. <sup>17</sup> Janhan ts'ayakonhan kixin kohya nkehe sit'aha tí sín judío la ko tí sín jehya judío. A ntá jie tétóan satsjia. <sup>18</sup> Méxra tétóan sátsjia tí tjejó tí jehe sín kixin takítjenkia ikon sín kixin í ts'ajihya sín ntia sítié la ts'aji sín ntia t'inkaséyan la ko tsoçóntahya tí jínahya kjuachaxién ts'etuènen tí jehe sín. Jehe sín mé tsinkáchónki sín tí janhan. Ntá janhan ts'áyáha sín la tsiin ijie sín la ko tsi-tonhen sín tí nkehe ts'áyéhe kaín tí sín tsíkjinchetjóá Dios,” ichro Ìnchéni.

### **Ch'in Pablo kuítekaon ch'án tí nkehe tsík'ikon ch'án**

<sup>19</sup> Mé xikaha jaha rey Agripa kjuíntaxiteyáha tí nkehe k'uíkuan kuixin nkaya nkajni. <sup>20</sup> Saóxín kjuákoça tí sín síin chjasin Damasco, la ntá chr'éxin chjasin Jerusalén, la ko kuènté tí estado Judea ntá kjaxin kjuákoça tí sín jehya judío. Kjuákoça sín kixin chrókuítóhe sín ijie sín, la chrókjan sín chrókuinkáchónki

sín Dios, la ko chrókjuakoxin sín xra jína kixin chaxín ó kjuítóxinhin sín tí nkehe tinkáchónki sín. <sup>21</sup> Mé xikaha tí xra tséxinna tí sín judío a nkaxenhen nínko la tjinkaon sín chrók'óyánna sín. <sup>22</sup> Ntá kjuasáyé Dios kjuínkítsana la ntoá itjen ijie tjákoḥa kaín chojni ntsínsí la ko chojni ihyé la ninkehó k'uan-taxíanhya kuènte tí nkehe tsíchrónka tí sín tsíchrónka itén Dios la ko tí nkehe tsíchrónka ch'ín Moisés tsonhen, <sup>23</sup> kixin t'ichjánxin its'en Cristo la ko tsoxechón ch'án inaá. Tí itén ch'án éxí ijnko xrohi ts'inkaséyanxín tí sín síin ntihi la ko tí sín síin í so nación kixin tsaáxin sín.

**Ch'ín Pablo nixjeḥe  
ch'án ch'ín Agripa kixin  
chrókuinkáchónki ch'án Ìnchéni**

<sup>24</sup> Mé xikaha ichro ch'ín Pablo kixin kohya jie kjuasin ch'án ntá tí ch'ín Festo mé itsen k'uèya ch'án kixin:

—Pablo jaha la kjá tsík'ixikján. Imá tsíkjinchekuáxian mé xikaha tsíkólókokxian —ichro ch'án.

<sup>25</sup> Ntá kjuátēhe ch'ín Pablo kixin:

—Jehya tsík'ixikjánna. Jaha Festo imá tjuḡa. A ntá tí nkehe ntáxrjan la ijnko nkehe jína la ijnko nkehe chaxín. <sup>26</sup> Ntihi itjen tí ch'ín rey Agripa. Jehé ch'án mé jína nohe ch'án kaín tí nkehe a. Méxra tjenixjaha ch'án jnkojína kixin ó ñona kixin jehé ch'án ó nohe ch'an kaín nkehe kónhen kixin jehya ijnko nkehe imó kónhen tíha. <sup>27</sup> Jaha, rey Agripa, ¿á titekávan tí nkehe tsíkjako tí sín tsíchrónka itén Dios ósé? Janhan la ó ñona kixin titekávan jaha.

<sup>28</sup> Ntá kjuátēhe ch'ín Agripa ntáchro ch'án kixin:

—Ó antsíkoá chrokjuacha chrókjuachròdena kixin chrók'ónana cristiano —ichro ch'án.

<sup>29</sup> Ntá ntáchro ch'ín Pablo kixin:

—Ntáxrjan kixin á isé tsoxrjanka o á séhya la Dios mé tjinkaon kixin jehya

jahvá chrókuinkachónkia ch'an. Náhí. Kjaxin tjinkaon ch'án kixin kaín nkexro tjejótinhin chrók'óna sín éxí tí janhan kjánchó xikahya chróchóna sín cadena.

<sup>30</sup> Ntá kjuixin nixja ch'ín Pablo ntá k'uínkatjen tí ch'ín rey, la ko kjaxin tí ch'ín gobernador, la ko kjaxin tí tjan Berenice, la ko kaín xín tí chojni tjejótxaxin ntiha. <sup>31</sup> Ntá kaín sín k'uaxrjenta sín la ikjo sín kichó sín. Ntáchro sín kixin:

—Kohya jie tsíkjasin tí ch'ín a kixin chrók'uénxín ch'án la ko chrókjuak'echjinaxín ch'án ntoechiso.

<sup>32</sup> Ntá tí ch'ín Agripa ntáche ch'án tí ch'ín Festo kixin:

—Ó nchoxon chrókjuánjuan kjuachaxin sáchrókjuí tí ch'ín a tí jehe ch'án chrókjuanchahya ch'án kixin tí ch'ín imá t'etoan sinchekitoexín ijie ch'án —mé xikaha ichro tí ch'ín Agripa.

**Ch'ín Pablo sákjuí  
ch'án chjasin Roma**

**27** Ntá k'uetoan sín sátsjini nación Italia. Tí ch'ín Pablo la ko í so sín tjejóchjina a mé k'uáyéḥe ijnko ch'ín capitán mé it'in Julio. Jehé ch'án me ijnko policía kuènte tí ch'ín t'etoan Augusto César. <sup>2</sup> Ntá k'uúxenhenni ijnko ntabarco tsíkjinín nó puerto Adramitio, la ó chjina sátsji tí puerto nó estado Asia. Kjaxin tjejókoni tí ch'ín Aristarco tsíkjinín chjasin Tesalónica nó estado Macedonia. <sup>3</sup> A ntá tí yaon chr'éxin mé kjujini ti puerto chjasin Sidón. Ntá ch'ín Julio mé ikjo jnkojína ch'ín Pablo ntá chjéhe ch'án kjuachaxin kixin sátsjitsjehe ch'án tí chojni chóxin ch'án ntiha kixin tsjinkítsa sín ch'án. <sup>4</sup> Ntá chr'éxin sákjuíxinni chjasin Sidón. Ntá kjujini ijnko isla it'in Chipre la nó tja kjonni kuítóḥe tíha la imá chjéhe xrinto. <sup>5</sup> Ntá k'uatòyeni tí ntayaon chjinaxón chjasin Cilicia la ko Panfilia la ntá kjujini chjasin Mira estado Licía.



<sup>6</sup> A ntá ntiha tí ch'ín capitán, tí ch'ín k'uetuēnhen tí sín soldado a, mé k'uitja ch'án í jnko ntabárco tsíkjinín nó chjasin Alejandría sátsji nó nación Italia. Ntá ntáchro ch'án kixin tíha sátsjikoni kixin tsijjini ntiha. <sup>7</sup> Nchónhya yaon kjuíjixínni kixin imá iyó la imá xra kjuíjini chjino chjasin Gnido. Ntá naxa chjéhe xrinto tsanka ntá k'uaúsínkani chjinaxón Salmón ntá kuinkátjájáxinni chjino tí isla Creta. <sup>8</sup> Ntá xikahó imá xra k'uaúsínkani chjinó chrínta ntá kjuíjini ijnko chjasin it'in Puertos Jína chjino chjasin Lasea.

<sup>9</sup> Ntá k'uitjáyannkí nchónhya yaon, ntá ó kjuixraká tí yaon xitjahya sátsjiko sín ntabárco chrítaón ntayaon kixin ó kóchjina tí nchakuen kin. Méxra ch'ín Pablo nixjehé tí sín a. <sup>10</sup> Ntáchro ch'án kixin:

—Tinhínrá tí nkehe tsoxrjanka. T'íkuan kixin nchónhya kjuachrakon tsonhen. Sinchek'itjáyanni tí ntabárco a la ko tí nkehe tjinká la kjaxin jeheni chrók'uitjáyanni —ichro ch'án.

<sup>11</sup> A ntá tí ch'ín capitán kuente tí sín soldado a mé antsí má tjinkaon ch'án chrókuinhin tí nkehe chrónka tí ch'ín tjiko ntabárco la ko tí nkehe chrónka tí inché tí ntabárco a ntá tí nkehe ntáchro ch'ín Pablo la náhí. <sup>12</sup> Jehya jína kixin tí puerto ntahó chrók'uejóni ntá chrók'uaúsínkajia tí nchakuen kin, ichro sín. Kaín sín kjuenkayáxin sín kixin íchá jína sátsjixínni ntiha kixin ákué xitjahya chrókjuijini chjasin Fenice, ijnko puerto estado Creta nó chók'á noroeste la ko suroeste, la ntaha chrók'uejóni ntá chrók'uaúsínkajia tí nchakuen kin.

### Tí xrinto chjéhe chrítaón ntayaon

<sup>13</sup> Ntá kjuankíxin chjehe xrinto kjuixín nó sur kjánchó kánhyó fuerte ntá kjuenkayáxin sín kixin kjá jína sátsjini.

Ntá sákjuixínni ntiha kjánchó kjónté naxa sákjuíni chjinaxón tí chrínta ti isla

Creta a. <sup>14</sup> A ntá chr'éxin ikjui ijnko xrinto kjuixín noroeste k'uíntaté tí ntabárco. <sup>15</sup> La kjuankíxin xrinto sákjuíko tí ntabárco kixin tsjachahyani sátsjini tí sítjixin tí xrinto a. Ntá t'ichjánxin kuítóheni sákjuíko xrinto tí ntabárco tjejóxenhenni. <sup>16</sup> Ntá k'uaúsínkani chjino ijnko isla ntsí it'in Claudia kixin ntiha mé kánhyó tjan chjéhe xrinto. Ntá imá xra k'uitjáianni tí ntabárco ntsí t'etenixín nóton ntabárco jie. <sup>17</sup> Ntá kjuixín kjuínchek'it'ótjen sín tí ntabárco ntsí ntá imá chrakon sín ntá kjuínchenteto sín tí ntabárco jie kixin kohya nkehe tsonhen. Kjaxin tóxakonhen sín chrakon sín tsíkjiine nchesen tí ntabárco tí tsijji sín tí it'in Sirte. Ntá kuakjinjin sín tí ka chóna ntabárco ntá kuítóhe sín sátsjiko xrinto. <sup>18</sup> Ntá tí yaon chr'éxin ntá naxa imá tjan chjéhe xrinto. Ntá ik'ue sín tí nkehe sítjinká tí ntabárco a chrínta ntayaon kixin kánhyó tsoye. <sup>19</sup> A ntá tí yaon níxin a mé itjani ó kuakitsjexínni tí nkehe kuente tí ntabárco. <sup>20</sup> Isé k'uíkonhyani yaon la k'uíkonhyani konotsé kixin imá tjan chjéhe xrinto la ko kjaxin ó k'uitjáyenhenni kaín tí tjenkayáxinni kixin naxa chrókuaáni.

<sup>21</sup> Ntá ó k'uaúsínka itsjé yaon kjónehyani ntá k'uíkatjen ch'ín Pablo nixjehé ch'án kaín tí sín tjejóxenhnen ntabárco a ntáchro ch'án kixin:

—Chrókuítekáonrá tí nkehe xrjanka kixin chrókuítóheni tí estado Creta ntá chrók'uitjáyenhanyi tí nkehe tjinká tí ntabárco a. <sup>22</sup> A ntá ijie la tóxakuanhyará kixin kohya nijnko tí jahará its'enrá kixin kjónté tí ntabárco la ts'itjayan. <sup>23</sup> Ntá tí tie a mé k'uíkuan ijnko ángel tsíchr'án Dios tinkachónkia la ko t'aha xra. <sup>24</sup> A ntá tí ángel mé chrónka kixin: “Chrakonhya jaha Pablo. T'ichjánxin tsjasán tí tjen tí ch'ín César t'etoan la kjaxin Dios la tsjinkitsa jaha la ko tí sín tjejókoa kixin ts'enhya sín.” <sup>25</sup> Méxra chróchrakonhyará jahará

kíxin tí Dios tinkachónkia la chaxín nchexiteyá tíha, éxí tsíntáchro tí ángel. <sup>26</sup> Kjónté ó jehí t'ichjánxín sátsjikoni xrinto ijnko nonte jnkosiné ntayaon —ichro ch'án.

<sup>27</sup> Kjuixín k'uaúsínka iyó semana ntá ijnko tie ntá kjuíjini ijnko ntayaon it'in Adria ntá sákjuíko tí ntabárcō ijnko lado la í jnko lado tí xrinto. Ntá chjino k'áxrótjen ntá tí sín tjiko ntabárcō mé ó kónohe sín kíxin ó chjina kjuixraká sín ijnko nonte xámá. <sup>28</sup> Ntá kjuáchroa sín tí nkekjaín nínkaxín tí ntá mé chóna treinta y seis metro nínkaxín. Ntá sákjuíni kjínhya la ó xíkjachroa sín la veintisiete metro ó nínkaxín. <sup>29</sup> Imá chrakon sín kíxin ts'itjatōn tí ntabárcō itjo ntá kjuinkajin sín noó chica gancho tí nóton tí ntabárcō a kíxin ntahó tsochónhen tí ntabárcō hasta chrók'uinkaséyan. <sup>30</sup> Ntá tí sín tjiko ntabárcō kjuenkayáxin sín sáchrókjui sín ntá kjuankíxin kjuinkajin sín tí ntabárcō ntsí chrítaón ntá éxí tjínkaon sín chrókjuinkajin sín tí gancho chóna tí kja ntabárcō. <sup>31</sup> A ntá ch'ín Pablo ntáche tí ch'ín capitán la ko kaín tí sín soldado kíxin:

—A ntá tí tsitōehya tí sín i ntihi nkaxenhen ntabárcō ntá xitjahya tsaára —ichro ch'án.

<sup>32</sup> Ntá tí sín soldado a mé kóchrínjint'ō sín tí hno kuénte ntabárcō ntsí tsitōhe sín tsjiankí nta.

<sup>33</sup> Ntá chjina t'inkaséyan a ntá ch'ín Pablo nixjehe ch'án kaín tí sín síin ntiha ntáchro ch'an kíxin chrókjōne sín ichrén nkehe. Ntáchro ch'án kíxin:

—Ó k'uaúsínka iyó semana k'uejóchrinhyará la ko kjóntehyará. <sup>34</sup> Tin-hínrā t'ichjánxín chrókjōnterá ichrén nkehe tí tjínkáonrā tsaára kíxin ntihi la kohya nkexro ts'itjáyan la nijnko tí kax-íhi chóna kjará ts'itjáyan.

<sup>35</sup> Ntá xíkaha ichro ch'ín Pablo ntá kuákja ch'án ijnko niotja a la ntiha

tí tjejó kaín sín ntá kjuanchia ch'án kjuasáyé Dios ntá kóchrít'ō ch'án ntá kjuankíxin kjōne ch'án. <sup>36</sup> Ntá kóchéhe sín kaín sín kjuankíxin kjōne sín kjáxin. <sup>37</sup> Kaínni tsík'ixenhenni ntabárcō mé iyó ciento setenta y seis chojni. <sup>38</sup> Ntá kjuixín kjōne sín la kókjehe sín ntá ik'ue sín tí noa trigo a tjínká tí ntabárcō a chrínkí tí ntayaon a kíxin kánhyó tsoye tí ntabárcō a.

### Tí ntabárcō kjuixín k'uaániánkí ntá

<sup>39</sup> A ntá ó k'uínkaséyan, a ntá tí sín tjiko ntabárcō la kjuátsoanhya sín tí nonte ntá k'uíkon sín ijnko chrínta ntá. Ntáchro sín kíxin ákué tsjachahya sín sátsjiko sín tí ntabárcō ntiha. <sup>40</sup> Ntá kóchrínjint'ō sín tí hno síchroéxin tí gancho kíxin ntahó tsitōhe chrínkí ntayaon. Ntá kjuínchentá sín tí nkehe tjikoxín sín tí ntabárcō a. Ntá kjuínchek'it'ótjen sín tí ka tjiko nkayakon tí ntabárcō. A ntá tí ntabárcō kjuankíxin sákjuí chrínta ntá. <sup>41</sup> Xrínahya kjuíji ntabárcō tí iyó kójnkojiéxin ntayaon ntá ntiha kjuíkji-at'ó tí kja tí ntabárcō tí nchesen síin ntiha. Ntá í xitjahya nchekinkí ninkehó, a ntá nóton tí ntabárcō kjuankíxin síxíka kíxin imá sítji chjéhe ntá a. <sup>42</sup> Ntá tí sín soldado a mé tjínkaon sín chrók'óyán sín tí sín tjejóchjina kíxin tjínkakonhya sín kíxin ninkexró sáchrókjui ókjé. <sup>43</sup> A ntá tí ch'ín t'etuenhen tí sín soldado a mé tjínkakonhya ch'án kíxin its'en ch'ín Pablo ntá kjuanjonhya ch'án kjuachaxin. Íchá k'uetōan ch'án kíxin tí sín jína tji-taón ntá la senó sátsji sín kíxin tsjiji nonte xámá <sup>44</sup> la ko tí sín noehya tsjitaón ntá a mé sátsjiko sín ti ntabla o it'ō tí ntabárcō. Ntá xíkaha kaín ni kjuíjini tí nonte xámá la ó kuaáni.

### Itjen ch'ín Pablo tí isla Malta

**28** Ntá tió tjejóni kaín ni kuaáni ntá kónoheni kíxin tí isla la mé nchek'in sín Malta. <sup>2</sup> A ntá tí sín chjasin

ntiha mé imá jína kjuínkĩtsa sín kaín ni la kjuaka sín ijnko xrohi jié kixin imá kin kixin sít'aniá chrin. Ntá k'uèya sín kixin tsochjinani kaín ni tsochjixroheni. <sup>3</sup> A ntá ch'ín Pablo mé sákjuíkakja ch'án í so njo tsíxámá ntá kjuasinkáte ch'án tí xrohi a. Ntá xrínahya k'uaxrjenkixin ijnko konche tí xrohi a kixin imá sóa ntá xrínahya k'uísímá itja ch'ín Pablo. <sup>4</sup> Ntá tí sín chjasin ntiha mé k'uíkon sín tí konche kjtjĩankítjen itja ch'án ntá ikjo sín kíchó sín. Ntáchro sín kixin:

—Kjá tí ch'ín a la ijnko chojni tsíkjàya a kixin kjónté kuaá ch'án k'uénxinhya ch'án ntayaon la Dios la í tjinkakonhya kixin naxa tsjak'echón ch'án.

<sup>5</sup> A ntá jehe ch'án kótsjénka ch'án itja ch'án chrítaón tí xrohi kixin ntiha ts'anótjen tí konche, ntá jehe ch'an la kohya nkehe kónhen ch'án. <sup>6</sup> Ntá kaín sín tjejóchónhen sín kixin ách'e ts'atjoyé itja ch'án o ách'e its'en ch'án. Ntá kjuixin k'uéjóchónhen sín isé la k'uíkon sín kixin kohya nkehe kónhen ch'án ntá kjuítóxin sín tí nkehe kjuenkayáxin sín la ntáchro sín kixin jehe ch'án mé ijnko dios tía, ichro sín.

<sup>7</sup> Ntá chjino tí k'uéjóni a mé itjen nontee ijnko ch'ín t'etoan kuènte isla me it'in Publio. Mé jína kjuanjon ch'án kjuachaxin k'uéjóni ntøe ch'án la kjuanjon ch'an nkehe kjóneni iní yaon. <sup>8</sup> Ntá it'é tí ch'ín Publio a mé tjetsínka ch'án kixin níhi ch'án chóna ch'án sóa la ko chinjni. Ntá ch'ín Pablo sákjuítsjehe ch'án la kjuixin nixjehe ch'án Dios, ntá kjuák'etja itja ch'án tí ch'ín a ntá kuítóhe ch'án jína. <sup>9</sup> Mé xíkaha kjaxin kóchjina í so tí sín níhi síin tí isla ntá kaín sín kuítóhe sín jína. <sup>10</sup> Na ntá imá kjuikosáyehe sín ch'án. A ntá chr'éxin tió kjuixin k'uíxenhenni ntabáro inaá ntá kjuanjon sín kaín nkehe t'ichjánxinhinni sátsjikoni.

### Kjuíji ch'ín Pablo chjasin Roma

<sup>11</sup> Ntá k'uátsínka iní nitjó tjejóni tí isla ntá k'uíxenhenni ijnko ntabáro mé ntahó tsíkitohe k'uátsínkajia tí nchakuen kin. Tí ntabáro a mé tsíkjin chjasin Alejandría la ko mé chóna nkehe tsíkjanoya chóna ihnié dios Cástor la ko Pólux. <sup>12</sup> Ntá sákjuíni ntá kjuíjini puerto chjasin Siracusa la ntaha kuítóheni iní yaon. <sup>13</sup> Ntá xík'ixenhenni tí ntabáro la k'uátsínkani chjinaxón tjen ijnko nonte ntá kjuíjini chjasin Regio. Ntá tí yaon chr'éxin a ntá kjuankixin chjéhe xrinto kjuixin nó sur, ntá yaon yóxin ntá kjuíjini chjasin Puteoli. <sup>14</sup> Ntá ntiha xetani iso kíchó ni, a ntá tjinkaon sín ts'ejókoni sín ntiha. Ntá k'uéjókoni sín ijnko semana ntá chr'éxin sákjuíni chjasin Roma. <sup>15</sup> Ntá tí sín kíchó ni chjasin Roma la ó nohe sín kixin tsjijini. Ntá iso sín la xetani sín ntja chjasin Foro Apio la ko í so sín xetani sín chjasin Tres Tabernas. Tió tí ch'ín Pablo k'uíkon tí jehe sín a kjuanchia ch'án kjuasáya Dios la imá kóchéhe ch'án. <sup>16</sup> Ntá tió kjuíji sín chjasin Roma ntá tí ch'ín capitán kjuikénhen tí sín tjejóchjina, k'uáyéhe tí ch'ín jefe ts'ayakonhen ch'án. A ntá ch'ín Pablo la kuítóhe ch'án ókjé kjuák'e ch'an la ijnko soldado a k'uáyakonhen tí jehe ch'án.

### Ch'ín Pablo kjuako chjasin Roma

<sup>17</sup> Ntá k'uátsínka iní yaon ntá tí ch'ín Pablo a mé k'uíyehé ch'án kaín tí sín judío tjetoan kuènte chjasin Roma. Ntá tió kjuixin kójnkotsé kaín sín ntá ntáchro ch'án kixin:

—Kíchóni, kohya ninkehó jié kjuásian kixin chrókóninkakonna tí sín judío la jehya kixin ninkakonxian tí nkehe k'uékinkáchónki tí sín tsík'axrjenixinni. A ntá kjónté itséna sín kjuak'echjina sín tí janhan chjasin Jerusalén la ko kjuínchekjasótena tí sín romano a. <sup>18</sup> Ntá

k'uitjahya sín ninkehó jie chonta. Ntá tjinkaon sín chrók'uatjántana sín kixin k'uitjahya sín ninkehó jie chrók'uénxian.<sup>19</sup> A ntá tí sín judío a mé imá kónínkaon sín tjanchia sín jie. Ntá t'ichjánxin tsjanchiani kixin tí ch'ín César mé chrókjuincheKITOXÍN ch'án nkehe tí jie chóntani, kjónté chóntahyani ninkehó jie ts'eka tí sín tí naciÓN kuénténi.<sup>20</sup> Méxra k'uíyáhará kixin tjinkaonni ts'fkuan tí jahará la ko tsonixjāharáni kixin tinkáchónkini tí nkexo tjejóchónhen kaín tí sín israelita mé xikaha t'ikonrá kixin tjechrontetoxinni cadena ntihi.

<sup>21</sup> Ntá ntáchro sín kixin:

—K'uáyèhyani ninkehó xroon chrókjuixin Judea kuénte tí jaha la ko kuihya nijnko tí sín kichó ni judío chróntáchro sín ichrén nkehe jínahya tsíkjih'e.<sup>22</sup> Tjinkaonni chrókuinhinni nkexrí tjenkayáxian kixin ó noheni kixin itsjé chjasin t'ántaxínhin sín tí nkehe nixin tjákua —mé xikaha ichro sín.

<sup>23</sup> Ntá chr'éxin kjueyá sín ijnko yaon tsinhin sín nkehe tsochrónka ch'ín Pablo. Ntá kójnkotsé nchónhya chojni tí nchia kjuák'e ch'án. Kuenté yaon chrónka ch'án nkexrí tí kjuachaxin kuénte Dios. Nixjehé ch'án sín kixin chrókuitekaon sín tí nkehe kjuako ch'ín Jesús, la chrónkaxín ch'án kixin nkexrí nixja tí ley kuénte ch'ín Moisés la ko tí tsíkjin tí sín profeta ósé.<sup>24</sup> Ntá iso tí sín mé kuítekaon sín tí nkehe ntáchro ch'ín Pablo. A ntá í so sín na kuítekakonyha sín.<sup>25</sup> Ntá jnkokoáhya kjuenkayáxin

tí jehe sín la iso sín tjinkaon sín kixin sáchrókjui sín, ntá ch'ín Pablo mé ntáchro ch'án kixin:

—Ntoá nixja tí nkehe chénka Nchakuen Dios tí sín tsik'axrjeníxinni ósé chrónkaxín ch'ín profeta Isaías ntáchro kixin:

<sup>26</sup> Sátjia nixjehé tí chojni a kixin jehe sín kjónté tjejótinhin sín la tienxínhya sín,

la kjónté tjejótsjehe sín la t'ikonhya sín.

<sup>27</sup> A ntá asén tí chojni tí chjasin i la tsík'óna imá cha

la ntatsjon sín la tsík'ikjehé

la ikon sín la tsíchr'áto

kixin t'ikonxínhya sín

kixin tinhín sín la tjinkakonhya sín chrókuienxín sín,

la tjinkakonhya chrókuienxín asén sín.

Í tjinkakonhya sín chrókjan sín chrókuinkáchónki sín tí janhan kixin ntá janhan chrókjuintakitohá sín jina.\*\*

Mé xikaha tsíkjin ch'ín Isaías.<sup>28</sup> Méxra chrókónohará jahará kixin ijie tí sín jehya judío me ts'áyéhe sín tí nkehe tsjanjon Dios tsaáxin sín kixin jehe sín mé tsinhin sín.

<sup>29</sup> Ntá xikaha ichro ch'ín Pablo ntá tí sín judío sákjuí sín la tinkákjo sín kichó sín.

<sup>30</sup> A ntá ch'ín Pablo kuítóhe ch'án tí nchia tsíkjen ch'án iyó nánó. La kjuanjon ch'án kjuachaxin k'uéjó tí sín kjuíjitsjehe ch'án.<sup>31</sup> La kjuako ch'án tí kjuachaxin kuénte Dios la ko kjuako ch'án kuénte Ìnchéni Jesucristo. La kohya ninkexró k'uínkákonhen tió kjuako ch'án. Ó tjen.

\*\*28:27 28.26–27 Isaías 6.9-10

## Tí xroon ikjin ch'in Pablo chr'énhen ch'án tí sín romanos

### Ch'in Pablo ikjin xroon k'uáyéhe tí nínko chjasin Roma

**1** Janhan Pablo mé t'ahá xrá Jesucristo mé kjian tí xroon i. Kjueyána Dios kixin sít'ahá ch'án xrá tsjàkua tí tan jina tsaáxinni.

<sup>2</sup>Tíha mé tsintácho Dios senó kixin tsoxiteyá éxi nixja tí xroon nixjxin tí sín tsíchronka itén ch'án ósé. <sup>3</sup>Tí tan a mé chrónka nkexrí tjen Ìnchéni Jesucristo Xjeen Dios. Jehe ch'án mé tsík'óna ch'án chojni k'uaxrjenixin ch'án tí sín tsík'axrjenixin tí rey David. <sup>4</sup>Tí kjuachaxin jié mé kjuakoxin kixin jehe ch'án mé chaxín Xjeen Dios kixin ó xechón ch'án la chóna ch'án Nchakuen Dios imá tje-toan. <sup>5</sup>Kjuasáyé Jesucristo k'uáyéheni kjuachaxin kixin sich'ehe ni ch'án xrá sátsjichronkaxinni itén ch'án kixin kaín xín chojni chónhya ch'án kuenté chjas-intajni chrókuitekaon sín ch'án la ko chrótjuèhe sín ch'án. <sup>6</sup>Jahará k'uék'e-jorá éxi tjejó tí jehe sín, a ntá jie la kjueyará Dios kixin chrókuítekáonrá Jesucristo.

<sup>7</sup>Janhan ikjian tí xroon chr'anhánrá kaín rá tjejorá chjasin Roma. Tjuàhará Dios la kjueyará ch'án kixin tjóá chrók'uejorá. Kjuasáyé It'éni Dios la ko Ìnchéni Jesucristo kixin kjuanjon ch'án kjuaxróxin k'uayéherá.

### Ch'in Pablo tjinkaon chrókjuitsjehe ch'án chjasin Roma

<sup>8</sup>Xrankíxixín kjuachaxién Jesucristo tjánchàxian Dios kjuasáya kixin jahará ó kuítekáonrá ch'án la ko nkuíxín chjasintajni nixja sín nkexrí tinkachónkirá ch'án. <sup>9</sup>Dios, tí nkexro

t'ahá xrá kaín asenná xrjanka tí tan jina kuènte Xjeen ch'án, mé nohe ch'án kixin xráxín xráxinkavan tí jahará tíó nixjahá ch'án. <sup>10</sup>Xráxín tjáncháha Dios kixin tí chrókjuanjon ch'án kjuachaxin la chrókjuasántsjahará. <sup>11</sup>Kixin tjínkavan chrókjuasántsjahará tí jahará kixin chrókjuínkítsa tí jahará kixin chrók'uitjará jina nkexrí chrók'uejorá ntoá. <sup>12</sup>Me xikaha tsocháhará la ko tsochána kixin jnkokoá tinkáchónkini Ìnchéni, jahará la ko janhan.

<sup>13</sup>Kíchóni, tjínkavan chrókónohará kixin nchónhya veces tjínkavan chrókjuásantsjahará kjánchó naxá xitjahya tsjasán. Tjínkavan chrókjuasán kixin chrókjuít'a xrá kuènte Ìnchéni kixin chrókjuachani nchónhya chojni chrókuinkáchónki Dios éxi kjuít'a xrá í so chjasin naxá chónhya sín Dios. <sup>14</sup>T'ichjánxin tsjakoá kaín chojni, á chojni griego o á chojni jehya griego o á chojni nohe o á chojni noehya. <sup>15</sup>Mé xikaha xrá ó tjéchonhan chrókjuasán chrókjuákohará tí tan tsaáxinrá tí jahará tjejorá chjasin Roma.

### Tí kjuachaxin kuènte tí tan jina

<sup>16</sup>Tósuànahya xrjanka tí evangelio kixin táha ijnko tan jina kixin chóna kjuachaxin kuènte Dios chrókuaáxin kaín xín tí chojni chrókuitekaon, mé saxín tí sín judío la ko kjaxin tí sín jehya judío. <sup>17</sup>Kixin tí tan jina kuènte Dios tjakuexin tí jeheni kixin chrókótjuáxin ijíeni kixin tinkáchónkini ch'án la jehó ch'án tinkáchónkini. Exí ntácho xroon itén Dios kixin: "Tí nkexro kótjóá kixin kuítekaon sín Dios mé táhó ts'ejóchónxin sín."<sup>††</sup>

### Tí jie tjasin chojni

<sup>18</sup>Dios tjen nkaya nkajní mé tsonínkakonhen ch'án tí sín jínahya

<sup>††</sup>1:17 Habacuc 2.4

tjasin jie, mé sinchekjasóte sín ch'án. Tí jie jínahya tjasin sín mé t'inkákonhen kixin chrókónohe sín tí nkehe jína chaxín. <sup>19</sup>Jehe sín ó nohe sín jína nkexrí tjen Dios kixin jehe ch'án kjuakuèxin ch'án tí jehe sín. <sup>20</sup>Tí kjuachaxin kuènte Dios kjónté t'ikonhyani la kjánchó noexínni kixin tí nkehe kjuích'éna ch'án. Kixin tí naxa k'ónahya chjasintajni kónoxín kixin jehó ch'án mé Dios t'etōan la ko chóna ch'án kjuachaxin jnkochrín. La ntá tí sín jínahya xitjahya tsontácho sín kixin k'uénoehya sín. <sup>21</sup>Kjónté nohe sín kixin xikaha itjen Dios la tjikosáyehya sín ch'án la ko ni tjanchehya sín ch'án kjuasáya. Tjenkayáxin sín tí nkehe ninkehó sínkíhya kixin jínahya asén sín la tí sítié ó kuítóhe sín. <sup>22</sup>Kjónté ntácho sín kixin imá nohe sín kjánchó imá lontj sín kixin antsí kjuasin sín jie. <sup>23</sup>Ǻ ntá ó kjuixin kjuinkí sín tí nkehe tinkáchónki sín la ko kuítékakonhya sín tí kjuachaxién Dios itjen jnkochrín, t'enhya. Ǻ ntá ijie tinkáchónki sín tí nkehe tsíkjanoya tóyóhe chojni it'en. Kjaxin tinkáchónki sín koxroxe tsíkjanoya la ko konche la ko iko chóna noó toté.

<sup>24</sup>Ǻ ntá xikaha Dios kuítóhe ch'án tí jehe sín kixin chrókjuich'e sín tí nkehe jínahya tjenkayáxin sín ntá xikaha ch'e sín ijnko nkehe chrókósuèxin sín ch'ehe kichó sín <sup>25</sup>kixin kuítékakonhya sín tí nkehe chaxín kuènte Dios, a ntá tí nkehe jínahya mé kjueyá sín. Kjuích'éna sín dios kuènte sín tí nkehe tsíkjich'éna Dios. Ǻ ntá tí nkexro kjuích'éna tí nkehe la titekakonhya sín. Jehe ch'án mé chrókjuancheheni ch'án kjuasáya jnkochrín kixin jehe ch'án mé kaín tí nkehe sínn mé kuènte ch'án. Amén.

<sup>26</sup>La ntá xikaha kjuích'e sín ntá Dios kuítóhe ch'án tí jehe sín kixin chrókjuich'e sín tí nkehe chrókósuèxin sín chrókjuich'e sín. Kjónté tí chojni

chjin la kuítóhe sín tí ichjin sín la ntá kjuích'éna sín asén sín chojni ntoa. <sup>27</sup>Ǻ ntá kjaxin xikaha tí chojni ntoa kuítóhe sín chróchóna sín chojni chjin la tjinkaon sín tí nkehe ntoáhya. La ntá ch'e sín nkehe chrókósuèxin sín ch'ehe kichó sín jnkokón ntoa sín. Mé xikaha mé tí cuerpo kuènte sín mé tsjasótéxin sín tí jie kjuasin sín.

<sup>28</sup>Tjinkakonhya sín tsoxraxinkaon sín Dios ntá jehe ch'án mé kuítóhe ch'án tí jehe sín kixin xikaha tsjenkayáxin sín tí nkehe jínahya kixin sich'e sín tí nkehe chrókjuich'ehya sín. <sup>29</sup>Nchónhya jie chóna sín mé tí nkehe ntoáhya ch'e sín, la tjinkaon sín chrókuakja sín í jnko chojni chjin ókjé, la ko tí nkehe jínahya ch'e sín, la ko tjinkaon sín jehó sín chróchóna sín itsjé nkehe, la ko imá tjasin sín jie, la ko jehe sín chjinoxín-hin sín, la ko tjinkaon sín chrók'óyán sín kichó sín, la ko itje sín kjuanínkaon, la ko ch'ia sín la ko jínahya sín xriko sín kjuach'ia. <sup>30</sup>T'ántaxinhjin sín kichó sín la ko nínkakonhen sín Dios, la ko jehó sín chrók'uetōan sín, la ko nchehnke sín, la ko jehó sín ch'éna sín nkehe jínahya tjasixín chojni jie, la ko tjikosáyehya sín it'é sín la ko iné sín. <sup>31</sup>Tienxín-hya sín la nchexiteyáhya sín nkehe nixja sín, la ko tjuèhya sín kichó sín, la ko tjinkakonhya sín sinchek'itjáyenhen sín ichrén jie kjuasinhin kichó sín, la ko tikonóehya kichó sín. <sup>32</sup>Jehe sín ó nohe sín jína kixin nkexrí k'uetōan Dios la jehe sín ó nohe sín kixin tí jie kjuasin sín chrók'uenxín sín, la kjónté xikaha ó nohe sín, la naxa tjasin sín jie la kjaxin chéhe sín chrók'uiikon sín ókjé nkexro chrókjuasin jie xikaha.

### Dios nchekitōexín ch'án tí jie tjasin chojni

**2** Mé xikaha jahará xitjahya tson-táchrorá kixin chontahyará jie a ntá tékará jie tí í so sín tjasin jie. Ǻ ntá

tí xikaha ch'erá la jahará xritjéyará nkexrí chrókjuasótexínrá kjaxin kixin jahará jnkokón jie tjásinrá. <sup>2</sup>Ó noheni kixin ntoá sinchekitōexín Dios tí jie kjuasin chojni kixin sinchekjasóte ch'án tí sín xikaha tjasin jie. <sup>3</sup>Á ntá jahará la tékará jie í so chojni ntá jahará kjaxin la xikaha jnkokón jie tjásinrá. ¿Á tjenkayáxinrá kixin tsjachará tsinkeherá tí sinchekjasótiará Dios ní? <sup>4</sup>¿Á kjoniehérá tí kjuaxróxin tsjéjehya tjanjon Dios kixin tjechónhen ch'án naḡa nínkakuanhyará ch'án? Á ntá jahará la kuiénxinhyará kixin Dios tjuàhará kixin tjinkaon ch'án chrókui-tohérá tí nkehe jínahya tjenkayáxinrá. <sup>5</sup>Kjánchó jahará imá icha asánrá, tjinkákonhyará chrókui-tohérá tí nkehe jínahya tjenkayáxinrá, a ntá antsí má nchek'ánkírá tí nkehe jínahya tsjasótexínrá tí yaon tsjixixín tió tsonoxín kixin sinchekjasóte Dios chojni. <sup>6</sup>Jehe ch'án mé tsjenkehe ch'án jnkjojnko chojni nkehe tí xrā tsíkijich'e sín. <sup>7</sup>Tsjanjon ch'án kjuachón ts'áyéhe tí sín tjejá sín tí nkehe náxrjón la ko tí kjuachaxin ts'itjáyanhya la ko xráxin kjuich'e xrā jína. <sup>8</sup>Á ntá tsonínkaon Dios sinchekjasóte ch'án kaín tí sín nchehnke la ko tí sín tjinkakonhya chrókjuich'e sín tí nkehe jína. Á ntá náhí, la íchá má kóxrjínhin sín kjuich'e sín tí nkehe jínahya. <sup>9</sup>Mé xikaha tsjasóte sín la ko kjuaxróxinhya tsonhen kaín tí sín kjuich'e tí nkehe jínahya, mé senó tí sín judío la ko kjaxin tí sín jehya judío. <sup>10</sup>Á ntá Dios mé tsjanjon kjuachaxin la ko tsjanjon ch'án kjuaxróxin la ko tsjikosáyehe ch'án kaín tí sín kjuínchexiteyéhe ch'án kjuich'e tí nkehe jína, mé senó tí sín judío la ko kjaxin tí sín jehya judío.

<sup>11</sup>Dios la t'ikon kixin kaín chojni la jnkokón sínkí. <sup>12</sup>Kaín tí sín tjasin jie kixin noehya sín tí ley tsíkjin ch'ín Moisés la kjónté chónhya sín tí ley la its'en sín. Á ntá tí sín ó nohe tí ley

tsíkjin ch'ín Moisés ntá tjasin sín jie, la tí ley a mé tsjanchia jie tsjasótexín sín. <sup>13</sup>Jehya tí sín ó chrókuinhón tí ley la ó chrókótjuáxin ijje sín. Náhí. Tí sín sinchexiteyéhe sín tí nkehe k'ue-toan Dios mé tsotjuáxin ijje sín. <sup>14</sup>Á ntá tí sín jehya judío chóntahya sín tí ley t'etuenhen sín la ntá tió jehó sín chrókjuinchexiteyéhe sín éxí nixja tí ley la jehí jehó sín t'etuenhen asén sín. <sup>15</sup>Kixin tí kjuínchexiteyá sín ch'e sín tí nkehe jína mé tjakoḡin sín kixin asén sín xraxinkakonxin sín tí nkehe ntoá la ko asén sín tjanchankíhi sín á jína tjejó sín o náhí. <sup>16</sup>Itsi tí yaon la Dios mé sinchekitōexín kjuachaxin Ìnchéni Jesucristo kaín nkehe imó kjuich'e chojni éxí nixja tí tan jína tjákua janhan.

### Tí sín judío la ko tí ley tsíkjin ch'ín Moisés

<sup>17</sup>Á ntá jahará ntáchrórá kixin jahará judíorá la tinkachónkirá tí ley tsíkjin ch'ín Moisés la ko nchehnkerá kixin tinkachónkirá Dios. <sup>18</sup>Ó nohará tí nkehe tjinkaon Dios la ko tí ley ó kjuakoḡhará kixin chrókjuéyará tí nkehe jína. <sup>19</sup>Ihnkerá kixin nohará tsjákohérá tí sín t'ikonhya la ko jahará mé xrohi ts'inkáséyanxín tí sín ixri sítié, ichrorá. <sup>20</sup>Ntáchrórá kixin nohará tsjákohérá tí sín noehya la ko tsjínkĩtsará tí sín tiénxínhya kixin jahará chontará tí ley chrónka kjuaxrexinkaon jína la ko tí nkehe chaxín, ichrorá. <sup>21</sup>Jahará tjákohérá í so chojni, a ntá jahará, ¿nkekuèté tjákoéhyará asánrá xikaha? Jahará tjákohérá chojni kixin chrókueéhya sín, a ntá jahará la, ¿nkekuèté teerá? <sup>22</sup>Ntáchrórá kixin xitjahya tsochóntha chojni yaá chojni chjin, a ntá jahará la, ¿nkekuèté xikaha ch'erá? Ntáchrórá kixin titekákonhyará tí nkehe tsíkjanoya, kjánchó jahará, ¿nkekuèté teerá tí nkehe tjete síin nkaxenhen nínko?

<sup>23</sup>Nchehnkerá kixin chontará tí ley, a ntá jahará chontahyará kjuasáyé Dios kixin kjuínchexiteyéhýará éxí k'ueṭoan tí ley. <sup>24</sup>Ntoá ntáchro tí xroon itén Dios kixin: “Tí sín jehya judío la t'ántaxínhìn sín Dios kixin tí ijíará.”

<sup>25</sup>A ntá tí chaxín kjuínchexiteyárá tí ley tsíkjin ch'ín Moisés la ntá jehya chónkó tsíkará xroye. A ntá tí kjuínchexiteyéhýará tí ley la éxí tsíkahyará ninkehó xroye. <sup>26</sup>A ntá tí sín tsíkahya xroye kjánchó titekaon sín nkexrí t'et'oan tí ley la tjejó sín éxí ó tsíka sín xroye kjónté chaxínhya chónṭa sín. <sup>27</sup>A ntá tí nkexro kuáhya xroye tí cuerpo chónṭa kjánchó nchexiteyéhé tí ley, mé jehe sín tsjanchia sín jie tí jahará kixin jahará kuítekákonhyará kjónté chontará tí xroon nixja tí ley la ko kjónté ó tsíkará xroye. <sup>28</sup>A ntá tí xíkaha la chaxínhya judío jahará kixin ó ntója ó chontará xroye la chaxínhya tsíkará xroye kixin chrítaón cuérporá ó, chontará. <sup>29</sup>A ntá tí chojni chaxín judío la t'ichjánxìn chróchónṭa sín xroye nkaya asén sín. Jehya tí ley chrók'ueṭoan xíkaha chrókonhen. Náhí. Táha la Nchakuen Dios. Jehya kixin chojni chrókóxrjínhìn kixin ó nchoxon. Náhí. Dios mé tsóxrjínhìn kixin nchoxon tíha.

**3** ¿A ntá nkehe tsonhen kixin ntáchro sín kixin judío sín la ko nkehe tsonhen kixin tsíka sín xroye? <sup>2</sup>Chaxín xíkaha jína kixin Dios kjuanjon tí itén ch'án saoxín k'uáyéhé tí sín judío kixin chrókjuinchexiteyá sín. <sup>3</sup>A ntá ¿nkehe tsonhen tí jnkójín tí jehe sín chrókjuinchexiteyáhya sín? Kjónté xíkaha chrókjuich'e sín la, ¿á chrókuítóhe Dios chrókjuinchexiteyáhya ch'án tí nkehe tsíntáchro ch'an? <sup>4</sup>Kjá náhí. Dios la sinchexiteyá kaín nkehe tsíntáchro ch'án kjónté kaín chojni

chrókjuich'ia. Ntáchro xroon itén Dios kixin:

Tsontáchro chojni kixin ntoá tí nkehe ntáchroa.

Tíha mé tsjachaxian tí tsjanchia sín jie.††

<sup>5</sup>Tí jie chóntani mé tjakoxìn kixin Dios mé nohe nkexrí sinchekitoexín ch'án ijíé chojni. ¿A ntá nkehe chróchroni? ¿Á ntoáhya chrókjuich'e Dios kixin chrókjuinchekjasóteni ní? (A ntá janhan nixja éxí nixja chojni ó.) <sup>6</sup>Kjá náhí. A ntá tí jehya ijnko nkexro jína tí jehe ch'án, ¿ntá nkexrí chrókjuinchekitoexín ch'án ijíé chojni chjasintajni?

<sup>7</sup>A ntá tí chrókjuínkítsa tí kjuach'ia kuèntana kixin chrókónoaxínrá tí nkehe chaxín kuènte Dios, ¿a ntá nkekuènté ts'ekaráni jie kixin janhan mé ijnko chojni chónṭa jie? <sup>8</sup>Tí xíkaha la, ¿á chrókjuich'eni tí nkehe jínahya kixin ntá chrókui tí nkehe jína? Mé xíkaha ichro iso chojni t'ekani jie kixin xíkaha tjakoni, ichro sín. Tí sín a chrókjuasóte sín kixin xíkaha ichro sín.

### Kaínni chóntani jie

<sup>9</sup>¿Ntá nkexrí? Jeheni judíoni la, ¿á antsí má tjeoanni, a ntá tí sín í so la, á náhí? Kjá náhí. Kixin kaín ni chojni judíoni la ko tí sín jehya judío mé kaín ni kjuínchexiteyéhèni tí jie kjuasinni.

<sup>10</sup>Ntáchro tí xroon itén Dios kixin:

Kohya ninkexró chrókjuich'e tí nkehe jína, la kohya nijnko chojni.

<sup>11</sup>Kohya ninkexró tienxín, Kohya ninkexró chrókjueyá Dios.

<sup>12</sup>Kaín chojni k'uék'aji sín tí ntja jínahya la ko kaín chojni jnkokón k'uájí sín ntoáhya,

kohya ninkexró chrókjuich'e tí nkehe jína la kohya nijnko chojni.†††

<sup>13</sup>Tí isin chojni la éxí tòye tsíxrankehe tsíxravá chojni

††3:4 Salmo 51.4

†††3:12 3.10–12 Salmo 14.1–3, Salmo 53.1–3



kíxin tí nejen chojni ch'iyaxín.  
 La tí veneno kuènte konche chón̄ta ir'va chojni.<sup>§§</sup>  
<sup>14</sup>Tí ir'va chojni tsíkaón nkehe jínahya la ko kjuanínkaon.\*  
<sup>15</sup>Xritinká sín kíxin tjinkaon sín chrók'óyán sín chojni.  
<sup>16</sup>Tí nt̄ia k'uáji sín tíó xíkaha kjuích'e sín mé kjuínchek'itjáyan sín kaín kjuaxróxin k'uéchénta ókjé chojni.  
<sup>17</sup>Chón̄hya sín tí nt̄ia tjanjon kjuaxróxin†  
<sup>18</sup>kíxin kjuenkayáxinhya sín chróchrakonhen sín Dios.\*  
 Mé xíkaha ntáchro itén Dios.

<sup>19</sup>Ó noheni kíxin kaín tí nkehe nixja tí xroon chón̄ta tí ley mé k'uetuenhen kaín tí sín tinkáchónki tí ley kíxin ntá kaín chojni chjasintajni chrótáni sín kíxin kaín chojni tsjasóte kíxin Dios mé sinchekitoxén ijié kaín chojni. <sup>20</sup>Kíxin ninkexró chrókuacha chrókótjuáxin ijié sín kíxin chrókjuinchexiteyéhe sín tí nkehe t'et̄oan tí ley. Tí ley la jehó ch'e xrā tsoxoxénni kíxin chón̄tani jje.

**Tsaáxinni kíxin tinkáchónkini Cristo**

<sup>21</sup>Á ntá jehya tí ley chrókuaáxinni. La ntá ó kónoxín nkexrí Dios tsaáxinní la kjaxin tí xroon chón̄ta ley la ko tí nkehe nixja tí sín profeta la ó nixja xíkaha. <sup>22</sup>Tsojtjuáxin ijiéni kíxin titekaonni Jesucristo kíxin kaín chojni chrókuaáxin tí tsitekaon sín tí jehe ch'án kíxin t'íkon ch'án kíxin jnkokón tsjehe kaín chojni. <sup>23</sup>Kíxin kaín xín chojni kjuasin jje la k'uáyèhya sín tí kjuachaxin chrókuaáxin sín. <sup>24</sup>Á ntá kjuasáyé Dios kíxin k'uenyákonhenni Cristo Jesús la kótjuáxin ijiéni. <sup>25</sup>Dios mé ichr'án ch'án Cristo, kuámá ijiéni, k'uenyákonhenni

ch'án kíxin chrókuinkáchónkini ch'án ntá chrókuaáxinni. Mé xíkaha kjuích'e Dios kíxin kjuakoxin ch'án kíxin ntoá kjuenkayáxin ch'án kíxin kónínkakonhya ch'án kjónté nchónhya jje tsíkjasinni senó. <sup>26</sup>Xíkaha kónhen kjuakoxin Dios kíxin jína ch'án ijie la naxā tjechónhen ch'án sinchetjóá ch'án ijié tí sín kuítekaon Jesús.

<sup>27</sup>Á ntá ¿nkekuènté chrókjuinchehnkeni? Xitjahya sinchehnke chojni nkayakon Dios kíxin jehya kíxin kjuínchexiteyéheni tí nkehe k'uet̄oan tí ley ntá chrókuaáxinni. Náhí. Kíxin Ìnchéni kuítekaonni ntá kuaáni. <sup>28</sup>Mé xíkaha ó noheni kíxin tsotjuáxin ijiéni tí tsitekaonni Dios kíxin Dios tahya cuenta á kjuínchexiteyéheni tí nkehe k'uet̄oan tí ley.

<sup>29</sup>¿Xá Dios mé kuènte tí sín judío ó? ¿Á kjaxinhya Dios kuènte tí sín jehya judío? Kjá kjaxin Dios mé kuènte tí sín jehya judío. <sup>30</sup>Kíxin kohya í jnko Dios la jehe ch'án sinchetjóá ch'án ijiéni kíxin tinkáchónkini ch'an la tahya ch'an cuenta á chón̄tani xroye o náhí. <sup>31</sup>Á ntá tí tinkáchónkini Ìnchéni, la ¿á í chrókjuinchexiteyáhyani tí ley? Kjá náhí. Íchá ant̄sí má jína chrókjuinchexiteyéheni tí ley.

**Tí kjuakoxin ch'ín Abraham**

**4** ¿Nkehe tsixroni kíxin nkehe k'uitja ch'ín Abraham, tí nkexro k'uaxrenjéxinni ósé? <sup>2</sup>Ntá ch'ín Abraham tí chrókótjuáxin ijié ch'án kíxin tí xrā kjuích'e ch'án ntá chrókóhnke ch'án, kjónté jehya nkayakon Dios. <sup>3</sup>Á ntá ntáchro xroon itén Dios kíxin: “Ch'ín Abraham kuítekaon Dios ntá táhó kuaáxin ch'án

§§3:13 Salmi 5.9, 140.3

\*3:14 Salmo 10.7

†3:17 Isaías 59.7-8

\*3:18 Salmo 36.1

la ko kótuáxin ijíe ch'án.<sup>4</sup> Jnkojín chojni kjuích'e xra la jehya k'uáyéhekoá ch'án tí chichaon. Náhí. Táha la tí xra kjuích'e ch'án mé kjuacha ch'án.<sup>5</sup> A ntá kjónté jnkojín chojni kjuích'ehya ninkehó xra ntá chrókuitekaon ch'án Dios a ntá Dios la sinchetjóá ch'án kjónté tí nkeexo chóna jie, kixin tí kuítekaon ch'án Dios la táhó mé kuaáxin ch'án.<sup>6</sup> Mé kjaxin tsíntáchro ch'ín David kixin náxrjón tí nkeexo kótjóá kixin Dios kuáhya kuentá nkerí jie tsíkjasin ch'án.<sup>7</sup> Ntáchro ch'ín David kixin:

Náxrjón tjejó tí nkeexo kjuíncheyaon Dios kjónté jínahya kjuích'e sín la kjuakjìn ch'án ijíe sín.

<sup>8</sup>Náxrjón tjejó tí nkeexo kixin Ìnchéni kuáhya ch'án kuentá tí jie k'uéchóna sín.<sup>8</sup>

<sup>9</sup>¿Á jehó tí sín ikuá xroye la náxrjón tjejó sín o á kjaxin náxrjón tjejó tí sín chónahya xroye? Ó chrónkani kixin Dios la kuikonóhe tí ch'ín Abraham kixin kuítekaon tí jehe ch'án la táhó mé kótuáxin ijíe ch'án.<sup>\*\*</sup> <sup>10</sup>¿A ntá nkesá tsíkjincheyaon Dios tí ch'ín Abraham? ¿Á ó tsíka ch'án xroye o naxa náhí? Kjá naxa náhí. Senó tsíkjincheyaon Dios tí jehe ch'án.<sup>11</sup> Ntá chr'éxin ch'ín Abraham ikuá ch'án tí xroye éxí ijnko sello kjuakoxin Dios kixin ó kótuáxin ch'án kixin kuinkáchónki ch'án Dios. Kixin ntá xikaha ts'óna ch'ín Abraham xjeen kaín chojni tinkáchónki Dios, kjónté chojni tsíkahya xroye. Ntá kjaxin jehe sín la Dios sinchetjóá ijíe sín.<sup>12</sup> La ko jehe ch'ín Abraham mé ts'axrjeníxin ch'án kaín tí sín tsíka xroye kixin ntá chrókuinkáchónki sín éxí kuinkáchónki

tí jehe ch'án kjónté naxa tsíkahya ch'án xroye.

### Tí nkehe tsíntáchro Dios la tsoxiteyá kixin tinkáchónki sín tí jehe ch'án

<sup>13</sup>Dios tsíntáche ch'ín Abraham kixin jehe ch'án la ko tí sín ts'axrjeníxin ch'án ts'áyéhe sín chjasintajni ts'ejó sín. A ntá tí nkehe ts'áyéhe ch'ín Abraham la jehya kixin kuítekaon ch'án tí ley. Náhí. Ts'áyéhe ch'án tíha kixin kuítekaon ch'án Dios la ntá Dios mé kjuínchetjóá ijíe ch'án.<sup>14</sup> A ntá tí jehó tí sín tsíkjinchexiteyéhe tí ley ó chrók'uáyéhe sín tí nkehe chrókjuanjon Dios, a ntá tí nkehe tinkáchónkini la ó chrókóchónkó xikaha la ko tí nkehe tsíntáchro Dios la kjá ninkehó sínkíhya tí xikaha.<sup>15</sup> Kixin tí ley la tjikao kixin tsjasótéxin chojni, a ntá tí chrókókohya ley la chrókókohya nkehe chrókjuanchia jie.

<sup>16</sup>Méxra tí nkehe tsíntáchro Dios la kjuasáyé ch'án tsjanjon ch'án kixin kuinkáchónki ch'ín Abraham tí jehe ch'án la ntá Dios sinchekitonhen tíha kaín tí sín tsík'axrjeníxin ch'án. Jehya jehó tí sín tinkáchónki tí ley chrók'uáyéhe sín tí nkehe tsjanjon Dios. Náhí. Kjaxin tí sín tsítekaon éxí kuítekaon ch'ín Abraham mé ts'áyéhe sín tíha. A ntá jehe ch'án mé k'óna ch'án it'é kaín ni.<sup>17</sup> Éxí nixja xroon itén Dios kixin: “Janhan kjuánjuan kjuachaxin kixin jaha ts'óna it'é nchónhya chojni chjasintajni.”<sup>††</sup> Mé xikaha tjetsjehe Dios kixin jína kuítekaon ch'ín Abraham tí jehe ch'án. Tí Dios a mé sinchexechón tí chojni tsík'en la ko t'etqan ch'án kixin ts'óna tí nkehe naxa kohya.

<sup>18</sup>Kjónté k'uéchónahya ch'ín Abraham xjeen ch'án la kuítekaon ch'án

<sup>4</sup>4:3 Génesis 15.6

<sup>5</sup>4:8 4.7–8 Salmo 32.1–2

<sup>\*\*</sup>4:9 Génesis 15.6

<sup>††</sup>4:17 Génesis 17.5

la chónhen ch'án kixin ts'óna ch'án it'é nchónhya chojni éxi tsíchronka Dios kixin xikaha nchónhya chojni ts'axrjeníxin ch'án. <sup>19</sup> Ch'ín Abraham k'uéchóna ch'án chjina ijnko ciento nánó la kjánchó k'uítjáyenhya ch'án tinkáchónki ch'án Dios, kjónté jehe ch'án la ko tjan Sara mero its'en sín la ko ó má táda nána sín kixin naxa chróhóna sín xjeen sín. <sup>20</sup> Ch'ín Abraham la kóxakuenhya ch'án la ko chrakonhya ch'án kixin tí nkehe tsjanjon Dios. Náhí. Íchá antsí má kuinkáchónki ch'án Dios la ko kjuanchehe ch'án kjuasáyé Dios. <sup>21</sup> Ó nohe ch'ín Abraham kixin Dios chóna kjuachaxin sinchexiteyá kaín nkehe tsín-táchro ch'án. <sup>22</sup> Dios k'uíkon kixin jehe ch'ín Abraham kuítekaon ch'án ntá Dios kjuínchetjóá ijíé ch'án.

<sup>23</sup> La jehya kixin tsík'óna tí xroon kixin tí ch'ín Abraham ó. <sup>24</sup> Náhí. Tsíkjin sín xroon kixin kjaxin jeheni chrókótjuáxin ijíéni kixin tsitekaonni Dios. Tíhi mé tí nkexro kjuínchexechón Ìnchéni Jesucristo. <sup>25</sup> Jehe ch'án mé k'uenyákonhenni ch'án kixin tí jie chóntani. Ntá xechón ch'án inaá kixin tsotjuáxin ijíéni kixin ó kuítekaonni tí jehe ch'án.

### Kótjuáxin tí jie chóntani

**5** Kótjuáxin tí jie chóntani kixin tinkáchónkini Cristo la kjuaxróxin ts'ejókoni Dios kixin k'uenyákonhenni Ìnchéni Jesucristo. <sup>2</sup> Kjuasáyé Cristo kixin jína tsochjineheni Dios kixin tinkáchónkini ch'án ntá ts'áyéheni kjuachaxin kuènte ch'án. Ntá tí kjuachaxin la jína tsjinkítsa kixin jína ts'ejóni la ko tsochéheni ts'ejóhónhenni kixin ntá tsjintaxín ts'áyéheni tí kjuachaxin jíé kuènte Dios. <sup>3</sup> Kjaxin jehya táhó. Náhí. Kjaxin tsochéheni kjónté nchónhya nkehe tsohenni kixin ó noheni kixin xikaha tsohenni kixin ntá ts'itjani tsonínkakonhyani. <sup>4</sup> A ntá tí xikaha jína chrók'uejóni ntá tsjachani

kixin jína ts'ejóhónhenni. <sup>5</sup> A ntá tí tjejóhónhenni la tósuèhyani kixin Dios imá tjuèheni ch'án la tí Nchakuen ch'án kjuanjon ch'án mé nchechéhe asénni.

<sup>6</sup> Tí jehóni xitjahya chrókuaáni. A ntá tió ikui Cristo la k'uenyákonhenni ch'án kixin tí jie chóntani. <sup>7</sup> Kjá ninkexró chróntáchro chrók'uenyákonhen sín í jnko chojni kjónté ijnko chojni imá jína tjuèhe kichó. Kohya nkexro xikaha chrókjuich'e. <sup>8</sup> A ntá Dios mé kjuakox-jin kixin imá tjuèheni ch'án kixin kjónté naxa chóntani jie la Cristo k'uenyákonhenni. <sup>9</sup> A ntá Dios mé kjuínchetjuáxin ch'án ijíéni kixin Cristo k'uenyákonhenni ch'án ntá ó noheni kixin jehe ch'án tsaáxinni ch'án kaín tí nkehe chrókjuasó-texínni. <sup>10</sup> Kjónté naxa k'uenínkakonhenni Dios la jehe ch'án mé kjuanjon ch'án kjuaxróxin kixin k'uenyákonhenni tí Xjeen ch'án. A ntá chaxín tsaáxinni ch'án kixin tjechón ch'án la ntá ijie kjuaxróxin tjejókoni ch'án. <sup>11</sup> La jehya chrókótíhó. Kjaxin tsochéheni kixin tinkáchónkini Dios kixin kjuasáyé Ìnchéni Jesucristo kixin Cristo chón-taxínni kjuaxróxin tí tjen Dios.

### Adán la ko Cristo

<sup>12</sup> Mé xikaha ó jnko nkexro kjuasin jie ntá k'uíxin jie kuenté chjasintajni. Mé xikaha kjuankíxin k'uén chojni ntá kaín chojni kjuankíxin k'uén kixin kaín sín kjuasin sín jie. <sup>13</sup> Kixin ósé la k'uékohya ley ntá ó xráxin k'uíxin jie chjasintajni kjánchó naxa kohya ley chrókjuanchia jie chrókjuasótexín sín. <sup>14</sup> Desde kjuák'e ch'ín Adán hasta kjuák'e ch'ín Moisés la k'uéchóna kjuachaxin tí kjuach'en kixin tí jie kjuasin sín mé k'uenxín sín. Kjánchó tí jie kjuasin sín la yóehya tí nkehe kjuích'e ch'ín Adán, kuítekakonhya ch'án tí nkehe k'uetóan Dios. Ntá ch'ín Adán yóhe tsotsjehe éxi tí nkexro tsi chr'éxin.

<sup>15</sup>Ntá tí jię kjuasin ch'ín Adán la xitjahya chrókóyóhę tí nkehe tsjanjon Dios kixin tí jię kjuasin jnkokoá chojni la ntá nchónhya chojni k'uenxín. A ntá tí tsaáxinni la kjuasáyé Dios ichr'án jnkokoá nkexro mé Jesucristo la antsí má jına tíha kixin tsaáxin nchónhya chojni. <sup>16</sup>A ntá tí jię kjuasin jnkokoá chojni la tóyóehya tí nkehe tsjanjon Dios tsaáxinni. Kixin tí jię kjuankixin kjuasótexín chojni kixin kjuasin jnkokoá chojni jię. A ntá tí tsaáxinni la kjuasáyé Dios sinchekaáni ch'án la ko nchetjóá ch'án tí jię chóntani kjónté nchónhya jię kjuasin chojni. <sup>17</sup>Tí kjuach'én la k'uéchónta kjuachaxin kixin tí jię kjuankixixín kjuasin jnkokoá chojni. A ntá kjuasáyé Dios kjuínchetjóá ch'án tí jię chóntani la ntá antsí tsochóntani kjuachaxin ts'e-jóni jına kixin k'uenyákonhenni jnkokoá nkexro, mé Cristo tíha.

<sup>18</sup>A ntá tí jię kjuasin ch'ín Adán la ntá kaín chojni kjuasin sín jię chrokjuasótexín sín. A ntá ijie la Cristo mé kótjuáxin ijie kaín chojni kixin tí jına ch'án k'uenyákonhenni ch'án. <sup>19</sup>Mé xikaha kuítekakonyha jnkokoá chojni, mé Adán tíha, ntá nchónhya chojni kjuasin jię. A ntá jnkokoá nkexro jına kuítekaon kjuakoxin, mé Cristo tíha, a ntá nchónhya chojni tsaáxin tí jehe ch'án kjónté k'uéchonta sín jię.

<sup>20</sup>Ikuí tí ley kuínhin sín ntá kónoxin kixin íchá antsí kjuasin sín jię. A ntá antsí k'uíxin jię la kjónté xikaha la antsí má kuíkonóeheni Dios kixin jehe ch'án tsjinkitsani ch'án tsaáxinni. <sup>21</sup>Mé xikaha tí jię k'uíxin k'uéchónta kjuachaxin kjuikao kjuach'én chrók'uenxinni. A ntá kjuasáyé Dios kjaxin antsí má chóntha ch'án kjuachaxin sinchetjóá ch'án tí ijieni la ko tsjanjon ch'án kjuachón jnkochrixin kixin Ìnchéni Jesucristo ikui ch'án k'uenyákonhenni ch'án, tsaáxinni.

**Ó k'uén tí jię ntá  
Cristo kjuínchexechónni**

**6** A ntá ijie ¿nkehe tsixroni? ¿A naxa chrókjuasinni jię kixin ntá Dios naxa chrókjuakoxin ch'án kixin chrókuiikonóeheni ch'án? <sup>2</sup>Kjá náhí. A ntá jeheni la éxí chojni tsík'en chrokjuahya tsjanjon jię. ¿A ntá nkekuènte naxa chrókjuasinni jię ínaá? <sup>3</sup>¿Á noahyará jahará kixin tí kufkiteni kixin tinkáchónkini Cristo la yóhę k'uénkoni ch'án? <sup>4</sup>Tí kufkiteni la éxí yóhę xravákoni Cristo la ko tsík'enkoni ch'án kixin ntá ó xechónni ntá chrók'ujini ijnko ntia nixin mé xikaha Cristo xechónxin ch'án tí kjuachaxin jíé chóntha tí It'é ch'án.

<sup>5</sup>Kixin tí chaxín k'uenxinni éxí ik'uén tí jehe ch'án la ntá kjaxin tsoxechónni éxí xechón tí jehe ch'án. <sup>6</sup>Ó noheni kixin nkexrí k'uejóni senó mé táha mé k'uenxín Cristo kjuák'enkánixín ch'án ntacruz kixin ntá chrók'uitjáyaxín kaín tí jię k'uékjasinni kixin ijie í chrókjuinchexiteyehyani tí jię. <sup>7</sup>Tí nkexro ó k'uén la ntá ó kuítóhe tí jię. <sup>8</sup>A ntá jeheni tí k'uenxinni Cristo la ó noheni kixin ts'ejókoni tí jehe ch'án. <sup>9</sup>Kixin ó noheni kixin Cristo jnkokoá vez xechón ch'án a ntá í ts'enhya ch'án ínaá kixin tí kjuach'én í chóntahya kjuachaxin kixin naxa ts'óyán tí jehe ch'án. <sup>10</sup>Tí ik'uén Cristo la ó naá ik'uén ch'án kixin k'uenyákonhenni ch'án kixin tí ijieni. Ntá xechón ch'án ijie kixin tsjak'eko ch'án Dios. <sup>11</sup>A ntá kjaxin jahará chrókjuenkayáxinrá kixin ik'uénrá, xitjahya tsjásinrá jię kixin ntá ijie la xíxechonrá chrókjuich'eherá xra Dios kixin tinkachónkirá Cristo Jesús, mé Ìnchéni tíha.

<sup>12</sup>Méxra chrókuiitóehyará kixin chrókjan tí jię chrók'uetuēhen tí cuérporá ínaá kixin tí jię chrók'uetoan kixin chrókjuinchexiteyéhérá tí

nkehe tjenkayáxinrá. <sup>13</sup>Tjánjonhyará tí cuérporá kixin chrók'óna nkehe chrókjuásixínrá jie. A ntá íchá jína chróchjehérá asánrá Dios éxí ijnko chojni tsík'en ó xíxechón ínaá. Chjehérá Dios tí cuérporá ts'óna ijnko nkehe sich'exín ch'án xṛá jína. <sup>14</sup>Kixin tí jie la í chóntahya kjuachaxin ts'etuenhen tí jahará. Jehya tí ley ts'etoan ijie. Náhí, jehó kjuasáyé Dios.

**Kjuíncheyóexin ch'ín Pablo nkexrí tí chojni ch'exón xṛá**

<sup>15</sup>A ntá ijie ¿nkexrí? ¿A chrókjuasinni jie kixin í t'etuenhyani tí ley? Kjá náhí. Kjuasáyé Dios tsaáxinni la kjá í chrókjuasinhyani jie. <sup>16</sup>Jahará ó nohará jína kixin tí sich'ehe ni ijnko lámō xṛá la tsitekakönhenni ch'án la tí xíkaha la t'ichjánxin ch'ehe ni xṛá tí lámō la t'ichjánxin sinchexiteyéhe ni ch'án. Mé xíkaha tónhen tí naxá sinchexiteyéhe ni tí jie la táha mé ts'enixínni. A ntá tí tsitekaonni Dios la mé chrók'uejóni jnkojína. <sup>17</sup>Jahará la ósé k'uekjásinrá jie, a ntá ijie kjuasáyé Dios kuikonóahará ch'án kixin kaín asánrá kuítekáonrá tí nkehe xrakohará. <sup>18</sup>A ntá ó kuítóhérá tí k'uekjinchexiteyéhérá tí jie. A ntá ijie ó kjuánjonrá asánrá kixin sich'erá xṛá jína kuènte Ìnchéni. <sup>19</sup>A ntá jie nixjá éxí ijnko chojni ó kixin jahará la tiénxinhyará jína tí nkehe i. A ntá xíkaha tí senó kjuínchexiteyéhérá tí nkehe ntoáhya la ko jínahya kixin sich'erá tí nkehe jínahya. A ntá ijie la xíkaha chrókjuánjonrá tí cuérpo kuèntará kixin chrókjuich'exínrá tí xṛá jína éxí tjinkaon Dios kixin ntá jehe ch'án chrókjuinchetjóará ch'án.

<sup>20</sup>A ntá tí jahará tió naxá kjuínchexiteyéhérá tí jie la ntá xitjahya sich'erá tí xṛá jína ntoá. <sup>21</sup>¿A ntá nkehe chrókjuachará kixin xíkaha kjuich'erá tí nkehe chrókósuàxinrá ó? Ntá xíkaha kjuéyará tí nkehe ts'énxinrá ó. <sup>22</sup>Na

ntá ijie ó kjuíin tí nkehe k'uek'etu-anhanrá k'uekjásinxínrá jie. A ntá ijie ch'eherá xṛá Dios. Táha la tsjinkítsa kixin ts'ejoxínrá jína kixin ntá tsjixixín tsotjuáxinrá ts'ayéhérá kjuachón jnkochrín. <sup>23</sup>A ntá tí chrókjuasinni jie la chrókjuachani kixin éxí chrók'uenni ó. A ntá tí nkehe chrókjuinchekitönhenni Dios la kjuachón jnkochrín kixin tin-káchónkini Ìnchéni Cristo Jesús.

**Kjuíncheyóexin ch'ín Pablo kuènte tí sín tsíkótehe**

**7** Kíchóni, jahará ó choxinrá tí ley la ó nohará kixin tí ley chóna kjuachaxin ts'etuenhen tí chojni naxá tjejóchón ó. <sup>2</sup>Tíha mé ts'axrxéjín éxí ijnko chojni chjin tsíkótehe la tí xii tjan chóna kjuachaxin ts'etuenhen tjan kixin naxá tjechón ch'án. A ntá tió tsík'en tí xii la ntá tí tjachjin la ó kuítóhe tí k'uek'etuenhen ch'án tjan. <sup>3</sup>A ntá tí jehe tjan chrókuakja í jnko chojni ntoa tí naxá tjechón xii tjan la ó chrókjuasin tjan jie. A ntá tió tsík'en xii tjan la jehe tjan la ó kuítóhe tí k'uek'etuenhen ch'án tjan la jína tsotehe tjan í jnko chojni ntoa la jehya jie tíha.

<sup>4</sup>Mé xíkaha jahará kíchó ni mé k'uenyákonhenni Cristo la ntá jahará la éxí tsík'enrá kixin í t'etuanhyará tí ley la éxí chrókuákjára í jnko xiará la mé xíkaha tinkachónkirá Cristo. Cristo mé xechón ch'án ínaá kixin ntá jína chrókjuich'ehe ni xṛá Dios. <sup>5</sup>Tió naxá k'uekjasinni jie a ntá tí ley chrókjuich'e xṛá kixin chrókjuasinhyani jie, a ntá íchá antsí má kjuasixínni jie tí cuerpo kuènténi, la táha mé kjuixín tí ts'enixínni. <sup>6</sup>A ntá ijie la éxí yóhe ik'uénni, a ntá tí ley chóntahya kjuachaxin naxá ts'etuenhenni. A ntá ijie í kohya nkehe t'inkákonhen kixin jína sich'ehe ni xṛá Dios kixin k'ónani ijnko chojni nixin kixin tí Nchakuen Dios k'uáyéhe ni. A ntá í t'etuenhyani tí ley ntaxin tsík'óna.

### Tí jie naxa chonta

<sup>7</sup> A ntá tí xikaha la, ¿nkehe chróchroni? Kíxin tí ley la, ¿á jie táha ní? Kja náhi. Kjánchó janhan chrókónonahya nkehe tí jie tí chrókohya tí ley chróchrónka. Chrókónonahya kíxin tí nkehe ókjé chrókjuakéhya asenná tí chróchrónkahya tí ley kíxin chrókjuakéhya asenná tí nkehe ókjé. <sup>8</sup> A ntá tió kónona tí ley a ntá tí jie antsí kjuacha k'uetōan. La ntá k'uúxin kaín nkehe ntáchro asenná. A ntá tí chrókohya ley la chrókónoxínhya tí jie chrók'uenxian. <sup>9</sup> A ntá tí ósé la nonahya nkehe tí ley. A ntá tió nōna nkehe tí ley, a ntá antsí kjuásian jie la ntá ó nōna kíxin tí jie kjuásian me ts'énxian. <sup>10</sup> Mé xikaha kónhen kíxin tí ley chrókjuanjon kjuachón ntá kjuikao tí ts'énxinni. <sup>11</sup> Ntá tí jie mé kjuacha k'uetōan kíxin sintaxiteyáhya tí ley. A ntá tí ley mé kjuanchia jie ts'énxian.

<sup>12</sup> Mé xikaha tí ley la chaxín jína la ko tí nkehe t'etōan Dios la kjaxin jína. <sup>13</sup> Mé xikaha tí nkehe jína la ¿á táha chrók'uénxian? Kja náhi. Tí jie kjuásian mé ts'énxian. Mé xikaha kjuakoxin tí nkehe jie kíxin tsonoxín tí jie kíxin tí ley la jína. Mé xikaha kjuakoxin tí ley kíxin tí jie tjasin chojni mé imá jínahya tíha.

<sup>14</sup> Ó noheni kíxin tí ley la kuente Dios tíha. A ntá janhan la kjuintaxiteyáha tí ntáchro asenná kíxin tí jie kjuacha k'uetōanna. <sup>15</sup> A ntá tí janhan la tí nkehe tjét'a la kjaxin naxa tianxínhya kíxin janhan la t'ahya tí nkehe tjínkavan chrókjuít'a, a ntá ijie mé it'a tí nkehe tóxrjínahya chrókjuít'a. <sup>16</sup> A ntá tí nkehe tjínkakonhya chrókjuít'a la tíha me it'a la mé xikaha tjátsoanxián kíxin tí ley la jína. <sup>17</sup> A ntá jehya janhan it'a tíha. Náhi tí jie chonta mé ch'e tíha. <sup>18</sup> Kíxin janhan ó nōna kíxin tí ntáchro asenná la kohya nkehe jína chrókjuít'a. Tjínkavan chrókjuintaxiteyá tí nkehe jína

kjánchó tjachahya sit'a tíha. <sup>19</sup> T'ahya tí nkehe jína chrókjuít'a. Tí nkehe jínahya tjínkakonhya chrókjuít'a mé it'a. <sup>20</sup> A ntá tí it'a tí nkehe jínahya tjínkakonhya chrókjuít'a la ntá jehya janhan it'a tíha. Náhi. Tí jie chonta mé ich'e tíha.

<sup>21</sup> Tónōna tíhi. Tí tjínkavan chrókjuít'a tí nkehe jína la mé íchá antsí it'a janhan tí nkehe jínahya. <sup>22</sup> Kjóté xikaha la tóxrjinna chrókjuintaxiteyáha tí ley kuente Dios. <sup>23</sup> T'íkuan kíxin tí nkehe ntáchro asenná mé t'inkákonhen tí nkehe tjínkavan chrókjuít'a. A ntá tí jie chonta mé éxí tjéchinaxián tíha.

<sup>24</sup> Nōa tí janhan. ¿Xá nkexro chrókjuatsen tí jie chóna tí cuerpo kuentana chrók'uénxian? <sup>25</sup> Kjuasáya tjaha Dios kíxin ikui Ìnchéni Jesucristo kuaáxinni. Mé xikaha tí janhan la it'ona tjenkayáxian kíxin chrókjuintaxiteyáha Dios a ntá tí t'ona mé ntáchro asenná chrókjuintaxiteyáha tí nkehe kuente tí jie.

### Tjejóchónxinni Nchakuen Dios

**8** A ntá ijie tí sín tinkáchónki Cristo Jesús la kohya jie chrókjuasótexín sín. Jehé sín í tjinkakonhya nchexiteyá sín xikaha ntáchro asén sín. Jehó tjinkaon sín sinchexiteyéhe sín Nchakuen Dios. <sup>2</sup> Kíxin tí nkehe t'etōan Nchakuen Dios mé tjanjon kjuachón kíxin tinkáchónkini Cristo Jesús. Tíha mé kjuatsen tí nkehe kuente jie chrók'uénxinni. <sup>3</sup> A ntá Dios kjuích'e tí nkehe kjuachahya kjuích'e tí ley kuente ch'ín Moisés kíxin jeheni kjuachahyani chrókjuinchexiteyéheni tíha. A ntá Dios mé ich'án ch'án Xjeen ch'án k'óna éxí chojni. La xra ó kui ch'án k'uenyákonhen ch'án tí ijiéni kaín ni ntíhi chjasintajni la kjuatsen ch'án tí jie chrók'uitjáyánxinni. <sup>4</sup> Mé xikaha kónhen kíxin ntá jeheni jína chrókjuinchexiteyéheni tí nkehe t'etōan tí ley la chrókjuinchexiteyéhyani

tí nkehe ntáchro asénni ó. Náhí. Chrókjuinchexiteyéheni tí nkehe ntáchro Nchakuen Dios.

<sup>5</sup> A ntá tí sín tjinkaon nchexiteyéhe tí nkehe ntáchro asén sín ntá táhó tjenkayáxin sín. A ntá tí sín tjinkaon nchexiteyéhe Nchakuen Dios la ntá xrit-jeyá sín tí nkehe kuènté Nchakuen Dios. <sup>6</sup> A ntá tí sín tóxakonhen tí nkehe ntáchro asén sín la táhó ts'énxín sín. A ntá tí sín tóxakonhen tí nkehe kuènté Nchakuen Dios la tsochóntaxín sín kjuachón la ko kjuaxróxin. <sup>7</sup> A ntá tí sín imá tóxrjínhin tí nkehe ntáchro asén sín ó la mé nínkakonhen sín Dios kixin tjinkakonhya sín la ko titekakonhya sín tí ley. <sup>8</sup> Tí sín tóxrjínhin sín tí nkehe ntáchro asén sín ó la xitjahya sinchechéhe sín Dios.

<sup>9</sup> A ntá jahará la nchexiteyéhyará tí nkehe ntáchro asánrá. Náhí. Jahará nchexiteyéhérá Nchakuen Dios tí chaxín chontará Nchakuen Dios. A ntá tí nkexro chóntahya Nchakuen Cristo la í tinkáchónkihya sín Cristo. <sup>10</sup> A ntá tí Cristo tjejókoará tí jahará la tí asánrá la tjechón kixin Dios kuikonóahará, kjuínchetjóá ch'án tí ijjárá, kjánchó tí cuerpo la éxí tsík'en kixin tí jie chontará. <sup>11</sup> A ntá jahará ó chontará Nchakuen Dios, tí nkexro kjuínchexechón Cristo Jesús. Tí Dios a mé kjuínchexechón Cristo la ntá kjaxín tsochjéhe ch'án kjuachón nixin tí cuerpo kuèntará kjónté chóna jie kixin tí Nchakuen Dios chontará jahará.

<sup>12</sup> Mé xikaha kichó ni, ó chóntani nkehe sinchexiteyéheni, kjánchó í chrókjuenkayáxinhyani tí nkehe ntáchro asénni. <sup>13</sup> A ntá jahará tí chrók'uejorá éxí ntáchro asánrá la tíha la mé chrók'uénxinrá. A ntá jahará ó chontará Nchakuen Dios ntá chrók'uen tí nkehe ntaxin kjuenkayáxinrá la ntá jehó Nchakuen Dios chrók'uejochonxínrá.

<sup>14</sup> Kaín tí nkexro t'etueñhen Nchakuen Dios la mé ó k'óna xjeen Dios. <sup>15</sup> Ntá Nchakuen Dios ó k'uayéhérá jahará la jehya tí nchakuen tí nkehe k'uék'etuanhanrá ósé kixin chróchrakonrá. Náhí. Ntá tí Nchakuen chóntani la k'ónaxínni xjeen Dios. A ntá tí Nchakuen ch'án nchexraxinkaonni tsocháchroni kixin: "It'eni Dios kuèntá tí jeheni." <sup>16</sup> Tí Nchakuen Dios tónoexín nchakuenni kixin k'ónani xjeen Dios. <sup>17</sup> A ntá ó k'ónani xjeen ch'án la kjaxín tsjanjon ch'án tí nkehe ts'áyéheni éxí tsintáchro ch'án ósé. Mé ts'áyèkoni Cristo tí nkehe tsjanjon Dios. Tí chaxín tsjasóteni éxí Cristo kjuasóte ntá chr'éxin ts'ejókoni ch'án kjuaxróxin.

#### Tí kjuachaxin jie itsi chr'éxin

<sup>18</sup> A ntá ijie la tóxakuenhyani kjónté nkehe ts'atsínkani tsjasótexínni kixin tíha la ninkehó sínkíhya kixin tíha la xitjahya tóyóhe tí nkehe ts'áyéheni chr'éxin kixin antsí má jína náxrjón tíha. <sup>19</sup> Tí nkehe tsík'óna tjejóchónhen kixin ts'ikon tí sín tsík'óna xjeen Dios. <sup>20</sup> Kjónté kaín nkehe tsík'óna sínni la ts'itjáyan tíha la jehya kixin xikaha tjinkaon tí nkehe tsík'óna. Náhí. Jehí xikaha tsík'etóan Dios. Ntá tjejóchónhen kaín nkehe tsík'jich'éna Dios <sup>21</sup> kixin chróchóna kjuachaxin chrók'uitjáyanhya. Ntá náxrjón ts'ixin kaín nkehe éxí náxrjón ts'ejó tí sín tsík'óna xjeen Dios. <sup>22</sup> Ó noheni kixin kaín tí nkehe kjuích'éna Dios la naxá tsjasóte éxí yóhe tjetéxin ijnko chojni nchekokjíhi xjeen. <sup>23</sup> A ntá jehya jehó tí nkehe tsík'óna t'ikon chojni chrókjoté. Náhí. Kjaxín jeheni tjasóteni kjónté chóntani Nchakuen Dios kixin tí Nchakuen Dios la mé tí nkehe xrankixín kuákjani la naxá ts'áyéheni inaá tí nkehe naxá tsjanjon Dios. Tjejótjasóteni la ko tjejóchónhenni kixin tsjintaxín ts'ónani

xjeen Dios la ko ts'áyéheni tí cuerpo chónhya ts'en. <sup>24</sup>Mé ó kuaáxinni la naxa tjejóchónhenni tí nkehe t'íkonhyani. Tí k'uíkonni tí nkehe tjejóchónhenni ntá t'ichjánxinhya chrók'uejóchónhenni. Tí nkehe ó t'íkonni la t'ichjánxinhya chrók'uejóchónhenni naxa chrók'uikonni inaá. <sup>25</sup>A ntá tí chónhenni tí nkehe naxa t'íkonhyani la ntá t'ichjánxin tsonínkakonhyani tsochónhenni.

<sup>26</sup>Mé kjaxin xíkaha tí Nchakuen Dios tjinkítsani tí noehyani nkexrí tsonixjeheni Dios kixin chaxín noehyani tsonixjeheni ch'án éxí chrónixjani. A ntá tí Nchakuen Dios tjinkítsa nixjaxin ch'án tí jeheni kjónté noehyani nkexrí tsochrónóaxinni éxí tjinkaon ch'án. <sup>27</sup>Dios mé nohe ch'án nkehe tónhen asénni la nohe ch'án nkehe ichro tí Nchakuen ch'án kixin tí Nchakuen ch'án mé chrónóaxin éxí tjinkaon Dios la nixjaxin ch'án tí sín tinkáchónki Dios.

<sup>28</sup>Ó noheni kixin Dios la k'uetóan kaín nkehe chrók'uaxrje jína kixin tí sín tjuèhe ch'án kixin tsíkjejá ch'án sín kixin xíkaha tjinkaon ch'án. <sup>29</sup>Tí sín tsíkjejá Dios ósé la ntá tsík'íyehé ch'án kixin ts'óna sín éxí tí Xjeen ch'án kixin ntá tí Xjeen ch'án mé ts'etuenhen nchónhya tí sín kíchó ch'án. <sup>30</sup>Mé xíkaha tí sín tsíkjejá Dios ósé mé kjaxin k'uíyehé ch'án sín la ko tí sín k'uíyehé ch'án la kjuínchetjóá ch'án ijíé sín la ntá tí sín kjuínchetjóá ch'án ijíé la kjuanjon ch'án kjuachaxin kuènte ch'án tsochóna sín.

<sup>31</sup>¿A ntá nkehe chróchroni tí xíkaha? Tí Dios tjuèhe tí jeheni, ¿a ntá nkexro chrókjuacha chrókónínkakonhen tí jeheni? <sup>32</sup>Kixin Dios la kjiakuènhya tí Xjeen ch'án. Kjuanjon ch'án k'uenyákonhenni kaín ni, a ntá tí ó kjuanjon ch'án Xjeen ch'án la kjá kaín nkehe chrókjuanjon ch'án. <sup>33</sup>¿Nkexro

chrókjuacha chrókjuanchia jie chrókónínkakonhen tí sín kjueyá Dios? Kixin Dios la ó kjuínchetjóá ijíé tí sín a. <sup>34</sup>¿Nkexro chrókjuinçekjasóte tí jehe sín? Kixin Cristo la ó k'uenyákonhen sín la kjaxin xechón ch'án inaá la itjen ch'án tí tja chjna Dios tjen nkaya nkajní la tjechronda ch'án kixin kaín tí jeheni. <sup>35</sup>¿Xá nkexro chrókuakitsjeheni tí tjuèheni Cristo? Kjónté ichrén nkehe chrókónhenni la ko chrókónínkakonhen chojni tí jeheni la ko kjónté chrók'uexínni kjinta la ko chróchóntahyani ikéni o kjónté tí kjuaxikaon chrók'uexínni la chrókuítóehya ch'án tí jeheni. <sup>36</sup>Éxí ntáchro xroon itén Dios kixin:

Tí tinkáchónkini tí jaha la síín kjuaxikaon kaín yaon chrók'uexínni.

Chrók'óyánni sín éxí t'óyán sín kolélo tí matanza.††

<sup>37</sup>Kaín tíha la antsí chrókjuachaxinni kixin kjuachaxién tí nkexro tjuèheni.

<sup>38</sup>Ó noheni kixin ninkehó nkehe tsjachahya tsakitsjeheni tí tjuèheni Dios. Kjónté tí its'enni, o kjónté tí tjejóchónni, o kjónté tí sín ángel, o tí kjuachaxién tí jínahya, o kjónté tí nkehe sítónhen ijie, o tí nkehe tsonhen chr'éxin, <sup>39</sup>o kjónté tí nkehe síín nkaya nkajní, o tí nkehe imá nínka síín chjasintajni, o í jnko nkehe kjuíuch'éna Dios. Mé koha nijnko tí nkehe a tsjacha tsakitsjeheni tí tjuèheni Dios kjuakoxin tí jehe ch'án kixin k'uenyákonhenni Inchéni Jesucristo.

### Dios kjueyá tí sín Israel

**9**Ntoá xrjanka kixin janhan ijnko chojni tinkáchónki Cristo la t'ayahya. Tí nkehe tjenkayáxian la Nchakuen Dios nchexraxinkaonna kixin chaxín. <sup>2</sup>Imá t'ává asenná la ko náxrjónhya tjèn

††8:36 Salmo 44.22



<sup>3</sup> kixin tjínkavan kjónté chrók'uitjáyanx-inna tí tinkachónkia Cristo kixin ntá jína chrókuinkáchónki Cristo tí sín kichiná naxa kjéhyana. <sup>4</sup> Jehe sín mé tsík'axr-jeníxin sín tí sín Israel la Dios k'uáyéhe sín éxi xjeen ch'án la ko Dios chón-tehe tí jehe sín la kjuanjon kjuachax-ién ch'án la kjaxin k'uáyéhe sín tí nkehe k'uetōan Dios la ko ti ley tsíkjin ch'ín Moisés la ko k'uáyéhe sín kjuachaxin ts'etōan sín kixin nkehe tí xra tson-hen nkaxenhen ninko la ko k'uáyéhe sín tí nkehe tsíntácho Dios. <sup>5</sup> Tsík'axr-jeníxin sín tí sín tsík'axrjeníxinni ósé la kjaxin Cristo tsík'axrjeníxin tí sín israelita tió k'óna ch'án chojni. Jehe ch'án mé Dios kuente kaín nkehe la tin-káchónkini ch'án jnkochrín. Amén.

<sup>6</sup> A ntá tí nkehe chrókuakja tí sín Israel kjuanjon Dios la jehya kixin chróx-iteyáhya tíha. Náhí. Kixin jehya kaín tí sín tsík'axrjeníxin tí sín israelita mé chrók'óna sín chojni chjasin Israel. <sup>7</sup> Kixin kénhya tí sín k'uaxrjeníxin ch'ín Abraham chrók'óna xjeen ch'án. Dios mé tsíntáche ch'ín Abraham kixin: “Tí sín ts'óna kjéhya jaha mé ts'axrjeníxin sín ti ch'ín Isaac.”<sup>¶¶</sup> <sup>8</sup> Tíhi mé tienxínni kixin ninkexró xitjahya ts'óna xjeen Dios kixin tí tsík'axrjeníxin sín chojni ó. Náhí. Jehó tí sín tinkáchónki tí nkehe tsíchenka Dios tí ch'ín Abraham mé jehe sín mé chaxín tsík'axrjeníxin sín ch'án. <sup>9</sup> Tí nkehe tsíchenka Dios tí ch'ín Abraham mé tíhi: “Itsi ijnko yaon mé tjan Sara sich'éna tjan ijnko xjan.”<sup>§§</sup>

<sup>10</sup> A ntá jehya táhó. Náhí. Kjaxin tí yaá chánjan tsík'jich'éna tjan Rebeca mé chóna jnkokoá it'é xjan

mé it'in Isaac, mé tsík'axrjeníxinni ch'án. <sup>11</sup> A ntá tí xjan la naxa kokjé-hya xjan la ninkehó nkehe jína o jí-nahya kjuích'e xjan. Ntá kjuakoxin Dios kixin chóna ch'án kjuachaxin éxi tsík-jenkayáxin ch'án tsjeyá ch'án nkexro ts'íyehé ch'án la tahya ch'án kuentá nkehe tí xra kjuích'e sín. <sup>12</sup> Ntá kjónté la ntá chenka ch'án tí tjan Rebeca kixin: “Tí ch'ín sao mé sich'ehe xra tí ch'ín tsoyo.”<sup>\*</sup> <sup>13</sup> Mé kjaxin xíkaha ichro xroon itén Dios kixin: “Tjuahá Jacob, a ntá Esaú la náhi.”<sup>†</sup>

<sup>14</sup> ¿A ntá nkehe chróchroni? ¿Á ntoáhya tjenkayáxin Dios? Kjá náhi. <sup>15</sup> Kixin tsíntáche Dios tí ch'ín Moisés kixin: “Tsojtjuahá tí nkexro tjínkavan tsojtjuahá la ko tsikonóahá tí nkexro tjínkavan tsikonóahá.”<sup>‡</sup> <sup>16</sup> Jehya éxi tjinkaon chojni o jehya kixin tí nkehe ch'e chojni. Náhí. Ó jehí Dios tsík'ikonóehé ti jehe sín. <sup>17</sup> Tí ntácho xroon itén Dios mé nixjehé Dios tí ch'ín rey Egipto kixin: “Kjuánjuan kjuachaxin kixin jaha k'óna rey kixin tjínkavan chrók'juakoxian kjuachaxin kuéntana kixin ntá kuenté chjasintajni chrókónohe la chrókuitekaon tí nina.”<sup>¶¶</sup>

<sup>18</sup> Mé xíkaha tí tjinkaon Dios tsikonóehé ch'án chojni la tsík'ónóehé ch'án, a ntá tí nkexro tjínkakonyha ch'án tsikonóehé ch'án la tsík'ónóehya ch'án.

<sup>19</sup> A ntá tsontáchorá kixin: “A ntá tí xíkaha la, ¿nkekuenté t'eka Dios chojni jie? ¿Nkexro chrók'juacha chrók'juan-jonko tí nkehe t'etōan Dios?” <sup>20</sup> ¿Xá nkexro tí jahará kixin chróntácherá Dios xíkaha? ¿Á tí chí tsík'óna nchetje chróntáche tí inché chí kixin: “¿Nkekuenté

¶¶9:7 Génesis 21.12

§§9:9 Génesis 18.10

\*9:12 Génesis 25.23

†9:13 Malaquíás 1.2–3

‡9:15 Éxodo 33.19

¶¶9:17 Éxodo 9.16

xikaha kjuich'énani?" chróchro. <sup>21</sup> A ntá kjaxin tí nkexo ch'éna chí mé chóna kjuachaxin tjinkaon sich'éna ch'án tí nkehe tóxrjínhin ch'án sich'éna ch'án, tí tjinkaon ch'án nchetje sich'éna ch'án nkehe imá náxrjón o tjinkaon ch'án sich'éna ch'án nkehe náxrjónhaya.

<sup>22</sup> Tjinkaon Dios chrókjuakoxin ch'án tí kjuachaxin kuente ch'án chrókjuinchekjasóte ch'án chojni la kjónté xikaha kónhen la kjuacha ch'án kónínkakonhaya ch'án la kuikonóehe ch'án tí sín chrókjuinchekjasóte ch'án kixin chrókjuinchek'itjayan ch'án sín.

<sup>23</sup> Mé xikaha kjuich'e ch'án kjuakoxin ch'án tí kjuachaxin imá jie chóna ch'án kixin jehe ch'án kuikonóeheni ch'án kixin xikaha tsíkjenkayáxin ch'án ósé kixin náxrjón chrók'uejókoni tí jehe ch'án. <sup>24</sup> Mé xikaha Dios tsíkjeýá ch'án iso tí sín judío la ko iso tí sín jehya judío. <sup>25</sup> Mé xikaha ntáchro tí xroon tsíkjin ch'ín Oseas kixin:

Tí sín jehya chjasenná la mé sintak'ian chjasenná.

La tí sín k'uetjuahya mé tsotjuaha sín ijie.<sup>§</sup>

<sup>26</sup> Tí chjasin ntiha tsintáchro ch'án kixin: "Jahará jehya chjasenná",

a ntá ijie sintak'ian xjeen Dios tjechón.\*\*

Mé xikaha ichro itén Dios. <sup>27</sup> Kjaxin nixja ch'ín Isaiás kuente tí sín israelita tsintáchro ch'án kixin: "Nchónhaya chojni ts'axrjeníxin tí sín Israel éxi tí nchónhaya nchesen siín ntayaon kjánchó tsjéhya tí jehe sín tsjacha sín tsaá sín. <sup>28</sup> Ntá tjoka tsonhen tí nkehe tsintáchro Ìnchéni sinchexiteýá ch'án."<sup>††</sup> <sup>29</sup> Ntá kjaxin ch'ín Isaiás tsintáchro ch'án ósé kixin:

Tí Ìnchéni chóna kaín kjuachaxin kuítoehya chrók'uitjayan kaín tí sín k'uaxrjeníxin Israel éxi k'uitjayan tí sín chjasin Sodoma la ko Gomorra.<sup>‡‡</sup>

### Tí sín judío la ko tí tan jína

<sup>30</sup> ¿Ntá nkehe tsixroni? Tí sín jehya judío kjueýáhya sín Dios sinchetjóá ijie sín ntá kjónté la k'uitja sín kixin tsotjóá ijie sín kixin tinkáchónki sín Cristo. <sup>31</sup> A ntá tí sín israelita chrókjuinchexiteýehe sín ley kixin chrókótjuáxin ijie sín kjánchó kjuachahya sín kjuínchexiteýehe sín tíha. <sup>32</sup> ¿A ntá nkeuènté kixin xikaha k'uitjahya sín nkexrí chrókuinkáchónki sín Dios? Kixin kjueýáhya sín nkexrí chrókjuinchetjóá ch'án ijie sín kixin tinkáchónki sín ch'án. Jehó tí xra kjuich'e sín chrókuaáxin sín, ichro sín. La méxra xikaha tjen tí xro kóténkixin sín. <sup>33</sup> Mé xikaha chronkaxín xroon itén Dios kixin:

Mé xikaha kjuaké tí xro chjasin Jerusalén mé tí xro tsóténkixin sín la ko tí tjó ts'anótjenxin sín.

A ntá tí sín chrókuitekaon tí jehe la chrókósuèhya sín.<sup>¶¶</sup>

**10** Kíchóni, kaín asenná níxjaha Dios kixin tjínkavan kixin tí sín israelita chrókuaá sín. <sup>2</sup> Janhan ntáxrjan kixin tí sín israelita imá tjinkaon sín chrókjuich'ehe sín xra Dios kjánchó chaxínhaya kixin jehe sín la tienxínhaya sín. <sup>3</sup> Kjaxin noehya sín kixin nkexrí chrókjuinchetjóá Dios tí ijie sín. A ntá jehó sín xritjeýá sín nkexrí chrókótjóá sín la tjinkakonhaya sín chrókjuinchexiteýehe sín Dios. <sup>4</sup> A ntá Cristo mé kjuínchexiteýá kaín nixja tí ley. A ntá

§9:25 Oseas 2.23

\*\*9:26 Oseas 1.10

††9:28 Isaiás 10.22–23

‡‡9:29 Isaiás 1.9

¶¶9:33 Salmo 118.22

ijie kaín tí sín kuítekaon tí jehe ch'án mé sinchetjóá ch'án ijíé sín.

<sup>5</sup> A ntá tí chrókótjóá ijíé sín kixin tí ley la ch'ín Moisés mé tsíkjin ch'án xíkíhi: “Tí nkebro chrókjuinchexiteyéhe kaín tí ley la táhó chrókuaáxin sín.”<sup>§§</sup> <sup>6</sup> A ntá tí chrókjuinchetjóá Dios tí ijíéni kixin tí tinkáchónkini ch'án ó mé ntábro xíkíhi: “Ntábrohyará kixin, ¿Xá nkebro sáchrókjuí nkaya nkajní? (Tí xíkaha la t'axrjéxin kixin naxá chrókui Cristo.)<sup>7</sup> La ko ntábrohyará kixin: ¿Xá nkebro chrók'uinkajin tí imá nínka?” (Mé t'axrjéxin t'íha kixin chrókjuífkakjín sín Cristo chrók'uaxrjetaón ch'án kixin itjen ch'án tí síin tí sín tsík'en, ichro sín.)<sup>8</sup> ¿A ntá nkehe ichro? Ntábro kixin: “Itén Dios la chjinaxón tjen tí tjejórá kixin ó nohará la ko xraxinkaon asánrá.”<sup>\*</sup> Tí tan a mé tí nkehe tinkáchónkini kjuakoni.<sup>9</sup> Tí ir'va tsonotábroxian kixin choxian Jesucristo mé Ìnchéni la ko tí asán tsitekaon kixin Dios kjuínchexechón ch'án ntá kjaxian tsaá.<sup>10</sup> A ntá tí asán tsitekaon la nta Dios sinchetjóá ch'án tí jaha la ko tí ir'va tsonotábroxian kixin choxian Jesucristo ntá sinchekaá ch'án tí jaha.

<sup>11</sup> Ntábro xroon itén Dios kixin: “A ntá tí sín chrókuitekaon tí jehe ch'án la chrókósuèhya sín.”<sup>†</sup> <sup>12</sup> Dios la t'íkon jnkokón tsjehe kaín chojni á tí sín judío o á tí sín jehya judío. Tí Ìnchéni la mé Ìnché kaín chojni la tsjanjon ch'án kaín nkehe t'íhjánxinhin kaín tí sín tjanchehe ch'án nkehe.<sup>13</sup> Mé xíkaha ntábro xroon itén

Dios kixin: “Kaín tí sín tjanchaxín nkehe ihnié Ìnchéni la tsaá sín.”<sup>‡</sup> <sup>14</sup> ¿A ntá nkebrí chrókjuanchehe sín ch'án kixin chrókjuinkítsa ch'án sín tí naxá kuítekakhonhya sín ch'án? ¿A ntá nkebrí chrókuitekaon sín tí jehe ch'án tí naxá kuénhya sín nkebro tí jehe ch'án? ¿A ntá nkebrí chrókuinhin sín tí kohya nkebro tsjakòhe sín tí itan a? <sup>15</sup> ¿La nkebrí chrókjuichronka sín tí tan tí kohya nkebro ichr'án sín sátsji? Éxí ntábro xroon chóna itén Dios kixin: “Náxrojón tí sín xrichronka itan jína.”<sup>¶</sup>

<sup>16</sup> Kjánchó kénhya sín titekaon sín tí itan tsaáxinni. Tsintábro ch'ín Isaías kixin: “Ìnchéni ¿xá nkebro ó kuítekaon tí tan xrichronkani?”<sup>§</sup> <sup>17</sup> Méxra t'íhjánxin tsinhin sín, a ntá chrókuitekaon sín, a ntá tí tan tsinhin sín mé itén Cristo.

<sup>18</sup> A ntá tjánchánkía kixin: ¿Á kuénhya sín tí tan? Kjá ó kuínhin sín. Ntábro xroon itén Dios kixin:

A ntá tí nkehe kjuako sín la ó kuínhin chojni kuenté chjasintajni. Tí nkehe nixja sín la ó kjuixraká hasta kjuèxin chjasintajni.”<sup>\*\*\*</sup>

<sup>19</sup> Ntá tjánchánkía inaá: ¿Xá tí sín Israel la naxá kíenxínhya sín ní? Senó ntábro ch'ín Moisés kixin:

Ijnko chjasin jehya chjasin kuèntana la tsoninkákonhénrá sín kixin injko chjasin tjinkakonhya tsinhin la tsoninkákonhénrá sín.<sup>††</sup>

<sup>20</sup> Ntá ntábro ch'ín Isaías kixin: Tí sín xritjeyáhya tí janhan la mé tí sín a mé k'uitja sín tí janhan.

§§10:5 Levítico 18.5

\*10:8 Deuteronomio 30.12–14

†10:11 Isaías 28.16

‡10:13 Joel 2.32

¶10:15 Isaías 53.1

§10:16 Isaías 53.1

\*\*\*10:18 Salmo 19.4

††10:19 Deuteronomio 32.21

La ko kjuákuaxian tí sín kjuanchankíhya kixin nkexro tí janhan.<sup>‡‡</sup>

<sup>21</sup> La ko nixja ch'ín Isaías kuente tí sín israelita kixin: “Kuenté yaon k'uíyaha ijnko chjasin síin chojni titekakonhya sín la ko jiehe sín.”<sup>¶¶</sup>

### Tí sín Israel tsíkjoyá Dios

**11** A ntá ijie tjánchánkiá kixin: ¿Dios la á kuítóhe ch'án tí sín Israel? Kjá náhí, kixin janhan kjaxian israelitana la t'ikiníxinna ch'ín Abraham la ko k'uaxrjeníxinna ch'ín Benjamín. <sup>2</sup> Kixin ósé tsíkjoyá Dios tí sín israelita kixin ts'óna sín chjasén ch'án. A ntá ijie la kjá sinchek'itjáyanhya ch'án sín. ¿Á noahyará jahará nkexrí nixja xroon itén Dios tí chrónka ch'ín profeta Elías nkexrí nixjehe ch'án Dios tjanchia ch'án jie kuente tí sín Israel? Mé ntáchro xik-ihí: <sup>3</sup> “Ínchéni, jehe sín k'óyán sín tí sín chrónka itán la ko k'óxíka sín tí altar kuéntá ntá jehóni kuítóheni tjechónni la tjinkaon sín kjaxin chrók'óyán sín tí jeheni.”<sup>§§</sup> <sup>4</sup> A ntá Dios kjuátehe ch'án kixin: “Naxa kuítóhe yato mil chojni kuítekaon sín tí janhan kjuíxienhya sín toch'in sín tí nkehe tsíkjanoya Baal.”<sup>\*</sup> <sup>5</sup> Ntá kjaxin xikaha ijie naxa kuítóhe iso tí sín naxa tinkáchónki Dios. Kjuasáyé Dios kixin kuikonóhe ch'án tí sín la tsíkjoyá ch'án kixin tsaá iso tí jehe sín. <sup>6</sup> Mé xikaha kjuasáyé Dios sinchekaá ch'án tí jehe sín kixin jehya tí xra kjuích'e sín chrókuaáxin sín. Náhí. Kjuasáyé Dios mé sinchekaá sín ch'án. Kixin tí xra chrókjuich'e sín ntá chrókuaáxin sín la jehya kjuasáyé Dios tí xikaha.

<sup>7</sup> A ntá tí xikaha la, ¿nkexrí? Tí sín israelita la k'uitjahya sín tí nkehe xritjeyá sín. A ntá tí sín kjueyá Dios la k'uitja sín. A ntá tí sín í so a la icha asén sín la kuítekakonhya sín. <sup>8</sup> Éxí ntáchro xroon itén Dios kixin: “Dios kjuanjonhya kjuachaxin chrókienxín tí sín a la ko mé kjaxin xikaha naxa sítonhen tí yaon ijie. La kjuanjonhya ch'án kjuachaxin kixin chrók'uikon sín la ko chrókienxín sín.”<sup>††</sup>

<sup>9</sup> Kjaxin tsíntáchro ch'ín David kixin: Tí kia tjasin sín mé tjasixín sín jie, tsjasótexín sín.

<sup>10</sup> Tí ikon sín ts'ikonxínhya sín kixin ts'óna sín ntakótán ntá tí jie kuente sín mé jnkochrín yamá sín.<sup>‡</sup>

### Tsaá tí sín jehya sín judío

<sup>11</sup> A ntá ijie tjánchánkiá: Tí sín judío la tí kjuasin sín jie la ¿á ó naá kuítóexón Dios tí jehe sín? Kjá náhí. Tió kuítekakonhya tí sín judío a ntá tí sín jehya judío la mé kjuacha sín kuaá sín. A ntá tí sín israelita la kónínkaon sín kixin kjuachahya sín. <sup>12</sup> A ntá tí jie kjuasin tí sín judío, a ntá kuítóhe Dios tí jehe sín, a ntá tí sín jehya judío antsí k'uitja sín nkexrí tsinkáchónki sín Dios. A ntá tí nkehe ntoáhya kjuích'e tí sín judío ntá tí sín jehya judío kjuacha sín kuaá sín. A ntá tí chrókjan tí sín judío chrókuitekaon sín Cristo la antsí má náxrjón tía.

<sup>13</sup> Chonta iso nkehe chrókuinhínra jahará jehya judiorá kixin Dios mé chr'ánna kixin tsjakoha tí sín jehya judío la antsí tjetooan tí xra kuente Ínchéni chrókjuít'a. <sup>14</sup> Tjínkavan kixin tí sín chjasenná chrókóchjijnóxinhin sín

‡‡10:20 Isaías 65.1

¶¶10:21 Isaías 65.2

§§11:3 1 Reyes 19.10, 14

\*11:4 1 Reyes 19.18

††11:8 Deuteronomio 29.4; Isaías 29.10

‡11:10 Salmo 69.22–23

kíxin jahará tinkachónkirá Dios kíxin ntá chrókjuacha chrókuaá iso tí jehe sín. <sup>15</sup> Kuítóhe Dios tí sín judío, a ntá iso tí sín jehya judío k'uitja sín tí kjuaxróxin kuènte Dios. A ntá tí chrókuitekaon tí sín judío kjaxin la yóhe éxí chróxechón chojni tsík'en tí jehe sín. <sup>16</sup> Tí chrókjuinchetjóá Dios tí niotja xrankíxixín chrók'óna tí ich'o la ntá kuenté tí ch'o chrókjuinchetjóá ch'án. A ntá kjaxin tí chrókjuinchetjóá ch'án tí nuèé ijnko nta la kjaxin kaín tí chaon tí nta chrókjuinchetjóá ch'án.

<sup>17</sup> Ntá iso tí sín judío la éxí iso chaon tí nta olivo mé xíkaha tsíchrinjin la ntá jahará la éxí ijnko chaon nta olivo nteje tsík'óna injerto mé xíkaha ts'ejóchónxin tí nta chaon tí tronco tí nta olivo jína xráxín tjechón. <sup>18</sup> Ntáchrohyará kíxin tí chaon tí nta la antsí jína. Íchá jína tson-táchrórá kíxin jehya tí nta t'etuèhen ti nuèé nta. Náhí. Tí nuèé mé tsjinkítsa tí nta mé xíkaha tí jahará.

<sup>19</sup> Ntá jahará tson-táchrórá kíxin: "A ntá tí chaon tí nta la tsíchrinjin kíxin ntá jeheni tsitoheni lùké tí nta chaon tsíchrinjin". <sup>20</sup> Tíha la chaxín. Kjánchó chrínjin kíxin kuítekakonyha Dios. A ntá jahará la tjejorá ntiha kíxin tinkachónkirá Dios. A ntá chrokjuinchehnkehyará. Íchá jína chróchrakonrá. <sup>21</sup> Kíxin Dios la kuikonóehya ch'án tí nta chaon kuènte tí nta tronco la ntá mé xíkaha kjaxin tí jahará la tsikonóahyará ch'án. <sup>22</sup> Tsjehérá kíxin Dios la imá jína kjánchó kjaxin sinchekjasóte ch'án tí sín titekakonyha. A ntá jína ch'án la kjuínkítsa ch'án tí jahará. Kjánchó chrók'uejorá jnkojína éxí tjinkaon tí jehe ch'án. A ntá tí náhí la chaxín jahará la tsítóhará ch'án. <sup>23</sup> A ntá tí sín judío tsítóhe sín tí nkehe ntoáhya k'uékjich'e sín ntá jehe ch'án kjónté senó kóchrínjin

ch'án la ntá ijie sinchetséxin ch'án tí tronco inaá kíxin jehe ch'án la imá chóna ch'án kjuachaxin kíxin xíkaha sich'e ch'án. <sup>24</sup> A ntá jahará jehya judíorá mé tsíkóchrínjinrá ch'án nta olivo nteje. A ntá antsí má xra tsotséxin tí nta olivo jína. A ntá tí sín judío la nta chaon kuènte tí tronco nta olivo jína la antsí xrahya tsjatsuehnen tsotséxin kíchó inaá kíxin ó nta chaon kuènte.

### Tí tsjixixín ntá tsaáxin tí sín Israel

<sup>25</sup> Kíchóni, tjínkavan tsonohará tí nkehe jehó Dios nohe kíxin sinchehnkehyará jahorá kíxin ó nohará. Mé tí sín Israel tsitekakonyha sín hasta ts'ixenjian kaín tí sín jehya judío tsitekaon. <sup>26</sup> Tió xíkaha tsonhen ntá kaín tí sín Israel tsaá sín kíxin tí xroon itén Dios ntáchro kíxin:

Tí nkexro sinchekaáni mé tsixin ch'án chjasin Jerusalén la tsjatsen ch'án ti jie kuènte tí sín tsík'axrjeníxin ch'ín Jacob.

<sup>27</sup> Tíhi mé kjuachaxin nixin kuèntana ts'áyehé tí jehe sín

kíxin janhan mé kjuatsìyan ijie sín.<sup>†</sup>

<sup>28</sup> Xíkaha kíxin tí tan nixin tsaáxinni ntá tí sín judío mé tsonínkakonyhen sín Dios kíxin ntá jahará ts'ayéhérá tí nkehe kuènte Dios. Kjánchó Dios naxa tjuèhe tí jehe sín judío kíxin jehe ch'án tsíkjejá ch'án tí sín tsík'axrjeníxin tí jehe sín.

<sup>29</sup> Kíxin tí kaín nkehe kjuanjon Dios la tsakitsjehya ch'án la ko tsítóehya ch'án tí sín tsík'íyehé ch'án. <sup>30</sup> Senó la jahará k'uékítekákonyhará Dios a ntá ijie la tí sín judío titekakonyha sín. A ntá jahará la kjónté la kuikonóahará Dios.

<sup>31</sup> Mé xíkaha jehe sín kuítekakonyha sín Dios la ntá kjónté xíkaha la jehe ch'án tsikonóehé tí jehe sín éxí kuikonóahará ch'án. <sup>32</sup> Kíxin Dios la kuítóhe ch'án kaín chojni kíxin chrókjuasin sín jie kíxin

<sup>†</sup>11:27 Salmo 14.7, Isaías 59.20

ntá tsjakoxin ch'án tí kjuachaxin kuènte ch'án kixin sinchetjóá ch'án kaín sín kjónté chojni chóna jie.

<sup>33</sup> A ntá tí kjuachaxin kuènte Dios la imá jie la ko imá nohe ch'án. Ninkexró tsjachahya tsochronkaxín nkexrí tjenkayáxin ch'án la ko ninkexró tsjachahya tsienxín tí ntja kuènte ch'án. <sup>34</sup> Ntáchro xroon itén Dios kixin: “¿Xá nkexro chrókienxín nkexrí tjenkayáxin Ìnchéni la xá nkexro chrókjuinkítsa chrókjuakohe tí jehe ch'án? <sup>35</sup> ¿Xá nkexro kjuanjon nkehe senó k'uáyéhe Dios a ntá ijie tjinkaon chrók'uáyéhe ínaá?”<sup>36</sup> Kixin kaín nkehe la tixín tí tjen Dios kixin kaín nkehe la kjuich'ena ch'án kixin jehe ch'án chóna ch'án. Mé xikaha tjancheheni kjuasáyé Dios jnkochrín. Amén.

### Chjehérá cuérporá Dios kixin sinchetjóá ch'án

**12** Mé xikaha kichó ni, xrjanóahará kixin Dios ó kuikonóahará ch'án ntá jahará chróchjehérá cuérporá Dios éxi ijnko nkehe tjechón kixin jehe ch'án ó kjuíntatjóará ch'án la mé xikaha chrókóxrjínhjin ch'án. Tíhi mé ijnko nkehe ntoá t'ichjánxin chróchjéheni ch'án. <sup>2</sup> Chrókóxrjánhyará tí nkehe síin chjasintajni. Náhí. Chrókónixin tí nkehe tjenkayáxinrá kixin jína chrókjuenkayáxinrá. Xikaha ntá chrókónohará kixin nkexrí tjinkaon Dios kixin ntoá chrók'uejorá éxi tóxrjínhjin ch'án.

<sup>3</sup> Kjuasáyé Dios kjuanjon ch'án tí xra tjet'ahá ch'án. Mé xikaha nixjahará kaín rá kixin chrókjuenkayáxinhyará kixin imá tjetoaná. Náhí. Chrókjuenkayáxinrá jína éxi tí kjuachaxin tjáhará Dios éxi nkexrí tinkachónkirá ch'án. <sup>4</sup> Mé xikaha ijnko cuerpo la nchónhya parte chóna. A ntá tí parte la jehya jnkokón

xra chrókjuich'e. <sup>5</sup> Mé kjaxin xikaha tí jeheni kjónté nchónhyani la ts'ónani jnkokoá cuerpo kuènte Cristo. Mé xikaha jnkokoá chrókjuenkayáxin kixin ó k'ónani jnkokoá cuerpo.

<sup>6</sup> Dios kjuanjon nchónhya clase xra éxi tjinkaon ch'án chróchjéhe ch'án jnkojnko chojni tí xra. Ntá t'ichjánxin jína sich'eni tí xra kjuanjon ch'án. A ntá tí kjuanjon ch'án kjuachaxin kixin tsochronkaxínni tí tan kuènte ch'án ntá t'ichjánxin sich'eni tí xra éxi titekaonni ch'án. <sup>7</sup> A ntá tí kjuanjon ch'án xra tsjinkítsani í jnko nkexro ntá t'ichjánxin jína sich'eni tí xra a. A ntá tí nkexro tsík'áyéhe kjuachaxin tsjako la t'ichjánxin jehó tí xra a chrókjuako. <sup>8</sup> Tí nkexro tsík'áyéhe kjuachaxin nchexraxinkaon í jnko nkexro la kaín asén chrókjuich'e ch'án tí xra a. A ntá tí nkexro tsjanjon ichrén nkehe la chrókójjehya chrókjuanjon ch'án. A ntá tí nkexro t'etóan la jína chrókjuich'e ch'án xra la ko tí nkexro chrókjuinkítsa tí sín chónahya la kjuaxróxin chrókjuinkítsa sín.

### Tí nkehe chrókjuich'e tí sín tinkáchónki Cristo

<sup>9</sup> Kaín asánrá chrótjuèherá kichuára. Chrókuítóherá tí nkehe jínahya tjenkayáxinrá la chrókjuenkayáxinrá tí nkehe jína. <sup>10</sup> Chrótjuèherá kichuára la ko chaxín chrókjuikosáyehé kichuára.

<sup>11</sup> Chrókósáhyará la chrókjuich'eherá Ìnchéni xra kaín asánrá.

<sup>12</sup> Chrókócháhará kixin tjejóchonhénrá la chrókóninkákonhyará kjónté chrókjuasótíará. Chrókuítóéhyará chrónixjehérá Dios.

<sup>13</sup> Chrókjuinkítsará tí sín tinkáchónki Ìnchéni tí chónahya sín nkehe sine sín. Chjehérá kjuachaxin ts'ejó tí sín tsjijinjahará sín.

<sup>14</sup>Nixjehérá Dios la tsjanchehérá ch'án kixin sincheyaon ch'án tí sín chonkíhará. Tjanchehérá Dios tsjinkítsa tí jehe sín la jehya kixin chrókóninkákonhénrá sín.

<sup>15</sup>Tócháhaakoará tí sín tjejóchéhe sín la ko tí tjejótsjánka sín la koírá chrótsjanará.

<sup>16</sup>Kjuaxróxin chrók'uejorá. Chrókjuínchehnkehyará. Náhi. Chrókóyóhárá éxí tí sín nòa. Chrókjuínchehnkehyará kixin nohárá.

<sup>17</sup>Chrókjuich'ehyará jínahya tí sín kjuít'ahará ichrén nkehe jínahya. Náhi. Íchá jína chrókjuákoxinrá nkehe jína kixin chrók'uikon kaín chojni.

<sup>18</sup>Chrókjuéyará jnkojína chrók'uejórá. Exí nkexrí chrókjuachará la kjuaxróxin chrók'uejorá kaín rá. <sup>19</sup>Tjuahará kíchó ni, la chrókjuínchekjásótehyará jahorá tí sín ichrén nkehe kjuít'ahará. Náhi. Títohérá kixin Dios sinchekjasóte tí sín a. Ntáchro xroon itén Dios kixin: “Ixra kuèntana sintakitoaxián tíha. Janhan tsjénkaḥa tí sín a, ichro ìnchéni.”\*\*

<sup>20</sup>Kjaxin ntáchro xroon itén Dios kixin: “Tí sín nínkakonhan t'énxín sín kjinta la chróchjehé sín nkehe chrókjóne sín la tí t'énxín sín ntḥa la kjaxin chróchjehé sín nkehe chrók'ui sín. Mé xíkaha chrókjuich'e kixin chrókósuèhe sín kixin tí nkehe kjuích'e sín.”††

<sup>21</sup>Chrókjuítoéhyará kixin chrókjuacha tí nkehe jínahya chrók'ueṭuānhanrá. Náhi. Chrókjuich'erá tí nkehe jína kixin chrókjuachahya tí nkehe jínahya chrók'ueṭoan.

**13** Kaín chojni t'ichjánxin sinchexiteyèhe sín tí gobierno kixin tí kjuachaxin chónṭa sín la Dios tsíkjanjon kixin kohya nijnko gobierno chrók'uejé tí jehya kjuachaxién Dios. <sup>2</sup>Mé xíkaha tí sín tjanjonko tí sín

t'etōan la kjaxin nínkakonhen sín tí nkehe k'ueṭoan Dios. A ntá tí sín xíkaha ch'e la mé jehe sín tjejá sín jie tsjasótéxín sín. <sup>3</sup>A ntá tí sín gobierno t'etōan la sinchekjasótehya sín tí nkexro titekaon ch'e nkehe jína. Náhi. Tsonínkakonhen sín tí nkexro ch'e tí jínahya. Tí tjinkáonrá tsonínkakuanhyará sín la chrók'uejorá jnkojína. Chrókjuínchexiteyèhérá

sín kixin chrókóninkakuanhyará sín. <sup>4</sup>Kixin Dios k'ueṭoan tí xra tjejóch'e sín kixin ntá jahará la jína chrók'uejorá. A ntá tí chrókjuich'erá nkehe jínahya la chróchrakonrá kixin jehya chónkó tjejó tí gobierno. Náhi. Chónṭa sín kjuachaxin sinchekjasótiará sín kixin jehe sín la Dios k'ueṭoan tjejó sín tí xra a kixin sinchekjasóte sín tí sín jínahya tjenkayáxin. <sup>5</sup>Mé xíkaha t'ichjánxin sinchexiteyèhérá tí gobierno la jehya jehí kixin chrókjuínchekjásótiahýará sín. Náhi. Ó jehí jahará chróxráxinkáonrá kixin t'ichjánxin sinchexiteyèhérá sín. <sup>6</sup>La kjaxin jehya táhó. Náhi. T'ichjánxin chrókjuenkehérá gobierno tí chichaon kuènte tí xra ch'erá tjanchia sín kixin tí gobierno la Dios k'ueṭoan tjejó sín t'etōan sín.

<sup>7</sup>Kjaxin chrókjuenkehérá kaín chojni tjasikéherá. Tí nkexro síká kuènte xra la chrókjuenka sín kuènte tí xra, la tí nkexro síká ichrén nkehe nchekji ntá tíha kjaxin chrókjuenka sín, la kjaxin chrókjuífkosáyehérá tí sín t'etōan. <sup>8</sup>Kjaxin chrókjuasikéhyará ninkexró. T'ichjánxin chrórtjuèherá kichuárá kixin tí nkexro tjuèhe kíchó la mé xíkaha kjuínchexiteyá tí nkehe k'ueṭoan tí ley. <sup>9</sup>Kixin ntáchro tí mandamiento kixin: “Tjakéhya asánrá í jnko chojni chjin la ko t'oyánhyará kichuárá la ko

\*\* 12:19 Deuteronomio 32.35

†† 12:20 Proverbios 25.21–22

t̄ehyará la nixjahyará kjuach'ia kuènte í jnko chojni. La ko tjaké hya asánrã nkehe ókjé.”<sup>‡‡</sup> Kaín tíha la ko í so nkehe t'et̄oan Dios mé tienxínni t'axrjéxín kixin: “Chrótjuèheni kichó ni éxí tjuèxín asénni.”<sup>10</sup> Tí chojni tjuèhe kichó la ninkehó nkehe jínahya sich'ehe kichó. Mé xikaha chrótjuèhe kichuárã la mé xikaha mé chróxiteyã jína tí nkehe nixja tí ley.

<sup>11</sup> Kaín tíha chrókónoheni tí tjejóni kixin ó kui tí hora chrók'uejótshjeheni chrók'uajuahyani. Tí nkexro tsaáxinni la í séhya itsi ch'án ijie, a ntã tí kjuankíxinni kuítekaonni itén ch'án la ísé tsixín ch'án.<sup>12</sup> A ntã tí tie la í séhya tsjak'e kixin ó tsi tí t'inkáséyan la chrókuít̄oheni tí nkehe ch'eni kuènte sítié la chróchóntani kjuachaxin kuènte Nchakuen Dios kixin tsjinkítsa ts'ajini tí t'inkáséyan, éxí ijnko soldado t'inkáyate ch'án ka tsík'óna chica kixin kohya nkehe tsonhen ch'án.<sup>13</sup> Chrók'uejóni jnkojína éxí nkexrí chrók'uajini chaxín ntoá tí t'inkáséyan a. Chrókjuasinhanyi kia chrókjuanjonxin chojni la ko chrókókoanhanyi la ko chrókjuenkayáxinhanyi chróchóntani nchónhya chojni chjin la ko chrókjuenkayáxinhanyi tí nkehe ntáchro asénni la ko chrókjueyáhyani kjuanínkaon la ko chrókóchjinoxíenhanyi.<sup>14</sup> A ntã jahará tákjárã tí kjuachaxin kuènte Ìnchéni Jesucristo tsjinkítsará la tíha mé éxí chrók'uínkayárã nkehe tsík'óna chica kixin kohya nkehe chrókónhanrá. La ko chrókjuenkayáxinhayarã tí nkehe ntoáhya tjenkayáxin chojni jínahya.

### Tjóntahyarã kichuárã

**14** A ntã kjónté ijnko chojni kánhyó tinkáchónki Ìnchéni la chrók'uejokoarã ch'án la ko chrókjóntahyarã ch'án kjónté kánhyó nohe ch'án.<sup>2</sup> A

ntã iso sín chaxín nohe sín la tjinkaon sín chrókjóne sín kaín nkehe. A ntã tí sín kánhyó tinkáchónki sín Ìnchéni ntã tjinkaon sín chrókjónehya sín nto, ntã kayoa ó chrókjóne sín.<sup>3</sup> Tí nkexro chrókjóne kaín nkehe chrókjóniehya tí nkexro tjinkaon chrókjónehya nkehe. A ntã tí sín chrókjónehya nkehe chrókjón-tahya sín tí sín chrókjóne sín kaín nkehe kixin kjónté xikaha la Dios tsakja tí jehe sín.<sup>4</sup> ¿Xã nkexro jaha kixin chrókjónta tí nkexro ch'ehe x̄ã í jnko nkexro? Tíha la x̄ã kuènte tí lám̄oé ch'án tsontáchro á jína kjuíuch'e ch'án x̄ã o náhí. A ntã kjã tsjak'e ch'án jína kixin Ìnchéni chóna ch'án kjuachaxin tsjinkítsa ch'án tsjak'e tí ch'ín a jína.

<sup>5</sup> Iso sín tjenkayáxin sín kixin imã tje-toan ijnko yaon a ntã í jnko yaon la náhí. La í so sín ntáchro sín kixin kaín yaon la ó jnkokón. Ntã jnkojnko sín la jehó sín chrókjuenkayáxin sín kixin nkehe tí chaxín titekaon sín.<sup>6</sup> Tí sín xraxinkaon tí yaon la tjikosáyehe sín Ìnchéni la kjáxin tí sín tinkáchónkihya sín xikaha la tjikosáyehe sín Ìnchéni kjónté xraxinkakonhya sín tí yaon. Kjáxin tí sín ine kaín nkehe la ine sín kixin xikaha tjikosáyehe sín Ìnchéni la kjáxin tjanchehe sín kjuasáyé Dios. A ntã kjáxin tí sín nehya kaín nkehe la xikaha mé tjikosáyehe sín Ìnchéni la kjáxin tjanchehe sín kjuasáyé Dios.

<sup>7</sup> Nijnko tí jeheni tjejóni kixin jehóni chrók'uet̄oanni la ko jehya jehí chrók'uenni.<sup>8</sup> Tí tjejóni la tjejóni kixin sich'eheni x̄ã Ìnchéni la kjónté its'enni la kuènte ch'án tí jeheni. Méx̄ã kjónté chrók'uejóchónni o kjónté chrók'uenni la kuènte ch'án tí jeheni.<sup>9</sup> Méx̄ã xikaha ntã Cristo la ik'uén ch'án la ko xechón ch'án inaã kixin k'óna ch'án Ìnché tí sín tsík'en la ko tí sín tjejóhón.

<sup>‡‡</sup>13:9 Éxodo 20.13–15, 17; Deuteronomio 5.17–19, 21; Levítico 19.18



<sup>10</sup> A ntá jahará la, ¿nkekuènte tjón tará tí kichuára o nkekuènte chontehyará kaín sín kjuasáya? Kíxin kaín ni tsochjini ní tjen Dios kíxin tsontá chro ch'án á jína xra kjuí ch'eni o náhi. <sup>11</sup> Ntá chro xroon itén Dios kíxin:

Méxra janhan takjénxian asenná, ichro ìnchéni, kíxin tí tjen la ts'ejóxin toch'in kaín chojni

kíxin kaín chojni la tsjanchia sín kjuasáya kíxin janhan mé Dios kuènte sín.<sup>¶</sup>

<sup>12</sup> Mé xikaha jnkojnkonni chrókónoheni kíxin tsochenkani Dios nkexrí kjuí ch'eni.

### Tjachruehyará kichuára

<sup>13</sup> Méxra chrókjón tahyará kichuára. Íchá jína kíxin ninkehó nkehe chrókjuí ch'ehyará kíxin ntá tí sín kichó ni chrókjuasinxinhya sín jie kíxin tí chrókjuasin sín jie ntá xikaha chrók'uitjáyánxín tí tinkáchónki sín Ìnchéni. <sup>14</sup> Janhan tinkáchónkia Ìnchéni Jesús la ntá xikaha ó nõna kíxin kohya ninkehó nkehe jehí tjuáhya. A ntá ijnko nkexro tjenkayáxin kíxin jehya nkehe jína tíha ntá chaxín tjuáhya tí nkehe kíxin xikaha tjenkayáxin ch'án. <sup>15</sup> Tí tjenkayáxin tí kichuá kíxin tí nkehe inte la ntoáhya a ntá tí xikaha ch'e la tjuèhya tí kichuá. Kíxin jehya tí nkehe chrókjón te ó chrókjuínchek'itjáyánxián tí kichuá kíxin Cristo k'uenyákonhen ch'án kjaxin. <sup>16</sup> Chrókjuí ch'ehyará nkehe jínahya kíxin ntá xikaha chrók'uántaxinhin sín tí nkehe jína tinkáchónkirá. <sup>17</sup> Kíxin tí kjuachaxién Dios la jehya tí nkehe chrokjóneni o tí nkehe chrokuíni. Náhi. Tí tjen tí kjuachaxién Dios la chrók'uejóni jnkojína la ko kjuaxróxin chrók'uejóni la ko chrókóchéheni kíxin chóntani Nchákuen Dios. <sup>18</sup> Tí nkexro ch'ehe

Cristo xra mé chrókjuínchekéhe Dios la ko chrókjuínchekéhe chojni.

<sup>19</sup> Mé xikaha chrókjuéyáni kaín tí nkehe tjikao kjuaxróxin kíxin ntá tsjinkítsani tí sín kichó ni kíxin ntá kjaxin sín antsí chrókuinkáchónki sín Ìnchéni. <sup>20</sup> Chrókjuínchek'itjáyánhyará tí xra kuènte Dios kíxin tí nkehe chrókjón terá ó kíxin kaín nkehe chrókjón terá la ó tsíkjinchetjóa Dios. Tí jínahya la tí chrókjóneni ókjé nkehe ntá xikaha la í so chojni chrók'uitjáyánxín tí nkehe tinkáchónki sín. <sup>21</sup> Ntá íchá jína chrókjón tehyará into la ko chrók'uihyará vino la ko ninkehó nkehe chrókjuí ch'ehyará tí xikaha chrókjuasixín jie kichuára. <sup>22</sup> Tí nkehe tinkáchónkirá la jahorá chrókónohará kíxin Dios la tjetsjehe ch'án. A ntá jína tsjak'e tí nkexro tí chrókjuasixínhyahya ch'án jie tí nkehe tjenkayáxin ch'án. <sup>23</sup> A ntá tí nkexro ine nkehe la tjenkayáxin sín kíxin tsjasixín sín jie ntá chaxín xikaha yámá sín jie kíxin kénhyahya asén sín kjóne sín tí nkehe. La tió kénhyahya asén sín tjenkayáxin sín la ó kjuasin sín jie.

### Nchechéhérá

#### kichuára la jehya jahorá

**15** Tí antsí tinkáchónkini Ìnchéni ntá chrókjuínkítsani tí sín kánhyó tinkáchónki tí jehe ch'án la chrókjuí ch'ehyani tí nkehe chrókóchéxinni jehóni. <sup>2</sup> Kjaxin kaín ni chrókjuínchekéheni kichó ni kíxin chrók'uejó sín jína la ko kíxin antsí chrókuinkáchónki sín Ìnchéni. <sup>3</sup> Kíxin kjaxin Cristo kjuí ch'ehya ch'án tí nkehe chrókóchéxin ch'án jehó ch'án. Náhi. Kjuínchexiteyá ch'án éxi ntá chro xroon itén Dios kíxin: “K'uinika kjuasótexinna kaín tí kjuanínkaon chón ta tí sín

<sup>¶</sup>14:11 Isaiás 45.23

nínkakonhen Dios.”§§ 4Kaín nkehe chrónka xroon itén Dios senó la tsíkjin sín ósé kixin chrókónoheni kixin ntá chrók'uejóchóhenni la chrókónínkakonhyani kixin tíha mé nchechéheni. 5Dios, mé tí nkexro tjinkítsani la ko nchechéheni, la kjaxin tsjinkítsa ch'án tí jahará kixin ts'ejorá jnkójína la ko jnkokón tsjenkayáinkoará kichuára kixin xíkaha kjuakoxin Cristo Jesús. 6Kixin kaín ni jnkokoá chrók'uákjenzinni Dios la chrókjuancheheni kjuasáyé ch'án mé jehe ch'án mé It'é Ìnchéni Jesucristo.

### Tí tan jína xrakõhë tí sín jehya judío

7Chrókjuánjonrá kjuachaxin ts'ejó í so chojni la chrótjuèherá sín kixin éxí Cristo tsík'áyéhe ch'án tí jahará mé xíkaha tsjikosáyehérá Dios. 8Janhan jína chróntáxrjan kixin Cristo ikui sich'ehe xrá tí sín judío kixin tsoxiteyá tí nkehe tsíchenka Dios tí sín tsík'axrjeníxinni ósé kixin xíkaha tsjakoxin kixin Dios la jína ch'án la sinchexiteyá ch'án tí nkehe tsíntáchro ch'án. 9La kjaxin ikui ch'án kixin kjónté tí sín jehya sín judío la chrokjuanchehe sín kjuasáyé Dios kixin kuikónõhë ch'án sín éxí chrónka tí xroon itén Dios kixin:

Janhan la ko tí sín tjejó ókjé nación mé tsjancheheni kjuasáyé Dios la ko tsotsjeni himno kixin ts'ákjenzinni ihnié ch'án.\*

10Kjaxin ntáchro í jnko parte xroon itén Dios inaá kixin:

Tsocháhaakoará kaín tí sín kuènté Dios.†

11Kjaxin ntáchro xroon itén Dios inaá kixin:

Tjanchehérá kjuasáyé ìnchéni Dios kaín rá kjónté jehya judíorá mé kaín chojni chrókjuanchehe sín kjuasáyé Dios.‡

12Kjaxin ch'ín Isaías tsíkjin kixin:

Ts'axrjeníxín ch'ín Isaí ijnko nkexro la ts'etuenhen ch'án kaín tí sín jehya judío,

a ntá tí sín a mé tsinkáchónki sín tí nkexro a.¶

Mé xíkaha ichro itén Dios.

13Dios mé tjetjanjon ch'án kjuachaxin tjejóchóhenni la jehe ch'án nchechéheni ch'án la tjanjon ch'án kjuaxróxin ts'ejóni kixin titekaonni tí jehe ch'án kixin ntá ts'ánkí tí kjuachéhe tjejóchóhenni kjuachaxiën Nchakuen ch'án.

14Kíchóni, chaxín tónòna kixin jahará la jína tjejórá la kaín xín kjuaxrexinkaon jína tjenkayáxinrá la nohará tsjínkítsará chénkará kichuára.

15La kjónté xíkaha la chrakonhya ikjian tí xroon i chr'anhánrá xrjanka kaín tí nkehe kixin chrók'uitjáyanhyará chróxráinkáonrá kaín nkehe. Mé xíkaha it'á tí xrá kixin kjuasáyé Dios kjuanjón ch'án tí xrá. 16Kixin sít'aha Jesucristo xrá tsotjanka tí sín jehya judío tí itén Dios. Tí xrá mé tjákua tí tan jína tsaáxin chojni kixin ntá janhan tsjánjuan tí sín jehya judío ts'áyéhe Dios éxí ijnko nkehe tsóxrjínhín ch'án kixin Nchakuen ch'án kótjuáxin sín.

17Janhan mé ijnko chojni tinkáchónki Cristo Jesús la mé xíkaha siín kjuachaxin tsochána kixin t'aha xrá Dios. 18Chrokjuahya tsohne tsontáxrjan í jnko nkehe. Jehó tsóxrjanka nkexrí tí kjuachaxin kjuanjón

§§15:3 Salmo 69.9

\*15:9 2 Samuel 22.50; Salmo 18.49

†15:10 Deuteronomio 32.43

‡15:11 Salmo 117.1

¶15:12 Isaías 11.10

Cristo chjina kixin tsotjanka tí sín Jehya judío tí itén ch'án kixin tsitekaon sín Dios. Ntá xikaha kuítekaon sín kixin tí itan kjuákua la ko tí nkehe jina kjuít'a. <sup>19</sup>Kixin tí kjuachaxiэн Dios mé kjuákoxiэн tí kjuásian kjuaxroan la ko kjuákoxiэн tí kjuachaxin kuэnte Nchakuen Dios. Mé xikaha kjuintaxiэн kjuákua tí tan jina tsaáxin chojni Cristo xrankixiэн chjasin Jerusalén la nkuixín chjinaxón ntiha la hasta estado Ilírico. <sup>20</sup>Mé xikaha tjínkavan tsjíkjakua tí tan tsaáxinni tí chjasin naxa tienhyé sín ihnié Cristo kixin tí janhan tjínkakhya tsjírónkaxiэн tí xra kuэnte í jnko chojni xráxín tjech'e xra. <sup>21</sup>Íchá jina éxí ntáχρο xroon itén Dios kixin:

Chrókuinhin tí sín naxa kienhyé sín tí tan kuэnte ti jehe ch'án.

La ko chrókienxín tí sín naxa kienhyé tí tan kuэnte ch'án.<sup>§</sup>

#### Ch'ín Pablo tjenkayáxin ch'án sátsji ch'án chjasin Roma

<sup>22</sup>Nchónhya veces tjínkavan chrókjuasántsjahá tí jahará kjánchó naxa xitjahya kjuasán ntiha. <sup>23</sup>Kjánchó ijie la ó kjuixinna tí xra nkuixín tí tjèn ntihi. Ntá itsjé nánó tjínkavan chrókjuasántsjahá tí jahará <sup>24</sup>a ntá ijie ts'atsínka tsonixjahará tí sátsjia nación España. Ntá tsochàna ts'fkuэн tí jahará ntá tsjixin ntá chr'éxin tjínkavan kixin jahará tsjínkítsará tí sátsjia. <sup>25</sup>A ntá ijie la sátsjiya chjasin Jerusalén, sátsjikian tí nkehe tsjinkítsa tí sín kichó ni ntiha. <sup>26</sup>Kixin tí sín estado Macedonia la ko estado Acaya kjuenkayáxin sín tsjejo sín chichaon kixin tsochr'énhen sín tí sín kichó ni ntiha tsochjéhe tí sín nòa tjejó chjasin Jerusalén. <sup>27</sup>Jehe sín kóxrjínhin sich'e sín xikaha kixin tí sín judío tinkáchónki Cristo kjuínkítsa tí jehe sín

tsonhe sín itén Dios. Ntá ijie la jehe sín chrókjuinkítsa sín inaá chrókjuanjon sín iso tí nkehe chóna sín chrók'uáyéhe tí sín judío tinkáchónki Ìnchéni. <sup>28</sup>A ntá tió tsjixin tí xra la ts'áyéhe sín tí chichaon la ntá janhan sátsjia España la ts'atsínkua tsonixjahará. <sup>29</sup>Ó nòna kixin tió sátsjia la Cristo mé imá sincheyaoon ch'án tí janhan la ko tí jahará.

<sup>30</sup>Kichóni kjuasáyé Ìnchéni Jesucristo la ko tí Nchakuen ch'án tjanjon kjuachaxin tsotjuéhени kichó ni mé xrjannóhará kixin jnkokoá chrókjuenkayáxinni kixin tí xra tjet'a la ko chrónixjehérá Dios kixin tí janhan. <sup>31</sup>Tjanchehérá Dios kixin tsjinkítsa ch'án tí janhan kixin kohya nkehe tsonna kixin kaín tí sín titekakhonya Dios sín chjasin Judea. La ko tjanchará kixin jina sátsjikian tí nkehe tsjinkítsa tí sín kichó ni tjejó chjasin Jerusalén kixin jina chrók'uáyéhe sín. <sup>32</sup>Ntá tí tjinkaon Dios la tsochàna tsjasán tí tjejorá jahará la ko kjuaxróxin tsjak'é tí tsjasántsjahará. <sup>33</sup>Dios tjanjon kjuaxróxin ts'ejokoará kaín rá. Amén.

#### Ch'ín Pablo nixjehé ch'án tí sín chóxin ch'án

**16** Tétuanhanrá tsjínkítsará tí tjan kichó ni Febe ch'e tjan xra ninko chjasin Cencrea <sup>2</sup>mé tjánjonrá kjuachaxin tsjak'e tjan kjuachaxiэн ihnié Ìnchéni éxí ch'eherá í so sín kichó ni tinkáchónki Ìnchéni. Tsjínkítsará tjan ichrén nkehe t'ichjánxinhin tjan kixin jehe tjan kjaxin kjuínkítsa tjan nchónhya chojni la kjaxin kjuinkítsa tjan tí janhan.

<sup>3</sup>Nixjehérá tjan Priscila la ko ch'ín Aquila. Jehe sín jnkokoá kjuích'ekoni xra kixin kjaxin sín mé ch'ehe sín Cristo xra. <sup>4</sup>Jehe sín chrók'uенxín sín kixin kjuínkítsana sín tí janhan mé xikaha tjahá sín kjuasáya la Jehya janhván,

§15:21 Isaías 52.15

kjāxin kaín sín kíchó ni n̄nkoé tí sín jehya judío. <sup>5</sup>Nixjehérá kjāxin kaín kíchó ni tóchjina ntōe tjan Priscila la ko ch'ín Aquila. Nixjehérá tí ch'ín choxian jína Epeneto mé jehe ch'án la saoxín kuítekaon ch'án Cristo estado Acaya. <sup>6</sup>Nixjehérá tjan María kíxin kjāxin tjan kjuích'e tjan x̄ra tí tjejórá ntiha. <sup>7</sup>Kjāxin nixjehérá tí sín tsík̄jixin chjasenná mé ch'ín Andrónico la ko ch'ín Junias. Tí k'uík̄jena ntōechiso la kjāxin tí jehe sín k'uík̄jehe sín. Kjāxin kaín tí í so sín apóstol la tjikosáyehē sín tí sín a. Jehe sín senó kuinkáchónki sín Cristo ntá chr'éxin janhan.

<sup>8</sup>Nixjehérá ch'ín Amplias kíxin jehe ch'án mé ijnko nkexro choxian la ko tjuah̄a tinkáchónki Ìnchéni. <sup>9</sup>Nixjehérá ch'ín Urbano kíxin jnkokoá kjuít'akian ch'án x̄ra kuènte Jesucristo la ko nixjehérá tí ch'ín choxian Estaquis. <sup>10</sup>Nixjehérá ch'ín Apeles. Jehe ch'án la kjónté nchónhya nkehe kónhen ch'án kjuasóte ch'án kíxin tinkáchónki ch'án Cristo. Kjāxin nixjehérá tí sín kjéhya ch'ín Aristóbulo. <sup>11</sup>Kjāxin nixjehérá tí ch'ín kjéhyana Herodión la ko kjāxin nixjehérá kaín tí sín kjéhya ch'ín Narciso kíxin kjāxin sín tinkáchónki sín Ìnchéni.

<sup>12</sup>Nixjehérá tjan Trifena la ko tjan Trifosa. Kjāxin jehe sín kjuích'e sín x̄ra kuènte Ìnchéni la ko nixjehérá kjāxin tí tjan kíchó ni Pérsida. Kjāxin kjuínk̄itsa tjan kjuích'e tjan x̄ra kuènte Ìnchéni. <sup>13</sup>Kjāxin nixjehérá ch'ín Rufo, ijnko chojni tsík̄jeyá Ìnchéni la ko nixjehérá tí iné ch'án kjāxin kíxin kjāxin tjan kjuínk̄itsa tjan tí janhan la éxí naná k'uík̄kuan tí jehe tjan. <sup>14</sup>Kjāxin nixjehérá ch'ín Asíncrito la ko ch'ín Flegonte la ko ch'ín Hermas la ko ch'ín Patrobas la ko ch'ín Hermes la ko tí í so sín kíchó ni tjejóko tí jehe sín ntiha. <sup>15</sup>Nixjehérá kjāxin ch'ín Filólogo la ko tjan Julia la ko ch'ín Nereo la ko tí tjan kíchó ch'án la ko ch'ín Olimpas la ko

kaín tí sín kíchó ni tinkáchónki Ìnchéni tjejóko sín ntiha.

<sup>16</sup>Kjāxin tsehérá tja kíchuará kjuachaxin ihnié Ìnchéni. Kaín tí sín n̄nko kuènte Cristo ntihi xraxinkaon sín tí jahará la nixjahará sín.

<sup>17</sup>Kíchóni, x̄rjanóahará kíxin chrótsjehérá nkexro tí sín tjixrónkaxin chrók'óxīka tí sín jnkokoá tinkáchónki Ìnchéni. Jehe sín titekakonhya sín tí itén Dios kjuáakohará k'uitjará. Tí x̄ikaha ch'e sín la chrók'uaxrjekjanxínrá ntiha. <sup>18</sup>Tí nkexro x̄ikaha ch'e la jehya Ìnchéni Jesucristo ch'ehe x̄ra. Náhí. Jehí tjinkaon sín chrókjuixrónkaxin sín la nixja sín tí nkehe náxrjón ó la x̄ikaha ch'iyehē sín asén tí chojni nax̄a noehya. <sup>19</sup>Kaín chojni ó nohe kíxin jahará la ó kuítekaonrá Ìnchéni. Mé x̄ikaha chàna tí janhan la tjínkavan chrókóxakonhanrá chrókjuích'erá x̄ra jína. Jehya kíxin chrókjuích'erá nkehe jínahya. <sup>20</sup>Tí Dios tjanjon kjuaxróxin mé tjoka tsinkátja Satanás, í ts'etuenhya. A ntá Ìnchéni Jesucristo mé sintayaonrá ch'án.

<sup>21</sup>Ch'ín Timoteo nixjahará ch'án. Jehe ch'án jnkokón ch'ekoni x̄ra. La kjāxin ch'ín Lucio la ko ch'ín Jasón la ko ch'ín Sosípater, tí sín chjasenná, mé nixjahará sín.

<sup>22</sup>Janhan Tercio ikjian tí xroon i k'ue-toan ch'ín Pablo la kjāxin nixjahará kjuachaxién Ìnchéni.

<sup>23</sup>Ch'ín Gayo nixjahará ch'án. Jehe ch'án kjuanjon kjuachaxin kjuak'é janhan ntōe ch'án la ko kaín tí sín kuènte n̄nko tójn̄kotsé ntōe ch'án. La ko nixjahará ch'ín Erasto. Jehe ch'án mé tesorero kuènte chjasin la ko tí ch'ín kíchó ni Cuarto kjāxin nixjahará ch'án.

<sup>24</sup>Ìnchéni Jesucristo sincheyaoon ch'án kaín tí jahará. Amén.

<sup>25</sup>Ntá ijie tsjancheheni kjuasáyé Dios kíxin jehe ch'án tjínk̄itsa ch'án kíxin jína chrók'uejórá éxí chrónka tí tan jína tsaáxinni la ko éxí kjuakoni kuènte Je-

sucristo. Tíha mé chaxín chrónka éxí Dios k'uętoan nchenoheni ch'án tí nkehe ninkexró k'uénoehya desde k'óna ch-jasintajni. <sup>26</sup> A ntá ijie kaín ni tso-noexínni nkexrí nixja xroon ikjin tí sín profeta kíxin nkexrí k'uętoan Dios it-jen jnkochrírín. Ntá kaín nkehe k'uénoe-

hya ninkexró a ntá tsochóxin kuenté ch-jasintajni kíxin tsinkáchónki sín la ko tsitekaon sín Dios.

<sup>27</sup> Itjen jnkokoá Dios la jehó ch'án imá nohe ch'án la jehó ch'án mé tjancheheni kjuasáya kíxin tinkáchónkini Inchéni Jesucristo jnkochrírín. Amén. Ó tjen.

**Tí xroon saoxín ikjin ch'ín  
Pablo chr'énhen ch'án tí  
sín tinkáchónki Cristo  
síin chjasin Corinto**

**Ch'ín Pablo mé ikjin ch'án xroon  
ichr'án ch'án tí nínko chjasin Corinto**

**1** Janhan Pablo mé kjueyána Dios tjinkaon ch'án kixin kjuachaxin kuènte Ìnchéni Jesucristo mé chrókjuit'aha ch'án xra. Janhan la ko kichó ni Sóstenes mé <sup>2</sup>ikjinni tí xroon i chr'ánhanráni tí jahará tójnksotá nínko chjasin Corinto. Ó kjuínchetjóára Ìnchéni Jesucristo na mé kjueyára Dios tí jahará kixin chrók'uaxrjekjanxínrá tí sín tjasin jie kixin tjinkaon ch'án tí jahará kixin tjóá chrók'uejorá la ko xikaha kjueya ch'án kaín xín tí sín tjanchehe sín ìnchéni Jesucristo kixin chrókjuinkitsa ch'án sín, tíha mé Ìnché sín la ko Ìnchéni. <sup>3</sup>Kjuasáyé It'éni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

**Ìnchéni Cristo mé  
tjencheyaoon tí sín ntiha**

<sup>4</sup>Jnkochríxín tjáncháha Dios kjuasáya kixin sintayaonrá ch'án tí jahará kixin tinkáchónkirá Ìnchéni Cristo Jesús. <sup>5</sup>Na mé Dios tjáhará kjuachaxin kuènte ch'án ntá xikaha antsí jína nohará chonkaxínrá kixin nkexrí tinkáchónkirá Ìnchéni la ko kjaxin antsí jína tiénxinrá kaín nkehe chaxín ntoá. <sup>6</sup>Tí nkehe kuínhínrá kixin nkexrí tjen Cristo na ntá jie jahará tjákoxinrá. <sup>7</sup>Ntá jahará ó chontará kaín xín tí kjuachaxin kuènte Nchakuen Dios, la í ninkehó t'itjáyankíhya tí kjuachaxin kuènte ch'án k'uayéhérá nachrohe tjejochonhénrá tsokjan Ìnchéni Jesucristo. <sup>8</sup>Ntá Ìnchéni

ts'ayakonhanrá ch'án kixin tsitóéhyará tí tinkáchónkirá ch'án hasta tsjixraká tí yaon tsjixixín. Ntá ninkexró ts'ekahyará jie kixin ntoáhya tjejoch'erá, tsixro sín, tí yaon tsokjan ch'án. <sup>9</sup>Ó noheni kixin Dios chaxín sinchexiteyá ch'án tí nkehe ntácho ch'án kixin jehe ch'án mé tsíkjayará ch'án kixin chrókuinkáchónkirá tí Xjeen ch'án Jesucristo, mé Ìnchéni tíha.

**Jnkokoáhya kjuenkayáxin tí  
sín tinkáchónki Cristo  
ntiha chjasin Corinto**

<sup>10</sup>Kíchóni, xrjanóaxínrá tí kjuachaxin ihnié Ìnchéni Jesucristo kixin jnkokoá chrókjuenkayáxinrá la ko chrók'uaxrjentahyará ókjé na mé jnkokoá chrókjuenkayáxinkoará kichuára. <sup>11</sup>Kíchóni, ó kuínhan tí nkehe chrónka tí sín kjéhya ch'ín Cloé kixin síin kjuanínkaon tí tjejorá tójnksotá ntiha. <sup>12</sup>Na mé ntáxrjan kixin isorá ntáchorá kixin jahará chréhérá tí janhan Pablo, la ko í sorá ntáchorá kixin jahará chréhérá tí ch'ín Apolos, la ko í sorá ntáchorá kixin jahará chréhérá tí ch'ín Pedro, la ko í sorá ntáchorá kixin chréhérá Cristo. <sup>13</sup>¿Xá nkekjaín Cristo síin kixin? ¿Á jehya jnkokoá Cristo tinkáchónkini? ¿Á janhan Pablo k'uényákonhanrá ní? ¿Á kuíkitezínrá tí nina ní? <sup>14</sup>Tjáncháha Dios kjuasáya kixin nijnko tí jahará kuíkítiahyará ntiha. Jehó ch'ín Crispo la ko ch'ín Gayo mé kuíkíte janhan. <sup>15</sup>Na mé nijnkorá xitjahya tsontáchorá kixin nina kuíkitezínrá. <sup>16</sup>Kjaxin jehó kuíkíte tí ch'ín Estéfanos la ko tí sín kjéhya ch'án. Xráxinkakonhya á kuíkíte í so sín o náhi. <sup>17</sup>Kixin tí xra chjina Cristo jehya kixin chrókuíkíte chojni. Náhi. Tí xra chjina Ìnchéni kixin tsóxrjankaxián tí tan tsaáxinni. Tjínkakonhya kixin chrókjuákoxian palabra náxrjón noi kixin xikaha chrókjuákua ntá

chrókjuintamá tí kjuachaxin jíé kónoxín tí k'uénxin Ìnchéni Jesús tí ntacruz, kjuák'enkáni ch'án, k'uenyákonhenni ch'án.

**Cristo mé tjáqoxin tí kjuachaxién  
Dios la ko tjáqoxin ch'án  
kíxin imá nohe Dios**

<sup>18</sup> Chronkaxínni kíxin k'uenyákonhenni Cristo tí ntacruz. A ntá tí tsinhin tí sín xráxín ts'itjáyan ntá ts'ikon sín tíha éxi nkehe chónkó. A ntá kaín ni chojni kuaáni mé t'ikonni kíxin kjuachaxin jíé tíha. <sup>19</sup> Mé xíkaha ntáchro xroon itén Dios tsíkjín sín ósé kíxin Dios mé sinchek'itjáyan tí nkehe tjenkayáxin tí sín imá nohe, la ko tsítóenta ch'án tí nkehe ntáchro tí sín imá tienxín sín.\*\*

<sup>20</sup> ¿Mé nkehe tsonhen ntáchro sín kíxin imá nohe sín la ko nkehe tsonhen tjako sín la ko nkehe tsonhen tí imá nohe sín nixja sín? Táha la nkehe síin chjasintajni ó. A ntá Dios mé t'ikon ch'án kíxin lontí sín kíxin xíkaha ichro sín. <sup>21</sup> Kíxin Dios antsí nohe ntá xíkaha kuítóehya ch'án kíxin kjuachaxin kuènte sín ó chrókjuacha sín chróchóxixín sín ch'án. Ntá kóxrjínhin Dios chrókjueyá ch'án chrókjuinchekaá ch'án tí sín kuítekaon tí tan tsaáxinni mé tí nkehe ó chónkó, ichro tí sín ókjé.

<sup>22</sup> Tí sín judío mé tjinkaon sín chrók'uikon sín kjuaxroan jíé, ichro sín. A ntá tí sín nkíva griego mé xritjeyá sín kíxin antsí chrókónohe sín, ichro sín. <sup>23</sup> A ntá jeheni kaín ni tinkáchónkini Cristo la tjinkakonhyani chrókónoheni kaín tíha la mé jehó Cristo tjáqoxinni. Chronkani kíxin ijnko ntacruz kjuák'enkáni ch'án, k'uénxin ch'án. A ntá tí sín judío ntáchro sín kíxin ijnko nkehe chrókósuèheni chrókuinkáchónkini tíha, ichro sín. A ntá tí sín jehya judío ntáchro sín

kíxin chojni lontí tí jeheni kíxin xíkaha tinkáchónkini, ichro sín. <sup>24</sup> A ntá tí sín kjueyá Dios, kjónté judío sín na o griego sín, la kaín ni ntáchroni kíxin Cristo mé k'uenyákonhenni ch'án. Mé xíkaha tjáqoxin Dios tí kjuachaxin jíé la ko tí kjuaxrexinkaon jína kuènte ch'án. <sup>25</sup> Ntá jehe sín ntáchro sín kíxin éxi ijnko nkehe chónkó tí nkehe kjuenkayáxin Dios, na kjónté xíkaha la antsí tjetóxin nohe Dios. A ntá tí sín imá nohe ntihi chjasintajni tsjachahya sín sincheyóhe sín ch'án. La ko kjaxin ntáchro sín kíxin jíehya tí kjuachaxin chóntha Dios. A ntá tí sín antsí má chóntha kjuachaxin ntihi chjasintajni kjónté la tóyóehya sín Dios kíxin antsí chóntha ch'án kjuachaxin t'etoan ch'án.

<sup>26</sup> Kíchóni, xráxinkáonrá nkexrí k'uéjorá ntá kjónté kjueyará Dios tí jahará. Na mé tsjéhyará imá kónohará éxi t'ikon tí sín chjasintajni la kjónté kjueyará Dios tí jahará. La ko tsjéhyará imá kuétoanrá la ko tsjéhyará k'uaxrjenixínrá tí sín imá k'uék'etoan. <sup>27</sup> Ntá kjónté Dios mé kjueyá iso tí sín noehya éxi t'ikon tí sín chjasintajni kíxin xíkaha tjinkaon ch'án chrókjuinchesuèhe ch'án tí sín imá nohe ntihi chjasintajni. La ko kjaxin kjueyá Dios iso tí sín chóntahya kjuachaxin éxi t'ikon tí sín chjasintajni kíxin xíkaha tjinkaon ch'án chrókjuinchesuèhe ch'án tí sín imá chóntha kjuachaxin ntihi chjasintajni. <sup>28</sup> Dios mé kjueyá ch'án iso tí sín t'etoanhya la ko iso tí sín ninkehó sínkíhya tónhen sín ntihi chjasintajni kíxin jehe ch'án mé chrókjuinchek'itjáyan ch'án kjuachaxién tí sín jehó chrók'uetóan. <sup>29</sup> Méxra xíkaha ninxeró tsjachahya sinchehnke tí tjen Dios. <sup>30</sup> A ntá tí kjuachaxin kuènte Dios mé tinkáchónkirá Cristo Jesús, a ntá chóntaxínni Cristo kjuaxrexinkaon jína,

\*\*1:19 Isaiás 29.14

la ko tí kjuachaxin kuènte ch'án kóxíka tí jie kuènteni, la ko tí kjuachaxin kuènte ch'án sinchetjuáxinni ch'án, la ko tí ijnié ch'án k'ueñaxínni ch'án. <sup>31</sup>Mé xíkaha éxí chrónka tí xroon tsíkjin sín ósé ntáχρο kíxin: “Tí nkexro tjinkaon chrókjuinchehnke ch'án la chrókjuinchehnkehya ch'án la jehó chrókjuakoxin ch'án kíxin imá t'etoan tí kjuachaxin kuènte Dios.”††

**Ch'ín Pablo mé tjako  
ch'án kíxin Jesucristo  
kjuák'enkáni ch'án ntacruz**

**2** Kíxhóni, tió kjuasán ntiha chjasánrá níxjahaará chrókjuákohará nkexrí tjen Dios la jehya ijnko tan tienxínhya chojni la ko jehya itan imá noi chrókjuákoáxinrá. <sup>2</sup>Kíxin tió k'uejóni jnkokoá ntiha kjuenkayáxinhya janhan kíxin í so nkehe chrók'uitja chróxrjanka la jehó tjínkavan chróxrjanka kíxin Jesucristo la kjuák'enkáni ch'án tí ntacruz. <sup>3</sup>K'uejóni jnkokoá ntiha la ntá jahará ó nohárá kíxin janhan kjuak'é éxí chrókjuachahya kíxin síxränkana, chràkonna. <sup>4</sup>Tí kjuankíxian níxjahaará la ko xrjankaxián tí tan tsaáxin chojni, la tjínkakonhya chrókjuáchruàxinrá tí nkehe náxrjón níxja chojni tsíkónohe má. Náhi. Tió kjuákohará kónoxín kíxin tjékian Nchakuen Dios la ko kónoxín tí kjuachaxin jie kuènte ch'án, <sup>5</sup>kíxin jehya kjuaxrexinkaon kuènte chojni tsíkónohe má chrókuinkachónkirá. Náhi. Tí kjuachaxin kuènte Dios mé chrókuinkachónkirá.

**Nchakuen Dios mé  
tsöchóxixínni ch'án**

<sup>6</sup>Kjánchó tió tjákoḡa tí sín chaxín ó nohe sín tinkáchónki Ìnchéni mé xrjanka tí kjuaxrexinkaon antsí noi. Na mé je-

hya tí nkehe nohe tí sín chjasintajni, la ko jehya tí nkehe nohe tí sín t'etoan chjasintajni, na mé tí kjuachaxin kuènte sín la tjoka ts'itjáyan. <sup>7</sup>Jeheni mé antsí chrónkani tí nkehe jehó Dios nohe, na mé tí nkehe tsíkjenkayáxin ch'án naḡa k'ónahya chjasintajni kíxin nkexrí tsaáxinni. <sup>8</sup>Nijnko tí sín t'etoan chjasintajni kienxínhya sín tí nkehe tsíkjenkayáxin Dios. A ntá tí chrókienxín sín tíha la ntá chrókjuak'enkanihya sín Ìnchéni tjettoan tí ntacruz. <sup>9</sup>Éxí ntáχρο xroon itén Dios tsíkjin sín ósé kíxin:

Naḡa k'uífkonhya chojni la ko naḡa kienhya chojni,  
la ko naḡa kjuenkayáxinhya chojni  
kíxin nkexrí síin kaín xín nkehe  
kjuích'éna Dios ts'áyéḡe tí sín  
tjuèhe ch'án.‡‡

<sup>10</sup>A ntá Dios mé nchenoexínni kaín tíha kíxin chóntani Nchakuen ch'án. Na mé tí Nchakuen Dios mé tjetsjehe kíxin nkexrí síin kaín xín nkehe la ko kjaxin nkexrí tjen tí nkehe tjenkayáxin Dios.

<sup>11</sup>Na mé ninkexró mé noehya nkexrí tjenkayáxin asén chojni. Na mé jnkojnko chojni mé nohe kíxin nkexrí tónhen asén. Méxra xíkaha kjaxin kohya nkexro nohe nkexrí tjenkayáxin Dios la jehó tí Nchakuen ch'án mé nohe. <sup>12</sup>A ntá jehya tí nchakuen chojni chjasintajni k'uáyéḡeni. Náhi. Tí Nchakuen kuixín tí tjen Dios mé k'uáyéḡeni kíxin ntá tsonoexínni kíxin kaín xín nkehe kjuínchekítònḡenni Dios. <sup>13</sup>Kjaxin jeheni chrónkani tíhi, a ntá jehya chronkaxínni tí nkehe tsíkónohe chojni ó. Náhi. Tí Nchakuen Dios mé nchenoexínni nkexrí tsjakoxéínni tí sín chónḡa Nchakuen ch'án.

<sup>14</sup>Kjánchó tí sín naḡa chóntahya Nchakuen Dios mé xitjahya ts'áyéḡe sín tí nkehe tjanjon Nchakuen Dios. Na mé

††1:31 Jeremías 9.23

‡‡2:9 Isaías 64.4



éxi lóco t'ikon sín kaín tíha kíxin jehó tí sín chóna Nchakuen Dios mé tsjacha sín tsienxín sín tíha. <sup>15</sup> A ntá tí nkexro chóna Nchakuen Dios mé chrókjuacha chrókónohe nkexrí síin kaín xín nkehe. Kjánchó tí nkexró chónahya Nchakuen Dios tsjachahya tsjanchia jie tí jehe ch'án. <sup>16</sup> Méxra ntáchro xroon itén Dios kíxin: ¿Xá ninkexró chrókónohe kíxin nkexrí tjenkayáxin Ìnchéni kíxin chrókjuacha sín chrókjuakóhe sín ch'án ínaá?<sup>¶</sup> Kjánchó jeheni la ó chóntani tí kjuaxrexinkaon kuènte Cristo.

### Tí sín jnkokoá kjuích'ehe sín Dios xra

**3** Mé xíkaha, kíchó ni, kjuachahya janhan chróníxjahará éxi chojni t'etuenhen asén sín Nchakuen Dios. Náhi. Éxi chojni naxa nchexiteyéhe sín tí nkehe ntáchro asén sín, na mé éxi xjan ntsínsí na ntá kjuankíxin kuinkáchónki Cristo mé xíkaha tí jahará. <sup>2</sup> Janhan na kjuákoáxinrá nkehe xrahya éxi yóhe ijnko xjanhte tí jahará naxa nchekakí iné tsjen kíxin naxa xitjahya sine nkehe cha. Mé xíkaha tí jahará naxa xitjahya sinterá nkehe cha <sup>3</sup> kíxin naxa éxi chojni ó nchexiteyéherá tí nkehe ntáchro asánrá kíxin tí naxa síin kjuachjinoxínhin la ko síin kjuanínkaon la ko jnkokoáhya tjenkayáxinrá, la mé tjejoch'erá éxi ch'e kaín xín chojni chjasintajni. <sup>4</sup> Isorá ntáchrórá kíxin chréhérá tí janhan Pablo, la ko í sorá ntáchrórá kíxin chréhérá tí ch'ín Apolos. Na mé éxi chojni chjasintajni ó tjenkayáxinrá.

<sup>5</sup> ¿Xá nkexro tí Pablo la ko nkexro tí Apolos? A ntá jeheni ó jehí ijnko chojni kjuích'ehe Dios xra, a ntá jahará kuinkachónkirá Ìnchéni kíxin janhan kjuákoahará. Jnkojnkoní kjuích'eni tí xra kjuanjon Ìnchéni. <sup>6</sup> Janhan kuènká, a ntá ch'ín Apolos intá kjuáka ch'án, a ntá Dios la mé kjuínchek'ánkí ch'án tí

nkehe a. <sup>7</sup> Méxra tí nkexro k'uenkaxin la ko tí nkexro tjáka ntá la kánhyó tjetean kíxin Dios mé chóna kaín kjuachaxin la jehe ch'án nchek'ánkí kaín nkehe síin. <sup>8</sup> A ntá tí sín t'enká la ko tí sín tjáka ntá la ó jnkokón ch'e sín xra, a ntá Dios mé tsjenkehe sín jnkojnko tí xra kjuích'e sín. <sup>9</sup> Méxra jeheni mé jnkokoá ch'ehe Dios xra, a ntá jahará mé éxi tí nontee Dios, ntaha ch'e ch'án xra, la ko kjaxin jahará mé tí nchia tjech'éna ch'án. <sup>10</sup> Janhan mé tí maestro ch'éna nchia kíxin Dios kjuanjon kjuachaxin tsjaké tí xro xrankíxixín, a ntá í jnko nkexro sich'éna nchia chrítaón tí xro a. A ntá jnkojnko nkexro t'lichjánxin ntoá chrókjuích'éna sín nchia chrítaón tí xro a, <sup>11</sup> kíxin kohya ninkexró tsjacha tsjak'e í jnko xro xrankíxixín tí nchia a kíxin táha la ó tsíkjixín tsík'óna, kíxin Jesucristo tíha. <sup>12</sup> A ntá chrítaón tíha mé tsjacha sich'éna chojni nchia tsík'óna chica oro, la ko chica plata, la ko xro náxrjón tjete, la ko inta tabla, la ko kaní, la ko ntaxro. <sup>13</sup> Na mé tsonoxín nkehe tí xra kjuích'e jnkojnko chojni tió tsi tí yaon tsjixixín. Kíxin tí yaon a mé tsi xrohi. A ntá tí xrohi mé tsjakoxin nkexéhe tí xra tsoche la ko nkexéhe tí xra tsochehya. <sup>14</sup> A ntá tí jnkojín chojni kjuích'éna ijnko nchia tsochehya la mé tsjacha ch'án tí xra kjuích'e ch'án. <sup>15</sup> A ntá tí chróche tí nchia kjuích'éna ijnko chojni, ntá chrók'uitjáyan kuenté. A ntá tí nkexro kjuích'éna nchia la tsaá éxi yóhe chrókuinkéhe ch'án xrohi.

<sup>16</sup> ¿Á noahyará kíxin jahará kaín rá na mé ijnko nínkoe Dios la ko Nchakuen Dios mé chóna asánrá? <sup>17</sup> A ntá jnkojín nkexro tjinkaon ts'óxíka tí nínkoe Dios na mé Dios mé sinchek'itjáyan tí nkexro xíkaha sich'e kíxin tí nínkoe Dios la tjóá tíha. A ntá tí nínko a mé jahará tíha.

<sup>¶</sup>2:16 Isaiás 40.13

<sup>18</sup> Ninkexró chrókjuenkayáxin kixin imá nohe. Tí jnkojínrá tónhen asánrá kixin imá nohará éxí nohe chojni chjasintajni ó, na ntá chrókjanrá chrók'ónará éxí chojni noehya kixin ntá chrók'uitjárá chrók'ónará ijnko chojni chaxín nohe. <sup>19</sup> Tí nkehe nohe tí chojni chjasintajni la mé ijnko nkehe lontj t'íkon Dios. A ntá ntáchro tí xroon itén Dios tsíkjín sín ósé kixin: “Tí nkehe tsík'itjá sín ch'iyaxín sín la tíha mé tsokjan ts'enxín sín.”<sup>§§</sup> <sup>20</sup> La ko kjaxin ntáchro xroon itén Dios kixin: “Ínchéni la ó nohe ch'án kixin kaín nkehe tjenkayáxin tí sín ntáchro sín kixin imá nohe sín la mé ijnko kjuaxrexinkaon lontj tíha, ichro Dios.”\* <sup>21</sup> Méxra chrókjuinchehnkehyará jahará kixin chréhérá ijnko chojni imá nohe, kixin kaín xín nkehe síin la kuéntará jahará, <sup>22</sup> mé janhan Pablo, la ko ch'ín Apolos, la ko ch'ín Pedro, la ko tí chjasintajni, la ko tí kjuachón, la ko tí kjuach'én, la ko tí nkehe sítónhen jie, la ko tí nkehe tsonhen chr'éxin, la kaín la kuéntará tí jahará. <sup>23</sup> A ntá jahará la Cristo mé t'ayakonhanrá. Kixin Cristo la jehe ch'án la mé kuente Dios.

### Tí xra kjuích'e tí sín kjueyá Ìnchéni

**4** Jahará chrók'uikonrá tí jeheni éxí chojni ch'ehó Cristo xra k'uáyéhéni tí xra tjakoni tí nkehe kuente Dios ninkexró k'uénoehya. <sup>2</sup> A ntá ijnko chojni k'uáyéhe xra ts'etoan chrókjuakoxin kixin jína ch'án la ko jína ch'e ch'án xra. <sup>3</sup> A ntá janhan tóxakonnahya tí nkehe chróntáchorá jahará chrókjuanchiará jie tí janhan kixin tí xra t'aha Dios, la ko kjaxin tóxakonnahya tí nkehe chróntáchro í so chojni chjasintajni, chrókjuanchia sín jie tí janhan. Kjaxin janhan la tékahya jie asenná. <sup>4</sup> Kjánchó janhan tjenkayáxinhya kixin chonta jie.

Kjánchó jehya xikaha tsontáxrjan kixin Dios t'íkon kixin chontahya jie janhan. Náhí. Jehe Ìnchéni mé tsotsjehe ch'án nkehe tí jie chonta janhan. <sup>5</sup> Méxra naxa kjuixrakáhya yaon chrókjuinchekitoxénrá ichrén jie. Chonhénrá tí tsi Ìnchéni kixin jehe ch'án mé sinchenoxín ch'án kaín tí nkehe símá tí sítié, la ko sinchenoxín ch'án kaín xín nkehe imó tjenkayáxin sín asén chojni. A ntá Dios mé tsjanjon ch'án tí nkehe tsjacha jnkojnko chojni.

<sup>6</sup> Kíchóni, nixjohará tí nkehe i kixin jína chrók'uejorá jahará ntá xikaha kjuintayóaxian éxí ch'ín Apolos la ko éxí janhan kixin chrók'uitjárá kixin chrókjuenkayáxinrá jehó tí nkehe tsíkjin sín ósé, kixin nijnko nkexro chrókjuinchehnkehya kixin chréhe sín ijnko chojni, a ntá tsochóntehya sín kjuasáyé tí í jnko chojni. <sup>7</sup> ¿Méxra nkexro ntáchro kixin jahará antsí tjetoaná? ¿Xá nkehe chontará naxa kjuanjonhya Dios kixin? Tí kjuanjon Dios kaín nkehe chontará, ¿ntá nkekuente nchehnkerá kixin jahorá tsíkjeyará tíha?

<sup>8</sup> Jahará tónhanrá kixin imá rícorá. Na mé chaxín chontará kaín xín nkehe tjenkayáxinrá. Ntá jie tónhen asánrá éxí ijnko rey, la í t'ichjánxianhyará ninkehó tí jeheni kixin naxa chrókjuinkitsani. Tí chrókóchaxín chrók'ónará ijnko rey chaxín ntá kjaxinni chróchóntani kjuachaxin chrók'uetoanni. <sup>9</sup> Ntá tónhen asenná kixin jeheni chojni kjueyá Ìnchéni mé kjuanjon Dios kixin jeheni chrókjuixín chrók'uejóni éxí chojni kuitonhenni kixin noxín chrók'uenni ts'íkon kaín xín chojni chjasintajni la ko ts'íkon tí sín ángel kjaxin. <sup>10</sup> A ntá jeheni tinkáchónkini Cristo, a ntá xikaha t'íkon sín tí jeheni

§§3:19 Job 5.13

\*3:20 Salmo 94.11

éxí chojni lontj. A ntá t'ikon sín tí jahará éxí imá nohará. Jeheni la éxí chóntahyani kjuachaxin, a ntá jahará la éxí imá chontará kjuachaxin. Jeheni la tjikosáyehyani sín. A ntá jahará la imá tjikosáyahará sín. <sup>11</sup>A ntá kjónté naxa jie jeheni t'énxinni kjinta, la ko t'énxinni nta, la ko chóntahyani ikéni, la ko nínkakohenni chojni, la ko chóntahyani nkerí ts'ejóni. <sup>12</sup>La ko tóxrjéni kixin itjani ch'exínni xra. A ntá tió t'ántaxínhinni sín la tjancheheni Dios kixin sincheyaon ch'an tí jehe sín. La ko tió chónkíhi sín tí jeheni la tónínkakuenhyani sín. <sup>13</sup>Tió t'ántaxínhinni sín la jnkójina tjateheni tí jehe sín. T'ikon sín tí jeheni éxí chjínínó ntihi chjasintajni, na mé éxí ijnko nkehe ninkehó sínkíhya la ko mé xikaha naxa sítónhen tí yaon jie.

<sup>14</sup>Ikjian tíhi na jehya kixin chrókjuiñtasuàhará. Náhí. Tjínkavan chrókjuiñtaxráxinkáonrá kixin éxí xjanna t'íkuan tí jahará, tjuahará. <sup>15</sup>Kjónté chróchontará ite mil chojni chrókjuaqohará nkexrí tjen Cristo la chontahyará itsjé it'ará. Ntá janhan mé k'óna it'ará tí jahará tió kuítekáonrá Cristo Jesús kixin kjuáqohará tí tan jina tsaáxinni. <sup>16</sup>Mé xikaha xrganóqahará kixin chrókjuaqoxinrá éxí tí janhan.

<sup>17</sup>Méxra kuétuqanhan tí ch'ín Timoteo kixin tsjiji ch'an ntiha. Na mé éxí xjanna t'íkuan tí jehe ch'an, tjuaha ch'an, kixin kjuáqoha ch'an ntá kuítekaon ch'an Ìnchéni ntá xráxín jina ch'e ch'an xra. Ntá tsjiji ch'an sintaxraxinkáonrá ch'an nkexrí tjáqoxian tí ntje Cristo éxí xráxín tjákua kaín xín njnko t'atsínka tí janhan. <sup>18</sup>Ntá iso tí jahará imá ihnkerá kixin tjenkayáxinrá kixin chaxínhya chrókjuaasántsahará. <sup>19</sup>A ntá tjoka chrókjuaasántsahará tí chaxín xikaha tjinkaon Ìnchéni. A ntá jehya jehó tí nkehe nixja tí sín xriko kjuahnke mé chrókuinhan. Náhí. Na mé ts'íkuan á

chaxín chóna sín kjuachaxin kixin xikaha nixja sín. <sup>20</sup>A ntá tí kjuachaxién Dios la jehya tí nkehe tsonixjani ó. Náhí. Tí tjáqoxinni la tí kjuachaxién Dios. <sup>21</sup>¿Nkehe tjinkáonrá tí jahará, kixin á chrókjuaasán chrókjuiñtakjasótiará? o ¿á tjinkáonrá kixin jnkójina chrókjuaasán?

### Tsitóexín ijnko jie tjachehe kichó chojni

**5** ¿Á chaxín tsík'ikon sín kixin tí tjejorá ntiha la ijnkorá mé chontará nájoanrá éxí ichjiánrá? Tíha mé ijnko jie jie, la mé kjónté tí sín chónhya Dios la xikaha ch'e sín. <sup>2</sup>A ntá kjónté xikaha tsikónhen la imá ihnkerá. Íchá jina imá chrók'uavará. A ntá tí xikaha ch'e ijnko chojni ntá chrókuétuqenhenrá ch'an sáchrókjui ch'an, chrók'uejokoahyará ch'an ntiha. <sup>3</sup>A ntá ntáxrjan janhan kjónté tjenhya cuerpo kuèntana tí tjejorá ntiha la tí tjenkayáxian la ntaha tjèn éxí chrókjuaq'è janhan, ntá t'akjénxian ihnié Ìnchéni Jesucristo la ntáxrjan kixin ó kjuixin kjuenkayáxian kixin nkexrí chrókjuaasóte tí ch'ín xikaha tsík'ich'e. <sup>4</sup>Tió tsojnkotsérá kaín rá ntiha la éxí koyá tsjak'é ntiha la kjánchó nchakuennà ó la ko koí tí kjuachaxién Ìnchéni Jesús ts'ejókoará ntiha. <sup>5</sup>A ntá tí ch'ín a la nchek'ayéhérá tí ch'ín Tsochren kixin tsjasóte tí cuerpo kuènte ch'an. Ntá tió tsokjan Ìnchéni mé tsaá asén ch'an.

<sup>6</sup>Jahará chrókjuiñchehnkehyará kixin tí nkehe tsikónhen ntiha. ¿Á noahyará nkehe ntáchro sín, kixin tí ch'o a mé tjiko intsíkoá tí xroan nchek'ánkí niotja, ntá kjónté la tsosán kaín tí ch'o? <sup>7</sup>Méxra chrókuakítsjerá ntója kaín tí xroan ntaxin nchek'ánkí niotja, kixin ntá jahará ts'ejorá éxí niotja tsík'óna ch'o nixin tsík'ikohya xroan nchek'ánkí niotja. Éxí niotja ine sín tí yaon pasqua, mé jahará tíha. Kixin jehe Cristo, éxí ijnko kolélo t'óyán sín tí yaon pas-

cua, mé k'uenyákonhenni ch'án. <sup>8</sup> A ntá chrókjuasinni tí kia a la kaín asénni chrórxaxinkaonni, tíha la éxí tí niotja chóntahya xroan nchek'ánkíxin. La jehya kíxin chrókjuasinni tí kia naxa chróchóntani kjuanínkaon kíxin táha la yóhe tí xroan ntaxin nchek'ánkí tí niotja a.

<sup>9</sup> A ntá í jnko xroon chr'anhanrá k'uén-táxrjan kíxin ninkehó chrók'uítohyará tí sín tjasin jie chóna chojni chjin ókjé. <sup>10</sup> Ntá jehya kíxin kuétuanhanrá kíxin chrók'uítohyará tí sín chjasintajni tjasin jie chóna chojni chjin ókjé, la ko tí sín tjinkaon jehó sín tsochóna itsjé nkehe, la ko tí chojni teé, la ko tí sín tinkáchónki tí nkehe tsíkjanoya. Náhí. Tí xikaha chrókjuich'erá la t'ichjánxin chrók'uaxr-jéxinrá tí chjasintajni. <sup>11</sup> Méxra ó kuétuanhanrá kíxin chrók'uítohyará ninkehó jnkojín chojni ntáchro sín kíxin kichó ni tí jehe sín, ntá naxa tjasin sín tí jie chóna sín chojni chjin ókjé, la ko tjinkaon sin jehó sín tsochóna sin itsjé nkehe, la ko tí sín naxa tinkáchónki sín nkehe tsíkjanoya, la ko tí sín naxa tinkáchónki kjuach'ia, la ko tí sín tókoan, la ko tí sín teé chichaon, la mé tí chojni xikaha ch'e la chrókjóntekoahyará sín. <sup>12</sup> Jehya xraa chrókjuintakitoaxián tí ijié tí sín jehya kuènte nínko ntiha. A ntá tí xra kuéntará jahará kíxin chrókjuinchekitoxínrá tí ijié tí sín kichó ni tójnoktsé nínko ntiha. <sup>13</sup> A ntá Dios mé sinchekitoxín ch'án ijié tí sín jehya kuènte nínko. Méxra, takítsjekjanxinrá tí ch'ín jínahya kjuasin jie tí tjejorá ntiha.

### Chrókjuikjanchahya sín jie nkayakon tí ch'ín juez tinkáchónkihya Ìnchéni

**6** A ntá jnkojínrá chrókjuánjonkoará kichuára chrókjuikjanchahyará jie nkayakon tí ch'ín juez tinkáchónkihya Ìnchéni. Íchá jína chrókjuirá chróchenkará tí sín tinkáchónki Dios. <sup>2</sup> ¿Á noahyará kíxin tí sín tinkáchónki

Ìnchéni mé sinchekitoxín sín ijié kaín xín chojni chjasintajni? A ntá xikaha sinchekitoxínrá ijié kaín xín chojni chjasintajni, ¿ntá nkekuènte tsjachahyará sinchekitoxínrá kjónté ijnko jie ntsí? <sup>3</sup> ¿Á noahyará jahará kíxin kjónté tí sín ángel tsotsjeheni nkehe tí xra kjuích'e sín? A ntá ijnko nkehe tí sín ntiyhó, la ¿á xitjahya chrókjuásiyóxinrá? <sup>4</sup> A ntá xikaha chrókjuánjonkoará kichuára, ¿ntá nkekuènte tjíkjanchiará jie nkayakon tí sín tikíníxinhya kuènte nínko? <sup>5</sup> Ntáxrjan xikaha kíxin chrókjuintasuàhará. ¿Xá kohya ninkexró kichó ni ntiha chóna kjuaxrexinkaon jína tsjacha sincheyóxinhin ijié kichó ni? <sup>6</sup> Jahará jnkokoá kichuára ntá tjanjonrá, la ko kjaxin sátjíkjanchiará jie nkayakon tí ch'ín juez tinkáchónkihya Ìnchéni.

<sup>7</sup> Kjónté ijnko jie ntsí ntá imá tjanjonkoáxinrá kichuára; tíha mé t'óna ijnko jie jie. Íchá jína chrókóninkákonhyará kíxin tí nkehe jínahya kjuít'ahará sín. Íchá jína chrókuítóhéra sín kjónté tsaáhará sín. <sup>8</sup> Kjánchó kjaxin jahará ntoáhya tjejoch'erá kíxin kjónté jnkokoá kichuára la teeherá sín.

<sup>9</sup> ¿Á noahyará kíxin tí sín jínahya ch'e la ts'áyèhya sín kjuachaxin kuènte Dios? Chrókuítóéhyará chrókjuít'áyahará sín, chrókónohará kíxin tí sín tjasinko jie tí chojni chjin ókjé, la ko tí sín tinkáchónki sín nkehe tsíkjanoya, la ko tí sín tjachehe kichó sín, la ko tí chojni t'ò chjin, t'ò ntoa, la ko tí sín jnkokón ntoa sín tóxrjínhin kichó sín, <sup>10</sup> la ko tí xíchee, la ko tí sín tjinkaon sín jehó sín tsochóna sín itsjé nkehe, la ko tí sín tókoan, la ko tí sín ch'éna kjuach'ia, la ko tí sín ixri ch'ia sín kíxin tsjacha sín chichaon, na mé ts'áyèhya sín kjuachaxin kuènte Dios. <sup>11</sup> Xikaha k'uéjorá isorá senó. Ntá jie ó k'uújmárá, kjuínchetjóará Dios, ntá ó xíka ijiará

kjuachaxin ihnié Ìnchéni Jesucristo la ko kjuachaxin kuènte Nchakuen Dios.

### Tí cuerpo ó tsikótjóa

<sup>12</sup> Siín kjuachaxin kaín nkehe chrókjuít'a, kjánchó iso nkehe la ó chónkó. Siín kjuachaxin kaín nkehe chrókjuít'a, kjánchó chrókuítóahya ninkehó nkehe chrók'uetuanna. <sup>13</sup> Chaxín tí nkehe ntáchro sín kixin ó k'óna tí nkehe sineni kixin tseeni ó sátsji, la ko ó tsík'óna tseeni kixin ts'inka nkehe sineni. Kjánchó Dios mé sinchek'itjáyan yóí tíha. A ntá k'ónahya tí cuerpo kuènteni kixin chrókjuasixínni jie. Náhi. Tí cuerpo kuènteni mé k'óna kixin tsochjéxínni Ìnchéni kjuasáya, la ko jehe Ìnchéni mé ts'ayakonhen ch'án tí cuerpo kuènteni. <sup>14</sup> Méxra Dios mé kjuínchexechón Ìnchéni, mé xikaha sinchexechónxinni ch'án tí kjuachaxin kuènte ch'án.

<sup>15</sup> ¿Á noahyará kixin jnkojnko cuerpo kuèntará mé it'ò tí cuerpo kuènte Cristo? ¿Á chrókjuít'a janhan kixin it'ò tí cuerpo kuènte Cristo chrók'óna it'ò cuerpo kuènte ijnko chojni chjin ch'iyehé nchónhya chojni ntoá? Méxra kjá náhi. <sup>16</sup> ¿Á noahyará kixin tió ijnko chojni ntoá chrókuakja ijnko chojni chjin chóna nchónhya chojni ntoá, ntá tí jehe sín yóí sín chrók'óna sín jnkokoá cuerpo? Kixin ntáchro xroon itén Dios kixin: “Yóí sín la ts'óna sín jnkokoá chojni.”† <sup>17</sup> A ntá tí jnkojín chojni tinkáchónki Ìnchéni, ntá jehe la ko Ìnchéni mé ts'óna jnkokoá.

<sup>18</sup> Méxra chrókuítóhérá chróchontahyará chojni chjin ókjé. Tí í so jie tjasin chojni na mé jehya tí cuerpo kuènte sín nchekjasóte sín. A ntá tí sín tjasinko jie chojni chjin ókjé la mé nchekjasóte sín tí cuerpo kuènte sín. <sup>19</sup> ¿Á noahyará kixin jnkojnko cuerpo kuèntará mé éxi

ijnko nínko itjen Nchakuen Dios kjuanjón ch'án k'uayéhérá, la ko chontará tí Nchakuen ch'án tjóá? Jahará la jehya ìnché tí cuerpo kuèntará <sup>20</sup> kixin jahará la tjete k'uenaxínra Dios. Méxra chjeéxinra kjuasáyé Dios tí cuerpo kuèntará la ko tí nchakónra kixin yóí la kuènte Dios.

### Chenka ch'án tí sín tsikótehe kixin nkexrí chrók'uejò sín

**7** A ntá jie tsjataha tí nkehe tsikjinra kjuanchankinará, na mé ntáxrjan kixin chaxín chrókójína kixin tí chojni ntoá chrókuakjahya ichjién. <sup>2</sup> Kjánchó tí xikaha imá tjinkaon sín tsochóna sín itsjé chojni chjin tsjasinko sín jie, la íchá jína jnkojnko chojni ntoá chróchóna jnkojnko ichjién kuènte la ko jnkojnko chojni chjin chróchóna jnkojnko xii kuènte. <sup>3</sup> Tí chojni ntoá la ko tí chojni chjin chrókjuinchexiteyéhe sín kichó sín. <sup>4</sup> Tí chojni chjin jehya ìnché tí cuerpo kuènte tjan, na mé kuènte xii tjan. Ntá kjaxin xikaha tí chojni ntoá la jehya ìnché tí cuerpo kuènte ch'án, na mé kuènte ichjién ch'án. <sup>5</sup> Chrókjuincheniéhyará kichuárá, jehí jnkokoá chrókjuenkayáxinra yóírá kixin tsochonteherá iso yaon kixin ntá kaín asánra chrónixjehérá Dios. Ntá tsjixin ntá chrókóchjineherá kichuárá ínaá kixin chrókjuítóéhyará kixin ch'ín Tsochren chrókjuacha chrókjuachroerá ch'án chrókjuásinra jie.

<sup>6</sup> Kaín tíhi tjonkara kixin tsonohará kixin siín kjuachaxin xikaha na kjánchó jehya kixin xikaha tétuanhanra. <sup>7</sup> A ntá janhan ntáxrjan kixin chrókójína kixin kaín rá chojni ntoará chrókóyohará éxi tí janhan. Kjánchó Dios chjéhe kjuachaxin jnkojnko chojni, la iso la ijnko nkehe tjenkayáxin, la í so la í jnko nkehe tjenkayáxin.

†6:16 Génesis 2.24

<sup>8</sup> A ntá tí sín naxa tóteehya la ko tí chojni tsíkók'án na ntátjan sín kixin chrókójína kixin xikahó chrók'uejó sín chrókóteehya sín éxi tí janhan xikaha. <sup>9</sup> Kjánchó tí chrókjuachahya sín tí tjak'e asén kichó sín, naxa chrókjuasin sín jie, ntá íchá jina chrókótehe sín kixin jehya jina kixin jnkochrín chrókjuak'ó asén sín.

<sup>10</sup> A ntá jahará ó tsíkjixin tsíkótahará, la tétuanhanrá tíhi: a ntá jehya kixin kjuachaxin kuèntana tétuanxínrá. Náhi. Kjuachaxin kuènte Ìnchéni mé tétuanxínrá kixin tí chojni chjin chrókjuákehya xii. <sup>11</sup> A ntá tí chrókjuákehé ijnko chojni chjin tí xii, ntá xikahó chrókuitohe tjan jehó tjan la ko chrókójína chrókóyóxin, chrókjuìnhin tí kjuanínkaon kixin tí kjuákehé kichó sín. Kjaxin xikaha tí chojni ntoa la chrókjuákehya tí ichjién.

<sup>12</sup> A ntá tí nkehe tétuanhan tí í so sín jaí la kuèntana janhvàn, jehya kuènte Ìnchéni, kixin tí tjan ijnko ch'ín kichó ni chóna ch'án ichjién ch'án tinkáchónkihya Ìnchéni, na kjónté naxa tjinkaon tjan chrókjuak'eko tjan tí jehe ch'án la chrókjuákehya ch'án tí jehe tjan. <sup>13</sup> La ko tí tjan ijnko tjan kichó ni chóna xii tjan tinkáchónkihya Ìnchéni, ntá kjónté naxa tjinkaon ch'án chrókjuak'eko ch'án tí jehe tjan, ntá chrókjuákehya tjan tí jehe ch'án. <sup>14</sup> Kixin tí xii tjan tinkáchónkihya Ìnchéni ntá jie ó kótjóá ch'án kixin tí ichjién mé tinkáchónki Dios, la ko tí ijnko tjan tinkáchónkihya Ìnchéni ntá jie ó kótjóá tjan kixin tí xii tjan mé tinkáchónki Dios. A ntá tí xikahya, la tí xjeen sín chrókótuáhya, na ntá jie la mé ó kótjóá tí xjeen sín. <sup>15</sup> A ntá tí ch'ín ntoa o tí tjachjin tinkáchónkihya Ìnchéni tjinkaon chrókjuákehé kichó sín, la ája nohe sín tjákehé kichó sín, kixin Dios tjinkaon kixin kjuaxróxin chrók'uejorá. <sup>16</sup> Jahará chojni chjinrá,

¿nkexrí chrókónohará kixin nkexrí chrókuaá xiará? La ko jahará chojni ntoará, ¿nkexrí chrókónohará kixin nkexrí chrókuaá ichjiánrá?

<sup>17</sup> A ntá jnkojnko chojni chrók'uejó sín éxi tsíkjanjon Ìnchéni kjuachaxin tsík'áyéhe sín, la ko éxi tí k'uejó sín tió k'uíyehé sín Dios, kjánchó chrókuitoehya sín tí jehe ch'án. Mé xikaha tétuanhan kaín tí ninko. <sup>18</sup> Tí chrók'uíyehé Dios ijnko ch'ín chóna xroye, ntá xikahó chrókuitohe ch'án. A ntá tí chrók'uíyehé Dios ijnko ch'ín chónahya tí xroye a, ntá kjónté chrókuaahya ch'án tí xroye a. <sup>19</sup> Na mé tjetuanhya á chóna chojni tí xroye o á chónahya chojni tí xroye. Na mé tí nkehe tjetooan kixin chrókjuinchexiteyéhéni tí nkehe k'uetooan Dios. <sup>20</sup> Chrók'uejóni jnkojnkonni éxi k'uejóni tí k'uíyehéni Dios. <sup>21</sup> A ntá tió Dios k'uíyaha jaha, kjónté jaha ijnko chojni ch'exón xra, ntá chrókóxakuanhya kjónté xikahó tjech'e xra. Kjánchó tí chrók'uitjá tí tsaáxian la chrókuaákjá tíha. <sup>22</sup> Kixin tí nkexro kjuích'exón xra tió k'uíyehé Ìnchéni kixin tsinkáchónki ch'án, la mé jie chóna ch'án tí kjuachaxin tjanjon Ìnchéni. Kjaxin tí nkexro k'uítuénhya tió k'uíyehé Ìnchéni la mé jie mé ch'ehe ch'án xra Cristo. <sup>23</sup> Dios imá tjete k'ue-naxín ch'án tí jahará. Méxra chrókjuánjonhyará kjuachaxin kixin ókjé chojni chrók'óna ìnchárá. <sup>24</sup> Méxra kichó ni, éxi k'uejorá tió k'uíyahará Dios kixin tsinkáchónkirá ch'án, la xikahó naxa chrók'uejorá jie kixin chontará Ìnchéni tsjinkítsa.

<sup>25</sup> A ntá tí chojni naxa tóteehya sin na mé janhan chontahya nkehe kuènte Ìnchéni chrókuétuanhan sín. Kjánchó tsoxrjanka tí nkehe tjenkayáxian janhvàn, a ntá chrókuítekáonrá tí janhan kixin kuikonóana Ìnchéni. <sup>26</sup> Mé xikaha tónna kixin chrókójína kixin jnkojnko chojni chrókuitohe sín éxi

tjejó sín chrókóteehya sín, kixin ijie la kjuaxróxinhya tjejóni. <sup>27</sup> A ntá tí chontará ichjiánrá ntá chrókjuakeéhyará tjan. A ntá tí chontahyará ichjiánrá ntá íchá jína chrókjuéyáhyará. <sup>28</sup> Kjánchó tí chrókótahará la jehya jie tíha, la ko tí chrókótehe ijnko tjan tjarisoá la kjaxin jehya jie. A ntá tí sín tsíkótehe la tsochóna sín kjuaxikaon, mé xikaha janhan chrókjuínkítsa sín kixin chróchón-tahya sín kjuaxikaon.

<sup>29</sup> Mé xikaha tjetjonkará kichó ni kixin tsjéhya yaon naxa t'itjáyán tsokjan Ìnchéni. Mé xikaha tí chojni ntoachóna ichjién sín, la antsí tjeoan saoxín chrórxaxinkaon sín Ìnchéni, la ntá chr'éxin chrórtjuèhe sín ichjién sín. <sup>30</sup> A ntá tí sín tsjánka la chrók'uejó sín éxí chrótsjánkahya sín. La ko tí sín chéhe la chrók'uejó sín éxí chèhya sín. La ko tí sín t'ena nkehe la chrók'uejó sín éxí chóntahya sín tí nkehe tsík'ena sín. <sup>31</sup> La ko tí sín kjuacha nkehe síin chjasintajni la chrók'uejó sín éxí ninkehó chróchóntahya sín, kixin kaín nkehe t'íkonní chjasintajni ntihi mé tjoka tsjeje.

<sup>32</sup> Tjínkakonhya kixin jahará chrókóxakonhanrá. Tí ch'ín ntoachóntahya ichjin antsí má tóxakonhen tí xra kuènte Ìnchéni chrókjuinchexiteyèhe ch'án tí nkehe tóxrjínhìn Ìnchéni. <sup>33</sup> A ntá tí ch'ín tsíkótehe antsí tóxakonhen tí nkehe síin chjasintajni kixin xikaha mé sinchechéhe ch'án ichjién ch'án. <sup>34</sup> Ókjé tjenkayáxin tí tjan tsíkótehe la ko tí tjan tsíkóteehya kixin tí tjan tsíkóteehya la antsí má tóxakonhen tjan tí xra kuènte Ìnchéni kixin tjinkaon tjan kixin Dios sinchetjóá tí cuerpo kuènte tjan la ko tí asén tjan. A ntá tí tjan tsíkótehe mé tóxakonhen tjan tí nkehe síin chjasintajni kixin xikaha sinchechéhe tjan xii tjan.

<sup>35</sup> Tjetjonkará tíhi kixin tjínkavan kixin jína chrók'uejorá, jehya kixin xikaha chrókuétuanhanrá. Náhí. Tjínkavan kixin kjuasáya

chrók'uejorá jnkojína la jehó Ìnchéni chrókjuich'ehérá xra.

<sup>36</sup> A ntá jnkojínrá tjenkayáxinrá kixin chrókójína chrókótehe ijnko xjaanrá chjin kixin ó tsícha tjan, la ntá tí xikaha la ó nchoxon tsothehe tjan na mé jehya jie. <sup>37</sup> A ntá jnkojínrá tjínkáonrá kaín asánrá kixin chrókóteehya xjaanrá chjin la kjaxin tjan xikaha tjenkayáxin tjan la antsí jína tíha. <sup>38</sup> Mé xikaha tí titoherá xjaanrá chjin kixin tsothehe tjan la ó nchoxon. La ko kjaxin tí tjínkakonhya tjan kixin chrókótohe tjan na mé antsí jína tíha.

<sup>39</sup> Tí tjan tsíkótehe mé k'uítuénxín tjan kjuachaxin tí ley kixin tsjak'eko tjan tí xii tí naxa tjechón ch'án. A ntá tí chrók'uen ch'án ntá tsochóna tjan kjuachaxin tsothehe tjan inaá tí nkexro tsoxrjínhìn tjan, kjánchó jehó ijnko nkexro tinkáchónki Ìnchéni mé chrókótehe tjan. <sup>40</sup> Kjánchó antsí chrókóchéhe tjan tí jehó tjan chrókuítohe tjan, tí í chrókóteehya tjan. Méxra xikaha tjenkayáxian janhan la ko kjaxin tónna janhan kixin chonta janhan tí kjuachaxin kuènte Nchakuen Dios.

### Tí nkehe ine sín tjokehe sín tí nkehe tsíkjanoya

**8** A ntá jie tsoxrjanka kuènte ti ko it-s'en tjokehe sín tí nkehe tsíkjanoya. Na mé chaxín kaín ni noheni tíha. Ntá chrókóxakonhenni kixin tí chrók'uitjani má ntá chrókóhnkeni má. Antsí tjeoan chrórtjuèheni kichó ni kixin xikaha antsí chrókuinkáchónkini Ìnchéni. <sup>2</sup> Tí jnkojín nkexro ntáchro kixin nohe ch'án, na mé chaxínhya tíha la naxa t'itjáyán tí nkehe chrókónohe ch'án. <sup>3</sup> A ntá jnkojín nkexro tsojtjuèhe Dios la Dios tsochóxin tí jehe ch'án.

<sup>4</sup> A ntá tí chrókjóneni nto tsíkjokehe sín tí nkehe tsíkjanoya, la ó noheni jína kixin tí nkehe tsíkjanoya la t'etuanhya

ninkehó ntihi chjasintajni, la ko ó noheni kixin jnkokoá Dios tjen. <sup>5</sup> A ntá síin nkehe nchek'in sín díos nkaya nkajní la ko chjasintajni na, kjánchó tí xíkaha la kjá chrók'uixins itjsé díos la ko itjsé ìnché sín. <sup>6</sup> A ntá jeheni chóntani jnkokoá Dios na mé It'éní tíha, la jehe ch'án mé kjuích'éna ch'án kaín xín nkehe la ko tje-jóni kixin chrókjuinchexiteyéheni ch'án. La ko kjaxin itjen jnkokoá Ìnchéni Jesucristo, na mé kaín xín nkehe síin la kjuích'éna ch'án la ko kjaxin tí jeheni tsíkijich'éna ch'án.

<sup>7</sup> Kjánchó kénhya chojni nohe sín tíhi. Na mé iso sín ó kuènnen sín kuinkáchónki sín tí nkehe tsíkjanoya, a ntá jie tió ine sín tí nkehe tsíkjokehe chojni tí nkehe tsíkjanoya na mé tjenkayáxin sín kixin ó tsík'áyéhe ijnko dios, kixin naxa noehya sín má, ntá ntáchro sín kixin ó kuámá sín tí jie kuènte tí nkehe tsíkjanoya. <sup>8</sup> Ó noheni chaxín kixin jehya kixin chrókóxrjínhjn Dios tí jeheni kixin tí nkehe jína chrókjóneni. Náhí. Jehya kixin chrók'uejóx-inni jína kixin tí nkehe chrókjóneni na ko tí nkehe chrókjónehyani. <sup>9</sup> Méxra títoéhyará kixin tí kjuachaxin chontará sinterá kaín xín nkehe mé xíkaha chrókjuachroe ijnko chojni kíchó ni naxa noehya jína tinkáchónki Ìnchéni ntá tíha chrókjuasixín sín jie. <sup>10</sup> A ntá tí chrók'uikon sín kixin jahará ó nohará jína ntá ts'ejorá sinterá nkehe nkaxenhen ijnko njnkoe nkehe tsíkjanoya, ntá tí chojni kíchó ni naxa noehya jína ntá chrók'uikon sín xíkaha ntá kjaxin jehe sín tsotjinkaon sín sine sín tí nkehe tsíkjokehe chojni ijnko dios chaxínhya. <sup>11</sup> A ntá jahará ó nohará jína ntá xíkaha tjejoch'erá itsará sìnchek'itjáyánrá tí kíchó ni naxa noehya jína tinkáchónki Ìnchéni kixin Cristo k'uenyákonhen tí jehe ch'án kjaxin. <sup>12</sup> Méxra tí xíkaha chrókjuich'erá la chrókjuasinhínrá jie tí sín kíchó ni naxa tinkáchónkihya

sín Ìnchéni jína, na mé xíkaha kjaxin chrókjuasínrá jie chrókuitekákuenhyará Cristo. <sup>13</sup> Méxra tí xíkaha chrókjuasixín jie ijnko kíchó ni kixin tí nkehe chrókjóneni, ntá íchá jína chrókjónehyani nto ínaá kixin xíkaha ntá chrókjuichroexín tí sín kíchó ni ntá chrókjuasixín sín jie.

### Tí kjuachaxin chóna ijnko apóstol

**9** Chaxín janhan la kohya nkexro t'etuanna kixin janhan la chonta kjuachaxin kixin ijnko apóstol tsíkjejá Ìnchéni kixin janhan k'uúkuan ch'án. Jahará mé tjákoxinrá tí xra kjuít'a kuènte Ìnchéni. <sup>2</sup> Iso sín ntáchro sín kixin tjátsoanhyana sín kixin ijnko apóstol tsíkjejá Ìnchéni. Ntá jahará kaín rá mé chrókjuátsoanrá tí janhan kixin tí kuítekáonrá kuinkáchónkirá Ìnchéni mé xíkaha tjákoxinrá kixin chaxín janhan tsíkjejána ch'án.

<sup>3</sup> Méxra janhan jína chrókjuátaha tí sín xritjontana, chróntáxrjan kixin: <sup>4</sup> Janhan chonta kaín kjuachaxin chrók'uayáha nkehe chrókjonè la ko chrók'uia. <sup>5</sup> Kjaxin chonta kjuachaxin chróchonta ijnko chojni chjin tinkáchónki Ìnchéni chrók'uajikian éxí chóna tí í so sín tsíkjejá Ìnchéni, la ko tí sín kíchó Ìnchéni, la ko éxí chóna ch'ín Pedro. <sup>6</sup> ¿Á tjenkayáxinrá kixin ch'ín Bernabé la ko janhan jehóni chóntahyani kjuachaxin tsítoheni tí xra sich'exínni tjani? <sup>7</sup> ¿Nkexro ch'e xra soldado ntá chichakqen ch'án ó chrókuicháxinhin? Nkexro k'uenka nta to uva ntá kjónehya ch'án to? ¿La ko nkexro t'ayakonhen kolélo ntá k'uúhya tí tsjen t'énhen sín va? <sup>8</sup> Ntáchrohyará kixin janhvàn kjuenkayáxian tíha kixin kjaxin xroon tsíkjin ch'ín Moisés xíkaha nixja. <sup>9</sup> Méxra kjaxin ntáchro tí xroon tsíkjin ch'ín Moisés ósé kixin: “Chrókjuéjójáhyará kampoxa ir'va koxinta tí tsinkátja va noatrigo tió



tsónkéhe sín noa.”\* Tíha mé t'axrjexín kixin jehya koxinta ó tóxakonhen Dios. <sup>10</sup>Náhi. Tóxakonhen ch'án kixin tí jeheni. Méxra xikaha nixja tí xroon kixin chrók'uejóxinni jína. A ntá tí nkexro kjuínchenta nche la ko tí nkexro tsónkéhe noa, yói sín la chróchónhen sín chrók'uáyéhe sín tí nkehe k'óna. <sup>11</sup>A ntá tí k'uénkani tí itén Dios asánrá, la kjá chróchóntani kjuachaxin chrókjuanchaharáni ichrén nkehe t'ichjánxinhinni. <sup>12</sup>A ntá tí xikaha í so sín chóna sín tí kjuachaxin tjanchia sín nkehe ts'áyéhe sín, ntá jeheni antsí má chóntani kjuachaxin chrók'uáyéheni nkehe.

Kjonté chóntani kjuachaxin xikaha la kjuanchahyani nkehe, kjonté kánhyó náxrjón k'uéjóni kixin tjinkakonhyani chrókjuanchiani nkehe chrók'uichjánxinhinni kixin ách'e xikaha ntá chrók'uinkákonhen tí itén Cristo chrókjuakoni. <sup>13</sup>Jahará ó nohará kixin tí sín ch'e xra kùente ninko mé ntaha xránjon nkehe ine sín. La ko tí sín t'óyánxin sín ko tí altar tsochjéhe sín Dios kjaxin ine sín tí ntøe tí ko t'óyánxin sín ntiha. <sup>14</sup>Méxra xikaha kjaxin k'uetøan Inchéni kixin tí sín ch'e tí xra ó chrónka sín tí tan tsaáxinni na mé tí xra a chrók'uaxrjeníxin tí nkehe chrókjóne sín. <sup>15</sup>Kjonté janhan sífn kjuachaxin xikaha chrókjuít'a, la xikahya kjuít'a la ko kjaxin xikahya ikjian tí xroon i kixin jahará chróchjinará ichrén nkehe. Náhi. Kjonté chrók'uénxian kjinta chrókjuáncháhyará nkehe kixin tjínkakonhya kixin ninkexro chrókuakitsjena tí kjuachéhe chonta.

<sup>16</sup>Jehya kixin chrokjuíntahnke chrókjuàkua tí tan tsaáxinni. Náhi. Janhan na ó jehí sít'a tí xra a. Nòa tí janhan tí chrókjuákohya tí tan jína chrókuaáxin chojni. <sup>17</sup>A ntá tí janhván

tjínkavan chrókjuàkua la xikahó chrókjuacha janhan. A ntá tí tjàkua itén Dios kixin xikaha kuítuanna ntá xikahó ntaxiteyá tí xra chjina Dios. <sup>18</sup>¿A ntá nkehe chrókjuacha janhan? Tíha mé chrókjuacha janhan kixin chrókóchàna má kixin chrókjuàkua tí itan tsaáxinni la ninkehó chrókjuánchàhya chrókjuacha la ntá tí xikaha la chrókuákjaáhya tí kjuachaxin tí chrókjuàkua.

<sup>19</sup>Méxra kohya nkexro t'etuanna. Kjánchó ó jehí chrókjuít'aha kaín xín chojni xra kixin xikaha antsí tsjé chojni chrókjuacha janhan kixin chrókuitekaon sín Cristo. <sup>20</sup>Ti tjèn tí síin tí sín judío ntayóha éxi jehe sín xikaha janhan kixin xikaha chrókjuacha jnkójín sín chrókuitekaon sín. Na mé t'axrjexín kixin tí chrókjuacha iso ti sín nchexiteyéhe tí ley k'uetøan ch'ín Moisés, la t'ichjánxin kixin kjaxin janhan chrókjuíntaxiteyá tí ley kjonté janhan la xikahya t'etuanna tí ley. <sup>21</sup>A ntá tí chrókjuacha jnkójín tí sín nchexiteyèhya tí nkehe k'uetøan ch'ín Moisés la ntayóha éxi tí jehe sín xikaha janhan kjaxin, kjonté chaxín t'etuanna tí nkehe k'uetøan Dios méxra ntaxiteyá tí nkehe k'uetøan Cristo. <sup>22</sup>Tió tjèn tí síin tí sín tienxínhya jína, ntá kjaxin janhan t'óna éxi tí jehe sín kixin xikaha chrókjuacha jnkójín tí jehe sín chrókuitekaon sín. Méxra ntayóha éxi kaín xín chojni xikaha janhan kixin xikaha chrókjuacha janhan kixin chrókuaá iso tí jehe sín. <sup>23</sup>Mé xikaha kaín tíha jtét'a kixin chrókuinhin sín tí tan chrókuaáxin sín la ko kjaxinna antsí má chrókjuíntayaonna Dios.

<sup>24</sup>Jahará ó nohará kixin tió tsjé sín tsinkáko kichó sín la kjánchó ójnkó nkexro tsjacha tí tsítønhen nkehe. A ntá jahará xikaha chrókuinkará kixin chrók'uáyéherá tí nkehe

\*9:9 Deuteronomio 25.4

chrókuiṭoṅhanrá. <sup>25</sup> Tí sín tinkáko kichó sín na mé jína t'ayakonhen sín asén sín, títohe sín kaín xín nkehe chrókjuich'ehe sín daño kixin tjinkaon sín chrókjuacha sín, chrók'uáyéhe sín kjónté ijnko corona tsík'óna kayoa ó tjoka tsoxámá. Kjánchó jeheni ch'eni xṛa kuènte Ìnchéni kixin ntá ts'áyéheni ijnko nkehe chónhya tsoxámá. <sup>26</sup> A ntá janhan jehya éxi ijnko chojni t'ikonhya chrókuinka. Jehya éxi xṛinto ó chrókjuánjonkian. <sup>27</sup> Náhi. Janhan tjánjonkian tí cuerpo kuèntana, tétuanhan kixin jína chrókjuinchexiteyana kixin tóxakonna kixin chrókjuásian ichrén jie ntá janhan chrókjuachahya kjónté senó kjuákoha itsjé chojni.

**Tí nkehe t'etōan ch'án kuènte  
tí nkehe tsíkjanōya**

**10** Tjínkavan janhan kixin chrókónohará kichó ni kixin tí sín k'uaxrjeníxinni ósé, kaín sín k'uixinkánkí sín chrínkí tí tjuí, la ko kaín sín k'uátōye sín Ntayaon Kjátse, <sup>2</sup> la ko kaín sín k'uéchréhe sín ch'ín Moisés éxi yóhe chrókuikite sín kixin jnkokoá k'uéjō sín tí tjen tí tjuí la ko tí ntayaon la ko kjuínchexiteyēhe sín ch'án kixin jehe ch'án k'uék'etōan ch'án. <sup>3</sup> La ko kaín sín kjóne sín jnkokón nkehe kuixin nkaya nkajní <sup>4</sup> la ko kaín sín ik'ui sín jnkokón nkehe kjuanjon Dios kixin ik'ui sín ntá k'uaxrjexín ijnko tjo kjuíncheyaon Dios, na mé tí tjo a la mé t'axrjexín kixin Cristo tíha. <sup>5</sup> Kjánchó itsjé tí jehe sín kjuínchexēhya sín Dios, méxra kónínkaon ch'án la tí nteje ó k'uénxin tí sín a.

<sup>6</sup> Kaínxín tíha kónhen kixin chrórxaxinkakonxínni jeheni,

chróntáchrohya asénni chrókjuich'eni tí nkehe jínahya éxi kjuích'e tí jehe sín. <sup>7</sup> Méxra chrókuinkachónkihyará jahará nkehe tsíkjanōya éxi k'uékinkáchónki iso tí jehe sín, éxi ntácho tí xroon itén Dios tsíkjin sín ósé kixin: “Kaín sín k'uéjótjaxin sín kjóne sín la ko ik'ui sín, ntá kjuixin la k'uínkatjen sín la ité sín”.<sup>†</sup> <sup>8</sup> Méxra chrókjuasinkohyani jie chojni chjin ókjé éxi kjuích'e iso jehe sín ntá ik'uén sín, ventitres mil sín, jnkokoá yaon.<sup>§</sup> <sup>9</sup> Kjaxin chrókjuinchekóninkakonhyani Ìnchéni éxi kjuích'e sín ntá ik'uén sín kixin kjónehe sín konche,<sup>\*\*</sup> <sup>10</sup> la ko chrók'uántaxiēnyani Dios éxi k'uántaxínhin tí jehe sín ntá tí ángel kuènte kjuach'én mé kui k'óyán sín.<sup>††</sup>

<sup>11</sup> Kaín tíha kónhen tí sín k'uaxrjeníxinni ósé kixin chrókónoexínni la ko k'óna xroon chrónka xíkaha kixin nchexaxinkaonni tí jeheni tjejóni jie kixin í séhya tsjixixín tsjeje chjasintajni. <sup>12</sup> A ntá tí nkexro ntácho kixin ntoá tjen na chrókóxakonhen kixin chrókjuichroehya. <sup>13</sup> Jahará naṛa k'uatsínkahyará ninkehó nkehe tí chrókjuachahya chojni chrókónhen. Méxra jahará chrórxáxinkáonrá Dios kixin jehe ch'án chrókuítōehya ch'án tí jahará kixin chrók'uatsínkará nkehe imá xṛa chrókjuachahyará. Méxra tí itsi ichrén nkehe tsoṅhanrá la Dios tsjinkítsará ch'án kixin chrókjuachará chrók'uatsínkará tí nkehe chrókónhanrá.

<sup>14</sup> Méxra tjuahará jahará kichó ni, la ntá ntáxrjan kixin chrókuítōhéhá tí nkehe tsíkjanōya. <sup>15</sup> Nixjahará jahará kixin jahará chojni ó tienxín. Méxra jahórá chrokJuenkayáxinrá kixin á jína tí

<sup>†</sup>10:7 Éxodo 32.6

<sup>§</sup>10:8 Números 25.6–9

<sup>\*\*</sup>10:9 Números 21.5–6

<sup>††</sup>10:10 Números 16.41–49

nkehe ntáxrjan. <sup>16</sup> Tí tjanchiniani kjuasáya kíxin tí nkehe it'ini na mé kaín ni jnkokoá tjakoxinni tí ijnié Cristo ó k'uítji. La ko tió tóchrít'oni tí niotja ineni, na mé kaín ni jnkokoá tjakoxinni tí cuerpo kuènte Cristo. <sup>17</sup> Kjónté nchónhyani jeheni la kaín ni na jnkokoá niotja ineni kíxin kaín ni jnkokoá k'ónani cuerpo kuènte Cristo.

<sup>18</sup> Chrókónohará nkexrí ch'e tí sín chjasin Israel, na mé ine sín tí ko tsíkjokehe sín Dios ntá xikaha tjakoxin sín kíxin xikaha tinkáchónki sín. <sup>19</sup> Ntáxrjanhya kíxin tí nkehe tsíkjanoya la chónta kjuachaxin, la ko ntáxrjanhya kíxin tí nto tsíkjokehe sín tí nkehe tsíkjanoya la antsí chónta kjuachaxin. <sup>20</sup> Náhí. Ntáxrjan kíxin tí nkehe tjanjon tí sín chónhya Dios na mé tjokehe sín tí nchakuen tí jínhya la jehya Dios tjokehe sín tíha. Méxra janhan tjínkakonhya kíxin xikaha chrókjuich'erá jahará chróxráxinkáonrá tí nchakuen tí jínhya. <sup>21</sup> Tí its'ini tí nkehe xraxinkakonxinni ijnié Ìnchéni ntá kjaxin tí chrók'uini tí nkehe xraxinkakonxin sín tí nchakuen tí jínhya la jehya jína tí xikaha chrókjuich'eni chrók'uini. Tí sineni tí nkehe xraxinkakonxinni tí cuerpo kuènte Ìnchéni ntá kjaxin tí chrókjóneni tí nkehe xraxinkakonxin sín tí nchakuen tí jínhya la jehya jína tí xikaha chrókjuich'eni chrókjóneni tí nkehe. <sup>22</sup> ¿A jína chrókjuinchekóninkaonni Ìnchéni ní? ¿Á jeheni antsí chóntani kjuachaxin la ntá jehe ch'án la náhi ní?

**Chóntani kaín kjuachaxin kaín  
xín nkehe na kjónté antsí  
tjetoan tsotjuèheni kichó ni**

<sup>23</sup> Síin kjuachaxin ichrén nkehe chrókjuich'eni. Kjánchó jehya kíxin kaín nkehe la jína. Síin kjuachaxin ichrén nkehe chrókjuich'eni na kjánchó kénhya nkehe chrókjuinkitsa chrókónoheni tí

nkehe kuènte Dios. <sup>24</sup> Chrókjuéyáhyará tí nkehe chrók'uejóxinrá jína jahórá. Náhí. Kjaxin chrókjuéyárá tí nkehe chrók'uejóxin jína í so chojni.

<sup>25</sup> Chrókjónterá kaín nto sítóxin la chrókjuanchankíhyará ninkehó kíxin tí xikaha ntá ntoáhya chrókjuenkayáxinrá, <sup>26</sup> kíxin kuènté chjasintajni la kaín xín nkehe sín la kuènte Ìnchéni.

<sup>27</sup> A ntá jnkójin chojni tinkáchónkihya Ìnchéni chrók'uíhahará sín kíxin chrókjóntekoará sín la ko tjínkaonrá sáchrókjuirá ntaha la ntá ó nchóxon chrókjónterá tí nkehe tjáhará sín la chrókóxakuanhyará chrókjuanchankíhyará ninkehó. <sup>28</sup> Kjánchó tí chróntáchro jnkójin sín kíxin tí nto la ó tsíkjokehe sín ijnko nkehe tsíkjanoya, ichro sín, ntá tí xikaha la chrókjóntehhyará jahará, chrókóxakonhanrá kíxin ntoáhya chrókjuenkayáxin tí nkexro chrónka xikaha. <sup>29</sup> Méxra ntáxrjan tíhi kíxin tjínkakonhya kíxin ntoáhya chrókjuenkayáxin chojni ókjé, jehya kíxin ntoáhya chrókjuenkayáxinrá jahará.

Kjánchó isorá tsjanchankinará kíxin nkekuènte chrókóxakonhanrá nkehe chrókjuenkayáxin ókjé chojni kíxin tí kjuachaxin chontará. <sup>30</sup> Tí tjáncháha Dios kjuasáya kíxin tí nkehe inè, ¿ntá nkekuènte kíxin chrókjontana chojni kíxin kuènte kjoné? <sup>31</sup> Tí chrókjónterá nkehe la ko chrók'uirá nkehe la ko ichrén xra chrókjuich'erá la chrókjuáoxinrá kíxin Dios kjuínkitsará. <sup>32</sup> Ch'ehhyará ninkehó nkehe chrókjuichroxin í so chojni kjónté judío sín la kjónté jehya judío sín la o tí chojni ninkoe Dios. <sup>33</sup> Janhan mé tjéyá kíxin kaín xín xra tjét'a chrókóxrxjínhin kaín xín chojni, na mé jehya kíxin tjéyá kíxin janhván chrókjuak'é jína. Náhí. Kjaxin tjínkaván kíxin chrókuaáxin í so chojni.

**11** Chrókjuákoxinrá jahará éxi kjuákoxiā janhan kixin janhan mé kjuákoxiān éxi kjuakoxin Cristo.

**Jína chrók'uejó tí chojni chjin tió tójnkoťsé chojni**

<sup>2</sup>Kíchóni, chàna kixin xráxin xráxinkáonrá tí janhan la ko nchexiteyéherá tí nkehe kjuákohará. <sup>3</sup>Á ntá tjínkavan kixin chrókiénxinrá kixin Cristo t'etuenhen jnkojnko chojni ntoa, la ko kjaxin xikaha jnkojnko chojni ntoa mé t'etuenhen tí ichjién, la ko kjaxin xikaha Dios mé t'etuenhen Cristo. <sup>4</sup>Á ntá tí jnkojín chojni ntoa xrasixín kachjinke ch'án tí tjenixjehe ch'án Dios, o xrasixín ch'án kachjinke ch'án tí tjechronka ch'án iten Dios, mé xikaha tjakoxin ch'án kixin chóntehya ch'án kjuasáyé tí Ìnchéni t'etuenhen ch'án. <sup>5</sup>Á ntá ijnko chojni chjin tjóchín kja tjan tí tjenixjehe tjan Dios la o tjóchín kja tjan tí tjechronka tjan iten Dios, mé xikaha tjakoxin tjan kixin chóntehya tjan kjuasáyé tí xii tjan. Mé tóyóhe éxi tsíkjín tjan xikaha. <sup>6</sup>Á ntá tí chojni chjin tjínkakonyha kixin chrók'uiáxin kja tjan nkehe mé chrókjín tjan. Kjánchó tí chrókósuēhe tjan chrókjín tjan, ntá chrók'uiáxin kja tjan tóte tió tójnkoťsé. <sup>7</sup>Kixin tí chojni ntoa chrókjuasinyha ch'án kachjinke ch'án kixin jehe ch'án mé éxi retratóé Dios la ko t'inkaséyanxín ch'án tí kjuachaxin kuente Dios. Á ntá tí chojni chjin mé t'inkaséyanxín tjan tí kjuachaxin kuente tí xii tjan. <sup>8</sup>Kixin tí chojni ntoa saoxín k'óna mé k'uaxrjeníxinyha ch'án chojni chjin. Náhí. Tí chojni chjin mé k'uaxrjeníxín tí chojni ntoa. <sup>9</sup>Chaxín k'ónahya tí chojni ntoa kixin jehó tsjak'e ch'án. Náhí. Tí chojni chjin mé k'óna kixin tsjak'ekotoxin ch'án. <sup>10</sup>Ntá t'ichjánxin kixin tí chojni chjin ts'iáxin kja sín tóte chrókjuakoxin sín kixin t'ítuenhen sín kixin xikaha ts'ikon tí sín

ángel. <sup>11</sup>Kjánchó kaín ni tinkáchónkini Cristo t'ichjánxin kixin tí chojni ntoa chrókjuinkítsa tí chojni chjin la ko tí chojni chjin chrókjuinkítsa tí chojni ntoa. <sup>12</sup>Kixin chaxín tí chojni chjin na tí chojni ntoa k'uaxrjeníxín. Á ntá jie tí chojni chjin na mé t'axrjeníxín tí chojni ntoa. Á ntá kaín ni k'uaxrjeníxinni Dios.

<sup>13</sup>Jahará nkechorá, ¿á ó nchoxon kixin ijnko chojni chjin tjóchín kja tjan chrónixjehe tjan Dios? <sup>14</sup>Jahórá chrókónohará kixin chrókósuēhe tí chojni ntoa chóna kaxihi kjinjin. <sup>15</sup>Á ntá tí chojni chjin chóna kaxihi kjinjin la mé ntoá tíha kixin ó kuítuenxin tjan kixin tsochóna tjan kaxihi tjan kjinjin kixin tsotjóchínnya kja tjan. <sup>16</sup>Á ntá tí tjan jnkojín nkexro titekakonyha tíha xikaha ntá chrókónohará kixin jeheni la ko kaín xín tí sín ninkoe Dios la xikahó kuēnhenni.

**Ntoáhya kjóne sín tí niotja xraxinkakoxín sín Ìnchéni**

<sup>17</sup>Méxra tí nkehe tjékjian la mé ijnko nkehe tóxrjinnahya tjejoch'erá. Tió tójnkoťsérá ntiha la ijnko nkehe jína chrókjuich'erá. Á ntá náhi la ijnko nkehe jínahya tjejoch'erá. <sup>18</sup>Na mé saoxín na mé ntáchro sín kixin tió tójnkoťsérá la jnkokoáhya tjenkayáxinrá. Ntáxrjan kixin ách'e chaxín xikaha tjejorá. <sup>19</sup>¿Xá t'ichjánxin kixin chrók'uaxrjentará kixin chrókónoexínni kixin nkexro chaxín tinkáchónki Ìnchéni la ko nkexro tí náhi? <sup>20</sup>Méxra tí xikaha jnkokoáhya tjenkayáxinrá ntá tió tójnkoťsérá chrókjónterá niotja la chaxínnya xraxinkakoxínrá Ìnchéni tí xikaha. <sup>21</sup>Kixin tió sinterá la senó isorá tjejonterá tí nkehe tsíkjásánkoará, la isorá la kjónté naxa t'énxinrá kjinta, la í sorá la tsíkókoanrá. <sup>22</sup>¿Á chontahyará nchia ntoará? Ntahó chrókjónatexínrá la ko chrók'uíxinrá nkehe. Mé xikaha

chontahyará kjuasáyé tí nínkøe Dios la ko nchesuèhérá tí sín nõa chóntahya ninkehó. ¿Nkehe tsontáxrjan? ¿Á tsontáxrjan kíxin jína tjejoch'erá? Kjá náhi. Jehya jína tjejoch'erá.

### Jína chrórxaxinkakonxínni Ìnchéni

(Mt. 26.26-29; Mr.  
14.22-25; Lc. 22.14-20)

<sup>23</sup> Kíxin Ìnchéni mé chjina ch'án tí nkehe kjuákoahará: kíxin tí tie tsíkóxi ch'án na mé jehe ch'án kuákja ch'án tí niotja <sup>24</sup> ntá kjuixin kjuanchia ch'án kjuasáya ntá kóchrít'ò ch'án tí niotja ntá ntáchro ch'án kíxin: “Tíhi mé ntõna xránjon its'en kíxin jína ts'ejóxin tí jahará. Méxra xíkaha sich'erá kíxin tsoxraxinkákonxínrá tí janhan”, ichro ch'án. <sup>25</sup> La ko kjaxin xíkaha tió kjuixin kjóne sín ntá kuákja ch'án tí vaso la ntáchro ch'án kíxin: “Tíhi mé tjákoxin kíxin chaxín tsoxiteyá ijnko nkehe nixin kuènte Dios kíxin ts'ítji jnina. Tió its'irá tíhi mé tsoxraxinkákonxínrá tí janhan”, mé chro ch'án. <sup>26</sup> Kíxin tí interá tí niotja la it'irá tí ìnté to uva mé xíkaha tjejotjákoxinrá kíxin xíkaha k'uénxin Ìnchéni. Mé xíkaha tsjákoxinrá tsjixrakájia yaon tsokjan ch'án.

### Ntoá chrókjóneni tí niotja kuènte Ìnchéni

<sup>27</sup> A ntá jnkojín nkexro chjini chrókjóne sín tí niotja la ko chrók'ui sín tí ìnté to uva xraxinkakonxínni Ìnchéni, mé xíkaha chrókjúasin sín jie chrókjúikosáyehya sín tí cuerpo la ko tí ijnié Ìnchéni. <sup>28</sup> Méxra jnkojnkon chrókjúenkayáxinni senó kíxin á chóntahyani jie na ntá chrókjóneni tí niotja la ko chrók'uini tí ìnté to uva. <sup>29</sup> A ntá tí xíkaha chjini chrókjóneni la ko chjini chrók'uini la chaxínhya chrórxaxinkakonxínni tí cuerpo kuènte Ìnchéni la mé tí xíkaha chrókjúich'eni la chrókjúasótéxinni tíha. <sup>30</sup> Mé xíkaha

itsjérá níhará la ko itsjérá tsankahyará la ko jnkojínrá k'uénrá. <sup>31</sup> A ntá tí chrókjúatsoanni nkexrí tjen asénni jeheni ntá Ìnchéni t'ichjánxienhya chrókjúinçekjasóteni ch'án. <sup>32</sup> A ntá kjónté chrókjúinçekjasóteni Ìnchéni ntá chrók'uitjani chrókjúinçekxiteyéheni ch'án, ntá chrókjúasótehyani éxi tsjasóte tí í so chojni chjasintajni.

<sup>33</sup> Méxra kichó ni, tió tójnkoitérá sinterá la chróchonhérrá chrókui tí í so sín ntá chrókjóntekoará sín jnkokoá. <sup>34</sup> A ntá tí nkexro ik'uén kjinta la íchá jína senó chrókjónexín nkehe ntøe ó kíxin ntá chrókjúinçekjasótehyará Dios kíxin xíkaha ntoáhya tójnkoitérá. A ntá tí í so nkehe la tsjásiyóxian janhan tió tsjasántsahará.

### Nchakuen Dios mé chjéhe kjuachaxin jnkojnko chojni

**12** Kíchóni, tjínkavan kíxin tsonohará jína kíxin nkexrí síin tí kjuachaxin tjanjon Nchakuen Dios t'áyéhe jnkojnko chojni.

<sup>2</sup> Jahará ó nohará jína kíxin tió naxa kuinkachónkehýará Ìnchéni na mé kuinkachréhérrá tí nkehe tsíkjanoya nixjahya. <sup>3</sup> Méxra chrókónohará kíxin nijnko nkexro nixjaxin kjuachaxin Nchakuen Dios tsjacha ts'ántaxinhin Jesús, la ko nijnko nkexro tsjacha tsontáchro sín kíxin Jesús mé Ìnché sín tí nixjaxinhya sín tí kjuachaxin Nchakuen Dios.

<sup>4</sup> A ntá nchónhya xra kuènte kjuachaxin Nchakuen Dios síin la kjánchó jnkokoá Nchakuen Dios mé tjetjanjon. <sup>5</sup> La ko síin nchónhya nkexrí sich'ehe ni xra Ìnchéni, kjánchó Ìnchéni la ójnkó nkexro tíha. <sup>6</sup> La ko nchónhya nkehe t'axrxén tí xra ch'e jnkojnko chojni la kjánchó jnkokoá Dios tjetjanjon tí kjuachaxin ch'exínni xra kaín ni. <sup>7</sup> Jnkojnko chojni mé kuítõnhen kíxin chrókjúakoxin

kjuachaxin kuènte Nchakuen Dios kixin xikaha chrókjuinkitsa kichó. <sup>8</sup>Iso chojni mé ts'áyéhe kjuachaxin tsonixja sín kjuaxrexinkaon jina kixin tjinkitsa Nchakuen Dios, la ko í so chojni ts'áyéhe kjuachaxin tsochrónka ijnko nkehe kuènte Dios noehya tí í so sín kixin Nchakuen Dios mé tjinkitsa sín tsonixja sín. <sup>9</sup>La ko í so chojni mé ts'áyéhe kjuachaxin antsí tsinkáchónki Dios kixin Nchakuen Dios mé tjinkitsa. La ko í so chojni mé ts'áyéhe kjuachaxin sinchekitohe chojni jina. <sup>10</sup>La ko í so chojni mé ts'áyéhe kjuachaxin tsjasin sín kjuaxroan, la ko í so chojni mé ts'áyéhe kjuachaxin kixin Dios sinchenohe sín ijnko nkehe tsochenka sín tí í so kichó ni, la ko í so chojni mé ts'áyéhe kjuachaxin tsjatsqanxín á kjuachaxin kuènte Nchakuen Dios o á kjuachaxin kuènte ijnko nchakuen jínahya chronkaxín ijnko chojni, la ko í so chojni mé ts'áyéhe kjuachaxin kixin ijnko nkiva ókjé naxa k'uitjahya sín tsonixjaxin sín ijnko nkehe kuènte Dios, la ko í so chojni mé ts'áyéhe kjuachaxin tsochronkaxín nkexrí t'axrxjén tí nkehe ókjé nkiva tsíchronka tí í jnko chojni. <sup>11</sup>Kjánchó kaín tíha jnkokoá Nchakuen Dios mé tjinkitsa, na mé k'uáyéhe jnkojnko chojni jnkojnko kjuachaxin éxí tjinkaon tí Nchakuen Dios nkerí xra chrókjuich'e sín.

### Kaínni k'ónani jnkokoá cuerpo kuènte Cristo

<sup>12</sup>Cristo la éxí yóhe ijnko cuerpo chóna nchónhya parte. A ntá ijnko cuerpo la jnkokoá kjánchó nchónhya parte chóna. Kjónté nchónhya parte chóna tí cuerpo la tí cuerpo la ójnkó. Mé xikaha Ìnchéni Cristo la ójnkó tí jehe ch'án. <sup>13</sup>Kaínni kjónté chojni judío la kjónté chojni jehya judío, la kjónté chojni ch'exón xra, la kjónté chojni t'ítuenhya, kaín ni na mé jnkokoáxón

Nchakuen Dios kuíkitexínni, na kaín ni k'ónani jnkokoá cuerpo kuènte Cristo, na mé éxí jnkokoá nkehe ik'uúni kaín ni na mé k'uáyéheni tí jnkokoá Nchakuen Dios.

<sup>14</sup>Kixin tí cuerpo kuènteni la jehya jnkokoá parte chóna. Náhí. Itsjé parte chóna tí cuerpo. <sup>15</sup>Tí chróntáchro tí toteni kixin: “Jehya itja tí jeheni na mé jehya jeheni kuènte tí cuerpo”, na mé chaxínhya tíha kixin ó jehe cuerpo kuènte. <sup>16</sup>Kjaxin tí chróntáchro ijnko ntatsjoni kixin: “Jehya ikon tí jeheni na mé jehya jeheni kuènte tí cuerpo a”, na mé chaxínhya tíha kixin ó jehe cuerpo kuènte. <sup>17</sup>Tí chaxín kuenté cuerpo kuènteni chrók'óna ikonni, ¿ntá nkexrí chrókuinhinni? A ntá tí chaxín kuenté cuerpo kuènteni chrók'óna ntatsjoni, ¿ntá nkexrí chrókókaxraxéheni? <sup>18</sup>A ntá Dios kjuanjon ch'án kjuachaxin nkexrí ch'e xra jnkojnko nkehe kuènte cuerpo kuènteni kixin jehe ch'án nkexrí tjinkaon ch'án kóxrjnhin ch'án. <sup>19</sup>A ntá tí chrók'óna jnkokoá nkehe tíha, ¿a ntá nkexrí chrókjuak'e tí cuerpo a? <sup>20</sup>Kjánchó jie nchónhya parte chóna tí cuerpo kuènteni la ó jnkokoá tíha.

<sup>21</sup>Tí ikonni la mé xitjahya tsontáche tí tjani kixin: “T'ichjánxienhyani tí jaha”, la ko kjaxin tí kjani xitjahya tsontáche tí toteni kixin: “T'ichjánxinnahya tí jaha.” <sup>22</sup>Náhí. Tí nkehe kuènte tí cuerpo tónhenni kixin tjetuanhya na mé kjónté antsí má t'ichjánxin <sup>23</sup>la ko í so nkehe kuènte tí cuerpo la kánhyó chónteheni kjuasáya na kjánchó antsí nchek'ítsáni ka. La ko tí nkehe náxrjónhya la antsí tóxakonhenni kixin tsonoxínhya. <sup>24</sup>A ntá tí nkehe náxrjón na mé t'ichjánxienhyani ka ts'ítsá. Mé xikaha Dios kjuíncheyóxin kaín tí nkehe kuènte tí cuerpo kuènteni la ko jehe ch'án antsí chjéhe ch'án kjuasáya tí nkehe chrókjuikosáyehyani jeheni <sup>25</sup>kixin ninkehó xitjahya chróxikeyehe

tí cuerpo kíxin kaín tí nkehe la jnkokón tjinkítsa kichó. <sup>26</sup>Tió tsíkóníhi ijnko parte kuènte tí cuerpo la kaín tí í so parte la kjaxin tjtóte; la ko tió tjikosáyehe sín ijnko parte la kuenté tsochéhe.

<sup>27</sup>A ntá jahará na mé kuènte tí cuerpo kuènte Cristo la ko jnkojnkorá mé ijnko parte kuènte tí cuerpo kuènte ch'án. <sup>28</sup>Méxra Dios kjueyá ch'án chojni sich'ehe ch'án xra kuènte nínko, na mé saoxín kjueyá ch'án tí sín apóstol; la ko yóxin kjueyá ch'án iso chojni chjéhe ch'án kjuachaxin tsochrónka sín ijnko nkehe kjuínchenohe sín ch'án. La ko níxin kjueyá Dios iso chojni chjéhe ch'án kjuachaxin tsjako sín itén ch'án, la ko kjaxin kjueyá ch'án iso chojni chjéhe ch'án kjuachaxin tsjasin sín kjuaxroan, la ko kjaxin kjueyá ch'án í so chojni chjéhe ch'án kjuachaxin sinchekitohe chojni níhi jína, la ko kjaxin kjueyá ch'án í so kjojni chjéhe ch'án kjuachaxin antsí tjinkítsa kichó, la ko kjaxin kjueyá ch'án í so chojni chjéhe ch'án kjuachaxin ts'etóan xra kuènte ch'án, la ko kjaxin kjueyá ch'án í so chojni chjéhe ch'án kjuachaxin tsonixjaxin sín í jnko nkíva. <sup>29</sup>Kénhya chojni tsík'óna apóstol, la ko kénhya chojni chóna kjuachaxin sinchenohe sín Dios ijnko nkehe tsochrónka sín, la ko kénhya chojni chóna kjuachaxin tsjako sín itén Dios, la ko kénhya chojni chóna kjuachaxin tsjasin sín kjuaxroan, <sup>30</sup>la ko kénhya chojni chóna kjuachaxin sinchekitohe sín chojni jína, la ko kénhya chojni chóna kjuachaxin tsonixjaxin sín ijnko nkíva ókjé, la ko kénhya chojni chóna kjuachaxin tsochronkaxin sín nkexrí t'axrxéjin tí nkehe chrónka tí sín nixjaxin ijnko nkíva ókjé. Chaxín kjá náhi. <sup>31</sup>Méxra tjéyará tí kjuachaxin antsí jína chrótjáhará Dios. Ntá jie tsjákohará ijnko ntía antsí jína chrók'uejorá.

### Chrótjueheni kichó ni

**13** Tí chrónixja nkívee chojni ó la ko kjaxin chrónixja éxi nixja tí sín ángel, ntá naxa chrótjuehya kichó ni la ó chónkó tíha la mé éxi chrókóyòna chica tsjánka ó la ko éxi ijnko chica platillo nchevékjan sín ó, kíxin ninkehó sòn chóntahya. <sup>2</sup>La ko tí chrónixja itén Dios, la ko tí chrókianxian kaín nkehe kuènte Dios naxa noehya chojni, la ko tí chrókónòna kaín nkehe, la ko antsí chrókuinkachónkia Dios ntá chrókjuacha chróntátjan ijnko jna sáchrókjui ókjé, kjónté tí xíkaha ntá naxa chrótjuehya kichó ni, ntá ninkehó sínkíhya tí janhan. <sup>3</sup>Tí chrókjuintaktónhan tí sín nòa kaín nkehe chonta, la ko tí chrókjuánjuan kjuachaxin kíxin chróchena kuenténa, kjónté tí xíkaha ntá naxa chrótjuehya kichó ni la ntá ninkehó sínkíhya tíha.

<sup>4</sup>Tí tjuèheni kichó ni na ts'ejóchónhenni kichó ni, tsonínkakuenhyani kichó ni, la ko sinchejína asénni, la ko tsochjinoxíenhyani, la ko sinchehnkehyaní, la ko tsohnkehyaní, <sup>5</sup>la ko ch'ehyaní ninkehó nkehe náxrjónhya, la ko tjejáhyani nkehe kuènteni ó, la ko tsonínkakonhyani tjoka, la ko tsochóntahyaní kjuanínkaon isé, <sup>6</sup>la ko kjaxin tsochéhyani tió í jnko chojni tjasin jie. Náhi. Chrókóchéheni tió ijnko nkehe jína sítóhnen. <sup>7</sup>Tí tjuèheni kichó ni la kjónté kaín nkehe chrókjuasótexínni la chrókuitekaonni kíxin jína sín la ko naxa chrok'uejóchónhenni chrókónínkakonhyani.

<sup>8</sup>Tí tjuèheni kichó ni la jnkochríxín tsjak'e ts'itjáyanhya. A ntá itsi ijnko yaon í t'ichjánxinhya tsochrónka chojni itén Dios, la ko tsokohya kjuachaxin tsonixjaxin chojni ókjé nkíva, la ko tsokohya kjuachaxin tsonohe chojni má. <sup>9</sup>Naxa t'itjáyan tí nkehe chrókónoheni la ko naxa t'itjáyan tí nkehe

chróchronkaxínni. <sup>10</sup> **A** ntá tió tsonoheni kaín xín nkehe ntá tí nkehe ntoáhya k'uénoheni la mé ts'itjáyán.

<sup>11</sup> Tió naxa chánjan janhan k'uéníxja éxi chánjan la ko k'uékjenkayáxian éxi chánjan. Ntá kóntetona ntá kuitóha tí nkehe kuènte chánjan. <sup>12</sup> Méxra éxi ijnko xrosentá t'ikonxínhyani jína jie, ntá tsi ijnko yaon chr'éxin ntá ts'ikonxínni jína kaín nkehe. Ijie naxa t'itjáyán tí nkehe chrókónona; ntá tsi ijnko yaon tsonóna jína kaín xín nkehe éxi xíkaha kjaxin Dios chóxin ch'án tí janhan. <sup>13</sup> Méxra, iní nkehe tjejó jnkochrín, la mé ts'ejó chojni tsinkáchónki Dios, la ko ts'ejó chojni tsochónhen sín, la ko ts'ejó chojni tsotjuèhe kíchó. **A** ntá iní nkehe síin, la kjánchó antsí má t'ichjánxin tsotjuèheni kíchó ni.

#### Tí nixjxin chojni ókjé nkiva

**14** Chrókóxakonhanrá kixin chrótjuèhéra kichuára la ko kjaxin chrókuéyará kixin Nchakuen Dios chrótjáhará kjuachaxin. Kjánchó antsí chrótjinkáonrá tí kjuachaxin tsochronkará ijnko nkehe kuènte Dios. <sup>2</sup> Méxra, tí nkexro nixjxin ijnko nkiva ókjé mé nixjehe sín Dios ó la ntá chojni la náhi, kixin kohya ninkexró tienxín tí nkehe nixja sín la mé nchakuen sín ó mé chronkaxín sín ijnko nkehe kuènte Dios noehya tí í so sín. <sup>3</sup> **A** ntá tí nkexro chronkaxín ijnko nkiva tienxín tí í so sín ijnko nkehe kuènte Dios mé nixjehe chojni ntá xíkaha tjinkítsa tí í so sín kixin antsí chrók'uitja sín nkehe kuènte Dios la ko chrókóchéhe sín. <sup>4</sup> **A** ntá tí nkexro nixjxin ijnko nkiva ókjé la mé tjinkítsa jehó ch'án antsí tsonohe tí kjuachaxin kuènte Dios. **A** ntá tí nkexro chronkaxín ijnko nkehe kjuínchenohe Dios mé tsjinkítsa tí sín kuènte njnko kixin antsí chrók'uitja sín nkehe kuènte Dios.

<sup>5</sup> Tjínkavan kixin kaín rá chróchontará kjuachaxin chrónixjaxinrá ijnko nkiva ókjé. Kjánchó antsí tjetooan chróchontará kjuachaxin chróchronkará ijnko nkehe kjuínchenohará Dios. **A** ntá kánhyó tjetooan chrónixjaxinrá ókjé nkiva tí noahyará tsochronkaxinrá nkexrí t'axrxjín tí nkehe chróchronkará kixin chrókuin hin kaín tí sín tinkáchónki Inchéni kixin antsí chrók'uitja sín nkehe kuènte Dios. <sup>6</sup> **A** ntá kíchó ni, tí chrókjuasánts-jahará chrónixjaáxinrá ijnko nkiva ókjé la ó chónkó tíha. Íchá jína chrónixjaáxinrá ijnko nkiva tienxínrá chróxrjankaxián ijnko nkehe kjuínchenóna Dios la chróxrjankaxián ijnko nkehe kuènte Dios naxa noahyará, la chróxrjankaxián ijnko nkehe tjinkaon Dios chrókónohará, la chrókjuákoáxinrá ókjé nkehe nixin.

<sup>7</sup> Kixin kjaxin tí ison flauta la ko tí isón arpa, tí jnkokónhya chróntácho jnko-jnko són, ntá chrókjuachahyani chrókjuatsoanni nkehe tí ntácho tí són a. <sup>8</sup> La ko éxi yóhe tí síin guerra, tjanjonko kíchó sín, la ntá ntoáhya chrók'uánoa sín tí chica trompeta, ntá kohya nkexro chrókóyaxínhin sín sáchrókjuikjanjonko kíchó sín. <sup>9</sup> Kjaxin xíkaha tí jahará tí nixjahyará ijnko tan tienxín sín, ¿ntá nkexrí chrókónohe sín nkehe tí ntáchorá? Mé xíkaha tjejonixjará éxi chjéhe xrinto ó. <sup>10</sup> Chaxín síin itsjé nkiva chjasintajni la ko kaín nkiva la síin chojni tienxín sín. <sup>11</sup> Kjánchó tí chrókixxinnya janhan tí nkehe tsonchécho ijnko nkexro, ntá tí nkexro a ts'ikon tí janhan éxi ijnko nkexro tsíkjin ókjé la ko kjaxin janhan ts'íkuan tí jehe ch'án éxi ijnko nkexro tsíkjin ókjé. <sup>12</sup> Méxra jahará imá tjinkáonrá chrók'uayéhéra ijnko xra kuènte Nchakuen Dios, ntá chrókójina chrókjuéyará tí xra chrókjuinkítsa tí í so sín kuènte njnko kixin antsí chrók'uitja sín ijnko nkehe kuènte Dios.

<sup>13</sup> Méxra tí nkexro nixjxin ijnko nkiva ókjé la chrókjuanchehe Dios kixin



chrókjuinkĩtsa chróchronkaxín ch'án nkexrí t'axrjexín tí tan a. <sup>14</sup>Kíxín tí tsonixjaxian Dios ijnko nkĩva ókjé, ntá tí nchakuenná ó mé tjenixjehé Dios, la ntá tí kjuaxrexinkaon kuèntana la ókjé tjen. <sup>15</sup>À ntá tí xíkaha, ¿nkehe chrókjuít'a? Íchá jína chrónixjaxian Dios tí nchakuenná la chrókianxian janhan, la ko tió chrótsje janhan himno, la chrótsjexian nchakuenná la ko chrókianxian janhan. <sup>16</sup>Kíxín tí tsochjéxínrá kjuasáya Dios nchakuanrá ó ntá tjejótinhin í so chojni, ¿ntá nkexrí kíxín tí sín naxa kienxínhya sín tí nkehe nixjehérá Dios chróntáchro sín “Amén, ó nchoxon”? <sup>17</sup>Kjónté imá náxrjón tí chrókjuanchehérá Dios kjuasáya la ntá chrókienxínhya tí sín tjejótinhin, ntá chrokuinkĩtsahya kíxín chrók'uitja sín nkehe kuènte Dios. <sup>18</sup>Tjánehá Dios kjuasáya kíxín antsí chonta janhan kjuachaxin tsonixjaxian ókjé nkĩva, la ntá jahará la kánhyó nixjará xíkaha. <sup>19</sup>Kjánhó tió tójnkotsé chojni kíchó ni la mé ntáxrjan kíxín antsí tjínkavan chrónixja janhan kjónté in'ó palabra ó tienxín sín kíxín xíkaha chrókjuákuaxian sín, la ntá kánhyó chrókójina kjónté ite mil palabra chrónixjaxian ijnko nkĩva ókjé tienxínhya chojni.

<sup>20</sup>Kíchóni, chrókjuenkayáxinhyará éxí chánjan. Kjánhó chrók'uejorá éxí chánjan naxa noehya nkehe jínahya. À ntá chrókjuenkayáxinrá éxí chojni nteto. <sup>21</sup>Tí xroon tsíkjin sín ósé nkexrí k'uetqan Dios mé ntáchro kíxín: “Janhan tsonixjaxian ókjé nkĩva la ko itén chojni ókjé kíxín tsinhin tí nación Israel na kjónté tsitekakonhya sín, xíkaha ichro Ìnehéni.”<sup>††</sup> <sup>22</sup>À ntá tí kjuachaxin tsonixjaxin chojni ókjé nkĩva mé xránjon kíxín chrókjuakoxin chojni chrókuinhin tí sín tinkáchónkihya

Ìnehéni, jehya kíxín t'ichjánxin chrókuinhin tí sín tinkáchónki Ìnehéni. À ntá tí kjuachaxin tsochronka chojni ijnko nkehe kjuínchenohe sín Dios mé xránjon kíxín chrókjuakoxin chojni chrókuinhin tí sín tinkáchónki Ìnehéni, jehya kíxín chrókuinhin tí sín tinkáchónkihya Ìnehéni. <sup>23</sup>À ntá tió tójnkotsérá kaín rá tinkáchónkirá Ìnehéni, a ntá kaín rá chrónixjaxinrá ókjé nkĩva, ntá tí chrók'uixenhen nchia ijnko chojni naxa kuènhya sín xíkaha, o chrók'uixenhen nchia ijnko chojni naxa tinkáchónkihya Ìnehéni ntá chrókuinhin sín xíkaha la kjá tsontáchro sín kíxín ó k'uúixikjánrá. <sup>24</sup>Kjánhó tí chróchronkará kaín rá ijnko nkehe kjuínchenohará Dios ntá chrók'uixenhen nchia ijnko nkexro tinkáchónkihya Ìnehéni, o chrók'uixenhen ijnko chojni naxa tienhyé, ntá chrókuinhin sín nkehe tjejonixjará kaín rá ntá chrórxaxinkaon sín tí jje chóna sín ntá chrókuítohe sín kaín jje chóna sín. <sup>25</sup>Ntá tsonoxín tí nkehe mó tjenkayáxin sín nkaya asén sín ntá ts'ejóxin toch'in sín tsoxraxinkaon sín Dios la ko tsontáchro sín kíxín chaxín tjejókoará Dios.

#### **Ntoá chrókjuich'eni kaín xín nkehe tió tójnkotséni**

<sup>26</sup>À ntá kíchó ni, ¿nkehe chrókónhen? Tió tójnkotsérá na mé isorá chrótsjerá salmo, la ko isorá chrókjuàkorá, la ko isorá chróchronkará ijnko nkehe kjuínchenohará Dios, la ko isorá chrónixjaxinrá ijnko nkĩva ókjé, la ko isorá chróchronkaxinrá nkexrí t'axrjexín tí nkehe nixjaxin tí í so sín ókjé nkĩva. Kjánhó kaín tíha tsonhen kíxín tí sín kuènte nínko chrók'uitja sín nkehe kuènte Dios. <sup>27</sup>À ntá tí chrónixjaxin sín ijnko nkĩva ókjé na

<sup>††</sup>14:21 Isaiás 28.11-12

mé yaá o iy'á chojni chrónixja sín la ko chrók'uúxinkí chojni tsonixja, la ko t'ichjánxin kixin jnkójín nkexro nohe tsochronkaxín nkexrí t'axrxjén tí nkehe nixja sín. <sup>28</sup> A ntá tí kohya ninkexro tí nínko ntaha tsjacha tsochronkaxín nkexrí t'axrxjén tí nkehe chrónixja sín, ntá chrónixjajínhya sín ókjé nkíva tí tjejótójnkotsé sín, na mé chrónixjehe sín asén sín ó la ko chrónixjehe sín Dios ó. <sup>29</sup> Tjánjonrá kjuachaxin kixin tsonixja yaá o y'á chojni k'uáyéhe sín kjuachaxin tsochronka sín nkehe kjuínchenohe sín Dios. A ntá tí sín tjejótinhin mé chrókjuenkayáxin sín á ó nchoxón tí nkehe kuínhin sín. <sup>30</sup> A ntá tí xringhya chrókjuinchenohe Dios ijnko nkehe ijnko nkexro tjetjajín ntá chróchronka ch'án tíha. A ntá tí nkexro senó kjuankíxin chrónka nkehe la chróchónhen ch'án chrónixjahya ch'án. <sup>31</sup> Ó nchoxon jnkojnkorá chróchronkará nkehe tjáhará Dios kixin xíkaha kaín rá chrók'uitjárá la ko chrókócháhará. <sup>32</sup> A ntá tí nkexro k'uáyéhe kjuachaxin tsochronka nkehe kjuínchenohe Dios kjáxin t'ichjánxin chróchónhen tsochronkaxín í jnko nkexro. <sup>33</sup> Kixin Dios tjanjon tí kjuaxróxin, a ntá tjinkakonhya ch'án kixin yóxinhya chrók'uejóni.

Tió tójnoktsé chojni kichó ni tinkáchónki Ìnchéni <sup>34</sup> chrónixjahya tí chojni chjin jnkosiné servicio. Kohya kjuachaxin xíkaha, na mé chrókjuinchexiteyéhe sín tí sín ntoa éxí t'etoan tí ley kuente Dios. <sup>35</sup> Tí tjinkaon sín tsonohe sín nkehe na mé chrókjuanchankíhi sín xii sín tió tjiji sín ntøe sín. Náxrxónhya chrónixja ijnko chojni chjin nkehe jnkosiné servicio.

<sup>36</sup> Chrókónohará kixin tí itén Dios xrankíxíxinhya tí tjejorá la ko jehya jahorá k'uayéhérá tíha. <sup>37</sup> A ntá tí tjen jnkójín nkexro tjenkayáxin kixin nixja itén Dios o tjenkayáxin kixin tí

Nchakuen Dios tjinkítsa tí jehe ch'án ntá chrókónohe ch'án kixin tí nkehe tjejkian mé ijnko nkehe tsík'etoan Ìnchéni. <sup>38</sup> A ntá tí nkexro titekakonhya tíhi na ntá jahará chrókuitekákúénhyará ch'án kjáxin.

<sup>39</sup> Méxra kichó ni, chrókjuyéará kixin chrók'uayéhérá kjuachaxin chróchronkará nkehe kjuínchenohará Dios la ko chrókuítóhérá tsonixjajín chojni ókjé nkíva. <sup>40</sup> Kjánchó kaín xín nkehe la jnkójína la ko kjuasáya chrókónhen.

### Tsíxechón Cristo

**15** A ntá jie kichó ni, tjínkavan chrórxaxinkáonrá nkehe tí tan kuaáxinrá kjuákohará. Tíha mé kuítekáonrá, la mé tíha mé tjejóxinrá jína. <sup>2</sup> Kjáxin tí nkehe kjuákohará mé kuaáxinrá, tí títóéhyará tí nkehe kjuákohará; tí la náhi la chónkó kuinkachónkirá tí nkehe kjuákua.

<sup>3</sup> Saoxín, kjuákohará tí nkehe k'uayáha kixin Cristo k'uenyákonhen ijjiéni, na mé xíkaha kjuínchexiteyá ch'án tí nkehe ntácho tí xroon itén Dios <sup>4</sup> la ko tsíkjavá sín ch'án la ko tsíxechón ch'án tí nixin yaon éxí ntácho tí xroon itén Dios. <sup>5</sup> Ntá k'uíkon ch'ín Pedro tí jehe ch'án, ntá chr'éxin inaá tí teyó sín k'uék'ajiko ch'án k'uíkon sín tí jehe ch'án. <sup>6</sup> A ntá chr'éxin chjina quinientos chojni kichó ni jnkokoá k'uejó sín k'uíkon sín ch'án. A ntá jie itsjé tí sín a naxa tjejó sín, a ntá jnkójín sín na ó tsík'en sín. <sup>7</sup> Chr'éxin k'uíkon ch'ín Jacobo tí jehe ch'án, la ko k'uíkon kaín tí í so sín apóstol inaá.

<sup>8</sup> A ntá kjuixixín janhan k'uíkuān Ìnchéni éxí ijnko xjan naxa xetjahya yaon chrókokjíhi. <sup>9</sup> Kjánchó janhan kánhyó tjettoan la mé tóyøghya tí í so sín tsíkjeýá Ìnchéni la ko tósuāna chrók'óna ijnko nkexro ch'ehe xra Ìnchéni kixin janhan mé k'uénínkakonhan tí sín

ninkoē Dios. <sup>10</sup> Kjonté jínahya kjuít'a la kjuasáyé Dios la ko kjuachaxin kuente ch'án mé kjuítóxinhin tí kjuenkayáxian, na mé chónkóhya kuikonóana ch'án, kixin tjetóxin kjuít'a xra la kaín sín la kánhyó. Kjánchó jehya janhan kjuít'a xra. Náhí. Dios kjuínkítsana ch'án kjuít'a xra. <sup>11</sup> Kjánchó tjetuanhya á janhan o á jehe sín kjuako sín, kixin xikaha tí itan kjuakoni, a ntá kuítekáonrá.

### Tsoxechón tí sín tsík'en

<sup>12</sup> A ntá tí tjakoni kixin Cristo la xechón, ¿ntá nkekuente ntáchrórá jnkojínrá kixin tsoxechónhya chojni tsík'en? <sup>13</sup> Tí chrókóchaxín tí nkehe ntáchrórá kixin tsoxechónhya chojni tsík'en, ntá kjaxin chróxechónhya Cristo. <sup>14</sup> A ntá tí chaxínhya xechón Cristo, ntá chónkó tí nkehe tjakoni la ko ninkehó sínkíhya la ko chónkó tí nkehe kuítekáonrá. <sup>15</sup> A ntá tí chaxínhya xikaha tsíkónhen, la jeheni la ijnko chojni ntoáhya chrónka kuenté Dios, kixin ó chrónkani kixin Dios kjuínchexechón Cristo. A ntá tí chrókóchaxínhya kixin chróxechón Cristo, ntá kjaxin chrókóchaxínhya kixin chróxechón chojni tsík'en <sup>16</sup> kixin tí chróxechónhya tí chojni tsík'en, ntá kjaxin Cristo chróxechónhya ch'án. <sup>17</sup> A ntá tí Cristo chróxechónhya ch'án ntá chrókóchónkó tí kuítekáonrá tí jehe ch'án kixin naxa chrókjuínhya tí ijjárá. <sup>18</sup> La ko tí chrókóchaxín tíha ntá chrók'uitjáyán tí sín kuítekaon Cristo ik'uén sín. <sup>19</sup> Méxra tí chrókuinkáchónkini Cristo kixin chrókjuinkítsa ch'án tí jeheni chjasintajni ntihyó, ntá kohya chojni chrókóyóhe tí jeheni, imá chrókónóeni chrók'uejóni kaín ni.

<sup>20</sup> Kjánchó náhí, la chaxín ó xechón Cristo. Jehe ch'án éxí tí nkehe tsík'óna saoxín kixin jehe ch'án saoxín xechón ch'án. <sup>21</sup> Méxra jnkokoá chojni ntoa kjuankíxin kjuasin jie, ntá kjuankíxin k'uén kaín xín chojni chjasintajni, la ko kjaxin jnkokoá chojni ntoa xechón, ntá xikaha tsoxechón kaín chojni tsík'en. <sup>22</sup> Kixin tí jie kjuasin ch'ín Adán ntá kaín xín chojni sít'enxín sín. A ntá Cristo la kaín ni tsochóntaxínni kjuachón. <sup>23</sup> Jnkojnkoni éxí tsojhenni tocar, na mé saoxín xechón Cristo, a ntá chr'éx-in tí tsokjan ch'án ntá tsoxechónni kaín ni kuítekaonni tí jehe ch'án. <sup>24</sup> A ntá ó tsi yaon tsjixixín ntá sinchek'itjáyán Cristo kaín xín nkehe t'etóan la ko kaín xín kjuachaxin ókjé, ntá tsjanjon ch'án tí xra t'etóan kixin ts'áyéhe It'é ch'án Dios. <sup>25</sup> Na mé t'ichjánxin ts'etóan Cristo tsjixrakájia tí yaon tsjachahya tí sín nínkakonhen ch'án. <sup>26</sup> A ntá tí nkehe tsjixixín ts'itjáyán la mé tí kjuach'én. <sup>27</sup> A ntá Dios kjuanjón kjuachaxin kixin kaín nkehe sín mé chrók'uetuēnhen Cristo. <sup>¶</sup> Kjánchó tí xikaha ntáchró tí xroon itén Dios tsíkjin sín ósé kixin kaín xín nkehe mé ts'etuēnhen ch'án, ntá ó noheni jína kixin jehya kixin Dios la chrók'uítuēnhen ch'án ínaá. Náhí. Jehe ch'án mé chjéhe Xjeen ch'án kaín kjuachaxin ts'etuēnhen ch'án kaín xín nkehe. <sup>28</sup> A ntá tíó tsjixin tsjacha Cristo ts'etuēnhen ch'án kaín xín nkehe, ntá Cristo, mé tí Xjeen Dios, la kjaxin sinchexiteyéhe ch'án It'é ch'án Dios kixin ntá Dios mé ts'etuēnhen ch'án kaín xín nkehe.

<sup>29</sup> A ntá í jnko nkehe, la iso sín tikiteyákonhen tí sín tsík'en. ¿Nkekuente xikaha ch'e sín tí titekakonhya sín kixin tí sín tsík'en tsoxechón sín ínaá?

<sup>30</sup> A ntá tí xikaha, ¿nkekuente kixin kaín yaon kjuaxróxinhya tjejóni

nínkakhenni chojni? <sup>31</sup> A ntá kíchó ni, kaín yaon siín kjuachrakon chrók'uen janhan. Chaxín tíhi, kjánchó chàna kixin jahará kjaxinrá tinkachónkirá Ìnchéni Jesucristo. <sup>32</sup> Kjonté kónínkakonna chojni chjasin Éfeso éxi iko jiehe la kjonté kjuak'é ntilha, ¿la ntá nkehe chrókjuacha tí janhan tí chrókochaxínhya chróxechón chojni tsík'en? Tí xikaha la ó nchoxon tí nkehe ntáchro tí sín titekakhonya Ìnchéni kixin chrókjóne sín la ko chrók'ui sín kixin ijie la o ntóye chrók'uen sín.

<sup>33</sup> Chrókuitoéhyará chrokjuit'áyahará sín. Éxi ntáchro sín kixin: “Tí chrók'uejókotoxinni chojni jínahya ntá chrók'uitjáyán tí nkehe jína tjenkayáxinni.” <sup>34</sup> Chrókjanrá ntja jína ntoá la chrókjuásinhyará jie. Méxra isorá naxa chonhyará Dios. Na mé ntáxrjan tíhi kixin chrókósuàhará.

### Nkexrí tsoxechón tí sín tsík'en

<sup>35</sup> Kjá jnkojínra tsjanchankìnará kixin: “¿Nkexrí tsoxechón tí sín tsík'en la ko nkexrí tsotsjehe tí cuerpo tsochóna sín?” <sup>36</sup> Lontírá tjanchankinará xikaha. Tí noatje t'enkanı nonte t'ichjánxin its'en ts'itjáyán kixin tsjak'echón tí nkehe ts'ayan. <sup>37</sup> Tí nkehe t'enkanı la jehya tí ka a. Náhí. Tí nkehe t'enkanı la noatrigo o í jnko tje. <sup>38</sup> Kjánchó Dios kjuanjon kjuachaxín kixin jnkojnko nta ts'óna éxi tjinkaon ch'án, la ko jnkojnko nta tsochóna tje kuènte. <sup>39</sup> A ntá jehya kaín tí cuerpo la jnkokon. Náhí. Ijnko la cuerpo kuènte chojni, la ko í jnko la cuerpo kuènte ko, la ko í jnko la cuerpo kuènte koxroxé, la ko í jnko la cuerpo kuènte koche. <sup>40</sup> Na mé kjaxin xikaha siín cuerpo kuènte tí sín ángel tjejó nkaya nkajní la ko siín cuerpo kuènte chojni tjejó chjasintajni. A ntá tí cuerpo

kuènte tí sín ángel la náxrjón tsjehe la ko kjaxin tí cuerpo kuènte tí chojni la náxrjón tsjehe, kjánchó ókjé nkexrí tsjehe. <sup>41</sup> Ókjé nkexrí t'inkaséyanxín tí yaon la ko ókjé nkexrí t'inkaséyanxín tí nitjó la ko kjaxin konotsé la ókjé nkexrí t'inkaséyanxín la ko kjonté itsjé konotsé la ókjé t'inkaséyanxín jnkojnko. <sup>42</sup> Kjaxin xikaha tsonhen tí chojni tsík'en tsoxechón sín. Tí nkehe tsoxravá la mé jnko nkehe tsotje, a ntá tí nkehe tsoxechón la mé jnko nkehe ts'itjáyanyha. <sup>43</sup> Tí nkehe tsoxravá la jnko nkehe náxrjónhya tíha, la ntá tí nkehe tsoxechón la jnko nkehe imá náxrjón. Tí nkehe tsoxravá la jnko nkehe chónahya kjuachaxin, la ntá tí nkehe tsoxechón la jnko nkehe tsochóna kjuachaxin. <sup>44</sup> Tí nkehe tsoxravá la mé cuerpo kuènte chojni chjasintajni ó. La ntá tí nkehe tsoxechón la mé cuerpo antsí tsochóna kjuachaxin kuènte Nchakuen Dios. A ntá tí chónatani cuerpo kuènte chojni chjasintajni ó na mé kjaxin tsochónatani cuerpo antsí tsochóna kjuachaxin kuènte Nchakuen Dios.

<sup>45</sup> A ntá éxi ntáchro tí xroon itén Dios kixin: “Tí chojni ntoa k'óna saoxín mé ch'ín Adán tíha mé k'uáyéhe ch'án kjuachón ó.” <sup>46</sup> A ntá tí ó kjuixixín ikui í jnko ch'ín éxi yóhe Adán, kjánchó jehe ch'án mé chóna ch'án nchakuen tjanjon kjuachón. <sup>47</sup> Kjánchó jehya saoxín k'óna tí cuerpo antsí chóna kjuachaxin kuènte Nchakuen Dios. Náhí. Saoxín k'óna cuerpo kuènte chojni chjasintajni ó, la ntá chr'éxin k'óna cuerpo antsí chóna kjuachaxin kuènte Nchakuen Dios. <sup>48</sup> Tí nkexro k'óna saoxín la k'óna nche na mé kjuák'e ch'án chjasintajni ó. A ntá tí nkexro k'óna yóxin na mé nkaya nkajní kjuixín ch'án. <sup>49</sup> Tí cuerpo siín chjasintajni mé yóhe tí cuerpo k'uéchóna tí nkexro tsík'óna nche. A ntá tí cuerpo siín

nkaya nkajní mé yóhe tí cuerpo chóna tí nkexro kuixín nkaya nkajní. <sup>49</sup>Éxí senó tóyóhēni tí nkexro k'óna nche, ntá xíkaha chr'éxin tsoyóhēni tí nkexro kuixín nkaya nkajní.

<sup>50</sup>Ntá tsotjonkará nkehe, kichó ni. Tí cuerpo k'óna nto la ko hueso chóntani jie xitjahya sátsjikoni tí tjen Dios t'etoan ch'án. Na mé tí nkehe tsjeje xitjahya ts'áyéhe tí nkehe tsjeje. <sup>51</sup>Á ntá tsotjonkará ijnko nkehe ninkexró noehya, kixin kénhyani its'enni. Kjánchó kaín ni ts'ixitóxinhin tí cuerpo chóntani. <sup>52</sup>Á ntá xrínahya titàya tjejóni ntá éxí chróchr'áton konni la ko chrókuak-itjenkini konni xíkaha tió tsjixixín tsinhini tsontáchro trompeta, la ntá kaín chojni tsík'en tsoxechón, í ts'enhya sín, la ko kjaxin jeheni kaín ni ts'ixitóxinhin tí cuerpo chóntani. <sup>53</sup>Á ntá tí cuerpo chóntani la tsjeje, ntá t'ichjánxin ts'inkáya nkehe chónhya tsjeje. La ko tí cuerpo chóntani la ts'en ntá t'ichjánxin ts'inkáya nkehe chónhya ts'en. <sup>54</sup>Á ntá tió tí cuerpo chóntani la tsjeje, na mé t'ichjánxin ts'inkáya tí nkehe chónhya tsjeje, la ko tió tí cuerpo chóntani la ts'en, na mé t'ichjánxin ts'inkáya tí nkehe chónhya ts'en. Ntá tí xíkaha na ntá tsoxiteyá éxí nixja tí xroon itén Dios ntáchro kixin: “Tsjachahya tí kjuach'én la mé tsjacha tí kjuachón.”\* <sup>55</sup>“Jaha kjuach'én, ¿kjá tí kjuachaxin kuènta kixin chrókjuacha jaha? Jaha kjuach'én, ¿kjá tí kjuachaxin kuènta kixin chrók'oyánni?”† <sup>56</sup>Tí jie tjasinni mé kuixín tí ts'enni. Á ntá tí ley k'uetóan ósé antsí k'uixixín jie. <sup>57</sup>Á ntá tjancheheni Dios kjuasáya kixin ichr'án ch'án Ìnchéni Jesucristo kixin táha mé tsaáxinni.

<sup>58</sup>Á ntá jahará kichó ni, imá tjuahará. Chrókuítóéhyará tinkachónkirá Ìnchéni.

Jnkochríxín chrókjuich'ehérá Ìnchéni xra antsí jína kixin ó nohará jahará kixin tí xra ch'eheheni Ìnchéni jehya chónkó tíha.

### Tí ofrenda tjenájín sín tsochr'énnen sín tí sín tjejó chjasin Jerusalén

**16** Á ntá tí chichaon tjenájínrá kixin tsjínkĩtsará tí sín kichó ni tinkáchónki Ìnchéni na mé chrókjuich'erá éxí kuétuanhan tí sín ninko estado Galacia. <sup>2</sup>Jnkojnko domingo jnkojnkorá chrókuakitsjenteherá nkerí síká chichaon kjuachará tí semana kjuich'erá xra kixin t'ichjánxinhya chrókjuasánjia janhan ntá chrókjuenájínrá chichaon. <sup>3</sup>Á ntá tió tsjasán janhan tsétuanhan tí sín tsjeyará kixin sátsji sín chjasin Jerusalén, na ntá tsokjian xroon tsjikoxín sín tí chichaon tsikjénájínrá tsjikaán tí sín kichó ni ntiha. <sup>4</sup>Á ntá tí chrókójina kjaxin janhan sáchrókjuiyá, a ntá sáchrókjuikian tí jehe sín kjaxin.

### Tjenkayáxin ch'ín Pablo nkexrí sátsji ch'án

<sup>5</sup>Tí sátsjia la t'ichjánxin ts'atsínka janhan estado Macedonia ntá chr'éxin tsjasán ntiha chjasin Corinto. <sup>6</sup>Ách'e ntahó chrókuítóna chrók'uaatsínkajia nchakuen kin. Á ntá jahará chrókjuínkĩtsará tí janhan tió sátsjia ókjé chr'éxin. <sup>7</sup>Méxra tjínkakonhya chrók'uaatsínkoá chrótsjahará ó. Náhí. Tjínkavan chrókuítóna iso yaon tí tjejorá ntiha tí Ìnchéni chrókjuanjon kjuachaxin. <sup>8</sup>Kjánchó tsitóna chjasin Éfeso tsjixrakájia yaon Pentecostés, <sup>9</sup>kixin ntihi antsí chonta kjuachaxin chrókjuít'a xra kuènte Ìnchéni la ko jína chrókónhen tí xra kjónté nchónhya chojni nínkakonna.

\* 15:54 Isaías 25.8

† 15:55 Oseas 13.14

<sup>10</sup> A ntá tí tsjiji ch'ín Timoteo ntiha la antsí jína chrónixjehérá ch'án kixin kjuaxróxin chrók'uejokoará ch'án kixin jehe ch'án kjaxin ch'ehe Ìnchéni xṛá éxí janhan. <sup>11</sup> Kaín tí jahará chróchonteherá ch'án kjuasáya. Tjínkĩtsará ch'án kixin jína itsi ch'án ntihi tsitsjehe ch'án tí janhan kixin tjéchonhan chrókui ch'án la ko tí í so sín kichó ni.

<sup>12</sup> A ntá tí kichó ni Apolos la imá xṛ-janóahá ch'án kixin kjaxin chrókjujiko ch'án tí í so kichó ni, kjánchó tjinkakonhya ch'án jie. Chr'éxin tsjiji ch'án tió ts'íxranka.

### Kjuixixín nixja ch'ín Pablo

<sup>13</sup> Chrókjuenkayáxinrá la ko chrók'uejotsjehérá. Chróchrakonhyará la ko chrókuitoéhyará tí tinkachónkirá Ìnchéni. <sup>14</sup> Kaín nkehe chrókjuich'erá la koí chrótjuèhérá kichuárá.

<sup>15</sup> Na ntá kichó ni, ó nohará kixin tí sín kjéhya ch'ín Estéfanos saxín kuinkáchónki sín tí tan tsaáxin chojni tí estado Acaya, la ko jehe sín kuákja sín xṛá a tjínkĩtsa sín tí sín kichó ni tinkáchónki Ìnchéni. <sup>16</sup> Tjínka-

van kixin chrókjuinchexiteyéhérá tí sín tjínkĩtsa éxí tí jehe sín la ko kaín tí sín ch'e xṛá. <sup>17</sup> Chàna kixin ó kui ch'ín Estéfanos la ko ch'ín Fortunato la ko ch'ín Acaico, kixin jahará kjónté tjejohyará. <sup>18</sup> A ntá jehe sín kjuínchechéhe sín asenná éxí kjuínchecháhará sín. Chróchonteherá kjuasáyé chojni xíkaha.

<sup>19</sup> Tí sín tójnkotsé estado Asia xraxinkaon sín tí jahará. Kjaxin ch'ín Aquila la ko tjan Priscila la ko tí sín tójnkotsé ntqe sín ima xraxinkaon sín tí jahará kixin tinkachónkirá Ìnchéni. <sup>20</sup> Kaín tí sín kichó ni ntihi xraxinkaon sín tí jahará. Nixjehérá kichuárá kaín rá tsehérá tja kichuárá jnkojína.

<sup>21</sup> Janhan Pablo xráxinkavan tí jahará ikjian xroon chr'anhánrá la tjaná kjínxi-an tí letra i.

<sup>22</sup> Tí nkexro tjuéhya Ìnchéni Jesucristo la tsjasóte. A ntá jeheni, la Ìnchéni xrákiá.

<sup>23</sup> A ntá kjuasáyé Ìnchéni Jesucristo mé sintayaonrá ch'án. <sup>24</sup> Tjuahará kaín rá kixin kaín ni tinkáchónkini Cristo Jesús. Amén. Ó tjen.

## Tí xroon yóxin ikjin ch'ín Pablo chr'énhen ch'án tí ninko chjasin Corinto

**1** Janhan Pablo mé kjueyána Dios kixin sít'ahá Ìnchéni Jesucristo xra, la ko kichó ni Timoteo ikjinni tí xroon i chr'ánhanráni tí jahará ninkoe Dios chjasin Corinto la ko kaín tí í so kichó ni tinkáchónki Ìnchéni tjejorá nkuíxín estado Acaya. <sup>2</sup>Kjuasáyé It'eni Dios la ko Ìnchéni Jesucristo chrókuuintayaonrá ch'án la ko chrótjáhará ch'án kjuaxróxin.

### Tí kjuasóte ch'ín Pablo

<sup>3</sup>Tjancheheni kjuasáyé Dios It'é Ìnchéni Jesucristo. Jehe It'eni mé tikonóeheni ch'án la ko xráxín nchechéheni ch'án. <sup>4</sup>Jehe ch'án mé nchechéhe ch'án kaín tí jeheni tió tsi ijnko kjuaxróxinhya kixin ntá tsjachani sinchechéheni í so chojni kjuaxróxinhya ts'atsínka sín éxí yóhe jehe ch'án kjuínchechéhe ch'án tí jeheni. <sup>5</sup>Mé xikaha tjejótjasóteni éxí yóhe kjuasóte Cristo ntá kjaxin jehe ch'án imá sinchechéheni ch'án kixin tinkáchónkini ch'án. <sup>6</sup>Tjejótjasóteni kixin tí jahará chrókóchàxinrá la ko chrókuaáxinrá. A ntá Dios nchechéhe tí jeheni kixin kjaxin jahará chrókócháhará kixin ntá chrókuachará kjónté chrókjuasóterá éxí tjasóteni jeheni. <sup>7</sup>Na mé ó noheni kixin chaxín ntoá tinkachónkirá Ìnchéni kixin ó noheni kixin jnkokón tjejótjasóteni kaín ni ntá kjaxin jnkokón sinchechéhe Dios tí jeheni kaín ni.

<sup>8</sup>Kíchóni, tjinkaonni kixin chrókónohará kixin nkexrí imá kjuasóteni tí k'uejóni tí estado Asia. Imá náxrjónhya kjuasóteni la chrókuachahyani, la k'uitjáyenhenni tí tjenkayáxinni kixin chrók'uaxrjéxinni ntiha naxa chrók'uejóchónni. <sup>9</sup>Ó kónoheni kixin

chrók'uenxínni ntiha. Mé xikaha kónhenni kixin chrókónoexínni kixin tí jehóni la chrókuachahyani tíha. Náhí. Chrókuinkáchónkini Dios, mé tí nkexro nchexechón chojni tsík'en. <sup>10</sup>Jehe Dios mé kjuínchekaáni ch'án la ko naxa sinchekaáni ch'án kixin tí nchónhya nkehe chrók'uenxínni. Méxra ó noheni kixin chaxín jehe ch'án sinchekaáni ch'án <sup>11</sup>tí tjínkĩtsaráni tjanchehéra Dios kixin tsjinkĩtsani ch'án. A ntá tí tsjé chojni chrókuanchehe Dios kixin tsjinkĩtsani ch'án ntá chr'éxin itsjé chojni tsjanchehe sín ch'án kjuasáyé kixin xikaha jehe ch'án kjuínkĩtsani ch'án.

### Nkeuènte sákjuíhya ch'ín Pablo tí chjasin Corinto

<sup>12</sup>Chéheni kixin noheni kixin ntoá k'uejóni ntihi chjasintajni kjuích'iyehyani chojni, mé xikaha k'uejókoaráni. Ntá jehya kjuachaxin kuènteni kjuachaxinni xikaha. Náhí. Kjuachaxin kuènte Dios mé kjuínkĩtsani kixin xikaha k'uejóni. <sup>13</sup>Tió chr'ánhanráni xroon, kjinhyani nkehe chrókiénxinyará. Náhí. Jehó tí nkehe chrókjuínchekuáxinrá chrókiénxínrá. Tjéchonhan kixin chrókiénxínrá jína. <sup>14</sup>A ntá ó tinkakiénxínrá ntsí kixin tió tsokjan Ìnchéni Jesús tsöcháhará kixin xikaha kjuakoharáni jeheni la ko kjaxin tsöchéheni kixin jahará kuítekáonrá.

<sup>15</sup>Mé xikaha kjuenkayáxian kixin saoxín chrókjuasántsjahará tí jahará kixin chrókócháhará kixin yáya chrókjuasántsjahará. <sup>16</sup>Kjuenkayáxian janhan chrókjuasántsjahará saoxín tió sáchrókjuia estado Macedonia la ko chrókjuasántsjahará inaá tió chrókjanxian ntiha. Mé xikaha chrókjuínkĩtsarána tió sáchrókjuiyá janhan estado Judea. <sup>17</sup>¿Á tjenkayáxinrá kixin ntoáhya kjuenkayáxian chrókjuasán ntiha ní? ¿Á tjenkayáxinrá kixin iyó

nkehe kjuenkayáxian kixin jnkokoá chróntáxrjan kixin chrókjuasán la ko chrókjuasánhya? <sup>18</sup>Méxra tjetsjehe Dios kixin xikahya kjuátēheni tí jahará kixin chrókjuijini la ko chrókjuijihyani. <sup>19</sup>Kixin Cristo Jesús mé Xjeen Dios, na mé tí nkexro kjuákoxin ch'ín Silvano la ko ch'ín Timoteo la ko kjuákoxian janhan tí k'uejóni ntiha, mé xikahya k'uechronka ch'án, kjuích'iyahya ch'án ninkehó. Náhí. Kaín nkehe tjakoni kuènte Cristo la chaxín tíha. <sup>20</sup>Kixin kaín nkehe tsíchronka Dios la mé jehe Cristo kjuínchexiteyá ch'án. Mé xikaha tió tjancheheni Dios kjuasáya la mé ntáchroni “Amén, ó nchoxon” kixin tí kjuachaxin kuènte Cristo Jesús. <sup>21</sup>Á ntá Dios mé kjuínkítsa ch'án tí jeheni la ko tí jahará kixin kaín ni ntoá chrókuinkáchónkini Cristo la ko jehe ch'án mé kjueyáni ch'án. <sup>22</sup>Kjaxin jehe ch'án tsíkjinchekani ch'án xroye, na mé kjuanjon ch'án Nchakuen ch'án tsochóna asenni senó kixin tsonoexínni kixin chaxín ts'áyēheni nkehe chr'éxin.

<sup>23</sup>Á ntá tí naxa kjuasánhya janhan chjasánrá Corinto éxi kjuenkayáxian la tjetsjehe Dios kixin tjínkakonhya kixin chrókóxakonhanrá tí chrókjuéntuáhárá tí jahará inaá. <sup>24</sup>Jehya kixin chrókuétuanhánrá kixin nkexrí chrókuinkachónkirá Ìnchéni kixin ó nòna kixin ntoá tinkachónkirá ch'án. Ó jehí tjinkaonni chrókjuínkítsaráni kixin antsí má chrókócháhará.

**2** Mé xikaha kjuenkayáxian kixin chrókjuasánhya janhan ntiha inaá tí naxa xrásinrá kjuanínkaon. <sup>2</sup>Á ntá tí naxa chrókjuíntak'ávárá, ¿a ntá nkexro chrókjuínchekhàna inaá tí chrókjuínchekhànahyará jahará kixin janhan kjuíntak'ávárá? <sup>3</sup>Mé xikaha ikjian tí xroon chr'anhánrá senó kixin tjínkakonhya chrókjuasán chrókjuínchekóxakonnará inaá. Náhí. Jahará chrókjuínchekhànará. Méxra ó

nòna kixin tí chrókóchána janhan ntá chrókócháhará kaín rá. <sup>4</sup>Kjánchó tió ikjian tí xroon a chr'anhánrá senó la imá kóxakonhen asenná tsjanka kjaxin. Kjánchó jehya kixin ikjian tí xroon a chr'anhánrá kixin chrókjuíntak'ávárá. Náhí. Ikjian tí xroon chr'anhánrá kixin chrókónoaxínrá kixin imá tjuahará tí jahará.

### **Ch'ín Pablo chrókjuínchek'itjáyenhen ch'án tí jie kjuasin tí nkexro a**

<sup>5</sup>Á ntá tí nkexro kjuínchexakonna la jehya janhvàn kóxakonna. Náhí. Kaínrá kóxakonhanrá. Kjánchó tjínkakonhya tjetóxin tsontáxrjan tíha. <sup>6</sup>Na mé it-sjé tí jahará nixjehérá ch'án kóyakoterá ch'án kixin chrókjuasinhya ch'án jie xikaha la táhó la ó tjen. <sup>7</sup>Ntá jie chrók'uitjáyanhanrá tí jie kjuasin ch'án, chrókjuínkítsará ch'án, kixin tí náhi la ts'itjáyanxín ch'án tí kjuancheníhi. <sup>8</sup>Méxra xrjanóahárá kixin chrókjuákoxinrá inaá kixin chaxín tjuèhérá ch'án. <sup>9</sup>Mé xikaha senó ikjian xroon chr'anhánrá kuènte tí kjuanínkaon chontará kixin tsononaxian á chrókjuínchexiteyà-nará kaín nkehe chrókuétuanhánrá. <sup>10</sup>Á ntá tí sìnchek'itjáyenhenrá ijnko chojni ichrén jie kjuasin ch'án ntá janhan kjaxian sìnchek'itjáyanhan ch'án tí jie kjuasin ch'án. Méxra tí chaxín k'ue ichrén jie chrókjuíntak'itjáyanhan ijnko chojni la ó kjuixin kjuíntak'itjáyanhan ch'án tí jie a kixin chrók'uejorá jnkojína. Kjaxin xikaha tjetsjehe Cristo, <sup>11</sup>kixin ntá tí ch'ín Tsochren na tsjachahya ch'án tsjachroe ch'án tí jeheni, kixin ó noheni nkexrí ch'ia tí ch'ín Jínahya.

### **Kóxakonhen ch'ín Pablo tí kjuák'e ch'án chjasin Troas**

<sup>12</sup>Á ntá tió kjuasán tí chjasin Troas chrókjuákua tí tan jína kuènte Cristo la antsí xránjon kjuachaxin kixin chrókón-



hen xra kuente Ìnchéni. <sup>13</sup> Kjánchó náxrjónhya tjen asenná kixin k'uitjahya tí kíchó ni Tito. Ntá tuénxín níxjaha tí jehe sín tjejó ntiha ntá sákjuia tí estado Macedonia.

### Ntá ó tsjacha sín tsochóna sín kjuachaxin kuente Cristo

<sup>14</sup> Kjuasáyé Dios kixin xráxín jehe ch'án tjinkitsani ch'án ntá tjachani kixin chóntani tí kjuachaxin kuente Cristo Jesús. Ntá kaín nketí sáchrókjuini mé tjaxoxinni tí tan kuente ch'án éxí ijnko nkehe xraxé náxrjón chrókóxrjínhin kaín xín chojni. <sup>15</sup> Kaínni la éxí yóhe tí xraxé náxrjón kuente chjincō chrókjuanjon Cristo chrók'uáyéhe Dios kixin tíha mé chrókonoexín tí sín tsaá la ko kjaxin chrókonoexín tí sín ts'itjáyán. <sup>16</sup> Tí sín ts'itjáyán mé tókaxraxéhe sín éxí ts'énxín sín tí xraxé a. A ntá tí sín tsaá mé tóxrjínhin sín kixin ijnko nkehe tsjanjon kjuachón tíha. ¿Xá nkexro chrókjuacha chrókjuich'e tíha? <sup>17</sup> A ntá jeheni mé xrinchekjihyani nkexrí nixja itén Dios éxí ch'e nchónhya chojni chrókjuacha sín chichaon. Náhí. Kaín asénni tjakoni itén Dios kixin kjueyáni ch'án sich'ehehi Cristo xra, la ko tjetsjehe ch'án tí xra tjejóch'eni.

### Tí pacto níxin

**3** A ntá xíkaha ntáchroni, ¿á tjenkayáxinrá kixin kjuankíxinni tsochronkani inaá kixin jína tí jeheni, o á t'ichjánxin kixin chrókjuijikoni xroon kixin tsonoaxínrá kixin jína tjakoni? ¿Xá t'ichjánxin kixin chrókjuanchaharáni ijnko xroon tsochronka kixin jína tjakoni? ¿Xá t'ichjánxin kixin chrókjuanchaharáni ijnko xroon tsochronka kixin jína tí jeheni éxí ch'e í so sín? <sup>2</sup> Náhí. T'ichjánxienhyani nijnko xroon kixin jahará mé éxí yóhe ijnko

xroon tsíkjinni xrikoni chróchóxin la ko chrókjuinchekuáxin kaín xín chojni tsonoexín sín kixin jeheni mé ch'ehehi Cristo xra. <sup>3</sup> T'ikon sín noxín kixin tí jahará mé éxí yóhe ijnko xroon tsíkjin Ìnchéni Cristo xrikoni nchekuáxin chojni. Kjánchó jehya ntáhi tsíkjinxin ch'án. Náhí. Kjuanjon ch'án Nchakuen ch'án tjechón chontará la kjaxin jehya xrotabla tsíkjin ch'án. Náhí. Táha la asén chojni.

<sup>4</sup> Ntá ó noheni chaxín tíhi kixin tinkáchónkini Dios kixin tjinkitsani Cristo. <sup>5</sup> Jehya kixin ó jehí chróchóntani kjuachaxin kixin chrókjuich'eni xra. Náhí. Kaín tí xra ch'eni na Dios tjetjanjon kjuachaxin. <sup>6</sup> Jehe ch'án mé kjuanjon ch'án kjuachaxin kixin chrókjuich'ehehi ch'án xra tsochenkani chojni tí tan níxin kui. Tíha jehya ijnko nkehe tsíkjin chojni chrókjuinchexiteyéhehi. Náhí. Tíha mé kjuachaxin kjuanjon Nchakuen Dios kixin sinchexiteyéhehi ch'án. Kixin tí ley ntáchro kixin its'en chojni. Kjánchó tí Nchakuen Dios la mé tjanjon kjuachón.

<sup>7</sup> Tí ley tsík'óna letra xrotabla mé imá kuikao t'inkaséyan la mé kjuachahya tí sín israelita chrókomá sín ikon ch'ín Moisés kixin imá tjákiní tsjehe ikon ch'án.<sup>3</sup> Kjánchó tí t'inkaséyan kjuankíxin ó tinkák'anka. Méxra tí xíkaha tí ley tjanjon kjuach'én mé kuikao ijnko t'inkaséyan imá náxrjón. <sup>8</sup> ¿á chrókójeheya kixin antsí má t'inkaséyan kuikao tí tan níxin kuixin kjuachaxin Nchakuen Dios? <sup>9</sup> Méxra xíkaha tí ley k'uéchóna kjuachaxin jié kjónté ntáchro kixin its'en chojni, a ntá antsí má jína tí tan chrónka Dios kixin tsotjuáxin tí jié chóntani. <sup>10</sup> Méxra tí kjuachaxin k'uéchóna tí ley k'uék'etqan ósé la ninkehó tóyóehya tí kjuachaxin jié

tjen jie. <sup>11</sup> A ntá tí k'uéchénta kjuachaxin tí nkehe séhyó ntá tinkákjeje, a ntá antsí má chóna kjuachaxin tí nkehe tsjak'e jnkochríxín.

<sup>12</sup> Mé xíkaha tí nkehe tsjejehya tjejóchónhenni ntá chrakonhyani chronkaxínni kaín tíha. <sup>13</sup> Ch'ehyani éxí kjuích'e ch'ín Moisés k'uikjèxin ch'án ka ikon ch'án kíxin tsonoehya tí sín israelita kíxin ó tinkákjeje tí t'inkaséyan chóna ch'án. <sup>14</sup> Kjánchó jehe sín naxa kienxínhya sín la ko naxa xíkaha tjejó sín ijie tíó nchekuáxin sín tí nkehe k'uítuenhen sín ósé kíxin tí ka naxa t'inkákonhen tí chrókienxín sín kíxin naxa kjuínhya tí ka. A ntá tí chrókuinkáchónki sín Cristo la ntá jehe ch'án chrókjuatsen tí ka a. <sup>15</sup> A ntá kjónté jie tíó nchekuáxin sín tí xroon tsíkjin ch'ín Moisés la tjejó sín éxí naxa t'inkákonhen tí ka a kíxin tienxínhya sín. <sup>16</sup> A ntá tíó ijnko chojni tsjankíxin tsinkáchónki Ìnchéni ntá tí ka t'inkákonhen la tsjiin. <sup>17</sup> A ntá Ìnchéni mé Nchakuen Dios tíha. A ntá tí tjen Nchakuen kuènte Ìnchéni Dios la ntiha kohya nkehe ts'inkákonhen. <sup>18</sup> A ntá jeheni kaín ni kohya nkehe t'inkákonhen ikonni la mé tjejóni éxí xrosentá tjákiní tí kjuachaxin kuènte Ìnchéni, na mé tinkák'ixitóxín tí kjuaxrexinkaon kuènténi kíxin antsí chrókóyóhèni éxí tí jehe ch'án kíxin antsí tsochóntani tí kjuachaxin kuènte ch'án, kíxin Ìnchéni, na tí Nchakuen a, mé xíkaha ch'e xra.

**4** Méxra xíkaha chrókórxjéhyani chrókjuich'eni tí xra kjuanjon Dios kíxin jehe ch'án kuikonóehèni ch'án. <sup>2</sup> Ó kuítóhèni kaín nkehe imó la ko kaín nkehe chrókósuèxinni, la ko ch'iyehyani kíchó ni, la ko tjitoxienhyani itén Dios. Náhí. Jehí tí nkehe ntoá chrónkani. A ntá xíkaha chrókónoexín kaín xín chojni kíxin ntoá tjejóni éxí tjinkaon Dios. <sup>3</sup> A ntá jeheni mé tjakoni tí itan tsaáxinni,

kjánchó iso sín kjónté xíkaha tinhin sín mé tienxínhya sín kíxin xráxín jehe sín la ts'tjáyán sín. <sup>4</sup> A ntá jehe sín kuítekakonhya sín, a ntá tí dios kuènte chjasintajni mé kjuínchek'ikonhya sín kíxin chrókienxínhya sín, kíxin ntá chrók'uikonhya sín tí t'inkaséyan kuènte tí tan kuènte Cristo, mé tí nkexro chóna kjuachaxin, a ntá jehe ch'án la mé yóhé éxí tsjehe Dios. <sup>5</sup> Tíó tjakoni na mé jehya tjakoni kíxin jeheni chrókuitekáonrá. Náhí. Chronkaxínni kíxin chrókuitekáonrá Jesucristo mé Ìnchéni la ko chrónkani kíxin jeheni mé t'aharáni xra tsjinkítsani tí jahará kíxin tjuahará Jesús. <sup>6</sup> Na mé jehe Dios k'uetóan kíxin tí xrohi ts'inkaséyanxín tí sítié a na mé kjaxin jehe ch'án kjuanjon ch'án xrohi ts'inkaséyanxín nkaya asènni kíxin chrókjuachani chrókónohèni nkexrí tjen tí kjuachaxin jíé kuènte Dios t'inkaséyanxín Ìnchéni Jesucristo.

#### Nkexrí chrók'uejóni kíxin tinkáchónkini Ìnchéni

<sup>7</sup> A ntá tí cuerpo kuènteni la yóhé ijnko chí tsík'óna nchetje tjinká nkehe tjete, mé xíkaha ts'ikon sín kíxin tí kjuachaxin jíé chóntani la kuixín tí tjen Dios kíxin jehya kuènteni tíha. <sup>8</sup> Chóntani nchónhya kjuaxikaon la kjónté tsjachahya tí kjuaxikaon a. Imá tóxakonhenni la kjónté títoehyani tinkáchónkini ch'án. <sup>9</sup> Kjónté chónkíhi sín tí jeheni kjánchó Dios la kuítóehya ch'án tí jeheni. Kjónté k'uékonni kjuítsínkani kjánchó kjuínchek'itjáyanyani sín. <sup>10</sup> Kjónté nketí sájtjini xráxín chrók'uénxinni éxí k'uénxin Ìnchéni Jesús, kíxin xíkaha tjakoxínni tí kjuachón chóna ch'án. <sup>11</sup> Méxra jeheni naxa tjejóchónni la xráxín síin kjuaxikaon kíxin chrók'uénxinni kíxin tinkáchónkini Jesús kíxin

kjaxin xikaha chrókjuakoxinni tí kjuachón ch'án kjónté chrók'uen tí cuerpo ch'ántani. <sup>12</sup>Kjónté xikaha chrók'uenxinni, a ntá jahará tsochontará kjuachón.

<sup>13</sup>Éxí ntáchro tí xroon itén Dios tsíkjin sín ósé kixin: “Kuítekavan ntá xikaha xrjanka.”<sup>14</sup>A ntá kjaxin jeheni kuítekaonni ntá xikaha chrónkani. <sup>14</sup>A ntá ó noheni kixin Dios mé tí nkexro kjuínchexechón tí Ìnchéni Jesús kjaxin sinchexechón ch'án tí jeheni koíni. A ntá jehe ch'án tsjiko ch'án tí jeheni la ko tí jahará kjaxinrá tí tjen Dios. <sup>15</sup>Kaín tíha kónhen kixin jahará jína chrók'uejoxinrá. La ko kjaxin xikaha nchónhyará chrók'uayéherá tí kjuasáyé Dios, ntá antsí tsjé chojni ts'ejóni tsjancheheni Dios kjuasáyé kixin tí kjuachaxin jíe ch'ánta ch'án.

<sup>16</sup>Méxra chrókóxrjehyani kjónté tinkákjeje tí cuerpo ch'ántani kixin ó noheni kixin jnkojnko yaon Ìnchéni mé tjenchek'ánkí ch'án tí kjuaxrexinkaon kuénteni. <sup>17</sup>A ntá tí nkehe tjasótexinni tí tjejóni ntihi jie mé tíha la tjoka ts'atsínka la ts'áyèxinni ijnko nkehe imá jíe la ko í tsjejhya tíha. <sup>18</sup>Ntá chrókomáhyani tí nkehe síin chjasintajni ntihyó. Náhí. Chrókjueyáni tí nkehe naxa t'ikonhyéni kixin tí nkehe t'ikonxínni ikonni na mé nkehe ch'óxin tsjeje. A ntá tí nkehe t'ikonhyani mé nkehe tsjejhya.

**5** A ntá ó noheni kixin tíó tsjeje tí cuerpo ch'ántani na mé yóhe éxí ijnko nchia tjoka tsjeje, a ntá Dios mé kjuích'éna jnkojnko nchia nixin ts'itjáyanhya jnkochrínk nkaya nkajní kixin jehya tja chojni kjuích'éanaxín tíha. <sup>2</sup>Tí naxa ch'ántani cuerpoéni ntihi la náxrjónhya tjejóni tjinkaonni tí ókjé cuerpo tsoch'ántani nkaya nkajní <sup>3</sup>kixin táha ts'inkáyani éxí ijnko ka, ntá xitjahya chrókótjóchinni. <sup>4</sup>Tí naxa tje-

jóchónxinni tí cuerpo ch'ántani jie la náxrjónhya tjejóni tjasóteni. Tjinkakonhyani xikahó chrókuítokoni tí cuerpoéni ntaxin, na mé tjinkaonni kixin tí cuerpoéni ntaxin chrókónixin ó. Ntá chrók'uitjáyan tí chrók'uenxinni la ntá chrók'ujaxin tí kjuachón nixin. <sup>5</sup>Dios mé kjuenkayáxin ch'án kixin xikaha sinchekitonhenni ch'án ntá kjuínchekitonhenni ch'án tí Nchakuen ch'án kixin ntá chrókónoexínni kixin chaxín ts'áyéheni tí nkehe tsjanjon ch'án.

<sup>6</sup>Mé xikaha xráxin ó noheni kixin tí naxa tjejóni ntihi naxa ch'ántani cuerpoéni ntá naxa tjejókohyani Ìnchéni. <sup>7</sup>A ntá jeheni tjejóni tinkáchónkini ch'án kjónté t'ikonhyani ch'án. <sup>8</sup>Kjánchó jeheni na imá chéheni tjinkaonni chrókuítóheni tí cuerpoéni ch'ántani jie kixin sáchrókjujini tí tjen Ìnchéni, chrók'uejókoni ch'án ntiha. <sup>9</sup>Méxra xikaha tjinkaonni chrókjuinchechéheni Ìnchéni kjónté naxa chróch'ántani cuerpoéni ntihi la o í chróch'ántahyani, la naxa chrókuinkáchónkini ch'án. <sup>10</sup>Kixin kaín ni t'ichjánxin tsochjineheni Cristo tí tjen ch'án t'etoan ch'án kixin nkehe ts'áyéheni jnkojnkonni kixin nkerí xra kjuích'eni á jína o náhí tí naxa k'uéch'ántani cuerpoéni ntihi chjasintajni.

### Tí tan tjanjon kjuaxróxin

<sup>11</sup>Méxra xikaha noheni chróchrakonhenni tí kjuachaxin jíe kuènte Ìnchéni ntá tóxakonhenni tjakoheni chojni kixin chrókuinkáchónki sín ch'án. Ó nohe Dios kixin nkexrí tjejóni la ko tjinkaonni kixin kjaxinrá chrókónohará. <sup>12</sup>Jehya kixin chrótjonkará inaá kixin jína ch'eni xra. Náhí. Jehí ntáchroni kixin síin nkehe chrókóchaxinrá kixin tí jeheni ntoá chrónkani kixin chrókónohará nkexrí chrókjuáteherá tí sín imá nchehnke sín kixin imá náxrjón

nixja sín a ntá xraxinkakonhya sín tí jie chóna asén sín. <sup>13</sup> A ntá tí lóconi na mé tíha kixin tjinkaonni chrókjuich'eheni Dios xra. A ntá tí jehya lóco tí jeheni la mé jehí tjinkaonni chrókjuinkitsani tí jahará. <sup>14</sup> Kixin Cristo la imá tjuèhe kaín xín chojni ntá t'etuenhenni ch'án kixin ó noheni jína kixin jehó ch'án k'uenyákonhenni ch'án tí ijieni kaín ni kixin éxi kjaxinni ik'uénni kaín ni kixin jehe ch'án k'uenyákonhenni ch'án. <sup>15</sup> Mé xikaha Cristo mé k'uenyákonhen ch'án kaín ni. Na ntá jeheni tjejóchónni mé tjejóchónxinni ch'án la jehya tí kjuaxrexinkaon kuènteni chrókjuinchexiteyéheni. Náhi. Chrókjuinchexiteyéheni ch'án kixin k'uenyákonhenni ch'án la ko xechón ch'án inaá kixin tsaáxinni ch'án. <sup>16</sup> A ntá jie jeheni tjenkayáxinhanyi éxi tjenkayáxin chojni chjasintajni ó. Kjánchó senó k'uéchóxinni Cristo kixin nkexrí kjuák'e ch'án chjasintajni ó, a ntá jie la xikahya t'ikonni ch'án. <sup>17</sup> Méxra tí nkexro tinkáchónki Cristo mé k'óna ijnko chojni nixin. A ntá kaín nkehe ntaxin la ó kjuixin k'uátsínka la ntá jie la kaín nkehe ó k'óna nixin.

<sup>18</sup> Kaín tíha mé tí xra kjuích'e Dios. Jehe ch'án mé kjuanjon ch'án kjuaxróxin kixin jína chrók'uejókoni ch'án kixin k'uenyákonhenni Cristo. Ntá jie jeheni k'uáyéheni tí xra tsochénkani í so chojni kixin kjuaxróxin chrók'uejóko sín ch'án. <sup>19</sup> A ntá ó noheni kixin Dios ichr'án Cristo k'uenyákonhenni ch'án, ntá xikaha Dios tjinkaon kixin kjuaxróxin chrók'uejóko ch'án tí sín chjasintajni, la ko jehe ch'án tahya ch'án kuentá kaín tí jie chóna chojni, a ntá jeheni k'uáyéheni tí xra tsjakoni itén ch'án. <sup>20</sup> Ntá jeheni kjuachaxin kuènte Cristo chronkaxinni kixin Dios chrónóaxinrá ch'án tí jeheni. Mé xikaha

tí kjuachaxin kuènte Cristo chrónóaxinráni kixin kjuaxróxin chrók'uejokoará Dios. <sup>21</sup> A ntá Cristo la ninkehó jie kjuasinhya ch'án, ntá ijieni k'uénxin ch'án. Kjánchó Dios k'uíkon kixin éxi tí jehe Cristo chóna ch'án jie, kjuenkayákonhen ch'án kaín tí jie k'uéchóntani.

**6** Ntá kaín ni jnkokoá ch'eheni Dios xra, ntá chrónóaharáni kixin chrókuítóéhyará tí kjuasáyé Dios kjuakuaxinrá ch'án. <sup>2</sup> Kixin ntáchro xroon itén Dios kixin:

A ntá tí yaon kóxrjinhin Dios kuínhin ch'án tí nkehe chronða chojni; Tí yaon tsaáxin chojni mé kjuínkitsa ch'án tí jehe sín.<sup>§</sup>

A ntá jie ó kui tí yaon kjueyá Dios. A ntá jie ó kui tí yaon tsaáxin chojni.

<sup>3</sup> Ch'ehyani ninkehó nkehe jínahya kixin ntá chrók'uantaxinhin sín tí xra tjejóch'eni. <sup>4</sup> Náhi. Kaín nkehe ch'eni tjakoxinni kixin ch'eheni Dios xra. Na mé tjachani tóninkakonhyani kjónté nchónhya nkehe tjasótéxinni, la kjónté ichrén nkehe t'ichjánxinhinni, la kjónté ichrén kjuaxikaon síin. <sup>5</sup> Na mé k'uékoni, la k'uéjóchjinani, la nchónhya k'uixite chojni kóninkakonhenni sín, la ko tí xra kjuích'eni la imá xra. Kjaxin k'uájuahyani la ko kjónehyani.

<sup>6</sup> Tjakoxinni kixin tjóá tjenkayáxinni, la ko tjakoxinni kixin ó noheni tí nkehe chaxín, la ko tjakoxinni kixin tóninkakonhyani, la ko tjakoxinni kixin ch'eni tí jína. La ko chóntani Nchakuen Dios, la ko kaín asénni tjuèheni kichó ni, <sup>7</sup> la ko chrónkani tí tan ntoá kuènte Dios, la ko tjakoxinni kixin chóna tí kjuachaxin kuènte ch'án. Ntoá tjejóni ntá xikaha tsjachani ntá kohya nkehe tsonhenni. <sup>8</sup> Iso sín náxrjón nixjehe sín tí jeheni la ko iso sín náxrjónhya nixjeheni sín, la ko iso sín jína nixja sín nkexrí tjejóni la ko iso

§6:2 Isaias 49.8

sín t'ántaxínhinni sín. Iso sín t'ikon sín tí jeheni éxi chojni ch'ia la ko iso sín ntáchro sín kixin jeheni chojni ntoá chrónka. <sup>9</sup>Iso sín ntáchro sín kixin chónhya sín tí jeheni kjónté chóxinni sín. Iso sín tjinkaon chrók'óyánni sín la kjónté naxa tjejóchónni. Kjuateni sín na kjónté k'óyanhyani sín. <sup>10</sup>T'áváni la kjónté xraxinkaonni kixin Ìnchéni t'ayakonhenni la chéheni. Éxi nòani jeheni na kjónté chénkani itsjé chojni tí itén Dios tsaáxin sín éxi chróchjeheni sín ijnko nkehe imá tjete xikaha. Éxi chóntahyani ninkehó nkehe la kjónté la kaín nkehe chóntani.

<sup>11</sup>Kíchóni tjejorá chjasin Corinto, ntoá chrónkani nixjahaaráni la ninkehó t'ayahyaráni la mé kaín asénni tjuahará. <sup>12</sup>Jehya jeheni chrók'uitjáyán kixin chrótjuahará. Náhí. Jahorá t'tijáyán kixin chrótjuèhérá tí jeheni. <sup>13</sup>Janhan xrjanóahará éxi ijnko it'é xjan chrónóhe tí xjeen ch'án kixin kjaxinrá kaín asánrá chrótjuèhérá tí jeheni éxi tjuèheni tí jahará.

### Jeheni mé éxi ninkoe Dios tjechón

<sup>14</sup>Chrók'uitohyará tí sín tinkáchónki-hya Ìnchéni kixin tíha mé éxi yóhe ijnko yunta, jnkokónhya koxinta. ¿La ko nkexrí chrók'óyóhe ijnko chojni ó kótjóá la ko ijnko chojni naxa náhi? ¿La ko nkexrí chrók'óyóhe tí t'inkáséyan la ko tí sítié? <sup>15</sup>Xitjahya chrók'uixin kjuaxróxin tí tjen Cristo la ko tí Tsochren. Xitjahya ts'ejóko kíchó ijnko chojni tinkáchónki Cristo la ko ijnko chojni tinkáchónkihya. <sup>16</sup>Xitjahya chrók'uito tí ninkoe Dios la ko tí nkehe tsikjanoya. Kixin jeheni mé tí ninkoe Dios tjechón, kixin jehe ch'án tsíntáchro ch'án kixin:

Ntaha tsjak'é la ko xritjak'é tí tjejó tí jehe sín,

à ntá janhan mé ts'óna Dios kuènte sín la ko jehe sín mé ts'óna chjasin kuèntana.\*\*

<sup>17</sup>Méxra xikaha kjaxin ntáchro Ìnchéni kixin:

T'axrjekjanxínrá tí jehe sín na ókjé tjejorá;

tsehyará tí nkehe tjuáhya.

À ntá janhan mé ts'ayáha tí jahará.††

<sup>18</sup>Ntá janhan mé ts'óna It'ará,

à ntá jahará ts'ónará xjanna ntoa la ko xjanna chjin,

ichro Ìnchéni Dios chóna kaín kjuachaxin.‡‡

**7** Mé xixaha kíchó ni, tí nkehe i mé tsíntáchro Dios tsjanjon ch'án. Méxra t'ichjánxin kixin tjóá chrók'uejóni, chrókuítóheni kaín nkehe chrókjuinckejita tí cuérpoéni la ko tí asénni. Ntá chrókóxakohenni chróchrakohenni Dios la t'ichjánxin chrókjuancheheni ch'án chrókjuincketjóáni ch'án kixin jehó ch'án chrókuinkáchónkini.

### Tí sín Corinto kjuitoxínhin sín ntje sín

<sup>2</sup>Chrókjuánjonrá kjuachaxin kaín asánrá chrókuinhínrá tí nkehe chróchronkani. Ninkehó jie chóntehyani ninkexró, la ko kjuích'iyehyani ninkexró. <sup>3</sup>Jehya ntáchroni tíhi kixin chrókuékará jie. Náhí. Ó nohará kixin ósé chrónkani kixin kaín asénni tjuèheni tí jahará kixin jnkokoá chrók'uejóni la ko jnkokoá chrók'uenni. <sup>4</sup>Janhan la imá tjíkosáyahará tí jahará la ko imá chàna kixin jína tjejorá. Kjónté kaín nkexrí tjejótjasóteni na imá chàna.

<sup>5</sup>À ntá tíó kjujini estado Macedonia la xitjahya chrók'ok'éheni kixin

\*\*6:16 Levítico 26.12, Ezequiel 37.27

††6:17 Isaías 52.11

‡‡6:18 Oseas 1.10

nkuíxín síin chojni nínkakönhenni la ko kóxakonhen asénni. <sup>6</sup>Kjánchó Dios na mé tí nkexro nchechéhe asén kaín tí sín tsíkóxrjé mé kjuínchechéhe ch'án asénni kixin ó kjuíji ch'án Tito. <sup>7</sup>Ntá jehya kixin tí kjuíji ch'án ó chrókóchéhinni. Náhí. Chéheni kixin jahará kjuínchechéhérá ch'án. Chrónka ch'án kixin imá tjinkáonrá chrók'uíkonrá tí janhan la ko chrónka ch'án kixin tóxakonhanrá kixin tí jie kjuásinrá la ko kjaxin tóxakonhanrá chrókjuích'erá tí nkehe kuétuñhanrá. Mé kuñhan kaín tíha ntá antsí má kóchána.

<sup>8</sup>Kjuíntak'avará kixin tí xroon kjian chr'anhánrá la kjónté la ntá jie í tóxakonhaya. Na mé senó kóxakonna ntá k'uíkuan kixin tí xroon kjuíntaxakonhanrá kjánchó kánhyó isé tíha. <sup>9</sup>Ntá jie chána, kjánchó jehya kixin tí nkehe kjuíntak'avará. Náhí. Chána kixin tí kjuat'avá a ntá ikjanrá kuinkachónkirá Dios. Kjuachará kjónté tí kjuat'avá ntá kjanrá kuinkachónkirá Dios la kóxrjínhin ch'án. Méxra xikaha jeheni la ninkehó nkehe jínahya kjuít'aharáni. <sup>10</sup>A ntá tí kjuat'avá kjuacha chojni ntá sinchechéhe sín Dios kixin kjuítóxinhin sín tí nkehe tjenkayáxin sín la ntá xikaha mé tsaáxin sín ntá í ts'aváhya sín chr'éxin. A ntá tí sín kuítóehya tí nkehe kuènte chjasintajni mé t'avá sín kixin táhó ts'enxín sín. <sup>11</sup>A ntá jahará kjuachará k'uátsínkará tí kjuat'avá éxí kóxrjínhin Dios, a ntá jie kónohará kixin jína tjejorá, la ó ntoá tjenkayáxinrá, ntá jie chrónkaxínrá nkexrí k'uékjich'erá. Tí nkehe kuinhínrá ntá kjuínchechónínkaonrá la ko kjaxin kjuínchechrakonrá. Ntá chr'éxin ntá tjinkáonrá chrók'uíkonrá tí janhan. Ntá kjuíncheckjasóterá tí nkexro kjuasin jie. Kaín tíha kjuákoxinrá kixin chontahyará ninkehó jie tí nkehe tsíkónhen. <sup>12</sup>A ntá tí nkehe kjian la jehya kixin

kjuenkayáxin janhan kuènte tí ch'ín kjuasin jie, la ko jehya kixin kjuenkayáxin janhan kuènte tí ch'ín k'uává ó. Náhí. Íchá jína kixin jahará chrókjuákoxinrá nkayakon Dios kixin imá tóxakonhanrá kixin jeheni xikaha k'uetoanni. <sup>13</sup>Mé xikaha kjuích'erá ntá kóchéheni.

Kjánchó antsí má kóchéheni kixin k'uíkonní kixin kóchéhe ch'ín Tito kixin jahará kaín rá kjuínkítará kixin kjuaxróxin kjuák'e ch'án ntiha. <sup>14</sup>Janhan k'uetjanka tí ch'ín Tito kixin chána kixin tí jahará la jehya kjuach'ia tíha la kósuànahya. Náhí. Kaín nkehe k'uetjónkará la chaxín la ko kjaxin kaín nkehe k'uentátjan ch'ín Tito la chaxín kixin chéheni kixin kuítekáonrá. <sup>15</sup>A ntá jie antsí tjuahará ch'án kixin xráxinkaon ch'án kixin nkexrí jína kuítekáonrá la ko nkexrí imá kjuíkosáyehérá ch'án kjuánjonrá kjuachaxin kuítóhe ch'án ntiha. <sup>16</sup>Ntá imá chána kixin ó nòna kixin jahará sinchexiteyànará.

### **Antsí má chrókjuínkítsa sín kichó sín**

**8** Ntá jie kichó ni, tjinkaonni chrókónohará kixin nkexrí tí sín tinkáchónki Ìnchéni tójnkontsé sín estado Macedonia kjuákoxin sín nkexrí tí kjuasáyé Dios. <sup>2</sup>Kjónté nchónhya nkehe tsíkónhen sín la kjónté la kóchéhe sín; la ko kjónté nda sín la antsí má kjuínkítsa sín tí sín í so éxí chojni chóna itsjé chichaon xikaha kjuích'e sín. <sup>3</sup>Chaxín k'uíkuan kixin kjuanjón sín éxí tí nkehe chóna sín la ko antsí má xikjanjón sín ínaa kixin xikaha kjuenkayáxin sín. <sup>4</sup>Nchónhya chrónóehé sín tí jeheni kixin chrókjuanjónni kjuachaxin kixin chrókjuínkítsa sín tí sín kichó ni tinkáchónki Dios. <sup>5</sup>Na mé antsí má kjuanjón sín la xikahya kjuenkayáxinni kixin xikaha chrókjuanjón sín, na mé senó kuinkáchónki sín Ìnchéni, ntá kjuixin ntá kjuínchexiteyéhe sín tí jeheni éxí tóxrjínhin Dios.

<sup>6</sup>Méxra chrónóhēni tí ch'ín Tito kixin chrókjuenájín ch'án chichaon tí tójnkotsérá ntiha éxí kjuankíxin ch'án senó. <sup>7</sup>A ntá jahará la tjákoxinrá jína kixin antsí tinkachónkirá Ìnchéni, la ko antsí k'uitjará chrónkaxínrá itén Dios, la ko antsí k'uitjará nkehe kuènte Dios, la ko antsí chontará kjuachéhe, la ko antsí tjuèhéra tí jeheni. Méxra xikaha antsí chrókjuákoxinrá tí xra jína chrókjuínkitsará tí sín kíchó ni.

<sup>8</sup>Jehya ntáxrjan tíhi kixin chrókuētuanhanrá xikaha. Náhí. Jehí tjínkavan chrókónohará nkexrí jína kjuích'e tí í so sín kixin kjaxinrá chrókjuákoxinrá kixin tjuèhéra kichuárá. <sup>9</sup>Kixin ó nohará nkexrí tí kjuasáyé Ìnchéni Jesucristo kixin k'uéríko ch'án la ntá kónòda ch'án kixin imá tjuèhe ch'án tí jahará kixin tí kónóaxin ch'án mé jahará kórkóxinrá.

<sup>10</sup>Méxra tsotjonkará tí nkehe tjenkayáxian janhan kuènte tí xra i kixin jahará tí nánó k'uátsínka kjuankíxinrá kjuínkitsará kjuánjonrá nkehe, la mé jehya kixin ó jehí kjuínkitsará sín. Náhí. Kjaxin imá kócháhará kixin kjuínkitsará sín. <sup>11</sup>A ntá jie chrókjuintaxín chrókjuánjonrá éxí tí chrókjuachará chrókjuánjonrá éxí xrankíxixín tsíkjataherá tsjínkitsará tsjánjonrá nkehe. <sup>12</sup>Mé xikaha tí chaxín tjinkaon jnkofín chojni chrókjuanjon sín nkehe, ntá tsóxrjínhìn Dios tí tjanjon sín tí nkehe chóna sín. Dios la tjanchahya ch'án tí nkehe chóntahya chojni.

<sup>13</sup>Jehya kixin xikaha tí í so sín chrók'uejó sín jína kixin tí nkehe kjuínkitsará sín la ntá jahará chrók'uitjáyan nkehe t'ichjánxinhanrá. Náhí. <sup>14</sup>Chrókójína chrókóyóhe chróchontará nkehe jnkokón. A ntá jie jahará chontará tí nkehe chóntahya tí í so sín. A ntá í jnko yaon jehe sín tsochóna sín tí nkehe tsochontahyará.

Chrókjuínkitsará tí sín chóntahya kixin chróchontará nkehe jnkokón. <sup>15</sup>Éxí ntáchro xroon itén Dios kixin: “Tí sín kjuenájín sín nchónhya la mé xèhya sín ninkehó, la ko tí sín kjuenájín sín tsjéhya na mé kjónté tsjéhya la kjuacha tí nkehe kuicháxinhin kjuenájín sín.”<sup>¶¶</sup>

### Ch'ín Tito la ko tí sín k'uájiko ch'án

<sup>16</sup>A ntá kjuasáyé Dios kixin kjuínchexraxinkaon ch'án tí ch'ín Tito ntá kóxakonhen ch'án éxí tóxakonna kixin tí jahará. <sup>17</sup>Ntá kóxrjínhìn ch'án tí nkehe k'uetuenhenni ch'án, la ntá kjaxin jehe ch'án kóxakonhen ch'án kixin á jína tjejorá, ntá jehe ch'án tjinkaon ch'án chrókjuiijitsjehe ch'án tí jahará.

<sup>18</sup>Kjaxin k'uetuanni sátsjikotoxin tí ch'ín Tito í jnko kíchó ni, na mé kaín chjasin tí sín tinkáchónki Ìnchéni mé chóxin sín ch'án kixin tí xra jína tjech'e ch'án tjako ch'án tí tan tsaáxinni. <sup>19</sup>La ko kjaxin tí sín kaín tí nínko ntihi kjueyá sín tí nkexro kíchó ni kixin sátsjikotoxin ch'án tí jeheni tí xra sátsjikoni tí chichaon tsjikénhenni tí sín nòda. Na mé tí xra ch'eni kixin xikaha tsjikosáye-heni Ìnchéni la ko xikaha tjákoxiníni kixin tjinkaonni chrókjuínkitsani sín. <sup>20</sup>Tjinkaonni kixin tsokohya nkexro chrók'uántaxínhinni kixin tí chichaon xrenájín kjuíjijikoni. <sup>21</sup>Méxra tjinkaonni chrókjuich'eni tí nkehe ntoá, jehya jehó tí nkehe chrókóxrjínhìn Ìnchéni. Náhí. Kjaxin tjinkaonni kixin chrók'uikon chojni kixin jína tjejóch'eni.

<sup>22</sup>La ko kjaxin k'uetuenhenni sín sátsjikotoxin sín í jnko kíchó ni, na mé ijnko nkexro nchónhya nkexrí kjuákoxin ch'án kixin chéhe ch'án chrókjuínkitsa ch'án kixin itsjé xra kjuích'e ch'án. A ntá jie antsí má chrókjuich'e ch'án xra kixin chóxin ch'án tí jahará. <sup>23</sup>A ntá jnkofín

sín tsjanchankí sín kixin nkehe tí xra ch'e ch'ín Tito la mé chenkará sín kixin jehe ch'án mé tjinkĩtsa ch'án tí janhan kixin xikaha tjinkĩtsa ch'án tí jahará. **A** ntá tí tsjanchankí sín kixin nkehe tí xra ch'e tí í so kichó ni ntá chenkará sín kixin tí sín kaín ninko k'uetqan sín kixin sátsji sín ntilha kixin mé xikaha tsjikosáyehe sín Cristo. <sup>24</sup> Méxra chrókjuáqoxinrá kixin chaxín tjuèhéra kichuára kixin tsonohe tí sín kichó ni í so ninko la ko kjaxin tsonohe sín kixin chaxín chéheni kixin tí jahará.

### Tí chichaon xrenájín tsjinkĩtsa tí sín kichó ni

**9** **A** ntá tí xrenájín chichaon kixin tsjinkĩtsará tí sín kichó ni tinkáchónki Inchéni, la t'ichjánxienhya tsokjian xroon tsochr'anhánrá <sup>2</sup> kixin xráxín kónona kixin jahará tjinkáonrá chrókjuínkĩtsará, na mé xikaha chàna la tjanka tí sín tjejó estado Macedonia kixin jahará chojni estado Acaya desde tí nánó k'uátsinka xráxín tjejorá tjinkáonrá chrókjuínkĩtsará. **A** ntá antsí tsjé sín estado Macedonia tjinkaon sín chrókjuínkĩtsa sín kixin jahará xikaha kjuáqoxinrá nkexrí tjinkáonrá chrókjuínkĩtsará. <sup>3</sup> **A** ntá ichr'an tí sín kichó ni kixin tjínkavan kixin tsontáchrohya sín kixin chaxínhya tí nkehe jína ntátjan sín senó. Mé xikaha jahará chrókóyaxínhanrá chrókjuínkĩtsará tí sín kichó ni éxí ntátjan sín senó. <sup>4</sup> Kixin tí chrókjuasánkian iso tí sín Macedonia ntá tí chrókónoxín kixin naxa kohya nkehe tsjánjonrá ntá chrókósuèheni tí jeheni kixin imá chóxinni kichó ni la ko kjá chrókósuàhará kjaxinrá. <sup>5</sup> Méxra xikaha tóna kixin t'ichjánxin tsontátjan tí sín kichó ni kixin sátsji sín tsitónxin sín ntia tsjijitsjehe sín

tí jahará senó tsjinkĩtsa sín kixin tsjenájínrá tí chichaon tsintáchorá senó kixin chrókjuánjonrá. **A** ntá chrókóyaxínhanrá kixin chrókjuánjonrá tí chichaon éxí ijnko nkehe chaxín tjinkáonrá chrókjuánjonrá la jehya éxí ijnko nkehe chrókjuanchaharáni afuerza.

<sup>6</sup> Xráxinkáonrá kixin tí nkexro k'uenka tsjéhya na mé tsjéhya tsotjá. **A** ntá tí nkexro k'uenka itsjé mé tsotjá itsjé. <sup>7</sup> Méxra jnkojnko chojni chrókjuanjon tí nkehe kjuenkayáxixín sín asén sín. Na mé tjinkakonhya Dios kixin kénhya asénni chróchjéheni ch'án nkehe, kixin Dios mé tjuèhe ch'án tí nkexro chéhe tjanjon nkehe. <sup>8</sup> **A** ntá Dios chóna kaín kjuachaxin jíé ntá tsotjáhará ch'án kaín nkehe t'ichjánxinhanrá kixin tsochontará nkehe tsochjehérá í so chojni chón-tahya kixin xikaha sich'erá kaín xra jína. <sup>9</sup> Éxí ntáchro tí xroon itén Dios kixin: Tí nkexro t'óxikayéhe ch'án itsjé nkehe nchekitonhen ch'án tí sín nòna mé nunca tsjejehya tí xra jína ch'e ch'án.<sup>§§</sup>

<sup>10</sup> Dios mé tjanjon noatje kixin ts'inka la ko jehe ch'án mé tjanjon nkehe sineni, la ntá kjaxin tsotjáhará ch'án kaín nkehe t'ichjánxinhanrá la ko jehe ch'án sinchek'ánkí ch'án tí nkehe ts'ènkará la ko jehe ch'án sinchek'ánkí ch'án tí xra jína tjejoch'erá. <sup>11</sup> **A** ntá tsochontará kaín nkehe tjehe kixin ntá antsí tsjachará tsjinkĩtsará tí í so sín kichó ni. **A** ntá xikaha tsjijikenhenni sín tí nkehe tsochjehérá tí sín kichó ni ntá tsjanchehe sín Dios kjuasáya. <sup>12</sup> Kixin xikaha chrókjuínkĩtsará tí sín kichó ni na jehya kixin chrók'uáyéhe sín tí nkehe t'ichjánxinhin sín ó, la mé kjaxin chróchjéhe sín Dios kjuasáya. <sup>13</sup> Mé xikaha tsjanchehe sín Dios kjuasáya kixin tí nkehe kjuánjonrá kjuáqox-



inrá kixin nchexiteyéherá tí tan kuente Cristo. Kjaxin tsjikosáyehe sín Dios kixin tí í so nkehe kjuánjonrá k'uáyéhe sín la ko tí nkehe k'uáyéhe í so chojni. <sup>14</sup>La ko jehe sín tsjanchehe sín Dios kixin tsjinkitsa ch'an tí jahará kixin jehe sín tjuahará sín kixin t'ikon sín kixin tjákoxinrá kixin tí kjuasáyé Dios chontará. <sup>15</sup>Tjancheheni Dios kjuasáya kixin kjuínchekitonhenni ch'an ijnko nkehe imá jié tsaáxinni la tsjachahyani tsochronkaxínni kaín tíha.

### Kjuachaxin chóna ch'in Pablo kixin tsík'óna ch'an apóstol

**10** Janhan Pablo tió xrjanóahará nkehe la jnkojína xrjanóahará la mé tjákoxian éxi toxrjínhin Cristo. Ntáchrorá kixin tió tjèn tí tjejorá ntiha la tósuàna, a ntá tí kjín tjèn la imá jièna, ichrorá. <sup>2</sup>Méxra xrjanóahará kixin tí tsjasántsahará tjínkakhonya kixin chrókjuintchekóninkáonrání kixin ntá tsonínkakhonhánrá jnkojínrá kixin tsékaráni jie kixin ixria éxi chojni chjasintajni ó, tsixrorá. A ntá xra ó tsjasán tsjentuáha tí jehe sín. <sup>3</sup>Chaxín tjejóni éxi chojni ó, na kjánchó tió tjanjonni la tjanjonhyani éxi tjanjon chojni chjasintajni. <sup>4</sup>Kixin tí nkehe xraáni tjanjonxinni jehya nkehe kuente chjasintajni. Náhí. Táha la kjuachaxin kuente Dios la tíha mé tsjacha sinchek'itjáyán kaín kjuachaxin kuente tí Jínahya. <sup>5</sup>Na mé tsjachani sinchek'itjáyanni tí nkehe ntoáhya tjenkayáxin chojni la ko kaín nkehe nchehnkexín sín t'inkákonhen kixin chrókóchóxin chojni Dios. A ntá kjuachaxin kuente Cristo tjákohe ni kaín chojni kixin ntá tsítóhe sín kaín nkehe ntoáhya tjenkayáxin sín, a ntá chrókuitekakonhen sín tí jehe ch'an <sup>6</sup>la ko tjejóchónhenni sinchekjasóteni kaín tí sín ntiha naxa tjinkakhonya sín chrókjuintchexiteyá sín tí tsjixin tsono-

heni kixin á chaxín tsjachará sinchexiteyará jína.

<sup>7</sup>A ntá jahará tékaráni jie kixin tí nkehe t'ikonrá ó. A ntá tí nkexro tjenkayáxin kixin chaxín ch'ehe Cristo xra la mé kjaxin chrókjuintsoan kixin kjaxinni jeheni la ch'eheni Cristo xra. <sup>8</sup>A ntá tí chrókjuintahnkena ntsí kixin tí kjuachaxin chonta janhan ntá chrókósuánahya kixin Inchéni kjuanjón tí kjuachaxin kixin chrókjuintkítsa tí jahará kixin antsí chrók'uitjará kuente Dios, la mé jehya kixin chrókjuintak'itjáyánrá. <sup>9</sup>Tjínkakhonya kixin chrókjuintachrakonxínrá tí xroon chr'anhánrá. <sup>10</sup>Kixin ntáchro sín kixin ixra la ko jiehe tí nkehe ikjian janhan, a ntá tí chrókjuaqué ntiha la jiènahya la ko kánhyó chonta janhan kjuachaxin tí nixja janhan. <sup>11</sup>Kjánchó tí nkexro xikaha ntáchro chrókónohe ch'an kixin jnkokón nixja janhan éxi nixja tí xroon tsíkjian kjónté ikjín tjèn la ko kjónté tí chrók'uejóni ntiha.

<sup>12</sup>Tjinkakhonyani chrókjuintkayáxin kixin chrókóyóhèni tí í so sín ntáchro sín kixin jína tí jehe sín. Jehe sín mé lontí sín kixin ncheyóhe sín asén sín í so chojni. <sup>13</sup>A ntá jeheni la chrókjuintchekóninkéxínhyani ijnko xra jehya xra kuènteni. Dios mé kjuako nketí sich'eni xra la kjuanjón ch'an kjuachaxin kixin kjujini kjuich'eni xra tí tjejorá chjasin Corinto. <sup>14</sup>Jehya kixin chróchóntahyani kjuachaxin chrók'uetuáhanhánrá. Tí chaxín jehya jeheni saoxín kjujini tí tjejorá ntá xikaha chróchóntahyani kjuachaxin. Ntá náhi, kixin jeheni saoxín kjujini ntiha kjuakoharáni itan kuente Cristo. <sup>15</sup>Chrókjuintchekóninkéxínhyani ijnko xra kjuich'e ókjé chojni éxi xra chrókjuintchekóninkéxínhyani jeheni. Náhí. Tjinkaonni kixin antsí chrók'uitjará tsinkachónkirá Inchéni ntá xikaha la antsí chrókjuintkítsani tí jahará kixin

jehó tí xrá k'uáyéhēni tjejóch'eni. <sup>16</sup>Kjāxin tjincaonni chrókjuakoni tí itén Īnchéni chrókuaáxin chojni í so chjasin sáchrókjuini la ko kjāxin chrókjuinchehnkexínhyani tí xrá chrókjuich'e ókjé chojni.

<sup>17</sup>Ā ntá jnkójín sín tjincaon sín chrókjuinchehnke sín ntá jehó chrón-táchro sín kixin kjuachaxin Īnchéni mé chóna sín.\* <sup>18</sup>Kixin tóxrjénhya Dios ijnko nkexro jehó chróntáchro kixin jina ch'án. Náhí. Īnchéni mé tsontáchro ch'án nkexro chaxín jina.

### Ch'ín Pablo la ko tí sín chaxínhya apóstol

**11** Tjínkavan chrókuinhínra ntsí tí lontina. ¿Á chrókjuachará chrókuinhínra nkehe tsontáxrjan? <sup>2</sup>Janhan tjínkakonhya kixin í jnko nkexro chrókuinkachónkirá. Kjāxin xikaha tjínkakonhya Dios. Ó ikjua Cristo kixin chrókuakja ch'án tí jahará. Tjínkavan chrókjuánjuan tí jahará chrókuakja tí jehe ch'án éxí yóhe ijnko tjan tjarisoá chrókótehe jnkokoá xii. <sup>3</sup>Tóxakonna kixin éxí tí konche tí kjuach'ia xriko ntá kjuích'iyehe tjan Eva, ntá xikaha kjāxinrá jahará tsitohérá sit'ayahará ókjé chojni ntá tsitohérá tí nkexrí kaín asánra tinkachónkirá Cristo. <sup>4</sup>Ā ntá jahará cháhará tjánjonra kjuachaxin tjiji ókjé chojni ntiha chronkaxín sín í jnko Jesús ókjé jehya éxí tí chronkaxinni jeheni, la ko kjāxin cháhará k'uayéhérá ókjé nchakuen jehya tí Nchakuen Dios k'uayéhérá sao, la ko cháhará chrókuítekáonra ijnko nkehe ókjé chrókuaáxinra jehya éxí tí nkehe kuítekáonra senó. <sup>5</sup>Ó ñona kixin chaxínhya ninkehó sínkíhyana janhan, a ntá antsí sínkí tí sín chréhérá jahará, ichrorá. <sup>6</sup>Kjónté kánhyó náxrjón níxja janhan la jehya kixin

kánhyó chrókónona chrókjuakua. Ā ntá tjákoáxinra jahará tíhi kixin kaín nkehe t'a.

<sup>7</sup>¿Á ntoáhya kjuít'a janhan xrjankaxián tí tan tsaáxinni kixin ninkehó kjuáncháhya chrókjuacha la ko éxí ijnko chojni nóe kjuak'é janhan kixin tjínkavan chrókjuínkítasará chrók'uitjará? <sup>8</sup>Tí sín í so njnko kjuínkítasana sín kjuanjon sín chichaon k'uayáha kixin tsjak'é tsjákohára jahará. <sup>9</sup>Tí kjuak'é tí tjejorá jahará la kjónté t'itjáyan nkehe la ninkexró kjuáncháhya nkehe. Jehó tí sín kichó ni kjuixín estado Macedonia kjuíkao sín tí nkehe t'ichjánxinna. Méxra tjínkakonhya kixin chrótjehará xrá tí jahará la ko xikaha naxa tjét'a jie. <sup>10</sup>Xikaha chaxín choxian tí tan chaxín ntoá kuente Cristo, a ntá kohya ninkexró nkuixín estado Acaya tsjacha tsakit-sjena tí kjuachéhe chonta. <sup>11</sup>¿Nkekuente xikaha ntáxrjan? ¿Á xikaha ntáxrjan kixin tjuahyará tí jahará ní? Náhí. Dios la ó nohe kixin imá tjuahará.

<sup>12</sup>Kjánchó ó jehí tsjintaxín xikaha sit'a kixin tjínkakonhya tsjánjuan kjuachaxin kixin nchehnkexín tí sín ixri ntáchro kixin jnkokón kjuachaxin chóna tí nkehe tjákua la ko tí nkehe tjako sín. <sup>13</sup>Kjánchó jehe sín ijnko apóstol chaxínhya mé ch'ia sín ncheyóhó sín éxí chojni kjueyá Cristo. <sup>14</sup>Jehya ijnko kjuachrakon tíha kixin kjāxin ch'ín Tsochren kjāxin xikaha ncheyóhe ch'án éxí ijnko ángel kuente tí t'inkaséyan. <sup>15</sup>Méxra xikaha kjāxin kuènnen tí sín ch'ehe tí Jínahya xrá mé ncheyóhe sín tí sín jina. Ntá tsjixixín mé tsjasótexín sín tí xrá jínahya kjuích'e sín.

### Kjuasóte ch'ín Pablo kixin apóstol tí jehe ch'án

<sup>16</sup>Ntáxrjan inaá kixin nijnkorá chrókjuenkayáxinra kixin lócona.

\*10:17 Jeremías 9.24

Kjánchó tí xíkaha tjenkayáxinrá la títóherá tsonixja janhan éxí lócona kixin kjaxinna jína chrókujintahnke ntsí. <sup>17</sup>Tí xíkaha ntahnkexián la jehya kjuachaxin kuènte Ìnchéni ntáxrjanxian tíha. Náhí. Jehí éxí ijnko chojni lóco nixja. <sup>18</sup>A ntá nchónhya chojni síin nchehnkexín sín tí nkehe nohe sín a ntá jie la kjaxin janhan sintahnke. <sup>19</sup>Kixin jahará ntáchrórá kixin imá nohará ntá cháhará tjejó tí sín lóco. <sup>20</sup>Kixin tjánjonrá kjuachaxin t'etuanhanrá sín la nchexiteyéherá sín la ko takitsjahará sín tí nkehe chontará la ko ch'éna asén sín éxí inché sín tí jahará, la ntá kjoníehyará sín la ko tjate sín nkaya ikonrá. <sup>21</sup>Kjonté chrókósuàna tsontáxrjan kixin jeheni la kánhyó jiehe k'uetuanhanráni.

Kjánchó tí nkehe nchehnkexín sín la janhan ntahnkexián kjaxinna, kjonté ntáxrjan tíhi éxí ijnko chojni lóco. <sup>22</sup>¿Á chojni hebreo jehe sín? Kjaxin janhan. ¿Á chojni israelita jehe sín? Kjaxin janhan. ¿Á k'uaxrjeníxin sín ch'ín Abraham? Kjaxin janhan k'uaxrjeníxian ch'án. <sup>23</sup>Ch'ehe sín Cristo xra kjánchó janhan la antsí má la jehe sín la kénhyó, kjonté ntáxrjan tíhi éxí ijnko chojni lóco. Janhan la antsí má kjuít'a xra a ntá jehe sín la kénhyó, la ko antsí má kjuak'échjina ntoechiso a ntá jehe sín la kénhyó, la ko antsí má kjuatena chojni a ntá jehe sín la kénhyó, la ko nchónhya veces k'uúxin kjuaxikaon kixin chrók'uén. <sup>24</sup>In'ó veces tí sín judío kjuatena sín la ko treinta y nueve tí kjuatjoté. <sup>25</sup>Níya kjuatexínna sín inta la ko í jnko vez kjuak'e sín xro. Níya k'uániánkí ntabárcō ntá ntá ijnko yaon la ko ijnko tie tjénkataván ntayaon. <sup>26</sup>K'uájia má, k'uúkuān kjuaxikaon chrók'uénxian tí ntarío la ko chrók'óyánna tí xíchee la ko chrók'óyánna tí sín chjasenná la ko tí sín tsíkjin ókjé. K'uúkuān kjuaxikaon tí ch-

jasin jie la ko tí nteje la ko tí ntayaon la ko chrók'óyánna tí sín chaxínhya tinkáchónki Ìnchéni. <sup>27</sup>Kóxrjéna kixin tí xra kjuít'a la ko itsjé nkehe náxrjónhya konna. Itsjé tie kjuak'échrinhya jína la ko itsjé yaon ik'uén kjinta la ko ik'uén ntá la ko itsjé yaon kjónéhya ninkehó la ko kókinna la ko chontahya kaná.

<sup>28</sup>Kjonté kaín tíha la ko í so nkehe konna la mé jnkojnko yaon imá tóxakonna kixin kaín tí sín tójnko tsé sín kaín tí nínko. <sup>29</sup>¿Á tjen jnkojínra níhará? A ntá tí xíkaha la koína éxí nina. ¿Á tjen jnkojínra kjuásinra jie? A ntá tí xíkaha la kjaxin tóxakonna. <sup>30</sup>Tí chrókjuintahnkexian nkehe la mé tjínkavan kixin jehó chrókjuákoxian kixin kánhyó jie. <sup>31</sup>Dios, It'é Ìnchéni Jesucristo, na mé tí nkexro chrórxaxinkaonni jnkochríxín mé ó nohe ch'án kixin chaxín tí nkehe ntáxrjan. <sup>32</sup>Ntá tí kjuak'é chjasin Damasco la mé tí ch'ín gobernador kjuíuch'ehe ch'ín rey Aretas xra mé k'uetuenhen ch'án tí sín soldado kixin tsochónhen sín tí ntója tí chjasin kixin chrót-séna sín chrókjuak'échjina. <sup>33</sup>Kjánchó síin nkexro k'uúinkajinxinna ijnko ntaxra ijnko ventana tí tjat'ō k'uantatjen chjasin la mé xíkaha kuaána, tséhyana sín.†

### Tí nkehe k'uúkon ch'ín Pablo

**12** Ninkehó tsjachahya tí nkehe tsōxrjanka kuèntana ó. Íchá jína tsōxrjanka tí nkehe k'uúkuān la ko tí nkehe kjuínchenóna Ìnchéni. <sup>2</sup>Choxian ijnko nkexro tinkáchónki Cristo. A ntá k'uátsínka catorce nánó sátsíkji ch'án tí níxin nkajní. Nonahya á sátsíkjiko ch'án cuerpo kuènte ch'án o asén ch'án ó. Jehó Dios mé nohe. <sup>3</sup>Méxra ó nóna kixin xíkaha sátsíkji ch'án la ntá nonahya á koí cuerpo kuènte ch'án o asén ch'án ó. Jehó

†11:33 Hechos 9.23–25

Dios mé nohe. <sup>4</sup> A ntá sátsíkji ch'án nkajní. La ntá tí palabra kuínhin ch'án la kohya kjuachaxin nijnko chojni tsochronka. <sup>5</sup> Jína chrókujuintahnkexián kixin xikaha kónhen tí nkexro a. A ntá tí chrókujuintahnkexián kixin kjuachaxin kuéntana la jehya jína tíha. Íchá jína chrókujuákoxián kixin janhvàn la chontahya kjuachaxin. <sup>6</sup> Tí chrókujuintahnkexián tí nkehe kónna la chrókólócohyana kixin chaxín tí nkehe chróxrjanka. Kjánchó xikahya t'á kixin tjínkakonhya kixin xikaha chrókjuenkayáxin chojni kixin antsí jína janhan. Náhí. Tjínkavan kixin tí xra t'íkon sín la ko tí nkehe tinhin sín mé chrókjuenkayáxixín sín kixin á jína tí janhan, tsixro sín.

<sup>7</sup> Méxra chrókujuintahnkexinhya ntá xikaha xránjon kjuachaxin kixin chrók'uayáha ijnko kjuatjoté éxi ijnko ch'í kuikjiáte cuerpo kuéntana mé ijnko nkehe tsík'etuenhen ch'ín Tsochren ikui kjuínchekjoténa. <sup>8</sup> Iní veces xrjanóaha ìnchéni kixin chrókujuatsen ch'án tí kjuatjoté chonta. <sup>9</sup> Kjánchó ntáchro ìnchéni kixin jehó tí kjuachaxián ch'án chrókuachaxián janhan. Kixin tí kjuachaxián ch'án antsí tsjákoexín chojni fuértehya. Méxra ntá chàna kixin fuértehyana kixin ntá xikaha tsjákoxián tí kjuachaxin kuénte Cristo. <sup>10</sup> Méxra chàna kjónté fuértehyana la ko kjónté t'ántaxina sín la ko kjónté t'ichjánxinna nkehe la ko kjónté chónkina sín chrók'óyánna sín la ko kjónté siín kjuaxikaon chrókjuasótexinna kixin tí tinkachónkia Cristo. Chàna kixin fuértehyana na mé fuérte janhan kixin Cristo tinkachónkia.

### **Tóxakonhen ch'ín Pablo kixin tí sín tjejó nínko chjasin Corinto**

<sup>11</sup> ¿Á lócona kixin xikaha xrjanka? Kjánchó jahará kuítekákonhyará ntá xikaha xrjanka. Jahará chróchronqará

xikaha kixin jína janhan. Jehya kixin kánhyó sínkina la ntá tí sín chréherá la antsí sínkí sín. Náhí. Kjónté janhan la chaxín ninkehó sínkíhyana. <sup>12</sup> Kjuásian itsjé kjuaxroan jié la jína kjuak'é kónínkakonhya kjuákoxián kixin chaxín janhan ijnko nkexro tsíkjejá ìnchéni. <sup>13</sup> ¿Xá k'uíkuan tí jahará éxi kánhyó sínkírá a ntá tí í so nínko la antsí sínkí sín kixin tí kjuasán janhan la ninkehó xra tjaáhyará? A ntá tí xikaha ntoáhya kjuít'a la tónínkakonhyará.

<sup>14</sup> A ntá ijie ó yaxinna tí nixin vez chrókjuasántsajahará la ko tjaáhyará ninkehó xra. Janhan la tjéyáhya tí nkehe chontará. Tí nkehe tjéyá janhan la mé jahará kixin jahará éxi yóhe xjanna t'íkuan. Méxra tí sín it'é xjan chrókjuenájín sín chichaon chrók'uayakuénxín sín xjeen sín. Jehya xra kuénte tí xjan chrókjuenájín xjan chichaon chrók'uayakuénxín sín tí it'é xjan. <sup>15</sup> Tóxakonnahya kjónté chrókjuintakjeje kaín nkehe chonta janhan o kjónté chrók'ueñxián kixin tí jahará la jína chrók'uejorá. A ntá janhan imá tjuahará la kjánchó éxi tona janhan kixin jahará kánhyó tjuéherá tí janhan.

<sup>16</sup> Méxra kjónté janhan tjaáhyará ninkehó xra la kjónté xikaha ntáchrórá kixin kjuít'ayahará, ichrorá. <sup>17</sup> ¿Xá kjuít'ayahará kixin jnkójín sín ichr'an kjuíjtsjehe sín tí jahará? <sup>18</sup> Kjuáncháha tí ch'ín Tito kixin tsjijtsjehe ch'án tí jahará la ko kjaxin kuétuanhan tí í jnko kichó ni sátsjikotoxin ch'án. ¿Á kjuít'ayahará ch'ín Tito ní? ¿Á chaxínhya jína k'uejóni yóini ntiha kixin jnkokón Nchakuen Dios chóntani?

<sup>19</sup> ¿Á tjenkayáxinrá kixin xikaha kjuáteheni kixin chóntani jie ní? Kjánchó xikahya. Dios tjetsjehe kixin nixjani éxi chojni tinkáchónki Cristo. Kichóni tjuahará la kaín tíha ntáxrjan kixin tjínkavan kixin antsí chrókuinkachónkirá ìnchéni.

<sup>20</sup>Tóxakonna kixin tió tsjasántsjahará la tsoxrjinnahya nkexrí tjejorá la ko kjaxinrá tsoxrjánhyará tí nkehe tsontáxrjan. Tóxakonna kixin naxa ts'ixin kjuanínkaon la ko naxa ts'ixin kjuachjinoxínhin la ko tsoninkákonhénra kichuára la ko chrókuétoanrá jahorá la ko naxa tsinkachónkirá kjuach'ia la ko naxa ts'ántaxínhínra kichuára la ko naxa chontará kjuahnke la ko jnkokoáhya tsjenkayáxinrá. <sup>21</sup>Tóxakonna kixin tió tsjasántsjahará inaá la tí Dios kuéntana mé sinchesuàna tí tjejorá la ntá imá tsotsjanka kixin itsjérá tsíkjasinrá jie tí ósé la naxa titoéhyará tí nkehe tjuáhya ch'erá la ko naxa titoéhyará chontará chojni chjin ókjé tjásinkoará jie la ko titoéhyará kaín tí í so nkehe jínahya k'uékjich'erá ósé.

**Nhexraxinkaon ch'án sín  
la ko tsjixixín nixja ch'án**

**13** A ntá jie la nýaxín tsjasánts-jahará. A ntá tí kaín nkehe tjinkáonrá tsonóna la mé chróchrónka yaá o iyá chojni tsík'ikonxín kon sín tí nkehe tsíkónhen. <sup>2</sup>Nixjahá tí sín tsík-jasin jie ósé, la ko nixjahará kaín rá kixin kjónté ikjín tjèn la inaá nix-jahará éxi nixja tí kjuak'é k'uéjóni tí iyó kjuasántsjahará kixin tió tsjasán inaá la í tsikonóahya tí sín kjuasin jie. <sup>3</sup>Jahará tjinkáonrá tsinhínra á chaxín níx-jaxian kjuachaxin kuènte Cristo. Jehya kixin Cristo tsjachahya tsjakoxin ch'án tí kjuachaxièn ch'án tí tjejorá ntiha. Náhí. Chaxín tjakoxin ch'án tí kjuachaxin chóna ch'án tí tjejorá ntiha. <sup>4</sup>Chaxín tí k'uénxin ch'án tí ntacruz la mé éxi chón-tahya ch'án kjuachaxin. Kjánchó ijie tjechónxin ch'án tí kjuachaxin kuènte Dios. Kjaxinni jeheni éxi kjuák'e ch'án k'uéchóntahyani kjuachaxin la ntá ijie tinkáchónkini tí jehe ch'án la tjejóhónx-

inni tí kjuachaxin kuènte Dios kixin jína tsjinkítsani tí jahará.

<sup>5</sup>Jahará chrókjuenkayáxinrá á nchoxon tjejorá, á kaín asánra tinkachónkirá Ìnchéni. ¿Á noahyará kixin tjejokoará Jesucristo? A ntá jahará tsonohará á chaxin tinkachónkirá o náhí. <sup>6</sup>Kjaxin tjinkávan chrókónohará kixin jeheni la jehya chojni chaxínhya tinkáchónki Ìnchéni. <sup>7</sup>Nixjeheni Dios kixin chrókuítoehya ch'án tí jahará kixin ninkehó nkehe jínahya chrókjuich'erá. Jehya kixin chrókjuakoxinni kixin jína tí jeheni. Náhí. Jehí tjinkaonni kixin jahará chrókjuich'erá nkehe jína. Ántoséni kjónté tsóntáchro sín kixin chóntani jie. <sup>8</sup>Ninkehó nkehe chrókjuich'eni kixin chrókjuinçek'itjáyanni tí nkehe chaxín. Kaín nkehe ch'eni la tjikosáyeheni tí nkehe chaxín. <sup>9</sup>Méxra chrókóchéheni tí t'ichjánxinhya imá chrók'ueñoanni, tí chaxín jína chrók'uejorá. Ntá naxa tsonixjeheni Dios kixin chrókjuixraká chrók'uejorá ntoá. <sup>10</sup>Mé xikaha ikjian tíhi senó naxa tsjasántsjahýará ntiha kixin ntá tió tsjasán la ts'ichjánxinhya naxa sinčekóninkáonrána tsoníxjaxian tí kjuachaxin chonta janhan. Kixin Ìnchéni mé chjina tí kjuachaxin jehya kixin chrókjuintak'itjáyannrá. Náhí. Kjuanjon ch'án tíha kixin jahará antsi chrókuinkachónkirá Ìnchéni.

<sup>11</sup>Na ntá kichó ni, chrókócháhará. Tjéyará kixin jína chrók'uejorá. Chrókjuinchechéhéra kichuára la jnkokoá chrókjuenkayáxinrá la ko kjuaxroxin chrók'uejorá. Kixin Dios mé ts'ejokoará ch'án. <sup>12</sup>Nixjehéra kichuára jnkójina la tsehéra tja kichuára. <sup>13</sup>A ntá kaín tí sín tinkáchónki Ìnchéni ntihi mé xraxinkaon sín tí jahará.

<sup>14</sup>Kjuasáyé Ìnchéni Jesucristo la Dios tjuahará la ko tí Nchakuen Dios tjejókoará tjinkítsará kaín rá. Amén. Ó tjen.

## Tí xroon ikjin ch'ín Pablo k'uáyéhe tí sín Galacia

### Ch'ín Pablo ikjin xroon k'uáyéhe tí nínko chjasin Galacia

**1** Janhan Pablo mé tsíkjeýána Ìnchéni tsjàkua itén ch'án. Janhan la jehya chojni kjeýána la ko jehya chojni ichr'ánna. Náhí. Kjeýána Jesucristo la ko It'éni Dios, mé tí nkexro kjuínchexechón Jesús. <sup>2</sup>Janhan la ko kaín tí sín kíchó ni tjejókoni ntihi ikjinni tí xroon ts'áyéhe tí nínko síin estado Galacia. <sup>3</sup>Tjancheheni It'éni Dios la ko Ìnchéni Jesucristo kjuasáyé ch'án chrókjuincheyaonrá ch'án la ko chrók'uayéhérá tí kjuaxróxin kuènte ch'án. <sup>4</sup>Jesucristo mé k'uenyákonhen ch'án ijíeni ntá kuaáxinni la mé ijie tsjachahya tí nkehe jínahya síin chjasintajni tsjachroeni mé xíkaha tjinkaon It'éni Dios. <sup>5</sup>Tjáncháha Dios kjuasáya jnkochrín mé xíkaha tsoxiteyá. Amén.

### Kohya í jnko tan tsaáxinni

<sup>6</sup>Janhan tóxakonna kixin jahará imá tjoka tinkakìtoherá Dios kjeýará kjuasáyé Cristo. Jahará la tjoka ó kjuankíxinrá chréhérá ókjé tan chrókuaáxinrá. <sup>7</sup>À ntá chaxínhya xíkaha. Kohya í jnko tan tsaáxinni. Jehí iso chojni tjinkaon nchexakonhanrá la ko tjinkaon sín chrókjuítóxinhin sín tí tan chrókuaáxinni kuènte Cristo. <sup>8</sup>À ntá tí jnkojín nkexro chrókjuakohará ókjé tan chrókuaáxinrá yóehya tí nkehe ó kjuakoni la tí xíkaha la Dios mé sinchekjasóte tí sín kixin xíkaha sich'e sín, kjónté á janhan o ijnko ángel chrókjuixin nkaya nkajní. <sup>9</sup>Senó xrjanka la inaá tsoxrjanka kixin jnkojín nkexro

chrókjuako ijnko tan ókjé tsaáxinrá yóehya tí tan ó kuítekaonrá la mé Dios sinchekjasóte tí jehé sín.

<sup>10</sup>Janhan la tjéyáhya kixin chrókóxrjínhin chojni tí xrá t'a. Náhí. Tjínkavan kixin Dios mé chrókóxrjínhin tíha. Tí chrókótjínkavan chrókóxrjínhin chojni ó a ntá xíkaha la jehya ijnko nkexro ch'ehe xrá Cristo.

### Ch'ín Pablo k'óna ijnko chojni tjako itén Dios

<sup>11</sup>Jahará kíchó ni chrókónohará kixin tí tan tjàkua tsaáxinni mé jehya ijnko nkehe kjuenkayáxin chojni ó. <sup>12</sup>Jehya chojni chjina tí tan la jehya chojni kjuakona. Náhí. Jesucristo mé kjuakona.

<sup>13</sup>Jahará la kjá ó kuinhínrá nkexrí k'uékjak'é tió naxá k'uéchráha tí sín judío. Ó nohará kixin k'uéchonkíha tí sín tinkáchónki Ìnchéni la ko tjínkavan chrókjuíntak'itjáyan sín.<sup>\*</sup> <sup>14</sup>Tí naxá k'uék'ájikian tí sín judío la antsí má k'uénòna. À ntá kaín tí sín chjasenná jnkokón nánó k'uéchontakian sín la kánhyó k'uénohe sín. Antsí má k'uékítekavan tí nkehe k'uék'etoan tí sín tsík'axreníxinni. <sup>15</sup>Kjánchó Dios kjeýána kjónté naxá tókjínahya la kjuasáyé ch'án kjeýána ch'án kixin xíkaha kóxrjínhin ch'án. <sup>16</sup>Kjuínchenòna ch'án nkexrí tjeen tí Xjeen ch'án kixin tsjàqoha tí sín jehya judío tí tan tsaáxinni. Tió kjeýána Dios la ninkexro kjuakonahya. <sup>17</sup>La ko kjáxin kjuítsjàhya janhan tí sín tsík'óna apóstol síin chjasin Jerusalén. Náhí. Janhván tuénxín sákjuia chjasin Arabia, a ntá chr'éxin ikjan tí chjasin Damasco.

<sup>18</sup>Á ntá iní nánó chr'éxin na ntá sákjuiyá chjasin Jerusalén kixin tsochoxian ch'ín Pedro la ntá ntiha mé kjuák'ekian ch'án quince yaon. <sup>19</sup>Kjánchó k'uíkonyha tí í so sín

\*1:13 Hechos 8.3; 22.4-5; 26.9-11

apóstol. Jehó k'uíkuān ch'ín Jacobo kichó Ìnchéni. <sup>20</sup> Ó tjetsjehe Dios kixin tí nkehe ikjian la mé chaxín tíha.

<sup>21</sup> A ntá chr'éxìn ntá sákjuia nó estado Siria la ko Cilicia. <sup>22</sup> A ntá tí sín kichó ni tinkáchónki Cristo tjejó estado Judea la naxá tjatsoanhyana sín. <sup>23</sup> A ntá ó kuínhón sín kixin tí nkexro k'uéchréhe sín chrók'óyán sín la ntá ijie mé tjako tí tan chrókjuinçek'itjáyan ch'án. <sup>24</sup> A ntá ijie tjanchia sín kjuasáya kixin janhan ó tinkáchónkia Ìnchéni.

### Tí iso sín kjueyá Jesús k'uáyéhe sín ch'ín Pablo

**2** La ntá catorce nánó chr'éxìn ntá sákjuiyá chjasin Jerusalén inaá la sákjuíkian ch'ín Bernabé la ko kjaxin ch'ín Tito. <sup>2</sup> Sákjuiyá ntiha kixin Dios kjuínchenóna kixin sáchrókjuiyá. Ntiha chjasin Jerusalén la kójnkotsékoni tí sín t'etoan nínko ntiha la ntá xrjankaxián nkexrí tí tan tsaáxinni tjákoḡa tí sín jehya judío. Mé xíkaha kjuít'a kixin janhan tjínkavan jnkokoá chrókjuenkayáxinni kixin ntá tí xḡa kjuít'a la jehya chrókóchónkó. <sup>3</sup> A ntá kjónté tí ch'ín Tito kjuák'ekian ch'án la jehe ch'án mé griego ch'án la k'uētuanhya sín kixin chrókua ch'án xroye. <sup>4</sup> Á ntá iso tí sín kichó ni chaxínhya tinkáchónki Ìnchéni k'uéjókoni sín la jehe sín imó tsík'ixenhen sín kixin tsáye-heni sín kixin tsotsjehe sín nkexrí kixin tí sín kuènte Cristo chóna kjuachaxin. A ntá jehe sín tjinkaon sín kixin chrókjuinçekhiteyéheni inaá tí nkehe k'uék'etoan tí ley. <sup>5</sup> A ntá tahyani kuenté nkehe tí tjejóchro sín kixin jehí tjinkaonni kixin tí tan tsaáxinni la ntoá chrókuinkachónkirá jahará.

<sup>6</sup> A ntá tí sín kónoxín t'etoan kjuakohaha sín ninkehó. A ntá jeheni la tahyani kuentá á chojni t'etoan o náhí kixin Dios la jnkokón t'ikon ch'án kaín chojni. <sup>7</sup> A ntá kjuátsoan sín kixin Dios

ó chjina tí xḡa tjákoḡa tí sín jehya judío tí tan jína éxí yóḡe tsíchjéhe Dios xḡa ch'ín Pedro tjakoḡe ch'án tí sín judío. <sup>8</sup> Tí Dios tsík'etuēnhen ch'ín Pedro ts'óna apóstol tsjakoḡe ch'án tí sín judío la ko kjaxin tsík'etuanna ch'án ts'óna apóstol tsjakoḡa tí sín jehya judío.

<sup>9</sup> Méxḡa ch'ín Jacobo la ko ch'ín Pedro la ko ch'ín Juan, mé tí sín t'etoan kuènte nínko, mé kjuátsoan sín kixin Dios tsíkjanjon tí kjuachaxin. Ntá kóchéhe sín kixin jnkokón ch'eni xḡa la itsé sín tjani la ko itsé sín itja ch'ín Bernabé. Ntá kjuenkayáxinkoni sín kixin jeheni la tsjakoheni tí sín jehya judío la jehe sín nachrohe tsjakohē sín tí sín judío. <sup>10</sup> Jehó k'uetoan sín kixin tsoxraxinkaonni la ko tsotjuēheni tí sín nòa la xráxín tóxakonhenni sinchexiteyáni tíha.

### Ch'ín Pablo kjuentuéhe ch'án tí ch'ín Pedro chjasin Antioquia

<sup>11</sup> A ntá tió kjuíji ch'ín Pedro chjasin Antioquia la kjuentuáha ch'án kixin ntoáhya kjuích'e ch'án. <sup>12</sup> Senó k'uékjineko ch'án iso chojni kjónté jehya sín judío. Ntá ikui iso sín kuixín tí tjen ch'ín Jacobo. A ntá kjuankíxin k'uaxrjenta ch'án la kuítoḡe kjónekohya ch'án tí sín jehya judío a. Xíkaha kjuích'e ch'án kixin chrakonhen tí sín kui kixin tí sín neko ch'án naxá tsíkaha sín xroye. <sup>13</sup> Tí iso sín kichó ni judío kjaxin kuítetekonhen sín tí ch'ín Pedro kjónté ntoáhya kjuenkayáxin ch'án. Kjaxin ch'ín Bernabé la kjuacha kjuachroe sín ch'án kixin tí nkehe ntoáhya kjuích'e sín. <sup>14</sup> A ntá tió k'uíkuān kixin tí nkehe kjuakoxín sín la tóyóḡehya tí chrónka tí tan jína tsaáxinni tjako sín la ntá níxjaha tí ch'ín Pedro nkayakon kaín tí sín tsíkójnkotsé. Ntáxrjan kixin: “Jaha mé ijnko chojni judío la kjónté itjen éxí jehya ijnko chojni judío. ¿A ntá kuènte tétuēnhén tí

sín jehya judío kixin chrók'uejó sín éxi chrókóyohē tí sín judío?"

**Tí sín judío la ko tí sín jehya judío la jnkokón tsaá sín kixin chóna sín fe**

<sup>15</sup> Jeheni la k'uaxrjeníxinni chojni judío desde tí kokjexinni la jeheni na chónahyani jie éxi tí í so chojni chónhaya Dios. <sup>16</sup> Kjónté xikaha la ó noheni kixin tsotjuáxinhya ijíe chojni tí nkehe tsík'etoan ch'ín Moisés. Jehó tí sín tinkáchónki Jesucristo mé tsotjóá ijíe sín. Méxra kjaxinni tinkáchónkini Jesucristo kixin tjinkaonni sinchetjóá ch'án ijíeni kixin titekaonni ch'án. Méxra ninkexró tsjachahya tsotjuáxin ijíe sín kixin chrókjuinchexiteyéhe sín tí nkehe t'etoan tí ley.

<sup>17</sup> Tí tjinkaonni tinkáchónkini Cristo kixin tsotjuáxin ijíeni, a ntá jeheni kjaxin xraxinkaonni kixin ó kjuasinni jie. A ntá í jehya Cristo k'uetōan kixin chrókjuasinni jie. Kjá chaxín náhi. <sup>18</sup> Tí kuítóheni tí ley la ntá naxa chrókjanni chrókuinkáchónkini tí ley inaá la tíha la ó jie kuénteni tíha. <sup>19</sup> A ntá tí ley la kjuanchia jie k'uénxian. A ntá ijie la tjéchuān kixin tinkáchónkia Dios. <sup>20</sup> Janhan la ó tsík'en kixin ó k'uénkian Cristo. A ntá ijie la janhya tjéchuān. Cristo mé tjéchónxin tí janhan. La ntá jie la tjéchónxian tí cuerpo chonta kixin tinkáchónkia tí Xjeen Dios kixin jehe ch'án la tjuāna ch'án la k'uenyákonhenni ch'án. <sup>21</sup> Tjínkakonhya tsjanoá tí kjuasáyé Dios. Tí chrókótjuáxin ijíe chojni tí ley tsík'etoan ch'ín Moisés, a ntá ó chónkó ik'uen Cristo tí xikaha.

**Tí ley o tí fe**

**3** Jahará kichó ni gálatas imá lontírā. ¿Nkexro kjuít'ayahará? Kixin tí nkehe kjuáko hará mé kuinhínra

kixin Cristo k'uenxín tí ntacruz k'uenyákonhenni ch'án. <sup>2</sup> Jnkokoá nkehe tjínkavan chrókjuateherá. ¿Á k'uayèxínra Nchakuen Dios kixin kuítekáonra tí nkehe tsík'etoan ch'ín Moisés o á k'uayèxínra Nchakuen Dios kixin kuítekáonra tí tan chrónkani kuinhínra? <sup>3</sup> Imá lontírā jahará. Tí kjuankíxixínra la kuítekáonra kjuachaxiēn Nchakuen Dios. A ntá jie la tjínkáonra jahórá sinchekjintaxínra tí xra. <sup>4</sup> ¿Á chónkó kaín tí nkehe tsík'atsínkara? Kjá chrókjuinkítsa chrókjuich'e xra tíha. Jehya chónkó tí nkehe kjuasótiaxínra. <sup>5</sup> ¿Nkekuénté kjuanjon Dios tí Nchakuen ch'án la ko kjuasin ch'án kjuaxroan k'uíkonra? Jehya k'uayèxínra tíha kixin kuítekáonra tí nkehe tsík'etoan tí ley. Náhi. K'uayèxínra tí nkehe kixin kuinkáchónkirá tí tan kuinhínra.

<sup>6</sup> Ch'ín Abraham kuítekaon tí nkehe k'uetōan Dios ntá Dios k'uíkon kixin jína ch'án. <sup>7</sup> Méxra chrókonohará jahará kixin tí sín chaxín tikiñixin sín ch'ín Abraham a mé tí sín a chaxín tinkáchónki Dios. <sup>8</sup> Tí xroon itén Dios mé chrónka kixin tí sín jehya judío mé sinchetjóá Dios ijíe sín kixin tsinkáchónki sín ch'án. Mé xikaha Dios mé chénka ch'ín Abraham ósé tí tan jína, ntáchro ch'án kixin: "Ijnko nkexro ts'axrjeníxin tí jaha mé tsoyaonxín kaín nación."<sup>9</sup> <sup>9</sup> Mé xikaha kjaxin kaín sín tinkáchónki Dios mé tsoyaon sín jnkokón éxi kóyaon ch'ín Abraham kixin kuítekaon ch'án.

<sup>10</sup> Kaín sín jehó tinkáchónki tí nkehe tsík'etoan ch'ín Moisés la tsjasóte sín kixin ntáchro xroon itén Dios kixin: "Ts-jasóte kaín tí sín tsjachahya sinchexiteyéhe tí nkehe tsík'etoan tí xroon chóna ley."<sup>8</sup> <sup>11</sup> Ntá ó ntoá ntáchro

<sup>3:8</sup> Génesis 12.3

<sup>3:10</sup> Deuteronomio 27.26



kíxin kohya nkexro tsotjuáxin ijjé sín tí tsitekaon sín tí ley. Xroon itén Dios ntáchro kíxin: “Tí nkexro tsíkótjóa la tjejóhónxin sín kíxin tinkáchónki sín Dios.”\*\* 12 Ntá tí chrókuinkáchónkini tí ley tsík'etōan ch'ín Moisés la chrókuinkáchónkihyani Cristo. Ntáchro xroon itén Dios kíxin: “Tí nkexro sinchexiteyá tí ley la táhó chrók'uejóhónxin sín.”††

13 A ntá Cristo kjuatsen ch'án kaín tí chrókjuasótexinni tí ley. Tí náhí la chrókjuasóteni kíxin chrókjuachahyani sinchexiteyéheni tí ley. Jehé ch'án kjuenka ch'án tí ijiéni kíxin k'uenyákonhenni ch'án. Ntáchro xroon itén Dios kíxin: “Kaín tí chojni chóna jie ts'e-jótjīan sín ijnko nta ntá its'en la mé xikaha k'uáyéhe sín tí kjuanínkaon kuènte Dios.”‡‡ Mé xikaha k'uíkon sín tí ch'ín Jesús. 14 Mé xikaha kónhen kíxin ntá tí nkehe chénka Dios tí ch'ín Abraham senó mé ts'áyéhe tí sín jehya judío kíxin kjuachaxién Cristo Jesús. Ntá xikaha kaín ni ts'áyéheni tí Nchakuen Dios kíxin tinkáchónkini ch'án mé xikaha tsíntáchro ch'án.

### Tí ley la ko tí nkehe kjuanjon Dios

15 Kíchóni, tíhi mé sintayóaxian kuènte chojni ó. Tió ijnko chojni ch'éna ijnko xroon tsochóna firma kuènte sín la ntá xitjahya ts'óxíka í jnko nkexro la xitjahya í jnko nkexro sich'éna í so nkehe. 16 A ntá Dios mé tsíkjo ch'án tí ch'ín Abraham kíxin tsjanjon ch'án nkehe ts'áyéhe tí nkexro ts'axrjeníxin ch'án. Tí xroon itén Dios ntáchrohya kíxin kaín nkexro ts'axrjeníxin ch'ín Abraham chrók'uáyéhe tíha. Náhi.

Ntáchro kíxin ts'áyéhe jnkokoá nkexro ts'axrjeníxin ch'án la mé Cristo tíha.¶¶ 17 Méxra xrxanka tíhi. Dios chénka tí ch'ín Abraham ijnko nkehe chaxín la tsoxiteyá tíha kíxin éxí yóhe ijnko xroon chóna firma tíha. A ntá cuatrocientos treinta nánó chr'éxin la ntá ikui tí ley k'uéchrónka ch'ín Moisés. La ntá kjónté xikaha la xitjahya tsoxíka tí nkehe tsíchronka Dios o tsochéchro chojni kíxin tjeoanhya tí nkehe tsíntáchro ch'án.§§ 18 Tí chrókjuanjon Dios nkehe kíxin chrókjuinchexiteyáni tí nkehe k'uetōan tí ley la ntá tí nkehe tsíntáchro Dios senó mé chróxiteyáhya. A ntá Dios mé tsíchénka ch'ín Abraham kíxin sinchekitonhen ch'ín Abraham ti nkehe kjuasáyé ch'án.

19 ¿A ntá xikaha la nkehe tsonhen tí ley tsík'etōan ch'ín Moisés? Chr'éxin kjuanjon Dios tí ley kíxin tsonoexinni nkehe tí jie tjasinni. K'uetōan Dios sinchexiteyéhe chojni tí nkehe tsík'etōan ch'ín Moisés tsjia tí nkexro ts'axrjeníxin ch'ín Abraham, mé tí nkexro kjuéyá Dios kíxin xikaha tsoxiteyá tí nkehe chrónka ch'án. A ntá tí ley mé chrónka tí sín ángel ntá k'uáyéhe ch'ín Moisés la ó chrónkaxón ch'án. 20 A ntá tí nixjehe Dios tí ch'ín Abraham la jehó ch'án la ko jehó Dios la méxra t'ichjánxinhya í jnko nkexro.

### Tí xra kuènte tí ley

21 ¿A ntá á chrók'uaxrjexín kíxin tí ley tsík'etōan ch'ín Moisés chrókjuanjonko tí nkehe tsjanjon Dios? Kjá náhi. Tí chrók'uixin ijnko ley chrókjuanjon kjuachón la ntá chrókótjuáxin ijiéni tí chrókuitekaonni tí nkehe t'etōan tí ley.

\*\*3:11 Habacuc 2.4

††3:12 Levítico 18.5

‡‡3:13 Deuteronomio 21.23

¶¶3:16 Génesis 12.7

§§3:17 Éxodo 12.40

<sup>22</sup> A ntá tsíntáchro xroon itén Dios kixin tí jie mé t'etuenhen kaín xín chojni kixin ntá tí sín chrókuinkáchónki Jesucristo ntá chrók'uáyéhe sín tí nkehe tsíchronka Dios.

<sup>23</sup> A ntá tí naxa kuihya Cristo la ntá tí ley la k'uetuenhen kaín ni la k'uejóchónhenni kixin chrókónoxín tí nkehe chrókuinkáchónkini. <sup>24</sup> Tí ley la éxí ijnko maestro kuente chánjan k'uetōan. A ntá jie ikui Cristo la jehe ch'án mé kótuáxinni ch'án kixin titekaonni ch'án. <sup>25</sup> A ntá ijie ó titekaonni Cristo la í nchexiteyèhyani kaín tí nkehe t'etoan tí ley.

<sup>26</sup> A ntá jahará ó k'ónará xjeen Dios kixin ó tinkáchónkirá Jesucristo.

<sup>27</sup> Kaínrá kuíkitiaxínrá kjuachaxién Cristo mé xikaha jehe ch'án kótuáxinrá ch'án. <sup>28</sup> A ntá jehya tjetoan á chojni judío o á chojni jehya judío o á chojni ch'exón xra o á chojni t'etōan o á chojni ntoa o á chojni chjin. Kaínni la ó k'ónani jnkokóá kixin tinkáchónkini Cristo. <sup>29</sup> A ntá tí tinkáchónkini Cristo chaxín la ntá tí xikaha ó chaxín tsík'axrjeníxinni ch'ín Abraham la ts'áyéheñi tí nkehe tsíchronka Dios.

**4** Mé xikaha ntáxrjan tíhi. A ntá ijnko chánjan tió chrók'uen tí it'é ntá chrókuitōeko tí nkehe kuente tí it'é la jehe ch'án la tóyóhó ijnko nkexro ch'exón xra kixin tí jehe la xitjahya t'etōan xra kjónté chaxín kuente ch'án kaín tí nkehe a. <sup>2</sup> Siín nkexro t'ayakonhen ch'án la t'etōan tí xra kuente ch'án tsjixrakájia tí yaon tsíntáchro tí it'é. <sup>3</sup> Mé xikaha kónhen tí jeheni. Kixin tí naxa k'uechánjanni la kuítekaonni kaín tí nkehe kuente chjasintajni. <sup>4</sup> A ntá ó kjuixraká tí yaon ntá Dios ichr'án tí Xjeen ch'án ikui ch'án k'uaxrjeníxín ch'án ijnko chojni chjin. La kjuínchexiteyá ch'án kaín tí nkehe tsík'etōan tí ley kuente Moisés. <sup>5</sup> Ikui ch'án xikaha kixin tsaáxinni ch'án kjónté senó k'uek'etuen-

henni tí ley. A ntá jie la chrók'uáyéhe Dios tí jeheni éxí xjeen ch'án.

<sup>6</sup> A ntá kjuakoxín Dios kixin jeheni mé xjeen ch'án mé ichr'án Dios tí Nchakuen Xjeen ch'án tsochónta asénni la tí Nchakuen ch'án mé t'èyaxín: "It'éni jaha mé kuéntá tí jeheni." <sup>7</sup> Méxra xikaha jahará la jehya ijnko nkexro ch'exón xra. Náhí. Jahará mé xjeen Dios. Jahará mé xjeen ch'án la jehe ch'án tjinkaon sinchekitōnhanrá tí nkehe kuente ch'án kixin tinkáchónkirá Cristo.

### Ch'ín Pablo tóxakonhen ch'án kixin tí sín tinkáchónki Ìnchéni

<sup>8</sup> Ósé la jahará k'uechonhyará Dios la kjuínchexiteyéhérá tí dios chaxínhya. <sup>9</sup> A ntá ijie la ó choxínrá Dios, o íchá jína chróntáchroni kixin Dios la ó chóxin ch'án tí jahará. A ntá jehya jína kixin naxa chrókuinkáchónkirá ínaá tí nkehe chóntahya kjuachaxin la ko tí nkehe chónkó kixin tí xikaha naxa chrókjuínchexiteyéhérá tí nkehe tinkáchónki chojni. <sup>10</sup> A ntá jahará la tjásínrá kia ichrén tí yaon la ko tí nitjó la ko tí yaon kia tí nánó. <sup>11</sup> Imá tóxakonna kixin á chónkó tí xra kjuít'a kjuákohará.

<sup>12</sup> Kíchóni, xrjanóahará kixin chrókóyóhará éxí tí janhan kixin janhan mé tóyóhe éxí k'uejorá senó kixin t'etuenhyani tí ley. Janhan la tékahyará ninkehó jie. <sup>13</sup> Ó nohará kixin tió saoxín kjuákohará tí tan tsaáxinni la k'ueítsankahyana kixin k'ueñina k'uechonta ijnko chin k'uekjinchekjoténa. <sup>14</sup> Kjónté xikaha k'ueñina la jahará kjuanoáhyará tí janhan la k'uechontará kjuasáya tí janhan. A ntá jahará la jína kjuánjonrá kjuachaxin kjuak'é ntiha. Éxí chrók'uayéhérá ijnko ángel kuente Dios o éxí chrók'uayéhérá jehe Ìnchéni Jesucristo mé xikaha kjuak'é jína ntiha. <sup>15</sup> ¿Nkehe kónhen tí kjuachéhe k'uechontará? Kixin ntáxrjan kixin jína

tí jahará kixin tjinkáonrá kjónté ikonrá chrókuakítsjerá chróchjinará tí janhan. <sup>16</sup> A ntá ijie la, ¿á ninkákònnará jehó kixin kuinhínrá tí nkehe ntoá xrjanka?

<sup>17</sup> Tí sín í so a la imá tjinkaon sín tí jahará. Kjánchó ntoáhya tí nkehe tjenkayáxin sín kixin jehe sín tjinkaon sín kixin chrókuiñtohérá tí jeheni kixin ntá tjinkaon sín kixin jahará chróchréhérá tí jehe sín. <sup>18</sup> Jína chrókótjinkáonrá tí í so sín kjánchó ntoá chrókjuenkayáxinrá kixin jehya tí chrókjuak'é tí tejorá ó chrókuítekáonrá jína. <sup>19</sup> T'íkonní tí jahará éxí xjeenni. Ijie la imá kjuíncheníhi asenná kixin tóxakonna tí jahará. Éxí yóhe ijnko ìné xjan tsjoté tjan tió sinchekokjíhi tjan xjeen tjan mé xikaha janhan la naxa tsjasótena kixin tjínkavan kixin Cristo chrókjuinchetjóá tí jahará. <sup>20</sup> Chrókójína ijie naxa chrókjuak'é ntilha ntá ókjé nkexrí chrónixjahará ntá ijie la nonahya nkehe tí tjenkayáxinrá.

### Kjuíncheyóexín ch'ín Pablo tí tjan Agar la ko tí tjan Sara

<sup>21</sup> A ntá jie chronkará nkehe. Jahará naxa tjinkáonrá chrókjuinchexiteyéhérá tí ley tsík'etoan ch'ín Moisés la ¿á kuiénhyará nkehe chro tí ley? <sup>22</sup> Ntáchro kixin ch'ín Abraham mé chóna ch'án yaá xjeen ch'án la ijnko mé xjeen tjan ch'exón xra la tí í jnko mé xjeen ichjién ch'án mé ijnko tjan t'ítuenhya.\* <sup>23</sup> Tí xjeen tjan ch'exón xra kokjíhi ch'án éxí tokjíhi chojni ó. A ntá tí xjeen tí tjan t'ítuenhya la mé ó kokjíhi ch'án kixin tsoxiteyá tí nkehe tsíntáchro Dios. <sup>24</sup> Tíhi mé ntayóaxián. Tí yaá chojni chjin mé tóyóexín tí yaá nkehe tsík'etoan Dios. Tí tjan Agar mé tóyóexín tí ley xránjónxín ijna Sinaí. La ntá tí sín titekaon

tíha mé éxí chojni ch'exón xra tí jehe sín kixin t'ítuenhen sín. <sup>25</sup> Mé xikaha tí tjan Agar mé tóyóexín tí jna Sinaí nacióon Arabia la tíha tóyóexín tí chjasin Jerusalén kixin tí chjasin la ko tí sín tjejó ntilha la mé t'ítuenhen sín la ko kaín xjeen sín. <sup>26</sup> A ntá tí chjasin Jerusalén itjen nkaya nkajni la mé t'ítuenhya. Náhí. Mé jeheni la kuènteni tíha. <sup>27</sup> Ntáchro xroon itén Dios kixin:

Jaha chojni chjin chontahya chánjan kjónté chrokóháha.

Jaha k'ufkonhya ninkehó kjuatjoté kixin kjuincheckokjíehya xjan la kjónté chrokóháha.

Tí tjan kuítínkehe na mé nchónhya inté tjan ts'ikon tjan,

a ntá tí tjan kjuak'eko xii tjan la kánhyó ts'ikon.†

<sup>28</sup> Kíchóni jeheni la éxí yóhèni ch'ín Isaac kixin kaín ni la xjeen Dios kixin xikaha tsíntáchro ch'án. <sup>29</sup> A ntá éxí senó tí xjan kokjíhi éxí tokjíhi chojni ó la jehe ch'án k'uechónkíhi ch'án tí xjan kokjíexín kjuachaxién Nchakuen Dios. Mé xikaha kjaxin sítónhen jie. <sup>30</sup> A ntá ntáchro tí xroon itén Dios kixin: “Tétuenhén tí tjan ch'exón xra sátsji tjan la ko tí xjeen tjan kixin tí xjeen tjan la ts'áyèhya ch'án tí nkehe tsítónhen tí xjeen tí tjan t'ítuenhya.”‡ <sup>31</sup> Méxra kíchó ni, kaín ni la jehya xjeen ijnko tjan ch'exón xra. Náhí. Jeheni mé xjeen tí tjan t'ítuenhya.

### Jína chrók'uejorá kixin kuaáxinrá

**5** Cristo mé kuaáxinni la ntá ó tí ley la t'etuenhyani. Méxra jína chrók'uayakonhénrá tí nkehe kuaáxinrá la í chrókjanhyará chrók'ónará chojni t'ítuenhen ínaá.

\*4:22 Génesis 16.15; 21.2

†4:27 Isaías 54.1

‡4:30 Génesis 21.10

<sup>2</sup>Tinhínrá, janhan Pablo mé ntáxrjan kixin tí chrókuará tí xroye a ntá ó chónkó chrókuinkachónkirá Cristo. <sup>3</sup>Tjínkavan tsoxrjanka inaá kixin tí jnkojín nkexro itsa tí xroye la jehe ch'án mé t'ichjánx-ín sinchexiteyéhe ch'án kaín tí ley tsikjin ch'ín Moisés. <sup>4</sup>A nta jahará la xritjéyará tsotjuáxin ijíará kixin sinchexiteyéhérá tí ley la ntá ó kuítóhérá Cristo la ko ó kuítóhérá tí kjuasáyé Dios tjuahará. <sup>5</sup>A ntá jeheni la tinkáchónkini Cristo la chón-tani Nchakuen Dios la ntá tjejóchón-henni kixin tsjintaxín tsotjóa ijíeni. <sup>6</sup>Jeheni mé tinkáchónkini Jesucristo la ntá kánhyó tjeoan tí xroye. Antsí tjeoan chrókuinkáchónkini Ìnchéni la ntá tí tinkáchónkini Ìnchéni la chrótuèheni kichó ni.

<sup>7</sup>Jahará la jína kjuankíxinrá tinkachónkirá Ìnchéni. ¿A ntá nkexro k'uetóan kixin chrókuítóhérá tí nkehe chaxín? <sup>8</sup>Jehya nkehe kuènte Dios tí tjejoch'erá méhe. Méxra jehe ch'án la kjueyará ch'án. <sup>9</sup>Ntáchro sín kixin tí ch'o t'óna niotja tsjiko intsíkoá tí xroan nchek'ánkí niotja, a ntá ts'ánkí kaín tí ch'o. <sup>10</sup>A ntá janhan tinkachónkia Ìnchéni la ko ó nòna kixin jahará kjáxin tinkachónkirá ch'án la kjá í chrókuenkayáxinhyará í jnko nkehe. A ntá Dios mé sinchekjasóte ch'án tí nkexro ixri tjixrónkáxin kixin Dios la chrakuenhya ch'án ninkexró.

<sup>11</sup>Kíchóni, tí naxa chrókuétoan chrókua chojni xroye la ntá tí sín judío chrókóninkakonnahya sín. Tí xikaha la chrók'uántaxíenhya sín tí tan jína chrónka nkexrí k'uenxín Cristo tí ntacruz. <sup>12</sup>Méxra tí sín ntaxakonhanrá la t'etóan sín itsará xroye la íchá jína naá chrók'uátsínkó chrókóchrít'o sín kaín.

<sup>13</sup>Jahará kichó ni, la Dios mé kjueyáni kixin tsaáni kjánchó

chóntahyani kjuachaxin ch'eni tí nkehe jínahya. Náhí. Chrókuinkitsani kichó ni la ko chrótuèheni kichó ni. <sup>14</sup>Mé xikaha tí ley mé t'axrjexín kixin: “Chrótuèhérá kichuára éxi tjuèxinrá asánrá.”<sup>15</sup> A ntá tí chrókjóntehérá kichuára la ko chrókjónterá kichuára la ntá chrókóxakonhanrá kixin tí xikaha la chrókuinçek'itjáyánrá kichuára.

### Tí jié chrókuasin chojni la ko tí nkehe t'etóan Nchakuen Dios

<sup>16</sup>A ntá ntáxrjan kixin chrók'uejorá éxi tjinkaon Nchakuen Dios, a ntá chrókuéyáhyará tí nkehe jínahya chrókuenkayáxinrá. <sup>17</sup>A ntá tí nkehe jínahya tjenkayáxinrá la tjanjonko Nchakuen Dios kixin Nchakuen Dios la tjanjonko tí nkehe jínahya la tí iyó nkehe tjenkayáxinrá la tjanjonko kichó. Méxra jahará la xitjahya ch'erá tí nkehe tjinkáonrá chrókuujch'erá. <sup>18</sup>A ntá tí Nchakuen Dios tjetjinkitsará, a ntá jehya tí ley t'etuanhanrá jie.

<sup>19</sup>Xrahya ts'ikonni tí jié tjasin chojni jínahya tjenkayáxin. Mé tíha la tí sín tjasinko jié chojni chjin ókjé, la ko tí chojni ch'e tí nkehe jínahya, la ko tí chojni náxrjónhya tjenkayáxin, <sup>20</sup>la ko tí chojni tinkáchónki nkehe tsíkjanoya, la ko tí chojni nchexroan, la ko tí chojni nínkaon, la ko tí chojni itje kjuanínkaon, la ko tí chojni chjio, la ko tí chojni tjinkaon jehó tsochóna itsjé nkehe, la ko tí chojni tjinkaon ts'axrjenta, la ko tí chojni t'óxika kichó, <sup>21</sup>la ko tí chojni chjinoxínhin, la ko tí chojni tjàya, la ko tí chojni tókoan, la ko tí chojni kóchjinka, la í so nkehe tóyóhe xikaha. Na mé éxi yóhe senó mé k'uetjonkará la ko ijie la xikaha tjétjonkará inaá kixin tí nkexro xikaha tinkákjasin jié mé xit-

jahya ts'áyéhe sín tí kjuachaxin kuènte Dios.

<sup>22</sup> A ntá tió chóntani Nchakuen Dios ntá tsotjuèheni kichó ni, la ko tsochéheni, la ko kjuaxróxin ts'ejóni, la ko tsochónhenni tsonínkakonhyani, la ko jnkójina ts'ejókoni kichó ni, la ko nchexiteyáni jnkójina. <sup>23</sup> La ko tsohnehyani, la ko ts'etuènhenni asénni kixin tsjasinhyani jie. Kohya nijnko ley chrókjuinchekjásóteni kixin tí jina chrók'uejóni xikaha. <sup>24</sup> Mé tí chojni tinkáchónki Jesucristo la kaín jie k'uéchóna sín la ko tí jínahya k'uékjenkayáxin sín la ó kjuenka ìnchéni kjuák'enkáni ch'án ntacruz. <sup>25</sup> A ntá tí t'ejókoni Nchakuen Dios t'ichjánxin tsítóheni kixin Nchakuen Dios ts'etuènhenni.

<sup>26</sup> Méxra chrókjuinchehnkehyani la ko chrókjuachaxinhyani kichó ni la ko chrókóchjinoxienhyani.

### Tjínkĩtsará kíchuára

**6** Kichóni, a ntá tí chrók'uíkonrá jnkójín nkexro kjuasin ichrén jie a ntá tí jahará tí chaxín chontará Nchakuen Dios la chrókjuéntuéhérá sín la chrókjuínkĩtsará sín. A ntá jnkójina chrónixjehérá sín, a ntá jahará la chrókóxakonhanrá kixin xikahya chrókónhanrá chrókjuás-inrá jie kjaxin. <sup>2</sup> Tsjínkĩtsará kíchuára kixin jóhya tsamará tí nkehe ye. Kixin tí xikaha la ó chrókjuinchehiteyáni tí nkehe t'etoan Cristo.

<sup>3</sup> Ntá jnkójín nkexro ntáchro kixin imá tjetooan tí jehe ch'án la chaxínhya tíha la jehó ch'iyehé asén. <sup>4</sup> Jnkójnko chojni chrórxaxinkaon á nchoxon tjenkayáxin la chrókónohe kixin ó nchoxon la jehya jehó chrókjuikosáyehe asén. Náhí. Chrókjuikosáyehe í so chojni. <sup>5</sup> Kixin jnkójnko chojni yamá tí jie kuènte.

<sup>6</sup> Tí nkexro xraqhe tí tan jina la chrókjuinkĩtsa sín chrókjuanjon sín nkehe chrók'úáyéhe tí nkexro tjako.

<sup>7</sup> Sích'iyéhyará asánrá. Kohya ninkexró tsjacha tsjanoá Dios. Tí nkehe ts'enka chojni la mé xikahó tsotjá. <sup>8</sup> Tí t'enka chojni tí nkehe jínahya tjenkayáxin sín la tí nkehe jínahya tsjacha sín mé ts'enxín sín. A ntá tí nkexro ts'enka tí nkehe tjinkaon Nchakuen Dios la Nchakuen Dios mé tsjanjon tí kjuachón jnkochrín sín ts'áyéhe sín. <sup>9</sup> Mé xikaha chrókóxrjéhyani chrókjuich'eni kaín nkehe jina kixin tí tsóxrjéhyani la ntá chaxín tsjixraká tí yaon tsjachani ts'áyéheni tí nkehe jina. <sup>10</sup> Méxra xikaha xráxin chrókjuich'eni nkehe jina la antsí t'ichjánxin chrókjuinkĩtsani tí sín kichó ni tinkáchónki Ìnchéni.

### Ch'ín Pablo nchexraxinkaon tí sín ntiha la ko kjuixixin nixja ch'án

<sup>11</sup> Tsjehérá kixin imá ihyé tí letra tjékjinxian tjaná. <sup>12</sup> Tí sín tjinkaon ts'etuèhanrá kixin chrókuará xroye la jehí tjinkaon sín tsjikosáyehe sín chojni la tjinkakonhya sín kixin chrókjuasótexín sín tí ntacruz kuènte Cristo. <sup>13</sup> Kjónté tí sín tsíka xroye la nchexiteyáhya sín kaín tí nkehe t'etoan tí ley. A ntá tjinkaon sín kixin chrókuará xroye kixin ntá kjaxin sín tsohne sín kixin tsontáchro sín kixin jahará kjaxinrá tjinkáonrá tsochontará xroye tí cuerpo kuèntará. <sup>14</sup> A ntá janhan mé tóxrjínahya sɪntahnke ninkehó. Íchá jina chróntáxrjan kixin Cristo k'uenyákonhenni. A ntá xikaha k'uenxín Cristo tí ntacruz la ntá tí nkehe k'uék'etoan kuènte chjasintajni la kjaxin k'uitjáyan la ko janhan kjaxin kuítóha tí nkehe kuènte chjasintajni. <sup>15</sup> La ntá ninkehó sínkíhya á tsíka chojni xroye o náhí. Tí nkehe sínkí la chrók'ónani ijnko chojni nixin. <sup>16</sup> A ntá tí sín ts'áyéhe kjuaxróxin kixin kuikonóhe Dios tí jehe sín la mé kaín tí sín kuítekaon tí nkehe t'etoan ch'án mé kaín tí sín chaxín tsík'óna xjeen ch'án.

<sup>17</sup> A ntá ijie la tjin̄k̄akonhya kixin chrók'uekana jie ninkexró. Janhan mé chaxín chonta tí tsíkjatsgenxín tsíchrit'ò cuerpo kuèntana kixin kjuasótexinna kixin kjujt'aha xra Ìnchéni Jesús.

<sup>18</sup> Kíchóni tjancháha Ìnchéni Jesucristo kixin kjuasáyé ch'án chrókjuincheyaon ch'án kaín rá. Mé xikaha tsoxiteyá. Amén. Ó tjen.

## Tí xroon chr'énhen ch'ín Pablo tí sín tjejó chjasin Éfeso

### Ch'in Pablo ikjin xroon k'uáyéhe tí nínko chjasin Éfeso

**1** Janhan Pablo tsíkjeýána Jesucristo kixin xikaha tjinkaon Dios tsjákuva itén ch'án. Janhan mé ikjian tí xroon chr'anhánrá tí jahará tjejórá chjasin Éfeso tinkachónkirá Dios la ko titekáonrá Cristo Jesús. <sup>2</sup>Tjétjáncháha It'éni Dios la ko Ìnchéni Jesucristo kixin kjuasáyé ch'án chrókuintayaonrá ch'án la ko chrótjáhará ch'án kjuaxróxin.

### Ts'áyéheni tí nkehe jína kuènte Cristo

<sup>3</sup>Chjéheni kjuasáya Dios mé It'é Ìnchéni Jesucristo. Jeheni mé tinkáchónkini Jesucristo la mé xikaha jehe ch'án mé kjuíncheyaonni ch'án kixin kaín nkehe jína tixin nkaya nkajní kjuanjon ch'án. <sup>4</sup>Dios mé kjueyá ch'án tí jeheni kixin chrókuinkáchónkini Cristo tí naxa t'ónahya chjasintajni. Tjinkaon ch'án kixin chrók'uejóni tí tjen ch'án ntá kjuínchetjóáni ch'án kixin kaín jie kjuatsenhenni ch'án. <sup>5</sup>Imá tjuèhe Dios tí jeheni ntá tsíkjeýáni ch'án kixin ts'ónani xjeen ch'án kixin kuinkáchónkini Jesucristo. Mé xikaha tsíkjenkayáxin ch'án kixin xikaha kóxrjínhìn ch'án. <sup>6</sup>Méxra imá tjancheheni kjuasáya Dios kixin kjuíncheyaonni ch'án kixin ó tinkáchónkini tí Xjeen ch'án, imá tjuèhe ch'án. <sup>7</sup>Imá tjuèhe Dios tí jeheni la xikaha kuaáxinni ijnié tí Xjeen ch'án k'uítji la xikaha tsjixín kaín ijjeni. <sup>8</sup>Dios kjuakoxin ch'án kixin imá tjuèheni ch'án. Kjuanjon ch'án kaín kjuachaxin kixin chrókuiénxinni jína la ko kjuanjon ch'án kjuaxrexinkaon jína. <sup>9</sup>Dios kjuínchenoheni tí nkehe jehó ch'án tjenkayáxin ch'án, mé tí nkehe

tóxrjínhìn ch'án tsoxiteyá. <sup>10</sup>Tí nkehe tsíkjenkayáxin ch'án la tsoxiteyá tí yaon tsíchrónka ch'án. La ntá jehe ch'án tsjanjon kjuachaxin kixin Jesucristo ts'etuenhen ch'án kaín xín nkehe síin nkaya nkajní la ko chjasintajni.

<sup>11</sup>Dios kjueyáni kixin chrókuinkáchónkini Cristo la ntá xikaha chrók'ueyéheni tí nkehe tsík'áyéhe ch'án. Kaín tíha la mé xikaha tsonhen éxí tóxrjínhìn Dios. <sup>12</sup>Mé xikaha kjuíuch'e ch'án kixin ntá jeheni kuítekaonni Cristo saxín chrók'uejóni chrókjuancheheni kjuasáya Dios kixin tí kjuachaxin jie chóna ch'án. <sup>13</sup>À ntá kjaxin jahará ó kuinhínrá tí tan jína ntoá chrónka nkexrí tsaáxinni, a ntá ó kuinkachónkirá Cristo. La ntá jnkokoá k'uáyéheni Nchakuen Dios k'ónani xjeen ch'án kixin tinkáchónkini ch'án. Mé xikaha ó xiteyá tí nkehe tsintáchro ch'án. <sup>14</sup>Tí Nchakuen Dios kuítonghenni mé kjuínchenoexinni Dios kixin tsakjani kaín nkehe tsjanjon ch'án tió tsaáxin kaín ni tinkáchónkini ch'án. Ntá xikaha kaín ni tsjancheheni kjuasáyé ch'án kixin tí kjuachaxin jie chóna ch'án.

### Ch'ín Pablo kjuanchehe Dios kixin antsí chrókónohe tí sín tinkáchónki Ìnchéni

<sup>15</sup>Méxra ó kuínhan kixin imá tinkáchónkirá Ìnchéni Jesús la ko imá tjuèhéra kaín tí í so sín tinkáchónki Dios. <sup>16</sup>Ntá janhan nunca títuáhya nixjaha Dios tjáncháha kjuasáya kixin ó tinkachónkirá ch'án. <sup>17</sup>Tjéníxjaha Dios, mé jehe ch'án mé ich'án Ìnchéni Jesucristo, mé It'éni imá tjeotan la tjétjáncháha ch'án kixin tsotjáhará ch'án kjuaxrexinkaon jína kuènte Nchakuen ch'án kixin ntá antsí chrókuiénxínrá jína tí nkehe kuènte ch'án kixin ntá antsí má chróchoxínrá ch'án. <sup>18</sup>Kjaxin tjétjáncháha Dios kixin tsjinkítsa ch'án tsjanjon ch'án ijnko kjuaxrexinkaon

jína kixin ntá tsonohará ts'ejochonhénrá kixin xikaha kjueyará ch'án. La ko tsonohará kixin imá tjetooan tí nkehe sinchekitonhenni ch'án kixin jeheni mé tinkáchónkini ch'án. <sup>19</sup>La ko kjaxin tjetjancháha Dios tsjinkitsará ch'án tsonohará kixin tí kjuachaxin kuente ch'án mé ijnko nkehe imá jie noehyani nketí kjuèxín. Tí kjuachaxién ch'án mé nchexraxinkaon tí sín tinkáchónki ch'án. Jnkokón tí kjuachaxin chóntani la ko tí kjuachaxin imá jie kjuakoxin ch'án <sup>20</sup>tío kjuínchexechón ch'án Cristo. Ntá Cristo sákjuí kjuák'etjaxin ch'án tja chjina tí It'é ch'án itjen nkaya nkajní. <sup>21</sup>Mé xikaha kjuanjon Dios kjuachaxin kixin Cristo ts'etuenhen ch'án kaín xín gobierno la ko kaín tí sín t'etooan. Ijie tjet'etuenhen ch'án kaín xín nkehe síin chjasintajni la ko chr'éxin ts'etooan ch'án kjaxin. <sup>22</sup>Cristo k'uáyéhe ch'án kjuachaxin ts'etuenhen kaín xín nkehe síin. Jehe ch'án mé ts'etuenhen kaín tí sín k'óna ninkoé ch'án. <sup>23</sup>Tí ninko mé éxí tí cuerpo kuente ch'án la jehó ch'án mé t'etuenhen ch'án. Jehó ch'án mé kuente ch'án kaín xín nkehe síin.

### Kuaáxinni kjuachaxién Dios

**2** La ntá ijie Dios mé kjuínchekitonhanrá tí kjuachón jnkochrín kixin tinkachónkirá Cristo. Senó la jahará la éxí tsík'enrá kixin tí jínahya k'uékjich'erá la ko tí jie k'uékjásinrá. <sup>2</sup>Mé xikaha k'uéchrehérá éxí sitónhen chjasintajni. K'uékjinchexiteyéherá éxí tóxrjinhin tí nchakuen jínahya t'etuenhen tí xrinto la ko t'etuenhen kaín xín tí chojni titekakuenhya Dios. <sup>3</sup>Kaínni xikaha k'uék'ejóni tí ósé a naxa kjuínchexiteyéheni tí nkehe ntáchro asénni la ko kjuínchexiteyáni tí kjuaxrexinkaon jínahya k'uéchóntani. A ntá tí naxa xikahó chrókjuich'eni la Dios imá chrókjuinchekjasóteni éxí tsjasóte tí í so sín. <sup>4</sup>A ntá Dios

mé imá kuikonóeheni ch'án la ko imá tjuèheni ch'án. <sup>5</sup>La ntá kjuanjon ch'án tí kjuachón éxí chóna Cristo. Jeheni la éxí chojni tsík'en k'uék'ejóni xikaha kixin tí jie k'uékjasinni. A ntá jie kjuasáyé Dios tsaáxinrá ch'án. <sup>6</sup>Dios mé kjuínchexechón Cristo Jesús la ko kjaxin jeheni tsoxechónni kixin ts'ejókoni ch'án nkaya nkajní. <sup>7</sup>Mé xikaha kjuích'e ch'án kjuakoxin ch'án la naxa tjetjakoxin ch'án kixin tjuèheni ch'án la ko kjuínkitsani ch'án kixin tinkáchónkini Cristo Jesús. <sup>8</sup>Kjuasáyé Dios kixin kuaáxinrá ch'án kixin tinkachónkirá ch'án kixin táha la jehya jahorá k'uitjará tíha. Náhí. Táha la mé kjuasáyé Dios kixin tjáhará ch'án. <sup>9</sup>Kixin jehya ichrén nkehe jína kjuích'eni kixin chrókjuinchehnkexínni. <sup>10</sup>Dios mé kjuíchéna tí jeheni ntá chr'éxin kjuínkítsa ch'án kixin tsinkáchónkini Cristo Jesús, kixin ntá chrókjuich'eni tí xra jína kixin xikaha tsíkjenkayáxin ch'án tí senó a.

### Kjuaxróxin tjejóni kixin tinkáchónkini Cristo

<sup>11</sup>Méxra jahará la jehya chojni judíorá. Mé tí sín judío ntak'inrá sín chojni chóntahya tí xroye tí jahará. A ntá tí sín judío, mé tí sín itsa sín xroye cuerpo kuente sín, mé nchek'in sín asén sín tí chojni chóna xroye. <sup>12</sup>Xráxinkáonrá kixin tí senó la k'úechonhyará Cristo. Jahará la jehya kuente tí nación Israel la xikaha k'úechonhyará tí nkehe tsík'etooan Dios la ko tí nkehe tsintáchro ch'án tsjanjon ch'án. Mé xikaha k'uék'ejorá la k'úechonhyará Dios la k'úechoénhyará kixin chrókuaará. <sup>13</sup>La ntá ijie la ó tinkachónkirá Cristo Jesús. Jahará tí ósé imá ikjín k'uék'ejorá. La ntá jie la ó kóchjineherá ch'án kixin k'uenyákonhánrá ch'án, k'uítji ijnié ch'án. <sup>14</sup>Jehe Cristo mé tjejóxinni



kjuaxróxin. La ntá tí sín judío la tí sín jehya sín judío ntá jie jnkokoá chrókjuenkayáxin sín kixin k'óna éxí jnkokoá chjasin. Cristo k'óxíka ch'án tí kjuanínkaon éxí ijnko tjat'o k'uinkákonhen. <sup>15</sup>Jehe ch'án kjuasóte ch'án, la kjuatsen ch'án tí ley. Tí iyó chjasin k'uéjó kjuíchéna ch'án jnkokoá chjasin nixin kixin tinkáchónki sín ch'án. Mé xíkaha kjuanjon ch'án kjuaxróxin. <sup>16</sup>Mé xíkaha k'uenyákonhenni ch'án k'uexín ch'án tí ntacruz la kjuakjin ch'án tí kjuanínkaon k'uék'ixin tí iyó chjasin k'uékjanjon sín kixin ntá kjuaxróxin ts'ejóko sín Dios la kaín sín jnkokoá k'óna éxí jnkokoá cuerpo kuènte ch'án.

<sup>17</sup>Cristo mé ikui la kjuakohe ch'án kaín chojni tí tan jína kixin kjuaxróxin ts'ejóni kaín ni, mé tí jahará kjónté k'uék'ejorá ikjín tí tjen Dios la ko kjaxin tí sín chjinaxón k'uéjó. <sup>18</sup>A ntá kjuachaxin kuènte Cristo la kaín ni kjónté jeheni o í so chojni mé tsochjineheni It'eni Dios kixin jnkokoá k'uáyéheni Nchakuen ch'án. <sup>19</sup>A ntá jahará la í tóyóahyará chojni tsíkjinín ókjé la ko jahará la jehya ókjé chjasin tjejorá. Kaínni la chóntani kjuachaxin kixin kaín ni la tinkáchónkini Dios la kaín ni la k'ónani chojni kjéhya ch'án. <sup>20</sup>Jahará la mé tsík'ónará ijnko nchia tjat'o jíe k'óna chrítaón tí xro k'uejo tí sín kjueyá Jesús la ko tí sín tsíchr'án Dios chrónka itén ch'án ósé. La ntá Jesucristo mé tí xro imá t'etoan kuènte tí tjat'o a. <sup>21</sup>Tí xrankixín mé Cristo la chrítaón k'óna kuénté nchia la tinkák'ánkí tí nchia kixin jína tsjak'e, ntá tsjixraká kixin ts'óna ijnko nijnko tjóá kuènte Ìnchéni. <sup>22</sup>Mé xíkaha jahará tinkachónkirá Cristo la tsojnkots'érá kaín rá ts'óna éxí ijnko nchia kuènte Dios la ntaha tsjak'exenhen tí Nchakuen ch'án.

### Ch'ín Pablo k'uáyéhe ch'án tí xra tsjakóhe ch'án tí sín jehya judío tí tan jína

**3** Mé xíkaha janhan Pablo mé tjéchi-naxián tí tjákua itén Cristo Jesús kixin jína ts'ejorá kjónté jehya chojni judío tí jahará. <sup>2</sup>Chrókónohará kixin kjuasáyé Dios kjuanjon ch'án tí xra k'uayáha kixin tsjákoahará. <sup>3</sup>Dios mé kjuakoxin tí nkehe tjenkayáxin ch'án ninkexró noehya mé kjuínchenóna tíha la ntá xíkaha ikjian ijnko xroon kánhyó tsjé nixja k'uayéhé. <sup>4</sup>Tiò sinchekuáxinrá tíha ntá tsonohará kixin ó nòna tí nkehe kuènte Cristo ninkexró k'uénoehya. <sup>5</sup>Tí nkehe la ninkexró k'uénoehya tí ósé a. A ntá jie kjuachaxin kuènte Nchakuen Dios la Dios kjuínchenoexín tí sín kjueyá Jesús ch'ehe ch'án xra la ko tí sín chrónka itén ch'án. <sup>6</sup>Tí nkehe ninkexró k'uénoehya la tíhi: Kuínhin tí sín jehya judío tí tan jína kixin nkexrí tsaáxin sín la ntá tí sín jehya judío la ó jnkokón ts'áyéhe sín nkehe jína éxí ts'áyéhe tí sín judío. La ntá jnkokoá ts'óna sín tí cuerpo kuènte Cristo la jnkokón ts'áyéhe sín kaín tí nkehe tsíchrónka Dios sinchexiteyá Cristo Jesús.

<sup>7</sup>Janhan k'uékítekakonhya, a ntá jie kjuasáyé Dios kjuanjon ch'án tí xra i sit'a kixin tsjákuá tí itén ch'án kixin tí kjuachaxin kuènte ch'án. <sup>8</sup>Janhan mé kánhyó tjetoan kixin janhan la imá intsína la kaín tí í so sín tsíkjinchetjóá Dios la antsí tjetoan sín. Kjónté la Dios mé kjuínchekitonna tí xra imá tjetoan kixin tsotjanka tí sín jehya sín judío tí tan jína nkexrí imá tjetoan tí nkehe kuènte Cristo. <sup>9</sup>La k'uayáha tí xra tsotjanka kaín xín chojni nkexrí tsíkjenkayáxin Dios tí ósé kixin nijnko nkexro k'uénoehya tíha. Mé jehe ch'án mé kjuíchéna ch'án kaín xín nkehe. <sup>10</sup>Mé xíkaha kónhen kixin

ntá tí sín kuènte ninko tsjakuexin sín kaín xín tí sín t'etōan nkaya nkajní kixin tsonhe sín kixin xikaha kaín nkehe jína tsíkjenkayáxin Dios. <sup>11</sup> Kaín tíha kjuích'e Dios éxi tsíkjenkayáxin ch'án ntá Ìnchéni Jesucristo la ó kjuínchexiteyá tíha. <sup>12</sup> Kjuasáyé Cristo ntá ó chóntani kjuachaxin tsochjineheni Dios kixin tinkáchónkini ch'án. <sup>13</sup> Méxra xrjanóahará kixin chrókuitoéhyará chrókuinkachónkirá ch'án kjónté tjetjasótena kixin kaín tíha kónhen kixin jahará chrók'uejoxinrá jína.

### Cristo imá tjuèheni

<sup>14</sup> Méxra xikaha tjak'éxian tóch'ian nkayakon It'é Ìnchéni Jesucristo. <sup>15</sup> Mé tsík'áyéhe ihnié Dios kaín xín chojni tinkáchónki ch'án mé tí sín siín nkaya nkajní la ko tí sín siín chjasintajni. <sup>16</sup> Tjáncháha It'éni kixin tsjanjon kjuachaxin kuènte ch'án ts'ayéhérá kjuachaxién Nchakuen ch'án <sup>17</sup> kixin Cristo chróchóna asánrá kixin tinkáchónkirá ch'án la ntá ntoá chrók'uejorá éxi ijnko nta tsíkji nuè ninka la chrótjuèhérá kichuára. <sup>18</sup> Ntá jahará la ko tí í so sín tinkáchónki Ìnchéni mé chrókuiéxinrá nkexrí tonxín la ko kjínxin la ko ninkaxín la ko ntetoxín kixin nkexrí tjuèheni Cristo. <sup>19</sup> Tjáncháha Dios kixin antsí chrókónohará nkexrí imá tjuèhe ch'án tí jeheni mé antsí má tjuèheni ch'án la tsjachahyani tienxínni kaín tíha. A ntá tí jehe ch'án chrókjuinkitsani ch'án la antsí chrókuiéxinni tí kjuachaxin kuènte ch'án.

<sup>20</sup> Ijie la chjéheni kjuasáya Dios kixin jehe ch'án chóna kjuachaxin tsjanjon ch'án antsí má tsjé nkehe que tí nkehe kjuanchiani o tí nkehe kjuenkayáxinni. Mé tsjanjon ch'án kaín tíhi kjuachaxin kuènte ch'án mé tsjinkitsa tí jeheni.

<sup>21</sup> Kjuasáyé Dios itjen jnkochrín kixin Cristo Jesús kjuínchekaá ch'án tí ninko, mé xikaha ó xiteyá jnkochrín. Amén.

### Jína chrók'uejókonni kichó ni kixin chóntani Nchakuen Dios

**4** Janhan mé tjéchinaxián tí xra kuènte Ìnchéni. Méxra xrjanóahará kixin jína chrók'uejorá kixin xikaha Dios tsíkjeýá tí jahará. <sup>2</sup> Méxra chrókjuínchehnkehyará la ko chrókójiahyará la ko chrókójinárá chrókóninkákonhyará la ko chrótjuèhérá kichuára. <sup>3</sup> Méxra jína chrók'uejokoará kichuára kixin chrókjuinkitsa Nchakuen Dios kjuaxroxin chrók'uejorá la ko jnkokoá chrókjuenkayáxinrá. <sup>4</sup> Itjen jnkokoá cuerpo la ko itjen jnkokoá Nchakuen Dios la ko Dios k'uíyehé kaín ni kixin jnkokoá nkehe ts'ejóchónhenni. <sup>5</sup> Chóntani jnkokoá Ìnchéni la ko jnkokoá nkehe tinkáchónkini la ko ó jnkokoá vez kuíkiteni. <sup>6</sup> Itjen jnkokoá Dios la jehe mé It'é kaín chojni. Jehe ch'án mé t'ayakonhen ch'án kaín nkehe la ko t'etuenhen ch'án kaín nkehe.

<sup>7</sup> Jnkojnkonni k'uáyéheni kjuachaxin sich'eheni Dios xra kixin xikaha kjuanjon Cristo. <sup>8</sup> Méxra xikaha nixja xroon itén Dios kixin:

“Jehe ch'án sákjuí ch'án nkaya nkajní la ko sákjuíko ch'án tí sín tjejóchjina, la ntá kjuínchekitonhen ch'án chojni jnkojnko kjuachaxin kuènte ch'án.”<sup>8</sup>

<sup>9</sup> ¿Ntá nkexrí t'axrjéxín kixin sákjuí ch'án? Tíhi mé t'axrjéxín kixin jehe ch'án mé senó k'uínkajinxin ch'án nkaya nkajní la kjuák'e ch'án chjasintajni. <sup>10</sup> Jehe ch'án mé k'uínkajinxin ntiha mé ntá jie sáxíkji ch'án tí nkajní imá noi. La ntá tjet'etuenhen ch'án kaín xín nkehe. <sup>11</sup> Jehe ch'án mé kjuínchekitonhen ch'án ijnko kjuachaxin jnkojnko

chojni. Kjueyá ch'án iso chojni k'óna apóstol la ko í so sín tsochrónka sín tí nkehe kjuínchenohe sín Dios la ko í so sín tsochrónka sín tí tan tsaáxinni. La ko kjueyá ch'án í so sín ts'óna pastor la ko í so sín tsjako sín itén ch'án. <sup>12</sup> Mé xikaha tí xṛá k'uáyéhe tí sín kjueyá ch'án kixin sich'ehe sín ch'án xṛá kixin ntá ts'ánkí tí sín k'óna tí cuerpo kuènte Cristo. <sup>13</sup> Ntá xikaha kaín ni jnkokoá tsinkáchónk-ini tí Xjeen Dios la ko tsochóxinni ch'án jína kixin ntá xikaha ts'ónani chojni ntoá nchexiteyá la ko chrókónoheni éxí nkexrí tjinkaon Cristo. <sup>14</sup> Méxṛá chrók'ónahyani éxí xjan ntsíntí. Tí xjanntí la xṛahya tsjinkí kjuaxrexinkaon éxí ijnko nkehe sákjuiko xrinto xikaha kixin sich'iyehe sín chojni ijnko nkehe nixin la xṛahya titekaon sín. Tí chojni ch'ia tjinkaon sín tsjachroeni sín í jnko ntja ntoáhya kixin chrok'uitjáyenhenni Cristo ntá chrókjuasinni jie. <sup>15</sup> A ntá íchá jína chrónixjani tí nkehe chaxín ntoá la kaín asénni chrótjuèheni kichó ni ntá xikaha chrókónoheni kixin xikaha tjinkaon Cristo. Jehe ch'án mé tí kja t'etuenhen tí cuerpo kuènte ch'án. <sup>16</sup> A ntá kjuachaxién Cristo kuénté tí cuerpo, tí ch'e xṛá jnkokón la tjinkítsa kuénté. Ntá jnkojnkonni jína ch'eni xṛá la mé xikaha ts'ánkí tí xṛá kuènte ch'án la mé jína chrótjuèheni kichó ni.

### Tí kjuachaxin nixin kuènte Cristo

<sup>17</sup> Tíhi mé ntáxrjan la ko tétuanhanrá kjuachaxién ihnié Ìnchéni. Ijie la chrók'uejohyará éxí ch'e tí sín chónhya Dios. Kaín nkehe tjenkayáxin sín la ntoáhya tíha. <sup>18</sup> Tí nkehe tjenkayáxin sín la sítié la chónhya sín tí kjuachón tjanjon Dios kixin tienxínhya sín kixin chrohya tsitekaon sín Dios. <sup>19</sup> Ó tsíkjinchek'itjáyan sín tí kjuaxrexinkaon kuènte sín la í tósuèhya sín chrókjuasin sín jie. Imá tóxrjínhin sín chrókjuich'e

sín kaín nkehe jínahya. <sup>20</sup> A ntá jahará xikaha xrakohará tí nkehe kjuako Cristo, <sup>21</sup> tí chaxín kuinhínra kuènte ch'án la ko tsíxrakohará tí nkehe chaxín ntoá kuènte ch'án. <sup>22</sup> Méxṛá tìtohéra tí kjuaxrexinkaon ntaxin k'uékjenkayáxinrá ósé k'uék'ejorá mé ijnko nkehe jínahya naxṛá t'ayahará. <sup>23</sup> Jahará t'ichjánxin kixin chrókónixin tí kjuaxrexinkaon kuéntará la ko tí nchakuanrá. <sup>24</sup> Méxṛá chrókuákjára tí kjuaxrexinkaon nixin kjuích'éna Dios xikaha tjinkaon ch'án la ntá chrókjuákoxinrá ijnko ntja jína ntoá.

<sup>25</sup> Méxṛá chrókuìtohéra tí kjuach'ia. Méxṛá jnkojnkorá chrónixjehéra kichuára ntoá kixin kaín ni tsík'ónani jnkokoá cuerpo.

<sup>26</sup> Tí chrókóninkáonrá la chrókjuás-inhyará jie la chrókóninkákonhyará kuénté yaon. <sup>27</sup> Chrókuìtoéhyará kixin Tsochren chrókjuít'ayahará.

<sup>28</sup> Tí jnkojínra kuèra la tìtohéra kjuachee. Íchá jína kixin itjára chrókjuích'exínra xṛá kixin tsochontará chichaon sinchekìtonhénra jnkojín nkexro t'ichjánxinhin.

<sup>29</sup> Nixjahyará tí nkehe náxrjónhya. Nixjará ijnko tan jína kixin tsjinkítsará ts'ánkí kjuaxrexinkaon kuènte kichuára la xikaha tsjinkítsará tí sín tjejóttin-hin. <sup>30</sup> Nchek'ávahyará tí Nchakuen Dios kixin tíha mé k'uayéxinrá éxí ijnko xroye kixin tsoxoaxínra kixin jahará mé tinkachónkirá Dios la ko tsochonhénra tí yaon itsi ch'án ntá tsjintaxín tsaára.

<sup>31</sup> Tìtohéra tí kjuanínkaon chontará la ko tìtohéra tí nkehe ntoáhya tjenkayáxinrá la ko tìtohéra tí kjuanoṭon la ko kaín nkehe jínahya. <sup>32</sup> A ntá chrókójínará chrókuìkonóhéra kichuára. Sinchek'itjáyenhénra ijie kichuára kixin Dios kjuatsen tí jie chontará kixin tinkachónkirá Cristo.

### Jína chrók'uejò tí sìn k'óna xjeen Dios

**5** Jahará ó k'óna xjeen Dios la tjuahará ch'án. Méxra chrókóxakonhanrá chrókjuákoxinrá éxí kjuákoxin tí jehe ch'án. <sup>2</sup>Chrótjuèhérá kíchuará éxí Cristo tjuèhe tí jeheni kíxin jehe ch'án la k'uenyákonhenni ch'án, éxí yóhé ijnko kolélo xíkaha kjokehé sìn Dios la kóchéhe Dios k'uáyéhe ch'án tí xraxé náxrjón.

<sup>3</sup>Ntá jahará mé tsík'ónará chojni kuènte Dios la ntá chrónixjahyará kuènte í jnko chojni chjin ókjé chrókjuásinkoará jie la ko chrókjuenkayáxinhyará ninkehó nkehe náxrjónhya la ko chrókjuakéhya asánrá tí nchónhya nkehe chróchontará. <sup>4</sup>Chrónixjahyará ijnko nkehe náxrjónhya o ijnko nkehe chónkó o ijnko nkehe tjuáhya kíxin jehya kuènte Cristo tíha. Íchá jína antsí má chrókjuancheherá Dios kjuasáya. <sup>5</sup>Ó nohará kíxin tí nkexro tjasinko jie í jnko chojni chjin ókjé la ko tí nkexro ch'e tí nkehe tjuáhya la ko tí nkexro tjak'e asén sìn tí itsjé nkehe chróchónta sìn la mé tíha ó yóhé tí nkexro tinkáchónki nkehe tsíkjanoya xíkaha. Mé tí nkexro xíkaha ch'e mé tsjachahya ts'ixenhen tí tjet'etoan Cristo la ko Dios. <sup>6</sup>Méxra tjánjonhyará kjuachaxin sit'ayahará ninkexró chrónka tí nkehe chónkó. Méxra xíkaha ntá itsi tí kjuanínkaon kuènte Dios la tsjasóte tí sìn titekakuenhya sìn tí jehe ch'án. <sup>7</sup>Méxra chrók'uítohyará tí sìn xíkaha ch'e.

<sup>8</sup>Senó la k'uék'ájrí ntja sítié. A ntá ijie ó k'ónará chojni kuènte Ìnchéni la ó xritjejorá tí ntja t'inkaséyan kuènte ch'án. Méxra tjenkayáxinrá jína éxí tí sìn xritjejó tí ntja t'inkaséyan. <sup>9</sup>Tí t'inkaséyan t'axrjeníxin kaín nkehe jína la ko tí nkehe chaxín la ko tí nkehe ntoá. <sup>10</sup>Tóxakonhanrá chrókjuich'erá tí nkehe

tóxrjínhin Ìnchéni. <sup>11</sup>Tankiéhyará tí sìn ch'e xra náxrjónhya mé tí sìn a ch'e xra tí sítié. Íchá jína tsjákoxinrá tí xra tí itjen tí t'inkaséyan. <sup>12</sup>Chrókósuèhèni chrónixjani kuènte tí nkehe imó ch'e tí sìn jínahya. <sup>13</sup>Tí t'inkaséyan mé tsonoxíxin kaín xín nkehe la mé tí xrohi ts'ikonxínni jína kaín nkehe. <sup>14</sup>Mé xíkaha ntáchro xíkahi:

T'áya jaha tjéchrian t'inkatjénxian tí síin tí sìn tsík'en.

Cristo mé tjetjoka xrohi.

<sup>15</sup>Méxra imá chrókóxakonhanrá jnkojína chrók'uejorá. Jehya éxí tí sìn noehya chrók'uejorá. Náhi. Chrók'uejorá éxí ijnko chojni nohe má. <sup>16</sup>Chrókóxakonhanrá chrókjuich'erá xra tí jie kíxin itsi ijnko yaon jínahya xitjahya sich'erá xra. <sup>17</sup>Chrókólontihyará. Chrókóxakonhanrá chrókuiénxinrá tí nkehe tóxrjínhin Ìnchéni. <sup>18</sup>Chrókókoanhyará kíxin tíha mé chrók'uitjáyánxínrá. Íchá jína chrókjuánjonrá kjuachaxin chrók'uetuəhanrá Nchakuen Dios. <sup>19</sup>Chrónixjexínrá kíchuará tí salmo la ko tí himno la ko chrótsjerá la xíkaha kaín asánrá chrókjuancheherá kjuasáyé Ìnchéni. <sup>20</sup>Jnkochríxín chjehérá kjuasáya It'éni Dios kíxin kaín nkehe kjuanjon ch'án la ko chrókjuanchaxínrá kjuasáya kjuachaxién ihnié Ìnchéni Jesucristo.

### Jína chrók'uejókoni tí sìn kjéhyani kíxin tinkáchónkini Ìnchéni

<sup>21</sup>Títekákonhénrá kíchuará kíxin ó tinkáchónkirá Ìnchéni. <sup>22</sup>Tí chojni chjin chrókjuinchexiteyéhe xii sìn éxí nchexiteyéhe sìn Ìnchéni. <sup>23</sup>Tí chojni ntoa chónka kjuachaxin ts'etuənen ichjién éxí Cristo mé ikja t'etuənen tí nínko. Kjaxin jehe ch'án kjuínchekaá ch'án tí nínko, mé tí cuérpoé ch'án. <sup>24</sup>Méxra éxí tí nínko nchexiteyéhe Cristo mé xíkaha

kjāxin tí chojni chjin chrókjuinchexiteyéhe tí xii.

<sup>25</sup>Tí chojni ntoa chrótjuèhe tí ichjién kixin éxi Cristo la tjuèhe tí ninko la k'uenyákonhen ch'án. <sup>26</sup>Mé xikaha kjuích'e Cristo kixin sinchetjóá ch'án tí ninko mé kjuínchetjuáxin ch'án tí nta kuúkitexín sín kjuachaxién itén ch'án. <sup>27</sup>Ntá tsjanjon ch'án tí jeheni éxi ijnko ninko imá jna chóntahya jie la ko chóntahya ninkehó nkehe náxrjónhya, mé ijnko ninko tjóá la ko ntoá. <sup>28</sup>Mé xikaha tí chojni ntoa chrótjuèhe tí ichjién sín éxi tjuèxin ch'án cuérpoé ch'án. Tí nkexro tjuèhe ichjién mé kjāxin tjuèhe asén ch'án. <sup>29</sup>Kohya ninkexró nínkakohen tí cuerpo kuènte. Kaín chojni la ine sín la t'ayakonhen sín cuérpoé sín la mé xikaha Cristo t'ayakonhen tí ninko. <sup>30</sup>Kaínni mé k'ónani cuerpo kuènte ch'án. Jeheni mé ntøe ch'án la ko huésøé ch'án. <sup>31</sup>Ntáchro kixin: “Méxra ijnko chojni ntoa mé tsítóhe it'é la ko iné kixin tsakja ichjién la yói sín mé ts'óna éxi jnkokoá chojni.”<sup>\*\*</sup> <sup>32</sup>Tíhi mé ijnko nkehe imá jie tienxínhya ninkexró. Mé janhan xrjanka kuènte Cristo la tíha mé ninkoé ch'án. <sup>33</sup>Méxra kjāxin tjéxrjanka kixin chojni ntoa t'ichjánxin tsotjuèhe ichjién sín éxi tjuèxin asén sín la tí chojni chjin chróchóntehe sín kjuasáya tí xii sín.

**6** Jahará chánjanrá la t'ichjánxin sinchexiteyéherá it'ará la ko inará kixin tjuèherá Ìnchéni kixin tí xikaha mé jína. <sup>2</sup>Tí nkehe saoxín tsík'ítuenhenni kixin chrókuitekaonni ntá chrókjuanjon Dios nkehe mé tíhi: “Chrókjuíkosáyehérá it'ará la ko inará <sup>3</sup>kixin mé náxrjón chrók'uejorá la isé chrók'uejorá ntihi chjasintajni.”<sup>††</sup>

<sup>4</sup>Jahará it'é xjan la chrókjuínchekónínkakonhyará

tí xjaanrá. Íchá jína kixin sinchek'ánkixinrá xjaanrá ijnko kjuaxrexinkaon jína kixin ts'ánkixin xjan tsinkáchónki xjan Ìnchéni.

<sup>5</sup>Jahará chojni ch'e xra mé chrókuítekákónhénrá tí lámøará ntihi chjasintajni la chróchontehérá sín kjuasáya. Sích'eherá sín xra éxi ch'eherá xra Ìnchéni Cristo.

<sup>6</sup>Chrókjuích'erá xra jína la jehya kixin tí tjejó sín tjejótsjehe sín kixin ntá xikahó ntá jína chrók'uejoxinrá. Náhi. Éxi ch'eherá xra Cristo kaín asánrá sích'erá xra kixin mé xikaha tóxrjínhin Dios. <sup>7</sup>Kaín asánrá chrókjuích'erá xra éxi ch'eherá xra Ìnchéni la jehya éxi chojni ó chrókjuích'eherá xra. <sup>8</sup>Ó nohará kixin jnkojnko nkexro kjónté ch'exón xra o kjónté chojni t'ítuenhya mé jnkojnko sín ts'áyéhe sín tí nkehe tsjanjon Ìnchéni kixin nkexrí tí xra jína kjuích'e sín.

<sup>9</sup>Tí jahará chojni lámó mé jnkójina chrókuétuènhénrá tí sín t'ahará xra la séchrókóninkákónhénrá sín. Xráxinkáonrá kixin jahará la ko jehe sín mé jnkokón chrókjuínchexiteyéherá Ìnchéni itjen nkaya nkajni kixin kaín chojni la jnkokón t'íkon ch'án.

### Tí nkehe tjinkítsa t'ayakonhen tí sín tinkáchónki Ìnchéni

<sup>10</sup>A ntá jie kichó ni, nchefuérte asánrá kixin tjejókoni Ìnchéni la tjejoan tí kjuachaxin kuènte ch'án. <sup>11</sup>Chrókuaáxinrá kaín tí kjuachaxin tsjanjon Dios kixin ntá xikaha jína chrók'uejorá la chrókjuít'ayahará Tsochren. <sup>12</sup>Jehya tjanjonkoni chojni tsík'óna into la ko hueso. Náhi. Jeheni tjanjonkoni kaín tí nchakuen tí jínahya síin chjasintajni. Tíha mé tjinkaon chrók'uejoan tí chjasintajni sítié. <sup>13</sup>Méxra chrókuákjárá kaín tí

\*\*5:31 Génesis 2.24

††6:3 Éxodo 20.12; Deuteronomio 5.16

kjuachaxin kjuanjon Dios kixin ntá chrókjuachará tí itsi tí yaon jínahya ntá tí xikaha chrókjuich'erá la chr'éxin la jína chrók'uejorá. <sup>14</sup>Nchefeuerte asánrā. Jína chrók'uejorá. Chrókuítekáonrā tí itan chaxín kixin tí nkehe ntoá mé chrók'uayakonhanrā. <sup>15</sup>Méxra listo chrók'uejorá sátsjichronkará tí tan tjanjon kjuaxróxin. <sup>16</sup>La antsí tjeoan chrókuinkachónkirā Ìnchéni. Tíha mé chrok'uinkákonhen tí chica flecha tsochr'án Tsochren. <sup>17</sup>Tí chrókuaáxinrā la táha éxí yóhe ijnko chica casco t'ayakonhen ikja chojni la tí itén Dios la éxí yóhe ijnko chica espada mé tjanjon Nchakuen Dios. <sup>18</sup>La ko kjaxin chrókuítóéhyará chrónixjehérá Dios la jnkochrín chrókjuanchehérá ch'án kaín nkehe t'ichjánxinhanrā la chrokjuanchatóxixínrā Nchakuen ch'án. Chrók'uejotsjehérá la chrókjuanchiará kixin tsjinkitsa Dios kaín tí sín tinkáchónki ch'án. <sup>19</sup>Chrónóehérá ch'án kixin kjaxin janhan tsjinkitsana ch'án tsjanjon ch'án tí tan t'ichjánxin

tsoníxja janhan kixin ntá janhan antsí jína chrónixja kixin ntá tsinhin sín tí nkehe ninkexró k'uénoehya kixin nkexrí tjen tí itén ch'án tsaáxin chojni. <sup>20</sup>Dios mé ichr'ánna tsoxrjanka tí itén ch'án, mé xikaha tjéchjínaxián ijie. Nixjehérá ch'án kixin jína tsoxrjankaxián tí itén ch'án la ko ninkexró tsochrakuanhya.

### **Kjuixixín nixja ch'ín Pablo**

<sup>21</sup>Kíchóni Tíquico, tí nkexro imá tjuèheni la ko xráxin ch'ehe xra Ìnchéni mé tsochenkará ch'án tí jahará nkexrí tjén la ko nkexrí tí xra tjét'a. <sup>22</sup>Mé xikaha tétuanhan ch'án sátsjitsjehe ch'án tí jahará kixin tsochrónka ch'án nkexrí tjejóni la xikaha chrókócháhará.

<sup>23</sup>Tjáncháha It'éni Dios la Ìnchéni Jesucristo kixin tsochjéhe ch'án kaín kichó ni kjuaxróxin kixin tsotjuèhe kichó sín la ko tsinkáchónki sín ch'án. <sup>24</sup>La ko kjuasáyé tí jehe ch'án sincheyaon ch'án kaín tí sín chaxín tjuèhe Ìnchéni Jesucristo. Mé xikaha tsoxiteyá. Amén. Ó tjen.

## Tí xroon ikjin ch'in Pablo chr'énhen ch'an tí sín sín chjasin Filipos

### Ch'in Pablo ikjin xroon k'uáyéhe tí nínko chjasin Filipos

**1** Janhan Pablo la ko Timoteo ch'eheni xra Jesucristo, mé ikjinni tí xroon i chr'anhánrá kaín tí jahará kíchó ni tinkachónkirá Cristo Jesús tjejórá chjasin Filipos la ko tí sín t'etoan kuènte nínko ntiha. <sup>2</sup>Tjanchiani kixin It'éni Dios la ko Ìnchéni Jesucristo kjuasáyé ch'an imá chrókjuincheyáonrá ch'an la ko chrók'uayéhérá kjuaxróxin.

### Ch'in Pablo tjechrónóhe ch'an Dios kixin tí sín tinkáchónki Jesús ntiha

<sup>3</sup>A ntá tíó xráinkavan tí jahará la imá tjaha Dios kjuasáya <sup>4</sup>la ko nixjaha Dios la imá chàna tjáncháha ch'an kixin tsjinkitsa ch'an kaín tí jahará. <sup>5</sup>Jahará la kjuínkitsará tíó kjuàkua tí tan jína tí saoxín kuinhínrá itén Dios la naxa tjejotjinkitsará ijie. <sup>6</sup>Ó nòna chaxín kixin xikaha Dios ó kjuankixin ch'an ch'e ch'an xra jína kixin kuítekáonrá mé xikaha naxa tsjintaxín sich'e ch'an tsjixrakájia tí yaon tsokjan Jesucristo. <sup>7</sup>Jína kixin tjenkayáxian kuènte kaín tí jahará. Méxra xikaha imá tjuahára. Jahará la ko janhan la jnkokón kjuachaxin k'uáyéheni la kjónté janhan tjéhjina o itjén tí tjejó tí sín t'etoan tjéxrjanka kixin jína tí tan tsaáxinni. <sup>8</sup>Dios la ó nohe kixin imá tjínkavan chrók'uíkuan kaín tí jahará kixin éxi tjuàxinrá Cristo. <sup>9</sup>Tjáncháha Dios kixin tsjinkitsa ch'an tí jahará kixin antsí má chrótjuéhérá ch'an la ko chrók'uánkí tí kjuaxrexinkaon kuéntará kixin antsí chrókuiénxinrá kaín nkehe. <sup>10</sup>La ntá chrókónohará chrókuákjárá tí nkehe jína. A ntá tí xikaha chrókjuich'erá la

jína tjóá chrók'uejórá la ko kohya nkehe chrókjuanchia jie tíó tsokjan Jesucristo. <sup>11</sup>Méxra jahará chrókjuich'erá xra jína éxi ijnko nkehe jína chrók'óna kixin kjuasáyé Jesucristo la ntá xikaha la chrókjuíkosáyehérá Dios.

### A ntá janhan la tjéchõnxian Cristo

<sup>12</sup>Kíchóni tjínkavan tsonohará kixin tí nkehe kjuasótexinna la kjuínkitsa kixin kuínhin chojni tí itén Dios tsaáxinni. <sup>13</sup>Kaínxín tí chojni sín palacio la ko kaín tí í so sín mé nohe sín kixin tjéchjínaxián kixin tinkachónkia Jesucristo. <sup>14</sup>A ntá tí tjéhjina la itsjé tí sín kíchó ni antsí má kóxrjínhin sín tjako sín itén Ìnchéni la í chrakonhya sín tinkáchónki sín ch'an.

<sup>15</sup>A ntá chaxín iso sín nixja sín itén Cristo kjánchó chjinoxínhin sín kixin tjinkaon sín chrókjuachaxinna sín. A ntá í so sín tjako itén ch'an kixin tjinkaon sín jína chrókjuinkitsana sín. <sup>16</sup>Kjánchó iso sín tjinkaon sín chrókjuako sín kixin chrókjuacha sín la ntá kénhya asén sín tjako sín. Mé xikaha ch'e sín kixin tjinkaon sín chrók'uekana sín antsí má jie kixin naxa tjéhjina. <sup>17</sup>La í so sín nixja sín kuènte Cristo kixin tjuèhe sín ch'an la ko tjuana sín la ó nohe sín kixin ntihi tjén kixin tsoxrjanka tí itan tsaáxinni. <sup>18</sup>Kjánchó ántosenná kjónté á chaxín kaín asén sín tjako sín o náhí, la imá chàna kixin chrónka sín tí tan jína kuènte Cristo la antsí má chéhe asenná.

<sup>19</sup>Ó nòna janhan kixin kjónté kaín nkehe tsonna la kjónté xikaha la tsaáxinna kixin kjuasáyará jahará tjejónix-jehérá Dios la ko tí Nchakuen Jesucristo mé tjetjinkitsana. <sup>20</sup>Jína tjéchõnhan kixin Dios la tsítõehya tí janhan kixin ichrén nkehe jínahya chrókóna. Tjínkavan tsochonta kjuachaxin kixin jína tsonixja kaín asenná nkayakon chojni. Ntá xikaha senó la xikaha ijie tíó ts'ikon chojni tí janhan la tsonoxín sín kixin Cristo imá chóna kjuachaxin

kjónté á naxa tjéchuān o á ó tsík'ena.  
<sup>21</sup> Kíxin janhan na Cristo tjéchonxian la ntá kjónté ts'énxian xíkaha la mé chrókjuácha. <sup>22</sup> A ntá tí naxa tsjak'é naxa tjéchuān ntá naxa jína sít'aha Ìnchéni xra. Nonahya nkehe tí chrókuákjaá, á chrók'uén o á chrókjuak'échuān. <sup>23</sup> Imá xra chrókjuenkayáxin chrókuákjaá tí yaá nkehe. Janhan na tí chrók'uén la chrókjuak'ékian Cristo. A ntá janhan la ntáxrjan kíxin íchá jína tíha. <sup>24</sup> Kjánchó t'ichjánxin naxa chrókjuak'é kíxin naxa chrókjuínkítsa tí jahará. <sup>25</sup> Méxra ó nòna kíxin naxa tsítona tí tjejorá kíxin chrókjuínkítsa tí jahará kíxin ntá antsí chrókónohará la chrókócháhará kíxin jína chrókuinkachónkirá Ìnchéni. <sup>26</sup> Ntá tió tsjasán janhan ts'ejóni ínaá la imá tsocháhará la tsjanchehéra kjuasáyé Jesucristo.

<sup>27</sup> A ntá jahará chrókjuákoxinrá chrók'uejorá jína éxi ntáchro tí tan kjuákoxin Ìnchéni Cristo. Mé xíkaha tí tsjasántsjahará o náhi la tjínkavan chrókuinhan kíxin naxa imá tinkachónkirá Cristo la ko jnkokoá tjenkayáxinrá la ko jnkokoá tjejoch'erá xra tjàkorá tí itan jína tsaáxinni. <sup>28</sup> Chrókuítóéhyará kíxin tí sín nínkakonhanrá chrókjuintachrakonrá sín. Tí xíkaha chróchrakonhyará la chrókónoexín sín kíxin ts'itjáyan sín, a ntá chrókónoxín kíxin jahará mé chaxín tsaára. Tíha mé Dios tsjinkítsará. <sup>29</sup> Ó kuitonhanrá tí kjuachaxin kíxin tsinkachónkirá Jesucristo la ko kjaxin kuitonhanrá kjuachaxin tsjasótiaxínrá kíxin jahará mé tinkachónkirá ch'án. <sup>30</sup> Jahará la ko janhan jnkokón ch'eni xra. Jahará ó k'uíkonrá senó nkexrí kjuít'a xra la ó kuinhínrá ijie kíxin naxa tjét'a xra kjónté nínkakonna sín.

**Kuítohe Jesús tí kjuachaxin  
 chrók'uetōan ch'án  
 ntá ijie imá tjejoan ch'án**

**2** Tí chaxín tí Cristo nchexraxinkaonrá la tí chaxín Cristo tjuàhará ch'án nchecháhará ch'án la tí chaxín tí Nchakuen ch'án xrikoára la tí chaxín nohará kíxin tikonóahará ch'án <sup>2</sup> la nchechànará kíxin jnkokoá chrók'uejokoará kíchuára la ko jnkokoá chrójtjuèhéra kíchuára la ko jnkokoá chrókjuenkayáxin nchakuanrá la ko jnkokoá xra chrókjuích'erá. <sup>3</sup> Chrókjuenkayáxinhyará chrókuétoanrá la ko chrókjuínchehnkehyará. Náhi. Chrók'ónará chojni t'etoanhya. Chrók'uikonrá éxi antsí tjejoan tí í so sín, a ntá kánhyó tjejoan tí jahará. <sup>4</sup> Ninkexró chrókjueyá tí nkehe kuènte jehó. Náhi. Chrókjuéyará tí nkehe chrókjuínkítsa tí í so chojni.

<sup>5</sup> Jahará chrókjuenkayáxinrá éxi kjuenkayáxin Cristo Jesús. <sup>6</sup> Jehe ch'án chóna ch'án kaín kjuachaxin kuènte Dios la kjónté xíkaha la tjínkakonhya ch'án chrókjuíncheyóhe ch'án éxi Dios. <sup>7</sup> A ntá kuítóhe ch'án ntáha tí kjuachaxin k'uechóna ch'án la k'óna ch'án ijnko chojni ntoa chjasintajni la ko kjuích'e ch'án xra. <sup>8</sup> La éxi ijnko chojni k'uetōanhya kjuák'e ch'án la kjuínchexiteyéhe ch'án Dios kaín asén ch'án kíxin ik'uén ch'án, mé k'uénxin ch'án tí ntacruz. <sup>9</sup> Méxra Dios imá kjuikosáyehe tí jehe ch'án la ko kjuínchek'in ch'án ijnko ihnié imá tjejoan. <sup>10</sup> Kíxin ntá tsinhin kaín chojni tí ihnié Jesús ntá ts'ejóxin toch'in sín, mé tí sín síin nkaya nkajní la ko tí sín síin chjasintajni la ko tí chojni síin chrínkí nche. <sup>11</sup> La ko kaín xín chojni tsochrónka sín kíxin Jesucristo mé Ìnché sín mé xíkaha tsjikosáyehe sín It'éni Dios.



**Tí sín tinkáchónki Cristo tóyóhe éxi xrohi t'inkaséyanxín chjasintajni**

<sup>12</sup> Jahará kíchó ni imá tjuahará la xráxín kjuínchexiteyànará tí k'uék'e-jóni. **A** ntá ijie la chrókuínchexiteyànará kjónté ikjín tjén. Chrókuítóéh-yará tí nkehe tsjanjon kjuachón la chrók'uayakonhénrá jnkójína <sup>13</sup> kíxín Dios ntaxraxinkaonrá s'ich'erá tí nkehe jína tjinkaon ch'án.

<sup>14</sup> Kaín xrá ch'erá la chrókóninkákuén-hyará kichuárá la ko chrókjóntahyará kichuárá <sup>15</sup> kíxín tsokohya ninkexró tsontáchro kíxín jahará la chontará jie. Kíxín jahará la mé tí xjeen Dios chróchontahyará jie, la tjejorá tí siín tí sín jínahya tjasin jie. Na ntá jahará chrók'uinkaséyanxín tí jehe sín éxi tí konotsé t'inkaséyanxín tí chjasintajni sítié. <sup>16</sup> Méxra jahará chrók'uayakonhénrá jína tí tan tjanjon kjuachón. Tí xikaha chrókuínchexiteyará jnkójína ntá tió tsi Cristo tsöchéhe asenná kíxín xikaha xrá tjejoch'erá kíxín ntá tsonóna kíxín jehya ó chónkó kjuak'ékjít'a xrá. <sup>17</sup> Kjónté chrók'uénxian la éxi nkehe chrókuanchatóxixínrá Dios chrók'uikonrá tí janhan. Mé xikaha chrókjuintaxín tí nkehe chróchjehérá ch'án kíxín tinkáchónkirá ch'án, la ntá mé janhan mé tsöchàna la ko tjínkavan kíxín kaín rá xikaha chrók'uayéhérá kjuachéhe. <sup>18</sup> Méxra chrókócháhará jahará kjaxin la chrók'uayéhérá éxi tí kjuachéhe chonta.

**Ch'ín Timoteo la ko ch'ín Epafrodito**

<sup>19</sup> Chonhan kíxín tí tsjanjon Ìnchéni Jesús kjuachaxin ntá tjoka tsochr'an ch'ín Timoteo tsjijitsjehe ch'án tí jahará kíxín ntá tsöchàna tsinhan nkexrí tjejorá. <sup>20</sup> Kohya í jnko nkexro chrókjuenkayáxín éxi tí janhan la ko chrókóxakonhen kíxín jahará

chrók'uejorá jína. <sup>21</sup> Kaín tí í so sín tjejá sín tí nkehe tóxrjínhìn sín ó la jehya tí nkehe tóxrjínhìn Jesucristo. <sup>22</sup> **A** ntá jahará ó nohará kíxín ch'ín Timoteo ó kjuakoxin ch'án kíxín jína asén ch'án kíxín jehe ch'án kjuít'akian ch'án xrá kjuakoni tí tan jína. Éxi ijnko xjana xikaha kjuínkítsana ch'án. <sup>23</sup> Mé xikaha tjínkavan tsochr'an ch'án tsjijitsjehe ch'án tí jahará tió tsonóna nkexrí tsji tí xrá kuéntana. <sup>24</sup> La ko kjaxin chonhan kíxín Ìnchéni tsjinkítsana kíxín tjoka tsjasán kjaxinna.

<sup>25</sup> **A** ntá kjaxin tónhen asenná kíxín t'ichjánxín tsochr'an kíchó ni Epafrodito tsjiji ch'án tí tjejorá. Jehe ch'án mé jnkokoá ch'ekoni ch'án xrá kjónté nínkakhenni chojni. Jahará k'uéchr'anrá ch'án ntihi kíxín jehe ch'án tsjinkítsana ch'án kaín nkehe tjínkavan. <sup>26</sup> Imá tóxakonhen ch'án tsjijitsjehe ch'án tí jahará kíxín ó nohe ch'án kíxín tsíkinhínrá kíxín k'uéníhi ch'án. <sup>27</sup> Chaxín k'uéníhi ch'án ó mero chrók'uen ch'án, a ntá Dios kuikonóhehe tí jehe ch'án kjánchó jehya jehó ch'án, kjaxin kuikonóana Dios tí janhan kíxín kánhyó chrók'uavá. <sup>28</sup> Méxra tjínkavan tsochr'an ch'án kíxín ó nóna kíxín tsöcháhará ts'ikonrá ch'án inaá la ko xikaha janhan í kánhyó chrók'uavá. <sup>29</sup> Imá chrókócháhará chrókjuiji ch'án kíxín jehe ch'án mé ijnko kíchó ni tinkáchónki Ìnchéni la ko chrókjuikosáyehérá ch'án éxi chrókjuikosáyehérá kaín tí í so sín éxi jehe ch'án. <sup>30</sup> Jehe ch'án ó mero chrók'uenxín ch'án tí ch'ehe ch'án xrá Cristo. Mé siín kjuaxikaon chrók'uenxín ch'án kíxín jehe ch'án kjuínkítsana ch'án kíxín jahará xitjahya ts'inkará tsjínkítsará tí janhan.

**Tí nkehe chaxín sínci**

**3** **A** ntá ijie, kíchó ni, chrókócháhará kíxín jahará la kuénte Ìnchéni. **A** ntá

tí janhan la xrahya tsokjatee tsokjian tí nkehe ó kjian kixin tíha la chrókjuinkitsa tí jahará. <sup>2</sup>Chróchontará cuidado ti sín ch'e jínahya éxí koniá la tóchrít'ò sín cuérpoé sín. <sup>3</sup>À ntá tí chojni chaxín chóna xroye la mé tí jeheni kixin jeheni chaxín xraxinkakonxínni Dios kjuachaxiën Nchakuen ch'án la ko imá chéheni kixin tinkáchónkini Ìnchéni Jesucristo. Jehya kixin chrókuinkáchónkini kixin tí cuérpoéni chrókóchrínjinni. <sup>4</sup>À ntá janhan kjaxin jína chróntáxrjan kixin chrókóchrít'ò tí cuérpoé chojni. Ninkexró antsí chróchóna kjuachaxin kixin chrókuitekaon tí nkehe a. <sup>5</sup>Janhan mé tsíkana xroye tí k'uéchonta ijní yaon la ko janhan mé tikiníxian tí sín israelita la tsík'axrjeníxinna tí sín tsík'axrjeníxin ch'ín Benjamín la kjaxin janhan mé hebreo la ko t'aná la naná la hebreo sín. La ko janhan mé tinkáchónkia tí ley éxí tinkáchónki tí sín fariseo. <sup>6</sup>À ntá imá k'uéninkakonhan k'uéchonkíha tí sín tinkáchónki Jesús la ko imá kjuíntaxiteyáha tí ley la kohya ninkexró tsontácho kixin chaxínhya tíha. <sup>7</sup>Ntá kaín tíha la tí ósé k'uékjenkayáxian janhan kixin sínkí tíha, a ntá ijie la tinkáchónkia Cristo la ntá tí nkehe k'uékóxrjína k'uékjít'a la ntá jie la ninkehó sínkíhya. <sup>8</sup>La kjaxin kaín xín nkehe t'íkuan éxí chónkó tíha kixin antsí má tjetóan tsochoxián Ìnchéni Jesucristo. Kaín kjuaxrexinkaon jínahya k'uéchonta la kjuíntak'itjáyan kixin ijie ó tinkáchónkia Cristo la kaín xín tí nkehe k'uéchonta la t'íkuan éxí chjínínó ó kixin ntá xíkaha jína chrókjuak'ékian Cristo. <sup>9</sup>Chrókóchána kixin jnkokoá chrók'uejókoni ch'án. Tjéyáhya kixin tí ley chrókjuíinxín ijíeni tí chrókjuinchexiteyéhéni. Náhí. Tinkáchónkia Cristo la tsaáxinni kixin Dios la tsjakjiiín tí ijíeni kixin tinkáchónkini ch'án. <sup>10</sup>Tí nkehe tjínkavan na tsochoxián Cristo la ko tsochonta tí kjuachaxin kjuakoxin ch'án

tíó xechón ch'án la ko tjínkavan tsjasótexinna éxí kjuasóte ch'án la ko kjónté chrók'uénna éxí k'uénxin ch'án <sup>11</sup>kixin ntá tjínkavan tsjácha tsoxechónna inaá.

### Ch'ín Pablo tjinkaon chrókjuacha ch'án

<sup>12</sup>Ntáxrjanhya kixin kjuácha kaín tíha la ko ntáxrjanhya kixin imá ntoá tjén. Kjánchó janhan tjínkavan tsjácha kaín tíha kixin Cristo Jesús mé kjueyána ch'án senó xíkaha. <sup>13</sup>Kíchóni, ntáxrjanhya kixin janhván kjuácha tíha. Náhí. Janhan mé ts'itjáyanna kaín xín tí nkehe ó kúitohe senó la t'ichjánxin kaín asenná tjichráha tí nkehe naxá t'itjáyan tsjácha. <sup>14</sup>Kixin xíkaha ntá chrókjuácha chrók'uayáha kaín tí nkehe jína tsjanjon Dios. Jehé ch'án la sinchexiteyá kaín tíha kixin tinkáchónkia Jesucristo.

<sup>15</sup>Kaínni tí tinkáchónkini Jesús kaín asénni la méxra xíkaha chrókjuenkayáxinni. À ntá tí ókjé nkexrí tjenkayáxinrá la Dios mé nchexraxinkaonrá ch'án kixin ntoáhya tíha. <sup>16</sup>À ntá t'ichjánxin chrók'uejóni éxí tí nkehe ó kjuachani.

<sup>17</sup>Kíchóni, chrók'uejorá éxí kjuak'é janhan la ko chrótsjehérá nkexrí tjejó tí í so chojni tjejóch'e éxí kjuakoni kixin xíkaha kjuakoharáni tí jahará. <sup>18</sup>Nchónhya xrjankaxián senó la ntá xrjanka inaá la imá tsjanka kixin sínn nchónhya sín tjejó sín éxí nínkakonhen sín tí Cristo k'uénxin ntacruz. <sup>19</sup>Tí sín a mé ts'itjáyan sín. Tí dios kuènte sín la mé tí nkehe ntácho asén sín ó la ko tjinkaon sín chrókjuinchehnkekín sín tí nkehe chrókósuèxin sín. Jehó tjenkayáxin sín tí nkehe sínn chjasintajni ó. <sup>20</sup>À ntá jeheni kaín ni la mé chojni kuènte nkajní la tjejóchónhenni kixin ts'inkajinxin nkaya nkajní tí nkexro tsaáxinni, mé Ìnchéni Jesucristo. <sup>21</sup>Ntá jehé ch'án mé tsjinkí ch'án tí cuerpo náxrjónhya chóntani kixin ntá tí cuerpo chóntani tsoyóhé éxí tí cuerpo náxrjón chóna ch'án. Tíha

mé tsoxiteyá kjuachaxiэн ch'án jíé kixin ó chóna ch'án kjuachaxin ts'etuenhen ch'án kaín xín nkehe.

**Jnkochríxín chrókócháhará kixin tinkachónkirá Ìnchéni**

**4** Jahará kichó ni imá tjuahará la ko imá tjínkavan chrókjuasántjahará tí jahará kixin jahará imá nchechànará kixin jahará mé éxí ijnko nkehe ó kjuácha. Méxra jína chrók'uejorá chrókuinkachónkirá Ìnchéni kixin tjuahará kichó ni.

<sup>2</sup>Xrjanóaha tjan Evodia la ko tjan Síntique kixin jnkokoá chrókjuenkayáxin sín kixin jehe sín la jnkokoá kichó sín kixin tinkáchónki sín Ìnchéni. <sup>3</sup>Jaha la jína k'uejóni kjuích'eni xra, méxra xrjanóaha tjínkítsa tí sín chjin kichó ni kixin jnkokoá chrókjuenkayáxin sín. Jehe sín kjaxin kjuích'e sín xra tió kjuakoni tí tan jína tsaáxinni. Koí tí ch'ín Clemente la ko í so sín kjuích'ekoni xra. Tí ihnié sín la ó ts'ínixín ts'ínixín ihnié chojni tsaá.

<sup>4</sup>Nchechéhérá asánrá jnkochríxín kixin tjejókoará Ìnchéni. Ínaá kjatée xrjanka nchechéhérá asánrá. <sup>5</sup>Kaín chojni chrókónohe kixin jahará la chojni jínará. Chróxráinkáonrá kixin í séhya tsokjan Ìnchéni.

<sup>6</sup>Tóxakuanhyará ninkehó. Íchá jína chróchenkará Dios kaín xín nkehe la chrókjuancheherá ch'án kaín nkehe t'ichjánxinhanrá la kjaxin chrókjuancheherá ch'án kjuasáya. <sup>7</sup>A ntá jehe ch'án mé tsotjáhará kjuaxróxin. Jeheni tsjachahyani tienxínni tí kjuaxróxin kuente ch'án kixin imá ijíé tíha. Tí kjuaxróxin mé ts'ayakonhen asánrá la ko ts'ayakonhen tí kjuaxrexinkaon kuéntará kixin jnkokoá tinkáchónkirá Cristo Jesús.

**Tjenkayáxinrá tí nkehe jína**

<sup>8</sup>Méxra tsjixixín tétuanhanrá kichó ni. Tjenkayáxinrá kaín tí nkehe chaxín, la ko kaín tí nkehe kjuasáya, la ko tí nkehe ntoá la ko tí nkehe jína. Mé xíkaha tjenkayáxinrá kaín xín tí nkehe náxrjón la ko tí nkehe tóxrjínhin Dios.

<sup>9</sup>Chrókjuich'erá kaín tí nkehe kjuáko-hará la ko tí nkehe kuínhínrá xrjanka la ko tí nkehe kuétuanhánrá la ko tí nkehe k'uúkonrá kjuít'a, mé kaín tíha chrókjuinchexiteyará la ntá tí Dios tjanjon kjuaxróxin mé ts'ejókoará ch'án.

**Tí ofrenda kjuanjón tí sín filipenses tsjinkítsa sín tí ch'ín Pablo**

<sup>10</sup>Ìnchéni imá nchechàna kixin jahará xráxinkáonrá tí janhan ínaá. Ntáxrjanhya kixin tsík'itjáyanhanrá tí janhan kixin jahará xitjahya k'uejkjínkít-sará tí janhan. <sup>11</sup>Jehya kixin ntáxrjan tíha kixin imá t'ichjánxinna kixin janhan na ó kuánna kjuaxróxin tjén kjónté tí nkehe chonta ó. <sup>12</sup>Janhan ó kuánna tjén kjónté nóana la ko kjaxin ó kuánna tsochonta itsjé nkehe. Kjónté ichrén nkehe ts'átsínka la ó tsjácha kjónté á kjoné jína o náhí la kjónté á chróchonta ichrén nkehe o á chróchontahya ninkehó la ántosénna. <sup>13</sup>Kaín xra tsjácha sít'a kixin Cristo tsjinkítsana. <sup>14</sup>Kjánchó jahará jína kjuich'erá kixin kjuínkítsará kjuánjonrá nkehe t'ichjánxinna.

<sup>15</sup>Tiό sákjuíxian estado Macedonia la kjuankíxian kjuákua tí tan tsaáxinni ínaá la jahorá tí nínko chjasin Filipos ichr'anrá chichaon k'uayáha kixin cháhará kjuákohará itén Dios. <sup>16</sup>Kjaxin tió naxa kjuak'é chjasin Tesalónica la jahará ichr'anrá chichaon iso veces kixin kjuínkítsará tí nkehe k'uihjánxinna ntiha. <sup>17</sup>La jehya kixin tjínkavan kixin jehó nkehe chrók'uayáha. Náhí. Jehí tjínkavan kixin jahará antsí má chrókjuich'erá tí nkehe tjinkaon

Dios kixin ntá antsí chrókjuachará. <sup>18</sup> Ó k'uayáha kaín nkehe tsíkjánjonrá la antsí itsjé chonta. Ó k'uayáha tí nkehe tsíchr'anrá mé tí nkehe kuīkao ch'ín Epafrodito, la kaín tíha la ó tsjácha. Tíha la éxí yóhe ijnko nkehe xraxé náxrjón chróchjehérá Dios mé éxí ijnko iko chrók'oyánrá imá chrókóxrjínhín ch'án. <sup>19</sup> Tí Dios kuèntana mé tsotjáhará kaín xín nkehe naxa t'itjáyan tsákjára kixin chóna ch'án kaín xín nkehe imá náxrjón tjete la tsjanjon ch'án kixin jahará la tinkachónkirá Cristo Jesús. <sup>20</sup> Kjuasáyé

It'éni Dios jnkochrín. Mé xikaha tsoxiteyá. Amén.

**Tsjixixín nixja ch'ín Pablo**

<sup>21</sup> Janhan tjínkavan tsonixjehérá kaín tí sín tinkáchónki Dios la ko Jesucristo ntiha. Tí sín kichó ni tjejókoni ntihi nixjahará sín. <sup>22</sup> Kjaxin kaín tí sín tinkáchónki Dios la ko tí sín ch'ehe xra tí ch'ín t'etoan romano mé nixjahará sín. <sup>23</sup> Tjáncháha kixin Ìnchéni Jesucristo mé chrókjuintayaonrá ch'án kaín rá. Amén. Ó tjen.

## Tí xroon tsíkjin ch'ín Pablo chr'énhen ch'án tí sín chjasin Colosas

### Ch'ín Pablo ikjin xroon k'uáyéhe tí nínko chjasin Colosas

**1** Janhan Pablo tsfkjeyána Jesucristo t'aha ch'án xra kixin xikaha tjinkaon Dios, la ko kichó ni Timoteo <sup>2</sup> mé ikjinni tí xroon i tsochr'ánharáni tí jahará tsfkjinchetjóará Dios la ko kuftékáonrá Jesucristo tjejórá chjasin Colosas. Kjuasáyé It'éni Dios chrókujuntayaonrá kixin kjuaxróxin chrók'uejórá.

### Ch'ín Pablo tjanchehe ch'án Dios kjuasáya kixin kaín tí sín tinkáchónki Cristo

<sup>3</sup> Jnkochríxín tjancheheni kjuasáya Dios la ko tjanchiani kixin chrókujinkitsa ch'án tí jahará mé jehe ch'án It'é Ìnchéni Jesucristo. <sup>4</sup> Ó kuínhinni kixin jína tinkachónkirá Ìnchéni Jesucristo la ko tjuèhérá kaín tí sín ó tsíkjinchetjóá Dios. <sup>5</sup> Mé xikaha tjejóchonhérrá kixin ts'ayéhérrá tí nkehe chóna Dios tjen nkaya nkajní. Jahará la xikaha tjejóchonhérrá kixin tjejótinhírrá tí tan chaxín kuènte Dios tsaáxinni. <sup>6</sup> Tí tan i mé kuínhin chojni la itsjé sín tinkáki tekaon sín la tinkák'ánkí tí kjuachaxin kuènte Dios kuenté chjasintajni. Mé xikaha kónhen tió kuínhírrá la ko kuftékáonrá kixin chaxín tjuahará Dios. <sup>7</sup> Tíhi mé kjuakohará kichó ni Epafra. Jehe ch'án la jnkokoá kjuích'ekoni ch'án xra kixin jehe ch'án la jína ch'ehe ch'án xra Cristo kixin xikaha tjinkitsa ch'án tí jahará. <sup>8</sup> Jehe ch'án mé kui ch'án ntihi chrónka ch'án nkexrí tjuèhérá kíchuará kixin Nchakuen Dios tjinkitsa tí jahará.

<sup>9</sup> Méxra xikaha tí yaon tió kuínhinni nkexrí tjejórá la títoehyani tjancheheni

Dios kixin tsjinkitsa tí jahará kixin tsonohará jína nkexrí tóxrjínhin ch'án la ko tjanchiani kixin tsjanjon ch'án kjuachaxin kixin tsiénxinrá kaín nkehe kuènte ch'án. <sup>10</sup> Tjancheheni ch'án kixin jína chrók'uejórá kixin tinkachónkirá Ìnchéni la ko chrókuítóéhyará chrókujich'erá éxí tóxrjínhin tí jehe ch'án. Ntá jína chrókjuachará chrókujich'erá xra kuènte ch'án la ntá chrókónohará jína nkexrí tjen Dios. <sup>11</sup> Tjanchiani kixin jehe ch'án chrókujinkitsa kixin chrók'uejórá fuerte kixin tí kjuachaxin jíé kuènte ch'án kixin ntá chrókjuachará la kjónté ichrén nkehe chrókónhanrá la chrókóninkákonhyará. <sup>12</sup> La ko chrókócháhará chróchjehérrá kjuasáya It'éni Dios kixin kjuanjon ch'án kjuachaxin kixin ts'áyéheni tí nkehe tí tjen tí t'inkaséyan mé tí nkehe ts'áyéhe kaín tí sín tsíkjinchetjóá tí jehe ch'án. <sup>13</sup> Jehe ch'án mé kuakitsjekjanxínni ch'án tí sítié la ntá kjuanjon ch'án kjuachaxin ts'ejóni tí t'etoan tí Xjeen ch'án, tjuèhe ch'án. <sup>14</sup> Jehe ch'án kjuínchekaáni ch'án kixin k'uenyákonhenni ch'án la tí ijnié ch'án mé kjuenka ch'án tí tjiéni.

### Kjuaxróxin ts'ejókoni Dios kixin k'uenyákonhenni Cristo

<sup>15</sup> Éxí tsjehe Cristo mé xikaha tsjehe Dios kjónté xitjahya t'ikonni tí jehe ch'án. Cristo la ó xráxín tjen tí naxa t'ónahya ninkehó. <sup>16</sup> Kjuachaxién tí jehe ch'án kjuích'éanaxín Dios kaín tí nkehe síin nkajní la ko chjasintajni la ko kaín tí nkehe naxa t'ikonhyani la ko tí nkehe ó t'ikonni. Kjaxin kaín tí sín ángel t'etoan la ko chóna kjuachaxin la mé jehe ch'án kjuích'éna ch'án kixin sich'ehe sín ch'án xra. <sup>17</sup> Cristo la ó xráxín tjen kjónté naxa t'ónahya ninkehó la jehe ch'án t'ayakonhen ch'án kaín nkehe síin kixin tí kjuachaxin

kuènte ch'án. <sup>18</sup>La kjaxin jehe Cristo mé tí kja t'etuenhen tí cuerpo mé tíha mé tí nínko. Jehe ch'án senó xechón ch'án kixin jehe ch'án mé ts'etuenhen ch'án kaín nkehe síin. <sup>19</sup>Dios tjinkaon chrókhjéhe ch'án tí Xjeen ch'án kjuachaxin éxi tí kjuachaxin chóna tí jehe ch'án. <sup>20</sup>Kjaxin tjinkaon Dios kixin kjuachaxién Cristo chrók'uixin kjuaxróxin nkuíxín mé chjasintajni la ko nkaya nkajní. Mé xikaha tsjasin ch'án kjuaxróxin kixin jehe ch'án kjuák'enkáni ch'án ntacruz ik'uén ch'án.

<sup>21</sup>Jahará la ósé ikjín k'uék'ejorá la k'uéninkákonhénrá Dios kixin tí nkehe jínahya k'uékjich'erá. A ntá jie la kjuaxróxin tjejokoará Dios <sup>22</sup>kixin k'uenyákonhánrá Cristo, kjuasóte tí cuérpoé ch'án. Mé xikaha kónhen ch'án kixin ntá tsjanjon ch'án tí jahará ts'áyéhe Dios kixin kjuíntatjóará ch'án, a ntá jie la chontahyará ninkehó jie. <sup>23</sup>Méxra xikaha chrókuítóéhyará chrókuinkachónkirá Ìnchéni la ko chrókuítóéhyará tí nkehe tjejochonhénrá kixin ó kuinhínrá tí tan tsaáxinni. Tí tan i mé ó chrónka chojni kuenté chjasintajni la ko janhan Pablo kjaxin tjínkítsa xrjanka xikaha.

### Ch'ín Pablo ch'e ch'án xra kuènte nínko

<sup>24</sup>Méxra ijie la tjasótexinna kixin tí jahará la chàna kixin xikaha mé tsjintaxín tjasóte janhan kixin tí nkehe t'itjáyán tí naxa chrókjuasóte Cristo kixin jehe ch'án mé kjuasóteyákonhen ch'án tí nínko mé tí cuérpoé ch'án. <sup>25</sup>Mé xikaha Dios kjuéyána kixin sit'a xra kuènte nínko kixin xikaha tí xra k'uetuanna ch'án kixin ntá jína chrók'uejoxínrá tí jahará kixin chrókjuintaxín chróxrjankaxián tí itan kuènte Dios. <sup>26</sup>Tí nkehe ninkexró k'uénoehya tjemá ósé nchónhya nánó a ntá ijie kjuínchenohe Dios kaín tí sín tinkáchónki tí jehe ch'án.

<sup>27</sup>Dios tjinkaon chrókjuinchenohe tí jehe sín tí nkehe tjemá náxrjón tjehe ts'áyéhe tí sín jehya judío ijie. Tí nkehe k'uénoehya chojni la mé Cristo tjejókoará la jehe ch'án mé tjanjon kjuachaxin ts'ejochonhénrá ts'ayéhérá tí kjuachaxin jíé kuènte ch'án.

<sup>28</sup>Jeheni mé chronkaxínni nkehe kuènte Cristo la nchexraxinkaonni kaín chojni la ko tjakoheni sín kixin chrókuienxín sín jína. Ntá jnkojnko sín chrók'uánkí kjuaxrexinkaon kuènte sín kixin tinkáchónki sín ch'án. <sup>29</sup>Méxra xikaha tí xra it'a la kaín asenná it'a xra tí kjuachaxién chjina Cristo.

**2** Tjínkavan chrókónohará kixin nchónhya xra kjuít'a kixin chrókjuínkítsa tí jahará la ko kjaxin tí sín tjejó chjasin Laodicea la ko kaín tí í so sín naxa t'ikonhya tí janhan. <sup>2</sup>Tjínkavan kixin jehe sín chrókóchéhe asén sín la ko jnkokoá chrókjuenkayáxin sín chrótjuéhe sín kichó sín. Mé xikaha chrók'uánkí kjuaxrexinkaon kuènte sín chrókuienxín sín jína kixin ntá chrókónohe sín tí nkehe ninkexró k'uénoehya kuènte It'éni Dios, mé Cristo tíha. <sup>3</sup>Jehe ch'án chóna kaín xín kjuaxrexinkaon kuènte Dios la jehe ch'án mé nohe ch'án kaín nkehe. <sup>4</sup>Kaín tíha xrjanka kixin ntá ninkexró chrókjuít'ayahyará tí jahará kixin tí náxrjón chrónixja sín ó. <sup>5</sup>Kjónté tjenhya tí cuerpo kuèntana tí tjejorá la ntá nchakuenná la mé tjen ntiha kixin xráxinkavan tí jahará la chàna kixin t'ikuán kixin jína tjejorá naxa tinkachónkirá Cristo.

<sup>6</sup>Méxra xikaha kuinkachónkirá Ìnchéni Jesucristo la mé xikaha jnkokoá chrókjuenkayáxinkoará tí jehe ch'án. <sup>7</sup>Éxi ijnko nta tsíkji nuéé nínka mé xikaha chrókuinkachónkirá tí jehe ch'án éxi kjuakohará ch'án la ko chrókjuanchehérá Dios kjuasáya jnkochrín.

### Cristo tjanjon ijnko ntja nixin

<sup>8</sup>Chrókuítóéhyará kixin ninkexró chrókjuít'ayahará kixin tí nkehe ntoáhya chrókjuakohará sín. A ntá jehe sín chrónkahya sín éxí tjinkaon Cristo. Náhi. Tjako sín tí nkehe tjenkayáxin chojni chjasintajni ó la ko tjako sín tí kjuachaxin kuènte tí nkehe jínahya síin chjasintajni.

<sup>9</sup>Kaínxín kjuachaxin chóna Dios mé chóna Cristo chjónké k'óna ch'án chojni. <sup>10</sup>La jahará chontará kaín kjuachaxin kuènte Dios kixin ó tinkachónkirá Cristo. Jehe ch'án t'etuenhen ch'án kaín nkehe síin la ko t'etuenhen ch'án kaín nchakuen t'etoan. <sup>11</sup>Kjaxin tió kjuankíxinrá tinkachónkirá Cristo ntá jehe ch'án kjuanjon ch'án jnko xroye k'uayéhéra kjánchó jehya tí xroye kuènte tí cuerpo. Náhi. Kjuakjiin ch'án tí jie k'uékóxrjínhanrá la kjuíntakaará ch'án, mé tíha mé tí xroye kjuanjon Cristo. <sup>12</sup>Tí kuíkiterá jahará mé xikaha éxí xravákoará Cristo. Ntá ó xechón tí jehe ch'án la kjaxinrá xechónrá kixin ó kuítekáonrá tí kjuachaxin kuènte Dios kixin Cristo la ó xechón ch'án inaá. <sup>13</sup>Jahará ósé la éxí tsík'en asánrá k'uék'ejorá kixin tí jie k'uéchontará kixin k'uéchonhyará Dios la k'uéchontahyará xroye kuènte ch'án. A ntá ijie la éxí xechónrá kixin Cristo kjuatsen tí jie chontará. <sup>14</sup>Mé Dios kjuatsen ch'án kaín tí nkehe tsík'etoan ch'án ósé kjuachahyani nchexiteyáni la ko kjuatsen ch'án kaín tí jie k'uéchóntani kixin Cristo kjuák'enkáni ch'án tí ntacruz la xikaha kjuatsenxin ch'án tíha. <sup>15</sup>Cristo k'uenyákonhenni ch'án la ntá kjuachaxin kuènte Dios kjuacha la kjuachahya ninkehó tí kjuachaxin k'uéchóna tí nchakuen jínahya kixin jehe ch'án kjuínchesuèhe ch'án tí sín jínahya noxín kixin jehe ch'án mé kjuacha ch'án.

### Tjéyará tí nkehe síin nkaya nkajni

<sup>16</sup>Méxra ninkexró chrókjontahyará kixin tí nkehe chrókjónterá o tí nkehe chrók'uirá o á tjikosáyehéra tí yaon kia o tí nitjó nixin o tí yaon t'ok'éheni. <sup>17</sup>Kaín tí nkehe a la ó tóyóhó tí nkehe itsi. A ntá tí nkehe chaxín la mé Cristo tíha. <sup>18</sup>Méxra chrókuítóéhyará kixin ninkexró chróntácho sín kixin ts'itjáyanrá kixin tinkachónkihyará tí sín ángel, tsixro sín. Tí sín a mé chrónkaxín sín tí nkehe éxí kotáchrién sín t'ikonxín sín la nchehnke sín kixin tí nkehe t'axrjeníxin kja sín ó. <sup>19</sup>A ntá jehe sín la chaxínhya tinkáchónki sín Cristo kixin jehe ch'án mé tí kja t'etuenhen kaín ni la jehe ch'án mé ch'éna ch'án jnkokoá cuerpo kuènte ch'án kaín ni la nchek'ánkí ch'án tí cuerpo kixin jehe ch'án t'ayakonhenni ch'án kixin xikaha tjinkaon Dios.

<sup>20</sup>A ntá jahará la ó k'uénkoará Cristo la kuitohéra tí nkehe k'uék'etoan kuènte chjasintajni ó. ¿A ntá nkekuènté naxa tjejorá éxí tí chojni síin chjasintajni chrókjuínchexiteyará tí nkehe t'etoan sín? <sup>21</sup>Mé xikaha t'etoan sín kixin jahará chrótsehyará tíha la chrókjóntehyará tí nkehe la chrókuákjáhhyará nkehe. <sup>22</sup>Kaín tí nkehe ntáchro sín mé nixja kuènte tí nkehe tsjeje la tíha mé t'axrjeníxin ikja chojni ó. <sup>23</sup>Chaxín kixin jehe sín ntáchro sín kixin jína xikaha sinchexiteyá sín kixin tinkáchónki sín tí sín ángel la nchehnkehya sín la ko itsje nkehe ch'ehe sín cuérpoé sín, kjánchó kaín tí nkehe ch'e sín xikaha la chónkó kixin tjinkítsahya kixin chrókuítóhe sín tí nkehe ntoáhya tjenkayáxin sín.

**3** A ntá tí jahará la ó tsíxechónkoará Cristo. Méxra chrókjuéyará tí nkehe síin nkaya nkajni kixin Cristo la ntiha tjetjaxín ch'án tí tja chjina Dios. <sup>2</sup>Chrókjuenkayáxinrá tí nkehe síin nkaya nkajni. Chrókjuenkayáxinhyará

tí nkehe síin chjasintajni. <sup>3</sup>Kíxin jahará la ó ik'uenrá la ntá ijie la Cristo la ko Dios chóntehe tí kjuachón kuèntará. <sup>4</sup>Jehe Cristo mé chontaxínrá kjuachón jahará la tió tsokjan tí jehe ch'án ntá kjaxínrá ts'ejókoará ch'án ntá ts'íkonrá tí kjuachaxin jìe kuènte ch'án.

### Tí ntja ntaxin la ko tí ntja nixin

<sup>5</sup>A ntá chrókuìtohèrá kaín tí jie tjenkayáxinrá chjasintajni. Ninkexró chrókjuasinko jie chojni chjin ókjé, la ninkexró chrókuich'e nkehe jínahya, la ko ninkexró chrókuich'e ninkehó tí nkehe ntáchro asén sín, la ko kjaxin chrócoxrxjjenhya sín chróchónta sín itsjé nkehe kíxin tíha mé yóhe tí chrórxaxinkaon sín tí nkehe tsíkjanoya. <sup>6</sup>Méxra tí nkexro titekakonhya tí nkehe t'etōan Dios la tsonínkakonhen Dios tí jehe sín la sinchekjasóte sín ch'án. <sup>7</sup>Mé xikaha k'uékjich'erá jahará tí ósé. <sup>8</sup>Méxra ijie chrókuìtohèrá kaín tí kjuanínkaon la ko tí nkehe tjak'e asánrá la ko tí nkehe jínahya la ko tí t'antaxínhínrá kíchuará la ko tí nkehe jínahya t'axrxjín ir'vará. <sup>9</sup>Chrókuich'iyéhyará kíchuará kíxin ósé xikaha k'uékjich'erá a ntá jie la ó chrókuìtohèrá kaín tí nkehe ntaxin k'uékjich'erá. <sup>10</sup>A ntá jie la ó tsík'ónará ijnko chojni nixin. Dios tinkánchetjórará ch'án kíxin ts'ónará éxí tí jehe ch'án kíxin jehe ch'án kjuich'èna ch'án tí jahará. Mé xikaha chrókuixraká chróchoxínrá tí jehe ch'án jína. <sup>11</sup>Jehya tjetōan á chojni judío o náhí o á chojni tsíka xroye o náhí o á chojni tsíkjin kjin o náhí o á chojni noehya o á chojni ch'exón xra o á chojni t'etōan. Tí nkehe tjetōan la tinkáchónkini Cristo la jehó ch'án t'etūenhen kaín nkehe.

<sup>12</sup>Dios la tjuèhe ch'án tí jahará la tsíkjayará ch'án kíxin tsinkachónkirá ch'án. A ntá jahará la ó k'ónará ijnko chojni nixin la chrókuikonóhèrá

kíchuará la jína chrók'uejorá la ko chrókuinchehnkehyará la ko chrókójjahyará la ko chrókóninkákonhyará. <sup>13</sup>Chrókóninkákuènyará

kíchuará la chrók'uitjáyānhanrá ichrén jie kjuasinhánrá í jnko chojni kíxin Cristo la k'uitjáyēnhen ch'án tí jie kjuásinrá la kjaxin jahará la xikaha chrókuich'erá. <sup>14</sup>Mé xikaha chrótjuèhèrá kíchuará la jnkokoá chrókujenkayáxinrá. <sup>15</sup>Tí kjuaxróxin kuènte Cristo mé chrók'uetūenhen asánrá kíxin xikaha kjuenkayáxin Dios k'uíyāhará ch'án kíxin chrók'ónará jnkokoá cuerpo kuènte ch'án mé xikaha chrókuancheherá ch'án kjuasáya.

<sup>16</sup>Tí tan kuènte Cristo jnkochrínxín chróchónta asánrá. Mé xikaha chrókuákohèrá kíchuará la chrókuinchechéhèrá kíchuará kaín kjuaxrexinkaon jína. Chrótsjerá salmo la ko himno la ko canto kuènte Dios la chrókuancheherá Dios kjuasáya kaín asánrá. <sup>17</sup>Kaín xra chrókuich'erá la ko tí nkehe chróntáchrórará la kaín táha chrókuanchaxínrá ihnié Ìnchéni Jesús la chrókuancheherá kjuasáya It'éni Dios kjuachaxiēn Jesucristo.

### Jnkójina chrók'uejoko kichó tí sín tinkáchónki Cristo

<sup>18</sup>Jahará chojni chjin la chrókuinchesiteyéhèrá tí xiyará kíxin mé t'ichjánxin xikaha chrókuich'erá kíxin tinkachónkirá Ìnchéni. <sup>19</sup>Jahará chojni ntoa la chrótjuèhèrá tí ichjiánrá la chrókóninkákuènyará tí jehe tjan. <sup>20</sup>Jahará chánjanrá la chrókuinchesiteyéhèrá it'ará la ko ìnará kaín nkehe chrók'uetōan sín kíxin xikaha mé tóxrjínhìn Ìnchéni. <sup>21</sup>Jahará it'é xjan la chrókuinchekónínkakonhyará tí xjaanrá kíxin tí xikaha la chrókuinchek'ávāhyará tí jehe xjan. <sup>22</sup>Jahará chojni ch'exón xra chrókuinchesiteyéhèrá tí lámōará ntihi



chjasintajni. Jehya kixin tí tjejótsjehe sín ó chrókjuich'erá xṛá kixin ntá jína chrók'uejoxinrá. Náhí. Kaín asánrá chrókjuich'erá xṛá kixin ó nohará kixin xikaha ch'eherá Ìnchéni xṛá. <sup>23</sup> Kaín nkehe chrókjuich'erá la kaín asánrá chrókjuich'erá xṛá éxí chrókjuich'eherá xṛá Ìnchéni la jehya kixin éxí chojni ó chrókjuich'eherá xṛá. <sup>24</sup> Ó nohará kixin Ìnchéni la sintakitonhanrá tí nkehe chóna ch'án kixin jahará ch'eherá Cristo xṛá la jehe ch'án mé chaxín Ìnchéni. <sup>25</sup> A ntá tí sín ch'e tí jínahya tsjacha sín tí nkehe jínahya kjuich'e sín kixin Dios la tikonóehya ninkexró ch'e tí nkehe jínahya.

**4** Méxṛa jahará lámorá la jína chrónixjehérá tí sín t'ahará xṛá. Chróxráxinkáonrá kixin kjaxinrá jahará chontará ijnko Dios tjen nkaya nkajní.

<sup>2</sup> Chrókuitoéhyará nixjehérá Dios la ko chrókjuanchehérá ch'án kjuasáya. <sup>3</sup> Kjaxin tjanchehérá ch'án tsjinkitsa tí jeheni kixin tsjanjon Ìnchéni kjuachaxin chrókuinhin chojni tsochrónkaxínni tí itén Cristo. Tí xṛá k'uénoehya ninkexró mé tjéchjinaxián jie. <sup>4</sup> Tsjanchehérá Dios kixin tsjinkitsa ch'án tí janhan kixin chrókiānxīān jína chrókjuākua éxí tjinkaon Dios.

<sup>5</sup> A ntá jahará la jína chrókjuākohérá itén Dios tí sín naxá tinkáchónkihya Ìnchéni kixin kánhyó tiempo síin kixin tsjàkorá. <sup>6</sup> Chrónixjehérá sín jnkójina kixin chrókóxrjínhin sín la chrókónohará chrókjuáteherá nkexrí tsixro jnkojnko chojni.

### Kjuixin nixja ch'ín Pablo

<sup>7</sup> Kíchóni Tíquico, mé ijnko nkexro jína tjinkitsa tí janhan ch'ehe Ìnchéni xṛá, mé tsjiji ch'án tsochrónka ch'án nkexrí tjén janhan. <sup>8</sup> Méxṛa kuétuanhan ch'án tsjiji ch'án tí tjejórá kixin tsonohará kixin nkexrí tjejóni kixin chrókócháhará. <sup>9</sup> Jehe ch'án la ko kjaxin

ch'ín Onésimo mé tjuèheni kíchó ni la ko jehe ch'án mé kjaxin jína ch'e ch'án xṛá, la mé tsjijitsjehe sín tí jahará. Jehe ch'ín Onésimo mé sín chjasánrá. Jehe sín mé tsochrónka sín kixin nkehe sítónhen tí tjejóni ntihi.

<sup>10</sup> Ch'ín Aristarco mé jnkokoá tjechjinakian ch'án ntóechiso mé nixjahará ch'án la ko kjaxin ch'ín Marcos mé tí ch'ín a mé naxá kjéhya ch'án ch'ín Bernabé. Ó nohará chrók'uayakonhénrá tí ch'ín Marcos tí tsjijitsjehe ch'án tí jahará la chjehérá ch'án kjuachaxin tsjak'e ch'án jína. <sup>11</sup> Kjaxin nixjahará ch'ín Jesús, kjaxin tikitexín sín ch'án Justo. Jehó tí sín a mé sín judío tinkáchónki Cristo, a ntá ijie tjinkitsa sín tí xṛá tjét'a la chrónkaxín sín nkehe kuènte tí kjuachaxin kuènte Dios. La tí sín a mé imá kjuínchechàna sín tí janhan. <sup>12</sup> Ch'ín Epafras nixjahará ch'án. Mé jehe ch'án ch'ehe ch'án xṛá Cristo la jehe ch'án mé sín chjasánrá. Jehe ch'án jnkochríxín chrónóehé ch'án Dios tjinkaon ch'án kixin kaín asánrá chrókuinkachónkirá Dios éxí tjinkaon ch'án. <sup>13</sup> Ó nòna kixin ch'ín Epafras la tóxakonhen ch'án kixin tí jahará la ko tí sín tjejó tí chjasin Laodicea la ko Hierápolis. <sup>14</sup> Ch'ín Lucas, mé tí ch'ín ch'e xroān, la kjaxin nixjahará ch'án la ko kjaxin ch'ín Demas nixjahará ch'án.

<sup>15</sup> Nixjehérá tí sín kíchó ni tjejó chjasin Laodicea la kjaxin nixjehérá tjan Ninfas la ko tí sín tójnkotsé ntóe tjan. <sup>16</sup> Tió tsjixin sinchekuáxinrá tí xroon tsíkjiji tí tjejórá ntiha la ichr'anrá xroon sátsji sinchekuáxin tí sín tjejó nínko chjasin Laodicea la ko kjaxin sinchekuáxinrá tí xroon tsíkjijihí tí jehe sín tió tsjiji tí xroon tí tjejórá. <sup>17</sup> Kjaxin chenkará ch'ín Arquipo kixin chrókjuinchexiteyá ch'án jína tí xṛá tsíkjanjon Ìnchéni sich'e ch'án.

<sup>18</sup> Janhan Pablo tjaná kjinxiān tí palabra nixjahará. Jahará chróxráxinkáonrá kixin janhan la

tjéhjina la Dios mé chrókjuintayaonrá.  
Amén. Ó tjen.

## Xroon saoxín ikjin ch'ín Pablo chr'énhen ch'án tí sín tinkáchónki Cristo chjasin Tesalónica

### Ch'ín Pablo nixjehe ch'án tí sín Tesalónica

**1** Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kíchó ni nínko chjasin Tesalónica kixin jnkokoá tinkáchónkini It'éni Dios la ko Ìnchéni Jesucristo. Kjuasáyé It'éni Dios la ko Ìchéni chrók'uejorá.

### Tí sín ókjé chjasin mé kjuíncheyóhe sín tí sín Tesalónica

<sup>2</sup>Jnkoyaxón chjéheni Dios kjuasáya la ko t'ákjenxinni tí jahará kaín rá kixin jehe ch'án mé chrókjuinkítsa ch'án tí jahará. <sup>3</sup>Tió nixjeheni It'éni Dios xraxinkaonni kixin kaín asánrá kuítekáonrá Ìnchéni, a ntá tjejoch'erá xra la ko imá tjuèhérá kichuárá ntá jnkokoá tjejochonhénrá tsokjan Ìnchéni Jesucristo. <sup>4</sup>Kíchóni jahará, imá tjua-hará Dios la ó noheni kixin jehe ch'án tsíkjeýará ch'án tí jahará. <sup>5</sup>Na mé xíkaha tió kjuíjini chjasánrá kjuakoharáni tí tan jína nixin tsaáxinni chrónkani na jehya iténni ó. Náhí. Kjaxin kjuachaxién Nchakuen Dios kjuakoxinni la ko tí Nchakuen Dios mé kjuínchenoheni kixin tí itan kjuakoni la chaxín ntoá. Jahará la ó nohará jína kixin nkexrí k'uejóni tí tjejorá kixin xíkaha chrók'uejorá chrókjuakoxinrá.

<sup>6</sup>Mé xíkaha kjuíncheyóhérá tí jeheni la ko kjuíncheyóhérá tí Ìnchéni Jesucristo. A ntá tió kuínhínrá tí itén Dios ntá kaín asánrá kuinkachónkirá Ìnchéni la ko kócháhará kixin tí Nchakuen Dios mé t'etuenhen asánrá kjónté nchónhaya nkehe k'uatsínkará. <sup>7</sup>Mé xíkaha

kjuakuexinrá kaín tí sín tinkáchónki Ìnchéni ntilha estado Macedonia la ko tí sín estado Acaya. <sup>8</sup>Jahará kjuakoxinrá tí itén Dios la jehya jehó estado Macedonia la ko tí estado Acaya kjuakoxinrá. Náhí. Na mé kaín chjasin chjinaxón ntilha kuínhin sín kixin nkexrí tinkachónkirá Dios. A ntá jeheni na í t'ichjánxinhya í jnko nkehe naxa chróchronkani, <sup>9</sup>kixin ijie jehe sín mé tjejóchronka sín kixin nkexrí kjuíjini chjasánrá a ntá kaín rá kjuánjonrá kjuachaxin k'uejóni la ko kuítekáonrá tí itén Dios kjuakoharáni la ntá kuítóhérá kaín tí nkehe tsíkjanoya kixin ntá kjuankíxinrá kuinkachónkirá Dios tjechón chaxín. <sup>10</sup>La ko kjaxin tjejóchronka sín kixin jahará tjejochonhénrá tsokjanxin nkaya nkajni tí Xjeen Dios na mé Jesús. Ó kjuínchexechón Dios tí Xjeen ch'án Jesús ntá jehe ch'án mé sinchekaáni kixin chrókjuasó-textínhyani tí nkehe jínahya chrókjuasó-textínni itsi.

### Tí xra tsíkjich'e ch'ín Pablo tí chjasin Tesalónica

**2** Kónohará kaín rá kíchó ni kixin jehya chónkó kjuíjini chjasánrá. <sup>2</sup>Ó kónohará kixin senó tí sín chjasin Filipos k'uekjinchekjasóteni sín la ko k'uek'ántaxínhinni sín. Kjánchó Dios mé kjuínkítsa ntá chrakonhyani kjuakoharáni tí tan tsaáxinni kuente Dios kjónté imá k'ueínkakonhenni sín. <sup>3</sup>Kónohará kixin jehya ntoáhya kjuakoharáni la ko jehya ijnko nkehe náxrjónhya kjuakoni la ko kjuít'ayahyaráni ninkehó. <sup>4</sup>Náhí. Dios mé kjueyá ch'án tí jeheni kixin chrókjuakoni tí tan tsaáxinni, mé xíkaha ntoá tjakoni. Jehya kixin chojni ó nchechéheni. Náhí. Nchechéheni Dios tí nkexro nohe nkehe tónhen asénni. <sup>5</sup>Ó nohará kixin kjuích'iyaxínhyani itan imá náxrjón kixin xíkaha chrókuak-itsjexínni chichaon chrókjuachani.

Náhí. Dios la ó nohe ch'án kixin xikahya kjuich'eni. <sup>6</sup>Tjeyáhyani kixin chojni chrókjuikosáyeheni sín la á jahará la o í so chojni. Náhí, xikahya ch'eni, kjónté chóntani kjuachaxin chrók'uetuanhanráni kixin chrókjuánjonrá nkehe chrók'uáyéheni kixin jeheni nch'eheni xra Cristo. <sup>7</sup>Jnkojína k'uénixjaharáni k'uék'ejóni. Éxí yóhe ijnko iné xjan t'ayakonhen xjeen kixin ts'ánkí xjan mé xikaha jeheni k'uáyakonhanráni tí jahará. <sup>8</sup>Imá tjuàhará ntá jehya jehó tí itén Dios chrókjuakoharáni. Náhí. Kjónté chrók'uénxínni tí tjakoharáni kixin xikaha imá tjuàhará. <sup>9</sup>Kíchóni, chrórxaxinkáonrá kixin tió k'uéjóni chjasánrá la mé nchónhya xra kjuich'eni nchakotjin la ko tie ntá kjuachani chichaon k'uénaxínni nkehe sineni kixin tjinkakonhyani kixin chrótjáharáni xra chrókjuánjonrá nkehe chrókjoneni nachrohe k'uejóni ntiha kjuakoharáni itén Dios.

<sup>10</sup>Jahará la ó nohará la ko ó nohe Dios kixin chaxín jína k'uéjokoaráni jahará chojni tinkáchónki Ìnchéni. Nijnko nkexro ts'ekahyani jie kixin ichrén nkehe jínahya chrókjuich'eni. <sup>11</sup>Jahará ó nohará kixin kjuakoharáni la ko kjuínchechéheni tí jahará jnkojnkora éxí ch'e ijnko it'é xjan tjuèhe xjeen ch'án. <sup>12</sup>La ko k'uetuanhanráni kixin jína chrók'uejorá éxí tjinkaon Dios chrók'uejó tí sín tinkáchónki ch'án kixin jehe ch'án ó k'uíyahará ch'án kixin chrók'uayéherá tí kjuachaxin kuènte ch'án.

<sup>13</sup>Méxra jnkochríxín tjancheheni Dios kjuasáya kixin tió kuínhínrá tí tan jína kuènte ch'án kjuakoharáni na ntá kjuátsoanrá kixin chaxín tí tan jína kuènte Dios ntá jehya tan kuènte chojni a ntá kaín rá ó kuítekáonrá tí tan a ntá k'uíxitóxin ntíará. <sup>14</sup>Mé xikaha jahará kíchó ni kjuasótiará kónínkakon-

hanrá tí sín chjasánrá éxí yóhe kónhen tí sín kuènte Dios tinkáchónki Ìnchéni Cristo Jesús tí estado Judea kixin tió kjuankixin kuinkáchónki sín Ìnchéni ntá tí sín judío chjasén sín mé kjuankixin sín kónínkakonhen sín chrók'óyán sín. <sup>15</sup>A ntá tí sín judío a mé tsík'óyán sín Ìnchéni Jesús la ko tsík'óyán sín tí sín tsíchronka tí itén Dios ósé la xikaha kjaxin k'uinkíténi sín. A ntá xikaha kjuich'e sín la kónínkakonhen sín kaín chojni. A ntá Dios la kóxrjjenhya ch'án kixin xikaha kjuich'e sín. <sup>16</sup>A ntá tjinkaonni kixin chrókjuakoheni tí sín jehya judío tí tan jína chrókuaáxin sín a ntá tí sín judío tjinkakonhya sín chrókjuakoni. Na mé xikaha imá nchek'ánkí sín tí jie kuènte sín. A ntá xikaha kjuich'e sín ntá Dios sinchekjasóte ch'án tí jehe sín.

### Ch'ín Pablo tjinkaon ch'án sáchrókjuitsjehe ch'án inaá tí sín chjasin Tesalónica

<sup>17</sup>Kíchóni, tió kuítóheni tí jahará a ntá kjónté ókjé k'uéjóni la k'uérxaxinkaonni kaín asénni tí jahará la ko imá tjinkaonni chrókjuijitsjeheni tí jahará inaá. <sup>18</sup>Na mé xikaha janhan Pablo itsjé veces mé tjínkavan chrókjuasántsajahá tí jahará, a ntá tí ch'ín Tsochren mé k'uínkakónna ntá xitjahya tsjasán. <sup>19</sup>¿Nkehe tsonhen tí xra tjejóch'eni tjejóchóenxinni la ko nkekuènte tjejóchéheni? Jahará mé tsochèxínni tió tsi Ìnchéni Jesucristo kixin kuítekáonrá ch'án. <sup>20</sup>Méxra jahará mé kóchèxinni kixin kuítekáonrá.

**3** Ntá imá kóxakonhenni. Ntá kjuenkayáxinni kixin chrókójína jehóni chrókuítóheni chjasin Atenas <sup>2</sup>na ntá ichr'ánni tí kíchó ni Timoteo a tsjijitsjehe ch'án tí jahará kixin kjaxin ixra kuènte Dios tjech'e ch'án tjejókoni ch'án tjako ch'án tí tan kuènte Cristo tsaáxinni. Ntá ichr'ánni ch'án kixin sintaxraxinkaonrá ch'án tí itén

Ìnchéni la ko sinchechéhe ch'án asánrá<sup>3</sup> kixin tsoxrjéhya asánrá má kixin tí kjuaxróxinhya tjejt'atsínkará. Kixin xikaha ó nohará kixin t'ichjánxin tsjasótéxinni tí xra kuente Ìnchéni.<sup>4</sup> Naxa k'uejóni jnkokoá ntiha la ó tjonkará kixin kaín ni kjuaxróxinhya tsonhenni tsjasóteni. A ntá jie la ó nohará kixin chaxín xikaha kónhen.<sup>5</sup> Méxra imá kóxakonna ntá ichr'an kichó ni Timoteo kjuíjitsjehe ch'án nkexrí tjejorá, á naxa tinkachónkirá Ìnchéni o ách'e ch'ín Tsochren chrókjuachroerá chrókuítóhéhá tí ntjie Ìnchéni a ntá chrókóchónkó kaín tí xra kjuich'eni kjuakoharáni.

<sup>6</sup>Na ntá ó kjanxin ch'ín Timoteo chjasánrá Tesalónica chrónka ch'án kixin jína tjejorá naxa tinkachónkirá Ìnchéni, la ko naxa tjejorá tjuèhéhá kichuárá la ko chrónka ch'án kixin xraxinkáonrá tí jeheni tjinkáonrá chrókjuíjitsjeheni tí jahará. Kjaxin jeheni xikaha tjinkaonni chrók'uikonní tí jahará.<sup>7</sup>Mé xikaha kichó ni tjejt'atsínkani kjuaxróxinhya ntihi na ntá kjónté kóchéhe asénni kuínhinni kixin kaín asánrá naxa tinkachónkirá Ìnchéni.<sup>8</sup>A ntá kuínhinni xikaha kixin jína tjejorá naxa tinkachónkirá Ìnchéni Jesús a ntá antsí kóchéheni.<sup>9</sup>Ntá imá tsjancheheni Dios kjuasáya kixin xikaha imá chéhe asénni kixin tí jahará tinkachónkirá ch'án.<sup>10</sup>Tie la ko nchakotjin chronóeheni Dios kixin tsjanjon ch'án kjuachaxin tsjijitsjeheni tí jahará inaá kixin naxa t'itjáyán iso nkehe chrókjuakoharáni naxa chrók'uítjárá nkexrí jína chrókuinkachónkirá Ìnchéni.

<sup>11</sup>Tjejt'ancheheni T'eni Dios la ko Ìnchéni Jesucristo kixin chrókjuinkít-sani ch'án chrókjuíjitsjeheni tí jahará<sup>12</sup>la ko tjancheheni Ìnchéni kixin chrókjuinkítsa ch'án tí jahará kixin antsí má chrótjuèhéhá kichuárá la ko

chrótjuèhéhá kaín xín chojni éxí yóhe tjuàhará.<sup>13</sup>Tjancheheni ch'án kixin sintaxraxinkaonrá ch'án kixin kaín asánrá chrókuitekáonrá ch'án kixin ntá tsochóntahya asánrá ninkehó jie nkayakon It'eni Dios tió tsokjan Ìnchéni Jesús tsikao ch'án kaín tí sín ó tsikótjóá.

### Nkexrí tóxrjínhin Dios chrók'uejóni

**4** Jahará kichó ni chronóaharáni la ko ntaxraxinkaonráni tí kjuachaxin ih-nié Ìnchéni Jesús kixin jína chrók'uejorá tinkachónkirá Ìnchéni éxí tjejoch'erá jie kixin éxí kjuakoharáni. Mé xikaha jína sinchechéhéhá Dios.

<sup>2</sup>Ó nohará tí nkehe kjuakuaxinráni kjuachaxin kuente Ìnchéni Jesús.<sup>3</sup>Tí nkehe tjinkaon Dios kixin jína tjóá chrók'uejorá la ko chrókjuásinkoahyará jie í jnko chojni chjin ókjé.<sup>4</sup>Jnko-jnkorá chrókónohará chróchontará jnko-jnko ichjiánrá la ko jína chrók'uejorá chrótjuèhéhá kichuárá.<sup>5</sup>Jehya kixin chrókjuakérá asánrá tí nkehe jínahya chrókjuich'erá éxí ch'e tí chojni chón-hya Dios.<sup>6</sup>Nijnkorá chrókjuich'iyehéhá ichjién kichuárá xikaha kixin Ìnchéni mé imá sinchekjásóte ch'án tí chojni xikaha sich'e mé xikaha kjuíntaxraxinkaon-ráni senó.<sup>7</sup>Dios mé k'uíyeheni ch'án kixin jína chrók'uejóni, jehya kixin naxa chrókjuasinni jie.<sup>8</sup>A ntá tí sín chónte-hya kjuasáyé tí nkehe tjakoni na mé jehya kixin chóntehya sín kjuasáyé chojni. Náhí. Chóntehya sín kjuasáyé Dios, tí nkexro kjuanjon tí Nchakuen chóntani.

<sup>9</sup>A ntá tí tjuèhéhá kichuárá la í t'ichjánxinhya naxa chrókjinni tsochronkani kixin nkexrí chrótjuèhéhá kichuárá kixin jehe Dios mé tjetjakohará ch'án nkexrí chrótjuèhéhá kichuárá.<sup>10</sup>Xrácín xikaha tjejoch'erá tjuèhéhá kaín tí sín kichó ni tjejó estado Macedonia. Kjánchó chronóaharáni kichó ni kixin antsí má chrótjuèhéhá kichuárá.<sup>11</sup>Tóxakonhanrá kixin

kjuaxróxin chrók'uejorá. Jnkojnkora nohará nketí xra chrókjuich'exínrá tjára éxi k'uetuanhanráni. <sup>12</sup>Na mé xíkaha chrók'uikon tí sín chónhya Dios ntá chróchóntahará sín kjuasáya la ko chrók'uitjáyanhya ninkehó nkehe chrókuicháxinhanrá.

### Itsi Ìnchéni Jesús

<sup>13</sup>Kíchóni, tjínkavan kixin chrókónohará nkehe tsonhen tí sín tsík'en. Na mé tjínkavan kixin kánhyó chrótsjankamará sín chrókóyóahyará tí sín tinkáchónki-hya sín Ìnchéni naxa chónhya sín kixin chróxechón sín ínaá. <sup>14</sup>Kuítekaonni kixin ik'uén Ìnchéni Jesús la ko xechón ch'án ínaá la ko kjaxin titekaonni kixin Dios kjuínchexechón Jesús la ko tió tsokjan Jesús ntá sinchexechón Dios kaín xín tí sín tsík'en kuítekaon sín tí jehe ch'án.

<sup>15</sup>Méxra chénkani ti jahará tí nkehe kjuako Ìnchéni kixin tí naxa tjejóchónni tió tsi ch'án na kjónté naxa tsitónxinyani ntja, naxa tsochónhenni tí sín tsík'en. <sup>16</sup>Jehe Ìnchéni mé ts'inkajinxin ch'án nkaya nkajni la ko itsen tsonixja ch'án kixin tí kjuachaxin jie kuènte ch'án la ko ts'èya tí ángel t'etōan la ko tsontácho tí trompeta kuènte Dios. A ntá kaín tí sín tsík'en kuítekaon sín Ìnchéni Cristo la senó tsoxechón sín. <sup>17</sup>A ntá chr'éxin kaín xinni tjejóchónni la ko kaín xín tí sín tsíxechón mé jnkokōa tsochriinni kixin tí kjuachaxin jie kuènte Ìnchéni. A ntá xrlkjan tju tsoxetani ch'án. Mé xíkaha ts'ejókoni ch'án jnkochrixin. <sup>18</sup>Méxra xíkaha chrókjuinchechéxínrá kichuára tí tan i kixin xíkaha tsonhen tió tsokjan Ìnchéni.

**5** A ntá tí yaon tsonhen tíhi kichó ni t'ichjánxinyha naxa tsokjinni í jnko nkehe tsinhínra. <sup>2</sup>Jahará ó nohará jina kixin titàya itsi tí yaon tsokjan Ìnchéni éxi yóhe chrókui ijnko xíchee tí tie a. <sup>3</sup>Ts'ejó sín itsjo sín

kixin ijie kjuaxróxin tjejó sín kaín sín la ko ninkehó nkehe tsonhen sín. Ntá xrinahya titàya itsi tí kjuaxikaon jie la ko kjuachrakon mé ts'itjáyanxín tí kjuachón chróchónta sín éxi yóhe ijnko tjan tjejá xrinahya titàya tsjankixin ts'óntáki tjan kixin sinchekokjñhi tjan xjeen tjan na mé jehe tjan xitjahya tsontácho tjan “Náhi”, mé xíkaha jehe sín chóntahya sín nkerí tsaáxin sín. <sup>4</sup>Ntá jahará kichó ni sítíehya tjejorá ntá chróchrakonhyará tí yaon itsi Ìnchéni. Tí náhi chróchrakonrá éxi chrókui ijnko xíchee chrókjuintachrakonrá. <sup>5</sup>Ntá jie kaín rá mé tjejorá tí ntja t'inkáséyan. Jeheni la jehya tjejóni tí ntja sítie a. <sup>6</sup>Méxra xíkaha chrók'uejójua hyani éxi tjejójua tí sín í so na mé chrók'uejójtsjeheni chrókjuenkayáxinni jina. <sup>7</sup>A ntá tí sín t'ajua la tjejójua sín tí sítie ó la ko tí sín tókoan la tókoan sín tí sítie a. <sup>8</sup>A ntá jeheni na tjejóni tí ntja t'inkáséyan t'ichjánxin kixin jina chrók'uejóni chrókjuasinyani jie. Chrókuinkáchónkini Ìnchéni la ko chrótjuèhenni ch'án. Ntá jeheni na Ìnchéni ts'ayakonhenni ch'án tsaáxinni ch'án éxi tí ch'ín soldado t'inkáya ka tsík'óna chica kixin kohya nkehe tsonhen ntakuin ch'án. La ko chrók'uejójchónhenni itsi Ìnchéni tsaáxinni ch'án na mé éxi tí ch'ín soldado a xrasín ch'án nkehe tsík'óna chica t'ayakonhen kja ch'án kixin kohya nkehe tsonhen kja ch'án. <sup>9</sup>Kjueyáhya Dios tí jeheni kixin chrókjuinchekjásóteni ch'án. Náhi. Kjueyá ch'án tí jeheni kixin chrókuaáxinni Ìnchéni Jesucristo. <sup>10</sup>Jehe Jesucristo mé k'uenyákonhenni ch'án kixin chrók'uejókoni ch'án jnkochrixin kjónté naxa tjejóchónni o kjónté ó tsík'enni tió tsokjan ch'án. <sup>11</sup>Méxra xíkaha chrókjuinchechéhéra kichuára la ko chrókjuínkisará

kíchuará kixin jína chrók'uejó sín éxí xráxín tjejoch'erá.

**Ch'in Pablo mé nhexraxinkaon  
ch'an tí sín tinkáchónki Cristo**

<sup>12</sup> Kíchóni chronoàharáni kixin chró-chontehérá kjuasáyé tí sín tjejóch'e sín xrá kuènte Dios ntiha tjejójtitaón sín ntja chrónka sín itén Ìnchéni. <sup>13</sup> Na mé chróchontehérá sín kjuasáya la ko chrótjuèhérá sín má kixin tí xrá tjejóch'e sín. A ntá jahará kaín rá jnkójna chrók'uejokoará kíchuará.

<sup>14</sup> Méxra tétuñhanráni kichó ni kixin chrókuéntuehérá tí sín tjinkakonhya sich'e sín xrá la ko chrókjuinchechéhérá asén tí sín kóxrjé asén sín la ko chrókjuínkĩtsará tí sín naxa noehya sín jína la ko chrókóninkákuénhyará ninkexró.

<sup>15</sup> Tóxakonhanrá kixin chrókjuich'e-hyará jínahya tí sín jínahya kjuít'ahará. Íchá jína chrókjuákoxinrá nkehe jína chrókjuich'erá kixin ts'ikon kaín xín chojni chjasintajni kixin jína tjejtjenkayáxinrá.

<sup>16</sup> Méxra nchechéhérá asánrá jnkochrín.

<sup>17</sup> Chrókuítóéhyará chrónixjehérá Dios jnkochrín.

<sup>18</sup> Kjónté ihrén nkehe chrókónhanrá la chróchjehérá Dios kjuasáya kixin xikaha mé tjinkaon ch'an chrókjuákoxinrá kixin tinkachónkirá Ìnchéni Cristo Jesús.

<sup>19</sup> T'ók'ankahyará tí xrohi t'inkáséyanxín Nchakuen Dios.

<sup>20</sup> Chontehérá kjuasáyé nkehe tjako tí sín kichó ni chronkaxín sín kjuachaxin kuènte Nchakuen Dios. <sup>21</sup> Chrótsjehérá jína tí nkehe tjejóch'e sín. A ntá tí jína na chrókuítekáonrá. <sup>22</sup> Chrókuítóhérá kaín xín nkehe jínahya.

<sup>23</sup> Dios mé tjanjon kaín kjuaxróxin ntá tjancheheni ch'an kixin jehe ch'an sinchetjóará ch'an la ko ts'ayakonhen ch'an nchakuanrá la ko asánrá la ko cuerpo kuèntará kixin tsochóntahya ninkehó jje tió tsi Ìnchéni Jesucristo.

<sup>24</sup> Dios tí nkexro kjuéyá tí jahará mé jína ch'an la ko kaín tí nkehe ntáchro ch'an la tsoxiteyá.

**Ch'in Pablo kjuixixín nixjehé ch'an  
sín la ko tjanchehe ch'an Dios kixin  
chrókjuincheyaon tí jehe sín**

<sup>25</sup> Kíchóni chrónóehérá Dios kixin tsjinkĩtsani ch'an kaín ni.

<sup>26</sup> La ko nixjehérá kaín xín tí sín kichó ni ntiha tsehérá tja sín.

<sup>27</sup> T'etoxínni tí kjuachaxin kuènte Ìnchéni kixin nchekuáxinrá tí xroon chr'anhánrá tsinhin kaín xín tí sín kichó ni ntiha.

<sup>28</sup> Kjuasáyé Ìnchéni Jesucristo sin-tayaonrá ch'an. Amén. Ó tjen.

## Xroon yóxin ikjin ch'ín Pablo chr'énnen ch'án tí sín tinkáchónki Cristo chjasin Tesalónica

### Ch'ín Pablo nixjehe ch'án tí sín Tesalónica

**1** Janhan Pablo la ko ch'in Silvano la ko ch'in Timoteo ikjinni tí xroon i chr'anhánrá kíchó ni ninko chjasin Tesalónica kixin jnkokoá tinkáchónkini It'éni Dios la ko Ìnchéni Jesucristo. <sup>2</sup>Kjuasáyé It'éni Dios la ko Ìnchéni Jesucristo chrókjuintayaonrá ch'án kixin kjuaxróxin chrók'uejorá.

### Dios sinchekitogexín ch'án tí ijíé chojni tió tsokjan Ìnchéni Cristo

<sup>3</sup>Kíchóni chrókjuancheheni Dios kjuasáya jnkochrín kixin tí jahará. Na mé jína xikaha chrókjuich'eni kixin tinkák'ánkí tí tinkachónkirá Ìnchéni Jesús la ko tinkák'ánkí tí tjuèhérá kichuárá tjejorá ntiha. <sup>4</sup>Ntá chéheni chenkani tí sín kíchó ni kaín tí ninkoe Dios kixin naxa tjákoxinrá kixin naxa tinkachónkirá Ìnchéni kjónté síin chojni nínkakonhanrá la ko kjónté t'atsínkará itsjé kjuaxróxinnya. <sup>5</sup>Tíha mé tjákoxinrá kixin tjinkaon Dios tsotsjehe ch'án kixin á tsjachará ts'ikonrá tí kjuachaxin kuènte ch'án. Méxra xikaha tjejtjasótéxinrá jie.

<sup>6</sup>Méxra ó nchoxon kixin sinchekjasóte Dios tí sín tjejónehkjasótíar á jie. <sup>7</sup>Ntá tsjanjon ch'án kjuachaxin kixin ts'ok'áhará kixin ó kjuasótíar á la ko kjaxin jeheni ts'ok'éheni tí yaon itsi Ìnchéni Jesús ts'inkajinxin ch'án nkaya nkajní tsikao ch'án kaín tí sín ángel t'etōan kuènte ch'án na mé tsikao ch'án xrohi nene. <sup>8</sup>Mé xikaha itsi ch'án kixin sinchekjasóte ch'án tí sín kuítekakuenhya Dios la ko kuítekakonhya tí tan jína

kuènte Ìnchéni Jesucristo chrókuaáxin sín. <sup>9</sup>Á ntá tí sín kuítekakonhya mé tsjasóte sín jnkochrín ts'ítuenhen sín ts'axrjenta sín tí kohya Ìnchéni, í ts'ikonhya sín tí kjuachaxin t'etōanxin ch'án. <sup>10</sup>Xikaha tsonhen tí yaon itsi Ìnchéni tsjikosáyehe ch'án kaín xín tí sín kjuínchetjóá ch'án la ko kaín tí sín kuinkáchónki sín ch'án la ts'ikon sín tí kjuachaxin jie kuènte ch'án. Mé xikaha kjaxinrá jahará kixin ó kuítekónrá tí nkehe kjuakoharáni.

<sup>11</sup>Mé xikaha jnkochrín tjancheheni Dios kixin jína chrók'uejorá éxi tjinkaon ch'án chrók'uejó tí sín kjueyá ch'án, la ko tjancheheni Dios kixin chrótjáhará ch'án kjuachaxin kuènte ch'án kixin chrókjuinkítsará ch'án kixin chrókjuachará ch'erá kaín tí xra jína tjinkaonrá chrókjuich'erá kixin tinkachónkirá ch'án. <sup>12</sup>Mé xikaha kaín xínrá tsjikosáyehérá tí ihnié Ìnchéni Jesucristo la ko jehe ch'án mé kjaxin tsjikosáyahará ch'án kixin tinkachónkirá ch'án. Mé xikaha kjuasáyé Dios la ko Ìnchéni Jesucristo kixin kuikonóeheni ch'án.

### Tsonoxín ijnko ch'ín jínahya

**2** Kíchóni, a ntá tí tsi Ìnchéni Jesucristo la ko tsojnkotséni tí tjen ch'án jehe ch'án, méxra xikaha chrónóaharáni <sup>2</sup>kixin chrókjuítóxinhyará tjoka tí nkehe chrókjuenkayáxinrá, la ko ní chróchrakonhyará tí chróntáchro jnkójín nkexro tónohe sín kixin ó kjuixraká tí yaon itsi Ìnchéni, la ko chróchrakonhyará xikaha chrókuínhínrá chróchronka ijnko chojni tjako, la ko chróchrakonhyará tí tsochronka sín kixin ó k'uáyéhe sín ijnko xroon éxi jeheni tsíkjanjonni chrónka kixin xikaha tsonhen. <sup>3</sup>Títoéhyará kixin jnkójín nkexro chrókjuít'ayahará xikaha. Naxa tsihya tí yaon ntá senó itsjé chojni



tsonínkakhonhen sín Dios, la ko tsonoxín ijnko ch'ín jínahya chóntha jié, na ntá tíha mé tsjasóte jnkochrín. <sup>4</sup>Tsjak'e ch'án tsjanjonko ch'án kaín xín nkehe tinkáchónki chojni, mé tsjak'etjāxín ch'án nkaxenhen tí nínkoe Dios kixin jehe ch'án mé sich'éna asén ch'án éxi Dios tí jehe ch'án.

<sup>5</sup>¿Á xráxinkákonhyará kixin xikaha k'uérjanka senó tí naxa k'uéjóni jnkokoá? <sup>6</sup>Ntá jahará ó nohará nkehe tí kjuachaxin naxa chónthehe kixin naxa tjexrakáhya tí yaon tsonoxín tí ch'ín jínahya. <sup>7</sup>Ntá jie imó ch'e xra tí kjuachaxin jínahya. Kjonté naxa t'itjāyan kixin sáchrókjuí tí nkexro chónthehe. <sup>8</sup>Á ntá tí ch'ín jínahya tsonoxín ch'án. Ntá tíó tsi Ìnchéni Jesús ntá tí itén ch'án ts'axrjexín ir'va ch'án ó mé ts'enxín tí jínahya a kixin mé xikaha sinchek'itjāyanxín ch'án tí jínahya tí kjuachaxin jié tsikao ch'án. <sup>9</sup>Méxra tí ch'ín jínahya mé tsikao ch'án tí kjuachaxin kuènte ch'ín Tsochren la mé xikaha tsochóntha ch'án kjuachaxin jié tsjakoxín ch'án sich'iyaxín ch'án tsjasin ch'án kjuaxroan ntoáhya. <sup>10</sup>Mé xikaha kaín nkehe jínahya sich'iyexín ch'án tí sín xráxín ts'itjāyan sín kixin chrohya sín chrókuitekaon sín tí tan chaxín ntoá chrókuaáxin sín. <sup>11</sup>Méxra tsítóhe Dios tí jehe sín kixin tsitekaon sín kaín nkehe chaxínhya <sup>12</sup>kixin ntá tsjasóte kaín tí sín kuitekakhonhya sín tí tan chaxín chrókuaáxin sín na mé antsí kóxrjínhín sín chrókjuasín sin jié tsjasótéxín sín.

### Dios mé kjueyá tí jehe sín kixin chrókuaá sín

<sup>13</sup>Ntá jeheni chrókjuancheheni Dios kjuasáya jnkochrín kixin jahará kichó ni chojni tjuahará Ìnchéni kixin tí tsík-jeyá Dios tí jahará kixin senó chrókuaáxinrá tí Nchakuen ch'án tsotjuáxinrá la ko tí itén ch'án chaxín ntoá kuitekáonrá. <sup>14</sup>Méxra xikaha k'uíyāhará Dios kixin

chrókuaáxinrá tí itén ch'án tjakoni kixin ntá tsjachará ts'ikonrá tí kjuachaxin jié kuènte Ìnchéni Jesucristo.

<sup>15</sup>Mé xikaha kichó ni, jína chrók'uejorá chrók'uitjāyanhyará tí nkehe kjuakoharáni tíó k'uéjóni jnkokoá la ko tí nkehe chrónka tí xroon ikjinni k'uayéherá. <sup>16</sup>Ntá Ìnchéni Jesucristo la ko It'eni Dios na mé tí nkexro kjuasáyé ch'án tjuèhe ch'án tí jeheni la ko nchechéhe ch'án asénni jnkochrín la ko kjuasáyé ch'án tjejóchónhenni itsi Ìnchéni <sup>17</sup>na mé sinchekéhe ch'án asánrá la ko tsjanjon ch'án kjuachaxin kixin ntoá chrók'uejorá ntá jína chrónixjará la ko kaín xra jína chrókjuich'erá.

### Nixjehérá Dios kixin tsjinkitsa kaín ni

**3** Méxra kjuixixín chrónóaharáni kichó ni kixin chrókjuancheherá Dios kixin chrókjuinkitsa ch'án tí jeheni kixin tjoka sáchrókjuikjakoni itén Ìnchéni nkuíxín kixin ntá tsinhin chojni la tsjikosáyehe sín ch'án éxi yóhe kuitekáonrá jahará. <sup>2</sup>Kjāxin nixjehérá Dios kixin chrókjuinkitsani ch'án kixin kohya nkehe chrókónhenni tí sínn chojni jínahya nínkakhonhenni kixin kénhya sín tinkáchónki Ìnchéni. <sup>3</sup>Ntá Ìnchéni mé chaxín jína ch'án la jehe ch'án tsítóehya ch'án tí jahará naxa tsjinkitsará ch'án kixin jína ts'ejorá la ts'ayakonhanrá ch'án kixin kohya nkehe jínahya tsonhanrá. <sup>4</sup>Ó noheni kixin Ìnchéni la tsjinkitsa ch'án tí jahará kixin naxa sich'erá xra éxi k'uētuanhanráni. <sup>5</sup>Ìnchéni tsjinkitsará ch'án tsonohará kixin Dios la tjuahará ch'án la ko tsjinkitsará ch'án kixin chrókóninkákonhyará éxi kónínkakhonhya Cristo.

### T'ichjánxín chrókjuich'eni xra

<sup>6</sup>Kichóni t'etóanxínni tí kjuachaxin ih-nié Ìnchéni Jesucristo kixin chrók'uaxr-

jekjanxínra tí sín kíchó ni tjinkakon-  
hya sich'e xra la ko xrihya sín éxi  
kjuakoharáni. <sup>7</sup>Ó nohará kixin nkexrí  
chrók'uejorá chrókjuákoxinrá éxi k'uéjó  
tí jeheni kixin tí k'uéjókoaráni la je-  
hya kixin kjuích'ehyani xra. <sup>8</sup>Jehya  
kixin kjóneni niotjé jnkojín nkexro  
ntá chrókjuenkahyani. Náhi. Kóxakon-  
henni nchakotjin la ko tie kjuích'eni  
xra kixin ninkehó chóntiaxinhyani tí  
johará kixin chrókjuánjonrá tí nkehe  
chrókjóneni. Náhi. <sup>9</sup>Kjonté chóntani  
kjuachaxin chrókjuanchaharáni kixin  
chrókjuínkítará tí jeheni kjánchó je-  
heni na kjuích'eni xra kjuakoxinni  
kixin xikaha jahará chrókjuich'erá xra.  
<sup>10</sup>Kixin tí naxa k'uéjóni jnkokoá ntiha  
k'uetoanni kixin: Tí nkexro tjinkakon-  
hya ch'e xra la kjaxin chrókjonehya.  
<sup>11</sup>Ó kuínhinni kixin tjejorá jnkojínra  
ninkehó xra ch'ehyará a ntá kjuach'ia ó  
xríkoará. <sup>12</sup>A ntá tí kjuachaxién Ìnchéni  
Jesucristo t'etoanxínni la ko chrónóex-  
inni tí sín a kixin chrókóninkakon-  
hya sín chrókjuich'e sín xra kixin

chrókjuacha sín chichaon chrók'uite tí  
nkehe chrókjone sín.

<sup>13</sup>Ntá jahará kíchó ni, chrókóxr-  
jéhyará chrókjuich'erá tí nkehe  
jína. <sup>14</sup>A ntá tí tjen jnkojín nkexro  
titekakonhya tí nkehe t'etoanxínni tí  
xroon i la tsjehérá jína nkexro tíha  
la ntá chrók'uitohyará ch'án la ntá  
chrókósuèhe ch'án. <sup>15</sup>Kjánchó jehya  
kixin chrókjuánjonkoará ch'án. Náhi.  
Chrókjuínchexraxinkáonrá ch'án  
jnkojína éxi ijnko chojni kíchó ni.

### Ó kjuixixín nixja ch'ín Pablo

<sup>16</sup>Ìnchéni mé tjanjon tí kjuaxróxin  
la ko naxa tsotjáhara ch'án kjuaxróxin  
jnkochrín kjonté ichrén nkehe chrók'u-  
atsínkará. Jehe ch'án mé t'ayakonhanrá  
ch'án kaín rá.

<sup>17</sup>Janhan Pablo tjaná mé kjinxian tí  
nkehe nixjohará. Mé xikaha chrókjuát-  
soanxínra tí letra kaín carta tsíkjian.

<sup>18</sup>Ntá Ìnchéni Jesucristo mé kjuasáyé  
sintayaonrá ch'án kaín rá. Amén. Ó tjen.

## Tí xroon saoxín ikjin ch'ín Pablo chr'énhen ch'án tí ch'ín Timoteo

### Ch'ín Pablo nixjehe ch'án tí ch'ín Timoteo

**1** Janhan Pablo kjueyána Jesucristo la ko Dios mé tsík'etuanna mé jehe ch'án mé tí nkexro nchekaá chojni. La ko kjaxin k'uetuanna Ìnchéni Jesucristo tí nkexro tjejóchónhenni itsi. <sup>2</sup>Ikjian tí xroon chr'anhan jaha Timoteo. T'íkuan éxí xjanna tí jaha kixin jaha tinkachónkia Cristo Jesús. Kjuasáyé It'éni Dios la ko Ìnchéni Jesucristo chrókuin-tayavan ch'án la ko chrókuikonógha ch'án kixin kjuaxróxin tsjak'e jaha.

### Chrókuinchexráxinkaon ch'án sín kixin chrókuitekakuenhya sín tí nkehe chaxínhya

<sup>3</sup>Éxí xrxannógha tió sákjuia estado Macedonia la mé jaha chrókuítóha tí chjasin Éfeso la ntaha chrókuétuénhén iso tí sín ntiha kixin chrókuakohya sín tí nkehe ntoáhya. <sup>4</sup>La ko chrókuétuénhén sín kixin chrókuahya sín kuenté tí cuento tsíchronka chojni tí ósé a. Tí tinhin sín tíha la imá tjachaxin kichó sín la ó chónkó tíha. Kaín tíha la í tsjinkit-sahya kixin sinchexitéyeheni Dios kixin tinkáchónkini ch'án.

<sup>5</sup>Tí nkehe tjinkaonni la chrótjuèheni kichó ni kaín ni kixin ó kótjóá asénni la ko ó noheni kixin jína tjenkayáxinni la ko kaín asénni tinkáchónkini Cristo. <sup>6</sup>Iso sín la kjuíchròe sín kixin itjo tí nkehe chónkó. <sup>7</sup>Tjinkaon sín chrók'óna sín maestro chrókuako sín tí ley a ntá jehe sín tienxínhya sín tí nkehe tjako sín kjánchó ntáchro sín kixin ó ntoá tí nkehe tjako sín, ntá chaxínhya.

<sup>8</sup>A ntá jeheni la ó noheni kixin tí ley la jína tí chrokuakoni éxí tjinkaon Dios. <sup>9</sup>Ó noheni kixin tí sín tjasin-

hya jje t'ichjánxienhya sín tí ley tsík'e-toan Moisés. Tíhi la t'ichjánxinhin tí sín titekakonhya la ko tí sín jiehe la ko tí sín jínahya tjasin jje la ko tí sín chón-tahya kjuasáyé Dios la ko tí sín t'óyán it'é la ko iné sín la ko kaín tí sín tjàya. <sup>10</sup>La ko tí sín tjasinko jje ijnko chojni chjin ókjé la ko tí sín jnkokón ntoa sín takja kichó sín la ko tí sín teé chojni ntá nchekji, la ko tí sín ch'ia la ko tí sín nchenohe Dios ntá chaxínhya. Mé tí ley mé chrókuinhin kaín tí sín ch'e tí nkehe jínahya la nínkakohenen tí nkehe jína tjakoni. <sup>11</sup>Tí nkehe tjakoni mé chaxín tí tan jína sinchekaá chojni la tí Dios tje-toan mé k'uetuanna kixin tsjàkua tíha.

### Ch'ín Pablo kjuanchehe ch'án kjuasáyé Dios

<sup>12</sup>Tjáncháha kjuasáyé Ìnchéni Jesucristo kixin imá kjuínkítsana ch'án la ko k'uíkon ch'án kixin jína sjt'aha ch'án xra ntá chjina ch'án tí xra i. <sup>13</sup>Mé xikaha kjueyána ch'án kjónté senó imá k'uék'ántaxínhan tí sín tinkáchónki ch'án la ko k'uéchonkíha sín la ko chrók'oyán sín. Kjónté la Dios imá kuikonógha ch'án tí janhan kixin ó nohe ch'án kixin k'uékinkachónkíhya janhan tí jehe ch'án la ko k'uénonahya nkehe tí xra k'uékjít'a. <sup>14</sup>Méxra Ìnchéni antsí má kjuíncheyaonna kixin ntá kjuanjon ch'án kjuachaxin kixin tsinkachónkia ch'án la ko tsotjuaha ch'án. Mé xikaha kaín ni chóntani tí kjuachaxin tinkáchónkini Cristo Jesús.

<sup>15</sup>Tíhi mé chaxín la kaín ni chrókuitekaonni. Ikui Jesucristo chjasintajni kixin sinchekaá ch'án tí sín kjuasin jje. Ntá janhan mé antsí má kjuásian jje. <sup>16</sup>Kjónté xikaha kjuít'a la Dios antsí má kuikonógha ch'án tí janhan kixin xikaha kjuakoxin Jesucristo kixin kóninkakonhya ch'án. Mé xikaha tsjakuaxian kaín nkexro tsitekaon tí jehe ch'án kixin tsochónta

sín kjuachón jnkochrín. <sup>17</sup>Ntá jnkochrín tsochónteheni kjuasáyé tí Rey t'etóan. Jehe ch'án mé ijnko nkexro xráxín tjen la mé ijnko nkexro chónhya ts'en la xitjahya ts'ikonni ch'án. Jehó ch'án mé Dios la imá nohe ch'án. Amén.

<sup>18</sup>Timoteo, éxí xjanna t'íkuan tí jaha, la kaín tí xrá i tjaha kixin tsjanjonkoa tí jínahya la tsjacha kixin tinkachónkia jína Ìnchéni la ko tjenkayáxian tí nkehe jína. Mé xíkaha sinchexiteyá tí nkehe kuínhín senó kixin tí sín kíchó ni chrónkaxín ihnié Dios. <sup>19</sup>Í so sín la kjuenkayáxinhya sín tí jína ntá kjuíchrè sín kuítóhe sín tí nkehe tinkáchónki sín. <sup>20</sup>Mé xíkaha kónhen ch'ín Hime-neo la ko ch'ín Alejandro. Janhan kjuánjuan kjuachaxin kixin ch'ín Tsochren mé sinchekjasóte sín kixin mé xíkaha ts'itja sín kixin í ts'ántaxiéhya sín Dios.

### Nkexrí chrónixjeheni Dios

**2** A ntá saoxín la xrjanógha kixin kaín chojni chrónixjehé sín Dios la chrókjuanchehe sín kjuasáyé ch'án kixin chrókjuinkítsa ch'án kaín xín chojni. <sup>2</sup>Chrókjuanchia sín kixin Dios imá chrókjuinkítsa ch'án kaín tí sín t'etóan la ko tí sín gobierno kixin ntá kjuaxróxín ts'ejóni la ko sinchexiteyéheni Dios la ko ntoá ts'ejóni. <sup>3</sup>Xíkaha mé imá jína la tóxrjínhín Dios, mé tí nkexro tsaáxinni. <sup>4</sup>Jehe ch'án mé imá tjinkaon ch'án kixin tsaá kaín xín chojni la ko tjinkaon ch'án kixin tsonhe chojni tí nkehe chaxín ntoá. <sup>5</sup>Mé itjen jnkokoqáxón Dios la ko itjen jnkokoqáxón nkexro nixjayákonhenni kixin tsochóxinni Dios. Tíha mé Jesucristo mé k'óna chojni ikui ch'án chjasintajni. <sup>6</sup>Jehe Jesucristo mé k'uenyákonhenni kaín xinni, kjuenkayákonhen ch'án ijíeni kixin tsaáxinni ch'án. Táha mé xiteyá tí tsintáchro Dios ósé kixin xíkaha tsonhen ch'án. <sup>7</sup>Méxra tí xrá mé kjueyána Dios kixin tsíjkjáhoga tí sín jehya judío

kixin tsinkáchónki sín Jesucristo la ko tsonhe sín tí nkehe chaxín. Janhan mé tinkachónkia Cristo la xrjanka tí nkehe chaxín mé t'ayahya.

<sup>8</sup>Méxra tjínkavan kixin kaín tí sín ntoa mé chrónixjehé sín Dios la chrókjuaya sín tja sín la chrókótjóa asén sín la ko chrókónínkakhonhya sín la ko chrókjuuehya sín kjuanínkaon. <sup>9</sup>A ntá tí chojni chjin mé ntoá chrók'uitsa sín ka la chrókjuinchehnkehya sín la ko chrókjuasin chóntahya sín kaxihí sín nkehe tjete xroxrjo náxrjón la ko chrók'uitsahya sín ika imá tjete. <sup>10</sup>Íchá jína kixin tí chojni chjin chrókjuich'e sín tí xrá jína éxí chrókjuich'e kaín tí sín tsíkjinchetjóa Dios. <sup>11</sup>Tí chojni chjin t'ichjánxin chrókuinhin sín itén Dios la chrónixjahya sín la ko chrók'uetóanhya sín. <sup>12</sup>A ntá janhan tjánjonhya kjuachaxin kixin chojni chjin chrókjuako tí nchónhya chojni síin la ko tjánjonhya kjuachaxin chrók'uetuénhen sín chojni ntoa. Jehe sín la tání sín chrók'uejó sín <sup>13</sup>kixin saoxín la Dios kjuích'éna ch'án tí ch'ín Adán la ntá chr'éxin kjuích'éna ch'án tjan Eva. <sup>14</sup>A ntá ch'ín Adán la ninkexró kjuích'iyehya ch'án. Náhi. Tí tjachjin mé tsíktekakohen tjan tí nkexro tsíkjich'iyehé tjan ntá xíkaha xrankíxixín k'uúxin jie. <sup>15</sup>A ntá tí chojni chjin la kjónté xíkaha kjuích'e sín la Dios sinchekaá sín tí jína ts'ayakonhen sín xjeen sín la tí chaxín tinkáchónki sín Dios la ko tjuèhe sín ch'án la ko ntoá ts'ejó sín la ko jína tsjenkayáxín sín.

### Jína chrók'uejó tí sín t'etuénhen tí nínko

**3** Ijnko nkehe chaxín tjónka. Tí nkexro tjinkaon sich'e xrá kuènte nínko mé imá jína xrá tjinkaon ch'án. <sup>2</sup>Tí ch'ín chrók'uetóan mé ntoá chrókjuak'e ch'án kixin kohya nkexro chrók'ueka ch'án jie la ko kjáxin chróchóna ch'án jnkokoá ichjién ch'án

ó la ko kjaxin chrókjuak'e ch'án jína la ko chrókjuenkayáxin ch'án jína la ko chróchónta ch'án kjuasáyé ch'án la ko kjaxin jína chrónixjehe ch'án tí nkexro tjiji ntøe la ko kjaxin chrókónohe ch'án tí nkehe chrókjuako ch'án. <sup>3</sup>La ko kjaxin chrókókoanhya ch'án la ko chrókjuehya ch'án kjuanínkaon la ko kjaxin chrókóxrjienhya ch'án kixin chrókjuacha ch'án nchónhya chichaon. A ntá chrókójiehya ch'án la ko kjuaxróxin chrókjuak'e ch'án la ko chrókóxrjienhya ch'án chróchónta ch'án itsjé chichaon. <sup>4</sup>Jehe ch'án mé kjaxin jína chrók'uetuēnhen ch'án tí sín tjejó ntøe ch'án la ko chrókjuentuéhe ch'án xjeen ch'án kixin tsitekaon xjan la tsjikosáyehe xjan it'é xjan. <sup>5</sup>Tí tsjachahya ch'án ts'etuēnhen ch'án tí sín tjejó ntøe ch'án la ¿ntá nkexrí chrók'uetøan ch'án tí nínko kuènte Dios? <sup>6</sup>Íchá jína kixin jehya ijnko nkexro na ntá k'uúixenhen chrókjuako kixin tí nkexro na ntá k'uúixenhen la imá chrókjuinchehnke ch'án la ntá chrókjuasin ch'án jie éxí kjuasin ch'ín Tsochren ijie senó. <sup>7</sup>Kjaxin t'ichjánxin kixin kaín xín tí sín naxa tinkáchónkihya Inchéni mé tsochónta sín kjuasáyé tí ch'ín t'etøan a. Tí náhí la ts'eka sín ch'án jie ntá tí xikaha la ch'ín Tsochren tsjacha tsjachrøe tí ch'ín a ntá tsjasin ch'án jie.

**Nkexrí chrók'uejó tí sín tsjinkitsa  
tí xra kuènte nínko**

<sup>8</sup>Kjaxin tí sín diácono ch'e xra kuènte nínko la kjaxin ntoá chrók'uejó sín kixin chróchóntehe sín kjuasáyé chojni. Kjaxin t'ichjánxin kixin chrókjuinchexiteyá sín tí nkehe ntáchro sín la ko chrókókoanhya sín la ko kjaxin chróchóntiáxinhya sín itsjé chichaon chrókjuacha sín. <sup>9</sup>T'ichjánxin chrókónohe sín jína tí

nkehe tinkáchónki sín kixin jehe sín chrórxaxinkaon sín á nchøxon tí xra ch'e sín. <sup>10</sup>Saoxín chrótsjehe kaín chojni á ninkehó jie chóntahya tí nkexro la ntá tí chaxín jína jehe ch'án la ninkehó jie chóntahya ch'án ntá jína ts'ixenhen ch'án tí xra kuènte nínko. <sup>11</sup>La ko kjaxin tí chojni chjin mé chrók'uejó sín jína kixin chróchónta sín kjuasáyé sín. Kjaxin chrókuinkáchónkihya sín kjuach'ia la ko jína chrók'uejó sín la ko chrókjuinchexiteyá sín kaín nkehe. <sup>12</sup>Tí sín diácono la mé chróchónta sín jnkokøá ichjién sín la jína chrók'uetuēnhen sín xjeen sín la ko jína chrók'uetøan sín ntøe sín. <sup>13</sup>T'ichjánxin ijnko xra jína sich'e sín kixin ntá tsjacha sín ts'áyéhe sín ijnko nkehe jína tsjanjon ìnchéni la ko kjaxin tsøsuèhya sín tsochrónka sín nkexrí tinkáchónki sín Cristo Jesús.

**Dios mé kjuínchenoheni tí  
nkehe k'uékiexínhyani**

<sup>14</sup>Tjínkavan tjoka chrókjuasántsjahá tí jaha kjánchó senó tsokjian tí xroon i. <sup>15</sup>A ntá tí tsøxrjenna isé ntá kjónté tsonoha nkexrí chrók'uejó tí sín naxa kjéhya Dios mé tí sín t'óna nínkøe Dios tjechón. Jeheni kaín ni mé tjejó't'ayakönhenni tí tan chaxín ntoá. <sup>16</sup>Ninkexró chróntáchrohya kixin chaxínhya tí nkehe tinkáchónkini mé ijnko nkehe imá jie tíha la ninkexró k'uénoehya tí senó a. Dios mé ikui k'óna chojni; ikui ch'án kjuakøxin ch'án kjuachaxién Nchakuen Dios chóna ch'án kixin jína tí jehe ch'án. La ntá tí sín ángel mé k'uúikon sín ch'án la kuenté chjasintajni mé ó kuínhin sín nkehe chrónka ch'án ntá itsjé sín kuítekaon sín ch'án. Ntá Dios k'uáyéhe tí jehe ch'án nkaya nkajní.

### Tí sín kuítóhe tinkáchónkihya Cristo

**4** A ntá ntáchro Nchakuen Dios kixin tí chjina tsjeje chjasintajni mé iso sín mé tsítóhe sín í tsinkáchónkihya sín Ìnchéni la ntá tsitekaon sín nchakuen tí jínahya sich'iehe sín la ko tsitekaon sín tí nkehe tjako tí sín demonio. <sup>2</sup>Mé tsinhin sín tí nkehe tjako tí chojni tjuáhya la ch'ia sín. Kjónté imá tsjasin sín jie la í tsoeuèhya sín kixin éxí tsichján tí tjenkayáxixín sín la í tjenkayáxinhya sín jína. <sup>3</sup>Jehe sín mé tjinkakonhya sín kixin chrókótehe chojni la ko kjaxin tjinkakonhya sín kixin chrókjóneni nto. A ntá jeheni ó noheni kixin Dios mé kjuích'éna ch'án kaín xín nkehe ineni la tjinkaon ch'án kixin tí jeheni tinkáchónkini ch'án la ó noheni tí tan chaxín ntoá mé chrókjuancheheni ch'án kjuasáya ntá chrókjóneni. <sup>4</sup>Méxra kaín xín tí nkehe kjuích'éna Dios la jína la kohya nkehe chróntáchroni kixin jehya jína sineni. Chrókjuancheheni Dios kjuasáya la ntá jína chrókjóneni <sup>5</sup>kixin tió tsoxraxinkaonni itén Dios la tsonixjeheni ch'án la ntá sincheyaon ch'án tí nkehe sineni.

### Jnko chojni jína ch'ehe xra Jesucristo

<sup>6</sup>Jaha tjácohé tí sín kíchó ni kaín tí nkehe i la ntá xikaha imá jína sich'ehé xra Jesucristo la ko antsí tsjinkítsa ch'án ts'ánki kjuaxrexinkaon kuéntá tí tinkachónkia tí tan kuénté ch'án la ko naxa tjákua tí nkehe jína ó xráko. <sup>7</sup>Jaha mé tahya kuenté tí cuento chónkó la ko tí nkehe ntoáhya tinkáchónki iso sín. A ntá jaha la chrókuítóéhya chrókuinkachónkia Dios. <sup>8</sup>Tí chojni tsítán la jína tíha kjánchó antsí má tjetoan chróxraxinkaonni Dios. Tíha la tsjinkítsa kixin jína xritjéjóni ijie la ko kjaxin tsjinkítsa kixin ts'áyéheni kjuachón jnkochrín tió tsokjan Ìnchéni. <sup>9</sup>Kaín tíhi mé chaxín la

kaín chojni chrókuitekaon. <sup>10</sup>Mé xikaha kjónté t'ántaxínhinni chojni la jína ch'eni tí xra i kixin tinkáchónkini Dios tjechón. Jehe ch'án chaxín sinchekaá ch'án kaín tí chojni titekaon tí jehe ch'án.

<sup>11</sup>Kaín tíha mé t'ichjánxin tsétoan la ko tsjákua. <sup>12</sup>Jaha chrókuítóéhya kixin chrokjuanoá sín kjónté naxa ntasoyá. Chrókujákoexián tí sín tinkáchónki Ìnchéni nkexrí chrónixja sín la ko nkexrí ntoá chrók'uejó sín la ko nkexrí chrótjuèhe sín Dios la ko nkexrí chrókuitekaon sín Ìnchéni la ko nkexrí tjóá chrók'uejó sín. <sup>13</sup>Nachrohe tsjasán la jaha sinchekuáxian tí xroon itén Dios kixin tsinhin kaín sín la ko sinchexraxinkávan kaín tí sín kíchó ni la ko tjácohé sín. <sup>14</sup>Sinchek'itjáyanhya tí kjuachaxién Dios k'uayéhé tió tí sín t'etóan kuènte ninko kjuachaxién Dios k'uejotja tja sín chrítaón ikjá.

<sup>15</sup>Chrókóxakonhan chrókuinchesiteyá kaín tíha kixin kaín chojni tsotsjehe sín kixin jína noha. <sup>16</sup>Chrókjuenkayáxian jína tí nkehe tjákua kixin jína chrókuak'e jaha, chrókuinchesiteyá kaín nkehe la ntá tí xikaha sich'e la tsaá jaha la ko tí sín tjejótinhin tjákua la tsaá sín kjaxin sín.

### Jína chrók'uejó tí sín tinkáchónki Cristo

**5** Jaha la chrókóninkákuenhya tí sín ó táda. Náhi íchá jína chrónixjehé sín jnkójina éxí chrónixjehé it'á. La kjaxin tí sín ntasoá chrónixjehé sín éxí chrónixjehé kichuá mero. <sup>2</sup>A ntá tí sín ó nána la mé chrónixjehé sín éxí chrónixjehé ìná xikaha. Kjaxin tí sín tjarisoá mé jnkójina chrónixjehé sín éxí chrónixjehé kichuá mero la kjaxin chróchóntehé sín kjuasáya.

<sup>3</sup>La ko kjaxin chrókuínkítsa tí síchjin tsíkók'án la ko nchekítónhén sín nkehe sine sín tí chaxín kohya nkexro tsjinkítsa

sín. <sup>4</sup>A ntá tí chojni chjin tsíkók'án chóna xjeen o chóna inté, a ntá tí jehe sín mé chrók'uitja sín chrókjuinkitsa sín kixin sine tí sín kjéhya sín. Tíha mé chrókjuenkaxin sín tí it'é, iné sín kixin kjuínchek'ánkí sín, kixin xikaha mé jína tóxrjínhín Dios. <sup>5</sup>Tí tjan chaxín tsíkók'án na jehó tjan tjan mé jehó Dios tinkáchónki tjan la imá chrónóehé tjan Dios tie la ko nchakotjin. <sup>6</sup>A ntá tí sín tsíkók'án ixri sín tjasin sín jie la kjónté tjejóchón sín la éxí tsík'en sín xikaha tjejó sín. <sup>7</sup>Tétuénhén tí sín kixin sinchexiteyá sín kaín tíha kixin tsokohya nkexro tsjanchia jie. <sup>8</sup>A ntá tí nkexro tóxakuenhya kixin tí sín naxa kjéhya la ko kjaxin tóxakuenhya kixin tí sín tjejó ntoe ch'án mé xikahó tjakoxín kixin ninkehó tinkáchónkihya ch'án Dios. Mé xikaha antsí chóna ch'án jie a ntá tí sín tinkáchónkihya Inchéni la kénhyó.

<sup>9</sup>Tí ts'ínixín ihnié tí sín tsíkók'án la chrók'uínixín jehó tí sín chóna sesenta nánó la ko tí sín k'uéchóna sín jnkokoá xii. <sup>10</sup>Kjaxin chrókjuakoxín tjan kixin jína ch'e tjan xra la ko chrókjuakoxín tjan kixin jína kjuínchek'ánkí xjeen tjan la ko kjaxin jína nixjehé tjan tí nkexro tjiji ntoe tjan la ko kjaxin k'uàyakonhen tjan tí sín tinkáchónki Cristo la nchehnkehya tjan la ko kjaxin kjuínkítsa tjan tí sín níhi la ko í so xra jína kjuích'e tjan.

<sup>11</sup>A ntá chrók'uénixínhya ihnié tí sín tsíkók'án naxa tsjéhya nánó chóna kixin tsontácho asén sín kixin í jnko chojni ntoa tsotéhe sín inaá la ntá tsítóhe sín ixra kuènte Cristo. <sup>12</sup>Ntá xikaha tsjasin sín jie kixin sinchexiteyáhya sín tí nkehe tsintácho sín. <sup>13</sup>Kjaxin sátsji sín ijnko nchia la í jnko nchia la ntá tsoséhe sín la ntá kjaxin xriko sín kjuach'ia la ko ch'éna sín kjuach'ia la kaín nkehe nixja

sín la jehya jína tí xikaha chrónixja sín. <sup>14</sup>Méxra tí sín tsíkók'án naxa tjarisoá sín la íchá jína chrókótehe sín chróchóna sín xjeen sín la ko chrók'uàyakonhen sín ntoe sín. A ntá tí xikaha la tí sín nínkakonhan la chrókjontahya sín tí jaha. <sup>15</sup>A ntá iso tí sín tsíkók'án ó kuítóhe sín tinkáchónki sín Inchéni kixin ch'ín Tsochren tsíkjachróde sín.

<sup>16</sup>A ntá jnkojín chojni tinkáchónki Cristo ts'ikon sín kixin tsíkók'án tí síchjin kjéhya sín ntá t'ichjánxin tsjinkítsa sín kixin sine tí sín a kixin tsochóntiahya sín tí nínko tsjinkítsa. Méxra jehó tí sín chaxín tsíkók'án chónahya ninkexró tsjinkítsa mé chrókjuinkítsa tí nínko.

<sup>17</sup>Tí nkexro jína t'etoan xra kuènte nínko la jehe sín chrókjuacha sín la ko kjaxin antsí chrókjuikosáyehe chojni tí sín chaxín xra ó tjejóchronkaxín sín la ko tjako sín. <sup>18</sup>Kixin xroon itén Dios mé ntácho kixin: “Chrók'uéjójáhyará kampoaxa ir'va tí koxinta tjejóch'e xra”, la ko kjaxin ntácho kixin: “Tí sín ch'e xra la síin kjuachaxin chrókjuacha sín.”<sup>††</sup>

<sup>19</sup>Chrókuahya kuénté jnkojín nkexro tsjikao kjuach'ia t'eka jie tí nkexro t'etoan xra kuènte nínko. T'ichjánxin tsonoxín yaá o iy'á sín tsochrónka kixin chaxín chóna jie tí nkexro a. <sup>20</sup>Chrókjuéntuéhé tí sín tjasin jie nkayakon kaín sín kixin ntá tsinhin tí í so sín kixin tsochrakon sín, í tsjasinhya sín jie. <sup>21</sup>Tétuánxian kjuachaxién Dios la ko Inchéni Jesucristo la ko tí sín ángel kjuéyá ch'án kixin jnkokón tsjéntuéhé kaín chojni la ko jnkokón tétuénhén sín kaín tí nkehe xrxanka. <sup>22</sup>Chrókjuéyáhya chjini jnkojín sín kixin ts'etoan sín xra kuénté nínko kixin tí chróchóna sín jie la kjaxin jaha chrókuamá tí jie. A ntá jaha chrókuítóhé kaín nkehe jínahya.

††5:18 Deuteronomio 25.4, Mateo 10.10; Lucas 10.7

<sup>23</sup> Jaha la jnkoyaxón tóniha tjeté tsaa. Jehya inta ó chrók'uia. Kjaxin intsi xranvino chrók'uia ntá chrókuítóaxián jína.

<sup>24</sup> Tí ijíé jnkójín chojni la t'ikonna noxín tí naxa kuítóexínhya ijíé sín. A ntá í so sín nóxinhya tjasin sín jie kjánchó tió tsjixín la tsonoxín tí jie tjasin sín. <sup>25</sup> Mé xikaha kjaxin ó t'ikonna kixin iso chojni imá ch'e sín tí xra jína. A ntá í so sín kjónté t'ikonhyani la xitjahya tsjak'emá sín tí nkehe jína ch'e sín.

**6** Tí sín ch'exín xra mé t'ichjánxin tsochóntehe sín kjuasáya tí lamo kuènte sín, kixin ntá tí í so sín la ts'ántaxiéhya sín ihnié Dios la ko ts'ántaxiéhya sín tí nkehe tjakoni. <sup>2</sup> A ntá tí sín ch'exín xra la chóna sín lámogé sín tinkáchónki Cristo la mé chrókuítóehya sín tsjikosáyehe sín tí lamo kixin jnkokoá kichó sín. La mé antsí jína chrókuinkitsa sín kixin ó nohe sín kixin tjinkitsa sín ijnko nkexro tinkáchónki Cristo la chrótjuèhe sín kichó sín. Jaha mé tjákohé sín kaín tíha.

### Tí nkehe tinkáchónkini tsochèxinni

<sup>3</sup> Iso sín tjako tí nkehe jehó sín tjenkayáxin sín la tóyóehya tí nkehe jína kjuako Ìnchéni Jesucristo la ko jehya tí nkehe tinkáchónkini. <sup>4</sup> Ó jehí nchehnke sín la nínkehó noehya sín. Tí ntoáhya nixja sín la tíha mé éxí ijnko chin chóna sín la tíha mé tjixin tí kjuachjinoxínhin la ko tjanjonko kichó sín la ko t'ántaxínhin sín kichó sín la ko chóntehya sín kichó sín kjuasáya. <sup>5</sup> Mé tí sín la náxrjónhya tjenkayáxin sín la jnkochrín tjanjonko kichó sín la noehya sín tí nkehe chaxín. Mé tjenkayáxin sín kixin tinkáchónki sín Ìnchéni kixin xikaha chrókuuacha sín nchónhya chichaon, ichro sín. Jaha la chrókuítóhé tí sín xikaha ch'e. <sup>6</sup> Tí tinkáchónkini Ìnchéni la ijnko nkehe imá tjetean la ko tjete tíha a ntá kjuaxróxin chrók'uejóni kjónté tí nkehe chónani ó. <sup>7</sup> A ntá tí kokjihini

la ninkehó kuikohyani tí kuini chjasintajni la kjaxin tió ts'enni la ninkehó nkehe xitjahya sátsjikoni. <sup>8</sup> A ntá tí chónani nkehe sineni la ko chónani ikéni la kjónté táhó la chrókóchéheni. <sup>9</sup> A ntá tí sín tjinkaon sín imá chrókóríko sín mé tí sín a mé tsjichròe sín la lontí sín kixin xikaha tjenkayáxin sín, la mé ts'itjáyanxín sín tíha. <sup>10</sup> Tí imá tjuèheni chichaon la tíha mé nuéé kaín nkehe jínahya. Jnkójín chojni imá tjinkaon sín tsochóna sín chichaon ntá tsjichròe sín tsítóhe sín tsinkáchónki Ìnchéni la tíha mé imá sinchekjasótexín sín asén sín.

### Jína tí nkehe tinkáchónkini

<sup>11</sup> Jaha mé tinkachónké Dios la títóhé kaín tí nkehe i. Chrókuak'e ntoá la ko kaín asán chróxráxinkávan Dios la ko chrókuinkachónkia ch'án la ko chrótjuéhé kichua la ko chrókónínkákonhya tjoka la ko chrókuinchehnkehya asán. <sup>12</sup> Tjanjonkoa kaín nkehe jehya tí jína la ko kaín asán tinkachónkia Ìnchéni kixin ntá chrókuuacha chrók'uayéhé tí kjuachón jnkochrín kixin mé xikaha k'uíyaha Dios tí jaha. Jaha la ó tsíchronka kixin tinkachónkia Ìnchéni la ó kuínhin la ko k'uíkon nchónhya chojni. <sup>13</sup> Nkayakon Dios, tí nkexro chjéhe kjuachón kaín xín tí nkehe síchón, la ko Jesucristo, tí nkexro tsíchronka jína nkayakon ch'ín Poncio Pilato, mé tétuanhan <sup>14</sup> kixin sinchexiteyá kaín tí nkehe t'etoan Dios kixin í chrókuinkíhya tí nkehe chrókuinkachónkia la ntá tsokohya ninkexró ts'eka jie tió tsjixrakája tí yaon tsokjan Ìnchéni Jesucristo. <sup>15</sup> Tsjixraká tí yaon kjueyá Dios ntá jehe ch'án mé tsjanjon ch'án kjuachaxin kixin itsi Jesucristo. Dios la jehó ch'án mé chóna ch'án kjuachaxin ts'etoan ch'án. Jehe ch'án mé tí Rey t'etuenhen kaín xín tí sín rey la ko



jehe ch'án mé Ìnché kaín chojni.  
<sup>16</sup> Jehó Dios mé chónhya ts'en la tí tjen ch'án la imá t'inkaséyan la ko kohya nínkexró tsjacha tsochjina tí tjen ch'án. Nínkexró k'uíkonhya tí jehe ch'án la ko nínkexró xitjahya ts'ikon tí jehe ch'án. Tsjikosáyeheni ch'án kixin jehe ch'án chóntha ch'án kjuachaxin ts'etōan jnkochrín. Amén.

<sup>17</sup> Tí sín chóntha itsjé nkehe chjasintajni mé tétuēnhén sín kixin sinchehnkehya sín la ko tétuēnhén sín kixin tsochón-tiāxinhya sín tí nkehe chóntha sín kixin jnkochrínhya tsochóntha sín tíha. Íchá jína chrókuinkáchónki sín Dios tjechón kixin jehe ch'án tjanjon ch'án kaín xín nkehe kixin mé xíkaha tjinkaon ch'án tsochéheni. <sup>18</sup> Tétuēnhén sín kixin

chrókjuich'e sín tí nkehe jína kixin tí chaxín chrókóríko sín la chrókjuinkítsa sín kíchó sín la chrók'óxikayehé sín tí nkehe chóntha sín. <sup>19</sup> Mé xíkaha chrókjuacha sín tí nkehe tjete kixin chr'éxin la jína chrók'uejó sín kixin chrókjuacha chróchóntha sín tí kjuachón jnkochrín.

### **Kjuixín k'uítuēnhen ch'ín Timoteo**

<sup>20</sup> Jaha Timoteo t'ayakonhén tí xra la tiénhya tí nkehe ntoáhya nixja chojni. Ntáchro sín kixin imá nohe sín kjánchó chaxínhya tíha. <sup>21</sup> Iso sín ó xíkaha ntáchro sín kixin imá nohe sín la ntá kjuíchròe sín í tinkáchónkihya sin Ìnchéni. Dios chrókjuintayavan tí jaha. Amén. Ó tjen.

## Tí xroon yóxin ikjin ch'ín Pablo chr'énnen ch'án tí ch'ín Timoteo

### Ch'ín Pablo nixjehe ch'án tí ch'ín Timoteo

**1** Janhan Pablo mé kjueyána Jesu-cristo t'ahá ch'án xra kixin xikaha tjinkaon Dios kixin mé xikaha ó chrónka ch'án kixin tsjanjon ch'án kjuachaxin tsochóna chojni kjuachón jnkochrínín tí tsinkáchónki sín Jesucristo. <sup>2</sup>Ikjian tí xroon i chr'anhan jaha kichó ni Timoteo. T'íkuān éxí xjanna tí jaha mé imá tjuaha. Kjuasáyé It'éni Dios la ko Ìnchéni Jesucristo chrókuuntayavan ch'án la ko chrókuikonòaha ch'án la ko chrótjáha ch'án kjuaxróxin.

### Chróchronka ch'án kixin tinkáchónki ch'án Jesucristo

<sup>3</sup>Xráxinkávan tí jaha tió níxjahá Dios nchakotjin la ko tie la ko tjetjancháha kjuasáyé Dios kixin imá tinkachónkia ch'án. Jehe ch'án mé t'ahá xra kaín asenná éxí xikaha mé k'uékjich'e tí sín tsík'axreníninna. <sup>4</sup>Xráxinkávan jnkochrínín nkexrí tsjanka la tjínkávan kixin chrótsjahá tí jaha inaá kixin tsochéhe asenná. <sup>5</sup>Ó ñona kixin kaín asán tinkachónkia Jesucristo. Kjaxin náchrja tjan Loida la ko iná tjan Eunice mé saoxín kuinkáchónki sín Ìnchéni Jesús la ntá ó ñona kixin kjá kjaxin jaha xikaha tinkachónkia ch'án.

<sup>6</sup>A ntá ijie ntáxráxinkávan kixin chrók'uitjáyannya tí kjuachaxién Dios kjuanjon ch'án k'uayéhé tió kjuaké tjaná chrítaón tí jaha. <sup>7</sup>Dios la kjuanjonhya Nchakuen ch'án kixin tsochrakonni. Náhí. Kjuanjon ch'án tí Nchakuen ch'án kixin tsochóntani kjuachaxin la ko jína tsotjuèheni ch'án la ko jína tsjenkayáxinni. <sup>8</sup>Chrókósuàhya chróchronka kixin tinkachónkia

Ìnchéni la ko kjaxin chrókósuàhya chróchronka kixin janhan tjechjinaxián tí xrjanka itén ch'án. Kjonté la íchá jína chrókjuasótexián tí tjákua tí tan tsaáxinni kixin tí kjuachaxin kuènte Dios ó k'uayéhé. <sup>9</sup>Jehe Dios mé kuaáxinni la ko kjueyá ch'án tí jeheni kixin jína chrók'uejóni. La jehya tí xra jína kjuích'eni ntá chrókuaáxinni. Náhí. Kjuasáyé Dios kjueyá ch'án tí jeheni kixin tsinkáchónkini Jesucristo. Tí naxá xrankíxixínhya chjasintajni mé tsíkjenkayáxin ch'án tíha kixin jehe ch'án mé imá tjuèheni ch'án. <sup>10</sup>Ntá jie ó kjuakoxin Dios kixin tjuèheni ch'án kixin ó kui tí nkexro tsaáxinni mé Jesucristo. Kjuínchek'itjáyán ch'án tí kjuachaxin k'uéchóna tí kjuach'én kixin kjuacha ch'án xechón ch'án inaá. Chronkaxín itén ch'án nkexrí tsaáxinni ntá ó kónoexinni kixin tí kjuachón kjuakoxin ch'án mé xitjahya ts'itjáyán.

<sup>11</sup>Dios mé k'uetuanna sátsjixrjanka itén ch'án la ko kjueyána ch'án tsjákoḡa tí sín jehya sín judío tí tan jína. <sup>12</sup>Mé xikaha tjetjasótexinna kaín tí nkehe i la kjonté tósuànahya kixin ó choxian jína tí nkexro tinkachónkia. Mé ó ñona kixin chóna ch'án kjuachaxin ts'ayakonhenni ch'án tsjixrakájia tí yaon tsokjan ch'án. Méxra janhan tjahá ch'án asenná kixin ts'ayakonhen ch'án.

<sup>13</sup>T'itjáyannya tjákua kaín nkehe jína ó kjuákḡa. Naxá títekávan la ko tjuèhé kíchuará kixin tinkachónkia Cristo Jesús. <sup>14</sup>Kjuachaxién tí Nchakuen Dios chóntani jnkoinkoni mé t'ayakonhén jína tí tan tjákua kjuíntakitonhan Dios k'uayéhé.

<sup>15</sup>Jaha mé ó noha kixin kaín tí sín estado Asia mé jehe sín kuítōna sín la ko kjaxin tí ch'ín Figelo la ko ch'ín Hermógenes. <sup>16</sup>Tjáncháha Ìnchéni kixin imá tsíkonóḡe ch'án tí sín tjejó ntoe tí ch'ín Onesíforo kixin jehe ch'án mé imá kjuínkitsana ch'án la ko kósuèhya ch'án

ikui ch'án kjónté tjéchjina. <sup>17</sup>Tí nantá kjuíji ch'án chjasin Roma ntá kuítóehya ch'án kjueyána ch'án hasta k'uitjana. <sup>18</sup>Tjáncháha ìnchéni kixin tí yaon itsi ch'án ntá chrókuikonóehē ch'án tí ch'ín a kixin jaha ó noha jína kixin nkexrí kjuínkítsa ch'án tí janhan tí chjasin Éfeso kjaxin.

**Kjuíncheyóexin ch'ín Pablo  
kixin jeheni éxí yóhē ijnko  
soldado jína kuènte Jesucristo**

**2** Jaha xjeenni tákjá tí kjuachaxin kjuasáyé Jesucristo kjuanjon ch'án kixin tsjinkítsa kixin tinkáchónkini ch'án. <sup>2</sup>Tí nkehe kuínhín kjuákua nkayakon nchónhya chojni mé xíkaha chjehé tí xrā tí sín jína choxian jína ch'e xrā kixin ntá jehe sín mé xíkaha chrókjuakohe sín í so chojni ínaá.

<sup>3</sup>Jaha la kjónté nchónhya nkehe kjuasótia la chrókjuacha kixin ijnko soldado jína kuènte Jesucristo. <sup>4</sup>Kohya nijnko soldado jína ch'e xrā chrók'uixenhen ókjé xrā kixin t'ichjánxin jnkójínxón xrā sich'e ch'án kixin éxí tjinkaon tí nkexro t'etuenhen ch'án. <sup>5</sup>Mé xíkaha éxí yóhē ijnko nkexro tsotsítán. Ntá tsjachahya ts'áyéhe ch'án nijnko nkehe tí sinchexiteyèhya ch'án tí sín t'etoan. <sup>6</sup>La éxí yóhē ijnko nkexro ch'e xrā nonte ntá chóna ch'án kjuachaxin saoxín tsakja ch'án tí nkehe ts'óna. <sup>7</sup>Chrórxaxinkávan jína kaín tí nkehe xrjanka la ìnchéni mé tsjinkítsa tsiénxian kaín nkehe.

<sup>8</sup>Xrāxinkávan kixin Jesucristo la ó xechón ch'án. Jehe ch'án mé k'uaxrjenixin ch'án ch'ín rey David. Tíha mé tí tan jína tsaáxinni tjétjàkua. <sup>9</sup>Tí tan tjéxrjanka mé tjasótexinna. Tíha mé tjéchrontetoxinna cadena éxí ijnko chojni tsíkjàya la kjónté tí itén Dios la jehya tjechrontetoxín cadena. <sup>10</sup>Méxrā kjónté nchónhya t'atsínka tí janhan la

ntaxiteyá kixin tí í so sín kjueyá Dios tsaáxin sín ch'án kixin tsochóna sín kjuachón jnkochríxín kixin tinkáchónki sín Jesucristo.

<sup>11</sup>Tíhi mé chaxín:

Tí jehe ch'án k'uénxinni ch'án a ntá chr'éxin ts'ejókoni ch'án.

<sup>12</sup>La tí tsjasótexínni tí jehe ch'án la ntá kjaxin ts'áyéheñi kjuachaxin kuènte ch'án ts'etōanni.

A ntá tí chrókjuinchemáni tí jehe ch'án na ntá kjaxin ch'án la xíkaha sich'e ch'án.

<sup>13</sup>Kjónté nchexiteyèhyani ch'án la jehe ch'án tjenchexiteyá ch'án kixin Dios la xitjahya sich'ia ch'án.

**Chrókjuich'eni tí xrā jína**

<sup>14</sup>Nchexraxinkávan sín kaín tí nkehe i. Dios tjetsjehe tétuenhén sín kixin chrókuítóhe sín tí nixja sín tjanjónxin sín kixin ó chónkó tíha la ninkehó sínkíhya. Tí xíkaha ch'e sín la sinchek'tijáyan sín tí sín tjejótinhin. <sup>15</sup>Sich'e xrā jína kixin tsoxrjínhin Dios tí xrā tjech'e a. Ntoá chrókjuákua tí tan jína chaxín kixin ntá chrók'uichjánxinhya chrókósuaha. <sup>16</sup>La títóhé tí nkehe náxrjónhya la ko chónkó nixja iso sín kixin tí sín nixja xíkaha la antsí tsinkák'ánkí tí nkehe jínahya nixja sín. <sup>17</sup>Tí nkehe jehya jína tjako sín mé éxí yóhē ijnko iton sóa sítinkáchr'enka. Mé xíkaha tjako tí ch'ín Himeneo la ko ch'ín Fileto. <sup>18</sup>Jehe sín mé ó kjuixin kuítóhe sín tí ntja ntoá la ntáchro sín kixin ó kjuixin k'uátsínka tí tsoxechón chojni. Ntá xíkaha ch'iyehē sín tí í so sín la tsjitóxinhin sín tí nkehe tinkáchónki sín. <sup>19</sup>Kjánchó tí sín tinkáchónki Dios éxí yóhē tí xrō xrankíxixín tjat'ō xitjahya tsoxíka la chóna éxí ijnko sello tí itén Dios ntáchro kixin: “Ìnchéni mé tjatsoan ch'án tí chojni kuènté ch'án”,<sup>¶¶</sup> la kjaxin ntáchro kixin: “Kaín tí sín tin-

<sup>¶¶</sup>2:19 Números 16.5; Juan 10.14

káchónki Cristo mé t'ichjánxin chrókuítohe sín kaín nkehe jínahya," mé xíkaha ichro itén Dios.

<sup>20</sup> Ijnko nchia jié kuènte tí sín rico la síin vaso tsík'óna chica oro la ko vaso tsík'óna chica plata. La kjaxin síin nkehe tsík'óna ntachiso la ko nkehe tsík'óna nchetje. Iso la xṛá ó tsík'óna kuènte tí xṛá tje-toan la í so la tsík'óna kuènte tí xṛá tje-tuanhya. <sup>21</sup> A ntá injko chojni chrókuítohe kaín jié chrókóyóhe éxí injko vaso tjóá jína kixin chrókuicháxinhin Ìnchéni. A ntá tí nkexro xíkaha chrókuich'ehya tí nkehe jínahya kixin chrókuicháxinhin Ìnchéni tí xṛá jína.

<sup>22</sup> Tjtohé kaín tí nkehe jehya tí jína tóxrjinhin í so tí sín ntasoá a. Chrókjuak'e tí ntja ntoá la ko kaín asán chrókuinkachónkia Cristo la ko chrótjuèhé kaín chojni la ko kjuaxróxin chrók'uejokoa kaín sín. Mé xíkaha chrók'uejó kaín xín tí sín kótjóá asén mé kaín tí sín tinkáchónki Ìnchéni.

<sup>23</sup> Jaha chrókuahya kuènté tí sín lontj tjenkayáxinhya jína kixin jaha ó noha kixin xṛahya chrókjuanjonko kichó sín.

<sup>24</sup> A ntá ninkexro ch'ehe xṛá Ìnchéni chrókjuanjonko kichó sín kixin jína chrókjuinkitsa kichó sín. Chrókónohe sín kaín nkehe jína chrókjuako sín la ko chrókónínkakuenhya sín kichó sín.

<sup>25</sup> Kaín asén sín jnkójna chrónixjehé sín tí sín titekakonhya kixin chróchónhen sín kixin Dios chrókjuinkitsa tí sín a chrók'uixinkí tí ntoáhya tjenkayáxin sín kixin ntá chrókónohe sín tí nkehe chaxín ntoá chrókjuich'e sín <sup>26</sup> kixin t'ichjánxin chrókónohe sín nkexrí chrókuaáxin sín kixin ch'ín Tsohren tjinkaon chrókjuich'iyehé sín ntá chrókjuasin sín jie.

### Nkexrí ts'ejó tí chojni chjasintajni tí yaon tsjixixín

**3** T'ichjánxin chrókónoha kixin tí yaon tsjixixín ntá itsi tí yaon

kjuaxróxinhya ts'ejó chojni. <sup>2</sup> Tí sín chjasintajni tsinkáchónkihya Ìnchéni mé imá chrók'uetōan sín jehó la ko imá tsoxrjinhin sín chichaon la ko sinchehnke sín la ko imá ts'ántaxinhin sín Dios. Sinchexiteyèhya sín it'é sín la ko iné sín la ko tsochóntahya sín kjuasáya la ko tsinkáchónkihya sín ninkehó dios. <sup>3</sup> Tsojtjuèhya sín kichó sín la ko tsikonóehya kichó sín la ko tsjonta sín kichó sín la ko ninkexró tsochrakuenhya sín la ántōsén sín tsjasin sín jie, la ko imá tsojjehe sín la ko imá tsonínkakonhen sín kaín nkehe jína. <sup>4</sup> Jehé sín mé sinchekji kichó sín la ko tsjenkayáxinhya sín jína la ko sinchehnke sín. Tsojtjinkaon sín tsjeyá sín tí nkehe ntáchro asén sín ó a ntá tsjeyáhya sín Dios. <sup>5</sup> Jehé sín la éxí chojni tinkáchónki Dios xíkaha ts'ejó sín. Kjánchó chaxínhya. Tsinkáchónkihya sín tí kjuachaxin kuènte Dios chaxín ntoá.

Méxṛá jaha la chrókuankíehya tí chojni ch'e xíkaha. <sup>6</sup> Iso tí sín a mé ixri sín t'ixenhen ntōe ókjé chojni la ch'iyehé sín tí chojni chjin lontj tjasin jie la nchexiteyèhe sín kaín tí ntáchro asén sín. <sup>7</sup> La xṛáxín ó tinkák'itja sín kjánchó nunca kuénxínhya sín tí nkehe chaxín ntoá.

<sup>8</sup> A ntá éxí yóhe tí sín k'uékjinchexroan mé ch'ín Janes la ko ch'ín Jambres mé k'uénínkakonhen sín ch'ín Moisés mé xíkaha tí sín tjako ijie nínkakonhen sín tí nkehe chaxín ntoá. Imá jínahya tí kjuaxrexinkaon kuènte sín la ko titekakonhya sín tí nkehe chaxín tinkáchónkini. <sup>9</sup> Kjánchó tsjachahya sín sich'ia sin isé kixin kaín chojni tsonohe kixin tí sín a mé lontj sín kixin éxí xíkaha tsíkónhen tí yaá sín k'uékónínkakonhen ch'ín Moisés.

**Tí nkehe kjuixixín k'uetuēnhen  
ch'ín Pablo tí ch'ín Timoteo**

<sup>10</sup> A ntá jaha mé ó kuítekáván tí nkehe kjuàkua. Ó noha nkexrí kjuak'è janhan la ko ó noha tí xra kjuít'a janhan. Ó noha nkexrí tinkachónkia Ìnchéni la ko noha kixin tjokahya kónínkavan la ko noha nkexrí tjuaha chojni. Ó noha kixin kjónté kónínkaon chojni la kuítóahya tí xra a <sup>11</sup> kjónté chónkina sín la ko kjuasótena. Ó noha nkehe kónna tí chjasin Antioquia la ko Iconio la ko Listra. Chrók'óyánna sín la kjuínchekjuasótena sín kjánchó Ìnchéni mé kjuínkítsana kjónté kaín tí nkehe chrókónna. <sup>12</sup> Kaínxín tí sín tjinkaon tjóá chrók'u'ejó sín nchexiteyéhe Cristo Jesús la t'ichjánxin tsjasóte sín. <sup>13</sup> A ntá tí sín jínahya la ko tí sín ixri ch'ia sín mé ts'óna sín antsí jínahya. Jehe sín xrich'ia sín la ch'iaxín sín nkehe jínahya.

<sup>14</sup> Jaha la jína chrókjuak'e la í chrókjuínkíhya tí nkehe k'uíjtá la ko tí nkehe ó kuítekáván. Jaha la ó noha tí nkexro kjuakóha. <sup>15</sup> Jaha la desde xjanntsia k'uíjtá nkexrí nixja xroon itén Dios la tíha mé tónoexínni kixin Cristo Jesús tsaáxinni kixin tinkáchónkini ch'án. <sup>16</sup> Ntá kuenté xroon Biblia kjuachaxién Nchakuen Dios kjuínkítsa tí nkexro ikjin la tíha mé jína tsoxrácuxinni tí nkehe chaxín la ko tíha mé jína tsjentuéhéni la ko tsjinkítsani tsonoheni nkexrí chrók'uejóni ntoá <sup>17</sup> kixin tí nkexro tinkáchónki Dios chrókónohe jína la ko chrókjuacha sich'e kaín tí xra jína.

**4** Kjuachaxién Dios la ko Ìnchéni Jesu-cristo, tí nkexro itsi éxi ijnko rey la sinchekitoxén ijie kaín chojni tjejóhón la ko tí chojni tsík'en, <sup>2</sup> mé tétuānhan chrókjuakua itén Dios kaín asán kjónté á chrókuinhin sín o náhí. Nixjehé sín jnkójina kixin tsitekaon sín la ko tjén-tuéhé sín jnkójina. Chrókóninkákonhya

chrókjuakohé sín. <sup>3</sup> Itsi ijnko yaon ntá tsotjinkakonhya sín tsinhin sín tí nkehe jína. A ntá sinchexiteyéhe sín tí nkehe ntácho asén sín ó. Tsjeyá sín nchónhya maestro tsjakóhe sín jehó tí nkehe tóxrjínhin sín chrókuinhin sín. <sup>4</sup> Méxra tsítóhe sín tí nkehe chaxín ntoá la ntá itsa sín kuènté kaín nkehe chaxínhya. <sup>5</sup> Méxra jaha jína chrókjuenkayáxian la chrókjuacha kjónté tsjasótia. Chrókjuin-taxín chrókjuich'e xra chrókjuakohé chojni itén Dios tsaáxinni mé xikaha sinchexiteyá jína tí xra chonta.

<sup>6</sup> Ntá janhan ó kjuixraká tí hora tsjasótena la ko ó kjuixraká tí hora its'èn. <sup>7</sup> Ó kjuánjonkian jína kaín tí nkehe jínahya la ko ó kjuixinna tí xra kuèntana la ko kuítóahya jína kuinkachónkia Ìnchéni. <sup>8</sup> A ntá ijie la tí nkehe tsíttonna mé tjechónhen kixin jína kjuak'é ntihi. Tíha mé tsjanjon Ìnchéni tí yaon itsi ch'án. Jehe ch'án mé ijnko juez jína. Jehya kixin janhván tsákjaá tí nkehe tsjanjon ch'án. Náhí, kjaxin kaín tí nkexro kuítekaon sin ch'án la ko chéhe sín tjejóhónhen sín tió tsi ch'án.

**Ch'ín Pablo k'uetōan  
tsjijitsjehe sín ch'án**

<sup>9</sup> Jaha chrókóxakonhan tjoka chrók'uinkatsjehé tí janhan <sup>10</sup> kixin ch'ín Demas la kuítóhe ch'án tí janhan kixin imá kóxrjínhin ch'án tí nkehe kuènte chjasintajni. Sátsíkji ch'án chjasin Tesalónica. Ch'ín Crescente mé sátsíkji ch'án chjasin Galacia a ntá ch'in Tito sátsíkji ch'án chjasin Dalmacia. <sup>11</sup> Jehó ch'ín Lucas naxa tjékian ch'án. Tjíkjéyá ch'ín Marcos la tsjúkuana ch'án ntihi kixin jehe ch'án mé jína tsjinkítsa ch'án tí xra chonta ntihi. <sup>12</sup> A ntá ch'ín Tíquico mé kuétuānhan ch'án sátsji ch'án chjasin Éfeso. <sup>13</sup> Tió ts'inka ts'inkakuana tí ka t'ítsate kuítóha chjasin Troas ntóé ch'ín Carpo la ko

kjāxin ts'inkakuana tí libro kuèntana la ko koi tí tjeé iko tsík'óna xroon.

<sup>14</sup>Tí ch'ín Alejandro tí ch'ín ch'e xra chica mé nchónhya nkehe jínahya kjuích'ena ch'án. Kjánchó Ìnchéni mé tsjenkehe ch'án kaín nkehe kjuích'e ch'án. <sup>15</sup>Jaha mé tóxakonhan kixin tí jehe ch'án kixin imá nínkakonhen ch'án tí nkehe tjakoni.

<sup>16</sup>A ntá tí saoxín k'uèya tí síxree tí kjuia tí tjejó sín la ninkexró kjuínkĩtsahyana. Kaín sín me kuítõna sín janhvân. Kjonté xikaha la tjáncháha Dios kixin chrókuahya ch'án kuèntá kixin xikaha kjuích'e sín. <sup>17</sup>Kjánchó Ìnchéni mé chaxín kjuínkĩtsana ch'án la kjuanjon ch'án kjuachaxin kixin tsjachana naxa jína tsjàkua itén ch'án. Ntá kuínhin kaín tí sín jehya judío. A ntá Ìnchéni kjuínkĩtsana kixin kjónehyana koxra. <sup>18</sup>Ìnchéni mé tsjinkĩtsana kixin naxa

tsõnnahya kaín nkehe jínahya. Jehe ch'án mé ts'ayakonna ch'án ts'ixanhan tí tjet'etoan ch'án nkaya nkajní. Kjuasáyé ch'án kixin xikaha jnkochrín tsoxiteyá. Amén.

### Ch'ín Pablo kjuixixín nixja ch'án

<sup>19</sup>Jaha nixjehé tí tjan Prisca la ko ch'ín Aquila la ko nixjehé tí sín sín ntõe ch'ín Onesíforo. <sup>20</sup>Kuítõhe ch'ín Erasto chjasin Corinto. A ntá ch'ín Trófimo kuítõhe chjasin Mileto kixin kónfhi ch'án. <sup>21</sup>Tóxakonhan chrók'uinka naxa t'ixenhya nchakuen kin. Tí ch'ín Eubulo la ko ch'ín Pudente la ko ch'ín Lino la ko tjan Claudia la ko kaín sín kíchó ni ntihi nixjaha sín jnkójina.

<sup>22</sup>Ìnchéni Jesucristo chrók'uajikoa ch'an la Dios chrókjuintayaonrá kaín rá mé xikaha tsoxiteyá. Amén. Ó tjen.

## Tí xroon ikjin ch'ín Pablo chr'énhen ch'án tí ch'ín Tito

### Ch'ín Pablo nixjehe tí ch'ín Tito

**1** Janhan Pablo mé t'ahā xṛa Dios la ko tsíkjejána Jesucristo kixin tsjákoḡa tí í so sín tsíkjejá Dios kjaxin kixin ts'itja sín tsonohe sín kixin nkexrí chrókuinkáchónki sín tí nkehe chaxín. <sup>2</sup>Ntá ts'ejóchónhen sín tsochónṭa sín kjuachón jnkochr'ín. Dios la xitjahya sich'ia la kaín tí nkehe tsíchronka ch'án ósé tí naxā k'ónahya chjasintajni la mé xikaha tsonhen. <sup>3</sup>Ntá tí yaon tsintáchro Dios la mé jie ó xiteyá la ntá kónoxín tí tan kuènte ch'án. A ntá Dios tí nkexro tsaáxinni mé k'uəṭoan kixin s'it'ahā ch'án xṛa tsjákuia itén ch'án. <sup>4</sup>Ikjian tí xroon i chr'anhan jaha Tito. T'íkuān éxí chaxín xjanna tí jaha kixin yóini tinkáchónkini Jesús. Kjuasáyé It'éni Dios la ko Jesucristo tí nkexro tsaáxinni, chrókjuintayavan la ko chrókuikonóḡa ch'án la ko chrótjáha ch'án kjuaxróxin.

### Tí xṛa sich'e tí ch'ín Tito chjasin Creta

<sup>5</sup>Kuítōha jaha tí isla Creta kixin jaha chrókuétuenhén tí sín síin ntiha kixin nkexrí chrók'uejó sín la ko chrókónoxín nkexro ts'əṭoan kuènte jnkójnko nínko jnkójnko chjasin éxí tí kuétuānhan jaha. <sup>6</sup>T'ichjānxin kixin tí nkexro ts'əṭoan xṛa kuènte nínko la jína chrókjuak'e kixin kohya nkexro chrók'ueka jie, la ko chróchónṭa jnkokoḡa ichjién la ko tí xjeen sín chrókuinkáchónki Ìnchéni kixin tsókohya nkexro chrókjuanchia jie kixin jehya tí jína tjejóch'e sín, la ko kjaxin chrókójiehya sín. <sup>7</sup>Mé xikaha tí nkexro ts'áyéhe tí xṛa ts'əṭoan xṛa kuènte nínko mé ts'əṭoan nkexrí tsonhen xṛa kuènte Dios la ntá t'ichjānxin ijnko nkexro tsjenkayáxin jína, chrókjuasin-hya jie. La chrókjuinchehnkehya la ko

chrókóninkakonhya tjoka. La ko kjaxin jehya ijnko nkexro tókoan la ko jehya ijnko nkexro tjejá kjuanínkaon la ko chrókóxrjienhya sín chrókjuich'ia sín ntá chrókjuacha sín chichaon. <sup>8</sup>Kjaxin jína chrókjuak'e ch'án kixin tí tsjiji ijnko nkexro ntəe ch'án chrókjuanjon ch'án kjuachaxin chrókjuak'e tí nkexro a. La ko jína chrókjuak'e ch'án la ko jína chrókjuenkayáxin ch'án kixin ijnko nkexro ó tsíkjinchetjóá Dios la ko chróchónṭa ch'án kjuasáyé ch'án. <sup>9</sup>Kjaxin t'ichjānxin chrókuítəehya ch'án tí tan jína xrákoḡe ch'án kixin ntá jína tsjákoḡe ch'án í so chojni tí nkehe ntoá la kjónté nkexro tjinkakonhya tsinhin la jína chróchenka ch'án chrókuinhin.

<sup>10</sup>Síin itsjé tí sín nínkaon mé tí sín a la mé tí sín judío la mé nixja sín éxí lənti sín mé xikaha ch'iyehé sín chojni. <sup>11</sup>Tí sín a la chrók'uíkjeḡeni ir'va sín kixin tjachrəde sín nchónhya chojni kixin tjako sín tí nkehe jehya jína kixin chrókjuich'ia sín chrókjuacha sín nchónhya chichaon.

<sup>12</sup>Ijnko ch'ín kuènte chjasin Creta la mé tsíchronka ch'án nkexrí tjejó tí sín chjasén ch'án. Ntáchro ch'án kixin: “Kaín tí chojni chjasénni mé imá ch'ia sín la ko imá jiehe sín la ko imá kóchjinka sín la ko séhe sín”, mé xikaha chrónka ch'án. <sup>13</sup>Tí nkehé tsíchronka ch'án mé chaxín ntoá. Méxṛa əntsi fuerte chrókjuéntuéhé sín kixin ntá jína chrók'uejó sín chrórxaxinkaon sín Dios. <sup>14</sup>Nixjehé sín kixin chrókuaḡa sín kuenté kaín tí nkehe tsík'axrjenixin kja tí sín judío tjako la ko chrókuitekakonhya sín tí nkehe t'əṭoan tí sín nínkakonhen tí nkehe chaxín.

<sup>15</sup>Tí sín chaxín tjóá kjuaxrexinkaon kuènte sín ntá kaín nkehe ch'e sín la jína. A ntá tí nkexro titekakonhya la tjuáḡa kjuaxrexinkaon kuènte la kohya ninkehó nkehe jína tí kjuaxrexinkaon kuènte sín la kaín nkehe tjenkayáxin sín

mé tjuáhya. <sup>16</sup>Ntáchro sín kixin chóxin sín Dios a ntá tí t'ikonna nkexrí ch'e sín ó noexinni kixin chaxínhya tíha la ch'ia sín. Jehé sín mé ntoáhya tjenkayáxin sín la ko jjehe sín la ko titekakonhya sín. A ntá tí xikaha ch'e sín la, ¿nkexrí chrókjuich'e sín tí xra jína?

### Chrókjuako ch'ín Tito tí tan chaxín

**2** A ntá jaha chrókjuákua éxí tí chrónka tí tan jína chaxín. <sup>2</sup>Tjákohé tí sín ó táda kixin chrókókoanhya sín la ko jína chrók'uejó sín la ko chróchóna sín kjuasáyé sín la ko chróchóna sín ijnko kjuaxrexinkaon jína la ko jína chrókuinkáchónki sín tí nkehe chaxín la ko chrótjuèhe sín kichó sín la ko chrókónínkakonhya sín kjónté tsjasóte sín. <sup>3</sup>A ntá kjaxin xikaha tí sín ó nána la kjaxin jína chrók'uejó sín la kjaxin chrókjuinchekuáxinhya sín chrókuinkáchónki sín kjuach'ia la ko kjaxin chrókókoanhya sín. Chrókjuakoxin sín ijnko kjuaxrexinkaon jína <sup>4</sup>kixin xikaha chrókjuakuxin sín tí chojni chjin tjarisoá a kixin chrótjuèhe sín xii sín la ko chrótjuèhe sín xjeen sín <sup>5</sup>la ko chrókjuich'e sín xra jína la ko ntoá chrókjuenkayáxin sín la ko jína chrók'uàyakonhen sín nchia ntoé sín la ko chrókójína sín la ko chrókuitekakonhen sín xii sín. Tí xikaha chrókjuich'e sín chrókjuinchexiteyá sín la kohya nkexro chrók'uántaxínhin tí itén Dios tinkáchónkini.

<sup>6</sup>Kjaxin xikaha chrókjuinchexraxinkávan tí sín ntasoá kixin jína chrók'uejó sín chróchóna sín kjuasáyé sín. <sup>7</sup>Jaha mé chrókjuákoéxian sín kaín nkehe jína la ko chrókjuákohé sín kixin ntoá chrók'uejó sín. <sup>8</sup>Jaha la chrónixja tí nkehe jína kixin kohya nkexró chrók'uántaxín la ntá xikaha chrókósuèhe tí sín nínkaon la ntá kohya nkehe jínahya chróntáchro sín kuènte tí jeheni.

<sup>9</sup>Tétuèhén tí sín xrich'exón xra kixin chrókjuinchexiteyèhe sín tí lamo kuènte sín la ko chrókójína sín la ko chrónixjankiehya sín tí nkexro ch'ehe sín xra <sup>10</sup>la ko kjaxin chrókueéhya sín kixin jehya ijnko chojni chee tí jehé sín. Ntá kaín chojni chrók'uikon sín kixin tjakoxin sín kixin náxrjón tí itén Dios chrókuaáxinini.

<sup>11</sup>Kixin Dios mé kjuakoxin ch'án kixin nkexrí tjuèheni ch'án kixin jehé ch'án mé tsaáxin kaín chojni. <sup>12</sup>Kjuasáyé Dios mé tjakoheni ch'án kixin chrókuítóheni kaín nkehe jje la ko kaín tí nkehe jínahya tjenkayáxinini. La ko jína chrók'uejóni chjasintajni la ko ntoá chrók'uejóni la ko chrókuinkáchónkini Dios. <sup>13</sup>Kjaxin chrók'uejóni jína kixin chrókóchéheni chrók'uejóchónhenni tí yaon kjuachaxién Dios jje itsi Dios la ko Jesucristo tí nkexro tsaáxinini. <sup>14</sup>A ntá jehé ch'án mé k'uenyákonhenni ch'án kixin tjinkaon ch'án tsaáxinini ch'án kixin tsotjuáxin kaín jje chóntani kixin ntá jeheni mé ts'onani ijnko chojni sich'ehe ch'án xra la ko tsoxrjínhinini sich'eni kaín xra jína tjinkaon ch'án.

<sup>15</sup>Tíhi mé chrókjuákua la ko chrókjuinchexraxinkávan sín la ko chrókuétuèhén sín kjuachaxién Dios. Chrókuítóéhya kixin ninkexró chrókókjonièhya tí nkehe tjákua jaha.

### Jína chrók'uejó tí sín tinkáchónki Cristo

**3** Chrókjuinchexraxinkávan sín kixin sinchexiteyèhe sín tí gobièrno la ko tsitekaon sín ichrén xra ts'etqan tí síxreé kixin chrókjuich'e sín kaín xra jína ts'etqan tí sín a. <sup>2</sup>La ko chrók'uántaxiènhya sín ninkexró la ko kjuaxróxin chrók'uejó sín la ko chrók'óna sín ijnko chojni jína la ko chrókjuakoxin sín kixin jehya ijnko chojni nchehnke la chrókjuikosáyehé sín kaín chojni.

<sup>3</sup>Jeheni kjaxin ósé k'uélontini la ko k'uékitekakonhyani Dios. Chjini k'uék'a-



jini la k'uékóxrjínhinni kaín nkehe jínahya. La ko jehya jína k'uék'e-jóni la ko k'uéchóntani kjuachjinoxín-hin la ko k'uéchjinoxíenhenni í so chojni. <sup>4</sup> A ntá tí Dios tsaáxinni mé kjuakuexínni ch'án kixin jína ch'án la ko tjuèhe ch'án kaín chojni. <sup>5</sup> Jehe ch'án kuaáxinni ch'án la jehya kixin ichrén xra jína chrókjuich'eheni ch'án. Náhi, ó jehí kuikonóeheni ch'án la ntá kjuínchekaáni ch'án la ko kjuínchetjóáni ch'án. Ntá kokjfhini nixin kixin tí Nchakuen ch'án la mé k'uáyèxinni kjuachón nixin. <sup>6</sup> Kjuasáyé Jesucristo tí nkexro tsaáxinni ntá kjuínchekitónhenni Dios Nchakuen ch'án kixin tsochóntani kjuachaxin kuènté ch'án. <sup>7</sup> A ntá xikaha kjuasáyé ch'án kjuínchetjóáni ch'án kixin ntá tjejóchónhenni tí kjuachón jnkochrínin tsjanjon ch'án.

<sup>8</sup> Kaín tíha mé chaxín. Tjínkavan kixin jaha chrókuétoan kaín tíha kixin ntá kaín tí sín tinkáchónki Dios mé chrókuitekaon sín chrókjuich'e sín kaín nkehe jína. Kaín tí nkehe la mé jína la ko tsjinkítsa kaín chojni. <sup>9</sup> A ntá jaha mé titohé tí sín tjachaxín kíchó sín lontí sín la ko titohé tí nkehe tinkáchónki sín kuènte tí sín tsík'axrjenínin sín la ko titohé tí sín tjanjonxin tí ley kuènte Moisés. Kaín tíha la ó chónkó la ninkehó kjuaxrexinkaon chóntahya.

<sup>10</sup> Jnkojín nkexro tjinkaon tsjixrónkáxin tí tójnkotsé nínko ntiha la nixjehé ch'án jnkojína senó la ko yóxin ínaá ntá tí titekakonhya ch'án ntá titohé sátsji ch'án <sup>11</sup> kixin ó noha kixin tí chojni xikaha a mé ntoáhya tjenkayáxin sín kixin jehó sín nchek'ánkí sín íjje sín.

### Tí nkehe k'uetqan ch'ín Pablo

<sup>12</sup> Tí tsétuanhan ch'ín Artemas la ko ch'ín Tíquico kixin tsjiji sín tí tjen jaha la ntá tjoka chrók'uinkatsjehé tí janhan chjasin Nicópolis kixin ntiha tsjak'é ts'atsínkajia tí nchakuen kin. <sup>13</sup> Jína chrókjuínkítsa jaha tí ch'ín Zenas tí ch'ín nixjayákonhen í jnko chojni la ko tí ch'ín Apolos la ko chróchjehé sín kaín tí nkehe t'ichjánxinhin sín tió sátsji sín kixin ninkehó nkehe chrók'uitjáyanhya tí t'ichjánxinhin sín. <sup>14</sup> Ntá tí sín í so chrók'uitja sín nkexrí sich'e sín tí xra jína la ko chrókjuínkítsa sín kíchó sín ichrén nkehe t'ichjánxinhin sín kixin chrókjuakoxin sín kixin jína tjejó sín.

### Ó kjuixixín nixja ch'ín Pablo

<sup>15</sup> Kaín tí nkexro tjékian janhan ntihi nixjaha sín jnkojína. Jaha mé nixjehé kaín tí sín tinkáchónki Inchéni ntiha mé kaín tí sín imá tjuèheni sín. Dios mé chrókjuincheyaonrá ch'án kaín rá. Amén. Ó tjen.

## Tí xroon chr'énhen ch'ín Pablo tí ch'ín Filemón

### Ch'ín Pablo nixjehę ch'ín Filemón

**1** Janhan Pablo tjéçhjinaxián tí xra kuènte Cristo Jesús tjékjian tí xroon i la ko kichó ni Timoteo kixin tí jaha Filemón ts'ayéhé. Jaha mé tjuaha kixin jnkokón tjejóch'eni xra kuènte Dios. <sup>2</sup>Kjaxin chrókuinhin kaín tí sín tinkáchónki Ìnchéni tójkotsé ntoa la ko tí tjan kichó ni Apia la ko tí ch'ín kichó ni Arquipo, mé tí ch'ín ch'e xra éxi tí jeheni. <sup>3</sup>Kjuasáyé It'eni Dios la ko Ìnchéni Jesucristo chrókuintayaonrá ch'án kixin chrótjáhará ch'án kjuaxróxin.

### Ch'ín Filemón tjuèhe ch'án chojni la ko tinkáchónki ch'án Jesús

<sup>4</sup>Xráxin tjáncháha kjuasáyé Dios tí xráxinkavan tí jaha tí nixjaha Dios <sup>5</sup>kixin ó kuinhan kixin imá tinkachónkia Ìnchéni Jesucristo la ko imá tjuèhé ch'án la ko kaín tí sín tinkáchónki Dios. <sup>6</sup>Tjáncháha Dios kixin tsjinkitsa ch'án tí sín kuítekaon tió kjuákohé sín kixin ntá tsienxín sín jína nkexrí kaín tí nkehe chótani kixin kjuíncheyaonni Cristo Jesús. <sup>7</sup>Imá chàna kixin ó nòna kixin jaha kichó ni imá tjuèhé tí sín kichuá ntiha la ko imá kjuínchechéhé asén tí sín tinkáchónki Ìnchéni.

### Ch'ín Pablo chrónóehę tí ch'ín Filemón kixin tsikonóehę ch'án tí ch'ín Onésimo

<sup>8</sup>Janhan na kjueyána Jesucristo t'aha ch'án xra méxra chonta kjuachaxin tsétuanhan jaha tí nkehe chrókjuich'e. <sup>9</sup>A ntá íchá jína jehó xrjannóaha sítekávan kixin jaha tjuèhé tí janhan. Janhan Pablo mé ó tádana la ko tjéçhjinaxián tí xra kuènte Jesucristo. <sup>10</sup>Méxra xrjannóaha tsjinkitsa tí ch'ín Onésimo. Jehe ch'án

mé t'íkuan éxi xjanna kixin kjuankixin ch'án tsinkáchónki ch'án Jesucristo tí tjéçhjinakian ch'án ntihi.

<sup>11</sup>A ntá tí ósé ch'ín Onésimo mé kjuít'ahya xra jína. A ntá ijie ó nòna kixin imá jína sit'aha ch'án xra tí jaha la ko jína sich'ena ch'án xra kjaxin. <sup>12</sup>Ntá ijie tsétuanhan ch'án tsjiji ch'án tí tjen jaha inaá. Chrótjuèhé ch'án éxi chrótjuèhé tí janhan. <sup>13</sup>Janhan tjínkavan chrókuitonakian ch'án ntihi kixin chrókjuinkitsana ch'án chrínki tí chrókjuak'e jaha kixin tjéçhjinaxián tí itén Jesucristo. <sup>14</sup>Kjánchó tjínkakhya tsjáncháha xikaha tí tjínkakhya jaha. Jehya kixin jaha chrókjuinkitsani kixin chrókuétuanhan xikaha. Náhí. Jehí tjinkaonni éxi jaha tóxrjínhan chrókjuich'e. <sup>15</sup>Tí ch'ín Onésimo kuítóha ch'án iso yaon a ntá jie la tsochonta ch'án jnkochrín. <sup>16</sup>Ijie la jehya éxi ijnko chojni tsík'íná chrók'uikuan ch'án. Náhí. Ntá jie la éxi ijnko nkexro ch'e xra antsí jína mé éxi ijnko kichua chrótjuèhé ch'án. Janhan na tjuaha ch'án kjánchó tí jaha la antsí má chrótjuèhé ch'án. Jehya éxi chojni ó chrók'uikuan ch'án. Náhí. Chrók'uikuan ch'án éxi ijnko kichua kuènte Ìnchéni.

<sup>17</sup>Méxra tí chaxín t'íkuan tí janhan éxi kichó ni jnkokoá tinkáchónkini Ìnchéni ntá chrók'uayéhé ch'án éxi chrók'uayéhé tí janhan. <sup>18</sup>A ntá tí ichrén nkehe kuaáha ch'án o ichrén nkehe síkáha ch'án la janhan tsjénkaha tíha. <sup>19</sup>Janhan Pablo mé tjaná kjinxian tí xroon i na mé janhan tsjénkaha tíha. A ntá janhan tjínkakhya chrókjuintaxraxinkávan tí jaha kixin kaín tí nkehe tjasikàna tí janhan kixin kjuákohá jaha. <sup>20</sup>Méxra kichó ni tsotsenkávan sich'e tí nkehe tjáncháha chaxín tinkachónkia Ìnchéni. Mé xikaha sinchechéhé asenná kixin jaha mé kichó ni tinkachónki Cristo.

<sup>21</sup> Méxrā ikjian tí xroon i chr'anhan kixin ó nòna kixin jaha la sinchexiteyá tíha la ko ó nòna kixin jaha la síh'e antsí má que tí nkehe tjáncháha jaha. <sup>22</sup> Kjaxin tjáncháha kixin tjéyá ijnko nchia tsjak'é. Tjéchonhan kixin jahará la nixjehérá Dios la ntá Dios chrókjuanjon kjuachaxin kixin chrókjuasántsjahará.

### **Kjuixixín nixja ch'ín Pablo**

<sup>23</sup> Kjaxin ch'ín Epafras mé nixjahará ch'án jnkojína. Jehe ch'án mé tjéchji-

nakian ch'án jnkokóá tí ntoéchiso ntihi kixin kjaxin tinkáchónki ch'án Cristo Jesús. <sup>24</sup> Ch'in Marcos la ko ch'ín Aristarco la ko ch'ín Demas la ko ch'ín Lucas mé kaín sín nixjaha sín jnkojína. Jehe sín mé tjinkitsana sín tí xrā.

<sup>25</sup> Tjéjtáncháha Inchéni Jesucristo kixin sintayaonrá ch'án kaín rá. Amén. Ó tjen.

## Tí xroon k'uáyéhe tí sín Hebreos

### Dios nixjaxin ch'án tí Xjeen ch'án

**1** **A** ntá tí imá ósé Dios mé nixjehe tí sín tsík'axrjeníxinni nchónhya veces kixin nchónhya nkexrí chrókienxín sín, nixjaxin ch'án tí sín k'uéchrónka tí itén ch'án. <sup>2</sup> **A** ntá jie tió tsjixixín Dios nixjaxin ch'án tí Xjeen ch'án, na mé Dios kjuích'éna ch'án kaín xín nkehe síin kixin kjuachaxién tí Xjeen ch'án, mé tí nkexro k'uáyéhe kaín xín nkehe. <sup>3</sup> Jehe ch'án mé t'inkaséyanxín ch'án tí kjuachaxin kuènte Dios, la ko jehe ch'án mé kjaxin éxí tsjehe Dios xíkaha tsjehe tí jehe ch'án. Jehe ch'án t'aykonhen ch'án kaín xín nkehe síin kixin tí kjuachaxin jie chóna tí tan nixja ch'án. **A** ntá kjuixin kjuínchetjóá ch'án tí jie chóntani, ntá sákjuí ch'án kjuák'etjaxin ch'án tí tja chjina It'é ch'án tí tjen ch'án t'etóan ch'án nkaya nkajní.

### Tí Xjeen Dios imá t'etóan, a ntá tí sín ángel la kénhyó

<sup>4</sup> Tí Xjeen Dios k'uáyéhe ch'án kjuachaxin ts'etueñhen tí sín ángel, kixin tsík'áyéhe ch'án tí kjuachaxin kuènte It'é ch'án, a ntá imá t'etóan ch'án, a ntá tí jehe sín la náhí. <sup>5</sup> Méxra Dios ntáchehya nijnko ángel kixin: Jaha mé Xjanna, janhan mé kjuít'ána tí jaha ijie. la ko kjaxin ntáchrohya Dios kuènte nijnko ángel kixin: Janhan mé chrók'óna It'é ch'án, la ko jehe ch'án mé chrók'óna xjanna.<sup>§§</sup>

<sup>6</sup> **A** ntá tió kui tí jnkokoá Xjeen Dios chjasintajni, ntá ntáchro Dios kixin: Kaín tí sín ángel kuènte Dios chrókjuikosáyehe tí jehe ch'án.\*

<sup>7</sup> **A** ntá ntáchro Dios kuènte tí sín ángel kixin:

Tí sín ángel ch'éna ch'án éxí xrinto kixin nchakuen sín ó,

la ko tí sín ch'ehe ch'án xra la ch'éna ch'án éxí xrohinene.<sup>†</sup>

<sup>8</sup> **A** ntá ntáche ch'án tí Xjeen ch'án kixin: Tí trono kuèntá itjen jnkochrín, jaha Dios,

la mé jaha mé ijnko nkexro t'etóan jina.

<sup>9</sup> Jaha tóxrjínhan tí nkehe jina, a ntá ninkákonhén tí nkehe jínahya.

Mé xíkaha tí Dios tsíkjejá jaha, la Dios kuèntá kjuíntacháha má,

a ntá tí í so sín k'uájikoa la kánhyó.<sup>‡</sup>

<sup>10</sup> Kjaxin ntáchro kixin:

Jaha Ìnchéni, tí xrankíxixín kjuích'éna chjasintajni,

la ko jaha kjuích'éna nkajní.

<sup>11</sup> Táha mé ts'itjáyan, a ntá jaha la tsjak'e jnkochrín.

Kaín tíha tsontaxín éxí iké chojni,

<sup>12</sup> éxí ijnko iké chojni xíkaha tsoxrát'o,

ts'ixinkí éxí ijnko iké chojni.

**A** ntá jaha la ts'ixitóxinhya jnkochrín tsjak'e,

a ntá tí kjuachón chonta jaha la nunca tsjejhya.<sup>†</sup>

<sup>13</sup> Dios la ntáchehya nijnko tí sín ángel kuènte ch'án kixin chrók'uejó sín tja ch'án chjina ntahó chrók'uetóan sín, tsjixinjian kaín xín tí sín nínkakohen sín la chrókjuachahya sín chrók'uetóan sín.<sup>§</sup> <sup>14</sup> Kaín tí sín ángel mé nchakuen sín ó mé ch'ehe Dios xra mé k'uítuenhen sín

§§1:5 Salmo 2.7; 2 Samuel 7.14; 1 Crónicas 17.13

\*1:6 Deuteronomio 32.43

†1:7 Salmo 104.4

‡1:9 1.8-9 Salmo 45.6-7

†1:12 1.10-12 Salmo 102.25-27

§1:13 Salmo 110.1

tsjinkitsa tí sín ts'áyéhe kjuachaxin tsaá sín.

### Chrókjoniehiani tí nkehe tsaáxinni

**2** Mé xikaha chrókjuenkayáxinni jína tí nkehe ó kuínhinni kixin chrókuítóehyani tí ntja ó kuákjani. <sup>2</sup>A ntá tí tan tsíchrónka tí sín ángel ósé la mé tsíkónoxín kixin chaxín tíha. A ntá tí sín kuítékakonhya sín tí tan jína kuínhin sín la kjuasin sín jie, na mé kjuasóte sín la táhó mé kjuacha sín. <sup>3</sup>Xá nkexrí chrókuaáni tí chrókuaahyani kuéntá tí nkehe jie chrókuaáxinni? Jehé ìnchéni tsíchrónka ch'án saoxín nkexrí chrókuaáxinni, a ntá chr'éxin tí sín tsík-inhin mé kjuakohe sín tí jeheni. <sup>4</sup>Méxra Dios kjuakoxin ch'án kjuaxroan jie la ko kjuachaxin jie kixin chaxín tíha, la ko noexínni kaín tí kjuachaxiэн Nchakuen ch'án tsík'áyéheni éxi tjinkaon ch'án tsjanjon ch'án.

### Jesucristo k'óna ch'án chojni

<sup>5</sup>Dios la tsíchjéhya tí sín ángel kjuachaxin kixin chrók'uetóan chjasintajni chr'éxin éxi tí jie tjejonixjani. <sup>6</sup>Náhi. Éxi nixja xroon itén Dios chronkaxín kixin:

¿Xá nkexéhe tí chojni a, jaha It'éni Dios, kixin imá xráxinkávan tí jehe ch'án?

¿Xá nkexro tíha kixin imá tóxakonhan kixin tí jehe ch'án?

<sup>7</sup>Jaha tsíkjich'éna ch'án éxi ijnko chojni t'etuanhya kjánchó kánhyó isé, a ntá tí sín ángel antsí má k'uéchónta sín kjuachaxin,

a ntá jie la imá kjuíkosáyehe ch'án;

<sup>8</sup>la jaha tsíchjehé ch'án kjuachaxin kixin kaín nkehe ts'etuenhen ch'án. <sup>\*\*</sup>

Mé xikaha ntácho tíha kixin tsíchjéhe Dios tí chojni kjuachaxin kixin chrók'uetuenhen ch'án kaín xín nkehe, ntá Dios kuítóehya ninkehó nkehe chrókuítekakuenhya ch'án. Kjánchó naxa t'ikonhyani kixin á kaín nkehe titekakonhen ch'án. <sup>9</sup>Kjánchó ó noheni kixin Jesús la tsíkjich'éna Dios éxi chojni t'etóanhya kjánchó kánhyó isé, a ntá tí sín ángel antsí má k'uéchónta sín kjuachaxin. Dios mé tjuéhe kaín xín chojni ntá tjinkaon ch'án kixin ch'ín Jesús chrók'uenyákonhen kaín chojni. A ntá jie tsík'áyéhe ch'án kjuachaxin náxrjón la ko Dios tjikosáyehe tí jehe ch'án kixin tí kjuasóte ch'án, ik'uén ch'án.

<sup>10</sup>Kaín nkehe sínn la kuénte Dios la ko tjejó kixin tí kjuachaxin kuénte tí jehe ch'án. A ntá Dios tjinkaon ch'án kixin kaín xín tí xjeen ch'án chrók'uejó sín tí tjeen ch'án tí t'inkaséyan. Méxra Dios kjuanjón Ìnchéni Jesucristo kixin tsjasóte ch'án kixin ntá jína kjuakoxin ch'án kixin ntá jehe ch'án tsaáxinni ch'án. <sup>11</sup>Kaín tí sín tsíkótjóá la ko tí nkexro kjuínchetjóá na mé chónta jnkokoá It'é. Méxra tí Xjeen Dios tósuèhya ch'án tsontácho ch'án kixin kichó ch'án tí jehe sín. <sup>12</sup>Éxi ntácho tí xroon itén Dios kixin:

Tsochénkani tí sín kichó ni kixin nkexro tí jaha,

tsjikosáyahani tsotsjeni himno tí tójnkot-sékoni tí sín kichó ni. <sup>††</sup>

<sup>13</sup>Kjixin ntácho kixin:

Janhan titekávan Dios. <sup>‡‡</sup>

La ko kjixin ntácho inaá kixin:

Ntíhi tjékian tí xjeen Dios tsíkjanjon ch'án tsík'ayáha. <sup>¶¶</sup>

\*\*2:8 2.6–8 Salmo 8.4–6

††2:12 Salmo 22.22

‡‡2:13 Isaiás 8.17,18

¶¶2:13 Isaiás 8.17,18

<sup>14</sup> **A** ntá tí xjeen chojni mé jnkokoá kichó la k'óna nto la ko ijni; la kjaxin ch'ín Jesús xikaha tsík'óna ch'án nto la ko ijni kixin jína its'en ch'án kixin jína sinchek'itjáyan ch'án tí nkexro chóna kjuachaxin t'óyan chojni, na mé t'axrjexín kixin diablo tíha, <sup>15</sup> mé xikaha chrókjuinchekaá ch'án kaín tí sín chrakonhen sín tí kjuach'en, tjejó sín éxí t'tuennen sín kaín yaon tjejó sín. <sup>16</sup> Kjaxin kuihya ch'án kixin chrókjuinkitsa ch'án tí sín ángel. Náhi. Ikui ch'án kixin tsjinkitsa ch'án tí sín tsík'axrjenixin ch'ín Abraham. <sup>17</sup> **A** ntá t'ichjánxin chrókóyóhe ch'án éxí tí sín kichó ch'án kixin jína chrók'óna ch'án nchat'á t'etoan kuènte Dios la chrókuikonóeheni ch'án, ntá jína tsjatsen ch'án ijje kaín chojni kixin k'uenyákonhenni ch'án. <sup>18</sup> Kixin jehe ch'án kjuasóte ch'án la ko tí Jínahya tjinkaon chrókjuachroe ch'án la kjuachahya, **a** ntá jie la jína tsjinkitsa ch'án tí sín chrókjuachroe tí Jínahya kixin chrókjuasinhya sín jie.

### **Antsí tjeoan ch'ín Jesús, **a** ntá ch'ín Moisés la kánhyó**

**3** **A** ntá kichó ni, jahará la tsíkótjóará, la mé Dios tsík'íyahará ch'án kixin ts'ónará xjeen ch'án, **a** ntá chrórxaxinkáonrá jína Cristo Jesús na mé jehe ch'án mé tí apóstol la ko tí nchat'á t'etoan kuènte tí nkehe tinkáchónkini. <sup>2</sup> Tí ch'ín Jesús jína kuítekakonhen ch'án Dios, mé tí nkexro tsíkjeýá ch'án sich'ehe ch'án xra, éxí kjaxin ch'ín Moisés jína kjuích'e ch'án xra k'uáyakonhen ch'án ntqe Dios. <sup>3</sup> Dios antsí kjuikosáyehe tí ch'ín Jesús, **a** ntá ch'ín Moisés la kénhyó, éxí antsí tjikosáyehe sín tí nkexro kjuích'éna ijnko nchia, **a** ntá tí nchia la kénhyó tjikosáyehe sín. <sup>4</sup> Jnkojnko nchia k'óna

kixin síin nkexro kjuích'éna, kjánchó Dios mé kjuích'éna kaín nkehe síin. <sup>5</sup> Ch'ín Moisés jína kjuích'e ch'án xra k'uáyakonhen ch'án tí nchia kuènte Dios. Tí xra kjuích'e ch'án mé k'uénixja ch'án kuènte tí nkehe tsontáchro Dios chr'éxin. <sup>6</sup> **A** ntá Cristo la mé Xjeen Dios tí jehe ch'án, nto kjuínchexiteyá ch'án jína la t'ayakonhen ch'án tí nchia kuènte Dios, la tíha mé jeheni, kixin tí tsítqehyani ch'án la naxa tsinkáchónkini ch'án ntá tsochéheni kixin tí nkehe tjejóchónhenni.

### **Ts'ok'éheni tí tjen Dios**

<sup>7</sup> Mé xikaha éxí ntáchro Nchakuen Dios nixja xroon itén Dios kixin:

**A** ntá jie tí chrókuinhínrá tí nkehe ntáchro Dios,

<sup>8</sup> chrókjuích'ehyará éxí kjuích'e tí sín ósé kuítekakonhya sín Dios

tí yaon kjuích'ehe sín prueba Dios tí nteje.

<sup>9</sup> **A** ntá ntaha tí sín tsík'axrjenixinrá ósé kjuích'éna sín prueba,

kjonté cuarenta nánó k'uíkon sín tí xra kjuít'a.

<sup>10</sup> Méxra kónínkakonhan tí chojni **a**, ntáxrjan kixin: “Xrácín xrichoe asén sín, tjinkakonhya sín tsochóxin sín ntianá.”

<sup>11</sup> Méxra kónínkakonhan tí jehe sín, ntátjan sín

kixin chaxín tsoxiteyá kixin ts'ixenhya sín ts'ok'éhe sín tí tjeñ janhan.<sup>§§</sup>

<sup>12</sup> Kichóni, chrókóxakonhanrá kixin chrókókohya nijnko tí jahará chróchon-tará asánrá jínahya chrókuítqohérá Dios tjechón chrókuítekákuenhyará tí jehe ch'án. <sup>13</sup> Chrókjuínchechéhérá kichuárá jnkojnko yaon naxa tjeñ tiempo kixin nijnko tí jahará chrókjuenkayáxinrá kixin naxa chrókjuásinrá jie, í chróntáchrohya asánrá kixin naxa chrókójiáhará. <sup>14</sup> **A** ntá tí chrók'uejóni jnkojína hasta tsjixixín

éxi kuinkáchónkini tí xrankíxixín, ntá síin kjuachaxin ts'ejókoni Cristo.

<sup>15</sup> Mé xíkaha ntáchro kíxin:

À ntá jie tí chrókuihínrá jahará tí nkehe ntáchro Dios, chrókjuich'ehyará éxi kjuích'e tí sín ósé kuítekakonhya sín Dios.\*

<sup>16</sup> ¿À ntá nkexro tí sín kuínhin itén Dios, a ntá tí chr'éxin kuítekakonhya sín? ¿Á jehya kaín tí sín tsíkakitsjexín ch'ín Moisés tí nación Egipto? <sup>17</sup> ¿À ntá nkexro tí kóninkakonhen Dios tí cuarenta nánó? ¿Á jehya tí sín kjuasin jie k'uénxin nteje? <sup>18</sup> ¿À ntá nkexro ntáche Dios kíxin chaxín tsoxiteyá kíxin ts'ixenhya sín ts'ok'éhe sín tí tjen tí jehe ch'án? ¿Á jehya tí sín kuítekakonhya? <sup>19</sup> À ntá ó noheni kíxin kjuachahya sín k'uixenhen sín kíxin kuítekakonhya sín.

**4** Méxra, tsíntáchro Dios kíxin tsjanjon ch'án kjuachaxin ts'ixenhenni ts'ok'éheni tí tjen ch'án, a ntá tóxakönhenni kíxin ách'e jnkojín tí jahará chrókjuachahyará chrók'uixenhenrá ntiha. <sup>2</sup> Kíxin kjaxin jeheni kuínhinni itén ch'án tsaáxinni éxi kuínhin tí jehe sín, kjánchó tí jehe sín la ninkehó kjuínkítsahya sín tí tan jína kuínhin sín, kíxin kjónté kuínhin sín tí tan na kuítekakonhya sín. <sup>3</sup> À ntá jeheni kuítekaonni, ntá ts'ixenhenni ts'ok'éheni ntaha, éxi tsíntáchro Dios kíxin:

Méxra kóninkakonhan sín tí jehe sín ntátjan sín kíxin chaxín tsoxiteyá kíxin ts'ixenhya sín ts'ok'éhe sín tí tjen janhan.†

Kíxin Dios la tió kjuixinhin ch'án xra kjuích'éna ch'án chjasintajni ntá kjuák'e

ch'án k'ok'éhe ch'án. <sup>4</sup> Mé xíkaha í jnko nketí nixja tí xroon itén Dios chrónka kuènte tí yaon yatoxin ntáchro kíxin:

Kjuixinhin Dios kaín xra ntá kjuák'e ch'án k'ok'éhe ch'án tí yaon yatoxin.‡

<sup>5</sup> À ntá inaá ntáchro tí xroon itén Dios kíxin:

Ts'ixenhya sín ts'ok'éhe sín tí tjen janhan.¶

<sup>6</sup> Kjánchó naxa t'itjáyan jnkojín chojni chrók'uixenhen sín chrók'ok'éhe sín. À ntá tí sín saoxín kuínhin tí tan chrókuaáxin sín la k'uixenhya sín kíxin kuítekakonhya sín tí tan a. <sup>7</sup> Méxra Dios tsíkjeýá ch'án í jnko yaon, mé tí yaon jie, a ntá chr'éxin nixjaxin ch'án tí nkehe tsíchrónka ch'ín David éxi ntáchro tí xroon itén Dios kíxin:

À ntá jie tí tsinhínrá tí nkehe ntáchro Dios, chrókjuinchexiteyará.§

<sup>8</sup> Kíxin tí chrókjuanjon ch'ín Josué kjuachaxin kíxin chrók'ok'éhe tí sín israelita,\*\* ntá Dios la í chrónixjahya ch'án kuènte í jnko yaon. <sup>9</sup> À ntá naxa tjechónhen tí ts'ok'éhe tí sín tinkáchónki Dios; <sup>10</sup> kíxin tí nkexro ts'ixenhen ts'ok'éhe tí tjen Dios tsíkjixinhin ch'án tí xra kuènte ch'án éxi yóhe kjaxin Dios kjuixinhin ch'án tí xra kuènte ch'án ntá kjuák'e ch'án k'ok'éhe ch'án. <sup>11</sup> T'ichjánxin kíxin kaín asénni chrókjueyáni nkexrí chrók'uixenhenni chrók'ok'éheni, kíxin chrók'ok'éhyani éxi tí sín kuítekakonhya.

<sup>12</sup> Kíxin tí itén Dios la mé tjechón la ko chóna kjuachaxin. Tíha la imá taté, a ntá kánhyó taté tí chica espada yánjín taté, la tíha mé t'ixenhen

\*3:15 Salmo 95.7-8

†4:3 Salmo 95.11

‡4:4 Génesis 2.2

¶4:5 Salmo 95.11

§4:7 Salmo 95.7-8

\*\*4:8 Josué 22.4

tí ninka asén chojni la ko nchakuen chojni hasta tí nkaya asén chojni. Tíha mé nchexraxinkaon chojni kaín nkehe tjenkayáxin sín la ko kaín nkehe ntáchro asén sín. <sup>13</sup> Kohya ninkehó nkehe tsíkjich'éna Dios tsjacha chrók'uejóméhe tí jehe ch'án kixin kaín nkehe la noxín siín t'ikon tí nkexro ts'áyéhe kuentá.

### Jesús mé tí nchat'á imá tjeoan

<sup>14</sup> Jesús tí Xjeen Dios mé tí nchat'á tjeoan kuènténi mé k'uixenhen tí tjen Dios la méxra chrókuítqehyani tí tinkáchónkini tí jehe ch'án. <sup>15</sup> Méxra jehe ch'án mé tí nchat'á tjeoan kuènténi mé tsjinkitsa ch'án tí jeheni kixin fuértehyani kixin kjaxin tí Jínahya chrókjuachroe tí jehe ch'án éxi sítónhen tí jeheni, kjánchó jehe ch'án la ninkehó jie kjuasinhya ch'án kjónté xikaha kónhen ch'án. <sup>16</sup> Méxra kaín asénni chrókóchjineheni Dios tí tjen ch'án t'etoan ch'án kixin chrókuikonóeheni ch'án la ko chrókjuinkitsa ch'án tí jeheni tí nkehe chrók'uichjánxinhinni.

**5** Kaín nchat'á t'etoan tsíkónoxín la chojni ó, tsík'áyéhe xra tsonix-ayákonhen chojni nkayakon Dios, la ko tsjanjon nkehe la ko iko its'en kixin ts'itjáyanxín tí jie kuènte chojni. <sup>2</sup> Kjaxin tí nchat'á a la fuértehya kixin chojni ó, a ntá chrókóninkakuenhya ch'án tí sín noehya la ko tí sín tsíkjichroe. <sup>3</sup> Kjaxin jehe ch'án, kixin fuértehya ch'án t'ichjánxin tsjanjon ch'án iko its'en kixin tí jie chóntha ch'án jehe ch'án éxi tjanjon ch'án nkehe kuènte tí í so chojni chóntha jie.

<sup>4</sup> Ninkexró xitjahya jehó sich'éna asén nchat'á t'etoan. Náhí. Jehó tí sín tsíkjejá Dios tsík'áyéhe tí xra éxi tsík'áyéhe ch'ín Aarón. <sup>5</sup> Mé xikaha Cristo, kjuích'énahya

ch'án jehó ch'án asén ch'án nchat'á t'etoan. Náhí. Dios mé kjuikosáyehe ch'án mé tsíkjanjon tí xra éxi tsintáchro kixin: Jaha mé xjanna;

Janhan mé kjuít'ána ijie.††

<sup>6</sup> Kjaxin í jnko nketí nixja xroon itén Dios ntáchro kixin:

Jaha mé ijnko nchat'á tsjak'e jnkochrín,

éxi yóhe k'uékjak'e ch'ín Melquisedec.‡‡

<sup>7</sup> Tió kjuák'e Cristo ntili chjasintajni imá tsjánka ch'án la ko itsen chrónóhe ch'án Dios, kixin Dios chóntha kjuachaxin chrókjuinchekaá ch'án kixin chrók'uenhya ch'án; la Dios la kuínhin kixin xikaha kuítekaon ch'án. <sup>8</sup> Méxra Cristo, kjónté Xjeen Dios, la kuítekaon ch'án kjuínchexiteyá ch'án kjónté tí kjuasote ch'án. <sup>9</sup> Mé kjuínchexiteyá ch'án, ntá kjuacha ch'án k'óna ch'án tí nkexro sinchekaá jnkochrín kaín tí chojni sinchexiteyéhe tí jehe ch'án. <sup>10</sup> A ntá Dios mé tsíkjich'éna ch'án nchat'á t'etoan éxi yóhe kjuák'e ch'ín Melquisedec.

### Jehya jína chrókuítqeheni tí tinkáchónkini Ìnchéni

<sup>11</sup> Chóntani nchónhya nkehe chróchrónkani kuènte tíha, kjánchó imá xra chróchrónkaxínni tíha kixin tiénxinhyará jahará. <sup>12</sup> Ntá k'uátsínka nchónhya tiempo, a ntá ó jína chrók'ónará maestro, ntá náhi kixin naxa t'ichjánxinhanrá nkexro chrókjuaqohará inaá tí nkehe xrahya kuènte itén Dios. Éxi xik'ónará lontirá, t'ichjánxin chrók'uirá tsjen inaá kixin xitjahya sinterá nkehe cha. <sup>13</sup> A ntá tí sín it'í tsjen ó, na mé yóhe chánjan takí tsjachahya sín tsjejá sín nkexrí chrók'uejó sín jína. <sup>14</sup> A ntá tí nkehe cha mé ine tí chojni nteto kixin ó nohe sín tí nkehe jína la ko tí nkehe jínahya.

††5:5 Salmo 2.7

‡‡5:6 Salmo 110.4



**6** Naxa chrókjueyáni kixin jína chrókjuenkayáxinni éxi chojni nteto. Chróchenkahyani tí jahará ijie tí nkehe kánhyó xra tsíxrakohará tí xrankíxín kuènte Cristo. Náhí. T'ichjánxinha naxa chrókjuakoharáni kixin chrókuítóherá tí jie k'uékjásinrá chrók'uénxinrá, la ko nkexrí chrókuinkachónkirá Dios, <sup>2</sup>la ko nkexrí chrókuikite chojni, la ko nkexrí ts'ejotja tjára chrítaón tí sín tinkáchónki Cristo, la ko nkexrí tsoxechón chojni tsík'en, la ko nkexrí chrókuítóexín ijíé chojni. <sup>3</sup>A ntá tí Dios chrókjuanjon kjuachaxin la chrókjuakoni í so nkehe.

<sup>4</sup>A ntá tí sín ó tsík'áyéhe sín tí xrohi, la ko ó tsjexín sín tí nkehe kjuanjon Dios, la ko tsík'áyéhe sín tí Nchakuen Dios, <sup>5</sup>la ko kóxrjínhin sín tí nkehe jína kuènte itén Dios, la ko kónohe sín nkexrí tí kjuachaxin tsochóna tí chjasintajni chr'éxin, <sup>6</sup>a ntá tí chrókuítóhe sín Dios, í chrókuinkáchónkihya sín, ntá xitjahya tsokjan sín inaá, kixin tí xíkaha la éxi chrókjuak'enkanı sín ntacruz tí Xjeen Dios inaá la ko chrókjuanoá sín ch'án nkayakon nchónhya chojni. <sup>7</sup>Éxi nonte jnkojnko vez t'aniá chrin la tsjántan la ts'óna jína, a ntá kjuacha tí sín kjuích'e xra kixin Dios kjuíncheyaon ntiha. <sup>8</sup>A ntá tí t'óna ntach'i la ko kach'i la ninkehó sínkíhya la tsonínkakohen Dios, la tí tsjixín mé tsoche.

### Tí nkehe tjejóchónhenni mé tjinkítsa kixin jína ts'ejóni

<sup>9</sup>Kjonté nixjani xíkaha, kíchó ni, ó noheni kixin chaxín jína tjejorá k'uitjará tí ntja tsaáxinrá. <sup>10</sup>Kixin Dios la jína, la ts'itjáyenhya ch'án tí xra jína tjejoch'erá kixin tjeùherá kichuára, mé xíkaha kjuáqoxinrá kixin kjuínkítsará tí kichuára tinkáchónki Cristo la naxa tjejótjinkítsará sín xíkaha. <sup>11</sup>Tjinkaonni

kixin jnkojnkorá chrókjuáqoxinrá hasta tsjixín kixin chontará kjuachéhe chrókjuínkítsará kichuára kixin chaxín ts'ayéherá tí nkehe tjejochónhénra. <sup>12</sup>Tjinkakonhyani kixin chrókjanrá chrókósáhará. Náhí. Tjinkaonni kixin chrókjuáqoxinrá éxi tí sín chaxín tinkáchónki Inchéni tjejóchónhen sín ts'áyéhe sín tí nkehe tsíntáchro Dios kixin tsjanjon ch'án.

<sup>13</sup>A ntá Dios, tió tsíntáchro ch'án kixin tsjanjon ch'án nkehe ts'áyéhe tí ch'ín Abraham la jehó Dios k'uákjénxin asén kixin kohya nkexro antsí tjeoan chrók'uákjénxin ch'án. <sup>14</sup>Ntáchro ch'án kixin chaxín sincheyaon ch'án tí ch'ín Abraham la ko nchónhya chojni ts'axrjeníxin tí jehe ch'án. <sup>15</sup>Ch'ín Abraham kjuák'echónhen ch'án isé kixin ts'áyéhe ch'án tí nkehe tsíntáchro Dios. <sup>16</sup>A ntá tió t'ákjénxin chojni ijnko nkexro la mé t'ákjénxin sín ijnko nkexro antsí tjeoan, a ntá jehó sín la náhi. A ntá ts'ákjénxin sín tí xíkaha kixin ijnko nkehe tsoxiteyá, a ntá kohya nkexro tsontáchro ninkehó. <sup>17</sup>Méxra Dios k'uákjénxin ch'án asén ch'án tsíntáchro ch'án kixin chaxín tsoxiteyá, kixin tjinkaon ch'án chrókjuáqoxin ch'án noxín kixin chrókónohe tí sín ts'áyéhe tí nkehe tsjanjon ch'án kixin sinchexiteyá ch'án tí nkehe tsíntáchro ch'án la í tsjitóxiénhya ch'án ninkehó tíha. <sup>18</sup>Mé xíkaha síin yaá nkehe xitjahya ts'ixitóxin, kixin Dios la xitjahya sich'ia; kixin tíha Dios nchenoexínni kixin chaxín tsoxiteyá, la mé jeheni kjuancheheni ch'án kixin chrók'uayakonhenni ch'án la ko tjejóchónhenni tí nkehe tsjanjon ch'án. <sup>19</sup>Tí tjejóchónhenni xíkaha la jína ts'ejó asénni éxi yóhe tí ntabárco chóna ganchó tjechruéxin kixin kohya nketí sátsji. Méxra xíkaha kjaxin tí nkehe tjejóchónhenni la sátskiji hasta nóton tí ka

<sup>¶</sup>6:14 Génesis 22.16-17

cortina tjen nkaxenhen ninko tjen nkaya nkajní, <sup>20</sup> tí senó k'uixenhen Jesús kuak-itjehē ch'án ijnko ntja ts'ixenxínni. Mé xikaha jehe ch'án k'óna ch'án nchat'á t'etoan jnkochrín éxí yóhē kjuák'e tí ch'ín Melquisedec.

**Ch'ín Jesús mé nchat'á éxí yóhē  
k'uékjak'e ch'ín Melquisedec**

**7** Tí ch'ín Melquisedec mé k'ué rey kuènte chjasin Salem la ko nchat'á kuènte Dios tjen nkaya nkajní. **A** ntá tió ch'ín Abraham kjanxin ch'án tí tsíkjik-janjonko ch'án tí í so sín rey, kjuacha ch'án, ntá ch'ín Melquisedec kjuixinhin ch'án ntja ikui ch'ín Abraham, ntá jehe ch'ín Melquisedec kjuíncheyaon ch'án tí ch'ín Abraham. <sup>2</sup>**A** ntá tí ch'ín Abraham chjéhe ch'án tí ch'ín Melquisedec diezmo kaín xín nkehe tsíkjaacha ch'án tí tsíkjikjanjonko ch'án tí sín rey.<sup>ss</sup> **A** ntá ihnié ch'ín Melquisedec mé t'axrjexín saxín kixin “ijnko rey jína”; **a** ntá jehe ch'án k'ué rey kuènte chjasin Salem, tíha mé t'axrjexín kixin “kjuaxróxin”, la mé xikaha jehe ch'án mé “ijnko rey tjanjon kjuaxróxin”. <sup>3</sup>**A** ntá ch'ín Melquisedec la noehya sín nkexro it'é ch'án la ko nkexro ìné ch'án la ko nkexro tsík'axr-jenixin ch'án; la ko noehya sin nkesá tsíkokjíhi ch'án la ko nkesá tsík'en ch'án. Mé xikaha tóyóhē tí Xjeen Dios kixin jehe ch'án mé ijnko nchat'á jnkochrín.

<sup>4</sup>**A** ntá jie, tsjehérá kixin imá t'etoan tí ch'ín Melquisedec kixin tí ch'ín Abraham k'uaxrjenixinni, la tsíchjéhe ch'án tí ch'ín Melquisedec diezmo tí nkehe tsíkjaacha ch'án tí tsíkjanjonko ch'an tí sín rey. <sup>5</sup>Éxí nixja ley tsík'etoan ch'ín Moisés, kixin tí sín nchat'á tsík'axrjenixin tí ch'ín Leví chóna sín kjuachaxin tsjanchehe sín kaín xín chojni diezmo kjónté **naxa** kjéhya sín, tsík'axrjenixin sín tí ch'ín Abraham éxí

tí jehe sín. <sup>6</sup>**A** ntá ch'ín Melquisedec, kjónté tsík'axrjenixinhya ch'án tí ch'ín Leví, na mé kjuích'ehe ch'án cobra tí ch'ín Abraham, mé tí ch'ín tsík'áyéhe tí nkehe tsintáchro Dios. Mé xikaha tí ch'ín Melquisedec tsíkjincheyaon ch'án tí ch'ín Abraham. <sup>7</sup>Kohya nkexro tson-táchro kixin chaxínhya kixin tí nkexro ncheyaon la **antsí** má t'etoan, **a** ntá tí nkexro tsíkóyaon la t'etoanhya. Náhí. <sup>8</sup>**A** ntá tí tjejóni, tí sín t'áyéhe tí diezmo la mé chojni ts'en ó. Kjánchó ntáchro tí xroon itén Dios kixin tí ch'ín Melquisedec mé ijnko chojni **naxa** tsík'enhya, la **naxa** tjechón. <sup>9</sup>Mé t'axr-jexín kixin ch'ín Leví la ko kaín xín tí sín nchat'á tsík'axrjenixin ch'án, mé tí sín t'áyéhe sín diezmo jie, la mé kjaxin jehe sín tsíkjenkehe sin diezmo tí ch'ín Melquisedec tió tsíkjenka ch'ín Abraham, <sup>10</sup>kixin **naxa** tjiko cuerpo kuènte ch'án tí sín ts'axrjenixin ch'án, **naxa** kokjéhya sín tió xeta ch'án tí ch'ín Melquisedec.

<sup>11</sup>Tí sín nación Israel tsík'áyéhe sín tí ley kixin tí sín nchat'á levita, mé tsík'axrjenixin sín tí ch'ín Aarón. **A** ntá jie tí chaxín chrókuacha sín chrókjuentoá sín tí sín tinkáchónki tí ley, la í t'ichjánxinhya **naxa** chrókónoxín í jnko nchat'á í chrókóyóhēya éxí tí ch'ín Aarón. **A** ntá kjuachahya sín xikaha ntá t'ichjánxin chrókónoxín ijnko nchat'á chrókóyóhē éxí tí ch'ín Melquisedec. <sup>12</sup>**A** ntá tí chrók'uixinkí tí nchat'á la kjaxin chrók'uixinkí tí ley. <sup>13</sup>**A** ntá tí xroon itén Dios chrónka tíhi kuènte Ìnchéni. **A** ntá jehe ch'án la tsík'axr-jenixin ch'án í jnko nkexro kuènte Israel la kohya ninkexró tsík'óna nchat'á tsík'axrjenixin tí sín a. <sup>14</sup>Kixin ó noxín kixin Ìnchéni tsík'axrjenixin ch'án tí ch'ín Judá, **a** ntá ch'ín Moisés la chrónkahya ch'án ninkehó kuènte tí sín

ts'axrjeníxin tí ch'ín a tió nixja ch'án kuènte tí sín nchat'á.

<sup>15</sup> A ntá tíhi la antsí má kónoxín kixin tí nchat'á nixin la tóyóhe éxí ch'ín Melquisedec <sup>16</sup>kixin tió k'óna ch'án nchat'á la jehya kixin xikaha chrók'uetōan ijnko ley kixin nkexro chrók'uaxrjeníxin ch'án. Náhí. Ó jehí k'óna ch'án nchat'á kixin tí kjuachaxin chóna ch'án la xitjahya ts'itjáyān. <sup>17</sup> Kixin nixja Dios kixin nkexrí tjen tí jehe ch'án, ntáchro kixin:

Jaha mé ijnko nchat'á tsjak'e jnkochríxín,

éxí yóhe k'uékjak'e ch'ín Melquisedec.\*

<sup>18</sup> Méxra tí nkehe k'uék'etōan senó mé ch'ehya xra jie kixin kánhyó kjuachaxin k'uéchóna la ko kjuachahya, <sup>19</sup> kixin tí nkehe k'uetōan ch'ín Moisés kjuachahya kjuínchetjóá ninkehó nkehe. A ntá jie chónani ijnko nkehe antsí jína tjejóchónhenni kixin tíha mé antsí jína tsochjinexínni Dios.

<sup>20</sup> A ntá tió ntáchro Dios tíha la tsík'ákjēnxin ch'án asén ch'án jehó ch'án. <sup>21</sup> La ntá tí í so nchat'á, tió tsíkónoxín sín, tsík'ákjēnxinhya Dios asén ch'án. A ntá tió tsíkónoxín tí nchat'á i la Dios tsík'ákjēnxin ch'án asén ch'án. A ntá ntáchro xroon itén Dios kixin:

Ìnchéni tsík'ákjēnxin asén ch'án

a ntá ts'ixitóxinhya tí nkehe tsíntáchro ch'án:

“Jaha mé ijnko nchat'á tsjak'e jnkochríxín

éxí yóhe k'uékjak'e ch'ín Melquisedec.”†

<sup>22</sup> Méxra ch'ín Jesús ntáchro kixin tí pacto t'etōan ch'án la antsí má jína, a ntá tí pacto senó la náhi. <sup>23</sup> Ntá k'uíxin nchónhya sín nchat'á, kjánchó nkák'en sín, ntá xitjahya naxa chrókjuich'e sín tí xra a. <sup>24</sup> A ntá ch'ín Jesús la ts'enhya ch'án la t'ichjānxinhya kixin í jnko

nkexro chrókuaqja tí xra kuènte ch'án chrók'óna nchat'á. <sup>25</sup> Méxra jehe ch'án tsjacha sinchekaá ch'án jnkochríxín tí sín tsochjinehe Dios kixin tinkáchónki sín tí jehe ch'án kixin itjen ch'án jnkochríxín chrónóhe ch'án Dios kixin chrókjuinchekaáni ch'án.

<sup>26</sup> Mé xikaha Jesús mé tí nchat'á t'etōan t'ichjānxinhinni; jehe ch'án mé ijnko nkexro tjóá, chónahya ninkehó jie, la ko tjenkákjanhya ch'án tí sín tjasin jie, a ntá sákjuí ch'án nkaya nkajní. <sup>27</sup> Ntá tóyóehya tí í so nchat'á t'etōan, kixin t'ichjānxin ts'óyán sín iko tsjanjon sín tsochjéhe sín Dios kaín yaon, saoxín kixin tí jie kuènte sín, a ntá chr'éxin kixin tí jie chóna tí í so chojni. A ntá ch'ín Jesús jnkokoaxón vez kjuanjon asén ch'án ik'uén ch'án. <sup>28</sup> Tí ley k'uék'etōan ch'ín Moisés t'etōan kixin chojni naxa chóna jie chrók'óna nchat'á, a ntá Dios tsík'ákjēnxin asén ch'án tió kjuixin k'óna tí ley, ntáchro ch'án kixin tí Xjeen ch'án mé ts'óna nchat'á t'etōan kixin jína kjuínchexiteyá ch'án jnkochríxín.

### Ch'ín Jesús nixjānxin ch'án ijnko pacto nixin

**8** Tí nkehe antsí má tjetōan chrónkani la mé tíhi kixin tí nchat'á kuènteni mé t'etōan ch'án, la ko tjetjānxin ch'án nkaya nkajní, nó chjina tí trono t'etōanxín Dios, <sup>2</sup> k'óna ch'án nchat'á tí ninko chaxín tsíkjich'éna Ìnchéni, la jehya chojni tsíkjich'éna tíha. <sup>3</sup> Kaín nchat'á t'etōan tsík'áyéhe xra kixin tsjanjon nkehe la ko iko its'en. Méxra Jesucristo t'ichjānxin kixin tsjanjon ch'án ichrén nkehe. <sup>4</sup> Tí chrókjuak'e ch'án chjasintajni, chrók'ónahya ch'án nchat'á kixin naxa síin nchat'á tjanjon nkehe k'uetōan tí ley tsík'áyéhe ch'ín Moisés. <sup>5</sup> A ntá tí sín nchat'á k'uékjanjon nkehe

\*7:17 Salmo 110.4

†7:21 Salmo 110.4

tóyóhó tí nkehe síin nkaya nkajíní. Noheni kixin tóyóhó kixin tió ch'ín Moisés chrókjuich'éna ch'án nínko la ntáche Dios tí jehe ch'án kixin: “Tjenkayáxian jína, a ntá sích'éna jaha éxí tí nkehe kjuákuáxian chrítaón jnā.”<sup>3</sup> <sup>6</sup> A ntá tí nchat'á t'etoan kuèteni tjech'e ch'án xrā antsí jína kixin jehe ch'án mé tí nkexro nixjāxín tí pacto nixin tsín-táchro Dios chrónka tí nkehe jína tsonhen chr'éxín.

<sup>7</sup> A ntá tí pacto tsík'etoan saoxín la tí chróxiteyá jína, la t'ichjānxínhya chrók'óna yóxin pacto. <sup>8</sup> A ntá Dios k'uŕkon kixin kjuínchexiteyáhya tí sín a, éxí ntáchro xroon itén Dios kixin: Ntáchro Ìnchéni kixin: Itsi ijnko yaon mé tsjānjuan ijnko pacto nixin tsochónta tí sín nacióon Israel la ko tí sín chjasin Judá.

<sup>9</sup> Jehya xikaha tí pacto kuétuanhan tí sín tsík'axrjeníxinrá ósé, tí yaon kjuínkítsa sín k'uaxrjexín sín tí nacióon Egipto; kjānchó kjuínchexiteyáhya sín tí pacto kuétuanhan sín, méxra kuitohā sín, ichro Ìnchéni.

<sup>10</sup> Tí pacto tsétuanhan tí sín chjasin Israel tió ts'atsínka tí yaon a, mé xikaha tíhi, ichro Ìnchéni:

Sintaxráxinkāvan asén sín tí ley tsétoan, a ntá tí kjuaxrexinkaon kuènte sín tsokjian tí nkehe tsétuanhan sín.

A ntá janhan ts'óna Dios kuènte sín, a ntá jehe sín mé ts'óna chjasin kuèntāna.

<sup>11</sup> Ts'ichjānxínhya naxā tsjakohē kichó sín

kixin chróchóxin sín Ìnchéni, kixin kaín sín tsochóxinna sín, kjónté chojni imá ntsínsí la ko chojni imá hyé.

<sup>12</sup> Sintak'itjāyan tí nkehe jínahya kjuíuch'e sín la ko í tsoxráxinkakonhya inaá tí jie chónta sín.<sup>†</sup>

<sup>13</sup> Xikaha nixja Dios kuènte tí pacto nixin ts'etoan ch'án kixin tsíkóntaxin tí pacto saoxín k'uetoan ch'án, tíha mé tinkákóntaxin la ko tinkákjeje, na í séhya ts'itjāyan.

### Tí nínko chjasintajni la ko tí nínko nkaya nkajíní

**9** A ntá tí pacto saoxín t'etoan nkexrí chróxaxinkaonni Dios, kixin tí nínko ntihyó chjasintajni. <sup>2</sup> A ntá tí nínko k'uékjak'e mé tí cuarto saoxín k'uekjinchek'in sín tí Cuarto Tjóá, tí kjuák'e tí candelero la ko tí mesa tjejókjen tí niotja k'uéxraxinkakonxín sín Dios. <sup>3</sup> Nóton tí yóxin ka cortina kjuák'e tí cuarto k'uékjinchek'in sín tí Cuarto Antsí Tjóá. <sup>4</sup> Ntiha k'uékjak'e tí altar tsík'óna chica oro k'uékjakaxín sín tí chjínco la ko k'uékjak'e tí ntacajón chr'ísimá chica oro tjenkáya tí pacto. Nkaxenhen tí ntacajón k'uékjak'e ijnko nchésen tsík'óna chica oro k'uék'inka maná k'óna niotja, la ko kjāxin k'uékjak'e tí nta k'uékjixín ch'ín Aarón kjuankíxin k'uayan nta ntahnte, la ko kjāxin ntiha kjuák'e tí xro chónta tí tan k'uetoan Dios. <sup>5</sup> Chrítaón tí ntacajón k'uék'ejó yaá ángel tsíkjanoya tsíkjentoá kanēnee chrítaón tí kjuák'e tí kjuachaxin kuènte Dios; ntaha k'uékjinxín tí jie k'uéchónta chojni. A ntá ijie la t'ichjānxínhya naxā tsonixjani kuènte tíha.

<sup>6</sup> A ntá xikaha k'uéjéjé tí nkehe a, a ntá tí sín nchat'á jnkoyaxón t'ixenhen sín tí cuarto saoxín kuènte nínko kixin tí xrā ch'e sín kuènte nínko. <sup>7</sup> A ntá tí yóxin cuarto jehó tí nchat'á t'etoan

<sup>†</sup>8:5 Éxodo 25.40

<sup>†</sup>8:12 8.8–12 Jeremías 31.31–34

t'ixenhen ch'án jnkokoá vez jnkojnko nánó; a ntá tí t'ixenhen ch'án t'ichjánxin ts'ixenko ch'án ijnié iko tsochjéhe ch'án Dios tsotjuáxin ijie ch'án la ko ijie tí i so chojni. <sup>8</sup> A ntá tí Nchakuen Dios nchenoexinni tíhi kixin nachrohe k'uékjich'e xra tí cuarto saoxín la naxa tjexrankehya kixin chrók'uixenhenni tí Cuarto Antsí Tjóá. <sup>9</sup> Kaín t'ha tjakoxín ijnko nkehe chrókónoheni jie, kjánchó tí nkehe chjéhe sín Dios la ko tí ko t'óyán sín xitjahya nchenoexín sín kixin á chaxín kótjóá tí jie k'uéchónta sín kixin xikaha k'uéxraxinkaon sín Dios. <sup>10</sup> A ntá t'ha jehó t'etóan kuènte tí nkehe chrókjone sín la ko tí nkehe chrók'ui sín la ko tí chrók'ónti sín kixin chrókótjuáxin ijie sín, kaín t'ha mé k'uítuenhen sín kuènte cuerpo ó la jehó k'uéchónta kjuachaxin tí naxa kjuinkíhya Dios nkexrí chróxraxinkaon sín ch'án.

<sup>11</sup> A ntá ó kui Cristo, jehe ch'án mé nchat'á t'etóan kuènte tí nkehe antsí jína itsi. A ntá tí nínko ch'e ch'án xra la antsí jína la ko antsí ntoá, la jehya chojni tsíkjich'ena t'ha kixin jehya chjasintajni ntihi tjen. <sup>12</sup> Tíó k'uíxenhen Cristo tí Cuarto Tjóá, la jehya kixin chrókjuañon ch'án ijnié kotèntso la ko ijnié koxintáxjan. Náhí. Ijnié ch'án kjuanjon ch'án; mé xikaha k'uíxenhen ch'án jnkokoá vez ntiha mé xikaha kjuenka ch'án kixin chrókuaáxinni jnkochrín. <sup>13</sup> A ntá tí ijnié koxinta la ko ijnié kotèntso la ko tí nteso kuènte tí koxintáxjan tsíchexín tí altar tikitexín tí sín tjuáhya la mé t'ha chóna kjuachaxin tsotjuáxin tí chrítaón ó. <sup>14</sup> A ntá tí xikaha, la kjá antsí má chóna kjuachaxin tí ijnié Cristo. Kixin tí kjuachaxin Nchakuen Dios tjen jnkochrín, la Cristo kjuanjon asén ch'án ik'uén ch'án k'uáyéhe Dios, la jehe ch'án la ninkehó jie chónahya ch'án.

A ntá ijnié ch'án nchetjóá tí nkehe kjuích'eni senó chrók'uénxinni kixin ntá jie la jína chrókjuich'ehe ni xra Dios tjechón.

<sup>15</sup> Méxra Jesucristo nixjaxín ch'án tí pacto nixin k'uetoan Dios. Kixin k'uenyákonhenni Cristo ntá tsotjuáxin tí jie kjuasinni kjuínchexiteyáhyani tí pacto k'uítuenhenni senó; kixin tí sín k'uíyehé Dios la jína chrók'uáyéhe sín tí nkehe tsjejehya kixin jehe ch'án xikaha tsintáchro ch'án tsjanjon ch'án. <sup>16</sup> A ntá tí siín ijnko nkehe tsintáchro ijnko chojni kjuák'e na ntá ik'uén la t'ichjánxin tsonoxín kixin chaxín tsík'en tí nkexro tsíkjich'ena. <sup>17</sup> A ntá tí nkehe tsintáchro ch'án la sínkíhya tí naxa tjechón tí nkexro tsíkjich'ena; jehó tíó chrók'uen ch'án mé sínkí. <sup>18</sup> Méxra tí pacto xrankíxixín tsík'etóan Dios kjuankíxín kjuích'e xra kixin k'uítji ijni. <sup>19</sup> Ch'ín Moisés tsíchronka ch'án kaín nkehe tsík'etóan tí ley kuínhin kaín tí chojni; a ntá chr'éxin kuákja ch'án ichjóen kolélo kjátse la koí ntarama hisopo, ntá kjuínchekjatjaxín ch'án ijnié koxintáxjan la ko ijnié kotèntso tsíkjiko ìnta, ntá kuikjanjin ch'án tí libro chóna ley la ko kuikjanjin ch'án kaín tí chojni. <sup>20</sup> A ntá ntáchro ch'án kixin: “Tí jni i tsoxiteyáxin tí pacto k'uetoan Dios chrókjuínchexiteyéhérá jahará.”<sup>8</sup> <sup>21</sup> Tí ch'ín Moisés kjaxin kuikjanjin ch'án jni tí nínko la ko kaín nkehe t'ichjánxin tí nkaxenhen nínko. <sup>22</sup> Kixin xikaha ntáchro tí ley kixin kaín nkehe la chrókótjuáxin tí jni; a ntá xitjahya chrókótjóá tí jie tí chrók'ui xikjanjinhya jni.

### Tí ik'uén Cristo mé tsjüinxín ijieni

<sup>23</sup> Méxra t'ichjánxin kixin ik'uén iko kótjuáxin tí nkehe a, táha mé tóyóhó tí nkehe siín nkaya nkajni; a ntá tí nkehe

chaxín kuènte nkaya nkajní t'ichjánxín ijnko nkehe antsí jína chrók'uen. <sup>24</sup> A ntá Cristo k'uíxenhya tí nínko tsíkjich'é-naxín chojni tja, táha mé ijnko nkehe tóyóhó tí nínko chaxín. Náhí. Jehé ch'án mé k'uíxenhén ch'án tí nkaya nkajní, a ntá jie mé tjen ch'án tí tjen Dios nixjaxín ch'án kaín ni. <sup>25</sup> A ntá jehé ch'án la jehya jnkoyaxón k'uíxenhén ch'án ntiha k'uenyákonhenni ch'án. Náhí. A ntá tí nchat'á t'etōan t'ixenhén tí Cuarto Tjóá jnkoinko nánó kixin tsjanjon ch'án ijnié ko ó. <sup>26</sup> A ntá tí xikaha chrókónhen Cristo la t'ichjánxín kixin jnkoyaxón chrók'óyán sín ch'án desde tí k'óna tí chjasintajni. A ntá jie la ó chjina, tsjixraká tsjeje chjasintajni, a ntá kónoxín Cristo la ik'uén ch'án jnkokoá vez kixin tsjiinxín ijieni. <sup>27</sup> Mé xikaha kaín ni its'enni jnkokoá vez, a ntá chr'éxín tsitoexín ijieni. <sup>28</sup> Mé xikaha kjaxin Cristo jnkokoá vez ik'uén ch'án kixin tsjiinxín ijie nchónhya chojni. A ntá chr'éxín itsi ch'án inaá, jehya kixin naxa tsjatsen ch'án ijie chojni. Náhí. Sinchekaá ch'án tí chojni ó tsíkótjóá tjejóhónhen itsi ch'án.

**10** A ntá tí ley k'uetoanxín ch'ín Moisés la tóyóhó tí nkehe jína tsi la jehya tí nkehe chrókuaáxinni. Méxra tí ley kjuachahya kjuínchetjóá tí sín kóchjinehe Dios kjuanjon sín iko its'en jnkoinko nánó. <sup>2</sup> A ntá tí chrókjuacha tí ley chrókjuinchetjóá ijie sín, ntá chrókjuenkayáxinhya sín kixin naxa chróhónha sín jie, la chrókuítōhe sín, í chrókjuanjonhya sín iko its'en. <sup>3</sup> A ntá xikaha ich'e sín t'óyán sín ko, la jnkoinko nánó xraxinkakonxín sín tí jie tsíkjasin sín <sup>4</sup> kixin ijnié koxinta la ko ijnié kotētso xitjahya tsjiinxín ijie chojni.

<sup>5</sup> A ntá tió Cristo kui chjasintajni ntáche ch'án Dios kixin:

Tjinkákonhya jaha iko its'en la ko tjinkákonhya jaha ninkehó nkehe chrók'uayéhé. Náhí.

Jaha tsíkjich'éna ijnko cuerpo kixin tsochonta janhan.

<sup>6</sup> Jaha tóxrjíanhya iko tsíchján la ko tí í so nkehe chrókjuanjonni chrókjuakjiinxian ijie.

<sup>7</sup> A ntá ntátjan ch'án kixin: “A ntá ijie la ntihi tjén janhan kixin sintaxiteyá tí nkehe tóxrjínhan jaha Dios, éxí nixja xroon chrónka nkexrí chrókjuít'a.”\*\*

<sup>8</sup> Senó ntáchro kixin Dios tjinkakonhya la ko tóxrjienhya ch'án iko its'en chrókjuanjonni la ko ninkehó nkehe chrókjuanjonni chrókjuinxín ijieni kjónté tí ley k'uetoan kixin xikaha chrókónhen. <sup>9</sup> A ntá chr'éxín tsintáchro kixin: “A ntá k'uinka janhan kixin sintaxiteyá tí nkehe tóxrjínhan jaha Dios,” ichro ch'án. Mé xikaha kjuatsen ch'án tí ko k'uék'óyán sín ósé, a ntá jehé ch'án kjuanjon ch'án ijnko nkehe nixin. <sup>10</sup> Dios kjuínchetjuáxinni kixin Jesucristo kjuínchetjueyá éxí tóxrjínhin Dios kixin tí cuerpo kuènte ch'án kjuanjon ch'án ik'uén ch'án jnkokoáxón vez para jnkochrixin.

<sup>11</sup> A ntá kaín nchat'á judío tí xra ch'e sín jnkoinko yaon la jnkokón nkehe its'en tjanjon sín kjánchó tíha la xitjahya tsjiinxín ijie chojni. <sup>12</sup> A ntá Jesucristo mé jnkokoá vez k'uenyákonhenni ch'án kixin tsotjuáxin ijieni la tíha mé sich'e xra jnkochrixin. A ntá kjuixin ntá sákjuí ch'án kjuák'etjaxin ch'án nó tí tja chjina kuènte Dios. <sup>13</sup> A ntá ntiha tjechónhen ch'án tsjixinjian kaín tí sín nínkakonhen ch'án tsjachahya sín ts'etōan sín. <sup>14</sup> Mé xikaha jnkokoá nkehe kjuích'e ch'án chjéhe ch'án Dios, kixin jína ts'ejó tí sín ó tsíkótjóá. <sup>15</sup> A ntá tí Nchakuen Dios

\*\*10:7 10.5–7 Salmo 40.6–8

nchenoheni tíhi ḱixin senó tsintáchro ḱixin:

<sup>16</sup>Tí pacto tsotjahá tí jehe sín tió ts'at-sínka tí yaon a, ichro Ìnchéni; Sîntaxrâxinkâvan asén sín tí ley tsétoan, a ntá tí kjuaxrexinkaon kuènte sín tsokjian tí nkehe t́jínkâvan.<sup>††</sup>

<sup>17</sup>Kjâxin ntáchro ḱixin:

Í tsoxrâxinkâkonhya ínaá tí ijíé sín la ko tí nkehe jínahya kjuích'e sín.<sup>‡‡</sup>

<sup>18</sup>Mé xíkaha tí ó kótjóa ijíéni la t'ichjânxinhya í so nkehe chrókjuanjónni chrókótjuáxin tí ijíéni.

### Méxra t'ichjânxin tsochjineheni Dios

<sup>19</sup>Kíchóni, a ntá la í kohya kjuachrakon ts'ixenhenni tí Cuarto Antsí Tjóa tí tjen Dios ḱixin kjuachaxién ijnié Jesucristo, <sup>20</sup>chréheni tí ntja nixin mé tí ntja tjechón kuakitjehe ch'án nóton tí ka cortina, tíha mé tí cuerpo kuènte ch'án. <sup>21</sup>Jesús mé tí nchat'á tjeotan kuènteni t'etoan tí ntje Dios. <sup>22</sup>Méxra xíkaha chrókóchjineheni Dios kaín asénni chrókuinkáchónkini ch'án chaxín ḱixin jehe ch'án tsíkjinchetjóa ch'án asénni ḱixin chrókjuenkayáxinhyani ḱixin naxa chóntani jie ḱixin tí cuerpo kuènteni kótjuáxin tí ntja jehó.<sup>¶¶</sup>

<sup>23</sup>Chrókuítjehyani chrók'uejóchónhenni tí nkehe tinkáchónkini ḱixin Dios la chaxín sinchexiteyá ch'án tí nkehe tsintáchro ch'án. <sup>24</sup>Chrókjueyáni nkexrí chrókjuinkítsani ḱichó ni ḱixin chrótjuèheni ḱichó ni la chrókjuich'eni tí nkehe jína. <sup>25</sup>Chrókuítjehyani chrókójkotséni, chrókóyóehyani éxí tí sín í tójnkotséhya sín. Náhi. Chrókjuinchechéheni ḱichó ni antsí má

jie ḱixin ó noheni ḱixin í séhya tsokjan Ìnchéni.

<sup>26</sup>A ntá tí naxa chrókjuenkayáxinni chrókjuasinni jie tí ó noheni tí nkehe chaxín, la kohya í jnko nkexro chrók'uenyákonhenni chrókótjuáxin tí jie chóntani. <sup>27</sup>A ntá jehó itjen tí kjuachrakon jie tsitoexín jie la ko tí xrohi tjeche ts'itjáyanxín tí sín nínkakohen Dios. <sup>28</sup>A ntá tí tjen jnkojín nkexro titekakonhya tí ley k'uetóanxín ch'ín Moisés, la tsonoxín yaá o y'á tí sín tsík'ikon tí jie tsíkjasin sín, tíha mé ts'enxín sín la kohya nkexro tsíkonóehé tí jehe sín. <sup>29</sup>¿Á tjenkayáxinhyará ḱixin antsí má chrókjuasóte tí sín kuítékakuenhya tí Xjeen Dios la ko chóntehya sín kjuasáya tí ijnié ch'án la ko t'ántaxínhin sín tí Nchakuen Dios tjuèheni? Ḱixin tí jni chrónkaxín ḱixin ts'etóanxín tí pacto la ko tí jni k'uíjmáxinni. <sup>30</sup>Noheni ḱixin tsintáchro Ìnchéni ḱixin: “Janhan mé tóna tocar sintakitoaxián ijie chojni la ko janhan tsjénkaha sín.”<sup>§§</sup> Kjâxin tsintáchro ḱixin: “Ìnchéni sinchekitoexín ijie tí sín tinkáchónki ch'án.”<sup>\*\*</sup> <sup>31</sup>Méxra kjuachrakon jie chrók'uanótjenyáni tí tja Dios tjechón.

<sup>32</sup>A ntá chróxrâxinkâonrá jahará tí nkehe tsíkónhen ósé ḱixin tió jahará nantá tsík'ayéhérá tí nkehe t'inkaséyan, a ntá kjuachará kjónté tí nchónhya nkehe tsíkónhanrá. <sup>33</sup>A ntá jnkojín tí jahará k'uántaxínhanrá sín la ko kjuatiará sín nkayakon nchónhya chojni, a ntá í so sín la kjuínkítsa tí sín tsík'ekon. <sup>34</sup>A ntá jahará kuíkonóehérá tí sín tjejóchjina ntjechiso, a ntá jahará kóninkákonhyará kjónté k'uaxrja-

<sup>††</sup>10:16 10.16-17 Jeremías 31.33-34

<sup>‡‡</sup>10:17 10.16-17 Jeremías 31.33-34

<sup>¶¶</sup>10:22 Ezequiel 36.25

<sup>§§</sup>10:30 Deuteronomio 32.35-36

<sup>\*</sup>10:30 Deuteronomio 32.35-36

hará kaín nkehe chontará, kixin ó nohará kixin nkaya nkajní chontará nkehe antsí jína chónhya tsjeje. <sup>35</sup> Chrókui-toéhyará tí nkehe tinkachónkirá kixin ó nohará kixin tíha mé ts'ayéxinrá nkehe chr'éxin. <sup>36</sup> Kjaxin jahará t'ichjánxin chrók'uejochonhénrá chrókóninkákonhyará kjónté ichrén nkehe chrókónhanrá, kixin s'ich'erá tí nkehe tjinkaon Dios, kixin xikaha chrók'uayéhérá tí nkehe tsintácho tí jehe ch'án. <sup>37</sup> Kixin xikaha ntácho xroon itén Dios kixin: Kánhyó sé

itsi tí nkexro tsi, í sinchexrjenhya.

<sup>38</sup> Tí sín kótjóá asén mé t'ejóchónxin sín kixin tinkáchónki sín Dios;

a ntá tí sín tsítóhe tí janhan la í tsochànahya tí xikaha ch'e sín.†

<sup>39</sup> Kjánchó jeheni jehya xikaha chrókuítóheni chrókuinkáchónkihyani tí jehe ch'án kixin ntá chrókjuasinni jie chrók'uitjáyánxinni. Náhí. Tinkáchónkini ch'án la tíha chrókuaáxinni.

### Tí fe

**11** Tí fe chóntani la mé noexínni chaxín kixin tsoxiteyá ts'áyéheni tí nkehe t'ejóchónhenni, la ko noexínni chaxín kixin kjónté ijnko nkehe t'ikonhyani la chaxín t'jen. <sup>2</sup> Tí sín tsík'axrjeníxinni ósé la kóxrjínhin Dios kixin k'uéchónta sín fe.

<sup>3</sup> Tí fe mé noexínni kixin Dios tsík'jich'éna kaín nkehe tí kjuachaxin tí nixja ch'án la ko noexínni kixin tí nkehe t'ikonni mé tsík'óna tí nkehe t'ikonhyani.

<sup>4</sup> A ntá tí fe k'uéchónta ch'ín Abel mé k'óyán ch'án ijnko kolélo chjéhe ch'án

Dios. Tíha ijnko nkehe antsí jína kjuanjon ch'án, a ntá tí nkehe tsíkjanjon ch'ín Caín la náhí. Méxra Dios kóxrjínhin tí nkehe kjuanjon ch'ín Abel ntá ntácho Dios kixin jína tí ch'ín a. Kjónté ó tsík'en ch'ín Abel la tí nkehe tsík'jich'e ch'án naxa tjakoxin kixin jína tí fe k'uéchónta ch'án.‡

<sup>5</sup> A ntá tí fe k'uéchónta ch'ín Enoc la Dios sátsík'jiko tí jehe ch'án la k'uénhya ch'án, a ntá k'uitjahya sín ch'án kixin Dios sátsík'jiko. Naxa sákjuíhya ch'án la xráxín kóxrjínhin Dios nkexrí k'uék'jak'e ch'án.¶ <sup>6</sup> A ntá tí chróchóntahyani fe la xitjahya chrókjuinchechéheni Dios, kixin t'ichjánxin kixin tí sín chrókóchjinehe sín Dios chrókuitekaon sín kixin chaxín itjen ch'án la ko jehe ch'án tsjenkehe ch'án tí sín xritjeyá sín tí jehe ch'án.

<sup>7</sup> A ntá tí fe k'uéchónta ch'ín Noé tí Dios chénka tí jehe ch'án tí nkehe naxa k'uíkonhya ch'án tsonhen, la kuítekaon ch'án kjuích'éna ch'án ntabárcó kixin tsaáxin ch'án la ko tí sín naxa kjéhya ch'án. Tí fe k'uéchónta ch'án kjuakoxin kixin tí í so chojni chjasintajni la jínahya sín tsjasóte sín. A ntá kóxrjínhin Dios tí jehe ch'án kixin kuítekaon ch'án la tí xra kjuích'e ch'án mé kuaáxin ch'án.§

<sup>8</sup> A ntá tí fe k'uéchónta ch'ín Abraham tí k'uíyehé Dios tí jehe ch'án la kuítekaon ch'án sákjui ch'án tí nonte tsjanjon Dios ts'áyéhe ch'án, ntá k'uaxrjexín ch'án chjasén ch'án kjónté noehya ch'án nketí nó sátsji ch'án.\*\* <sup>9</sup> A ntá tí fe k'uéchónta ch'án k'uék'jak'e ch'án tí nonte chrókjuanjon Dios, éxi jehya nontee ch'án tíha. Kjuák'e ch'án nchia tsík'óna ka, la ko kjaxin xikaha

†10:38 10.37-38 Habacuc 2.3-4

‡11:4 Génesis 4.3-10

¶11:5 Génesis 5.21-24

§11:7 Génesis 6.13-22

\*\*11:8 Génesis 12.1-5



k'uéchónṭa ch'ín Isaac la ko ch'ín Jacob la ko kṭaxin jehe sín tsík'áyéhe sín tí nkehe tsíntáchro Dios.†† 10 A ntá ch'ín Abraham k'uékjak'echónhen ch'án tí chjasin tsíkṭjich'éna Dios ts'itjáyannya.

11 A ntá tí fe k'uéchónṭa tjan Sara kṭjonté ó nána tjan, k'uáyéhe tjan kṭuachaxin sich'éna tjan iṭnko xjan; a ntá kṭuích'éna tjan iṭnko xjan kṭixin kuítekaon tjan kṭixin Dios sinchexiteyá tí nkehe tsíntáchro ch'án.‡‡ 12 Kṭaxin xikaha ch'ín Abraham, kṭjonté ó mero chrók'uen ch'án kṭixin ó táda ch'án, la k'uaxrjeníxin ch'án nchónhya chojni éxi konotsé síin nkajní o éxi nchesen síin chrínta ntayaon, xitjahya ts'ekini.¶¶

13 A ntá kaín tí chojni a ik'uén sín k'uáyèhya sín tí nkehe tsíntáchro Dios kṭixin chrók'uáyéhe sín, a ntá k'uéchónṭa sín fe, la kṭjonté ikṭjín k'uíkon sín la ko kuítekaon sín kóchéhe sín. Mé xikaha k'uéchrónka sín kṭixin tí chjasintajni jehya chjasén sín. 14 Mé xikaha k'uénixja sín la tienxínni jína kṭixin naṭa xritjeyá sín nketí chrók'óna chjasén sín. 15 A ntá tí chrórxaxinkaon sín tí chjasin tsík'axrjexín sín ntá jína chrókjan sín ntiha ínaá. 16 Kṭjánchó tṭjinkaon sín iṭnko chjasin antsí má jína, tíha mé chjasin nkaya nkajní. Méxra Dios la tósuèhya ch'án kṭixin chrókṭjuinchek'in sín ch'án tí Dios kuènte tí jehe sín, kṭixin ó tjechónhen tí chjasin ts'áyéhe tí jehe sín.

17 A ntá fe k'uéchónṭa ch'ín Abraham kṭixin Dios kṭuích'e prueba tí jehe

ch'án kṭjuanchia tí xjeen ch'án Isaac, a ntá kṭjuíkṭao ch'án chrók'óyán ch'án, chrókṭjuanjon ch'án. Tjechónhen ch'án chrókṭjuanjon ch'án kṭjonté jnkokoáxón xjeen ch'án tsíkjanjon Dios.§§ tsíntáchro kṭixin: 18 “Tí ch'ín Isaac ts'axrjeníxin nchónhya xjan.”\* 19 A ntá ch'ín Abraham kṭuátsoan ch'án kṭixin Dios imá chónṭa kṭuachaxin, la kṭjonté chojni tsfk'en na nchexechón ch'án, la éxi yóhe chrók'uen tí xjeen ch'ín Abraham ntá chrók'uáyéhe ch'án ínaá.

20 A ntá tí fe k'uéchónṭa ch'ín Isaac kṭjuíncheyaon ch'án tí xjeen ch'án ch'ín Jacob la ko Esaú, kṭixin jína ts'ejó sín.† 21 A ntá tí fe k'uéchónṭa ch'ín Jacob tíó chjina its'en ch'án kṭjuíncheyaon ch'án jnkojṭnko tí xjeen ch'ín José, a ntá tí nta tṭjixin ch'án kṭjuisójixin ch'án nixjehe ch'án Dios.‡ 22 A ntá tí fe k'uéchónṭa ch'ín José tíó chjina its'en ch'án tsíntáchro ch'án kṭixin tí sín israelita la chr'éxin ts'axrjexín sín chjasin Egipto, tsík'etoan ch'án kṭixin tíó sátsṭji sín la sátsṭjiko sín tí huesoé ch'án.¶

23 A ntá tí fe k'uéchónṭa it'é la ko iné ch'ín Moisés tíó kokṭjíhi ch'án kṭjuak'ema sín ch'án iní nitjó kṭixin tsík'ikon sín kṭixin iṭnko xjan ntoa náxrjón tsjehe ch'án, la ko chrakuenhya sín tí nkehe tsík'etoan tí ch'ín rey kṭixin chrók'óyán sín xjan.§ 24 A ntá tí fe k'uéchónṭa ch'ín Moisés tíó kónteto ch'án la chrohya ch'án its'in ch'án xjeen tí tjan xjeen ch'ín rey Egipto.\*\* 25 Náhi. Kṭjueyá

††11:9 Génesis 35.27

‡‡11:11 Génesis 18.11–14; 21.2

¶¶11:12 Génesis 22.17

§§11:17 Génesis 22.1–14

\*11:18 Génesis 21.12

†11:20 Génesis 27.27—29,39–40

‡11:21 Génesis 47.31—48.20

¶11:22 Génesis 50.24–25

§11:23 Éxodo 1.2; 2.2

\*\*11:24 Éxodo 2.10–12

ch'án kixin kjónté chrókjuasóteko ch'án tí sín tinkáchónki Dios, la kóxrjienhya ch'án kixin séhya náxrjón chrókjuak'e ch'án chrókjuasin ch'án jie. Náhi. <sup>26</sup> Kjuenkayáxin ch'án kixin antsí tjetóan chrókjuasótéxin ch'án tí tinkáchónki ch'án tí Cristo itsi chr'éxin, a ntá kánhyó tjetóan chróchóna ch'án kaín nkehe tjetóan sín chjasin Egipto. Kjuenkayáxin ch'án kixin chrók'uíyéhe ch'án tí nkehe chrókjuanjón Dios. <sup>27</sup> A ntá tí fe k'uéchóna ch'ín Moisés sákjuixin sín tí chjasin Egipto,<sup>††</sup> chrakonhya ch'án kjónté kónínkaon tí ch'ín rey, a ntá kuítóehya ch'án tí tinkáchónki ch'án Dios kixin éxi t'ikon ch'án tí Dios ninkexró t'ikonhya.

<sup>28</sup> A ntá tí fe k'uéchóna ch'ín Moisés kjuasin ch'án tí kia pascua, k'uetóan ch'án kixin chrókuikjanjin sín jni tí puerta, kixin tí ángel t'óyán chojni chrókjuincheníehya nijnko tí xjan sao kuènte tí sín Israel.<sup>‡‡</sup> <sup>29</sup> A ntá tí fe k'uéchóna tí sín israelita k'uátòye sín tí Ntayaon Kjátse kixin k'óna nche xamá, a ntá tió tí sín Egipto tjinkaon sín chróchréhe sín xikaha la kjánchó kjuínhin sín tí ntá a.<sup>¶¶</sup>

<sup>30</sup> A ntá tí fe k'uéchóna tí sín israelita la xítjen tí tjat'ó t'inkákuènxín tí chjasin Jericó, tió kjuixin k'uántatjen sín yato yaon tí chjasin a.<sup>§§</sup> <sup>31</sup> A ntá tí fe k'uéchóna tí tjan Rahab, na mé ijnko tjan k'uéchóna nchónhya chojni ntoa, ntá k'uénkohya tjan kaín tí sín jiehe kuítekakonhya, kixin tsíkjanjón tjan kjuachaxin kixin kjuaxróxin tsikítóhe ntoe tjan tí sín israelita kjuíjitsàya sín tí chjasin Jericó.\*

<sup>32</sup> ¿Nkehe naxa chróntáxrjan? Sintak'itjáyan tiempo naxa chrónixja kuènte ch'ín Gedeón, la ko ch'ín Barac, la ko ch'ín Sansón, la ko ch'ín Jefe, la ko ch'ín David, la ko ch'ín Samuel, la ko tí sín profeta. <sup>33</sup> Kixin tí fe k'uéchóna tí jehe sín kjuacha sín k'uetóan sín jina ókjé hjasin, la ko jina kjuínchekitóxín sín ijje chojni, la ko k'uáyéhe sín tí nkehe tsintáchro Dios kixin tsjanjón ch'án, la ko k'uikjehe sín ir'va koxra, <sup>34</sup> la ko k'uanka tí xrohi chróchexín sín, la ko kjuachahya tí espada chrók'uenxín sín. A ntá tí sín chrakon la kófuérte sín, k'óna sín chojni tsehe kjuacha sín kjuánjónko sín tí sín soldado tsíkjin ókjé. <sup>35</sup> Kjaxin k'uék'ixin chojni chjin k'uáyéhe inaá tí chojni tsík'en kuènte sín tsíxechón inaá.

A ntá í so sín la kjuasote sín k'uénxin sín kixin kjuínchemáhya sín kixin kuinkáchónki sín Dios kixin ó nohe sín kixin tsóxechón sín antsí jina inaá. <sup>36</sup> A ntá í so sín kjuasóte sín la nchónhya chojni kjuanoá tí jehe sín, la ko tsík'ekon sín la ko kjaxin cadena chróntetoxín sín k'uejóchjina sín. <sup>37</sup> Í so sín la ixro k'uénxin sín, la í so sín cierra chrít'oxin sín, la í so sín la nchónhya nkehe kjuasótexín sín, la í so sín k'uénxin sín espada, la í so sín k'uék'aji sín tsík'inkáya sín tjoé kolélo la ko tjoé kotentsó, nõa sín, kjuasóte sín, kjuaxróxinhya la náxrjónhya k'uejó sín. <sup>38</sup> A ntá tí sín chjasin ntiha kjuikosáyehya tí sín a la ntá k'uínkíté sín, la tí sín a la chóntahya chjasén sín la sákjuí sín nteje, la ko jna, la ko tjo síxrja la ko tòye. <sup>39</sup> Kaín tí sín a kónhen sín prueba kixin á chaxin chóna sín fe la kjónté xikaha k'uáyéhya

<sup>††</sup>11:27 Éxodo 2.15

<sup>‡‡</sup>11:28 Éxodo 12.21–30

<sup>¶¶</sup>11:29 Éxodo 14.21–31

<sup>§§</sup>11:30 Josué 6.12–21

\* 11:31 Josué 2.1–21

sín tí nkehe tsíntáchro Dios kixin ts-janjon ch'án <sup>40</sup>kixin Dios kjuenkayáxin ch'án ijnko nkehe antsí jína kixin jehó jnkokoá chrók'uáyèkoni sín tí nkehe ts-janjon ch'án.

### Jehó Cristo chrókuinkáchónkini

**12** Méxra tí jeheni la tsík'antátjenni nchónhya chojni tsíkjakoxin sín tí fe k'uéchónta sín, la ntá chrókuí-toheni ntáha kaín tí nkehe t'inkákon-hen, la ko tí jie chrókuachroeni, a ntá chrókuich'eni jína tí xra chóntani la ntá chrókuachani antsí má chrókóno-heni. <sup>2</sup>Jehó Jesús chrókuinkáchónkini kixin jehe ch'án kjuanjon tí fe chóntani kixin jína kjuakoxin ch'án kjuínchex-iteyá ch'án, la kjuasótexín ch'án tí ntacruz, la kuáhya ch'án kuentá kó-suèhya ch'án tí nkehe kónhen ch'án ik'uén ch'án, kixin nohe ch'án kixin tsjixin tsjasóte ch'án ntá náxrjón tsjak'e ch'án la ko tsochéhe ch'án kixin tsjak'et-jaxin ch'án tí tja chjina tí trono kuènte Dios.

<sup>3</sup>Méxra chrókuenkayáxinrá jahará nkexrí kjuakoxin ch'ín Jesús. Tí sín chóna jie imá kjuínchekjasóte tí jehe ch'án la kjónté jahará xikaha chrókujasóterá la chrókóxrjéhyará chrókuinkáchónkirá ch'án. <sup>4</sup>A ntá jahará naxa k'uénxinhyará tí tjanjonkoará tí jie. <sup>5</sup>¿Á k'uitjáyánhanrá tí jahará tí nkehe ntaxraxinkaonrá Dios kixin éxi xjeen ch'án t'ikon ch'án tí jahará? Éxi ntáchro xroon itén Dios kixin:

Xjeenni, tóninkákonhya tí nkehe tje-ntúaha Ìnchéni, chrók'uaváhya tí chrókujuentuáha ch'án.

<sup>6</sup>Kixin Ìnchéni mé tjeñtúéhe tí sín tjeñtúe ch'án la ko nchekjasóte kaín tí sín ts'áyéhe ch'án ts'óna xjeen ch'án.<sup>†</sup>

<sup>7</sup>Chrókuítekáonrá tí nkehe t'etoan Dios kixin Dios t'ikon kixin éxi xjeen ch'án tí jahará. ¿Á sín ijnko it'é xjan chrokuju-entúéhya tí xjeen? <sup>8</sup>A ntá tí chrókujuentuá-hyará Dios tí jahará éxi tjeñtúéhe ch'án kaín tí xjeen ch'án, ntá jahará kjá je-hya xjeen ch'án chaxín. <sup>9</sup>A ntá tí naxa k'uéchánjanni, na mé it'èni ntihi chjas-intajni kjuentuéhe tí jeheni, la jeheni kjuikosáyeheni sín. A ntá xikaha antsí chrókujuinchexiteyèheni It'èni tjen nkaya nkajni kixin chróchóntaxinni kjuachón. <sup>10</sup>It'èni ntihi chjasintajni kjuentuéheni ch'án kjónté kánhyó sé éxi nkexrí kóxr-jínjin ch'án; a ntá It'èni Dios tjeñtúéheni ch'án kixin jnkojína chrók'ue-jóni, kixin chrók'ónani tjóá kixin jehe ch'án la tjóá ch'án. <sup>11</sup>Chaxín ninkehó xikaha chrókujuinchekjasóte Dios tí jeheni chrókóxrjínjinni tí nantá chrókón-henni kixin tí kjuatjoté. A ntá xikaha ts'itjaxinni tí kjuaxróxin éxi ijnko nkehe náxrjón kjuachani.

### Tí sín tjanoá tí kjuasáyé Dios

<sup>12</sup>Méxra tjsisójirá tí tjára tsíkóxrjé la ko tóch'inrá chóntahya fuerza, <sup>13</sup>la ko chrókujuéyará tí ntia ntoá. A ntá tí totará níhi xitjahya tjixinrá chrókuitohe jína la ko chrókónéhya inaá.

<sup>14</sup>Chrókóxakonhanrá kixin kjuaxróxin chrók'uejorá kaín rá, jnkojína tjóá chrók'uejorá. A ntá tí tjuáhya chrók'uejorá la xitjahya ts'ikonrá Ìnchéni. <sup>15</sup>Chrókóxakonhanrá kixin nijnkorá chrókuitoéhyará tí kjuasáyé Dios la ko nijnkorá chrók'ónahyará éxi ijnko nuèe ka tsjá chóna veneno chrókóniéxin tí í so chojni. <sup>16</sup>Nijnko tí jahará chrókujuásinkoará jie ijnko chojni chjin ókjé, la ko chrókjoniéhyará tí nkehe tjóá éxi kjuích'e ch'ín Esaú, kixin jnkokoá comida kjuínchekjixin ch'án

<sup>†</sup>12:6 Job 5.17; Provérbios 3.11–12

tí nkehe chróchóna ch'án kixin xjan saó jehe ch'án.<sup>‡</sup> <sup>17</sup>Jahará ó nohará kixin chr'éxin, tíó tjincaon ch'án kixin chrókjuincheyaon it'é ch'án tí jehe ch'án la í xitjahya tsoyaon ch'án kixin kohya nkexrí chrók'uixitóxín tí nkehe tsikjich'e ch'án kjónté imá chrótsjánka ch'án.<sup>¶</sup>

<sup>18</sup> A ntá jahará la jehya kóchjinará éxí kóchjina tí sín israelita tí jna jina chrótsé sín tí síchr'ákjen xrohi, tí tjen tí sítié t'inkaséyanhya la ko tí chjéhe xrinto. <sup>19</sup> Na ni tsíkíenhyará tí tsíntácho trompeta, la ko tí itén Dios nixja. A ntá tí sín tsíkinhin tí tan a na mé chronòda sín kixin í chrónixjahya ch'án inaá,<sup>§</sup> <sup>20</sup> mé xikaha ichro sín kixin tsjachahya sín sinchexiteyá sín tí nkehe k'uetóan ch'án kixin “Tí nkexro tsinkátja tí jna mé its'en, la ixro la o chica lanza chrók'óyánxin sín, la kjónté ijnko ko tsinkátja va tí jna la chrók'uen.”<sup>\*\*</sup> <sup>21</sup> Ijnko kjuachakon jíé tí nkehe k'uíkon sín la kjónté ch'ín Moisés tsíntácho ch'án kixin: “Kjaxin síxrankana chrakonna.”<sup>††</sup>

<sup>22</sup> A ntá jahará tsíkóchjineherá tí jna Sión, tí chjasén Dios tjechón, mé tí Jerusalén itjen nkaya nkajní, la ko nchónhya miles ángel <sup>23</sup> tsíkójnkotsé sín kixin tsochjéhe sín kjuasáyá Dios, la ko tí sín tsíkójnkotsé sín tsík'óna sín xjeen Dios saoxín ts'ínixín ihnié sín nkaya nkajní. Jahará tsíkóchjineherá Dios, jehe ch'án mé Juez sinchekitoxén ch'án ijé kaín chojni, la ko tsíkóchjineherá tí nchakuen chojni jina ó

tsíkjinchetjóá Dios, <sup>24</sup> la ko tsíkóchjineherá ch'ín Jesús, jehe ch'án mé nixjaxin ch'án tí pacto nixin kixin tí ijnié ch'án k'uítji kjuinchetjuáxinni ch'án. A ntá antsí jina chrónkaxín tí ijnié ch'án, a ntá kánhyó tí ijnié ch'ín Abel.

<sup>25</sup> Chrókóxakonhanrá chrókuítekákonhénra tí nkexro tjenixja. Kixin tí sín kjuanoá Dios tíó kjuínchexraxinkaon ch'án tí jehe sín ntihi chjasintajni ó la kuaáhya sín; a ntá antsí má xitjahya chrókuaáni tí chrókuitekakuenhyani tí nkexro nchexraxinkaonni kuxin nkaya nkajní. <sup>26</sup> A ntá tí itén Dios tí yaon a kjuínchekinkí nonte. A ntá jie tsíntácho ch'án kixin: “A ntá inaá jehya nonte ó sintakinkia. Náhí. Kjaxin nkajní sintakinkia”,<sup>‡‡</sup> <sup>27</sup> A ntá tí tsíntácho ch'án kixin “inaá” mé t'axrjexín kixin tsjakjiin ch'án tí nkehe jina tsinkí, a ntá tsítóhe ch'án tí nkehe xitjahya tsinkí. <sup>28</sup> A ntá tí ts'áyéheni tí kjuachaxin kjuanjon Dios la xitjahya ts'ixinkí tíha. Méxra chróchjéheni Dios kjuasáyá chrórxaxinkaonni ch'án chróchrakonhenni ch'án <sup>29</sup> kixin tí Dios kuènteni mé éxí ijnko xrohi tsjacha sinchek'itjáyan kaín nkehe.<sup>¶¶</sup>

### Nkexrí chrók'uejóni kixin chrókóchéhe Dios

**13** Méxra chrókuítóéhyará chrótkuèherá kichuára. <sup>2</sup> Chrók'uitjáyanhyará chrókjuánjonrá kjuachaxin chrókuitohe ntoará tí sín tsíkjin kjin. Mé xikaha kjuích'e iso

‡12:16 Génesis 25.29–34

¶12:17 Génesis 27.30–40

§12:19 Éxodo 19.16–22, 20.18–21

\*\*12:20 Éxodo 19.12–13

††12:21 Deuteronomio 9.19

‡‡12:26 Hageo 2.6

¶¶12:29 Deuteronomio 4.24

sín la kjónté ángel tsík'áyéhe sín la kónoehya sín.<sup>§§</sup>

<sup>3</sup>Xráxinkáonrá tí sín tjejóchjina éxí kjaxinrá chrók'uejochjinakoará tí jehe sín. Xráxinkáonrá tí sín tsík'ekon éxí kjaxin tí jahará xíkaha chrókonhanrá kjaxin.

<sup>4</sup>Káinrá chróchonteherá kjuasáya tí kótehe chojni. A ntá jahará tsfkótahará la jína chrók'uejokoará kíchuará chrótjuèhérá kíchuará. A ntá tí sín tjinkaon tsochónta chojni chjin ókjé la Dios sinchekjasóte sín kixin xíkaha ich'e sín.

<sup>5</sup>Kénhyó má chrókóxrjínhanrá itsjé chichaon. Chrókócháhará kjónté tí kánhyó tsjé chontará; kixin tsintáchro Dios kixin: “Janhan na tsítóahya tí jahará la ko ts'itjáyannahya tí jahará.”<sup>\*</sup> <sup>6</sup>Mé xíkaha chrakonhyani tsonáchroni kixin: Ìnchéni mé tjinkĩtsani,

méxra chróchrakonhyani kjónté ichrén nkehe chrókjuich'ehe ni chojni.<sup>†</sup>

<sup>7</sup>Chróxráxinkáonrá tí sín kjuínkĩtsa tí jahará kjuakohará sín itén Dios, chrókjuenkayáxinrá nkexrí k'uejó sín ntá xíkaha chrókóyóhará sín éxí tí fe k'uéchónta sín.

<sup>8</sup>Jesucristo mé itjen ch'án ijna la ko ijie la ko jnkochrín.<sup>9</sup>Chrókuítóéhyará chrókjuakohará chojni ijnko nkehe ókjé chrókuinkachónkirá. Íchá jína tí asánrá chrók'uáyéhe fuerza kixin Dios tjuahará la jehya tjetooan chrókjuinchexiteyéhe ni tí nkehe t'etooan nkehe sineni. Mé xíkaha tí sín kjuích'e xíkaha kjuínchexiteyá tí nkehe k'uítuenhen sín nkexrí chrókjóné sín la ninkehó kjuínkĩtsahya tíha.

<sup>10</sup>A ntá jeheni chóntani í jnko altar kixin k'uenyákonhenni Cristo la ntiha kohya kjuachaxin chrókjónexín tí nchat'á kjuích'e xra nkaxenhen njnko

ósé.<sup>11</sup> A ntá tí nchat'á t'etooan judío kjuíko sín tí ijnié ko nkaxenhen tí Cuarto Antsí Tjóá kixin tí nkehe la tsjatsen tí ijie sín. A ntá tí cuérpoé tí ko kjuakaxín sín ikon tí chjasin k'uejó sín.<sup>12</sup> Kjaxin Ìnchéni Jesús kjuasóte ch'án k'uénxin ch'án ikon chjasin kixin tsotjuáxin kaín ijie chojni tí ijnié ch'án.<sup>13</sup> Tsochréhe ni Ìnchéni Jesús éxí k'uénxin ch'án ikon chjasin kjónté tsjasóteni éxí kjuasóte tí jehe ch'án kjuikosáyehya sín tí jehe ch'án.<sup>14</sup> A ntá ntihi chjasintajni chóntahyani njnko chjaséni chrók'uitjáyanyha; a ntá xritjeyáni tí chjasin itsi chr'éxin.<sup>15</sup> Méxra chrókuítóehyani chrókjuikosáyeheni Dios kixin Jesucristo k'uenyákonhenni ch'án. Tí xraxinkaonni ch'án la yóhe tí ko tsík'en tsíchjéhe sín Dios. Yóhe xíkaha chrókjuanjóni kixin ir'vani ó chrókjuikosáyexínni ch'án.

<sup>16</sup>Chrók'uitjáyanyhará chrókjuich'erá xra jína la ko chrókjuínkĩtsará kíchuará. Tí xíkaha chrókjuich'erá la imá tóxrjínhjn Dios.

<sup>17</sup>Chrókuítekákonhénrá tí sín tjakohará chrókjuinchexiteyéhérá tí jehe sín. Jehe sín mé t'ayakonhen sín asánrá kixin jehe sín la ó nohe sín kixin tsjanjon sín kuentá tí tjen Dios. Tsjínkĩtsará sín kixin tsochéhe sín sich'e sín xra la tsonínkakonyha sín. A ntá tí chrókjuínchek'ávára sín, ntá ninkehó tsjachahya sín tsjinkĩtsa sín tí jahará.

<sup>18</sup>Nixjehérá Dios kixin tí jeheni kaín ni, kixin chaxín jína kjuenkayáxin ni la ko tjinkaonni kixin jína chrók'uejóni.<sup>19</sup> Tjánchíá xra ó kixin chrónixjehérá Dios kixin chrókjuanjón ch'án kjuachaxin kixin tjoka chrókján janhan chrók'uejóni.

§§13:2 Génesis 18.1–8, 19.1–3

\*13:5 Deuteronomio 31.6

†13:6 Salmo 118.6

### Tjanchia ch'án kixin chrókóyaon sín

<sup>20</sup>Tí Dios tjanjon kjuaxróxin, mé tí nkexro kjuínchexechón Ìnchéni Jesucristo kjónté tsík'en ch'án, jehe Jesucristo mé tí Pastor tjetoan t'ayakonhen tí kolélo, la tí ijnié ch'án mé tsoxiteyáxin tí pacto sich'e xra jnkochríxín, <sup>21</sup>jehe Dios mé tsjinkítsa tí jahará kixin jína chrók'uejorá la ko kaín xra jína chrókjuich'erá kixin xíkaha tjinkaon ch'án; kixin jehe ch'án t'etueñhenni ch'án kaín nkehe nkexrí tjinkaon ch'án kixin tí kjuachaxin chóna Jesucristo. Mé xíkaha chjéheni Cristo kjuasáya jnkochríxín. Amén.

<sup>22</sup>Kíchóni, xrjanóahará kixin tóninkákonhyará kixin tí palabra xrjanka syntaxraxinkáonrá. Méxra ikjian tí xroon kjónté kánhyó tsjé nixja ts'ayéhérá. <sup>23</sup>Chrókónohará kixin kíchó ni Timoteo la í tjechjinahya ch'án jie. Tí tjoka tsi ch'án la tsjasánkian ch'án tí tsjasántsjahará tí jahará.

<sup>24</sup>Nixjehérá jnkojína kaín tí sín tjítaón ntia tjako la ko kaín tí sín kíchó ni tinkáchónki Dios. Tí sín tinkáchónki Ìnchéni tjejó Italia mé nixjahará sín.

<sup>25</sup>Dios sintayaonrá ch'án kaín rá. Amén. Ó tjen.

## Tí xroon tsíkjin ch'ín Santiago

### Tí ch'ín Santiago tsíkjin ch'án xroon ts'áyéhe kaín tí sín tsíxikayehe

**1** Janhan Santiago mé t'ahá xra Dios la ko Ìnchéni Jesucristo nixjahá kaín tí sín tsík'axrjeníxin tí teyó xjeen ch'ín Israel tsíxikayehe sátsíkji kuenté chjasintajni.

#### Dios mé tsjanjon tí kjuaxrexinkaon jína

<sup>2</sup>Jahará kichó ni, chrókócháhará kjónté chrók'uats'ínkará ichrén nkehe náxrjónhya. <sup>3</sup>Ó nohará kixin tí ichrén nkehe chrókónhanrá kixin tinkachónkirá Ìnchéni la t'ichjánxin chrókjuachará la chrókóninkákonhyará. <sup>4</sup>Chrókónohará kixin tí chrókóninkákonhyará la tíha mé ijnko xra jína chaxín kixin ntá jahará ijnko chojni chaxín kjuacha titekaon la í t'itjányanhya ninkehó.

<sup>5</sup>Tí jnkójín tí jahará t'itjányan kjuaxrexinkaon la chrókjuancheherá Dios la Dios mé chrótjáhará ch'án tíha. Jehe ch'án mé xráxín tsjanjon ch'án kaín nkehe ts'áyéhe tí chojni tjanchia la tsonínkakonhya ch'án. <sup>6</sup>Tió chrókjuancheherá Dios nkehe la kénxín asánrá chrókjuanchiará la chrókjóhya asánrá ninkehó. A ntá tí chojni tjo asén la éxi ntayaon tjiko xrinto ijnko lado la í jnko lado. <sup>7</sup>A ntá tí xikaha itjo asén sín la chróntáchrohya sín kixin chrók'uáyéhe sín ichrén nkehe chrókjuanjon Ìnchéni. <sup>8</sup>A ntá tí nkexro xikaha tjenkayáxin ijnko nkehe jie la í jnko nkehe ntóye la jnkokoáhya nkehe tjenkayáxin.

<sup>9</sup>Tí kichó ni tinkáchónki Cristo la kjónté nòa chóntahya itsjé nkehe chjasintajni la kjónté xikaha chrókóchéhe kixin tí tinkáchónki ch'án Ìnchéni la

antsí má sínkí tíha. <sup>10</sup>A ntá tí nkexro rico kjónté chrók'uitjányan tí nkehe chóna la antsí chrókóchéhe kixin tinkáchónki ch'án Ìnchéni, kixin tí nkehe chóna ch'án la kánhyó sínkí la ts'itjányan éxi itsjo tsík'óna ka. <sup>11</sup>Tió tsjiton yaon la tsosóa imá la tí ka tsoxámá la ko tí tsjo la ts'ánótjen la tí náxrjón tsjehe la tsjeje. Mé xikaha tsonhen tí ch'ín rico, ts'itjányan ntá tsítóhe ch'án tí xra k'uéchóna.

#### Tí nkehe tsonhen chojni

<sup>12</sup>Náxrjón tí nkexro tsjacha ts'atsínka tí nkehe náxrjónhya tsonhen. A ntá tí tsjacha ch'án ts'atsínka kaín tí nkehe náxrjónhya tsonhen ntá ts'áyéhe ch'án tí corona kuente kjuachón kixin Dios tsintáchro ch'án kixin tíha mé tsochjéhe ch'án tí sín tjuéhe ch'án. <sup>13</sup>A ntá jnkójínrá tí chróntáchro asánrá chrókjuich'erá ichrén nkehe jínahya, la chróntáchrohyará kixin Dios tsíkjanjon kjuachaxin xikaha sich'erá kixin Dios la tjinkakonhya chrókjuich'e ch'án nkehe jínahya la ko tjinkakonhya ch'án chrók'uetóan ch'án kixin ninkexró chrókjuich'e ijnko nkehe jínahya. <sup>14</sup>A ntá jnkójín chojni tí ó jehó tjenkayáxixin asén tí jínahya la mé xikaha tsjachroe, tsjasin sín jie. <sup>15</sup>Mé xikaha tí nkehe jínahya tjenkayáxin chojni mé tjixin tí jie. La mé xikaha ts'ánkí tí jie la ntá tíha ts'enxín chojni.

<sup>16</sup>Kichóni, chrókjuich'iyéhyará asánrá. <sup>17</sup>Kaín nkehe jína ntoá t'áyéheni mé tixin nkajní tí tjen Dios tí nkexro kjuich'éna kaín tí xrohi kuente nkajní. Jehe ch'án mé Dios jnkochrínin la jehe ch'án mé xitjahya ts'ixitóxin. <sup>18</sup>Jehe ch'án kjuanjon ch'án kjuachón k'uáyéheni kixin tí tan ntoá nixja ch'án, kixin éxi tí nkehe senó tsík'óna, mé xikaha tjinkaon ch'án chrók'óna tí jeheni.

### Tí nkehe chaxín chrókuinkáchónkini

<sup>19</sup> Méxra chrórxáinkáonrá tíhi jahará kichó ni. Kaínra chrók'uejorá chrókuinhínra jína la tjokahya chrónix-jará kixin tjokahya chrókóninkáonrá. <sup>20</sup> A ntá tí chojni tjoka tónínkaon la ch'ehya tí xra jína éxi tóxrjínhin Dios. <sup>21</sup> Méxra tìtoherá tí nkehe tjuáhya la ko tí nkehe jínahya kjuachjinoxínhin síin nkuíxín la chrókjuínchexnkehýará, chrók'uayéhérá tí itén Dios chrók'uinka nkaya asánra. Tí tan a mé chóna kjuachaxin kixin chrókuaáxinra.

<sup>22</sup> Jehya kixin chrókuinhónra; jahará chrókjuich'erá éxi tí nkehe tjako tí tan a. A ntá tí náhi la jahorá ch'iyehérá asánra. <sup>23</sup> A ntá tí chojni tsinhón tí tan la ntá sinchexiteyáhya la éxi ijnko chojni tsjéxín xrosenta tí kon ó. <sup>24</sup> A ntá tí k'uíkon tí kon la sátsji la tuénxín k'uitjáyenhen nkexrí tsjehe. <sup>25</sup> A ntá tí nkexro k'uítjáyenhya tí nkehe kuínhin la mé tsjehe ch'án jína tí ley chaxín ntoá, mé tí nkehe chaxín tsaáxinni la titekaon ch'án jína la ich'e ch'án nkehe t'etóan tíha la ntá náxrjón tsjak'e kixin kjuínchexiteyá ch'án.

<sup>26</sup> A ntá jnkofjín nkexro tjenkayáxin kixin imá tinkáchónki ch'án Dios kjánchó tí noehya tsochjéhe freno nejen la jehó ch'iyehé asén la ninkehó sínkíhya tí nkehe tinkáchónki ch'án. <sup>27</sup> A ntá tí nkexro tinkáchónki Dios chaxín jína la ko tjasinhya jie nkayakon It'éni Dios la mé tíhi: mé chrókjuinkítsa tí chojni nóe la ko tí chojni k'án chónahya nkehe sine sín o níhi sín, la ko chrókjuasinhya tí jie jínahya síin chjasintajni.

### Jnkokón chrókjuikosáyehe kichó ni

**2** Kichóni, jahará tinkáchónkirá Ìnchéni Jesucristo imá tjetóan la t'ichjánxín chrókjuikosáyeherá kaín chojni jnkokón. <sup>2</sup> Éxi ijnko chojni

rico chrók'uixenhen tí tójnkotsérá la chóna koch'aninko oro la ko chóna iké náxrjón, a ntá ntiha kjáxin chrók'uixenhen ijnko chojni nóe chóna iké ntáxin. <sup>3</sup> A ntá tí chrókjuikosáyeherá tí chojni t'itsa ka jína la tsontácherá ch'án kixin: "Ntíhi antsí jína tjak'e." A ntá tí chojni nóe tsontácherá ch'án kixin: "Jaha la tjak'éxian totá ntiha o tjak'e nonte ó." <sup>4</sup> Mé xíkaha la jnkokónhya tjikosáyeherá kichuárá la tí nkehe jínahya tjenkayáxinra.

<sup>5</sup> Kichóni tjuahará, tsinhínra tíhi: Dios tsíkjeyá tí sín nóe ntihi chjasintajni kixin antsí má tsinkáchónki sín tí jehe ch'án kixin ts'áyéhe sín tí kjuachaxin kuente ch'án éxi tsintáchro ch'án tsochjéhe ch'án tí sín tjuéhe ch'án. <sup>6</sup> A ntá jahará mé tjikosáyeherá tí sín nóe. A ntá tí sín rico mé tjikosáyeherá. ¿Á jehya tí sín rico tjanchia sín jie sájtiko sín tí jahará nkayakon tí sín t'etóan ní? <sup>7</sup> ¿La á jehya jehe sín t'ántaxínhin sín tí ihnié Cristo tjikosáyehehi?

<sup>8</sup> A ntá jahará la jína tjejoch'erá tí nchexiteyará éxi t'etóan tí ley éxi nixja tí xroon itén Dios kixin: "Chrótjuéherá kichuárá éxi tjuèxíná asánra". <sup>9</sup> A ntá tí jnkokónhya tjikosáyeherá chojni la ntá xíkaha la tjasínra jie la nchexiteyéhýará éxi tí nixja tí ley kuente Dios. <sup>10</sup> A ntá ijnko nkexro titekaon kaín tí ley la ntá kjuínchexiteyáhya jnkokoá tí nkehe tjetóan la mé tí xíkaha la kjuínchexiteyéhýa kaín tí nkehe t'etóan tí ley. <sup>11</sup> Ntá Dios tsintáchro kixin: "Chrókuák-jahýará í jnko chojni chjin ókjé", la kjáxin tsintáchro ch'án kixin: "T'oyán-hýará kichuárá." A ntá tí nkexro kuák-jahýa í jnko chojni chjin ókjé kjánchó kjuàya la kjuínchexiteyéhýa tí nkehe t'etóan tí ley. <sup>12</sup> A ntá jahará chrónix-jará la ko chrókjuínchexiteyará kixin chrókjuanchiahya jie tí ley sinchekaáni. <sup>13</sup> A ntá tí nkexro kuíkonóehya í jnko chojni la kjáxin tsíkonóehya Dios tí jehe.



A ntá tí nkexro kuikonóhe kichó la mé xikaha tsjacha tsaáxin ch'án tí yaon tsjixixín tsitoxén jie.

### Tí fe ch'ehya xra la tsík'en

<sup>14</sup> Kichóni, ¿neke tsonhen ntáchrórá kixin chontará fe a ntá ninkehó nkehe jina tjákoxinhyará? ¿Á ntáchrórá kixin xikahó chrokuaáxinrá? <sup>15</sup> Éxí ijnko kichó ni nto a kichó ni chjin chóntahya iké o chóntahya nkehe sine sín t'ichjánxinhin sín jnkojín yaon. <sup>16</sup> Ntá jnkojín tí jahará tsontácherá sín kixin: “Sátjia jnkojina la ko ts'itsa ká la ko sinte jina.” A ntá tí kjuánjonhyará tí nkehe t'ichjánxinhin tí cuerpoé sín la sínkíhya tí nkehe ntáchrórá. <sup>17</sup> La mé xikaha tónhen tí fe la tí tjákoxinhyará ninkehó nkehe jina kjuich'erá la éxí nkehe tsík'en tí ntáchrórá.

<sup>18</sup> A ntá jnkojín chojni tsontáchro kixin: “Jaha chonta fe a ntá janhan it'a tí xra jina.” Tí xikaha la jaha tjákoxian tí fe kjónté kohya xra la janhan tsjákoxian tí fe la ko tí xra jina tjét'a. <sup>19</sup> Jaha titekávan kixin jnkokoá Dios itjen la chaxín jina xikaha, kjánchó kjaxin tí jinahya titekaon tíha la ko síxranka chrakon. <sup>20</sup> T'ónahyará lontj. Jahará la nohará kixin tí fe ch'ehya xra la chónkó tíha. <sup>21</sup> Dios kóxrjinhin tí nkehe chrókjuich'e ch'ín Abraham, tí nkexro k'uaxrjeníxinni ósé, tió chrók'óyan ch'án tí xjeen ch'án Isaac la chrókjuanjon ch'án chrók'uáyéhe Dios. <sup>22</sup> Chrókónohará kixin tí fe k'úechóna ch'ín Abraham la kjuakoxin ch'án tí xra kjuich'e ch'án la ntá xikaha kjuakoxin ch'án kixin antsí má kuinkáchónki ch'án Dios. <sup>23</sup> Mé xikaha xiteyá éxí ntáchro xroon itén Dios kixin: “Abraham kuítekaon Dios la ntá Dios ntáchro kixin jina ch'án”, la ntá Dios kjuínchek'in ch'án amigo kuènte ch'án.

<sup>24</sup> Chrókónohará jahará kixin Dios la t'áyéhe ch'án chojni la nchetjóá ch'án

kixin tí xra jina ch'e sín la jehya kixin jehó chrókuinkáchónki sín ch'án. <sup>25</sup> Mé kjaxin xikaha kónhen tí tjan Rahab, tí tjan k'úechóna nchónhya chojni ntoa. Jehe tjan kjuanjon tjan kjuachaxin kuítóhe ntoe tjan tí sín kjuítsjehe chjasén tjan la ko kjuínkítsa tjan sákjuixin sín ókjé ntia, a ntá Dios la kóxrjinhin tí nkehe kjuich'e tjan. <sup>26</sup> Éxí tí cuerpoé chojni chóntahya nchakuen la tsík'en la kjaxin xikaha tí fe la tsík'en tí ninkehó tjákoxinhya tí nkehe jina chrókjuich'e sín.

### Tí kjuachaxin chóna nejen chojni

**3** Kichóni, chrók'ónahya tí jahará nchónhya maestro kixin tí ntoáhya chrókjuàkorá la tíha mé chrókjuasótiaxinrá imá. <sup>2</sup> Kaínni chóntani jie, a ntá tí nkexro ninkehó jie ntáchrohya la ijnko chojni jina tíha la ó tsjacha ch'án ts'etueñhen ch'án kuenté tí cuerpo kuènte ch'án. <sup>3</sup> Éxí tí kokate tsochóna chica freno tí ir'va va kixin tsitekaon va la sátsjiko tí inché va la tsjacha ch'án ts'etueñhen kuenté tí cuerpo kuènte va. <sup>4</sup> Tjenkayáxinrá kjaxin nkexrí tjejó tí ntabarco kjónté imá jié la tsjacha tí xrinto chjéhe tjian sátsjiko, la ntá tí ch'ín tjiko la kjónté ijnko nta ntsí la tsjacha ch'án sátsjikoxín ch'án tí tjinkaon ch'án sátsjiko ch'án. <sup>5</sup> Mé xikaha tí ir'va chojni. Kjónté ijnko nkehe imá ntsí kuènte tí cuerpo kjánchó nchónhya nkehe jinahya ntáchro éxí ijnko xrohi ntsí la tsjacha tsochéxin kuenté ijnko jna jié. <sup>6</sup> Mé xikaha tí ir'vani la éxí ijnko xrohi kixin nchónhya jie t'axrjexín la éxí ijnko veneno ncheníhi cuerpo mé xikaha mé tsjasixín kuenté cuerpoé chojni jie. La tí kjuachaxin kuènte ir'vani la mé tjixín tí infierno la tíha mé tjixín tí ts'itjáyanxínni. <sup>7</sup> Tí chojni la tsjacha sinchesáncho kaín ko jiehe la ko tí ko xritjaká la ko tí konche la ko

tí ko sínkankí ntayaon la mé xíkaha kjuacha sín nchesáncho sín va. <sup>8</sup> A ntá tí ir'va chojni la kohya nijnko chojni tsjacha sinchesáncho. Tíha mé jínahya la xitjahya tsosáncho. Tíha mé éxí ijnko nkehe chóna nchónhya veneno ts'ensexín chojni. <sup>9</sup> Tí ir'vani la kjaxin tjikosáyexinni It'eni Dios la tíha kjaxin t'ántaxíenxinni chojni tsfkjich'éna Dios éxí tsjehe tí jehe ch'án. <sup>10</sup> Kjaxin tí ir'vani t'axrjexín tí nkehe itsjeni kuènte Dios la kjaxin tíha t'ántaxínxinni. Kíchóni, xíkaha chrókjuich'erá. <sup>11</sup> Jnkokoá tòye xitjahya ts'axrje ntá xé la ko kjaxin ntá tsjá. <sup>12</sup> Kíchóni, ¿á jína tí nta higuera chrók'óna to aceituna o tí nta to uva chrók'óna to higo? Kjaxin xitjahya ijnko tòye chrók'uaxrje ntá xíjnta la ko ntiha kjaxin chrók'uaxrje ntá xé.

### Tí kjuaxrexinkaon jína

<sup>13</sup> Tí tjen jnkójín nkexro tí tjejorá nohe jína la ko tienxín la chrókjuakoxin ch'án jnkójína la ko chrókjuinehnekexínhya ch'án tí nkehe imá nohe ch'án. <sup>14</sup> A ntá tí jahará chóna kjuachjinoxínhin asánra la tjinkáonra jahorá chrókuétoanra. A ntá tí xíkaha la chrókjuinehnekexínhyará tí nkehe nohará kixin tí xíkaha la ch'iyará la tjinkákonhyará chróchronkará tí nkehe chaxín ntoá. <sup>15</sup> A ntá tí xíkaha sinchehnerá la jehya tí kjuaxrexinkaon kujxin tí tjen Dios. Tí xíkaha la kjuachaxin kuènte chojni chjasintajni ó la ko kuènte ch'ín Tsochren. <sup>16</sup> A ntá tí xíkaha síin kjuachjinoxínhin la ko tjinkaon chojni jehó chrók'uetōan la ntá xitjahya tsonhen xra yóxin kixin xíkaha síin nkehe jínahya. <sup>17</sup> A ntá tí síin kjuaxrexinkaon jína tsfkixin tí tjen Dios la saxín tjejó chojni jína la ko kjaxin kjuaxróxin tjejó sín la ko náxrjón tjejó

sín la ko jnkójína nixjehe kíchó sín la ko kjaxin tikonóehe kíchó sín la ko tí xra jína tjejóch'e sín la tí nkehe ntoá nixja sín. <sup>18</sup> Tí nkexro tjejá tí kjuaxróxin xíkaha chrók'uenka sín kjuaxróxin la ko xíkaha chrótjá sín tí nkehe jína.

### Tí tjanjonxin chojni

**4** ¿Nketí tjixin tí guerra la ko tí kjuanínkaon tjanjonkoaxínra kíchuára? Táha la mé jahorá t'axrjenínra kaín tí kjuanínkaon a. <sup>2</sup> Jahará tjinkáonra tsochontará ichrén nkehe ntá chontahyará ntá tónínkáonra t'oyánra kíchuára. Tóchjinoxínhanra kixin tsjachahyará sincheyóherá í so chojni ntá tónínkáonra. Jahará ts'ayéhyará tí nkehe tjinkáonra kixin tjanchehyará Dios. <sup>3</sup> La tí tjanchará la ts'ayéhyará kixin ntoáhya kjuanchiará kixin tjinkáonra chrókuicháxinhanra ó la chrókjuinehnekexínra. <sup>4</sup> Jahará chojni titekakhya Dios. ¿Á noahyará tí jahará kixin tí imá tsotjuèhéra chjasintajni la ntá tsoninkákonhérra Dios? A ntá tí jnkójínra tjinkáonra tsotjuèhéra chjasintajni la tsokjanra tsoninkákonhérra Dios. <sup>5</sup> ¿Á tjenkayáxinra kixin tí nkehe ntáchro xroon itén Dios la á chónkó? Ntáchro xíkahi: “Tí Nchakuen Dios kjuanjon ch'án k'uayéhéra la tjuahará ch'án la tsonínkaon tí tsitohérra ch'án.” Mé xíkaha ichro Dios. <sup>6</sup> Kixin Dios la imá tjinkitsani ch'án, méxra ntáchro xroon itén Dios kixin: “Dios la nínkakohen tí chojni nchehke a ntá tjinkitsa ch'án tí chojni nchehkehya.”<sup>\*</sup> <sup>7</sup> Méxra chrókjuinehnekehyará. Íchá jína chrókuítekáonra Dios la chrókjuánjonhyará kjuachaxin tí jínahya chrók'uetuānhanra ntá chrók'uikon tí jínahya kixin chrók'uetuānhya ntá sáchrókjui.

\*4:6 Proverbios 3.34

<sup>8</sup>Chrókóchjineherá Dios, la tí jehe ch'án kjaxin tsochjinahará ch'án. Jahará chojni chóna j̄ie la chrókjonemará tjára. Chrókjūinchetjóará asánrá k̄ixin chrótjuèhérá Dios la kánhyó chrótjuèhérá chjasintajni. <sup>9</sup>Chrók'uavará la ko chrótsjankará. Chrókjūinkirá tí tjanorá la chrótsjankará la chrókjūinkí tí cháhará la chrók'uavará. <sup>10</sup>Chrókjūinchehnkehýará chrórxáinkáonrá Ìnchéni a ntá jehe ch'án chrókjūink̄isa ch'án ant̄si chrókónohará.

### Chrók'uántaxiēnyani kichó ni

<sup>11</sup>Kíchóni, chrók'uántaxiēnyará kichuárá. A ntá tí nkexro t'ántaxínhin ijnko kichó la ntá jehe ch'án t'ántaxínhin ch'án tí ley, la t'eka j̄ie tí ley. A ntá tí t'eka ch'án j̄ie tí ley la mé t'óna juez chrínkí chrókuitekaon tí ley. <sup>12</sup>Kíxin jnkokoá nkexro kjuanjon tí ley la tí nkexro a mé tí juez la jehe ch'án sinchekaá ch'án chojni la ko sinchekjásote ch'án chojni. ¿A ntá nkexro tí jaha k̄ixin chrókjuanchéhé j̄ie tí kichuá?

### Í noehyani nkehe t̄onhen ntóye

<sup>13</sup>A ntá j̄ie jahará chrókuinhínrá t̄íhi k̄ixin ts̄intáchrórá k̄ixin: “Ij̄ie o ntóye sáchrókjuini ijnko chjasin la ntiha chrók'uejóni ijnko nánó chrókjuinchekjini nkehe chrókjuachani chichaon.” <sup>14</sup>A ntá jahará noahýará nkehe t̄onhen ntóye k̄ixin tí t̄iejóchónni la éxí ijnko t̄juí nonte ts'ikonn̄i a ntá tuénxín ts'itjáyan. <sup>15</sup>Íchá jína chróntáchrórá k̄ixin: “Tí t̄jinkaon Ìnchéni la nax̄a chrók'uejóchónni la chrókjuich'eni t̄íhi o t̄íha.” <sup>16</sup>A ntá jahará tí nixjará la imá ihnkerá la káin tí kjuahnke la mé jínahya. <sup>17</sup>A ntá tí nkexro nohe chrókjuich'e tí nkehe jína la ntá ch'ehya x̄ikaha la mé ant̄si t̄jasin j̄ie.

### Tí nkehe chrókuinhin tí sín rico

**5** Jahará rícorá chrókuinhínrá t̄íhi. Chrótsjankará la ko chrók'uíyatorá k̄ixin tí nkehe t̄onhanrá tsjasótiará. <sup>2</sup>Tí nkehe rícoxínrá la ó tsíkótje la ko tí ka chontará la ó tsík'in kué. <sup>3</sup>Tí oro la ko tí plata chontará ó tsíkóchjisen. Tíha mé t̄jakōxin k̄ixin nkexr̄i t̄onhen ntóará t̄soche. ¿Nkehe t̄onhen kjuásintonrá nkehe k̄ixin ó t̄si tí yaon tsjixixín? <sup>4</sup>A ntá tí nkehe chrókjuacha tí sín kjuít'ahará x̄ra la kjuénkehýará sín la ntá tjanchia sín j̄ie tí jahará la t'èya sín, ntá Ìnchéni imá t'et̄oan mé kuínhin k̄ixin x̄ikaha ichro tí sín kjuíuch'e x̄ra. <sup>5</sup>A ntá ntihi chjasintajni la náxrjón t̄ejorá la káin nkehe tóxrjínhanrá ch'erá la éxí iko imá jína ine la tsíkótsan̄ka la ntá itsji yaon ntá its'en la mé x̄ikaha t̄onhanrá. <sup>6</sup>Kíxin jahará la kjūinchekjásóterá la k'oyánrá chojni ninkehó j̄ie chóntahya k̄jonté kohya nkehe kjuít'ahará sín.

### Chrókónínkakonhyani chróchónhenni la chrónixjehēni Dios

<sup>7</sup>Méx̄ra kichó ni, chrókónínkákonyará chróchonhénrá tsokjanjian Ìnchéni. Éxí tí ch'ín ch'e x̄ra nont̄e chónhen xrakoa chrin senó la ko tí chrin tsjixixín ntá tsotj̄a ch'án tí nkehe náxrjón k'óna. <sup>8</sup>Mé x̄ikaha jahará la kjaxin chrókónínkákonyará chróchonhénrá chrókóxrjéhyará k̄ixin tí yaon itsi Ìnchéni la ó chjina t̄si. <sup>9</sup>Kíchóni, chrókónínkákonyará kichuárá k̄ixin ntá chrókjuanchahya Dios j̄ie tí jahará k̄ixin Dios la mé tí juez la ó t̄jen ch'án tí ntója puerta. <sup>10</sup>Kíchóni, chrókuankíhírá éxí tí sín k'uéchrónka itén Dios k'uéchrónkaxín sín kjuachaxin ih̄nié Ìnchéni. Jehe sín k̄jonté kjuasóte sín la kónínkakonhya sín. <sup>11</sup>A ntá jeheni ntáchroni k̄ixin kóchéhe tí sín a k̄jonté kjuasóte sin la

kjuacha sín. Jahará la ó kuinhínra kixin nkexrí kónhen ch'ín Job. Ó nohará kixin Ìnchéni kjuínkítsa ch'án hasta kjuixixín kixin Ìnchéni la imá jína ch'án la kuikonóehe ch'án tí ch'ín a.

<sup>12</sup> A ntá kichó ni, chrókuakjénxínhyará ihnié Dios tjen nkaya nkajní la ko ni chjasintajni la nijnko nkexro chrók'uakjénxínhyará. Tí chróntáchrora chaxín la chaxín la tí náhí la náhí kixin Dios la chrókjuinchekjásótiahyará.

<sup>13</sup> A ntá jnkojín tí jahará náxrjónhya tjejorá la chrónixjehérá Dios, a ntá jnkojínra náxrjón tjejorá la chrótsjerá kuènte Dios. <sup>14</sup> A ntá tí jnkojín nkexro níhi la chrók'uíyehé sín tí sín táda t'etóan kuènte ninko kixin ntá chrónixjehé sín Dios kixin tí síníhi la ko chróchjéhe sín aceite tí sín a kjuachaxín ihnié Ìnchéni.

<sup>15</sup> Chrónixjehérá Dios kaín asánra kixin tí síníhi chrókuítóhe jína la ntá Ìnchéni chrókjuinkítsa sín, a ntá ichrén jie kjuasin sín la jehe ch'án sinchek'itjáyan tíha. <sup>16</sup> Méxra chróchenkará kichuárá tí

jie chontará la ko chrónixjehérá Dios kixin chrókuítóhará jína. Tí nixjehé Dios ijnko chojni jína tinkáchónki Ìnchéni la chóna nchónhya kjuachaxin tíha. <sup>17</sup> Tí ch'ín Elías, tí nkexro k'uéchrónka itén Dios, mé ijnko chojni éxí tí jeheni la jehe ch'án kjuanchehe ch'án Dios kaín asén ch'án kixin ts'aniáhya chrin la ntá k'uániáhya chrin chjasintajni iní nánó ko t'ó. <sup>18</sup> A ntá chr'éxín kjuanchehe ch'án Dios kixin ts'aniá chrin la ntá k'uániá chrin ínaa chjasintajni la jína k'óna tí nkehe k'uénka sín.

<sup>19</sup> Kichóni, tí jnkojín chojni chrókjuichroe chrókuítóhe tí nkehe ntoá la í jnko nkexro chrókjuinkítsa kixin chrókjan tí nkexro a <sup>20</sup> la chrókónohará tí jahará kixin jnkojín chojni tjinkítsa ijnko nkexro chóna jie tsokjanxín tí ntia jínahya k'uék'aji ch'án la ntá ó kjuínkítsa kixin tsaáxin asén tí ch'ín a kixin ts'itjáyanhya ch'án la ntá chrók'uitjáyan tí nchónhya jie k'uéchóna ch'án. Ó tjen.

## Tí xroon saoxín tsíkjin ch'ín Pedro

### Ch'ín Pedro ikjin ch'án xroon chr'énhen ch'án tí sín tinkáchonki Ìnchéni tjejó ókjé

**1** Janhan Pedro, mé kjueyána Jesu-cristo t'aha ch'án xra mé ikjian tí xroon chr'anhanrá jahará sátsíkjurá ókjé chjasin tjejorá, mé tjejorá estado Ponto, la ko Galacia, la ko Capadocia, la ko Asia, la ko Bitinia. <sup>2</sup>Kjueyará It'éni Dios kixin jehe ch'án tsíkjenkayáxin ch'án ósé xikaha. Kóttjuáxinrá Nchakuen ch'án kixin chrókuítekáonrá ch'án la ko kóttjuáxinrá ijnié Jesucristo. Kjuasáyé ch'án chrókjuintayaonrá ch'án kixin antsí chrókuákjárá tí kjuaxróxin kuènte ch'án.

### Tjejóchónhenni kixin jehe ch'án sinchekaáni ch'án

<sup>3</sup>Tjancheheni kjuasáyé Dios mé It'é Ìnchéni Jesucristo kixin kjuasáyé jehe ch'án kuíkonóhēni ch'án kixin éxí kokjéxinni nixin kixin xechón Jesucristo. Mé xikaha tjejóchónhenni sinchekaáni ch'án. <sup>4</sup>Mé xikaha ts'ayéhérá jahará tí nkehe tsjanjon Dios chóna ch'án nkaya nkajní mé ijnko nkehe chónhya ts'itjáyan, la ko chónhya tsokjita, la ko chónhya tsoxamá. <sup>5</sup>Dios mé t'ayakuanxínrá ch'án tí kjuachaxin kuènte ch'án kixin jahará tinkachónkirá ch'án kixin ntá tsjacha tsaará éxí tsíkjenkayáxin ch'án ósé mé tjinkaon ch'án kixin chrókuaará tí tsjixixin tsjeje chjasintajni.

<sup>6</sup>Méxra xikaha chróócháhará kjónté ichrén nkehe chrókónhanrá iso yaon kixin jehí t'ichjánxin xikaha itsjé nkehe chrókónhanrá. <sup>7</sup>Méxra tí tinkachónkirá Ìnchéni la t'ichjánxin tsjachará nchónhya nkehe chrókónhanrá éxí yóhe chica

oro xikaha t'ichjánxin ts'atsínka tí siín xrohi tsotsjéxin sín á chaxín jina kohya nkehe tsonhen. <sup>8</sup>ntá antsí má sínkí tí tinkachónkirá Ìnchéni a ntá tí chica oro la kénhyó sínkí kixin tí chica oro la chóxin tsjeje. Mé xikaha tí tinkachónkirá Ìnchéni t'ichjánxin xikaha tsonhanrá kixin tsontácho Dios kixin jina kjuachará ntá ts'ayéhérá kjuachaxin tió tsi Jesucristo.

<sup>8</sup>Jahará tjuèhéra Jesucristo kjónté k'uíkonhyará ch'án. Ijie tinkachónkirá ch'án kjónté t'ikonhyará ch'án la ko tócháhará ijnko kjuachéhe imá jié kohya nkehe sincheyóhēni kixin imá náxrjón tíha. <sup>9</sup>Mé xikaha k'uitjará nkexrí tsaáxin asánrá. Tíha mé tí nkehe tjejóchónhénrá tinkachónkirá.

<sup>10</sup>Mé xikaha tí sín profeta tsíki ósé la kjueyá sín nkexrí chrókuaáxin chojni la ko k'uéchrónkaxín sín tí nkehe kjuasáyé Dios chrókjuanjon ch'án chrók'uayéhérá tí jahará. <sup>11</sup>Nchakuen Cristo kjuínchenohe tí sín k'uéchrónka itén Dios kixin Cristo tsjasóte la ko chr'éxin ts'ayéhe ch'án tí kjuachaxin jié. <sup>12</sup>ntá tí sín k'uéchrónka mé tjinkaon chrókónohe sín nkexro tíha la ko nkesá tsonhen tí nkehe chrónkaxín Nchakuan Ìnchéni. <sup>13</sup>Kjánchó Dios kjuínchenohe tí jehe sín kixin tí nkehe chrónka sín jehya kixin tjoka chróxiteyá tí k'uéjé sín. Náhí. Hasta tí tjejóni jie mé ó xiteyá tíha. Tí nkehe chrónka sín la mé yóhe tí nkehe kuínhínrá, mé tí tan tsaáxinni k'uéchrónkaxín tí sín kjuakohará kixin tí kjuachaxin Nchakuen Dios kuixín nkaya nkajní mé kjuínkítsa tí jehe sín. Kjaxin tí sín ángel tjinkaon sín chrók'uikon sín nkexrí tíha.

### Dios k'uíyēhe ch'án tí jeheni kixin tjóá chrók'uejóni

<sup>13</sup>Méxra chrókjuenkayáxinrá jina nkehe chrókjuich'erá kixin chrók'uejorá jnkójina. Kaín asánrá

chrók'uejochonhénra kixin tí nkehe sintakitonhanra Dios tió tsi Ìnchéni Jesucristo. <sup>14</sup>Éxí ijnko xjan titekaon mé xikaha jnkojína chrók'uejorá jahará, chrók'juekayáxinhyará éxí k'uékjenkayáxinrá senó naxa k'uéchonhyará Dios. <sup>15</sup>Náhi. Jnkojína tjóá chrók'uejorá kixin Dios k'uíyáhará la mé jína ch'án la ko tjóá ch'án. <sup>16</sup>Kixin ntáchro xroon itén Dios kixin: “Jahará chrók'uejorá tjóá kixin janhan na mé ijnko nkexro tjóá.”<sup>¶</sup>

<sup>17</sup>Tí ntáchrorá jahará kixin It'ará mé Dios la ko ó nohará kixin jehe ch'án sinchekitoexín ch'án ijíe jnkojnko chojni, kixin t'ikon kixin jnkokón sínkí jnkojnko chojni, a ntá jahará chrórxáinkáonrá ch'án jnkochrínxín tí naxa tjejochónrá ntihi chjasintajni. <sup>18</sup>Dios mé kjuíntakaará ch'án kixin chrók'uejohyará éxí k'uék'ejó tí sín tsík'axrjeníxinrá. Jahará ó nohará jína kixin tí nkehe k'uínáxinrá tsaáxinrá jehya ijnko nkehe chrók'jueje éxí chica oro o chica plata. <sup>19</sup>Náhi. Ná mé k'uínáxinrá ijnié Jesucristo imá tjete. Jehe ch'án mé k'óyán sín la k'uáyéhe Dios éxí ijnko kolélo ninkehó xéhya va. <sup>20</sup>Kixin Cristo mé ósé tsikónoxín ch'án tí naxa k'ónahya chjasintajni. Kjánchó jehya tuénxín kónhen tíha hasta tí chr'éxin ntá kónoxín ch'án kixin jína chrók'uejoxínrá tí jahará. <sup>21</sup>Ntá xikaha kónhen Cristo a ntá jie jahará la kuítekáonrá Dios, mé tí nkexro kjuínchexechón Cristo la ko kjuikosáyehe ch'án. Mé xikaha jahará tinkachónkirá Dios la ko tjejochonhénra sintakaará ch'án.

<sup>22</sup>A ntá jie ó kuítekáonrá tí tan chaxín ntoá kixin tjinkitsará Nchakuén Dios. Tíha mé kótjuáxin asánra kixin ntá tsotjuèhéra kichuára. Mé xikaha

chrótjuèhéra kichuára kaín asánra. <sup>23</sup>Méxra jahará kokjílhará nixin, jehya kixin naxa chrók'uaxrjeníxinrá it'ará chjasintajni ntiho ts'itjáyan. Náhi. Kokjíaáxinrá itén Dios itjen jnkochrínxín. <sup>24</sup>Kixin ntáchro xroon itén Dios kixin: Kaín chojni chjasintajni tóyóhe kayoa ó, a ntá tí kjuachaxin chóna la tóyóhe itsjo t'óna kayoa.

Tí ka la tsoxamá a ntá tí tsjo la ts'anótjen <sup>25</sup>a ntá tí tan kuente Ìnchéni la tsjak'e jnkochrínxín.<sup>§</sup>

Tí tan í mé tsaáxinni la kuinhínra tí jahará.

**2** Méxra tjtóhéra kaín nkehe jínahya, la ko kaín kjuach'ia, la ko tí ntoáhya tjenkayáxinrá, la ko tí kjuachjinoxínhin, la ko tí xrikoará kaín xín kjuach'ia. <sup>2</sup>Chrók'uejorá éxí chánjan na ntá tsík'okjíhi la itsjen ó chrók'ui, mé xikaha jahará chrók'jueyárá itén Dios, tíha mé chrókónohará la chrók'uánkixin kjuaxrexinkaon kuéntará kixin chrókuaáxinrá, <sup>3</sup>tí chaxín kjuátsoanrá kixin Ìnchéni la jína.

### Cristo mé tí xro tjechón

<sup>4</sup>Chrókochjineherá Ìnchéni, mé jehe ch'án me éxí tí xro tjechón. A ntá tí chojni la kuítekakhonhya tí xro a, a ntá Dios la kjuéyá ch'án tí xro a imá tjete sínkí. <sup>5</sup>Mé xikaha Dios kjuích'énará tí jahará éxí xro tjechón la Dios chrók'juich'éna ch'án tí jahará jnkokoá nínko kuente ch'án, la mé ts'ónará nchat'á tsíkjinchetjóá Dios, a ntá chróchjehéra ch'án tí nkehe tóxr-jínhin ch'án kixin tinkachónkirá Jesucristo. <sup>6</sup>Mé xikaha kjaxin xroon itén Dios ntáchro kixin:

Tsjaké chjasin Jerusalén ijnko xro t'etōan ts'óna nchia, ijnko xro tsíkónoxín imá tjete sínkí

<sup>¶</sup>1:16 Levítico 11.44

<sup>§</sup>1:25 1.24-25 Isaías 40.6-8

ḡ ntá tí sín tsitekaon tí jehe ch'án mé tso-  
suèhya sín.\*\*

<sup>7</sup> Ḃ ntá jahará títekaónrá tí xṛo kíxin  
imá tjete. Ḃ ntá tí sín kuítekakonhya, la  
mé tsoxiteyá éxí ntáchro xroon itén Dios  
kíxin:

Tí xṛo náxrjónhya kuítóenta tí sín ch'éna  
tjat'o,

mé ijie mé k'óna tí xṛo tjetoan.††

<sup>8</sup> La ko kjaxin tsoxiteyá tí nkehe ntáchro  
xroon itén Dios kíxin:

Tí xṛo mé tsóténkíxin sín la mé t'ha ijnko  
tjo tsjitsínkaxín sín.‡‡

Kjánchó jehe sín kóténkíxin sín tí xṛo  
kíxin kuítekakonhya sín tí itén Dios mé  
xráxín tsíkítoenxín sín xíkaha tsonhen  
sín.

### Tí sín tinkáchónki Dios

<sup>9</sup> Ḃ ntá jahará tsík'axrjeníxinrá tí sín  
tsík'jeyá Dios la ko tsík'ónará nchat'á  
ch'eherá xṛa tí rey, la ko tsík'ónará ijnko  
nación tjóá, la ko tsík'ónará ijnko ch-  
jasin kuènte Dios kíxin ntá tsochronkará  
tí xṛa náxrjón kuènte Dios. K'ufyahará  
ch'án kíxin ts'axrjéxinrá tí sítié ntá ts'ix-  
enhénrá tí síin xrohi náxrjón t'inkaséyan  
kuènte ch'án. <sup>10</sup> Ḃ ntá jahará tí ósé la  
jehya chjasén Dios, ḡ ntá jie la tsík'ó-  
nará chjasén ch'án. Tí ósé la Dios k'uék-  
ikonóahyará. Ḃ ntá jie la kuíkonóahará  
Dios.

### Chrók'uejóni ch'ehe ni xṛa Dios

<sup>11</sup> Kíchóni, xrjanóahará tí jahará kíxin  
éxí chojni tsík'jixin ókjé chrók'uejorá  
ntíhi chjasintajni chrók'juánjonhyará  
kjuachaxin chrókóxrjínhin asánrá tí  
nkehe síin chjasintajni, mé tí nkehe  
tjanjonko asánrá. <sup>12</sup> Jína chrók'uejorá  
tí síin tí sín chónhya Dios kíxin kjónté  
t'ántaxínhanrá sín éxí chojni jínahya

chóna jie tí jahará, ichro sín, la ntá tí  
chrók'uiikon sín kíxin jína tjejoch'erá  
xṛa ntá tsjanchehe sín Dios kjuasáya  
tsjixraká tí yaon tsjanchia ch'án nkehe  
tí xṛa kjuich'erá.

<sup>13</sup> Jahará tinkachónkirá Ìnchéni  
chrók'juinchesteyéhérá kaín tí sín  
t'etoan kuènte chjasintajni, á tí ch'ín  
rey kíxin imá t'etoan ch'án, <sup>14</sup> ḡ á tí  
ch'ín gobernador ichr'án Dios kíxin  
sinchesteyéhérá ch'án tí sín tjasin jie, ḡ  
ntá tsjikosáyehe ch'án tí sín ch'e tí  
nkehe jína. <sup>15</sup> Dios tjinkaon kíxin jína  
chrók'uejorá kíxin tí sín noehya la ko  
tí sín lontí la kohya jie ts'ekará sín tí  
jahará.

<sup>16</sup> Chrók'uejorá éxí chojni t'ítuenhya,  
ḡ ntá tí kjuachaxin chontará jehya  
kíxin chróchontaxínrá kjuachaxin  
kíxin chrók'juich'erá tí jínahya. Náhí.  
Chrók'juákoxinrá éxí chojni ch'ehe  
Dios xṛa. <sup>17</sup> Chrók'juikosáyeherá kaín  
chojni. Chrótjuehérá tí sín kíchó ni, la  
ko chróchontehérá Dios kjuasáya, la ko  
chrók'juikosáyeherá tí ch'ín gobierno  
t'etoan.

### Tóyoéxin éxí tí nkehe kjuasótéxin Cristo

<sup>18</sup> Jahará chojni ch'exón xṛa,  
chrók'juinchesteyéhérá tí lámóará,  
chróchontehérá kjuasáyé sín, kjónté  
tí sín jína la ḡ tí sín jínahya. <sup>19</sup> Tíha  
mé ijnko nkehe jína chrók'juákoxinrá  
kjónté chrók'juasótiaxínrá ijnko  
nkehe jínahya kíxin xíkaha mé  
chrók'juinchesteyéhérá Dios. <sup>20</sup> Ḃ ntá  
tí tjejoch'erá ichrén nkehe jínahya,  
ntá nchesteyéhérá sín la ¿nkehe  
tsonhen kíxin chrókóninkákonhyará?  
Ḃ ntá tí chrók'juasótiaxínrá ijnko  
nkehe jína la ntá chrók'juachará

\*\*2:6 Isías 28.16

††2:7 Salmo 118.22

‡‡2:8 Isías 8.14

chrókóninkákonhyará, la tíha mé tóxrjínhñ Dios. <sup>21</sup>Méxra xíkaha k'uíyahará Dios kixin Cristo kjuasóteyákonhánrá. Tíha mé kjuakoxin ch'án kixin mé xíkaha chrókjuich'erá. <sup>22</sup>Kixin Cristo la ninkehó jie kjuasinhya ch'án la ko ninkexró kjuich'iyehya ch'án, <sup>23</sup>la ko ninkehó kjuáteehya ch'án tió k'uántaxínhñ sñ ch'án; a ntá tió kjuínchekjasóte sñ ch'án la ninkehó l'ókjanxinhya ch'án. Náhí. Jehe ch'án kjuanchia ch'án kixin Dios ts'ayakonhen tí jehe ch'án kixin Dios mé ntoá nchekitoexín ijíe chojni. <sup>24</sup>Cristo mé kuamá ch'án tí ijíeni kixin tí cuérpoé ch'án kjuák'enkáni ntacruz kixin éxí tsík'enni k'uék'ejóni kixin tí jie k'uéchóntani, a ntá jie chrók'uejóni jnkójina. Kixin Cristo kjuasóte ch'án, chrít'o ch'án kixin jahará chrókuitoaxínrá jína. <sup>25</sup>A ntá jahará k'uék'ejorá éxí kolélo tsíkjichroe. A ntá jie k'uitjará tí nkexro ts'ayakonhen asánrá.

### Nkexrí chrók'uejó tí sñ tsíkótehe

**3** Kjaxin jahará chojni chjin ó tsíkótahará chrókuítekákonhénrá tí xiyará, kixin kjaxin jnkójín tí sñ titekakonhya itén Dios chrókuitekaon sñ kixin jína tjen tí tjachjin, kjónté t'ichjánxinhya chróchrónka tjan kixin jína tjen tjan, <sup>2</sup>kixin chrók'uikon sñ xíkaha kixin jína tjen tí tjachjin chóna kjuasáyé tjan. <sup>3</sup>Chrókjuínchehnkexinhýará nkehe náxrjón chróchontará la ko tí nkehe náxrjón chróchóna kaxihará la ko nkehe náxrjón tsík'óna chica oro la ko tí ikará imá náxrjón. <sup>4</sup>Náhí. Chrókjuínchejínará asánrá, kixin tí nkehe náxrjón chrók'uitjáyanhya na mé tí asén chojni tójiehya la ko náxrjón. Tíha mé imá sínkí nkayakon Dios. <sup>5</sup>A ntá tí ósé xíkaha k'uékjenkayáxin tí chojni chjin jína.

Jehe sñ mé kuinkáchónki sñ Dios la ko kjuínchexiteyéhe sñ xii sñ. <sup>6</sup>Mé xíkaha kjuích'e tjan Sara kjuínchexiteyéhe tjan tí ch'ín Abraham, mé kjaxin ntáchro tjan kixin ñché tjan tí jehe ch'án. A ntá tí jahará tí xjeen tí jehe tjan la chrókjuínchexiteyará jína la ko ninkehó kjuachrakon chróchontahýará.

<sup>7</sup>Kjaxin jahará chojni ntoará tsíkótahará chróchontehérá ichjiánrá kjuasáya kixin ó nohará kixin kánhyó tsehe tjan la ko ó nohará kixin yófrá tjáhará Dios tí kjuachón. Xíkaha chrókjuích'erá ntá tió chrónixjehérá Dios la kohya nkehe chrók'uinkákonhen.

### Tí sñ tjasótexín sñ kixin jína kjuích'e sñ

<sup>8</sup>Méxra, jnkokoá chrókjuenkayáxinrá kaín rá chrókuíkonóehérá kichuárá, chrótjuèhérá kichuárá. Jnkójina chrónixjehérá kichuárá la chrókjuínchehnkehyará asánrá. <sup>9</sup>Tí ichrén nkehe jínahya chrókjuít'ahará sñ la jahará la xíkahya chrókjuích'ehérá sñ. Tí chrók'uántaxínhanrá sñ la jahará chrók'uantaxíenhyará sñ. Náhí. Íchá jína chrókjuancheherá Dios kixin chrókjuíncheyaon ch'án sñ kixin Dios la k'uíyahará ch'án kixin chrók'uayéhérá kjuachaxin kuènte ch'án. <sup>10</sup>Kixin:

Tí nkexro tjinkaon tsotjuèhe asén kixin jína chrókjuak'e kaín yaon la chrónixjahya ch'án ninkehó nkehe jínahya la ko ninkehó kjuach'ia chrók'uaxrjéxinhya ir'va ch'án.

<sup>11</sup>Tí nkexro la chrókuítóhe tí nkehe jínahya la íchá jína chrókjuích'e tí nkehe jína,

la ko íchá jína chrókjueyá ch'án kjuaxróxin chrókjuak'e ch'án.

<sup>12</sup>Kixin ñchéni t'ayakonhen tí nkexro jína



la ko tinhin ch'án tí nixjehe sín ch'án, a ntá tí sín ch'e tí jínahya la tjinkitsahya ch'án.<sup>¶</sup>

<sup>13</sup> ¿Xá nkexro chrókjuít'ahará nkehe jínahya tí jahará tjeoch'erá nkehe jína? <sup>14</sup> Kjónté chrókjuasótéxínrá tí nkehe jína tjeoch'erá kjónté la chrókócháhará chróchrakuenhyará ninkexró la ko chróchrakonhyará.

<sup>15</sup> Náhí. Íchá jína chrókjuíkosáyehérá Cristo nkaya asánrá kixin Ìnchárá. Chrók'uejorá listo chrókjuáteherá tí nkehe chrókjuanchankíhará kaín chojni kixin nkexrí tinkachónkirá Ìnchéni, la chrókjuínchehnkehyará la kjuasáya chrókjuáteherá. <sup>16</sup> Chróchontará ijnko kjuaxrexinkaon jína kixin ntá tí sín xrich'ia sín t'ántaxínhanrá sín kjónté jína tjejorá tinkachónkirá Cristo la mé chrókósuèhe sín kixin tí nkehe ntáchro sín la ntoáhya. <sup>17</sup> Íchá jína chrókjuasótíaxínrá kixin tí jína tjeoch'erá tí xíkaha tjinkaon Dios, a ntá chrókósuàhará chrókjuasótíaxínrá tí ichrén jie chrókjuích'erá.

<sup>18</sup> Kixin Cristo kjuasóte ch'án la ko k'uénxin ch'án tí jie kuènteni, ónaá k'uén ch'án kixin para jnkochrín. Jehe ch'án la jína ch'án la kjuasóteyákonhenni ch'án kjónté jínahyani, kixin ntá jína sáchrókjuíkoni ch'án tí tjen Dios. A ntá ik'uén ch'án éxi chojni, a ntá Nchakuen ch'án la k'uénhya mé xechón ínaá, <sup>19</sup> kixin tí Nchakuen ch'án sákjuík-jakohe tí nchakuen tí sín tsík'en tjejóchjina. <sup>20</sup> Tí sín a mé kuítekakonyha sín tí ósé tió kjuák'e ch'ín Noé na mé Dios la kóninkakonhya ch'án kjuák'echónhen ch'án nachrohe sít'óna tí arca, na mé ijníkoá chojni kuítekaon sín mé kuaá sín tí kuíteé sín nta. <sup>21</sup> Tí nta a mé tóyóhe tí tikitexín chojni ijie kixin tí xíkaha tsonhenni la tsaáxinni ijie. A ntá tí tikite chojni la jehya kixin

tsotjuáxin tí cuerpo. Náhí. Tsjancheheni Dios kixin sinchetjóá ch'án tí tjenkayáxinni. A ntá tí nkehe tsaáxinni la mé tí xechón Ìnchéni Jesucristo, <sup>22</sup> mé tí nkexro sátsíkji nkaya nkajní itjen ch'án itja chjina Dios. A ntá jehe ch'án la mé t'etuenhen tí sín ángel la ko tí sín t'etoan.

### Chrókjuich'eheni Dios xra éxi tí kjuachaxin kjuanjon ch'án

**4** Méxra éxi Cristo kjuasóte tí cuérpóé ch'án ntá kjaxinrá kjónté xíkaha chrókjuasóterá chrókóxakuanhyará kixin tí nkexro kjuasóte tí cuérpóé la ó kuítóhe tí jie. <sup>2</sup> A ntá tí naxa chrók'uejochónrá intsí la chrók'uejorá éxi tóxrjínhin Dios. Jehya éxi k'uékóxrjínhanrá. <sup>3</sup> A ntá tí ósé nchónhya nkehe k'uékjich'erá éxi ch'e tí sín naxa chónhya Dios. K'uék'ejorá k'uékjenkayáxinrá tí nkehe jínahya la ko k'uékjásinrá jie k'uéchontará ókjé chojni chjin la ko k'uékókoanrá la k'uekjásinrá kia ntá ntiha kjuánjonxin chojni la ko k'uékinkachónkirá tí nkehe tsíkjanoya. <sup>4</sup> A ntá ijie la jahará t'itohyará tí sín a kixin tí jínahya ch'e sín. Méxra xíkaha t'ántaxínhanrá sín. <sup>5</sup> A ntá tí jehe sín tsjanjon sín kuentá tsochéinka sín tí nkexro tjechónhen sinchekitoexín ijie tí sín tjejóchón la ko tí sín tsík'en. <sup>6</sup> Méxra kjónté tí sín tsík'en tsixrákohe sín tí itén Dios kixin tí nchakuen sín chrók'uejó éxi tjinkaon Dios kjónté naxa k'uéjó sín ntihi chjasintajni la kuítóexín tí ijie sín éxi tsitoexín ijie kaín chojni.

<sup>7</sup> Ó kuichjina tsjeje chjasintajni a ntá xíkaha chrók'uejorá jnkójina la ko chrók'uejotsjehérá chrónixjehérá Dios. <sup>8</sup> Tí nkehe imá tjetóan kixin antsí chrótjuèhérá kíchuará. A ntá tí tjuèhérá kíchuará la mé tíha chrók'uitjáyánxin tí nchónhya jie chontehérá kíchuará.

<sup>¶</sup>3:12 3.10–12 Salmo 34.12–16

<sup>9</sup>Chrókjuánjonrá kjuachaxin chrókuitohe jnkojín kíchuará ntoará chrókóninkákuénhyará nijnko tí jehe sín. <sup>10</sup>Jnkojnkora nkehe tí xra tjáhará Dios k'uayéhérá chrókjuínkĩtsará kíchuará. Xíkaha jína chrókjuákoxinrá tí kjuasáyé ch'án tjáhará ch'án kixin nchónhya xra k'uayéhérá. <sup>11</sup>Tí jnkojínrá tjinkáonrá chrónixjará ichrén nkehe la chrónixjará éxi nixja itén Dios. Ti jnkojínrá tjinkáonrá chrókjuínkĩtsará la chrókjuákoxinrá tí kjuachaxin tjáhará Dios. Kaín tí xra chrókjuich'erá chrókjuanchehérá Dios kjuasáya kixin kjuasáyé Jesucristo tinkachónkirá tí jehe ch'án. Kixin jehe ch'án la kaín tí kjuachaxin siín la kuènte ch'án jnkochríxín. Mé xíkaha chaxín. Amén.

### Íchá jína chrókjuasótexínni kixin tí tinkáchónkini Cristo

<sup>12</sup>Kíchóni, chrókóxakuanhyará kjónté ichrén nkehe jínahya chrókónhanrá. Ó jehí t'ichjánxin xíkaha tsonhanrá. Chróntáchrohyará kixin ókjé nkehe tjasótiaxínrá. <sup>13</sup>Náhi. Íchá jína chrókócháhará kixin xíkaha chrókjuasóterá éxi kjuasótexín Cristo, kixin kjaxínrá tsocháhará imá tió ts'ikonrá tí kjuachaxin tsikao Inchéni tí itsi ch'án. <sup>14</sup>Chrokócháhará tí t'ántaxínhanrá sín kixin tinkachónkirá Cristo kixin tí Nchakuen Dios chóntha kjuachaxin t'ayakonhanrá. Jehe sín t'ántaxínhin sín ch'an, a ntá jahará tjikosáyehérá ch'án. <sup>15</sup>Á ntá tí jnkojínrá tjejtjasóterá chrókójehya kixin ichrén nkehe chrókjuich'erá chrókjuàyará o chrókuèrera o ichrén nkehe jínahya chrókjuich'erá o chrókjiatérá kjuanínkaon kuènte ókjé chojni. <sup>16</sup>Náhi. Á ntá jnkojínrá chrókjuasótiaxínrá kixin tinkachónkirá Cristo la chrókósuàhyará. Náhi.

Chrókjuanchehérá Dios kjuasáya kixin xíkaha kónhanrá.

<sup>17</sup>Ntá jie ó kui tí tsitoexín ijié chojni mé xrankíxixín tí sín tsík'óna xjeen Dios. Á ntá tí xíkaha tsitoexín ijié tí jeheni xrankíxixín, a ntá íchá tí ó tsjixixín tí sín titekakonhya tí itén Dios. <sup>18</sup>Íchá tí sín jína la ko xíkaha tsonhen sín ntá tsaá sín a ntá íchá tí sín jínahya chóntha jie kjá antsí tjasóte sín. <sup>19</sup>Á ntá tí nkexro tjasóte éxi tjinkaon Dios la kjónté xíkaha la naxa chrókjuich'e sín nkehe jína la ko chrókjuanjon sín asén sín chrók'uayakonhen Dios mé tí nkexro kjuích'éna sín la mé jehe ch'án xráxín jína ch'án.

### Tí k'uítuenhen tí sín t'etōan kuènte nínko

**5** Tjínkavan tétuanhan tí chojni t'etōan kuènte tí nínko tjejorá ntiha kixin kjaxin janhan tétōan kuènte nínko éxi tí jehe sín, a ntá janhan mé k'uítuan kixin nkexrí kjuasóte Cristo, la ko kjaxin janhan mé tsochonta kjuachaxin kuènte Dios éxi tsochóntha tí jehe sín tió itsi Inchéni chr'éxin. <sup>2</sup>Jahará chrók'uayakonhénrá tí kolélo kuènte Dios ntiha kixin xíkaha tí xra k'uayéhérá. Jnkojína chrókjuínkĩtsará sín éxi tjinkaon Dios la jehya kixin ijnko chojni chrók'uetuanhanrá chrókjuich'erá xra, la ko kjaxin jehya kixin imá chrókóxrjínhanrá chichaon. Náhi. Kaín asánrá chrókjuich'erá xra jína. <sup>3</sup>Jehya jahará kuéntará tí jehe sín kixin chjini chrókuétuènhénrá sín. Náhi. Jnkojína chrókjuákoéxínrá tí jehe sín. <sup>4</sup>Á ntá tió tsi tí Pastor chaxín t'etōan ntá jahará ts'ayéhérá ijnko corona náxrjón tsjehéhya.

<sup>5</sup>Kjaxin jahará ntasoará chrókjuinchexiteyéhérá tí sín t'etōan kuènte nínko. Kaínrá

chrókjuinchehiteyéherá kíchuará  
 chrókjuinchehnkehyará kixin:  
 Dios la tsonínkakonhen tí sín nchehnke,  
 a ntá tí sín nchehnkehya mé tsjinkítsa  
 ch'án.\*

<sup>6</sup>Méxra chrókjuinchehnkehyará,  
 chrókjuinchehiteyéherá Dios kixin  
 jehe ch'án imá ts'etōan ch'án kixin  
 tsjixraká tí yaon mé jehe ch'án  
 tsotjáhará ch'án kjuachaxin kixin  
 tsétoanrá. <sup>7</sup>Chróchjehéherá Dios kaín tí  
 kjuaxrexinkaon chontará kixin kjaxin  
 jehe ch'án tóxakonhen ch'án tí jahará.

<sup>8</sup>Chróróxakonhanrá jína  
 chrók'uejorá. A ntá ijie ixri tí nkexro  
 nínkakonhanrá mé tí ch'ín Tsochren éxi  
 ijnko koxra tsjánka va xritjeyá va nkehe  
 sine va. <sup>9</sup>Tjánjonhyará kjuachaxin  
 kixin jehe ch'án chrókjuacha ch'án  
 chrókjuachroerá ch'án, kixin ó nohará  
 kixin kaín tí sín kíchuará nkuíxín  
 chjasintajni xíkaha tjejótjasóte sín kixin  
 tinkáchónki sín Ìnchéni. <sup>10</sup>Kjánchó  
 kánhyó sé tsjasótiará, a ntá Dios antsí

tsjinkítsará ch'án kixin tsjachará ts'ejorá  
 jína. A ntá jehe Dios a mé tjuahará ch'án  
 la k'uíyahará ch'án kixin ts'ejokoará  
 ch'án jnkokoá tí tjen Jesucristo chóna  
 kjuachaxin jnkochrín. <sup>11</sup>Jehe ch'án  
 tsjancheheni ch'án kjuasáya kixin  
 chóna ch'án kjuachaxín ts'etōan ch'án  
 jnkochrín. Amén.

### Kjuixín nixja ch'ín Pedro

<sup>12</sup>Ch'ín Silvano mé t'íkuan ijnko  
 kichó ni jína mé kjuínkítsa ikjinni  
 tí xroon kjónté kánhyó tsjé nixja,  
 la ntaxraxinkáonrá kixin kjuintayaonrá  
 Dios ntá xíkaha kjuakoxin ch'án kixin  
 chaxín tjuahará ch'án. Méxra xíkaha jína  
 chrók'uejorá kixin tjuahará ch'án.

<sup>13</sup>Tí nínko tjen Babilonia mé tsíkjeyá  
 Dios éxi tsíkjeyá ch'án tí jahará nixja-  
 hará sín la ko kjaxin nixjahará ch'ín Mar-  
 cos, mé éxi xjanna t'íkuan tí jehe ch'án.

<sup>14</sup>Nixjehéherá kíchuará jnkojína.  
 Kjuaxróxin chrók'uejorá tinkachónkirá  
 Jesucristo. Amén.

\*5:5 Proverbios 3.34

## Xroon yóxin tsíkjin ch'ín Pedro

### Ch'ín Pedro chr'énhen ch'án tí xroon tí sín tinkáchónki Cristo

**1** Janhan Simón Pedro, na mé t'aha xra Jesucristo. Ikjian tí xroon ts'ayéhérá jahará ó tinkáchónkirá Ìnchéni éxí tinkáchónkini jeheni kixin Dios la ko Jesucristo tí nkexro sinchekaáni na mé jína ch'án. <sup>2</sup>Sintayaonrá Dios la ko antsí ts'ayéhérá kjuaxróxin kixin ó nohará nkexrí tjen Dios la ko Ìnchéni Jesús.

### Jína chrók'uejó tí sín tinkáchónki Jesús

<sup>3</sup>Dios kjuanjon kjuachaxin tsochón-tani kaín nkehe t'ichjánxinhinni kixin chrók'uejóni jína chrórxaxinkaonni tí jehe ch'án. Kixin ó noheni nkexrí tjen tí nkexro k'uíyeheni kixin tí kjuachaxin jíé chóna ch'án la ko tí xra imá jíé kjuích'e ch'án. <sup>4</sup>Mé xikaha kjuanjon ch'án kaín xín tí nkehe a, táha la mé imá jíé la ko imá tjete sínkí. Mé xikaha kjuakoxin ch'án kixin chrók'uayéhérá kjuachaxin chrók'uejorá éxí tjinkaon ch'án la ko chrókuítóhérá tí nkehe jínahya kixin chrók'uitjáyanxínhyará tí nkehe k'uékjenkayáxinrá sífn chjasintajni. <sup>5</sup>Á ntá jahará tinkáchónkirá Ìnchéni la kjaxin chrókuéyará kixin chrók'uejorá jnkójina; a ntá tí jína tjejorá ntá chrókuachará antsí chrókónohará; <sup>6</sup>a ntá tí kónohará ntá chrókuachará chrókuenkayáxinrá jína; a ntá tí tjenkayáxinrá jína ntá chrókuachará chrókóninkákonhyará tjoka; a ntá tí tóninkákonhyará ntá chrókuachará chaxín xráxinkáonrá Dios; <sup>7</sup>a ntá tí chaxín xráxinkáonrá Dios ntá chrókuachará chrótjuèhérá kíchuára; a ntá tí tjuèhérá kíchuára ntá chrókuachará chrótjuèhérá kaín chojni.

<sup>8</sup>Á ntá xikaha tjejoch'erá tinkák'ánki tí kjuaxrexinkaon kuèntará, ntá jehya kixin chónkó kuinkáchónkirá Ìnchéni Jesucristo. <sup>9</sup>Á ntá tí nkexro ch'ehya xikaha la mé éxí ijnko chojni t'ikonhya o ijnko chojni t'ikonhya jína, kixin ó k'uitjáyenhen kixin Ìnchéni ó kjuixin kjuínchetjóá tí jie k'uéchóna ósé. <sup>10</sup>Méxra xikaha kíchó ni jnkójina chrók'uejorá kixin ntá tsonohará jína kixin Dios tsíkjeýará tí jahará la ko tsík'iyahará ch'án kixin xikaha jína chrókuenkayáxinrá, a ntá xitjahya chrókuichroerá. <sup>11</sup>Á ntá xikaha chrókuítekáonrá ntá tsotjáhará Dios kjuachaxin ts'ixenhenrá tí tjen Ìnchéni Jesucristo t'etqan ch'án jnkochrín. Jehe ch'án mé tí nkexro kjuínchekaáni.

<sup>12</sup>Méxra titoqahyantaxráxinkáonrá kaín tí nkehe i, kjónté ó nohará tí nkehe ntoá kjuákoahará. <sup>13</sup>Ntáxrjan kixin jína tí naxa tjén chrókuíntaxráxinkáonrá kaín tí nkehe a <sup>14</sup>kixin Ìnchéni Jesucristo kjuínchenóna kixin í séhya its'én janhan. <sup>15</sup>Na mé kaín tíha tjet'a kixin tió its'én, ntá jahará tsoxráxinkáonrá jnkochrín kaín tí nkehe kjuít'a.

### Tí sín k'uíkon tí kjuachaxin kuènte Cristo

<sup>16</sup>Tí nkehe kjuakoharáni kuènte tí kjuachaxin kuènte Ìnchéni Jesucristo la ko nkexrí itsi ch'án na mé jehya ijnko cuento kjuích'éna chojni chrókuich'iyaxín. Náhí. Ikonni k'uíkonxínconi Ìnchéni la ko tí kjuachaxin kuènte ch'án. <sup>17</sup>K'uíkonni tíha tió It'eni Dios kjuikosáyehe ch'án tí Xjeen ch'án, la ntá kuínhinni nixja Dios tjen nkaya nkajní ntáchro ch'án kixin: “Tíhi mé xjanna tjuaha ch'án. Imá chàna kixin nchexitéyá ch'án éxí tjínkavan janhan,” ichro Dios. <sup>18</sup>Mé kuínhinni itén Dios kuixín nkaya nkajní kixin xikaha ntáchro tió k'uejókoni Ìnchéni chrítaón tí jna tjóá.

<sup>19</sup>Mé xikaha k'uéchrónka tí sín tsíkjin itén Dios ósé ntá noexínni kixin chaxín tsoxiteyá. A ntá jahará chrók'uejorá chrókuinhínrá jína nkehe k'uéntáchro sín kixin tí tan mé éxí ijnko xrohi t'inkaséyanxín tí sítié tsjixrakájia tí yaon ts'inkaséyan itsi tí konotsé t'inkaséyanxín tí nchítjen mé xikaha ts'inkaséyanxín nkaya asánrá. <sup>20</sup>A ntá tjetóan chrókónohará tñhi: kixin ninkehó xroon itén Dios tsík'óna jehó chojni chrókjuacha chrókienxín. <sup>21</sup>Náhi. Tí sín k'uéchrónka itén Dios la nixjahya sín tí nkehe jehó sín chrókjuenkayáxin sín. Náhi. Tsíkjinchetjóá Dios tí jehe sín, a ntá Nchakuen Dios kjuínkítsa k'uénixja sín itén Dios.

### Tí sín tjako kjuach'ia

(Judás 4–13)

**2** Kjaxin k'uék'ixin tí sín ntoáhya k'uéchrónka itén Dios tí chjasin Israel, mé kjaxin xikaha tí jie ts'ixin maestro sit'ayahará. Jehe sín tsochr'ákjenhen sín iso nkehe ntoáhya ts'itjáyánxín tí nkehe chaxín tsaáxinni la xikaha sinchemá sín tí Ìnchéni chrókuaáxinni. Tíha mé tsjixin tsjasótexín tí jehe sín. <sup>2</sup>Nchónhya chojni tsochréhe sín tí nkehe jínahya ch'e sín. A ntá tí xikaha ch'e sín la ts'ántaxiexín chojni tí ntja ntoá kuènte Ìnchéni. <sup>3</sup>Tsoxrjínhjin sín tsochóna sín nchónhya chichaon, ntá tsjanchiaxínrá sín chichaon tí nkehe ntoáhya tsjakohará sín. A ntá tí nkehe ts'itjáyánxín sín tjechónhen la kohya nkerí tsaáxin tí jehe sín kixin ósé tjechónhen xikaha tsonhen sín.

<sup>4</sup>Dios la kjónté tí sín ángel kjuasin jie la kuíkonóehya ch'án sín la k'uetóan ch'án kixin sátsji sín tsjasóte sín sá-

sjik'ikjehe sín tí sítié na tjejóchjina sín tsjixrakájia tí tsitóexín ijie sín. <sup>5</sup>La ko kjaxin kuíkonóehya Dios tí sín k'uéjé chjasintajni ósé ntá ichr'án ch'án ntá kuíteé tí sín jínahya, a ntá Dios kjuínchekaá jehó tí ch'ín Noé, na mé tí nkexro kjuako tí tan jína la ko kjuínchekaá ch'án tí yato sín ó.<sup>†</sup> <sup>6</sup>Kjaxin Dios kjuínchek'itjáyán tí chjasin Sodoma la ko tí chjasin Gomorra iche hasta k'óna nteso, kixin chrókónohe chojni jínahya ts'ejó chr'éxjin kixin xikaha tsonhen sín.<sup>‡</sup> <sup>7</sup>Kjánchó Dios kjuínchekaá ch'án tí ch'ín Lot kixin ijnko chojni jína tí jehe ch'án la ko imá kóxakonhen ch'án tí k'uíkon ch'án tí jie kjuasin tí sín jínahya. <sup>8</sup>Tí ch'ín Lot mé jína asén ch'án mé k'uékjak'e ch'án tí síin tí sín jínahya ntá kaín yaon kóxakonhen asén ch'án k'uíkon ch'án la ko kuínhin ch'án tí nkehe jínahya k'uékjich'e sín.<sup>¶</sup> <sup>9</sup>A ntá Ìnchéni na sinchekaá ch'án tí sín kaín asén kuítekaon tí jehe ch'án kjónté nchónhya kónhen sín. A ntá tí sín jínahya la sinchekjasóte ch'án tí yaon tsi-toexín ijie chojni.

<sup>10</sup>Dios antsí sinchekjasóte ch'án tí sín nchexiteyéhe tí nkehe jínahya ntáchro asén sín a ntá nchexiteyéhya sín tí nkehe t'etoan Ìnchéni. Titekakonhya sín la ko chrakonhya sín chrók'uantaxínhjin sín tí sín ángel chóna kjuachaxín. <sup>11</sup>A ntá tí sín ángel imá tsehe sín la ko imá chóna sín kjuachaxín la kjónté tjinkakonhya ts'ántaxínhjin tí sín a nkayakon Ìnchéni.

<sup>12</sup>A ntá tí chojni a la éxí yóhe iko tjenkayáxinhya ninkehó la nchexiteyéhe tí nkehe ntáchro asén, la kokjñhi kixin ts'óyán kichó ó. T'ántaxínhjin sín tí nkehe tienxínhya sín, mé xikaha its'en sín éxí its'en tí ko a. <sup>13</sup>Tíha mé tsjasótexín sín kixin jehe sín kjuínchekjasóte í so chojni. Xrácín tóxrjínhjin sín ich'e sín

<sup>†</sup>2:5 Génesis 6.1–7.24; 8.18

<sup>‡</sup>2:6 Génesis 19.24

<sup>¶</sup>2:8 2.7–8 Génesis 19.1–16, 29

tí nkehe ntáchro asén sín. Ijnko kjuató-suèhe kíxín tjejóntaxín sín ntekoará sín tí kia chontará la kjónté tí xíkaha la naxa tjasin sín jie.

<sup>14</sup> Kohya nijnko chojni chjin chrokjuasinkohya sín jie. Tóxrjéhya sín tjasin sín jie tsjasótexín sín. <sup>15</sup> Kuítóhe sín tí ntia ntoá ntá chréhe sín ntia kuènte ch'ín Balaam xjeen ch'ín Beor, kíxín kóxrjnhin ch'án chrókjuacha ch'án nchónhya chichaon tí nkehe jínahya chrókjuich'e ch'án. <sup>16</sup> A ntá t'ichjánxin tsjasóte ch'án kíxín tí jie kjuasin ch'án. A ntá ijnko kolócho chjin xitjahya nixja la xrínahya nixja itén chojni la kjuentuéhe tí ch'ín Balaam kíxín tí jie chóna ch'án ntá kuítóhe ch'án tí nkehe jínahya chrókjuich'e ch'án.<sup>§</sup>

<sup>17</sup> Tí chojni tjako mé éxí yóhe tòye tjiáhya ntá la ko éxí tjuj tjakáko xrínto ó; ó kjuixin k'uítuénhen sín sátsji sín tí imá sítié tsjasóte sín jnkochríxín. <sup>18</sup> Kaín nkehe jínahya nixja sín, a ntá tí jie tjasin sín tóxrjnhin sín chojni chjin ókjé ntá tjachroexín sín tí sín na ntá tjinkaon chrókuítóhe sín tí jie. <sup>19</sup> Chrónka sín kíxín kaín nkehe jínahya la jína, kíxín jehe sín nchexiteyéhe sín tí nkehe jínahya ntoáhya; kíxín jnkojnko chojni mé nchexiteyéhe tí nkehe kjuacha k'uetuénhen sín. <sup>20</sup> A ntá tí nkexro ó chóxin Ìnchéni Jesucristo tsaáxinni mé kuítóhe sín tí nkehe chrók'uitjáyaxín sín kuènte chjasintajni. A ntá chr'éxin tí chrókuakja sín ntia jínahya ínaá tí chrókjuacha tí jínahya chrókjuachroe sín, a ntá antsí má jínahya chrókónhen tí jehe sín. <sup>21</sup> Íchá jína chrókónoehya sín tí ntia jína. A ntá jehya jína tí ó nohe sín ntá tsítóhe sín tí nkehe k'uetōan Dios kuínhin sín. <sup>22</sup> A ntá tí jehe sín kjuínchexiteyá sín éxí ntáchro

tí proverbio kíxín: “Tí konia t'ókjan ntá xíkjan xíkjine ínaá,\*\* la ko tí cochíno na ntá tsík'ónti tjóá ntá xíkjan kjíankí tí nchet'o kjita.”

### Tiô tsi Ìnchéni

**3** Kíchóni tjuahará tíhi la xroon yóxin ikjian ts'ayéherá. Yóí tí xroon a ntáxráxinkáonrá kíxín jína chrókjuenkayáxinrá. <sup>2</sup> Chróxráxinkáonrá tí nkehe tsíchronka tí sín k'uechrónka itén Dios ósé la ko tí nkehe k'uetōan Ìnchéni, mé tí nkexro tsaáxinni, kjuakohará tí sín kjueyá ch'án.

<sup>3</sup> Tjetoan chrókónohará tíhi kíxín tí yaon tsjixixín la itsi chojni tsjanoá tí tan jína kuènte Ìnchéni, la sinchexiteyéhe sín kaín nkehe jínahya ntáchro asén sín. <sup>4</sup> Tsjanchankí sín nkehe kónhen tí nkehe tsíntáchro Cristo kíxín tsokjan ch'án, kíxín desde ik'uén tí sín tsík'axreníxinni k'uejó ósé la xíkaho naxa sítónhen éxí tió k'óna chjasintajni. <sup>5</sup> Tí sín a titekakhya sín kíxín ósé k'uenixja Dios ntá k'óna nkajni la ko chjasintajni na mé kjuin tí ntá ntá kuítóhe nonte xamá. <sup>6</sup> A ntá tí ntá k'uitjáyaxín chjasintajni ínaá. <sup>7</sup> A ntá tí nkajni la ko tí chjasintajni naxa tjejó jie tjejóchónhen tsoche kíxín xíkaha k'uetōan Dios kíxín xrohi tsochexín tí yaon tsjixixín tsitōexín ijié chojni la ko kaín tí sín jínahya tsjasóte sín.

<sup>8</sup> A ntá kíchó ni, chrók'uitjáyanyará kíxín Ìnchéni tí ijnko yaon t'íkon ch'án éxí mil nánó la ko mil nánó t'íkon ch'án éxí ijnko yaon ó.<sup>††</sup> <sup>9</sup> Ntá Ìnchéni í séhya sinchexiteyá ch'án tí nkehe tsíntáchro ch'án la jehya éxí tjenkayáxin í so chojni kíxín ó má sé tjejóchónhen sín. Náhí. Jehí tjechónhen ch'án kíxín ninkexró chrók'uitjáyanyaha kíxín

§2:16 Números 22.35–46

\*\*2:22 Proverbios 26.11

††3:8 Salmo 90.4

tjinkaon ch'án kixin kaín chojni chrók-jan sín chrókuinkáchónki sín Dios.

<sup>10</sup> A ntá tí yaon tsokjan Ìnchéni mé tsí éxí xíchee itsi tí tie. A ntá tí nkajní ts'itjáyan, la mé nchónhya kjuachrakon ts'ixikónhen ts'ixikóvékjan. A ntá kaín nkehe sínkáni nkajní na mé ts'itjáyan tsoche, la ko tí chjasintajni tsoche la ko kaín nkehe síin.

<sup>11</sup> A ntá tí xíkaha kaín nkehe ts'itjáyan, a ntá jahará la jína chrók'uejorá chrórxáinkáonrá Dios. <sup>12</sup> Chrók'uejochonhénrá tí yaon itsi Dios chrókóxakonhanrá chrókjuich'erá xra kixin ntá tjoka chrókui Ìnchéni. A ntá tí yaon tsjixixín mé ts'itjáyan nkajní tsoche, la ko kaín nkehe tsoxíka ts'itjáyan kixin imá tsosóa. <sup>13</sup> A ntá jeheni tjejóchónhenni nkajní nixin la ko chjasintajni nixin éxí tsíntáchro Dios kixin tsjanjon ch'án. A ntá ntila la mé imá náxrjón la ko kjuaxróxin ts'ixin tí chojni jína.

<sup>14</sup> Méxra xíkaha kíchó ni, nachrohe tjejochonhénrá kixin itsi tí yaon tsonhen xíkaha la kaín asánrá chrókjuéyará jnkójína chrók'uejorá kixin ts'ikon Dios

kixin kjuaxróxin tjejorá chontahyará jie. <sup>15</sup> Chrókónohará kixin naxa tjechónhen Ìnchéni, tjokahya itsi ch'án kixin í so chojni naxa chrókuitekaon sín ch'án. Kjaxin xíkaha tsíkjin tí kíchó ni Pablo tí xroon chr'ánhanrá ch'án éxí tí kjuachaxién Dios tsík'áyéhe ch'án chrónka xíkaha. <sup>16</sup> Jnkójnko tí xroon tsíkjin ch'án nixja xíkaha la imá xra chrókiénxín chojni. A ntá tí sín noehya la ko tí sín kánhyó tinkáchónki Ìnchéni ntá tienxínhya sín la ntá ntoáhya tjako sín nkexrí t'axrxjén tí nixja tí xroon tsíkjin ch'án la ko kjaxin ntoáhya tjako sín í so nkehe nixja xroon itén Dios. Ntá xíkaha jehó sín tjejá sín nkehe ts'itjáyanxín sín.

<sup>17</sup> Méxra kíchó ni, ó nohará tí nkehe senó, ntá chrókóxakonhanrá kixin chrókjuachruèhyará tí kjuach'ia xriko tí sín jínahya ntá chrókuitohérá tí nkehe jína ntoá tinkáchónkirá.

<sup>18</sup> Ìchá jína antsí má chróchoxínrá Ìnchéni Jesucristo, mé tí nkexro sinchekaáni la ko antsí chrók'uánkí tí kjuachaxién ch'án chróchontará. Méxra tsjikosáyeheni ch'án ijie la ko jnkochrín. Amén. Ó tjen.

## Tí xroon saoxín tsíkjin ch'ín Juan

### Tí tan tjanjon kjuachón

**1** Ikjinni tí xroon i ts'ayéherá kixin tsonohará kuènte tí nkexro xráxín kjuák'e tí naxa t'ónahya chjasintajni, mé tí nkexro kuínhinni nixja la ko tí nkexro k'uífkonxín konni. Kixin tí nkexro mé k'uífkonni la ko tí nkexro kuákóxín tjani, mé tí nkexro nixja tí tan tsjanjon kjuachón. <sup>2</sup>Kjuaqoxin ch'án nkexrí kjuák'e ch'án, a ntá kaín tí jeheni k'uífkonni ch'án, mé xíkaha chrónkaxínni nkexrí kjuák'e ch'án; a ntá tjakuexinni tí jahará nkexrí tjen tí kjuachón jnkochrín, la mé jehe ch'án k'uékjak'eko ch'án It'é ch'án Dios, a ntá ikui ch'án ntihi chjasintajni. <sup>3</sup>Chrónkaxínni tí nkehe k'uífkonni la ko tí nkehe kuínhinni, kixin kjaxinrá jnkokoá chrókuinkachónkirá éxí tinkáchónkini tí jeheni, éxí tí jeheni jnkokoá tinkáchónkini It'éni Dios la ko tí Xjeen ch'án Jesucristo. <sup>4</sup>Mé xíkaha ikjinni tí nkehe i, kixin chrókjuintaxín chrókócháhará la ko chrókóchéheni.

### Dios mé tí xrohi

<sup>5</sup>Tí tan i mé Ìnchéni Jesucristo kjuakohe tí jeheni, a ntá jie tjakoharáni tí jahará, kixin Dios mé tí xrohi, a ntá kohya ninkehó sítié tí tjen tí jehe ch'án. <sup>6</sup>A ntá tí tsontáchroni kixin tinkáchónkini tí jehe ch'án, a ntá naxa ixrini tí ntja sítié, na mé xíkaha ch'iani kixin ch'ehyani tí nkehe ntáchroni. <sup>7</sup>A ntá tí xritjeóni tí t'inkaséyan kixin tí Dios mé jehe ch'án tí t'inkaséyan, na mé xíkaha jnkokoá tinkáchónkini ch'án, a ntá tí ijnié Xjeen ch'án Jesucristo mé ts'íjmáxin kaín jie chóntani.

<sup>8</sup>Tí chróntáchroni kixin ninkehó jie chóntahyani, mé xíkaha la jehóni ch'iyeheni

asénni, a ntá tí nkehe chaxín la chóntahyani. <sup>9</sup>A ntá tí tsontáchroni kixin chóntani jie, a ntá tsonoheni chaxín kixin itjen ijnko Dios la jína ch'án la ts'itjáyenhen ch'án kaín jie chóntani la ko sinchetjóáni ch'án kixin kaín tí nkehe jínahya kjuích'eni. <sup>10</sup>A ntá tí tsontáchroni kixin kjuasinhyani ninkehó jie, la éxí chróntáchroni kixin Dios la ch'ia ch'án, a ntá tí xíkaha tsixroni la chaxínhyaya tsík'áyéheni tí tan kuènte ch'án.

### Cristo mé tsonixjayákonhenni ch'án

**2** Kíchóni, éxí xjanna t'íkuan tí jahará, a ntá tjékjian tí xroon ts'ayéherá tsochrónka kixin chrókjuásinhyará jie. A ntá tí jnkójínrá chrókjuásinrá jie la chóntani ijnko nkexro tsonixjayákonhenni nkayakon It'éni Dios, tíha mé Jesucristo, la jehe ch'án mé ijnko nkexro jína. <sup>2</sup>Jesucristo mé k'uenyákonhenni ch'án kixin tí jie chóntani; a ntá jehya ijjiéni ó. Náhí. Ijié kaín chojni síin chjasintajni.

<sup>3</sup>Tí tsitekaonni tí nkehe k'uetōan Dios ntá tsonoexínni chaxín kixin chóxinni ch'án. <sup>4</sup>A ntá jnkójín nkexro ntáchro kixin chóxin Dios, a ntá titekakonhya tí nkehe tsík'etōan Dios, la mé ch'ia la noehya tí nkehe chaxín. <sup>5</sup>A ntá tí nkexro titekaon tí nkehe tsík'etōan Dios la chaxín tjuèhe Dios; mé xíkaha noheni kixin chaxín jnkokoá tjejókoni ch'án. <sup>6</sup>Tí nkexro ntáchro kixin chaxín tinkáchónki Dios chrókjuak'e éxí kjuák'e Jesucristo.

### Tí mandamiento nixin

<sup>7</sup>Kíchóni, méxra tí nkehe tjékjian jehya ijnko nkehe nixin tsík'etōan Dios. Náhí. Tíha mé tí nkehe k'uayéherá tí xrankíxín, mé tí mandamiento óse tjen, mé tí nkehe ó tsíkinhínrá. <sup>8</sup>Kjánchó tí nkehe ikjian mé yóhe ijnko nkehe nixin, éxí kjuaqoxin Cristo mé xíkaha tjakoxinni, kixin tí sítié la tinkák'itjáyán



kíxin ijie la ó t'inkaséyanxín tí xrohi chaxín.

<sup>9</sup> A ntá tí nkexro tsontáchro kíxin ixri tí t'inkaséyan, a ntá naxa nínkakonhen kíchó, na mé tí xíkaha naxa itjen tí sítie a. <sup>10</sup> A ntá tí nkexro tjuèhe kíchó mé tjen tí t'inkaséyan, a ntá xíkaha jína tjen, chóntahya jie la chrókjuachruèhya ch'án ninkexró kíxin chrókjuasin sín jie inaá. <sup>11</sup> A ntá tí nkexro nínkakonhen kíchó mé tjejó sín la ko ixri sín tí sítie a la ko noehya sín nketí nó sátsji sín kíxin tí sítie la kjuích'éna ntakótán sín.

<sup>12</sup> Éxi xjanna t'íkuan tí jahará, la méxra tjékjian tí xroon ts'ayéhérá kíxin tsonohará kíxin kjuachaxin ihnié Dios kjuínchetjuáxinrá tí ijíará kíxin k'uenyákonhenni Ìnchéni Jesucristo. <sup>13</sup> Jahará it'é xjan, ikjian tí xroon ts'ayéhérá jahará kíxin choxínrá tí nkexro tjen tí xrankíxixín. A ntá jahará ntasoírá kjaxin ikjian tí xroon ts'ayéhérá jahará kíxin kjuachará kíxin kjuachahya tí Jínahya chrók'uetuanhanrá.

Ikjian tí xroon ts'ayéhérá jahará chánjanrá, kíxin choxínrá It'eni. <sup>14</sup> A ntá jahará it'é xjan ikjian tí xroon ts'ayéhérá kíxin ó choxínrá tí nkexro itjen tí xrankíxixín tí naxa t'ónahya chjasintajni. Ikjian tí xroon ts'ayéhérá jahará ntasoírá, kíxin naxa fuérterá, la ko k'uayéhérá tí itén Dios, la ko kjuachará kíxin kjuachahya Tsochren chrók'uetuanhanrá.

<sup>15</sup> Chrótjuèhyará tí chjasintajni la ko ni tí nkehe sífn chjasintajni. A ntá tí chojni tjuèhe tí chjasintajni, na mé chaxínhya tjuèhe sín It'eni Dios. <sup>16</sup> Kíxin ninkehó tí nkehe chrókjuanjon chjasintajni chrókuixín tí tjen It'eni Dios. Tí nkehe tjinkaon tsjanjon chjasintajni na mé tíhi, mé tí nkehe jínahya chrókjuich'eni, la ko tí chrókjuak'e asenni tí nkehe ts'ikonni, la ko tí kjuahnke xrikoni kíxin itsjé nkehe chróchóntani. <sup>17</sup> A ntá tí chjasintajni

sítinkákjeje la ko tí nkehe jínahya tjenkayáxin chojni; a ntá tí nkexro nchexiteyá tí nkehe tóxrjínhin Dios mé ts'ejó sín jnkochrígín.

### Tí nkehe chaxín la ko tí nkehe kjuach'ia

<sup>18</sup> Éxi xjanna t'íkuan tí jahará, la chrókónohará kíxin ó kuichjina tí yaon tsjixixín. Jahará ó kuínhínrá kíxin ó tsi tí nkexro nínkakonhen Cristo. A ntá ijie tinkákónoxín nchónhya tí sín a, mé noexínni kíxin ó kuichjina tí yaon tsjixixín. <sup>19</sup> Jehé sín tsík'axrjekjanxín sín tí tjejóni; kjánchó chaxínhya kuinkáchónki sín éxi tinkáchónkini. Náhí. Tí chaxín chrókuinkáchónki sín éxi tinkáchónkini la chrók'uaxrjekjanxínhya sín tí tjejóni, naxa chrók'uejókoni sín jnkokoá. A ntá xíkaha kónhen k'uaxrjekjan sín kíxin tsonoxín kíxin kuinkáchónkihya sín éxi tinkáchónkini.

<sup>20</sup> A ntá jahará la Cristo tsíkjanjon Nchakuen ch'án tsík'ayéhérá kaín rá, ntá jie tiénxinrá intsi kuènte ch'án. <sup>21</sup> Ikjian tí xroon ts'ayéhérá kíxin ó nohará tí nkehe chaxín, jehya kíxin chrókónoahyará; jahará la ó nohará kíxin nijnko kjuach'ia tixínhya tí nkehe chaxín.

<sup>22</sup> ¿Xá nkexro tí ch'ia? Mé tí nkexro ntáchro kíxin Jesús la jehya tí Cristo. Tí nkexro a mé nínkakonhen Cristo, mé titekakonhya It'eni Dios la ko tí Xjeen ch'án. <sup>23</sup> A ntá tí nkexro titekakonhya tí Xjeen Dios la kjaxin chóntahya sín tí It'é ch'án, a ntá tí nkexro chrónka kíxin chóxin tí Xjeen Dios mé kjaxin chóxin sín tí It'é ch'án.

<sup>24</sup> Méxra tí nkehe tsíkinhínrá tí xrankíxixín la chróxráxinkáonrá jnkochrígín. A ntá xíkaha tí chróxráxinkáonrá jnkochrígín tí nkehe tsíkinhínrá tí xrankíxixín, la kjaxin xíkaha jnkokoá chrókuinkachónkirá tí Xjeen Dios la ko tí It'é ch'án. <sup>25</sup> Kíxin

Jesucristo tsíntáchro ch'án kixin tsjanjon ch'án tí kjuachón jnkochrixin.

<sup>26</sup>Méxra xikaha tjékjian tí xroon i ts'ayéhérá kixin chrókónohará kuènte tí sín tjinkaon chrókjuit'ayahará.

<sup>27</sup>Kjánhó jahará la ó chontará Nchakuen Dios tsítjáhará Jesucristo, a ntá xikaha la í t'ichjánxinhya kixin ókjé nkexro chrókuajakohará, kixin tí Nchakuen Dios mé tjakohará kaín xín nkehe, mé tjako tí nkehe jína la jehya kjuach'ia tíha. A ntá chaxín chrókuinkachónkirá Cristo éxí kjuako tí Nchakuen ch'án.

<sup>28</sup>A ntá jie éxí xjanna t'íkuan tí jahará, chrókuítóéhyará chrókuinkachónkirá Cristo, kixin tió tsi ch'án la antsí chróchoxínrá ch'án la ko chrókósuàhyará chrókóchjinará tió tsi ch'án, <sup>29</sup>kixin ó nohará kixin Jesucristo la jína ch'án. A ntá chrókónohará kixin kaín nkexro jína la xjeen Dios tíha.

### Tí sín xjeen Dios

**3** Chrókónohará kixin It'éni Dios, imá tjuèhe tí jeheni kixin nchek'in ch'án xjeen ch'án tí jeheni, la mé chaxín jeheni tíha. Mé xikaha tí sín chjasintajni chónhya sín tí jeheni kixin jehe sin la xráxín chónhya sín Dios. <sup>2</sup>Mé xikaha kichó ni, ó tsík'ónani xjeen Dios, a ntá naxa tjakoxinhya ch'án nkehe tsonhenni tí tsjixixín. Kjánhó ó noheni kixin tió itsi Ìnchéni Jesucristo la ts'ónani éxí tí jehe ch'án, kixin ts'ikonní kixin nkexrí tjen tí jehe ch'án. <sup>3</sup>A ntá kaín nkexro tjejóchónhen tí tsi ch'án la chrókuítóhe sín ijíe sín kixin tsotjóá sín kixin jehe ch'án la tjóá ch'án.

<sup>4</sup>Kixin kain tí nkexro tjasin jie mé jínahya ch'e sín, kixin tió tjasin chojni jie la mé xikaha kuítekakonhya sín tí ley a. <sup>5</sup>Jahará ó nohará kixin Jesucristo kui chjasintajni kixin tsjatsen ch'án tí ijíeni, a ntá jehe ch'án la ninkehó jie chóntahya ch'án. <sup>6</sup>Mé xikaha kaín tí sín

chaxín tinkáchónki tí jehe ch'án la mé tjasinhya sín jie; a ntá kain tí sín tinkákjasin jie la tsík'ikonhya sín ch'án la ko xráxín chónhya sín ch'án. <sup>7</sup>Éxí xjanna t'íkuan tí jahará; méxra chrókuítóéhyará kixin ninkexró chrókjuit'ayahará; a ntá tí nkexro ch'e nkehe jína la jína ch'án, kixin Ìnchéni la jína ch'án. <sup>8</sup>A ntá tí nkexro xritjasin jie la mé kuènte tí Jínahya; kixin tí Jínahya mé kjuankixin kjuasin jie desde tí xrankixixín k'óna chjasintajni. Méxra tí Xjeen Dios mé kui chjasintajni kixin sinchek'itjáyan ch'án kaín tí xra kjuích'e tí Jínahya.

<sup>9</sup>Nijnko tí chojni tsík'axrjenixin Dios naxa chrónkákjasin jie, kixin ó chóna tí kjuachón kjuanjón Dios; la í xitjahya naxa chrókjuasin jie kixin ó tsík'óna xjeen Dios. <sup>10</sup>Mé xikaha tónoxín kixin nkexro tí xjeen Dios la ko nkexro tí xjeen tí Jínahya, kixin tí nkexro ch'ehya tí jína la ko tjuèhya kichó mé jehya xjeen Dios tíha.

### Chrótjuèheni kichó ni

<sup>11</sup>Méxra tí tan tsíkinhínrá tí xrankixixín mé tíhi, kixin chrótjuèheni kichó ni.

<sup>12</sup>Chrókjuich'ehyani éxí kjuích'e ch'ín Caín, kixin jehe ch'án mé kuènte tí Jínahya, kixin k'óyán ch'án tí kichó ch'án. ¿Nkekuènte kixin k'óyán ch'án? Kixin tí ch'ín Caín la tí nkehe jínahya kjuích'e ch'án, a ntá tí kichó ch'án la kjuích'e ch'án tí nkehe jína.

<sup>13</sup>Kichóni, chróchrakonhyará tí nínkakonhanrá tí sín síin chjasintajni.

<sup>14</sup>A ntá noheni kixin k'uat sínkani tí kjuach'én, a ntá kjuachón, mé noexínni tíhi kixin tjuèheni kichó ni. Tí nkexro tjuèhya kichó la éxí tsík'en sín xikaha xritjejó sín. <sup>15</sup>Kaín tí nkexro imá nínkakonhen kichó na mé chojni tjàya tíha, la ko ó nohará kixin ijnko chojni tjàya la xitjahya tsochóna kjuachón jnkochrixin. <sup>16</sup>Ó noheni kixin nkexro tí tjuèheni, kixin Ìnchéni Jesucristo

mé k'uenyákonhenni ch'án; kjaxin jeheni kjónté chrók'uenyákonhenni tí sín kichó ni. <sup>17</sup> A ntá tí tjen ijnko nkexro rico t'íkon kixin ijnko tí kichó ch'án t'ichjánxinhin nkehe, a ntá tí tsjinkĩsahya tí kichó, za ntá nkexrí chrótjuèhe ch'án Dios kaín asén ch'án? <sup>18</sup> Éxí xjanna t'íkuan tí jahará, méxra chrótjuèxínhyani tí kichó ni tí tan náxrjón chrónixjani ó. Náhí. Chrókjuakoxinni tí nkehe jína chrókjuich'eni.

### Jína tsochjineheni tí tjen Dios

<sup>19</sup> Tíha mé noexínni kixin chaxín ntoá tjejóni, a ntá chrókónoheni kixin chaxín tjejóni éxí tjinkaon Dios. <sup>20</sup> A ntá tí tjoni asénni kixin chóntani ichrén jie, a ntá Dios la imá nohe ch'án la nohe ch'án kaín nkehe tónhen asénni. <sup>21</sup> Mé xíkaha kichó ni, tí tjohya asénni kixin naxa ichrén nkehe jínahya tjenkayáxinni, a ntá antsí jína tsochjineheni tí tjen Dios, <sup>22</sup> a ntá jehe ch'án tsjanjon ch'án kaín nkehe tsjancheheni ch'án, kixin nchexiteyéheni tí nkehe k'uetōan ch'án la ko ch'eni tí nkehe tóxrjínhjn ch'án. <sup>23</sup> Tí nkehe tsík'etōan ch'án la mé tíhi kixin chrókuitekaonni tí Xjeen ch'án Jesucristo, la ko chrótjuèheni kichó ni éxí k'uetōan ch'án. <sup>24</sup> Tí nkexro nchexiteyéhe tí nkehe k'uetōan ch'án mé tjejóko tí jehe ch'án, la ko jehe ch'án tjen tí tjejó sín. Tíhi mé noexínni kixin jehe ch'án tjejókoni ch'án kixin tí Nchakuen ch'án tsíkjanjon ch'án.

### Tí Nchakuen Dios la ko tí nchakuen tí nkexro nínkakonhen Cristo

**4** Kichóni, chrókuitekákonyará kaín tí sín ntáchro sín kixin Nchakuen Dios mé nixjaxin tí jehe sín. Náhí. Chrót-sjehérá tí nkehe ch'e sín kixin chrókónohará kixin á chaxín chóna sín Nchakuen Dios o náhí, kixin tí chjasintajni la ixri nchónhya chojni ch'ia, ntáchro sín kixin

nixja sín tí itén Dios. <sup>2</sup> A ntá xíkaha mé chrókónoaxínrá kixin á chaxín chóna sín Nchakuen Dios kixin kaín tí sín chaxín titekaon sín kixin Jesucristo ikui éxí chojni mé chóna sín Nchakuen Dios. <sup>3</sup> A ntá tí nkexro titekakonhya kixin xíkaha tsíki Jesús, na chóntahya sín Nchakuen Dios. Náhí. Chóna sín tí nchakuen tí nkexro nínkakonhen Cristo. Jahará ó kuínhínrá kixin itsi tí nchakuen a, a ntá jie ó tsíki chjasintajni.

<sup>4</sup> T'íkuan tí jahará éxí xjanna, kixin jahará la ó titekáonrá Dios, a ntá kjuachará kixin kjuachahya tí sín ch'ia chrók'uetōan, kixin tí nkexro tjejókoará la imá t'etōan, a ntá tí nkexro t'etōan chjasintajni la kánhyó t'etōan. <sup>5</sup> Kixin jehe sín la kuènte chjasintajni ó, méxra nixja sín tí nkehe kuènte chjasintajni ó. A ntá tí chojni kuènte chjasintajni ó mé tjejótinhin sín. <sup>6</sup> A ntá jeheni mé xjeen Dios. A ntá tí sín chóxin Dios mé tjejótinhin sín tí nkehe tjakoni. A ntá tí nkexro chónhya Dios mé tjinkakonhya sín chrókuinhin sín tí nkehe tjakoni. A ntá tíha mé tjtsoanxínni nkexro chóna tí Nchakuen tí nkexro chaxín la ko nkexro chóna tí nchakuen tí nkexro xrich'ia.

### Dios mé tjuèheni

<sup>7</sup> Kichóni, méxra chrótjuèheni kichó ni, kixin tí tjuèheni kichó ni mé tixín tí tjen Dios. Kaín nkexro tjuèhe kichó mé xjeen Dios, la ko chóxin Dios. <sup>8</sup> A ntá tí nkexro tjuèhya kichó na mé chónhya Dios kixin Dios la xráxin tjuèhe chojni. <sup>9</sup> Dios la ó kjuakoxín ch'án kixin tjuèhe tí jeheni kixin tsíchr'án ch'án tí jnkokoá Xjeen ch'án chjasintajni kixin tsochón-taxínni kjuachón tí jehe ch'án. <sup>10</sup> A ntá tí tjuèheni Dios la mé tíhi: jehya kixin jeheni k'uetjuèheni tí jehe ch'án. Náhí. Jehe ch'án mé xráxin tjuèhe ch'án tí jeheni, a ntá ichr'án ch'án xjeen ch'án k'uenyákonhenni kixin tsojtuáxin tí jie chóntani.

<sup>11</sup> Kíchóni, a ntá tí xíkaha Dios tjuèhe tí jeheni, a ntá kjaxinni jeheni xíkaha chrótjuèheni kíchó ni. <sup>12</sup> A ntá Dios la ninkexró k'uíkonhya. Kjánchó tí chrótjuèheni kíchó ni la Dios ts'ejókoni ch'án, a ntá tsjinkítsa ch'án kixin chaxín tsotjuèheni kíchó ni. <sup>13</sup> Tíhi mé noexínni kixin tjejókoni Dios la ko jehe ch'án tjejóko tí jeheni kixin tsíkjanjon ch'án tí Nchakuen ch'án chótani. <sup>14</sup> Jeheni mé k'uíkonxín konni la mé chrónkaxínni kixin It'éni Dios tsíchr'án ch'án Xjeen ch'án kixin tsaáxin chojni síin chjasintajni. <sup>15</sup> A ntá jnkójín nkexro titekaon la ko chrónkaxín kixin Jesús mé Xjeen Dios mé tjejóko Dios la ko Dios mé tjejóko tí jehe sín.

<sup>16</sup> Mé xíkaha mé noexínni la ko titekaonni kixin Dios la tjuèhe tí jeheni. Dios mé xráxín tjuèhe chojni, a ntá tí nkexro tjuèhe Dios mé tjejóko Dios la ko Dios tjejóko tí jehe sín.

<sup>17</sup> Mé xíkaha chaxín chrótjuèheni Dios kixin ntá chróchrakonhyani tí yaon tsi-toexín ijíeni kixin ó noheni kixin Jesucristo la tjuèheni ch'án la ko jeheni la kjaxin tjuèheni tí jehe ch'án. <sup>18</sup> Kixin tí tjuèheni Dios la kohya kjuachrakon. Tí chaxín tjuèheni Dios la tíha mé tsakit-sje tí kjuachrakon. A ntá chojni chrakon mé chaxín tsjasóte. A ntá jnkójín chojni chrakon la mé chaxínhya tjuèhe Dios.

<sup>19</sup> A ntá jeheni la tjuèheni Dios kixin jehe ch'án senó tjuèhe ch'an tí jeheni. <sup>20</sup> A ntá jnkójín nkexro ntáchro kixin jehe mé tjuèhe Dios, a ntá tuénxín nínkakonhen kíchó mé kjuach'ia xriko. Tí tjuèhya ch'án tí kíchó chóxin ch'án, la kjaxin xitjahya tsotjuèhe Dios kixin tsík'ikonhya ch'án Dios. <sup>21</sup> Tíhi mé tsík'etoan Jesucristo kixin tí nkexro tjuèhe Dios la mé kjaxin chrótjuèhe kíchó.

### Tí tinkáchónkini Dios la tsjachahya tí chjasintajni

**5** Kaín nkexro titekaon kixin Jesús mé tí Cristo la jehe mé tsík'axrjeníxin Dios; a ntá tí nkexro tjuèhe tí it'é tí xjan mé kjaxin tsotjuèhe tí xjeen tí nkexro a. <sup>2</sup> A ntá tí tjuèheni Dios la ko nchexiteyáni tí nkehe t'etoan ch'án, a ntá noheni kixin kjaxin tjuèheni tí sín tsík'óna xjeen Dios. <sup>3</sup> Tí tjuèheni Dios la t'ichjánxin kixin chrókuitekaonni tí nkehe k'uetōan ch'án, kixin ti nkehe t'etoan ch'án la jehya ijnko nkehe imá xra <sup>4</sup> kixin kaín chojni tsík'óna xjeen Dios tsjacha, la ntá tí chjasintajni la náhi. A ntá tí tinkáchónkini Ìnchéni la mé tsjachaxinni la tsjachahya tí chjasintajni. <sup>5</sup> A ntá tí sín tinkáchónki kixin Jesús mé tí Xjeen Dios mé tsjachahya tí chjasintajni ts'etuenhen sín.

### Tí nkehe chrónkaxín nkexrí tjen tí Xjeen Dios

<sup>6</sup> Tió kui Jesucristo la kjuakoxin tí ìnta la ko tí jni. La jehya kixin jehó tí ìnta kjuakoxin ch'án. Náhi. Kjaxin ìnta la ko ijni kjuakoxin ch'án. A ntá tí Nchakuen Dios mé chrónkaxín tíha, kixin tí Nchakuen Dios la chaxín ntoá. <sup>7</sup> Síin iní nkexro chrónkaxín nkaya nkajni: ijnko la It'éni, la ijnko la tí Palabra, la ijnko la tí Nchakuen ch'án. Tíha mé iní, kjánchó jnkokoá nkexro tíha. <sup>8</sup> A ntá síin iní tí nkehe chrónkaxín ntihi chjasintajni, mé tí Nchakuen Dios, la ko tí ìnta la ko tí jni; a ntá tí iní mé jnkokón chrónka. <sup>9</sup> ¿Á chrókuitekaonni tí nkehe chrónka chojni ó? A ntá tí nkehe tsíchrónka Dios, antsí má tjetōan kixin táha la Dios tsíchrónkaxín kixin nkexrí tjen tí Xjeen ch'án. <sup>10</sup> Tí nkexro titekaon tí Xjeen Dios na mé asén ó tōnoexín tíha. A ntá tí sín titekakonhya sín Dios, la ntáchro sín kixin Dios la ch'ia ch'án kixin kuítekakonhya sin tí nkehe tsíntáchro

Dios kixin nkexrí tjen Xjeen ch'án. <sup>11</sup>Tí nkehe tsíchrónka Dios mé tíhi kixin tsjanjon ch'án kjuachón jnkochrín, a ntá tí kjuachón mé chóna tí Xjeen ch'án. <sup>12</sup>A ntá tí nkexro chóna tí Xjeen Dios mé kjaxin chóna kjuachón; a ntá tí nkexro chónahya tí Xjeen Dios la mé chónahya kjuachón.

### Chrónkaxín nkehe kuènte kjuachón

<sup>13</sup>Tí nkehe mé kjinni kixin jahará ó títekáonrá tí Xjeen Dios, kixin mé tsonoxínrá kixin chaxín chontará kjuachón jnkochrín.

<sup>14</sup>Tíhi mé chóxixínni Dios kixin noheni kixin ichrén nkehe tsjancheheni ch'án éxí tjinkaon ch'án la jehe ch'án la tsinhin ch'án. <sup>15</sup>A ntá tí xíkaha ó noheni kixin Dios tjetinhin tí nkehe nixjeheni ch'án, a ntá kjaxin ó noheni kixin ó chón-tani tí nkehe kjuancheheni ch'án.

<sup>16</sup>A ntá jnkójínrá ts'ikonrá ijnko kichuára tjasin jie, a ntá tí jehya ijnko jie chrók'uenxín ch'án, la chrókjuancheherá Dios kixin chrókjuinchexraxinkaon ch'án

kixin kjuasin ch'án jie, a ntá Dios chrókjuanjon ch'án kjuachón, tí chaxín jehya ijnko jie chrók'uenxín chojni. A ntá tí jie chrók'uenxín chojni la ntáxrjan kixin íchá jína chrókjuanchehyará Dios kixin chrókjuinkĩtsa tí ch'ín a. <sup>17</sup>Kaín nkehe jínahya la ijie tíha. Kjánchó síin jie ts'enxínhya chojni.

<sup>18</sup>Ó noheni kixin tí nkexro tin-káchónki It'éni Dios tjasinhya sín jie, kixin tí Xjeen Dios tjinkĩtsa tí jehe sín, a ntá tí Jínahya tsjachahya tsjachroe tí jehe sín.

<sup>19</sup>Ó noheni kixin Dios t'ayakonhen tí jeheni, a ntá tí Jínahya chóna kjuachaxin t'etuenhen kuenté chjasintajni.

<sup>20</sup>Ó noheni kjaxin kixin Xjeen Dios kui, la ko kjuínkĩtsa ch'án tí jeheni kixin chrókónoheni nkexrí tjen Dios chaxín. A ntá tzejókoni jnkokoá tí nkexro chaxín, tíha mé Jesucristo tí Xjeen Dios. Tíha mé Dios chaxín, la tsochóntaxínni ch'án kjuachón jnkochrín. <sup>21</sup>Éxí xjanna t'íkuan tí jahará, la títóherá tí dios tsíkjanoya. Amén. Ó tjen.

## Yóxin xroon tsíkjin ch'ín Juan

**1** Janhan mé ijnko nkexro ó táda t'ayakonhen nínko mé ikjian tí xroon ts'áyéhe tí sín tsíkjoyá Dios tójnkotsé sín ntiha, la mé chaxín tjuaha sín: a ntá jehya janhván, la kjaxin kaín tí sín chóxin tí tan chaxín. <sup>2</sup>Tjuahará tí jahará kixin tí tan chaxín ó chóna asénni, tíha mé ts'ejókoni jnkochrín. <sup>3</sup>It'eni Dios la ko Ìnchéni Jesucristo mé Xjeen Dios chrókjuintayaonrá ch'án la ko chrókuikonóahará ch'án la ko chrótjáhara ch'án kjuaxróxin kixin chaxín tjuahará ch'án.

<sup>4</sup>Imá chàna k'uikuan kixin isorá tje-jorá títekáonrá tí nkehe chaxín, éxí tsík'etoan It'eni Dios. <sup>5</sup>A ntá jie jahará kichó ni, xrjanóahará kixin chrótjuèhéra kichuára. Méxra xikaha tjékjian tí xroon i, la jehya ijnko nkehe nixin tsík'etoan Dios. Náhi. Tíha la mé tí nkehe tsík'áyeheni tí kjuák'e Ìnchéni Jesucristo. <sup>6</sup>A ntá tí tjuèheni kichó ni la mé tíhi kixin chrók'uejóni éxí tsík'etoan Dios; a ntá tí nkehe tsík'etoan Dios la mé ó tsíkinhínra jahará tí senó kixin chrótjuèheni kichó ni.

### Tí chojni xrich'ia

<sup>7</sup>Nchónhya chojni chjasintajni xrich'ia sín titekakonhya sín kixin

Jesucristo kui k'óna chojni. A ntá tí chojni xikaha mé ixri xrich'ia la ko nínkakonhen Cristo. <sup>8</sup>Chrókóxakonhanrá kixin chrók'uitjáyanhya tí xra kjuich'erá kixin naxa chrók'uayéhéra tí nkehe tsjintaxín ts'ayéhéra.

<sup>9</sup>A ntá tí síin ijnko nkexro kuítóhe tí nkehe kjuako Cristo ntá kjuichroe la mé chónahya sín Dios; a ntá tí nkexro títoehya tí nkehe kjuako Cristo mé chóna sín It'eni Dios la ko tí Xjeen ch'án. <sup>10</sup>A ntá jnkojín sín chrókjuijit-sjehe tí jahará, a ntá ntoáhya chrókjuako sín, la chrókjuánjonhyará kjuachaxin chrókuitóhe tí sín a ntóará la ko ni chrónixjeéhyará sín jnkojína. <sup>11</sup>A ntá tí nkexro tsonixjehe tsontácho kixin: “¿Á jína k'uinka?” na mé éxí tóxrjínhin sín tí nkehe jínahya ich'e tí sín a.

### Tí tan tsjixixín

<sup>12</sup>Chonta nchónhya nkehe chrókuinhínra jahará, kjánchó tjínkakonhya chrókjian xroon ó. Náhi. Tjínkavan kixin tjoka chrókjuasántsajahará tí jahará tsonixjahará kixin chrókjuintaxín chrókóchéheni.

<sup>13</sup>Tí sín kichuára tójnkotsé kuènte nínko ntihi, mé tí sin kjaxin tsíkjoyá Dios, mé nixjahará sín. Amén. Ó tjen.

## Tí nixin xroon tsíkjin ch'ín Juan

**1** Janhan mé tí nkexro t'ayakonhen nínko mé tjékjian tí xroon ts'áyéhe tí ch'ín choxian, mé tí ch'ín Gayo tí ch'ín chaxín tjuaha.

<sup>2</sup>Kíchóni, tjáncháha Dios kixin éxi jaha jína tjen tinkachónkia Ìnchéni la jína chrók'uaxrje kaín xra ch'e la ko jína chrókjuak'e jaha. <sup>3</sup>Imá kóchàna tió kui iso tí sín kíchó ni chrónka sín kixin jína tjákoxian tí tan chaxín. <sup>4</sup>Kohya ijnko nkehe antsí má nchechàna éxi tió kuinhan kixin tí sín t'íkuan éxi xjanna tje-jótitekaon sín tí tan chaxín

<sup>5</sup>Kíchóni, chaxín jína tjech'e xra tjínkítsa tí sín kíchó ni la ko antsí tjínkítsa tí sín tsíkjin ókjé chjasin.

<sup>6</sup>À ntá tí tsíkójkotsé tí sín kíchó ni la tsíchrónka sín kixin nkexrí tjuèhé tí jehe sín. Jaha chrókjuínkítsa tí nkehe t'ichjánxinhin sín tí sátsji sín. Xíkaha mé tóxrjínhin Dios. <sup>7</sup>Tió sákjuí sín kjuankíxin sín chrónka sín itén Ìnchéni la chrohya sín chrók'uáyéhe sín ninkehó nkehe kuènte tí sín chónhaya Dios. <sup>8</sup>Méxra tí jeheni t'ichjánxin chrókjuínkítsani tí jehe sín kixin tsjacha sín tsochrónkaxín sín tí tan chaxín ntoá.

### Ntoáhya kjuako ch'ín Diótréfes

<sup>9</sup>Janhan ikjian ijnko xroon k'uáyéhe tí sín tójkotsé ntiha. Kjánchó ch'ín Diótréfes kuítekakonhya ch'án tí

nkehe k'uetuenhenni ch'án kixin tjinkaon ch'án chrók'uetōan ch'án jehó ch'án. <sup>10</sup>Méxra xíkaha tí sátsjia ntiha tsonixjaha ch'án kixin tí kjuach'ia ntáchro ch'án t'ántaxínhin ch'án tí jeheni. Jehya táhó ich'e ch'án. Kjaxin tjanjonhya ch'án kjuachaxin ts'ejó tí sín kíchó ni tjiji; a ntá tí sín tjinkaon chrókjuanjon kjuachaxin la t'etōan ch'án kixin tsjanjonhya sín kjuachaxin la ko t'etōan ch'án kixin tsochjinahya sín tí tójkotsé tí chojni.

<sup>11</sup>Kíchóni chrókjuákoxinhya tí nkehe jínahya. Íchá jína chrókjuákoxian tí nkehe jína. Tí nkexro ich'e nkehe jína na mé kuènte Dios. À ntá tí nkexro ich'e nkehe jínahya la mé tsík'ikonhya sín Dios.

### Jína tjákoxin tí ch'ín Demetrio

<sup>12</sup>Kaín sín ntáchro sín kixin jína tjákoxin tí ch'ín Demetrio la mé chaxín tíha. Kjaxin tí jeheni chrónkani tíha la ko jahará ó nohará kixin tí nkehe ntoá chrónkani.

### Kjuixixin nixja ch'án

<sup>13</sup>Janhan chonta nchónhya nkehe tsontáxrjan, kjánchó tjínkakonhya tsokjian ó <sup>14</sup>kixin tjínkavan tjoka ts'íkuan tí jaha, a ntá tsjoni.

<sup>15</sup>Kjuaxróxin chrókjuak'e jaha. Kaín nkexro choxian ntihi nixjaha sín. Tétuhanhan nixjehé jnkojnko tí sín chóxinni.

## Tí xroon tsíkjin ch'ín Judas

**1** Janhan Judas, t'aha xra Jesucristo, la sana mé Jacobo la mé ikjian tí xroon í ts'áyéhe tí sín tsíkjejá It'eni Dios tsíkjinchetjóá ch'án kixin tsinkáchónki sín ch'án. Mé xikaha Jesucristo t'ayakonhen ch'án tí jehe sín. <sup>2</sup>Imá kuikonóahará ch'án ntá ts'ayéhérá kjuaxróxin kixin tjuahará ch'án.

### Tí sín ntoáhya tjako

(2 Pedro 2.1–17)

<sup>3</sup>Kíchóni, imá tjínkavan tsokjian tí xroon ts'ayéhérá tsochrónka nkexrí tsaáxinni kaín ni. A ntá t'íkuan kixin t'ichjánxin tsokjian tí xroon ts'ayéhérá tsoxrjanóaxínrá kixin jína chrókiénxinrá nkehe chrókjuáteherá kixin nkexrí tinkachónkirá Ìnchéni kixin tí fe la mé ónaá tsík'áyéhé tí sín tsíkjinchetjóá Dios. <sup>4</sup>A ntá jie ó kuik'ixenhen iso sín ch'ia tí tjejorá. A ntá ósé nixja xroon itén Dios kuènte tí sín a kixin tsjasóte sín. Jehe sín la chojni jínahya ntá ntáchro sín kixin tinkáchónki sín Dios la ó ch'iaxón sín ntá imá tjasin sín jie. La titekakonhya sín Dios, jehó t'etoan, la ko titekakonhya sín Ìnchéni Jesucristo.

<sup>5</sup>Jahará kjónté ó nohará la jehí tjínkavan sintaxráxinkáonrá inaá kixin Ìnchéni Dios kuakitsjexín ch'án Egipto tí sín chjasin Israel, ntá kjónté xikaha la chr'éxin kjuínchek'itjáyan ch'án tí sín kuítekakonhya sín tí jehe ch'án.<sup>‡‡</sup> <sup>6</sup>Kjaxin tí sín ángel kuítekakonhya sín tí k'uetōan Dios ntá kuítóhe sín tí kjuachaxin tsíkjanjon Dios tsík'áyéhe sín la ko kuítóhe sín tí k'uék'ejó sín jína,

a ntá jie Dios k'uetōan ch'án kixin ts'ejóchjina sín tí sítié la ts'ejóchónhen sín tsijia tí yaon tsitoéxin ijíé sín. <sup>7</sup>Kjaxin tí sín chjasin Sodoma la ko tí sín chjasin Gomorra la ko tí sín chjasin chjinaxón kóyóhe sín tí sín ángel kuítekakonhya la kjuasinko sín jie chojni chjin ókjé la ko kjuasinko sín jie kichó sín kjónté jnkokón toa sín. Tíha mé chrórxaxinkakonxín kaín chojni kixin nkexrí tsonhen tí sín titekakonhya tsjasótexín sín tí xrohi jnkochrixin ts'ankahya.

<sup>8</sup>Méxra kjaxin tí chojni a kotáchrién sín tsík'ikonxín kixin ó nchoxon chrókjuasinko sín jie chojni chjin ókjé la ko chrókuítekakonhya sín tí kjuachaxién Ìnchéni la ko chrók'uántaxínhin sín tí sín ángel chóna kjuachaxin t'etoan. <sup>9</sup>A ntá tí ch'ín arcángel Miguel kjuánjonko ch'án tí ch'ín Tsochren la ko ikjo sín kjuánjonxin sín nkehe tsonhen tí cuerpo kuènte ch'ín Moisés.<sup>¶¶</sup> A ntá jehe ch'án kjónté xikaha la kjuínchekjasótehya ch'án tí ch'ín Tsochren. Jehó ntáche ch'án kixin: “Ìnchéni mé tsjentuáha tí jaha.” <sup>10</sup>A ntá tí chojni i t'ántaxínhin sín tí nkehe tienxínhya sín la tjenkayáxin sín éxi ko tienxínhya nchexiteyéhe tí nkehe ntáchro asén, mé xikaha tí nkehe jínahya kjuích'e sín ts'itjáyaxín.

<sup>11</sup>¡Nò! tí jehe sín! Chréhe sín éxi kjuích'e ch'ín Caín.<sup>§§</sup> Tjinkaon sín chrókjuacha sín chichaon ntá ntoáhya kjuích'e sín éxi kjuích'e Balaam, la ko its'en sín éxi ik'uén ch'ín Coré kixin kuítekakonhya sín.<sup>\*†</sup> <sup>12</sup>Ijngo kjuatósuèhe kixin tjejóyákjanxín sín tí síin kia náxrjón chontará, kixin tjejóne

‡‡1:5 Éxodo 12.51 Números 14.29–30

¶¶1:9 Deuteronomio 34.6

§§1:11 Génesis 4.3–8

\*1:11 Números 31.16

†1:11 Números 16.1–3



sín la ko tjejó't'i sín chéhe sín la kjónté xíkaha la ninkehó kjuasáya chóntahya sín. Tjejó sín éxí tí sín t'ayakonhen kolélo kjánchó jehe sín t'ayakonhen sín asén sín ó. Jehe sín la éxí tjuí chóntahya ntá tjakáko xrínto; la ko éxí ijnko nta t'ónahya to tí nitjó chrók'óna to, éxí yáya tsfk'en tsfk'axrjenkíxin nuèé. <sup>13</sup> Jehe sín na mé éxí ntayaon jiehe síxróji lóxrjo ó chóntahya ntá jína mé xíkaha chónkó tí nkehe ch'e sín mé ijnko kjuatósuehe tía; la ko éxí konotsé kjuíchroe sákjuí ókjé; a ntá tjechónhen sátsji sín tsjasóte sín sítié jnkochríxín.

<sup>14</sup> A ntá kjuák'e ch'ín Adán, a ntá yatoxín chr'éxín kui ch'ín Enoc nix-jaxín kjuachaxién Dios ntácho ch'án kíxin k'uíkon ch'án itjen Ìnchéni kuikao nchónhya mil tí sín ángel kuènte ch'án, <sup>15</sup> kíxin sinchekitoéxín ch'án ijíé kaín tí sín jínahya kíxin kaín tí jínahya kjuích'e sín la ko kaín nkehe k'uénixja tí sín jínahya k'uántaxínhín sín tí jehe ch'án. <sup>16</sup> Xráxín tóxrjénhya sín nkehe sítónhen la ko ixri sín tjonta kíchó sín. Jehó xritjeyá sín tí nkehe tóxrjínhín sín tjenkayáxin sín. Ihnke sín nixja sín la ko itjo sín jína chojni kíxin ntá tí sín a chrókjuinkítsa jehe sín.

### Nchexraxinkaon ch'án tí sín tinkáchónki Cristo

<sup>17</sup> A ntá jahará kíchó ni, xráxinkáonrá kíxin tí sín tsíkjeyá Ìnchéni Jesucristo <sup>18</sup> ntácho sín kíxin tí yaon tsjixixín tsjejexín chjasintajni ts'ixín chojni tsitekakonhya sín ts'ántaxínhín sín tí

nkehe tjinkaon Dios la ko tsotjinkaon sín sinchexiteyéhe sín tí nkehe jínahya ntácho asén sín ó. <sup>19</sup> Tí sín a mé tjinkaon ts'óxika tí sín jnkokoá tjejótójnkotsé kíxin naxá tóxrjínhín sín sich'e sín nkehe síin chjasintajni kíxin chóntahya sín Nchakuen Dios.

<sup>20</sup> A ntá jahará kíchó ni tjuahará, antsí jína chrók'uejorá tinkachónkirá Ìnchéni. Chrónixjeexínrá Dios tí kjuachaxin kuènte Nchakuen ch'án. <sup>21</sup> Jína chrók'uejorá kíxin tjuahará Dios ts'ejochonhénrá tí yaon tsokjan Ìnchéni Jesucristo kíxin kjuasáyé ch'án tsotjáhará ch'án kjuachón jnkochríxín.

<sup>22</sup> Chrókuiikonóehérá tí sín naxá tienxínhya. <sup>23</sup> Jnkojín sín chrókjuínchekaará chrókuakitsjek-janxínrá sín chríkjan xrohi, la ko chrókuiikonóehérá í so sín kjánchó chróchontará cuidado tí jehe sín kíxin kjónté ti iké sín kjaxin chóna jie.

### Tjanchia ch'án kjuasáya

<sup>24-25</sup> Jnkokoá Dios tjen mé imá nohe ch'án la ko sinchekaáni ch'án la chóna ch'án kjuachaxin ts'ayakonhenni ch'án kíxin chrókjuasinhyani jie la ko tíó tsjijini tí tjen ch'án la ninkehó jie chróchóntahyani, imá tsochéheni tí tjen ch'án ntiha. Kjuasáyé Dios imá chóna ch'án kjuachaxin t'etoan ch'án la ko kjuínchekaáni ch'án kjuachaxin Ìnchéni Jesucristo. Jehe ch'án jnkochríxín tjen ch'án chóna ch'án kénxín kjuachaxin. Amén. Ó tjen.

## Tí nkehe chrónka Jesucristo k'uúikon ch'ín Juan

**1** 18

Kaín tí nkehe i mé chénka Dios Jesucristo kixin jehe ch'án tsochénta tí sín ch'ehe ch'án xra tí nkehe tjoka tsonhen. Ntá Jesucristo kjuínchenohe ijnko ángel kuénte ch'án nkexrí chrókónohe tí ch'ín Juan ch'ehe ch'án xra. <sup>2</sup>A ntá jehe ch'án mé k'uútuénhen ch'án ntá chrónkaxín tí nkehe chaxín tsintáchro Dios la ko tí nkehe chrónka Jesucristo la ko kaín tí nkehe tsík'ikon ch'án nkexrí kjuakoxín Dios.

<sup>3</sup>Náxrjón tjejó tí sín nchekuáxin tí xroon i la ko kjaxín tí sín tjejótinhin tí palabra chrónka nkehe tsonhen la ko tóxrjínhin sín titekaon sín nkehe nixja tí xroon i kixin ó kuichjina tí hora tsoxiteyá tíha.

### Ch'ín Juan ikjin ch'án xroon ts'áyéhe tí yato nínko

<sup>4</sup>Janhan Juan ikjian tí xroon tsochr'anhan tí yato nínko tjejó estado Asia. Jahará chrók'uayéhérá kjuasáyé Dios la ko kjuaxróxin. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá la ko kjaxín tí yato Nchakuen ch'án tjejó tí trono t'etóanxín ch'án mé tjanjon kjuaxróxin. <sup>5</sup>La ko kjaxín kjuasáyé Jesucristo. Jehe ch'án chaxín chrónka kaín nkehe ntoá la ko jehe ch'án mé xrankíxixín xechón kjónté tsík'en kixin tjeotoan ch'án kixin t'etúenhen ch'án kjónté kaín tí sín rey la ko tí sín t'etóan síin chjasintajni. Jehe ch'án mé tjuèheni ch'án la ko tí ijnié ch'án mé k'uújmáxinni kaín tí jje chóntani. <sup>6</sup>Jehe ch'án mé tsíkjanjon kjuachaxin tsík'ónani nchat'á kixin sich'ehehi xra It'éni Dios. Tí kjuachaxin kuénte ch'án

me ts'etóan jnkochríxín. Mé xíkaha tsoxiteyá. Amén.

<sup>7</sup>Ts'ikon chojni kixin Cristo la ó tsi chríkjan tjuí. Kaín chojni ts'ikon ch'án la ko kjaxín tí sín k'uékónínkakonhen tí jehe ch'án tsíkjinchekjasóte sín ch'án mé ts'ikon sín ch'án la ko kaín chojni chjasin síin chjasintajni tsotsjánka sín tíó ts'ikon sín tí jehe ch'án. Mé xíkaha tsonhen. Amén.

<sup>8</sup>Janhan mé tí xrankíxixín la ko tí tsjixixín éxí tí letra xrankíxixín A la tsjixixín Zeta. Mé xíkaha ichro Ìnchéni Dios, tí nkexro imá t'etóan. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá.

### Ch'ín Juan tsík'ikon ch'án kixin Cristo chónka kjuachaxin

<sup>9</sup>Janhan Juan mé ijnko kichó tí jahará mé tjékjan Jesús la ko tí kjuachaxin kuénte Dios chonta la mé jahará la ko jeheni jnkokón tjejóttjasóteni la jehe ch'án tjinkítsani kixin tsjachani. Kjuakua itén Dios éxí chrónka Jesucristo la mé tíha kjuak'échjínaxián tí isla it'in Patmos. <sup>10</sup>A ntá ijnko yaon xraxinkakonxínni Ìnchéni la ikui kjuachaxin Nchakuen Dios tí tjén tí janhan la kuínhan kixin nóton tí janhan ijnko nkexro nixja imá itsen éxí itén ijnko trompeta. <sup>11</sup>Mé ntáchro ch'án kixin:

—Janhan mé tí xrankíxixín la ko tí tsjixixín éxí tí letra xrankíxixín A la tsjixixín Zeta. Mé tsokjian jaha ijnko xroon kaín tí nkehe k'uúkuan kixin tsochr'enhén tí yato nínko tjejó tí estado Asia na mé tí nínko tjen chjasin Éfeso, la Esmirna, la Pérgamo, la Tiatira, la Sardis, la Filadelfia, la ko Laodicea —ichro ch'án.

<sup>12</sup>Ntá nkátjía tsjahá kixin nkexro itén tí tjenixjana ntá xrínghya k'uúkuan yato candelero tsík'óna chica oro. <sup>13</sup>A ntá chríkjan tí yato candelero k'uúkuan ijnko nkexro éxí yóhe Xjeen Dios tsík'óna cho-

jni. Ntá tí iké ch'án la ika kjínjin tjenkáya ch'án hasta tsíkóyohé toté ch'án la ko mé chóna ijnko cinta jehó oro tjenkáni ntakuin ch'án. <sup>14</sup>Tí kaxihí ch'án la tjóá éxi kaxree kolélo tjóá o éxi chrinta tsjehe la ko tí ikon ch'án la éxi xrohi nene tsjehe. <sup>15</sup>Ntá tí toté ch'án la éxi chica sine tjákini na ntá tsik'axrjexín tja. A ntá tí itén ch'án la itsen éxi tóvéntó nchónhaya ntarío. <sup>16</sup>A ntá tí tja ch'án chjina mé chóna yato konotsé. A ntá tí ir'va ch'án k'uaxrjexín chica espada iyo, yánjín taté. A ntá imá tjákini tsjehe ikon ch'án la éxi yaon t'inkaséyanxín imá.

<sup>17</sup>A ntá tí k'uíkuan xikaha la kjuáchr'ítsinka toté ch'án éxi tsik'éna. A ntá jehe ch'án kjuak'etja tja ch'án chjina chrítaón tí janhan ntá nixjana ch'án ntáchro ch'án kixin:

—Chrakonhya jaha. Janhan mé tí xrankixixín la ko tí tsjixixín. <sup>18</sup>Janhan tí nkexro tjechón. Ik'uén, a ntá ijie la tjéchuán inaá la itjén jnkochríxín. Amén. Janhan chonta llave kuènte chojni its'en la ko kuènte tí síin tí sín tsik'en. <sup>19</sup>Méxra ikjian jaha tí nkehe k'uíkuan mé tí nkehe síin ijie la ko tí nkehe tsonhen chr'éxin. <sup>20</sup>Ninkexró k'uékiexínhya nkexr'í t'axrjexín tí yato konotsé k'uíkuan chonta tjana chjina, la ko tí yato candelero tsik'óna chica oro. Mé tí yato konotsé t'axrjexín kixin tí yato ángel t'ayakonhen tí yato nínko la ko tí yato candelero k'uíkuan me kjaxin t'axrjexín tí yato nínko.

### **Tí tan k'uáyéhe tí yato nínko: Tí tan k'uáyéhe tí sín chjasin Éfeso**

**2** Tsojkian tí nkehe ts'áyéhe tí ángel t'ayakonhen tí nínko Éfeso: “Xikaha ichro tí nkexro chóna yato konotsé itja ch'án chjina la ko xritjak'e ch'án jnkosiné tí yato candelero tsik'óna oro. Ntáchro xikihí: <sup>2</sup>Janhan nóna kaín tí xra ch'erá la ko nóna kixin tóxrjánhyará tí sín jínahya. Janhan

la ó nóna kixin kjuich'erá prueba tí sín ntáchro kixin apóstol tí jehe sín la ntá jehya la ntá kónoxín kixin xrich'ia tí jehe sín. <sup>3</sup>Nchónhya kjuasótiará la kjónté chonhénrá kóninkákonhyará la imá kjuich'erá xra kixin tinkachónkirá nina la ko nunca kóxrjéhyará. <sup>4</sup>Kjánchó tjánchía ijnko jie tí jahará kixin tinkachónkihyará éxi kjuankixixínrá k'uétjuanará. <sup>5</sup>Méxra chróxráxinkáonrá kixin ó kuítóh'érá tí k'uétjuanará la ntá chrókjuínkirá tí nkehe tjenkayáxinrá la ko chrókjuich'erá xra éxi tí kjuankixixínrá. A ntá tí náhi, la tjoka tsjasán la tsjakíyan tí candelero tí tjejorá tí nunca tsjínkihyará tí nkehe jínahya tjenkayáxinrá la tí tsokjanhyará tsoxráxinkáonrá Dios. <sup>6</sup>Kjánchó chrókónohará kixin tóxrjina tí nkehe tjejoch'erá kixin tóxrjánhyará tí xra ch'e tí sín nicolaítas kixin kjaxin janhan nínkakonhan tí nkehe ch'e sín. <sup>7</sup>Tí nkexro tjinkaon chrókuinhin la chrókuinhin sín tí nkehe nixjehe Nchakuen Dios tí nínko ntáchro kixin: Tí sín tsjacha sinchexiteyána sín la tsotjahá sín kjuachaxin sine sín tí to t'óna tí nta tjanjon kjuachón itjen tí tjen Dios.”

### **Tí tan k'uáyéhe tí sín chjasin Esmirna**

<sup>8</sup>Ikjian tí nkehe ts'áyéhe tí ángel t'ayakonhen tí nínko Esmirna: “Xikaha ichro tí nkexro xrankixixín la tsjixixín, mé tí nkexro ik'uén la ntá jie tjechón: <sup>9</sup>Janhan la ó nóna kaín nkehe tjejoch'erá. Ó nóna kixin nkexr'í tjejótjasótiará la ko ó nóna kixin nóna kjánchó jehya. Náhi. Jehe sín mé tójnko tsé sín tí nínkoé tí Jínahya. <sup>10</sup>Kjánchó chrakonhyará kjónté tsjasótiará. Tí ch'ín Tsochren tsochr'ánxanhanrá ntóechiso jnkójín tí jahará kixin tsotsjexín nkexr'í tí jahará ntá t'ichjánxin tsjasótiará iso yaon. Kjánchó chrókui-toéhyará Dios kjónté chrók'uenrá ntá

janhan tsotjáhará tí kjuachón chr'éx-in. <sup>11</sup>Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko: Tí nkexro tsjacha sinchexiteyàna sín la í tsjasótehya, la tí yóxin its'en chojni la í ts'enhya tí jehe sín.”

### Tí tan k'uáyéhe tí sín chjasin Pérgamo

<sup>12</sup>Tsokjian tí nkehe ts'áyéhe tí ángel t'ayakonhen tí nínko Pérgamo: “Mé xíkaha ichro tí nkexro chóna chica espada yánjín taté: <sup>13</sup>Janhan ó nòna kaín nkehe tjejoch'erá la ko ó nòna nketí tjejorá kixin tí tjejorá la t'etōan ch'ín Satanás la kjónté la jína kuinkachónkirá tí janhan. Jahará kuítóéhyará kuinkachónkirá tí janhan kjónté tí yaon tsík'en ch'ín Antipas, ijnko nkexro kjuínchexiteyàna jína. Jehe sín tsík'óyánxin sín ch'án tí tjejorá ntiha kixin ntaha t'etōan ch'ín Satanás. <sup>14</sup>Kjánchó janhan tjánchíá ijnko jie tí jahará kixin iso nkehe ntoáhya ch'erá. Síin ntiha chjasin Pérgamo tí tjejorá iso sín tjinkakonhya sín tsítóhe sín tí nkehe k'uékjako ch'ín Balaam, tí nkexro k'uék'etuenhen ch'án tí ch'ín Balac kixin tí sín israelita chrókjuasin sín jie chrókjóne sín tí nkehe tsíkjokehe sín tí nkehe tsíkjanoya la ko chróchóna sín chojni chjin ókjé chrókjuasinko sín jie. <sup>15</sup>Kjāxin xíkaha tí tjejorá la síin iso sín tjinkakonhya sín tsítóhe sín tí nkehe tjako tí sín nicolaítas. Janhan mé tjínkakonhya tí sín a. <sup>16</sup>Méxra chrókjanrá chrókuinkachónkirá Dios. A ntá tí náhi, la tjoka tsjasán tí tjejorá la tsjánjonkianxian sín tí espada t'axrjexín ir'va. <sup>17</sup>Tí nkexro tjinkaon chrókuinhin la chrókuinhin sín tí nkehe nixjehe Nchakuen Dios tí nínko ntáchro kixin: Tí nkexro tsjacha sinchexiteyàna sín la tsotjahá sín kjuachaxin chrókjóne sín maná tjechónhen la ko tsotjahá sín ijnko xro tjóá la tí xro la ts'ínixín ihnié sín

nixin chónhya ninkexró. Jehó tí nkexro ts'áyéhe mé tsonohe.”

### Tí tan k'uáyéhe tí sín chjasin Tiatira

<sup>18</sup>Tsokjian tí nkehe ts'áyéhe tí ángel t'ayakonhen tí nínko chjasin Tiatira: “Mé xíkaha chro tí Xjeen Dios, tí nkexro ikon éxí yóhe xrohi nene sít'axrjexín la ko toté éxí chica sine tjákini tsjehe. <sup>19</sup>Janhan ó nòna kaín tí nkehe tjejoch'erá la ko ó nòna kixin tjejanará la ko tinkachónkirá tí janhan la ko ó nòna tí xra tjejoch'erá la ko ó nòna kixin tjejochonhénrá tóninkákonhyará. La ko ó nòna kixin antsí tjejoch'erá xra ijie ntá tí kjuankíxixínrá la kénhyó. <sup>20</sup>Kjánchó tjánchíá ijnko jie tí jahará kixin tjánjonrá kjuachaxin tjako tí tjan Jezabel. Kjāxin ntáchro tjan kixin nixja tjan itén Dios kjánchó ch'iyehé tjan tí sín ch'ena xra kixin kjāxin sín chrókjuasinko sín jie chojni chjin ókjé la ko chrókjóne sín tí nkehe tsík'óyán sín tsíkjokehe sín tí nkehe tsíkjanoya. <sup>21</sup>A ntá janhan ó kuítóhā tjan intsí kixin chrókuinkí tjan tí tjenkayáxin tjan kjánchó tjinkakonhya tjan sich'e tjan xíkaha la tjinkakonhya tjan chrókuítóhe tjan tí jie tjasinko tjan chojni ntoa. <sup>22</sup>A ntá jie tsjánjuan kjuachaxin tsoníhi tjan tsjak'eták'á tjan cama la ko kjāxin tsjasóte kaín tí nkexro kjuasinko tjan jie tí nunca tsítóehya sín tí nkehe tjinkaon tjan sich'e tjan. <sup>23</sup>A ntá janhan ts'oyán tí xjeen tí jehe tjan. Ntá kaín tí nínko tsonoxín sín kixin janhan choxian nkehe tónhen asén kaín chojni. A ntá jnkojnko tí jahará la tsjénkahará nkexrí tí xra kjuich'erá. <sup>24</sup>A ntá tí í sorá tjejorá chjasin Tiatira tí chréhyará tí nkehe ntoáhya tjako sín la ko tjínkakonhyará chrókónohará tí nkehe jínahya kuénte ch'ín Tsochren la xíkahó la í tsétuanhyará í jnko xra. <sup>25</sup>A ntá jahará la tí nkehe ó chontará la t'ayakonhénrá hasta tsokjan janhan. <sup>26</sup>A ntá tí sín tsjacha sinchexiteyàna sín la ko xíkaha

sich'e sín hasta tsjixixín kixin janhan tjínkavan xikaha chrókjuich'e sín na mé janhan tsjánjuan kjuachaxin ts'etuenhen sín kaín nación. <sup>27</sup>Na mé xikaha T'aná mé chjina kjuachaxin tsétoan la kjaxin xikaha jehe sín mé ts'etuenhen sín tí nación yóhe chróchónta sín ijnko chica vara kixin chróchjéhe sín tí chj chrók'ókuen tí chj tsík'óna nchetje. <sup>28</sup>Me kjaxin tsotjaha sín tí konotsé tí tji nchítjen. <sup>29</sup>A ntá ti nkexro tjinkaon chrókuinhin la chrókuinhin tí nkehe nixjehe Nchakuen Dios tí ninko.”

### Tí tan k'uáyéhe tí sín chjasin Sardis

**3** <sup>1</sup>Tsokjian tí nkehe ts'áyéhe tí ángel t'ayakonhen tí ninko chjasin Sardis: “Xikaha ichro tí nkexro chóna yato Nchakuen kuènte Dios la ko chóna tí yato konotsé: Janhan nòna kaín nkehe ch'erá, ó nòna kixin éxí tsík'en tí xra ch'erá kjónté nchehnerá kixin tjejochónrá. <sup>2</sup>T'áyará. Naxa t'ayakonhénra kjónté í tsjéhya tí nkehe kuítóhe kixin kjaxin tíha mero its'en. Ó k'uúkuan kixin tí xra ch'erá la t'íkon tí Dios kuèntana kixin ntoáhya. <sup>3</sup>Chrórxáinkáonrá tí nkehe tsíxrakohará la ko tíha chrókjuich'erá la chrókanrá chrórxáinkáonrá Dios. A ntá tí naxa tjejochrinrá la titàya tsjasán éxí ijnko síchee la tsonohayará nkesá tíha. <sup>4</sup>Kjánchó naxa síin iso chojni ntaha chjasin Sardis naxa kjuínchekjitàhya sín iké sín la jehe sín la ts'ájikjan sín kixin chóna sín ka tjóá kixin jehe sín la jina sín. <sup>5</sup>Tí sín tsjacha sinchexiteyána sín la ts'áyéhe sín ka tjóá ts'ínkáyá sín la ko tsoxíkahya ihnié sín chóna tí libro ts'ínixín ihnié tí sín tsaá la ko tsochoxian sín nkayakon T'aná la ko nkayakon tí sín ángel kuènte ch'án. <sup>6</sup>Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí ninko.”

### Tí tan k'uáyéhe tí sín chjasin Filadelfia

<sup>7</sup>Tsokjian tí nkehe ts'áyéhe tí ángel t'ayakonhen tí ninko chjasin Filadelfia: “Xikaha ichro tí nkexro tjóá la ko chaxín mé tí nkexro chóna llave kuènte ch'in rey David. A ntá tí tsakitjehe ch'án puerta la ninkexro tsjachahya ts'ikjéhe, a ntá tí ts'ikjéhe ch'án puerta la ninkexro tsjachahya tsakitjehe. <sup>8</sup>Janhan ó nòna kaín nkehe tjejoch'erá. Kjuaké tí tjejorá ijnko puerta xitjehe la ninkexro xitjahya ts'ikjéhe. Kjónté intsíkoá kjuachaxin chontará la jahará kjuínchexiteyará tí nkehe kjuákua la ko kjuínchemáhyará tí janhan. <sup>9</sup>Tí sín tsíkitekaon Satanás la ntáchro sín kixin judío sín kjánchó jehya sín, xrich'ia sín la chr'éxin tsétuanhan sín ts'ejóxin toch'in sín chrínkí totará la ntá tsonohé sín kixin chaxín janhan tjuahará. <sup>10</sup>Ó kuítékáonrá tí nkehe kuétuanhanrá la jina tjejorá la mé xikaha janhan ts'ayakonhanrá tí ichrén nkehe tsonhanrá tíó tsi tí nkehe tsonhen kuènté chjasintajni kixin ó jehí xikaha tsonhen kaín chojni tjejó chjasintajni. <sup>11</sup>Janhan mé tjoka ts'inka. Méxra t'ayakonhénra tí nkehe chontará kixin ninkexro chrókuakitsjohará tí nkehe ó kjuachará. <sup>12</sup>Tí nkexro tsjacha sinchexiteyána la ts'óna sín columna kuènte ninko kuènte Dios kuèntana la nunca xitjahya sátsjixin sín ntiha. La janhan tsokjian ihnié tí Dios kuèntana tsjiko sín la ko tsokjian ihnié chjasén Dios kuèntana mé tí Jerusalén nixin tsixin nkajni tí tjen Dios kuèntana. Kjaxin tsokjian nina nixin tsochóna sín. <sup>13</sup>Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí ninko.”

### Tí tan k'uáyéhe tí sín chjasin Laodicea

<sup>14</sup>Tsokjian tí nkehe ts'áyéhe tí ángel t'ayakonhen tí ninko chjasin Laodicea: “Xikaha ichro tí nkexro chaxín ntoá

mé tí nkexro chrónka tí nkehe chaxín. Tí kjuachaxién ch'án kjuích'énaxín Dios kaín nkehe. <sup>15</sup> Ó ñona kaín nkehe tje-joch'erá. Ó ñona kixin jahará la ní jehya kinrá o sóará. Chrókóchaxín chrókókinrá o chrókóchaxín chrókósóará. <sup>16</sup> A ntá jahará la yásorá la jehya ikinrá la jehya sóará. A ntá ijie ir'va ó tsíkja tí jahará la ts'itjia. <sup>17</sup> Ntáchrórá kixin jahará rícorá la imá jina tjejórá la ko ninkehó t'itjáyanyha tí tjejórá, ichrorá. Kjánchó chontahyará kjuachéhe la ko jehya jina tjejórá la ko ñorá la ko ntakótánrá la ko tjóchínrá. <sup>18</sup> Méxra ijie ntaxraxinkáonrá janhan sjintakjihará tí nkehe oro náxrjón ts'ík'axrjéxín tja kixin ntá chaxín ts'ónará rico. La ko janhan sjintakjihará ika tjóá kixin ts'ínkayará ntá tsjínhanrá kjuatósuehe kixin í tjóchínhyará. La ko janhan tsjánjuan xroan kolirio tsjankí ikonrá kixin ts'ikonrá. <sup>19</sup> Janhan mé tsjéntuáha kaín tí sín tjuaha. Méxra íchá jina chrókjan sín chrókuinkáchónki sín Dios. <sup>20</sup> Tsjehérá janhan itjén ntója puerta, tjet'eya. A ntá jnkójín nkexro chrókuinhin tí tanná ntá chrókuakitjehe tí puerta ntá chrók'uíx-anhan ntoe sín la chrókjónekian sín la ko jehe sín la ko janhan. <sup>21</sup> A ntá tí sín chrókjuacha chrókjuinchexiteyàna la tsjánjuan kjuachaxín ts'ejókián sín tí tétóanxian ntiha la éxi xikaha janhan kjuacha ntá T'aná kjuanjón kjuachaxín tjékian ch'án tí tjen ch'án t'etóan ch'án ntiha. <sup>22</sup> Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí ninko."

#### Tí sín tjikosáyehe Dios nkaya nkajní

**4** Ntá chr'éxin janhan k'uíkuan ijnko puerta tjebrankehe nkaya nkajní. Ntá kuinhan ijnko itén nkexro éxi trompeta mé tí nkexro nixjana tí xrankixín, ntá jehe ch'án nixjana ch'án, ntáchro ch'án kixin:

—T'it'ótjen ntihi ntá tsjákoaha kaín nkehe tsonhen chr'éxin.

<sup>2</sup> Ntá tuénxín ikui tí kjuachaxin kuènte Nchakuen Dios k'uayáha ntá k'uíkuan tí trono itjen nkaya nkajní ntá ntiha tjet-jaxín ijnko nkexro. <sup>3</sup> A ntá tí ch'ín tjet-jaxín tí trono mé tjákiní tsjehe éxi ixro jaspe o ixro cornalina. A ntá jnkontatjen tí trono itjen ijnko konchécha tjákiní tsjehe éxi ijnko xro esmeralda. <sup>4</sup> A ntá kjaxín jnkontatjen tí trono k'uíkuan í so veinticuatro trono kjaxín tjejótxajín veinticuatro sín táda, iké sín la tjóá la ko tjejóya kja sín corona tsík'óna chica oro. <sup>5</sup> A ntá tí trono kuènte Dios la ntiha sít'axrjéxín tí sítjónkixín la ko sítjonta. A ntá nkayakon tí trono a kjaxín tjejóche yato xrohi la mé tí yato Nchakuen Dios. <sup>6</sup> A ntá nkayakon tí trono la kjaxín itjen ijnko ntayaon éxi xroxro tsjehe.

A ntá tí jnkosiné la ko jnkontatjen tí trono tjejó noó nkexro tjejóchón chóna nchónhya ikon nkayakon la ko nóton. <sup>7</sup> A ntá tí nkexro tjechón k'uíkuan saoxín mé éxi koxra tsjehe. A ntá tí nkexro yóxin tóyóhe éxi koxinta, a ntá tí nkexro níxin tsjehe éxi chojni. A ntá tí noóxin la éxi kotjuanhnko xritjaká tsjehe. <sup>8</sup> A ntá jnkójnko tí noó nkexro tjejóchón chóna injon kanenee sín la chóna nchónhya ikon nóton la ko nkaxenhen, la nchakotjin la ko tie títoehya sín ntáchro sín kixin:

Santo, santo, santo,  
Inchéni Dios, jaha chonta kaín  
kjuachaxin,  
jaha xráxin tjen la ko itjen ijie la ko jaha  
ts'inka ínaá.

<sup>9</sup> A ntá tí nkexro tjejóchón jnkoyaxón tió tjanchia sín kjuasáyé Dios la ko tjikosáyehe sín ch'án la ko nixjehe sín ch'án chjéhe sín kjuasáyé tí nkexro tjetjaxín tí trono mé tí nkexro tjechón jnkochrín. <sup>10</sup> La ntá tí veinticuatro tí sín táda tjejóxin toch'in sín nkayakon ch'án ntiha la tjikosáyehe sín

tí jehe ch'án kixin jehe ch'án tjechón jnkochrín la ko tjakjinjin sín corona tjoka sín tí tjen tí trono la ntáchro sín kixin:

<sup>11</sup> Ìnchéni Dios kuènteni, jaha la imá jína la t'ayéhé kjuasáya kixin tjikosáyahani tí jaha kixin tí kjuachaxin chonta;

kixin jaha kjuich'éna kaín nkehe síin kixin jaha kóxrjínhan xíkaha k'óna.

### Tí libro la ko tí Kolélo

**5** A ntá tí tja chjina tí nkexro tjetjaxin tí trono, k'uíkuan ijnko libro mé tsíkjin sín nkaxenhen la ko nóton la ko mé tsíkjèxin yato sello. <sup>2</sup> La k'uíkuan ijnko ángel chóna kjuachaxin ntá kjuanchankí ch'án itsen ntáchro ch'án kixin:

—¿Nkexro tí jína chrókjuacha chrókuakitjehe tí libro la ko chrókóchrítón tí sello chóna?

<sup>3</sup> La ninkexró ní nkajní o ní chjasintajni o ní chrínkí nonte tsjachahya tsakitjehe tí libro la ní komáhya sín. <sup>4</sup> A ntá janhan la imá tsjanka kixin naxa tónoxínhya ninkexró chrókjuacha chrókuakitjehe tí libro o chrókjuinchekuáxin tí libro o chrókomá nkehe tí ntáchro tí libro. <sup>5</sup> Ntá ijnko tí sín táda ntá nixjana ntáchro kixin:

—Tsjankahya, tsjehé ntihi tí Koxra k'uaxrjeníxin Judá la ko tsík'axrjeníxin rey David. Mé kjuacha la ó tsjacha tsakitjehe tí libro la ko tsóchrítón tí yato sello —ichro ch'án.

<sup>6</sup> A ntá jnkosiné tí trono la ko tí tjejó tí noó tí nkexro tjejóchón la ko jnkosiné tí tjejó tí sín táda ntaha mé k'uíkuan tjejín toté ijnko Kolélo tsjehe éxí tsík'óyán sín mé chóna yato ntèè la ko yato ikon. A ntá tí kon mé tí yato Nchakuen Dios la táha mé tsík'ítuenhen t'ayakonhen kuenté chjasintajni. <sup>7</sup> A ntá tí Kolélo a kuákja tí libro itjen tja chjina tí nkexro tjetjaxin tí trono. <sup>8</sup> A ntá tió k'uáyéhe ch'án tí libro la ntá tí noó sín tjejóchón

la ko tí veinticuatro tí sín táda k'uéjóxin toch'in sín nkayakon tí Kolélo. A ntá kaín tí jehe sín chóna sín ison arpa la ko xraá sín ihnti tsík'óna chica oro tsíkaón chjincó. Tíha mé oración nixjehe Dios kaín tí sín tsíkjinchetjóá ch'án. <sup>9</sup> Itsje sín nkehe nixin ntáchro kixin:

Jaha mé ijnko nkexro jína kjuacha kuákja tí libro la ko kóchrítuan tí sello;

kixin tsík'óyán sín tí jaha la ko tí ijniá k'uénaxian tí jeheni ts'áyéhe Dios, mé ts'áyéhe ch'án kenxín chojni kjónté nkexrí tsjehe sín la ko kjónté nkexrí nixja sín la ko chojni kénxín chjasin la ko kaín nación.

<sup>10</sup> Jaha tsíkjich'énani reyes la ko nchat'á sich'eheni xra Dios kuènteni, la ko jaha tsíkjánjuan kjuachaxin ts'etoanni chjasintajni.

Mé xíkaha ichro sín.

<sup>11</sup> Ntá tuénxín k'uíkuan la ko kuínhan itén nchónhya sín ángel tjejó sín jnkontatjen tí trono la ko tí sín tjejóchón la ko tí veinticuatro tí sín táda. Nchónhya millones la ko millones tí jehe sín. <sup>12</sup> Itsen nixja sín ntáchro sín kixin:

Tí Kolélo tsík'óyán sín, tíha mé kjuacha k'uáyéhe kjuachaxin ts'etoan la ko k'uáyéhe tí nkehe tjeje kuènte Dios,

la ko tí kjuaxrexinkaon jína la ko kjuachaxin sich'e xra

la ko mé xíkaha tjikosáyeheni ch'án. <sup>13</sup> Kjaxin kuínhan kixin kaín nkehe kjuich'éna Dios síin nkajní la ko chjasintajni la ko tí nkehe síin chrínkí nonte la ko kaín nkehe síin ntayaon la kaín tíha mé ntáchro kixin:

Chjeheni kjuasáya tí nkexro tjetjaxin tí trono la ko tí Kolélo kixin chóna kjuachaxin jnkochrín.

<sup>14</sup> A ntá tí noó sín tjejóchón ntáchro sín kixin:

—Xíkaha tsonhen. Amén.

La ko tí veinticuatro tí sín táda k'uejoxin toch'in sín la chjéhe sín kjuasáyé tí nkexro tjechón jnkochrín.

### Tí yato sello

**6** **A** ntá k'uúkuan kixin tí Kolélo kóchríton tí xránkixixín tí yato sello ntá kuinhan ijnko tí noó tí noó tí sín tjejóchón nixja ch'án éxi kjóna, la ntáchro ch'án kixin:

—Xrákiá tsjehé.

<sup>2</sup> Ntá k'uúkuan ijnko kokate tjóá. **A** ntá tí nkexro tjejen tí kokate chóna ch'án ijnko arco tí tja ch'án la tsík'áyéhe ch'án ijnko corona. Jehe ch'án mé kjuacha ch'án la naxa xikjacha ch'án inaá.

<sup>3</sup> **A** ntá tí Kolélo kóchríton tí yóxin sello ntá kuinhan tí nkexro yóxin tjechón ntáchro kixin: —Xrákiá tsjehé.

<sup>4</sup> Ntá sákjuí í jnko kokate kjátse. **A** ntá tí ch'in tjejen k'uáyéhe ch'án kjuachaxin tsjakjiin tí kjuaxróxin síin chjasintajni kixin ntá chojni mé ts'óyan kichó sín kixin jehe ch'án mé tsík'áyéhe ch'án ijnko espada ijie.

<sup>5</sup> **A** ntá tí Kolélo kóchríton tí níxin sello la ntá kuinhan nixja tí níxin nkexro tjechón ntáchro kixin:

—Xrákiá tsjehé.

Ntá k'uúkuan ijnko kokate tié. **A** ntá tí nkexro tjejen tí kokate chóna itja ch'án ijnko báscula. <sup>6</sup> La ntá kuinhan itén ijnko nkexro jnkosiné tí tjejó tí noó sín tjejóchón mé ntáchro kixin:

—Jehó ijnko kilo trigo ijnko chichaon denario la ko iní kilo cebada ijnko chichaon denario. Kjánchó chrókuinchek'itjáyanhya tí aceite la ko tí vino. (Tíha mé t'axrjexín tsokjinta.)

<sup>7</sup> **A** ntá tí Kolélo kóchríton tí noóxin sello ntá kuinhan tí noóxin tí nkexro tjechón ntáchro kixin:

—Xrákiá tsjehé.

<sup>8</sup> Ntá k'uúkuan ijnko kokate sine. **A** ntá tí ch'in tjejen va a mé it'in ch'án

Muerte. **A** ntá nóton tí jehe ch'án la ikui nkehe tóyóhe tí tjejó tí sín tsík'en. Jehe ch'án k'uáyéhe kjuachaxin ts'etqan ch'án noóxin parte chjasintajni kixin ntá ts'óyan kichó sín la tsokjinta la ko ts'enixín sín ichin la ko kaín ko jiehe síin chjasintajni mé tsjáva va.

<sup>9</sup> **A** ntá tí Kolélo kóchríton tí n'óxin sello ntá k'uúkuan chrínkí tí altar tí asén tí sín tsík'enixín tí tan kuente Dios tsíchrónka sín. <sup>10</sup> Ntáchro sín itsen kixin:

—Jaha mé Ìnchéni tjóá jína la jaha mé sinchexiteyá tí nkehe tsintáchrúa, ¿la nkesá sinchekitoexián ijie tí sín síin chjasintajni tsík'óyan tí jeheni? —ichro sín.

<sup>11</sup> **A** ntá tí sín a mé k'uáyéhe sín iké sín tjóá ntá k'uútuennen sín naxa ts'ok'éhe sín í so yaon tsoxetajia tí número tí kichó sín ch'ehe xra Cristo naxa ts'enixín sín éxi k'uén tí jehe sín.

<sup>12</sup> **A** ntá tí Kolélo kóchríton tí injonxin sello ntá xrinahya imá kuínkí nonte. **A** ntá tí yaon la kótié éxi ika tjiko chojni tsík'en. **A** ntá nitjó k'óna kjátse éxi jni. <sup>13</sup> **A** ntá konotsé sít'ánótjenxin nkajni sítjitsínka nonte éxi yóhe tí inta t'óna to higo la síxènjín tí to yoa tió tsjixraya tí nta kixin tí imá fuerte chjéhe xrinto. <sup>14</sup> **A** ntá nkajni k'uitjáyan éxi ijnko xroon tsíxrèya. Ntá kaín jna la ko tí nonte ntsínsí síin jnkosiné ntayaon sákjuí ókjé. <sup>15</sup> **A** ntá kaín tí sín reyes síin chjasintajni la kjaxin tí sín t'etqan la ko chojni rico la ko comandante la ko tí sín chóna kjuachaxin la ko kaín tí sín ch'exón xra la ko tí chojni náhi mé k'uúixenhen sín tjo síin nteje ts'ejómáxin sín. <sup>16</sup> Ntáche sín tí jna la ko tí tjo kixin:

—Xrákiá xrátja tí jeheni nchemáni kixin chrók'uikonhyani tí nkexro t'etqan tjetjaxin trono la ko chrókjuasótehyani tí kjuachrakon jie tsjanjon tí Kolélo.

<sup>17</sup> Kixin ó kui tí yaon imá jie kuente kjuachrakon la, ¿xá nkexro chrókjuacha chrók'uejó ntiha?



### Tí sín israelita chón̄ta sello

**7** **A** ntá chr'éx̄in k'uíkuān noó sín ángel tjejóxin toté sín la jnkojnko sín tjejó sín tí chrínta chjasintajni chón̄tehe sín tí noó xr̄nto ḱixin tsochjéhya xr̄nto chjini chrítaón chjasintajni la ko ní chrítaón ntayaon la ko nijnko tí nta yoa. <sup>2</sup>Kj̄axin k'uíkuān í jnko ángel kjuix̄in nó tjitox̄in yaon la chón̄ta sello kuènte Dios tjechón. Ntá tí ángel mé k'uíyeh̄e ch'án itsen tí noó ángel tsík'áyeh̄e kjuachaxin sincheníhi nonte la ko ntayaon. <sup>3</sup>Ntáchro ch'án ḱixin:

—Náhi, s̄incheníehya nonte la ko ntayaon la ko kj̄axin tí nta la náhi tí nax̄a tsíkahya sello totjen tí sín ch'ehe x̄ra Dios kuènteni.

<sup>4</sup>Kuñhan tí número tí sín tsíka sello la me ciento cuarenta y cuatro mil kain tí sín tsík'axrjeníxin tí sín israelita. <sup>5</sup>Teyó mil tí sín tsíka sello tsík'axrjeníxin tí Judá la ko teyó mil tí sín tsíka sello tsík'axrjeníxin Rubén la ko teyó mil tí sín tsíka sello tsík'axrjeníxin sín Gad <sup>6</sup>la ko teyó mil tí sín tsíka sello tsík'axrjeníxin sín Aser, la ko teyó mil tí sín tsíka sello tsík'axrjeníxin sín Neftalí la ko teyó mil tí sín tsíka sello tsík'axrjeníxin sín Manasés <sup>7</sup>la ko teyó mil tí sín tsíka sello tsík'axrjeníxin sín Simeón la ko teyó mil tí sín tsíka sello tsík'axrjeníxin sín Leví la ko teyó mil tí sín tsíka sello tsík'axrjeníxin sín Isacar <sup>8</sup>la ko teyó mil tí sín tsíka sello tsík'axrjeníxin sín Zabulón la ko teyó mil tí sín tsíka sello tsík'axrjeníxin José la ko teyó mil tí sín tsíka sello tsík'axrjeníxin sín Benjamín.

### Siín nchón̄hya chojni chón̄ta ka tjóá

<sup>9</sup>Ntá kjuix̄in tíha ntá k'uíkuān nchón̄hya chojni kaín xín nación la ko kaín xín nkexr̄i tsjehe sín la ko kaín xín nkìva la ko kaín xín chjasin mé tjejóxin toté sín nkayakon tí trono la ko nkayakon tí Kolélo. Nchón̄hya sín la kohya ninkexr̄o

tsjacha ts'ekin nkekjaín tí jehe sín la tjejóya sín ka tjóá la tjejóya kajni tja sín. <sup>10</sup>Kaín sín itsen nixja sín ntáchro sín ḱixin:

Dios kuènteni mé kjuínchekaáni.

Jehe ch'án mé tjetj̄axin tí trono tí tjen tí Kolélo kjuínchekaáni.

<sup>11</sup>Kaín tí sín ángel tjejóxin toté sín jnkontatjen tí trono la ko jnkontatjen tí sín táda la ko tí noó sín tjejóchón la ntá k'uejóxin toch'in sín la k'uísen sín hasta káxin ikja sín nonte nkayakon tí trono la tjanchehe sín kjuasáye Dios. <sup>12</sup>Ntáchro sín ḱixin:

Amén. Kjuíncheyaonni Dios la tsochjéheni Dios kjuasáya ḱixin kaín tí kjuaxrexinkaon jína tjanjon ch'án la ko tjancheheni ch'án kjuasáya.

Tsjikosáyeheheni tí kjuachaxin kuènte ch'án ḱixin tjink̄itsani ch'án jnkochr̄íxin. Amén.

<sup>13</sup>**A** ntá ijnko tí sín táda kjuanchankina, ntáchro ḱixin:

—**A** ntá tí sín tjejóya ika tjóá la, ¿xá nkexro tíha? la ko ¿xá nketí tsík̄j̄ix̄in sín?

<sup>14</sup>Ntá janhan ntáxr̄jan ḱixin:

—Ínchéni, jaha ó noha. Ntá jehe ch'án ntáchro ch'án ḱixin:

—Tí sín i tsík̄j̄ix̄in sín tí kjuaxróxinhya k'uék'ejó sín, la tí sín a mé tsíjen sín iké sín la ko tsíkótjuáxin ijn̄ié tí Kolélo. <sup>15</sup>Méx̄ra x̄ikaha ntá ijie tjejó sín nkayakon tí trono kuènte Dios la tjejóch'ehe sín x̄ra Dios nch̄akotjin la ko tie tí nkaxenhen n̄jnko kuènte ch'án. **A** ntá tí nkexro tjetj̄axin chrítaón tí trono mé t'ayakonhen ch'án sín. <sup>16</sup>**A** ntá tí sín a mé ts'enixnhya sín kj̄inta la ko ts'enixnhya sín ìnt̄a la ko tsochj̄ánxinhya sín yaon la ko ni sóa kohya nkehe sich'ehe sín. <sup>17</sup>Ḱixin tí Kolélo tjen jnk̄osiné tí trono mé t'ayakonhen ch'án tí jehe sín éx̄i iko kuènte ch'án la ko s̄átjiko ch'án tí tj̄iá nt̄a tjanjon kjuachón la Dios mé sinchexámá kaín tí nt̄akon tí jehe sín.

### Tí yatoxin sello la ko tí ihnti oro

**8** **A** ntá tí Kolélo kóchríton tí yatoxin sello kuènte tí libro la ntá kohya ninkehó ruido nkajní chjina it'ò hora. <sup>2</sup>Ntá tuénxín k'uíkuan yato ángel tjejóxin toté nkayakon Dios la jnkoinko sín k'uáyéhe sín jnkoinko trompeta. <sup>3</sup>Ntá chr'éxin ikui í jnko ángel xraá ihnti tsík'óna chica oro la kjuák'exin toté nkayakon tí altar. K'uáyéhe ch'án nchónhaya chjincò tsjak'e ch'án kixin sátsjiko tí oración kuènte kaín tí sín tsikjinchetjóá Dios kixin tsjak'e chrítaón tí altar oro nkayakon tí trono. <sup>4</sup>**A** ntá tí ihnti kuènte chjincò chrínxín tja tí ch'ín ángel tí tjen Dios la ko kjaxin tí oración kuènte chojni tsikjinchetjóá Dios. <sup>5</sup>**A** ntá tí ch'ín ángel kuákja ch'án tí ihnti kjuínchekaón ch'án xrinta kuènte xrohi kuènte tí altar la ik'ue ch'án chjasintajni. La ntá kjónta la ko nchónhaya ruido la ko sítjónkixin la ko kuínki nonte.

### Tí trompeta

<sup>6</sup>**A** ntá tí yato ángel mé chóna sín jnkoinko trompeta ó yaxínhin sín kixin ts'ánoa sín.

<sup>7</sup>**A** ntá tí ángel saoxín k'uánoa trompeta ntá k'uáníá toni la ko xrohi tsínkíkjan jni mé xikaha ikui chrítaón chjasintajni. **A** ntá iche nixin parte nonte la ko nixin parte tí nta la ko kaín tí kayoa síin.

<sup>8</sup>**A** ntá tí yóxin ángel k'uánoa trompeta la ijnko nkehe yóhe tsjehe éxi ijnko jnā jíe tjeche la sákjuí kjuíankí ntayaon la ntá nixin parte tí ntayaon la k'óna jni. <sup>9</sup>**A** ntá tí nixin parte kaín tí nkehe síin tí ntayaon la ik'uén la ko nixin parte kaín tí ntabárcò la xíka.

<sup>10</sup>**A** ntá tí nixin ángel k'uánoa trompeta la ntá xrinahya k'uánótjen ijnko konotsé jíe k'uánótjexin nkajní mé tjeche éxi ijnko xrohi jíe. K'uánótjen chrítaón nixin parte ntarío la ko tí

sít'axrje ntā. <sup>11</sup>Tí konotsé mé it'in Itsjá la tsíkjiankí nixin parte tí ntā ntá kótsjá tí ntā la nchónhaya chojni ik'uén kixin tí ntā xikaha tsíkótsjá.

<sup>12</sup>**A** ntá tí noóxin ángel k'uánoa trompeta la kjuíncheníhi ijnko nixin parte tí yaon la ko nixin parte tí nitjó la ko nixin parte tí konotsé. Méxra tí nixin parte kuítohe sítié la í kohya t'inkaséyan tí nixin parte tí nchakotjin la ko tí tie.

<sup>13</sup>Ntá tuénxín k'uíkuan la ko kuínhan ijnko ángel tjetjaká jnkosiné nkajní t'èya ch'án itsen, ntáchro ch'án kixin:

—Nòda tí sín tjejó chjasintajni tí tson-táchro tí trompeta ts'ánoa tí iní ángel ínaá.

**9** **A** ntá tí n'óxin ángel k'uánoa trompeta la k'uíkuan ijnko konotsé tsík'ánótjexin nkajní chrítaón chjasintajni ntá k'uáyéhe tí llave kuènte tí tòye ninka. <sup>2</sup>**A** ntá tuénxín xitjehe tí tòye ninka ntá ntiha chríinxín nchónhaya ihnti kuènte tja ntá tí t'inkaséyanxín yaon la ko tí xrintò k'uíxin tié kixin tí ihnti kuènte tí tòye. <sup>3</sup>**A** ntá tí ihnti mé k'uaxrxjén kochjoa xritjaká chrítaón chjasintajni. **A** ntá tí kochjoa k'uáyéhe kjuachaxin éxi tí chóna konchija síin chjasintajni. <sup>4</sup>K'uítuenhen va kixin sincheníehya va tí kayoa síin chjasintajni la ko ninkehó nkehe yoa la ko ninkehó ntayoa. Jehó chojni chónahya sello kuènte Dios tí totjen mé sincheníhi va. <sup>5</sup>Kjánchó k'uáyèhya va kjuachaxin ts'óyan chojni. Jehó sinchekjoté va chojni hasta in'ó nitjó la tí kjuatjoté mé yóhe kjuatjoté éxi chojni tsíkjinéhe konchija. <sup>6</sup>**A** ntá tí yaon a tsotjinkaon chojni chrók'uen sín la ntá xitjahya its'en sín. Kjónté tjinkaon sín chrók'uen sín la tí muerte sátsíkji ókjé.

<sup>7</sup>**A** ntá tí kochjoá éxi kokatè tsjehe, listo tjen sátsjikjanjon va. **A** ntá tí ikja va itjen nkehe tóyóhe ijnko corona tsík'óna oro la ko tí kàré la tóyóhe éxi kàré cho-

jni. <sup>8</sup> A ntá tí kaxrē va tsjehe tóyóhé éxí kaxihí chojni chjin, a ntá tí neno va la tóyóhé neno koxra. <sup>9</sup> A ntá tí cuérpóé la tjeckjanjin nkehe tsík'óna chica kixin kohya nkehe tsonhen va. A ntá ruido kuènte kanēne la éxí nchónhya carro tinkánkákjen kokatē tió xritinká tí síin kjuanfínkaon. <sup>10</sup> A ntá tí ntané la mé tsjiate chojni la éxí ntané konchia, la tíha mé tsochóna kjuachaxin sincheníhi chojni hasta in'ó nitjó. <sup>11</sup> A ntá tí kochjoá mé chóna ijnko nkexro t'etōan mé ijnko ángel kuènte tí tōye ninka. Tí ángel mé nkiva hebreo mé it'in Abadón la nkiva griego la mé Apolión mé t'axrjexín kixin táha mé sinchek'itjáyān nkehe.

<sup>12</sup> Mé xikaha kónhen tí kjuachrakon xrankixixín. A ntá naxa t'itjáyān yaá inaá.

<sup>13</sup> A ntá tí injonxin ángel k'uánao trompeta la kuinhan ijnko itén nkexro k'uaxrjexín tí tjejó tí noó ntéé kuènte tí altar oro tí tjen Dios. <sup>14</sup> A ntá tí itén tí nkexro ntáche tí injonxin ángel chóna trompeta kixin:

—Tjasintankehé tí noó ángel kuènte tí jinahya tjejóchroé chjinaxón tí ntarío jie it'in Eufates.

<sup>15</sup> Ntá xikaha xintankehe tí noó sín ángel kixin ts'óyán sín tí nixin parte chojni. Mé xikaha yaxínhin sín sátsji sín tí hora la tí yaon la tí nitjó la tí nánó. <sup>16</sup> Ntá kuinhan tí número tí soldado la ko tí kokatē la doscientos millones.

<sup>17</sup> Mé xikaha xrinahya k'uúkuān tí kokatē. A ntá tí sín tjejókjen kokatē la tí ntakuin sín chóna nkehe tsík'óna chica kjátse la azul la sine. A ntá tí kokatē la ikja la éxí kja koxra la tí ir'va la k'uaxrjexín xrohi la ko ihnchi la ko azufre. <sup>18</sup> A ntá nixin parte chojni tsík'enxín tí iní clase tí chin tsík'axrjexín ir'va kokatē mé xrohi la ihnchi la azufre. <sup>19</sup> Tí kjuachaxin chóna tí kokatē la k'uaxrjexín ir'va va la ko tí ntané va. A ntá ntané la éxí konche tsjehe la tí kja va mé sincheníhi chojni.

<sup>20</sup> A ntá tí í so chojni kuítóhe k'uénx-inhya tí chin a la kjónté kjuinkíhya sín tí nkehe tjenkayáxin sín la kuítóehya sín tinkáchónki sín nchakuen jinahya la ko tí nkehe tsíkjanoya chica oro la ko chica plata la ko chica bronce la ko ixro la ko inta, mé tí nkehe t'ikonhya la ko tienhya la ko tjihya. <sup>21</sup> La kjónté xikaha la kuítóehya sín tí nkehe jinahya ch'e la ko tí chrók'óyán kichó la ko tí nchekjiko kichó la ko tí chóna sín chojni chjin ókjé la ko tí tjinkaon sín chrókueé.

### Ijnko ángel la ko tí librito ntsí

**10** Ntá k'uúkuān í jnko ángel imá chonta kjuachaxin k'uúnkajinx-in nkajní tjenkakjan ch'án tjui la ko ijnko konchecha chrítaón tí ikja ch'án. A ntá tí kàré ch'án imá tjákini tsjehe éxí yaon, a ntá tí toté la éxí xrohi síchr'ákjen. <sup>2</sup> Tjexraá ch'án ijnko libro ntsí tjexrankehe, la ntá toté ch'án chjina la chrítaón ntayaon la ntá toté ch'án kjon la chrítaón nche. <sup>3</sup> Ntá xrinahya k'uèya ch'án itsen éxí ijnko koxra tsjánka va tí tónínkaon va mé xikaha k'uèya la yato kjóna kjuatéyá tí itén ch'án. <sup>4</sup> Ntá kjuixin ntáchro tí yato kjóna la chrókjian ntá kuinhan ijnko itén nkexro nkaya nkajní ntáchro kixin:

—Chróchronkahya tí nkehe ntáchro tí yato kjóna la ko ni chrókjinhya tíha.

<sup>5</sup> Ntá tuénxín tí ángel k'uúkuān ijnko toté tjeckjen ntayaon la ijnko toté tjeckjen nche ntá kjuaya tja chjina nó nkajní. <sup>6</sup> Ntá kjuasin ch'án testigo tí nkexro tjen jnkochrín mé tí nkexro a mé kjuích'éna nkajní la ko chjasintajni la ko ntayaon la ko kaín xín nkehe síin la ntáchro ch'án kixin:

—Í séhya má naxa tsoxrjen <sup>7</sup> ntá tsjixraká tí yaon tí yatōxin ángel ts'ánao trompeta ntá tsoxiteyá tí nkehe jehó Dios nohe kixin xikaha tsíchénka ch'án tí sín k'uékjich'ehe ch'án xra ósé k'uéchrónka sín itén ch'án.

<sup>8</sup> A ntá tí itén nkexro kuinhan k'uaxr-jexín nkaya nkajní ntá xínixjana inaá ntáchro kixin:

—Sátjia tákjá tí libro ntsí tjexrankehe tjexraá tí ángel itjen toté ch'án chrítaón ntayaon la ko chrítaón nche.

<sup>9</sup> Ntá sákjuia kjuáncháha tí ángel tí libro ntsí ntá jehe ch'án ntáchro ch'án kixin:

—Tákjá la inte. A ntá tí ir'va la tsoxé éxí tsjen kjánchó tí tsaa la tsotsjá.

<sup>10</sup> Ntá kuákjaá tí libro ntsí tjexraá tí ángel ntá kjonè. A ntá ir'va kóxé éxí tsjen ntá chr'éxin la kótsjá nkaya tsena. <sup>11</sup> Ntá tuénxín k'uetuanna ch'án kixin:

—Inaá tsochrónkaxián itén Dios tsin-hin nchónhya chjasin la nación la ko nkiva la ko tsinhin tí sín reyes.

### Iyó testigo

**11** A ntá chjina ch'án ijnko ntavara éxí tji tsjehe tsjáchróaxián ntá ntáchro ch'án kixin:

—T'àyá tjáchróa nkaxenhen ninko kuènte Dios la ko tí altar la tékia nkek-jain nkexro tjejó ntiha tinkáchónki Dios. <sup>2</sup> Kjánchó tí ntasin itjen ntója ninko la tjáchróahya kixin táha ó tsík'áyéhe tí sín tsíkjinín kjín la ntá jehe sín tsjikosáye-hya sín tí chjasin tjóá Jerusalén ijnko cuarenta y dos nitjó. <sup>3</sup> A ntá mé janhan tsochr'an iyó testigo kuèntana tsonixjaj-inna mil doscientos sesenta yaon. Tí iké sín la ika tié ts'ejóya sín.

<sup>4</sup> Tí yaá testigo i mé iyó nta olivo la ko iyó candelero tjejó tí tjen ìnchéni kuènte chjasintajni. <sup>5</sup> A ntá tí jnkojín sín tjinkaon sich'ehe sín daño la jehe sín la xrohi ts'axrjexín ir'va sín la tsoche kaín tí sín nínkakonhen sín la mé xikaha its'en kaín tí sín tjinkaon sich'ehe sín daño tí jehe sín. <sup>6</sup> A ntá tí testigo i chóna kjuachaxin ts'ikjehe nkaya nkajní kixin í ts'aniáhya chrin tí tsonixja sín kuènte Dios la ko kjaxin chóna sín kjuachaxin

tsontáche sín tí ntá kixin ts'óna jni la ko sinchekjasótexín sín chojni chjasintajni nchónhya clase chin nchónhya veces éxí tí tjinkaon sín. <sup>7</sup> A ntá tí kjuixinhin sín tí xra ntá tí ko jiehe ts'axrjexín tí tóye njnka mé tsjankixin tsjanjonko tí jehe sín ntá tsjacha va ts'óyan va tí jehe sín. <sup>8</sup> A ntá tí cuérpóé sín tsitohe sítsínka tí calle kuènte chjasin jie tí tsíkjak'enkani sín ìnchéni ntacruz mé tí chjasin mé kjaxin nchek'in sín Sodoma la ko Egipto. <sup>9</sup> A ntá iní yaon ko t'ò la kaín chojni its-jé chjasin la ko kaín nkexrí tsjehe sín la ko nchónhya nkiva la ko nchónhya nación ts'ikon sín tí chojni tsík'en tje-jótsínka sín ntiha la ko tsjanjonhya sín kjuachaxin tsoxravá tí chojni tsík'en a. <sup>10</sup> A ntá tí sín tjejó chjasintajni tsóchéhe sín kixin xikaha tsík'en tí sín a la antsí má tsóchéhe sín la tsochr'án sín nchón-hya nkehe nchekitonhen kichó sín kixin xikaha ik'uén tí yaá sín k'uéchrónka itén Dios kixin jehe sín kjuaxróxinhya k'uék'ixin sín tí chjasintajni tí k'uék'ejó tí sín a. <sup>11</sup> A ntá chr'éxin ó k'uátsínka iní yaon ko t'ò la ntá Dios kjuínchexechón tí iyó tí sín a inaá la k'uàya sín inaá la ntá kaín chojni k'uíkon la imá chrakon sín. <sup>12</sup> Ntá tuénxín tí iyó sín testigo kuínhin sín ijnko nkexro nixja itsen nkaya nkajní ntáchro kixin:

—Chriyan xrákiá antsí ntihi.

Ntá chríinxín sín nkajní ijnko tjuí. A ntá kaín tí sín nínkakonhen sín la k'uíkon sín kixin xikaha kónhen sákjuí tí iyó sín a. <sup>13</sup> Ntá tuénxín imá kuínki nonte la ntá ijnko ite parte chjasin ntiha la k'uítjáyan la yato mil chojni tsík'en kixin tí kuínki nonte. A ntá kaín tí sín xéhe imá chrakon sín la kjuankixin sín tinkáchónki sín Dios la tjanchia sín kjuasáya.

<sup>14</sup> Mé xikaha kónhen tí yóxin kjuaxikaon la ntá tuénxín itsi tí nixin kjuachrakon inaá.

### Tí yatoxin trompeta

<sup>15</sup> A ntá tí yatoxin ángel k'uánoa trompeta ntá kuínhin sín ijnko tan nkajní itsen ntáchro kixin:

A ntá tí sín k'uáyéhe kjuachaxin kuènte chjasintajni la ó kjaxin nchexiteyéhe sín

Ìnchéni Jesucristo

kixin jehe Jesucristo mé ts'etoan ch'án jnkochríxín.

<sup>16</sup> A ntá tí venticuatro tí sín táda tje-jótjaxin sín trono nkayakon Dios la mé k'uísén sín hasta káxin ikja sín nonte la tjanchehe sín kjuasáya Dios. <sup>17</sup> Ntáchro sín kixin:

Tjáhani kjuasáya jaha Ìnchéni Dios imá chonta kjuachaxin.

Jaha itjen la ko xráxín tjen la ko jaha ts'inka ínaá.

Kixin jaha k'uayéhe kjuachaxin jíé kixin xráxín tétōan.

<sup>18</sup> A ntá kaín tí nación kónínkaon, a ntá ó kui tí yaon jaha sinchekjasóte sín la ko kjaxin jaha sinchekitoexián ijíé tí sín tsík'en

la ko tsjénkehé tí sín kjuít'aha xra chrónkaxín itán

la ko tí sín ó kjuínchetjóá la ko tí sín kjuikosáyehe tí ihniá,

mé tí chojni nteto la ko tí sín chánjan ntsíntsí.

Jaha tjoka sinchek'itjáyan tí sín chrókuinçek'itjáyan chjasintajni.

<sup>19</sup> A ntá xitjehe tí nínkōe Dios tjen nkaya nkajní, a tí nkaxenhen kónoxín tí caja tjínká tí nkehe tsík'etoan Dios. A ntá sítjónkixin la ko nchónhya ruido sítjonta la ko kuínkí nonte la ko imá tsanká k'uániá toni.

### Tí chojni chjin la ko tí dragón

**12** A ntá kónoxín nkajní ijnko kjuaxroan jíé mé ijnko chojni chjin iké tjákini éxí yaon tsjehe la chrínkí toté tjan itjen nitjó. A ntá tí

kja tjan tjenkáya ijnko corona chóna teyó konotsé. <sup>2</sup> A ntá tí chojni chjin a mé tjejá tjan la t'èya tjan kixin tjeté tjan kixin sinchekokjíhi tjan xjeen tjan.

<sup>3</sup> Kjaxin kónoxín í jnko kjuaxroan nkajní mé ijnko dragón kjátse chóna yato kja la ite ntèe la jnkojnko corona jnkojnko kja. [Tí dragón mé ijnko kots'aja jíé.]

<sup>4</sup> Tí ntané mé nkánkákjen níxin parte konotsé kuènte nkajní la ik'ue chrítaón chjasintajni. A ntá tí dragón kjuák'e chók'èxin tí tjen tí chojni chjin mero tsokjíhi xjeen kixin tjínkaon tjoka chrókjóne tí xjan tsokjíhi.

<sup>5</sup> A ntá tí xjan kjuínchekokjíhi tjan mé xjan ntoa kixin jehe ch'án mé ts'etueñhen ch'án kaín nación la tsochóna ch'án ijnko vara chica ts'etoanxín ch'án. Ntá tí xjeen tjan la mé Dios sákjuiko tí tjen ch'án t'etoan ch'án. <sup>6</sup> A ntá tí chojni chjin la kuinká tjan sákjuí tjan nteje kixin tsíkjincheyóxin Dios nketí sátsji tjan kixin ntaha tsoxranjon nkehe sine tjan mil dos cientos sesenta yaon.

<sup>7</sup> Ntá chr'éxin xrínahya k'uúxin kjuanínkaon jíé nkajní la mé tí arcángel Miguel la ko tí í so ángel xriko ch'án mé kjuánjonko sín tí dragón, la tí dragón la ko tí ángel kuènte mé kjuánjon sín.

<sup>8</sup> Kjánchó kjuachahya tí dragón la kohya lugar kuènte nkaya nkajní.

<sup>9</sup> Mé xíkaha kuakitsjexín sín tí dragón nkajní. Jehe mé tí konche ósé ikjí mé nchek'in sín diablo la ko Satanás. Jehe mé k'uékjich'iyehé tí chojni kuenté chjasintajni. Jehe la ko tí sín ángel kuènte k'uaxrjexín ntiha la kjuitsínka chjasintajni.

<sup>10</sup> Ntá kuínhan itén ijnko nkexro nkaya nkajní itsen nixja ntáchro kixin:

—Ó kui ti tsaáxinni tí kjuachaxién tí Dios kuènténi la ko tí kjuachaxin t'etoan Cristo kixin ó k'uaxrjexín nkajní tí nkexro t'eka jie tí kichó ni mé kjuanchia jie nchakotjin la ko tie nkayakon Dios kuènténi. <sup>11</sup> Tí sín kichó ni la kjuacha

sín kuaáxin sín kixin tí ijnié tí Kolélo k'uítji la ko kixin jehe sín chrónkaxín sín tí tan tsík'áyéhe sín la chrakonhya sín kjónté chrók'uénxín sín. <sup>12</sup> A ntá jie la tócháhará kaín rá tjejórá nkajní. Ntá nòda tí sín tjejó chjasintajni la ko ntayaon kixin k'uínkajin tí ch'ín diablo la imá nínkaon ch'án kixin ó nohe ch'án kixin í kánhyó tsé tsjak'e ch'án.

<sup>13</sup> Ntá tí ch'ín dragón ó nohe kixin k'uánótjenxin nkajní ikui chjasintajni ntá sákjuúchréhe tí chojni chjin chónata tí xjan ntoa kixin chrókjuinçek'tijáyan tjan. <sup>14</sup> Kjánchó tí chojni chjin k'uáyéhe yaá kanéne kuènte kotjuanhno ijié kixin jína tsjaká tjan sátsji nteje kixin ntá ikjín tsitohe tí konche. Sátsji tjan kixin ntiha tsoxranjon nkehe sine tjan iní nánó ko t'ò. <sup>15</sup> A ntá tí konche mé k'uaxrjexín ntá ir'va kixin ts'óna ijnko ntarío kixin tjinkaon va chrók'uátjoáko tí tjan a tí ntá a. <sup>16</sup> A ntá tí nonte kjuínkítsa tí tjan a kixin xitjehe ir'va nonte la kaín tí ntá k'uaxrjexín ir'va tí konche la ntahó sákjuú k'uúxnenhen. <sup>17</sup> A ntá tí dragón la imá kónínkakonhen tí tjan a ná imá kónínkaon kjuánjonko tí í so sín naxa kjéhya tí tjan a kixin naxa titekaon sín tí nkehe tsík'etòan Dios la naxa tinkáchónki sín tí nkehe tsíchrónka Jesucristo.

### Tí yaá bestia

**13** Tí kjuak'é chrínta ntayaon ntá ntaha k'uúkuan chrínxín ijnko bestia chónata yato kja la ko ite ntèe chojni t'ántaxínhin Dios. <sup>2</sup> Tí bestia k'uúkuan mé tóyóhe kotigre la chónata toté éxí toté ko oso la ko tí ir'va la éxí ir'va koxra. Tí dragón kjuanjón kjuachaxin imá ts'etòan tí bestia a. <sup>3</sup> A ntá ijnko kja tí bestia chónata ijnko tsíchrít'ò jie chónata chrók'uénxín ntá tsíkitohe jína ntá kuenté chjasintajni la chrakon chojni ntá chréhe sín tí bestia. <sup>4</sup> Kjuikosáyehe sín tí dragón kixin jehe kjuanjón tí

kjuachaxin k'uáyéhe tí bestia ntá kjaxin kjuikosáyehe sín tí bestia la ntáchro sín kixin:

—¿Xá nkexro chrókóyóhe tí bestia la xá nkexro chrókjuacha chrókjuanjónko tí jehe?

<sup>5</sup> Kjaxin tí bestia k'uáyéhe kjuachaxin tsontáchro kixin chónata kjuachaxin má la ts'ántaxínhin Dios la tsochónata kjuachaxin cuarenta y dos nitjó. <sup>6</sup> Ntá mé xíkaha kjuích'e k'uántaxínhin Dios la ko k'uántaxínhin ihnié Dios la ko k'uántaxínhin tí nínko tjen nkaya nkajní la ko kaín tí sín tjejó ntiha. <sup>7</sup> Kjaxin tsík'áyéhe kjuachaxin tsjanjonko tí sín tinkáchonki Dios hasta tsjacha ts'etuenhen tí sín ntá k'uáyéhe kjuachaxin ts'etuenhen kaín xín nkexrí tsjehe chojni la ko kaín xín chjasin la ko kaín xín tan la ko kaín xín nación. <sup>8</sup> A ntá tí bestia mé kaín xín chojni síin chjasintajni mé tsjikosáyehe sín tí bestia. Tí chojni a mé ts'ínixínhya ihnié tió k'óna chjasintajni, mé ts'ínixínhya ihnié sín tí libro ts'inixín ihnié tí sín tsaá. Tí xroon a mé chónata tí Kolélo tsík'óyán sín.

<sup>9</sup> La jnkojín nkexro tjinkaon chrókuinhin la chrókuinhin tíhi. <sup>10</sup> Tí nkexro sátsjiko tsjik'íkjehe í so chojni la kjaxin ch'án ts'íkjehe ch'án la tí nkexro tsjayaixin espada la kjaxin espada ts'énxín. A ntá tí nkexro tinkáchónki Dios la t'ichjánxin tsonínkakonhya la ko tsochónata fe.

<sup>11</sup> A ntá chr'éxin k'uúkuan í jnko bestia k'uaxrjexín nonte, chónata yaá ntèe éxí tsjehe ntèe coronta la mé nixja éxí nixja tí dragón. <sup>12</sup> Tí bestia la chónata kaín xín kjuachaxin éxí k'uéchónata tí bestia saoxín tí k'ué la t'etuenhen tí sín síin chjasintajni kixin tinkáchónki sín tí bestia saoxín mé tí bestia tsíchrít'ò kja ntá tsíkitohe jína. <sup>13</sup> Kjaxin kjuasin kjuaxroan jie hasta xrohi k'uánótjenxin nkajní ikui nonte ntá nchónhya chojni k'uúkonxín kon sín kixin xíkaha kón-

hen. <sup>14</sup>Mé xikaha tí bestia tsík'áyéhe kjuachaxin kjuasin kjuaxroan tí tjen tí bestia saoxín la kjuích'iyehe nchónhya chojni síin chjasintajni. La ntá k'uætuenhen tí sín síin chjasintajni sich'éna sín ijnko nkehe tsíkjanoya éxi yóhe tsjehe tí bestia tsíchrít'oxín espada la kjónté xikaha naxa kjuák'echón. <sup>15</sup>A ntá tí yóxin bestia k'uáyéhe kjuachaxin tsochjéhe kjuachón tí nkehe tsíkjanoya tóyóhe tí bestia saoxín kixin ntá tí nkehe tsíkjanoya la jina tsonixja la ko jina ts'etoan its'en kaín nkexro tinkáchónki-hya tí jehe. <sup>16</sup>Kjxin ts'etoan kixin kaín chojni tsochóna marca, á chojni hyé o chojni ntsínsí, la á chojni rico, la á chojni nòa la á chojni ch'exón xra la ko chojni náhi, mé kaín sín tsochóna sín marca, á tja sín chjina o totjen sín. <sup>17</sup>Ntá ninkexró xitjahya ts'ena la ko ninkexró xitjahya sinchejji tí chón-tahya sín marca o ihnié tí bestia o chón-tahya sín número kuènte ihnié tí bestia. <sup>18</sup>T'ichjánxin chrókiénxínrá tíhi. Tí nkexro tienxín la chrókónohe tí número chóna tí bestia kixin tíhi mé tí número chóna ijnko chojni la mé tí número mé seiscientos sesenta y seis.

### Tí nkehe itsje tí ciento cuarenta y cuatro mil

**14** A ntá k'uíkuān tí Kolélo tjejín toté chrítaón tí jna Jerusalén. Jehe ch'án tjejo ch'án ciento cuarenta y cuatro mil chojni ts'ínixín totjen sín ihnié tí Kolélo la ko ihnié It'é ch'án. <sup>2</sup>Ntá tuénxín kuñhan ijnko itén nkexro kuixín nkaya nkajni mé ijnko ruido éxi nchónhya ntárió la ruido éxi sítjonta itsen la éxi ijnko ruido nchónhya chojni it'in sín isón arpa. <sup>3</sup>Itsje sín nkehe nixin nkayakon tí trono la ko nkayakon tí noó nkexro tjejóchón la ko tí sín táda. Nijnko nkexro chrók'uitjahya tí nkehe tjejótsje sín; jehó tí sín ciento cuarenta y cuatro mil mé sín tsíkaá k'uék'ejó chjasintajni.

<sup>4</sup>Tí sín a mé k'uéchóntahya sín itsje chojni chjin la tjóá sín la chréhe sín tí Kolélo kjónté nketí k'uáji. Tí sín a mé kuaá sín tí k'uék'ixin chojni k'uékjasin jie la ko tí sín a mé éxi ijnko ofrenda xrankíxín k'uáyéhe Dios la ko tí Kolélo kjxin. <sup>5</sup>Kónoxínhya ninkehó kjuach'ia k'uaxrjexínhya ir'va sín. La tí sín la ninkehó jie chónahya sín tí tjejó sín nkayakon tí trono kuènte Dios.

### Tí nkehe chrónka tí iní ángel

<sup>6</sup>A ntá k'uíkuān í jnko ángel tjetjaká jnkosiné nkajni chrónka tí tan tsaáxinni jnkochrín tinhin tí sín síin chjasintajni, mé tsinhin kaín nación la ko kaín nkexrí tsjehe chojni la ko kaín xín tan la ko kaín chjasin. <sup>7</sup>Ntá t'èya itsen ntáchro kixin:

—Chróchrakonrá la chrórxáinkáonrá Dios la chróchjeherá ch'án kjuasáya kixin ó kjuixraká tí yaon sinchekitóexín ch'án ijje chojni. Tjikosáyeherá ch'án kixin jehe ch'án kjuích'éna ch'án nkajni la ko chjasintajni la ko ntayaon la ko tí sít'axrje ntá.

<sup>8</sup>Ntá xíki yóxin ángel, ntáchro kixin:

—Ó kjuixín kjuítsínka, ó kjuixín kjuítsínka tí chjasin jie Babilonia. Mé ntiha kuixín tí vino kókuānxín sín kaín nación ntá kjuasin sín jie chóna sín chojni chjin ókjé.

<sup>9</sup>Ntá xíki tí nixin ángel nixja itsen, ntáchro kixin:

—Jnkojín sín tsjikosáyehe sín tí bestia la ko tí nkehe tsíkjanoya kuènte o tsítóhe sín tsochóna tí marca tí totjen sín o tí tja sín, <sup>10</sup>mé t'ichjánxin its'i sín tí vino tsjasótexín sín kuixín tí tjen Dios kixin xikaha tjechónhen tí kjuanínkaon kuènte Dios ntá ntiha tsjasótexín sín tí xrohi la ko azufre mé xikaha tsonhen tí sín a ts'ikon tí sín ángel kuènte Dios la ko tí Kolélo. <sup>11</sup>Tí ihnchi kuènte xrohi sítjasótexín sín síchriin jnkochrín la tí sín a kuinkáchónki tí bestia la ko tí

nkehe tsíkjanoya kuènte o chóna sín ih-  
nié kuènte. <sup>12</sup> A ntá tí sín tinkáchónki  
Dios la kuítekaon sín tí nkehe k'uetōan  
ch'án la ko naxa jína tinkáchónki sín  
Jesús mé t'ichjánxín chrókuítóehya sín  
titekaon sín ch'án.

<sup>13</sup> Ntá kuínhan itén ijnko nkexro kuix-  
in nkajni ntáchro kixin:

—Ikjian tíhi: “Náxrjón tjejó tí nkexro  
kjónté its'en sín ijie o chr'éxín kixin tin-  
káchónki sín Ìnchéni.” Kjá jína, ichro  
Nchakuen Dios, kixin tí jehe sín ts'ok'éhe  
sín kixin ó kjuích'e sín xra la tí xra  
kjuích'e sín mé kjuacha sín.

### Tí nkehe tsík'óna chjasintajni

<sup>14</sup> Ntá xrínahya k'uífkuān ijnko tjuí tjóá  
la chrítaón tí tjuí tjetjāxín ijnko nkexro  
éxí yóhē tsjehe tí Xjeen Dios Tsík'óna  
Chojni tjenkáya ijnko corona tsík'óna  
chica oro tí kja ch'án la ko ijnko chica  
hoz imá taté tjexraá ch'án. <sup>15</sup> A ntá nkax-  
enhen nínko mé k'uaxrjexín í jnko án-  
gel itsen nixja ch'án nixjehe ch'án tí  
nkexro tjetjāxín chrítaón tjuí ntáchro  
ch'án kixin:

—Tjankíxian tātēxian chica hoz kixin  
ó kjuixraká tí yaon tsotjá tí nkehe sín  
chjasintajni kixin tí nkehe tsík'óna chjas-  
intajni la ó tsícha.

<sup>16</sup> Ntá tuénxín tí nkexro tjetjāxín  
chrítaón tjuí ntá kjuínchek'átsínka  
ch'án chica hoz kuenté chjasintajni  
la kjuenájín ch'án nkehe tsík'óna  
chjasintajni.

<sup>17</sup> Ntá k'uaxrjexín í jnko ángel tí nínko  
tjen nkaya nkajni la kjaxin sákjuíko  
ch'án ijnko chica hoz imá taté. <sup>18</sup> Ntá  
sákjuíxín í jnko ángel tí tjen altar la  
chóna ch'án kjuachaxin kuènte xrohi la  
itsen k'uíyēhe ch'án tí nkexro chóna tí  
chica hoz imá taté la ntáchro ch'án kixin:

—Tjankíxian tātēxian tí chica hoz taté  
la tjankíxian itja tí racimos to uva  
tsík'óna chjasintajni kixin ó tsíchjé to  
—ichro ch'án.

<sup>19</sup> A ntá tí ángel kjuínchek'atsínka tí  
chica hoz chrítaón tí nonte ntá chrín-  
jin tí to uva tsík'óna tí nonte ntiha. Ntá  
sákjuíkenka ch'án to tí tjat'ō ts'ényaxín  
sín to. Tíha mé t'axrjexín kixin xíkaha  
Dios sinchekjasóte chojni. <sup>20</sup> A ntá tí to  
uva tsík'ényaxín sín tjat'ō tí ikon chjasin  
a ntá tí tjat'ō a mé k'uaxrjexín nchónhya  
jni noixín éxí tí freno tjínká ir'va kokāte  
la trescientos kilómetro kjínxín sátsíkji tí  
jni a.

### Tí yato tí ángel la ko tí chin tsjixixín

**15** Ntá k'uífkuān tí nkajni í  
jnko kjuaxroan jíé mé ijnko  
kjuachrakon: mé tí yato sín ángel  
kuikao tí yato chin tsjixixín tsoníexín  
chojni. Tíha mé tí kjuanínkaon kuènte  
Dios tsjixixín.

<sup>2</sup> Kjaxin k'uífkuān ijnko nkehe tóyóhē  
ijnko ntayaon tsík'óna éxí xrosentā  
tsínkíkjan xrohi. La tí sín tsíkjacha kixin  
kuinkáchónkihya sín tí bestia la ko tí  
nkehe tsíkjanoya kuènte la ko kuáhya  
sín tí número kuènte ihnié tí bestia  
mé tjejóxín toté sín chjinaxón ntayaon  
tsík'óna éxí xrosentā la ko chóna sín  
isón arpa tsíkjanjon Dios tsík'áyēhe sín.

<sup>3</sup> Itsje sín isón k'uétsje ch'ín Moisés, tí  
nkexro kjuích'ehe xra Dios la ko isón  
kuènte tí Kolélo la mé ntáchro kixin:

Imá ijie tí kjuaxroan kuéntá kixin kaín  
nkehe tsíkjich'éna.

Jaha Ìnchéni Dios kaín kjuachaxin  
chonta.

Ntoá la ko chaxín tí ntia kuéntá.  
Jaha mé ijnko Rey t'etōan kuènte  
chjasintajni.

<sup>4</sup> ¿Xá nkexro chrakuanhya tí jaha  
Ìnchéni?

¿Xá nkexro tjáhya kjuasáya kixin jaha  
mé ijnko nkexro jína tjóá?

Kuenté chjasintajni tsjikosáyehe sín tí  
jaha

kixin k'uíkon sín tí xra tsíkjich'e la jína  
tíha.



<sup>5</sup>Kjuixin tíha la k'uúkuan nkajní tjexrankehe tí nínko la ko tí cuarto tjóá t'inkachjina tí nkehe tsík'etóan Dios. <sup>6</sup>Ǻ ntá tí nínko a k'uaxrjexín yato ángel kuikao yato chin. Tí iké sín la ika tjete tjóá tjákini. Ǻ ntá tí cinta chóna ntakuin sín mé jehó oro. <sup>7</sup>Ǻ ntá ijnko tí noó tí nkexro tjejóchón mé kjuanjón ijnko copa k'uáyéhe jnkojnko tí yato ángel mé copa tsík'óna chica oro tsíkaón tí nkehe tsjasótexín chojni kuixín tí tjen Dios tí nkexro tjechón jnkochrífín. <sup>8</sup>Ǻ ntá tí nkaxenhen nínko la tsíkaón ihnchi kuixín tí kjuachaxin jié kuènte Dios la nijnko nkexro xitjahya ts'ixenhen ntiha tsjixinjian ts'átsínka tí yato tí chin kuikao tí yato ángel.

### Tí copa tjinká nkehe tsjasótexín chojni

**16** Ntá kuinhan ijnko itén ijnko nkexro imá itsen k'uaxrjexín nkaxenhen nínko, ntáche tí yato sín ángel kixin:

—Sátjia tikíkanjian chrítaón chjasintajni tí nkehe tjiá tí yato copa la táha mé tsjasótexín chojni kuixín tí tjen Dios —ichro ch'án.

<sup>2</sup>Ǻ ntá tí ángel saoxín sákjuúk'itji tí nkehe tjiá tí copa chrítaón chjasintajni. Ǻ ntá kaín tí chojni chóna marca kuènte tí bestia la ko tjikosáyehe sín tí nkehe tsíkjanoya kuènte tí bestia mé tsík'ayan sín tosóa, imá tjtóthe sín.

<sup>3</sup>Ǻ ntá tí yóxin ángel sákjuúk'itji tí nkehe tjiá copa chrítaón ntayaon. Ǻ ntá tí ntayaon la k'óna jni éxi ijnié ijnko chojni tsík'óyan kichó la kaín ko sínkánki ntayaon ik'uén.

<sup>4</sup>Ǻ ntá tí níxin ángel sákjuúk'itji tí nkehe tjiá copa chrítaón ntarío la ko chrítaón tí nta sít'axrje tòye, la ntá tí nta k'óna jni. <sup>5</sup>Ntá tuénxin kuinhan nixja tí ángel kuènte nta ntácho kixin:

—Jaha mé ijnko nkexro jína kixin kjuinchekitoexián ijie chojni. Ìchéni jaha

ijnko Dios jína, ósé tjen la ko naxa tjen ijie <sup>6</sup>kixin jehe sín k'óyan tí sín tin-káchónki tí jaha la ko tí sín tsíchrónka itan la ntá jaha Ìchéni chjehé sín ijni it-s'i sín kixin mé xikaha sítjasóte tí jehe sín.

<sup>7</sup>Kjaxin kuinhan nó altar ijnko nkexro ntácho kixin:

—Chaxín Ìchéni Dios, jaha mé chonta kaín kjuachaxin la ntoá jína kjuinchekitoexián tí ijie a.

<sup>8</sup>Ǻ ntá tí noóxin ángel sákjuúk'itji tí nkehe tjiá copa chrítaón yaon, a ntá tí yaon antsí k'uáyéhe kjuachaxin tsosóa kixin tsochjánxin chojni tí sóa kuènte. <sup>9</sup>Ǻ ntá kaín chojni chjánxin tí imá sóa kuènte yaon la k'uántaxínhin sín ihnié Dios mé jehe ch'án mé tí nkexro chóna kjuachaxin kuènte tí chin a. La kjónté kjuinkíhya sín tí nkehe tinkáchónki sín la xraxinkakonhya sín Dios.

<sup>10</sup>Ǻ ntá tí in'óxin ángel sákjuúk'itji tí nkehe tjiá copa chrítaón tí trono t'etóanxin tí bestia. Ǻ ntá kaín tí k'uéchóna kjuachaxin k'uék'etóan tí bestia la k'uúxin tié. Ǻ ntá tí chojni a la netja nejen sín kixin tjtóthe sín. <sup>11</sup>La kjónté xikaha la kjuinkíhya sín tí nkehe jínahya ch'e sín. Náhi. Íchá má k'uántaxínhin sín Dios tjen nkaya nkajni kixin tjtóthe sín kixin xikaha kónhen sín.

<sup>12</sup>Ǻ ntá tí injonxin ángel sákjuúk'itji tí nkehe tjiá copa chrítaón ijnko ntarío jié it'in Eufrates. Ǻ ntá tí ntarío la kjuixié kixin jína tsakitjehe sín ijnko ntia tsjixin tí sín rey tsjixin nó tjtóxin yaon.

<sup>13</sup>Ǻ ntá k'uúkuan kixin ir'va tí dragón la ko ir'va tí bestia la ko ir'va tí profeta ntoáhya tjako mé k'uaxrjexín iní nchakuen tí jínahya éxi korána tsjehe. <sup>14</sup>Tíha mé nchakuen tí jínahya kjuasixin sín kjuaxroan. Ǻ ntá sákjuúkjinchekójnko sé kaín rey síin chjasintajni kixin tsjanjon sín ijnko yaon jié kuènte Dios chóna kaín kjuachaxin. <sup>15</sup>“Tsjehe, janhan titàya

ts'inké éxi ijnko xíchēe. Chéhe tí nkexro tjejótsjehe la t'ayakonhen tí iké kixin ts'itjáyanhya kixin chrók'uajihya sín tjóchín sín la chrókósuèhya sín kixin chrókónoxín kixin tjóchín sín.” <sup>16</sup> A ntá tsojnkotsé tí sín rey tí nonte it'in Armagedón nkiva Hebreo.

<sup>17</sup> A ntá tí ángel yatoxin sákjuífk'itji nkehe tjia copa chrítaón tí xrínto ntá nkaxenhen nínko nkaya nkajní k'uaxr-jexín ijnko itén chojni itsen nixja mé kuixín tí tjen tí trono la ntáchro kixin:

—Ó kjuixin kónhen t'ha.

<sup>18</sup> A ntá sítjónkixín la ko ruido sítjonta la ntá imá kuínkí nonte fuerte. La desde tí kjuankixín k'uúxin chojni chjasintajni la xikahya kónhen kuínkí nonte a ntá jie antsí fuerte kuínkí nonte. <sup>19</sup> A ntá tí chjasin jie xitjehē nonte la iní k'óna, chjenca. La koí kaín chjasin síin chjas-intajni tsík'oya. A ntá Dios xraxinkaon kixin chrókjuínchekjasóte tí sín síin tí chjasin jie Babilonia la k'uətoan ch'án its'i sín tí vino tsjasótexín sín kixin mé xikaha kóninkaon ch'án. <sup>20</sup> A ntá kain tí nonte sínkátáón ntayaon k'uániankí ntá la ko tí jnā k'uitjáyan. <sup>21</sup> A nta nkajní k'uánótjexín toni ijie xrátja chojni mé cuarenta kilo yexín jnkojnko toni. A ntá chojni na antsí má k'uántaxínhín sín Dios kixin tí xikaha kónhen sín xratja sín toni la imá kjoté sín.

### Tsjasóte tí tjan jínahya

**17** A ntá ikui ijnko tí yatoxin ángel chóna tí yato copa la ntáchro ch'án kixin:

—Xrákiá tsjákoaha nkexrí tsjasóte tí chojni chjin tjasin jie tjetjaxín tjan chrítaón tí nchónhya ntá. <sup>2</sup> Tí sín rey t'etōan chjasintajni kjuasinko tjan jie la ko tí chojni síin chjasintajni kókuaxín sín tí vato a mé kjaxin kjuasixín sín jie.

<sup>3</sup> A ntá tuénxín Nchakuen Dios sákjuikian nteje ntá k'uíkuan ijnko chojni chjin tjetjaxín chrítaón ijnko

bestia kjátse la kuenté tí ko a la símá ihnié náxrjónhya tsík'ántaxíenxín sín Dios la chóna yato kja la ko ite ntéé. <sup>4</sup> A ntá jehe tjan chóna tjan iké tjan morado la ko kjátse la teyá tjan chica oro la ko xro náxrjón la ko perla. Tjexraá tjan ijnko copa tsík'óna chica oro tsíkaón nkehe jínahya tsjasixín tjan jie. <sup>5</sup> Tí totjen tjan ts'ínixín ijnko ihnié kohya nkexro tienxín. “Tíha mé tí chjasin jie Babilonia, mé iné tí chojni chjin tjasin jie la ko kain chojni jínahya ch'e síin chjasintajni.” <sup>6</sup> Ntá kónona kixin tí tjan a la tsékanxín tí ijnie tí sín tinkáchónki Dios la ko tí ijnie tí sín tsík'enxín tí chrónka sín kixin tinkáchónki sín Jesús. Ntá k'uíkuan xikaha imá chrakonna. <sup>7</sup> A ntá ijnko ángel ntáchro ch'án kixin:

—¿Nkekuénté chrakuan? Ntá ijie sítanoha tí nkehe tienxínhya chojni kuénte tí tjan a la ko kuénte tí bestia tjejkjen tjan chóna yato kja la ko ite ntéé. <sup>8</sup> Tí bestia k'uíkuan jaha kjuák'e ósé la ijie tjechónhya kjánchó senó tsochríinxín tí tòye nínka ntá chr'éxin ts'itjáyan. A ntá tí sín síin chjasintajni ts'ínixínhya ihnié sín tí libro ts'ínixín ihnié chojni tsaá desde k'óna chjasintajni, la mé jehe sín tsochrakon sín tíó ts'ikon sín tí bestia kjuák'e ósé la tsík'en la ntá ijie xikjan inaá.

<sup>9</sup> Tí jnkojín nkexro chrókienxín la mé tí yato kja la t'axrjexín yato jnā tjejkjen tí chojni a. <sup>10</sup> A ntá tí kja kjaxin t'axrjexín yato rey la ntá in'ó tí sín rey la í t'etu-anhya sín ijie la ijnko tí jehe sín t'etōan ijie la í jnko naxā tjihya. A ntá tíó tsji tí yatoxin la í kánhyó sé ts'etōan. <sup>11</sup> A ntá tí bestia kjuák'e senó la ijie tjechónhya mé tí jnixin rey la jehe ch'án kuénte tí yato rey la chr'éxin la ts'itjáyan.

<sup>12</sup> A ntá tí ite ntéé tsík'íkuan mé ite rey naxā t'etuanhya. A ntá ijie la ts'áyéhe sín kjuachaxin ts'etōanko tí bes-

tia kjánchó kánhyó sé. <sup>13</sup>Tí ite tí rey la jnkokoá tsjenkayáxin sín la tsjanjon sín kjuachaxin kuènte sín kixin ts'etóan tí bestia. <sup>14</sup>Tsjanjonko sín tí Kolélo a ntá tí Kolélo la tsjacha ts'etóan kixin jehe ch'án mé Ínché kaín chojni la ko jehe ch'án mé tí Rey ts'etuenhen kaín rey la ko tí sín tjejóko ch'án mé tsík'íyehé Dios la tsíkjevá ch'án sín la jína nchexiteyá sín.

<sup>15</sup>Kjaxin ntáchro tí ch'ín ángel kixin:

—Tí nta k'uíkuan la chrítaón tjetjxin tí chojni chjin tjasin jie la mé t'axrjéxin kixin nchónhya chjasin la ko nchónhya chojni la ko nchónhya nación la ko nchónhya nkíva. <sup>16</sup>A ntá tí bestia k'uíkuan la ko tí ite ntèé la tíha mé tsonínkakonhen tí tjan tjasin jie la tsi-tohe tjan tjóchin tjan la sine tí bestia tí nto chóntha cuérpoé tjan la ko tsoche tí huésóé tjan. <sup>17</sup>Dios tsík'etuenhen asén sín kixin xíkaha sich'e sín éxi tjinkaon ch'án kixin jnkokoá tsjenkayáxin sín la ko tsjanjon sín kjuachaxin kuènte tí sín rey kixin ts'etóan tí bestia tsoxiteyáxia tí nkehe tsintáchro Dios. <sup>18</sup>A ntá tí chojni chjin k'uíkuan la táha mé tí chjasin jie t'etóan tí sín rey t'etóan chjasintajni.

### Kjuítsínka chjasin Babilonia

**18** Ntá chr'éxin k'uíkuan í jnko ángel k'uínkajinxin nkajní chóntha nchónhya kjuachaxin ntá chjasintajni antsí k'uínkaséyanni tí tjákiní tsjehe ch'án. <sup>2</sup>Ntá k'uíyato ch'án itsen ntáchro ch'án kixin:

—Ó kjuítsínka, ó kjuítsínka tí chjasin jie Babilonia. Ntá tí jínahya ó kjuacha k'uixenhen t'etóan ntiha la ntiha siín kaín xín clase nchakuen jínahya la ko siín kaké ko xritjaká tjuáhya la ko jínahya. <sup>3</sup>A ntá kaín xín nación kókuaxin tí vino kjuínchekji tjan ntá kjuasinko tjan sín jie la ko tí sín rey t'etóan chjasintajni kjaxin kjuasinko tjan jie. La tí sín

nchekji nkehe chjasintajni kóríkoxín sín kixin k'uena tjan nchónhya nkehe.

<sup>4</sup>Ntá kuínhan í jnko itén nkexro kuixin nkaya nkajní ntáchro kixin:

—T'axrjéxinrá tí chjasin ntiha kixin tí jahará tinkachónkirá tí janhan kixin chrók'uícahyará tí ijié sín la ko chrókjuasótexínhyará tí nkehe tsonhen sín. <sup>5</sup>Kixin tí nchónhya jie tinkák'ánki hasta kjuixraká nkajní la Dios ó nohe tí jie chóntha sín. <sup>6</sup>Ch'eherá tjan éxi tí jehe tjan kjuích'ehe tjan í so chojni kixin xíkaha tsjasótexin tjan. Chrókjuenkehérá tjan iyó veces éxi tí tsíkjich'éna tjan ik'ui í so chojni. <sup>7</sup>Antsí chrókjuasóte tjan tóyóhe tí nkehe kjuích'ehe tjan kixin kjuínchehnke tjan la ko k'uéchóntha tjan kaín nkehe tóxrjínhin tjan. Jehe tjan ntáche asén tjan kixin: “Ntihi tjetjxian éxi ijnko reina. Jehya ik'ána kixin chrókjuasótena.” <sup>8</sup>Mé xíkaha kjaxin jnkokoá yaon itsi tí kjuaxikaon tsonhen tjan mé its'en tjan la ko tsjasótexin tjan kjinta la tsoche tjan kixin Ínchéni imá chóntha kjuachaxin la jehe ch'án sinchekjasóte ch'án tjan.

<sup>9</sup>A ntá tí sín rey siín chjasintajni tsíkjasinko sín tjan jie la ko nchónhya nkehe kjuínchexenko sín tjan la mé tsotsjánka sín la ts'èya sín tió ts'íkon sín ts'aya ih-nchi tió tsoche tjan. <sup>10</sup>Ntá jehe sín tsi-tohe sín ikjín kixin chrakon sín kixin xíkaha tsjasóte tjan la tsontáchro sín kixin:

—Nòda tí jaha chjasin jie Babilonia, chjasin imá t'etóan kixin titàya kjuasótia.

<sup>11</sup>Tí sín xrinchekji nkehe la kjaxin tsjánka sín, t'èya sín kixin xíkaha kónhen tí chjasin ntiha kixin kohya nkexro ts'enhehe sín tí nkehe sinchekji sín. <sup>12</sup>Kjuínchekji sín chica oro la chica plata la ko ixro náxrjón la ko perla la ko ika náxrjón lino la ko ka seda la ko ika color morado la kjátse la ko kjaxin kaín xín clase nta náxrjón xraxé la ko tí nkehe

tsík'óna neno elefante la ko inta náxrxjón la ko bronco la ko ixro chica la ko ixro mármol. <sup>13</sup> Kjaxin xrinchekji sín canela la ko xroan xraxé náxrxjón la ko chjincō la ko xroan mirra la ko crema la ko vino la ko aceite la ko harina náxrxjón la ko noa trigo la ko iko tamá nkehe la ko kolélo la ko kokate la ko carreta la ko chojni ch'exón xra kjaxin kjuínchekji sín. <sup>14</sup> Tsontáche sín tí chjasin a kixin:

—Í chontahya kain to tjete imá k'uékóxrjínhan. Ó k'uítjáyán kaín nkehe náxrxjón tjete k'uéchonta.

<sup>15</sup> Tí sín k'uékjinchekji tí nkehe la kóríco sín kixin kjuacha sín tí xra kjuích'e sín tí chjasin ntiha. Ijín k'uéjo sín kixin chrakon sín kixin xikaha kónhen kjuasóte tí chjasin. Tsjánka sín la t'èya sín <sup>16</sup> la tsontácho sín kixin:

—Nòda tí chjasin jié. Éxí ijnko chojni chjin tsík'itsa ka lino náxrxjón la ko ika morado la kjátse la ko teyá nkehe oro la ko xro náxrxjón tjete la ko perla. <sup>17</sup> A ntá jnkorato koá kjuixin kjuéje tí nkehe imá tjete —ichro sín.

Kaín tí nkexro t'etōan tí ntabáro la ko tí sín tsík'ixenhen tí ntabáro la ko tí sín ch'e xra chrítaón ntayāon kuítóhe sín ikjín <sup>18</sup> la tió k'uúkon sín tí ihnchi síche tí chjasin ntiha la k'óyako sín kixin:

—¿Xá nkexéhe í jnko chjasin chrókóyóhe tí chjasin jié i?

<sup>19</sup> La tjíkjānjīn kja sín nche la tsjánka sín t'èya sín kixin:

—Nòda tí chjasin jié. Kóríco tí sín k'uéchóna ntabáro chrítaón ntayāon kixin tí chjasin i la ntá jnkoratō koá kjuixin k'uítjáyán tí nkehe chóna sín.

<sup>20</sup> A ntá jahará tjejórá nkajní tócháhará kixin xikaha kónhen tí chjasin a. Tócháhará jahará k'uájikoará Ìnchéni la ko jahará k'uéchronkará itén Dios la ko kaín rá kuinkachónkirá tí jehe ch'án kixin Dios kjuínchekjasóte tí chjasin a kixin tí jie kjuasin sín kjuínchekjasótíará sín tí jahará.

<sup>21</sup> A ntá ijnko ch'ín ángel chóna kjuachaxin kjuatsen ijnko xro éxí ijnko xro jié kuènte molino la k'uenkí ch'án ntayāon la ntá ntácho ch'án kixin:

—Mé xikaha tsonhen tí chjasin Babilonia, tí chjasin jié la nunca ts'ikónhya chojni chr'éxin. <sup>22</sup> Nunca tsienhya sín música kuènte isón arpa la ko flauta la ko trompeta tí ntja la ko ninkexró xitjahya sich'e ninkehó xra ntiha la ko kjaxin tsienhya sín ninkehó tóvéntó xro molino. <sup>23</sup> Í ts'inkaséyanxínhya xrohi kuènte ninkehó lámpara la kjaxin í tsienhya sín ts'ixin kia tsotēhe chojni ntiha. Tí sín k'uékjinchekji nkehe ntiha la imá k'uék'etōan kuènte chjasintajni la tí sín k'uékjich'iyehé tí sín síin chjasintajni la k'uékjich'e sín jínahya, k'uéd-kjinchexroan sín.

<sup>24</sup> A ntá tí chjasin jié ntiha tsíkónoxín ijné tí sín tsík'en k'uéchronka itén Dios la ko tí sín tinkáchónki tí jehe ch'án la ko kain tí sín tsík'enxín chjasintajni.

**19** Ntá chr'éxin ntá kuínhan itén nchónhya nkexro tjejó nkaya nkajní itsen nixja, ntácho sín kixin:

¡Aleluya! Kjuasáyé Dios kuaáxinni la ko jehe ch'án t'inkaséyanxín ch'án ti jeheni la imá chóna kjuachaxin Dios kuènteni.

<sup>2</sup> Kixin jehe ch'án ntoá kjuínchekjasóte ch'án tí tjan kjuasin nchónhya jie kixin jehe tjan kjuachroe tjan chojni síin chjasintajni kixin tí nkehe jínahya k'uékjich'e tjan.

Dios kjuínchekjasóte tjan kixin k'óyán tjan tí sín k'uékjich'ehe ch'án xra.

<sup>3</sup> La ntá kjaxin inaá xintácho kixin:

—¡Aleluya! Kjuasáyé Dios kixin tí ihnchi síchexín tí jehe tjan tsítóehya chrīn hasta tí ntihi.

<sup>4</sup> A ntá tí veinticuarto tí sín táda la ko tí noó nkexro tjejóchón tjejóxin toch'in sín hasta káxin kja sín nonte kjuikosáyéhe sín Dios tí nkexro tjetjāxin tí trono la ntácho sín kixin:

—¡Amén! ¡Aleluya! ¡Kjuasáyé Dios!

<sup>5</sup>Ntá xrinahya kuínhin sín itén ijnko nkexro tjen nó trono ntáchro kíxin: Chjehérá kjuasáya tí Dios kuènteni kaín rá ch'ehérá ch'án xra la kuítekákonhénrá ch'án, mé kaín tí jahará kjónte chánjan ntsíntsi o chojni nteoto.

### Tí kia tsotehe tí Kolélo

<sup>6</sup>Kjaxin kuínhan nkehe éxi itén nchónhya chojni éxi nchónhya ntarío sítóvéntó la ko imá itsen sítjonta la ntáchro kíxin: ¡Aleluya! Kjuasáyé Ìnchéni ó kjuankíxin t'etoan Ìnchéni Dios kuènteni chóntha kaín kjuachaxin.

<sup>7</sup>Chrókóchéheni la chrókjuikosáyeheni Dios kíxin ó kjuixraká tí yaon ts'ixin kia kuènte Kolélo.

La tí tjan tsotehe la tsíkóyaxinhin tjechónhen,

<sup>8</sup>mé tsík'áyéhe kjuachaxin tsík'itsa ka lino náxrjón tjóá tjákini.

À ntá tí ka lino náxrjón a mé t'axrjexín kíxin tí jína k'uéjé tí sín tinkáchónki Dios.

<sup>9</sup>Ntá tí ch'ín ángel k'uetoan ch'án kíxin:

—Ikjian tíhi: “Náxrjón tjejó tí nkexro k'uáyéhe kjuachaxin sátsji tí kia tsotehe tí Kolélo.”

À ntá ntáchro ch'án inaá kíxin:

—Tí palabra a mé chaxín ntoá nixja Dios.

<sup>10</sup>Ntá kjuak'éxian toch'ian toté tí ángel kíxin chrókjuikosáyaha ch'án, kjánchó jehe ch'án ntáchro ch'án kíxin:

—Xikahya chrokjuich'e kíxin janhan kjaxian t'aha xra Dios éxi tí jaha la ko éxi tí sín kichuá kuítoehya kuítekaon tí tan jína chrónka Jesús. Jehó Dios mé chrókjuíkosáyehé jaha.

Tí nkehe k'uéchrónka Jesús mé k'uéchrónka tí sín profeta.

### Tí nkexro kjuák'ekjen kokate tjóá

<sup>11</sup>Ntá k'uíkuan kíxin nkajni tjebrankehe la ntaha kónoxín ijnko kokate tjóá la ko tí nkexro tjejkjen va mé it'in Jína la ko Chaxín kíxin ntoá kjuínchekitoexín ch'án ijíé chojni la ko ntoá kjuánjonko ch'án chojni. <sup>12</sup>À ntá tí ikon ch'án mé tjákini éxi xrohi nene xikaha tsjehe. À ntá tí kja ch'án la chóntha nchónhya corona la ko ts'ínixín ijnko ihnié ijnko nkexro la jehó ch'án mé nohe ch'án tíha. <sup>13</sup>Tjenkáya ch'án ijnko ka tsík'ixikjanjin jni ntá ihnié ch'án mé Itan Kuènte Dios. <sup>14</sup>Chréhe tí sín soldado kuènte nkajni. Iké sín mé ka lino náxrjón tjóá la tjejókjen sín kokate tjóá. <sup>15</sup>Ir'va tí jehe ch'án k'uaxrjexín espada imá taté kíxin táha mé tsjik'óyánxin ch'án tí sín síin kaín nación la ko ts'etoxánxin ch'án ijnko chica vara. Jehe ch'án mé sinchekitoexín ch'án ijíé sín éxi t'énxin sín to uva toté sín mé xikaha ts'etuenhen ch'án kíxin its'i sín vino tsjasótéxin sín kíxin mé xikaha tsixín tí kjuanínkaon kuènte Dios chóntha kaín kjuachaxin. <sup>16</sup>Iké ch'án mé ts'ínixín kíxin jehe ch'án me Rey t'etuenhen kaín rey la ko jehe ch'án mé Ìnché kain chojni.

<sup>17</sup>Ntá tuénxin k'uíkuan ijnko ángel tjejin toté tí tjen yaon la k'uéyato ch'án itsen k'uéyatohe ch'án tí ko xritjaká, ntáchro ch'án kíxin:

—Xrákirá tójnksotésará ntihi kíxin Dios tsjanjon nkehe sinterá ijie. <sup>18</sup>Sinterá cuerpo kuènte reyes la ko sinterá cuerpo kuènte tí sín comandante la ko cuerpo kuènte chojni jjehe la ko ntqo kokate la ko cuerpo kuènte tí sín tsíkjiták'á va la ko cuerpo kuènte kaín chojni libre o chojni ch'exón xra la chojni hyé o chojni ntsíntsi.

<sup>19</sup>K'uíkuan tí bestia la ko tí sín reyes t'etoan chjasintajni la ko tí soldado

kuènte sín, tsíkójnksé sín tsjanjonko sín tí nkexro tjejen kokate la ko kí tí sín soldado kuènte ch'án. <sup>20</sup> A ntá itsé sín tí bestia kíxin sátsji tsjasóte la ko kjaxin itsé sín tí nkexro ntoáhya k'uékjako itén Dios la ko k'uékjasin ch'án kjuaxroan náxrjón nkayakon tí bestia mé xíkaha kjuích'e tí nkexro ntoáhya kjuako, kjuích'iehe ch'án tí sín tsíkítóhe tsíka marca kuènte tí bestia la ko kjuikosáyehe sín tí nkehe tsíkjanoya kuènte tí bestia. Ntá tí bestia la ko tí nkexro ntoáhya kjuako itén Dios mé k'uítuenhen sín sátsji tí síin xrohi tsoche tjejóchónxinhín sín tsochéxin azufre. <sup>21</sup> A ntá tí í so sín la ts'énxín tí espada k'uaxrxéjin tí ir'va tí nkexro tjejen tí kokate tjóá la kaín ko xritjaká ts'ixin tí síin tí cuerpo kuènte tí jehe sín la hasta tsokjehe va sine va.

### Tí mil nánó

**20** Ntá xrínghya k'uíkuan ijnko ángel k'uínkajinxín nkajní tjebraá llave kuènte tí tóye nínka la ko ijnko cadena jíe tjebraá ch'án. <sup>2</sup> A ntá tí ángel a itsé tí dragón mé tí konche ósé kí mé tíha tí ch'ín diablo la ko Satanás la kjuak'echroé ch'án ijnko mil nánó. <sup>3</sup> Ichr'án ch'án sákjuí tóye nínka ntá k'uikjehe ch'án la ko kjuak'e ch'án ijnko sello chrítaón puerta kíxin ntá tí dragón chrókjuich'iehyha tí chojni síin kaín nación hasta chrók'uatsínkajia tí mil nánó. A ntá ts'atsínka tí mil nánó ntá tsoxintankehe kjánchó séhya its'e.

<sup>4</sup> Ntá tuénxín k'uíkuan tí trono la ko tí sín tjejótjaxin tsík'áyéhe sín kjuachaxin sinchekitoexín ijíe chojni. Kjaxin k'uíkuan asén chojni tsíchrínjin kja kíxin kuítekaon sín Jesús la ko tsíchrónkaxín sín itén Dios. Jehe sín la kuinkáchónkihya sín tí bestia la ko tí nkehe tsíkjanoya kuènte la ko kuítóehya sín ikuá sín marca tí totjen sín o tí itja sín. Mé k'uíkuan kíxin tsíxechón sín la

ko ts'etōanko sín Cristo ijnko mil nánó. <sup>5</sup> Ntá í so chojni tsík'en la naxa xechónhya hasta ts'atsínkajia tí mil nánó. Tíha mé xrankíxixín tsoxechón chojni. <sup>6</sup> Náxrjón tjejó tí sín tsíkjinchetjóá Dios mé tí sín a mé senó tsoxechón sín. A ntá tí yóxin chrók'uen sín la tíha chón-tahya ninkehó kjuachaxin naxa xíkaha chrókónhen sín. Jehe sín mé nchát'á kuènte Dios la ko kuènte Cristo la ts'etōanko sín ch'án tí mil nánó.

<sup>7</sup> A ntá ts'átsínka tí mil nánó ntá ch'ín Satanás tsoxintankehe tí kíjchroé. <sup>8</sup> La sátsjikjich'iehe tí chojni síin kuenté chjasintajni la ko sátsjikjich'iehe tí chjasin Gog la ko Magog. La tsojnkotsé sín kíxin tsjanjon sín la ko tí soldado kuènte tí jehe sín. Nchónhya sín tsojnkotsé ntiha éxí tí nchesen síin ntayaon. <sup>9</sup> Mé xíkaha sátsji sín tí tonxín la ko tí tekaxin nonte la ts'ántatjen sín tí tjejó tí sín tsíkjinchetjóá Dios mé tí chjasin jíe tjehe ch'án. A ntá xrohi tsíxin nkajní kíxin tsochéxin tí sín jínahya ts'itjáyánxín sín. <sup>10</sup> A ntá tí diablo tsíkjich'iehe tí jehe sín kjaxin sátsji tsochéxin xrohi la ko azufre tí sátsíkji tsíchéxin tí bestia la ko tí nkexro ntoáhya kjuako itén Dios. Mé ntiha mé tsjasótexín nchakotjin la ko tie jnkochrín.

### Tsitōexín ijíe chojni tí tjen tí trono jíe tjóá

<sup>11</sup> Ntá k'uíkuan ijnko trono jíe tjóá la ko tí nkexro tjetjaxin nó ntiha. A ntá tí tjen ch'án ntiha la ó k'uitjáyankoá nonte la ko nkajní la í kónoxínhya inaá tí nonte. <sup>12</sup> Ntá k'uíkuan tí sín tsík'en; chojni hyé la ko chojni ntsínsí tjejóxin toté sín nkayakon Dios la ntá xitjehe iso libro la ko xitjehe í jnko libro ts'ínixín ihníe tí sín tsaá. Ntiha tsitōexín ijíe chojni tsík'en éxí nixja tí í so libro nkehe tí xra kjuích'e sín ts'ínixín ntiha. <sup>13</sup> Tí sín tsík'énxín ntayaon la ntiha xrakuaxin sín la tí sín sátsíkji tí síin chojni

tsík'en la ntiha xrakuaxin sín kaín sín tsochjina sín tsitoxén ijíe jnkojnko sín kixin nkexrí tí xra kjuích'e sín. <sup>14</sup>Ntá tí kjuachaxin kuènte kjuach'én la ko tí tsík'ejó tí asén tí sín tsík'en sátsji tsoche tí xrohi tsochexín, mé tí muerte yóxin tíha. <sup>15</sup>La ko ntaha sátsji tí chojni ts'ínixínhya ihníé sín tí libro ts'ínixín ihníé chojni tsaá.

### Nkajní nixin la ko nonte nixin

**21** Ntá k'uíkuan ijnko nkajní nixin la ko ijnko nonte nixin kixin tí nkajní saoxín la ko tí nonte saoxin tsík'itjáyán la ko kjaxin kohya ntayaon. <sup>2</sup>Janhan Juan k'uíkuan tí chjasin jié tjóá. Táha mé tí Jerusalén nixin k'uínka-jjinxín nkajní kuixin tí tjen Dios la kuenté tsíkóyóxin éxí ijnko chojni chjin tsothe tsík'itsa kixin tsákja tí xí. <sup>3</sup>Ntá kuínhan ijnko itén ijnko nkexro itsen kuixin nkajní ntáchro kixin:

—Dios itjen tí síin chojni, la ts'ejóko sín tí jehe ch'án la jehe sín mé ts'óna chjasén ch'án la Dios a mé ts'ejóko sín ntiha la mé ts'óna Dios kuènte sín. <sup>4</sup>Jehe ch'án mé sinchexámá kaín ntakon sín la í tsokohya nkexro its'en la tsokohya nkexro tsotsjánka la ko ts'áváhya sín la ko tsokohya kjuatjoté kixin kaín tí nkehe k'uékónhen ósé la ó kjuixin k'uátsínka.

<sup>5</sup>Ñ ntá tí nkexro tjetjxin tí trono ntáchro ch'án kixin:

—Janhan mé t'ána kaín nkehe nixin.

Kjaxin ntáchro ch'án kixin:

—Ikjian tíha kixin tíha mé palabra chaxín la chrókuítekáván kaín tíha.

<sup>6</sup>Ntá chr'éxin chrónka ch'án kixin:

—Kaín nkehe la ó kjuixin tsík'óna. Janhan la tí xrankíxixín la ko tí tsjixixín éxí tí letra xrankíxixín A la ko tsjixixín Zeta. Tí nkexro t'enxín ntá la janhan tsojtjaha sín tí ntá its'i sín mé tí ntá tjanjon kjuachón la ninkehó ts'ixinkíéhya sín tíha. <sup>7</sup>Tí nkexro tsjacha sítoehya tí janhan la ts'áyéhe sín kaín tí nkehe tsojtjaha

sín. La janhan mé ts'óna Dios kuènte sín, a ntá jehe sín mé xjanna ts'íkaan tí jehe sín. <sup>8</sup>Ñ ntá tí chojni chrakon la chojni titekakonhya la tí sín chjinoxínhin la ko tí chojni ts'óyán kíchó la ko tí chojni tsakja chojni chjin ókjé la ko tí chojni xrinchexroan la ko chojni tinkáchónki nkehe tsíkjanoya la ko kain chojni ch'ia mé tí sín a mé ts'ítuenhen sátsji sín tí síin xrohi tsochexín sín azufre tió itsi tí yóxin muerte.

### Tí Jerusalén nixin

<sup>9</sup>Ntá ikui ijnko tí yatoxin ángel chóna tí yatoxin copa tsikaón tí yatoxin chin tsjixixín tsjasótexín chojni. Ntá ntáchro ch'án kixin:

—Xrákia tsjakoha tí tjan tsothe tí Kolélo.

<sup>10</sup>Ntá k'uíkuan ijnko nkehe kjuakoxin Nchakuen Dios la ntá tí ángel sákjuikian ijnko jna jié la ko noi la kjuakona ch'án tí chjasin jié tjóá mé tí Jerusalén ts'inka-jjinxín nkajní tsíkixín tí tjen Dios. <sup>11</sup>Ñ ntá tí chjasin a mé tjákiníxín kjuachaxin kuènte Dios. Ñ ntá tjákiní éxí ijnko xro imá náxrjón tjete éxí xro jasje éxí xrosenta tsjehe. <sup>12</sup>Ñ ntá jnkontatjen tí chjasin chóna tjat'o noi la chóna teyó puerta la jnkojnko ángel jnkojnko puerta tjejónta la ihníé tí teyó tí sín tsík'axreníxín sín Israel ts'ínixín jnkojnko puerta. <sup>13</sup>La iní puerta la nó tjitoxin yaon la iní puerta la nó norte la iní puerta la nó tjiatóxin yaon la iní puerta la nó sur. <sup>14</sup>Tí tjat'o tsík'antatjen tí chjasin chóna teyó xro chónatxín fuerza tí tjat'o la jnkojnko ihníé tí teyó tí sín k'uájiko tí Kolélo a mé ts'ínixín jnkojnko tí xro a.

<sup>15</sup>Ñ ntá tí ángel tjenixjana chóna ijnko nta vara oro, éxí tji tsjehe, tsjachoxín tí chjasin la tí puerta kuènte chjasin la ko tí tjat'o t'inkákuènxin. <sup>16</sup>Tí chjasin la cuadrada la tí kjinjinxin jnkokón la ko tonxín la jnkokón. Ñ

ntá tí ángel kjuachoxín tí chjasin tí nta vara éxí tji tsjehe tsíkjachoxa ch'án tí chjasin mé chóna dos mil dos cientos kilómetro tí kínjinxín la ko tí ntetoxín la ko tí tonxín la jnkokón. <sup>17</sup> Ntá tsíkjachoxa ch'án tí tjat'ox tsíkjintajin tí chjasin a la chóna sesenta y cuarto metro kixin éxí tjachroa chojni chjasintajni mé xíkaha kjuachoxa tí ángel.

<sup>18</sup> Tí tjat'ox tsík'ántatjen tsík'óna xroxaspe, a ntá tí chjasin tsík'óna jehó chica oro tóyóhe jehó xroxentá tjóá. <sup>19</sup> Tí xrox tsík'óna xrankixín tsík'antatjen tí tjat'ox la nchónhya xrox chjini náxrjón tsínkíjjan. A ntá tí xrox xrankixín la jaspe, a ntá tí xrox yóxin la zafiro, la tí xrox níxin la ágata, a ntá tí noóxin la esmeralda. <sup>20</sup> A ntá tí n'óxin xrox la xrox mármol la tí injonxin la cornalina, la tí yatoxin la crisólito, a ntá tí jnixin la berilo, la tí xrox naxin la topacio, la tí texin la crisoprasa. A ntá tí tejncoxin la jacinto, a ntá tí teyóxin la amatista. <sup>21</sup> A ntá tí teyó puerta mé tjejó perla la jnkojnko puerta tsík'óna jnkokoá perla. A ntá tí ntia jié kuènte chjasin la tsík'óna jehó chica oro éxí xroxentá tsjehe.

<sup>22</sup> Ntaha la k'uúqonhya ninkehó ninko tí chjasin a, kixin Ìnchéni Dios chóna kaín xín kjuachaxin la jehe ch'án la ko tí Kolélo mé tí ninko ntiha. <sup>23</sup> Tí chjasin a mé t'ichjánxinhya yaon la ko ni nitjó ts'inkaséyanxín. Kixin tí t'inkaséyanxín la Dios la ko tí Kolélo mé tí xrohi kuènte. <sup>24</sup> A ntá tí chojni kuènte kaín nación tsíkaá la ts'ikonxín tí xrohi kuènte tí chjasin la tí sín tsík'óna reyes chjasintajni la ntiha tsjanjon sín tí nkehe k'uéchóna sín. <sup>25</sup> A ntá tí puerta kuènte chjasin la tsíkjèhya tí nchakotjin la ntaha la tsokohya ts'ixin tie. <sup>26</sup> Ntaha sátsjiko kaín xín nación tí nkehe náxrjón k'uéchóna sín chjasintajni. <sup>27</sup> A ntá ntaha mé xitjahya ts'ixenhen ninkehó nkehe tjuáhya, la ninkexró chjinoxínhin ox chojni ch'ia. Jehó ts'ixenhen tí sín ts'ínixín ihnié tí li-

bro ts'ínixín ihnié tí sín tsaá, mé tí libro chóna tí Kolélo.

**22** A ntá tí ángel kjuákona ijnko ntarío tjóá, a ntá tí ntá a mé tjanjon kjuachón. Táha mé t'ikonxinni éxí xroxentá la mé k'uaxrxjén tí trono kuènte Dios la ko tí Kolélo. <sup>2</sup> A ntá jnkosiné tí calle tjetooan kuènte tí chjasin a la ko nanánko tí ntarío ntiha itjen tí inta tjanjon kjuachón mé t'óna to teyó veces jnkojnko nánó kixin t'óna to jnkojnko nitjó. Tí ka kuènte tí nta la xroxan tsitoxín jina tí nación sín ntiha. <sup>3</sup> La mé ntiha tsokohya ninkehó kjuachjinoxínhin la tí trono kuènte Dios la ko kuènte tí Kolélo la ntiha tjen tí chjasin. La tí sín ch'ehe ch'án xra la mé tsjikosáyehe sín ch'án. <sup>4</sup> Ts'ikon sín tí kàré Dios la ko tsochóna sín ihnié ch'án tí totjen sín. <sup>5</sup> Ntiha la tsokohya ts'ixin tie la tí sín sín ntiha la t'ichjánxienhya sín xrohi kuènte lámpara la ko ni xrohi kuènte yaon kixin Ìnchéni Dios mé ts'inkaséyanxín sín ntiha la ko tsochóna sín kjuachaxin kuènte Dios jnkochrín.

### Tí itsi Ìnchéni la kánhyó sé

<sup>6</sup> A ntá tí ángel mé nixjana ch'án ntáchro kixin:

—Tí itan a mé chaxín la chrókuítekákónhén tí tan a. La ko Ìnchéni mé tí Dios nchexraxinkaon tí sín nixja kjuachaxin ihnié ch'án mé ichr'án ch'án tí ángel kuènte ch'án kixin tsjakuexin ch'án tí sín ch'ehe ch'án xra, tí nkehe tjoka tsonhen.

<sup>7</sup> —¡Tjoka ts'inka janhan!

Náxrjón tjejó tí sín titekaon tí itén Dios nixja tí libro i.

<sup>8</sup> Janhan Juan, kuñhan la ko k'uúkuñ tía. A ntá chr'éxin kjuixin kuñhan la ko k'uúkuñ tía ntá kjuak'éxiñ tochi-an chrínki toté tí ángel kixin xíkaha kjuákona la ntá chrókjuíkosáyaha ch'án. <sup>9</sup> A ntá jehe ch'án ntáchro ch'án kixin:



—Xikahya s̄ich'e ḱixin janhan kjaxin t'ah̄a x̄r̄a Dios éxí t́í jaha x̄ikaha la ko éxí t́í s̄ín ḱichuá mé t́í s̄ín nixja itén Dios la ko kaín t́í s̄ín t̄jinkaon chrókuitekaon nkexŕí nixja t́í libro i. Mé jehó Dios chrókjuíkosáyehé.

<sup>10</sup> Kjaxin k'uetuanna ch'án ḱixin:

—Chrókjuak'echjinahya t́í nkehe jahvá kuinhín kuènte Dios éxí nixja t́í libro i ḱixin ó kuichjina t́í yaon tsoxiteyá. <sup>11</sup> A ntá t́í s̄ín ch'e j́inahya ája nohe s̄ín ch'e s̄ín t́í j́inahya. A ntá t́í nkexro ntoáhya ch'e la ája nohe ch'e t́í nkehe ntoáhya. A ntá t́í nkexro ch'e nkehe tóxrjính̄in Dios la nax̄a chrókjuich'e x̄ikaha la ko t́í nkexro tsíkjinchetj́óá Dios la nax̄a j́ina chrók'uej́ó s̄ín chrókuitekaon s̄ín t́í jehe ch'án.

<sup>12</sup> —Chaxín t̄joka ts'inka janhan la ts'inkakian t́í nkehe tsoťjahará jnkorká ḱixin nkexŕí t́í x̄r̄a chuich'erá.

<sup>13</sup> Janhan mé t́í xrankíxixín la ko t́í tsjixixín la janhan mé t́í saoxín la ko t́í tsjixixín éxí t́í letra xrankíxixín A la tsjixixín Zeta.

<sup>14</sup> Náxrjón ts'ejó t́í nkexro tsíkjen iké ḱixin tsochón̄ta s̄ín kjuachaxin tsochjinehe s̄ín t́í nta tjanjon kjuachón ḱixin j́ina ts'ixenxín s̄ín t́í puerta kuènte chjasin. <sup>15</sup> A ntá ntója tsitohe t́í chojni j́inahya kuítekakonhya la ko t́í chojni nchexrōan la ko t́í s̄ín chón̄ta nchónhya chojni chjin la ko t́í chojni t̄jàya la ko t́í

chojni tinkáchónki t́í nkehe tsíkjan̄ya la ko t́í chojni tóxrjính̄in xrich'ia.

<sup>16</sup> —Janhan Jesús mé ichr'an t́í ángel kuèntana ḱixin tsochénka kaín n̄inko kaín t́íha. Janhan mé k'uaxrjeníxian t́í rey David la ko janhan t́í konotsé it̄ji t́í chjina t'inkáséyan. <sup>17</sup> T́í Nchakuen Dios la ko t́í s̄ín tinkáchónki t́í Kolélo ntáchro ḱixin:

—Xrákiá.

La t́í s̄ín t̄jéjótinh̄in la ntáchro s̄ín ḱixin:

—Xrákiá.

A ntá t́í nkexro t'enxín n̄ta t̄jinkaon n̄ta la chrók'ui t́í n̄ta tjanjon kjuachón la ninkehó ts'ixinkíhya t́íha.

<sup>18</sup> Kaín nkexro t̄jéjótinh̄in itén Dios ts'ínixín t́í libro i la chrókónohe s̄ín t́íha: Jnkójín s̄ín chrókjuich'éna í so nkehe chrónixja la Dios mé ant̄sí sinchekjasóte t́í jehe s̄ín tson̄íhi s̄ín éxí nixja t́í libro i.

<sup>19</sup> A ntá jnkójín nkexro tsjatsen jnkójín palabra chón̄ta t́í libro i la Dios tsjatsen t́í nkehe chrók'uáyéhe s̄ín chón̄ta t́í libro ts'ínixín ihnié t́í s̄ín tsaá la ko Dios tsjatsen t́í nkehe chróchón̄ta s̄ín t́í t̄jen t́í chjasin t̄j́óá ḱixin éxí nixja t́í libro i.

<sup>20</sup> A ntá t́í nkexro chrónkaxín t́í tan i mé ntáchro ḱixin:

—Tjoka ts'inka janhan.

Amén. ¡Xrákiá. Inchéni Jesús!

<sup>21</sup> Inchéni Jesucristo mé sincheyaonrá kaín rá. Amén.